


# Deus Itaumbyry



New Testament in Bakairi

# **Deus Itaumbyry**

## **New Testament in Bakairí**

copyright © 2011 Wycliffe Bible Translators, Inc.

Language: Bakairí

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Bakairí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 18 Apr 2025 from source files dated 30 Dec 2021  
521fc4dc-fae1-547b-b3c6-9853e24bf2ed

## Contents

MATEUS	1
MARCOS	63
LUCAS	101
JOÃO	165
ATOS	207
ROMANOS	266
1 CORÍNTIOS	292
2 CORÍNTIOS	317
GÁLATAS	332
EFÉSIOS	341
FILIPENSES	350
COLOSSENSES	356
1 TESSALONICENSES	362
2 TESSALONICENSES	368
1 TIMÓTEO	371
2 TIMÓTEO	378
TITO	383
FILEMOM	386
HEBREUS	388
TIAGO	409
1 PEDRO	415
2 PEDRO	422
1 JOÃO	427
2 JOÃO	433
3 JOÃO	434
JUDAS	435
APOCALIPSE	438

## MATEUS

### Unâ Koendonro Jesus Cristo Wâgâ Mateus Inweniby

Xirâ livru wâgâ inwenily Mateus nhangahu odaji iemâmy Deus. Awlylygue Deus itaumburylâ xirâ Mateus nhagatuyby. Jesus nhapygueni, aguely idani warâ ewy myakâwândy Mateus.

Kâmakerim Jesus Cristo wâgâ kiuntuhoem myakâwândy Deus xirâ inwenien-honly. Xirâ livru wâgâ Jesuslâ, Messias awlyly kiuntuly, mâkâ Deus "Igonose urâ" kehobyry. Jesus iazehobyry wâgâ, âdy waunroem aini awlyly tiuntuhoem ximukâ enuagaeni modo xyrense idâhobyry wâgâ, José, Maria, iamudo warâ Egitoram âwientomobyry wâgâ, târâpa odopâdomobyry wâgâ warâ xirâ aguely.

Tâlâ xirâ wâgâ "Jesus iwy wâgâ unâ nhagatuhobyry." Jesus aguely: "Koendâ lelâ âduerymo xurâem aitaungâ. Tâpeânzeba itaungâ. Ipa kydato xuduze lelâ Deus." Turâ modo tonomedâze lâpylâ, âdara Deus agâ aguelymo awlyly wâgâ. Xirâ iwenihobyry wâgâ tutuze kurâ, Deus kywymâry awlyly, âdy xypyry etay aini modo awlyly warâ.

#### *Jesus Cristo idamudo*

*(Lc 3.23-38)*

<sup>1</sup> Jesus Cristo wâgâ ise unâgu. Davi iwerypyry myakâwâm Jesus Cristo, Davi pylâ Abraão iwerypyry-ro warâ.

<sup>2</sup> Saguhoem kuru ise Jesus idamudo kâengatuly, Abraão donropyrylâ, pymâ Daviram. Abraão myakâwândy Isaque nhunwym; Isaque, Jacó nhunwym. Jacó, Judâ, iwaigorudolâ warâ nhunwym.

<sup>3</sup> Judâ, Peres, Zera warâ nhunwym. (Tamar myakâwândy isemo ezedy.) Peres, Esrom nhunwym. Esrom, Arão nhunwym.

<sup>4</sup> Arão, Aminadabe nhunwym. Aminadabe, Nasom nhunwym. Nasom, Salmom nhunwym.

<sup>5</sup> Salmom, Boaz nhunwym. (Boaz ise myakâwândy Raabe keho.) Boaz, Obede nhunwym. (Obede ise myakâwândy Rute.) Obede, Jessé nhunwym. Jessé, Davi nhunwym.

<sup>6</sup> Jesus idamudo ise iwerâ kâengatuly, Davidâpalâ, kypemugudo sawâtybyem Babiloniarum satyby modoram. Kydamudo iwymâry ton-honreim, tynrenseim warâ myakâwândy Davi. Davi, Salomão nhunwym. (Bate-Seba keho agâ imerymo. Urias iwydypyry myakâwândy mâkâ.)

<sup>7</sup> Salomão, Roboão nhunwym. Roboão, Abias nhunwym. Abias, Asa nhunwym.

<sup>8</sup> Asa, Josafâ nhunwym. Josafâ, Jorão nhunwym. Jorão, Uzias nhunwym.

<sup>9</sup> Uzias, Jotão nhunwym. Jotão, Acáz nhunwym. Acáz, Ezequias nhunwym.

<sup>10</sup> Ezequias, Manassés nhunwym. Manassés, Amom nhunwym. Amom, Josias nhunwym.

<sup>11</sup> Josias, Jeconias, iukonodolâ warâ nhunwym. Israeldâ Jeconias pymâem awlyly ume myakâwândy kydamudo adaholy Babiloniarum. Iweâpa myakâwândy Babiloniadâ awlylymo, tâtymo anaxilâ odopâdomoem en-hem kehomba tawlylymogue.

<sup>12</sup> Jesus idamudo ise iwerâ kâengatuly, kydamudo Babiloniarum satoem sawâtyby modo dompyryenlâ, Jesus iazehobyryram. Jeconias, Salatiel nhunwym. Salatiel, Zorobabel nhunwym. Akaemo ume myakâwândy kydamudo Babiloniadâpa odopâdyllymo tâtymo anaxilâ.

<sup>13</sup> Zorobabel, Abiúde nhunwym. Abiúde, Eliaquim nhunwym. Eliaquim, Azor nhunwym.

<sup>14</sup> Azor, Sadoque nhunwym. Sadoque, Aquim nhunwym. Aquim, Eliúde nhunwym.

<sup>15</sup> Eliúde, Eleazar nhunwym. Eleazar, Matâ nhunwym. Matâ, Jacó nhunwym.

<sup>16</sup> Jacó, José nhunwym. José akâwâm Jesus nhunwym-em ini, Maria agâ tohogüinduo. Jesus ani Maria imery. Jesus mawânkâ Cristo kelygue tâzekeim, Messias "Deus Ingonotyby" keze aguely.

<sup>17</sup> Jesus idamudo merâ kâengatuly: Abraão donropyryem katorze lelâ iepadomobyry, Daviram; eagonro katorze modo lâpylâ Davi donropyryem israelita domodo Babiloniarum satyby modoram, eagonro katorze iepadobyryem lâpylâ Jesus iazeho odaxi.

#### *Jesus iazehobyry*

*(Lc 2.1-7)*

<sup>18</sup> Jesus iazehobyry wâgâ ise unâ kâengatuly. Pekodo Maria keho myakâwâm ise. Uguondo José keho agâ ohogüinrim wâne myakâwâm mâkâ. Ohogüinlymo iraynâlâ olâ myakâwâm Deus Ispiritury eon-honrugue adamyly.

<sup>19</sup> Moisés inwenibya ara lelâ adâidysedo myakâwâm mâkâ José. Maria imegu tiuntuduo olâ myakâwâm imoze tâkeze, âdykâ aniempyry tawylgyue. “Eagonro uguondoram adâiehoze keanra awâkâ” tâkeduo. Aituo tutuzebalâ imoze kely, Maria tâwentâzeba itoem.

<sup>20</sup> “Âdara ise awidyly-ro?” kely ume myakâwâm, nhâenkyem Deus eanjury âepanâguely; eyam aguely myakâwâm:

— José, Davi iwerypyry, tywypazeba ikâ Maria agâ ohogüinze. Tymegue lelâlâ wâne, âdaunlo uguondoram nâdynamâoba olâ. Awâkâ pekodo iodano iamudo, Deus Ispiritury awâkâ xuguni.

<sup>21</sup> Uguondo ise awâkâ imery. Awâkâ iamudo wâgâ ise Deus kurâdo nhemakely, inakanhe aitomboryr nhygakely warâ. Awylgyue ise “Jesus” kelygue mâenzetâdyly — kely myakâwâm anju Joseram.

(“Jesus”, “Kâmakerim” keze aguely.)

<sup>22-23</sup> Iweâpalâ myakâwândy Isaias aguely:

“Pekodo âdykâ uguondo nhyranâdânry adamyze.

‘Emanuel’ kely ise imery ezedy”

kewândymy Isaias tinwenibya wâgâ.

(“Emanuel”, “Kagâlâ Deus” keze aguely.)

Jesus iazeduo, aguehobyry aralâ myakâwâm aidyly.

<sup>24</sup> Kopaelâgâem myakâwâm José, anju aguehobyry ara aidyly. Maria tagâ nhedyly.

<sup>25</sup> Nynanâbyra olâ myakâwâm, imery saguho iazeho odaxi kehoem. “Jesus” kelygue myakâwâm iamudo nhezetâdyly.

## 2

*Ximukâ enuagaeni modo Jesus eydâ atoram idâhomobyry*

<sup>1</sup> Jesus iazely myakâwâm xidadâ imeimbyry Belémdâ, Judéia eynynâ, Herodes pymâem awyly ume. Jesus iazepygueduo, xixi egaseho eynnonro modo ewy idâlymo myakâwâm xidadâ Jerusalémram. Ximukâ enuagaeni modo myakâwâm akaemo, âdy aini awyly tiuntuhoem.

<sup>2</sup> Saintrybyem myakâwâm tonlo modo nhapâiguelymo:

— Ádykâka iamudo judeu domodo iwymâryem iazepy? Xixi egaseho eynynâ ani xina ximukâ nhedyly, iazehobyry xutuho. Enado âzeguhoam ise, ehogueze warâ xina âewyly — kelymo.

<sup>3</sup> Egary tindatuo, toenzepa kehoem myakâwâm pymâ Herodes âseguâdâdyly. Toenzepa lâpylâ myakâwâm mârâ xidadâ odano modo âda tâidyly nutuba idylymo, âseguâdâdylymo warâ.

<sup>4</sup> Aituo Herodes, kurâdo eynynâ Deus agâ aguewâni modo iwymârydo, Moisés inwenibya wâgâ enomedâni modo warâ indâtyguely, tyampâiguhomoem:

— Ádykâka ise Messias Deus Ingonokyly iazely? — kely.

<sup>5</sup> Aituo in-hogulymo:

— Belémdâ ise iazely, Judéia eynynâ. Warâ myakâwâm Deus itaumbyry egatuimbyry Miquéias inwenily:

<sup>6</sup> “Kydamu Judâram xuduypy onro odaylâ myakâwâm awârâ xidadâ imeimbyry, Belém.

Tâwâlâ lelâlâ wâne mârâ xidadâ imeimbyry awyly.

Alâ olâ ise mârâ xidadâ egary,

târâ pymâ ton-honreim iazely awylgyue.

Israelita domodo iwymâry ise mâkâ.

Kanery eni modo tâgyu nhedyly ara ise tynnonro modo nhedyly’ nygue Deus”

kewânmy Miquéias tinwenibya wâgâ — kely judeu domodo iwymârydo Herodesram.

<sup>7</sup> Aituo myakâwâm Herodes, akaemo ximukâ enuagaeni modo ingâsenehonly, eagâmo lelâ adâkehoem. Saintuomo, adapâiguelymy:

— Âdaraka ani mârâ ximukâ Messias iazely xutuho âepanâguely? — kely.

Aituo tientobyry nhगतulymo.

<sup>8</sup> Aguepygueduo, eyanmo aguely:

— Inepa Belémram idâwâtaungâ. Koendâ iamudo âdykâ awyly xutuwwâdaungâ. Mâentuomo, yam egatuwwâdaungârâ. Udâdyse lâpylâ urâ myarâ, enadoram âzeguhoam ise, koendonroem awyly wâgâ auguehoem — kely Herodes; kewâdyly kulâ olâ myakâwâm.

<sup>9-10</sup> Ilâpygueduo, ximukâ enuagaeni modo âxiguelymy. Belémram idâlymo myakâwâm. Tâtadaymolâ, ximukâ xixi egaseho eynynâ saguhoem tientybymolâ nhetonguylymo kau wâgâ. Toenzepa kehoem myakâwâm iomazelymo mârâ ximukâ tientonduomo. Iwaunrorumoenlâ mârâ ximukâ idâly, idâhomo tânehonze. Iamudo eydâ ato nhangawaym myakâwâm ximukâ epagudyly.

<sup>11</sup> Âtâ odaji egawântbyem myakâwâm iamudo nhedylymo Maria ihuay. Iamudo enado âzeguhoam idylymo, tynrense tawly tienehon-homoem. Ilâpyryem tysejiguy etary nhenahunguelymo. Iamudo xurâem tiantyby nhudulymo: ouru, incensu tyân-rânguneim, mirra warâ.

<sup>12</sup> Ilâpygueduo myakâwâm kopae nhâenkymo enlâ Deus eyanmo aguely:

– Herodesram egatuze todopâzebane itaungâ – kely.

Aituo tâty anaxilâ odopâdylymo eagonro ânwa oze, Jerusalém einkâ sakadânry oze.

*José, Maria, Jesus warâ Egitoram âwientomobyry*

<sup>13</sup> Ximukâ enuagaeni modo idâpygueduo myakâwâm anju âepanâguely Josêram, nhâenkyem. Eyam aguely:

– Autaungâ. Inepa tarâpa itaungâ. Merâ iamudo xuien-honze enra Herodes, tyâen-hon-hoem. Egitoram âwientaungâ iamudo agâ. Târâlâ wao itaungâ. Âgâsezemo urâ, modopâdomoem – kely.

<sup>14</sup> Anju agueduo myakâwâm inepa kehoem José saudyly. Kopaelâ kehoem âwiendylymo iamudo agâ Egitoram.

<sup>15</sup> Herodes iguely ara myakâwâm târâ awylymo. “Egitodâba ymery xigâsedâ” kewândymy Deus, Oséias inweniby wâgâ. Jesus iamugâry Egitodâba odopâduo, Deus aguehobyry ara kehoem myakâwâm aidyly.

*Herodes iamimeom nhâen-hon-hobyry*

<sup>16</sup> Ximukâ enuagaeni modo tonokudobyry tiuntuduo myakâwâm Herodes iewiâpadyly. Aituo tyzodadury modoram aguely:

– Belémram idâwâtaungâ. Iamudo uguondo imeombyry xyâwâtaunda tâjihuano modo dompyryem, azagâ anupeom modoram xyâwâtaunda. Idânârâ xyâwâtaungâ, xidadâ odano modo, poji anano modo, xidadâ iwaguepaom modo alelâ – kely.

Jerusalémâ taty, ximukâ enuagaeni modo aguewânmmomy: “Azagâ anu sakadyby wâgâ akâwâm mârâ ximukâ pymâ iazely xutuho xina nhedyly” kewânmmomy. Aguehobyry wâgâ myakâwâm Herodes, idânârâ iamudo uguondo imeombyry tâjihuano modo dompyryem, azagâ anupeom modoram nhâen-honwâdyly, âdykonlo pymâem ini awyly nûtuba tawlylygue.

<sup>17</sup> Arâ myakâwândy Deus itaumbry egatuimbyry Jeremias aguehobyry ara aidyly:

<sup>18</sup> “Xidadâ Ramâdâ kurâ domodo tytyrungue toenzepa eogunrumo xina nidadâ.

Tymeombyry xyâhobyry wâgâ Raquel eogunru xina nidadâ.

Ânguy nhetubanâguelyyemba itynrumo

idânârâ tymeombyry xyâhobyry wâgâ”

kewândymy tinweniby wâgâ.

Jeremias inwenihobyry ara kehoem myakâwâm Herodes uguondo modo imeombyry nhâen-honwâdyly. (Israel iwydy Raquel iweompyrylâ mawânkâ israelita domodo.)

*José, Maria, Jesus warâ Egitodâba odopâdomobyry*

<sup>19</sup> Herodes igueduo myakâwâm Deus, tyanjury Egitoram ingonodyly, José xuruse. José xkyly ume myakâwâm anju âepanâguely nhâenkyem.

<sup>20</sup> Eyam aguely:

– Aukâ. Israelram odopâgâ, iamudo, ise warâ agâ. Mâkâ iamudo tyândygedonro modo ipa, niguemo – kely.

<sup>21</sup> Aituo myakâwâm José, Maria, Jesus warâ saudylymo. Israelram odopâdylymo.

<sup>22</sup> Saintybyem myakâwâm “Arquelau pymâ, Herodes imerybyry, tunwym ejiptyano” kely indadyly. Awylygue myakâwâm José eanu myarâ Judéia yan-yam idâze, “Pymâ iwelo iamudo xyâen-honze enra” tâkeduo. Nhâenkyenlâ olâ myakâwâm Deus aguely:

– Galiléia yan-yam âxidâdaunda – kely.

Aituo Galiléia yan-yam âxidâze idâlymo.

<sup>23</sup> Xidadâ Nazarêdâ myakâwâm âxidâdylymo. Iweâpa Deus itaumbry egatuwânibyry modo, “nazareno” kelygue âzezekeoze kehombryrylâ. Nazarêram iamudo Jesus agâ âxidâze idâduomo, Deus aguehobyry ara aidyly.

### 3

*João kurâ domodoram Jesus âewyly wâgâ aguehobyry*

(Mc 1.1-8; Lc 3.1-17; Jo 1.19-28)

<sup>1</sup> Tâlâ myani uguondo João Batista keho Judéia eynynâ. Âji âdy peba atodâ myani mâkâ âxidâdybyem awyly. Deus itaumbry mykâinane nhegatuly kurâ domodo myarâ idânri modoram.

<sup>2</sup> Alâ mykâinane aguely:

– Âjityendaungâ, inakanhe kulâ amitomobyry wâgâ. Deus izepa ato aiedyly imowâdaungâ warâ. Iweâpa nitaymba ise Deus Ingonotyby âewyly. Kywymâryem ise – tâkeze mykâinane.

<sup>3</sup> Warâ myakâwândy Deus itaumbyry egatuimbyry Isaías inwenily João Batista wâgâ: “Messias wâgâ agueim târâ âji âdy peba atodâ ise aguely.

Adâkely idase idâwâtyby modoram:

‘Inepa ise Deus Ingonotyby saindyly.

Izepa ato aiedyly imowâdaungâ.

On-hondybyem lelâ itaungâ, aguely mâindatomoem.

Pymâ ton-honreim kâty anaxi âewyly kiuntuduo wâne,

kâty inatary tuonse, tuonkeze warâ kurâ,

myara on-hondybyem lelâ kydawwyly aguely idase’ ”

kely ise mâkâ unâ egatuim, warâ myakâwândy Deus itaumbyry Isaías inwenily.

João Batista myani Kywymâry saindyly egatuim.

<sup>4</sup> Camelu xuhudugue xygatyby mykâinane João ety iwogonro, âdy pebaom ety iwogonro emyenro kulâ. Tâjitybugue kulâ mykâinane iwanxiegu. Kahuli, penrâ warâ mykâinane ipyniry.

<sup>5</sup> Jerusalémdâ tâtyuneim modo, Judéia eynynonro modo, paru Jordão emelano modo warâ tâtâzemo mykâinane João aguely idase.

<sup>6</sup> João aguely tindatuomo myani toenzepa kurâ domodo aguely eyam:

– Deus izepa ato aieni xina. Adâidyly tumoze olâ xina-ro warâ – kelymo.

Arâ agueduomo myani paru Jordão ikay Joãoram batiza âieholymo, Deus izepa ato adientomobyry wâgâ tâjityenze tawlymo tienehon-homoem, inakai modo adientyly imoimbyryem tawlymo tienehon-homoem warâ.

<sup>7</sup> Agui kehoem myani fariseu domodo, saduceu domodo warâ Joãoram batiza âiehoze idâlymo. Tutuze olâ myani João, akaemo nâjityembyra awyly Deus izepa ato adientomobyry wâgâ. Awlyly aguely eyanmo:

– Âgâu poji âduguely ume âsemagueze kewâni ara kulâ âmaemo! Warâ wâne amyguelymo: “João batiza kyetuo ise kydâsemaguely. Deus kânagazedaymba ise” myguelymo.

<sup>8</sup> “Deus eynynonro urâ” myguelymo wâne, Deus eynynonro keba olâ âmaemo. Deus izepa ato amânhetomobyry wâgâ tâjityenze mawlymo enehorim aietaungâ, inakanhe amidlymo imoimbyryem mawlymo mâenehon-homoem warâ.

<sup>9</sup> “Deus kânagazenehonwâbyra ise, Abraão iweonma kurâ” tâkezeba itaungâ. Abraão iweryem tadawwyly mâkeba mârâ kuru. Âdy mâkeba awârâ! Auguely xirâ âyanmo. Ton-honre Deus, xirâ tuhu modo Abraão iweryem ienehonze.

<sup>10</sup> Nady koendâ ewisedânry pygwe satâly. Iwindy âzesagueoly. Peto onwanji adameoly alelâ aieholy. Nady koendâ ewisedânry ara kulâ âmaemo. Deus izepa ato mâinmopa âmaemo-ro watay, inepa ise Deus inagazenehonlymo.

<sup>11</sup> – Urâ pygueduo eagonro âese lâpylâ Deus wâgâ aguenri. Ton-honreim ise mâkâ, iemyenro keba. Mâkâ ise yakadâ kuru ton-honreim. Ihuru etary sanienlâ witoem nudupa lâgâlâ. Urâ parugue batiza âenimo, Deus izepa ato amânhekylymo wâgâ tâjityenze mawlymo mâenehon-homoem, inakanhe amidlymo imoimbyryem mawlymo mâenehon-homoem warâ. Mâkâ âeni olâ ise Deus Ispiritury xudunri, eynynâ mawlymo xutuhoem. Inakanhe amitomobyry xygakeze, peto wâne saxium nhaduândyly âpa ezay myara.

<sup>12</sup> Trigu ekaunâni wâneam tuduakeze ewy nhekaunâdyly myara mâkâ. Tynynonro modo iduakewâze ejidy tâkehobyryanlâ ise nhekanâdyly, trigu etary kehobyry odaxilâ ekanâdyly myara. Tynynâbaom modo olâ typygueba kehoem enagazeze peto âdaunloenlâ nhântânry onwanxi ise nhamely – kely João.

*João Jesus batiza nhetobyry*

*(Mc 1.9-11; Lc 3.21-22)*

<sup>13</sup> Alâ myani Jesus Galiléia eynynâba idyly, paru Jordãoram idâly, João batiza tyetoem.

<sup>14</sup> João myani batiza tiendyseba, Jesus tynrenseim kuru awyly tutuze tawlylygue. Aituo aguely:

– Batiza âetoem yam mâewyly. Âmâlâ yakadâ kuru tynrenseim. Âmâ batiza yekâ – kely João.

<sup>15</sup> Warâ olâ Jesus aguely:

– Ize wato aralâ nidâ. Batiza yekâ. Ara ise Deus ize ato aguiendyly – kely.

Aituo João âkeâ kely. Jesus batiza âieholu myani, Deus eynynonroem tawlyly tienehonhoem.

<sup>16</sup> Jesus âjikaguely paikayba. Âjikaguebygueduo myani kau âzenahunguely nhedyly. Papaem myani Deus Ispiritury xytâguely, ekadyly nhonwa.

<sup>17</sup> Aituo kau oday Deus itanru indadyly lâpylâ:

– Mery toenzepa kâinwyneguly merâ, toenzepa womazeâni – kely myani Deus.

## 4

*Deus ize ato araba Jesus aitoem, Satanás aiese kehobry  
(Mc 1.12-13; Lc 4.1-13)*

<sup>1</sup> Ilâpyryem myani Jesus adaholy Deus Ispirituryam âji âdy peba atoram. Tarâ myani Deus izepa ato anhetoem Satanás aiese kely wâne.

<sup>2</sup> Quarenta iguandyly, quarenta emedyly warâ myani Jesus nâwinduapya awyly. Alâ myani toenzepa kehoem ewindupadyly.

<sup>3</sup> Aituo Satanás eyam saindyly, aguely:

– “Deus imery urâ” mygueansema. Âkealâ kuru amyguely-ro watay, awârâ tuhu pãoem iekâ pylâ – kely.

<sup>4</sup> Aituo myani Jesus aguely:

– Amyguehobry agânhetaymba ise urâ.

“Pão kiendawynlygue lelâ inkâba kyiguepa kydawyly.

Idânârâ Deus agueho kicinwandyly, aguiendyly warâ watay,  
kyiguwâpyra kurâ”

kely mawânâ Deus itaumbry awo wâgâ iweniby – kely Jesus.

<sup>5</sup> Ilâpygueduo myani Satanás, Jesus nhadyly Jerusalémram. Deus ijidadâry kelygue tâzekeim myani mârâ xidadâ. Deus ety nhangakuedaji myani nhadyly.

<sup>6</sup> Aituo aguely:

– “Deus imery urâ” mygueansema. Âkealâ kuru amyguely-ro watay, tarâpa onro onwa adamegâ. Mâdyâwâpyra ise âmâ. Warâ mawânâ iwenibyem Deus itaumbry awo wâgâ: “Deus nhese lelâ.

Anju domodo igonose awâniem.

Âihugueduo, awâse lelâ tâmarygue,

âda mîpyra mitoem, âhuru tuhu onwa nâdyâpa itoem warâ”

kely iwenibybe mawânâ – kely Satanás.

<sup>7</sup> Aituo myani Jesus eyam aguely:

– Onro onwa kadamewâbyra ise urâ. Warâ lâpylâ iwenibyem awyly Deus itaumbry awo wâgâ:

“Deus imakelymo mâentomoem kulâ, kâmayno akâiedaundâ.

Amidylymo-ro watay, mâinwâmpyra mawylymo kulâ ise mâenehonlymo”

warâ lâpylâ iwenibyem awyly – kely Jesus Satanásram.

<sup>8</sup> Ilâpyryem myani iwy kaynonro onwa adaholy Satanásram. Idânârâ onro anano modo nhenehonly; idânârâ âdydo imeom iwâkuru modo, tâwâenseim modo warâ nhenehonly.

<sup>9</sup> Aituo myani aguely Jesusram:

– Idânârâ awârâ mâentaynly modo âyam xuduze urâ, ienado âzeguhoam midyly yrentoen-ro watay – kely.

<sup>10</sup> Jesus aguely:

– Âyrentoem inado âzeguhoam witaymba ise urâ! Deus itaumbry awo wâgâ iwenibyem: “Kywymâry Deus enado lelâ âzeguhoam itaungâ.

Aguehobry ara lelâ aitaungâ”

kely iwenibyem. Idâ, Satanás. Tarâpa ikâ – kely Jesus.

<sup>11</sup> Aituo Satanásram âjionly. Satanásram âjiompygueduo myani anju domodo saindyly, Jesus eydâ atoram xuahuze, idânârâ ize ato modo xuduze warâ.

*Jesus Galiléia eynynâ tâwanu nhaguhobry*

*(Mc 1.14-15; Lc 4.14-15)*

<sup>12</sup> João Batista kadeia oday kely tindatuo myani Jesus Galiléia yan-yam idâly.

<sup>13</sup> Xidadâ Nazaréamba olâ myani odopâdondyly-ro warâ. Xidadâ Cafarnaumdâ myani âxidâdyly, Galiléia iwalu iwagupa, saguhoem kydamudo Zebulom, Naftali warâ eonronruem xuduypy eynynâ.

<sup>14-16</sup> Enanâgiewâdaungâ saguhoem Deus itaumbry egatuimbyry Isaiás inweniby:

“Kydamudo Zebulom, Naftali warâ eonronru

Galiléia eynynâ ejiku, paru Jordão kuynâ,

tuomareim kuru ise âmaemo judeu, judeu keba alelâ,

mârâ anaym tâjikuneim modo,

âdaralâ Deus itaumbry mâuntuba olâ âmaemo.

Awylygue toenzepa âiguelymo mâyntadylymo, mâseguâdâdylymo warâ.

Deus wâgâ âzenomedâoze olâ âmaemo,



iajину odano aramo lelâ ise, iamu odanopyryem” kewândymy.

<sup>17</sup> Deus xunâry egatuze myan-yam Jesus idâduo, Isaías inweniby ara kehoem myani aidyly. Târâlâ myani Jesus unâ nhegatuzy adaguly. Alâ myani aguezesedyly:

– Âjityendaungâ inakanhe amitomobyry wâgâ. Inakanhe adâjidyly imowâdaungâ warâ. Arâ lelâ ise Deus âwymârymoem awyly – kezesedyly.

*Jesus kanra awâni modo tynnonroem ingâsedobyry*

*(Mc 1.16-20; Lc 5.1-11)*

<sup>18</sup> Paru Galiléia emelay takobâday myani Jesus azagâ uguondo nhedyly, iwaigoru, iukono warâ; Simão Pedro, André warâ. Âedâgue kanra sawâni myani akaemo, vende tientoem. Âedâ paikaji nhamedaymo myani Jesusram âzeholyomo.

<sup>19</sup> Azakâlâram myani Jesus aguely:

– Âtaungâ. Saguhoem kanra keankâ mawelymo; iwerâ kurâ domodo tynnonroem itoem unâry egaturin-em ise âmaemo – kely.

<sup>20</sup> Inepa kehoem myani âedâ kanra sawâto inmolymo, Jesus eynnonroem tâitomoem, Deus wâgâ tiuntuhoem.

<sup>21</sup> Tâtâday myani Jesus azagâ uguondo modo nhetondyly, Tiago, iukonolâ João warâ. Zebedu imeombyry myani akaemo. Ekadybymoem myani tywepiry oday tunwym agâ. Âedâ kanra sawâto myani kua nhekylymo, kopaelâgâroem. Aituo myani Jesus akaemo ingâsedyly tynnonroem itomoem.

<sup>22</sup> Inepa kehoem tywepiry odayba idylymo. Tunwym tyânzemo myani, Jesus agâ tâtâhomoem.

*Jesus kurâ domodo nhenomedâdobyry, tâwânuneim modo kua nhetobyry warâ*

*(Lc 6.17-19)*

<sup>23</sup> Idânârâ Galiléia eynnonro âta anakâ myani Jesus sakadyly. Âtâdyguyhomodâ mykâinane Deus wâgâ nhenomedâdylimo. Deus iwymârymoem idyly wâgâ mykâinane unâ iwâkuru nhegatuzy. Tâwânuneim modo, âsenagazeni modo warâ kua tyese mykâinane.

<sup>24</sup> Tâinkâ lelâba myani anhekyly egary idâly Síria eynynâ. Aituo pylâ myani tâwâneim modo Jesusram nhadylymo-ro warâ. Âdaunlo tâzewânulâ kua nhekyly. Kadopâgue taseim modo kua nhetaynly. Ekomani modo kua nhetaynly. Adakobâdânry modo kua nhetaynly lâpylâ warâ myani. Idânârâ tâwâneim modo tyam idâpyy kua tyese lelâ myani.

<sup>25</sup> Toenzepa myani kurâ domodo nhapgye awyly, Galiléia eynynâba âetaymby modo, Dez Xidadâ anano modo, Jerusalém donro modo, Judéia eynnonro modo warâ, paru Jordâo kuynnonro modo lâpylâ warâ.

## 5

*Jesus kurâdo iwya wâgâ âtâdyguyby nhenomedâdobyry*

*(Mt 5.1-7.29)*

<sup>1</sup> Toenzepa kehoem myani kurâ domodo Jesus eydâ atoram idâly. Arâ kurâdo tientoem myani iwya onwa âkuly, ekadyly warâ. Eynnonro modo iopaji idylymo myani.

<sup>2</sup> Aituo myani kurâ domodo enomedâdylly Jesus nhaguly.

*Âdara tojiomaru kuru awyly xutuho*

*(Lc 6.20-23)*

<sup>3</sup> Aituo Jesus aguely kurâ domodoram:

– Tuomareim kuru mâkâ, Deuslâ idânârâ tâlâ tato xuduim awyly xuturim.

Imâemba lelâlâ wâne, Deus kaynonro olâ iwymâry, eni warâ.

<sup>4</sup> – Tuomareim kuru mâkâ iwerâ âjityeni.

Itynru ume, Deuslâ mawânkâ ise iomazeâni.

<sup>5</sup> – Tuomareim kuru mâkâ tâlâ tato modo wâgâ kulâ sawoem itânry.

Deus tynnonro modoram, “Xuduze urâ” kehobyry emakeze mawânkâ.

<sup>6</sup> – Tuomareim kuru mâkâ Deus ize ato modo lelâ adiyndyse donro.

Kurâ tâwinzeim, tatuanzeim warâ wâne pyni, paru warâ lelâ ize ato,

myara lâpylâ Deus ize ato lelâ adiyndyse awyly.

Idânârâ ize ato xuduze Deus, ton-honre lelâ tâinwântoem.

<sup>7</sup> – Tuomareim kuru mâkâ âkelo modo ityeni.

Deus mawânkâ ityenze lâpylâ.

<sup>8</sup> – Tuomareim kuru mâkâ Deus izepa ato aniempyra tâitoem Deus xurâ modo wâgâ lelâ âtyanâni,

Deus eydâ atoram idâze mawânkâ.

<sup>9</sup> – Tuomareim kuru mâkâ, tâdâtuebadyly, tâdâseguebyly warâ adain-hoem aini.

Tymery ara lelâ mawânkâ ise Deus nhedyly.

10 – Tuomareim kuru mâkâ Deus ize ato ara aidylygue tânagazezeim.  
Deus kaynonro mawânkâ ise iwymâry, eni warâ.

11 – Ynyonro mawylmogoe, ynyâbaom modoram âjiewiâseoze âmaemo. Âunâguezemo. Inagazenehonzemo. Âwâgâmo kewâdylimo kulâ ise warâ. Arâ wâne ise amyguehonlymo, tuomare lelâ olâ ise âmaemo.

12 Tytywanzeba itaungâ, tuomare lelâ. Deus olâ eydâ tatodâ imâem âyanmo nhudulype, omazeânimo nhekanâdybybe. Deus izepaom modoram mâzenagazeolyo. Alâ mykâinane Deus xunâry egatuim modo nhenagazedylimo lâpylâ – kely Jesus.

*Jesus, “Peku, iajinu warâ emyenro âmaemo” kehobyry  
(Mc 9.50; Lc 14.34-35)*

13 Aituo Jesus aguely:

– Peku pyni tâkubâzeânze, podo niwânzeânheomba warâ, myara âmaemo taunlo modo ywâgâ amyguelymo, kurâ domodo yeinwântomoem, inakanhe nâiehoba itomoem warâ. Peku onro agâ on-hoam ityby olâ pyni ikaji ietoem nudupa. Âdaitoem ânguy ize inkâba. Awylygue adameoly lelâ, adakabeoly warâ sakani modoram.

14 – Iajinu, iamu oday kydadakobâdo kiento nhesagonly myara ywâgâ mâuntuenhonlymo. Koendâ kehoem wâne xidadâ iwiy angatay saunâtyby edyly myara ywâgâ totoenzeba aguewâtaungâ.

15 Lamparina kienmanâdily watay, âdylâ iaxi kioentaymba kurâ. Kayanlâ kianlokuândily, idânârâ âtâ odano modo nhesagon-hoem.

16 Lamparina kaynâ ekanâdyby ara ise koendâ amidylimo âzeholy idânârâam, Deus mâinwândylimo warâ. Koendâ amidylimo tientuo: “Koendonroem unwânmo Deus kaynonro awyly” aguehonze – kely Jesus.

*Jesus Moisés inweniby wâgâ aguehobyry*

17 Jesus aguely:

– “Jesus aguehobyry lelâ iwerâ kyzeinwâne, âdaitoem saguhoem Moisés agâ, tunâry egatuwâni modo agâ warâ, Deus aguehobyry kienwântaymba kurâ” tâkezeba itaungâ. Deus Moisésram kâzewenry inwenien-hoymby koendâ kuru mâuntuhomoem xirâ kâewyly, mâinmohomoem inkâba.

18 Kau, onro warâ tâlâ awyly ara, Moisés inweniby tâlâ lelâ lâpylâ ise; tugukewâduneba ise xypyry etaji kehoem. Iwenihobyry tokalâ letralâ tygakeduneba ise. Xirâ mawânâ mâuntudyzemo kuru wato.

19 Moisés inweniby modo ewy einwântânry, kurâ domodo mârâ neinwâmpyra itoem aguenri watay âdy mâkeba ise mâkâ, Pymâ Deus nhekyly modo duay. Deus Moisésram kâzewenry inwenien-hoymby ara aini, kurâ domodo onomedâni waunlo watay, tywyneim ise mâkâ Pymâ Deus eydâ atodâ.

20 Warâ âyanmo auguely. Fariseu domodo, Moisés inweniby wâgâ onomedâni modo warâma koendâ aini, tâkewâze kurâ. Kurâ domodo tynrentomoem kulâ olâ akaemo aidylyro warâ. Deusgue âwymâgumo ize mataymo, kurâ domodo ize ato ara kulâ aini modo takaze Deus ize ato aietaungâ – kely Jesus.

*Ânguy kienwiâsebyra kine*

21 Jesus aguely:

– Tydaselâ âmaemo, Moisés kydamudoram aguehobyry: “Ânguy kâdywâtaundâ. Kyâmpyry pymâ domodo xyâen-honze lâpylâ” kewândymy Moisés.

22 Urâ olâ warâ âyanmo auguely. Deus enanaji, kagonro kienwiâsedily, inakai kuru, ânguylâ kyânly aralâ lâpylâ. Awylygue kyewiâsenibe-ro watay, adaholy pymâdoram âzenagazeohoem. Âkelo xunâguenibyry tribunalram sadyly lelâ, setenta pymâ tynreim modoram âzenagazeohoem. “Tuândy kulâ âmâ” keypy watay, samely lelâ peto nhântânry onwanji.

23-24 Tâwâlâ lelâlâ wâne Deus etydâ mawylimo, âdylâ Deusram egameze, târâ mawylimo ume, mâdunâgueohomobyry mâenanâguelymo-ro watay, Deus xurâem mantybymo târâlâ wao nhânwâtaungâ, mâengamebamolâ. Waunroem mâkâ âewiâsenimobyry agâ âtunâguedaunda wao. Koendâ lelâ agâmo-ro watayma tâwâlâ Deus etyram modopâdylimo, Deus xurâem mantybymo egameze.

25 – Ânguylâ tribunalram adysemo watay, waunroem wao eagâ koendâ âtunâguedaungâ, agâmo tyewiâseba itoem. Arâ amipyra âmaemo-ro watay, tribunalram asemo. Târâ ise; pymâ domodo policia domodoram igameinmo-ro warâ mâzetadâohomoem.

<sup>26</sup> Dinheru mâempywadomoem juiz aguehobyry idânârâ mâempywabyra âmaemo-ro watay, igasewâbyra ise âmaemo târâpa. Arâ lâpylâ Deus agâ koendâ itaungâ koendâ mitomobe awyly umelâ. Xirâ mâuntudyzemo kuru wato – kely Jesus.

*“Eagâ mohogüin-homobyry keba kulâ kâdyanâdaundâ” Jesus kehobyry*

<sup>27</sup> Jesus aguely:

– Tutuzelâ âmaemo Moisés inweniby: “Âwydymo keba kulâ kâdyanâdaundâ” kely myakâwândy inwenily.

<sup>28</sup> Urâ olâ warâ âyanmo aguely: Uguondo pekodo enupegyugueni, tynanâdyze, iwidy keba olâ waunlo, inakanhe mâkâ xunâgu tyangahu oday. Nynanâbyra wâne, arâlâ olâ âzewentâoly Deusrâ.

<sup>29</sup> Inwentânehoinmo Deus mâendysebamo ato kâzetaundâ. Koendâ tâise azakâlâ inumo etyly, Deus mâendysebamo ato mâempyry mitomoem. Koendonro kuru tânuembalâ Deus agâ tadawly; idânârâ kodo peto nhântânry onwanxi adameoly mawânâ koendâpaom kuru.

<sup>30</sup> Deus xurâem inwentânehoinmo akâiedaundâ imarymogue. Koendâ tâise imarymo satâyly, samely warâ, Deus izepa ato amânhepyra mitomoem. Koendonro kuru tâmaguebalâ Deus agâ tadawly; idânârâ kodo peto nhântânry onwanxi adameoly mawânâ koendâpaom kuru – kely Jesus.

*Jesus tâdâximoly wâgâ aguehobyry*

*(Mt 19.1-9; Mc 10.1-12; Lc 16.18)*

<sup>31</sup> Jesus aguely:

– Tutuzelâ âmaemo Moisés inweniby: “Pekodo eagâ mohogüin-homobyry mâinmodyze âmaemo watay, tâwâlâ imowâdaungâ. Âdaituo mâinmolymo awyly xutuhoem pape mâinwenibymo olâ eyam xuduwâtaungâ” kely myakâwândy inwenily.

<sup>32</sup> Urâ olâ warâ âyanmo aguely. Âdaituoba kulâ âwydymo kâjimowâdaundâ. Eagonro uguondo agâ ituo lelâma pekodo imoly. Pekodo imoyby agâ ohogüimby watay Deus izepa ato ara kulâ lâpylâ aidyly. Deus xurâem, waunroem eagâ ohogüimbylâ mawânkâ iso kuru – kely Jesus.

*Jesus aguienkyly kykehobyry wâgâ aguehobyry*

<sup>33</sup> Jesus aguely:

– Tutuzelâ âmaemo Moisés inweniby: “Deusrâ amyguehomobyry watay, aietaungâ lelâlâ; amyguehomobyry amânhepyra tâiseba itaungâ” kely myakâwândy inwenily.

<sup>34</sup> Urâ olâ warâ âyanmo aguely. Âdaunloenlâ Deus ezedy âwankuem kâietaundâ. “Mâkâ kaynonro tutuze âkealâ aguely awyly” tâkezeba itaungâ. “Mâkâ kaynonro” myguelymo-ro watay, Deusrânlâ amyguelymo lâpylâ, kaynâ ejidy awylygue.

<sup>35</sup> “Mâkâ onro xyganipyry âkealâ aguely awyly tutuze” tâkezeba itaungâ. Deusrânlâ arâ amyguelymo. Deus mawânkâ onro anaynlâ lâpylâ. “Mâkâ Jerusâlêm donro âkealâ aguely awyly tutuze” tâkezeba itaungâ, Deusrânlâ arâ amyguelymo, Deus Ijidadâry kelygue tâzekeim awylygue.

<sup>36</sup> “Iangatolezeze urâ, uguewâdyly kulâ-ro watay” tâkezeba itaungâ. Tokalâ kyangahudu kiampekanânehonwâbyra kurâ, kienmyguymanânehomba warâ, Deus nhygatyby awylygue.

<sup>37</sup> “Aiese urâ” myguelymo watay, aietaungâ. “Agânhepyra ise urâ” myguelymo watay, akâiedaundâ. Amyguehomobyry aralâ aitaungâ, Deus ezedy mâempâguebamolâ. Deus ezedy mâempâguelymo-ro watay, Diabulâ aienehonrim – kely Jesus.

*Tâdâpeândyly wâgâ Jesus aguehobyry*

*(Lc 6.29-30)*

<sup>38</sup> Jesus aguely:

– Tutuzelâ âmaemo Moisés inweniby: “Ânguylâ otoguylymo, inuxiguylymo warâ watay, enuxiguywâdaungâ lâpylâ. Âerymo nhukagâdyly watay, iery xukagâdaungâ lâpylâ” kely myakâwândy inwenily.

<sup>39</sup> Urâ olâ warâ âyanmo aguely: “Ânguylâ âdalâ âetuomo, âpeânze tâkezeba itaungâ” uguely. Mâjiwapagainhoduomo, tâpeânzeba itaungâ. MYRYK itaungâ, iladune âwapagain-homoem lâpylâ.

<sup>40</sup> Âdylâ amânhetomobyry wâgâ mâzewentâoly mo watay, policiaram adahoze âmaemo. Târâ “Âgamizary merâ uguondoram xudugâ” myguehonduomo, tâwâlâ âwalitoru nadâ lâpylâ.

<sup>41</sup> Sodadu Roma donro âyanmo “Ysejiguy sakâ tokalâ kilômetro” keduo, azagâ kilômetro lelâ sataungâ.

<sup>42</sup> Âyanmo âdylâ ekanibyryram ânduwâtaungâ. Âdylâ tiempywaguylyem ekanibyryram ânduwâtaungâ lâpylâ – kely Jesus.

*Áizepanromo agâ koendâ lelâ itaungâ  
(Lc 6.27-28,32-36)*

<sup>43</sup> Jesus aguely:

– Tutuzelâ âmaemo Moisés inweniby: “Áwynenimo lelâ iwynedaungâ. Áwynedânrymo kâjiwynedaundâ” kely myakâwândy inwenily.

<sup>44</sup> Urâ olâ warâ âyanmo auguely. Áwynedânrymo agâ koendâ lelâ itaungâ, ataen-homo mâinwynegyulymo agâ matomo ara. Ânguyâ inakanhe âedylymo watay, inakanhe aitobyry wâgâ Deusram ekadaungâ, eagâ koendâ lelâ itoem.

<sup>45</sup> Koendonro mawânkâ Deus, tynynonro modo agâ, tynynâbanro modo agâ alelâ. Xixi tohobanâze mawânkâ koendonro modoem, inakai modoem alelâ. Kopâ tyihugueânze lâpylâ tâinwânni modoem, tâinwântânry modoem alelâ. Awylygue koendâ lelâ âmaemo ataen-homo, âduerymo alelâ agâ-ro watay, Deus kaynonro xurâem kuru mawylymolâ mânehonlymo.

<sup>46</sup> Agâmo koendonro agâ kulelâ koendâ mawylymogue, “Deus koendonro kurâem xuduze, koendonro kydawylygue” tâkewâzeba itaungâ. Âdyem itaymba awârâ. Asaemo dinheru impostu epywadobyry emakewânni modo tataen-ho modo agâ koendâ lelâmo lâpylâ. Awylygue arâ amidylymo watay, âkelo modo takaze amidylymo mâkeba.

<sup>47</sup> Âpemugudomo agâ lelâ, ataen-homo agâ lelâ warâ mâsedaengulymo, âunâgumo warâ lâpylâ watay, âkelo modo takaze amidylymo mâkeba. Deus eynynâbaom modo mawânkâ tataen-ho modo agâ koendâ lelâ lâpylâ.

<sup>48</sup> Koendâ lelâ idânârâ kurâ domodo agâ itaungâ, Kunwym kaynonro ara, mâkâ idânârâ koendâ eni ara – kely Jesus.

## 6

*Jesus tâdâsemawadâdily wâgâ aguehobyry*

<sup>1</sup> Jesus aguely.

– Xirâ âyanmo augueho. Tâmaynelâ itaungâ, tâzenanaym kehoem âdylâ amânhepyra mitomoem, amyguepa mitomoem warâ. Igaromoem kulâ âdylâ koendonro amânhedilymo-ro watay, Deus ipywadaymbamo ise amânhetybymo wâgâ.

<sup>2</sup> – Awylygue kaikâ modo mâenmawadâdilymo watay, amânhetybymo ânguyam kâzegeaundâ. Koendonroem âdutuim modo aito araba aitaungâ. Kaikâ modo nhemawadâdilymo watay, tâinkâ lelâba adientyby nhगतulymo, kurâ domodo âtâdyguyho odakâ, xidadâ earuary oze warâ. Kurâ domodo tywâgâ koendâ aguehoem kulâ kaikâ modo nhemawadâdilymo. Deus koendonro nuduwâpyra ise eyanmo. Aitomobyry ebyrylâ ise awârâ kurâdoram âzehogueolyo.

<sup>3</sup> Awylygue âdy pebaom modo mâenmawadâdilymo watay, ânguyam kâzegeaundâ. Koendâ kehoem aitaungâ, ataen-homo kuru nhutulyemba kehoem, imarymo pâem eynynonro wâne, imarymo aho eynynonro anhekyly nutuba myara.

<sup>4</sup> Awylygue kaikâ modo emawadâdaungâ, ânguy nutubalâ. Kunwym Deus olâ idânârâ aguienkyly tâense. Koendonro amânhekylymo tâense, ipywazemo-ro warâ – kely Jesus.

*Jesus Deus agâ aguykehoem konomedâdobyry  
(Lc 11.2-4)*

<sup>5</sup> Jesus aguely:

– Deus agâ amyguedaymo, koendonroem âdutuim modo ara inkâba itaungâ. Deus agâ adâkehomoem XYDYK idilymo, âtâ tâdâtâdyguyho oday, arua iskinarydâ warâ, kurâ domodo tâentoem kulâ. Deus koendonro nuduwâpyra ise eyanmo. Aitomobyry ebyrylâ awârâ kurâdoram âzehogueohomo. Xirâ mâuntudyzemo kuru wato.

<sup>6</sup> Koendonro lelâlâ Deus agâ agueze kydâtâdyguyly. Koendonro lâpylâ olâ kurâ kulelâ eagâ aguykely. Awylygue âji ânguy âynanâbyramo atodâ eagâ aguewâtaungâ. Kunwym Deus awâtârâlâ ise agâmolâ. Mâempyra lelâlâ wâne âmaemo, alâ olâ eagâ aguewâtaungâ. Âmaemo kulelâ eagâ amyguelymo tydase mâkâ. Arâ amituomo koendonro âyanmo xuduze.

<sup>7</sup> – Deus agâ amyguedaymo, amyguehomobyrylâ adâkezezeba itaungâ. Deus einwântânry modo ara inkâba aitaungâ. Deus tydadyly waunlo ara, enanajimo, imeâgâemba kehoem adâkelymogue.

<sup>8</sup> Aguehomo ara inkâba aguewâtaungâ. Tutuze mawânkâ Kunwym Deus âdy ize matomo, mâenkadylymo iraynâlâ.

<sup>9</sup> Deus agâ amyguedaymo, warâ aguewâtaungâ:

“Pabai kaynonro, tynrenseim lelâlâ mawlyly, izedy awyly warâ idânârâ nhutudyzemo xina.

Ânguy âwankuem âepyra nidâ.

<sup>10</sup> Tarâ xina iwymâryem ikâ.

Xina xirâ onro anano modo ize mato ara lelâ xina aiedyse awyly,  
târâ kaynâ agonro modo ize mato ara aito ara lelâ.

<sup>11</sup> Âmâlâ kopaelâgâembaba xina ipyniry âundugâ.

<sup>12</sup> Inakanhe xina aitobyry xygakegâ,  
âkelomo inakanhe tynynâ aitobyry xina nhenanânehon-ho ara.

<sup>13</sup> Satanâs izepa mato aienehonze keduo, xina agâlâ ikâ,  
izepa mato xina aniempyra itoem.

[Xina iwymârye âmâ.

Ton-honre kehoem âmâ, amânhedyse mato aiese.

Tynrenseim âmâ.

Aunlolâ ise âmâ, typygueim keba. Arâlâ ise”]\*

– warâ aguewâtaungâ Deusram.

<sup>14</sup> – Inakanhe âetomobyry mâenanânehonlymo-ro watay, Kunwym kaynonro xygakeze lâpylâ inakanhe amitomobyry.

<sup>15</sup> Inakanhe âetomobyry mâenanânehomba âmaemo-ro watay, Kunwym kaynonro nygakeba lâpylâ ise inakanhe amitomobyry – kely Jesus.

*Tâdâwinduapryra tâjidyly wâgâ Jesus aguehobyry*

<sup>16</sup> Jesus aguely:

Tâjityenzeba itaungâ, Deus agâ amyguehomoem mâwinduapryra midylymo watay. Koendonro emyentro modo ara inkâba itaungâ. Deus agâ adâkehomoem nâwinduapryra tâise tawily xutudyzemo. Awylygue tytyreim ara idylymo. Nâzemetagogueba, nâzekagâimba warâ awylymo. Kurâ domodo tywâgâ koendâ aguehoem kulâ arâ aidylymo. Âdy koendonro nuduwâpyra ise Deus eyanmo. Aitomobyry ebyrylâ awârâ kurâdorom âzehogueolyo.

<sup>17-18</sup> Âmaemo olâ, Deus agâ amyguehomoem mâwinduapryramo mituomo, tuomare lelâ itaungâ. Âzemetagoguewâdaungâ lelâ, âzekagâinwâdaungâ lelâ warâ, ânguy mâwinduapryra mawilymo nutuba itoem. Kunwym kaynonro agâmolâ. Amidylymo tutuze mâkâ. Mâkâlâ ise âyanmo koendonro xudunri – kely Jesus.

*Koendonro kaynâ ekanâdyby*

*(Lc 12.33-34)*

<sup>19</sup> Jesus aguely:

– Tarâ onro anaym âdydo imeom tâwâentuneim modo kâzekanâdaundâ, potogo, tuonro warâ inakanhe nhetodâ, âzemetagoguehodâ warâ.

<sup>20</sup> Awylygue âzeon-hondâdaungâ, Deus ize ato amânhetomoem. Arâ ise koendonro ekanâdybybe mawilymo târâ kaynâ. Âdaunloenlâ tuonro, potogo warâ inakanhe nhetânry. Tâmagazeim modo nemagazebyra ise.

<sup>21</sup> Xirâ anano tâenseim wâgâ kulâ mâpaunzedylymo watay, mârâ wâgâ kulâma âwaunkymo. Deus xurâ toenzepa ize matomo-ro watay olâ ise, ize ato ara lelâ ise amidylymo – kely Jesus.

*Kodo iajimanâni*

*(Lc 11.34-36)*

<sup>22</sup> Jesus aguely:

– Kânugue mawânâ kytâho kiendyly, iajino oze kytâly. Koendâ kiendyly-ro watay, ânwa iozeno oze lelâ kytâly.

<sup>23</sup> Koendâ kiempyra kurâ-ro watay, tuzase kurâ, iamu duay tâduzato ara. Epy xurâem toenzepa lelâlâ iamu – kely Jesus.

{ “Kânu agâlâ mawânâ kyangahu âsewanily” keze Jesus aguely. Deus ize ato aguiendyse kurâ-ro watay, iozeno lelâ aguienkyly. Arâ aguiendyseba kurâ-ro watay, iozeno keba kulâ aguienkyly. Toenzepa ise kydâsenagazedily, aguehobyry kieinwâmpyra kurâ-ro watay. }

*Deus lelâ kieinwântaymaba kurâ, toenzepa âdydo imeom ize lâpylâ kurâ watay*

*(Lc 16.13; 12.22-31)*

<sup>24</sup> Jesus aguely:

– Azagâ tywymâgueim kurâ watay, nuduwâpyra azakâlâ agueho aguienkyly; tokalâ âdylâ aguiendyse, eagonro âdylâ aguiendyse lâpylâ. Aituo tokalâ aguehobyry lelâ aguienkyly. Arâ lâpylâ Deus ize, toenzepa tydinherugu ize waunlo modo Deusgue lelâ iwymâgoem nudupa awyly – kely Jesus.

\* 6:13 Idânârá livru saguho modo wâgâ iwenibyemba xirâ.

<sup>25</sup> — Warâ âyanmo auguely. Tâseguâdâzeba itaungâ pyni wâgâ, okumo wâgâ warâ, âiguepa mitomoem. Itymo owogonromo wâgâ tâseguâdâzeba itaungâ. Pyni keba, okumo keba, âtâ tâjiwogonro keba warâ tywyneim kuru. Deus ize matomo xuduze lelâ âpynirimo, itymo owogonromo warâ.

<sup>26</sup> Etaungâ atâingâ konopio modo. Typiembamo. Typyniry netâbyramo, nekaunâbyramo, netadâbyramo etary odaji warâ wâne. Deus olâ ipynirimo tuduze. Deus xurâ âmaemo. Tawâguneim modo ipyniry tiunduho ara, âyanmo xuduze lâpylâ.

<sup>27</sup> Mâungukedânrymo wâgâ tâseguâdâzeba itaungâ. Âdara âiguelymo wâgâ tâseguâdâzeba itaungâ. Kyigueho odaji ituo, kyiguepa kitoem aguiantaymba kurâ. Deuslâ kyigueho xutuim.

<sup>28</sup> — Mâzetydâdomogue, mâpâgudâdomogue warâ tâseguâdâzeba itaungâ. Etaungâ poji anano tadawanku. Nâsewanibamo, tâty tywogonro tianâtomoe. Kâdâkerâ nawâpyramo tâty tywogonro adientomoem warâ wâne. Deuslâ olâ iwâkudâni.

<sup>29</sup> Kydamu Salomâo toenzepa âdypeom myakâwândy, toenzepa lelâlâ. Iwâkuru modo myakâwândy ety iwogonro. Poji anano sawanku olâ Salomâo ety iwogonro takaze kuru tywâkurein-ro warâ.

<sup>30</sup> Iweâpa nîpyra olâ awârâ poji anano sawanku. Iwerâ koendâ, tywâkure warâ, kopaelâgâem ipa, iladybyem lelâ, peto emanâdoem âieholy lelâ warâ. Awârâ sawanku tâense Deus; nhesemo lâpylâ. Itymo owogonromo xuduze. Mâinwâmpyra olâ âmaemo!

<sup>31</sup> — Tâseguâdâzeba itaungâ. “Âdykâ kaise xina typyniry, toku, tâty tywogonro warâ nhedyly?” tâkezeba itaungâ.

<sup>32</sup> Deus einwântânry modo typynirimo, tokumo, tâty tywogonro modo wâgâ warâ kulâ inanry âtynanâdylimo. Âmaemo olâ, awârâ wâgâ tâtynanâzeba itaungâ. Tunwyn-em âmaemo Deus kaynonroque. Tutuze mâkâ idânârâ ize matomo. Âpynirimo, okumo, itymo owogonromo, awârâ modo xuduze lelâ.

<sup>33</sup> Awlylygue âwymârymo Deus ize ato modo waunroem aietaungâ. Mâkâ ize ato wâgâ waunroem mâpaunzeduomo, idânârâ ize matomo xuduze Deus — kely Jesus.

<sup>34</sup> — Tâseguâdâzeba itaungâ kopaelâgâ ainigue. Kopaelâgâembaba mawânkâ Deus tynynonro modo nhedyly. Mâseguâdâdomogue kulâ mâpaunzedylimo watay, adakaladâze âmaemo — kely Jesus.

## 7

*Ânguy kienwentâbyra kine  
(Lc 6.37-38,41-42)*

<sup>1</sup> Jesus aguely:

— Ânguy kâzewentâdaundâ, Deus iwentâbyramo itoem lâpylâ.

<sup>2</sup> Âkelomoram mâundulymo ara lâpylâ ise Deus âyanmo nhuduly. Imâem mâundulymo watay, imâem lâpylâ ise Deus nhuduly. Imâemba watay, imâembalâ ise nhuduly warâ.

<sup>3</sup> Agonromo tâwentâze âmaemo, âdiempa inakanhe aitobyry wâgâ kulâ, âmaemo olâ inakanhe kuru aini. Koendonro mâkeba awârâ. Agonro âzenupialodobyry lelâ mâenkylymo, inumo odano se iwatary imâsedo pylâ mâempyra âmaemo-ro myara.

<sup>4</sup> Agonromo âzenupialodobyry etyze myguewâdylimo, inumo oday se iwatarybe awlyly umelâ.

<sup>5</sup> Saguhoem wao inumo odano se iwatary etywâdaungâ, koendâ agonromo âzenupialodobyry mâentyhomoem. Koendonro emyenro wâne âmaemo, inakanhe kulâ olâ amidylimo! Saguhoem kuru wao inakanhe amidylimo imowâdaungâ. Inakanhe amidylimo mâinmopygueduomoma ise tâwâlâ agonrodo mâunrudylimo, inakanhe anipyra itoem.

<sup>6</sup> — Deus itaumbyry egatuly izepaom modo tindadyseba awlyly umelâ aguehonly watay, tindadyseba inkâba, Deus itaumbyry iweniby kaxoroam samely waunlo ara kulâ. Amyguelymo watay, kaxoro ara otoguyzemo, nhâsemo warâ. Tuhu tâwâenseim pâsega nhakabeoem samely myara kulâ ise amyguehomobyry — kely Jesus.

*Ize kydato Deusram kyzekane  
(Lc 11.9-13)*

<sup>7</sup> Jesus aguely:

— Ekadaungâ. Mâenkaduomo, emakeze lelâ âmaemo. Xuiwâtaungâ. Mâwinduomo, soenkeze lelâ âmaemo. Pyantaylâ âtâ sodo igâsedaungâ, enahungueze lelâ mawânkâ.

<sup>8</sup> Idânârâ ekanibyry modo emakeze. Xuirimpyry modo soenkeze. Âtâ sodo pyantay tygâsenibyryram enahungueze.

<sup>9</sup> Âmerymo turu nhekaduo, tuhu mâunduwâpyra âmaemo.

<sup>10</sup> Kanra ájihuyby nhekaduo, ágâu mâunduwâpyra âmaemo eoduem.

<sup>11</sup> Inakai wâne âmaemo, iwâkuru modo olâ âmerymoram mâundulymo. Kunwym kaynon-roma kuru koendonro-ro; koendonro modo xuduze ekanibyry modoram!

<sup>12</sup> – Âkelomo agâ koendâ itaungâ, agâmo koendâ awyse matomo ara. Xirá aguely mawânâ Moisés inweniby, akaemo Deus wâgâ aguewâni modo konomedâdobyry warâ – kely Jesus.

*Aguipa kulâ ise Deus eydâ atoram idâwâni modo*  
(Lc 13.24)

<sup>13</sup> Jesus aguely:

– Agui lelâ yeinwândysebaom modo tâwâlâ ize tato ara kulâ adâidyse awylymo; Deus ize ato ara adâidysebamo. Pyanta tâtaydygueim oze tâgawândyse awylymo, ânwa tâtaydygueim oze tâtâdyse awylymo warâ. Awylygue ise tâdâsenagazedoram kulâ idâlymo, Satanâs eydâ atoram. Akaemo araba itaungâ. Yeinwântaungâ, pyanta tâtabigueim oze egawâni ara.

<sup>14</sup> Ton-honreim olâ awârâ ânwa tâtabigueim oze tâdâtâly, pyanta tâtabigueim oze tâzegawândyly warâ, myara lâpylâ aguipa kulâ Deus eydâ atoram idâwâni modo, tâwâlâ ájize tawlyly imowâni modo, Deus ize ato ara lelâ aitaynrin modo warâ – kely Jesus.

*Konokuze kulâ “Deus itaumbryr egatuim xina” kewâni modo*  
(Lc 6.43-44)

<sup>15</sup> Jesus aguely:

– Tonomeguelâ itaungâ, “Deus itaumbryr egatuim xina” kewâni modo agâ. Udodo kaneru xuhudugue âzetydâdyby emyenro kulâ akaemo.

<sup>16</sup> Inakanhe aidylymogue olâ ise Deus eynynonro keba awylymo mâuntulymo. Tyguyreim, uvague tâwituneba; kazainwam, figugue tâwiseba warâ. Tâwilygue lelâ mawânâ nady modo ewitu.

<sup>17-18</sup> Se takyguenry, koendâ lelâ ewily, ein-hoem tuduze. Se takygueim, inakanhe lâpylâ ewily, ein-hoem nudupa.

<sup>19</sup> Se koendâ tâwisenry satâly lelâ. Peto onwanji samely-ro warâ.

<sup>20</sup> Warâ ise ânguy Deus wâgâ koendâ aguenri, ânguy konokuni warâ awyly, mâuntulymo aidyly wâgâlâ – kely Jesus.

*Idânârâ inkâba ise Deus pymâem atoram tâdâtâly*  
(Lc 13.25-27)

<sup>21</sup> Jesus aguely:

– Deus aguehobyry ara aini modo lelâ ise Deus eydâ atoram idânri. Toenzepa kurâ domodo yam, “Pymâ, pymâ” kewâni modo, kewâdylymo kulâ olâ. Pabai kaynonro eydâ atoram nâtâwâbyramo ise, Deus aguehobyry ara anipyra awylymogue.

<sup>22</sup> Xypyry etay, “Jesus eynynonro xina” kewâtyby modo warâ ise yam aguelymo: “Pymâ, Deus itaumbryr xina egatuwâm on-honrugue. Toenzepa kadopâ modo xina egaseânâ, toenzepa adyesenry modo warâ xina aiemâ on-honrugue” kezemo yam.

<sup>23</sup> Warâ olâ ise eyanmo aguely: “Âtuwâbyramo urâ. Ydâpa itaungâ, âmaemo inakanhe aitaynrin modo!” keze lelâ urâ – kely Jesus.

*Deus aguehobyry ara lelâ aini, aguehobyry araba aini warâ*  
(Lc 6.47-49)

<sup>24</sup> Jesus aguely:

– Deus itaumbryr indadyly, aguehobyry ara aidyly waunlo uguondo tonomegueim, tuhu wâgâ tâty itânibyry emyenro.

<sup>25</sup> Toenzepa kopâ ihugueduo, paru inwenly. Sapezenru ton-honre kehoem âtâ onwa idâly. Mârâ âtâ olâ nihugueba, tâhugane kehoem tuhu wâgâ itâdyby awylygue.

<sup>26</sup> – Deus itaumbryr idani, aguehobyry ara aniempyra olâ waunlo uguondo sagunu wâgâ tâty itâni emyenro kulâ.

<sup>27</sup> Toenzepa kopâ ihugueduo, paru inwenly. Ton-honre kehoem adapezeinly âtâ onwa. Aituo âtâ ihuguely. Idânârâ kehoem adakalaguely, tâhuganeba itâdyby awylygue – kely Jesus.

*Adâkeho tutuze lelâlâ Jesus*

<sup>28</sup> Jesus aguepygueduo, toenzepa myani kurâ domodo âsewâni, arâ tâzenomedâoduomo.

<sup>29</sup> Aguelymo:

– Adâkeho tutuze lelâlâ awâkâ uguondo! Ton-honruguelâ awâkâ aguely, akaemo Moisés inweniby wâgâ enomedâni modo ara inkâba – kelymo.

## 8

*Jesus uguondo tājimitugueilygue tāwāneim kua nhetobyry*

*(Mc 1.40-45; Lc 5.12-16)*

<sup>1</sup> Iwy wāgāpa Jesus xytāguily. Toenzepa myani kurā domodo nhapygue awily.  
<sup>2</sup> Aituo myani uguondo iopaji saindyly. Jesus enado āzeguhoam idily, tynrense tawily tienehon-hoem. Tājimitugueilygue tāwāneim myani mākā. Aituo Jesusram aguely:  
 – Pymā, kua yese ton-honre mawily, xutuanze. Kua yedyse āmā watay, kua yekā wao – kely.

<sup>3</sup> Jesus tāmārygue MĀ' nhedyly. Eyam aguely:

– Kua āedyse urā. Tāwānepa āmā iweāma. Kua āetai – kely.

Ilāenlā kehoem kua idily. Iwāgā pinuri peba idily, itugoenzely warā.

<sup>4</sup> Eyam aguely:

– Idakā. Iweāma tāwālā idā. Ānguyran-ne xirā kua āetobyry kāzegatu – kely.

– Kurādo eynynā Deus agā agueinram āzehora, kua itybyem mawily nhetoem. Kua itybyem mawily kurādo nhetoem, Deusram ādylā xudugā, kāzewenryem Moisés inweniby agueho ara – kely Jesus.

*Jesus sodadu domodo iwymāry agā tāwāneim ewānu ume kua nhetobyry*

*(Lc 7.1-10)*

<sup>5-6</sup> Jesus idāly xidadā Cafarnaumram. Saimpygueduolā kehoem myani sodadu domodo iwymāry idāly eyam. Aituo aguely:

– Pymā, tārā ietydā yagā tāwāneim toenzepa ewānu. LYK itoenlā nudupa. Toenzepa āpyneāndily. Kua mānhedyse wāne urā – kely.

<sup>7</sup> – Idāze urā itynra, kua iese – kely Jesus.

<sup>8</sup> Tārā endaylā Jesus mākā tāwāneim kua iese ton-honre awily tainwānse olā myani mākā uguondo. Aituo myani aguely:

– Pymā, ādy mākēba urā, ietyram māvāntoem. Toenzepa ton-honreim āmā. Iwague endaylā yagā tāwāneim kua itoem amyguely watay, kua ise lelā mākā – kely sodadu iwymāry.

<sup>9</sup> – Ywymāry modo aguely tainwānse urā. Tyzodadugue lāpylā urā, yeinwānni modogue warā. Kāingonotuo, tātāze lelā. Eagonro kāingāseduo, tāese lelā warā. Yagā tāwāneinram “Xirā aiekā” ugeduo, inepa adyese lelā warā – kely myani cem sodadu domodo iwymāry.

<sup>10</sup> Awārā tindatuo myani Jesus toenzepa kehoem āsewānily, mākā sodadu domodo iwymāry toenzepa tainwāndily tiuntuduo. Aguely mākā kurādo tyampygueni modoram:

– Eagā tāwāneim kua kānhedyly tainwānse mynra merā uguondo. Ānguy yeinwānni kāentaymā urā merā Roma donro yeinwānto ara kehoem. Kypemugudo israelita domodo duay kuru ānguy yeinwānni lāpeba merā ara! – kely.

<sup>11</sup> – Enanāgüewādaungā xirā. Toenzepa ise israelita domodo keba ewy Deus pymāem atoram idāim. Xixi egaseho eynynonro modo, egawānto eynynonro modo warā kehoem ise ātādyguilymo Deus pymāem atodā. Toenzepa ise āzetyguedilymo, iomarumo warā, kydamudo Abraão, Isaque, Jacó akaemo agā.

<sup>12</sup> Tālā olā ise toenzepa kypemugudo israelita domodo ewy Deus pymāem atoram idādānry, yeinwāmpyra awilymogue. Iamu odaxi ise adameolyo, toenzepa kehoem āsenagazedomoem. Toenzepa ohogüenzemo, tyery saguzemo warā, tāsēnagazedilymogue – kely Jesus.

<sup>13</sup> Jesus aguely sodadu iwymāryam:

– Idā ityam. Agā tāwāneim kua kānhedyly; meinwāntaima. Aituo enra kua kānhedyly – kely.

Jesus aguely umelā myani sodadu iwymāry agā tāwāneim kua idily lelā tārā.

*Jesus tawānuneim modo kua nhetobyry*

*(Mc 1.29-34; Lc 4.38-41)*

<sup>14</sup> Sodadu modo iwymāry agā ātunāguedybyem myani Jesus idāly Simāo Pedro etyram. Saintrybyem myani Simāo imenhundu tāwāne, toenzepa kehoem iaturu kely indadyly.

<sup>15</sup> Jesus tawāneim eguetonra idāly. Emary wāgā nhawādyly. Ilā umelā kehoem myani kua idily; tyatureba idily, pekodo saudyly, ipynirimo aiese, āwinduatomoem.

<sup>16</sup> Iguampygueduo myani kurā domodo kadopāgue taseim modo, tawānuneim modo warā Jesusram nhadylymo. Kadopā kurā domodo odaypa egasehoem, tawānuneim modo kua itoem warā aguely. Aituo kadopā modo egasewādyly, idānārā tawānuneim modo kua itaynly warā.

<sup>17</sup> Warā myakāwāndy Deus itaumbry egatuumbyry Isaías aguely iwāgā:

“Mākālā kāwānu kua ieni,

kydāpyneāndo etynri warā”



kewândymy.

Jesus kurâ domodo kua nhetuo, Isaías aguehobyry aralâ aidyly.

*Jesus kieinwândyly-ro watay, kieinwândyly kinmopa kine  
(Lc 9.57-62)*

<sup>18</sup> Alâ myani Jesus toenzepa kurâ domodo nhedyly, taynâ, tâynâ warâ kehoem. Tynynonro modo agâ kulelâ tidyse lâwâne myani. Aituo eyanmo aguely:

– Kydâzêkuâne paru kuyam – kely.

<sup>19</sup> Egaselymo iraynâ kehoem olâ myani Moisés inweniby wâgâ enomedâni saindyly. Jesusram aguely:

– Pymâ, âynynonroem widyse urâ. Âdyam mydâhobyryram idâze lelâ urâ, agâ kâsenomedâdoem – kely myani.

<sup>20</sup> Jesus aguely:

– Ton-honre ise enra. Idânârâ ânguydo imeom tâjikune lelâ xkykhobe warâ; poroho, tawâguneim modo warâ tâjikune lelâ. Urâ, Uguondo Kaynâpa Âetyby olâ, iekobyzeguehoenlâ tâtyemba – kely.

<sup>21</sup> Aituo eagonro uguondo koendâ kehoem Jesus aguely idanipyry aguely:

– Pymâ, saguhoem pabai ugueho wao ise kâenkyly, niguepa awyly ara. Igueduo, epyâbygueduo ise âynynonroem widyly – kely.

<sup>22</sup> Jesus olâ eyam aguely:

– Iweâ lelâlâ âekâ ynynonroem. Yeinwântânry modo igueypy ara kulâ, iazeontoem Deus aniempyra awylygue. Xirâ anano wâgâ kulâ âtynanâdylymo. Xirâ onro anano modo wâgâ âtynanâni modolâ igueypy nepyâdâ – kely myani.

*Jesus sapezenru ton-honreim, kopâ tyelugueim agonro nhepagunâdobyry  
(Mc 4.35-41; Lc 8.22-25)*

<sup>23</sup> Akaemo azagâ uguondo agâ agueypyem myani Jesus tynynonro modo agâ paruum idâly. Pepi odaxi âxiedyly, paru tienkuâdomoem.

<sup>24</sup> Mârâ paru imâsedo tuotagueze ataymo kehoem myani kopâ sapezenru ton-honreim agonro adaguly. Ton-honre kehoem myani sapezenru paru nhahugânyly. Parugue pepi adapadyly warâ. Jesus olâ myani xkykylâ lelâ.

<sup>25</sup> Aituo eynynonro modo nhuagueândyly, adaenkelymo warâ:

– Pymâ, âwaguegâ! Aukâ! Kâmakegârâ. Kyguely ise xirâ! Pepi xytyzeaji xirâ! – kelymo.

<sup>26</sup> Aituo myani tuagueântuo, Jesus eyanmo aguely:

– Tâseanezeba itaungâ. Imakezemo ton-honre wawyly mâinwâmpyra lâgâlâ ianumo – kely.

Aituo saudyly. Ton-honre kehoem aguely:

– Arâ kehoem tadapezeinzeba ikâ! – kely sapezenruram.

– Tahugâneba ikâ! Ipagugâ! – kely paru sahugânuram warâ.

Agueduo, tapezenremba idyly, paru tahugâneba idyly warâ.

<sup>27</sup> Toenzepa myani âsewânilymo, âseguâdâdylymo warâ. Aituo aguelymo:

– Etaungâ! Sapezenru nadapezeimba itoem adyese. Paru tahugâneba itoem adyese warâ. Ânguy kuruka awâkâ eon-honru xudunri, awârâ modo anhetoem? – kelymo.

*Jesus azagâ uguondo kadopâgue taseim modo kua nhetobyry  
(Mc 5.1-20; Lc 8.26-39)*

<sup>28</sup> Jesus tynynonro modo agâ saindyly paru Galiléia kuyam, Gadararam\*. Târâ myani azagâ uguondo kadopâbeom modo agâ oxiodylymo. Tâdâzepyâdodâpa myani idâlymo, târâlâ âxidâdybyem tawlymogoue. Kâmayno, tytazeim warâ myani akaemo. Mârâ âji einkâ sakani modoram tâdytaozemo mykâinane.

<sup>29</sup> Jesus tientuo myani ago kehoem adaenkelymo:

– Xina kâdynanâdâ, Deus imery. Xina âsenagazedo naimpyralâka xina enagazeze mâewyly? – kelymo.

<sup>30</sup> Tâlâ myani târâ iwaguepa toenzepa pâsega âwinduani modo.

<sup>31</sup> Aituo kadopâdo aguely Jesusram:

– Xina mânhânkyduo, awâkâ pâsega modo iodaxilâ xina igonokâ – kelymo.

<sup>32</sup> Aituo Jesus aguely:

– Tâwâlâ, idâwâtaungâ – kely.

Agueduo, kadopâ modo akaemo uguondo modo odaypa egasewâdyly. Pâsega modo iodaxi egawândylymo. Kadopâbeo taituo myani pâsega modo enuimbadaynyly. Egatudylymo. Iwly wâgâpa paikaji adamunedylymo. Idânârâ kehoem tyense, iguwâdyly.

\* 8:28 Gerasa lâpylâ myani mârâ âji ezekeho.

<sup>33</sup> Pâsega eni modo iwy wâgâpa pâsega paikaji adamunedily tâensemo myani. Mârâ aidily tientuo, âwenkelymo. Inepa kehoem idálymo xidadâram. Xidadâ odaxi taintuo tonlo modoram tientyby nhegatulymo. Tâgatuzemo lâpylâ myani Jesus kadopâ modo nhânkyhobyry.

<sup>34</sup> Arâ egary tindatuomo, idânârâ kehoem mârâ xidadâ odano modo Jesus agâ oxioze idálymo. Toxioduomo, aguelymo eyam:

– Âxigugâ xina ety anaymba. Taynynâ inkâba ikâ – kelymo Jesusram, tâguy pâsega nhaindyseba tawylmogue.

## 9

*Jesus adakobâdânry kua nhetobyry*

*(Mc 2.1-12; Lc 5.17-26)*

<sup>1</sup> Îlâpygueduo myani Jesus tynynonro modo agâ paruum idály. Pepi imâsedo odaxi âxiedylymo, paru tienkuâdomoem. Âzekuâdybyem, tyjidadâry Cafarnaumram saindily.

<sup>2</sup> Tonlo modo ewy uguondo adakobâdânry nhadylymo sawo wâgâ, Jesus kua nhetoem. Kua nhedyly tâinwânsemo awyly tiuntuduo myani Jesus aguely tâwâneinra:

– Ton-honre ikâ. Idânârâ inakanhe amitobyry modo xygakeagui – kely.

<sup>3</sup> Moisés inweniby wâgâ enomedâni modo Jesus aguely tindatuo, tâpaunzemo myani.

– Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidyse awyly kulâ! – kelymo.

<sup>4</sup> Tutuze olâ Jesus âdy nhangahumo oday xunârymo awyly-ro warâ. Aituo aguely:

– Arâ ywâgâ tâpaunzezeba itaungâ. Unâguedaundâ – kely.

<sup>5</sup> – Merâ adakobâdânryam: “Idânârâ inakanhe amitobyry modo xygakeagui” uguely-ro watay, mâuntuwâbyra ise âmaemo âkealâ, âkealâba warâ auguely awyly. “Aukâ. Adakobâgâ” ugueduo, adakobâdyly-ro watay olâ xutuze âmaemo ton-honre wawyly!

<sup>6</sup> Merâ koendâ adakobâdyly mâentuomo, xutuze âmaemo, kurâ domodo inakanhe aito xygakeze ton-honre wawyly urâ Uguondo Kaynâpa Âtyby – kely Jesus.

Aituo adakobâdânryam aguely:

– Aukâ. Iguetudobyry sanâkâ; adakobâgâ; idâ itynra – kely.

<sup>7</sup> Aguely umelâ kehoem kua idyly. Saudyly. XYDYK idyly. Adakobâdyly. Tâtyram idály.

<sup>8</sup> Mâkâ aidily tientuo kurâ domodo âsewânylymo, âseanedilymo warâ. Aituo myani aguelymo:

– Koendonro, ton-honreim warâ Deus, awâkâ uguondo tâwânuneim modo kua nhetoem eon-honru nhuduhobyry wâgâ! – kelymo.

*Jesus Mateus tynynonroem itoem ingâsedobyry*

*(Mc 2.13-17; Lc 5.27-32)*

<sup>9</sup> Adakobâdânry kua tiempygueduo myani Jesus târâpa âxiguely. Tadakobâday myani Jesus iedyly, urâ Mateus. Pymâ Roma donro xurâem dinheru impostu epywadoobyry emakerim urâ. Târâ dinheru kâenmakezezedodâ ekadybyem wawyly ume ani Jesus yam aguely:

– Yagâ âekâ. Ynynonroem ikâ, yagâ mâsenomedâdoem – kely.

Aituo yaudyly. Jesus agâ udály, eynynonroem witoem.

<sup>10</sup> Kopae ietydâ âwinduatoem kâingâsedyly. Aituo Jesus ietyram idály. Xina âwinduadyly ume, yataen-ho modo ewy saindilymo, impostu epywado emakewâni modo. Kurâ domodo saindilymo lâpylâ, inakanhe tâgaruneim modo. Xina agâ ekadylymo, tâwinduatoem.

<sup>11</sup> Fariseu domodo ewy Jesus xina agâ âwinduadyly tientuomo, Jesus eynynonro modoram aguelymo:

– Kâzewenry araba kulâ awâkâ âwymârymo Jesus aidily! Dinheru impostu epywado emakewâni modo agâ, kurâdo inakai modo agâ warâ nâwinduapyra tâise awâkâ! – kelymo.

<sup>12</sup> Aguelymo tindatuo Jesus eyanmo aguely:

– Deus wâgâ auguehoem uirimpyrylâ asaemo. Tâwânuneim modo mawânkâ kua tyeni xuirim, tâwânunenry modo keba.

<sup>13</sup> Deus itaumbry awo wâgâ iweniby mâuntuba lelâ kuruka âmaemo: “Ânguydo imeom xyâly, iaduândyly mâkeba ize kuru wato, kurâ domodo âjigie koendâ awyly” kewândy Deus. Koendâ âpaunzezungâ, âdakeze aguely awyly mâuntuhomoem. Inakanhe aita ynrim modo igâseze kâewyly. Inakanhe aitânry modo igâseze inkâba xirâ kâewyly – kely Jesus.

*Saguho kiuntuyby kyjimonre, iwelo kiuntuhoem*

*(Mc 2.18-22; Lc 5.33-39)*

<sup>14</sup> Aituo João Batista eynynonro modo ewy saindilymo, Jesusram aguelymo:

– Xina João Batista eynynonro modo, fariseu domodo warâ xina nâwinduapyra tâise inanry, Deus agâ adâkehoem. Âynynonro modo olâ nâwinduapyra nipyramo, Deus agâ adâkehoem. Adaituoka xina aito ara anipyra awylymo kâzewenry agueho ara? – kelymo.

<sup>15</sup> Aituo Jesus eyanmo aguely:

– Eagâmo watay, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehoem. Todohogüin-horam igâsedaymby modo ohogüinrim agâ tatay, nâwinduapyra nitaymbamo, etygumo lelâ. Ohogüinrim tuduaypa ituo lelâ nâwinduapyra idylymo myara – kely.

<sup>16</sup> Jesus aguely:

– Âtâbâ adauguehobyry tawentâzeba âtâ iwelo sapidubygue. Âtâ sawentâdobyry tukuiduo, odopâduo, tadaugueze mawânâ âtâbâ.

<sup>17</sup> Tâjituby vinhu etaryem xygatyby iwelo keba odaxi vinhu iwelo tâkanâduneba. Tâjituby iwelo keba odaxi ekanâduo, etary tadaugueze mawânâ. Aituo vinhu apâdyly. Aypa olâ, vinhu iwelo etaryem tâjituby iwelo xygatyby odaxilâ ekanâdyly watay, vinhu nhewantuo, imâem ituo warâ, tâjituby iwelo tâzepâgueze. Etary, vinhu alelâ nâxiumebyra – kely Jesus.

{Jesus aguely, saguho konomedâdobyry kinmoheom, iwelo konomedâdo kieinwântoem warâ. Saguhobyry mawânâ nâseinwâmbyra iwelo agâ.}

*Jesus pekodo tâwâneim kua nhetobyry, âwynsaundo igueypy kurâem nhetondobyry warâ (Mc 5.21-43; Lc 8.40-56)*

<sup>18</sup> Jesus eyanmo aguely ume myani uguondo âtâ tâdâtâdygyuho iwymâry Jesus iopaji saindyly; âzeguhoam idyly enado. Aguely:

– Inoro wao ietyam. Iexiryze nigueaki. Nhonwa imary MÂ' ieta wao, kurâem itondoem – kely.

<sup>19</sup> Aituo Jesus eagâ idâly. Xina Jesus eynynonro modo tâtâze lâpylâ ani eagâ.

<sup>20</sup> Pymâ etyram xina idâly ume, pekodo tâwâneim Jesus ikaynâ saindyly. Imery etary myani âunkeim; kuapa idyly agâ toenzepa myani iunu ihuguely, toenzepa lelâlâ. Doze anupe myani mâkâ arâ ewânu. Eyam taintuo, ety MÂ' nhedyly, ikaynâlâ.

<sup>21</sup> Warâ tâpaunzeduo myani aidyly.

– Etylâ MÂ' kânhetuo, kua yese lelâ – tâkeduo.

<sup>22</sup> Tâty tywogonro MÂ' ietuo, Jesus MYRYK idyly. Pekodo nhedyly. Eyam aguely:

– Tyanepa ikâ. Kua ietybyem âmâ, kua kyetâ wawlylâ mâinwântobyry wâgâ – kely.

Aguely umelâ kehoem myani pekodo kua idyly lelâlâ.

<sup>23</sup> Ilâpygueduo ani xina idâly lelâ. Pymâ etyram xina saindyly. Saintrybyem, âguedy tuhu esagueyby odaxi etadâdo eremu xina indadyly. Idânârâ ani tonlo modo eogunrumo, âpyneândylymo warâ, âwynsaundo igueypyem lelâlâ awylygue.

<sup>24</sup> Aituo ani Jesus eyanmo aguely:

– Igasewâdaungâ wao. Niguwêapyra awâkâ âwynsaundo; xykyly kulâ – kely.

{Arâ aguely, kurâem tientondyly tiuntuduo.}

Arâ aguely tindatuomo, nheinledylymo. Igueypyem lelâlâ awyly tiuntuduomo, nâepaigueba awylygue.

<sup>25</sup> Egasebygueduomo, Jesus idâly igueypy eguetunâdobyryram. Egawântybyem Jesus âguedy emary wâgâ nhawâdyly. Ilâenlâ kehoem kurâem nhetondyly, kama wâgâpa saudyly idyly.

<sup>26</sup> Idânârâ âtâ anary iwaguepaom modo Jesus âwynsaundo kurâem nhetondobyry egary tydasemo myani.

*Jesus azagâ epy kua nhetobyry*

<sup>27</sup> Jesus agâ târâpa xina âxiguely ume, azagâ epy xina nhapygue idâly. Warâ adaenkelymo: – Xina tytyenzelâ ikâ, Jesus. Pymâ ton-honreim âmâ, âdamu Davi ara! – kelymo.

<sup>28</sup> Jesus âtâ tâxidâdobyryram saintuo azagâ epy modo eagâ egawândyly. Iopaji saindylymo. Jesusram adapâigueolyomo:

– Tâinwânse lelâlâka âmaemo, kua âenimoem wawlyly? – kely.

– Tâinwânse xina, Pymâ – kelymo.

<sup>29</sup> Aituo Jesus enumo onwa tâmary MÂ' nhedyly, kua tientomoem.

– Kua âedyly; tâinwânse mawlymogyem kua midylymo – kely.

<sup>30</sup> Aguely umelâ kehoem epyemba idylymo. Kua tiempygueduomo, Jesus eyanmo aguely:

– Awitobyry ânguyram kâzegatuwâdaundâne! – kely.

<sup>31</sup> Tâtâdaymo olâ mâkânra lelâba nhegatulymo Jesus kua tyetobyry.

*Jesus tytarenry kua nhetobyry*

<sup>32</sup> Azagâ epy kua ityby idâpygueduomo, kurâ domodo ewy uguondo tytarenry nhadylymo. Nâjitaimba mâkâ uguondo, kadopâram nâjitaimba âiehoypyem awylygue.

<sup>33</sup> Jesus mâkâ iodano kadopâ egasehoem agueduo, uguondo koendâ âjitaibly adaguly. Idânârâ kurâ domodo âsewânilymo. Aituo aguelymo:

– Âdykâ Israeldâ uguondo kadopâbeom kua ieni xina netaymba, Jesus anheto ara! – kelymo.

<sup>34</sup> Fariseu domodo enanaji olâ Jesus aidyly Deus eon-honrugueba.

– Kadopâ modo iwymâry eon-honrugue kulâ awâkâ kadopâ modo nhegaseândyly – kelymo; kewâdylymo kulâ olâ.

*Jesus kurâ domodo intyendobyry*

<sup>35</sup> Idânârâ âtâ anakâ ani Jesus adakobâdyly. Âtâ tâdâtâdygyuho odakâ kurâ domodo nhenomedâdyly. Unâ iwâkuru nhगतuly, âdara Deus idânârâ kurâ domodo iwymâryem idyly wâgâ. Âdaunlo tâzewânugue tâwâneim modo kua tyese lelâ ani.

<sup>36</sup> Tadakobâdodâ Jesus toenzepa kurâ domodo nhedyly, kaikâem kulâ. Tientuo, toenzepa intyendylymo, âseguâdâdylymogue, itynrumogue warâ, kaneru todonenry ara kulâ awylymogue.

<sup>37-38</sup> Aituo xinaram aguely:

– Etaungâ kurâ domodo. Koendâ tâise Deus itaumbry nhutulymo. Aguipa kulâ olâ egatuim modo. Deusram ekadaungâ, agui kurâ ingonotoem tywâgâ agueze. Urâem, asaemo kurâ domodo mârâ etâdyby sahuadyby tâkaunâzeim ara, ekaunâni modo olâ ipa myara – kely Jesus.

## 10

*Jesus tynynonro modo eon-honru nhuduhobyry*

(Mc 3.13-19; Lc 6.12-16)

<sup>1</sup> Aituo Jesus xina doze lelâ tinduakeyby modo indâtygyuly. Xinaram aguely:

– On-honrumo kâunduly, kadopâ mânhânkyhomoem, tâwânuneim modo kua mânhetomoem warâ – kely.

<sup>2-4</sup> Induakeyby modo ezedy xirâ, tywâgâ aguenriem:

Waunroeno Simão (Pedro kelygue tâzekeim)

André (Simão iukono)

Tiago, João warâ (Zebedeu imeombry)

Filipe

Bartolomeu

Tomé

Mateus (Levigue tâzekeim lâpylâ urâ, saguhoem dinheru impostu epywado emakerimbyry)

Tiago (Alfeu imerybyry)

Tadeu

Simão (tâty anary izetonro lelâlâ tawylygue, Roma donrogu tywymâgu izepaom)

Judas (Queriotte donro, Jesus egamenribyry izepaom modoran-ro warâ)

Warâ ani xina doze lelâ, Jesus induakeyby modo.

*Jesus tynynonro modo Deus wâgâ unâ iwâkuru egatuze ingonotobyry*

(Mc 6.7-13; Lc 9.1-6)

<sup>5</sup> Deus xunâry egatuze ani xina âjigonoholy. Xina idâly iraynâ, Jesus aguely:

– Judeu keba modo ety anaxi tâtâzebane itaungâ. Samaria eynynonro modo ety anaxi tâtâzeba itaungâ warâ.

<sup>6</sup> Kypemugudoram lelâ Deus itaumbry egatuwâdaunda, Israelita modoram. Kaneru zuzatyby ara kulâ akaemo.

<sup>7</sup> Warâ ise amyguelymo: “Inepa ise Deus kurâ domodo iwymâryem idyly” myguelymo.

<sup>8</sup> Tâwâneim modo kua ietaungâ. Tâjimitugueylygue tâwâneim modo kua ietaungâ. Igueypy modo kurâem ietondaungâ. Kurâ domodo kadopâbeom modo kua ietaungâ warâ. Awârâ modo amânhetomoem tâbyguepa on-honrumo kâunduly. Awylygue kadopâbeom modo, tâwânuneim modo warâ kua ietaungâ, tâbyguepalâ.

<sup>9</sup> Mydâdaymo âdylâ manâtomoem ouru, prata, dinheru, awârâ modo kadataundâ.

<sup>10</sup> Owosarymo kadataundâ. Âgamizarymo, âhurumo etary warâ mâungukehomo kadataundâ. Amatagorumo ânwa oze mâzesebydâdomoem kadataundâ lâpylâ warâ. Tâwaneim mawânkâ âdy ize tato tâmakeze lelâ tâzetoem. Awylygue idânârâ ize matomo ara âdydo imeom âduduoze lelâ.

11 – Âtâ anaxi aintuomo, âdaunlo uguondo koendonro awyly etaungâ, târâ eagâlâ mitomoem. Mâkâ etydâlâ itaungâ, eagonro âtâ anaryam mydâlymo ara.

12 Âdaunlolâ âtâ odaji igawândylymo watay, tonlo modo agâ âsedaenguwâdaungâ. “Deus koendâ nhese” kewâtaungâ eyanmo.

13 Tonlo âtâ odano modo koendâ idaenkulymo, mâengatulymo tindadysemo warâ watay, koendâ ise Deus akaemo agâ awyly. Koendâ idaenkubamo, unâ mâengatulymo tindadysebamo warâ watay olâ Deus eagâmo koendâ itoem kâzekadaundâ.

14 – Mârâ âtâ odano modo, xidadâ odano modo koendâ idaenkubamo, mâengatulymo tindadysebamo warâ watay, inepa târâpa âxiguwâdaungâ. Igasedaymo, âhurumo etary etywâdaungâ, xutolegugewâdaungâ warâ, Deusram tânagazezeim awylymo xutuhoem, ize ato ara anipyra awylymogue, yeinwâmpyra awylymogue warâ.

15 Sodoma donro modo, Gomorra donro modo warâ myakâwândy ânguydo kulâ. Awylygue myakâwândy Deus peto in-hugueândyly nhonwamo adain-homoem. Xypyryem, idânârâ tynynâbanro modo enagazeze. Deus itaumbry mâengatulymo izepanro modo olâ ise Sodoma donro modo, Gomorra donro modo warâ âsenagazedobryr takaze kehoem kuru âsenagazezeni. Xirâ mâuntudyzemo kuru wato – kely.

*Jesus tâdâsenagazedily wâgâ aguehobyry  
(Mc 13.9-13; Lc 21.12-19)*

16 Jesus aguely:

– Ydataungâ. Deus xunâry egatuze ogonodylymo kâmayno modo duaxi, auwa tâwinzeim modo duaxi kaneru igonodyly ara. Âgâu ara, tonomegue itaungâ, kâmaynodâpa tâdâsemaguely mâuntuhomoem. Koendâ olâ itaungâ, papa ara, âdanimô mânhewiâpanânehomba mitomoem.

17 Tonomeguelâ itaungâ. Yizepaom modo awâsemo, yeinwândylymogue. Adahoze âmaemo pymâ modo enadoram, mâzenagazeohomoem. Apiogüen-honzemo âtâ tâdâtâdyguyho day.

18 Yeinwândylymogue, idânârâ pymâ domodoram adahoze âmaemo. “Tumunreim âmaemo” keze akaemo pymâdo, inagazedomoem. Pymâ domodo enado mataymo tâwâlâ ise unâ iwâkuru mâengatulymo âdara imakehomobryr wâgâ judeu domodo iwymâryam, judeu keba modo iwymâryam warâ.

19 Amygüehomo wâgâ tadahulizeba olâ itaungâ, pymâ domodo enadoram madahoduomo. Deus agâmolâ ise. Âurusemo amygüehomoem.

20 Âunârymo wâgâ kulâ inkâba ise amyguelymo, Deus Ispiritury xunâry wâgâ.

21 – Ipemugudomoanlâ ise yeinwânni modo âzenagazeoly. Ipemugumolâ ise pymâdoram egamenrimo, âdyohomoem. Âjiukonoem, âjiwaigoruem warâlâ ise âsegamelymo. Tâjiunwym, tymery agâlâ ise âsegamelymo lâpylâ, âdyohomoem.

22 Ynynonroem mawlylymogue, toenzepa ise mâjiewiâseoly. Âmaemo yeinwândyly imodânry modo olâ âsemagueze, aunloenlâ Deus agâ mitomoem.

23 Mârâ xidadâ eydâ matomodâ ynynonroem mawlylymogue mâzenagazeoduomo, eagonro âtâ anaxi âwientaungâ, târâ ywâgâ amygüehomoem. Auguely âyanmo. Urâ Uguondo Kaynâpa Âetyby odopâze urâ, idânârâ Israel eynynâ âtâ anakâ ywâgâ amyguelymo iraynâ.

24 – Enomedâni mawânkâ tonomedâzeim takazeno. Pymâ mawânkâ tâwaneim takazeno.

25 Tonomedâni eto ara lâpylâ ise âsenomedâni âzeholy. Âwanu sodo ara lâpylâ tâwaneim âzeholy. Ayetomo ara lâpylâ ise amâieholymô. Inakanhe aguezemo ywâgâ. Belzebu eonhonrugue kulâ iewanu nhegaedylymo. Âunâguezemo lâpylâ; inakanhe aguezemo âwâgâmo – kely Jesus.

(Belzebu, Satanâs ezedy eagonro).

*Deus lelâ kydynrene  
(Lc 12.2-7)*

26 Aituo Jesus aguely:

– Ânguy kâdytadaundâ, ywâgâ inagazedilymogue kulâ. Idânârâ soentaymby âjipepanâgueowâze lelâ. Idânârâ koendâ tydasenrybry MON warâ âjidahoze.

27 Âyanmo kulelâ auguehobyry idânârâ kurâ domodoram egatuwâdaungâ. Âmaemo kulelâ mâindatybymogue kurâ domodo xurutaungâ.

28 – Ârinno kâdytadaundâ; igadoprymo âdaunloenlâ adaindânry tyân-hoem ton-honremba mawânkâ. Tâwâlâ lelâlâ wâne inagazedilymo. Ton-honremba olâ Satanâs eydâ tatoram ogonosemo. Deus anhekyly xytadaungâ. Awâkâ kulelâ mawânkâ âigueduomo, Satanâs eydâ atoram ogonosemo ton-honreim.

<sup>29</sup> Idânârâ tâense awâkâ Deus. Etaungâ konopio. Imâem tâwâentuneba konopio. Tokalâ moeda imeimbyry tâwâensenrygue azagâ konopio tadanâhoze. Onro onwa igueypyem nihuguebamo olâ Deus aguehobyry odayba kulâ.

<sup>30</sup> Nhetâmo lâpylâ Deus. Âdara lelâ angahumo wâgâ angahudumo awyly tutuze.

<sup>31</sup> Awylygue tâseguâdâzeba itaungâ. Deus konopio tâense watay, âmaemoma kuru nhesemo lâpylâ. Xurâem, âmaemo tywyneim kuru, konopio modo takaze – kely Jesus.

*“Jesus eynnonro urâ” keze tyanenry modo  
(Lc 12.8-9)*

<sup>32</sup> Jesus aguely:

– Tâjiduay, “Jesus eynnonro urâ” myguelymo-ro watay, “Ynnonrolâ asaemo” keze lâpylâ urâ Pabai kaynonroam, enado mawylymo ume.

<sup>33</sup> Tâjiduay, “Jesus eynnonro keba urâ” myguelymo-ro watay olâ, Pabai kaynonroam, “Ynnonro mâkeba asaemo” keze lâpylâ urâ, enado mawylymo ume – kely Jesus.

*Jesus wâgâ âewiâmunezemo tagonro agâ  
(Lc 12.51-53; 14.26-27)*

<sup>34</sup> Jesus aguely:

– Kâetuo, inakanhe tadawyly, tâdâsegebyly warâ adainly keanra keankâ, inanajimo. Arâpa olâ. Espada iemaym kâenewyly waunlo ara urâ. Ynnonro kebaom modo ynnonro modo agâ âsegebyzemo.

<sup>35</sup> Yeinwândylymogue, âpemugudomolâ ise âewiâsenimo. Tâjimeom tunwym iewiâseze. Tâzexiry tyze iewiâseze. Tâjiweise tymenhundu iewiâseze.

<sup>36</sup> Warâ ise âpemugudomolâ âewiâsedylymo, âkelomo agâmo iewiâky takaze kehoem yeinwândylymogue.

<sup>37</sup> – Ynnonroem midyse mataymo, unwânmo, âzemo, âmerymo, ixiryimo warâ takaze kehoem ywynedaungâ. Yakadâ âdaunlo kurâdo kulâ mâinwynegylymo-ro watay, ynnonroemba ise âutulymo.

<sup>38</sup> Ynnonroem lelâlâ midyse mataymo, ize matomo ara kulâ amidylymo imowâdaungâ. Mâsenagazedylymo umelâ aguely idataungâ, yeinwântaungâ warâ, âiguehomo odaji kehoem, kruz manâdylymo-ro waunlo ara. Arâpa-ro watay, ynnonroemba ise mataunaze.

<sup>39</sup> Tyâzepa mitomoem kulâ, “Jesus eynnonro keba urâ” myguelymo watay, Deus eydâ atoram mydâpa ise âmaemo. “Âdykâ ‘Jesus eynnonro mâkeba urâ’ uguewâpyra ise urâ, tâwâlâ ise kâdyoly” myguelymo watay, Deus eydâ atoram idâze âmaemo, aunloenlâ eagâ mitomoem – kely Jesus.

*Koendonro modo Deus xuduze tynnonro modoram  
(Mc 9.41)*

<sup>40</sup> Jesus aguely:

– Koendâ nhenimo, koendâ iedyly lâpylâ. Koendâ ieni, ugononibyry Deuslâ koendâ nhekyly.

<sup>41</sup> Koendonro xuduze Deus tunâry egatuwâni modoram. Koendonro xuduze lâpylâ olâ tunâry egatuwâni modo emawyadâni modoram. Koendonro xuduze Deus, koendâ aitaynrin modoram. Xirâ koendonro lâpylâ xuduze Deus, koendâ aitaynrin modo emawyadâni modoram, koendâ aidylymogue.

<sup>42</sup> – Âdylâ amânhekyly ynnonro modo emawyadâdoen-ro watay, tâwâlâ wâne parugue kulâ mankuilymo, alâ olâ ise Deusram mâzepywaolyo. Tâwâlâ lelâlâ wâne ynnonro modo âdy keba awyly, alâ olâ Deusram âzeholyo. Xirâ mâuntudyzemo kuru wato – kely.

## 11

*João Batista tynnonro modo Jesus agâ agueze ingonotobyry  
(Lc 7.18-35)*

<sup>1</sup> Jesus xina doze lelâ tinduakeby modo xurudyly ewanikeimbyryem, târâpa idâly, xidadâ modo anakâ Deus wâgâ unâ iwâkuru egatuze.

<sup>2</sup> Kadeia oday myani João Batista, Jesus Cristo egary indadyly. Egary tindatuo, azagâ tynnonro modo ewy ingonodyly Jesusram.

<sup>3</sup> Jesusram taintuo, aguely indadylymo aidyly nhedylymo warâ. João aguehobyry ara Jesus nhapâiguelymo:

– “Deus Ingonotyby âese” kehoerylâ âmâ? Eagonro ise xina inwânwânkyly? – kelymo.

<sup>4</sup> Aituo Jesus in-hoguly:

– Odopâdaungâ. Mâentybymo, mâindatybymo warâ Joãoram egatuwâdaunda.

<sup>5</sup> “Jesus tâwâneim modo kua nhedyly xina nedâ. Epybyry modo koendâ tâense. Adakobâdnrybyry modo tadakobâzemo iwerâ. Tâjimitugueylygue tâwânuneimbyry modo itugoenzeybyem. Kydatânrybyry modo koendâ tydase. Iguewâtyby modo kurâem tyetonze. Kaikâ modoram Deus xunâry iwâkuru Jesus nhegatyly xina nidadâ lâpylâ.

<sup>6</sup> “Tuomareim ise yeinwândyly imodânry modo!” nygue Jesus” myguelymo ise Joãoram – kely Jesus.

<sup>7</sup> Aituo João eynynonro modo azakâlâ odopâdylymo. Idâpygueduomo Jesus aguely João wâgâ kurâ domodoram:

– Agui âmaemo ewy tâtâze âji âdy peba atoram, João aguely idase. Âdaunloka mâkâ, inanjimo? Etaungâ adapezeinly-ro watay, poji wayam wayam warâ tâzekânize. Myara keankâ João, inanjimo? Âdy pebaom modoram âkelo unâ nhegatyly, âdypeom modoram âkelo unâ nhegatyly warâ keankâ aguely, inanjimo? Ainkâba, tokalelâ mâkâ xunâry. Âdypebaom agâ, âdypeom agâ alelâ mâkâ Deus wâgâ aguely.

<sup>8</sup> Medâmolâ ety iwogonro iwâkuru keba awyly. Âdypeom xidadâ odano, âtâ imâsedo iwâkurugue tâtyreim warâ mawânkâ âtâ tâjiwogonro tâwânenseim ieni. Âdypeom mâkeba mâkâ.

<sup>9</sup> – Âdaunlo kuruka mâkâ, âmaemoem? Deus itaumbry egatuim? Mâkâlâ mâkâ Deus itaumbry egaturinlâ. Warâ olâ aguely âyanmo. Deus itaumbry egatuim âdaunlo kulâ mâkeba mâkâ. Idânârâ Deus itaumbry egatuim modo takaze tynreim mâkâ.

<sup>10</sup> Warâ iwenibyem awyly Deus itaumbry awo wâgâ: “Anra unâry egatuim. Waunroenlâ ise merâ kâingonodyly, kurâ domodo nhonse Messias saintodâ” kewândy Deus. Kurâ domodo yaintodâ nhoniem kehobyry mâkâ João.

<sup>11</sup> Uguondo âdaunlo kulâ mâkeba mâkâ João. Tynreim mâkâ, idânârâ saguhoem Deus itaumbry egatuwâni modo takaze. Mâkâlâ keankâ “Inepa ise Deus Ingonotyby âewyly” keim. Âdara Deus kurâ domodo iwymâryem idyly awyly koendâ nutuba olâ mâkâ. Iwerâ Deus Ingonotybygue tywymâgueim watay, mâkâ takaze ise xynru. Tâwâlâ lelâlâ wâne âdaunlo kulâ awyly. Xirâ mâuntudyzemo kuru wato.

<sup>12</sup> – João Deus wâgâ unâ egatyly nhagupygueduolâ keankâ kurâ domodo Deus tywymâryem izetonro modo âzenagazeoly Deus eynynonro keba modoram. Inakai modoram adainhoze kelymo, Deusgue iwymâgumogue.

<sup>13-14</sup> Saguhoem Moisés iweniwândyly âdara Deus pymâem idyly awyly wâgâ. Deus eynynâ aguewâni modo iweniwânmo lâpylâmy warâ. “Elias emyenro sainse, Deus itaumbry egatuim, Deus Ingonotyby saindyly iraynâ” kelymo. Aguehomobyrylâ mawânkâ mâkâ João. Aguely mâinwâmpyra olâ keankâ âmaemo.

<sup>15</sup> Augueho mâuntudyze âmaemo watay, koendâ idataungâ.

<sup>16</sup> – Âdaunloem mawylymo wâgâ agueze urâ, âmaemo xirâ umeno modo. Iamimeom tagonrodo taseray âzenanâdogue tâzenanâdyzebaom ara kulâ âmaemo.

<sup>17</sup> Tataen-hodo tugoru indyduo, tâidysebamo. Tataen-hodo itynru ume, tytyrembamo.

<sup>18</sup> Âdiempa kulâ João Batista âwinduadyly, vinhu nenypa. Warâ awylygue, “Kadopâbeom awâkâ” myguelymo. Urâ Uguondo Kaynâpa Âetyby kâwinduadylygue, kadakuilygue warâ, “Idolai awâkâ. Nhuduypymo tâinze, tânyze alelâ. Impostu epywado emakewâni modo, kurâdo inakai modo eataen-ho warâ awâkâ” myguelymo.

<sup>19</sup> Aguitobyry, aguykehobyry warâ wâgâlâ Deus nhutuly xurâem, xurâempa warâ kydzeholy – kely Jesus.

*Jesus einwântânry modo âsenagazedo*

*(Lc 10.13-15)*

<sup>20</sup> Xidadâ Corazimdâ, Betsaidadâ, Cafarnaumdâ warâ Jesus Deus eon-honrugue toenzepa adyosenry modo aiemâ. Tâenselâ wâne akaemo Jesus aidyly; alâ olâ neinwâmpyra awylymo. Inakanhe adâidylymogue nâjityembyramo lâgâlâ. Adâidyly timodyzebamo. Aituo Jesus ton-honre kehoem iwâgâmo aguely adaguly:

<sup>21</sup> – Warâ aguedyze wawyly unâry izepaom modoram. Toenzepa kehoem ise mâsenagazedylymo, âmaemo Corazim donro modo, Betsaida donro modo warâ. Toenzepa adyosenry modo kehoem ajiedâ âjidadârymodâ, Deus eon-honru kênehohoem. Yeinwândyseba olâ mataunaguyne. Tumunruneim modo akâwândy Tiro, Sidom warâ donro modo. Deus eon-honru enehonze âjidadârymodâ awitobyry ara ânguylâ aidyly-ro watay, inakanhe adâidyly tumozemo tâise, Deus tâinwânsemo warâ. Tâzetydzemo tâise âtâem saku tyxieim sakâjibygue, pelupâ tyangahumo onwa tyese mo tâise warâ, inakanhe adâitomobyry wâgâ tâjityendyly tienehon-homoem, imoimbyryem tawyly tienehon-homoem warâ. Deus eon-honrugue awidyly tâense lelâlâ wâne âmaemo. Inakanhe amidylymo mâinmopa olâ âmaemo.

<sup>22</sup> – Corazim donro modo, Betsaida donro modo warâ, tâdâsenagazedo saintuo, âmaemo nynnâbaom modo toenzepa ise mâsenagazedilymo, Tiro, Sidom warâ donro modo âsenagazedo takaze kehoem. Xirâ mâuntudyzemo kuru wato. Medâmolâ Deus eon-honrugue awidyly. Akaemo olâ nepyra.

<sup>23</sup> – Âmaemo Cafarnaum donro modo koendonro, tynreim warâ âmaemo, inanajimo. Deus eydâ atoram mydâlymo warâ wâne, inanajimo. Arâpa olâ. Satanás eydâ atoram ise mâjigonoholyo. Inakai kehoem akâwândy Sodoma donro modo. Deus eon-honru enehonze Cafarnaumdâ awitobyry nhedylymo-ro watay, inakanhe adâidyly tumozemo tâise, Deus tâinwânsemo warâ. Ijidadârymo tainzepa tâise. Deus eon-honrugue awidyly tâense lelâlâ wâne âmaemo. Inakanhe amidilymo mâinmopa olâ âmaemo.

<sup>24</sup> Cafarnaum donro modo, xypyry etay, tâdâsenagazedo saintuo, âmaemo nynnâbaom modo toenzepa ise mâsenagazedilymo, Sodoma donro modo âsenagazedo takaze kehoem. Xirâ mâuntudyzemo kuru wato. Tâenselâ âmaemo Deus eon-honrugue awidyly. Akaemo olâ nepyra – kely Jesus.

*Âmaemo mâsemaquedyzedo modo Jesusram âetaungâ  
(Lc 10.21-22)*

<sup>25</sup> Ilâpyryem Jesus aguely Deusram:

– Kau odano modo, onro wogonro modo warâ sodo âmâ, Pabai! Âdaunlo modoanlâ âunârybyry mutuen-ho, tonomegueim modoram lelâ inkâba, enomedâdaymy modoram lelâ inkâba warâ.

<sup>26</sup> Amânhedyse mato aralâ ise aidyly – kely.

<sup>27</sup> Deus agâ adâkebygueduo, Jesus agueondyly tonlo modo agâ:

– Pabai idânârâ won-honru, ienomery warâ xuduim. Mâkâ kulelâ koendâ kuru utunri. Urâ lelâ lâpylâ Pabai Deus koendâ kuru xuturim warâ. Eyam kâuntuen-hoymy lâpylâ olâ koendâ Deus xutuze.

<sup>28</sup> – Mâkâ tâmânreingue tyekeim wâne ekozely, myara ekozeybyem mawilymo. Yeinwântaungâ, ikuâdânimo, ahulirinmo warâ kâentyhoem. Âkarymo wogonro tâmânreingue âekelymo waunlo ara ise, ikobyzeguelymo.

<sup>29</sup> Nynnonroem itaungâ. Âsenomedâdaungâ ywâgâ. Ikobyzeguehomo ese âmaemo. Koendonro urâ, tyewiâseim mâkeba. Imakerinmoem ise urâ.

<sup>30</sup> Kâenomedâdo ara amitomoem ton-honruneba, agâmolâma ise urâ, on-hondâzemolâ. Tâmânreim sanâni emawydâni emyenro urâ – kely Jesus.

## 12

*Jesus eynnonro modo tâzekobyzegueho oday trigu ewily nhasewâdomobyry  
(Mc 2.23-28; Lc 6.1-5)*

<sup>1</sup> Tâzekobyzegueho oday ani Jesus agâ xina trigu ejidy ezakâ sakadyly. Toenzepa ani xina ewindy. Sahuadybyem ani trigu ewily. Awilygyue xina nhasewâdyly, tâmarygyue xina nhatuguely, xina nhaguly warâ.

<sup>2</sup> Fariseu domodo ewy xina aidyly tientuo ani Jesusram aguelymo:

– Egâ âynnonro modo aidyly! Trigu ewily nhasewâdylymo, nhatuguelymo warâ. Tutuzelâ âmâ, kâzewenry eynynâ kokobyzegueho oday kydâsewaniba kydawily – kelymo.

<sup>3</sup> Aituo Jesus aguely:

– Enanâguedâdaungâ typynigueba tâituomo, kydamu Davi, eagonro modo warâ aito-mobyry, toenzepa tâwindymogue.

<sup>4</sup> Deus ety odaji myakâwândy Davi egawândyly. Târâ myakâwândy Deusram xuduypy pão modo nhanâdyly, nhedawynlymo tagonrodo agâ. Kâzewenry eynynâ olâ tâise akaemo pão nedawynmpa. Kurâdo eynynâ Deus agâ aguewâni modo lelâ tâise mârâ pão edawynrim, âkelo modo lâpylâ warâpa. Deus xurâem olâ myakâwândy akaemo inakanhe aidyly keba.

<sup>5</sup> Kurâdo eynynâ Deus agâ aguewâni modo kokobyzegueho oday âsewaniduo, inakanhe aidylymo mâkeba lâpylâ.

<sup>6</sup> – Deus ety takaze mâynrenkylmope tarâ âduaymo awily olâ mâuntudyzemo kuru wato.

<sup>7</sup> Warâ Deus aguehobyry iwenibyem awily: “Ânguydo imeom xyâly, iaduândyly mâkeba ize wato kuru, kurâ domodo âjigie koendâ awily” kewândy Deus. Xirâ mâuntuba olâ âmaemo. Âdakeze xirâ aguely awily mâuntulymo watay, nynnonro modo âdaituoba kulâ mâenwentâdaymba tâise âmaemo.

<sup>8</sup> Uguondo Kaynâpa Âetyby urâ. Âdy iwâkuru adyeseim, adyesenry warâ tâzekobyzegueho oday xuturim urâ – kely Jesus.



*Jesus uguondo âzemapiluguedânry kua nhetybyry*  
(Mc 3.1-6; Lc 6.6-11)

<sup>9</sup> Târâpa âxigüeybyem Jesus idâly âtâ tâdâtâdyguyhoram.

<sup>10</sup> Uguondo âzemapiluguedânrybe ani târâ. Tâlâ pylâ ani kurâdo ewy Jesus izepaom modo. Jesus tiunâguedomoem kulâ aidyly enuagaeni modo. Xunâzelymo:

– Tâzekobyzegueho oday Jesus, awâkâ uguondo emary kua nhedyly watay, Moisés inweniby araba aidyly awyly aguykenre. “Deus aiedyseba ato amientai” kykenre – kelymo.

<sup>11</sup> Aituo Jesus in-hoguly:

– Tâzekobyzegueho oday iguymo kaneru tâtagueim odaxi ihuguely-ro watay, kopaelâgâem mânhenhonwâbyra âmaemo, mâentyhomoem. Kydâsewaniho keba awyly umelâ, tâzekobyzegueho oday iguymo tâtyze âmaemo.

<sup>12</sup> Kaneru takaze kywynu! Awylygue, tâzekobyzegueho oday koendonro aguiendyly watay, Deus ize atolâ aguienkyly – kely Jesus.

<sup>13</sup> Aituo Jesus uguondo âzemapiluguedânryram aguely:

– Âzemapiluguegâ – kely.

Jesus agueduo, uguondo âzemapiluguely, emary kua ienipyryem awylygue. Koendâ idyly; emaduno ara idyly.

<sup>14</sup> Fariseu domodo olâ târâpa egaselymo, Jesus tyâen-hon-hoem tâtunâguedomoem.

*Saguhoenlâ Isaiás Jesus wâgâ aguehobyry*

<sup>15</sup> Tyâly kelymo tiuntuduo ani Jesus târâpa âxigüely. Toenzepa ani kurâ domodo nhapygue idâlymo. Akaemo duano tâwânuneim modo idânârâ kua nhetaenyly.

<sup>16</sup> Aituo ani eyanmo aguely:

– Ânguyran-ne awitobyry kâzegatuwâdaundâ – kely.

<sup>17</sup> Saguhoeim iweniwânîlâmy Isaiás Deus Ingonotyby arâ aidyly wâgâ. Deus aguehobyry aralâ kehoem Jesus wâgâ aidyly.

<sup>18</sup> “Êtaungâ! Anra merâ iemary kâinduakeyby.

Toenzepa kâinwyneguyly merâ, toenzepa womazeâni warâ.

Yispiritury nhonwa iese urâ.

Judeu domodoram, judeu keba modoram alelâ ise unâry koendonro nhegatyly.

<sup>19</sup> Kurâ domodoram tyewiâse aguepa ise, nadaenkeba ise warâ.

Arua oze nâseubyra ise.

<sup>20</sup> Toenzepa ise kityendyly.

Awylygue ise kurâ domodo âdiempa tâinwânni modo koendâ lelâ nhedyly.

Peto nhâseajiom wâne tyânlanênehonzeba myara ise

âdiempa tâinwânni nitywanânehomba awyly.

Inakai modo adain-ho odaxi alâ ise aisezedyly.

Kurâ domodo inakanhe tâentuneim modo koendâ lelâ nhedyly,

se iwatary âdukagâdyby saseudyly wâne myara.

<sup>21</sup> Einwânse akaemo idânârâ, tâmakehomoem’ kely Deus,” itaumbryry Isaiás iweniby.

*“Satanás eon-honru kainly lakuru Deus eon-honrugue” Jesus kehobyry*

(Mc 3.20-30; Lc 11.14-23)

<sup>22</sup> Ilâpygueduo ani Jesusram uguondo nhadylymo, tytarembe, kêempyry warâ âiehoily kadopâram. Jesus mâkâ kua nhedyly. Kadopâ egaseduo uguondo koendâ âjityainly idyly, epyemba idyly warâ.

<sup>23</sup> Awârâ tientuo, tonlo modo toenzepa âsewânilymo. Âjigüe aguelymo:

– Davi kydamudo iwymâryem awyly myakâwândy myara keanra ise Jesus kywymâryem awyly – kelymo.

<sup>24</sup> Awârâ tindatuo fariseu domodo aguely:

– Kadopâ modo iwymâry Belzebu\* eon-honrugue kulâ awâkâ kadopâ modo nhânklyly – kelymo; kewâdylymo kulâ olâ.

<sup>25</sup> Âdara xunâgumo awyly tutuze myani Jesus. Aituo aguely:

– Âjigüe âzety anano modo âseguelyly-ro watay, mârâ âtâ anary tadainze. Âjiukonoem, âjiwaigoruem warâ âjigüe âseguelyly-ro watay, tunwyndo sodokewâzemo. Koendâ nâzepyramo, âjidueryem tâisemo mawânkâ.

<sup>26</sup> Kadopâ modo iwymâry mawânkâ Satanás. Kadopâ modo âjigüe âseguelylymo, tygue tygue idylymo warâ watay, ton-honrembe tâise Satanás.

\* 12:24 Satanás ezedy eagonro awârâ “Belzebu.”

<sup>27</sup> “Jesus kadopâ nhânkly olâ, Belzebu mawânkâ aitoem eon-honru xudunri” tâkeze âmaemo. “Belzebu eon-honrugue kulâ kadopâ mânhânklylmo” myguepa olâ âmaemo âynnonromoam. Arâ âynnonromoram amyguepa âmaemo-ro watay, arâ yam adâkezeba lâpylâ itaungâ.

<sup>28</sup> Deus eon-honruguelâ kadopâ modo kânhânkly. Won-honru tiundulygue, tutuen-honze mâkâ, tarâ pymâem wawyly – kely Jesus.

<sup>29</sup> – Uguondo ton-honreim ety odaji ânguy negawântaymba, emagaduze, tâkâjizeba mâkâ watay. Ekâjido lâlâ ise jiguy emagazedily. Satanâs eon-honrugue aini mâkeba urâ, eon-honru sainrim lâkuru – kely.

<sup>30</sup> – Ynynâba âmaemo-ro watay, ynynnonroem inkâba âmaemo. Kurâ domodo Deus nheinwântoem iemawiyadâbyra âmaemo watay, neinwâmpyra itomoem amânhenehonlylmo lakuru. Ydâ iwague mânhenehonlylmo; mâindâtyguylmo tâise koendonro kuru – kely Jesus.

<sup>31</sup> – Deus izepa ato amânhedilylmo, amyguelylmo, mâunâguedilylmo warâ watay, idânârâ awârâ modo xygakeze Deus, mâenkadylmo-ro watay. Deus Ispiritury ewanu wâgâ inakanhe kulâ amyguehomobyry olâ ise Deus nygakeba.

<sup>32</sup> Urâ Uguondo Kaynâpa Âetyby wâgâ inakanhe amyguelylmo-ro watay, idânârâ yam inakanhe amyguehomobyry xygakeze Deus, Deusram mâenkadylmo nhygakehoem watay. Deus Ispiritury ewanu wâgâ inakanhe kulâ amyguehomobyry olâ ise Deus nygakeba. Xirâ mawânârâ mâuntudyzemo kuru wato – kely Jesus.

*Ewily wâgâlâ nady âdaunlo awyly xutuly  
(Lc 6.43-45)*

<sup>33</sup> Jesus aguely:

– Se takyguenry koendâ lelâ ewisely; kiein-hoem tuduze. Se takygueim inakanhe kulâ ewisely; kiein-hoem nudupa. Ewily wâgâlâ se âdaunlo awyly xutuly, koendonro, inakai warâ awyly – kely Jesus.

{Koendâ aguidily, aguykely wâgâlâ koendonro kydawily âdutuoly. Inakanhe aguidily, aguykely warâ wâgâlâ inakai kydawily âdutuoly. Warâ Jesus konomedâze aguely.}

<sup>34</sup> Jesus aguely:

– Âgâu ara kâmayno kulâ myaze âmaemo! Awylygue koendonro modo wâgâ amyguepa mawlylmo. Kyangahu odanolâ mawânârâ aguykeho.

<sup>35</sup> Âdylâ ekanâdo oday koendonro ekanâdyby watay, koendonrolâ tâtyzeim. Inakai ekanâdyby watay, inakailâ lâpylâ tâtyzeim. Arâ lâpylâ kunâry kyangahu oday kydâpaunzedo kienkanâdyby. Koendonro watay, koendonrolâ aguykeho. Inakai watay, inakailâ aguykeho warâ.

<sup>36</sup> – Xypyry etay, Deus enadoram mâepanâgueduomo, inakanhe amyguehomobyry ara ise mâkâ idânârâ inagazedilylmo. Xirâ mawânârâ mâuntudyzemo kuru wato.

<sup>37</sup> Âunârymo wâgâlâ âdaunlo mawlylmo tutuen-honze âmaemo. Âunârymo wâgâlâ ise Deus tâwentâzeinhe, tâwentâzein-emba warâ mawlylmo nhutuly – kely Jesus.

*“Adyesenry aiekâ” kehomobyry Jesusram  
(Mc 8.11-12; Lc 11.29-32)*

<sup>38</sup> Ilâpygueduo Moisés inweniby wâgâ enomedâni modo, fariseu domodo warâ Jesus iopaji idâlylmo, aguelylmo:

– Âdylâ adyesenry amânhedily tiendyse xina, Deuslâ ogononi, on-honru xuduim warâ awyly xina nhutuhoem – kelylmo.

<sup>39</sup> Aituo Jesus eyanmo aguely:

– Iumunrumi âmaemo xirâ umeno modo! Deus tumoze âmaemo, pekodo tuso inmo ho ara. “Adyesenry aiekâ, Deus Ingonotyby mawlyly xina tiuntuhoem” tâkeze âmaemo. Deus itaumbry egatuimbyry Jonas aitobyry enanâgueduanga.

<sup>40</sup> Kanra imâsedoram xuomympyem, azagâ† emedyly idyly ara myakâwândy mâkâ ioday awyly, Niguepa olâ myakâwândy; kanra imâsedo âjitaguguely ara. Alâpylâ ise, yigueduo, ieguepybyry etadâdybyem awyly. Azagâ emedyly idyly wâgâ olâ ise kurâem witondily. Mâenanâgueduomo ise, Deus Ingonotybylâ wawyly, mâuntulylmo.

<sup>41</sup> Kanra adyry odanopyryem myakâwândy Jonas idâly Niniveram, Deus itaumbry egatuze. Jonas aguely tindatuomo myakâwândy, mârâ xidadâ odano modo Deus

† 12:40 Judeu domodo emedyly nhapâguelo ara, azagâ tokalâ warâ myakâwândy, tokalâ iguandyly aralâ mawânkâ kogoneyam watay, nhapâguelylmo. Awylygue karaiwaem, “azagâ tokalâ” kely, “azagâ emedyly” kely keba awyly. Ânguy Pakuenraram sexta-feira kopae nove horas saindily. Sâbado oday târâlâ. Domingo pealâ duas horas pylâ tâty anaxi odopâdily-ro warâ watay, “Azagâ tokalâ warâ emedyly ara Pakuenradâ wakyntre” kepa. Bakairi domodo xurâem azagâ emedyly ara kulâ. Awylygue xirâ versiculu wâgâ koendâ itoem, “azagâ emedyly idyly ara” kely iwenily.

nheinwândylymo. Âjityendylymo inakanhe tawly inmolymo warâ. Akaemo emyenro keba olâ âmaemo. Urâ, Jonas takaze won-honru. Auguely mâindadysebamo, mâinwândysebamo warâ olâ âmaemo. Awlylygue ise xyppyry etay, Deus enadoram mâepanâgueduomo, warâ ise Nînive donro modo Deusram aguelymo: “Tâwâlâ akaemo kurâ domodo Jesus aidyly, aguely warâ einwântânrybyry modo nâsenagazedâmo” kezemo.

<sup>42</sup> – Enanâguedaungâ mâkâ pekodo Sabâdâ pymâpyry. Taypa myakâwândy mâkâ idâly, eagonro anaymba, Salomão enomery idase. Ienomery olâ Salomão enomery takaze kehoem. Tarâ âduaymo lelâlâ wâne urâ, arâlâ olâ inomedâdomo mâindadyseba, mâuntudyzeba warâ mawlylymo. Awlylygue ise xyppyry etay Deus enadoram mâepanâgueduomo, warâ ise mâkâ pekodo pymâ aguely Deusram: “Tâwâlâ akaemo kurâ domodo Jesus tonomedâdly tindadysebamo atomobyry ara nâsenagazedâmo” keze – kely Jesus fariseu domodoram, Moisés inweniby wâgâ enomedâni modoram warâ.

*Kadopâ odopâdobyry*

*(Lc 11.24-26)*

<sup>43</sup> Jesus aguely:

– Tâlâ myani kadopâ kurâ odaypa nhânkyby. Mâkâ kadopâ adakobâdlyly myani paru peba ato einkâ, tâjidy xuize. Tâjidy nepyra olâ myani.

<sup>44</sup> Aituo mâkâ kadopâ tâwâlâ aguely: “Tegasehobyryanlâ ise kodopâdlyly mâkâ saguhoem inakanhe kânhytybyanlâ” kely. Adâkeduo, odopâdlyly. Nodopâbyra awlyly ara, koendâ myani mâkâ uguondo, eagonro kadopâram nâdynanâoba, âtâ koendâ kehoem nhontyby, taxiembra wâne myara.

<sup>45</sup> Aituo myani mâkâ kadopâ sete lelâ tataen-hodo inakai modo kuru ese idâly, mâkâ uguondo odaxi tâxedomoem. Aituo mâkâ uguondo ago kehoem kuru inakanhe itondyly, tokalâ kadopâbe tatobyry takaze kehoem. Arâ lâpylâ ise inakanhe misezedylymo, yeinwâmpyra âmaemo watay – kely Jesus.

*Jesus tyze, tukonodo warâ wâgâ aguehobyry*

*(Mc 3.31-35; Lc 8.19-21)*

<sup>46</sup> Jesus aguely ume ise, iukonodo warâ saindylymo eydâ atoram. Kuoholâ ingâsenehonlymo.

<sup>47</sup> Aituo Jesusram aguenri aguely:

– Âze, âukonodo warâ tarâ kuohomo. Agâ adâkedyzemo – kely.

<sup>48</sup> Aituo Jesus aguely:

– Yze lelâlâ mâkâ pekodo. Konodo lelâlâ akaemo uguondo modo warâ. Tâlâ lâpylâ olâ yze ara lelâ, konodo ara lelâ warâ kâenkyly kuru – kely.

<sup>49</sup> – Etaungâ ynynonro modo. Asaemo mawânkâ yze ara, konodo ara warâ kâenkyly, kâinwynegylyly warâ.

<sup>50</sup> Idânârâ mâkâ Pabai kaynonro ize ato ara aitaynrim modo mawânkâ konodo ara, koudo ara, yze ara warâ kâenkyly – kely Jesus.

## 13

*Jesus trigu ewy tamuizze etâni wâgâ unâ nhegatuhoobyry*

*(Mc 4.1-9; Lc 8.4-8)*

<sup>1</sup> Ilâ iguandyly umelâ Jesus âtâ odayba egasely. Paru Galiléia emelaji idâly. Târâ ekadyly, kurâ domodo enomedâze.

<sup>2</sup> Toenzepa kurâ domodo eydâ awlyly tânâmize kehoem. Awlylygue pepi imeimbyry târâ ekâjiby odaxi idyly, târâ enday kurâ domodo tienomedâdoem. Kurâ domodo tâpagune lelâ paru emelay, Jesus xunâry idase.

<sup>3</sup> Unâ ani nhegatyly, kurâ domodo tienomedâdoem. Aguely:

– Xîrâ idataungâ. Tâlâ myani uguondo trigu tamuizze etâni typi ezay.

<sup>4</sup> Nhamuinday, tâlâ myani ânwa oze ihugueim. Mârâ myani konopio modoram tadaguoze.

<sup>5</sup> Tâlâ pylâ myani toenzepa tuhube atoram ihugueim, onro tâsanigueba atoram. Inepa kehoem myani târâ iazely wâne, tydâetâgueba olâ mârâ ago idyly.

<sup>6</sup> Xixi myani nady tyaduânse, iwindy ago ondaxi nâtâba awlylygue.

<sup>7</sup> Tâlâ myani tyguyreimpe atoram ihugueim. Tyguyreim modo, trigu modo warâ âzekiba ago idyly myani. Tyguyreim olâ ago ini kuru, trigu takaze kehoem. Aituo kopâ ihugueyby nikuiba. Mârâ duay tawlylygue trigu newiseba.

<sup>8</sup> Tâlâ myani onro iwâkuru onwa ihugueim. Awlylygue koendâ kehoem ago itaynly. Toenzepa myani mârâ nady modo ewitunu. Koendâ kehoem myani ekaunâdlyly ewy modo wâgâ cem, sessenta, trinta alelâ kehoem – kely.

<sup>9</sup> Wará Jesus nhegatumy eyanmo.

– Xirá uná koendâ mãuntudyze mataymo, koendâne angahumo odaji ietaungâ – kely Jesus.

*Ádaituo uná tâgatuzeingue kulelâ tienomedâdily Jesus aguehobyry  
(Mc 4.10-12; Lc 8.9-10)*

<sup>10</sup> Aituo xina Jesus eynnonro modo kuru nhapâiguely:

– Ádaituoka mãenomedâday uná mãengatumy, ago lelâ amyguepa mawly? – xina kely.

<sup>11</sup> Aituo Jesus in-hoguly:

– Saguhoem mykâinane Deus kaynonro nutuen-homba âdara idânârâ iwymâryem tâidyly. Urâlâ olâ xutuen-hoim âyanmo. Koendâ ise âyanmo auguely. Deus koendâ tiuntudyzebaom modo olâ uná tâgatuzeingue lelâ kêanomedâdily; ago lelâ auguepa.

<sup>12</sup> Imâem ywâgâ mãuntudyze âmaemo watay, Deuslâ ise mãuntuhomoem aieni. Ânguy ywâgâ tiuntudyzeba watay olâ, âdiempa ywâgâ tiuntuyby enanânehonze, utuba ise warâ.

<sup>13</sup> Awlylygue, kurâ domodo kêanomedâday, uná kêangatumy, tahule kêanomedâdomo nutuba itomoem. Agânhekyly tâensemolâ wâne, nutubamo olâ, nepyramo-ro waunlo ara kulelâ. Auguely tydasemolâ wâne, âdakeze auguely nutubamo olâ ise, nidapyra waunlo ara lelâmo.

<sup>14</sup> Deus aguehobyry Isaiás inweniby ara aidyly iwerâ:

“ Idase wâne âmaemo,

âdakeze aguely awlyly mãuntuba olâ ise âmaemo.

Ese wâne âmaemo,

âdy mãenkylymo awlyly mãuntuba olâ ise âmaemo.

<sup>15</sup> Auguely mãindadyseba, yeinwândyseba warâ âmaemo.

Mâpaunzebyramo itybyem, âzenuahybyem, âjiwantahuybyem waunlo ara lelâ âmaemo, inomedâdomo mãuntuba mawlymogue.

Ywâgâ mãuntudyze lelâlâ âmaemo watay, auguely tydase, tâinwânse warâ tâise âmaemo.

Tâpaunzeze tâise âmaemo, âjiwantahudânry ara, âzenuahudânry ara warâ.

Inakanhe amitomobyry tygakeze tâise urâ, ynynnonroem mitomoem' nygue Deus”

kely myakâwândy Isaiás inwenily – kely Jesus.

<sup>16</sup> Jesus xinaram agueondily:

– Tutuze olâ âmaemo, awlylygue omarumo. Mãenkylymo tutuze lelâ âmaemo. Mãindatyby tâinwânse lelâ âmaemo warâ.

<sup>17</sup> Saguho Deus eynynâ aguewâni modo, kurâdo Deus eynnonro modo warâ toenzepa mãenkylymo tiendyse tâisemo myakâwândy, rhetomoem anipyra olâ myakâwândy. Mãindakylymo tindadyse tâisemo myakâwândy, nidapyramo olâ myakâwândy. Xirâ mawânâ mãuntudyzemo kuru wato – kely.

*Jesus âdakeze nady wâgâ adâkely awlyly aguehobyry  
(Mc 4.13-20; Lc 8.11-15)*

<sup>18</sup> Aituo Jesus aguely:

– Ydataungâ wao. Inomedâzemo nady ewy wâgâ auguehobyry ise âyanmo koendâ kêangatumy.

<sup>19</sup> Mârâ nady ewy ânwa oze tamuizne etâdyby tadaguoze. Aituo âdy niazepa myani târâ samuîn-hobyrydâ. Tâlâ lâpylâ arâ Deus itaumbry idataynrim modo. Tydasemo wâne. Inepa olâ Satanás idânârâ indatybymo nhangahumo odayba nhetyly. Aituo pylâ Deus neinwâmpyra awlylymo-ro warâ.

<sup>20-21</sup> – Mârâ nady ewy onro tuhuboem onwa ihuguewâdyby inepa kehoem iazely. Iwinyd modo ago ondaxi nâtâba awlylygue olâ, inepa iladaynly, iguewâdyly warâ. Tâlâ lâpylâ arâ Deus itaumbry idataynrim modo. Tindatyby modo tâinwânsemo wâne tuomare kehoem. Tâzenagazeoedu olâ inepa kehoem Deus neinwâmpyra idylymo.

<sup>22</sup> – Mârâ nady ewy tygyreim duaxi ihuguewâdyby; ago tâise wâne, newiseba olâ, tuahuze mârâ tygyreim awlylygue. Tâlâ lâpylâ arâ Deus itaumbry idataynrim modo, Deus tâinwânse wâne. Xirâ onro anaym adienkyly modo wâgâ kulâ olâ âseguâdâdilylymo. Toenzepa âdype tâidyly kulâ, toenzepa tydinerugadyly kulâ warâ olâ ize atomo. Awlylygue Deus nhenanânehonlymo. Deus itaumbry nidapyra, iwâgâ nâpaunzebyra warâ idylylymo. Deus wâgâ ânguy agâ aguepa idylylymo.

<sup>23</sup> – Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim, sessenta lelâ ewily xuduim, trinta lelâ ewily xuduim warâ. Tâlâ lâpylâ arâ Deus itaumbry idataynrim modo

tindakylymo lelá nheinwânkylimo. Deus lelá nheinwânkylimo. Ize ato lelá anhekylymo. Iwâgâ aguelymo toenzepa kurâ domodo nheinwântoem warâ – kely Jesus.

*Jesus joiu wâgâ unâ nhegatuohobyry*

<sup>24</sup> Ilâpygueduo, Jesus âkelo unâ nhegatuondyly tienomedâdomoem. Aguely:  
– Unâ segatuji wao, âdara Deus kaynonro kywymâryem lelâlâ idyly awyly wâgâ mâuntuohomoem. Tâlâ myani uguondo typi ezay trigu ewy tamuizze etâni.

<sup>25</sup> Nhamuimbygueduo myani, kopae xykylymo ume, iduery ipi ezaji idâly. Trigu ewy samuin-hobyrydâ myani joiu\* keho ewy nhamuinly. Samuinrimbyryem myani idâly.

<sup>26</sup> Aituo myani trigu ewy, joiu ewy warâ samuimby iazewâdyly, ago itaynly, âzekiba kehoem ewisewâdyly warâ. Aituo myani sodo agâ tâwanuneim modo mârâ joiu, trigu-empa awyly nhedylymo.

<sup>27</sup> Aituo myani âpa ezary sodoram idâlymo. Aguelymo eyam: “Trigu ewy kulelâma keankâ mamuinly târâ âpa ezay; toenzepa olâ joiu, trigu duakâ. Ânguyka keankâ joiu ewy mârâ ezaxi samuinrim?” kelymo.

<sup>28</sup> – Aituo âpa ezary sodo in-hoguly: “Uduery keanra keankâ samuinrim” kely.

– Eagâ tâwamuneim modo aguelymo: “Joiu xina nhonkedyzeka âmâ iweâ lelâlâ?” kelymo.

<sup>29</sup> – Warâ olâ âpa ezary sodo aguely eyanmo: “Alâ nidâ. Joiu monhokelymo-ro watay, trigu nhonkeze lâpylâ mataunaze.

<sup>30</sup> Tâwâlâ trigu, joiu alelâ âzekiba ago nidâ. ‘Ekaunâdo odaji ituo joiu ise waunroem kuru monhokelymo, mâintugâjilymo, iaduhoem, peto onwanji manmelymo warâ. Ilâpygueduo ise trigu mâenkaunâdylymo. Kâenkanâdo odaxi mâenkanâdylymo-ro warâ’ keze urâ ekaunâni modoram” kely myani sodo – kely Jesus.

*Jesus mostarda ewy wâgâ aguehobyry*

(Mc 4.30-32; Lc 13.18-19)

<sup>31</sup> Jesus âkelo unâ nhegatuondyly eyanmo tienomedâdomoem. Aguely:  
– Unâ segatuji wao âdara Deus kaynonro kywymâryem lelâlâ idyly awyly mâuntuohomoem. Tutuzelâ âmaemo, idânârâ nady ewy modo takaze kehoem mostarda ewy imeimbyryem awyly.

<sup>32</sup> Tâtâduo olâ tyazeze, eagonro modo etâdaymby modo takaze kehoem ago tâise, imâsedo modoem kehoem tywatezeze warâ. Awylygue tawâguneim modo iwatarý wâgâ tâty anhetoem nhuduly – kely Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui idylymo” keze Jesus aguely.}

*Jesus fermentu wâgâ aguehobyry*

(Lc 13.20-21)

<sup>33</sup> Jesus âkelo unâ nhegatuondyly, tienomedâdomoem. Aguely:  
– Xirâ unâ lâpylâ segatuji wao, âdara Deus kaynonro kywymâryem lelâlâ idyly awyly mâuntuohomoem. Pekodo pão aieni imâem trigu nhedyly; fermentu olâ âdiempa kulâ nhedyly. Mârâ fermentu pão ioliho âdiempaombyry olâ trigu tuolize imâem kehoem – kely Jesus.

*Jesus unâgue lelá tienomedâdaymo aguehobyry*

(Mc 4.33-34)

<sup>34</sup> Unâem lelá ani Jesus kurâ domodo nhenomedâdyly.

<sup>35</sup> Warâ myakâwândy Deus itaumbry egatuimbyry Asafe inwenily:

“Unâ ise kâengatuly,  
eagâmo augueday.

Adaguday tutuzenrybyry wâgâ augueday”

kely myakâwândy.

Aituo Jesus unâ kurâ domodo tienomedâdoem nhegatuodo, Deus itaumbry egatuimbyry aguehobyry ara kehoem aidyly.

*Jesus âdakeze joiu wâgâ adâkely awyly aguehobyry*

<sup>36</sup> Agueypyem Jesus kurâ domodo nhodokely. Xina agâ âtânra idâly. Saintrybyem iopaji xina idâly, sapâiguzee:

– Kurâ domodo agâ kydatay, joiu trigu duano wâgâ amygueaki. Âdyka enra awârâ unâgue mâenomedâdyzemo mato? – xina kely.

<sup>37</sup> Aituo xinaram aguely:

– Urâ Uguondo Kaynâpa Âetyby trigu ewy tamuizze etâni emyenro urâ.

\* 13:25 Trigu ipery ara iazeim joiu keho. Newiseba kulâ, nuduwâpyra âdaunlo joiu, âdaunlo trigu warâ awyly xutuhoem.

<sup>38</sup>Trigu ewy, joiu ewy alelá âpa ezay etâdyby ara mawânkâ kurâ domodo tarâ onro anaym awyly, ynynonro modo, ynyñâbaom modo alelá. Ynynonro modo, Deusgue tywymâgueim, trigu ewy aramo. Satanás eynynonro modo pylâ joiu emyenro-ro warâ.

<sup>39-40</sup>Âpa ezary sodo iduery emyenro mawânkâ Satanás. Nady ekaunâdyly umeno ara lâpylâ ise xypyry etay aidyly. Tâwaneim modo joiu iaduhom peto onwanji nhamehomo, ara lâpylâ ise xypyry etay anju domodo, Deus eynynâbaom modo eydâpa nhamelymo.

<sup>41</sup>Pymâem kuru wituo, iemary modo igonose urâ târâ kaynâpa, kurâdo inakanhe aityby modo, idânârâ kurâdo inakanhe kulâ aitoem aienibyry modo warâ idâtygyuze. Mâkâ modo duaypa ynynonro modo iese iemary modo.

<sup>42</sup>Peto nhântânry onwanji ise inakai modo nhamelymo. Târâ ise eogunrunumo, tyery nhagulymo warâ tâpyneândylymogue.

<sup>43</sup>Awârâ ume ise ânguy Deus eynynonro kuru awyly edyly. Xixi wâne eunu duaypa idyly myara ise Deus eynynonro modo, tynakaiguneim modo duaypa idylymo. Pabai Deus pymâem atodâ ise ejikumo. Xirâ koendâ mâuntudyze mataymo, koendâ idataungâ – kely Jesus.

*Jesus tâwânseim soentyby wâgâ aguehobyry*

<sup>44</sup>Aituo Jesus aguely:

– Unâ segatuji wao âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo âpa ezay tâtagueim esagueim. Tiensagueday myani tâwânseim epyâdyby nhoenkely. Toenzepa kehoem mârâ tientuo, iomazely. Âpa ezary sodo keba olâ myani mâkâ. Aituo mârâ tâwânseim tiempyâgueyby, nhepyâdondyly. Ilâpygueduo, idâly. Idânârâ tâlâ tato modo vende nhedyly. Ebyry tienmakeybygue, mârâ tâwânseim tiempyâdobyry onro nhanâdyly – kely Jesus.

*Jesus pérola wâgâ unâ nhegatuhoobyry*

<sup>45</sup>Jesus aguely:

– Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo pérola vende ieni, sanâni warâ.

<sup>46</sup>“Xirâ pérola toenzepa tâwânseim, tâwânseim lelâlâ, sanâkâ” kehonly myani. Aituo idânârâ tâlâ tato modo vende nhedyly. Ebyry tienmakeybygue mârâ pérola tâwânseim lelâlâ nhanâdyly – kely Jesus.

{“Koendonro kuru Deusgue kywymâgu, idânârâ tâlâ kydato takaze kehoem” keze Jesus aguely.}

*Jesus âedâ kanra sawâto wâgâ nhenomedâdobyry*

<sup>47</sup>Jesus aguely:

– Unâ segatuji wao, âdara Deus kaynonro kywymâryem lelâlâ idyly awyly, mâuntuhomoem. Tâlâ myani uguondo modo ewy âedâgue kanra sawâni. Agui kehoem myani âedâ oday kanra inwynly, tâseim, tâsenry alelá.

<sup>48</sup>Âedâ kanrague xumyduo myani paru emelaji nhuxidylymo. Sagunu wâgâ ekadybyem, kanra iduakelymo. Cestu modo odaxi tâseim nhedylymo. Tâsenry nhamelymo lelâ warâ.

<sup>49</sup>Arâ lâpylâ ise xypyry ume kurâ domodo âjidiukeoly. Anju domodo âese; kurâ domodo iduakeze. Kurâ inakai modo etyzemo Deus eynynonro modo duaypa.

<sup>50</sup>Deus eynynâbaom modo tâdâsenagazedo peto nhântânry onwanxi adameozemo. Târâ ise eogunrunumo, tyery nhagulymo warâ, tâsenagazedylmogue – kely Jesus.

*Iwelo konomedâdo, saguhobyry konomedâdo warâ*

<sup>51</sup>Jesusram xina adapâigueoly:

– Idânârâ auguehobyry tutuze wâne âmaemo? – kely.

Aituo xina in-hoguly:

– Tutuze – xina kely.

<sup>52</sup>Aituo Jesus aguely:

– Koendâ lelâlâ Moisés inweniby wâgâ enomedâni modo yeinwândylymo watay. Tâwâlâ Moisés inweniby wâgâ, âdara Deus kaynonro kywymâryem idyly awyly wâgâ alelá nhenomedâdylymo, uguondo wâne koendonro modo tienkanâdyby saguhobyry, iwelo alelá nhoenkely myara – kely Jesus.

*Nazaré donro modo Jesus neinwâmpyra atomobyry*

(Mc 6.1-6; Lc 4.16-30)

<sup>53</sup>Unâ tiengatubygueduo ani Jesus târâpa âxiguely.

<sup>54</sup>Xidadâ Nazaréram odopâdyly, tânamadobyryanlâ. Târâ tâdâtâdygyuhodâ kurâ domodo nhenomedâdyly. Aguely idanipyry modo toenzepa âsewânilymo nhenomedâdo wâgâ. Aituo âjigie aguelymo:

– Toenzepa awâkâ enomegu; kiuntuba olâ kurâ ânguy enomedânibyry awyly. Adyosenry modo adyese lelâlâ; kiuntuba olâ kurâ âdara awârâ anhedily awyly.

<sup>55</sup> Segue âdydo imeom xygani Maria agâ imery kulâ mawânkâ; Tiago, José, Simão, Judas warâ iwaigoru kulâ awâkâ.

<sup>56</sup> Eaundudo tarâ kuduaylâ inanry kyjidadârydâlâ. Kiuntuba olâ kurâ âdykâ awâkâ awârâ nhutuhobyry awyly – kelymo.

<sup>57</sup> Jesus iamugâry enipyry tawlymogue, Deus Ingonotyby mâkâ awyly neinwâmpyra awylymo. Aguely tindadyseba awylymo warâ. Warâ olâ Jesus eyanmo aguely:

– Unâ egatuim tâty anaym, unâ nhegatuduo ipemugudoram nâzeinwân-honwâbyra. Ety odano modoram, ety anano modoram warâ tâinwântuneba, âkelo kulâ einwâni – kely Jesus.

<sup>58</sup> Neinwâmpyra tawlymogue tonlo modo Jesusram nâtâba awylymo. Aituo myani âdiempa kulâ adyosenry modo târâ anhedily.

## 14

*João Batista nhangasagâdobyry*

*(Mc 6.14-29; Lc 9.7-9)*

<sup>1</sup> Mârâ ume Herodes Galiléia eynnonro modo iwymâry. Jesus anhekyly egary indadyly.

<sup>2</sup> Aituo tagâ tâwanuneim modoram aguely:

– João Batista kurâem itondyby keanra awâkâ Jesus. Awylygue mawânkâ eon-honru adyosenry modo aiese – kely.

<sup>3-4</sup> João igueypyem awyly tutuze olâ myani Herodes, mâkâlâ lelâlâ nhangasagânehoimbyry tawlylygue. Âdara João xyâhobyry awyly ise kêangatuly wao. Herodes myani Herodias agâ tohogüindyze, tukono Filipe iwidyem awyly umelâ. Alâ mykâinane João agezesedyly eyam:

– “Kukono iwidy agâ todohogüinly lâpeba” kelype Moisés inweniby wâgâ – kezesedyly.

Awylygue myani Herodes tyzodadury modoram aguely:

– João Batista sawâtaunda. Emakâjiwâdaungâ, etadâdaungâ warâ – kely.

<sup>5</sup> Herodes wâne myani João tyâen-hondyze, tyangahu oday xunâzely olâ:

– Kâyâen-honly-ro watay, kurâdo iewiâpaze yagâ – kely.

Kurâdo enanaji Deus itaumbry egatuim mawânkâ myani João.

<sup>6</sup> João kadeia oday awyly umelâ myani Herodes iazehobyry etyguedo saindyly. Alâ myani Herodias âdara João tyâen-honly awyly nhutuly. Mârâ âty ume Herodias exiry myani igâsedaymby modo nhetoem âini. Âidyly tientuo myani Herodes toenzepa kehoem nhehoguedily.

<sup>7</sup> Aituo âwynsaundoram aguely:

– Tâwâlâ âdyly ize mato ekagâ; xuduze lelâ urâ. Tâwâlâ ise Deus ienagazedily, mâenkadyby kâundupa wituo – kely.

<sup>8</sup> Âdy nhekgauyly awyly ageimpyryem olâ myani ise. Awylygue myani Herodesram aguely:

– João Batista mânhangasagânehonly ize wato. Iweâma ise nhangahubyry mâenenehonly prato oday xarâ-ro warâ – kely.

<sup>9</sup> Awârâ tindatuo myani pymâ Herodes toenzepa kehoem itywandily. Adâkehobyry awylygue olâ myani anhenehonly lelâlâ, tingâsedaymby modo, “Tâwâlâ ise Deus ienagazedily, mâenkadyby kâundupa wituo” kely idanipyrymoem awylygue.

<sup>10</sup> Aituo sodadu ingâsedily. Eyam aguely:

– João nhangasagâda. Nhangahubyry xarâ enekâ-ro warâ – kely.

<sup>11</sup> Aituo sodadu idâly, João etadâdobyryram nhangasagâze. Ilâpyryem nhangahubyry prato odaxi nhedyly, nhadyly âwynsaundoram. Âwynsaundo tyzeram xuduim.

<sup>12</sup> Aituo myani João eynnonrobyry modo xyâhobyry egary indadylymo. Tiuntuduomo myani eguepybyry ese idâlymo. Nhadylymo. Tuhu esagueyby odaxi nhetadâdylymo warâ. Jesusram, egatuze tâtâzemo myani. Warâ myani João âdyoly, awylygue myani Herodes tutuze lelâ awyly, João igueypyem awyly.

*Jesus cinco mil uguondo modo cinco pão, azagâ kanra âjihuyby warâgue nhuantobyry*

*(Mc 6.30-44; Lc 9.10-17; Jo 6.1-14)*

<sup>13</sup> João xyâhobyry egary tindatuo ani Jesus pepi odaxi âxiedily. Paru ozelâ xina âxiguely. Âji âdy peba atoram xina idâly. Kurâ domodo olâ âdyam idâhobyry tutuze. Xidadâ odano modo, âtâ anary iwaguepaom odano modo warâ myani tuhuru wâgâ Jesus agâ oxioze idâwâni modo.

<sup>14</sup> Pepi odayba itybyem Jesus toenzepa kurâ domodo tynwânwâni modo nhedyly. Akaemo ityenmâ Jesus. Iduaymo tâwânuneim modo kua iemâ.

<sup>15</sup> Iguandyly ume Jesus iopaji xina idâly. Eyam xina aguely:

– Iguandyly enra. Âdykâ pyni xuiho lâpeba tarâ. Asaemo igonokâ, âtâ anary iwaguepaonram, typyniry xuize – xina kely.

<sup>16</sup> Jesus olâ warâ xinaram aguely:

– Nâtâwâbyramo ise. Âmaemolâ ipynirymô âunduwâtaungâ – kely.

<sup>17</sup> Aituo xina aguely:

– Nuduwâpyra xina nhuantomoem! Cinco pão, azagâ kanra âjihuyby alâ kulâ taunlo – xina kely.

<sup>18</sup> – Enetaungâ pão, kanra âjihuyby warâ yam – kely Jesus.

<sup>19</sup> Aituo aguely:

– Tâwâlâ kurâ domodo nekadâ âji koendonrodâ – kely.

Aituo ani Jesus cinco pão, azagâ kanra âjihuyby warâ nhanâdyly. Sanânibyryem, kayam MYK idyly. Deus agâ aguely:

– Koendonro lelâlâ âmâ, Pabai, awylygue xinaem xirâ pão, merâ kanra warâ mâunduly – kely.

Ilâpyryem pão nhepajiwâdyly. Xinaram nhuduly, kurâdoram xina nhepâdoem. Xina nhepâdaynly umelâ kehoem Jesus pão epajiwâdyby, kanra âjihuyby warâ agui nhenehonly.

<sup>20</sup> Ize tato ara kehoem ani idânârâ kurâdo âwinduadyly; kanra âjihuyby nhâdylymo, pão nhepawynlymo warâ. Koendâ kehoem iolataynlymo. Ilâpygueduo pão, kanra âjihuyby warâ âsegubydâdaymby xina nhekanâdyly cestu imâsedo modo odaji. Doze cestu tumyke ani xina nhekanâdyly.

<sup>21</sup> Toenzepa âwinduani modo, cinco mil uguondo modo lelâ, pekodo modo, iamimeom warâ tapâguezebamo.

*Jesus paru wâgâ adakobâdobyry*

*(Mc 6.45-52; Jo 6.15-21)*

<sup>22</sup> Ilâpyryem Jesus aguely xinaram:

– Âxiedaunda pepi odaxi. Idâwâtaungâ Galiléia iwalu kuyam. Tarâ asaemoram âsedaengübyem ise oiosemo udâly – kely.

Aituo xina idâly.

<sup>23</sup> Tonlo modoram tâsedaengubygueduo Jesus iwy onwa âkuly, mâkâ kulelâ Deus agâ adâkehoem. Iguampygueduo, mâkâ kulelâ ani Jesus târâ awyly.

<sup>24</sup> Ilâem pepi oday ani xina paru iotay. Toenzepa ani xina yan-yam adapezeinly; awylygue toenzepa paru adahugânily xina iwepiry onwa.

<sup>25</sup> Emedylylâ, aukuma igâtudyly ume ani, Jesus idâly xinaram paru wâgâlâ.

<sup>26</sup> Jesus paru wâgâ adakobâdyly tientuo, toenzepa xina âseanedly.

– Etaungâ! Kadopâ mâkâ! – tâkewâduo, xina adaenkely tyanugue.

<sup>27</sup> Warâ olâ ani Jesus aguely xinaram:

– Âzeon-hondâdaungâ! Tâseanezeba itaungâ! Jesuslâ urâ! – kely.

<sup>28</sup> Aituo Pedro aguely eyam:

– Pymâ, âkealâ kuru âmâlâ matay, âyam paru wâgâ udâhoem aguekâ – kely.

<sup>29</sup> – Âekâ – kely Jesus.

Aituo Pedro pepi odayba idyly. Paru wâgâ SE SE warâ idâly Jesus XYDYK warâ atoram. Koendâ lelâ Pedro idâly.

<sup>30</sup> Sapezenru eon-honru tiuntuduo olâ âseanedly, xytyly adaguly. Aituo adaenkely:

– Pymâ, iemakegâ! – kely.

<sup>31</sup> Inepa kehoem Jesus tâmary IUK nhedyly Pedro adawâtoem, nytyba itoem. Jesus aguely eyam:

– Pedro, imâem yeinwâmpyralâ myanze âmâ! Inepa kehoem imakeinhe wawyly mâinwâmpyra mitai! – kely.

<sup>32</sup> Aituo azakâlâ pepiram idâlymo, âxiedylymo, sapezenru epagudyly warâ.

<sup>33</sup> Aituo xina Jesus nhehoguedyly:

– Âkealâ Deus imery lelâlâ âmâ! – xina kely.

*Jesus Genesaré donro tâwânuneim modo kua nhetobyry*

*(Mc 6.53-56)*

<sup>34</sup> Jesus agâlâ xina paru nhekuâdyly. Genesaréram xina saindyly.

<sup>35</sup> Jesus saintybyem awyly tiuntuduomo tonlo modo aguely:

– Etaungâ. Awâkâ mawânkâ Jesus! – kelymo.

Âji iwaguepaom donro modoram aguelymo, tâwânuneim modo nhatomoem. Aituo toenzepa kehoem tâwânuneim modo adaholy Jesusram.

<sup>36</sup> Eyam nhekadylymo:



– Ity owogonro wao MÂ' ienehongâ asaemo tâwânuneim modoram, kua itomoem – kelymo.

Idânârâ tâty tywogonro MÂ' ienipyry modo ara kua tyese ani.

## 15

*Deus agueho ara kine, saguho modo agueho ara inkâba*

(Mc 7.1-13)

<sup>1</sup> Aituo fariseu domodo ewy, Moisés inweniby wâgâ enomedâni modo ewy warâ idâlymo Jerusalémâpa, Jesus agâ âtunâgueze. Aituo aguelymo:

<sup>2</sup> – Kydamudo ezewenrypyry ara inkâba âynynonro modo aidyly. Tâwinduatoemoem nâzemaungewâbyramo, kâzewenry ara. Kâzewenry nhakadylymo. Koendâpa akaemo awârâ modo inmoly – kelymo.

<sup>3</sup> Aituo Jesus eyanmo aguely:

– Âmaemolâ Deus aguehobyry aietânry. Izewenrymolâ mâinwânkylimo, Deus aguehobyry mâkeba.

<sup>4</sup> “Unwânmo, âzemo warâ einwântaungâ. Ize atomo eyanmo âunduwâtaungâ” kewândy Deus. “Tunwym, tyze warâ âsenagazedoem Deusram ekani xyâwâtaungâ” kewândy lâpylâmy warâ.

<sup>5-6</sup> Âmaemo olâ aypa mâenomedâdylimo. “Unwânmo, âzemo warâ âdylâ nhakadylymo watay, ‘Tâlâ wato Deusram ise kâunduly. Awylygue âdy âyanmo kâundupa wawlyly’ kewâtaungâ” myguelymo. Alâ kulâ mâenomedâdylimo, amidylimo warâ. Deus aguehobyry âwankuem mânhekylymo, amyguehomobyry lelâ mâinwântomoem.

<sup>7</sup> Koendonro emyenro wâne âmaemo. Izewenrymo kulâ olâ amyguehomo. Âwâgâmo Deus aguehobyry iweniwânmy Isaias:

<sup>8</sup> “Tytanrugue ywâgâ koendâ adâkezemo,  
Tuodaxi niepyramo olâ.

<sup>9</sup> Ywâgâ koendâ adâkezemo wâne,  
tâzewenke kulâ olâ kurâdo nhenomedâdylimo, augueho araba”  
kehobyry – kely Jesus.

*Deus izepa ato wâgâ Jesus aguehobyry*

(Mc 7.14-23)

<sup>10</sup> Aituo Jesus kurâ domodo ingâsedondyly, eyanmo adâkehoem:

– Idataungâ, xutuwâdaungâ xirâ augueho.

<sup>11</sup> Mâimpymo mâkeba Deus agueho mankadomoem aieni; mâimpymo tâgaseze mawânâ. Deus izepa ato amânhedyse mawlylymo mawânâ Deus xurâem inakai; anghumo odaylâ mawânâ awârâ âtugudyly – kely Jesus.

<sup>12</sup> Aituo Jesus opaji xina saindyly. Xina aguely:

– Fariseu domodo tutuze iwâgâmo amyguely awyly, awylygue akaemo agâ iewiâky – xina kely.

<sup>13</sup> Jesus xinaram aguely:

– Nady inakai ojionkeoly, adameoly alelâ. Arâ lâpylâ ise idânârâ Pabai kaynonro eynynâboem modo adameoly eydâpa.

<sup>14</sup> Tâseguâdâzeba itaungâ fariseu domodo kywâgâ aguelygue. Epy wâne eagonro epy nhakobâdylily myara akaemo. Deus aguehobyry koendâ nutuba tawlylymo umelâ, kurâdo enomedâze kewâdylimo, Epy, epy alelâ adakobâdylimo watay, azakâlâ tyihuguezemo tâtagueim odaxi – kely.

<sup>15</sup> Aituo Pedro aguely eyam:

– “Mâimpymo mâkeba Deus agueho mankadomoem aieni; mâimpymo tâgaseze mawânâ. Deus izepa ato amânhedyse mawlylymo mawânâ Deus xurâem inakai; anghumo odaylâ mawânâ awârâ âtugudyly” myguely enra. Koendâ wao awârâ wâgâ aguekâ – kely.

<sup>16</sup> Aituo Jesus aguely:

– Iweâpa lelâlâ wâne yagâ mawlylymo; inomedâdomo wato mâuntuba lelâ olâ âmaemo!

<sup>17</sup> Âpyniryimo mâkeba Deus izepa ato amânhetomoem aienehoim. Eimpymo mawânâ kuwe odaxi idâly, ilâpyryem pylâ kokomiry odaxi-ro warâ. Awârâ modo odakâ sakadybyenma egasely lelâ-ro warâ.

<sup>18</sup> – Kyangahu oday mawânâ kydâpaunzedo, aguiendyse kydato, aguykeho warâ âtugudyly. Awylygue anghumo odayba âeni Deus izepa ato aienehonrim awyly.

<sup>19</sup> Anghumo oday Deus izepa ato amânhedylimo wâgâ tunâgue âmaemo, kurâ mâyândyse midylimo; âkelo iwydy mâynanâdylimo; eagâ mohogüin-homobyry keba kulâ mâynanâdylimo; uguondo, uguondo agâ tâidylimo awyly âewyly; pekodo, pekodo agâ

tidyse awyly âewyly; imagadudyze midylymo; tådâsenogudyly myguedyse midylymo; âkelo mâunâguedyze midylymo warâ.

<sup>20</sup> Awârâ modo mawânâ Deus xurâem âwykanânehoinmo. Tådâzemaunguebalâ tådâwinduadylyma Deus xurâem inakai mâkeba-ro – kely Jesus.

*Jesus pekodo Fenícia donro exiry odaypa kadopâ nhânkyhobyry*  
(Mc 7.24-30)

<sup>21</sup> Jesus agâ xina târâpa idâly, xidadâ Tiro, Sidom warâ iwaguepaonram.

<sup>22</sup> Târâ xina awyly ume pekodo Jesusram saindyly. Judeu keba mâkâ pekodo, idamudo cananéu awylygue. Aituo adaenkely:

– Ytyendâlâ ikâ. Âadamu Davi ara pymâ ton-honreim âmâl Iexiry kadopâgue taseim; kua iekârâ wao. Toenzepa mâkâ âsenagazedyly – kely.

<sup>23</sup> Jesus olâ âdakepa. Aituo Jesus opaji xina idâly. Eyam xina aguely:

– Igonokâ awâkâ pekodo. Kyampyguedyly kulâ awâkâ. Kâkuâdâdyly kulâ awâkâ saenlu – xina kely.

<sup>24</sup> Jesus xinaram aguely:

– Kypemugudo judeu domodo eniem keankâ kâjigonoholy; kaneru xuzatyby wâne myara awylymogue – kely.

<sup>25</sup> Aguely tindatuo mâkâ pekodo iwaguepa kehoem Jesusram saindyly. Âzeuguham idyly. Enado âzeuguham itybyem aguely:

– Pymâ, iexiry odayba kadopâ nhânkygâ – kely.

<sup>26</sup> Aituo Jesus aguely:

– Koendâ inkâba iamudo ipyniry emakely, kaxorodoam xuduhoem – kely.

{Awârâ adâkehogue, koendâ inkâba judeu keba modoram, judeu domodo xurâ xuduly. “Judeu domodo kua kânhetu iwerâ. Judeu keba modo kua kânhedily-ro watay, iamimeom pãogue kâenmakely, kaxorodoam kâunduhoen-ro waunlo ara ise” keze aguely.}

<sup>27</sup> Âdakeze aguely awyly xutuwâm olâmy mâkâ pekodo. Aituo aguely:

– Arâlâ, Pymâ. Sodo modo mesa iaxi pyni in-hugueânehoymy tânzê olâ kaxoro imeombyry – kely.

<sup>28</sup> Jesus aguely:

– Yeinwântâ mawylygue olâ ise ixiry kua kânhedily. Mâkâ odaypa kadopâ kânhânkyly, mâenkadobyry ara – kely.

Aguely umelâ kehoem myani mâkâ pekodo exiry koendâ idyly, kadopâ tuodaypa egase-duo.

*Jesus toenzepa tâwânuneim modo kua nhetobyry*

<sup>29</sup> Tonlopyryem Jesus agâ xina idâly, paru Galileiaram. Aituo Jesus iwy angataji âkuly. Târâ ekadyly.

<sup>30</sup> Toenzepa kehoem kurâdo eyam idâly. Nhakylymo ezeumpadyby modo, tywyke iazeypy modo, epy modo, tytarenry modo, âkelogue tâwânuneim modo lâpylâ warâ. Enadoram nhakylymo. Idânârâ kehoem kua nhetaynly.

<sup>31</sup> Tytarenrybyry modo koendâ kehoem âjitainglymo. Tywyke iazeypy koendâ idylymo. Adakobâdânrybyry modo koendâ adakobâdylymo idyly. Epybyry modo koendâ nhedylymo warâ. Awârâ tientuo tonlo modo toenzepa kehoem âsewânilymo. Aituo israelita domodo iDeusry nhehoguedylymo:

– Koendonro, ton-honreim warâ âmâ, Deus – kelymo.

*Jesus quatro mil kurâdo sete pão, aguipa kanra âjihuyby warâgue nhuantobyry*  
(Mc 8.1-10)

<sup>32</sup> Jesus xina ingâsedily. Aguely xinaram:

– Ytynroem enra asaemo kurâdo. Kopaêlâgâbygueduolâ asaemo yagâ awyly. Taypa âetybybe asaemo duay. Âdy nheinlymo peba-ro warâ. Ipynirymô kâundupa kulâ kâingonodysebamo urâ, tâtyram todopâdaymo ânwa oze ihuguezemo mawânkâ tokozelymogue – kely.

<sup>33</sup> Aituo xina aguely Jesusram:

– Kuantomoem nudupa lâpylâ olâ, iwague xidadâdâ kydawlylygue. Asaemo xuato âdykâ imâem pyni kiempyra ise kurâ – xina kely.

<sup>34</sup> – Âdara pãobeka âmâemo? – kely.

– Sete lelâ, PU warâ kanra âjihuyby warâ – xina kely.

<sup>35</sup> Aituo kurâdoram aguely:

– Ikadaungâ – kely.

<sup>36</sup> Mârâ sete pão, kanra âjihuwâdyby warâ nhanâdyly. Tianâpygueduo Deus agâ aguely:

– Koendonro leláâ âmâ, Pabai. Awylygue xirâ pão, merâ kanra âjihuyby warâ mâunduly – kely.

Deus agâ agueypyem nhepajiwâdily. Xinaram nhuduly, kurâdoram xina nhepâdoem. Xina nhepâdily umelâ kehoem Jesus pão, kanra âjihuyby warâ agui nhenehony.

<sup>37</sup> Idânârâ âwinduadilymo ize tato ara kehoem; koendâ kehoem ioladylymo warâ. Ilâpyryem xina cestu imâsedo modo odaxi âsegubydâdyby modo nhekanâdily. Sete cestu tumyke lelá xina nhekanâdily.

<sup>38</sup> Toenzepa âwinduani modo, quatro mil uguondo modo lelá, pekodo modo, iamimeom warâ tapâguezeba.

<sup>39</sup> Ilâpyryem Jesus aguely kurâdoram:

– Tâwâlâ itymoram idâwâtaungâ – kely.

Agueypyem xina agâ pepi odaji âxieze idâly. Magadâ keho yan-yam ani xina idâly.

## 16

*Jesus adyesenry anhetoem aguehomobyry*

(Mc 8.11-13; Lc 12.54-56)

<sup>1</sup> Iweâpa ipygueduo fariseu domodo ewy, saduceu domodo ewy warâ idâlymo Jesusram. Tienwentâdomoem wâne inakanhe kulâ aguedyse awylymo. Aituo eyam aguelymo:

– Deus lelá anhekyly aiekâ, mâkâlâ ogononi, on-honru xuduim warâ awyly xina nhutuhoem – kelymo.

<sup>2</sup> Aituo Jesus eyanmo aguely:

– Iguandyly ume, kau sapabiladyly watay, “Koendâ isenra kopaelâgâ emedyly, kopâ peba” tâkeze âmaemo. Adâise inanry amyguehomobyry ara kehoem.

<sup>3</sup> Emetybyem, tyame, eunu tâmyguyne warâ watay, “Kopâ ihugueze iwerâ” myguelymo. Amyguehomobyry ara adâise lelá. Tutuze âmaemo, kau mâendilymo watay, kopâ ihugueze, nihugueba warâ awyly. Agânhekyly modo Deus eon-honruguelâ agânhedily awyly mâuntuba lelá olâ âmaemo.

<sup>4</sup> Ânguydoem kulâ âmaemo xirâ umeno modo iwerâ! Deus einwândily mâinmolymo, pekodo tuso inmoho ara. “Adyesenry aiekâ, Deus ingonotyby mawyly xina nhutuhoem” mygueakimo yam. Deus unâry egatuimbyry Jonas aitobyry enanâgüewâdaungâ. Jonas kanra imâsedo tuompygueduo egasehobyry ara, igueypyem kurâem witondily watay, xutuze âmaemo Deus Ingonotyby lelá wawyly – kely.

Agueypyem Jesus akaemo nhodokely, idâly.

*“Fariseu domodo, saduceu domodo warâ ifermenturygue tâmaynelâne itaungâ” Jesus kehobyry*

(Mc 8.14-21)

<sup>5</sup> Paru tienkuâday pão sadyly xina enanânehonwâm.

<sup>6</sup> Aituo Jesus xinaram aguely:

– Idataungâ. Tâmaynelâne itaungâ fariseu domodo, saduceu domodo warâ ifermenturygue – kely.

<sup>7</sup> Âdakeze Jesus arâ aguely awyly xina nutuba olâ. Aituo âjigüe xina aguely:

– Âdaituoka awâkâ arâ aguely? Pão kienepyra kydatobyry wâgâ? – xina kely.

<sup>8</sup> Jesus olâ xina aguely idamâ. Aituo xinaram aguely:

– Âdaugüewâpyra urâ, pão mâenanânehon-homobyry wâgâ. Pão wâgâ inkâba auguely. Mâinwâmpyra olâ âmaemo, idânârâ ize matomo ara tuduze wawyly. Âdiempa kulâ mawânâ yeinwândilymo – kely.

<sup>9</sup> – Âdaituoka ton-honreim wawyly mâinwâmpyra mawylymo! Saguhomem cinco mil uguondo modo xuadâ cinco pãogue. Idânârâ âwinduatyby modo nioladâmo. Toenzepa cestu modo mumytâdâmo âsegubydâdybygue warâ. Tânanâgüezelâ keanra âmaemo.

<sup>10</sup> Iwerâ quatro mil uguondo modo xuatai lâpylâ sete pãogue. Idânârâ âwinduatyby modo niolataimo. Toenzepa cestu modo mumytâdaimo âsegubydâdybygue. Tânanâgüezelâ keanra âmaemo lâpylâ.

<sup>11</sup> Pão wâgâpa auguely awyly mâuntuba gâlâ olâ keanra âmaemo, “Tâmaynelâne itaungâ fariseu domodo, saduceu domodo warâ ifermenturygue” ugueduo – kely.

<sup>12</sup> Tahuleba kehoem xina fermentu pão ioliho keba agueho awyly xina nhutuly. Fariseu domodo, saduceu domodo warâ nhenomedâdo wâgâ olâ myani Jesus aguely.

*Pedro, “Messias âmâ” Jesusram kehobyry*

(Mc 8.27-30; Lc 9.18-21)

<sup>13</sup> Ilâpygueduo Jesus idâly xina agâ âtâ anary modo Cesaréia de Filipe iwaguepa. Aituo xinaram aguely:

– Ânguy tâkezeka inanry kurâdo yam, urâ Uguondo Kaynâpa Âetybyam? – kely.

<sup>14</sup> Aituo xina in-hoguly:

– Tâlâ inanry, “João Batista kurâem itondyby awâkâ Jesus” kewâni modo. Tâlâ inanry, “Elias kurâem itondyby awâkâ” keim modo warâ. Tâlâ lâpylâ inanry, “Deus eynynâ aguenripyry Jeremias kurâem itondyby awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ – xina kely.

<sup>15</sup> Aituo xinaram aguely:

– Âmaemo-ro? Ânguy tâkeze âmaemo yam? – kely.

<sup>16</sup> Aituo Simão Pedro in-hoguly:

– Messiaslâ âmâ, Deus iguedânry imery – kely. (“Deus Kâmakeze Ingonotyby” keze “Messias” kely.)

<sup>17</sup> Jesus eyam aguely:

– Mâkâlâ urâ. Tuomareim kuru âmâ, Simão, João imery. Ânguy awârâ mâuntuhoem inomédâdaymba. Pabai kaynonrolâ âyam xutuen-hoim.

<sup>18</sup> Âmâ Pedrogue tâzekeim. “Tuhu imâsêdo” keze xirâ âze aguely. Amyguehobyry ara Deus Ingonotybylâ wawlyly einwânni watay, ynynonrolâ. Âtâ tuhu wâgâ itâdyby wâne alâ kulâ nihugueba myara ise ynynonro modo âda tyeseba awyly. Tâwâlâ wâne iguelymo, idâzemo olâ yam, yagâ aunloenlâ itomoem. Xirâ mâuntudyze wato kuru.

<sup>19</sup> Ynynonro modo mâentoem aiese urâ, pymâ âtâ ijawerygue tâmaseim wâne, âtâ tânahungeze, tânahunze warâ myara ise âmâ. Tarâ onro anaym aiedyse matobe watay, Deus anienehonwâbyra ise. Tarâ onro anaym aiedyse matobe watay, Deus aienehonze warâ – kely Pedroram.

<sup>20</sup> Aituo Jesus aguely idânârâ xinaram:

– Mâkâlâ urâ, Deus Ingonotyby. Iwerâ kuru wao olâ Messiaslâ wawlyly kâzegatuwâdaundâ – kely.

*Jesus tyiguely wâgâ, kurâem tâitondyly wâgâ warâ aguehobyry  
(Mc 8.31-9.1; Lc 9.22-27)*

<sup>21</sup> Ilâenlâ Jesus nhegatyly xinaram âda tyedyly awyly.

– Jerusalémram idâze urâ. Kywymâry modo toenzepa târâ ienagazenehonzemo. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehonrim. Yigueduo, azagâ emedyly\* idyly wâgâ olâ ise kurâem witondyly – kely.

<sup>22</sup> Pedro olâ neinwâmpyra arâ Deus Ingonotyby âdyoly awyly. Awylygue nhejikely, eagâ adâkehoem:

– Pymâ, arâ adâkezeba ikâ. Âtyenze Deus. Inagazenehonwâbyra ise warâ – kely.

<sup>23</sup> Aituo Jesus MYK idyly xinaram. Pedro aguehobyry nehoguebyra tawlylygue aguely eyam:

– Satanás arâ amyguehoem aieni, Pedro. Satanás aguely kâindatymba ise urâ. Ânwa ozeno tuhu wâne kuhodaigâdyly myara Deus ize ato agânhedyseba mawlyly. Deus xunâry ara inkâba âunâgu, uguondo modo xunâry ara kulâ – kely Pedroram.

<sup>24</sup> Aituo Jesus aguely xinaram:

– Ynynonroem ize mataymo, augueho ara aitaungâ. Kopaêlâgâembaba ize wato aietaungâ; amânhedyse matomo mâkeba aietaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze.

<sup>25</sup> “Jesus eynynonro keba urâ” myguelymo, tyâzêpa mitomoem kulâ watay, âdiempa kulâ ise xirâ anaym kurâem mawlylymo. Âigueduomo Deus enadoram mydâwâpyra ise âmaemo. Yeinwândylymogue mâdyolylo watay olâ, Deus enadoram idâze âmaemo; aunloenlâ ise eagâ mawlylymo.

<sup>26</sup> Tâwâlâ wâne âdydo imeom sodoem mawlylymo, ize matomobe mawlylymo warâ, Deus eydâ atoram mydâhomoem nepywabyra olâ awârâ modo. Deus agonro keba âmaemo watay, âdype matomo âdy mâkeba. Ânguy niguepa tâitoem nepywadaymba. Tâdâsenagazedo amaxi ise mydâlymo.

<sup>27</sup> – Uguondo Kaynâpa Âetyby urâ. Idâze urâ Deus eydâ atoram; odopâze olâ urâ Deus dompyryem anju domodo agâ. Kodopâdyly ise Kunwym eon-honru tânehonze. Pymâ tynrenseinhe lelâlâ ise urâ. Yeinwânni modo yagâlâ ienehonze urâ. Yeinwântânrybyry modo tâdâsenagazedoram igonose urâ.

<sup>28</sup> Iwerâ ydataynrim modo ewy esemo Deus eon-honrugue pymâem widyly adaguly. Xirâ mâuntudyzemo kuru wato – kely Jesus.

\* 16:21 Nota de pé Mateus 12.40dâ egâ.

## 17

*Iwy wâgâ Jesus âkeloem itobyry  
(Mc 9.2-13; Lc 9.28-36)*

<sup>1</sup> Seis iguandyly ipygueduo ani Jesus iwy onwa âkuly. Pedro, Tiago, Tiago iukono João warâ tagâ nhakyly.

<sup>2</sup> Târâ Jesus âkeloem idyly nhedylymo myani. Xixi ara kehoem emydy ehazeladyly; esagoymyby ara kehoem ety iwogonro sapekadyly warâ nhedylymo.

<sup>3</sup> Moisés, Elias warâ nhedylymo lâpylâ, Jesus agâ xunâgumo ume.

<sup>4</sup> Aituo Pedro aguely Jesusram:

– Koendâ kehoem tarâ kydawyly, Pymâ. Ize matay, azagâ tokalâ warâ âta imeimbyry aiese urâ, âmâem, Moisés-em, Elias-em warâ – kely.

<sup>5</sup> Pedro aguely umelâ eunu tohozeleim xytâguyly nhonwamo. Eunu duay Deus aguely indadylymo:

– Ymery toenzepa kâinwyneguely merâ, toenzepa womazeâni. Aguely idataungâ – kely.

<sup>6</sup> Pedro, Tiago, João warâ tâjitanru tindatuo, tâseanezemo myani. Awylygue âzeguhoam idylymo onwâgâ.

<sup>7</sup> Aituo Jesus eyanmo idâly. MÂ' nhedylymo. Eyanmo aguely:

– Autaungâ. Tyanepa itaungâ! – kely.

<sup>8</sup> Adâkehonduo iwykaudylymo enuaguyrnurmo. Jesus kulelâ olâ nhekylymo; Moisés, Elias warâ netombyramo.

<sup>9</sup> Aituo xytâguylymo iwy wâgâpa. Tytâguylymo ume Jesus aguely Pedro, Tiago, João warâam:

– Mâentybymone iweâkuru ânguyram kâzegatuwâdaundâ. Yiguely, kurâem witondyly wituo maise tâwâlâ mâengatulymo – kely.

<sup>10</sup> Aituo aguelymo:

– Moisés inweniby wâgâ enomedâni modo adâkeze: “Elias âese, Messias Deus Ingonotyby iraynâ” tâkezemo. Adaituoka arâ aguelymo? – kelymo.

<sup>11</sup> Aituo Jesus in-hoguly:

– Âkealâ aguelymo; Eliaslâ mawânkâ Messias saindyly wâgâ agueim.

<sup>12</sup> Warâ olâ âyanmo auguely: “Elias ara ini nâedâ” uguely. Deus eynynâbaom modo olâ ize tato ara kehoem nenagazedâ. Myara lâpylâ ise ienagazenehonlymo, urâ Uguondo Kaynâpa Âetyby – kely.

<sup>13</sup> Aguely tindatuo Pedro, Tiago, João warâ tutuzemo lelâ João Batista wâgâ aguely awyly.

*Jesus salokuzenomo odano kadopâ nhânkyhobyry  
(Mc 9.14-29; Lc 9.37-43)*

<sup>14</sup> Jesus, Pedro, Tiago, João warâ agâ iwy wâgâpa xytâguybygueduomo, toenzepa kurâdo târâ âtâdyguybyem awyly. Uguondo kurâ domodo duay Jesus iopaji saindyly, enado âzeguhoam idyly, eyam aguely:

<sup>15</sup> – Pymâ, ymery wao ityengâ! Kua iekâ! Tokomaze inanry merâ; toenzepa inanry âsenagazedyly. Tokomaduo, peto onwanji tyihugueze inanry, paikaji atay warâ.

<sup>16</sup> Âynynonro modoram sekadai wâne, kua nhetomoem. Kua niepyramo olâ enra – kely.

<sup>17</sup> Aituo Jesus aguely:

– Âdy einwânni kebalâ myanze âmaemo! Ânguydo kulâ âmaemo! Agâmolâ wâne urâ, yeinwâmpyra olâ âmaemo. Ynadaize yeinwâmpyra lelâ mawylmogue. Enetaungâ awâkâ salokuzenomo xarâ – kely.

<sup>18</sup> Jesusram nhadylymo. Tyam nhatuomo ton-honre kehoem Jesus mâkâ salokuzenomo idano kadopâram aguely:

– Igasegâ iweâ lelâlâ merâ salokuzenomo odaypa, kadopâ! Todopâzeba ikâ-ro warâ! – kely Jesus.

Agueduo kadopâ egasely. Salokuzenomo kua idyly.

<sup>19</sup> Mârâ aipygueduo xina Jesus iopaji saindyly. Mâkâ kulelâ awyly ume xina nhapâiguely:

– Ton-honre lâwâne enra xina aidyly, kadopâ tiânkyhoem. Âda xina niepyra olâ enra. Âdaituo kukeanra? – xina kely.

<sup>20</sup> Aituo Jesus in-hoguly:

– Deus koendâ mâinwâmpyra mawylmogue enra mâkâ kadopâ mâingonopyra mawylmo. Mostarda ewy imeimbyry aralâ âdiempalâ yeinwântâ âmaemo watay, adyenyry adyese lelâ tâise âmaemo. Xirâ mâuntudzemo kuru wato. Yeinwântâ lelâlâ

âmaemo-ro watay, xirâ iwyram “Âxiguegâ; tarâpa ikâ” myguelymo-ro watay, tâxigueze tâise. Adyesenry amânhetomoem ton-honre lelâ tâise âmaemo.

<sup>21</sup> [Ton-honreim lelâlâ mâkâ kadopâ salokuzenomo iodanopyry. Deus eon-honru kienkadoem, kydwanduapryra kidyly wao warâ lelâ mâkâ igonodyly]\* – kely Jesus.

*Jesus tyiguely wâgâ agueontobyry*  
(Mc 9.30-32; Lc 9.43-45)

<sup>22</sup> Galiléia eynynâ xina adakobâday Jesus xinaram agueondyly tyiguely wâgâ:

– Urâ Uguondo Kaynâpa Âetyby yizepaom modo emaxi âzegrateoze urâ.

<sup>23</sup> Akaemo ise yâen-honri. Yigueduo, azagâ emedyly† idyly wâgâ olâ ise kurâem witondyly – kely.

Jesus tyiguely wâgâ aguely tindatuo, toenzepa kehoem ani xina itynwandily.

*Deus ety impostury epywado*

<sup>24</sup> Cafarnaumram xina saimpygueduo aunlo keba uguondo modo âewyly xina eydâ atoram. Deus ety impostury epywado emakeim myani akaemo. Pedroram idâlymo sapâigueze:

– Âwymâry Deus ety impostury epywaze? – kelymo.

<sup>25</sup> Aituo Pedro in-hoguly:

– Epywaze mâkâ – kely.

Ilâpygueduo Pedro egawândily Jesus eydâ atoram. Deus ety Impostury epywado wâgâ Pedro aguely iraynâ, Jesus Pedroram aguely:

– Ânguyka tâise pymâdoram impostu epywani? Xirâ anano modolâ? Âkelo anano modo? Âdara mâuntuly, Simão? – kely.

<sup>26</sup> Aituo Pedro in-hoguly:

– Âkelo anano modo tâise epywani – kely.

Aituo Jesus aguely:

– Iozelâ amyguely – kely. – Pymâ ety anano modo tâise nepywabyra. Alâpylâ urâ Deus ety impostury epywani keba wawyly tâise, Deus eydâpa âetyby wawylygue.

<sup>27</sup> Alâ olâ ise kêempywadyly, Deus ety impostury epywado emakewâni modo newiâpabyra itomoem. Paruam idâ. Atâry samegâ. Saguho mawepyy ikaguegâ. Mâkâ kanra itay moedape ise. Mârâ moeda ise Deus ety impostury epywado emakeim modoram mâunduly. Xuduze lelâ mârâ, urâ, âmâ warâ impostu kiempywadoem – kely.

## 18

*Ânguyka tynrenseim kuru?*

(Mc 9.33-37; Lc 9.46-48)

<sup>1</sup> Ilâpygueduo kehoem xina Jesus iopaji idâly, sapâigueze:

– Ânguyka xina enday tynrenseim kuru Deus kaynonro pymâem atodâ? – xina kely.

<sup>2</sup> Aituo Jesus iamudo tonlo ingâsedily tyam. Iamudo saintuo, Jesus xina ontaji iamudo nhedyly.

<sup>3</sup> Aituo aguely:

– Merâ iamudo ara itaungâ. Âwâlâ kulâ mâzehoguedylymo tâiseba itaungâ. Iamudo arâpa âmaemo-ro watay, mydâpa ise âmaemo Deus pymâem atoram. Xirâ mâuntudyzemo kuru wato.

<sup>4</sup> Merâ iamudo ara mâdutuduomoma toenzepa ise âynrumo Deus nhekyly modo duay.

<sup>5</sup> Pymâem xynru waunlo keba merâ iamudo. Mâkâ ynynonro xurâem koendâ amânhedilymo, tynrenseim keba awyly umelâ warâ watay, urâenlâ amânhedilymo. Mâkâ ynynonro xurâem koendâ amidilymo, tynrenseim keba awyly umelâ warâ watay, urâenlâ amidilymo – kely Jesus.

*Deus einwânnipyryem neinwâmpyra ienehoim toenzepa ise âsenagazedily*

(Mc 9.42-48; Lc 17.1-2)

<sup>6</sup> Jesus aguely:

– Merâ iamudo yeinwânto ara yeinwânni yeinwâmpyra ienehoim koendâ tâise tuhu imâsedo iwymy wâgâ ekâjily, parutabâ ikaji samely, iguehoem, yeinwâmpyra nhenehonly iraynâlâ.

<sup>7</sup> Kurâ domodo Deus izepa ato aiedily imodânry modo mawânkâ toenzepa âsenagazezemo. Yeinwâmpyra itomoem aienehoim olâ ise toenzepa kuru âsenagazeni.

<sup>8</sup> – Imarymogue Deus izepa ato akâiedaundâ; mydâdysebamo atoram tâtâzeba itaungâ warâ. Koendâ tâise imarymo atay, âhurumo atay warâ satâly, samely warâ, Deus izepa ato

\* 17:21 Idânârâ livru saguho modo wâgâ iwenibyemba xirâ. † 17:23 Nota de pé Mateus 12.40dâ egâ.

amânhepyra mitomoem. Koendonro kuru tâmaguebalâ, tuhuguebalâ warâ Deus agâ aunloenlâ mawlymo; idânârâ kodo peto nhântânry onwanji adameoly mawânâ koendâpaom kuru.

<sup>9</sup> Deus mâendysebamo ato kâzetaundâ. Koendâ tâise inumo etyly, samely warâ, Deus mâendysebamo ato mâempyra mitomoem. Koendonro kuru tânuembalâ Deus agâ aunloenlâ mawlymo; idânârâ kodo peto nhântânry onwanji adameoly mawânâ koendâpaom kuru – kely Jesus.

*Jesus enomedâzemo, kaneru xuzatyby wâgâ aguehobyry*  
(Lc 15.3-7)

<sup>10</sup> Jesus aguely:

– Imâemba yeinwânni izepa tâiseba itaungâ. Deus anju domodo tugonose akaemo eniem.

<sup>11</sup> [Kaneru eni wâne tâguy xuzatyby xuize tâtâze, myara lâpylâ ynynâbaom modo kâwinly, inakanhe awlymo kâyngakehoem, kâenmakehomoem warâ.]\*

<sup>12</sup> Cem kaneru ewy tokalâ xuzatuo, âdaidylyka sodo, inanjimo? Noventa e nove tyânze âwinduatodâlâ, mâkâ xuzatyby xuize tâtâhoem.

<sup>13</sup> Nhuiuly, nhedyly. Tientuo, toenzepa kehoem iomazely, noventa e nove âwinduani tionmaendyly takaze kehoem iomaru. Xirâ mâuntudyzemo kuru wato.

<sup>14</sup> Kaneru sodo tokalâ tâguy xuzadyseba awlyly ara lâpylâ Kunwym Deus kaynonro tokalâ kurâ ewy Satanâs ejidyram idâdyseba awlyly; tâwâlâ lelâlâ wâne tynrenseim keba awlyly – kely Jesus.

*Kurâem inakanhe ityby agâ kydâtunâguene*

<sup>15</sup> Jesus xinaram aguely:

– Ynynonro ewy inakanhe idyly agâmo-ro watay, idâwâtaungâ eagâ agueze. Inakanhe itobyry wâgâ aguewâtaungâ; âmâ, mâkâ warâ âtunâguedaungâ. Amyguelymo koendâ tindatuo, “Aetobyry enanânehongâ” kely âyanmo watay, aitobyry enanânehonwâdaungâ. Eataen-hoem itondaungâ.

<sup>16</sup> Amyguelymo tindadyseba watay olâ tokalâ atay, azagâ atay warâ agâmo antaungâ, eagâ amygueontomoem. Wakely iwenibybe mawânâ Deus itaumbry awo wâgâ: “Ânguy tânagazezeba ise, azagâ, azagâ tokalâ warâ ewentâni peba watay” kely iwenibybe.

<sup>17</sup> Akaemo aguely tindadyseba watay olâ idânârâ yeinwânni modoram anhetyby modo wâgâ aguewâtaungâ, mâkâ agâ aguehomoem. Turudyly tindadyseba watay olâ, Deus einwântânry modo ewyênlâ mâkâ nidâ; impostu epywado emakewâni modo aralâ etaungâ warâ – kely.

*“Pabai agâ amyguedaymo, agâmolâ urâ” Jesus kehobyry*

<sup>18</sup> Jesus aguely:

– Tarâ onro anaym aiedyseba matomobyrybe watay, Deus aiedyseba lâpylâ ise târâ kaynâ; tarâ onro anaym aiedyse matomobyrybe watay, Deus aiedyse lâpylâ târâ kaynâ. Xirâ mâuntudyzemo kuru wato.

<sup>19</sup> – Tarâ onro anaym âmaemo azagâ mâseinwândylymo, tokalelâ mâenkadomoem watay, Pabai kaynonro xuduze lelâ mâenkadybymo.

<sup>20</sup> Yagâ agueze âtâdyguywâni modo eagâlâ urâ, tâwâlâ wâne azagâ, azagâ tokalâ warâ kulâ awlyly. Xirâ mâuntudyzemo kuru wato lâpylâ – kely Jesus.

*Jesus, tataen-ho inakanhe itobyry nenanânehombanro wâgâ aguehobyry*

<sup>21</sup> Pedro Jesusram iwaguepa idâlly, nhapâiguely:

– Ânguylâ inakanhe kulâ ynynâ aisezedyly watay, âdaraka ise awidyly aitobyry kâenanânehohoem, Pymâ? Sete lelâ inakanhe ynynâ aisezebygueduo tâwâlâ kâpeandyly? – kely.

<sup>22</sup> Aituo Jesus in-hoguly:

– Sete lelâ âdalâ mâiehoduo tâpeânzeba ikâ. Aedyly agâ, aedyly agâ warâ enanânehongâ aetobyry. Mapâguely eki kehoem awlyly umelâ, enanânehongâ; tâpeânzeba ikâ.

<sup>23</sup> Deusgue tywymâguneim modo inakanhe tuduery tyetobyry modo tânanânehonze. Unâ segatuji wao:

– Tâlâ myani pymâ tagâ tâwanuneim modo igondary wâgâ adâkedyzedonro.

<sup>24</sup> Aituo akaemo tokalâ, tokalâ warâ ingâsedyly. Saguho ingâseguely myani imâem kuru tugondagueim. Milhâo kehoem myani igondary.

<sup>25</sup> Âdara nhepywadoem nudupa lelâlâ myani, âdy peba tawlylygue. Aituo myani iwymâry aguely: “Vende âedylymo isenra, âmâ, âwydy, âmeombry alelâ” kely. “Tydinherugueinram ise vende âedyly. Idânârâ âsejiguy modo vende iese urâ warâ. Mâkâ eagâ iwano iwelo

\* 18:11 Idânârâ livru saguho modo wâgâ iwenibyemba xirâ.

ise idânârâ dinheru mâenmakely yam xudunri, ogondary mâempywadyly ara” kely mâkâ toenzepa tugondagueinram.

<sup>26</sup> Agueduo, mâkâ tâwaneim toenzepa kehoem adahulily. Aituo âzeguhoam idyly iwymâry enado. Eyam aguely: “Tyendâlâ wao ikâ. Arâ kehoem ayedâ. Âdiempa wao iwânwânkâ. Epywaze lelâ urâ agâ ugondago” kely.

<sup>27</sup> – Tutuze olâ iwymâry, mâkâ tagâ tâwaneim âdy peba awyly. Aituo aguely: “Yagâ ogondago enanânehonze urâ. Yagâ tugondaguneba ise âmâ. Idâ lelâ” kely.

<sup>28</sup> Aituo tâwaneim idâly. Târâpa âxigueybyem myani tataen-ho tagâ tugondagueim agâ oxiodyly. Âdiempa kulâ olâ myani mâkâ eagâ igondagu, cem moeda pratagueto lelâ. Aituo myani tataen-ho iwymy wâgâ nhawâdyly. Tingounkuly ume eyam aguely: “Iweâ lelâlâ kehoem iepywagâ” kely.

<sup>29</sup> – Aituo myani eataen-ho âzeguhoam itybyem aguely: “Tyendâlâ ikâ. Iwânwânkâ wao. Idânârâ kehoem agâ ugondago epywaze lelâ urâ” kely.

<sup>30</sup> – En-hem kepa olâ myani. Tataen-ho nhadyly lelâ etadânehonze kadeia odaxi. “Tarâlâ ise âmâ, idânârâ yagâ ogondago mâempywadoem” kely.

<sup>31</sup> Tataen-ho nityembyra kehoem aidyly tâense myani akaemo eagonro modo. Tientuo, mâkâ tataen-ho aienibyry izepa tâisemo myani. Aituo myani nhegatulymo tywymâryam.

<sup>32</sup> Aituo iwymârymo mâkâ aityby ingâsenehonly. Aguely eyam: “Koendonro keba myaze âmâl! Âtyendylygue yagâ imâem ogondago idânârâ kehoem senanânehoangui, mâenkadobyry wâgâ.

<sup>33</sup> Ataen-ho mityendyze, âtyendobyry ara” kely.

<sup>34</sup> – Tyewiâpaduo myani pymâ tyzodadury modoram aguely: “Merâ tumunreim kadeia odaxi sataungâ. Târâlâ yagâ tugondago nepywadâ” kely. Warâ myani mâkâ tataen-ho tagâ igondago tienanânehondyzebaom aieholy – kely Jesus.

<sup>35</sup> Xina agâ tunâry tympygueândoem kuru Jesus aguely:

– Arâ lâpylâ ise Pabai kaynonro aedylymo, inakanhe amâiehohomobyry mâenanânehomba âmaemo-ro watay – kely Jesus xinaram.

## 19

*Jesus tâjiwydy imoly wâgâ aguehobyry*

*(Mt 5.31-32; Mc 10.1-12; Lc 16.18)*

<sup>1</sup> Agueypyem Jesus xina agâ idâly Galileiadâpa. Judéia yan-yam xina odopâdyly ânwa oze, paru Jordão kuynâ, xixi egaseho eynynâ.

<sup>2</sup> Toenzepa kurâdo xina agâ awyly. Iduanomo tâwânuneim modo kua tyese ani Jesus.

<sup>3</sup> Fariseu domodo ewy eagâ agueze idâlymo. Tienwentâdoem wâne inakanhe kulâ aguedyze awlymo. Aituo Jesus nhapâiguelymo:

– Kâzewenry eynynâ, tâwâlâka uguondo tywydy inmoly âdy wâgâlâ? – kelymo.

<sup>4</sup> Aituo Jesus in-hoguly:

– Deus itaumbry iweniby tutuzelâ âmaemo. “Kaudyly umelâ myakâwândy Deus uguondo, pekodo warâ nhygadyly, ohogüinrin-em” warâ iwenibyem awyly Deus itaumbry awo wâgâ.

<sup>5</sup> Warâ lâpylâ myakâwândy Deus aguely: “Awylygue mawânkâ uguondo, tunwym agâpa, tyze agâpa warâ idyly, tywydy agâ lelâ tâitoem. Awylygue azagâpa awylymo, tokalelâ” kewândymy Deus.

<sup>6</sup> Awylygue mawânkâ ohogüimby modo tywydy agâ tokalelâ awylymo, Deuslâ âzeyam ienimo awylygue. Awylygue ânguy ohogüimby modo âximohoem aniempyra nidâ – kely Jesus.

<sup>7</sup> Fariseu domodo Jesusram agueondylymo:

– Tutuzelâ âmâ Moisés inweniby: “Âwydy mâinmodyze âmaemo watay, tâwâlâ imowâdaungâ” kely. “Iweniwâdaungâ olâ âdaituo mâinmoly mo awyly. Aitybyem eyam pape mâinwenibymo eyam xuduwâtaungâ. Igonotaungâ lelâ-ro warâ” kely myakâwândy inwenily. Arâ-ro watay, âdaituo pylâka koendâpa tâjiwydy imoly awyly? – kelymo.

<sup>8</sup> Jesus in-hoguly:

– Tutuze myakâwândy Moisés, tienkily modo ânguydo kulâ, Deus ize ato adiendysedo keba awylymo. Awylygue myakâwândy Moisés “Tâwâlâ tâjiwydy imoly” kely inwenily, pekodo tâwentâzeba itoem. Kaudyly umelâ olâ myakâwândy Deus ohogüinwâdyby modo âximoly izepa awyly.

<sup>9</sup> Agâmo ohogüimbyem tawyly umelâ, eagonro uguondoram âdynanâoly watay lelâ imowâdaungâ, mâinmodyze mataymo olâ-ro warâ. Tâwâlâ lâpylâ arâ aidyly umelâ eagâ mawylymo. Âdaituoba kulâ âwydymo mâinmoly mo, eagonro agâ mitomoem kulâ-ro watay olâ, Deus ize ato araba kulâ amidylymo. Waunroem mohogüin-homobyrylâ âwydymo



kuru Deus xurâem, nhatano keba. Xirâ mâuntudyzemo kuru wato – kely Jesus fariseu domodoram.

<sup>10</sup> Aituo xina aguely:

– Arâ atayma, uguondo nohogüimbalâ koendâ awyly-ro – xina kely.

<sup>11</sup> Jesus aguely:

– Âkealâ, Deus eon-honru nhuduypy lelä olâ nohogüimba tawlyly emoenrim.

<sup>12</sup> Tâlâ mawânkâ âdaituo uguondo nohogüimba ato. Tâlâ imezedânryenlä iazeypy; awylygue tohogüindyzeba awylymo. Tâlâ emukeybyem tawlylygue, tohogüindyzebaom. Tâlâ mâkâ Deus itaumbry tiengatuhoem tohogüindyzebaom, pekodogue, iamudogue warâ aekuru tâtynanâdyzeba tawlylygue. Deus, nohogüimba itoem eon-honru nhuduypy lelä ohogüindânry – kely.

*Jesus iamimeom agâ atobyry*

*(Mc 10.13-16; Lc 18.15-17)*

<sup>13</sup> Îläpygueduo tâjiunwyndo Jesusram tymeom nhadylymo.

– Asaemo nhangahu onwa imary iekâ. Deusram koendâ âzehohomoem ekagâ asaemo xurâem – kelymo.

Xina olâ ani akaemo iamudo sanipyry modo tâuse:

– Jesus kâdyanâdaundâ – tâkeze.

<sup>14</sup> Arâ xina agueduo Jesus xinaram aguely:

– Arâ adâkezeba itaungâ! – kely. – Tâwâlâ iamimeom yam nâedâ. Kodopâdaundâmo. Iamimeom wâne enra ohondybyem lelä yam tâetoem, myara lâpylä kurâ domodo nohondâ, yeinwântomoem, Deus kaynonro iwymârymoem itoem – kely.

<sup>15</sup> Aituo Jesus nhangahumo onwa tâmary nhedyly; mâkânra, mâkânra warâ aguely:

– Deus koendâ nhese – kely.

Aitybyem idâly.

*Uguondo toenzepa âdypeom agâ Jesus aguehobyry*

*(Mc 10.17-31; Lc 18.18-30)*

<sup>16</sup> Alâ ani uguondo Jesusram saintybyem, aguely:

– Pymâ koendonro, âdyka ise koendonro enday agânhekyly, Deusram udâhoem, aunloenlä eagâ witoem warâ? – kely.

<sup>17</sup> Aituo Jesus in-hoguly:

– Amyguely tutuzeka âmâ? Âdaituoka koendonro myguely yam? Tokalelä koendonro kuru, Deus lelä. Deus agâ midyse âmâ-ro watay, Moisés inweniby wâgâ agueho ara aikâ – kely.

<sup>18</sup> – Âdaunloka ise Moisés inweniby ewy agânhekyly? – kely uguondo.

Jesus in-hoguly:

– “Ânguy kâdyâ. Eagâ mohogüin-hobyry lelä xynanâgâ. Tâmagazeba ikâ. Aitobyry wâgâpa kulâ âkelomo kâzewentâdâ.

<sup>19</sup> Unwâm, âze warâ einwânkâ, xyrenkâ warâ. Agonro agâ âpynegâ; koendâ mâzeto ara, arâ lâpylä agonrodo agâ koendâ ikâ” – kely Jesus.

<sup>20</sup> Aituo uguondo aguely:

– Aunlolâ inanry idânârâ amyguehobyry Moisés inweniby ara awidyly. Âdy pylâka ise agânhetonguly, Deus agâ lelä witoem? – kely.

<sup>21</sup> Jesus aguely:

– Deus enudâ kuru amidyse matay, âsejiguy modo idânârâ vende ieta. Ebyry ise âdy pebaom modoram mâunduly-ro warâ. Awârâ amânhedily-ro watay, tâlä lelä ise âmâ koendonro Deus eydâ atodâ ekanâdyby. Idânârâ tâlä mato mâunduduo, odopâgâ, nynonroem mitoem – kely Jesus.

<sup>22</sup> Jesus arâ aguely tindatuo ani mâkâ uguondo toenzepa tydinherugueim âjityendyly, tysejiguy modo vende tiendyseba tawlylygue. Tytynre kehoem idâly.

<sup>23</sup> Aituo Jesus xinaram aguely:

– Ton-honre lelälä âdypeom modo yeinwântoem, Deus kaynonro iwymârymoem itoem warâ, tysejiguy kulâ ize atomo kuru awylygue. Xirâ mâuntudyzemo kuru wato.

<sup>24</sup> Ton-honre camelu agüie ihu oze sakadoem, arâ lâpylä ton-honre âdypeom modo tâlä tato inmohomoem, Deusgue lelä tywymâgomoem warâ – kely.

<sup>25</sup> “Ton-honre lelälä âdypeom modo Deusgue iwymâgomoem” Jesus keduo, toenzepa kehoem xina âseguâdâdyly. Xina enanaji, âdypeom modo lakuru Deus eydâ atoram idâim waunlo ara awylygue. Âjiguy xina aguely:

– Arâ atayma ise ânguy nâsemaguewâbyra-ro – xina kely.

<sup>26</sup> Aituo Jesus xinaram MYK itybyem aguely:

– Âkealâ, ânguy nâsemaguewâbyra ton-honrugue kulâ, Deus olâ kurâ domodo anhetânry adyese lelâ. Âdy anhetânry lâpeba Deus – kely.

<sup>27</sup> Jesus aguely tindatuo myani Pedro aguely:

– Xina-ro? Idânârâ tâlâ tato xina niâm, âynynroem tâtoem. Iwerâ ise-ro? Âdy ise xina nhemakely? – kely.

<sup>28</sup> Jesus xinaram aguely:

– Deus idânârâ kehoem iweloem nhetondyly ume, pymâ xurery iwâkuru wâgâ ise iekadyly, pymâem witoem, urâ Uguondo Kaynâpa Âetyby. Pymâem wituo, pymâem lâpylâ ise âmaemo. Pymâdo xurery wâgâ ise ikadylymo, kypemugudo israelita domodo iwymâryem.

<sup>29</sup> Idânârâ tâlâ matomo mânhânlymo, ynynonroem mitomoem watay, Deus xuduze lelâ ipa matomo. Xirâ mâuntudyzemo kuru wato. Itymo mânhânduomo, âykyhomoem ijidumo xuduze. Âwaigorumo, âukonomo, nhaundumo, unwânmo, âzemo, âmeonmo warâ mânhânduo, Deus âpemugomo nhetomo ara kehoem nhenimo, âwynenimo warâ xuduze. Âpimo mânhânduomo, Deus âpynirylo xuduze. Tâlâ matomo mânhânlymo ynynonroem mitomoem watay, âdy ize matomo xuduze, mânhâympymo takaze kehoem ise tâlâ mawlymo. Âgueduomo olâ ise aunloenlâ Deus agâ mawlymo. Xirâ mâuntudyzemo kuru wato.

<sup>30</sup> Iwerâ waunropyry modo, ilâem âgânâynra ise. Âgânrobyry modo, ilâem waunroem ise warâ – kely Jesus.

## 20

*Jesus uva ezay tâwanuneim modo wâgâ nhegatuhoery*

<sup>1</sup> Jesus aguely:

– Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo imâsedogue tyfazendagueim. Typi ezay uva etânehonrimbyryem myani. Ekaunâdyly ume, emedyly wâgâ idâlly tâwanuneim modo xuize, uva nhekaunâdomoem.

<sup>2</sup> Uguondo modo tientuo myani, eyanmo aguely: “Tâwanuneim modo ize urâ iwerâ, uva ekaunâniem. Koendâ ise ipywadylymo. Tuguanse mâsewanilymo-ro watay, tokalâ moeda prataguetogue ise ipywadylymo” kely. Tutuzemo myani koendâ nhepywadyly awyly. “Ize lelâ ise xina amyueho ara. Âpi ezay âsewanize lelâ xina iwerâ” kelymo myani. Arâ âseinwândybyem, âpa ezary sodo akaemo ingonodyly âsewanize.

<sup>3</sup> Emedyly wâgâ nove horas awârâem myani eagonro tâwanuneim modo xuionse idâondyly. Tâsewanidyzedonro modo âtâdyguyhoam idâlly. Tâsewanidyzedo modo tientuo, eyanmo aguely:

<sup>4</sup> “Uva ekaunâni ize urâ” kely. “Iwerâ wao ypi ezaji âsewaniwâdaunda. Koendâ ise ipywadylymo” kely.

<sup>5</sup> – Âseinwândybyem myani âpa ezaji âsewanize idâllymo. Kuotatay myani âpa ezary sodo idâondyly tâwanuneim modo xuionse. Tientuo myani eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobyry modo idâlly âpa ezaji. Trêshoras kogoneyam lâpylâ warâ tâwanuneim modo xuionse idâondyly Tâsewanidyzedonro modo tientuo myani, eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobyry modo idâlly âpa ezaji.

<sup>6</sup> Kogoneyam, cinco horas awârâem myani âpa ezary sodo idâondyly tâsewanidyzedo modo âtâdyguyhoam. Tâsewanidyze donro modo tientuo myani aguely: “Âdy amânhepyralâ inanry tarâ âguansezedylymo. Âdaituoka âsewanize mydâpa mawlymo?” kely.

<sup>7</sup> – “Tâsewanidyze wâne xina, ânguy olâ xina ewanu nudupa” kelymo.

– “Ypi ezaji pylâ uva ekaunâdaunda” kely âpa ezary sodo. Agueduo myani idâllymo âsewanize.

<sup>8</sup> – Iguandyly ume, seis horas awârâem myani sodo aguely tâwanuneim modo iwymâryem: “Tâwanu inmo odaylâ akaemo. Idânârâ tâwanuneim modo igâsegâ, mâempywadomoem. Tokalâ hora lelâ âsewaniby modo saguhoem epywagâ, xypyryem ise tuguanse âsewaniby modo-ro warâ” kely.

<sup>9</sup> – Warâ myani nhepywadaynly. Saguhoem nhepywagyly myani akaemo tokalâ hora lelâ âsewaniby modo. Tokalâ moeda prataguetogue myani âzepywaolylo.

<sup>10</sup> Tuguanse âsewaniby modo awârâ tientuo myani, aguelymo âjigue: “Imâem ise kâpywadyly, tokalâ moeda takaze” kelymo. Tokalâ moeda prataguetogue kulâ olâ myani akaemo modo âzepywaolylo lâpylâ.

<sup>11</sup> Tâpywadobyry tientuomo myani âpa ezary sodo agâ iewiâpadylymo. Eyam aguelymo:

<sup>12</sup> “Koendâ xina mâempywanehonwâbyra enra âmâ. Tokalâ hora kulâ awâkâ agâ saintyby modo nâsewaniagui. Xina lakuru enra tuguanse kehoem âdâpigu oday âsewanirim. Xina

agâ âzekiba kehoem akaemo mepywanehoangui. Xina menokudai” kely akaemo tuguanse âsewaniby modo.

<sup>13</sup> – Aituo myani âpa ezary sodo eyanmo aguely: “Idataungâ wao. Inokudaymbamo urâ. Tokalâ moeda prataguetogue tuguanse âsewanize lelâ xina’ mygueakimoma.

<sup>14-15</sup> Ize wato ara ydinheruru agânhedyly. Âzekiba idânârâ kêempywanehony-ro watay, inokudylymo mâkeba. Akaemo modo arâ kêempywadobyry wâgâ tyewiâseba itaungâ. Mâsewânilymo kulâ. Anra ipywadomo. Emakewâdaungâ. Idâwâtaungâ-ro warâ” kely. Warâ myani, âpa ezary sodo, tâwanuneim modo warâ aidyly.

<sup>16</sup> Iwerâ waunropyry modo, xypyry etay âgânâynra ise. Âgânnonrobyry modo, xypyry etay waunroem ise – kely Jesus.

{Koendâ lelâ awâkâ Jesus agaityon-enlâ tâinwânni agâ, iamudoenlâ tâinwânni agâ alelâ keze awârâ aguely.}

*Jesus, “Yigueduo, kurâem itonze urâ” keontobyry*

*(Mc 10.32-34; Lc 18.31-34)*

<sup>17</sup> Xidadâ Jerusalémram xina âkuly. Tâtâday Jesus aguiom modo duaypa xina nhejikely. Aituo xinaram aguely:

<sup>18</sup> – Idataungâ wao aguely. Jerusalémram xirâ kytâly. Yizepaom modoram adawâhoze urâ, urâ Uguondo Kaynâpa Âetyby. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ iegamezemo. “Nigue awâkâ” kezemo.

<sup>19</sup> Judeu keba modo emaxi iegamezemo. Akaemo ise âwankuem yeni, yapiogunri, kruz wâgâ yârim warâ. Awârâpygueduo, azagâ\* emedyly idyly wâgâ olâ ise kurâem witondyly – kely.

*Tiago, João warâ xurâem isemo nhekadobyry*

*(Mc 10.35-45)*

<sup>20</sup> Zebedeu iwidy, Tiago, João warâ agâ Jesusram saindylymo. Enado âzeguhoam itybyem eyam aguely:

– Âyam kêenkagulyly wao aiekâ – kely mâkâ pekodo.

<sup>21</sup> Aituo Jesus mâkâ pekodo nhapâiguely:

– Âdyka mâenkadyze mato? – kely.

Pekodo in-hoguly:

– Pymâem kuru mituo, asaemo azagâ ymeombyryne apay ekanâgâmo, tokalâ aho eynynâ, tokalâ pâem eynynâ warâ, pymâem agâ itomoem – kely.

<sup>22</sup> Jesus aguely mâkâ imeombyryram:

– Mâuntuwâbyra âmaemo âdara yagâ pymâem mitomoem adâjidyly awyly. Toenzepa kêsenagazedo ara kehoem âsenagazeze tâeganeka ise âmaemo? – kely.

Aituo aguelymo:

– Emaenze lelâ xina, mâenmaen-ho ara – kelymo.

<sup>23</sup> Jesus aguely:

– Âsenagazeze urâ, âmaemo lâpylâ warâ. Yahoru eynynâ ekani, pâem eynynâ ekani warâ kêinduakeba olâ urâ. Pabai kaynonrolâ ise iduakeim. Mâkâ mawânkâ târâ tâzekado nhonipyry – kely.

<sup>24</sup> Tiago, João warâ ise nhekadobyry tindatuo, xina nehoguebyra ani. Eagâmo xina tyewiâpadaynze warâ.

<sup>25</sup> Aituo Jesus xina idânârâ ingâsedyly tuopaji, xina agâ adâkehoem:

– Tutuzelâ âmaemo, pymâdo ton-honreim modo, tyewiâse kehoem kurâdo agâ aguely, adâkehobyry anhetomoem.

<sup>26</sup> Âmaemo olâ arâpa itaungâ. Mâdyren-hondyze mataymo, tâzemaryenlâ itaungâ.

<sup>27</sup> “Imawyadâbyramo ise urâ. Pymâ wawylygue; âmaemolâ ise urâem aieni” tâkezeba itaungâ, pymâem mituom.

<sup>28</sup> Yara itaungâ. Deus Ingonotyby lelâlâ wâne urâ, iemawyadâdomoem âetyby keba olâ urâ, imarymo lakuru urâ. Igueze âetyby urâ. Kurâdo inakanhe aito modo epywaze ise yiguely, Deus aguehobyry ara – kely Jesus.

*Jesus azagâ epy kua nhetobyry*

*(Mc 10.46-52; Lc 18.35-43)*

<sup>29</sup> Jericodâba xina egaseday, toenzepa kurâ domodo xina nhapygue idâlymo.

<sup>30</sup> Tâlâ ani azagâ epy ânwa edazekâ ekadybyem. “Jesus awâkâ sakani” kely tindatuomo, azakâlâ adankelymo:

\* 20:19 Nota de pé Mateus 12.40dâ egâ.

– Xina tytyenzelâ ikâ, Pymâ ton-honreim! Âadamu Davi ara pymâ ton-honreim âmâ! – kelymo.

<sup>31</sup> Ton-honre kehoem kurâdo eyanmo aguely:

– MYK alelâ itaungâ. Tadaenkezeba itaungâ warâ – kelymo.

Adâkehondoumo lakuru ago kuru adaenkelymo:

– Xina tytyenzelâ ikâ, Pymâ. Âadamu Davi ara pymâ ton-honreim âmâ! – kelymo.

<sup>32</sup> Jesus epagudyly. Akaemo azagâ ingâsedily. Tuopaji saintuomo Jesus aguely:

– Âadyka âmaemoem agânhedyse matomo? – kely.

<sup>33</sup> – Tiendyse xina, Pymâ – kelymo.

<sup>34</sup> Tintyenduomo Jesus enumo MÂ' nhedyly. Inepa kehoem nhedylymo. Xina nhapygue-niem idilymo lelâ-ro warâ.

## 21

*Jesus Jerusalémram saintobyry*

*(Mc 11.1-11; Lc 19.28-40; Jo 12.12-19)*

<sup>1</sup> Âtâ anary Betfagé iwaguepa xina saindyly, Jerusalém iwaguepa, iwya Se Oliveira Ekaram. Myarâ saintybyem, Jesus xina ewy azagâ waunroem ingonodyly.

<sup>2</sup> Wakely eyanmo:

– Idâwâtaungâ Betfagéram. Aindylymo umelâ ise tokalâ jumenta, imerylâ warâ ekâjiby mâendilymo. Azakâlâ ekâjigüewâdaungâ. Enetaungâ xarâ.

<sup>3</sup> “Âdaituoka jumenta, imery warâ mandilymo?” myguehonlymo watay, “Kywymâry asaemo izetonro. Inepa olâ ise jumenta, imery warâ nhopânehonly” myguelymo lelâ ise – kely Jesus.

<sup>4-5</sup> Warâ myakâwândy Deus itaumbry egatuim Zacarias inwenily:

“Jerusalém donro modoram agüewâtaunda:

‘Etaungâ! Âwymârymo saindyly.

Pymâ ton-honreim ara kehoem inkâba ise âewily.

Jumentinhu wâgâ ise âewily, jumenta imery wâgâ’ kewâtaunda eyanmo”

kely myakâwândy inwenily.

Jesus jumentinhu wâgâ Jerusalémram saintuo, Zacarias inwenily ara kehoem aidily.

<sup>6</sup> Aituo akaemo azagâ ingonotyby modo idâly. Jesus aguehobyry ara aidilymo.

<sup>7</sup> Jumentinhu, ise alelâ nhadylymo. Tygaparyguelâ jumentinhu, ise warâ inkawendâdilymo. Ilâpyryem Jesus jumentinhu onwa âkuly.

<sup>8</sup> Jesus saindyly iray toenzepa kehoem kurâ domodo tygapary ânwa oze PO PO nhedylymo, Jesus tynrense tawly tienehon-homoem. Tâlâ pylâ wakuri sary tiantâwâdyby modo onro onwa PO PO ieni modo, tynrense tawly tienehon-homoem, pymâ ton-honreim kehoem iray adâitomo ara.

<sup>9</sup> Waunroem idâwâni modo, âgânâ idâwâni modo warâ adaenkewâdilymo adaguly:

– Hosana Davi iweryppyry! – kelymo. (“Tohoguezeim Davi iweryppyry” keze aguely.)

– Tohoguezeim kuru awâkâ Deus eon-honru enehonze âeni! Hosana Deus kaynonro! – kelymo.

<sup>10</sup> Warâ Jesus Jerusalém odaxi saindyly. Idânârâ kehoem mârâ xidadâ odano modo âjigüe aguelymo:

– Ânguyka mâkâ saini? – kelymo.

<sup>11</sup> Aituo kurâdo in-hoguly:

– Jesus mâkâ, Deus nynnâ aguenri. Galiléia eynynonro, xidadâ Nazaré donro mâkâ – kelymo.

*Jesus ânguydo imeom vende ieni modo Deus ety odayba nhégaseândobyry.*

*(Mc 11.15-19; Lc 19.45-48; Jo 2.13-22)*

<sup>12</sup> Jesus egawândyly Deus ety idaseraji. Âdydo imeom vende ieni modo, sanâni modo warâ târâpa nhégaseândaynly, Deus ety oday aidilymo awylygue. Dinheru troca ieni modo iwenzary nhamely. Papa vende ieni modo xurery nhamunedily.

<sup>13</sup> Egaseânimobyryem eyanmo aguely:

– Deus itaumbry awo wâgâ iwenibyem: “Xirâ iety yagâ agueho xirâ” kewândy Deus. Kurâ domodo mâenmagazedilymo kulâ olâ. Ânguydo imeom Deusram tiunduly nhanâdilymo watay, toenzepa mâenwâentanâdilymo. Dinheru âmaemoenlâ mânhedilymo. Deus ety, tâmagazeim modo otoendoem mânhedilymo kulâ – kely Jesus.

<sup>14</sup> Jesus Deus ety idaseray atay, epy modo, adakobâdânry modo warâ eyam idâlymo. Kua tyesimo ani Jesus.

<sup>15</sup> Aituo tonlo modo iamimeom adaenkewâdily:

– Hosana Davi iweryppyry! – kelymo.

Kurâdo eynynâ Deus agâ aguewâni modo iwymârydo, Moisés inweniby enomedâni modo warâ Jesus akaemo tâwânuneim modo kua nhedyly nhedylymo, iamimeom saenlu indadylymo warâ. Aituo toenzepa kehoem iewiâpadylymo.

<sup>16</sup> Jesusram aguelymo:

– Iamimeom âwâgâ aguely midatai? Arâ aguepa nidâmo – kelymo.

– Xidatailâ. Kâeumpyramo olâ ise urâ. Tutuze urâ, Deus itaumpyry awo wâgâ iweniby tutuzelâ mawlylymo: “Iamimeonra, iamimeom tâjihuanu modoram warâ ise mâzehogueoly kuru” kely iweniby – kely Jesus eyanmo.

<sup>17</sup> Jesus Deus ety odayba egasebygueduo, xina idâly Jerusalemdâpa. Betanianra xina xykyze idâly.

*Jesus figueiraram, “Iwiseodaymba ise âmâ” kehobyry  
(Mc 11.12-14,20-25)*

<sup>18</sup> Kopaelâgâem emedyly wâgâ Jesus agâ xina odopâdlyly Jerusalemmram. Tâwinze myani Jesus.

<sup>19</sup> Awlylygue figueira ânwa edazekânro toenzepa saryum tientuo, ago iopaji saindyly. Tâwise-ro waunlo ara, enanaji, tarysely agâlâ ewiseim mawânâ figueira. Tâwiseba olâ ani mârâ, toenzepa saryun-em lelâ. Aituo Jesus figueiraram aguely:

– Iwiseodaymba olâ ise âmâ – kely.

Aguepygueduolâ kehoem figueira iladyly.

<sup>20</sup> Xina emâ figueira sary iladyly. Toenzepa kehoem xina âsewânily. Aituo xina aguely:

– Inepa kehoem awârâ figueira sary niladai! – xina kely.

<sup>21</sup> Jesus xinaram aguely:

– On-honrumo kâunduly mâinwândylymo, âkealâ kuru ton-honre wawlyly mâinwândylymo warâ watay, adyesenry modo aiese lelâ âmaemo, figueira agânhetobyry takaze. Amânhetomoem on-honrumo kâundupygye idânârâ aiese lelâ âmaemo. Xirâ iwyrâ “Âxigegâ; paikaji adamegâ” myguelymo-ro watay, tâjidydâpa tâxigeeze tâise, paikaji tadameze warâ.

<sup>22</sup> Emakeze mawlylymo mâinwântuomo, mâenkadybymo âyanmo xuduze Deus. Xirâ mâuntudyzemo kuru wato – kely Jesus.

*Deuslâ Jesus igononi, âdaunlo kulâ mâkeba  
(Mc 11.27-33; Lc 20.1-8)*

<sup>23</sup> Jerusalemmram saintybyem, Jesus idâly Deus ety odaji. Târâ kurâdo nhenomedâdlyly ume, kurâdo eynynâ Deus agâ aguewâni modo iwymârydo, eagonro pymâ modo warâ eyam idâlymo. Aituo nhapâguelymo:

– Ânguyka tarâ Deus etydâ arâ amitoem agueim? – kelymo.

<sup>24</sup> Aituo Jesus in-hoguly:

– Apâiguezemo lâpylâ wao urâ. Uhoguduomo ise ânguy ugononibyry awlyly auguely – kely.

Aituo aguely:

<sup>25</sup> – Ânguyka ani João Batista inakanhe adâitobyry wâgâ âjityenydyby modo batiza nhetoem aguenri? Deuslâ? Âdaunlo uguondo kulâ? Uhoguwâdaungâ wao – kely.

Aituo myani âjigüe aguelymo:

– Iwerâ, ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mâinwâmpyra mawlylymo?” keze.

<sup>26</sup> “Uguondo kulâ ani João aitoem agueim, Deus mâkeba” kykeduo, kurâ domodo kagâ iewiânpadaynze. “Deuslâ João Batista igononi” tâkezemo inarry – kelymo.

<sup>27</sup> Awlylygue warâ in-hogulymo:

– Xina nutuwâbyra ânguy João Batista batiza nhetoem agueim awlyly – kelymo.

Aituo Jesus aguely:

– Arâ atayma auguepa lâpylâ ise urâ, ânguy xirâ agânhetoem ugononi awlyly-ro – kely.

*Jesus azagâ tâjimery wâgâ unâ nhegatuhoery*

<sup>28</sup> Jesus aguely pymâ modoram:

– Adâjitobyry ise unâ kâengatuly. Koendâne idataungâ mâuntuhomoem. Tâlâ myani uguondo azagâ tymegeuem. Tymery saguhobyryram aguely: “Ypi uva kâentâdobyry ezaxi isenra âsewanize mydâly” kely.

<sup>29</sup> Imery aguely: “Kâsewanidyzeba aze iwerâ. Udâpa ise aze” kely. Agueypyem olâ tunâry nhugukely. Idâly âpa ezaji âsewanize.

<sup>30</sup> Aguely lâpylâ iukonoam: “Uva kâentâdobyry ezaxi isenra âsewanize mydâly” kely. Mâkâma, “Idâze lelâ urâ, Pabai” keim. Agueypyem olâ myani âsewanize nâtâba.

31-32 Aituo Jesus aguely pymâ domodoram:

– Ádaunloka akaemo enday tunwym ize ato ara aini? – kely.

Aituo in-hogulymo:

– Iwaigoru ásewanize idâhobyry wâgâ – kelymo.

Jesus eyanmo aguely:

– Ákealâ awârâ. Mâkâ iukono ara kulâ olâ amidylymo. Impostu epywado emakewâni modo, pekodo inakanhe aini modo warâ mawânkâ yeinwântâmo. Ámaemo kulelâ yeinwântânry. Ádara Deus ize ato ara lelâ amidylymo awyly enomedâze keankâ mâkâ João Batista âewyly. Aguely mâindadyseba olâ keankâ âmaemo. Akaemo kurâdo izepa matomo keankâ toenzepa João aguely idani. Akaemo impostu epywado emakewâni modo, pekodo inakanhe aini modo warâ nâjityendâmo inakanhe adâitomobyry wâgâ, adâidyly nimomo warâ. Akaemo aidyly mâentumolâ, mâjityendylymo, inakanhe amidylymo mâinmolymo mipyra olâ keankâ âmaemo. Deus ize ato ara amitaymba âmaemo. Awylygue ise Deus pymâem atoram mydâpa mawylymo. Xirâ mâuntudyzemo kuru wato – kely Jesus.

*Tâwanuneim modo koendâpa aitobyry wâgâ Jesus unâ nhegatuhoobyry  
(Mc 12.1-12; Lc 20.9-19)*

33 Ilâpyryem Jesus tonlo modoram aguely:

– Idataungâ wao xirâ unâ. Tâlâ myani uguondo uva etâdybybeom. Aituo uva ejidy nhahodânehonly tuhu imâsedo modogue. Onwâgâ tâtagueim nhesaguehonly, uva ekuguehoem tâjihurugue, vinhu xygatoem. Âtâ imeimbyry kaynâ olâ-ro waunlo aienehonwânmy tâmagazeim enuagaendo, ânguydo imeom nady saguwâni modo enuagaendo warâ. Ilâpyryem myani uva ejidy etaynrin modope nhedyly. Warâ myani eyanmo aguely: “Ypi mâendylymo-ro watay, uva xutuduo, epajigâze urâ agâmo” kely. Koendâ lelâ myani in-hogulymo. Aituo myani idânârâ âtunâguedybyem, âtâ anary iwaguenonra idâly.

34 Uva ekaunâdo odaji ituo myani tâmary modo ingonodyly, akaemo tâwaneim modoram nhekaunâdybymo ewy turâ emakeze.

35 Aituo myani ingonotyby modo idâlymo âpa ezaji. Saintuomo, tâzenagazeozemo myani uva ejidy etaynrin modoram. Adapiguolylo, âdyolylo, tuhugue tadamytâoze âdyolylo warâ myani aieholymo.

36 Aituo myani uva sodo eagonro tâmary modo ingonotondyly wâne, turâ emakeze. Adyetonzemo lelâ olâ myani.

37 – Ilâpyryem myani uva sodo tymery ingonodyly. “Ymery tokaleom awylygue âda nientaymbamo ise” tâkeduo myani ingonodyly.

38 Sodo imery saindyly tientuo myani âpa ezay tâwanuneim modo âjigüe aguelymo: “Uva ejidy sodo imery mâkâ âeni. Tunwym igueduo, mâkâ ise ipibyry sodo. Kydyânrene, nhunwym ipibyry kurâenlâ itoem” kelymo.

39 – Aituo myani mâkâ uva sodo imery nhawâdylymo. Sawânipyryem, âpa ezayba nhedylymo, tyân-hoem – kely Jesus.

40 Aituo Jesus adâkely idani modo nhapâigüewâdyly:

– Uva ejidy sodo odopâdyly watay, ise-ro? Ádaiehoze akaemo? – kely.

41 Aituo in-hogulymo:

– Todopâduo, tumunruneymo modo xyâen-honze mâkâ. Eagonro modo ise mârâ uva ejidy eniem nhekyly-ro warâ. Ipi eni iwelo modoma tienkaunâduo, sodo xurâ xuduze – kelymo.

42 Aituo Jesus eyanmo aguely:

– Deus itaumbry awo wâgâ iwenibyry mâintaimbymo enanâgüewâdaungâ.

“Tâlâ myani tuhu imeâgâkeba, âtâ itâdo.

Idânârâ itâdaynrin modo mârâ tuhu tâensemo,

mârâgue âtâ tintâdyzebamo olâ.

Deus xurâem olâ mârâ tuhu tywyneim kuru!

Kywymâry Deus induakeyby mârâ tuhu, âtâ itâdoem.

Deus anhetyby awylygue iwâkuruem awyly!”

warâ iwenibyem awyly – kely.

43 – Yizepa matomobyry enanâgüewâdaungâ. Awylygue judeu keba modoram ise âdara Deus kywymâryem idyly egatuly. Yeinwânsemo-ro warâ. Akaemo iwymâryem ise Deus, âwymârymoemba.

44 [Ânguylâ mârâ tuhu onwa ihugueyby, âdyâze. Ânguy onwalâ mârâ tuhu ihugueduo, samiunze] – kely Jesus.

45 Aituo ani akaemo kurâdo eynynâ Deus agâ agüewâni modo iwymârydo, fariseu domodo warâ Jesus unâ nhegatuhyby indadylymo. Tywâgâ aguely awyly nhutulylo myani,

Jesus izetonro keba tawylgyue, tâwanuneim modo âpa ezary sodo imery izepa atomobyry ara.

<sup>46</sup> Awylgyue Jesus tientadânehondyze idylymo, tyâen-hon-hoem. Âjigüe aguelymo:  
– Iweâ lelâlâ kianwânehonly watay, kurâdo kagâ iewiâpaze Xurâmoem, koendonro lelâlâ awâkâ Jesus, Deus eynynâ aguenri awâkâ – kelymo.

Awylgyue Jesus âdara niepyra awylymo ilâenlâ.

## 22

*Todohogüin-ho etyryam igâsedyby modo wâgâ Jesus aguehobyry  
(Lc 14.15-24)*

<sup>1</sup> Jesus âkelo unâ nhegatuly, tienomedâdomoem.

<sup>2</sup> Warâ aguely:

– Unâ segatuji wao, âdara Deus kaynonro kywymâryem lelâlâ idyly awylymo mâuntuhomoem. Tâlâ myani pymâ tynrenseim, tumuru ohogüin-hoem âty imâsedo aieni.

<sup>3</sup> Toenzepa myani kurâdo tâtyram âwinduase idâhoem ingâsedyby modo. Alâ ituo myani tâmary modo ingonodyly aguewâtobyry modo igâseze, âwinduase idâhomoem. Akaemo olâ myani tâtâdyzeba.

<sup>4</sup> Ine warâ myani tâmary eagonro modo ingonodyly. Warâ myani aguely eyanmo: “ ‘ Alâ pyni nâwanikeagui. Tapirâ tadygueim modo nâdyoaki, nâjihuoagui warâ. Alâ idânârâ. Yagâ âzetyguedaungârâ ’ keanry xina iwymâry ’ kewâtaunda kâingâsedaymyby modoram ” kely âty sodo.

<sup>5</sup> – Aituo myani emary modo idâondyly igâsedonzemo. Todohogüin-ho etyryam tâtâdyzeba olâ myani akaemo. Âsewanize lelâ myani idânârâ idâlymo. Tâlâ myani tyfazendaryanlâ âsewanize idâim, tylojaryanlâ âsewanize idâim warâ.

<sup>6</sup> Tâlâ lâpylâ olâ myani tygâseze idâppy modo sawâni, sapiogurim, xyârim warâ.

<sup>7</sup> Âty sodo tâmary modo enagazenibyry modo agâ iewiâpadyly myani. Aituo myani tyzodadury modoram aguely: “Iemary modo xyârimpyry modo xyâwâtaunda. Ijidadârymo iaduântaunda warâ ” kely. Tywymâry aguehobyry ara myani sodadu domodo aidyly.

<sup>8</sup> Ilâpyryem warâ myani aguely tâmary modoram: “Alâ wâne todohogüin-ho etyry. Kâingâsedaymyby modo olâ enra yagâ tâzetyguedyzeba. Awylgyue ise kâingâsedombyramo wawylly.

<sup>9</sup> Idâwâtaungâ arua oze. Idânârâ monhontybymolâ ise mâingâsegulyymo âtynra âetomoem ” kely myani âty sodo.

<sup>10</sup> – Aituo myani emarydo arua oze idâlymo. Idânârâ kurâdo tiontyby ara nhadylymo âtynra. Kurâ domodo inakanhe aitânyry modo, inakanhe aini modo alelâ myani nhakylymo. Saintybyem, âtâ tâjiwogonro iwâkuru tâduduoze myani eyanmo. Âty sodo ety tumyze myani.

<sup>11</sup> Inepa kehoem myani âty sodo egawândyly, saintyby modo edaenkuze. Akaemo duay tâlâ olâ myani uguondo âtâ iwâkurugueba kulâ âzetydâni, igâsedyby modo âtâ odaji egawântoem xuduypygueba kulâ.

<sup>12</sup> Aituo myani âty sodo mâkâ uguondo nhapâiguely: “Âdaituoka kâingâsedaymyby modoram kâunduypy âtâguepa âzetydâdybyem mawylly? ” kely eyam. Mâkâ olâ myani nihoguba.

<sup>13</sup> Aituo myani âty sodo aguely tâmary modoram: “Etaungâ awâkâ uguondo; kâingâsedyby modoram kâunduypy âtâguepa kulâ âzetydâdyly. Tarâpa tâise awâkâ. Emakâjiwâdaungâ. Ihugâjiwâdaungâ. Iamu odaji samewâdaungâ warâ. Myarâ samewâdyby modo âsenagazedoram, ohogüendoram, tyery nhaguhomoram warâ ” kely myani âty sodo.

<sup>14</sup> Arâ lâpylâ wâne, idânârâ kurâdo igâsedyly Deusgüe iwymâgoem. Aguipa kulâ olâ yeinwânni modo. Awylgyue ise aguipa kulâ lâpylâ Deus eydâ atoram idânri modo awylly – kely Jesus.

*Impostu epywadyly wâgâ Jesus nhapâiguehomobyry  
(Mc 12.13-17; Lc 20.20-26)*

<sup>15</sup> Jesus aguely tindatuo myani fariseu domodo âxiguely âtunâgueze, Jesus tienwendâdomoem. Warâ aguelymo:

– Moisés inweniby wâgâpa kulâ aguehoem aguyjiene – kelymo.

<sup>16</sup> Âtunâguedybyem tynnonro modo ewy, Herodes eynnonro modo ewy warâ Jesus agâ agueze ingonodylymo. Saintybyem, ingonotaymyby modo Jesusram aguelymo:

– Pymâ, konokuni keba mawylly, tutuze xina. Deus ize ato wâgâ âkealâ xina mâenomedâdyly. Iozeno lelâ amygueho, ânguy izepa awylly umelâ. Pymâdo tynrenseim modo ize ato amânhetoem kulâ amygueho mâungukewâbyra âmâ.

<sup>17</sup> Awylygue âdara impostu epywadyly wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu ebyry epywadyly? Koendâpa? – kelymo.

<sup>18</sup> César tiunâguedoem kulâ tapâiguelymo awyly xuturimbyryem olâ myani Jesus.

Aituo aguely:

– Koendonro emyenro wâne âmaemo, koendonro keba olâ âmaemo. Inra esagueyby odaji wâne ângyulâ ihugely myara wâne ienokudyze mawylymo.

<sup>19</sup> Moeda enetaungâ, pymâ Roma donro xurâem kiempywado – kely.

Agueduo moeda nhadylymo.

<sup>20</sup> Emaksi nhudulymo. Jesusram adapâigueolyo:

– Ângy emydy ekudoka xirâ wogonro? Ângy ezedy iwâgâ iweniby warâ? – kely.

<sup>21</sup> Aituo in-hogulyo:

– Roma donro kywymâry César ezedy, emydy warâ – kelymo.

Jesus aguely:

– César xurâ, Cesaranlâ xuduwâtaungâ. Deus xurâ, Deusranlâ xuduwâtaungâ warâ – kely.

<sup>22</sup> Jesus aguely tindatuo âseguâdadylymo. Napâigueombyra idylymo. Aituo idâlymo.

*Iguewâtyby modo kurâem itondyly wâgâ nhapâiguehomyry*

*(Mc 12.18-27; Lc 20.27-40)*

<sup>23</sup> Mârâ iguandyly wâgâlâ saduceu domodo ewy Jesus agâ âtunâgueze idâlymo. Iguewâtyby modo kurâem itondyly einwânni keba myani akaemo. Jesus iopaji saindylymo.

<sup>24</sup> Aguelymo:

– Idakâ, Pymâ. Moisés ezewenry tutuzelâ âmâ, iweâpa kydamudoem inweniby: “Uguondo tywydy namypalâ iguely-ro watay, iukonobyrylâ nohogüim iwydypyry agâ, imezeândoem. Aituo iamudo iazepy, igueypy imeryenlâ âdutuoly” kelype.

<sup>25</sup> Xina olâ ise warâ nhegatuly. Tâlâ myakâwâm sete uguondo modo âjiwaigoruem, âjiukonoem waunlo. Iwaigoru ohogüinly myakâwâm. Tywydy namypalâ iguely. Iukonobyrylâ myakâwâm ohogüinrim pypâ agâ.

<sup>26</sup> Mâkâ lâpylâ myakâwâm tywaigoru iwydypyry namypalâ iguely. Azagâ tokalâ ietomo iukono ohogüinly myakâwâm pypâ agâ. Mâkâ lâpylâ iguewâm, tywaigoru iwydypyry namypalâ. Tywaigoru iwydypyry namypalâ lâpylâ myakâwâm quatro ietomo, cinco ietomo, seis ietomo, sete ietomo warâ iguewâdylymo. Sete uguondo lelâ myakâwâm mâkâ pekodo agâ ohogüimby.

<sup>27</sup> Idânârâ mâkâ uguondo modo iguewâpygueduo myakâwâm, mâkâ pekodo iguely lâpylâ.

<sup>28</sup> – Xirâ xina apâiguedyze ato. Âkealâ kuru igueypy kurâem itondyly watay, âdaunlo uguondo akaemo sete ewy iwydyenka ise mâkâ, kurâem itonduomo? Idânârâ akaemo sete lelâ iwydyem ityby mawânkâ! – kelymo.

Âdalâ kulâ in-hoguly tientomoem kulâ olâ ara aguelymo.

<sup>29</sup> Aituo Jesus in-hoguly:

– Iozepa kulâ âunâgumo! Mâuntuwâbyra âmaemo Deus itaumbry awo wâgâ iweniby. Âdydo imeom aiese Deus ton-honre awyly, mâuntuba gâlâ âmaemo.

<sup>30</sup> Iguewâtyby modo kurâem itonze lelâlâ, nigueompyra tâitomoem. Anju domodo nohogüinwâbyra. Alâpylâ iguewâtyby modo, kurâem itonduo, nohogüin-ondaymbamo ise.

<sup>31</sup> Iozeno kuru iguewâtyby modo kurâem itonze kely mâintaimbaka minasemo? Enanâguewâdaungâ Deus Moisésram aguehobyry.

<sup>32</sup> Deus aguewânmy: “Deus urâ, Abraão, Isaque, Jacó warâ iDeusry; tarâlâ asaemo yagâlâ” kewândymy. Kurâdo enanaji olâ, Deus einwânni iguewâtyby modo, iguewâtybyem lelâlâ. Deus xurâem olâ akaemo igueypyemba, târâlâ akaemo Deus eydá atodâ. Arâ aguehobyry wâgâ Deus einwântaynrim modo nigueompyra awyly kiuntuly – kely Jesus.

<sup>33</sup> Jesus aguely tindatuo toenzeim keba gâlâ kurâdo âsewânily, arâ kurâdo nhenomedâduo.

*Deus aguiendyse ato*

*(Mc 12.28-34; Lc 10.25-28)*

<sup>34</sup> Saduceu domodo nhewentâguilyemba kehoem Jesus aguely, kely tindatuo myani fariseu domodo âtâdyguilymo.

<sup>35</sup> Moisés inweniby wâgâ enomedânibe myani akaemo ewy. Inakanhe kulâ Jesus aguedyse wâne myani. Awylygue Jesusram aguely:

<sup>36</sup> – Toenzepa Moisés kâzewenryem inweniby modo. Âdaunloka koendonro kuru? Âdaunloka awârâ modo takazeno kuru? – kely.

<sup>37</sup> Jesus in-hoguly:



– “Kywymâry Deus iwynedaungâ âdydo imeom, kurâ domodo warâ mâinwynedomo takaze kehoemo. Idânârâ ize matomo, Deus ize ato ara lelâ nidâ. Idânârâ angahumo oday âunâgomo Deus ize ato lelâ nidâ warâ.”

<sup>38</sup> Xirâ aguely mawânârâ tâzezewenry takazeno kuru.

<sup>39</sup> Eagonro tâzezewenry koendonro lâpylâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” kewândy Deus.

<sup>40</sup> Arâ aini kydatay, idânârâ Moisés inweniby aralâ aguidyly, Deus itaumbyry egatuwâni modo inweniby aralâ warâ – kely Jesus.

*Jesus, “Ânguyka Messias?” kehobyry*

*(Mc 12.35-37; Lc 20.41-44)*

<sup>41</sup> Târâ fariseu domodo âtâdyguybyem atay, Jesusram adapâigueolyo:

<sup>42</sup> – Âmaemoem, ânguyka Messias, inanjimo? Ânguy iweryppyry? – kely.

Aituo in-hogulyo:

– Davi iweryppyry ise Messias. Davi pymâem atobyry ara ise mâkâ tarâ onro anaym pymâem awyly – kelymo.

Aituo Jesus eyanmo aguely:

<sup>43</sup> – Iozepa kulâ amyguelymo. Tutuzelâ myakâwândy Davi, âdaunlolâ kurâ takaze kehoemo ton-honreim Messias awyly. Awylygue “Ywymâry” kewândy Davi Messiasram, niazepa awyly umelâ. Deus Ispiriturylâ mawânkâ eyam xutuen-hoim. Tutuzelâ âmaemo Davi inweniby:

<sup>44</sup> “Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,

âduery modo eon-honru kainly ara,

âdydo ara kulâ âhuru iaxi kânhedylymo ara’ kely Deus”

kely myakâwândy Davi inwenily.

<sup>45</sup> – Davilâ Messias tywymâryem awyly wâgâ aguewândymy. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze – kely Jesus eyanmo.

<sup>46</sup> Jesus aguely tindatuo ânguy adâkedyzeba idyly, âkealâ aguely awylygue. Ilâpyryenlâ, ton-honremba idylymo, sapâigueze.

## 23

*Fariseu domodo wâgâ, Moisés inweniby wâgâ enomedâni modo wâgâ warâ Jesus aguehobyry*

*(Mc 12.38-39; Lc 11.43,46; 20.45-46)*

<sup>1</sup> Ilâpyryem Jesus xinaram, kurâ domodoram warâ aguely:

<sup>2</sup> – Moisés inweniby wâgâ enomedâni modo, fariseu domodo warâ koendâ tutuzemo Moisés inweniby. Awârâlâ akaemo ewanu, Moisés inweniby wâgâ enomedâdylylâ.

<sup>3</sup> Awylygue aguedaymo, koendâ aguelymo idataungâ, idânârâ aguehomobyry ara aitaungâ warâ. Earamo adâiseba olâ itaungâ. Koendâ lelâlâ wâne nhenomedâdylymo.

<sup>4</sup> “Aiekâ” tâkehomybyry ara anipyramo lâpylâ olâ. Tâjienwyeno tâmânreim sanâdyly tâmaenzeba ato ara awârâ nhenomedâdomo, tâmaenzein-embra awyly. Akaemolâ nemaembamo, ânguy tienmawyadâdomoem.

<sup>5</sup> Tâzehogueoly kulâ ize atomo. Tâjituby wâgâ Deus itaumbyry inwenilymo watay imeâgâemba kehoemo tâjituby tywendy wâgâ, tâwâry wâgâ warâ nhekâjilymo. Etaungâ etymo. Tâty tywogonro wâgâ imâem kehoem panu ihomigadyby nhekâjien-honlymo, tynrentomoem kulâ.

<sup>6</sup> Âtâ tâdâtâdygyho odaji tâtâduomo, tâgareim ekado wâgâ ekadylymo, arâ lâpylâ âty mododâ.

<sup>7</sup> Âdykâlâ kurâdo âtâdygyho einkâ takaduomo, mâkâ modo tâdaenkudyzemo, tynrendysemo warâ inanry. “Konomedâni” kelygue lelâ tâzekedyze awylymo.

<sup>8</sup> – Urâ lelâ inomedâni kuru. Awylygue “Ienomedâni” myguehondyze tâiseba itaungâ. Agonromo takazeno mâkeba âmaemo; idânârâ âzekiba âmaemo, âjiukono, âjiuwaigoru waunlo ara lelâ.

<sup>9</sup> Tunwyune lelâlâ wâne âmaemo, tarâ onro wâgâ. Deus kaynonro olâ unwânmo kuru âgunimopyry.

<sup>10</sup> Nhenimope lelâlâ wâne âmaemo, “Pymâ” myguehomo. Deus kaynonro olâ âwymârymo kuru.

<sup>11</sup> Âduaymo tynrenseimbe-ro watay, imawyadâdâmo.

<sup>12</sup> Koendonroem tawyly wâgâ aguewâni modo, tynrempa âiehoze. Koendonroem tawyly wâgâ aguedânry modo olâ, âdyren-honze – kely Jesus.

*Jesus ton-honre aguehobyry koendâ lelâ aini emyenro modoram  
(Mc 12.40; Lc 11.39-42,44,52; 20.47)*

<sup>13</sup> Aituo Jesus aguely, Moisés inweniby wâgâ enomedâni modoram, fariseu domodoram warâ:

– Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendâ lelâ aini emyenro wâne âmaemo, koendonro aieni keba olâ âmaemo. Deus kaynonro âwymârymoem awyseba âmaemo; kurâ domodo iwymâryem idyseba warâ. Pyanta kadiadugue enahuimbyryem xave soeni emyenro âmaemo, igawâmpyra mitomoem, tâgawândysedo modo mâenkaunânehomba mitomoem lâpylâ warâ.

<sup>14</sup> [– Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro ara wâne amyguelymo, koendonro aieni keba olâ âmaemo. Pekodo pypâ modoram amyguelymo inanry: “Xinalâ ise âsejiguymo eni; tusonebama âmaemo” myguelymo. Isejiguymo âmaemoem mânhetomoem kulâ olâ mâenokudylymo. Deus agâ amyguedaymo, imeâgâemba kehoem amyguelymo, koendâ igaromoem kulâ. Awlygyue ise Deus inagazedilymo, eagonro modo takaze kehoem.]

<sup>15</sup> – Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro wâne âmaemo, koendonro keba aieni olâ âmaemo. Taypa kehoem wâne mydâlymo, kâmayno einkâ kehoem akadylymo warâ wâne mâinwânkylmogogue kurâdo enomedâze. Arâ amidilymo, aguipa kurâdo mâenomedâdomo tyeinwântoem, saguho tâzezewenry inmôly umelâ. Mâenomedâdomo einwânni modo inakanhe kehoem adâisemo-ro warâ, amânhekylymo takaze kehoem. Agâmolâ ise idâlymo peto nhântânry onwanji.

<sup>16</sup> – Âmaemo Moisés inweniby wâgâ enomedâni modo, fariseu domodo warâ toenzepa âsenagazeze âmaemo! Epy eagonro epy sakobâni ara kulâ âmaemo. Inanajimo, Deus ety oday ourugue xygatyby modo tywyneim kuru, Deus ety takaze. “ ‘Tâwâlâ ise Deus ety adakalaguely, auguehobyry agânhepyra urâ watay’ myguelymo-ro watay, tâwâlâ ‘Aiese urâ’ myguehobyry amânhepyra mawilymo. ‘Tâwâlâ ise Deus ety odano ourugue xygatyby modo âjimatywâdily, auguehobyry agânhepyra urâ watay’ myguelymo-ro watay olâ, ‘Aiese urâ’ myguehobyry aietaungâ” warâ inanry mâenomedâdilymo.

<sup>17</sup> Ândonro âmaemo. Epy emyenro âmaemo! Deus ety tywyneim kuru, iodano modo takaze. Mârâ ioday awylygue kulâ awârâ modo iwynu.

<sup>18</sup> Inanajimo, awârâ Deusram xuduypy tywyneim kuru, mesa Deusram xuduypy ekanâdo, altar takaze. “ ‘Tâwâlâ ise altar inakanhe idily, auguehobyry agânhepyra urâ-ro watay’ myguelymo-ro watay, tâwâlâ ‘Aiese urâ’ myguehobyry amânhepyra mawilymo. ‘Tâwâlâ ise Deusram kâunduyy inakanhe idily, auguehobyry agânhepyra urâ-ro watay’ myguelymo-ro watay olâ, ‘Aiese urâ’ myguehobyry aietaungâ” warâ mâenomedâdilymo.

<sup>19</sup> Epy emyenro âmaemo! Deusram mâengamelymo âdy mâkeba mâkâ xurâem, ety odano mesa onwa mâenkanâdilymo iraynâ.

<sup>20</sup> Awlylygue altar iwogonro tynrense kurâ watay, altar, iwogonro modo alelâ kiynrenkyly.

<sup>21</sup> Deus, ety alelâ tywyneim. Deus ety tynrense kurâ-ro watay, alâpylâ Deus kiynrendily.

<sup>22</sup> Deus eydâ ato wâgâ aguykely watay, Deus wâgâ lâpylâ aguykely, mâkâlâ mawânkâ pymâ ton-honreim awâtârâ.

<sup>23</sup> – Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro kehoem âmaemo, koendonro aieni keba olâ. Dez âsejiguymo ewy, tokalâ inanry mâundulymo Deusram, Moisés inweniby agueho ara. Âpa ezano pyni ekubâzeândo ewy warâ inanry Deusram mâundulymo, hortelâ, erva-doce, cominho, awârâ modo. Âdainkâba awârâ modo mâundulymo Deusram. Deus xurâem tywyneim kuru amânhepyra olâ minasemo. Âdypebaom, kaikânro modo warâ mâintyendaymba minasemo. Ioze lelâ amipyra, Deus mâinwâmpyra âmaemo warâ.

<sup>24</sup> Epy eagonro epy sakobâni emyenro âmaemo. Toenzepa kuru Moisés inweniby modo wâgâ kulâ mâtynanâdilymo; mârâ tywyneim kuru pylâ amânhepyra âmaemo-ro. Okumo ikano mazagâ mainguelymo, camelu pylâ monwonlymo-ro myara.

<sup>25</sup> – Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Moisés inweniby ara amidyse mawilymo umelâ, inakanhe kulâ adâiselâ âmaemo tyewiâpazelâ warâ. Tâdâjitoquyly tâkeze minasemo, ize matomo mâenmakehomoem. Tâlâ wâne kopu, prato warâ ikaynâ lelâ nhagokely, ioday pylâ nagokeba waunlo emyenro âmaemo. Deus ize ato ara adâjidyly mâuntuba olâ âmaemo.

<sup>26</sup> Epy ara kulâ âmaemo, fariseu domodo. Deus ize ato ara lelâ aitaungâ. Aituomoma ise Deus tywykeba nhedylymo. Kopu koendâ sagokeyby ara ise âmaemo, kuoho, odaymo alelâ.

<sup>27</sup> — Moisés inwenibiy wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Igueypy etadâdo emyenro âmaemo! Kuoho tywâkure kehoem tapekeingue iwâkudâdybyem awylygue, iodano olâ tâjibyry, tywângueim myara âmaemo.

<sup>28</sup> Koendonroem mawyse mawylimo kulâ, koendonro mâkeba âmaemo, angahumo oday âunârymo inakanhe lelâlâ — kely Jesus.

*Koendonro emyenro, koendonro aieni keba olâ waunlo modo enagazeze Deus (Lc 11.47-51)*

<sup>29</sup> Jesus aguely:

— Âmaemo Moisés inwenibiy wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, aunlo keba olâ âmaemo. Deus itaumbryry egatuwânibyry modo eguepybyry etadâdobyry nhangatay tuhu iwâkuru kehoem ekanâni âmaemo. Torre iwâkuru kehoem aieni âmaemo, koendonro modo iguewâtiby enanâgueho.

<sup>30</sup> Amyguelymo: “Tâlâ kurâ mârâ ume-ro watay, Deus emary modo kyânwâpyra tâise kurâ; kydamudo ara aguitaymba tâise kurâ” myguelymo.

<sup>31</sup> — Inakanhe mawylimo soense myguelymo wâgâlâ âdamudomo Deus emary modo xyârimpyry aralâ ânguydoem mawylimo mânehonlymo.

<sup>32</sup> Alâ ise amidylimo âdamudomo aitobyry aralâ. Âmaemo ise akaemo aitobyry takaze kuru inakanhe aini.

<sup>33</sup> Âgâu tyewiâseim emyenro âmaemo! Âgâu poji iaduly ume âsemagueze kewâni emyenro kulâ âmaemo! “Âsemagueze kurâ” myguelymo wâne. Peto nhântânry onwanji idâze lelâlâ olâ âmaemo.

<sup>34</sup> — Urâlâ ise ywâgâ aguenri âyanmo igononi. Aguelymo, mâinwantaguedyzeba olâ ise âmaemo. Akaemo ewy xyâze âmaemo. Akaemo ewy kruz onwa sakâjize âmaemo. Eagonro modo sapioguze âmaemo âtâ tâdâtâdyguyhodâ. Tâinkâ lelâba ise mâwinlymo, mâenagazedomoem.

<sup>35</sup> Âdamudomo kurâdo koendonro modo nhâhobyry wâgâ âmaemo ise tânagazezeim. Abel, Adão imery, âdaityby mâkeba myakâwândy saguhoem âdyoim. Alâ myakâwândy toenzepa âdaitânry modo âdyozesedyly. Xypyryem xyâpy myakâwândy Zacarias, Baraquias imery, âdyoly Deus etydâ. Mesa Deusram xuduypy ekanâdo, Âji Tynrenseim Kuru warâ ontay myakâwândy âdyoly.

<sup>36</sup> Idânârâ âdamudomo aitobyry modo wâgâ âmaemo xirâ umeno modo ise tânagazezeim. Xirâ mâuntudzemo kuru wato — kely Jesus.

*Jesus Jerusalém domodo wâgâ toenzepa kehoem itywandobyry*

*(Lc 13.34-35)*

<sup>37</sup> Ilâpygueduo Jesus aguely Jerusalém donro modo wâgâ, eydâmolâ waunlo ara lelâ:

— Âmaemo, Jerusalém donro modoram xirâ aguely. Iweâparoem, âjidadârymo donro modo Deus itaumbryry egatuwânibyry modo xyâwânmyo. Agui Deus ingonotaymby modo tuhugue tyâzemo myakâwâm. Arâlâ olâ toenzepa âwynedylymo. Aukuma wâne tymeombryry tawâry iaxi tydâtgyuze, tuan-hun-hoem, myarâ idânârâ nhedysemo wawyly. Agui olâ keankâ âmaemo ewy yizepaom modo.

<sup>38</sup> Deus odokezemo. Saguhoem wâne ani koendâ agâmo myarapa ise Deus. Âtâ sodokeyby ara ise âmaemo.

<sup>39</sup> Ietondaymba ise âmaemo, “Koendonro lelâlâ âmâ, Deus Ingonotyby” yam myguelymo ara. Xirâ mâuntudzemo kuru wato — kely Jesus.

## 24

*“Deus ety adakalagueoze” Jesus kehobyry*

*(Mc 13.1-2; Lc 21.5-6)*

<sup>1</sup> Jesus xina agâlâ âxiguely Deus ety idaserayba. Tâtâday, Jesus iopaji idâpyyem, xina aguely ani:

— Egâ xirâ Deus ety! Iwâkuru kehoem xirâ! — xina kely.

<sup>2</sup> Aituo Jesus aguely:

— Arâ wâne awârâ Deus ety imâsedo mâendylimo. Adainhoze olâ awârâ. Idânârâ adakalagueoze. Angato inkâba ise awârâ tuhu modo; ihugewâze awârâ onro onwa — kely Jesus.

*Jesus tâdâsenagazedily wâgâ aguehobyry*

*(Mc 13.3-13; Lc 21.7-19)*

<sup>3</sup> Iâpÿryem xina idâly iwyrã, Se Oliveira Ekaram. Târã Jesus ekadyly. Iopaji idâpÿryem xina nhãpãiguelly:

– Âdara kaise xÿpÿry iwaguepa idyly, xina nhutuly? Âdy kaise inepã modopãdo odaxi itybyem awyly xina nhutuho? – xina kely.

<sup>4</sup> Jesus in-hoguly:

– Inanaynmolã itaungã, kodopãdo wãgã ânguy inokubyramo itoem.

<sup>5</sup> Xÿpÿry etaji idyly ume, toenzepã ise “Messias urã, Deus Ingonotyby” kewãni modo. Toenzepã ise agueduomo âsenogudaynrã modo.

<sup>6</sup> Tãinkã lelãba âseguelymo, âdyãwãdylymo warã kely idase âmaemo. Tadahulizeba olã itaungã, awãrã modo egary mãindatuomo. Aise awãrã modo, âdÿpydãdo keba olã ise.

<sup>7</sup> Âkelo anano modo âdyãwãsemo; âjitanwebaom modo âdyãwãsemo warã. Tãinkã lelãba ise onro âzekãni. Âtã anakã pyni peba ise.

<sup>8</sup> Tãdãsenagazedly imãem isezedly, pekodo âsenagazedly xigãlegueam tymery iazehoem ewãnugue myara.

<sup>9</sup> – Yizepaom modo awãsemo, yeinwãndylymogue, asemo pymã modo enado. Toenzepã inagazenehonze, âhonzemo warã. Ynynonroem mawlymogue, toenzepã ise mãjiewãseolylo.

<sup>10</sup> Mãrã ume, toenzepã ise yeinwãndyly imowãni modo, nãzenagazeoba tãitoem. Yeinwãndyly imowãni byry modo, yeinwãni modo iewiãseze. Pymã domodo enagazenehonze.

<sup>11</sup> Kurãdo enokuni modope ise. Warã ise aguelymo: “Deus wãgã aguenri xina” kezemo. Kewãdylymo kulã olã ise. Toenzepã kurãdo enokuzemo.

<sup>12</sup> Tãinkã lelãba ise inakai modo awyly. Awylygue ise ânguy tagonrodo niwynebyra awyly. Peto wãneam tyãntoem âdiempa tãise, myara ise kurãdo âpÿnyedly adainly.

<sup>13</sup> Idãnrã awãrã emãenwãni byry modo olã âsemagaze. Aunloenã ise Deus agã awylymo.

<sup>14</sup> Tãinkã lelãba ise unã iwãkuru sani idãly. Deusgue tywymãgu wãgã aguelymo ise. Xirã modopygeduo ise kodopãdly – kely Jesus.

*Jesus Jerusalém adainholly wãgã aguehobyry*

*(Mc 13.14-23; Lc 21.20-24)*

<sup>15</sup> Jesus aguely:

– Âpanãgaze Deus izepãom kuru, mãkã inakai kuru. Jerusalẽmã ise âpanãguely, Deus ety oday, Deus unãry egatuim Daniel iwãgã aguehobyry. (Xirã itainwãni modo xutuze, âdara keze aguely awyly.)

<sup>16</sup> Mãkã inakai Jerusalẽmram saintuo, âmaemo Judẽia donro modo iwyrã âwientaungã, otoenze.

<sup>17</sup> Inepã kehoem âwientaungã. Itymo inatay âmaemo watay, tãwãnseba itaungã itymo odaji, âdylã ese.

<sup>18</sup> Âpã ezay âsewanize mataymo, inepã âwientaungã. Itymo mãungukehomo ese todopãzeba itaungã.

<sup>19</sup> Toenzepã âsenagaze pekodo modo ioday tymegeim, tuhuazeim modo warã. Tahule âwienniembãmo mawãnkã ise.

<sup>20</sup> Deusram ekadaungã, kopã umepã, tãzekobyzegueho odaypã warã, xirã tãdãsenagazedo saindyly itoem, inepã tãdãwientoem nudupa ise.

<sup>21</sup> – Ton-honre ise awãrã tãdãsenagazedly saindyly. Deus onro nhugutobyryenã arã kehoem tãdãsenagazedly peba awyly. Anitombyra ise-ro warã xirã emyenro kuru.

<sup>22</sup> Deus olã mãrã tãdãsenagazedo epagunãze, aisezedly lelã waypã itoem. Aypã watay, ânguy nẽmaenwãbyra tãise; idãnrã tadainze. Tynynonroem tinduekeyby modo wãgã olã Deus anhedlyly ise – kely Jesus.

<sup>23</sup> – Kodopãdo xutuze âmaemo, ânguy âdakepalã. Awylygue, “Anra merã Messias” kely mãindatuomo, kãzeinwãntãundã. “Awãtãrãlã awãkã Messias” kely mãindatuomo, kãzeinwãntãundã warã.

<sup>24</sup> Mãrã ume toenzepã ise konokuni modo. “Deus Ingonotyby urã” kezemo, kurãdo enokuze. “Deus keankã ugononi, xunãrybyry egatuze” kewãni modope lãpylã ise, kurãdo enokuze. Adyẽsenry modo kehoem aiesemo, kurã domodo iomazeãni aiesemo lãpylã warã. Idãnrã enokuze kezemo; Deus induakewãdyby modo enokuze kezemo lãpylã, akaemo olã ise nãzenokuoba.

<sup>25</sup> – Inanaynmolã itaungã. Âurudylymo olã waunroenã, mãrã ume mãzenokuoba mitomoem.

<sup>26</sup> Ânguylà, “Egâ. Messias naintai. Poji anaym mâkâ” kely-ro watay, kâzeinwântaundâ. Uize tâtâzeba itaungâ, kodopâdaymba ise urâ ilâem. “Messias naintai. Âtâ oday notoendai” kely-ro watay, kâzeinwântaundâ.

<sup>27</sup> Idânârâ kodopâdily esemo. Ielu wâne kau wâgâ, âzehoruguely xixi egaseho eynynâ, egawânto eynynâ warâ idânârâ nhetomoem, myara ise kodopâduo, idânârâ yaindily nhedylymo.

<sup>28</sup> Tywângueimpe atoram elaho modo âtâdyguely, ânguy “Târâ igueypy” keduo inkâba. Arâ lâpylâ ise kurâdorom kodopâdily âduuoly, ânguy âdakepalâ – kely Jesus.

*Uguondo Kaynâpa Âetyby odopâdo xutuho*  
(Mc 13.24-27; Lc 21.25-28)

<sup>29</sup> Jesus aguely:

– Mârâ tâdâsenagazedily sakabygueduo, xixi, nunâ warâ tohoreba ise. Ximukâ modo kau wâgâpa ihuguewâze. Kaynâ tyngataymby modo ihugueânze Deus.

<sup>30</sup> Ilâem ise kau oday âepanâguely urâ Uguondo Kaynâpa Âetyby kodopâdily xutuho. Idânârâ nynnâbaom modo mârâ tientuo, âseanezemo. Eunu duay ytâguely esemo. Pymâem kuru wawylygue, toenzepa won-honru enehonze.

<sup>31</sup> Târâ kaynâ trombeta idyen-honze urâ. Anju domodo igonose urâ, idânârâ âtâ anakâ Deus iduakeyby modo idâtyguyze, xixi egaseho eynynâ, egawânto eynynâ, norte eynynâ, sul eynynâ warâ – kely.

*Jesus odopâdo xutuhobe ise*  
(Mc 13.28-31; Lc 21.29-33)

<sup>32</sup> Jesus aguely:

– Inepa kodopâdily awyly xutuhobe ise, iwaguepa kopâ ihugueho awyly xutuho ara. Etaungâ figueira. Iwatary modo ikuandaynly, sary ilusewâdily warâ watay, tutuze âmaemo kopâ ume idily awyly.

<sup>33</sup> Myara lâpylâ ise xirâ auguehobyry modo aidily adaguly mâentuomo, kodopâdo iwaguepa awyly mâuntulymo.

<sup>34</sup> Aise xirâ âdydo imeom, idânârâ xirâ onro anano modo iguelymo iraynâ.

<sup>35</sup> Kau, onro warâ adainze. Auguehobyry olâ ise nadaimpa, nâtugueba warâ; aunloenlâ ise. Xirâ mâuntudzemo kuru wato – kely Jesus.

*Ohondybyem lelâ itaungâ. Jesus odopâdily iraynâ*  
(Mc 13.32-37; Lc 17.20-37)

<sup>36</sup> Jesus aguely:

– Kunwym Deus kulelâ xuturim kuru âdara kodopâdily awyly, kopae atay, peto oday atay warâ. Ânguy xirâ anano nutuwâbyra. Anju domodo nutuwâbyra. Urâ Deus imerylâ kâuntuwâbyra urâ.

<sup>37</sup> Noé umenobyry ara, arâ lâpylâ ise urâ Uguondo Kaynâpa Âetyby kodopâduo.

<sup>38</sup> Saguhoem, paru inwenlygue tadainlymo iray, kurâdo xara tatomo aralâ mykâinane. Âwinduadilymo. Adakuilymo. Salokuzenomo modo, âwynsaundo modo warâ ohogüinlymo warâ myakâwândy aidilymo, Noé pepi imâsedo âtâ emyenro tyngatyby odaji âxiedily iray.

<sup>39</sup> Inepa iguein-em tawyly nutuwâbyramo myakâwândy. Deus olâ myakâwândy toenzepa kehoem kopâ tugonose idânârâ adain-homoem, myara lâpylâ ise agui kurâ domodo kodopâdily nenuembyra awyly.

<sup>40</sup> – Kodopâduo, ynyonro modo sase urâ. Ynynâbaom modo olâ ise urâ kamyra. Ynyonro modo, ynynâbaom modo agâ on-hoan-ro watay, ynyonro modo lelâ ise taseim Deus eydâ atoam. Azagâ uguondo âpa ezay tâwaneim, ynyonro, ynynâbaom warâ watay, ynyonro adahoze Deusram, eagonro olâ âjionze.

<sup>41</sup> Azagâ pekodo trigu sakoim, ynyonro, ynynâbaom warâ watay, ynyonro adahoze Deusram, eagonro olâ âjionze.

<sup>42</sup> Ywânwântâlâ itaungâ. Mâuntuwâbyra âmaemo, âdara urâ Uguondo Kaynâpa Âetyby kodopâdily awyly.

<sup>43</sup> Âdara tâmagazeim saindily awyly nutuwâbyra âtâ sodo. Tutuze-ro watay, tânanaynlâ tâise, tysejiguy tienmakehoem.

<sup>44</sup> Kodopâdily tânuenzelâ itaungâ; inananmolâ lâpylâ itaungâ warâ. Ienuendilymo ume inkâba ise urâ Uguondo Kaynâpa Âetyby kodopâdily. Xirâ mâuntudzemo kuru wato – kely Jesus.

*Tâwaneim koendonro wâgâ, inakai wâgâ warâ Jesus unâ nhegatuhobyry*  
(Lc 12.41-48)

<sup>45</sup> Jesus aguely:

– Unâ segatuji wao, âdara kodopâdily awyly mâuntuhomoem. Fazenda sodo taypa tâtâly iraynâ, tagâ tâwaneim tonomegueim, koendonroram watâkeze: “Udâly wao ise. Âmâ ise iety, ysejiguy, yagâ tâwanuneim modo warâ eni. Kopaelâgâembaba ise akaemo mâwandily. Âdy ize atomo âundugâ” tâkeze mâkâ eagâ ewano, tâtâday. Tâwaneim koendonro eagâ tâwano tânuenze myara ienuendaungâ.

<sup>46</sup> Fazenda sodo aguehobyry ara aidily-ro watay, koendâ ise iwymâry eagâ awyly, todopâduo.

<sup>47</sup> Tâmaryam aguely ise: “Koendonro lelâ âmâ. Koendâ lelâ tâwanuneim modo medâ. Awylygue idânârâ ysejiguy modo eniem ise âmâ” kely.

<sup>48</sup> Koendâ tâwaneim keba mâkâ watay olâ eagâ tâwano aguehobyry ara anipyra. “Tahule nodopâdaymba ise mâkâ sodo” kely tyangahu oday.

<sup>49</sup> Adâkeduo, koendâ tagonro modo nepyra. Tapioguzemo. Âtydâ kulâ warâ. Âwinduadyly, adakuily, toku ikaji kehoem idily toku ikano modo agâ warâ aidily.

<sup>50</sup> Mâkâ tâwaneim tynwânwândily umepa iwymâry saindily.

<sup>51</sup> Eagâ ewano mâkâ tâwaneim agâ tyewiâpaze, tâdâsenagazedoram talehoze-ro warâ, Deus einwântânry modo âsenagazedoram. Ohogüenze, tyery saguze warâ tâsenagazedilygue – kely Jesus.

## 25

### *Jesus dez âwynsaundo wâgâ unâ nhegatuhojyry*

<sup>1</sup> Jesus aguely:

– Unâ segatuji wao, âdara Deus kaynonro kywymâryem lelâlâ idily awyly mâuntuhomoem. Tâlâ myani kopae salokuzenomo ohogüin-ho etyry. Kuoho myani akaemo dez âwynsaundo modo mâkâ salokuzenomo enuenze. Lamparinague tâmatunemo myani.

<sup>2-4</sup> Cinco lelâ myani akaemo âwynsaundo modo ewy tonomegueim. Tумыке myani tylamparinary nhadylymo, sapedondo warâ. Cinco âwynsaundo modo myani tonomegueim keba. Tумыке lelâ tylamparinary nhadylymo; sapedondo napyramo olâ myani.

<sup>5</sup> Tahuleba idily myani ohogüinrim. Aituo myani idânârâ âwynsaundo modo xuedunu iwynely, xykylymo.

<sup>6</sup> – Kuetâji xuagueânimo adaenkely: “Etaungâ! Ohogüinrim saindily! Iotaungârâ” kely.

<sup>7</sup> – Aituo myani âwynsaundo modo xuagewâdily. Tylamparinary nhântybyem awyly nhedylymo, taseba awylygue. Aituo tonomegueim modo nhapadylymo, nheganâdilymo warâ.

<sup>8</sup> Aituo myani akaemo âwynsaundo modo tonomeguenry aguely: “Âdiempa wao xina ilamparinary eoku âunduwâtaungâ. Xina ilamparinary nhâdily olâ” kelymo.

<sup>9</sup> – Tonomegueim modo olâ en-hem kepa. Aguelymo myani: “Sapedondo xina nhentyby nuduwâpyra âmaemoem. Âlamparinarymo eoku anâtaunda” kelymo.

<sup>10</sup> – Agueduomo myani akaemo tonomeguenry modo idâlymo tylamparinary eoku sanâse. Nodopâbyramolâ myani ohogüinrim saindily. Akaemo tonomegueim modo myani ohondybyenlâ tawlylygue, eagâlâ egawândilymo âtyam. Warâ myani pyanta âzenahuoly, xavepe âieholy warâ.

<sup>11</sup> – Ilâpygueduo myani akaemo âwynsaundo modo tonomeguenry saindilymo. Ohogüinrinram adaenkelymo: “Yataen-ho! Yataen-ho! Xina egawântoem pyanta enahunguegâ” kelymo.

<sup>12</sup> – Ohogüinrim eyanmo aguely: “Kâenahungueba ise aze. Tarâpa itaungâ. Yataen-ho mâkeba âmaemo” kely. Warâ myani âwynsaundo modo, tonomegueim, tonomeguenry warâ aidilymo – kely Jesus.

<sup>13</sup> Warâ Jesus xinaram aguely:

– Inanaynmolâ itaungâ! Mâuntuwâbyra ise âmaemo âdara kodopâdily – kely.

### *Azagâ tokalâ warâ tâwaneim modo wâgâ unâ Jesus nhegatuhojyry (Lc 19.11-27)*

<sup>14</sup> Jesus aguely:

– Unâ segatuji wao âdara Deus kaynonro kywymâryem lelâlâ idily awyly mâuntuhomoem. Uguondo tydinherugeim âkelo âtâ anaxi tâtâly iraynâ myani tagâ tâwanuneim modo ingâsedily. Eyanmo aguely: “Koendâne ysejiguy etaungâ. Dînheru xirâ âyanmo kâundily. Imâem ienehowâdaungâne xirâ âyanmo kâundupy” kely myani.

<sup>15</sup> Aiedly nhtulymo aralâ olâ myani nhuduly, imâem nhetomoem. Saguhoram quinhentas moedas ouruguetu modo\* myani nhuduly, nhatanoram duzentas moedas, azagâ tokalâ ietomoram, cem moedas warâ. Aitybyem myani idâly.

<sup>16</sup> Mâkâ quinhentas moedas lelâ emakerimbyry âdydo imeom nhanâdyly, tyanâtyby vende nhedyly warâ myani mârâ dinherugue. Alâ imâem nhenehonly; mil moedas lelâ idlyly.

<sup>17</sup> Mâkâ duzentas moedas emakerimbyry, alâpylâ myani âdydo imeom nhanâdyly, tyanâtyby vende nhedyly warâ mârâ dinherugue. Alâpylâ dinheru imâem nhenehonly; quatrocentas moedas nhedyly.

<sup>18</sup> Mâkâ cem moedas emakerimbyry olâ myani anipyry. Tâtagueim tâsagueze, dinheru tâpyâze warâ myani.

<sup>19</sup> – Iweâpa itybyem myani mâkâ dinheru sodo odopâdyly. Saintybyem myani tokalâ, tokalâ warâ tâmary modo ingâsedly, dinheru âdanhetybymo awyly tiuntuhoem.

<sup>20</sup> Saguhoram kuru saini myani mâkâ quinhentas moedas emakerimbyry. Mil moedas myani nhuduly eagâ tâwanonra. Aituo myani aguely: “Pymâ, quinhentas moedas keankâ yam mâunduly. Âdydo imeom sanâdâ, kanâtyby vende xiedâ warâ, quinhentas moedas kânhetondoem. Anra, mil moedas lelâ âdinheruru” – kely.

<sup>21</sup> – “Koendâlâ myze amidâl!” kely myani iwymâry. “Koendonro âmâ. ‘Aiekâ’ uguehobyry amiendâ. Koendâmy awârâ âdiempa dinheru kâunduyppy mewani. Âdydo imeom manâdâ, manâtyby vende miedâ warâ. Aituo, imâemba kâunduyppy imâem mânhenhon-hobyry wâgâ, imâem ise âmâem kâunduly. Yagâ âzetyguegârâ” kely myani iwymâry.

<sup>22</sup> – Ilâpyryem myani duzentas moedas emakerimbyry idâly. Aituo aguely: “Pymâ, duzentas moedas keankâ yam mâunduly. Âdydo imeom sanâdâ, kanâtyby vende xiedâ warâ âdinherurugue, duzentas moedas kânhetondoem. Anra xirâ quatrocentas moedas lelâ âdinheruru” – kely.

<sup>23</sup> – “Koendâlâ myze amidâl!” kely myani iwymâry. “Koendonro âmâ. ‘Aiekâ’ uguehobyry amiendâ. Koendâmy awârâ âdiempa dinheru kâunduyppy mewani. Âdydo imeom manâdâ, manâtyby vende miedâ warâ. Aituo, imâemba kâunduyppy imâem mânhenhon-hobyry wâgâ, imâem ise âmâem kâunduly. Âekâ. Yagâ âzetyguegârâ” kely lâpylâ myani mâkânra.

<sup>24</sup> – Aituo myani mâkâ cem moedas emakerimbyry idâly, aguely: “Pymâ, ânguy ityeni keba mawyly, tutuze urâ. Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro.

<sup>25</sup> Âytadâ, awylygue âdinheruru ondaxi sepyâdâ. Egâ, anra tarâ dinheru mâunduyppy” kely.

<sup>26</sup> – Iwymâry eyam aguely myani: “Inakanhe tâwaneim, xynumi warâ myanze âmâ. Yam amyguely enra: ‘Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro’ mygueanse.

<sup>27</sup> Ydinheruru imâem itoem âdy amânhedyseba matay, dinheru xynanâdaynrim modoram metadânehondyze banco odaji. Imâem ydinheruru tyenehonze tâise akaemo. Arâ tâise kodopâduo imâem kâenmakely” kely. Aituo iwymâry aguely eagonrodoram:

<sup>28</sup> “Merâ inakanhe tâwaneim emaymba moeda emakewâdaungâ. Mil moeda modopeonra xuduwâtaungâ” kely.

<sup>29</sup> “Mâkâ toenzepa tâlânro, imâem emakeze, iwerâ tâlâ tato takaze. Mâkâ agui ipaom olâ, âzemaqueoze iwerâ aguipa tâlâ ato.

<sup>30</sup> Iamu odaxi awâkâ tâwaneim inakai samewâdaungâ, toenzepa âsenagazedoem. Ohogüenze, tyery saguze warâ awâkâ târâ tâsenagazedlylygue” kely myani iwymârymo tonlo modoram. Warâ myani akaemo azagâ tokalâ warâ tâwaneim aidlylymo – kely Jesus.

*Deus eynnonro, eynynâbaom modo warâ iduakeho*

<sup>31</sup> Jesus aguely xinaram:

– Pymâem kuru wituo ise kodopâdyly. Anju domodo agâ ise kâewyly. Yaimpygueduo, pymâ tynreim ekado wâgâ ise iekadyly.

<sup>32</sup> Tâinkâ lelâba ise anju domodo adakobâdyly kurâdo idâtygyuze. Kaneru eni wâne, kaneru modo âikânra tyese kabra modo duaypa myara ise ynynonro modo âikânra âedylymo, ynynonro keba modo duaypa.

<sup>33</sup> Yahoru eynynâ ise ynynonro modo kâenjitâdyly. Pâem eynynâ ise ynynâbaom modo kâenjitâdyly, tyguelâ itomoem.

\* 25:15 Gregüem aguehobyry, cinco talentos, azagâ talentos, tokalâ talento warâ. Quinze anos lelâ kâwanu ebyry myani tokalâ talento. Awylygue, xuduyppy toenzepa dinheru awyly, toenzepa lelâlâ. Setenta e cinco anos âsewanizeze tatobyry ebyry waunlo ara myani waunro nhemakely. Eagonro myani trinta anos âsewanizeze tatobyry ara. Tokalâ ieto uguondo myani quinze anos âsewanizeze tatobyry ebyry ara.

<sup>34</sup> Aituo ise yahoru eynnonro modoram aguely: “Yagâ âetaungâ, Deus xurâem tywyneim âmaemo. Deus idânârâ nhugudyly iraynâlâ myakâwândy, âmaemoem koendonro nhekanâdily. Deusgue tywymâgueim modo xurâ tâlâ mâkâ, mârâ koendonro lelâlâ.

<sup>35</sup> Koendâ lelâ ise Deus agâmo, koendâ yagâ mawwylmogue. Iewindy ume, uwamâmo. Yatuandyly ume, parugue yakuiwânmo. Itymo anakâ kadakobâdily ume, itymodâ ykyânâmamo, utubamolâ.

<sup>36</sup> Iety ywogonro muduwânmo, tâtyemba wawily ume. Iewânmo ume, wonmâmo, Iewiânâmamo warâ, kua witoem. Kadeia oday watay, yam IU ise mydâwânmo, womazeânze” keze urâ nynnonro modoram.

<sup>37</sup> – Aituo ise koendonro modo yam aguely: “Pymâ, xina nutuwâbyra âdakeze amyguely awily” kelymo ise. “Âdykâ tâty anaym xina nhetaymba ani. Inwindy ume xina âwapyra ani. Âdykâ xina akuiwâbyra, atuandyly ume.

<sup>38</sup> Âykyândaymba lâpylâ warâ xina tâty oday. Tâtyemba mawily ume, xina itydâdaymba ani.

<sup>39</sup> Iwânmo ume, ontaymba, iweântaymba warâ ani xina, kua mitoem. Kadeia oday matay, omazeânze xina nâtâwâbyra ani” kezemo yam.

<sup>40</sup> Warâ ise aguely eyanmo:

– “Ynnonro modoram pyini, paru, âtâ xikyhomomo warâ muduwânmo. Ynnonro modo ewânmo ume, kadeia oday awilymo ume warâ, iomazeânze mydâwânmo. Ukono emyenro modo koendâ memâmo. Kaikânro modo, tâwâneim modo warâ koendâ mâendilymo-ro watay, urâlâ mâenkylymo” keze urâ yagonro modoram. Xirâ mâuntudyzemo kuru wato.

<sup>41</sup> – Warâ ise akaemo pâem eynnonro modoram aguely: “Ydâpa itaungâ, âmaemo Deus izepa ato modo. Inakanhe kehoem ise mâsenagazedilymo. Mârâ peto nhântânry Diabu ejidyem, eanjury kadopâ keho modo ejidyem warâ Deus anhyetyby odaji idâze âmaemo. Âdara igasewâbyra ise âmaemo târâpa.

<sup>42</sup> Koendâ inkâba ani iedylymo. Awilygue ise mâzenagazeolyo lâpylâ. Iewindy ume, uwapyra mataunaguynre. Yatuandyly ume, yakuiba mataunaguynre parugue.

<sup>43</sup> Itymo anakâ kadakobâdily ume, itymodâ ykyâmbyra mataunaguynre. Tâtyemba wawily ume, iety ywogonro mâundupa mataunaguynre. Iewânmo ume, wompyra, iewiâmbyra warâ mataunaguynre, kua witoem. Kadeia oday watay, yam IU ise mydâwâpyra mataunaguynre womazeânze” keze urâ nynnâbaom modoram.

<sup>44</sup> – Warâ ise yam aguelymo: “Âdykâ nhetaymba xina. Awilygue ani koendâ tawily tienehon-hoem xina aniempyra awily. Inwindy ume xina âwapyra; atuandyly ume, xina akuiba, âdykâ xina agâ mipyra mawilygue. Tâtyram âykyânze xina apyra; ity owogonro xina nudupa, xina agâ mipyra mawilygue. Iwânmo ume, kadeia oday mawily ume warâ xina âyam IU nipyra, xina âtuba awilygue” kezemo yam.

<sup>45</sup> – Aituo ise aguely eyanmo: “Âdykâ kaikânro modo mâenmawiyadâdaymba ani âmaemo. Akaemo mâenmawiyadâdaymba âmaemo watay, urâlâ mâenmawiyadâdizeba matomo” keze urâ eyanmo. Xirâ mâuntudyzemo kuru wato – kely.

<sup>46</sup> – Akaemo nynnâbaom modo idâlymo ise myarâ kurâdo inakai modo âsenagazedoram. Ynnonro modo olâ Deus agâ idâze aunloenlâ – kely Jesus.

## 26

### *Jesus xyâly wâgâ aguehomobyry*

*(Mc 14.1-2; Lc 22.1-2; Jo 11.45-57)*

<sup>1</sup> Waunroem aini modogue xina tienomedâbygueduo, Jesus xinaram agueondily:

<sup>2</sup> – Tutuzelâ âmaemo, kopaelâgâbygueduo kâtyry Pâscoa awily, kydamudo Egitodâba âsemaguehomobyry etyry. Yizepaom modo yawânehonzemo, kruz onwa yakâjien-honzemo yigehoem warâ. Warâ ise ayedylymo urâ Uguondo Kaynâpa Âtyby – kely xinaram.

<sup>3</sup> Aguehobyry ara kehoem aidily. Kurâdo eynynâ Deus agâ aguewâni modo iwymârydo, kywymâry modo warâ Caifás ety imâsedo oday myani âtâdyguylymo. Caifás ani kurâdo eynynâ Deus agâ aguewâni modo iwymâry kuru.

<sup>4</sup> Âjigie aguelymo myani, âdara Jesus tientadânehonly, tyâen-honly warâ wâgâ. Kurâ domodo nhutudyzebamo olâ myani. Aituo myani aguelymo:

<sup>5</sup> – Koendâpa ise enra âty ume sawâdily. Toenzepa ise kurâdo âzetygueni modo. Jesus etadâdobyry egary indadylymo watay, kagâ iewiâpazemo, âjitoguyzemo warâ – kelymo wâne myani.

### *Pekodo Jesus nhangahu onwa uriza nhapâdobyry*

*(Mc 14.3-9; Jo 12.1-8)*

<sup>6</sup> Jesus agâ xina idâondily âtâ anary Betanianra. Târâ tatay xina idâly Simão tâjimitugueygue tâwâneimpypy etyram.



<sup>7</sup> Xina âwinduadyly ume, pekodo Jesus iopaji saindyly. Alabastrogue uriza etary xygaty-bygue tãase; uriza tâwãenseim nardogue tummyke ani mârâ. Uriza tyânringueim nhapâdyly Jesus nhangahu onwa.

<sup>8</sup> Pekodo uriza nhapâdyly tientuo aidyly xina nehoguebyra. Aituo âjigüe xina aguely:

– Etaungâ! Awâkâ pekodo uriza tâwãenseim alâ kulâ nhumedlyly!

<sup>9</sup> Awârâ uriza vende iedylylâ-ro watay, toenzepa tâise idinhergu. Koendâ tâise vende nhedyly, âdy pebaom modoram dinheru tiunduhoem – xina kely.

<sup>10</sup> Xina aguely xuturimbyryem olâ Jesus. Aituo xinaram aguely:

– Arâ adâkezeba itaungâ merâ pekodoram. Âwankuem kâietaundâ warâ. Koendonro merâ urâem anhekyly.

<sup>11</sup> Aunlolâ ise âdy pebaom modepe awyly mâenmawayadâdomoem. Urâ olâ ise âdiempa kulâ agâmo wawyly.

<sup>12</sup> Wonwa uriza tyânringueim niapâdai, yigueduo, ieguepybyry etadâdo odaji ietoem, wondyly ara.

<sup>13</sup> Merâ anhetbyry ânguy nenanânehonwâbyra ise. Âdykâlâ unâ koendonro egatuly watay, tânanâguezeinlâ ise merâ aitobyry. Xirâ mâuntudyzemo kuru wato – kely Jesus.

*Jesus tiengamehoem, Judas dinheru nhemakehobyry*

(Mc 14.10-11; Lc 22.3-6)

<sup>14</sup> Aituo Jesus eynynonroem ityby ewy Judas xidadâ Queriotte donro idâly kurâdo eynynâ Deus agâ aguewâni modo iwymârydoram, Jesus wâgâ agueze.

<sup>15</sup> Aituo myani Judas aguely:

– Âdaraka ise iepywadylymo, Jesus âyanmo kâengameduo? – kely.

– Trinta moedas pratague ise ipywadyly. Anra – kelymo myani.

Aituo Judas dinheru nhemakely.

<sup>16</sup> Ilâpygueduo Judas âdara Jesus tiengamely awyly wâgâ âpaunzedlyly.

*Jesus, “Ohondaungâ, Pâscoa kientyguedoem” kehobyry*

(Mc 14.12-21; Lc 22.7-13; Jo 13.21-30)

<sup>17</sup> Pão ioliho pebaom etyguedo adaguly ume Jesusram xina aguely:

– Âdykâka ise pyni iwâkuru xina anhenhondyze mawyly, xirâ Pâscoa ume kydawindua-toem? – xina kely.

<sup>18</sup> Jesus in-hoguly:

– Jerusalêmdâ ise kydwanduadyly. Idâwâtaungâ wao myarâ. Mâkâ uguondo auguehobyry agâ oxioze âmaemo. “Alâ enra iweâma” keanryze Konomedâni. Itydâ ise tynynonro modo agâ Pâscoa nhetygyedyly, âwinduadyly warâ” kewâtaunda eyam – kely Jesus.

<sup>19</sup> Jesus aguehobyry ara aidylymo. Pyni modo adyenehonzemo myani, Pâscoa xina nhetyguedoem.

<sup>20</sup> Iguampygueduo xina myarâ idâly Jesus agâ. Xina ekadyly tâwinduatoem.

<sup>21</sup> Xina âwinduatay Jesus aguely xinaram:

– Idataungâ wao. Tokalâ âmaemo ewy ise yizepanro modoram iegamerim – kely.

<sup>22</sup> Jesus agueduo xina itynwandilyly. Mâkâ, mâkâ warâ xina aguely:

– Urâ mâkeba ise igamenri, Konomedâni! – xina kely.

<sup>23</sup> Aituo Jesus aguely:

– Âmaemo ewylâ olâ ise iegamerim, yagâ pão edawynrim modo ewylâ.

<sup>24</sup> Deus itaumbyry egatuwâni modo iweniwânmy ywâgâ: “Uguondo Kaynâpa Âetyby âdyoze” kely myakâwâm inwenilymo. Aguehomobyry ara ise awidyly. Toenzepa âsenagazeze olâ yizepanro modo emaxi iegamerimbyry. Niazepa wânkâ nidyse! – kely.

<sup>25</sup> Aituo egamenrianlâ adapâigüeoly, Judasram:

– Yanlâ amyguely watay, Ienomedâni. Urâ mâkeba ise igamenri – kely.

Aituo Jesus in-hoguly:

Mâkadulylâ awârâ – kely.

*Kywymâry Jesus iguehobyry enanâgueho*

(Mc 14.22-26; Lc 22.14-20; 1Co 11.23-25)

<sup>26</sup> Tâwinduatay Jesus pão nhanâdyly. Deusram aguely:

– Koendonro âmâ, Pabai, xirâ pão mâundulygue – kely.

Aguenripyryem pão nhepajiwâdyly. Mâkânra, mâkânra warâ nhuduly. Aguely xinaram:

– Sawâtaungâ. Edawynwâtaungâ. Xirâ pão kêempajiwâdyby, wodolâ xirâ – kely.

<sup>27</sup> Ilâpyryem kopu vinhugue taseim tâmaxi nhedyly. Deusram aguely:

– Koendonro âmâ, Pabai, xirâ vinhu mâundulygue – kely.

Aguenripyryem, mâkânra, mâkânra warâ nhuduly, xina nhenyhoem. Aituo aguely xinaram:

– Enywâdaungâ idânârâ âmaemo.

<sup>28</sup> Unulâ xirâ. Tâunkeze ise yiguely, toenzepa kurâdo emakeze, inakanhe aitomobyry xygakeze. “Ynynonro modo emakeze urâ” Deus kehobyry mawânâ. Awylygue ise unu tyapâze yigueduo, iwelo tâdâsemaguehobe Deus nhedyly.

<sup>29</sup> Xirâ pygueduo, Pâscoa kêentyguedombyra, vinhu kêenyombyra warâ wao ise urâ agâmo, Pabai Deus eynynonro modo myarâ pymâem atoram saindylymo ara. Xirâ mâuntudyzemo kuru wato – kely Jesus.

<sup>30</sup> Âty âwanikebygueduo, xina igâtudyly Deus tionmaendoem. Igâtudybyem xina idâly iwiy Se Oliveira Ekaram.

*Jesus Pedroram, “Azagâ tokalâ warâ, ‘Kâuntuwâbyra urâ awâkâ’ keze âmâ” kehobyry (Mc 14.27-31; Lc 22.31-34; Jo 13.36-38)*

<sup>31</sup> Jesus aguely xinaram:

– Xirâ kopae idânârâ âwiense âmaemo. Wodokeze âmaemo. Deus itaumbryry sawo wâgâ iwenibyem: “Kaneru sodo xyâduo, idânârâ eguy modo adapâeguyze” kewânmy Deus. Arâ ise ayedylymo.

<sup>32</sup> Yigueduo, kurâem itonze olâ urâ. Kurâem witombygueduo, âwaynâmolâ ise udâly Galileiaram – kely.

<sup>33</sup> Agueduo myani Pedro aguely:

– Tâwâlâ wâne ise idânârâ odokelymo. Urâ olâ ise odokeba – kely.

<sup>34</sup> Jesus olâ warâ eyam aguely:

– Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely. Xirâ mâuntudyze wato kuru – kely.

<sup>35</sup> Pedro olâ agueondyly lelâ:

– “Jesus kâuntuwâbyra urâ” uguewâpyra ise urâ. Tâwâlâ ise agâlâ yâlymo. “Jesus kâuntuwâbyra urâ” ugupea olâ ise urâ – kely.

Idânârâ xina Jesus eynynonro modo aguely:

– “Jesus kâuntuwâbyra urâ” xina kepa lâpylâ ise – xina kely.

*Jesus Tunwym agâ Getsemanidâ aguehobyry (Mc 14.32-42; Lc 22.39-46)*

<sup>36</sup> Xina saindyly âji Getsemaniram. Myarâ saintybyem Jesus xinaram aguely:

– Tarâlâ wao itaungâ, ikadaungâ warâ, Deus agâ agueze udâday – kely.

<sup>37</sup> Adâkebygueduo, Jesus Pedroram, azagâ Zebedeu imeombyryram warâ aguely:

– Yagâ âetaungâ; akaemo modo lelâ ise taunlo – kely.

Aituo eagâ idâlymo iwague nekâ. Târâ myani toenzepa kehoem Jesus itywandily.

<sup>38</sup> Aituo myani aguely eyanmo:

– Toenzepa enra ytyrnu, yigueho ara kehoem. Tarâlâ wao itaungâ. Tykyzeba olâ itaungâ, ynyâ Deus agâ amyguehomoem – kely.

<sup>39</sup> Âdiempa waunroem idâly myani. Târâ myani âzeguhoam idyly, Deus agâ adâkehoem:

– Pabai, toenzepa kuru kâsenagazedily warâ izepa wâne urâ. Ize wato araba olâ aidyse wawily, ize mato aralâ – kely myani.

<sup>40</sup> Deus agâ agueypyem myani, Pedro, Tiago, João warâ âxiân-hobyryram idâly, xykylymo ume. Xuagueânimopyryem myani aguely Pedroam:

– Âmâ, agonrodo warâ âykylymo enra. Âdiempalâ ynyâ Deus agâ amyguehomoem âykyba mitomoem nudupa kuru? – kely.

Aituo eyanmo aguely:

<sup>41</sup> – Nhaum, xuagueypyem lelâ itaungâ, inanaynmolâ warâ. Satanâs umohomoem aienehonze keze. Deusram ekadaungâ, Satanâs ize ato amânhepyra mitomoem. Deus eonhonru peba kulâ yagâ tâdâsenagazedily mâenmaenwâbyra ise âmaemo, yagâ mâsenagazedily mawilymo umelâ – kely myani Jesus.

<sup>42</sup> Jesus idâondyly âdiempa waunroem, Deus agâ agueonse:

– Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyse wawily, ize mato aralâ – kely.

<sup>43</sup> Ilâpyryem myani odopâdondyly Pedro, Tiago, João warâ eydâ atoram. Xykyondyby-moem awily nhedyly. Toenzepa myani xuedunumo, xuagueypyem lelâ itomoem nudupa.

<sup>44</sup> Jesus târâpa âxigyeondyly. Deus agâ agueonse idâly. Alâpylâ myani agueondyly:

– Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyse wawily, ize mato aralâ – kely.

<sup>45</sup> Ilâpyryem Jesus eagâ idâpyy modo warâ odopâdilymo xina eydâ atoram. Xinaram Jesus aguely:

– Âykylymo kulâ enra. Inuzeba lelâ mataunaze, Deus agâ amyguehomoem. Alâ! Iweâ lelâ yizepaom modo emaxi âduduoze urâ.

<sup>46</sup> Autaungâ. Inoro, eagâmo kydoxioda. Etaungâ! Awâkâlâ iegamerim saindyly – kely.

*Jesus nhawâtomobyry*

*(Mc 14.43-52; Lc 22.47-53; Jo 18.3-12)*

<sup>47</sup> Jesus aguely ume Judas saindyly. Jesus eynnonrolâ kâinane mâkâ. Toenzepa kurâdo eynynâ Deus agâ aguewâni modo iwymârydo ingonotaymby modo, kywymârydo ingonotaymby modo warâ Judas agâ saindylymo. Espadague, segue warâ tâmatune kehoem saindylymo, Jesus sawâse.

<sup>48</sup> Taindylymo umelâ myani Judas eyanmo aguely:

– Uguondo konhonuguguly, mâkâlâ ise mâkâ, Jesuslâ. Tâwâlâ ise manwâdylymo – kely.

<sup>49</sup> Aituo Judas saindyly Jesus iopaji, aguely:

– Âdapolâ wâne, Pymâ? – kely.

– Âdankâba urâ – kely Jesus.

Aguenrippyrem Jesus iwaparydâ nhonugudyly; tataen-ho agâ adâito ara nhedaenkuly.

<sup>50</sup> Jesus eyam aguely:

– Yataen-ho, inepa aiese mâetobyry aiekâ – kely.

Aituo Judas agâ idâwâtyby modo Jesus nhawâdylymo, nhemakâjilymo warâ.

<sup>51</sup> Xina ewy tydahoru imâsedo ety odayba tâtyze ani. Kurâdo eynynâ Deus agâ aguewâni modo iwymâry kuru agâ tâwaneim iwantazagâmâ.

<sup>52</sup> Aituo eyam Jesus aguely:

– Adâiseba ikâ. Âdahoru ekanâgâ. Tutuzelâ âmâ, “Espadague âseguebyby, espadaguelâ ise âdyoly” kely.

<sup>53</sup> Kâsemaguehoem âmâ, uguewâpyra urâ. Pabairam tâise kâenkadyly kâsemaguehoem. Inepa tâise toenzepa kehoem anju domodo ingonodyly iemakeze.

<sup>54</sup> Deus itaumbry awo wâgâ inwenibyem olâ ara âsenagazeniem wawily. Anju domodo kâingâsedily watay, iwenihobyry aguehobyry araba ise awidyly – kely Jesus mâkâ aienibryam.

<sup>55</sup> Ilâ ume Jesus aguely kurâdo tawâse idâppy modoram:

– Espadague, segue warâ tâmase kehoem yawâse mâewilymo, tâmagazeim urâ-ro waunlo ara. Yawâto moduzelâ keankâ saguhoem, kyâho pebalâ. Kopaelâgâembaba keankâ Deus ety idaseray, agâmo agueze wawily. Târâlâ yawâpyra olâ mataunaguynre. Yawâto odayba awilygue keankâ ilâenlâ yawâpyra mawilymo. Tâwâlâ yawâtaungâ lelâ, âdaitybyemba wawily umelâ.

<sup>56</sup> Arâlâma Deus itaumbry egatuwâni modo ywâgâ inwenibyem awily Deus itaumbry awo wâgâ – kely Jesus.

Jesus sawâtu, idânârâ xina eagonropyry modo nhodokely. Xina âwiendily.

*Jesus judeu domodo iwymârydoram satobyry*

*(Mc 14.53-65; Lc 22.54-55,63-71; Jo 18.12-14,19-24)*

<sup>57</sup> Ilâpygueduo Jesus nhadylymo kurâdo eynynâ Deus agâ aguewâni modo iwymâry kuru Caifâs etyram. Idânârâ pymâ tynroneim modo târâ âtdygybyem awilymo. Kurâdo eynynâ Deus agâ aguewâni modo iwymârydobe, Moisés inweniby wâgâ enomedâni modo warâmo myani târâ, idânârâ uguondo modo tynrenseim modope warâ.

<sup>58</sup> Myarâ idâdaymo myani âgânâ kehoem Pedro idâly, Caifâs ety idaseraji. Tâgawânse, tâkaze warâ myani akaemo guarda domodo agâ, âdara Jesus nhedylymo tientoem.

<sup>59</sup> Kurâdo eynynâ Deus agâ aguewâni modo iwymârydo, kywymâry modo, kurutaynrim modo warâ, âdara Jesus tienwentâdo wâgâ aguelymo myani. Mâkâ wâgâ âdalâ kulâ aguenri nhuinlymo warâ, âdy wâgâ tiân-homo awily tiuntuhomoem.

<sup>60</sup> Akaemo pymâ domodoem olâ myani âdy ewentâdo peba, iwâgâ aguewâni modo kewâdyly kulâ awilygue. Ilâppyrem myani azagâ uguondo saindyly pymâdo enadoram. Jesus ewentâze kewâdylymo kulâ olâ myani.

<sup>61</sup> Warâ aguelymo:

– Jesus aguehobyry tindatyby ise xina nhegatyly. “Deus ety sakalagueze urâ. Azagâ\* emedyly idily ara saunâtonze olâ urâ” kely, xina nidadâ – kelymo myani, Jesus tienwentâdomoem.

<sup>62</sup> Aguelymo idanipyryem, kurâdo eynynâ Deus agâ aguewâni modo iwymâry kuru saudily. Jesus nhapâiguely:

\* 26:61 Nota de pé Mateus 12.40dâ egâ.

– Âwâgâ aguelymo midatailâ. Âkealâ, âkealâba iwentâdomo awyly ise amygueho? Âdamyguepaka ise âmâ mâsemaguehoem? – kely.

<sup>63</sup> Âdakepa olâ myani Jesus tâsemaguehoem. Aituo myani kurâdo eynynâ Deus agâ aguewâni modo iwymâry kuru nhapâigueondyly:

– Messiaslâka âmâ, Deus Ingonotyby? Deus iguedânry imerylâka âmâ? Âkealâ xinaram mângatuba âmâ-ro watay, âsenagazeze âmâ – kely.

<sup>64</sup> Aituo Jesus in-hoguly:

– Mâkâlâ urâ, amygueho aralâ. Xirâpygueduo ekadybyem ise urâ Deus ton-honreim ahoru eynynâ. Eagâ ise pymâem wawyly. Eunu duay ise Deus eydâpa kâewyly. Xirâ mâuntudyzemo kuru wato – kely Jesus.

<sup>65</sup> Toenzepa kehoem kurâdo eynynâ Deus agâ aguewâni modo iwymâry kuru iewiâpadyly “Deus imerylâ urâ” Jesus kely tindatuo. Tyewiâkygue tâty tywogonrolâ nhaunguely. Pymâdo târâ âtâdyguyby modoram aguely:

– Deus nunâguedai merâ Jesus. Deus agâ âzekiba tawyllylâ agueho, “Deus imerylâ urâ” keduo. Ânguy kingâsedaymba ise kurâ, ewentâniem. Midataimolâ Deus wâgâ aguely.

<sup>66</sup> Âdara iedylyka inanajimo inakanhe kehobyry wâgâ? – kely.

Aituo pymâ domodo aguely:

– Uguondo inakai kulâ awâkâ! Xyâly lelâ! – kelymo.

<sup>67</sup> Agueypyem emydy onwa KUITÚ kelymo, nhapiogulymo warâ. Jesus nhenuahulymo, tiampioyguhoem. Sapiogunrimbyryem, aguelymo:

<sup>68</sup> – Ânguyka apioyurim? Apioyũimbyry xutugâ, âkealâ kuru Deus Ingonotyby matay – kelymo.

*Pedro, “Jesus kâuntuwâbyra urâ” kehobyry*

*(Mc 14.66-72; Lc 22.56-62; Jo 18.15-18,25-27)*

<sup>69</sup> Jesus pymâdo enado atay, Pedro târâ taseraylâ myani. Pekodo târâ tâwaneim ewy Pedro einkâ sakadyly. Koendâ kehoem enipyryem aguely:

– Jesus Galiléia donro eynynonro modo ewylâ âmâ – kely.

<sup>70</sup> Aituo myani kurâdo enanaym Pedro aguely:

– Mâkâ mâkeba urâ! Kâuntuwâbyra urâ awâkâ! Ânguyka awâkâ Jesus, iwâgâ amyguehomo? – kely.

<sup>71</sup> Agueypyem myani taseraji tâdâwânto iwyantaji Pedro idâly. Eagonro pekodo târâ tâwaneim modo ewy, Pedro tientuo, tydâ iwaguepanro modoram aguely myani:

– Jesus Nazaré donro eynynonro ewy awâkâ uguondo – kely.

<sup>72</sup> Mâkâ pekodo aguely tindatuo myani Pedro agueondyly:

– Âdykâ Jesus eynynonroem witaymba urâ. Kâuntuwâbyra urâ awâkâ. Tâwâlâ ise Deus ienagazenehony, uguewâdyly kulâ-ro watay – kely.

<sup>73</sup> Ilâpyryem myani uguondo modo ewy Pedro iopaji saindylymo.

– Jesus eynynonrolâ âmâ. Tutuze xina, Galiléia donro mawyly, earamolâma amygueho – kelymo.

<sup>74</sup> Aituo myani Pedro agueondyly:

– Mâkâ mâkeba urâ! Kâuntuwâbyra urâ awâkâ uguondo! Tutuze Deus âkealâ auguely awyly. Tâwâlâ ise Deus ienagazenehony, uguewâdyly kulâ-ro watay – kely. Pedro.

Aguely umelâ myani aukuma igâtudyly.

<sup>75</sup> Tindatuo, Pedro Jesus tyam aguehobyry nhenanâguely, “Xirâ kopae, aukuma igâtudyly iraynâ, azagâ tokalâ warâ ise ‘Jesus kâuntuwâbyra urâ’ myguely” kehobyry. Aguehobyry tienanâgueduo myani toenzepa Pedro itynwandily. Târâpa âxiguely. Tâjityenze kehoem eogumadyly.

## 27

*Pilatosram Jesus satobyry*

*(Mc 15.1; Lc 23.1-2; Jo 18.28-32)*

<sup>1</sup> Emetybyem idânârâ akaemo kurâdo eynynâ Deus agâ aguewâni modo iwymârydo, pymâ judeu domodo iwymârydo warâ âtunâguedylymo, âdara kuru Jesus tyâen-honlymo awyly tiuntuhomoem.

<sup>2</sup> Tonlo guarda modoram nhekâjien-honlymo, nhaleholymo, nhegamehonlymo warâ Pilatosram, pymâ Romadâpa ingonotybyram.

*Judas âdyâhobyry*

*(At 1.16-19)*

<sup>3</sup> Judas, Jesus egamenribyry, pymâdo Jesus tiân-homoem aguelymo tientuo, toenzepa kehoem âjityendyly, pymâdoram mâkâ tiengamehobyry wâgâ. Awylygue myani kurâdo eynynâ Deus agâ aguewâni modo iwymârydoram, kywymâry modoram warâ idâly. Mârâ trinta moeda sopâze kely mâkâ tiengamehobyry ebyry.

<sup>4</sup> Eyanmo aguely:

– Inakanhe lelâlâ awidâ; mâkâ uguondo âdaityby keba kulâ sawâneho – kely.

Aituo eyam aguelymo:

– Awârâ tiuntudyze inkâba xina. Âmâ inakanhe aini, xina mâkeba – kelymo.

<sup>5</sup> Agueduomo, Judas mârâ dinheru nhamely Deus ety odaji. Dinheru sameimbyryem, idâly okogâjize.

<sup>6</sup> Akaemo kurâdo eynynâ Deus agâ aguewâni modo iwymârydo mârâ moeda pratagueto sanâniibyryem, aguelymo:

– Xirâ dinherugue keankâ uguondo xyâhoem epywadyly. Awylygue ise Moisés inweniby eynynâ, Deus ety oday kienwanipa kydawyly – kelymo.

<sup>7</sup> Aituo âtunâguedybyem, mârâ dinherugue onro nhanâdilymo. “Âdydo imeom onrogue xygato” kehobyry. Mârâ onro nhanâdilymo judeu keba modo igueypy etadâdoenlâ.

<sup>8</sup> Jesus iguehoem egamehobyry ebyrygue sanâtyby awylygue, “Xyâhoem egamehobyry ebyrygue sanâtyby” kelyguelâ mârâ âji ezeku iwerâ.

<sup>9</sup> Aguewânâmym Jeremias, Deus eynynâ agueypy\*: “Trinta lelâ moeda pratagueto nhemakelymo. Israel iweom ‘Warâ ise ebyryem kiunduly’ kehobyry” kewâm.

<sup>10</sup> Mârâ dinheru tienmakeybygue, âdydo imeom onrogue xygato ejidy nhanâdilymo. Warâ myani aidylymo, Kywymâry Deus aguehobyry ara tâkeze myakâwânmy Deus eynynâ agueim.

Warâ myani Judas mârâ dinheru, Jesus tiengamehobyry ebyry anhedyly.

*Jesus Pilatos enado satobyry*

*(Mc 15.2-5; Lc 23.1-5; Jo 18.33-38)*

<sup>11</sup> Jesus XYDYK warâ, mâkâ pymâ Romadâpa ingonotyby, Pilatos enado. Pilatosram adapâigueoly:

– Judeu domodo iwymâry kuruka âmâ? – kely.

Jesus in-hoguly:

– Mâkâlâ urâ, amygueho ara – kely.

<sup>12</sup> Akaemo kurâdo eynynâ Deus agâ aguewâni modo iwymârydo, kywymâry modo warâ tâwentâduo, âdakepa olâ Jesus.

<sup>13</sup> Pilatos aguely Jesusram:

– Akaemo iwentâdo midatailâ. Amyguehonly mâin-hogubaka ise âmâ? – kely.

<sup>14</sup> Jesus olâ âdakepa. Toenzepa kehoem Pilatos âseguâdâdyly, Jesus tâsemaguehoem âdakepa awylygue.

*“Nigue lelâ awâkâ Jesus” Pilatos kehobyry*

*(Mc 15.6-15; Lc 23.13-25; Jo 18.38-19.16)*

<sup>15</sup> Pâscoa etyguedyly ume, aunlolâ mykâinane Pilatos etadâdyby modo ewy tokalâ nhetaguehonly, âdaunlolâ kurâdo nhekadybylâ.

<sup>16</sup> Ilâ ume tâlâ myani uguondo kadeia oday tâtagueim, kurâ domodo nhutuly, Barrabâsgue tâzekeim.

<sup>17</sup> Aituo kurâdo âtâdygyuly, Pilatos ety iwyantay. Pilatos eyanmo aguely:

– Ânguyka kâentagueyzye matomo, [Jesus] Barrabâs keho, Jesus Messias keho Deus Ingonotyby? – kely.

<sup>18</sup> Tâsewânilygue kulâ akaemo judeu domodo iwymâry, Jesus tyam nhegamey awyly, tutuze olâ myani Pilatos.

<sup>19</sup> Pilatos târâ tribunaldâ ekadybyem awyly ume myani iwidy âjitaumbyguely eyam.

– Jesus âdakâiedâ. Koendonro awâkâ uguondo. Âdy inakanhe anientaymba awâkâ. Kopae eagâ kâjiâensedai. Toenzepa kâsenagazedai eagâ kâjiâensedobyry wâgâ – kely.

<sup>20</sup> Akaemo kurâdo eynynâ Deus agâ aguewâni modo iwymârydo, kywymâry modo warâ toenzepa kurâdoram aguelymo.

– Barrabâs nhetaguehoem ekadaungâ Pilatosram. Jesus xyâhoem ekadaungâ-ro warâ – kelymo.

<sup>21</sup> Ine warâ myani Pilatos kurâdoram agueondyly:

– Âdykonlo uguondoka kâentaguehondyze matomo? – keondyly.

\* 27:9 Zacarias 11.12-13 warâdâ aguely. Zacarias myakâwândy agueim. Judeu domodo xurâem olâ idânârâ Deus xunâry egatuwâni modo inweniby Jeremias aguehobyryem lelâ nhutulymo.

Aituo in-hogulymo:  
– Barrabás! – kelymo.

22 – Ádakânhedyly pylâka ise merâ Jesus, Messias, Deus Ingonotyby? – kely myani Pilatos. Idânârâ kehoem in-hogulymo:

– Kruz onwa sakâjien-hongâ, iguehoem! – kelymo.

23 – Ádaituo? Ienanaji, âda nitaymba merâ iguehoem – kely Pilatos.

Agueduo olâ idânârâ adaenkelymo ton-honre kehoem:

– Kruz onwa sakâjien-hongâ, iguehoem! – keondylymo.

24 Tutuze olâ Pilatos, aguiom kurâdo tunâry nugukeba awyly. Tutuze lâpylâ, akaemo tagâ iewiâpadyly, aguehomobyry ara anipyra-ro watay. Aituo tâzemaunguehoem paru nhenenehonly. Enanaynmo âzemaunguely, tâwentâzeba tawyly tienehon-hoem. Eyanmo aguely:

– Urâ keba ise âsenagazeni merâ uguondo iguehobyry wâgâ. Âmaemo ise tâwentâzeim, mâyâen-hohomobyry wâgâ – kely.

25 Idânârâ kurâdo aguely:

– Xinalâ ise tâwentâzeim awâkâ iguehobyry wâgâ, xina, xina imeombyry, xina iweompyry alelâ – kelymo.

26 Aituo Barrabás nhetaguehonly, nhekadomobyry ara. Ilâpyryem myani Roma donro sodadu domodoram aguely:

– Jesus sapioguwâdaungâ. Ilâpyryem ise mandylymo, kruz onwa sakâjize-ro warâ, iguehoem – kely.

*Sodadu domodo Jesus âwankuem nhetobyry*

*(Mc 15.16-20; Jo 19.2-3)*

27 Ilâpyryem sodadu domodo Jesus nhadyly palaciuram, Pilatos etyram. Idânârâ târâ sodadu modo âtâdygylymo myani. Jesus tuontaji nhedylymo, âwankuem tientomoem.

28 Jesus etygueimbyryem, âtâ BOH waunlo tapabileingue nhetydâdyllymo, pymâ âzetydâdo ara, âwankuem tientomoem.

29 Tygyreim koroaem xygatyby myani mâkâ nhangahu onwa nhekylymo. Aho eynynâ segue nhematâdyllymo, pymâ ara. Enado âzeguhoam idyllymo, pymâ enado adâitomo ara. Eyam aguelymo:

– Tynrenseim âmâ, judeu domodo iwymâry kuru! – kelymo, âwankuem nhedylymo.

30 KUITÚ kelymo nhonwa, segue nhangatainlymo warâ.

31 Âwankuem ienipyryem âtâ BOH waunlo tapabileim Jesus wâgâpa nhetylymo. Ety iwogonropyryguelâ nhetydâdyllymo. Ilâpyryem nhadylymo, kruz se xygatyby onwa sakâjize.

*Jesus kruz wâgâ iguehoem sakâjihobyry*

*(Mc 15.21-32; Lc 23.26-43; Jo 19.17-27)*

32 Xidadâ odaypa tâgasedaymo, uguondo Simão agâ oxiodyllymo. Xidadâ Cirene donro myani mâkâ. Aituo myani, sodadu domodo kruz Jesus tiankâjiho eyam nhanânehonlymo.

33 Golgotaram myani Jesus nhadylymo. (Iwy Calvariogue tâzekeim lâpylâ, tâjiangahubyry ara enurunogue.)

34 Târâ myani vinhu tâzenukuru agâ ietybygue sakuize kelymo. Ekunibyryem myani tienydyzeba idyly.

35-38 Aituo kruz onwa nhakâjilymo. JESUS MERÂ, JUDEU DOMODO IWYMÂRY KURU kely iweniby sakâjiwânmony Jesus nhangawaym kruz wâgâ. Ádaituo Jesus nhakâjilymo awyly xutuhoem myani mârâ anhedyllymo. Ilâem lâpylâ azagâ tâmagaduneim modo nhakâjilymo. Tokalâ Jesus ahuru eynynâ, eagonro pâem eynynâ warâ nhakâjilymo. Sakâjirimbyryem, Jesus ety iwogompyry nhepajiwâdyllymo. Dadu nhamelymo ânguy, ânguy warâ Jesus ety iwogompyry emakeim awyly tiuntuhoem. Aitybyem ekadylymo, akaemo azagâ tokalâ warâ kruz onwa sakâjiwâdyllymo ânguy nyanâbyra itoem.

39 Tâinkâ sakadaynrim modoram âwankuem âieholly. Angakânylymo, inwykelymo warâ.

40 – “Deus ety sakalagueze urâ” myguema. “Azagâ emedyly† idyly ara kulâ saunâtonze urâ” mygue warâ. Ton-honreim lelâlâ matay, tâwâlâ âsemaguegâ! Deus imery âmâ watay, kruz wâgâpa âytâgygâ! – kelymo.

41 Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, kywymâry modo warâ âwankuem nhedylymo. Aguelymo:

42 – Âkelomo nemake, tâwâlâ nâsemagueba olâ! Israelita domodo iwymâry lelâlâ-ro watay, iweâ lelâlâ kruz wâgâpa nytâgy. Xytâgyly-ro watay, einwânse kurâ.

† 27:40 Nota de pé Mateus 12.40dâ egâ.

<sup>43</sup> “Deus imery urâ” nygue. “Deus ietâ” nygue warâ mawânkâ. Âkealâ kuru-ro watay, Deus kruz wâgâpa xytâguyânze âese iweâ lelâlâ! Deus tâense watay, nemake pylâ! – kelymo, âwankuem nhedylymo.

<sup>44</sup> Akaemo azagâ tâmagaduneim modo eagâ sakâjiwâdyby modoram âwankuem âieholo lelâ lâpylâ.

*Jesus iguehobyry*

*(Mc 15.33-41; Lc 23.44-49; Jo 19.28-30)*

<sup>45</sup> Kuotatay idânârâ iamadyly; azagâ tokalâ warâ horas ani iamu.

<sup>46</sup> Azagâ tokalâ horas ituo myani Jesus adaenkely:

– *Eli, Eli, lemâ sabactani?* – kely. (“Pabai, âdaituoka wodokely?” keze aguely.)

<sup>47</sup> Tonlo modo, koendâ nidapyra tawylygue, Elias ingâsedly ara nhenehonylmo, Deus eynynâ agueim lâpylâ mykâinane mâkâ. Aituo aguelymo:

– Idataungâ. Elias ingâsedly tâmakehoem – kelymo.

<sup>48</sup> Akaemo ewy egatudyly myani vinhu nhewantybygue esponja ikuize. Tinkuibygeduo se iopiry onwa nhekâjily. Jesus nhugakâin-hoem wâne nhuduly.

<sup>49</sup> Eagonro modo eyam aguely:

– Ine wao. Elias awâkâ ingâseguely. Elias emakeze âewyly kyzene wao – kelymo.

<sup>50</sup> Aituo Jesus adaenkeondyly ago kehoem, tyiguehoem kuru. Ipa kuru idyly.

<sup>51</sup> Iguely ume kehoem myani, Deus ety oday Deus Âepanâgueho xuahuhu tyxieim iotagâ adauguely kaynonrobyryem, on-yam; Deus, kurâdo agâ tygue ito myani mârâ xuahuru. Ton-honre kehoem onro âzekânyly. Tuhu imâsedo modo tatuwâze myani.

<sup>52</sup> Onro âzekâniduo, âguedy modo etadâdo âzenahunguewâdyly. Aituo myani Deus eynynonro igueypy modo myarâ ietyby, kurâem itondylymo.

<sup>53</sup> Tâkanâdobyrydâba egaselymo. Deus, Jesus kurâem nhetombygeduo myani akaemo idâly xidadâ Jerusalémram, Deus ijidadâryam. Târâ tâtyuneim modoram tâzehozemo myani.

<sup>54</sup> Sodadu Roma donro modo iwymâry, izodadury Jesus etaynrim modo warâ onro âzekânyly tâensemo myani. Aidlyly tâensemo warâ. Tientuomo, toenzepa kehoem myani âseanedlylymo. Aguelymo:

– Deus imery lelâlâ mynra merâ uguondo! – kelymo.

<sup>55</sup> Tâlâ myani târâ pekodo modo, iwaguelâ olâ nhedylymo. Jesus sakâjily iraynâ, Jesus Galliléia eynynâ atay, emawydânybyry ani akaemo pekodo modo tâlâ tatomogue.

<sup>56</sup> Maria (Magdala donro), Maria (Tiago, José warâ ise), Zebedeu imeom ise warâ myani iduaymo.

*Jesus eguepybyry tuhu imâsedo tâtagueim odaji nhetadâdomobyry*

*(Mc 15.42-47; Lc 23.50-56; Jo 19.38-42)*

<sup>57</sup> Iguandyly iraynâ uguondo tydinhergueim José saindyly, xidadâ Arimatéia donro. Jesus einwânni lâpylâ myani mâkâ.

<sup>58</sup> Aituo José, Pilatosram idâly agueze:

– Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtagueim odaxi kâenkanâdoem. Tâwâlâ kâyntâguyândyly? – kely.

Aituo Pilatos, Jesus eguepybyry José nhatoem,

– Tâwâlâ – kely.

<sup>59</sup> Aituo José, Jesus eguepybyry kruz wâgâpa nhytâguyândyly. Xytâguyânybyryem intuwynly âtâ iwelo lînhuguetogue.

<sup>60</sup> Tyigueduo tâtaryem tiensaguehoymby odajilâ myani Jesus eguepybyry nhetadâdyly. Iwelo esagueze myani mârâ tâtagueim. Myarâ eguepybyry ienipyryem nhenahunly tuhu imâsedogue. Ilâpygeduo, idâly.

<sup>61</sup> Azagâ pekodo modo: Maria Magdala donro, Maria lâpylâ warâ Jesus eguepybyry etadâdobyrydâmolâ myani.

*Jesus eguepybyry etadâdobyrydâ guarda domodo âxidâdobyry*

<sup>62</sup> Pâscoa etyry sakabygeduo, iguandyly ume akaemo kurâdo eynynâ Deus agâ aguewâni modo iwymârydo, fariseu domodo warâ idâlymo Pilatos agâ âtunâgueze.

<sup>63</sup> – Pymâ, tyiguely iraynâ, warâ keankâ Jesus aguely: “Yigueduo, azagâ<sup>‡</sup> emedyly idyly wâgâ kurâem itonze urâ” nygue. Xirâ âkealâba kullâ aguehobyry enra xina nhenanâguely.

<sup>64</sup> Awylygue Jesus eguepybyry etadâdobyry koendâ mâenehonyly xina ize ato. Azagâ emedyly idyly ara enipe târâ nidâ, eynynonrobyry modo eguepybyry nemagazebyra itomoem. Tienmagazeduo, “Jesus kurâem nitondâ” kezemo mawânkâ. Toenzepa iwerâ “Jesuslâ Messias” kelygue tonokudo einwânni modo. “Jesus kurâem itondybyem” kely nheinwândylymo watay lakuru ise aguykeho einwândyly inmolymy kuru – kelymo.

<sup>‡</sup> 27:63 Nota de pé Mateus 12.40dâ egâ.

<sup>65</sup> Aituo Pilatos eyanmo aguely:

– Âdainkâba. Anra yzodadury modo. Idâzemo lelâ agâmo, azagâ emedyly ise târâ agâmo awyly, Jesus etadâdobyry eniem. Imawyadâzemo, ânguy Jesus eguepybyry nyanâbyra itoem – kely.

<sup>66</sup> Aituo myani Roma donro sodadu domodo tagâ nhadylymo. Tâtaguem enahun-ho enahungueybyem awyly xutuho tyesemo myani, ânguyâ Jesus eguepybyry eydâ atoram egawânipryem awyly tiuntuhoem. Adiepygueduo myani idâlymo. Sodadu domodo lelâ myani eniem âxiânrim.

## 28

*Jesus kurâem itondobyry*

(Mc 16.1-10; Lc 24.1-12; Jo 20.1-10)

<sup>1</sup> Tâzekobyezueho sakabygueduo domingo pealâ pekodo modo Jesus eguepybyry etadâdobyryram idâlymo, Maria Magdala donro, Maria lâpylâ warâ.

<sup>2</sup> Tadagueim kulâ onro âzekânily. Anju Deus ingonotyby myani Jesus eguepybyry etadâdobyry enahun-ho ejikeim. Tuhu imâsedo ejikeimbyryem myani nhonwa ekadyly.

<sup>3</sup> Ielu ara kehoem myani ehoru, tapeke kehoem ety iwogonro warâ.

<sup>4</sup> Târâ eniem âxiâymyby modo tâseaneze myani, tadapânizemo warâ. Onro onwa ihugewâdilymo myani, ekomadybyem.

<sup>5</sup> Anju kaynâpa âetyby pekodo modoram aguely myani:

– Tâseanezeba itaungâ. Tutuze urâ, Jesus mâwinlymo awyly, kruz onwa sakâjiby.

<sup>6</sup> Tarâpa olâ mâkâ. Ipa, kurâem nitondai, aguehobyry aralâ! Etaungârâ etadâdobyryam. Ânguy lâpeba tarâ.

<sup>7</sup> Inepa idâwâtaungâ, eynynonro modoram egatuze. “Kurâem nitondai! Waunroenlâ ise Galileiaram idâly. Târâ ise mâendilymo” kewâtaunda eyanmo. Auguehobyry ara ise aidyly – kely myani anju.

<sup>8</sup> Inepa kehoem pekodo modo Jesus eguepybyry etadâdobyry nhodokelymo. Toenzepa myani eanumo, iomarumo lâpylâ warâ. Egatudylymo Jesus eynynonro modoram tien-gatuhomoem.

<sup>9</sup> Jesus eagâmo toxioze myani. Aituo myani aguely:

– Âdapa lâwâne âmaemo? – kely.

– Âdapa – kelymo.

Iopaji saindilymo. Enado âzeguhoam idylymo. Ixinary tywymogoynzemo myani, koen-donroem awyly wâgâ adâkezemo warâ.

<sup>10</sup> Aituo myani Jesus eyanmo aguely:

– Tâseanezeba itaungâ. Idâwâtaungâ. Ynynonro modoram aguewâtaunda. “Âwaynâmolâ ise Jesus idâly Galileiaram. Târâ ise âwânwândilymo. Ese âmaemo” warâ kewâtaunda – kely Jesus.

*Guarda domodo xunâry*

<sup>11</sup> Pekodo modo xinaram Jesus wâgâ agueze idâday myani guarda domodo ewy xidâdâram odopâdilymo. Idânârâ tientyby ara myani kurâdo eynynâ Deus agâ aguewâni modo iwymârydoram nhegatulymo.

<sup>12</sup> Kurâdo eynynâ Deus aguewâni modo iwymârydo myani kurâdo nhutudyzeba akaemo tyam nhegatuyby. Aituo myani kywymârydo agâ âtunâgueze idâlymo. Koendâ âtunâguedybyem myani toenzepa kehoem guarda domodoram dinheru nhudulymo.

<sup>13</sup> Warâ myani eyanmo aguelymo:

– Jesus eguepybyry wâgâ amyguehonly-ro watay, “Kopae xina xykyly ume Jesus eynynonro modo nâtâ, eguepybyry emagazeze” kewâtaungâ lelâne.

<sup>14</sup> Pilatos âykyhomobyry wâgâ agâmo iewiâpadyly-ro watay, xina ise eagâ aguenri, inagaze-byramo itoem – kelymo.

<sup>15</sup> Aituo myani guarda domodo dinheru nhemakely. Kurâdo eynynâ Deus agâ aguewâni modo iwymârydo aguehobyry ara lelâ aguelymo. Arâ lelâ myani judeu domodoram nhegatulymo, kypemugudoram. Xirâ tonokudobyry tâinwânselâ akaemo judeu domodo ewy iwerâ.

*Jesus onze tynynonro modoram âepanâguehobyry*

(Mc 16.14-18; Lc 24.36-49; Jo 20.19-23; At 1.6-8)

<sup>16</sup> Xina idâly Galileiaram. “Târâ ise kydoxiodyly” Jesus kehobyry iwy onwa xina âkuly.

<sup>17</sup> Târâ Jesus tientuo, toenzepa kehoem xina iomazely. Enado xina âzeguhoam idyly. Koendâ awyly wâgâ xina aguely warâ. Tâlâ olâ ani xina ewy Jesuslâ awyly einwântânry.

<sup>18</sup> Aituo Jesus xinaram saindily, aguely:



— Deus kaynâ, onwâgâ alelâ pymâem witoem anygue.

<sup>19</sup> Awylygue idâwâtaungâ awârâem kurâdope ato ara enomedâzemo, yeinwântomoem. Yeinwâmpygueduomo, batiza ietaungâmo, ynynonroem, Pabai Deus eynynonroem, Deus Ispiritury eynynonroem warâ awylymo xutuhomoem.

<sup>20</sup> Amitomoem inomedâdomobyry ara lâpylâ enomedâdaungâmo. Enanâgüewâdaungâ, agâmolâ wawyly, koendâ nhetomoem xypyry etaji kehoem — kely Jesus.

Alâ kulâ.

Mateus

## MARCOS Unâ Koendonro Jesus Cristo Wâgâ Marcos Inweniby

Xirâ livru wâgâ inwenily Marcos nhangahu odaji iemâmy Deus. Awylygue Deus itaumbrylâ xirâ Marcos nhegatuyby. Jesus Cristo wâgâ kiuntuhoem myakâwândy Deus xirâ livru inwenien-honly. Jesus Cristo eon-honru wâgâ aguely xirâ wâgâ kiuntuly. Tunwym Deus aguehobyryem awylygue, toenzepa adyosenry emyenro kehoem adyese mâkâ, Deus eon-honrugue. Kadopâgue taseim modo, tâwânuneim modo, epy modo, adakobâdânry modo, idatânry modo warâ kua tyese mâkâ. Capitulo 6dâ cinco pão, azagâ kanra âjihuyby warâ agui nhenehon-hombryry tytainze kurâ, cinco mil uguondo modo xuatoem; paru wâgâ tadakobâze lâpylâ myakâwândy.

*João kurâ domodoram Jesus âewyly wâgâ aguehobyry  
(Mt 3.1-12; Lc 3.1-20; Jo 1.19-28)*

<sup>1</sup> Deus Imery Jesus wâgâ xirâ unâ aguely; Deus imery lelâlâ awâkâ.

<sup>2</sup> Iweâpalâ myakâwândy Isaías Deus itaumbryry wâgâ agueseze awyly. Awârâ âdydo imeom aidyly wâgâ inwenily modo. Saguhoem warâ myakâwândy Deus, Tingonotybyram aguely:

“Ynynonro modoram mydâly iraynâ, uguondo igonose urâ,  
âwâgâ aguenriem on-hondybyem lelâ itomoem,  
âdatomoem, âinwântomoem warâ.

<sup>3</sup> Messias wâgâ ageuim târâ âji âdy peba atodâ ise aguely.

Adâkely idase idâwâtyby modoram:  
‘Inepa ise Deus Ingonotyby saindyly.

Izepa ato aiedyly imowâdaungâ.

On-hondybyem lelâ itaungâ’ aguely mâindatomoem.

Pymâ ton-honreim kâty anaxi âewyly kiuntuduo wâne,

kâty inatary tuonse, tuonkeze warâ kurâ,

myara on-hondybyem lelâ kydawyly aguely idase”

warâ myakâwândy Deus itaumbryry Isaías inwenily.

<sup>4</sup> Arâlâ myani João âji âdy peba atodâ awyly, Isaías aguehobyry aralâ. Kurâ domodo idâly myani eydâ atoram. Eyanmo aguely myani Deus aguehobyry:

– Âjityendaungâ, inakanhe amitomobyry wâgâ. Deus izepa ato aiedyly imowâdaungâ. Deus einwântaungâ, inakanhe amitomobyry nhygakehoem. Parugue batiza âiehowâdaungâ, inakanhe amidlymo imoimbyryem amidlymo mâenehon-homoem – kely.

Inakanhe tadawyly timoduomo myani, Deus eynynonroem tawyly nhenehonlymo.

<sup>5</sup> Toenzepa mykâinane xidadâ Jerusalém donro modo João aguely idase idâlymo. Tâtâze lâpylâ mykâinane Judéia donro modo. Aguewâdylymo myakâwâm:

– Deus izepa ato aieni ani xina. Adâidyly tumoze olâ xina-ro warâ – kelymo.

Arâ agueduomo, Joãoram batiza âieholymo paru Jordão ikay, Deus izepa ato adientomobyry wâgâ tâjityenze tawylymo tienehon-homoem, inakai modo adientyly imoimbyryem tawylymo tienehon-homoem warâ.

<sup>6</sup> Camelu xuhudu xygatyby mykâinane João ety. Tâjitybygue kulâ mykâinane iwanxiegu. Kahuligue, penrâgue warâ mykâinane ipynigu. Kurâ domodoram aguely mykâinane:

<sup>7</sup> – Eagonro âese lâpylâ Deus wâgâ aguenri. Ton-honreim ise mâkâ, iemyenro keba. Mâkâ ise yakadâ kuru ton-honreim. Âdy mâkeba urâ. Ihuru etary ekâjiguerin-enlâ witoem nudupa lâgâlâ, ihuru kâingokehoem\*.

<sup>8</sup> Urâ parugue batiza âenimo, Deus izepa ato amânhetomobyry wâgâ tâjityenze mawylymo mâenehon-homoem, inakai modo aiedyly imoimbyryem mawylymo mâenehon-homoem warâ. Mâkâ âeni olâ ise Deus Ispiritury xuduim, einwânni modo eon-honwanâniem, izepa ato aniempyra itomoem, ize ato lelâ anhetomoem warâ – kely João.

*João Jesus batiza nhetobyry  
(Mt 3.13-17; Lc 3.21-22)*

<sup>9</sup> Aituo Jesus idâly Galiléia eynynonro âtâ anary Nazaré donropyryem myarâ João eydâ atoram. Târâ myani Jesus batiza âieholo Joãoram paru Jordão ikay, Deus eynynonro tawyly tienehon-hoem.

<sup>10</sup> Paikayba tâjikagueday myani Jesus kau âzenahunguely nhedyly. Papaem Deus Ispiritury xytâguely nhonwa.

<sup>11</sup> Aituo kau oday Deus itanru indadyly lâpylâ:

\* 1:7 Tâwaneinhe sanâtyby modo myakâwândy adakobâni modo ihuru etary ekâjigueim, etyim, ihugogueim warâ.

– Ymery âmâ, toenzepa kâinwyneguly; toenzepa womazeâni âmâ – kely Deus.

*Deus ize ato araba Jesus aitoem, Satanás aiese kehobyry*

*(Mt 4.1-11; Lc 4.1-13)*

<sup>12</sup> Aituo Deus Ispiritury Jesus nhadyly âji âdy peba atoram.

<sup>13</sup> Quarenta iguandyly, quarenta emedyly warâ Jesus târâ awyly. Ânguydo imeom tyewiâtuneim modope mykâinane târâ. Târâ atay Deus iduery Satanás âepanâguely. Idânârâ wâne myani anhedyly, Jesus, Deus ize ato araba aitoem. Jesus olâ myani mâkâ agueho ara anipyra. Ilâpygueduo myani anju domodo xytâgulyly Jesus eydâ atoram xuahuze, idânârâ ize ato modo xuduze warâ.

*Jesus Galiléia eynynâ tâwanu nhaguhobyry*

*(Mt 4.12-22; Lc 4.14-15; 5.1-11)*

<sup>14</sup> João Batista etadâbygueduo myani Jesus Galiléia eynynâ adakobâdily, Deus itaumbryry iwâkuru egatuze.

<sup>15</sup> Aguely myani:

– Inepa ise idânârâ mâuntulymo Deus pymâ ton-honreim awyly. Âjityendaungâ, inakanhe amitombohyry wâgâ. Inakanhe adâjidyly imowâdaungâ warâ. Deus itaumbryry iwâkuru einwântaungâ – kely.

<sup>16</sup> Aituo Jesus paru Galiléia emelay adakobâdily. Tadakobâday azagâ uguondo nhedyly, Simão Pedro, iukonolâ André warâ. Âedâgue kanra sawâni myani akaemo, vende tientoem. Âedâ paikaji nhamelymo ume myani Jesusram âzeholymo.

<sup>17</sup> Jesus aguely eyanmo:

– Âetaungâ. Saguhoem kanra keankâ mawelymo; iwerâ kurâ domodo ynyonroem itoem unâry egaturin-em ise âmaemo – kely.

<sup>18</sup> Inepa kehoem âedâ kanra sawâto inmolymo, Jesus eynynonroem tâitomoem, Deus wâgâ tiuntuhoem.

<sup>19</sup> Tâtâday myani Jesus azagâ uguondo modo nhetondily, Tiago, iukonolâ João warâ. Zebedeu imeombryry myani akaemo. Ekadybymoem tywepiryro oday; âedâ kanra sawâto kua nhedylymo, kopaelâgâroem.

<sup>20</sup> Aituo myani Jesus akaemo ingâsedily tynynonroem itomoem. Tunwynmo, tagâ tâwaneim modo warâ tyânzemo myani, Jesus agâ tâtâhomoem.

*Jesus uguondo kadopâgue taseim kua nhetobyry*

*(Lc 4.31-37)*

<sup>21</sup> Aituo Jesus tynynonro modo agâ xidadâ Cafarnaumram saindily. Tâzekobyzegueho oday myani Jesus idâly âtâ tâdâtâdyguyho odaji, enomedâzemo.

<sup>22</sup> Aituo idataynrin modo aguely:

– Koendâ lelâlâ wânkâ merâ konomedâdily uguely! – kelymo.

Ton-honre kehoem mawânkâ aguely, adâkely tutuze tawlygyue, tâzewenry ara kulâ kurâ domodo enomedâni modo arapa.

<sup>23</sup> Târâ enomedâzemo Jesus atay myani uguondo kadopâgue taseim âepanâguely. Uguondo oday myani kadopâ adaenkely Jesusram:

<sup>24</sup> – Xina kâdynanâdâ! Tutuze urâ koendâ kehoem ânguy mawily, Jesus Nazaré donro! Xina eon-honru etyze âetyby mawily, tutuze urâ. Inakanhe amitaymba âmâ; Deus ingonotyby âmâ warâ – kely uguondo kadopâgue taseim; uguondo keba olâ ageim, kadopâ.

<sup>25</sup> Ton-honre kehoem myani Jesus aguely mâkâ uguondo odano kadopâram:

– MYK alelâ ikâ! Adâkeonzeba ikâ! Igasegâ iweâ lelâlâ merâ uguondo odaypa! – kely Jesus.

<sup>26</sup> Jesus agueduo kadopâ uguondo nhapânyly ton-honre kehoem. Ton-honre kehoem adaenkely. Ilâ umelâ myani uguondo odaypa egasely, idâly.

<sup>27</sup> Idânârâ etaynrinbryry modo tâsewânizemo, tuomazezemo warâ myani. Aituo âjigye aguelymo:

– Iwelo modogue awâkâ konomedâdily! Âdykâ awârâ aguely kindataymba kurâ! Kadopâ takaze kehoem awâkâ aguehobyry eon-honru. Warâ keduo, aguely âzeinwân-honly lelâ – kelymo myani.

<sup>28</sup> Inepa kehoem Galiléia eynynonro modo Jesus egary indadylymo.

*Jesus Pedro imenhundu kua nhetobyry*

*(Mt 8.14-15; Lc 4.38-39)*

<sup>29</sup> Ilâpygueduo, Jesus egasely Tiago, João warâ agâ âtâ tâdâtâdyguyho odaypa. Simão†, André warâ etyram myani idâlymo. Simão imenhundu tâwâne myani toenzepa iaturu.

† 1:29 Simão myakâwândy ezedy, Jesus olâ Pedrogue ezetâni.

<sup>30</sup> Jesus egawândyly tientuo, tonlo modo eyam aguely:

– Toenzepa Simão imenhundu ewânu – kelymo.

<sup>31</sup> Aituo tâwâneim eguetonra idâly. Emary wâgâ nhawâdyly, sautoem. Ilâenlâ kehoem myani iaturu inmoly. Aituo myani pekodo tyatureimbyry saudyly, ipynirymo aiese, âwinduatomoem.

*Jesus tâwânuneim modo kua nhetobyry*

(Mt 8.16-17; Lc 4.40-41)

<sup>32</sup> Xixi âwâmpygueduo, myani tonlo modo tâwânuneim modo, kadopâgue taseim modo warâ Jesusram nhadylymo.

<sup>33</sup> Toenzepa kurâdo âtâdygyuly Simão ety inataji, Jesus aidyly ese.

<sup>34</sup> Âkelo tâzewânugue tâwânuneim modo kua tyese lâpylâ myani. Kadopâ modoram aguely:  
– Kurâ domodo imowâdaungâ. Ânguy wawyly adâkezeba itaungâ-ro warâ.

Jesus arâ aguely myani, Deus Imery Jesus awyly tutuze kadopâ modo awylygue, awârâ xutuen-hon-ho odaji nipyra awylygue.

*Jesus Deus wâgâ Galiléia eynynâ nhegatuhybyry*

(Lc 4.42-44)

<sup>35</sup> Pealâ myani Jesus âxiguely. Âji âdy peba atoram idâly, Deus agâ agueze.

<sup>36</sup> Tuagueduo Simão Pedro domodo Jesus târâpa awyly nhedylymo. Aituo xuize idâlymo.

<sup>37</sup> Deus agâ aguely ume nhodylymo. Tiontuo aguelymo:

– Âdaituoka tarâ mawyly? Idânârâ âdykâ mawyly tiuntudyzemo enra – kelymo.

<sup>38</sup> Aituo Jesus in-hoguly:

– Âkealâ. Taunloem kulelâba olâ keankâ kâjigonoholy. Inoro âtâ anary iwaguepaonram, Deus xunârybyry egatuze – kely Jesus.

<sup>39</sup> Aituo âtâ anary Galiléia eynynonro modo einkâ adakobâdylymo. Deus wâgâ adâkeze myani âtâ tâdâtâdygyuho odakâ, kadopâgue taseim modo kua tyese warâ myani.

*Jesus uguondo tâjimituguelygue tâwâneim kua nhetobyry*

(Mt 8.1-4; Lc 5.12-16)

<sup>40</sup> Jesus adakobâday myani uguondo iopaji saindyly. Tâjimituguelygue tâwâneim myani mâkâ. Jesus enado âzeguhoam idyly, tynrense tawyly tienehon-hoem. Aituo myani Jesusram aguely:

– Pymâ, kua yese ton-honre mawyly, xutuanze. Kua yedyse âmâ watay, kua yekâ wao – kely.

<sup>41</sup> Toenzepa myani Jesus mâkâ tâwâneim intyendyly, arâ tientuo. Aituo tâmarygue MÂ' nhedyly. Eyam aguely:

– Kua âedyse urâ. Tâwânepa âmâ iweâma. Kua âetai – kely.

<sup>42</sup> Ilâenlâ kehoem kua idyly. Iwâgâ pinuri peba idyly, ituby itugoenzely warâ.

<sup>43</sup> Uguondo kua tiempygueduo Jesus aguely:

– Iweâma tâwâlâ idâ.

<sup>44</sup> Ânguyran-ne xirâ kua âetobyry kâzegatu – kely.

– Kurâdo eynynâ Deus agâ agueinram âzehora, kua itybyem mawyly nhetoem. Kua itybyem mawyly kurâdo nhetoem, Deusram âdylâ xudugâ, kâzewenryem Moisés inweniby agueho ara – kely Jesus.

<sup>45</sup> Mâkâ uguondo olâ myani târâpa itybyem kua tyetobyry tâgatuze lelâ. Idânârâ egary indadylymo. Awylygue, xidadâ imâsedo odakâ Jesus nâtâba awyly, toenzepa kurâdo tydâtygyuba itoem. Kurâ domodo aguipaom duay, xidadâ imeombyry oday alelâ ize awyly. Kurâ domodolâ aguely idase, nhenomedâdo xutuze warâ idâim.

## 2

*Jesus adakobâdânry kua nhetobyry*

(Mt 9.1-8; Lc 5.17-26)

<sup>1</sup> Iweâpa itybyem myani Jesus odopâdyly xidadâ Cafarnaumram. Inepa kehoem egary indadylymo warâ; Jesus târâ awyly nhutulymo.

<sup>2</sup> Toenzepa lâpylâ kurâdo myarâ idâppy âtâdygybyem awylymo. Tasera tumyke kehoem, toenzepa lelâlâ âtâ odaji tâdâwântoemba lâgâlâ. Deus wâgâ Jesus aguely indadylymo.

<sup>3</sup> Jesus âtâ oday aguely ume uguondo tâwâneim adaholy. Adakobâdânry myani mâkâ. Aituo quatro eataen-hodoram adaholy sawo wâgâ.

<sup>4</sup> Toenzepa kurâdo awylygue olâ myani Jesus iopaji naimpyra awylymo. Pyanta oze tâgawâmpyra tawlyly tientuomo myani âkulymo âtâ angawanxi\* tâdâkuho wâgâ adakobâdânry agâ. Jesus nhangawaym kehoem myani in-hoguylymo. Ilâ oze myani tâwâneim eguetudo wâgâlâ tasegue nhytâguyândylymo.

<sup>5</sup> Aidylymo tientuo Jesus tyangahu oday aguely:

– Awâkâ adakobâdânry kua kânhedlyly tâinwânse asaemo – kely.

Aituo Jesus aguely eyam:

– Idânârâ inakanhe amitobyry modo xygakeagui – kely.

<sup>6</sup> Moisés inweniby wâgâ enomedâni modo târâlâ myani âtâ oday ekadaymybem. Jesus aguely tindatuomo, âpaunzedylymo:

<sup>7</sup> – Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidyse awyly kulâ! Âdaunlo uguondo nhygakely mâkeba awârâ idânârâ inakanhe adâjitobyry modo! Deus lelâ awârâ xygakerim – kelymo.

<sup>8</sup> Tutuze olâ myani Jesus âdy nhangahumo oday xunârymo awyly. Aituo aguely:

– Arâ ywâgâ tâpaunzezeba itaungâ! Unâguedaundâ – kely.

<sup>9</sup> – Merâ adakobâdânryam: “Idânârâ inakanhe amitobyry modo xygakeagui” uguely-ro watay, mâuntuwâbyra ise âmaemo âkealâ, âkealâba warâ auguely awyly. “Aukâ. Iguetudobyry sanâkâ. Adakobâgâ” ugueduo, adakobâdyly-ro watay olâ xutuze âmaemo, ton-honre wawyly!

<sup>10</sup> Merâ koendâ adakobâdyly mâentuomo, xutuze âmaemo, kurâ domodo inakanhe aito xygakeze ton-honre wawyly, urâ Uguondo Kaynâpa Âetyby – kely Jesus.

<sup>11</sup> Aituo adakobâdânryam aguely:

– Aukâ, iguetudobyry sanâkâ, adakobâgâ, idâ itynra – kely.

<sup>12</sup> Aguely umelâ kehoem koendâ idyly, saudyly idânârâ enanaynmo. Tâguetudobyry nhanâdyly, adakobâdyly, egasely, tâtyram idâly. Idânârâ âsewânilymo, iomazelymo warâ. Aituo aguelymo:

– Koendonro, ton-honreim warâ Deus! Âdykâ aunlo kientaymba kurâ! – kelymo.

*Jesus Levi tynynnonroem itoem ingâsedobyry*

*(Mt 9.9-13; Lc 5.27-32)*

<sup>13</sup> Aituo Jesus egaseondyly. Idâondyly paru Galiléia edazekâam. Toenzepa myani kurâdo saindyly eyam, Deus wâgâ nhenomedâdoam.

<sup>14</sup> Târâ tadakobâday Jesus, uguondo impostu epywado emakeim nhedyly. Levi myani mâkâ, Alfeu imery. Ekadybyem myani kurâdo impostu nhepywadodâ. Aituo Jesus aguely eyam:

– Yagâ âekâ, Nynnonroem ikâ, yagâ mâsenomedâdoem – kely.

Aituo Levi saudyly. Jesus agâ idâly, eynynnonroem tâitoem.

<sup>15</sup> Ilâpygueduo kopae Jesus tynynnonro modo agâ âwinduadylymo Levi etydâ. Dinheru impostu epywadobyry emakewâni modo, kurâdo judeu domodo izepa ato modo, Jesus aguely idase eagâ adakobâni modo warâ târâmo lâpylâ âwinduadylymo.

<sup>16</sup> Moisés inweniby wâgâ enomedâni modo, fariseu domodo warâ âdara idyly awyly tânuagaenzemo myani. Izepa tatomo agâ Jesus âwinduadyly tientuomo, Jesus eynynnonro modoram aguelymo:

– Kâzewenry araba kulâ awâkâ Jesus aidyly! Dinheru impostu epywado emakewâni modo agâ, kurâ domodo inakanhe kulâ aini modo agâ warâ âxidujaji nipyra tâise awâkâ! – kelymo.

<sup>17</sup> Aguelymo tindatuo Jesus eyanmo aguely:

– Deus wâgâ auguehoem uirimpnylâ asaemo. Tâwânuneim modo mawânkâ kua tyeni xuirim, tâwânunenry modo keba. Inakanhe aini modo igâseze kâewyly, “Inakanhe aitânry urâ” kewâni modo igâseze inkâba xirâ kâewyly – kely.

*Saguho kiuntuyby kyjimonre, iwelo kiuntuhoem*

*(Mt 9.14-17; Lc 5.33-39)*

<sup>18</sup> João Batista eynynnonro modo, fariseu eynynnonro modo warâ ezewenrymolâ mykâinane nâwinduapyra idylymo, Deus agâ adâkehoem. Aituo kurâ domodo saindyly; Jesusram aguelymo:

– João Batista eynynnonro modo, fariseu eynynnonro modo warâ nâwinduapyra tâiseimo inanry, Deus agâ adâkehomoem. Âynynnonro modo olâ nâwinduapyra nipyramo, Deus agâ adâkehomoem. Âdaituoka anipyra awylymo kâzewenry agueho ara? – kelymo.

Aituo Jesus eyanmo aguely:

\* 2:4 Mârâ ume âtâ nhangakuedary TUN-HUM waunlo lelâ mawânâra saryum waypa, iwerâ âtâ emyenro keba.

19-20 — Eagâmo wawyly ara, nâwinduapyra nitaymbamo ise. Eagâmpa wituo olâ nâwinduapyra isemo, Deus agâ adâkehomoem. Todohogüin-horam igâsedaymby modo mawânkâ ohogüinrim agâ tatay, nâwinduapyra nipyra, etygumo lelâ. Ohogüinrim tuduaypa ituo lelâ nâwinduapyra idylymo myara — kely.

21 Jesus eyanmo agueondyly. Nhenomedâdylymo xirâ modogue.

— Âtâba adaguehobyry tawentâzeba âtâ iwelo sapidubygue. Âtâ sawentâdobyry tukuiduo, odopâduo, tadaugueze mawânâ âtâbâ.

22 Tâjityby vinhu etaryem xygatyby iwelo keba odaji vinhu iwelo tâkanâduneba. Tâjityby iwelo keba odaji ekanâduo, etary tadaugueze mawânâ. Aituo vinhu apâdyly. Aypa olâ, vinhu iwelo etaryem tâjityby iwelo xygatyby odajilâ ekanâdyly watay, vinhu nhewantuo, imâem ituo warâ, tâjityby iwelo tâzepâgueze — kely Jesus.

{Jesus aguely, saguho konomedâdobyry kinmoem, iwelo konomedâdo kieinwântoem warâ. Saguhobyry mawânâ nâseinwâmbyra iwelo konomedâdo agâ.}

*Jesus eynnonro modo tâzekobyzegueho oday trigu ewily nhasewâdomobyry (Mt 12.1-8; Lc 6.1-5)*

23 Tâzekobyzegueho oday myani Jesus tynnonro modo agâ trigu ejidy ezakâ sakadylymo. Sahuadybyem myani trigu ewily. Tâtâdaymolâ Jesus eynnonro modo trigu ewily nhasewâdyly; tâzewenkelâ aidylymo. Tâmarygue nhekyguelymo, nhagulymo idylymo.

24 Aituo fariseu domodo ewy, akaemo aidyly tientoemo, Jesusram aguelymo:

— Egâ âynnonro modo âsewanily! Trigu ewily nhasewâdylymo, nhaturugelymo warâ. Tutuzelâ âmâ, kâzewenry eynnâ kokobyzegueho oday âdy aguento keba awyly — kelymo.

25 Aituo Jesus aguely:

— Enanâguedaungâ typynigeba tâituoemo, kydamu Davi, eagonro modo warâ aito-mobyry. Ewindymo lelâlâ myakâwândy.

26 Deus ety odaji egawândylymo. Abiatar myakâwândy mârâ ume kurâdo eynnâ Deus agâ aguewâni modo iwymâry kuru. Davi, eagonro modo warâ tytyenze tawylygue myakâwândy, Deusram xuduypy pão modo Daviram nhuduly. Kâzewenry eynnâ olâ tâise Davi domodo nedawympa. Kurâdo eynnâ Deus agâ aguenri lelâ mawânkâ tâise mârâ pão edawynrim, âkelo modo lâpylâ warâpa. Davi myakâwândy tâdawynze, tagonrodo tuase warâ. Deus olâ myakâwândy nehoguebyramo nipyra, nhedawynduomo.

27 Tyanepa kine, ânguylâ tâzekobyzegueho oday emawydâze. Deus tâzekobyzeguehoem anhetyby lelâlâ wâne sâbado. Tâwâlâ olâ xirâ oday tâdâsemawydâdyly.

28 Uguondo Kaynâpa Âetyby urâ. Âdy iwâkuru adyeseim, adyesenry warâ tâzekobyzegueho oday xuturim urâ — kely Jesus.

### 3

*Jesus uguondo âzemapiluguedânry kua nhetobyry (Mt 12.9-14; Lc 6.6-11)*

1 Jesus egawântondyly âtâ tâdâtâdyguyho odaxi. Uguondo âzemapiluguedânrybe myani târâ.

2 Tâlâ lâpylâ myani târâ kurâdo ewy Jesus izepaom. Jesus tiunâguedomoem kulâ aidyly enuagaeni modo xunâzelymo:

— Tâzekobyzegueho oday Jesus awâkâ uguondo emary kua nhedyly watay, Moisés inweniby araba aidyly awyly aguykenre. “Deus aiedyseba ato amientai” kykenre — kelymo.

3 Aituo Jesus mâkâ uguondo âzemapiluguedânry ingâsedyly:

— Âekâ xarâ — kely.

4 Mâkâ tuopaji idâduo Jesus âtâdyguyby modo nhapâiguely:

— Âdaraka Moisés inweniby aguely, koendâ aguidyly, inakanhe aguidyly tâzekobyzegueho oday? Ânguylâ tâzekobyzegueho oday kâmaynoem watay, kienmakely? Tâwâlâ kingueânehonly? — kely Jesus.

Ânguy olâ aguely nihoguba.

5 Jesus tyewiâpaze, tytywanze warâ myani. Saguho tâzewenrylâ ize atomo kuru awylygue, mâkâ uguondo nityembyramo myani. Aituo Jesus uguondoram aguely:

— Âzemapiluguegâ — kely.

Jesus agueduo, uguondo âzemapiluguey, emary kua ienipryrem awylygue.

6 Awârâ tiento fariseu domodo târâpa egaselymo. Herodes eynnonro modo ewy agâ âtunâgueze idâlymo, Jesus tyâen-hon-homoem.

*Toenzepa kurâdo Jesus aguely idase âtâdyguyhomobyry*

7 Târâpa Jesus âxiguely. Paru Galiléia emelaji myani idâlymo tynnonro modo agâ. Toenzepa kurâdo Galiléia donro, Judéia donro warâ eagâ idâlymo.

<sup>8</sup> Xidadâ Jerusalém donro, Iduméia donro warâ eagâ idâwânmo lâpylâ. Paru Jordão eynnonro, Tiro eynnonro, Sidom eynnonro modo warâ idâwânmo lâpylâ. Tâinkânro modo lelâba myakâwâm eagâ idânri modo, anhekyly tiuntudyze tawylmogue.

<sup>9</sup> Toenzepa kurâdo okonodyly tientuo tynnonro modoram aguely:

– Pepine nhontaungâ. Kurâdo yakabeba itoem, pepi oday ekadybyem ise kâenomedâdylimo – kely.

<sup>10</sup> Toenzepa kurâdo kua nhedyly awylygue, tâwânuneim modo kurâdo agâ okonodylymo, Jesusram taintomoem, “MÂ’ kientuo, kua ise kurâ” tâkeduomo.

<sup>11</sup> Kadopâgue taseimbe lâpylâ târâ. Jesus tientuo myani enado âzeguhoam itybyem, aguelymo:

– Deus imerylâ âmâ! – kelymo.

<sup>12</sup> Jesus olâ ton-honre kehoem aguely:

– Ânguyem wawlyly adâkezeba itaungâ – kely kadopâ modoram.

*Jesus tynnonro tienomedâgyuly modo induakehobyry*

*(Mt 10.1-4; Lc 6.12-16)*

<sup>13</sup> Ilâpygueduo Jesus iwy onwa âkuly toenzepa kurâdo agâ. Akaemo ewy myani induakely.

<sup>14</sup> Induakewâdyby modo iopaji idâim. Doze lelâ induakely tunâry egaturin-em.

– Ynnonro ise âmaemo, yagâ âsenomedâniem. Ogonodylymo olâ, Deus itaumbryy egatuze. “Jesus tunâry egatuze ingonotaymby modo” kely ise izedymo – kely.

<sup>15</sup> – On-honrumo xirâ kâunduly, kadopâ mânhânkyhomoem – kely Jesus.

<sup>16</sup> Doze lelâ induakeyby:

Simão (“‘Pedro’ ise izedy”) Jesus kehobyry)

<sup>17</sup> Tiago, João warâ, Zebedeu imeombry (“Boanerges”) kelygue nhezetaâdyby lâpylâ asaemo, “Ton-honre tytareim”) keze aguely.)

<sup>18</sup> André

Filipe

Bartolomeu

Mateus

Tomé

Tiago (Alfeu imery)

Tadeu

Simão (Tâty anary izetonro lelâlâ tawylgue, Roma donrogye tywymâgu izepaom.)

<sup>19</sup> Judas, Queriotte donro (Jesus egamenribyry izepaom modoran-ro)

Warâ Jesus induakewâgyuly.

*“Satanás eon-honru kainly lakuru Deus eon-honrugue” Jesus kehobyry*

*(Mt 12.22-32; Lc 11.14-23; 12.10)*

<sup>20</sup> Ilâpyryem Jesus egawândyly âtâ odaji tynnonro modo agâ. Târâ awyly tiuntuduo toenzepa kurâdo Jesus tiendysedonro modo myarâ idâly. Awylygue, tynnonro modo agâ âwinduatoem nudupa lâgâlâ.

<sup>21</sup> Jesus ipemugudo awârâ tiuntuduo ese idâlymo, Jesus “Âindâam idyly” kely idanipyryem tawylmogue.

<sup>22</sup> Jesus ipemugudo saindyly ume myani Moisés inweniby wâgâ enomedâni modo Jerusalémâpa saintybyem, Jesus wâgâ aguelymo:

– Belzebu\* eon-honrugue kulâ awâkâ kadopâ modo nhânkyly – kelymo; kewâdylimo kulâ olâ.

<sup>23</sup> Aituo Jesus akaemo arâ aguewâtyby modo tuopaji ingâsedyly. Tienomedâdomoem, Satanás eon-honrugueba kadopâ modo inwenkely wâgâ, aguely:

– Satanás kadopâ niwenkewâbyra, eynnonrolâ mawânkâ. Tâwâlâ Satanás okonodyly waunlo ara kulâ tâise.

<sup>24</sup> Âjigüe âzety anano modo âsegyebyly-ro watay, mârâ âtâ anary tadainze.

<sup>25</sup> Âjipemugu âjigüe kulâ âsegyebylymo watay, tyewiâpadaynzemo, tâwiensemo warâ. Tagonro agâ koendâ nâzepyramo, âjidueryem tâisemo mawânkâ.

<sup>26</sup> Kadopâ modo iwymâryma Satanás. Kadopâ modo âjigüelâ âsegyebyly, tygue tygue idylymo warâ watay, ton-honremba tâise Satanás. Tywymâgueba tâisemo mawânkâ. Satanás eon-honrugue inkâba kadopâ modo kânhânkyly. Satanás eon-honru kainly lakuru Deus eon-honrugue – kely.

<sup>27</sup> – Uguondo ton-honreim ety odaji ânguy negawântaymby, emagaduze, tâkâjizeba mâkâ watay. Ekâjiduo lelâ isejiguy emagazedlyly. Satanás eon-honrugue aini mâkeba urâ, eon-honru sainrim lakuru – kely myani Jesus.

\* 3:22 Satanás ezedy eagonro awârâ “Belzebu.”

<sup>28</sup> – Deus izepa ato amânhedylymo, amyguelymo, mâunâguedylymo warâ-ro watay, idânârâ awârâ modo xygakeze Deus, mâenkadylymo-ro watay.

<sup>29</sup> Deus Ispiritury ewanu wâgâ inakanhe kulâ amyguehobyry olâ ise Deus nygakeba. Arâ agueim modo aguehobyry Deus nygakewâbyra aunloenlâ. Xirâ mâuntudyzemo kuru wato – kely Jesus.

<sup>30</sup> “Kadopâ agâ awâkâ Jesus” kerim modope awylygue myani Jesus arâ aguely.

*Jesus tyze, tukonodo warâ wâgâ aguehobyry*

*(Mt 12.46-50; Lc 8.19-21)*

<sup>31</sup> Jesus aguely ume, ise, iukonodo warâ saindylymo eydâ atoram. Kuoholâ ingâsenehonlymo.

<sup>32</sup> Toenzepa târâ kurâdo iopay ekadaymbyem awyly. Târâ mawânkâ aguehonly:

– Âze, âukonodo warâ târâ inuendyly – kehonly.

<sup>33</sup> Aituo Jesus aguely:

– Yze lelâlâ mâkâ pekodo. Konodo lelâlâ akaemo uguondo modo warâ. Tâlâ lâpylâ olâ yze ara lelâ, konodo ara lelâ warâ kâenkylly kuru – kely.

<sup>34</sup> Arâ adâkebygueduo Jesus MYK idyly, tânâmize ekadaymby modoram, aguely:

– Etaungâ. Asaemo mawânkâ yze ara, konodo ara warâ kâenkylly, kâinwynegyly warâ.

<sup>35</sup> Idânârâ mâkâ Deus ize ato ara aietaynrin modo mawânkâ konodo ara, koudo ara, yze ara warâ kâenkylly – kely Jesus.

## 4

*Jesus trigu ewy tamuınze etâni wâgâ unâ nhegatuhoobyry*

*(Mt 13.1-9; Lc 8.4-8)*

<sup>1</sup> Jesus kurâdo nhenomedâdondyly paru Galiléia emelay. Toenzepa myani kurâdo eydâ âtâdygybyem awyly. Aituo ekadyly pepi sagunu iwaguepanro odaji. Kurâ domodo tâpagune lelâ paru emelay, Jesus xunâry idase.

<sup>2</sup> Jesus unâ nhegatyly, kurâ domodo tienomedâdoem, aguely:

<sup>3</sup> – Xirâ idataungâ. Tâlâ myani uguondo trigu ewy tamuınze etâni typi ezay.

<sup>4</sup> Nhamunday olâ myani tâlâ ânwa oze ihugueim. Mârâ myani konopio modoram tadaguoze.

<sup>5</sup> Tâlâ pylâ toenzepa tuhube atoram ihugueim, onro tâsanigueba atoram. Inepa kehoem myani târâ iazely wâne, tydâetâgueba olâ mârâ ago idyly.

<sup>6</sup> Xixiram tâjiaduân-honze myani nady tyaduânse, iwiny ago ondaxi nâtâba awylygue.

<sup>7</sup> Tâlâ myani tygyreimpe atoram ihugueim. Tygyreim modo, trigu modo warâ âzekiba ago tâise myani. Tygyreim olâ ago ini kuru, trigu takaze kehoem. Aituo kopâ ihugueyby nikuiba. Aituo âdaitoem nudupa. Mârâ duay tawylygue trigu newiseba.

<sup>8</sup> Tâlâ myani onro iwâkuru onwa ihugueim. Tyazewâse, ago tâise, tâwiseze warâ myani. Toenzepa myani mârâ nady modo ewitunu. Koendâ kehoem myani ekaunâdyly ewy modo wâgâ cem, sessenta, trinta alelâ kehoem – kely.

<sup>9</sup> Warâ Jesus nhegatyly eyanmo.

– Xirâ unâ aguely koendâ mâuntudyze mataymo, koendâne angahumo odaji ietaungâ – kely Jesus.

*Âdaituo unâ tâgatuzeingue kulelâ tienomedâdyly Jesus aguehobyry*

*(Mt 13.10-17; Lc 8.9-10)*

<sup>10</sup> Îlâpygueduo kurâ domodo idâwâdyly, Jesus aguely idanipryem. Jesus eynonro modo, târâ âxiânwâdyby modo warâ Jesus nhapâiguelymo:

– Âdaituoka mâenomedâday unâ mâengatyly, ago lelâ amyguepa mawyly? – kelymo Jesusram.

<sup>11</sup> Aituo Jesus in-hoguly:

– Saguhoeim mykâinane Deus nutuen-homba âdara idânârâ iwymâryem tâidyly. Urâlâ olâ xutuen-hoim âyanmo, âmaemoma mâindadysedonromo. Koendâ ise âyanmo kâuntuen-honly. Deus koendâ tiuntudyzebaom modo olâ unâ tâgatuzeingue lelâ kâenomedâdyly.

<sup>12</sup> Agânhekyly tâensemolâ wâne, nutubamo olâ, nepyramo-ro waunlo ara kulelâ. Auguely tydaseamolâ wâne, âdakeze auguely nutubamo olâ ise. Koendâ tiuntuduomo, Deus izepa ato aiedyly tumozemo tâise. Deus tâinwânsemo tâise, inakanhe aitomobyry tygakeze tâise Deus warâ – kely Jesus.

*Jesus âdakeze nady wâgâ adâkely awyly aguehobyry*

*(Mt 13.18-23; Lc 8.11-15)*

<sup>13</sup> Alâ Jesus agueondyly:



– Nady wâgâ kêngatuyby mâuntuba âmaemo watay, eagonro modo kêngatuduo mâuntuwâbyra ise âmaemo.

<sup>14</sup> Inomedâzemo nady ewy wâgâ auguehobyry ise âyanmo koendâ kêngatuly. Mâkâ nady ewy âpa ezay tamuizne etâni emyenro mawânkâ Deus itaumbry egatuim modo. Deus itaumbry iwâkuru pylâ awârâ nady ewy ara-ro. Onro onwa nady ewy samuin-hobyry ara lâpylâ Deus itaumbry kurâ domodoram âzegatuoly.

<sup>15</sup> Mârâ nady ewy ânwa oze tamuizne etâdyby tadaguoze myani. Aituo âdy niazepa awyly târ samuin-hobyrydâ. Tâlâ lâpylâ arâ Deus itaumbry idataynrim modo. Tydasemo wâne. Inepa olâ Satanâs idânârâ indatybymo nhangahumo odaypa nhetyly. Aituo pylâ Deus neinwâmpyra awylymo-ro warâ.

<sup>16-17</sup> – Mârâ nady ewy onro tuhubeom onwa ihugewâdyby inepa kehoem iazely. Iwiny modo ago ondaxi nâtâba awylygue olâ, inepa iladaynly, iguwâdyly warâ. Tâlâ lâpylâ arâ Deus itaumbry idataynrim modo. Tindatyby modo tâinwânsemo tuomare kehoem. Tâzenagaeoduo olâ inepa kehoem Deus neinwâmpyra idylymo.

<sup>18</sup> – Tâlâ mârâ nady ewy tygyreim duaxi ihugewâdyby, ago tâise wâne, newiseba olâ, tuahuze mârâ tygyreim awylygue. Tâlâ lâpylâ arâ Deus itaumbry idataynrim modo, Deus tâinwânsemo wâne.

<sup>19</sup> Xirâ onro anaym adienkyly modo wâgâ kulâ olâ âseguâdâdylymo. Toenzepa âdype tâidyly kulâ, toenzepa tydinherugadyly kulâ warâ olâ ize atomo. Kurâdo tohoguedyly kulâ ize atomo. Awylygue Deus nhenanânehonlymo. Deus itaumbry nidapyra, iwâgâ nâpaunzebyra warâ idylymo. Deus wâgâ ânguyram aguepa idylymo warâ.

<sup>20</sup> – Mârâ nady ewy onro iwâkuru onwa ihugewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim, sessenta lelâ ewily xuduim, trinta lelâ ewily xuduim warâ. Tâlâ lâpylâ arâ Deus itaumbry idataynrim modo, tindakylymo lelâ nheinwânkylimo. Deus lelâ nheinwânkylimo. Ize ato lelâ anhekylymo. Iwâgâ aguelymo, toenzepa kurâ domodo nheinwântoem warâ – kely Jesus.

*Âdy kioempyra kine Deus kurâem anhetyby  
(Lc 8.16-18)*

<sup>21</sup> Jesus aguely:

– Âyanmo kêngatuyby koendâ mâuntudyzemo urâ. Peto tyatygueim âdylâ iaxi toentuneba, kama iaxi tyeseba, cestu iaxi tyeseba warâ. Kayanlâ kianlokuândyly âtâ oday, idânârâ nhesagon-hoem.

<sup>22</sup> Idânârâ unâry mâuntuba mitomoem xirâ auguely. Koendâ kehoem mâuntuhomoem auguely. Idânârâ soentaymbry modo âjjeapanâgueowâze; idânârâ koendâ tydasenrybyry modo âjidahoze, keze mawânâ xirâ auguely.

<sup>23</sup> Xirâ unâ koendâ mâuntudyze âmaemo watay, koendâne angahumo odaji ietaungâ.

<sup>24</sup> Idânârâ auguehobyry koendâ idataungâ. Mâindatomobyry ara lelâ amidylymo-ro watay, ago kuru mâuntuhomoem inomedâdonzemo lelâ urâ.

<sup>25</sup> Imâem ywâgâ mâuntudyze âmaemo watay, imâem ise mâuntulymo. Ywâgâ mâuntudyzeba âmaemo watay olâ, âdiempa ywâgâ mâuntuybymo enanânehonze âmaemo. Utuba ise âmaemo warâ – kely Jesus.

*Deuslâ Jesus einwânni modo imâem nhutuhomoem aieni*

<sup>26</sup> Aituo Jesus agueondyly. Unâ nhegatuondyly enomedâzemo:

– Deus kywymâryem kuru idyly wâgâ ise auguely. Tâlâ myani uguondo nady ewy tamuizne etâni.

<sup>27</sup> Nady ewy tientâbygueduo myani eagonro âwanu anhekyly. Peto oday âsewanily, kopae xykyly. Eagonro ewanu anhetay, nady ewy iazely, ago itaynly. Deuslâ mârâ ago ieni, uguondo keba.

<sup>28</sup> Onro iwâkuru watay, ewy samuimby tyazeze, ago tâise, tâwiseze, tahuaze warâ.

<sup>29</sup> Trigu sahuaduo, sodo nhatâwâdyly, ekaunâdo odaji itybyem awylygue – kely Jesus.

{Deus itaumbry lelâ kieinwânkylimo watay, ize ato ara aise lelâ kurâ. Awyara lâpylâ ise ohondybyem lelâ kydawyly kêense Jesus âewyly-ro watay.}

*Jesus mostarda ewy wâgâ aguehobyry  
(Mt 13.31-32; Lc 13.18-19)*

<sup>30</sup> Tienomedâdondomoem Jesus âkelo unâ nhegatuondyly myani eyanmo. Aguely:

– Unâ segatuji wao âdara Deus kywymâryem lelâlâ idyly awyly mâuntuhomoem.

<sup>31</sup> Tutuzelâ âmaemo, idânârâ nady ewy modo takaze kehoem mostarda ewy imeimbyryem awyly.

<sup>32</sup> Tâtâduo olâ tyazeze, kaynâ kehoem ago tâise, eagonro modo etâdaymby modo takaze kehoem ago tâise; imâsedo modoem kehoem tywatazeze warâ. Awylygue tawâguneim modo iwatary wâgâ tâty anhetoem nhuduly – kely Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui idylymo” keze Jesus aguely.}

*Jesus unâgue lelâ tienomedâdaymo aguehobyry*

(Mt 13.34-35)

<sup>33</sup> Jesus Deus wâgâ kurâdo nhenomedâdily, unâ nhegately warâ. Nhutuhomo aralâ olâ mykâinane nhenomedâdilymo.

<sup>34</sup> Kurâdo nhenomedâdily watay, âdylâ wâgâ mykâinane unâ nhegately. Tynynonro modo koendâ tonomedâze olâ mykâinane âdara keze mârâ unâ aguely awyly wâgâ.

*Jesus sapezenru ton-honreim, kopâ tyelugueim agonro nhepagunâdobyry*

(Mt 8.23-27; Lc 8.22-25)

<sup>35</sup> Ilâ iguandyly ume Jesus tynynonro modoram aguely:

– Paru kuyam kydâzekuâne – kely.

<sup>36</sup> Aituo kurâ domodoram âsedaengulymo. Pepi odaji âxiedilymo, tâzekuâdomoem Jesus agâ. Kurâ domodo idâwânmo lâpylâ eagonro pepi modo oday.

<sup>37</sup> Âzekuâdilymo ume myani kopâ sapezenru ton-honreim kopâ agonro adaguly. Toenzepa kehoem myani paru adahugânily, xytyânimobelâ kehoem.

<sup>38</sup> Mârâ aitay myani Jesus pepi ihudâ xykyly tyangahu awo wâgâ. Aituo tytylymo tiuntuduo, eynynonro modo nhuagueândily. Adaenkelymo:

– Pymâ, âwaguegâ! Aukâ! Kyguely ise xirâ! Kytyly awyly mâempyraka âmâ? – kelymo.

<sup>39</sup> Aituo saudyly. Ton-honre kehoem aguely:

– Arâ kehoem tadapezeinzeba ikâ! – kely sapezenruram.

– Tahugâneba ikâ! Ipagugâ! – kely paru sahgânuram warâ.

Agueduo tapezenremba idily, paru tahugâneba idily warâ.

<sup>40</sup> Aituo myani aguely tynynonro modoram:

– Tâseanezeba itaungâ. Imakezemo, ton-honre wawyly mâinwâmpyra lelâ waunlo ara lâgâlâma âmaemo – kely.

<sup>41</sup> Toenzepa myani âseanedilymo, aguelymo:

– Etaungâ! Sapezenru nadapezeimba itoem adyese. Paru tahugâneba itoem adyese warâ. Ânguy kuruka awâkâ eon-honru xudunri, awârâ modo anhetoem? – kelymo.

## 5

*Jesus uguondo kadopâgue taseim kua nhetobyry*

(Mt 8.28-34; Lc 8.26-39)

<sup>1</sup> Jesus tynynonro modo agâ paru Galiléia kuyam saindily myani, Gerasaram\*.

<sup>2</sup> Jesus pepi odaypa âzetybygueduo uguondo kadopâgue taseim agâ oxiodily.

<sup>3</sup> Tâdâzepyâdodâpa myani idâly, târâlâ âxidâdybem tawylygue. Aunlolâ mykâinane âzekâjioly kurâdoram, korenty ferroguetogue, ton-honreingue kehoem.

<sup>4</sup> Toenzepa wâne mykâinane nhemakâjilymo, in-hugâjilymo warâ. Mârâ tâkâjiho tukagâze lelâ olâ mykâinane mâkâ.

<sup>5</sup> Iwy tâtaguneim modo igueypy etadâdo odakâ mykâinane adakobâdily. Peto oday, kopae alelâ mykâinane tâinkâ adakobâdily. Aunlolâ mykâinane saenlu, tâwâlâ kulâ tuhugue âdyâly warâ.

<sup>6</sup> Aituo myani iwaguelâ Jesus nhedyly. Eyam tâgase kehoem idâly. Inepa kehoem âzeguhoam idily Jesus enado.

<sup>7-8</sup> Arâ aituo Jesus aguely mâkâ odano kadopâ modoram:

– Igasewâdaungâ merâ uguondo odaypa. Merâ uguondo kâzenagazedaundâ – kely.

Agueduo uguondo adaenkely.

– Ynanâdâ, Jesus, Deus Ton-honreim Imery! Ienagazenehomba mitoemo âyam kâenkadyly – kely myani uguondo kadopâgue taseim.

<sup>9</sup> Arâ adaenkeduo myani Jesus aguely eyam:

– Ânguyka izedy? – kely.

– “Aguiom” xina ezedy, agui tawylygue – kely mâkâ kadopâdo iwymâry uguondo oday.

<sup>10</sup> Kadopâ uguondo odano agueondily:

– Xina xirâ âjidâpa kâzejike – kely.

<sup>11</sup> Tâlâ myani târâ iwaguepa toenzepa pâsega âwinduani modo iwy wâgâ.

\* 5:1 Gadara lâpylâ myakâwâm mârâ âji ezedy.

<sup>12</sup> Aituo myani kadopâ modo aguely Jesusram:

– Awâkâ pâsega modo iodaxilâ xina igonokâ – kely.

<sup>13</sup> Agueduo Jesus eyanmo aguely:

– Tâwâlâ, idâwâtaungâ iodaximo – kely.

Aituo myani uguondo odaypa egaselymo. Pâsega iodaxi pylâ egawândylymo. Toenzepa myani pâsega târâ awyly, azagâ mil awârâem. Kadopâbe tâituo myani pâsega modo enuimbadaynly. Egatudylymo. Iwy wâgâpa adamunedylymo paikaji. Idânârâ kehoem tyense, iguewâdyly.

<sup>14</sup> Pâsega eni modo iwy wâgâpa pâsega paikaji adamunedyly emâmomy. Mârâ tientuo, âwenkelymo. Inepa kehoem idâlymo xidadâram. Poji anakâ takadaymo, tonlo modoram nhegatulymo pâsega modo aitobyry. Xidadâram taintuomodo tonlo modoram nhegatulymo lâpylâ. Arâ egary tindatuo myani xidadâ odano modo aityby ese idâlymo.

<sup>15</sup> Jesusram saindylymo. Târâ uguondo kadopâgue taseimbyry kua ietybyem, âzetydâdybyem warâ nhedylymo, saguhobyry araba, ekadybyem, koendâ lelâ xunâgu warâ. Arâ mâkâ tientuomodo, toenzepa âseanedylymo.

<sup>16</sup> Jesus aidyly etaynrimyry modo âdara aitobyry awyly tâgatuzemo myani. Jesus mâkâ uguondo kadopâgue taseim kua nhetobyry, pâsegado paikay nhetayn-homyry warâ nhegatulymo.

<sup>17</sup> Awârâ tindatuo Jesusram aguelymo:

– Âxiguegâ xina ety anaymba. Taynynâ inkâba ikâ – kelymo, Jesus tâguy pâsega nhaindyseba tawylymogue.

<sup>18</sup> Agueduomodo myani Jesus idâly pepi odaji ekaze. Aituo myani uguondo kua ityby aguely eyam:

– Idâze urâ agâ – kely.

<sup>19</sup> Jesus olâ warâ aguely:

– Atâlâ ikâ. Itynralâ odopâgâ. Âmâem koendonro Deus anhetyby egatura âpemugudoram – kely.

<sup>20</sup> Aituo myani uguondo idâly. Dez Xidadâ anakâ myani Jesus kua tyetobyry egatuze. “Jesus kua yedâ” kely tindatuomodo toenzepa âsewânilymo.

*Jairo Jesus ingâsedobyry*

*(Mt 9.18-19; Lc 8.40-42)*

<sup>21</sup> Aituo Jesus tynnonro modo agâ mârâ paru nhekuâdondylymo. Toenzepa myani kurâdo iose idâly mârâ paru emelaji.

<sup>22</sup> Eagâmo aguely ume âtâ tâdâtâdygyho iwymâry Jairo, Jesus iopaji saindyly; âzeguhoam idyly enado.

<sup>23</sup> Jesusram aguely:

– Inoro wao ietyram. Iexiry iguely mârâ. Ytyengâ wao – kely. – Nhonwa imary MÂ’ ietâ wao, kua itoem, niguepa itoem – kely.

<sup>24</sup> Aituo Jesus eagâ idâly. Idâday, taynâ, tâynâ warâ tadakabezelâ kehoem kurâ domodo.

*Jesus pekodo tâwâneim kua nhetobyry*

*(Mt 9.20-22; Lc 8.43-48)*

<sup>25</sup> Kurâdo duay tâlâ myani pekodo tâwâneim. Imery etary myani âunkeim; kuapa idyly agâ toenzepa iunu ihuguely, toenzepa lelâlâ. Doze anupe myani mâkâ arâ ewânu.

<sup>26</sup> Tâpyneândylygue idâzesedyly kua kyesi modoram. Tâwânense nhepywadyly, kua nipyaro warâ. Âdara tienwiândyly awyly nutubamo olâ mykâinane. Toenzepa kua kyesi modo epywanibyryem myani mâkâ pekodo, tâsewiândoem wâne, inakanhe idyly lakuru olâ myani, tydinheruguepa idyly warâ.

<sup>27-28</sup> “Kua kyetâ Jesus” kely tindatuo myani aguelymo tindatobyry aralâ tyangahu oday xunâzely:

– Ety MÂ’ kânhetuo, kua ise lelâ urâ – kely.

Aituo kurâ domodo duakâlâ Jesus ikaingâ saindyly. Eyam taintuo, ikaynâ ety iwâmudâ MÂ’ nhedyly.

<sup>29</sup> Ety MÂ’ nhedyly umelâ kehoem myani iunu ihuguely epagudyly. Jesus kua tyeni awyly xutuwanmy.

<sup>30</sup> Awârâ umelâ kehoem lâpylâ Jesus nhutuly, ânguylâ kua ienipyryem tawyly. Aituo âsemyombâdyly kurâdo tientoem. Aituo kurâdoram aguely:

– Ânguyka enra iety MÂ’ yeni? – kely.

<sup>31</sup> Aituo Jesus eynnonro modo in-hogulymo:

– Egâ, toenzepa kurâdo okonodaynlymo onwa. Agui asaemo ewy ity MÂ' nietai – kelymo.

<sup>32</sup> Âdakepa olâ Jesus enuaguynru lelâ, ânguy tâty MÂ' ienipyry awyly tientoem.

<sup>33</sup> Kua itybyem tawyly tiuntuduo mâkâ pekodo tyanugue, tapâne kehoem Jesus enadoam saindyly, âzeguhoam idyly, aguely:

– Ity MÂ' ienipyryem kua witai – kely.

<sup>34</sup> Aituo Jesus aguely pekodoam:

– Kua itybyem âmâ, kua kyetâ wawyly mâinwântobyry wâgâ. Idâ lelâ ityam. Awârâ aunlogue, tâwânepa ise âmâ iweâma – kely.

*Jesus Jairo exiry kurâem nhetondobyry igueypyem awyly ume  
(Mt 9.23-26; Lc 8.49-56)*

<sup>35</sup> Jesus aguely umelâ Jairo ety donro modo saindyly; Jairoam aguelymo:

– Ipa ixiry nigueaki! Itynra âdaiseba kulâ Jesus kadadâ – kelymo.

<sup>36</sup> Jairoam aguelymo idanipyryem tawylygue Jesus aguely:

– Tadahulizeba ikâ. Yeinwânkâ – kely Jairoam.

<sup>37</sup> Pedroram, Tiagoram, iukono Joãoram warâ Jesus aguely:

– Âmaemo lelâ ise yagâ idâim. Eagonro modo nâtâba ise – kely.

<sup>38</sup> Aituo myani Jairo etyram saindylymo, egawândylymo. Egawântybyem myani Jesus, tonlo modo âwynsaundo epyâdoem on-hondylymo nhedyly. Tâguepymo eongüendylymo, âpyneândylymo warâ nhedyly.

<sup>39</sup> Aituo myani Jesus aguely:

– Âdaituoka ogunrumo, mâpyneândylymo warâ? Niguwâpyra awâkâ âwynsaundo; xykyly kulâ – kely.

{ Arâ aguely, kurâem tientondyly tiuntuduo. }

<sup>40</sup> Arâ aguely tindatuomo nheinledylymo. Igueypyem lelâlâ awyly tiuntuduomo, nâepaigueba awylygue. Aituo Jesus aguely:

– Kuohoram igasewâdaungâ wao. Âwynsaundo nhunwym, ise, Pedro, Tiago, João alelâ yagonro nidâ – kely.

Agueypyem myani Jesus eagâmo egawândyly igueypy ejidyram.

<sup>41</sup> Tâgawâmpygeduomo myani igueypy emary wâgâ sawânipyryem, Jesus aguely:

– *Talitâ kumi* – kely. (“Aukâ, âwynsaundo” keze aguely.)

<sup>42</sup> Adâkehonly umelâ kehoem myani âwynsaundo âepaigueondyly, kurâem itondyly. Kama wâgâpa saudyly, adakobâdyly idyly. (Doze anupe myani âwynsaundo.) Adakobâdyly tientuo myani enipyry modo âseguâdâdylymo.

<sup>43</sup> Aituo Jesus aguely:

– Ânguyran-ne tarâ aityby kâzegatuwâdaundâ – kely.

Âwynsaundo sodo modoram,

– Xuataungâne merâ – kely Jesus.

## 6

*Nazaré donro modo Jesus neinwâmpyra atomobyry  
(Mt 13.53-58; Lc 4.16-30)*

<sup>1</sup> Cafarnaumdâba Jesus âxiguely. Tynynonro modo agâ xidadâ Nazaréram odopâdyly, tânamadobyryanlâ.

<sup>2</sup> Tâzekobyzegueho oday âtâ tâdâtâdygyuho odaji idâly. Târâ Deus wâgâ aguely, kurâdo enomedâze. Toenzepa aguely idani modo âseguâdâdylymo. Aituo aguelymo:

– Koendâ Deus wâgâ tutuze lelâlâ awâkâ uguondo; kiuntuba olâ kurâ âdykâ awârâ nhutuhobyry awyly. Toenzepa awâkâ enomegu, kiuntuba olâ kurâ ânguy enomedânibyry awyly. Adyesenry modo adyese lelâlâ; kiuntuba olâ kurâ âdara awârâ modo anhedyly awyly.

<sup>3</sup> Mure, mesa, awârâ modo segue xygahudâni Maria agâ imery kulâ mawânkâ; Tiago, José, Judas, Simão warâ iwaigoru kulâ awâkâ. Eaundudo tarâ kuduaylâ inanry kyjidadârydâlâ – kelymo.

Jesus iamugâry enipyry tawylmogoue, Deus Ingonotyby mâkâ awyly neinwâmpyra awylymo. Aguely tindâdyseba awylymo warâ.

<sup>4</sup> Aituo myani Jesus aguely:

– Unâ egatuim tâty anaym, unâ nhegatuduo ipemugudoram nâzeinwân-honwâbyra; âkelo âtâ anano modo kulâ einwânni – kely.

<sup>5</sup> Neinwâmpyra tawylmogogue tonlo modo Jesusram nâtâba awylymo. Aituo âdiempa kulâ adyenyry modo târâ anhedily. Aguiapa kulâ tâwâneim tâmarygue MÂ' nhekyly, kua tientoem warâ.

<sup>6</sup> Toenzepa myani âpaunzedily, agui târâ Nazarédâ tâinwântânry modo awylygue.

*Jesus tynynonro modo Deus wâgâ unâ iwâkuru egatuze ingonotobyry  
(Mt 10.5-15; Lc 9.1-6)*

Ilâpyryem myani Jesus kurâdo nhenomedâdily âtâ anary imeombyry anakâ.

<sup>7</sup> Akaemo doze tynynonro modo igâsemâmy, Deus wâgâ agueze tingonotomoem. Azagâ myarâ, azagâ myarâ, azagâ myarâ warâ myani ingonodylymo. Kadopâ nhânkyhomoem eon-honrumo nhuduly.

<sup>8</sup> Egaselymo iraynâ aguely:

– Unâ idataynrin modolâ ise âdy ize matomo xudunri. Pyni, dinheru, âsejiguyimo etary warâ kadataundâ. Amatagorumo lelâ sataungâ, ânwa oze mâzeseydâdomoem.

<sup>9</sup> Owogonromo lelâ itymo sataungâ; âhurumo etary mâungukehomo kadataundâ warâ.

<sup>10</sup> Âtâ anaxi aintuomo, saguhoem âgâsenimobyry etydâlâ itaungâ. Târâlâ âykywâdaungâ, eagonro âtâ anaryam mydâlymo ara.

<sup>11</sup> Ânguy idaenkubamo, amyguelymo tindadyseba warâ atoram aindilymo-ro watay, ineapa igasewâdaungâ. Târâpa igasedaymo, âhurumo etary etywâdaungâ, xutoleguguewâdaungâ warâ, Deusram tânagazezeim awyly xutuhomoem, ize ato ara anipyra awylmogogue, yeinwâmpyra awylmogogue warâ – kely Jesus.

<sup>12</sup> Aituo eynynonro modo Deus itaumbry egatuze idâlymo. Alâ myani tâtâhobrydâ aguezesedylymo:

– Âjityendaungâ Deus xurâem inakanhe amitomobyry wâgâ. Inakanhe Deus xurâem amitomo imowâdaungâ. Aguely kadakadaundâ – kelymo.

<sup>13</sup> Kadopâ tyânkyzemo mykâinane. Toenzepa kurâdo tâwânuneim modo nhangahu onwa azeiti tyesimo mykâinane warâ, kua tientoem.

*João Batista nhangasagâdobyry  
(Mt 14.1-12; Lc 9.7-9)*

<sup>14</sup> Jesus anhekyly modo egary idamâmy pymâ Herodes, tâinkâ lelâba Jesus wâgâ aguelymo awylygue. Tâlâ wakenri modo:

– João Batista kurâem itondyby keanra awâkâ Jesus. João kurâem nitondâ. Awylygue eon-honru adyenyry modo aiese – keim.

<sup>15</sup> Tâlâ lâpylâ wakenri modo:

– Mâkâ keba awâkâ. Elias awâkâ Jesus-em ini – keim.

Tâlâ pylâ,

– Mâkâ keba awâkâ. Saguho modo Deus itaumbry egatuwânybry ewy kurâem ityby awâkâ Jesus – keim.

Warâ myani aguelymo, ânagadoem kulâ.

<sup>16</sup> Ânguyem Jesus awyly wâgâ aguelymo idamâmy Herodes. Aituo myani aguely:

– João Batistama igueypem, xiangasagâneho mawânkâ, Jesus-em olâ âepanâguely iwerâ – kely.

<sup>17-18</sup> Âdara João xyâhobryry awyly ise kâengatuly wao. Herodes myani Herodias agâ tohoguinze, tukono Filipe iwydyem awyly umelâ. Alâ mykâinane João aguezesedyly eyam:

– “Kukono iwydy agâ todohoguinly lâpeba” kelype Moisés inweniby wâgâ – kezesydyly.

Awylygue myani Herodes tyzodadury modoram aguely:

– João Batista sawâtaunda. Emakâjiwâdaungâ, etadâdaungâ-ro warâ – kely.

<sup>19</sup> Herodias myani João izepa, tyâen-honly mykâinane ize ato.

<sup>20</sup> João xyâen-honze tyane olâ myani Herodes, uguondo koendâ lelâ aini mâkâ awyly, tutuze tawylmogogue. Deus ize ato ara lelâ aini João awyly tiuntulygue lâpylâ warâ. Awylygue myani nhetadânehonly lelâ. Alâ mykâinane Herodes xunâgu João agâ. Ize ato mykâinane João agâ tâdunâgu. João aguely tindatuo, âdy adienkyly awyly nutuba idyly mykâinane.

<sup>21</sup> Alâ myani Herodias âdara João tyâen-honly awyly nhutuly. Herodes tyazehobryry nhetyguedyly myani. Idânârâ pymâ domodo, sodadu iwymâry modo, uguondo tâgaruneim modo warâ tygâseze myani. Idânârâ myani âzetyguedylymo Herodes agâ.

<sup>22</sup> Âwinduadylymo ume myani Herodias exiry âise egawândily nhetomoem, iomazeânzemo. Âidyly tientuo myani Herodes, eagonro modo warâ toenzepa kehoem nhehoguedylymo. Aituo myani eyam aguely:

– Tâwâlâ âdylâ ize mato ekagâ; xuduzê lelâ urâ.

<sup>23</sup> Tâwâlâ ise Deus ienagazedily, mâenkadyby kâundupa urâ-ro watay. Pymâ ton-honreim urâ. Âdypeom urâ. Idânârâ tâlâ wato epajiwâze urâ, ize matay – kely âwynsaundoam.

<sup>24</sup> Aituo myani mâkâ âwynsaundo tyze agâ agueze idâly.

– Âdyka ise kâenkaguyly? – kely.

– João Batista nhangahu ekagâ; ilema ise xarâ mâenenehony-ro warâ – kely ise.

<sup>25</sup> Aituo myani mâkâ âwynsaundo odopâdyly pymâ Herodesram. Aguely myani:

– João Batista mânhagasagânehony ize wato. Iweâma ise nhangahubyry mâenenehony prato oday xarâ-ro warâ – kely.

<sup>26</sup> Awârâ tindatuo toenzepa kehoem myani pymâ Herodes itynwandily. Tingâsedyby modo enanaym adâkehobyry awylygue olâ myani anhenehony lelâ.

<sup>27</sup> Aituo myani sodadu kyârim ingâsedyly, eyam aguely:

– João nhangasagâda. Nhangahubyry xarâ enekâ-ro warâ – kely.

Aituo myani sodadu idâly João etadâdobyryam nhangasagâze.

<sup>28</sup> Ilâpyryem myani nhangahubyry prato odaji nhedyly, nhadyly âwynsaundoam. Âwynsaundo myani tyzeram xuduim.

<sup>29</sup> Aituo myani João eynynonrobyry modo xyâhobyry egary indadylymo. Tiuntuduomo myani eguepybyry ese idâlymo. Nhadylymo. Tuhu esagueyby odaji nhetadâdylymo warâ.

Awârâ wâgâ myani Herodes âpaunzedily. Awylygue myani “João keanra awâkâ Jesus” kely tyngahahu oday.

*Jesus cinco mil uguondo modo, cinco pão, azagâ kanra âjihuyby warâgue nhuantobyry (Mt 14.13-21; Lc 9.10-17; Jo 6.1-14)*

<sup>30</sup> Jesus xunâry egatuze igonotaymyby modo todopâdaynzemo myani. Odopâdybyem adientaymyby modo, tienomedâdaymyby modo warâ Jesusram nhegatulymo.

<sup>31</sup> Toenzepa Jesus tynynonro modo agâ atoam, kurâdo saindyly, egasely warâ, Jesus tynynonro modo agâ koendâ âwinduatomoemba. Aituo tynynonro modoram Jesus aguely:

– Inoro âji âdy peba atoam. Ekozeybyem mataunaze adakobâzedybyem. Âetaungâ yagâ. Ikobyzeguewâdaungârâ wao – kely.

– Inoro pylâ – kelymo.

<sup>32</sup> Aituo Jesus tynynonro modo agâ pepi oday âdy peba atoram idâlymo.

<sup>33</sup> Kurâdo olâ pepi oday idâlymo tâense-ro warâ. Awylygue Jesus tynynonro modo agâ âdykâ awyly nhutulymo. Aituo tysegoze idâlymo tuhuru wâgâ, paru nhere. Waunroenlâ saindylymo.

<sup>34</sup> Pepi odayba itybyem Jesus toenzepa kurâdo tynwânwâni modo nhedyly. Akaemo tytyenze myani Jesus ânguy Deus wâgâ nhutuhomoem aguenri peba awylygue. Kanerudo eni pebaom aramo mawânkâ. Aituo Deus wâgâ kurâdo nhenomedâdyly.

<sup>35</sup> Iguandyly ume Jesus eynynonro modo eyam saintaynly. Aituo aguelymo:

– Iguandyly enra. Âdykâ pyni xuiho lâpeba tarâ.

<sup>36</sup> Asaemo igonokâ âpa ezaji, pyni xuize, âtâ anary iwaguepaonram warâ – kelymo.

<sup>37</sup> Jesus olâ aguely:

– Nâtâwâbyramo ise. Âmaemolâ ipyniryimo âunduwâtaungâ – kely.

– Arâ xina anipyra ise enra! Toenzepa dinherupe-ro watay lelâ tâise, duzentas moedas prataguetogue lelâ merâ idânârâ ipyniry adanâdyly. Âdy peba xina-ro warâ – kelymo.

{Tokalâ iguandyly âwanopyry epywado mawânâ myani tokalâ moeda prataguetu.}

<sup>38</sup> Aituo Jesus aguely:

– Âdara pãobeka akaemo? – kely.

Aituo xutuze idâlymo. Odopâdybyem Jesusram aguelymo:

– Cinco pão, azagâ kanra âjihuyby warâpe – kelymo.

<sup>39</sup> Aituo Jesus aguely:

– PU târâ, PU târâ warâ ikadaungâ âji koendonrodâ – kely.

<sup>40</sup> Kurâdo idânârâ ekadaynly PU târâ, PU târâ, PU târâ warâ cem, cinquenta warâ âzepajiwâdylymo.

<sup>41</sup> Aituo Jesus cinco pão, azagâ kanra âjihuyby warâ nhanâdyly tâmaxi. Sanâniubyryem, kayam MYK idily. Deus agâ aguely:

– Koendonro lelâlâ âmâ, Pabai, awylygue xinaem xirâ pão, merâ kanra warâ mâunduly – kely.

Ilâpyryem pão nhepajiwâdyly, tynynonro modoram nhuduly, kurâdoram nhepâdomoem. Nhépâdylymo umelâ kehoem Jesus pão epajiwâdyby, agui nhenehony. Azagâ kanra âjihuyby nhépajiwâdyly tynynonro modoram nhuduly lâpylâ myani, kurâdoram nhépâdomoem. Nhépâdaymolâ kehoem kanra âjihuyby agui idily lâpylâ.

<sup>42</sup> Ize tato ara kehoem idânârâ kurâdo âwinduadyly; kanra âjihuyby nhâdylimo, pão nhedawynlymo warâ. Koendâ kehoem iolataynlymo.

<sup>43</sup> Ilâpygueduo myani Jesus eynynonro modo pão, kanra âjihuyby warâ âsegubydâdyby nhekanâdylimo cestu imâsedo modo odaji. Doze cestu tumyke âsegubydâdyby nhuduly.

<sup>44</sup> Toenzepa myani âwinduani modo, cinco mil uguondo modo lelâ, toenzepa lâpylâ pekodo modo, iamimeom warâ.

*Jesus paru wâgâ adakobâdobyry  
(Mt 14.22-33; Jo 6.15-21)*

<sup>45</sup> Ilâpyryem Jesus tynynonro modoram aguely:

– Âxiedaunda pepi odaji. Idâwâtaungâ paru kuyam kurâdo Betsaida donro modoram. Tarâ asaemoram âsedaengübybem ise oiosome udâly – kely.

– Idâze lelâ xina – kelymo myani.

<sup>46</sup> Tonlo modoram tâsedaengubygueduo, Jesus iwy onwa âkuly, Deus agâ agueze.

<sup>47</sup> Iguampygueduo, Galiléia iwalu iotay pepi odano modo; mâkâ kulelâ myani Jesus târâ awlyly.

<sup>48</sup> Jesus iwaguelâ nhedylymo. Kura kehoem inkâguelymo eon-honrugue, nhonwamo adapezeinly awlylygue. Emedyly wâgâ, aukuma igâtuduo myani Jesus idâly eyanmo. Sakazemo kely ume myani,

<sup>49</sup> paru wâgâ adakobâdylly nhedylymo. “Kadopâ” tâkewâduo adaenkelymo.

<sup>50</sup> Jesus olâ myani eyanmo aguely:

– Âzeon-hondâdaungâ. Tâseanezeba itaungâ! Jesuslâ urâ! – kely.

<sup>51</sup> Aituo pepi odaji âxiedyly. Âxieduo, tapezenremba idyly. Awârâ tientuomo, toenzepa kehoem âseanedylimo.

<sup>52</sup> Jesus pão, kanra warâ agui tienehonduo, enehonwâm, Deus Ingonotyby tawlyly. Awârâ anhetuolâ ânguy Jesus awlyly nutubamo olâ myani. Awlylygue mawânkâ nutuba awlylymo, âdara mâkâ paru wâgâ adakobâdylly awlyly, ago lelâlâ Messiaslâ mâkâ awlyly neinwâmpyra tawlylymogue.

*Jesus Genesaré donro tâwânuneim modo kua nhetobyry  
(Mt 14.34-36)*

<sup>53</sup> Jesus tynynonro modo agâ paru nhekuâdylimo. Genesaréram saindylimo. Saintrybyem, pepi nhekjilymo sagunu wâgâ.

<sup>54</sup> Jesus âzetyly umelâ myani kurâdorom âduuoly, aguelymo warâ:

– Etaungâ. Awâkâ mawânkâ Jesus! – kelymo.

<sup>55</sup> Inepa kehoem tonlo modo xuruse idâwâdylimo, “Jesus naintai” keze. Târâ tawlyly ume, eagonro âtâ anakâ idâwâm lâpylâ Jesus, tynynonro modo agâ. Tâtymo anaxi Jesus saintrybyem awlyly tiuntuduo, tonlo modo tâwânuneim modo eguetudo wâgâ eyam nhadylymo.

<sup>56</sup> Âdyam idâhobyrydâ, tonlo modo, tâwânuneim modo tasemo lelâ Jesus kua nhetoem. Eyam nhekadylimo:

– Ity owogonro wao MÂ’ ienehongâ asaemo tâwânuneim modoram, kua itomoem – kelymo.

Idânârâ tâty MÂ’ ienipyry modo ara kua tyese myani. Arâlâ myani aidylimo xidadâ imeimbyry odakâ idâduo, xidadâ imâsedo odakâ, âtâ anary imeimbyry modo odakâ lâpylâ warâ.

## 7

*Deus agueho ara kine, saguho modo agueho ara inkâba  
(Mt 15.1-9)*

<sup>1</sup> Aituo fariseu domodo ewy, Moisés inweniby wâgâ enomedâni modo warâ Jerusalémdâpa idâlymo Jesus eydâ atoam.

<sup>2</sup> Âjigüe aguelymo:

– Etaungâ Jesus eynynonro modo aidyly. Kydamudo ezewenrypyry araba kulâ akaemo aidyly. Kâzewenry ara nâzemaungewâbyramo, tâwinduatomoem – kelymo.

<sup>3</sup> Judeu domodoma tâzewenry saguhobyry nimopa, fariseu domodo sahogueni kuru. Agaityom modo aitobyry aralâ aidylimo. Âzemaungueybyem lelâ âwinduadylymo.

<sup>4</sup> Tianâtybymo tugokezemo lelâ, tydâlâseim, tâinzeim warâ tugokezemo, âmugâ, kudupi, awârâ modo sagokely wâne myara. Saguho modo ezewenry nimopamo.

<sup>5</sup> Awlylygue myani fariseu domodo, Moisés inweniby wâgâ enomedâni modo warâ Jesusram aguelymo:

– Kydamudo ezewenrypyry ara inkâba âynynonro modo aidyly. Tâwinduatomoem nâzemaungewâbyramo kâzewenry ara. Koendâpa akaemo awârâ modo inmoly – kelymo.

<sup>6</sup> Aituo Jesus eyanmo aguely:

– “Deus tâinwânse xina” tâkeze wâne âmaemo; âtuahuze kulâ olâ amyguelymo. Âwâgâmo Deus aguehobyry iweniwânmy Isaías:

“Tytanrugue ywâgâ koendâ adâkezemo.

Tuodaxi niepyramo olâ.

<sup>7</sup> Ywâgâ koendâ adâkezemo wâne,

tâzewenke kulâ olâ kurâdo nhenomedâdilymo, augueho araba’ kely Deus”

kely myakâwândy Isaías inwenily – kely Jesus.

<sup>8</sup> Aituo myani Jesus agueondily fariseu domodoram, Moisés inweniby wâgâ enomedâni modoram warâ:

– Deus ezewenry tutuze wâne âmaemo, uguondo modo ezewenry kulâ olâ amânhekylymo.

<sup>9</sup> Saguhoobyry modo aguehobyry kulâ mâinwânkylymo, Deus aguehobyry mâkeba. “Deus aguely tâinwânse xina” tâkewâze wâne âmaemo, mâinwâmpyra olâ âmaemo-ro warâ.

<sup>10</sup> Tâlâ myakâwândy Deus aguehobyry Moisés inweniby wakely: “Unwânmo, âzemo warâ einwântaungâ. Ipa atomo eyanmo âunduwâtaungâ” kewândymy Deus. “Tunwym, tyze warâ âsenagazedoem Deusram ekani xyâwâtaungâ” kewândy lâpylâmy warâ.

<sup>11-12</sup> Âmaemo olâ aypa mâenomedâdomo. “Unwânmo, âzemo warâ âdylâ nhekadyly watay, ‘Tâlâ wato Deusram ise kâunduly. Awlygyue âdy âyanmo kâundupa wawly’ kewâtaungâ” myguelymo. Alâ kulâ mâenomedâdilymo.

<sup>13</sup> Arâ mâenomedâduomo, Deus itaumbryr idadyly mâinmolymy, amyguehomobyry lelâ mâinwântomoem. “Âmeonmo enomedâdaungâ xina aguehobyry ara” tâkeze âmaemo. Inakai modo adyese âmaemo – kely myani Jesus.

*Deus izepa ato wâgâ Jesus aguehobyry*

*(Mt 15.10-20)*

<sup>14</sup> Aituo Jesus kurâ domodo ingâsedondily, eyanmo adâkehoem:

– Idataungâ, xutuwâdaungâ xirâ augueho.

<sup>15</sup> Mâimpymo mâkeba Deus agueho mankadomoem aieni; mâimpymo odaymopa tâgaseze mawânâ. Deus izepa ato amânhedyse mawlymo mawânâ Deus xurâem tywykeim; angahumo odaylâ mawânâ awârâ âtugudyly.

<sup>16</sup> [Xirâ unâ koendâ mâuntudyze mataymo, koendâ angahumo odaji ietaungâ]\* – kely.

<sup>17</sup> Eyanmo aguenrippyrem Jesus kurâdodâpa âxiguely. Egawândilyl âtâ odaji tynynonro modo agâ. Tâgawâmpygueduomo nhapâiguelymo:

– Âdara kezeka enra mârâ amyguely? – kelymo.

<sup>18-19</sup> Aituo Jesus aguely:

– Iweâpa wâne yagâ mawlymo; kurâdo ara lâpylâ olâ mâuntuba mawlymo! Auguely wâne mâindadysemo wato. Âpyniryimo mâkeba Deus izepa ato aienehoiim. Eimpymawânâ kuwe odaxi idâly, ilâppyrem pylâ kokomiry odaxi-ro warâ. Awârâ modo odakâ sakadybyenma egasely lelâ-ro warâ – kely.

<sup>20</sup> Aituo agueondily:

– Kyangahu oday mawânâ kydâpaunzedo, aguiendyse kydato, aguykeho warâ âtugudyly. Awlygyue angahumo odayba âeni Deus izepa ato aienehonrim awly.

<sup>21-22</sup> Angahumo oday Deus izepa ato amânhedilymo wâgâ tunâgue âmaemo. Arâ amidyse âmaemo watay, eagâ mohogüin-homobyry keba kulâ mâynanâdyze midylymo; imagadudyze midylymo; kurâ mâyândyse midylymo; âkelo iwydy mâynanâdyze midylymo; toenzepa âdype midyse mawlymo; âkelo xurâem inakanhe amidyse midylymo; tâdâsenogudyly myguedyse midylymo; âkelo isejigyube midyse mawlymo; âkelo mâunâguedyse mawlymo; âkelo modo takaze kehoem mâdutydyze midylymo; amidilymo, amyguelymo warâ âdy mâuntubamo kulâ warâ.

<sup>23</sup> Idânâra inakanhe adâjito angahumo odaylâ mawânâ âtugudyly; awârâ modo mawânâ Deus xurâem tywykeinhe âenehoimmo. Tâdâzemaunguebalâ tâdâwinduadylyma Deus xurâem inakai mâkeba-ro – kely myani Jesus.

*Jesus pekodo Fenícia donro exiry odaypa kadopâ nhânkyhobyry*

*(Mt 15.21-28)*

<sup>24</sup> Tonloppyrem Jesus idâly myani xidadâ Tiro iwaguepaom yan-yam. Saintybyem egawândilyl âtâ odaji. Târâ Tiro oday tawlyl nhutudyzebamo wâne myani Jesus; inepa olâmy târâ awlyl xutuwânmo.

<sup>25</sup> Târâ xidadâ oday tâlâ myani pekodo exiry kadopâgue taseim. Jesus saintybyem awlyl tiuntuduo, mâkâ ise eyam idâly, âzeguhoam idyly enado.

\* **7:16** Idânâra livru saguho modo wâgâ iwenibymba xirâ.



<sup>26</sup> Âkelo anano myani mâkâ: Judâ donro keba. Feniciadâ egaseyby, âtâ anary Síría eynynâ. Enado âzeguhoam itybyem aguely:

– Pymâ, iexiry odayba kadopâ nhânkygâ – kely.

<sup>27</sup> Jesus aguely:

– Tâwâlâ iamimeom nâwinduadâ saguhoem. Koendâ inkâba iamudo ipyniry emakely, kaxorodoram xuduhoem – kely.

{Awârâ adâkehogue, koendâ inkâba judeu keba modoram, judeu domodo xurâ xuduly. “Judeu domodo kua kânhetu iwerâ. Judeu keba modo kua kânheduly-ro watay, iamimeom pãogue kâenmakely, kaxorodoram kâunduhoen-ro waunlo ara ise” keze aguely.}

<sup>28</sup> Âdakeze aguely awyly xutuwm olâmy mâkâ pekodo. Aituo aguely:

– Arâlâ, Pymâ. Iamimeom mesa iaxi pyni in-hugueânehoymby tâinze olâ kaxoro imeombyry – kely.

<sup>29</sup> – Arâ amyguehobyry wâgâ yeinwântâ mawyly tutuze urâ. Awylygue enra ixiry odaypa kadopâ kânhankyly. Tâwâlâ itynra odopâgâ – kely Jesus.

<sup>30</sup> Agueduo myani pekodo tâtyram idâly. Saintybyem tâxiry kua itybyem awyly nhedyly. Koendâ lelâ tykyho wâgâ eguetudybyem awyly warâ.

*Jesus uguondo kydatânry, koendâ aguedânry kua nhetobyry*

<sup>31</sup> Aituo Jesus egasely Tirodâpa. Sidom einkâ, âji Dez Xidadâ kelygue tâzekeim einkâ warâ sakadyly. Paru Galiléia emelaji myani idâly.

<sup>32</sup> Uguondo kydatânry, koendâ âjitaïnândânry warâpe myani târâ. Eataen-hodo Jesusram nhadylymo myani, aguelymo eyam:

– Ityengâ wao merâ uguondo. MÂ’ iekâ wao, kua itoem – kelymo.

<sup>33</sup> Agueduomo, Jesus âdiempa kurâdo duaypa nhejikely. Tâmary ewily iwantary onwa nhedyly. Ilâpyryem KUITÚ kely. Tâdaku âdiempa uguondo ilu onwa nhedyly.

<sup>34</sup> Ilâpyryem kayam MYK idyly. Tunwym agâ aguely. Ton-honre kehoem âepaiguely, aguely:

– *Efatâ* – kely. (“Âzenahunguegâ” keze aguely.)

<sup>35</sup> Mâkâ aguepygueduo, inepa kehoem myani uguondo koendâ indadyly, âjitaïnly warâ.

<sup>36</sup> Jesus aguely kurâdoram:

– Ânguyran-ne xirâ kâzegatuwâdaundâ – kely.

Aguehobyryenlâ olâ tâinkâ lelâba nhegatulylo.

<sup>37</sup> Jesus egary tindatuomo toenzepa myani âsewânilylo.

– Koendonro lelâlâ mâkâ! Kydatânry modo indatoem adyese, tytarenry modo âjitaïnhoem adyese warâ – kelymo.

## 8

*Jesus quatro mil kurâdo sete pão, aguipa kanra âjihuyby warâgue nhuantobyry*

(Mt 15.32-39)

<sup>1</sup> Ilâpyryem iweâpa nipyralâ kurâ domodo Jesus aguely idase âtadyguyondylymo. Âdygue typyniguebamo myani. Arâ awylymo tiuntuduo, Jesus tynnonro modo ingâsedyly. Eyanmo aguely:

<sup>2</sup> – Ytynroem enra asaemo kurâdo. Kopaëlâgâbygueduolâ keankâ yagâ awylymo. Âdy nheinlymo peba-ro warâ.

<sup>3</sup> Taypa âetybybe asaemo duay. Koendâpa ise nâwinduapyralâ etymoram kingonodylymo. Arâ kâingonodylymo-ro watay, ekozezemo tâwindygue – kely.

<sup>4</sup> Aituo Jesusram eynnonro modo aguely:

– Kuantomoem nudupa lâpylâ enra, iwague xidadâdâ kydawlylygue. Asaemo xuato âdykâ imâem pyni kiempyra ise kydaze – kelymo.

<sup>5</sup> Aituo Jesus aguely:

– Âdara pãobeka âmaemo? – kely.

– Aituo in-hogulylo:

– Sete lelâ – kelymo.

<sup>6</sup> Aituo kurâdoram aguely:

– Ikadaungâ – kely.

Mârâ sete pão sanânibyryem, Deus agâ aguely:

– Koendonro lelâlâ âmâ, Pabai. Awylygue xirâ pão mâunduly – kely.

Deus agâ aguepyyem, pão nhepajiwâdyly. Tynnonro modoram nhuduly, kurâdoram nhepâdomoem. Nhepâdylymo umelâ kehoem Jesus pão epajiwâdyby agui nhenehony.

<sup>7</sup> Tâlâ lâpylâ myani aguipa kanra imeombyry âjihuyby. Jesus agueondyly Deus agâ:

– Koendonro lelâlâ âmâ, Pabai; awylygue xinaram merâ kanra mâunduly – kely.

Deus agâ agueypyem myani tynynonro modoram Jesus aguely:

– Epâdaungâ merâ kanra kurâ domodoram – kely.

<sup>8</sup>Idânârâ âwinduadylymo ize tato ara kehoem, koendâ kehoem ioladylymo warâ. Ilâpyryem Jesus eynynonro modo cestu imâsedo modo odaji âsegubydâdyby modo nhekanâdyllymo, sete cestu tumykune lelâ.

<sup>9</sup>Toenzepa âwinduani modo; quatro mil lelâ kurâdo. Ilâpyryem Jesus aguely kurâdoram:

– Tâwâlâ itymoram idâwâtaungâ lelâ – kely.

<sup>10</sup>Agueypyem pepi odaji âxieze idâly tynynonro modo agâ. Dalmanuta yan-yam idâlymo.

*Fariseu domodo Jesus adyesenry anhetoem aguehobyry*

*(Mt 12.38-42; 16.1-4; Lc 11.29-32)*

<sup>11</sup>Aituo fariseu domodo Jesus iopaji idâlymo. Tienwentâdomoem wâne inakanhe kulâ aguedyse awylymo. Aituo eyam aguelymo:

– Deus lelâ anhekyly aiekâ, mâkâlâ ogononi, on-honru xuduim warâ awyly xina nhutuhoem – kelymo.

<sup>12</sup>Toenzepa myani Jesus itynru, tâinwâmpyra awylymo tiuntuduo. Aituo imâem âepaigeybyem aguely:

– Kurâdo ize ato ara âdylâ adyese lelâ urâ, Deuslâ ugononi awyly kêenehohoem. Deus ingonotyby wawyly kêenehondyzelâ urâ. Mâenkadybymo agânhepyra olâ ise urâ, mâkâ eon-honru keba mawânârâ mâendyse matomo, ienwentâdomoem kulâ arâ amyguelymo – kely myani Jesus.

<sup>13</sup>Aituo myani Jesus târâpa âxiguely. Pepi odaji odopâdylly, paru tienkuâdoem.

*“Fariseu domodo, Herodes warâ ifermenturygue tâmaynelâne itaungâ” Jesus kehobyry*

*(Mt 16.5-12)*

<sup>14</sup>Jesus eynynonro modo pão sadyly enanânehonwânmy. Tokalâ kulâ myani pão nhadylymo.

<sup>15</sup>Aituo myani Jesusram âduruholyo:

– Idataungâ. Tâmaynelâne itaungâ fariseu domodo, Herodes warâ ifermenturygue – kely.

<sup>16</sup>Âdakeze Jesus arâ aguely nutubamo olâ. Awylygue myani âjigue aguelymo:

– Âdaituoka awâkâ arâ aguely? Pão kienepyra kydatobyry wâgâ? – kelymo.

<sup>17</sup>Jesus olâ aguelymo idamâ. Aituo eyanmo aguely:

– Âdaugewâpyra urâ, pão mâenanânehon-homobyry wâgâ. Pão wâgâ inkâba aguely. Âdy inomedâdomo awyly mâuntuba lelâ kuru mataunaze. Deus eon-honrube wawyly mâinwâmpyra lelâ âmaemo. Âdaituoka augueho mâuntuba mawylymo!

<sup>18</sup>Agânhekyly tâenselâ âmaemo, aguely tydaselâ âmaemo warâ. Agânhetaynly modo, kurâdo kêanomedâdo modo warâ Deus xurâlâ awyly, mâinwâmpyra lelâ olâ âmaemo. Kurâdo toenzepaom modo kânwantobyry enanâgüewâdaungâ.

<sup>19</sup>Cinco mil uguondo modo suadâ cinco pãogüe. Idânârâ âwinduatyby modo nioladâmo warâ. Âdara cestu tumykeka mekanâdâmo âsegubydâdyby? – kely.

– Doze cestu lelâ – kelymo.

<sup>20</sup>Jesus eyanmo agueondylly myani:

– Quatro mil kurâdo xuatoem sete pão agui xienehoangui, âdara cestu tumykeka mekanâdaimo âsegubydâdyby? – kely.

– Sete cestu lelâ – kelymo.

<sup>21</sup>– Won-honru tâense lelâlâ wâne âmaemo, ânguy wawyly mâuntuba lelâ olâ âmaemo – kely Jesus.

*Jesus uguondo epy Betsaida donro kua nhetobyry*

<sup>22</sup>Ilâpygueduo, Jesus, eynynonro modo warâ xidadâ Betsaidaram saindyllymo. Saimpygueduom, tonlo modo uguondo epy eyam nhadylymo. Jesusram aguelymo:

– Xina tytyenzelâ ikâ. Merâ uguondo enu MÂ' iekâ, nhetoem – kelymo.

<sup>23</sup>Emary wâgâ sawânipryem Jesus epy kurâdo duaypa nhedyly. Tâmary ewily edakudânyryem Jesus uguondo enu MÂ' nhedyly. Aienibyryem eyam aguely:

– Âdylâ tâense âmâ? – kely.

<sup>24</sup>MYK itybyem, uguondo aguely:

– Âdiempa tâense wâne urâ. Se ara kulâ olâ kurâdo adakobâdylly kêendylly – kely.

<sup>25</sup>Aituo Jesus tâmarygue enudâ MÂ' nhetondylly. Ilâenma koendâ nhedyly idyly.

<sup>26</sup>Ilâpyryem Jesus uguondo ingonodyly.

– Tâwâlâ idâ ityam. Todopâzeba waone ikâ Betsaidaram – kely.

*Pedro, “Messiaslá âmâ” Jesusram kehobyry  
(Mt 16.13-20; Lc 9.18-21)*

<sup>27</sup> Ilâpygueduo myani Jesus, eynynonro modo warâ tuhuru wâgâ idâlymo âtâ anary modo Cesaréia de Filipe iwaguepa. Tâtâdaymo myani Jesus tynynonro modoram aguely:

– Ânguy tâkezeka inanry kurâdo yam? – kely.

<sup>28</sup> Warâ myani eynynonro modo in-hoguly:

– Tâlâ inanry, “João Batista kurâem itondyby awâkâ Jesus” kewâni modo. Tâlâ inanry, “Elias kurâem itondyby awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ – kelymo.

<sup>29</sup> – Âmaemo-ro? Ânguy tâkeze âmaemo yam? – kely Jesus.

Aituo Pedro in-hoguly:

– Messiaslá âmâ – kely. (“Deus Kâmakeze Ingonotyby” keze “Messias” kely.)

<sup>30</sup> Aituo myani Jesus eyanmo aguely:

– Mâkâlâ urâ. Iwerâ kuru wao olâ Messiaslá wawyly kâzegatuwâdaundâ – kely.

*Jesus tyiguely wâgâ, kurâem tâitondyly wâgâ warâ aguehobyry  
(Mt 16.21-28; Lc 9.22-27)*

<sup>31</sup> Aituo myani Jesus tynynonro modoram aguely:

– Urâ Uguondo Kaynâpa Âetyby toenzepa âsenagazeze urâ. Kywymâry modo yizemo inkâba ise. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehoim. Yigueduo, azagâ emedyly\* idyly wâgâ olâ ise kurâem witondyly – kely.

<sup>32</sup> Kulâkâba kehoem myani Jesus iguein-em tawyly nhutuen-honly. Pedro olâ myani neinwâmpyra arâ Deus Ingonotyby âdyoly awyly. Awylygue myani nhejikely, eagâ adâkehoem:

– Pymâ, arâ adâkezeba ikâ – kely.

<sup>33</sup> Aituo Jesus MYK idyly, tynynonro modoram. Pedro aguehobyry nehoguebyra, tawylygue myani aguely:

– Satanás arâ amyguehoem aieni, Pedro. Deus xunâry ara inkâba âunâgu, uguondo modo xunâry ara kulâ. Satanás aguely kâindataymba ise urâ – kely.

<sup>34</sup> Aituo Jesus kurâ domodo, tynynonro modo warâ ingâsedyly, eyanmo aguely:

– Ynynonroem ize mataymo, augueho ara aitaungâ. Kopaêlâgâembaba ize wato aitaungâ; amânhedyse matomo mâkeba aitaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze.

<sup>35</sup> “Jesus eynynonro keba urâ” myguelymo, tyâzepa mitomoem kulâ watay, âdiempa kulâ ise xirâ anaym kurâem mawylymo. Âigueduomo Deus enadoram mydâwâpyra ise âmaemo. Yeinwândylymogue, unâry mâinwândylymogue warâ mâdyolylo watay olâ, Deus enadoram idâze âmaemo; aunloenlâ ise eagâ mawylymo warâ.

<sup>36</sup> Tâwâlâ wâne âdydo imeom sodoem mawylymo, ize matomobe mawylymo warâ, Deus eydâ atoram mydâhomoem nepywabyra olâ awârâ modo. Deus agonro keba âmaemo-ro watay, âdype matomo âdy mâkeba.

<sup>37</sup> Ânguy, niguepa tâitoem nepywadaymba. Tâdâsenagazedo amaxi ise mydâlymo.

<sup>38</sup> Uguondo Kaynâpa Âetyby urâ. Idâze urâ Deus eydâ atoam, odopâze olâ urâ Deus dompyryem anju domodo agâ. Kodopâdyly ise Kunwym eon-honru tânehonze. Iwerâ xirâ inakanhe tadawyly ume ywypazeni, kâenomedâdo iwypazeni warâ, kodopâduo, iwypazeze lâpylâ urâ – kely.

## 9

<sup>1</sup> – Iwerâ ydataynrinbyry modo ewy Deus eon-honrugue lelâ pymâem idyly enipe ise – kely myani Jesus.

*Iwy wâgâ Jesus âkeloem itobyry  
(Mt 17.1-13; Lc 9.28-36)*

<sup>2</sup> Seis iguandyly ipygueduo Jesus iwy onwa âkuly. Pedro, Tiago, João warâ myani tagâ nhaklyly. Târâ Jesus âkeloem idyly nhedylymo.

<sup>3</sup> Toenzepa myani ety iwogonro sapeku, ehozelu warâ, âtâ igokewâni modo lâgâlâ tâise myara kehoem napekanâbyra.

<sup>4</sup> Moisés, Elias warâ nhedylymo lâpylâ Jesus agâ xunâgumo ume.

<sup>5</sup> Aituo myani Pedro aguely Jesusram:

\* 8:31 Nota de pé Mateus 12.40dâ egâ.

– Koendâ kehoem tarâ kydawly, Pymâ. Azagâ tokalâ warâ âtâ imeimbyryla xina nitâdâ, âmâem, Moisés-em, Elias-em warâ – kely.

<sup>6</sup> Pedro, Tiago, João warâ toenzepa tâseanezemo myani. Awlylygue myani Pedro âdara tâkely awlyly nutuba kulâ arâ aguely.

<sup>7</sup> Inepa kehoem myani eunu xytâguyly nnonwamo. Eunu duay Deus aguely indadylymo: – Ymery toenzepa kâinwynegylyly merâ. Aguely idataungâ – kely.

<sup>8</sup> Adâkehonduo iwykaudylymo enuaguyly. Jesus kulelâ olâ myani nhekylymo; Moisés, Elias warâ netombyramo myani.

<sup>9</sup> Aituo xytâguylymo iwy wâgâpa. Tytâguylymo ume, Jesus aguely Pedro, Tiago, João warâam:

– Mâentybymone iweâ kuru ânguyram kâzegatuwâdaundâ. Yiguely, kurâem witondyly wituo maise tâwâlâ mâengatulymo – kely.

<sup>10</sup> Aguely einwânâmomy. Âjigue olâ warâ aguelymo:

– Âdaituoka awâkâ arâ aguely? Deus Ingonotyby awâkâ. Âdaraka ise iguely, kurâem itondyly warâ? – kelymo.

<sup>11</sup> Aituo Jesus nhapâiguelymo:

– Moisés inweniby wâgâ enomedâni modo adâkeze: “Elias âese, Messias Deus Ingonotyby iraynâ” tâkezemo. Âdaituoka arâ aguelymo? – kelymo.

<sup>12</sup> Aituo in-hoguly:

– Âkealâ aguelymo; Eliaslâ mawânkâ Messias saindyly wâgâ agueim. Iwenibyem Deus itaumbyry awo wâgâ: “Uguondo Kaynâpa Âetyby âzenagazeoze. Agueho tindadyse inkâbamo ise” kely iwenibyem. Awârâpe angahumo oday?

<sup>13</sup> “Elias ara ini nâedâ” uguely. Deus eynynâbaom modo olâ nenagazedâ, Deus itaumbyry awo wâgâ agueho ara – kely.

*Jesus salokuzenomo odano kadopâ nhânkyhobyry*

*(Mt 17.14-21; Lc 9.37-43)*

<sup>14</sup> Jesus, Pedro, Tiago, João warâ agâ iwy wâgâpa xytâguylygueduomo myani, tagonrodo nhedylymo kurâ domodo duay. Moisés inweniby wâgâ enomedâni modo ton-honre kehoem âjihogulymo Jesus eynynonro modo agâ, kadopâ niânkyba awlylymogue.

<sup>15</sup> Jesus saindyly tientuo, toenzepa kurâdo âsewânyly. Inepa kehoem myani edaenkuzé idâlymo.

<sup>16</sup> Aituo Jesusram adapâigueolyo:

– Âdy wâgâka enra amyguelymo? – kely.

<sup>17</sup> Uguondo kurâ domodo duay in-hoguly myani:

– Pymâ, ymery senetai âyam; kadopâgue tase merâ, âjитайn-hoemba-ro warâ.

<sup>18</sup> Kadopâ ymery odaji idyly watay, onro onwa tameze lelâ inanry, itabigonzely, tyery nhaguly warâ inanry ton-honremba nhedyly. Âynynonro modoram sekadai wâne, kua nhetomoem. Kua niepyramo olâ enra – kely salokuzenomo nhunwym.

<sup>19</sup> Aituo Jesus aguely:

– Âdy einwânni kebalâ myanze âmaemo! Agâmolâ wâne urâ, yeinwâmpyra olâ âmaemo. Ynadaize yeinwâmpyra lelâ mawlylymogue. Enetaungâ awâkâ salokuzenomo xarâ – kely.

<sup>20</sup> Jesusram nhadylymo. Jesus tientuo, kadopâ salokuzenomo nhapânyly. Salokuzenomo ihuguely, onro wâgâ âtâgumidyly; itabigonzely idyly.

<sup>21</sup> Aituo Jesus salokuzenomo nhunwym nhapâiguely:

– Iweâpa merâ âmery arâ awlyly? – kely.

Nhunwym in-hoguly:

– Iamugâryenlâ merâ arâ awlyly.

<sup>22</sup> Alâ inanry kadopâram adameozezedyly peto onwanji, paikaji warâ tyân-hoem. Xina tytyenzelâ ikâ. Kua mânhedyse matay, ymery kua iekâ wao – kely.

<sup>23</sup> Jesus aguely:

– Âdaituoka yam, “Kua mânhedyse matay” myguely? Tâinwânni xurâem âdylâ adyese lelâ Deus – kely Jesus.

<sup>24</sup> Aguely umelâ salokuzenomo nhunwym aguely:

– Âdiempa tâinwânse urâ. Won-hondâgâ, imâem kâinwânstoem – kely.

<sup>25</sup> Aituo Jesus toenzepa kurâdo tuopay âtâdyguyly nhedyly. Tientuomo, ton-honre kehoem kadopâram aguely:

– Igasegâ iweâ lelâlâ merâ salokuzenomo odaypa, kadopâ! Nidapyra itoem, aguepa itoem warâ akâiedâ. Tâwântonzeba ikâ iodaxi! – kely Jesus.

<sup>26</sup> Jesus aguely tindatuo, kadopâ adaenkely. Salokuzenomo ton-honre kehoem nhapânyly. Iodaypa egaselylâ-ro warâ. Kadopâ tuodaypa egasebygueduo igueypy ara idyly.

– Etaungâ. Nigueaki awâkâ! – kely tonlo modo, onro wâgâ awyly tientuo.

<sup>27</sup> Jesus olâ salokuzenomo emary wâgâ XYDYK itoem nhaunâdily.

<sup>28</sup> Mârâ aipygueduo myani Jesus egawândily tynnonro modo agâ âtâ odaji. Mâkâ kulelâ awyly ume Jesus nhapâiguelymo:

– Ton-honre lâwâne enra xina aidily, kadopâ tiânkyhoem. Âda xina niepyra olâ enra. Âdaituo kukeanra? – kelymo.

<sup>29</sup> Aituo Jesus in-hoguly:

– Ton-honreim lelâlâ mâkâ kadopâ salokuzenomo iodanopyry. Deus eon-honru kienkaduo lelâ mâkâ igonodyly – kely.

*Jesus tyiguely wâgâ agueontobyry*

*(Mt 17.22-23; Lc 9.43-45)*

<sup>30</sup> Jesus tynnonro modo agâ târâpa âxiguelymo. Galiléia einkâ myani sakadylymo. Ânguy âdykâ tawyly nhutudyzeba myani Jesus,

<sup>31</sup> tynnonro modo lelâ tienomedâdize ato awylygue. Aituo aguely:

– Urâ Uguondo Kaynâpa Âetyby yizepaom modo emaxi âzegameoze urâ. Akaemo ise yâen-honri. Yigueduo, azagâ emedyly\* idily wâgâ olâ ise kurâem witondily – kely.

<sup>32</sup> Âdaituo Jesus tyiguely wâgâ aguely awyly nutuba olâ myani eynnonro modo. Eyam “Âdaituoka arâ amyguely?” keze tywypazemo myani. Nutuba lelâ tawylmogue, tâduylymo ytaze.

*Ânguyka tynrenseim kuru?*

*(Mt 18.1-5; Lc 9.46-48)*

<sup>33-34</sup> Jesus, eynnonro modo warâ Cafarnaumram idâlymo myani. Tâtâlymo ume myani, Jesus eynnonro modo tuduay ânguy tynrenseim kuru awyly wâgâ aguelymo. Aituo myani tykyhoram saintybyem, eyanmo Jesus aguely:

– Âdyka enra ânwa oze âunâgomo? – kely.

MYK imâmo lelâ olâmy tunârybyry tinwypazedilymogue.

<sup>35</sup> Aituo myani Jesus ekadyly. Eyanmo aguely:

– Kuturin-em tidysedo, tynrendysedo warâ idânârâ nemawyadâdâ, mâkâ keba tâmawyadâzeim nidâ – kely.

<sup>36</sup> Aituo myani tonlo iamudo nhenenehonly tyam. Mâkâ myani iontajimo nhekyly. Iwymogoiimbyryem myani eyanmo aguely:

<sup>37</sup> – Pymâem xynru waunlo keba merâ iamudo. Mâkâ ynnonro xurâem koendâ amânhedilymo, tynrenseim keba awyly umelâ warâ watay, urâenlâ amânhedilymo. Âdylâ urâem amânhetuomo, ugononibyry xurâenlâ ise amânhedilymo lâpylâ – kely Jesus.

*Deus eynnâ aini izepa kipyra kine, kuduano keba awylygue kulâ*

*(Lc 9.49-50)*

<sup>38</sup> Aituo João aguely:

– Xina Enomedâni, ânâry egatuze xina tâtâly ume, uguondo on-honrugue kadopâ nhânkyrim xina nedâ. “Jesus eon-honrugue kadopâ modo kâjiânky” xina nygue eyam. Xina ewy keba awylygue keankâ xina aguely – kely.

<sup>39</sup> Aituo Jesus aguely:

– “Adâiseba ikâ” tâkezeba itaungâ. Won-honrugue adyesenry modo aieholly watay, urâenlâ mâkâ aidily.

<sup>40</sup> Kuduery keba watay, kataen-holâ mâkâ.

<sup>41</sup> Ynnonro modo âmaemo. Koendâ nhenimopyryam koendonro xuduze Deus. Parugue kulâ wâne akuilymo, alâ olâ ise Deusram âzepywaolyo. Xirâ mâuntudyzemo kuru wato – kely.

*Deus einwânipyryem neinwâmpyra ienehoim toenzepa ise âsenagazedily*

*(Mt 18.6-9; Lc 17.1-2)*

<sup>42</sup> Aituo Jesus agueondily:

– Merâ iamudo yeinwânto ara yeinwânni yeinwâmpyra ienehoim koendâ tâise tuhu imâsedo iwymy wâgâ ekâjily, parutabâ ikaji samely, iguehoem, yeinwâmpyra tienehonly iraynâlâ.

<sup>43</sup> Imarymogue Deus izepa ato akâiedaundâ. Koendâ tâise imarymo satâly, Deus izepa ato amânhepyra mitomoem. Koendonro kuru tâmaguebalâ Deus agâ aunloenlâ mawyllymo; koendâpa mawânâ peto nhântânry onwanji madameolyo.

\* 9:31 Nota de pé Mateus 12.40dâ egâ.

<sup>44</sup> [Târâ iguewâtyby modo toenzepa tâsenagazeze, tâjynryryram tâdâhoze, peto adaindânryram tâjiaduân-honzemo warâ.]†

<sup>45</sup> – Deus mydâdysebamo atoram tâtâzeba itaungâ. Koendâ tâise âhurumo satâly, Deus mydâdysebamo atoram mydâpa mitomoem. Koendonro kuru Deus agâ mawlylmo, ihuru satâlybyem; koendâpa mawânâ inferrudâ peto nhântânry onwanji madameolymo.

<sup>46</sup> [Târâ iguewâtyby modo toenzepa tâsenagazeze, tâjynryryram tâdâhoze, peto adaindânryram tâjiaduân-honzemo warâ.]‡

<sup>47</sup> – Deus mâendysebamo ato kâzetaundâ. Koendâ tâise inumo etyly, Deus mâendysebamo ato mâempyra mitomoem. Koendonro kuru tânuemalâ aunloenlâ Deus pymâem atodâ mawlylmo; koendâpa mawânâ tâdâsenagazedo peto nhântânry onwanji madameolymo.

<sup>48</sup> Târâ iguewâtyby modo toenzepa tâsenagazeze, tâjynryryram tâdâhoze, peto adaindânryram tâjiaduân-honzemo warâ – kely Jesus.

<sup>49</sup> – Tâseanezeba itaungâ, mâsenagazeduomo. Peto kyaduântobyry ara kehoem wâne kydâsenagazedily ewânu. Tâseguadâzeba olâ itaungâ. Deusram âtuibyem kurâ, ize tato kagâ anhetoem. Kydâsenagazedily watay, âdy mâkeba awârâ. Kyzeinwâne, kieinwâmpyra kipyra kine, peku, tanepa nipyra myara.

<sup>50</sup> Peku pyni ekubâzeândoem koendâ awyly, podo niwânzeânehomba warâ, myara âmaemo taunlo modo ywâgâ amyguelymo, kurâ domodo yeinwântomoem, inakanhe nâiehoba itoem warâ. Peku, onro agâ on-hoam ityby olâ pyni ikaji tyeseba. Arâ lâpylâ mâpaunzedomo koendâ ietaungâ. Arâ ise koendâ mawlylmo. Ânguy agâ inakanhomba mawlylmo – kely Jesus.

## 10

*Jesus tâjiwydy imoly wâgâ aguehobyry  
(Mt 5.31-32; 19.1-12; Lc 16.18)*

<sup>1</sup> Jesus tynnonro modo agâ idâly Cafarnaumdâba myani Judéia yan-yam. Ilâpygueduo paru Jordão nhekuadilymo. Toenzepa myani kurâdo âtâdygyondyly iopay. Âtâdygyuduomo tâzewenry aralâ nhenomedâdilymo.

<sup>2</sup> Fariseu domodo ewype lâpylâ myani târâ. Tienwentâdoem wâne myani inakanhe kulâ aguedyse awylymo. Aituo myani Jesus nhapâiguelymo:

– Kâzewenry eynynâ, tâwâlâka uguondo tywydy inmoly? – kelymo.

<sup>3</sup> Jesus in-hoguly tiampâiguelymo agâlâ:

– Âdaraka Moisés inweniby aguely tâjiwydy imoly wâgâ? – kely.

<sup>4</sup> Aituo myani in-hogulymo:

– Tutuzelâ âmâ, kydamu Moisés inweniby: “Âwydy mâinmodyze matay, tâwâlâ imogâ. Iwenigâ olâ âdaituo mâinmoly awyly. Aitybyem pape mâinwenibymo eyam xudugâ. Igonokâ lelâlâ-ro warâ” kely myakâwandy inwenily – kelymo.

<sup>5</sup> Aituo Jesus aguely:

– Tutuze myani Moisés, tienkyly modo ânguydo kulâ, Deus ize ato adiendysedo keba warâ awyly. Awlylygue myakâwandy Moisés “Tâwâlâ tâjiwydy imoly” kely inwenily, pekodo tâwentâzeba itoem.

<sup>6</sup> Kaudyly umelâ olâ myakâwandy Deus ohogüinwâdyby modo âximoly izepa awyly. “Kaudyly umelâ myakâwandy Deus uguondo, pekodo warâ nhygadyly, ohogüinrin-em” warâ iwenibyem awyly Deus itaumbyry awo wâgâ.

<sup>7</sup> Alâpylâ iwenibyem awyly: “Awylygue mawânkâ uguondo, tunwym agâpa, tyze agâpa warâ idyly, tywydy agâ lelâ tâitoem.

<sup>8</sup> Ohogüinduomo, tokalâ kurâ ara lelâ Deus xurâem” warâ iwenibyem awyly Deus itaumbyry awo wâgâ. Awlylygue azagâpa awylymo, tokalelâ.

<sup>9</sup> Ohogüinduomo Deuslâ âzeyam ienimo; awlylygue ânguy ohogüimby modo âximohoem aniempyra nidâ – kely Jesus.

<sup>10</sup> Aituo âtâ oday ataymo, Jesus eynnonro modo agueondylymo:

– Awârâ wâgâ agueonkâ xinaram, âdara awlylygue uguondo, pekodo warâ nâximoba awyly wâgâ – kelymo.

<sup>11</sup> Aituo Jesus agueondyly:

– Uguondo modo, âwydymo kâjimowâdaundâ. Mâinmoly mo watay, eagonro pekodo agâ tohogüinzeba itaungâ. Eagonro agâ mohogüinduomo, Deus izepa. Deus xurâem, saguholâ âwydymo, nhatano keba.

<sup>12</sup> Pekodo modo, osomo kâjimowâdaundâ. Mâinmoly mo watay, eagonro agâ tohogüinzeba itaungâ. Deus xurâem, saguholâ osomo, nhatano keba – kely.

† 9:44 Idânâra livru saguho modo wâgâ iwenibyemba xirâ. ‡ 9:46 Idânâra livru saguho modo wâgâ iwenibyemba xirâ.

*Jesus iamimeom agâ atobry**(Mt 19.13-15; Lc 18.15-17)*<sup>13</sup> Ilâpygueduo tâjiunwyndo tymeom nhadylymo Jesusram.

– Asaemo nhangahu onwa imary iekâ. Deusram koendâ âzehohomoem ekagâ asaemo xurâem – kelymo Jesusram.

Jesus eynynonro modo olâ myani akaemo iamimeom sanipyry modo tâuse:

– Jesus kâdynanâdaundâ – kelymo myani.

<sup>14</sup> Jesus olâ aguelymo nehoguebyra; awylygue myani tynynonro modoram aguely:

– Arâ adâkezeba itaungâ! – kely. – Tâwâlâ iamimeom nâedâ. Kodopâdaundâmo. Iamimeom wâne enra ohondybyem lelâ yam tâetoem, myara lâpylâ kurâ domodo nohondâ, yeinwântomoem, Deus iwymârymoem itoem.

<sup>15</sup> Yam tâetoem ohondânry modo Deusgue tywymâgunebamo ise, iamimeom wâne enra ohondybyem lelâ yam tâetoem myarapa tawylmogoue. Xirâ mâuntudyzemo kuru wato – kely.<sup>16</sup> Aituo tokalâ, tokalâ warâ Jesus iamimeom nhanâdyly. Nhangahumo onwa tâmary nhedyly, mâkânra, mâkânra warâ aguely:

– Deus koendâ nhese – kely.

*Uguondo toenzepa âdypeom agâ Jesus aguehobry**(Mt 19.16-30; Lc 18.18-30)*<sup>17</sup> Jesus egasely, idâly. Uguondo ânwa oze tâgase kehoem âewyly. Jesus enado âzeguhoam itybyem myani aguely:

– Koendonro lelâlâ âmâ, Pymâ. Âdaraka awidyly Deusram udâhoem, aunloenlâ eagâ witoem warâ? – kely.

<sup>18</sup> Aituo Jesus in-hoguly:

– Amyguely tutuzeka âmâ? Âdaituoka “Koendonro lelâlâ âmâ” myguely yam? Kurâ koendonro lâpeba, Deus lelâ koendonro.

<sup>19</sup> Tutuzelâ âmâ, âdy Deus aguiendyse ato awyly Moisés inweniby: “Ânguy kâdyâ. Eagâ mohogüin-hobry lelâ xynanâgâ. Tâmagazeba ikâ. Aitobry wâgâpa kulâ âkelomo kâzewentâdâ. Unwâm, âze warâ einwânkâ, xyrenkâ warâ” – kely Jesus.<sup>20</sup> Aituo uguondo aguely:

– Salokuzenomoem wawyly umelâ idânârâ Moisés inweniby ara awidyly; adyesezelâ urâ – kely.

<sup>21</sup> Tywyneze kehoem Jesus mâkâ nhedyly, eyam aguely:

– Tâlâ lâpylâ olâ amânhekyly. Âsejiguy modo idânârâ vende ieta. Ebyry ise âdy pebaom modoram mâunduly-ro warâ. Awârâ amânhedily-ro watay, tâlâ lelâ ise âmâ mârâ koendonro Deus eydâ atodâ ekanâdyby. Idânârâ tâlâ mato mâunduduo odopâgâ, ynynonroem mitoem – kely Jesus.

<sup>22</sup> Jesus arâ aguely tindatuo myani uguondo tuomareba idyly, itynwandily, idânârâ tysejiguy vende tiendyseba tawylgyue, idâly.<sup>23</sup> Aituo Jesus tynynonro modo nhedyly. Eyanmo aguely:

– Ton-honre lelâlâ âdypeom modo yeinwântoem, Deusgue iwymâgomoem warâ, tysejiguy kulâ ize atomo kuru awylmogoue – kely Jesus.

<sup>24</sup> Agueduo, Jesus eynynonro modo toenzepa âseguâdâdylymo. Toenzepa âdypeom lakuru Deus ize ato waunlo ara mawânkâ, enanajimo. Aituo Jesus agueondily:

– Ton-honre lelâlâ âdypeom modo yeinwântoem, Deus tywymâryem nhetoem warâ, tysejiguy mawânkâ ize atomo kuru.

<sup>25</sup> Ton-honre camelu agüie ihu oze sakadoem, arâ lâpylâ ton-honre âdypeom modo tâlâ tato inmohomoem, Deusgue lelâ tywymâgomoem warâ – kely Jesus.<sup>26</sup> “Ton-honre lelâlâ âdypeom modo Deusgue iwymâgomoem” Jesus keduo myani, toenzepa kehoem Jesus eynynonro modo âseguâdâdylymo, âdypeom modo lakuru Deus eydâ atoram idâim waunlo ara enanajimo awylygue. Aituo âjigüe aguelymo:

– Arâ atayma ise ânguy nâsemaguewâbyra-ro – kelymo.

<sup>27</sup> Aituo Jesus eyanmo MYK itybyem aguely:

– Âkealâ, ânguy nâsemaguewâbyra ton-honrugue, Deus olâ kurâ domodo anhetânry adyese lelâ. Âdy anhetânry lâpeba Deus – kely.

<sup>28</sup> Jesus aguely tindatuo, Pedro aguely:

– Xina-ro? Idânârâ tâlâ tato xina niâm, âynynonroem tâitoem – kely.

<sup>29-30</sup> Aituo myani Jesus eyanmo aguely:

– Idânârâ tâlâ matomo mânhânlymo, ynynonroem mitomoem watay, Deus xuduze lelâ ipa matomo. Xirâ mâuntudyzemo kuru wato. Itymo mânhânduom, âykyhomoem

ijidy mo xuduze. Âwaigoromo, âukonomo, nhaundumo, unwânmo, âzemo, âmeonmo warâ mânhânduomo. Deus âpemugumo nhetomo ara kehoem nhenimo, âwynenimo warâ xuduze. Âpimo modokelymo watay, Deus âpyniry mo xuduze. Tâlâ matomo mânhânlymo Deus itaumbry egatuze madakobâdomoem watay, âdy ipa matomo xuduze, mânhâmpymo takaze kehoem, até cem vezes lelâ. Âiguepa mawlymo ara, toenzepa ise yeinwântânry modoram mânzenagaeoly mo yeinwândylymogue. Âigueduomo aunloenlâ ise Deus agâ mawlymo. Xirâ mâuntudyzemo kuru wato.

<sup>31</sup> Iwerâ waunropyro modo, ilâem âgânâynra ise. Âgânnonrobyry modo, ilâem waunroem ise warâ – kely Jesus.

*Jesus, “Yigueduo, kurâem itonze urâ” keontobyry  
(Mt 20.17-19; Lc 18.31-34)*

<sup>32</sup> Jesus, eynynonro modo warâ tuhuru wâgâ xidadâ Jerusalémram âkuly mo. Waunroem myani Jesus idâly. Tyanepa, adâieholly tutuze tawlygye, âgânâ eynynonro modo idâly-ro warâ. Izepanro modo mârâ xidadâ oday awly tyuntuduomo eynynonro modo âdara tâidyly nutuba idylymo. Tyane myani kurâdo eagâ idâwâni modo. Aituo Jesus tynynonro modo aguio duaypa nhejikely iwaguedope, âdatidyly awly wâgâ adâkehoem.

<sup>33</sup> – Idataungâ wao auguely. Jerusalémram xirâ kytâly. Yizepaom modoram adawâhoze urâ Uguondo Kaynâpa Âetyby. Kurâdo eynynâ Deus agâ aguwâni modo iwymârydo, Moisés inweniby wâgâ enomedâni modo warâ iegamezemo. “Nigue awâkâ” kezemo. Judeu keba modo emaxi iegamezemo.

<sup>34</sup> Akaemo ise âwankuem yeni, iedakudâni, yapiogunri, yârim warâ. Awârâpygueduo azagâ\* emedyly idyly ara olâ ise kurâem witondyly – kely.

*Tiago, João warâ Jesus agâ pymâem tâitoem nhekadomobyry  
(Mt 20.20-28)*

<sup>35</sup> Ilâpygueduo Zebedeu imeom Tiago, João warâ Jesus iopaji saindylymo. Nhekadylymo eyam:

– Xina nhekadybyne aiekâ, xina kely, Pymâ – kelymo.

<sup>36</sup> Agueduomo, Jesus aguely:

– Âdyka mâenkadyze matomo? – kely.

<sup>37</sup> Warâ in-hoguly mo:

– Pymâem kuru mituo, xina iduakegâne, agâ pymâem xina itoem. Tokalâ aho eynynâ, tokalâ pâem eynynâ warâ xina ekanâgâ – kelymo.

<sup>38</sup> Arâ agueduomo, Jesus aguely:

– Mâuntuwâbyra âmaemo âdara yagâ pymâem mitomoem amidylymo awly. Toenzepa kâsenagazedo ara kehoem âsenagazeze tâeganeka ise âmaemo? Yiguely ise myara igueze tâeganeka ise âmaemo? – kely.

<sup>39</sup> – Emaenze lelâ xina, mâenmaen-ho ara – kelymo myani.

Aituo myani Jesus aguely:

– Âsenagazeze urâ, âmaemo lâpylâ warâ. Igueze urâ, igueze lâpylâ âmaemo.

<sup>40</sup> Yahoru eynynâ ekani, pâem eynynâ ekani warâ kâinduakeba olâ urâ, yagâ pymâem itoem. Deuslâ ise iduakeim. Mâkâ mawânkâ târâ tâzekado nhonipyry – kely.

<sup>41</sup> Tiago, João warâ Jesus agâ pymâem tâidyse awly tindatuo, eagonrodo eagâmo iewiâpadaynly.

<sup>42</sup> Aituo Jesus idânârâ ingâsedylymo tuopaji, eagâmo adâkehoem.

– Tutuzelâ âmaemo, pymâdo ton-honreim modo, tyewiâse kehoem kurâdo agâ aguely, adâkehobyry anhetomoem.

<sup>43</sup> Âmaemo olâ arâpa itaungâ. Mâdyren-hondyze mataymo, tâzemaryenlâ itaungâ.

<sup>44</sup> “Imawyadâbyramo ise urâ. Pymâ wawlygye, âmaemolâ ise urâem aieni” tâkezeba itaungâ, pymâem mituomo.

<sup>45</sup> Yara itaungâ. Deus Ingonotyby lelâlâ wâne urâ, iemawyadâdomoem âetyby keba olâ urâ, imarymo lakuru urâ. Igueze âetyby urâ. Kurâdo inakanhe aito modo epywaze ise yiguely, Deus ize ato ara – kely Jesus.

*Jesus epy Jericó donro kua nhetobyry  
(Mt 20.29-34; Lc 18.35-43)*

<sup>46</sup> Jesus, tynynonro modo agâ xidadâ Jericó einkâ sakadylymo. Kurâdogue tyampyguenone kehoem xidadâ odaypa egaselymo ume epy Bartimeu, ânwa edazekâ ekadybyem awly, sakadaynrim modoram dinheru tienkadoem.

<sup>47</sup> – Jesus Nazaré donro enra awâkâ sakani – kely tindatuo myani adaenkely:

\* 10:34 Nota de pé Mateus 12.40dâ egâ.



– Ytyendâlâ ikâ, Jesus. Âdamu Davi ara pymâ ton-honreim âmâ! – kely.

<sup>48</sup> Ton-honre kehoem eyam aguelymo:

– MYK alelâ ikâ! Tadaenkezeba ikâ! – kelymo eyam.

Agueduomo lakuru myani epy adaenkely:

– Ytyendâlâ ikâ, Jesus! Âdamu Davi ara pymâ ton-honreim âmâ! – kely.

<sup>49</sup> Jesus epagudyly. Aguely tonlo modoram:

– Epy yam enetaungâ – kely.

Epy nra aguelymo:

– Tyanepa ikâ! Aukâ. Âgâsedily mâkâ – kelymo eyam.

<sup>50</sup> Aituo Bartimeu tâty BOH waunlo tâmaeozo kehoem nhetyly, nhamely, saudily, Jesus iopaji adaholy.

<sup>51</sup> Aituo Jesusram adapâigueoly:

– Âdyka âmâem agânhedyse mato? – kely.

– Kâentondyze urâ, Pymâ – kely in-hoguly.

<sup>52</sup> – Ipa, kua mitai, kua âeniem wawily mâinwântobyry wâgâ. Idâ lelâ itynra – kely Jesus. Ilâenlâ kehoem Bartimeu nhentondyly, ânwa oze Jesus nhampygue idâly lelâ.

## 11

*Jesus Jerusalémram saintobyry*

*(Mt 21.1-11; Lc 19.28-40; Jo 12.12-19)*

<sup>1</sup> Âtâ anary Betfagé, Betânia warâ Jerusalém iwaguepaonram myani Jesus, tynnonro modo, kurâ domodo warâ agâ saindylymo. Iwy Se Oliveira Ekadâ epagudylymo. Myarâ saintybyem Jesus tynnonro ewy azagâ waunroem ingonodyly.

<sup>2</sup> Wakely eyanmo:

– Idâwâtaungâ mârâ âtâ anary iwaguepaonram. Myarâ aindylymo umelâ ise jumentinhu ekâjiby mâendylymo. Ânguy âkuhobyry keba mâkâ. Ekâjigewâdaungâ; enetaungâ xarâ.

<sup>3</sup> Ânguylâ apâiguelymo: “Âdaituoka jumentinhu mandylymo?” kely-ro watay, “Kywymâry merâ izetonro. Inepa olâ ise nhopânehonly” myguelymo lelâ ise – kely Jesus.

<sup>4</sup> Myarâ idâypyem jumentinhu kuoho ekâjibyem nhedylymo. Aituo nhekâjiguelymo.

<sup>5</sup> Aidilymo tientuo, tonlo modo aguelymo:

– Âdaituoka mâenkâjiguelymo? Iguymo mâkeba awâkâ – kelymo.

<sup>6</sup> Jesus tyam aguehobyry ara myani aguelymo:

– Kywymâry merâ izetonro. Inepa olâ ise nhopânehonly – kelymo.

Aituo tonlo modo aguely:

– Âdâinkâba. Sataungâ lelâ – kelymo.

<sup>7</sup> Jumentinhu nhadylymo Jesusram. Saintybyem myani tygaparyguelâ jumentinhu inkawendâdylymo. Aituo Jesus jumentinhu onwa âkuly.

<sup>8</sup> Toenzepa kurâ domodo tâty BOH waunlo ânwa oze, PO PO tyesimo myani Jesus idâwaym. Tâlâ pylâ myani wakuri sary tiantâwâdyby modo onro onwa PO PO ieni modo, tynrense tawily tienehon-homoem, pymâ ton-honreim idâwaym adâitomo ara.

<sup>9</sup> Waunroem idâwâni modo, âgânâ idâwâni modo warâ adaenkelymo adaguly:

– Hosana Deus! – kelymo. (“Tohoguezem Deus” keze aguely.)

– Tohoguezem kuru awâkâ Deus eon-honru enehonze âeni!

<sup>10</sup> Ton-honreim âmâ!

Xina iwymâry ise âmâ!

Davi pymâem atobyry ara ise pymâem mawily!

Hosana Deus kaynonro

– kelymo.

<sup>11</sup> Jesus Jerusalém ijidadâry odaji saindyly. Saintybyem, Deus ety odaji egawândyly, nhenuagaendyly. Enuagaenibyryem, egasely. Betânia anaxi odopâdyly doze tynnonro modo agâ, iguandyly awylygue.

*Jesus figueiraram, “Iwiseondaymba ise âmâ” kehobyry*

*(Mt 21.18-19)*

<sup>12</sup> Kopaêlâgâem Jesus, tynnonro modo agâ odopâdyly Betânia donropyryem Jerusalémram. Tâwinze myani Jesus.

<sup>13</sup> Iwague endaylâ figueira nhedyly, tarygoengue kehoem. Tâwise-ro waunlo ara, enanaji, tarysely agâlâ ewiseim mawânâra figueira. Aituo eyam iwaguepa saindyly. Ewily sasegâze wâne, tâwiseba olâ, âdaunloenlâ ipa lelâlâ, ewiseho umeba awylygue.

<sup>14</sup> Aituo Jesus figueiraram aguely:

– Iwiseondaymba olâ ise âmâ. Ânguy iwily neinhotaymba ise – kely.  
Eynynonro modo Jesus aguely idamâmomy.

*Jesus ânguydo imeom vende ieni modo Deus ety odaypa nhegaseândobyry  
(Mt 21.12-17; Lc 19.45-48; Jo 2.13-22)*

<sup>15</sup> Figueiraram agueypyem Jesus, tynynonro modo agâ Jerusalémram saindylymo. Sain-tybyem, Jesus egawândyly Deus ety idaseraji. Âdydo imeom vende ieni modo târâ aidyly tientuo nehoguebyra, kurâdo nhenokudylymo kulâ awylygue. Aituo tyewiâse kehoem idânârâ sanâni modo, vende ieni modo warâ nhegaseândaynly. Dinheru troca ieni modo iwenzary nhamunedyly, papa vende ieni modo xurery nhamely idyly.

<sup>16</sup> – Xirâ âtâ âwankuem kâietaundâ. Âsejiguymo xirâ taseragâ kadakobâdaundâ. Idâwâtaungâ. Igasewâdaungâ tarâpa – kely.

<sup>17</sup> Egaseânimobyryem eyanmo aguely:

– Deus itaumbry awo wâgâ iwenibyem: “Xirâ iety idânârâ kurâ domodo yagâ agueho xirâ” kewândymy Deus. Kurâ domodo mâenmagazedilymo kulâ olâ. Ânguydo imeom Deusram tiunduly nhanâdylymo watay, toenzepa mâenwâentanâdylymo. Dinheru âmaemoenlâ mânhedilymo. Deus ety, tâmagazeim modo otoendoem mânhedilymo kulâ – kely Jesus.

<sup>18</sup> Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ Jesus aguely idamâmomy. Jesus agâ iewiâpadylymo myani. Jesus anhekily lelâ kurâdo nehogueguyly, aguely lelâ inwantagueguylymo warâ awylygue. Awylygue âdara Jesus tyâly awyly wâgâ tyangahu oday xunâzelymo.

<sup>19</sup> Iguandyly ume Jesus, tynynonro modo agâ Jerusalêmdâpa idâlymo.

*Figueira iladobyry  
(Mt 21.20-22)*

<sup>20</sup> Emetuo Jesus, tynynonro modo agâ odopâdyly Jerusalémram. Jesus, “Iwiseondaymba ise âmâ” kehobyry figueira einkâlâ myani sakadylymo, todopâdaymo. Igueypyem lelâ mârâ se nhedylymo. Iwindy agâ kehoem warâ iladybyem awyly.

<sup>21</sup> Tientuo, Pedro nhenanâguely Jesus mârâ figueiraram aguehobyry. Aituo Jesusram aguely:

– Egâ figueira, Pymâ. Kopaelâgâ kulâ keankâ “Iwiseondaymba ise âmâ” myguely eyam. Ipa iwerâ, idânârâ kehoem iladybyem awyly – kely Pedro.

<sup>22</sup> Aituo myani Jesus eyanmo aguely:

– Toenzepa Deus einwântaungâ.

<sup>23</sup> Deusram mâenkadybymo aidyly tâinwânse âmaemo watay, adâise lelâ. Tâinwânse lelâlâ âmaemo watay lelâ olâ ise aidyly. Amânhetomoem on-honrumo kâunduyppygue idânârâ aiese lelâ âmaemo. Xirâ iwyrâm, “Âxiguegâ; paikaji adamegâ” myguelymo watay, tâjidydâpa tâxigeeze tâise, paikaji tadameze warâ.

<sup>24</sup> Deus agâ amyguelymo, tâinwânse kehoem amyguelymo watay, xuduze lelâ. Arâ amyguelymo watay, mâenkadybymo aiese lelâ. Xirâ mâuntudyzemo kuru wato.

<sup>25</sup> Deus agâ amyguedaymo, âkelomo agâmo inakanhe aitobyry enanânehonwâdaungâ, Kunwym Deus inakanhe amitomobyry nhygakehoem.

<sup>26</sup> Âkelomo aitobyry mâenanânehomba âmaemo-ro watay, inakanhe amitomobyry Kunwym Deus nygakewâbyra ise, mâenkadybymo nudupa ise warâ. Xirâ mâuntudyzemo kuru wato – kely Jesus.

*Deuslâ Jesus igononi, âdaunlo kulâ mâkeba  
(Mt 21.23-27; Lc 20.1-8)*

<sup>27</sup> Jesus, eynynonro modo warâ Jerusalémram saintondylymo. Saintybyem, idâlymo Deus ety odaji. Taseragâ myani Jesus adakobâdyly. Jesus târâ atay, kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, uguondo tâgareim modo warâ iopaji idâlymo.

<sup>28</sup> Aituo nhapâiguelymo:

– Ânguyka tarâ Deus etydâ arâ amitoem agueim? – kelymo.

<sup>29</sup> Aituo Jesus in-hoguly:

– Apâiguelymo lâpylâ ise. Uhoguduomo, ânguy ugononibyry awyly agueze urâ – kely.

Aituo aguely:

<sup>30</sup> – Ânguyka ani João Batista, inakanhe adâitobyry wâgâ âjityendyby modo batiza nhetoem agueim? Deuslâ? Âdaunlo uguondo kulâ? Uhoguwâdaungâ wao – kely.

<sup>31</sup> Aituo aguelymo:

– Iwerâ ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mâinwâmpyra mawylimo?” keze.

<sup>32</sup> “Uguondo kulâ ani João aitoem agueim, Deus mâkeba” kykeduo, kurâ domodo kagâ iewiâpazemo – kely pymâ domodo.

João Batista, Deus itaumbry egatuin-em igonotyby awyly tâinwânse mawânkâ myani kurâ domodo. Awylygue “Deus mâkeba igononi” keze eanumo.

<sup>33</sup> Awylygue in-hogulymo:

– Xina nutuwâbyra ânguy João batiza nhetoem agueim awyly – kelymo.

– Arâ atayma auguepa lâpylâ ise urâ, ânguy xirâ agânhetoem ugononi awyly-ro – kely Jesus.

## 12

*Tâwanuneim modo koendâpa aitobyry wâgâ Jesus unâ nhegatuhyobyry  
(Mt 21.33-46; Lc 20.9-19)*

<sup>1</sup> Ilâpyryem Jesus tonlo modo kurâdoram agueondyly. Enomedâzemo unâ nhegatyly:

– Tâlâ myani uguondo uva etâdybybeom. Aituo uva ejidy nhahodânehonly tuhu imâsedo modogue. Onwâgâ tâtagueim nhesaguehonly, uva ekuguehoem tâjihurugue, vinhu xygatoem. Âtâ imeimbyry kaynâ olâ-ro waunlo aienehonwânmy tâmagazeim saindyly enuagaendo, ânguydo imeom nady saguwâni modo enuagaendo warâ. Ilâpyryem myani uva ejidy etaynrin modope nhedyly. Warâ myani eyanmo aguely: “Ypi mâendylymo-ro watay, uva xutuduo, epajigâze urâ agâmo” kely. Koendâ lelâ myani arâ âjihogulymo. Aituo myani idânârâ nhonipyryem, âtâ anary iwaguenonra idâly.

<sup>2</sup> – Uva ekaunâdo odaji ituo myani tâmary ingonodyly akaemo tâwaneim modoram, turâ emakeze.

<sup>3</sup> Aituo ingonotyby idâly âpa ezaji. Saintuo, tâzenagazeozemo myani uva ejidy etaynrin modoram. Sawâmâmomy, sapioguwânmommy warâ. Aguelymo: “Idâ. Xina âdy nuduwâpyra ise âpa ezary sodoram” kelymo.

<sup>4</sup> Saguho âdy peba odopâduo myani uva sodo eagonro tâmary ingonotondyly wâne, nhekaunâdybymo ewy turâ emakeze. Âpa ezary etaynrin modo olâ myani mâkâ tânagazezemo, tyangatainzemo, kywypadoem kulâ adyesemo warâ. Âdy nudupamo myani âpa ezary sodoram.

<sup>5</sup> Aituo myani eagonro ingonodyly myarâ âpa ezaji. Tâwanuneim modo nhâlymo lelâ. Alâ pylâ myani eagonro modo aiehowâdyly. Toenzepa kehoem nhapiogulymo. Eagonro modo nhâlymo.

<sup>6</sup> – Alâ tâmary ingonokyly peba idyly. Imery inwynegyuly kulelâ idyly. Alâ ingonodyly. “Merâ ymery tokaleom awylygue âda nientaymbamo ise” tâkeduo, ingonodyly.

<sup>7</sup> Sodo imery saindyly umelâ, âpa ezay tâwanuneim modo âjigie aguelymo: “Uva sodo imery mâkâ âeni. Tunwym igueduo, mâkâ ise ipibyry sodo. Kydyânrene, nhunwym ipibyry kurâenlâ itoem” kelymo.

<sup>8</sup> – Aituo myani mâkâ uva sodo imery nhawâdylymo, nhâlymo, eguepybyry nhamelymo âpa ezayba – kely Jesus.

<sup>9</sup> Aituo Jesus adâkely idani modo nhapâiguely:

– Âdya ise mâkâ uva sodo akaemo âpa ezary eni modoem anhekyly? Agueze urâ âyanmo. Todopâduo, uguondo modo xyâwâse mâkâ sodo. Eagonro modo ise mârâ uva ejidy eniem nhekyly-ro warâ.

<sup>10</sup> Deus itaumbry awo wâgâ iweniby mâintaimbymo enanâguewâdaungâ:

“Tâlâ myani tuhu imeâgâkeba, âtâ itâdo.

Idânârâ itâdaynrin modo mârâ tuhu tâensemo,

mârâgue âtâ tintâdyzebamo olâ.

Deus xurâem olâ mârâ tuhu tywyneim kuru!

<sup>11</sup> Kywymâry Deus induakeyby olâ mârâ tuhu, âtâ itâdoem.

Deus anhetyby idânârâ iwâkuru kurâem!”

warâ iwenibyem awyly – kely.

<sup>12</sup> Pymâdo, âpa ezary eni inakai wâgâ unâ tindatuo, toenzepa iewiâpadylymo. Tywâgâ aguely awyly nhutulymo, Jesus izetonro keba tawylygue, tâwaneim modo âpa ezary sodo imery izepa atomobyry ara.

Awylygue Jesus tientadânehondyze idylymo, tyâen-hon-hoem. Âjigie aguelymo:

– Iweâ lelâlâ kianwânehonly watay, kurâdo kagâ iewiâpaze – kelymo âjigie.

Awylygue myani Jesus âdara niepyra awylymo ilâenlâ, nhodokelymo lelâ.

*Impostu epywadyly wâgâ Jesus nhapâiguehomobyry*  
(Mt 22.15-22; Lc 20.20-26)

<sup>13</sup> Mârâpygueduo judeu domodo iwymârydo aguely fariseu domodo ewyram, Herodes enynnonro modo ewyram warâ:

– Idâwâtaungâ Jesus agâ agueze. Moisés inweniby wâgâpa kulâ aguehoem ise amyguelymo – kelymo.

<sup>14</sup> Saintrybem igonotaymby modo Jesusram aguelymo:

– Pymâ, konokuni keba mawyly, tutuze xina. Deus ize ato wâgâ âkealâ xina mâenomedâdily. Iozeno lelâ amygueho, ânguy izepa awyly umelâ. Pymâdo tynrenseim modo ize ato amânhoem kulâ amygueho mâungukewâbyra âmâ. Awylygue âdara impostu epywadyly wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu epywadyly? Koendâpa? – kelymo.

<sup>15</sup> César tiunâguedoem kulâ tapâiguelymo awyly xuturimbyryem olâ myani Jesus.

Aituo aguely:

– Inra esagueyby odaji wâne ânguyâ ihuguely myara wâne ienokudyze mawylymo. Moeda enetaungâ, kâentoem – kely.

<sup>16</sup> Aituo moeda nhadylymo, nhudulymo, Jesusram adapâigueolyo:

– Ânguy emydy ekudoka xirâ wogonro? Ânguy ezedyka iwâgâ iweniby warâ? – kely.

Aituo in-hogulymo:

– Roma donro kywymâry César ezedy, emydy warâ – kelymo.

<sup>17</sup> Aituo Jesus aguely:

– César xurâ, Cesarânâ xuduwâtaungâ. Deus xurâ, Deusranlâ xuduwâtaungâ warâ – kely. Jesus aguely tindatuo Jesus enokuze kewâtyby modo âseguâdâdilymo. Âdara tienwentâdo nutuba tâituomo.

*Iguewâtyby modo kurâem itondyly wâgâ nhapâiguehomobyry*  
(Mt 22.23-33; Lc 20.27-40)

<sup>18</sup> Saduceu domodo ewy Jesus agâ âtunâgueze idâlymo myani. Iguewâtyby modo kurâem itondyly einwânni keba akaemo. Jesus iopaji saindilymo. Aguelymo:

<sup>19</sup> – Idakâ, Pymâ. Moisés ezewenry tutuzelâ âmâ, iweâpa kydamudoram inweniby: “Uguondo tywydy namypalâ iguely-ro watay, iukonobyrylâ nohogüim iwidyppyry agâ, imezeândoem. Aituo iamudo iazepy, igueypy imeryenlâ âdutuoly” kelype.

<sup>20</sup> Xina olâ ise warâ nhegately. Tâlâ myakâwâm sete lelâ uguondo modo âjiwaigoruem, âjiukonoem waunlo. Iwaigoruemo ohogüinly myakâwâm. Tywydy namypalâ iguely.

<sup>21</sup> Iukonobyrylâ myakâwâm ohogüinrim pypâ agâ. Mâkâ lâpylâ myakâwâm tywaigoru iwidyppyry namypalâ iguely. Azagâ tokalâ ietomo iukono ohogüinly myakâwâm pypâ agâ. Mâkâ lâpylâ iguewâm, tywaigoru iwidyppyry namypalâ.

<sup>22</sup> Tywaigoru iwidyppyry namypalâ lâpylâ myakâwâm quatro ietomo, cinco ietomo, seis ieto, sete ietomo warâ iguewâdilymo. Sete uguondo lelâ myakâwâm mâkâ pekodo agâ ohogüimby. Idânârâ mâkâ uguondo modo iguewâpygueduo myakâwâm, pekodo iguely lâpylâ.

<sup>23</sup> – Xirâ xina apâiguedyze ato. Âkealâ kuru igueypy kurâem itondyly watay, âdaunlo uguondo akaemo sete ewy iwidyenka ise mâkâ, kurâem itonduomo? Idânârâ akaemo sete lelâ iwidyem ityby mawânkâ! – kelymo.

<sup>24</sup> Aituo Jesus in-hoguly:

– Iozepa kulâ âunâgumo! Deus itaumbry awo wâgâ iweniby mâuntuba kuruka âmaemo! Âdydo imeom aiese Deus ton-honre awyly, mâuntuba gâlâ âmaemo.

<sup>25</sup> Iguewâtyby modo kurâem itonze lelâlâ, nigueompyra tâitomoem. Anju domodo nohogüinwâbyra. Alâpylâ iguewâtyby modo, kurâem itonduo, nohogüin-ondaymbamo ise.

<sup>26</sup> – Iozeno kuru iguewâtyby modo kurâem itondyly, kely mâintaimbaka minasemo. Enanâguedaungâ Moisés inweniby igueypyem kurâem tâjítondyly wâgâ, se imeimbyry niadupalâ tyatygueindâ Deus aguehobyry: “Deus urâ, Abraão, Isaque, Jacó warâ iDeusry; tarâlâ akaemo ywâgâ” kewândy Moisésram.

<sup>27</sup> Kurâdo enanaji olâ Deus einwânni iguewâtyby modo, iguewâtybyem lelâlâ. Deus xurâem olâ akaemo igueypyemba, tarâlâ akaemo Deus eydâ atodâ. Arâ aguehobyry wâgâ Deus einwântaynrim modo nigueompyra awyly kiuntuly. Ioze inkâba awârâ “Igueypy kurâem nitombyra” myguelymo – kely Jesus.

*Deus aguiendyze ato*  
(Mt 22.34-40; Lc 10.25-37)

<sup>28</sup> Moisés inweniby wâgâ enomedâni ewy aguelymo idamâ. Koendâ lelâ Jesus saduceu domodo aguelymo in-hoguhobyry tutuze tawylygue, Jesusram aguely:

– Toenzepa Moisés kâzewenryem inweniby modo. Âdaunloka koendonro kuru? Âdaunloka awârâ modo takazeno kuru? – kely.

<sup>29</sup> Aituo Jesus in-hoguly:

– Warâ mawânâ Deus itaumbry awo wâgâ iwenibyem awyly: “Israel iweom, ydataungâ. Kywymâry awâkâ Deus. Awâkâ kulelâ Kuturim! Tokalâ kulâ awâkâ!

<sup>30</sup> Kywymâry Deus iwynedaungâ idânârà âdydo imeom, kurâ domodo warâ mâinwynedomo takaze kehoem. Idânârà ize matomo, Deus ize ato ara lelâ nidâ. Idânârà angahumo oday âunâgomo Deus ize ato lelâ nidâ. Idânârà amânhekylymo Deus ize ato ara lelâ nidâ” warâ. Xirâ aguely mawânârà tâzewenry takazeno kuru.

<sup>31</sup> – Eagonro tâzewenry koendonro lâpylâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” kewândymy Deus. Xirâ azagâ tâzewenry auguehobyry mawânârà mârâ kuru – kely Jesus.

<sup>32</sup> Aituo Moisés inweniby wâgâ enomedâni ewy aguely Jesusram:

– Koendâ lelâlâ amyguely, Pymâ. Âkeâ lelâlâ amyguehobyry modo. Deus kulelâ kywymâry. Ipa eagonro Deus.

<sup>33</sup> Deus kinwyneguly kuru nidâ, kurâdo, âdydo imeom warâ takaze. Mâkâ ize ato ara lelâ kyangahu oday kunâgu nidâ. Ize ato ara lelâ agwine. Ton-honre kehoem eagâ kydawyly nidâ. Mâkâ agâ, mâkâ agâ alelâ âjize kine, âwâlâ âjize kydato ara. Deus ize kurâ, kurâ domodo ize kurâ warâ watay lâpylâ olâ iomaru kuru-ro warâ, âdydo imeom, ânguydo imeom warâ egameduo iomaru takaze kehoem – kely.

<sup>34</sup> Awârâ tindatuo, tutuze myani Jesus, mâkâ Moisés inweniby wâgâ enomedâni tutuze kehoem aguely awyly. Aituo eyam aguely:

– Koendâ kehoem Deus wâgâ tutuze âmâ. Deusgue tywymâgueinhe iseaji mynra âmâ – kely.

Agueduo tonlo modo Jesus napâigueba idylymo.

*Jesus, “Ânguyka Messias?” kehobyry  
(Mt 22.41-46; Lc 20.41-44)*

<sup>35</sup> Deus ety idaseray kurâdo tienomedâdyly ume, Jesus aguely tydataynrim modoram:

– Moisés inweniby enomedâni modo, “Uguondo kulâ Messias; Davi iwerypyry tarâ onro anaym kulâ ise pymâem awyly” kelymo. Âyanmo auguely olâ, âkealâ awyly mâuntuhoem.

<sup>36</sup> Tutuzelâ myakâwândy Davi, âdaunlolâ kurâ takaze kehoem ton-honreim Messias awyly. Awylygue “Ywymâry” kewândymy Davi Messiasram, niazepa awyly umelâ. Deus Ispiriturylâ mawânkâ eyam xutuen-hoim. Tutuzelâ âmaemo Davi inweniby:

“Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,

âduery modo eon-honru kainly ara,

âdydo ara kulâ âhuru iaxi kânhedilymo ara’ kewândymy Deus”

kely myakâwândy Davi inwenily, Deus Ingonotyby wâgâ.

<sup>37</sup> – Davilâ myakâwândy Messias tywymâryem awyly agueim. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwwâdaungâ, Davi takaze – kely Jesus.

Koendâ kehoem kurâdo Jesus tonomedâdyly indadylymo.

*Moisés inweniby wâgâ enomedâni modo wâgâ Jesus aguehobyry  
(Mt 23.1-36; Lc 20.45-47)*

<sup>38</sup> Aituo Jesus agueondyly kurâdoram:

– Tonomegulâ itaungâ Moisés inweniby wâgâ enomedâni modo aito ara amipyra mitomoem. Koendonro aramo wâne, koendonro kebamo olâ. Earamopa itaungâ. Kurâ domodoram tâzehogueoly kulâ ize atomo. BOH waunlogue lelâ etyunmo, Deus eynynon-roem tawyly tienehon-homoem. Âdykâlâ kurâdo âtâdygyuho einkâ takaduomo, mâkâ modo tâdaenkudzemo, tynrendysemo warâ.

<sup>39</sup> Âtâ tâdâtâdygyuho odaji tâtâduomo, tâgareim ekado wâgâ ekadylymo, arâ lâpylâ âty mododâ.

<sup>40</sup> Pekodo pypâ modoram aguelymo inanry: “Xinalâ ise âsejiguyumo eni; tusonebama âmaemo” kelymo. Isejiguyumo turâem tientomoem kulâ olâ nhenokudylymo. Deus agâ adâkedaymo, imeâgâemba kehoem aguelymo, koendâ tâgaromoem kulâ. Awylygue ise Deus nhenagazedilymo, kurâdo takaze kehoem – kely Jesus.

*Pypâ âdy pebanro Deusram tydinheruru nhuuhobyry  
(Lc 21.1-4)*

<sup>41</sup> Deus ety idaseray Jesus ekadyly, dinheru Deusram xuduypy etary iwaguepa. Ilâ odaji dinheru ieni modo myani nhenuagaendyly. Toenzepa tydinherugueim modo imâem dinheru nhetadâdylymo nhedyly.

<sup>42</sup> Aituo pypâ âdy pebanro kehoem saindyly. Azagâ moeda imeimbyry, tâwâensenry nhetadâdyly nhedyly lâpylâ.

<sup>43</sup> Awârâ tientuo, Jesus aguely tynynonro modoram:

– Deus xurâem, mâkâ pypâ nhetadâdyby tâwâenseim kuru, akaemo âdypeom modo nhetadâdyby takaze.

<sup>44</sup> Dinheru âsegubydâdyby akaemo nhuduly. Mâkâ olâ idânârâ tâlâ tato ara nuduaki, typyniry tianâto alelâ. Xirâ mâuntudyzemo kuru wato – kely Jesus.

## 13

*“Deus ety adakalagueoze” Jesus kehobyry*

(Mt 24.1-2; Lc 21.5-6)

<sup>1</sup> Aituo Jesus âxiguely Deus ety idaserayba. Tâtâday, Jesus eynynonro ewy aguely:

– Egâ, Pymâ. Iwâkuru kehoem Deus ety! Tuhu iwâkuru kehoem âtâ itâdobyry! – kely.

<sup>2</sup> Aituo Jesus aguely:

– Arâ wâne awârâ Deus ety imâsedo mâendylymo. Adainhoze olâ awârâ. Idânârâ adakalagueoze. Angato inkâba ise awârâ tuhu modo; ihugewâze awârâ onro onwa – kely Jesus.

*Jesus tâdâsenagazedly wâgâ aguehobyry*

(Mt 24.3-14; Lc 21.7-19)

<sup>3</sup> Ilâpyryem idâlymo iwy onwa Se Oliveira Ekaram. Târâ iwy wâgâ ekadybyem Jesus Deus ety nhesedyly iwague endaylâ. Pedro, Tiago, João, André warâ eyam idâlymo.

<sup>4</sup> Eagonrodo naimpyra awyly umelâ sapâigueze:

– Âdara kaise xypyry iwaguepa idyly xina nhutuly? Âdy kaise tâenseim Deus ety adakalagueoho odaji itybyem awyly xutuhoem? Âdara kaise awârâ adaguhoem aidyly? – kelymo.

<sup>5</sup> Aituo Jesusram âzenomedâolylo:

– Inanaynmolâ itaungâ, kodopâdo wâgâ ânguy inokubyramo itoem.

<sup>6</sup> Xypyry etaji idyly ume, toenzepa ise “Messias urâ, Deus Ingonotyby” kewâni modo. Toenzepa ise agueduom âsenogudaynrim modo.

<sup>7</sup> Tâinkâ lelâba âseguebylymo, âdyâwâdylymo warâ kely idase âmaemo. Tadahulizeba olâ itaungâ, awârâ modo egary mâindatuomo. Aise awârâ modo, âdypydâdo keba olâ ise.

<sup>8</sup> Âkelo anano modo âdyâwâsemo. Âjitanwebaom modo âdyâwâsemo warâ. Tâinkâ lelâba ise onro âzekâni. Âtâ anakâ pyini peba ise. Tâdâsenagazedly imâem iseze, pekodo âsenagazedly xigâlegueam tymery iazehoem ewânugue myara.

<sup>9</sup> – Tonomeguelâ itaungâ. Yizepaom modo awâsemo yeinwândylymogue. Asemo pymâ domodo enadoram, mâzenagazeohomoem. Apiogüen-honzemo âtâ tâdâtâdygyuho oday. Yeinwândylymogue, pymâ domodoram adahoze âmaemo. Pymâ domodo enado mataymo tâwâlâ ise unâ iwâkuru mâengatulymo âdara imakehomobyry wâgâ.

<sup>10</sup> Xypyry etaji idyly iray, unâ iwâkuru ywâgâ agueim âzegatuoze idânârâ kurâdoram.

<sup>11</sup> Adahoze âmaemo pymâ domodo enadoram, âzetadâoze âmaemo warâ. Amyguehomo wâgâ tadahulizeba itaungâ, pymâdo enadoram madahoduomo. Pymâdo enado mawylymo ume, Deus agâmolâ ise. Âurusemo amyguehomoem. Âunârymo wâgâ kulâ inkâba ise amyguelymo, Deus Ispirityry xunâry wâgâ.

<sup>12</sup> – Ipemugüanlâ ise yeinwâni modo âzenagazeoly. Ipemugumolâ ise pymâdoram egamenrimo, âdyohomoem. Âjiukonoem, âjiwaigoruem warâlâ ise âsegamelymo. Tâjiunwym, tâjimery warâlâ ise âsegamelymo lâpylâ, âdyohomoem.

<sup>13</sup> Nynynonroem mawylymogue, toenzepa ise mâjiewiâseoly. Âmaemo yeinwândyly imodânry modo olâ âsemaeze, aunloenlâ Deus agâ mitomoem – kely Jesus.

*Jesus Jerusalém adainholly wâgâ aguehobyry*

(Mt 24.15-28; Lc 21.20-24)

<sup>14</sup> Aituo Jesus agueondyly:

– Âepanâgueze “Deus izepaom kuru” keho, mâkâ inakai kuru. Jerusalémâ ise âepanâguely, Deus ety oday, tâjidydâpa kulâ. (Xirâ itainwâni modo xutuze, âdara keze aguely awyly.) Mâkâ inakai kuru Jerusalémram saintuo, âmaemo Judéia donro modo iwyrarm âwientaungâ, otenze.

<sup>15</sup> Inepa kehoem âwientaungâ. Itymo inatay âmaemo watay, tâwânseba itaungâ itymo odaji, âdylâ ese.

<sup>16</sup> Âpa ezay âsewanize mataymo, inepa âwientaungâ, itymo iwanomoguelâ. Itymo mâungukehomo ese todopâzeba itaungâ.

<sup>17</sup> – Toenzepa âsenagazeze pekodo modo ioday tymegeim, tuhuazeim modo warâ. Tahule âwienniembamo mawânkâ ise.

<sup>18</sup> Deusram ekadaungâ, kopâ umeba xirâ tâdâsenagazedo saindyly itoem; inepa tâdâwiento nudupama ise.

<sup>19</sup> Ton-honre ise awârâ tâdâsenagazedelyly saindyly. Deus onro nhugutobryenlâ arâ kehoem tâdâsenagazedelyly peba awyly. Anitomyra ise-ro warâ mârâ emyenro kuru.

<sup>20</sup> Deus olâ mârâ tâdâsenagazedo epagunâze, aisezedelyly lelâ waypa itoem. Aypa watay, ânguy nemaenwâbyra tâise; idânârâ tadainze. Tynynonroem tinduaekeyby modo wâgâ olâ ise Deus anhedelyly – kely Jesus.

<sup>21</sup> Jesus aguely:

– Kodopâdo xutuze âmaemo, ânguy âdakepalâ. Awylygue “Anra merâ Messias” kely mâindatuomo, kâzeinwântaundâ. “Awâtârâlâ awâkâ Messias” kely mâindatuomo, kâzeinwântaundâ warâne.

<sup>22</sup> Toenzepa ise enra konokuni modo. “Deus Ingonotyby urâ” kezemo. “Deus keankâ ugononi, itaumbry egatuze” kezemo. Adyesenry modo kehoem aiesemo, kurâ domodo iomazeâni aiesemo warâ. Idânârâ enokuze kezemo; Deus induakewâdyby modo enokuze kezemo lâpylâ, akaemo olâ ise nâzenokuoba.

<sup>23</sup> Inanaynmolâ itaungâ. Ârudylymo olâ waunroenlâ, mârâ ume mâzenokuoba mitomoem – kely Jesus.

*Uguondo Kaynâpa Âtyby odopâdo xutuho*

*(Mt 24.29-31; Lc 21.25-28)*

<sup>24</sup> Aituo Jesus aguely:

– Mârâ tâdâsenagazedelyly sakabygueduo, xixi, nunâ warâ tohoreba ise.

<sup>25</sup> Ximukâ modo kau wâgâpa ihuguewâze. Kaynâ tyngataymby modo ihugueânze Deus.

<sup>26</sup> Idânârâ kurâdo kâpanâguely ese, urâ “Uguondo Kaynâpa Âtyby” keho. Eunu duay ise ytâgyuly. Pymâem lelâlâ wawyly; toenzepa won-honru enehonze urâ.

<sup>27</sup> Anju domodo igonose urâ idânârâ âta anakâ, Deus induakeyby modo idâtyguyze. Xixi egaseho eynynâ, egawânto eynynâ, norte eynynâ, sul eynynâ warâ ise yeinwântaynrim modo âewyly – kely Jesus.

*Jesus odopâdo xutuhobe ise*

*(Mt 24.32-35; Lc 21.29-33)*

<sup>28</sup> Aituo Jesus aguely:

– Inepa kodopâdelyly awyly xutuhobe ise, iwaguepa kopâ ihugueho awyly xutuho ara. Etaungâ figueira. Iwatary modo ikuandaynly, sary ilusewâdelyly warâ watay, iwaguepa kopâ ume idyly awyly tutuze âmaemo.

<sup>29</sup> Myara lâpylâ ise xirâ auguehobyry modo aidyly adaguly mâentuomo, kodopâdo iwaguepa awyly mâuntulymo.

<sup>30</sup> Aise xirâ âdydo imeom, idânârâ xirâ onro anano modo iguelymo iraynâ.

<sup>31</sup> Kau, onro warâ adainze. Auguehobyry olâ ise nadaimpa, nâtugueba warâ; aunloenlâ ise. Xirâ mâuntudyzemo kuru wato – kely Jesus.

*Ohondybyem lelâ itaungâ, Jesus odopâdelyly iraynâ*

*(Mt 24.36-44)*

<sup>32</sup> Aituo Jesus aguely:

– Kunwym Deus kulelâ xuturim kuru âdara kodopâdelyly awyly, kopae atay, peto oday atay warâ. Ânguy xirâ anano nutuwâbyra. Anju domodo nutuwâbyra. Urâ Deus imerylâ kâuntuwâbyra urâ.

<sup>33</sup> Tonomeguelâ olâ itaungâ. Kâewyly inwânwântaungâ. Mâinwânwâmpyra tâiseba itaungâ, âdara kodopâdelyly mâuntuba mawylmogue kulâ.

<sup>34</sup> – Unâ ise âyanmo kâengatuly, mâuntuhomoem. Alâ myani uguondo adakobâze idâly. Tâgasely iraynâ tagâ tâwanuneim modoram aguely: “Tegasely ise. Âdara kodopâdelyly kâuntuba olâ urâ. Iwanumone aietaungâ. Auguehobyry aietaungâ” kely myani. Pyanta eniram aguely myani: “Inanaynlâne ikâ, pyanta mâenahunguehoem kodopâduo” kely.

<sup>35</sup> Awylygue myani tâwanuneim modo âsewanilymo lelâ. Nâsewaniba nipyramo. Âdara âta sodo odopâdelyly nutubamo mawânkâ.

<sup>36</sup> Arâ lâpylâ aunlolâ kodopâdily iwânwântaungâ. Auguehobyry amânhepyra tâiseba itaungâ. Tyneim, xykynri warâ ara inkâba itaungâ.

<sup>37</sup> Yeinwâmpyra tâiseba itaungâ. Auguehobyry amânhepyra tâiseba itaungâ, kodopâdily ara – kely Jesus.

## 14

*Jesus xyâly wâgâ aguehomobyry*  
(Mt 26.1-5; Lc 22.1-2; Jo 11.45-57)

<sup>1</sup> Azagâ iguandyly kulâ myani Pâscoa etyry adaguhoem, judeu domodo idamudo Egit-odâba âsemaguehomobyry etyguedo, pão ioliho pebaom nhedawyn-homo. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ âjigie âtunâguedylymo myani, âdara Jesus tianwânehonly, tyâen-honly warâ wâgâ. Kurâ domodo nhutudyzebamo.

<sup>2</sup> Aituo aguelymo:

– Koendâpa ise enra âty ume sawâdily. Toenzepa ise kurâdo âzetygueni modo. Jesus sawâtobyry egary indadylymo-ro watay, kagâ toenzepa iewiâpazemo – kelymo.

*Pekodo Jesus nhangahu onwa uriza nhapâdobyry*  
(Mt 26.6-13; Jo 12.1-8)

<sup>3</sup> Jesus idâondyly âtâ anary Betanianra. Târâ tatay myani idâly Simão tâjimituguelygue tâwânembyry etyram. Jesus, eynynonro modo warâ Simão agâ âwinduadylymo myani. Âwinduadylymo ume, pekodo Jesus iopaji saindyly. Alabastrogue uriza etary xygatybygue tâmase; uriza tâwânenseim nardogue tumyke mârâ. Eтары enahuru nhukagâdily, tienahunguehoem. Ilâpyryem uriza tyânârngueim nhapâdily Jesus nhangahu onwa.

<sup>4</sup> Uriza nhapâdily tientuo, tonlo modo, aidyly nehoguebyra. Aituo aguelymo:

– Etaungâ! Awâkâ pekodo uriza tâwânenseim alâ kulâ nhumedily!

<sup>5</sup> Awârâ uriza vende iedyly-ro watay, trezentas moedas takaze kehoem tâise idinherugu\*. Koendâ tâise vende nhedyly, ebyry âdy pebaom modoram tiunduhoem – kelymo.

Toenzepa pekodo nhunâguedylymo.

<sup>6</sup> Aituo Jesus aguely:

– Arâ adâkezeba itaungâ merâ pekodoam. Kâjiwypazenehonwâdaundâ. Koendonro merâ urâem anhekyly.

<sup>7</sup> Aunlolâ ise âdy pebaom modope awyly; ize matomobyry aralâ ise âdylâ mâundulymo. Urâ olâ ise âdiempa kulâ agâmo wawyly.

<sup>8</sup> Idânârâ adienkyly ara anientai. Wonwa uriza tyânârngueim niapâdai, yigueduo, ieguepybyry etadâdo odaxi ietoem wondyly ara.

<sup>9</sup> Merâ anhetyby ânguy nenanânehonwâbyra ise. Unâ koendonro egatuly âdykâlâ-ro watay, tânanâguezeinlâ ise merâ aitobyry. Xirâ mâuntudyzemo kuru wato – kely Jesus.

*Jesus tiengamehoem, Judas dinheru nhemakehobyry*  
(Mt 26.14-16; Lc 22.3-6)

<sup>10</sup> Aituo myani Judas xidâdâ Queriotte donro Jesus eynynonro modo ewy, idâly kurâdo eynynâ Deus agâ aguewâni modo iwymârydoam, eagâmo âtunâguezee. Eagâmo âseinwândily myani Jesus eyanmo tiengamehoem.

<sup>11</sup> Aguely tindatuo, toenzepa kehoem iomazelymo.

– Xina emaxi Jesus mâengamely-ro watay, ipywaze xina – kelymo myani.

Eagâmo adâkebygueduolâ kehoem Judas, âdara Jesus tiengamehoem adâidyly awyly nhutuly.

*Jesus, “Ohondaungâ, Pâscoa kientyguedoem” kehobyry*  
(Mt 26.17-25; Lc 22.7-16,21-23; Jo 13.21-30)

<sup>12</sup> Egitodâba tydamudo âsemaguehomobyry tianânâguehoem, judeu domodo pão ioliho pebaom nhedawyn-ho, kordeiru nhâhomo warâ, âty Pâscoa keho oday awylygue myani Jesus eynynonro modo aguelymo eyam:

– Âdykâka ise pyni iwâkuru xina anhenehondyze mawyly, xirâ Pâscoa ume kydawindua-keymo? – kelymo.

<sup>13</sup> Aituo Jesus azagâ tynynonro ewy ingonodyly âji nhonse. Egaselymo iray Jesus aguely eyanmo:

– Idâwâtaungâ xidâdâ Jerusalémram. Myarâ aintuomo, uguondo âmugâ oday paru sani iose âmaemo. Idâwâtaungâ eagâ.

\* 14:5 Tokalâ anu ara kehoem tâsewanize uguondo trezentas moedas pratagueto tâmakehoem.



<sup>14</sup> Igawântaungâ egawântobyry âtâ odaji. Mârâ âtâ sodo agâ aguewâtaungâ: “Pymâ mawânkâ âty Páscoa tientyguedyze tarâ xirâ kopae. Ádykonlo âtâ sahomery oday kaise tynynonro modo agâ kordeiru nhunru nhâdyly, pão ioliho pebaom nhedawynly warâ?” kewâtaungâ âtâ sodoram.

<sup>15</sup> Eagâlâ ise mâkulymo, âtâ sahomery kaynonro odaji. Târâ ise sahomery imeâgâ keba nhenehonly Tâlâ ise târâ mesa, tâzekado, idânârâ ize kydato modo warâ. Târâ ise kypyniry amânhenehonlymo – kely myani Jesus.

<sup>16</sup> Jesus aguepygueduo, azakâlâ idâlymo. Saindylymo xidadâram. Saintrybyem, Jesus aguehobyry ara lelâ nhedylymo. Mâkâ uguondo agâ oxiodylymo, idâlymo eagâ, âtâ nhedylymo warâ, Páscoa tientyguedomoem. Pyni modo aienehonrimbyryem myani odopâdylymo Jesus eydâ atoam.

<sup>17</sup> Iguampygueduo, Jesus myarâ idâly tynynonro modo agâ. Saindylymo. Âwinduadylymo.

<sup>18</sup> Âjigüe tâwinduataymo, Jesus aguely eyanmo:

– Idataungâ auguely. Tokalâ âmaemo ewy yâdysedo modo emaxi iegameze. Yagâ âwinduani modo ewylâ ise iegameim – kely.

<sup>19</sup> Jesus agueduo, itywandylymo. Mâkâ, mâkâ warâ aguelymo:

– Urâ mâkeba ise igamenri, Pymâ! – kelymo.

<sup>20</sup> Aituo Jesus aguely:

– Âmaemo ewylâ olâ ise iegamerim, yagâ pão edawynrim modo ewylâ.

<sup>21</sup> Deus itaumbyry egatuwâni modo iweniwânmy ywâgâ. Uguondo Kaynâpa Âtyby âdyoze, kelymo myakâwâm. Aguehomobyry ara ise aidyly. Toenzepa âsenagazeze olâ yizepanro modo emaxi iegamerimbyry. Niazepalâ wânkâ nidyse! – kely.

*Kywymâry Jesus iguehobyry enanâgueho  
(Mt 26.26-30; Lc 22.14-20; 1Co 11.23-25)*

<sup>22</sup> Tâwinduatay, Jesus pão nhanâdyly. Deusram aguely:

– Koendonro âmâ, Pabai, xirâ pão mâundulygue – kely.

Agueypyem, pão nhepajiwâdyly. Mâkânra, mâkânra warâ nhuduly, nhedawyn-homoem. Aituo aguely eyanmo:

– Sawâtaungâ. Xirâ pão kêempajiwâdyby, wodo xirâ – kely.

<sup>23</sup> Ilâpyryem kopu vinhugue taseim tâmaxi nhedyly. Deusram aguely:

– Koendonro âmâ, Pabai, xirâ vinhu mâundulygue – kely.

Agueypyem, mâkânra, mâkânra warâ nhuduly nhenyomoem.

<sup>24</sup> Aituo Jesus aguely:

– Unulâ xirâ. Tâunkeze ise yiguely, toenzepa kurâdo emakeze. “Ynynonro modo emakeze urâ” Deus kehobyry mawânârâ. Awlylygue ise unu tyapâze yigueduo, iwelo tâdâsemaguehobe Deus nhedyly.

<sup>25</sup> Xirâ pygueduo, Páscoa kêentyguedombyra, vinhu kêenyombyra warâ wao ise urâ agâmo, Pabai Deus eynynonro modo myarâ pymâem atoram saindylymo ara. Xirâ mâuntudyzemo kuru wato – kely Jesus.

<sup>26</sup> Âty âwanikebygueduo igâtudylymo Deus tionmaendoem. Igâtudybyem idâlymo iwiy Se Oliveira Ekaram.

*Jesus Pedroram, “Azagâ tokalâ warâ ‘Kâuntuwâbyra urâ awâkâ’ keze âmâ” kehobyry  
(Mt 26.31-35; Lc 22.31-34; Jo 13.36-38)*

<sup>27</sup> Aituo tâtâlymo ume, Jesus aguely tynynonro modoram:

– Xirâ kopae idânârâ âwiense âmaemo. Wodokeze âmaemo. Deus itaumbyry sawo wâgâ iweniibem: “Kaneru sodo xyâduo, idânârâ eguy modo adapâeguyze” kewânmy Deus. Arâ ise ayedylymo.

<sup>28</sup> Yigueduo, kurâem itonze olâ urâ. Kurâem witombygueduo, waunroenlâ ise Galileiaram udâly – kely.

<sup>29</sup> Agueduo Pedro aguely:

– Tâwâlâ wâne ise idânârâ odokelymo. Urâ olâ ise odokeba – kely.

<sup>30</sup> Jesus olâ warâ eyam aguely:

– Xirâ kopae, aukuma igâtudyly azagâ ieto iraynâ, azagâ tokalâ warâ ise “Jesus kâuntuwâbyra urâ” myguely. Xirâ mâuntudyze wato kuru – kely.

<sup>31</sup> Pedro olâ agueondyly lelâ:

– “Jesus kâuntuwâbyra urâ” uguewâpyra ise urâ. Tâwâlâ ise agâlâ yâlymo. “Jesus kâuntuwâbyra urâ” ugupepa olâ ise urâ-ro warâ – kely.

Idânârâ Jesus eynynonro modo aguelymo lâpylâ:

– “Jesus kâuntuwâbyra urâ” xina kewâpyra lâpylâ ise – kelymo.

*Jesus Tunwym agâ Getsemanidâ aguehobyry**(Mt 26.36-46; Lc 22.39-46)*

<sup>32</sup> Aituo Jesus, tynnonro modo agâ âji Getsemaniram idâlymo. Myarâ saintybyem myani Jesus eyanmo aguely:

– Tarâlâ wao itaungâ, ikadaungâ warâ, Deus agâ agueze udâday – kely.

<sup>33</sup> Adâkebygueduo, Jesus Pedroram, Tiagoram, Joãooram warâ aguely:

– Yagâ âetaungâ; eagonro modo lelâ ise taunlo – kely.

Aituo eagâ idâlymo iwague nekâ. Târâ myani toenzepa kehoem Jesus itywandily.

<sup>34</sup> Aituo aguely:

– Toenzepa enra ytnru, yigueho ara kehoem. Tarâlâ wao itaungâ. Tykyzeba olâ itaungâ, ynyâ Deus agâ amyguehomoem – kely.

<sup>35-36</sup> Âdiempa waunroem idâly myani. Târâ âzeguhoam idyly, Deus agâ adâkehoem:

– Pabai, Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyze wawyly ize mato aralâ – kely.

<sup>37</sup> Deus agâ agueypyem, Pedro, Tiago, João warâ âxiân-hobyryram idâly, xykylymo ume. Xuagueânimobyryem, aguely Pedroam:

– Âkyly enra, Pedro. Agonrodo lâpylâ warâ xykylymo enra. Âdiempalâ ynyâ Deus agâ amyguehomoem âkyba mitoem nudupa kuru? – kely.

Aituo eyanmo aguely:

<sup>38</sup> – Nhaum, xuagueypyem lelâ itaungâ, inanaynmolâ warâ. Satanás umohomoem aienehonze keze. Deusram ekadaungâ, Satanás ize ato amânhepyra mitomoem. Deus eonhonru peba kulâ yagâ tâdâsenagazedily mâenmaenwâbyra ise âmaemo, yagâ mâsenagazedize mawylymo umelâ – kely myani Jesus.

<sup>39</sup> Aituo Jesus idâondily âdiempa waunroem, Deus agâ agueonse:

– Pabai, idânârâ adyese âmâ. Toenzepa kuru kâsenagazedily warâ izepa wâne urâ. Ize wato araba olâ aidyze wawyly, ize mato aralâ – kely.

<sup>40</sup> Ilâpyryem myani odopâondily Pedro, Tiago, João warâ eydâ atoram. Xykyndybymoem awyly nhedyly. Toenzepa myani xuedunumo, enuzehomoemba. Xykylymo tientuo, âduagueân-honlymo, aguely:

– Âkylymo kulâ enra. Inuzeba mataunaze, Deus agâ amyguehomoem – kely.

Tywypadylymogue adakepamo myani eyam.

<sup>41</sup> Aituo Deus agâ agueze idâondily. Ilâpyryem odopâondily tynnonro modo eydâ atoam. Nhuagueântondilymo. Aituo agueondily eyanmo:

– Âkylymo kulâ enra. Inuzeba lelâ mataunaze, Deus agâ amyguehomoem. Alâ! Iweâ lelâlâ yizepaom modo emaxi âduoaze urâ.

<sup>42</sup> Autaungâ. Inoro; eagâmo kydoxioda. Etaungâ. Awâkâlâ iegamerim saindily! – kely.

*Jesus nhawâtomobyry**(Mt 26.47-56; Lc 22.47-53; Jo 18.3-12)*

<sup>43</sup> Jesus aguely ume myani Judas saindily, Jesus eynnonrolâ kâinane mâkâ. Toenzepa kurâdo eynynâ Deus agâ aguewâni modo iwymârydo ingonotaymby modo, Moisés inweniby wâgâ enomedâni ingonotaymby modo, kywymârydo ingonotaymby modo warâ Judas agâ saindilymo. Espadague, segue warâ tâmatune kehoem saindilymo, Jesus sawâse.

<sup>44</sup> Taindilymo ume Judas eyanmo aguely:

– Uguondo konhonuguguly, mâkâlâ ise mâkâ, Jesuslâ. Tâwâlâ ise manwâdilymo. Kâzemakehonwâdaundâne – kely myani Judas.

<sup>45</sup> Aituo Judas saindily Jesus iopaji, aguely:

– Pymâ – kely.

Aguenripyryem Jesus iwaparydâ nhonugudyly; tataen-ho agâ adâito ara nhedaenkuly.

<sup>46</sup> Aituo Judas agâ idâwâtyby modo Jesus nhawâdilymo, nhemakâjilymo warâ.

<sup>47</sup> Jesus eynnonro ewy tydahoru ety odayba nhetyly. Kurâdo eynynâ Deus agâ aguewâni modo iwymâry kuru agâ tâwaneim inwantazagâdily.

<sup>48</sup> Jesus aguely kurâdo tawâse idâypy modoram:

– Espadague, segue warâ tâmase kehoem yawâse mâewylymo, tâmagazeim urâ-ro waunlo ara.

<sup>49</sup> Yawâtomu tuduzelâ keankâ saguhoem, kyâho pebalâ. Kopaelâgâembaba keankâ Deus ety idaseray, agâmo agueze wawyly. Târâlâ yawâpyra olâ mataunaguynre. Yawâto odayba awylygue keankâ ilâenlâ yawâpyra mawylymo. Tâwâlâ yawâtaungâ lelâ, âdaitybyemba wawyly umelâ. Arâlâma ywâgâ iwenibyem awyly Deus itaumbry awo wâgâ – kely.

<sup>50</sup> Jesus sawâtu, idânârâ kehoem Jesus eynnonro modo nhodokelymo, âwiendilymo.

<sup>51</sup> Salokuzenomo BOH waunlogue tâtyeim lelâ myani Jesus nhataymo nhapygue idâim. Mâkâ sawâse kewânmo lâpylâmy.

<sup>52</sup> Tâty tywogonro wâgâ tadawâhoduo, âzetyguewâm olâmy; tâtyembalâ myani âwiendily.

*Jesus judeu domodo iwymârydoram satobyry*  
(Mt 26.57-68; Lc 22.54-55,63-71; Jo 18.12-14)

<sup>53</sup> Ilâpygueduo, Jesus nhadylymo kurâdo eynynâ Deus agâ aguewâni modo iwymâry kuru etyram. Idânârâ pymâ tynrunem modo târâ âtâdyguybyem awylymo. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, idânârâ uguondo modo tynrensem warâ myani tonlo.

<sup>54</sup> Myarâ idâdaymo, âgânâ kehoem Pedro idâly, kurâdo eynynâ Deus agâ aguewâni modo iwymâry kuru ety idaseraji. Tâgawânse, tâkaze warâ myani peto opaji, guarda domodo agâ âunse.

<sup>55</sup> Kurâdo eynynâ Deus agâ aguewâni modo iwymârydo, idânârâ judeu domodo iwymârydo, Moisés inweniby wâgâ enomedâni modo warâ myani âjigie aguelymo âtâ oday:  
– Azagâ atay, azagâ tokalâ warâ atay kurâ domodo ewy kuduinre, âzekiba lelâ Jesus wâgâ ewentâniem, kyâen-hon-hoem – kelymo.

Arâ ize tatomo ara kurâdo ewy nepyramo olâ.

<sup>56</sup> Toenzepa mawânkâ kurâdo Jesus ewentâze kewâni modo. Iozepa kulâ aguewâdilymo. Âikâ âikâ warâ kulâ aguelymo.

<sup>57</sup> Ilâpyryem tonlo modo ewy saudily pymâdo enanaym, Jesus ewentâze kewâdily.

<sup>58</sup> – “Deus ety uguondo modo itâdyby sakalagewe urâ. Azagâ† emedyly idyly ara saunâtonze urâ” kely, xina nidadâ – kelymo.

<sup>59</sup> Toenzepa kurâdo Jesus ewentâni, “Deus ety sakalagewe urâ” kehobyry wâgâ wâne. Nâzeinwân-hombamo olâ, âzekiba aguenri peba awylygue.

<sup>60</sup> Aguelymo idanipyryem, kurâdo eynynâ Deus agâ aguewâni modo iwymâry kuru saudily idânârâ tâzenanaym, Jesus nhapâiguelly:

– Âwâgâ aguelymo midatailâ. Âkealâ, âkealâba inwentâdomo awyly ise amygueho? Âdalâ myguepaka ise âmâ mâsemaguehoem? – kely.

<sup>61</sup> Jesus olâ âdakepa myani tâsemaguehoem. Aituo kurâdo eynynâ Deus agâ aguewâni modo iwymâry kuru nhapâiguelly:

– Messiaslâka âmâ, Deus Ingonotyby? Deus koendonro imerylâ âmâ? – kely.

<sup>62</sup> Aituo Jesus in-hoguly:

– Messiaslâ urâ, Deus imerylâ warâ. Xirâpygueduo ekadybyem ise urâ, Deus ton-honreim ahoru eynynâ. Eagâ ise pymâem wawyly. Eunu duay ise Deus eydâpa kêewyly – kely Jesus.

<sup>63</sup> Toenzepa kurâdo eynynâ Deus agâ aguewâni modo iwymâry kuru iewiâpadyly, “Deus imerylâ urâ” Jesus kely tindatuo. Tyewiâkygue tâty tywogonrolâ nhaunguely. Pymâdo târâ âtâdyguywâdyby modoram aguely:

– Ânguy kingâsedondaymba ise kurâ, Jesus ewentâniem.

<sup>64</sup> Deus nunâguedai awâkâ Jesus. “Deus imerylâ urâ” keduo, Deus agâ âzekiba tawylylâ agueho. Ânguy kiunhotaymba ise kurâ, ewentâniem. Midataimolâ, Deus wâgâ aguely. Âdara iedylyka inanjimo inakanhe kehobyry wâgâ? – kely.

Aituo pymâ domodo aguely:

– Uguondo inakai kulâ awâkâ! Xyâly lelâ awâkâ! – kelymo.

<sup>65</sup> Aituo nhedakudâdilymo, nhenuahulymo, nhapiogulymo nhedylymo.

– Ânguyka apiogurim? Apiogüimbyry xutugâ, âkealâ kuru Deus Ingonotyby matay – kelymo.

Ilâpyryem guarda domodoram nhagamelymo. Guarda domodoram âjiwapagainholy, adapioguly âieholy myani.

*Pedro, “Jesus kâuntuwâbyra urâ” kehobyry*  
(Mt 26.69-75; Lc 22.56-62; Jo 18.15-18,25-27)

<sup>66</sup> Jesus pymâdo enado atay, Pedro târâ taseraylâ. Pekodo târâ tâwaneim ewy Pedro einkâ sakadyly.

<sup>67</sup> Pedro âundyly nhedyly. Koendâ kehoem enipyryem aguely:

– Jesus Nazaré donro eynynonro modo ewylâ âmâ – kely.

<sup>68</sup> – Mâkâ mâkeba urâ. Kâuntuwâbyra urâ awâkâ. Ânguyka awâkâ Jesus, iwâgâ amygueho? – kely myani Pedro.

Agueypyem, pyanta taseraji tâdâwântoram Pedro idâly. Mârâ umelâ myani aukuma igâtudyly.

<sup>69</sup> Eagonro pekodo târâ tâwaneim modo ewy, Pedro tientuo, iwaguepaom modoram aguely:

– Jesus eynynonro ewy awâkâ uguondo – kely.

† 14:58 Nota de pé Mateus 12.40dâ egâ.

<sup>70</sup> Mâkâ pekodo aguely tindatuo, Pedro agueondyly:

– Âdykâ Jesus eynynonroem witaymba urâ. Kâuntuwâbyra urâ awâkâ – kely.

Ilâpyrem tonlo modo agueondyly:

– Jesus eynynonrolâ âmâ. Tutuze xina, Galiléia donro mawyly, earamolâma amyguely – kelymo.

<sup>71</sup> Aituo Pedro agueondyly:

– Mâkâ mâkeba urâ! Kâuntuwâbyra urâ awâkâ uguondo amyguehomo! Tutuze Deus âkealâ auguely awyly. Tâwâlâ ise Deus ienagazenehonly, uguewâdyly kulâ-ro watay – kely.

<sup>72</sup> Pedro aguely umelâ, aukuma igâtudondyly. Tindatuo Pedro, Jesus tyam aguehobyry nhenanâguely, “Xirâ kopae, aukuma azagâ igâtudyly iraynâ, azagâ tokalâ warâ ise ‘Jesus kâuntuwâbyra urâ’ myguely” kehobyry. Aguehobyry tiananâgueduo, toenzepa Pedro âjityendyly, ohogüendyly warâ.

## 15

*Pilatosram Jesus satobyry*

(Mt 27.1-2,11-14; Lc 23.1-5; Jo 18.28-38)

<sup>1</sup> Emetybyem myani pymâ tynrentuneim modo âtâdygyuly: kurâdo eynynâ Deus agâ aguewâni modo iwymârydo; Moisés inweniby wâgâ enomedâni modo; judeu domodo iwymârydo, akaemo Sinédrio kelygue tâzekeim; iwymâry modo warâ. Âtunâguedylymo, âdara kuru Jesus tyâen-honlymo awyly tiuntuhomoe. Guarda domodoram nhekâjien-honlymo, nhaleholymo, nhegamehonlymo warâ Pilatosram, pymâ Romadâpa igonotybyrna.

<sup>2</sup> Jesus tânado atay, Pilatos nhapâiguely:

– Judeu domodo iwymâry kuruka âmâ? – kely.

Jesus in-hoguly:

– Mâkâlâ urâ, amygueho ara – kely.

<sup>3</sup> Kurâdo eynynâ Deus agâ aguewâni modo iwymârydo toenzepa myani Jesus nhewentâdylymo.

<sup>4</sup> Aituo Pilatos aguely Jesusram:

– Akaemo iwentâdo midatailâ. Amyguehonly mâin-hogubaka ise âmâ? – kely.

<sup>5</sup> Jesus olâ âdakepa. Toenzepa kehoem Pilatos âseguâdâdyly, Jesus tâsemaguehoem âdakepa awylygue.

*“Nigue lelâ awâkâ Jesus” Pilatos kehobyry*

(Mt 27.15-26; Lc 23.13-25; Jo 18.38-19.16)

<sup>6</sup> Páscoa etyguedyly ume, aunlolâ mykâinane Pilatos etadâdyby ewy tokalâ nhetaguehonly, kurâdo nhekadybylâ.

<sup>7</sup> Ilâ ume tâlâ myani uguondo kadeia oday tâtagueim, Barrabâsgue tâzekeim. Târâlâ mâkâ, tagonrodo agâ, pymâ Roma donro agâ âjizepa awylymogue; kyâim awylymogue warâ nhetadâdybymo.

<sup>8</sup> Agui kurâdo idâwânmy Pilatosram ekaze:

– Âty ume aunlolâ ani etadâdyby ewy mâentaguehonly. Uguondo xina etaguedyze ato etaguehongâ – kelymo.

<sup>9</sup> – Âwymârymo Jesus âdara kânhenehonlyka ize matomo? Kâinmoen-hondyzeka âmaemo? – kely Pilatos.

<sup>10</sup> “Ekâjiguen-hongâ” kelymo-ro waunlo ara myani, enanaji. Tâsewânilygue kulâ akaemo kurâdo eynynâ Deus agâ aguewâni modo iwymârydo, Jesus tyam nhegameyly awyly, tutuze myani Pilatos.

<sup>11</sup> Kurâdo eynynâ Deus agâ aguewâni modo iwymârydo toenzepa kurâdoram aguelymo:

– Barrabâs nhetaguehoem ekadaungâ Pilatosram. Jesus xyâhoem ekadaungâ-ro warâ – kelymo.

Akaemo aguehobyry ara kurâdo aguely.

<sup>12</sup> Aituo Pilatos nhapâigueondyly:

– Merâ uguondo “Pymâ” myguehomo âdakânhedylyka ize matomo? – kely.

<sup>13</sup> Aituo adaenkelymo:

– Kruz wâgâ sakâjien-hongâ iguehoem! – kelymo.

<sup>14</sup> – Âdaituo? Ienanaji, âda nitaymba merâ iguehoem – kely Pilatos.

Agueduo olâ idânârâ adaenkelymo ton-honre kehoem:

– Kruz wâgâ sakâjien-hongâ iguehoem! – keondylymo.

<sup>15</sup> Kurâdo tionmazeândyze myani Pilatos. Awylygue Barrabâs nhetaguehonly, nhekado-mobyry ara. Ilâpyrem Roma donro sodadu domodoram aguely:

– Jesus sapioguwâdaungâ. Ilâpÿryem ise mandylymo, kruz onwa sakâjize-ro warâ, iguehoem – kely Pilatos.

*Sodadu domodo Jesus âwankuem nhetobry*  
(Mt 27.27-31; Jo 19.1-3)

<sup>16</sup> Ilâpÿryem sodadu domodo Jesus nhadyly Pilatos ety idaseraji. Idânârâ sodadu domodo târâ âtâdyguylimo, Jesus âwankuem tientomoem.

<sup>17</sup> Âtâ BOH waunlo tapabileingue nhetydâdylymo, pymâ âzetydâdo ara, âwankuem tientomoem. Tygyreim koroaem xygatyby myani mâkâ nhangahu onwa nhekylymo.

<sup>18</sup> – Tynrenseim lelâlâ âmâ, judeu domodo iwymâry kuru! – kelymo, âwankuem nhedylymo.

<sup>19</sup> Edakudâmâmomy, segue nhangatainwâmomy warâ. Enado âzeguhoam idylymo, pymâ enado adâitomo ara.

<sup>20</sup> Âwankuem ienipÿryem âtâ BOH waunlo tapabileim Jesus wâgâpa nhetylymo. Ety iwogonropyrguelâ nhetydâdylymo. Ilâpÿryem nhadylymo kuohoram, kruz se xygatyby onwa sakâjize.

*Jesus kruz wâgâ iguehoem sakâjihobry*  
(Mt 27.32-44; Lc 23.26-43; Jo 19.17-27)

<sup>21</sup> Ânwa oze tâtâdaymo, uguondo Simão agâ oxidylymo. Xidadâ Cirene donro mâkâ, Alexandre, Rufo warâ nhunwym. Xidadâ odaji saindyly myani poji ananobryryem. Tiontuo, sodadu domodo kruz Jesus tiankâjiho eyam nhanânehonlymo.

<sup>22</sup> Golgotaram myani Jesus nhadylymo. (Iwy Calvariogue tâzekeim lâpylâ, tâjiangahubry ara enurunogue.)

<sup>23</sup> Târâ vinhu mirra agâ ietybygue sakuize kelymo, kruz onwa takâjily newânebyra itoem wâne, nenypa olâ.

<sup>24-27</sup> Nove horas atay myani kruz onwa nhakâjilymo. JESUS MERÂ, JUDEU DOMODO IWYMÂRY KURU kely iweniby sakâjiwânmy Jesus nhangawaym kruz wâgâ. Idânârâ âdaituo Jesus nhakâjilymo awyly xutuhoem mârâ anhedilymo. Ilâem lâpylâ azagâ tâmagaduneim modo nhakâjilymo. Tokalâ Jesus ahoru eynynâ, eagonro pâem eynynâ warâ nhakâjilymo. Sakâjirimbyryem, Jesus ety iwogonropyry nhepajiwâdylymo. Dadu nhamelymo myani, ânguy, ânguy warâ Jesus ety iwogonropyry emakeim awyly tiuntuhoem.

<sup>28</sup> [Deus itaumbry saguho wâgâ iweniby ara kehoem aidylymo. “Mâkâ Deus Ingonotyby inakanhe kehoem aityby ara ise âzenagazeoly” kewânmy.]

<sup>29</sup> Tâinkâ sakadaynrim modoram âwankuem âieholy. Angakânilymo, inwykelymo warâ.

– “Deus ety sakalagueze urâ” myguema. “Azagâ emedyly\* idyly ara saunâtonze urâ” mygue warâ.

<sup>30</sup> Ton-honreim lelâlâ matay, tâwâlâ âsemaguegâ! Kruz wâgâpa adakâjiguegâ, âytâguygâ warâ! – kelymo.

<sup>31</sup> Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ âwankuem nhedylymo, aguelymo:

– Âkelo modo nemake, tâwâlâ nâsemagueba olâ!

<sup>32</sup> “Messias urâ, Deus Ingonotyby” nygue. “Âwymârymo kuru urâ” nygue. Kruz wâgâpa xytâguyly watay, Messiaslâ awyly einwânse kurâ – kelymo myani.

Akaemo azagâ tâmagaduneim modo eagâ sakâjiwâdyby modoram âwankuem âieholy lelâ lâpylâ.

*Jesus iguehobry*  
(Mt 27.45-56; Lc 23.44-49; Jo 19.28-30)

<sup>33</sup> Kuotatay idânârâ iamadyly. Iamapygueduo trêz horas lelâ myani iamu.

<sup>34</sup> Azagâ tokalâ warâ horas ituo, Jesus adankely:

– *Eloi, Eloi, lemâ sabactani?* – kely. (“Pabai Deus, âdaituoka wodokely?” keze aguely.)

<sup>35</sup> Tonlo modo, koendâ nidapyramo tawylgyue, Elias ingâsedyly ara nhenehonlymo myani, Deus eynynâ agueim lâpylâ mykâinane mâkâ. Aituo aguelymo:

– Idataungâ. Elias awâkâ ingâsedyly, tâmakehoem – kelymo.

<sup>36</sup> Akaemo ewy egatudyly myani, esponja, vinhu nhewantybygue ikuize. Tinkuibygue-duo, se iopiry onwa nhekâjily. Jesus nhugakâin-hoem wâne nhuduly. Aituo eagonro modo aguely:

– Ine wao. Elias ingâseguyly. Elias kruz wâgâpa etyze âewyly kyzene wao – kelymo.

<sup>37</sup> Aituo Jesus adankenondyly ago kehoem, tyiguehoem kuru.

\* 15:29 Nota de pé Mateus 12.40dâ egâ.

<sup>38</sup> Iguely ume kehoem Deus ety oday Âji Tynrenseim xuahuho tyxieim iotagâ adaguely kaynonrobyryem, on-yam; Deus, kurâdo agâ tygue ito myani mârâ xuahuru.

<sup>39</sup> Târâ Jesus sakâjihobyry ipebaylâ myani sodadu iwymâry. Jesus iguely emâmy. Iguely tientuo aguely:

– Deus imery lelâlâ keanra enra merâ uguondo! – kely.

<sup>40</sup> Tâlâ myani târâ pekodo modo, iwaguelâ olâ nhedylymo. Maria, (Magdala donro), Salomé, Maria (José, iukonolâ Tiago warâ ise), eagonro pekodo modo warâ lâpylâ iduanomo.

<sup>41</sup> Xirâ modo iraynâ, Galiléia eynynâ atay, tâlâ tatogue Jesus emawyadânibyry akaemo pekodo modo. Tâlâ lâpylâ târâ pekodo modo Jesus nhapyguenibyry modo Jerusalémram saintay.

*Jesus eguepybyry tuhu imâsedo tâtaqueim odaji nhetadâdomobyry  
(Mt 27.57-61; Lc 23.50-56; Jo 19.38-42)*

<sup>42</sup> Tâzekobyzeguehoem todohondo âwanikely myani.

<sup>43</sup> Iguandyly iraynâ myani José idâly tâegane kehoem pymâ Pilatos agâ agueze. Xidadâ Arimatéia donro myani mâkâ. Judeu domodo iwymâry Sinédrio kelygue tâzekeim ewy myani. Idânârâ kurâdoram tâdutuoze, tâdyren-honze warâ mykâinane. Idânârâ kurâdo iwymâryem Deus idyly sainto tânuenze mykâinane. Pilatos etyram saintyly, aguely:

– Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtaqueim odaji kâenkanâdoem. Tâwâlâ kâyntâguyândyly? – kely.

<sup>44</sup> “Jesus nigueaki” kely tindatuo, Pilatos neinwâmpyra myani. Awylygue sodadu domodo iwymâry Gólgota donrobyry ingâsedyly. Sodadu domodo iwymâry saintuo myani nhapâiguely:

– Âkealâ “Jesus nigueaki” kehonly? – kely.

<sup>45</sup> Aituo sodadu domodo iwymâry aguely:

– Âkealâ, nigueaki lelâlâ – kely.

Aituo Pilatos Joséram aguely:

– Tâwâlâ, Jesus eguepybyry sakâ tuhu imâsedo tâtaqueim odaxi – kely.

<sup>46</sup> Agueduo, José idâly. Âtâ tapaileim linhugeto tâwânseim nhanâdyly. Ilâpyryem Jesus eguepybyry kruz wâgâpa nhytâguyândyly, intuwynly warâ. Ilâpygueduo, eguepybyry nhetadâdyly tuhu imâsedo tâtaqueim esagueyby odaji. Myarâ ienipryem, nhenahunlymo tuhu imâsedogue.

<sup>47</sup> Azagâ pekodo Jesus eguepybyry sadyly etaunmâmomy, Maria (Magdala donro), Maria (José ise) warâ. Âdykâ Jesus eguepybyry etadâdyly awyly emâmomy.

## 16

*Jesus kurâem itondobyry  
(Mt 28.1-8; Lc 24.1-12; Jo 20.1-10)*

<sup>1</sup> Tâzekobyzegueho iguampygueduo Maria Magdala donro, Salomé, Maria (Tiago ise) warâ idâlymo uriza tyânrangeim sanâse, Jesus eguepybyry onwa tientomoem, tâzewenrymo ara.

<sup>2</sup> Kopaelâgâem, pealâ idâlymo Jesus eguepybyry etadâdobyryam.

<sup>3</sup> Ânwa oze tâtâday myani âjjigue xunâgumo:

– Pekodo modo lelâ kurâ. Ânguyka ise tuhu imâsedo tâtaqueim enahun-hombyry etyim? – kelymo.

<sup>4</sup> Tuhu imâsedo awylygue arâ aguelymo. Iwaguepa saintybyem olâ tâtaqueim enahun-hobyry tuhu imâsedo ejkiyebyem nhedylymo.

<sup>5</sup> Aituo myani Jesus eguepybyry etadâdobyryram âwândylymo. Tâwântaymo, salokuzenomo ekadyby iwaguelâ taboru eynynâ nhedylymo. Âtâ tapekeingue âzetydâdybyem awyly. Tientuo, pekodo modo toenzepa âseanedyly.

<sup>6</sup> Mâkâ olâ myani aguely:

– Tâseanezeba itaungâ. Tutuze urâ, Jesus Nazaré donro mâwinlymo awyly, kruz onwa sakâjiby. Tarâpa olâ mâkâ. Ipa, kurâem nitondai! Etaungârâ etadâdobyryam. Ânguy lâpeba tarâ.

<sup>7</sup> Idâwâtaungâ, Pedro domodoram egatuze: “Wauvroenlâ ise Galileiam idâly. Târâ ise âwânwândylymo, mâendylymo warâ aguehobyry aralâ” myguelymo ise eyanmo – kely.

<sup>8</sup> Aituo pekodo modo egasely. Inepa kehoem Jesus eguepybyry etadâdobyry nhodokelymo. Âseguâdâdylymo, toenzepa kehoem adapânilymo, tâseaneduo. Xidadâram todopâdylymo ume ânguyram negatubamo tientyby modo, tindatyby modo warâ. Toenzepa lelâlâ ekuâgumo.

*Jesus Maria Magdala donroram âepanâguehobyry*

*(Mt 28.9-10; Jo 20.11-18)*

<sup>9</sup> [Domingo pealâ, Jesus kurâem itombygueduo, Maria Magdala donro waunroem kuru eni. Iweâpa xirâ modo aidyly iraynâ, Jesus mâkâ pekodo odano sete lelâ kadopâ tyânkyze myani.

<sup>10</sup> Jesus kurâem itondybyem awyly tientuo, idâly eataen-ho modoram Jesus kurâem itondybyem awyly egatuze. Toenzepa myani itynrumo, eogunrumo warâ.

<sup>11</sup> Eyanmo saintybyem, Maria Magdala donro aguely:

– Jesus kurâem nitondai! Urâ lelâlâ setai – kely.

Agueduo neinwâmpyramo.

*Jesus azagâ tâinwânirram âepanâguehobyry*

*(Lc 24.13-35)*

<sup>12</sup> Îlâpyryem azagâ Jesus einwânni modo idâly eagonro âtâ anaxi. Ânwa oze awylymo ume, Jesus âepanâguely eyanmo. Saguhoem tientobyry arapa tiendyly awylygue myani ânguy nutuba mâkâlâ awyly.

<sup>13</sup> Jesus lelâlâ mâkâ awyly tiuntuduomo, Jerusalémram odopâdylymo tagonro modoram, Jesus tientobyry egatuze. Akaemo azagâ aguely neinwâmpyramo lâpylâ.

*Jesus onze tynynonro modoram âepanâguehobyry*

*(Mt 28.16-20; Lc 24.36-49; Jo 20.19-23; At 1.6-8)*

<sup>14</sup> Kopae onze lelâ uguondo modo Jesus eynynonro âjigüe âwinduadylymo ume, Jesus âepanâguely eyanmo. Aituo aguely:

– “Jesus kurâem nitondai. Xina netai kurâem itondyby” kehondulâ mâinwâmpyrya lâgâlâ âmaemo. Tâegane kehoem âmaemo, mâindatybyymo mâinwântomoem – kely.

<sup>15</sup> Adâkebygueduo, agueondyly:

– Idâwâtaungâ tâinkâ lelâba Deus itaumbry idânârâ kurâdoram agueze.

<sup>16</sup> Warâ aguewâtaungâ: “Jesus mâinwântuomo, Jesus einwânniem mawylymo mâenehonomoem batiza âiehowâdaungâ, Deus imakezemo, aunloenlâ eagâ mitomoem. Jesus mâinwâmpyrya âmaemo watay, Deus eydâ atoram aintaymba ise âmaemo.” Warâ idânârâam aguewâtaunda.

<sup>17</sup> Yeinwântaynrim modoram won-honru xuduze urâ, adyesenry modo kehoem anhetomoem. Won-honrugue kurâdo odaypa kadopâ nhânkyze âmaemo. Won-honrugue tâjitanru âdykâ tydasenry agueze âmaemo.

<sup>18</sup> Âgâu manwâdylymo, venenu mâenylymo warâ watay, âda mitaymba ise âmaemo. Won-honrugue tâwânuneim modo kua iese âmaemo, imarymogüe MÂ’ mânhetuomo – kely Jesus.

*Jesus Deus eydâ atoram âkuhobyry*

*(Lc 24.50-53; At 1.9-11)*

<sup>19</sup> Tynynonro modo agâ aguepygueduo, Kywymâry Jesus adaholy Deus eydâ atoam. Deus ahoru eynynâ ekadybyem awyly, eagâ pymâem tâitoem.

<sup>20</sup> Jesus Deusram idâpygueduo myani eynynonro modo Deus itaumbry egatuze idâlymo. Idânârâ âtâ anakâ tâtâhobyrydâ mykâinane aguelymo Jesus wâgâ. Jesuslâ eon-honrumo xuduim; tywâgâ unâ iwâkuru nhegatudaymo, mâkâlâ eon-honrumo xudunri adyesenry modo anhetomoem. Mârâ anhetuomo, kurâ domodo tutuze âkealâ aguelymo awyly.]

Alâ kulâ.

Marcos

## LUCAS

### Unâ Koendonro Jesus Cristo Wâgâ Lucas Inweniby

Xirâ livru wâgâ inwenily Lucas nhangahu odaji iemâmy Deus. Awylygue Deus itaumbryrylâ xirâ mâkâ nhegatyby. Médico myakâwândy mâkâ, gregu, judeu keba.

Xirâ livru wâgâ Jesus Cristo iazehobyry kiuntuly. Kâmakerim ise-em tawyly tiuntuduo, Maria igâtudobyry tutuze kurâ xirâ wâgâ. Poji anaym tâguy kaneru eni modoram “Belémâ imakerinmo niazeaki” anju kehobyry tutuze kurâ xirâ wâgâ warâ.

Jesus anhetyby, nhenomedâdobyry warâ xirâ wâgâ kiuntuly. Xirâ pape wâgâ tytainze kurâ, Jesus turâ modo nhenomedâdobyry, âdara Deus agâ aguelymo awyly warâ.

Capítulo 15dâ tâgatuze lâpylâ kaneru xuzatyby soenkeyby wâgâ, moeda xuzatyby soenkeyby wâgâ, tâjimery, tunwym sodokerimbyry, eyanlâ odopâdyby wâgâ warâ, Jesus aguehobyry. Xirâ unâ Jesus nhegatyby modo, Jesus kieinwântuo lelâ Deus iomazely awyly kiuntuhoem, aguely.

Tutuze lâpylâ kurâ, Deus izepa ato adientuo, Zaqued itywandobyry, inakanhe adâidyly imohobyry warâ. Warâ myakâwândy Jesus aguely: “Deus agâpaom ese, emakeze warâ kêwely” kely.

Jesus iguehobyry wâgâ, igueypyem kurâem itondobyry wâgâ warâ tytainze kurâ, xirâ pape wâgâ.

#### *Aguely adaguhô*

<sup>1</sup> Pymâ Teófilo, xirâ pape wâgâ âdaise Jesus onro anaym atobyry, anhetyby modo warâ wâgâ mâuntuhoem waunroem kâinwenily mâkeba xirâ. Eagonro modo iweniwânmmomy lâpylâ anhetaymby modo wâgâ.

<sup>2</sup> Saguhoem Jesus aidyly etaynrinbyry modo agâ âtunâguemâmomy. Egatuhobyry ara pylâ iwâgâ aguelymo, inwenilymo-ro warâ.

<sup>3</sup> Urâ lâpylâ, kura kehoem koendâ aitaymby modo ara kâuntuhoem awidyly. Ienanaji, koendâ âyam kâinwenily, koendâ kehoem ârutoem Jesus aitobyry wâgâ, aguehobyry wâgâ warâ, adaguhobyrylâ, xypyryam.

<sup>4</sup> Toenzepa Jesus wâgâ tâzenomedâoaze âmâ. Xirâ kâinwenily olâ, âkealâ kuru egary awyly mâuntuhoem.

#### *“João Batista iazely ise” kehobyry*

<sup>5</sup> Saguhoem kâinwenily ise, Zacarias, iwydylâ warâ aitomobyry wâgâ. Herodes, judeu domodo eonronru anaym pymâem awyly ume tâlâ myakâwâm uguondo Zacarias keho, iwydylâ Isabel warâ, saguhoem kurâdo eynynâ Deus agâ aguewâni modo ipemugubyry myakâwâm mâkâ. Eagâ Zacarias âsewaniho myakâwâm “Abias Ipemugudo” kelygue tâzekeim.

<sup>6</sup> Zacarias, Isabel warâ koendâ mykâinane aidylymo Deus ize ato ara lelâ. Judeu domodoram Deus aguehobyry modo ara lelâ mykâinane aidylymo. Tâwentâzeba tâitomoem âdy inakai aniempyramo mykâinane.

<sup>7</sup> Tymeguebamo myakâwâm, imezerim keba Isabel awylygue, agaitoem iso, aripiem iwydylâ warâ awylymogue.

<sup>8-9</sup> Deus ety oday tâwanu aiese myakâwâm Zacarias, âsewaniho oday awylygue. Akaemolâ mykâinane tagonrodo iduakeim âdylâ aieniem, tâwâlâ, tâwâlâ warâ tâwanu xuduypy anhetomoem. Zacarias myakâwâm induakelymo se atuby tyânângueim Deusram egameyby iaduâniem.

<sup>10</sup> Deus ety odaji egawândyly myakâwâm se satuby tyânângueim modo iaduânse. Ilâ iaduântay mykâinane kuoho kurâ domodo Deus agâ aguely.

<sup>11</sup> Aituo myakâwâm anju kaynâpa âetyby Zacariasdâ âepanâguely. XYDYK warâ myakâwâm, mesa se satuby tyânângueim iaduânto sahoru eynynâ.

<sup>12</sup> Mâkâ tientuo myakâwâm Zacarias toenzepa âseanedyly. Âda tâidyly nutuba idyly.

<sup>13</sup> Aituo myakâwâm anju aguely eyam:

— Tâseanezeba ikâ, Zacarias. Deus amyguely nidatai. Mâenkadyby ara aiese lelâ. Âwydylâ adamyze lelâ. João kelygue ise mâenzetâdyly-ro warâ.

<sup>14</sup> Toenzepa ise iazeduo mohomaendyly, kurâdo ohomaenze lâpylâ warâ.

<sup>15</sup> Deus xurâem, uguondo tywyneim ise mâkâ. Vinhu enynri keba, toku ikaji ini keba warâ ise mâkâ. Niazepe awyly umelâ ise Deus Ispiritury Koendonro eagâ awyly.

<sup>16</sup> Israelita domodo Kywymâry Deus nheinwântoem aienehonze warâ.

<sup>17</sup> Kurâ domodo koendâ iese Kywymâry sainto iray. Deus itaumbryry egaturin-em iesemo warâ. Deus Ispiritury myakâwâm Elias eon-honru tuduze, myara ise âmery agâ awyly,



tâjimersy modo tunwym agâ koendâ itoem aiese. Deus einwântânrybyry modoram, Deus einwânehonze. Warâ ise Israel donro modo koendâ nhedyly, Kywymâry saindily iray – kely myakâwâm anju Zacariasram.

<sup>18</sup> Aituo myakâwâm Zacarias aguely anjuam:

– Xina nimezewâbyra ise! Agaityoem urâ, aripiem ywydy warâ! – kely.

<sup>19</sup> Aituo myakâwâm anju aguely:

– Gabriel urâ. Kopaelâgâembaba Deus agâ wawyly emaryem. Mâkâlâ âyam ugononi, xirâ unâ iwâkuru auguehoem.

<sup>20</sup> Auguely mâinwâmpyra wâne âmâ, aito odaxi ituo olâ auguehobyry aise. Mâinwâmpyra matobyry wâgâ âmery iazeho odaxi ise tytarembe mawyly – kely.

<sup>21</sup> Xunâgumo ume toenzepa myakâwâm kurâdo âtdygybyem awyly kuoho, Zacarias egasely inwânwânse. Âjigüe aguelymo:

– Iweâpa idyly enra Zacarias se satuby iaduântodâ – kelymo.

<sup>22</sup> Egaseybyem agueze kewâdyly wâne eagâmo; tytarembe itybyem lelâ. Tâmaryguelâ egatuze kewâdyly târâ adâitobyry. Aituo myakâwâm aguelymo:

– Deus galâ awâkânra târâ se satuby tyânângueim iaduântodâ nâepanâgueagui – kelymo.

<sup>23</sup> Deus ety oday tâwanu ewanikeimbyryem myakâwâm Zacarias tâtyram idâly.

<sup>24</sup> Iweâpa nipyralâ myakâwâm iwydy Isabel adamyly. Cinco nunâ ara lelâ myakâwâm âdyam negaseba awyly.

<sup>25</sup> Alâ mykâinane tyangahu oday xunâgu:

– Koendonro lelâlâ awâkâ Pymâ Deus urâem! Awylygue iwerâ kâpybazebyra wawyly, tymegue wawylygue; ânguy unâguebyra ise warâ – kely.

*Deus eydâpa “Jesus iazely ise” kerim âetobyry*

<sup>26</sup> Seis nunâ Isabel adamybyem awyly ume myakâwâm, Deus tâmary anju ingonodyly unâ enese xidadâ imeimbyry Galiléia donro Nazaréram. Gabriel myakâwâm mâkâ Deus emary ezedy.

<sup>27</sup> Mariaram myakâwâm Deus itaumbyry nhadyly. Âwynsaundo myakâwâm mâkâ, ânguy nhuniby keba, José agâ ohogüinrim kehobyry, pymâ Davi iwerypyry agâ.

<sup>28</sup> Aituo myakâwâm anju Mariaram idâly, aguely:

– Tuomare ikâ, Maria. Kywymâry Deus agâlâ, koendonro âmâem adientoem – kely.

<sup>29</sup> Anju aguely tindatuo, Maria âpaunzedily âda tâidyly nutuba idyly, âseguâdâdyly. Âdakeze mâkâ aguely tiuntudyze.

– Âdaituoka arâ amyguely? – kely.

<sup>30</sup> Aituo anju aguely:

– Tâseanezeba ikâ, Maria – kely.

– Deus induakeyby âmâ, koendâ kehoem nhetoem – kely.

<sup>31</sup> – Adamyze âmâ. Jesus kelygue ise âmery mâenzetâdyly.

<sup>32</sup> Aunlo kulâ keba ise mâkâ, uguondoem ituo. “Deus ton-honreim imery” ise mâkâ. Pymâem ienehonze Deus. Tydamudo Davi pymâem atobyry ara ise âmery pymâ tâgareim-em awyly – kely.

<sup>33</sup> – Jacó iweompyry modo iwymâryem, enimoem warâ lâpylâ ise. Aunlolâ ise pymâem awyly, typygueim keba – kely\*.

<sup>34</sup> Aituo Maria anjuram aguely:

– Âdaraka ise awârâ aidyly? Âdykâ mawânkâ uguondo ynanâbyra – kely.

<sup>35</sup> Aituo anju aguely:

– Deus Ispiriturygue ise madamyly. Deus tâgareim Ispiritury onwa âese âmezehoem. Awylygue ise iamudo iazeim “Kywymâry Deus Imery” kelygue ezeku. Deus imery tawylygue ise, Deus ize ato lelâ anhekily – kely.

<sup>36</sup> – Apemugu Isabel agâ aityby enanâguegâ. “Nimezewâbyra ise awâkâ” kehobyry mâkâ. Iwerâ olâ aripienlâ tymegue, seis nunâguetogue.

<sup>37</sup> Âdy adiendyse tato adyese lelâ Deus – kely.

<sup>38</sup> Aituo Maria aguely:

– Âdy Deus aidyse ato tâwâlâ ise yagâ anhedily ize tato aralâ – kely Maria.

Maria aguepygueduo anju odopâdyly Deus eydâ atoram.

*Maria, Isabel etyram idâhobyry*

<sup>39</sup> Iweâpa nipyralâ Maria ohondily, xidadâ imeimbyry iwy donroram Judéia yan-yam tâtâhoem, Zacarias, Isabel warâ etyram.

<sup>40</sup> Saintrybyem, egawândyly. Typemugu Isabel nhedaenkuly.

\* 1:33 Israel lâpylâ Jacó ezedy eagonro. Awylygue iweompyry Israelitasgue âzezekeoly.

<sup>41</sup> Maria, Isabel nhedaenkudaylâ myakâwâm Isabel ioday iamudo âjitâgüily. Deus Ispiritury Isabel enomery nhuduly, waunroem aitaynrin modo wâgâ aguehoem.

<sup>42</sup> Aituo Isabel aguely Mariaram:

– Deus induakeyby âmâ pekodo modo enday, koendâ kehoem nhentoem, iamudo iazenri lâpylâ koendâ kehoem tientoem warâ.

<sup>43</sup> Odaypa iazeim iamudo ise ton-honreim kuru, ymery takaze kehoem. Tuomare olâ urâ, âmâ Kâmakerim ise ietyram mâetobyry wâgâ.

<sup>44</sup> Tedaenkuly tindatuo, iamudo niomazeagui woday, nâjitâgüiagui warâ.

<sup>45</sup> Tuomareim lelâlâ âmâ, Deus koendonro âmâem anhetobyry wâgâ; warâ kehobyry tâinwânse mawlygye – kely Isabel Mariaram.

*Maria, Deus koendonroem awyly wâgâ tygâkyem aguehobyry*

<sup>46</sup> Aituo Maria aguely:

– Ywymâry Deus koendonro awyly wâgâ tunâgue urâ yangahu oday.

<sup>47</sup> Iemakerim mâkâ. Toenzepa womaru.

<sup>48</sup> Âdy mâkeba urâ, ienanânehomba olâ keankâ.

Iwerâma ise idânârâ aguelymo:

“Koendonroem Maria awyly Deus xurâem,  
Deus aguehobyry ara aitobyry wâgâ” kelymo ise.

<sup>49</sup> Ton-honreim lelâlâ awâkâ Deus; koendâ kehoem iedyly.

Koendonro lelâ aieni awâkâ.

<sup>50</sup> Koendonro tawlyly tânehonze idânârâ âwankuem tyetânry modoram,  
adaguhobyrylâ, xypyryam kehoem warâ.

<sup>51</sup> Toenzepa ton-honreim awâkâ.

Tâwâlâ kulâ tywâgâ koendonroem tawlyly aguewâni modo tainze Deus.

<sup>52</sup> Ton-honrunreim modo ton-honremba tyese,  
ton-honrenry eon-honru tuduze warâ.

<sup>53</sup> Âdy pebaom modoram âdy koendonro modo tuduze Deus.

Âdypeom modo olâ âdy peba tyese.

<sup>54</sup> Xina nâzemakeo.

Israelita domodo agâ koendonroem tawlyly adâkehobyry nenanânehomba Deus.

<sup>55</sup> Iweâpa myakâwândy aguely tako Abraão agâ:

“Koendâ ise urâ agâ, âweom agâ warâ” kewândymy.

Adâkehobyry anhedily

– kely Maria.

<sup>56</sup> Azagâ tokalâ warâ nunâ lelâ Maria, Isabel agâ awyly. Ilâpyryem tâtyram odopâdyly.

*Zacarias, Isabel warâ imery iazehobyry*

<sup>57</sup> Alâ Isabel âjihwadâdo odaji idyly. Uguondo imeimbyry iazely.

<sup>58</sup> Ety iwaguepaom modo, ipemugudo warâ imery iazehobyry egary indadylymo. Awylygye, Deus, Isabel agâ koendonroem kuru awyly nhutulymo. Idânârâ nhomaendylymo eagâ.

<sup>59</sup> Iamudo iazehobyry tokalâ semana ipygyueduo, âtybe myakâwâm ezedy xuduho, ilery ety iopiry satâho warâ. Mâkâ uguondo imeimbyry ilery ety nhatâlymo, judeuem awyly xutuhoem. Tonlo modo wâne Zacariasgue tienzetâdyze awylymo, nhunwym ezedyguelâ.

<sup>60</sup> Aituo iamudo ise aguely:

– “João” ise ezedy – kely.

<sup>61</sup> Aituo aguelymo:

– Adaituo? Awârâgue tâzekeingue typemuguneba âmaemo – kelymo.

<sup>62</sup> Isabel, “Zacarias” kelygye tienzetâdyzeba awyly tiuntuduomo, tâmarygye nhunwym nhapâiguelymo, âdakelygye tienzetâdyze awyly tiuntuhomoem.

<sup>63</sup> Tâmaryguelâ Zacarias tinweniho nhekadyly. Nhuduypymo wâgâ inwenily: “ ‘João’ ise iamudo ezedy” kely inwenily. Âze inwenily tiuntuomo, idânârâ eydonro modo âseguâdâdylymo.

<sup>64</sup> Awârâ ume kehoem myakâwâm Zacarias âjitaïn-ondyly. Deus koendonroem awyly wâgâ aguely.

<sup>65</sup> Aituo toenzepa tonlo modo âseguâdâdylymo. Târâ tâtyuneim modo tâinkâ lelâba, iwiy odakâ Judéia eynynonro awârâ modoem, mâkâ aitobyry lelâ nhogatulymo.

<sup>66</sup> Idânârâ egary idataynrinbyry modo ara awârâ wâgâ xunâgumo âpaunzedilymo, aguelymo lâpylâ warâ:

– Uguondo aunlo kulâ mâkeba ise awâkâ. Âdy wânkâ ise anhekyly? – kelymo.

Kywymâry Deus olâ mykâinane tâenselâ-ro warâ ton-honrugue.

*Zacarias âdydo imeom aidyly wâgâ aguehobyry*

<sup>67</sup> Aituo myakâwâm Deus Ispiritury, Zacarias enomery nhuduly. Deus aguehobyry nhegataly:

<sup>68</sup> – Koendonro mawlyly wâgâ xina aguely, pymâ Deus!

Xina israelita domodo xurâem koendonro âmâ.

Kâmaynodâpa xina etyze mâedâ.

Âynynonro modo memake.

<sup>69</sup> Xina emakerim ton-honreim migonodâ, pymâ Davi iwerypyry.

<sup>70</sup> Âunâry egatuwâni modo agâlâ myakâwâm amyguely:

“Igonose urâ Davi iwerypyry, Messias” myguely.

Amyguehobyry aralâ amidyly.

<sup>71</sup> “Imakezemo urâ âduerymo amaymba.

Âizepanromo amaymba warâ” myguely.

<sup>72</sup> “Âtyendâmolâ ise urâ, âweonmo lâpylâ warâ.

Agâmo auguehobyry kêenanânehonwâbyra ise urâ”

warâ myakâwândy xina idamudoram amyguely.

<sup>73-74</sup> Saguhoenlâ myakâwândy xina idamu Abraâoram amyguely:

“Âweompyry modo iduery amaymba emakeze urâ,

tyanepa auguehobyry anhetomoem.

Aguehobyry agânhepyra witaymba urâ” myguely myakâwâm.

<sup>75</sup> Warâ myakâwândy amyguely, aunloenlâ, xina israelita domodo âmâenlâ itoem,

ize mato lelâ xina anhetoem warâ

– kely Zacarias, Deusram.

<sup>76</sup> Ilâpygueduo, Zacarias tymeryram aguely:

– Ymery, Deus Ton-honreim xunâry aguenri ise âmâ.

Pymâ tâgareim iray todohondyly wâne saintodâ,

myara ise Kywymâry saindyly iray kurâ domodo mâunrudyly.

<sup>77</sup> Warâ ise israelita domodoram amyguely:

“Deus kâmakeze.

Inakanhe aguitobyry Deus xygakeze” myguely ise, ymery.

<sup>78</sup> Toenzepa awâkâ Deus kywynedyly.

Aunlolâ kagâ koendâ awyly.

Kâmakerim igonose.

Deusdâpalâ ise Kâmakerim âewyly.

Kyajimanânibe awylygue wâne kytâho kiendyly myara ise mâkâ wâgâ Deusram tâdâtâly kiuntuly.

<sup>79</sup> Deus wâgâ xutuen-honze kyam.

Iwerâma iamu odano ara kulâ kurâ-ro.

Tâjiguely amaym kulâ kurâ.

Kâmakerim olâ ise ânwa iajimanâni ara.

Deus agâ koendâ lelâ kyese, tyanepa eagâ kitoem – kely Zacarias tymeryram.

<sup>80</sup> Zacarias imery ago idyly, uguondoem idyly. Deus wâgâ nhutuly, iwâgâ aguely warâ Deus Ispiriturybe xuturim awylygue. Âji âdy peba atoram idâly wao, Deus itaumbry israelita modoram tiengataly iraynâ.

## 2

*Jesus Cristo iazehobyry*

(Mt 1.18-25)

<sup>1</sup> João iazepygueduo, iweâpa nipyrâlâ myakâwâm pymâ kuru Roma donro Augusto aguely:

– Urâ Augusto, pymâ kuru. Xirâ ytaumbryr kâingonodyly idânârâ kurâdo kêantaynly modoram: “Idânârâ âmaemo âdamudomo iazehobyrydâlâ izedymo iweniehonwâdaungâ. Kurâdo kampâguely mawânâ” – kely.

<sup>2</sup> Saguhoem kuru kurâ domodo sapâguelylâ myakâwâm Augusto pymâem awyly ume. Ilâ ume Cîrênio pymâ Siriadâ.

<sup>3</sup> Aituo idânârâ kurâ domodo idâwâdylimo tydamudo iazehobyryanlâ, tâzedy iweniehonze.

<sup>4</sup> Aituo myakâwâm xidadâ Nazarê, Galiléia eynynonro dombyryem José idâly Belêmmram, Judéia eynynonro anaxi. Pymâ Davi iwerypyry myakâwâm mâkâ. Awylygue tâzedy iweniehonze idâly Belêmmram, Davi iazehobyryanlâ.

<sup>5</sup> Tywydy agâlâ myakâwâm José Belémram idâly. Idâhu imeâgâemba myakâwâm Maria.

<sup>6</sup> Belémâ ataymolâ myakâwâm iamudo egaseho saindyly.

<sup>7</sup> Toenzepa myakâwâm târâ kurâdo awyly. Âtâ âxidâdomo peba myakâwâm. Awylygue myakâwâm tapirâ xkyhodâlâ âxidâdylimo. Târâ Maria imebyary uguondo imeimbyry iazely. Tymery ikowendâmbryem myakâwâm Maria nheguetunâdylly tapirâ xuato odaji.

*Kaneru etaynrin modoram anju, "Jesus niazeaki" kehobyry*

<sup>8</sup> Kopae myakâwâm kaneru etaynrin modo poji anaym awylymo, Belémâ iwaguepalâ, tâguy kaneru ese.

<sup>9</sup> Aituo anju âpanâguely eyanmo, Deus tâmaryem ingonotyby. Tohozely kehoem myakâwâm, Deus eydâpa âewyly awylygue. Târâ kaneru eni mododâ MAH warâ kehoem myakâwâm peto odano ara kehoem iajimadyly. Aituo toenzepa âseanedylimo.

<sup>10</sup> Anju olâ aguely:

– Tâseanezeba itaungâ! Unâ iwâkuru egatuze xirâ âyanmo kêawyly. Idânârâ xirâ unâ idataynrin modo toenzepa iomazeze – kely myakâwâm.

<sup>11</sup> – Imakerinmo niazeaki iwerâ, târâ Davi iazehobyrydâ. Deus Ingonotyby mâkâ, Messias, âwymârymoem.

<sup>12</sup> Âkealâ augueho mâuntuhomoem, tapirâ xuato oday ise uguondo imeimbyry ituwymbyem eguetunâdybyem warâ mâendylimo – kely myakâwâm.

<sup>13</sup> Inepa lâpylâ toenzepa anju modo âpanâguewâdylly. Igâtudylimo myakâwâm:

<sup>14</sup> – Târâ eydâ atodâ Deus nâzehoguo! Xirâ onro anano modo nadahuliba nidâmo, turâem itoem Deus induakewâdyby modo! – kely myakâwâm, igâkymo.

<sup>15</sup> Tygâtubygueduomo myakâwâm anju domodo odopâdylimo lelâ Deusranlâ. Odopâbygueduomo myakâwâm kaneru etaynrin modo âjigüe aguelymo:

– Inoro Belémram, âdaityby kyzeta. Kywymâry aguehobyry kudutura – kelymo.

<sup>16</sup> Inepa kehoem myakâwâm idâlymo. Maria, José, warâ nhedylymo. Tapirâ xuato oday iamudo nhedylymo eguetunâdybyem, ituwymbyem warâ.

<sup>17</sup> Aituo anju domodo iamudo wâgâ aguehobyry nhegatulymo.

<sup>18</sup> Kaneru etaynrin modo aguehobyry idanipyry modo toenzepa kehoem myakâwâm âsewânilymo.

<sup>19</sup> Maria tyangahu oday xunâgu mârâ nhegatuybymo wâgâ. Awârâ modo tyangahu oday nhekanâdylly.

<sup>20</sup> Aituo myakâwâm iamudo enipyryem uguondo modo, poji anaxi odopâdylimo. Deus koendonro awyly wâgâ igâkymo Deus wâgâ iomarumo.

– Koendonro lelâlâ Deus, koendonro modo kientoem, kindatoem warâ anhetobyry wâgâ – kely, igâkymo.

Anju domodo aguehobyry aralâ myakâwâm nhedylymo.

*Iamudo nhezêtâdomobyry*

<sup>21</sup> Iamudo iazehobyry tokalâ semana itybyem awyly ume, âtybe myakâwâm, ezedy xuduho, judeu domodo aito ara. Ilery ety nhatâlymo lâpylâ myakâwâm, israelitalâ awyly xutuhoem, Deus induakeyby ewy. "Jesus" kelygue nhezêtâdylimo. Maria nadamypalâ myakâwâm anju aguely: " 'Jesus' kelygue ise mâenzetâdylimo" kely.

*Maria, José warâ iamudo nhatomobyry Deus ety odaji*

<sup>22</sup> Ilâpygueduo, Maria inwânwândylly myakâwâm Deus ety odaji tâtâho saindyly, pekodo ekuize israelita Deus aguehobyry ara aito. Aituo myakâwâm Maria, José warâ iamudo Jerusalémram nhadylymo, Deusram enehonze. Kurâdo eynynâ Deus agâ agueinram nhenehonlymo, iamudo Deus xurâ awyly xutuhoem.

<sup>23</sup> Saguhoem Moisés inweniby mawânâ myakâwândymy: "Saguho iamudo iazepyry watay, Deus xurâem lelâ" kewândymy.

<sup>24</sup> Jesus ise idâly myakâwâm azagâ tawâguneim modogue tâmase, Deusram tiengamehoem. Deus ety oday tâwaneinram nhuduly, mâkâ nhâhoem, nhaduântoem warâ. Moisés inweniby wâgâ mawânâ iwenibyem: "Pekodo âdy pebaom iamudo iazepyry ise israelita watay, azagâ papa, azagâ pâmuko atay warâ nhuduly" kely.

<sup>25</sup> Mârâ ume uguondo Simeão tâtyem myakâwâm Jerusalémâ. Judeu domodo ezewenry eynynonro mykâinane. Deus ize ato ara lelâ mykâinane aidyly. Alâ mykâinane typemugudo emakerin Deus ingonodyly nhenuendylly. Eagâlâ mykâinane Deus Ispiritury.

<sup>26</sup> "Âguely iraynâ ese âmâ Deus Ingonotyby" Deus Ispiritury kehobyrylâ Simeãoram.

<sup>27</sup> Jesus Deus ety odaji sato emedyly ume Deus Ispiritury aguely myakâwâm Simeãoram: – Idâ Deus ety odaji – kely.

Aituo myakâwâm idâly. Maria, José warâ iamudo Jesus agâ saindylymo myakâwâm; Deus itaumbryry inweniby agueho ara aidylymo.

<sup>28</sup> Aituo Simeãoram âzeholyimo. Simeão iamudo nhanâdily. Deus koendonroem awyly wâgâ aguely:

<sup>29</sup> – Iweâma tuomare urâ, Pymâ Deus.

“Igonose urâ” myguehobyry migonodâma.

Alâ ise. Tâwâlâ ise iweâma yiguely.

<sup>30</sup> Ienague kehoenma setai, merâ kurâ domodo emakerim âydâpa âetyby.

<sup>31</sup> Idânârâ kurâdo emakerin-em migonodâ.

<sup>32</sup> Judeu keba modoram xutuen-honze âdara Deus ize awyly, iajinu wâne kydadakobâdo nhesagonly myara.

Mâkâ wâgâ, judeu domodo koendâ aguehonze, kurâ domodo mâinduakeyby

– kely myakâwâm Simeão Deusram.

<sup>33</sup> Simeão iamudo wâgâ aguely tindatuo myakâwâm José, Maria warâ âsewânilymo.

<sup>34</sup> Simeão agueondily myakâwâm eyanmo:

– Deus agâmolâ ise, nhenimoem – kely.

Aituo myakâwâm Jesus isenra aguely:

– Deus induakeyby wâne merâ iamudo, kypemugudo judeu domodo ewy âmery neinwâmpyramo olâ ise. Awylygue ise Deus agâpa âieholymo. Igeduomo âji tâdâsenagazedoram ise idâlymo. Tâlâ pylâ olâ ise âmery einwânni modo. Deus eydâpa nâiehobamo ise-ro warâ. Igeduomo eydâ atoram ise idâlymo. Âmerylâ ise kurâ domodoram âdara âsemaguelymo wâgâ aguenri. Toenzepa olâ ise izepanro modo.

<sup>35</sup> Deus âdara kydawily xutuen-honze, Jesus eynynâ, eynynâba warâ kydawily. Âsenagazeze âmâ, âmery aietaynlygue. Espadague ihoguyby ara ise âmâ – kely Simeão, Jesus isenra.

<sup>36</sup> Îlâpyryem myakâwâm aripi Ana saindily, Deus itaumbryry agueim, Maria, José warâ iamudo agâ, Deus ety oday atomoram. Fanuel exiry myakâwâm mâkâ, judeu domodo ewy myakâwâm Aser iweompyry. Âwynsaundoem tatay myakâwâm ohogüinly. Sete anu ohogüimbyem awyly ume olâ myakâwâm iso iguely.

<sup>37</sup> Iweâpa myakâwâm pypâbyryem awyly. Oitenta e quatro anupe myakâwâm ilâem. Alâ mykâinane idâly Deus ety odaji. Kopae, peto oday alelâ mykâinane Deus wâgâ aguely. Nâwinduapyra tâise mykâinane, Deus agâ adâkehoem.

<sup>38</sup> Simeão, Maria, José warâ agâ xunâgu ume myakâwâm mâkâ saindily, aguely:

– Koendonrolâ enra Deus! – kely.

Deus Jerusalém donro modo nhemakely enuenni lâpylâ myakâwâm Ana. Kurâ domodoram aguely lâpylâ Maria imery wâgâ.

*Maria, José warâ Jesus agâ Nazaréram odopâdomobyry*

<sup>39</sup> Moisés ezewenry ara aitybyem myakâwâm José, Maria warâ iamudo agâ odopâdilymo Galiléia yan-yam, tâtymoram Nazaré anaxi.

<sup>40</sup> Iamudo ago idily myakâwâm. Eon-howanzedyly, enomezedyly warâ. Koendâ lelâ myakâwâm Deus nhedyly.

*Jesus doze anupe atay, Páscoa etyguedoram idâhobyry todo modo agâ*

<sup>41</sup> Aunlolâ myakâwâm José, Maria warâ Jerusalémram idâlymo Páscoa etyguedoram, Egitodâba tydamudo âsemaguehobyry etyguedoram.

<sup>42</sup> Jesus doze anupe awyly ume Páscoa etyguedoram idâlymo myakâwâm Jerusalémram, ezewenrymolâ awylygue.

<sup>43</sup> Âtybygueduo myakâwâm José, Maria warâ odopâdilymo tâtyam. Jesus Jerusalémdâlâ âxiânly nepyramo myakâwâm.

<sup>44</sup> Odopâdaynrim modo duaylâ enanajimo. Iguandyly ara lelâ ânwa oze idâlymo. Iguandyly ume myakâwâm nhuinlymo, typemugudo duay, tataen-ho modo agâ warâ.

<sup>45</sup> Nepyramo olâ. Aituo myakâwâm emetobyry aralâ xuize odopâdilymo Jerusalémram. Tuguanse myakâwâm, nhuinlymo.

<sup>46</sup> Deus ety oday myakâwâm nhedylymo, Moisés inweniby wâgâ aguewâni modo duay ekadybyem. Eagâmo xunâgu, aguelymo, indadyly, nhapâiguely idily ume.

<sup>47</sup> Toenzepa myakâwâm târâ idataynrim modo âsewânily.

– Aekuru wânkâ merâ iamudo enomegu! Tutuze lelâlâ merâ koendâ kehoem kunâry inhoguly! – kelymo.

<sup>48</sup> Maria, José warâ âsewânilymo lâpylâ, tientuo, tindatuo warâ. Ise aguely myakâwâm eyam:

– Xina arâ akâiedâ, Mery. Urâ, unwâm warâ âdykâ mawyly nutuba tawylygue, toenzepa xina âwize nâsenagazedâ – kely Maria.

<sup>49</sup> Aituo myakâwâm Jesus aguely eyanmo:

– Uipa midysemo. Pabai ety odaylâ wawily mutudyzemo – kely.

<sup>50</sup> Arâ Jesus agueduo nutubamo myakâwâm âdakeze aguely awily. Nutubamo myakâwâm âdy aiese kuru Jesus âewily awily.

<sup>51</sup> Aituo myakâwâm Jesus odopâdily eagâmo Nazaréram. Aguelymo nakabyra. Ise olâ myakâwâm idânârâ aitaymby modo nenanânehomba.

<sup>52</sup> Jesus ago idily, enomezely alelâ. Toenzepa kurâ domodo, Deus warâ ize atoem awily.

### 3

*João kurâ domodoram Jesus âewily wâgâ aguehobyry  
(Mt 3.1-12; Mc 1.1-8; Jo 1.19-28)*

<sup>1</sup> João, Deus itaumbryr nhegatyly adaguly ume, quinze anos myani Tibério, Romadâ pymâem awily. Pôncio Pilatos myani Judéia donro modo iwymâry. Galiléia donro modo iwymâry myani Herodes. Iwaigoru Filipe myani Ituréia eynynâ, Traconitesdâ warâ pymâem awily. Lisâniyas myani Abilenedâ pymâ.

<sup>2</sup> Anás, Caifás warâ myani kurâdo eynynâ Deus agâ aguewâni modo iwymâry kuru. Âji âdy peba atodâ myani Zacarias imery, João. Târâ awily ume myani Deus aguely eyam, tytaumbryr egatuze kurâ domodoram idâhoem.

<sup>3</sup> Aituo myani João Deus itaumbryr egatuze idâly. Idânârâ paru Jordão eynynâ mykâinane adakobâdily, Deus itaumbryr egatuze. Warâ myani aguezesedyly:

– Âjityendaungâ inakanhe amitomobyry wâgâ. Deus izepa ato aiedily imowâdaungâ. Deus einwântaungâ, inakanhe amitomobyry nhygakehoem. Parugue batiza âiehowâdaungâ, inakanhe mawilymo imoimbyryem mawilymo mâenehon-homoem – kely mykâinane.

<sup>4</sup> Saguhoem Deus itaumbryr egatuim Isaias aguehobyry ara awârâ aidyly:

“Messias wâgâ agueim târâ âji âdy peba atodâ ise aguely.

Adâkely idase âetaymby modoram:

‘Inepa ise Deus Ingonotyby saindily.

Izepa ato aiedily imowâdaungâ.

On-hondybyem lelâ itaungâ, aguely mâindatomoem.

Pymâ ton-honreim kâty anaxi âewily kiuntuduo wâne,

kâty inatary tuonse, tuonkeze warâ kurâ,

myara on-hondybyem lelâ itaungâ saindily iray.

<sup>5</sup> Idânârâ koendâpanro modo kua ledily.

Tâtaguneim modo mâentamuhomo ara;

tywyguneim modo, mâinwyguehomo ara,

ânwa tâkâineim, mâenkâinuguehomo ara,

ânwa tâtagueim modo, tywyguneim modo warâ âzekiba lelâ mânhetomo ara warâ,

Arâ lâpylâ ise inakai modo mâinmolymo, Deus Ingonotyby iray.

<sup>6</sup> Idânârâ kurâ domodo ese âdara Deus kâmakely awily’ kely ise”

kewândymy Isaias.

João Batista myani Kywymâry saindily egatuim.

<sup>7</sup> João, Deus itaumbryr nhegatuudo, toenzepa kurâdo idâly eyam:

– Batiza tyedyse xina – kelymo.

Tyam idâwâni modoram myani João aguely:

– Âgâu poji âduguely ume âsemagueze kewâni ara kulâ âmaemo! Warâ wâne amyguelymo:

“João batiza kyetuo ise kydâsemaguely. Deus kânagazedaymba ise” myguelymo.

<sup>8</sup> “Deus eynynonro urâ” myguelymo wâne, Deus eynynonro keba olâ âmaemo. Deus izepa ato amânhetomobyry wâgâ tâjityenze mawilymo enehorim aietaungâ, inakanhe amidilymo imoimbyryem mawilymo mâenehon-homoem warâ. “Deus kânagazenehonwâbyra ise, Abraão iweonma kurâ” tâkezeba itaungâ. Abraão iweryem tadawily mâkeba mârâ kuru. Âdy mâkeba awârâ! Aguely xirâ âyanmo. Ton-honre Deus, xirâ tuhu modo Abraão iweryem enehonze.

<sup>9</sup> Nady koendâ ewisedânry pygue satâly. Iwindy âzesagueoly. Peto onwanji adameoly alelâ aieholy. Nady koendâ ewisedânry ara kulâ âmaemo. Deus izepa ato mâinmopa âmaemo watay, inepa ise Deus inagazedilymo – kely myani João.

<sup>10</sup> Aituo myani kurâdo aguely:

– Âdaraka Deus xina aidyse awily? – kelymo.

<sup>11</sup> João in-hoguly:

– Deus tâinwânse lelâlâ mawilymo enehonwâdaungâ. Itymo owogonromo azagâpe âmaemo watay, ipaonra tokalâ âunduwâtaungâ. TYPYNIGUE MATAYMO, EPJIGÂDAUNGÂ IPANRO AGÂ – kely.

<sup>12</sup> Aituo myani Romadâ pymâem dinheru impostu ebyry emakewâni modo ewy saindyly. João batiza tyedysemo, Deus xurâem tawly tienehon-homoem. Aituo João nhapâiguelymo myani:

– Konomedâni, âdara kuruka ise xina aidyly, Deus tâinwânse tawly tienehon-hoem? – kelymo.

<sup>13</sup> Aituo João in-hoguly:

– Pymâ aguehobyry ara lelâ dinheru emakewâdaungâ. Âunârymo wâgâ kulâ imâem nhuduhomoem adâkezeba itaungâ – kely.

<sup>14</sup> Sodadu domodo ewyram lâpylâ myani adapâigueoly:

– Xina-ro? Âdaraka ise xina aidyly, inakanhe adâidyly imoimbyryem tawly, Deus einwânniem tawly warâ tienehon-hoem? – kelymo.

Aituo myani João in-hoguly:

– Ânguy idinheruru kâzemakewâdaundâ, tutoguyze kehoem. Ânguy âdanipyra kulâ âdygue kâzewentâdaundâ. Tuomare lelâ itaungâ ipywadomogue – kely.

<sup>15</sup> Toenzepa myani kurâdo inwauntunu, koendonro modo lelâ aini awyly tiuntuduomo. Aituo âjigie aguelymo:

– Messias kinwânwânkylylâ keanra awâkâ João, Deus Ingonotyby! – kelymo.

<sup>16</sup> Aituo myani idânârâ eyanmo João aguely:

– Âese eagonro Deus wâgâ aguenri. Ton-honreim ise mâkâ, imyenro keba. Mâkâ ise yakadâ kuru ton-honreim. Ihuru kâingochehoem, ihuru etary ekâjiguerin-em witoenlâ nudupa lâgâlâ. Urâ parugue batiza âenimo, Deus izepa ato amânhetomobyry wâgâ tâjityenze mawlymo mâenehon-homoem, inakanhe amidylmo imoimbyryem mawlymo mâenehon-homoem warâ. Mâkâ âeni ise Deus Ispiritury xudunri, eynynâ mawlymo xutuhomem. Inakanhe amitomobyry xygakeze, peto wâne saxium tyaduânse âpa ezay myara\*.

<sup>17</sup> Trigu ekaunâni wâne ewy wâgâpa ewily tyekygueze myara ini mâkâ. Tynynonro modo iduakewâze ejidy tâkehobyryanlâ ise nhekanâdyly, trigu etary kehobyry odajilâ ekanâdyly myara. Tynynâbaom modo olâ typygueba kehoem enagazeze, peto âdaunloenlâ nhâtânry onwanji ise nhamely – kely João.

<sup>18</sup> Arâ adâkely umelâ myani, João, Deus itaumbryr nhegatuly kurâdoram. Mârâgue lelâba nhurudylymo. Ton-honre kehoem eyanmo aguely.

<sup>19</sup> Pymâ Herodes, Herodias agâ ohogüimbyem. Herodes iwaigoru iwydylâ myani mâkâ. Aituo João aguely Herodesram:

– Koendâ inkâba âwaigoru iwydy agâ mohogüinly – kely pymânra.

Idânârâ inakanhe aitobyry modo wâgâ lâpylâ warâ aguely.

<sup>20</sup> Herodes olâ João aguely neinwâmpyra. Nhawânehonly lelâ, kadeia odaxi nhetadânehonly warâ.

### *João Jesus batiza nhetobyry*

*(Mt 3.13-17; Mc 1.9-11)*

<sup>21</sup> Tâzetadâoly iraynâ, João toenzepa kurâ domodo batiza tyese, Deus eynynonroem tawly nhenehon-homoem. Alâpylâ Jesus batiza âieholy Joâoram, Deus eynynonroem tawly tienehon-hoem. Paikayba itybyem, Jesus aguely myani Deus agâ. Aituo kau âzenahunguely.

<sup>22</sup> Papaem myani Deus Ispiritury xytâguyly nhonwa. Aituo myani kau odaypa Deus itanru indadyly lâpylâ.

– Ymery âmâ, toenzepa kâinwynegyuly; toenzepa womazeâni âmâ – kely Deus.

### *Jesus idamudo*

*(Mt 1.1-17)*

<sup>23</sup> Batiza tyepygueduolâ myani Jesus Deus xunâry egatuly nhaguly. Trinta anu awârâempe myani. Judeu domodo xurâem, José imery mâkâ. Eli imery, José.

<sup>24</sup> Matate imery, Eli. Levi imery, Matate. Melqui imery, Levi. Janai imery, Melqui. José imery, Janai.

<sup>25</sup> Matatias imery, José. Amós imery, Matatias. Naum imery, Amós. Esli imery, Naum. Nagai imery, Esli.

<sup>26</sup> Maate imery, Nagai. Matatias imery, Maate. Semei imery, Matatias. José imery, Semei. Jodâ imery, José.

<sup>27</sup> Joanâ imery, Jodâ. Resa imery, Joanâ. Zorobabel imery, Resa. Salatiel imery, Zorobabel. Neri imery, Salatiel.

\* **3:16** Ilâ ume tâwaneinhe sanâtyby modo myakâwâm adakobâni modo ihuru etary ekâjiguiem, etyim, ihuru igokeim warâ.

<sup>28</sup> Melqui imery, Neri. Adi imery, Melqui. Cosã imery, Adi. Elmadã imery, Cosã. Er imery, Elmadã.

<sup>29</sup> Josué imery, Er. Eliézer imery, Josué. Jorim imery, Eliézer. Matate imery, Jorim. Levi imery, Matate.

<sup>30</sup> Simeão imery, Levi. Judá imery, Simeão. José imery, Judá. Jonã imery, José. Eliaquim imery, Jonã.

<sup>31</sup> Meleá imery, Eliaquim. Mená imery, Meleá. Matatá imery, Mená. Natã imery, Matatá. Davi imery, Natã.

<sup>32</sup> Jessé imery, Davi. Obede imery, Jessé. Boaz imery, Obede. Salá imery, Boaz. Nasom imery, Salá.

<sup>33</sup> Aminadabe imery, Nasom. Admim imery, Aminadabe. Arni imery, Admim. Esrom imery, Arni. Peres imery, Esrom. Judá imery, Peres.

<sup>34</sup> Jacó imery, Judá. Isaque imery, Jacó. Abraão imery, Isaque. Tera imery, Abraão. Naor imery, Tera.

<sup>35</sup> Serugue imery, Naor. Reú imery, Serugue. Pelegue imery, Reú. Éber imery, Pelegue. Salá imery, Éber.

<sup>36</sup> Cainã imery, Salá. Arpaxade imery, Cainã. Sem imery, Arpaxade. Noé imery, Sem. Lameque imery, Noé.

<sup>37</sup> Matusalém imery, Lameque. Enoque imery, Matusalém. Jaredede imery, Enoque. Maalalel imery myakãwãndy Jaredede. Cainã imery, Maalalel.

<sup>38</sup> Enos imery, Cainã. Sete imery, Enos. Adão imery, Sete. Deus nhygatyby myakãwãndy Adão.

## 4

*Deus ize ato araba Jesus aitoem, Satanás aiese kehobyry*

*(Mt 4.1-11; Mc 1.12-13)*

<sup>1</sup> Deus xurãem tawlyly tienhon-hoem Joãoram batiza âiehoibyem myani Jesus paru Jordãodãpa âxiguely. Deus Ispiritury agã myani. Aituo Deus Ispirituryam adaholy âdy peba atoram.

<sup>2</sup> Quarenta iguandyly, quarenta emedyly warã myani Jesus târã awyly. Târã tawlyly ara, nãwinduapya. Alã myani ewindupadyly. Târã atay Deus iduery Satanás âepanãguely. Toenzepa wãne Jesus enokuze kely, Deus aguehobyry nhakadoem.

<sup>3</sup> Aituo Satanás eyam aguely:

– “Deus imery urã” mygueansema. Âkealã kuru amyguely-ro watay, awãrã tuhu pãoem iekã pylã – kely.

<sup>4</sup> Aituo Jesus aguely:

– Amyguehobyry agãnhetaymba ise urã. “Pão kiendawynlygue lelã inkãba kyigüepa kydawlyly” kely iwenibybe Deus itaumbyry awo wãgã – kely Jesus.

<sup>5</sup> Ilãpyryem iwyy onwa adaholy Satanásram. Idãnrã kehoem onro modo nhenehony.

<sup>6</sup> Aituo myani aguely:

– Idãnrã awãrã mãentaynly modo iwymãryem âese urã. Tãnkã lelãba ise pymãem mawlyly. Koendonro modo idãnrã âmãem xuduwãse urã. Idãnrã awãrã mãentaynly modo sodoma urã. Ângulyã pymãem kãnhedyse urã-ro watay, adyese urã.

<sup>7</sup> Âmãenlã ise idãnrã awãrã modo, ienado âzeguhoam midyly, yrentoen-ro watay – kely.

<sup>8</sup> Jesus aguely:

– Inado âzeguhoam witaymba ise urã! Warã Deus itaumbyry aguely:

“Kywymãry Deus enado lelã âzeguhoam itaungã.

Aguehobyry ara lelã aitaungã”

kely iwenibyem – kely myani Jesus.

<sup>9</sup> Ilãpygueduo myani Satanás, Jesus nhadyly Jerusalémram. Deus ety nhangakuedaji sanipyryem aguely:

– “Deus imery urã” mygueansema. Âkealã kuru amyguely-ro watay, tarãpa onro onwa adamegã.

<sup>10</sup> Mãdyãwãpyra ise âmã. Warã mawãnrã iwenibyem Deus itaumbyry awo wãgã:

“Deus nhese lelã.

Anju domodo igonose awãniem.

<sup>11</sup> Âihugueduo, awãse lelã tâmarygue,

ãda mipyra mitoem, âhuru tuhu onwa nãdyãpa itoem warã”

kely iwenibybe mawãnrã – kely myani Satanás.

<sup>12</sup> Aituo myani Jesus eyam aguely:



— Onro onwa kadamewâbyra ise urâ. Warâ lâpylâ iwenibyem awyly Deus itaumbry awo wâgâ:

“Deus imakelymo mâentomoem kulâ, kâmayno akâiedaundâ.

Amidylymo-ro watay, mâinwâmpyra mawylymo kulâ ise mâenehonlymo”  
warâ lâpylâ iwenibyem awyly — kely Jesus Satanâsram.

<sup>13</sup> Warâ myani Satanâs aguely, Jesus Deus aguehobyry nhakadoem wâne. Satanâs aguehobyry ara anipyra olâ myani Jesus. Aituo myani Satanâs, Jesus nhodokely. Âdara kuru Jesus Deus aguehobyry nhakadoem adyendyly xutuze wao.

*Jesus Galiléia eynynâ tâwanu nhaguhobyry*

(Mt 4.12-17; Mc 1.14-15)

<sup>14</sup> Jesus odopâdyly myani Galiléia yan-yam. Eagâlâ myani Deus Ispiritury. Idânârâ mârâ âji anakâ myani Jesus egary indadylymo.

<sup>15</sup> Deus wâgâ mykâinane âzenomedâolyo, âtâ judeu domodo âtâdygyuho odakâ. Koendâ lelâ myani Jesus wâgâ aguelymo:

— Idataungâ. Ânguy awâkâ ara koendâ konomedâni lâpeba! — kelymo.

*Nazaré donro modo Jesus neinwâmpyra atomobyry*

(Mt 13.53-58; Mc 6.1-6)

<sup>16</sup> Târâpa Jesus âxiguely. Tânamadobyry Nazaréram idâly. Tâzekobyzegueho oday myani tâzewenry ara âtâ tâdâtâdygyuho odaji idâly. Târâ tawyly ume, saudyly myani Deus itaumbry kaynâ kehoem tintain-hoem.

<sup>17</sup> Aituo pape ituwymby imâsedo âduduoly, Isaías inweniby. Iweâpa Deus itaumbry egatuimbyry myakâwândy mâkâ. Warâ kelydâ lelâ myani Jesus pape ituwymby nhawynkely:

<sup>18</sup> “Kywymâry Deus Tyispiritury ingonodyly yam.

Mâkâlâ keankâ ugononi,

unâ iwâkuru âdy pebanro modoram kêngatuhoem,

etadâdaymy modo, tânagazezeim modo warâ kêenmakehoem,

epyem itaymby modo nhetondoem warâ.

<sup>19</sup> ‘Iweâma ise Deus tynynonro modo nhemakely’ keze ugononi keankâ”

warâ Deus itaumbry awo wâgâ iwenibyem awyly — kely Jesus.

<sup>20</sup> Tintaimbygeduo, Jesus pape imâsedo intuwonydyly. Târâ âtâ tâdâtâdygyuho oday tâwaneinram nhuduondyly, ekadyly. Idânârâ tonlo modo toenzepa myani Jesus nhesedylymo.

<sup>21</sup> Aituo myani Jesus aguely:

— Iwelo keba xirâ mâindakylymo; iwerâ olâ ise xirâ aidyly adaguly — kely.

<sup>22</sup> Idânârâ tonlo modo aguely myani:

— Idataungâl! Koendonro kehoem awâkâ uguondo! Âdydo imeom koendâ kehoem aguely, âdykâ kindatânry kehoem. José imery kulâ wâne, tonomegueim olâ — kelymo âjigüe.

<sup>23</sup> Aituo Jesus aguely:

— Cafarnaumdâ awitobyry tutuze âmaemo. Awylygue ise târâ awitobyry ara, tarâ ienamadobyrydâ awidyse mawylymo. Warâ ise yam amyguelymo: “Tâwâlâ âsewiângâ, kua kyeni” myguelymo ise. Âdylâ adyenyry, agânhedyse mawylymo.

<sup>24</sup> Unâ egatuim ipemugudoram kuru tâinwântuneba; âkelo kulâ einwânni. Xirâ mâuntudyzemo kuru wato.

<sup>25</sup> — Saguhoem Deus tynynâ aguewâni modo eon-honru tuduze myakâwândy adyenyry modo anhetomoem, Israelita keba modo nhemawyadâdomoem. Elias ume toenzepa myakâwândy tarâ Israeldâ pypâbyry modo. Typynigüeba tawylygue âsenagazeni modo, três anos e meio kopâ nihugueba awylygue, âdy âpa ezay ago nipyra awylygue, toenzepa myakâwândy pypâ israelita modo typynigüenyry.

<sup>26</sup> Deus olâmy Elias igonomâ Sarepta donro pypâ emawyadâze. Israelita keba myakâwândy mâkâ, Sidom eynynonro. Deus eon-honrugue myakâwândy Elias mâkâ pekodo ipyniry aguipaombyry agui nhenehonly, kopâ ihugueondyly nhotoem. Pypâ israelita xurâem myara aniempyra myakâwândy Elias.

<sup>27</sup> Toenzepa lâpylâ myakâwândy tâdâjimitugueylygue tâwânuneim modo tarâ Israeldâ, Eliseu ume. Deus olâ myakâwândy Eliseu eon-honru nudupa akaemo kua nhotoem. Sodadu domodo iwymâry Naamâ keho kua iese lelâ ingonodyly, israelita keba myakâwândy mâkâ, Síria donro — kely Jesus.

<sup>28</sup> Awârâ tindatuo, toenzepa iewiâpadylymo, judeu keba modo lelâ Deus nhemawyadâgyuly kely tindatuo.

<sup>29</sup> Aituo myani sautaynlymo. Sautybyem Jesus nhawädylimo. Xidadâ odaypa nhadylymo. Iwy iay myani mârâ xidadâ ejiku. Awlylygue iwy angataji nhadylymo. Târâpa igonose kelymo ihuguely, iguely itoem.

<sup>30</sup> Âdaniepyramo olâ. Aituo Jesus kurâ domodo duakâ kehoem sakadily.

*Jesus uguondo kadopâgue taseim kua nhetobyry*  
(Mc 1.21-28)

<sup>31</sup> Aituo myani Jesus idâly, Galiléia eynnonro xidadâ Cafarnaumram. Târâ myani kurâdo ghenomedädily tâzekobyzegueho oday.

<sup>32</sup> Arâ nhenomedädily tindatuo myani toenzepa kehoem kurâdo âsewânilymo. Aguelymo:  
– Pymâ ara kehoem aguely. Adâkely tutuze, âkeâ lelâlâ aguely warâ merâ – kelymo.

<sup>33</sup> Tâlâ myani târâ âtâ tâdâtädigyuhyo oday uguondo kadopâgue taseim. Uguondo oday myani kadopâ adenkely Jesusram:

<sup>34</sup> – Xina kâdynanâdâ. Tutuze urâ koendâ kehoem ânguy mawly, Jesus Nazaré donro! Xina eon-honru etyze âetyby mawly, tutuze urâ. Inakanhe amitaymba âmâ; Deus ingonotyby âmâ warâ – kely uguondo kadopâgue taseim; uguondo keba olâ agueim, kadopâ.

<sup>35</sup> Ton-honre kehoem Jesus aguely mâkâ uguondo odano kadopâram:

– MYK alelâ ikâ! Adâkeonzebane ikâ! Igasegâ iweâ lelâlâ merâ uguondo odaypa! – kely Jesus.

Idânârâ kurâdo enanaym kehoem mâkâ kadopâ uguondo onro onwa nhamely. Onro onwa sameimbyryem kadopâ egasely uguondo odaypa, âdaniepyra olâ.

<sup>36</sup> Idânârâ etaynrinbyry modo âsewânilymo. Âjigie aguelymo:

– Idatungâ konomedâni ton-honre kehoem aguely. Ton-honreim merâ! Tunâry wâgâlâ awâkâ kadopâ nhâkyly! Agueduo, idâly lelâ – kelymo.

<sup>37</sup> Inepa kehoem Galiléia eynnonro modo Jesus egary indädilymo.

*Jesus tâwânuneim modo kua nhetobyry*  
(Mt 8.14-17; Mc 1.29-34)

<sup>38</sup> Ilâpyryem myani Jesus egasely âtâ tâdâtädigyuhyo odaypa. Simão Pedro etyram idâly. Simão imenhuudu toenzepa myani iaturu. Jesus egawândily tientuo, tonlo modo eyam aguely:

– Toenzepa Simão imenhuudu iaturu – kelymo.

<sup>39</sup> Aituo myani eydâ atoram idâly. Sautybyem eatado XYDYK idily. Aituo aguely ton-honre kehoem, mâkâ tyatureba itoem.

Aguely umelâ, tyatureba idily. Inepa kehoem myani saudyly; ipynirymyo aiese, âwinduatomoem.

<sup>40</sup> Xixi egawâmpygueduo, idânârâ tonlo tâwânuneim modo Jesusram adaholyo. Mârâgue lelâba tâwânuneim modo myani nhaklymo. Aituo myani Jesus akaemo nhangahu onwa tâmary nhedyly, kua itomoem.

<sup>41</sup> Kadopâgue taseim modope myani akaemo duay. Jesusram tâjiânkyoduo, tadaenkeze kehoem kurâdo odaypa adâkewädily:

– Deus Imery âmâ! – tâkeze.

Warâ olâ Jesus aguely kadopâ modoram:

– Âdatâkezeba itaungâ! – kely.

Messias-em tawly nhutuduomo, ânguyram nhegatudyzebamo myani Jesus.

*Jesus Deus wâgâ Galiléia eynynâ nhegatuhobyry*  
(Mc 1.35-39)

<sup>42</sup> Emetybyem myani xidadâ odaypa Jesus egasely. Âji âdy peba atoram idâly. Toenzepa kurâdo Jesus xuize awly. Tiontuo myani aguelymo:

– Tâtâzeba ikâ, Jesus. Xina agâlâ ikâ tarâ Cafarnaumdâ – kelymo.

<sup>43</sup> Jesus olâ aguely:

– Tarâ lelâ wipyra ise aze. Deus xunârybyry âkelo âtâ anakâ auguedyse lâpylâ urâ. “Inepa ise Deus pymâem awly xirâ anaym” ugedyse lâpylâ urâ. Agueze Deus ingonotybyma urâ – kely Jesus.

<sup>44</sup> Tâdâtädigyuhyo modo odakâ mykâinane Deus xunârybyry nhegatuly idânârâ âji judeu domodope ato ara.

## 5

*Jesus uguondo âedâgue kanra awâni modo tynnonroem ingâsedobyry*  
(Mt 4.18-22; Mc 1.16-20)

<sup>1</sup> Paru Galiléia\* emelay sagunu wâgâ Jesus eagâmo awyly. Tokonoze kehoem myani kurâ domodo, Deus xunârybyry nhegatyly idase awylymo.

<sup>2</sup> Aituo azagâ pepi sagunu wâgâ TUXUK TUXUK ietyby nhedyly. Sodo modo myani iodaypa itybyem, âedâ kanra awâto igokeze aidylymo.

<sup>3</sup> Mârâ tokalâ pepi sodo myani Simão Pedro. Aituo Jesus pepi odaji âxiedybyem sodoram aguely:

— Âwepiry wao âdiempa igonokâ — kely.

Jesus aguehobyry ara sodo anhedily. Aituo Jesus pepi oday ekadybyenlâ kurâ domodo sagunu wogonro modo nhenomedâdily.

<sup>4</sup> Enomedâdilymo ewanikeimbyryem Simão Pedroam aguely:

— Paru esanigonra pepi sakâ — kely.

Simão Pedroram, pepi odano modoram warâ aguely:

— Âedâ samewâdaungâ paikaji, kanra manwâtomoe — kely.

<sup>5</sup> Aituo Simão Pedro aguely:

— Ah, Pymâ, tâmese enra xina kanra sawâse kewâdily. Ânguy xina nawâtaymba enra. Amyguehobyry ara aise lelâ olâ xina — kely.

<sup>6</sup> Aituo âedâ nhamoondilymo paikaji. Ilâenma toenzepa kehoem kanra nhawâdilymo-ro, âedâ adaguezeseaji kehoem.

<sup>7</sup> Aituo Simão Pedro eagonro pepi odano modo tâmaryuelâ tâmawadâze âetomoem ingâsedily. Myarâ saintybyem, azakâlâ kehoem kanrague pepi xumywâdily, xytyzeaji kehoem kanrague tumykgue.

<sup>8</sup> Kanra peba atobyrydâ toenzepa sawâtyby tientuomo, myani Simão Pedro Jesus enado âzeguhoam itybyem, aguely:

— Tâwâlâ wixi, Pymâ. Âdy mâkeba urâ âmâem, inakanhe aini kulâ — kely.

<sup>9</sup> Mâkâlâ, eataen-ho modo warâ âsewânilymo, toenzepa kehoem kanra tianwâtuomo.

<sup>10</sup> Zebedeu imeombyry, Tiago, João warâ toenzepa kehoem âsewânilymo lâpylâ, Simão Pedro eagonrodo. Aituo Jesus aguely Simão Pedroam:

— Tâegane ikâ. Saguhoem kanra sawâniem makynre. Kurâ domodo ynyonroem itoem unâry egaturin-em ise âmaemo iwerâ — kely myani Jesus.

<sup>11</sup> Agueduo, pepi modo nhuxidylymo sagunu onwa, târâlâ âxiân-hoem. Idânârâ timo-bygueduo myani Jesus agâ idâlymo, âsenomedâze.

*Jesus uguondo tâjimituguelygue tâwâneim kua nhetobyry*

*(Mt 8.1-4; Mc 1.40-45)*

<sup>12</sup> Jesus myani uguondo tâjimituguelygue tâwâneim ety anaym. Toenzepa myani uguondo âjimituguely. Jesus nhedyly. Aituo eyam idâly. Jesus enado âzeguhoam idyly, tâmydy onro onwa nhedyly, Jesus tynrense tawlyly tienehon-hoem. Aituo Jesusram aguely:

— Pymâ, kua yese ton-honre mawlyly, xutuanze. Kua yedyse âmâ watay, kua yekâ wao — kely.

<sup>13</sup> Jesus tâmarygue MÂ' nhedyly. Eyam aguely:

— Kua âedyse urâ. Tâwânepa âmâ iweâma. Kua âetai — kely.

Ilâenlâ kehoem kua idyly. Iwâgâ pinuri peba idyly, itugoenzely warâ.

<sup>14</sup> Eyam aguely:

— Idakâ. Iweâma tâwâlâ idâ. Ânguyran-ne xirâ kua âetobyry kâzegatu — kely.

— Kurâdo eynynâ Deus agâ agueinram âzehora, kua itybyem mawlyly nhetoem. Kua itybyem mawlyly kurâdo nhetoem, Deusram âdylâ âundugâ, kâzewenryem Moisés inweniby agueho ara — kely myani Jesus.

<sup>15</sup> Tâinkâ lelâba Jesus egary âjidaholy. Aituo myani kurâ domodo aguely idase idâlymo. Tâwânuneim modo idâly kua tyetoem.

<sup>16</sup> Aunlolâ myani Jesus idâly âji âdy peba ato modoram, Deus agâ agueze.

*Jesus adakobâdânry kua nhetobyry*

*(Mt 9.1-8; Mc 2.1-12)*

<sup>17</sup> Jesus Deus wâgâ nhenomedâdily myani. Eydâ iwaguepa ekadybyem fariseu domodo ewy, Moisés inweniby wâgâ enomedâni modo warâ. Jerusalémdâpa âewylymo; idânârâ xidadâ Galiléia eynynâba, Judéia eynynâba lâpylâ warâ âetaynlymo. Kywymâry Deus eon-honrugue Jesus kurâ domodo kua nhetaynly.

<sup>18</sup> Aituo myani uguondo modo adakobâdânry nhadylymo kama emyenro xygatyby wâgâ, Jesus kua nhetoem. Âtâ odaji tienkaunâdizemo wâne, Jesusram tiantomoem.

\* 5:1 Paru Galiléia, Genesaré lâpylâ ezedy eagonro.

<sup>19</sup> Toenzepa kurâdo awylygue olâ âdara nâwâmpyra awylymo mâkâ agâ. Aituo pyanta oze tâgawâmpyra tâituomo, âkulymo âtâ nhangataji tâdâkuho wâgâ mâkâ uguondo agâ. Tarâ tyntâguyândo in-hoguylymo. Mârâ adientybymo oze tâwâneim nhytâguyândylymo kurâdo tonlo modo duakâ kehoem Jesus enadoram. <sup>20</sup> Aidylymo tientuo myani Jesus tyngahu oday aguely:

– Awâkâ adakobâdânry kua kânhedily tâinwânse asaemo – kely.

Aituo Jesus aguely adakobâdânryam:

– Inakanhe amitobyry modo xygakeagui – kely.

<sup>21</sup> Moisés inweniby wâgâ enomedâni modo, fariseu domodo warâ Jesus aguely tindatuo, tâpaunzezemo myani.

– Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidyse awyly kulâ! Âdaunlo uguondo nhygakehonly mâkeba awârâ inakanhe adâjitybry modo! Deus lelâ awârâ xygakerim – kelymo.

<sup>22</sup> Tutuze olâ Jesus âdy nhangahumo oday xunârymo awyly-ro warâ. Aituo aguely:

– Arâ ywâgâ tâpaunzezema itaungâ! Unâguedaundâ – kely.

<sup>23</sup> – Merâ adakobâdânryam: “Inakanhe amitobyry modo xygakeagui” uguely-ro watay, mâuntuwâbyra ise âmaemo, âkealâ, âkealâba warâ auguely awyly. “Aukâ, adakobâgâ” eyam ugueduo, adakobâdily-ro watay olâ, xutuze âmaemo ton-honre wawyly!

<sup>24</sup> Merâ koendâ adakobâdilyly mâentuomo, xutuze âmaemo, kurâ domodo inakanhe aito xygakeze ton-honre wawyly urâ Uguondo Kaynâpa Âtyby – kely Jesus.

Aituo myani adakobâdânryam aguely:

– Aukâ, iguetudobyry sanâkâ, adakobâgâ. Idâ itynra – kely.

<sup>25</sup> Aguely umelâ kehoem kua idily, Saudyly idânârâ enanaynmo. Tâguetudobyry nhanâdily. Adakobâdily, egasely, tâtyram idâly. Deusram aguely:

– Koendonro, ton-honreim warâ âmâ! – tâkeze, idâly.

<sup>26</sup> Toenzepa kehoem Idânârâ âsewânilymo, âseanedilymo warâ. Deusram aguelymo:

– Koendonro, ton-honreim lelâlâ warâ âmâ, Deus! Koendonro modo aieni. Âdykâ koendonro awârâ emyenro kientaymba kurâ, iwerâ olâ kyzetai! – kelymo.

*Jesus Levi† tynnonroem itoem ingâsedobyry*

*(Mt 9.9-13; Mc 2.13-17)*

<sup>27</sup> Ilâpygueduo myani Jesus târâpa âxiguely. Tadakobâday myani pymâ ton-honreim Roma donro xurâem dinheru impostu epywado emakeim nhedyly. Levi myani mâkâ impostu epywado emakerim ezedy. Ekadybyem myani kurâdo dinherugue impostu nhepywadodâ. Jesus aguely myani eyam:

– Yagâ âekâ. Ynynnonroem ikâ, yagâ mâsenomedâdoem – kely.

<sup>28</sup> Aituo myani Levi saudyly. Dinheru Roma donro pymâ xurâem emakely inmoly. Jesus agâ idâly; eynynnonroem tâitoem.

<sup>29</sup> Ilâpyryem Levi âty anhedily, Jesus tynnonroem tygâsebygueduo. Pyni tâkubâgueim anhenehonly. Jesus ingâsedily âtyam, dinheru impostu epywado emakewâni modo lâpylâ, kurâ domodo warâ. Toenzepa myani Levi etydâ kurâdo âwinduani modo.

<sup>30</sup> Tâlâ lâpylâ myani târâ uguondo modo ewy Jesus izepaom: fariseu domodo, Moisés inweniby enomedâni modo warâ, (fariseu domodo lâpylâ akaemo.) Jesus, akaemo modo agâ âwinduadily tientuomo, toenzepa iewiâpadylymo. Aituo Jesus eynynnonro modoram aguelymo:

– Kâzewenry ara inkâba amidilymo! Dinheru impostu epywado emakewâni modo agâ, kurâdo inkai modo agâ warâ mâwinduapyra tâise âmaemo – kelymo.

<sup>31</sup> Jesus olâ eyanmo aguely:

– Deus wâgâ auguehoem uirimpyrilâ asaemo. Tâwânuneim modo mawânkâ kua tyeni xuirim, tâwânery modo keba – kely.

<sup>32</sup> – Inakanhe aitaynrim modo igâseze kâewyly, inakanhe adâjidyly imohomoem. “Inakanhe aitânry urâ” kewâni modo igâseze inkâba xirâ kâewyly – kely Jesus.

*Saguhô kiuntuyby kyjimonre, iwelo kiuntuhoem*

*(Mt 9.14-17; Mc 2.18-22)*

<sup>33</sup> Tonlo modo ewy Jesusram aguely:

– João Batista eynynnonro modo, fariseu eynynnonro modo warâ nâwinduapyra tâisemo inanry, Deus agâ adâkehomoem. Akaemo pylâ âwinduadilymo, adakuilymo alelâ. Koendâpa akaemo arâ aidily – kelymo.

<sup>34-35</sup> Aituo Jesus eyanmo aguely:

† 5:26 Azagâ myani ezedy. Aramaiku-em Levi; hebraiku-em Mateus warâ.

– Eagâmo watay, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehomoem. Todohogüin-horam igâsedaymby modo watay, ohogüinrim agâ tatay, nâwinduapyra nitaymbamo, etyguemo lelâ. Ohogüinrim tuduaypa ituo lelâ nâwinduapyra idylymo myara – kely.

<sup>36</sup> Aituo Jesus enomedâzemo aguely:

– Ânguy âta iwelo natâwâbyra, âtâbâ tianwentâdoem. Nhawentâduo, âta iwelo inakanhe nhedyly kulâ tâise. Sawentâdobyry iwelo nadauguepa tâise. Tawentâzeim tâise, adaugueinro warâ. Âta iwelo ewy koendâpa âtâbâ sawentâdoem.

<sup>37</sup> Tâjituby vinhu etaryem xygatyby iwelo keba odaxi vinhu iwelo tâkanâduneba. Tâjituby iwelo keba odaji ekanâduo, etary tadaugueze mawânâ. Aituo vinhu apâdily.

<sup>38</sup> Aypa olâ, vinhu iwelo etaryem tâjituby iwelo xygatyby odajilâ ekanâdily watay, vinhu nhewantuo, imâm ituo, tâjituby iwelo tâzepâgueze. Êtary, vinhu alelâ nâxiumebyra.

<sup>39</sup> Ânguy vinhu iwelo tienydyze inkâba, vinhu nhewantyby enyrimbyryem. “Vinhu saguhobyrylâ koendonro tânyzeinhe” tâkezemo – kely.

{Jesus aguely, saguho konomedâdobyry kinmohoem, iwelo konomedâdo kieinwântoem. Saguhobyry mawânâ âzekiba nâseinwâmbyra iwelo konomedâdo agâ.}

## 6

*Jesus eynynonro modo tâzekobyzegueho oday trigu ewily nhasewâdomobyry  
(Mt 12.1-8; Mc 2.23-28)*

<sup>1</sup> Tâzekobyzegueho oday Jesus tynynonro modo agâ trigu ejidy ezakâ sakadylymo. Iduakâ takaday olâ myani Jesus eynynonro modo trigu ewily tasewâzemo. Tâmarygue nhatugue-lymo, nhagulymo idylymo.

<sup>2</sup> Fariseu domodo ewy, akaemo aidylymo tientuo Jesus eynynonro modoram aguelymo: – Kadasewâdaundâ, kadatuguewâdaundâ warâ awârâ trigu ewily iverâ. Tutuzelâ âmaemo, kâzewenry eynynâ kokobyzegueho oday kydâsewaniba kydawly – kelymo.

<sup>3</sup> Aituo Jesus aguely:

– Enanâguewâdaungâ typynigueba tâituo, kydamu Davi, eagonro modo warâ aitomobyry, toenzepa tâwindymogue.

<sup>4</sup> Deus ety odaji myakâwândy Davi egawândily. Deusram xuduypy pão modo nhanâdily, nhedawynly idily. Tagonrodo nhedawyn-hoem xuduwânmy warâ. Judeu domodo eynynâ olâ tâise akaemo awârâ pão modo nedawympa. Kurâdo eynynâ Deus agâ aguenri lelâ mawânkâ tâise mârâ pão edawynrim, âkelo modo lâpylâ warâpa. Deus olâ myakâwândy nehoguebyram nipyra mârâ nhedawynduomo.

<sup>5</sup> Uguondo Kaynâpa Âetyby urâ. Âdy iwâkuru adyeseim, adyesenry warâ tâzekobyzegueho oday xuturim urâ – kely Jesus.

*Jesus uguondo âzemapiluguedânry kua nhetobyry  
(Mt 12.9-14; Mc 3.1-6)*

<sup>6</sup> Tâzekobyzegueho oday Jesus egawântondily âta tâdâtâdyguyho odaji. Âwântybyem, Deus xunârygue tonlo modo nhenomedâdily. Târâ uguondo emary eahoru eynynonro âzemapiluguedânrybe myani.

<sup>7</sup> Tâlâ lâpylâ myani târâ fariseu domodo, Moisés inweniby wâgâ enomedâni modo warâ. Jesus tiunâguedoem kulâ aidily enugaeni modo xunâzelymo:

– Tâzekobyzegueho oday Jesus awâkâ uguondo emary kua nhedyly watay, Deus ezewenry arapa aitobyry kyzeatunre. “Deus aiedyseba ato amientai” kykenre – kelymo.

<sup>8</sup> Jesus olâ myani tutuze akaemo nhangahumo oday xunârymo. Awlylygue uguondo âzemapiluguedânryam aguely:

– Aukâ. XYDYK ikâ; âekâ xarâ waunroem – kely Jesus.

Agueduo uguondo saudyly, XYDYK idily.

<sup>9</sup> Jesus tonlo modoram aguely:

– Âdaraka Moisés inweniby tâzekobyzegueho oday aguienkyly wâgâ aguely? Âdyka adyeseinhe agueho, koendonro aguiendily, inakai aguiendily, kely? Ânguylâ tâzekobyzegueho oday kâmaynoem watay, kienmakely, tâwâlâ kingueânehonly? – kely Jesus.

<sup>10</sup> Aituo Jesus idânârâ kehoem kurâdo tydonro modo nhenuagaendily. Aguely uguondo âzemapiluguedânryam:

– Âzemapiluguegâ – kely.

Jesus agueduo, uguondo âzemapilugue myani, emary kua ienipyryem awlylygue.

<sup>11</sup> Awârâ tientuo myani Moisés inweniby wâgâ enomedâni modo, fariseu domodo warâ iewiâpadaynlymo. Âjigüe aguelymo:

– Âdakiendylyka ise awâkâ Jesus? – kelymo.

*Jesus tynnonro tienomedâguely modo induakehobyry*

*(Mt 10.1-4; Mc 3.13-19)*

<sup>12</sup> Ilâpygueduo Jesus iwy onwa âkuly, tynnonro modo agâ, Deus agâ agueze. Tânese myani Deus agâ xunâgu.

<sup>13</sup> Emetybyem, tynnonro modo ingâsedily. Akaemo ewy doze lelâ induakely. Aituo eyanmo aguely:

– Âduakelymo, ywâgâ amyguehomoem – kely.

<sup>14</sup> Doze lelâ iduakeyby:

Simão (“ ‘Pedro’ ise izedy” Jesus kehobyry.)

André (Simão iukono)

Tiago

João

Filipe

Bartolomeu

<sup>15</sup> Mateus

Tomé

Tiago (Alfeu imery)

Simão (tâty anary izetonro lelâlâ tawlylygue, Roma donrogue tywymâgu izepaom)

<sup>16</sup> Judas (Tiago imery)

Judas, Queriotte donro (Jesus egamenribyry izepanro modoran-ro.)

Warâ Jesus induakely.

*Jesus kurâ domodo nhenomedâdobyry, tâwânuneim modo kua nhetobyry warâ*

*(Mt 4.23-25)*

<sup>17</sup> Ilâpyryem myani Jesus xytâguely eagâmo iwy wogompyryem. Toenzepa iwy iakoay eynnonro modo. Toenzepa lâpylâ myani iwagueno modo ewy: Jerusalém donro modo, Judéia eynnonro modo, azagâ xidadâ parutabâ emelano Tiro, Sidom warâ donro modo warâ.

<sup>18</sup> Âdy Jesus agueho awyly xutuze, kua âiehoze warâ myani akaemo idâly. Kadopâgue taseim modo idâly myani, kua âieholymo lelâ.

<sup>19</sup> Idânârâ tâwânuneim modo MÂ’ tiendyse, eon-honrugue kua tâitomoem. Idânârâ MÂ’ ienipyry modo kua itaunmâmomy.

*Âdara tojiomaru kuru awyly xutuho*

*(Mt 5.1-12)*

<sup>20</sup> Ilâpygueduo myani Jesus tynnonro modoram MYK idily. Eyanmo aguely:

– Tuomareim kuru âmaemo âdy pebaom modo.

Deuslâ olâ âwymârymo, nhenimo warâ.

<sup>21</sup> – Tuomareim kuru âmaemo tâwinzeim modo.

Ilâpyryem ise idânârâ ize matomo tâlâ lelâ.

– Tuomareim kuru âmaemo tytyrunem modo, tuoguruneim modo warâ.

Ilâpyryem olâ ise omarumo, âilumo lelâ warâ.

<sup>22</sup> – Tuomareim kuru ise âmaemo. Iwerâ kulelâ mâjiewiâseolyo; ânguy izepa ato modo, tywykeduneim modo, tunâgueduneim modo warâ. Urâ Uguondo Kaynâpa Âtyby xurâem mawlymogue ise mâzenagazeolyo.

<sup>23</sup> Arâ watay, tytywanzeba itaugâ, tuomare lelâ. Deus olâ eydâ tatodâ imâem âyanmo nhudulype, omazeânimoem nhekanâdybybe. Deus izepanro modoram mâzenagazeolyo. Alâ mykâinane akaemo idamudo lâpylâ Deus xunâry egatuwâni modo nhenagazedily – kely.

<sup>24</sup> Tynynâbaom modoram aguely lâpylâ:

– Kaikâlâ ise âmaemo âdypeom modo.

Iwerâ kulelâ omarumo.

Ilâpyryenma ise tuomareba âmaemo.

<sup>25</sup> – Kaikâ âmaemo iwerâ pyni sodo modo.

Âsewinzeze âmaemo.

– Kaikâlâ âmaemo iwerâ tuomareim, tyeileim warâ.

Âjityenze, ohogüenze warâ âmaemo.

<sup>26</sup> – Kaikâlâ ise âmaemo, Deus izepa ato aieni modoram âzehogueorim modo. Alâ pylâ mykâinane âdamudomoram iozepa kulâ Deus itaumbyry egatuwâni modo âzehogueoly – kely Jesus.

*Âizepanromo agâ koendâ lelä itaungâ*

*(Mt 5.38-48)*

<sup>27</sup> Aituo myani Jesus agueondyly eyanmo:

– Ydataynrin modoram xirâ auguely. Âwynedânrymo agâ koendâ lelä itaungâ, ataen-homo mâinwynegulylymo agâ matomo ara lelä. Âwiâsenimo agâ koendâ lelä itaungâ.

<sup>28</sup> Ângulyâ âmeodoram igameduomo, âmeodoram igrimeinmobyry xurâem Deusram ekadaungâ koendâ lelä nhetoem.

<sup>29</sup> Mâjiwapagainhoduomo, tâpeânzeba itaungâ. MYRYK itaungâ, iladune âwapagain-homoem lâpylâ. Âgamizary âzemagazeoduomo, tâwâlâ âwalitoru nadâ lâpylâ.

<sup>30</sup> Âyanmo âdylâ ekanibyryram âunduwâtaungâ. Ângulyâ âsejiguy nhemagazeduo, “Epywagâne” tâkezeba itaungâ.

<sup>31</sup> Koendâ itaungâ âkelomo agâ, agâmo koendâ awyse matomo ara.

<sup>32</sup> – Koendâ lelä itaungâ idânârâ agâ, ataen-homo agâ kulelä inkâba. Agâmo koendonro agâ kulelä koendâ mawlylymo watay, âdyem nitaymba awârâ. Ânguy takazeno mâkeba âmaemo. Kurâdo inakai modo kuru tataen-ho agâ koendâmo lelä.

<sup>33</sup> Agâmo koendonro agâ kulelä koendâ mawlylymogue, “Deus koendonro kurâem xuduze, koendonro kydawlylygue” tâkewâzeba itaungâ. Âdyem itaymba awârâ. Kurâdo inakai modo kuru, tagâ koendonro agâ koendâmo lâpylâ.

<sup>34</sup> Ipywanimoem awyly mâuntulymoram kulelä âdylâ mâundulylymo-ro watay, “Deus âdylâ koendonro xuduze aguitobyry wâgâ” tâkewâzeba itaungâ. Deus einwântânry modo arâ adâisemo lâpylâ.

<sup>35</sup> – Akaemo ara inkâba itaungâ. Inagazenimo agâ koendâ itaungâ. Koendâ lelä xurâem aitaungâ, ipywadomo peba awylylymo umelâ. Inagazenimo koendâ lelä mâendylylymo watay, ise Deus koendâ nhedylylymo, koendonro nhuduly âyanmo warâ. Kurâ koendonro agâ kuleläba Deus koendâ awyly, kurâ inakanhe aini modo agâ lâpylâ, “Kagâ koendonro mâkeba Deus” kewâni modo agâ. Idânârâ agâ koendâ mataymo, Deus eynynonroem mawlylymo âdutuoze.

<sup>36</sup> Koendâ itaungâ, Kunwym kaynonro ara – kely Jesus.

*Ânguy kienwentâbyra kine*

*(Mt 7.1-5)*

<sup>37</sup> Jesus aguely myani:

– Ânguy kâzewentâdaundâ, Deus iwentâbyramo itoem lâpylâ. Ânguy kâdunâguedaundâ, Deus ânâgüebyramo itoem lâpylâ. Âkelomo inakanhe aitobyry enanânehonwâdaungâ, Deus inakanhe amitomobyry nhygakehoem.

<sup>38</sup> Âkelomoram ipa ato âunduwâtaungâ, tâwânrempa, Deus ize matomo nhuduhoem lâpylâ, saku kiampazezeduo, xumykadyly ara. Arâ lâpylâ ise Deus âyanmo imâem nhuduly, tâwânrempa mataymo. Imâem mâundulylymo watay, imâenlâ ise Deus âyanmo nhuduly. Imâemba watay, imâembalâ ise nhuduly warâ – kely Jesus.

<sup>39</sup> Aituo Jesusram âzenomedâolylymo, aguely:

– Epy, eagonro epy akobâniem nitaymba. Aidily-ro watay, azakâlâ tyihuguezemom tâtageim odâji.

<sup>40</sup> Enomedâni mawânkâ tonomedâzeim sakani kuru. Pymâ mawânkâ tâwaneim sakani kuru – kely Jesus.

<sup>41</sup> – Agonromo tâwentâze âmaemo, âdiempa inakanhe aitobyry wâgâ kulâ, âmaemo olâ imâem inakanhe kuru aini. Koendonro mâkeba awârâ. Agonro âzenupialodobyry lelä mâenkyllymo, inumo odano se iwatary imâsedo pylâ mâempyra âmaemo-ro myara.

<sup>42</sup> Agonromo âzenupialodobyry etyze mygüewâdylylymo, inumo oday se iwatarybe awyly umelâ. Saguhoem wao inumo odano se iwatary etywâdaungâ, koendâ agonromo âzenupialodobyry mâentyhomoem. Saguhoem kuru wao inakanhe amidlylymo imowâdaungâ. Inakanhe amidlylymo mâinmopygueduomoma ise tâwâlâ agonrodo mâunrudilylymo, inakanhe anipyra itoem – keze Jesus aguely.

*Ewily wâgâlâ nady âdaunlo awyly xutuly*

*(Mt 7.15-20; 12.33-35)*

<sup>43</sup> Jesus aguely:

– Se takyguenry, koendâ lelä ewily, ein-hoem tuduze. Se takygueim, inakanhe lâpylâ ewily, ein-hoem nudupa.

<sup>44</sup> Ewily wâgâlâ se âdaunlo awyly xutuly. Tygyureim, uvague tâwituneba; kazainwam, figuge tâwiseba warâ; tâwilygue lelä mawânrâ nady modo ewitu.

<sup>45</sup> Âdylâ ekanâdo oday koendonro ekanâdyby watay, koendonrolâ tâtyzeim. Inakai watay, inakai lâpylâ tâtyzeim. Arâ lâpylâ kunâry, kyangahu oday kydâpaunzedo kienkanâdyby. Koendonro watay, koendonrolâ aguykeho. Inakai watay, inakailâ aguykeho warâ. Aguykeho mawânâ, âdara kyangahu oday kunâgu awyly xutuen-hoim – kely Jesus.

*Deus aguehobyry ara lelâ aini, aguehobyry araba aini warâ*  
(Mt 7.24-27)

<sup>46</sup> Jesus eyanmo aguely:

– “Pymâ, Pymâ” myguelymo kulâ yam, aguehobyry mâinwâmpyra olâ âmaemo. Koendâpa awârâ.

<sup>47</sup> Âdaunlo ynynonro modo kuru awyly wâgâ ise kâengatuly. Auguely tydasemo; aguehobyry adyese mo warâ awylygue.

<sup>48</sup> Tâlâ uguondo koendâ kehoem tâty itânybyry nihugueba itoem; mâkâ emyenro asaemo. Tâsanigue kehoem tâty enu etary nhesaguely, tâhugamune kehoem tiempadâdoem, nâzekâniba itoem. Toenzepa kopâ ihugueduo, paru inwenduo, mârâ âji nhytyândyly warâ. Mârâ âtâ olâ nihugueba, tâhugane kehoem tuhu wâgâ itâdyby awylygue. Arâ lâpylâ yeinwânni modo kâenomedâdobyry imodânry modo.

<sup>49</sup> Tâlâ lâpylâ auguely idani modo, aguehobyry aniempyramo olâ waunlo. Uguondo koendâ tâty itâdânry emyenro akaemo. Sagunu wâgâ kulâ tâty intâdyly. Imâem nesagueba âtâ enu tiempadâdoem. Toenzepa kopâ ihugueduo, paru inwenduo, mârâ âji nhytyândyly. Aituo âtâ ihuguely. Idânârâ kehoem adakalaguely, tâhuganeba itâdyby awylygue – kely Jesus.

## 7

*Jesus sodadu domodo iwymâry agâ tâwaneim ewânu ume kua nhetobyry*  
(Mt 8.5-13)

<sup>1</sup> Akaemo kurâdo agâ agueypyem Jesus idâly xidadâ Cafarnaumram.

<sup>2</sup> Tâlâ myani mârâ xidadâdâ sodadu Roma donro iwymâry. Tâlâ lâpylâ myani eagâ tâwaneim mâkâ ize ato kuru. Toenzepa myani mâkâ tâwaneim ewânu iguezeseaji kehoem.

<sup>3</sup> Aituo myani sodadu iwymâry “Jesus kurâdo kua nhedyly” kely indadyly. Awârâ tindatuo myani judeu domodo iwymâry ewy ingâsedyly. Eyanmo aguely:

– Jesusram ekadaunda wao, yagâ tâwaneim kua iese âetoem – kely.

<sup>4</sup> Aituo idâlymo Jesus agâ agueze. Eagâ toxioduomo, aguelymo mâkâ sodadu iwymâry aguehobyry. Myarâ idâhoem nhekezedylymo. Aguelymo:

– Uguondo koendonro mâkâ. Toenzepa xina izetonro mâkâ. Nhekadyby aieta wao.

<sup>5</sup> Roma donro wâne mâkâ, kurâ judeu domodo izetonro olâ mâkâ. Mâkâlâ keankâ âtâ itânehonrim, xina Deus wâgâ agueze âtâdyguyho – kelymo Jesusram.

<sup>6</sup> Aituo Jesus eagâmo idâly. Âtânra saindylymo ume, sodadu iwymâry tataen-ho modo ewy Jesusram agueze ingonodyly.

– “Pymâ, âdy mâkeba urâ, ietyram mâwântoem.

<sup>7</sup> Toenzepa ton-honreim âmâ, agâ tunâgueim mâkeba tâise urâ. Ton-honreim âmâ. Iwague endaylâ yagâ tâwaneim kua itoem amyguely watay, kua ise lelâ merâ.

<sup>8</sup> Ywymâry modo aguely tâinwânse urâ. Tyzodadugue lâpylâ urâ yeinwânni modogue warâ. Kâingonotuo, tâtâze lelâ. Eagonro kâingâseduo, tâese lelâ warâ. Yagâ tâwaneinram ‘Xirâ aiekâ’ ugueduo, inepa kehoem adyese lelâ warâ” keanry xina iwymâry – kelymo ingonotaymy modo.

<sup>9</sup> Awârâ tindatuo myani Jesus toenzepa kehoem âsewânily, mâkâ sodadu domodo iwymâry toenzepa tâinwândyly tiuntuduo. MYK idyly. Aguely mâkâ kurâdo tyampygueni modoram:

– Eagâ tâwaneim kua kânhedily tâinwânse mynra mâkâ uguondo. Ânguy yeinwânni kâentaymba urâ mâkâ Roma donro yeinwânto ara kehoem. Kypemugudo israelita domodo duay kuru ânguy yeinwânni lâpeba mâkâ ara! – kely Jesus.

Iwague endaylâ myani Jesus aguely:

– Kua ikâ – kely.

Agueduo, uguondo kua idyly.

<sup>10</sup> Sodadu iwymâry eataen-ho modo odopâdyly etyram. Saintrybyem mâkâ tâwâneimbyry kua itybyem nhedylymo.

*Jesus pypâ imery igueypy kurâem nhetondobyry*

<sup>11</sup> Mâkâ uguondo kua ienipyryem ine nipyralâ, Jesus idâly xidadâ Naimram. Eynynonro modo, toenzepa kurâ domodo warâ idâlymo eagâ.



<sup>12</sup> Xidadá odaxi tâdâwânto iwaguepa ataymo, Jesus âguedy epyâdoram sani modo nhodylymo. Pypâ imery tokaleom myani mâkâ âguedy. Toenzepa myani kurâdo mârâ xidadâ odano modo igueypy nhapygue idâlymo.

<sup>13</sup> Isebyry tientuo toenzepa myani Jesus intyendily. Aituo aguely:

– Tuogunrepa ikâ – kely.

<sup>14</sup> Agueypyem myani iwaguepa saindily. Mâkâ igueypy sawo MÂ' nhedyly, sani modo epagudoem. Aituo myani epagudylymo. Epaguduomo, Jesus aguely igueypyram:

– Kurâem itongâ. Aukâ, salokuzenomo – kely.

<sup>15</sup> Jesus aguely umelâ kehoem mâkâ salokuzenomo kurâem itondily. Tawo wâgâpa saudily, âjitalny alelâ. Jesus aguely isenra:

– Anra âmery – kely.

<sup>16</sup> Salokuzenomo igueypy, kurâem itondily tientuo toenzepa kehoem idânârâ âseanedilymo. Deusram aguelymo myani:

– Koendonro âmâ, Deus! Xina agâlâ merâ âynynâ ageim, mâkâ xina emakeze mâingonotyby! – kelymo.

<sup>17</sup> Idânârâ Judéia eynynâ, tânkâ iwaguepaom modo eynynâ warâ indataynlymo Jesus Naim donro salokuzenomo igueypy kurâem nhetondobyry.

*João Batista tynnonro modo Jesus agâ agueze ingonotobyry*

*(Mt 11.2-19)*

<sup>18</sup> João Batista Jesus aitobyry egary indadyly. Eynnonro modo eyam egatuim.

<sup>19</sup> Aitobyry egary tindatuo myani azagâ tynnonro modo ewy ingâsedily. Eyanmo aguely:

– Jesusram idâwâtaungâ. “ ‘Deus ingonotyby âese’ kehobyrylâka âmâ? Eagonro ise xina inwânwânkily?” kewâtaunda Jesusram – kely João Batista.

<sup>20</sup> Aituo Jesusram idâlymo. Saintybyem, aguelymo:

– “ ‘Deus ingonotyby âese’ kehobyrylâ âmâ? Eagonro ise xina inwânwânkily?” keze João Batista ingonotyby xina. Awârâ mawânkâ tiuntudyze ato – kelymo.

<sup>21</sup> Saintaymo toenzepa myani Jesus kurâdo tâwânuneim modo kua nhedyly. Kurâdo inakanhe ieni kadopâ nhâkywâdily. Epy modo nhetoem kua nhedyly lâpylâ warâ.

<sup>22</sup> Aituo Jesus aguely mâkâ azagâ João ingonotybyram:

– Odopâdaungâ. Mâentybymo, mâindatybymo warâ Joâoram egatuwâdaunda. “Jesus tâwânuneim modo kua nhedyly xina nedâ. Epybyry modo koendâ tâense. Adakobâdânrybyry modo tadakobâzemo iwerâ. Tâjimitugueygue tâwânuneimbyry modo itugozenybyem. Kydatânrybyry modo koendâ tydasemo. Iguewâtybyry modo kurâem tyetonze. Kaikâ modoram Deus xunâry iwâkuru Jesus nhegatuly xina nidadâ lâpylâ.

<sup>23</sup> Tuomareim ise yeinwândily imodânry modo!” nygue Jesus. Myguelymo ise Joâoram – kely Jesus.

<sup>24</sup> Aituo João eynnonro modo odopâdilymo. Idâpygueduomo Jesus aguely João wâgâ kurâ domodoram:

– Agui âmaemo ewy tâtâze keankâ âji âdy peba atoram, João aguely idase. Âdaunloka mâkâ, inanajimo? Etaungâ adapezeinly-ro watay, poji wayam wayam warâ tâzekânize. Myara keankâ João, inanajimo? Âdy pebaom modoram âkelo unâ nhegatuly, âdypeom modoram âkelo unâ nhegatuly warâ keankâ aguely, inanajimo? Ainkâba, tokalelâ mâkâ xunâry. Âdypebaom agâ, âdypeom agâ alelâ mâkâ Deus wâgâ aguely.

<sup>25</sup> Medâmolâ ety iwogonro iwâkuru keba awyly. Âdypeom xidadâ odano, âtâ imâsedo iwâkurugue tâtyreim warâ mawânkâ âtâ tâjiwogonro tâwânenseim ieni. Âdypeom mâkeba mâkâ.

<sup>26</sup> – Âdaunlo kuruka mâkâ, âmaemoem? Deus itaumbry egatuim? Mâkâlâ mâkâ Deus itaumbry egaturinlâ. Warâ olâ aguely âyanmo. Deus itaumbry egatuim âdaunlo kulâ mâkeba mâkâ. Idânârâ Deus itaumbry egatuwâni modo takaze tynreim mâkâ.

<sup>27</sup> Warâ iwenibyerem awyly Deus itaumbry awo wâgâ: “Anra yaumbry egatuim. Waunroenlâ ise merâ kâingonodyly, kurâ domodo nhonse Messias saintodâ” kewândymy Deus. Kurâ domodo yaintodâ nhoniem kehobyry mâkâ João – kely Jesus.

<sup>28</sup> Jesus aguely eyanmo:

– Uguondo âdaunlo kulâ mâkeba mâkâ João, uguely olâ âyanmo. Tynreim mâkâ, idânârâ saguhoem Deus itaumbry egatuwâni modo takaze. Mâkâlâ keankâ “Inepa ise Deus Ingonotyby âewyly” kerim. Âdara Deus kurâ domodo iwymâryem idily awyly koendâ nutuba olâ mâkâ. Iwerâ Deus Ingonotybygue tywymâgueim watay, mâkâ takaze ise xynru. Awârâ xuturim watay, mâkâ takaze ise xynru, tâwâlâ lelâlâ wâne ise âdaunlo kulâ awyly – kely Jesus.

<sup>29</sup> Pymã domodo mâkeba myani João aguely ehogueni, âdaunlo kurâdo kulã, Roma iwymâryem impostu emakewâni modo kulã warã. Awârã tindatuo, toenzepa kurâdo mâkã xunãry ize idyly. Deus ize ato araba aitybyem tawyly tutuzemo tawylgyue. Deus tâinwânseim awyly tutuzemo. Aituo Joãooram batiza âieholymo, Deus eynynnonroem tawyly tienehon-homoem.

<sup>30</sup> Judeu domodo iwymârydo olã myani, João aguely tindadysebamo, fariseu domodo, Moisés inweniby wãgã enomedâni modo warã. Awylgyue myani Deusram nãzemaakeoba awylymo, Joãooram batiza nãiehoba awylymo warã.

<sup>31</sup> Jesus kurâdo târã âtãdygybyram aguely:

– Âdaunloem mawylmo wãgã ageuze urã, âmaemo xirã umeno modo.

<sup>32</sup> Iamimeom tagonrodo taseray âzenanãdogue tâzenanãdzyebaom ara kulã âmaemo. Tataen-hodo tugoru indyduomo, tâidysebamo. Tataen-hodo itynru ume, tytyrembamo.

<sup>33</sup> Âdiempa kulã João Batista âwinduadyly, vinhu nenypa. Warã awylgyue, “Kadopãbeom awãkã” myguelymo.

<sup>34</sup> Urã Uguondo Kaynãpa Âetyby kãwinduadylygue, kadakuilygue warã, “Idolai awãkã. Nhudyypymo tâinze, tânyze alelã. Impostu epywado emakewâni modo, kurâdo inakai modo eataen-ho warã awãkã” myguelymo.

<sup>35</sup> Aguitobyry wãgãlã Deus xurãem, Deus xurãempa warã kydzãzeholy – kely Jesus.

*Jesus Simão etyram âwinduase idãhobyry*

<sup>36</sup> Tãlã myani uguondo Simão keho. Fariseu myani mâkã. Jesus ingãsedily myani tâtyram âwinduase idãhoem. Jesus idãly. Egawãntybyem ekadyly tâwinduatoem.

<sup>37</sup> Tãlã myani târã xidadã oday pekodo inakanhe kehoem aityby. Jesus olã inakanhe aitobyry modo xygakeimbyryem. Inakanhe adãitobyry modo Jesus nhygakehobyry wãgã myani mâkã pekodo eagã tuomare tawyly tienehondyze awyly. “Kopae fariseu Simão etydã ise Jesus âwinduadyly” kely tydase myani. Aituo Jesus âwinduatoram idãly. Uriza etary tâwãenseim alabastrogue xygatyby myani tagã nhakly urizague tase.

<sup>38</sup> Egawãndily. Jesus eydã atoram iwaguepa kehoem idãly. LãPU idyly. Eogumadyly. Aituo Jesus ihuru inkuily tânuguruge. Tyangahudugelã Jesus ihuru in-huguoguely. Ihuru nhonugudyly. Ihuru onwa uriza nhapãdily.

<sup>39</sup> Pekodo aidily tientuo myani Simão aguely tyangahu oday:

– Deus eynynã ageuim mâkeba keanra awãkã Jesus. Deus Ingonotybylã-ro watay, tutuze tâise, awãkã pekodo toenzepa inakai lelãlã awyly. MÃ nãiehowãbyra tâise warã – kely myani Simão tyangahu odaylã.

<sup>40</sup> Simão xunãry tutuze olã myani Jesus. Aituo eyam aguely:

– Simão, koendã idakã. Âdylã auguedyse watobe urã âyam – kely.

– Aguekã lelã, Ienomedâni – kely.

<sup>41</sup> Aituo Jesus aguely:

– Tãlã myani azagã uguondo, tydinherugeinram dinheru ekanibyry modo. “Ipywaze lelã xina” kewãnmomy. Tokalã myani imãem kehoem dinheru ekani, quinhentas moedas pratagueto lelã. Eagonro myani âdiempalã nhekadyly, cinquenta moedas prataguetolã.

<sup>42</sup> Akaemo azakãlã olã myani, tienkadyby ebyry nudupamo, âdy peba tawylmogue. Aituo dinheru xuduimpyry aguely azakãlãam: “Âdainkãba. Enanãnehonze lelã urã awãrã” kely azakãlãam. Aituo, mâkã azakãlã tâpywabyra ato nhenanãnehonly – kely Jesus.

Aituo Simão nhapãiguely:

– Âdaunloka mâkã ewy ogondarymo enanãnehonze lelã urã keduo, mâkã agueypy iwyneni kuru, imãem tugondagueim, imãemba tugondagueim? Âdara inanaji, Simão? – kely.

<sup>43</sup> Aituo Simão in-hoguly:

– Mãkã imãem tugondagueim – kely.

– Iozelã mihoguagui – kely Jesus.

<sup>44</sup> Jesus MYK idyly pekodoam. Simãoram agueondily:

– Metai merã pekodo anhekyly. Amãnhetyby takaze kehoem merã pekodo ayedyly; ywynedã kuru tawyly nhenehonly, xurãem agãnhetyby wãgã. Kãzewenryem adakobãni aieto ara ayepyra enra âmã. Ity odaji iegawãmpygueduo, agã tâwaneinram uhuguogue-honwãbyra enra âmã. Merã olã tânuguruguelã kehoem uhuru nigokeagui. Tyangahudugue uhuguogueagui warã.

<sup>45</sup> Yaimpygueduo, wonugubyra enra âmã. Merãma uhuru ionuguzezelã.

<sup>46</sup> Âdiempalã azeiti yangahu onwa mânhepyra enra âmã. Merãma uriza tâwãenseingue kehoem uhuru niãrãnzeãntai.

<sup>47</sup> Warã âyam aguely, Simão. Toenzepa yagã tuomaru nhenehonly merã pekodo, idãnarã inakanhe aitobyry modo kãyngakeduo. Imãem inakanhe aitobyry kãyngakewãdyby

modo, imâem lâpylâ aidylymo urâem ywynedâ tawyly tienehon-homoem. Imâemba kulâ inakanhe aitobyry kânygakewâdyby modo olâ imâemba kulâ urâem aidylymo – kely.

<sup>48</sup> Ilâpyryem myani Jesus aguely pekodoram:

– Idânârâ nhutuhomoem, saguhoem inakanhe amitobyry modo xygakeimbyryem wawyly, augueondyly. Inakanhe amitobyry modo xygakeagui – kely.

<sup>49</sup> Târâ eagâ âwinduataynim modo aguelymo:

– Idataungâ! Arâ aguepa tâise awâkâ. Deus lelâ inakanhe aguitobyry modo xygakeim, âdaunlo kulâ mâkeba – kelymo.

<sup>50</sup> Jesus olâ pekodoram aguely:

– Yeinwândylygue, enra imakely. Agâlâ ise Deus nheniem – kely.

## 8

*Pekodo modo, Jesus eynnonro modo warâ nhemawyadâdomobyry*

<sup>1</sup> Iweâpa itybyem Jesus adakobâze idâly xidadâ modo anakâ, poji anakâ warâ, unâ iwâkuru agueze, âdara Deus kywymâryem awyly wâgâ. Doze eynnonro modo eagâ tâtâzemo myani.

<sup>2</sup> Xidadâram, poji anaxi warâ tâtâly iraynâ, Jesus pekodo modo tâwâneim, kadopâgue taseim modo warâ kua nhedyly. Azagâ tokalâ warâ mâkâ ewy Jesus einwânniem imâ: Maria Magdala donro (sete kadopâgue taseimbyry Jesus kua nhetyby),

<sup>3</sup> Joana, (Herodes isejiguy eni Cuza iwidy), Susana, eagonro pekodo modo lâpylâ warâ, Jesus, eynnonro modo tâmawyadâzemo myani, tydinheruruguelâ, tâlâ tatoguelâ warâ.

*Jesus trigu ewy tamuizze etâni wâgâ unâ nhegatuhoobyry*

(Mt 13.1-9; Mc 4.1-9)

<sup>4</sup> Toenzepa kurâdo Jesus aguely idase idâlymo, xidadâ âkelo anano modo warâ kehoem. Idânârâ âtâdygybyem awylymo ume myani enomedâzemo unâ nhegatuly;

<sup>5</sup> aguely:

– Tâlâ myani uguondo trigu tamuizze etâni typi ezay. Nhamuinday, tâlâ myani ânwa oze ihugueim. Mârâ myani sakadaynim modoram tadakabeoze, konopio modoram tadaguoze warâ.

<sup>6</sup> Tâlâ pylâ myani toenzepa tuhube atoram ihugueim. Mârâ myani tyazeze, tyluseze warâ. Ago nipyra olâ. Iladaynly lelâ, iwindy ago ondaxi nâtâba awylygue.

<sup>7</sup> Tâlâ myani tygyreimpe atoram ihugueim. Tygyreim modo, trigu modo warâ âzekiba ago tâise myani. Tygyreim olâ ago ini kuru, trigu takaze kehoem. Aituo kopâ ihugueyby nikuiba. Mârâ duay tawylygue trigu newiseba.

<sup>8</sup> Tâlâ myani onro iwâkuru onwa ihugueim. Iazewâdyly, ilusewâdyly, koendâ ago itaynly warâ myani. Toenzepa myani mârâ nady modo onro koendonro wâgâ iazepy ewitunu. Koendâ kehoem myani ekaunâdyly, toenzepa ewitugue. Ewy wâgâ cem lelâ myani ewily nhuduly – kely Jesus.

Eyanmo Jesus aguely:

– Xirâ unâ koendâ mâuntudyze âmaemo-ro watay, koendâne angahumo odaji ietaungâ – kely.

*Jesus âdakeze nady wâgâ adâkely awyly aguehobyry*

(Mt 13.10-23; Mc 4.10-20)

<sup>9</sup> Akaemo doze lelâ Jesus eynnonro modo nutubamo âdakeze aguely awyly. Aituo nhapâguelymo:

– Âdakezeka awârâ unâ aguely? – kelymo Jesusram.

<sup>10</sup> Aituo Jesus aguely:

– Saguhoem mykâinane Deus nutuen-homba âdara idânârâ iwymâryem tâidyly. Urâlâ olâ xutuen-hoim âyanmo. Koendâ ise âyanmo kâuntuen-honly. Deus koendâ tiuntudyzebaom modoram olâ unâ tâgatuzeingue kulelâ kâenomedâdyly. Agânhedyly tâensemolâ wâne, nepyramo-ro waunlo ara kulelâ. Aguely tydasemolâ wâne, âdakeze aguely nutubamo olâ ise, nidapyra waunlo ara lelâmo.

<sup>11</sup> – Unâ nady ewy târâ târâ warâ ihugueyby, âdakeze kâenomedâdo aguely awyly ise kâengatuly. Mârâ nady ewy ara mawânâ Deus itaumbry aidyly. Târâ târâ warâ onro onwa nady ewy samuin-hobyry ara lâpylâ mawânkâ Deus itaumbry idataynim modo âzekiba lelâba nheinwândylymo.

<sup>12</sup> Mârâ nady ewy ânwa oze tamuizze etâdyby tadaguoze, tadakabeoze warâ. Aituo âdy niazepa myani târâ samuin-hobyrydâ. Tâlâ lâpylâ arâ Deus itaumbry idataynim modo. Tydasemo wâne. Inepa olâ Satanâs idânârâ indatybymo nhangahumo odaypa nhetyly. Aituo Deus neinwâmpyra idylymo.

<sup>13</sup> – Mârâ nady ewy onro tuhubeom onwa ihuguewâdyby inepa kehoem iazely. Iwindy modo ago ondaxi nâtâba awylygue olâ, inepa nady iladaynly, iguewâdyly warâ. Tâlâ lâpylâ arâ Deus itaumbry idataynrim modo. Tindatyby modo tâinwânsemo tuomare kehoem. Tâzenagazeoduo, âwankuem tâiehoduo, tâdunâgueoduo warâ olâ inepa kehoem Deus neinwâmpyra idylymo.

<sup>14</sup> – Mârâ nady ewy tygyreim duaxi ihuguewâdyby, ago tâise wâne, newiseba olâ, tuahuze mârâ tygyreim awylygue. Tâlâ lâpylâ arâ Deus itaumbry idataynrim modo, Deus tâinwânsemo wâne. Âdype tidyly kulâ, tohomaendyly kulâ warâ olâ enananomo. Toenzepa tydinherugadyly kulâ ize atomo warâ. Awylygue Deus nhenanânehonlymo, ize ato aniempyra idylymo warâ. Deus wâgâ ânguy agâ aguepa idylymo.

<sup>15</sup> – Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim. Tâlâ lâpylâ arâ Deus itaumbry idataynrim modo, tindakylymo, nheinwândylymo lelâlâ. Deus aguehobyry wâgâ lelâ âpaunzedylymo. Adyese mo lelâlâ Deus “Aietaungâ” kehobyry – kely Jesus.

*Âdy kioempyra kine Deus kurâem anhetyby*

*(Mc 4.21-25)*

<sup>16</sup> Aituo Jesus aguely:

– Tâdâzesagon-ho kienmanâduo, âdylâ iaxi kioentaymba kurâ. Kama iaxi kioempyra lâpylâ kurâ warâ. Kayanlâ kianlokuândyly ejidyranlâ, idânârâ âwântaynrim modo nhesagon-hoem.

<sup>17</sup> Idânârâ unâry mâuntuba mitomoemba xirâ auguely. Koendâ kehoem mâuntuhomoem auguely. Idânârâ soentaymby modo âjijepanâgueoze lelâ. Idânârâ tydasenrybyry âjidahoze.

<sup>18</sup> – Idânârâ auguehobyry koendâ idataungâ. Imâem ywâgâ mâuntudyze âmaemo watay, imâem ise mâuntulymo. Ywâgâ mâuntudyzeba âmaemo watay olâ, imâemba mâuntuybymo enanânehonze âmaemo. Utuba ise âmaemo warâ – kely Jesus.

*Jesus tyze, tukonodo warâ wâgâ aguehobyry*

*(Mt 12.46-50; Mc 3.31-35)*

<sup>19</sup> Jesus aguely ume ise, iukonodo warâ saindylymo eydâ atoram. Toenzepa myani kurâdo eyam iwaguepa saintomoemba.

<sup>20</sup> Aituo tonlo modo ewy Jesusram aguely:

– Âze, âukonodo warâ tarâ kuohomo. Agâ adâkedyzemo – kely.

<sup>21</sup> Jesus aguely idânârâ tonlo modoram:

– Ze lelâlâ mâkâ pekodo. Konodo lelâlâ akaemo uguondo modo warâ. Deus xunâry idataynrim modo, aietaynrim modo warâ olâ yze ara, konodo ara warâ kâenkyly – kely Jesus.

*Jesus sapezenru ton-honreim, kopâ tyelugueim agonro nhepagunâdobyry*

*(Mt 8.23-27; Mc 4.35-41)*

<sup>22</sup> Alâ myani pepi odaxi âxiedybyem Jesus tynynonro modoram aguely:

– Paru kuyam inoro – kely.

Aituo âzekuâdylymo.

<sup>23</sup> Tâzekuâdaymo myani Jesus xykyly. Kopâ sapezenru ton-honreim agonro adaguly. Toenzepa kehoem paru adahugânyly. Pepi xumyly parugue, xytyzeaji kehoem idyly. Kâmaynomoem kehoem myani.

<sup>24</sup> Aituo âseanedylymo xytyzeaji kehoem tawylmogue. Tâseaneduomo, Jesus nhuagueândylymo. Adaenkelymo:

– Pymâ, âwaguegâ! Aukâ! Kyiguely ise xirâ! Pepi xytyzeaji xirâ! – kelymo.

Aituo saudyly. Ton-honre kehoem aguely:

– Arâ kehoem tadapezeinzeba ikâ! – kely sapezenruram.

– Tahugâneba ikâ. Ipagugâ – kely paru sahugânuram warâ.

– Agueduo tapezenremba idyly, paru tahugâneba idyly warâ.

<sup>25</sup> Aituo tynynonro modoram aguely:

– Yeinwâmpyra lelâ waunlo ara lâgâlâma âmaemo! – kely.

Toenzepa âsewânilymo, âseguâdâdylymo warâ. Aguelymo:

– Etaungâ! Sapezenru nadapezeimba itoem adyese. Paru tahugâneba itoem adyese warâ. Âdara kuruka awârâ modo anhedyly? Ânguy kuruka awâkâ? – kelymo.

*Jesus uguondo kadopâgue taseim kua nhetobyry*

*(Mt 8.28-34; Mc 5.1-20)*

<sup>26</sup> Jesus, tynynonro modo agâ saindyly myani paru Galiléia kuyam, Gerasaram\*.

\* 8:26 Gadara lâpylâ myani mârâ âji ezedy.

<sup>27-29</sup> Jesus pepi odayba ipygueduo myani uguondo mârâ xidadâ odano eyam idâly. Iweâpa myani mâkâ uguondo, kadopâ modoram inakanhe âieholo. Âtâ oday nitaymba mykâinane. Tâtyemba mykâinane adakobâdily tâdâzepyâdo odakâ. Alâ myani korenty ferroguetogue in-hugâjilymo, nhemakâjilymo warâ. Tatâwâze lelâ olâ mykâinane kadopâ modo eon-honrugue. Kadopâ modolâ mykâinane sani âdy peba atoram. Aituo Jesus iopaji saintybyem, mâkâ kadopâgue taseim toenzepa kehoem adaenkely. Jesus enado âzeguhoam idily. Jesus aguely kadopâ modoram:

– Igasewâdaungâ merâ uguondo odaypa – kely.

Arâ Jesus agueduo myani kadopâ modo mâkâ uguondo ioday aguelymo Jesusram:

– Xina kâdynanâdâ, Jesus, Deus Ton-honreim Imery! – kely ago kehoem.

<sup>30</sup> Arâ adaenkeduo Jesus aguely eyam:

– Ânguyka izedy? – kely.

– “Aguiom” iezedy – kely myani.

Arâ aguely, agui kadopâ modo tuoday awylygue.

<sup>31</sup> Kadopâ modo aguely:

– Mârâ tâtagueim tuhuadaguenry odaji xina kâjigonodâ, xina âsenagazedoram – kelymo.

Tadaenkeze myani aguezesedylymo.

<sup>32</sup> Tâlâ myani târâ iwaguepa toenzepa pâsega âwinduani modo iwy wâgâ. Aituo kadopâ modo aguelymo Jesusram:

– Awâkâ pâsega modo iodaxilâ xina igonokâ – kelymo.

Aituo Jesus eyanmo aguely:

– Tâwâlâ idâwâtaungâ iodaximo – kely.

<sup>33</sup> Arâ Jesus agueduo myani, kadopâ modo uguondo odaypa egasewâdily. Pâsega modo odaxi egawândilymo. Kadopâbe tâituo myani, pâsega modo enuimbadaynly. Egatudylymo. Iwy wâgâpa adamunedilymo paikaji. Idânârâ kehoem tyense; iguwâdilymo.

<sup>34</sup> Pâsega eni modo, iwy wâgâpa pâsega paikaji adamunedily emâmomy. Mârâ tientuomo, âwenkelymo. Inepa kehoem idâlymo xidadâram. Poji anakâ takadaymo tonlo modoram nhegatulymo pâsegado aitobry. Xidadâ odaxi taintuo myani tonlo modoram aidily tientyby nhegatulymo lâpylâ.

<sup>35</sup> Arâ egary tindatuomo, xidadâ odano modo aityby ese idâlymo lâpylâ. Jesusram saindilymo. Myarâ saintybyem myani uguondo kadopâgue taseimbyry nhedylymo. Âzetydâdybyem, ekadybyem warâ Jesus aguely idase saguhoem tientomobyry araba. Koendâ, kua itybyem tientuomo myani Jesus nhytadylymo, kadopâ modo nhâkyze eon-honrugue.

<sup>36</sup> Jesus awâkâ uguondo kua nhedyly etaynrinbyry modo tientyby wâgâ nhegatulymo.

<sup>37</sup> Aituo idânârâ Gerasa eynynonro modo Jesus nhytadylymo.

– Âdylâ aiese awâkâ tarâlâ watay – kelymo.

Aituo eyam aguelymo:

– Âxiguegâ xina ety anaymba. Taynynâ inkâba ikâ – kelymo, Jesus tâguymo pâsega nhaindyseba tawylymogue.

Agueduomo Jesus âxiguely; pepi odaji âxiedily, tâtâhoem.

<sup>38</sup> Aituo kadopâgue taseimbyry aguely eyam:

– Idâze urâ agâ – kely.

Jesus olâ aguely:

<sup>39</sup> – Itynra odopâgâ. Âmâem Deus anhetyby egatura – kely.

Agueduo, uguondo idâly. Idânârâ târâ tâtyuneim modoram, Jesus kua tyetobyry egatuwânmy.

*Jesus pekodo tâwâneim kua nhetobyry, âwynsaundo igueypy kurâem nhetobyry warâ (Mt 9.18-26; Mc 5.21-43)*

<sup>40</sup> Jesus, eynynonro modo warâ mârâ parulâ myani nhekuâdongulymo. Toenzepa myani kurâ domodo târâ mâkâ inwânwânse awyly. Iomarumo saindily tientuo.

<sup>41</sup> Eagâmo aguely ume myani uguondo Jairo keho, âtâ tâdâtâdyguyho iwymâry, Jesus iopaji saindily; âzeguhoam idily enado. Aguely:

– Inoro wao ietyam.

<sup>42</sup> Iexiry, tokaleom, doze anugueto toenzepa ewânu, iguezeseaji kehoem. Kua ietâ wao – kely.

Aituo myani Jesus eagâ idâly. Idâday, tokonoze kehoem kurâ domodo.

<sup>43</sup> Tâlâ lâpylâ myani pekodo tâwâneim kurâ domodo duay. Imery etary myani âunkeim; kuapa idily agâ toenzepa myani iunu ihuguely, toenzepa lelâlâ. Doze anupe myani mâkâ arâ ewânu. Tâpyneândilygue mykâinane idâzesedyly kua kyeni modoram. Tâwâense

nhepywadyly, kua nipyra-ro warâ. Âdara tienwiândyly awyly nutubamo olâ mykâinane. Toenzepa kua kyeni modo epywanibyryem myani kua tâitoem tâkewâduo, idinheruru olâmy adainwâm.

<sup>44</sup> Aituo myani saindyly Jesus ikaynâ. Eyam taintuo, ety iwogonro MÂ' nhedyly, ikaynâ. Ety MÂ' nhedyly umelâ kehoem myani iunu ihuguely epagudyly, kua idyly.

<sup>45</sup> Aituo Jesus nhapâiguely:

– Ânguyka enra MÂ' yeni? – kely.

– Urâ keba – kely Jesus iopano modo.

Aituo Pedro aguely:

– Egâ, toenzepa tarâ kurâ domodo awyly; onwa MÂ' tâiselâ kehoem, Pymâ. Agui asaemo ewy MÂ' âetai – kely.

<sup>46</sup> Jesus olâ wakely lelâ:

– Ânguylâ MÂ' yetai. Won-honrugue ânguylâ kua xietai, xutuanze – kely.

<sup>47</sup> Mâkâ pekodo myani totoendo nutuba tâituo. Tyanugue, tapâne kehoem Jesus enadoram saindyly. Âzeguhoam idyly, tâinwânse tawlylygue. Idânârâ enanaynmo aguely:

– Urâ enra MÂ' âeni, Jesus, kua yeniem mawlyly, kâuntuduo. MÂ' âetuolâ enra koendâ kehoem kua widyly – kely.

<sup>48</sup> Aituo Jesus eyam aguely:

– Kua itybyem âmâ, kua kyetâ wawlyly mâinwântobyry wâgâ. Idâ lelâ itynra Tâseguâdâzeba ikâ – kely Jesus.

<sup>49</sup> Jesus aguely umelâ Jairo ety donro saindyly, aguely:

– Jairo, ipa ixiry, nigueaki! Itynra âdaiseba kulâ Jesus kadadâ – kely.

<sup>50</sup> Mâkâ aguely tindatuo Jesus Jaioram aguely:

– Tadahulizeba ikâ. Yeinwânkâ. Kurâem itonze lelâ ixiry, koendâ ise lelâ warâ – kely.

<sup>51</sup> Aituo myani saindylymo Jairo etyram. Jaioram aguely:

– Inoro âmâ, âwydy warâ igueypyram – kely.

Ilâpyryem tynynonro modoram aguely myani:

– Pedro, João, Tiago alelâ xina agâ negawândâ. Eagonrodoma talâ wao nidâ – kely.

<sup>52</sup> Idânârâ târâ âtâdygyby modo eogunrunu, itynrunu warâ, âwynsaundo igueduo. Aituo Jesus aguely:

– Tuogunrepa itaungâ. Niguwâpyra awâkâ âwynsaundo, xykyly kulâ – kely.

{Arâ aguely, kurâem tientondyly tiuntuduo.}

<sup>53</sup> Arâ agueduo myani nheinledylymo. Igueypyem lelâlâ awyly tiuntuduomo, nâepaigueba awylygue.

<sup>54</sup> Jesus idâly myani igueypy eguetunâdobyryram. Egawântybyem myani Jesus âwynsaundo igueypy emary sawânipyryem aguely:

– Aukâ, âwynsaundo – kely.

<sup>55</sup> Adâkehonly umelâ kehoem myani âwynsaundo âpagueondyly, kurâem itondyly, saudyly idyly. Ilâpygueduo myani Jesus aguely âwynsaundo sodo modoram:

– Xuataungâne – kely.

<sup>56</sup> Nhunwym, ise warâ toenzepa kehoem âsewânilymo. Warâ olâ myani Jesus eyanmo aguely:

– Ânguyran-ne tarâ aityby kâzegatuwâdaundâ – kely.

## 9

*Jesus tynynonro modo Deus wâgâ unâ iwâkuru egatuze ingonotobyry  
(Mt 10.5-15; Mc 6.7-13)*

<sup>1</sup> Jesus doze tynynonro modo ingâsedyly myani. Eyanmo aguely:

– On-honruno kâunduly, idânârâ kadopâ mânhâkyhomoem, tâwânuneim modo kua mânhetomoem warâ. Won-honrugue ise amidylymo.

<sup>2</sup> Aguwâtaunda unâ iwâkuru, âdara Deus kywymâryem idyly awyly wâgâ. Tâwânuneim modo kua ietaungâ.

<sup>3</sup> Mydâdaymo âdy kadataundâ. Amatagorumo ânwa oze mâzesebydâdomoem kadataundâ. Sakola kadataundâ. Pyni, dinheru warâ kadataundâ. Owogonromo lelâ itymo sataungâ, mâtuguehomo kadataundâ.

<sup>4</sup> Âtâ anaxi aintuomo, saguhoem âgâsenimobyry etydâlâ itaungâ. Târâlâ âykywâdaungâ, âkelo âtâ anaryam mydâlymo ara.

<sup>5</sup> Mârâ xidadâ odano modo idañkubamo, unâ mêngatulyo tindadysebamo warâ watay, inepa târâpa âxiguwêdaungâ. Igasedaymo âhurumo etary etywêdaungâ, xutoleguguwêdaungâ warâ, Deusram tânagazezim awylymo xutuhoem, ize wato ara anipyra awylymogue, yeinwâmpyra awylymogue warâ – kely myani Jesus.

<sup>6</sup> Aguepygueduo eynynonro modo idâlymo, myarâ, myarâ warâ, unâ iwâkuru egatuze, âdara Deus kywymâryem idyly awyly wâgâ, tâwânueim modo kua iese warâ.

*Herodes Jesus ânguyem awyly nutuba atobyry*

*(Mt 14.1-12; Mc 6.14-29)*

<sup>7</sup> Herodes myani Galiléia eynynonro modo iwymâry. Idânârâ kehoem Jesus, eynynonro modo warâ aidyly egary indadyly. Aituo Jesus wâgâ âdatâkeho nutuba idyly. Tâlâ wakenri modo:

– João Batista kurâem itondyby awâkâ Jesus – keim.

<sup>8</sup> Tâlâ lâpylâ myani wakenri modo:

– Mâkâ mâkeba awâkâ. Elias, awâkâ Jesus-em ini – keim.

Tâlâ pylâ,

– “Mâkâ mâkeba awâkâ. Saguho modo Deus itaumbry egatuwânibyry ewy kurâem ityby awâkâ Jesus” keim.

Awylygue Herodes âdatâkeho nutuba idyly.

<sup>9</sup> Aituo myani aguely:

– Tutuze ku-aze João Batista igueypyem awyly-ro. Urâlâma keankâ nhangasagânehoim. Ânguyka awâkâ Jesus? Âdaunlo uguondo kulâ mâkeba keanra awâkâ, adyesenry anhetoom ton-honre awyly egary xidadâ mawânkâ – kely.

Toenzepa myani Jesus tiendyse awyly.

*Jesus cinco mil uguondo modo, cinco pão, azagâ kanra âjihuyby warâgue nhuantobyry*

*(Mt 14.13-21; Mc 6.30-44; Jo 6.1-14)*

<sup>10</sup> Jesus xunâry egatuze odopâdaynlymo. Odopâdaymyem myani adientaymy modo Jesusram nhegatulymo. Ilâpygueduo myani Jesusram adaholyo Betsaidaram, akaemo kulelâ tagâ itoem wâne.

<sup>11</sup> Agui olâ myani kurâdo Jesus idâpyem awyly xutuwanî modo. Aituo idâlymo xuize. Saintuomo myani Jesus nhedaenkulyo. Deus idânârâ iwymâryem ituo âdara aidyly awyly wâgâ myani aguely. Tâwânuneim modo kua nhedyly lâpylâ.

<sup>12</sup> Iguandyly awylygue myani akaemo doze Jesus eynynonro modo Jesusram idâlymo; eyam aguelymo:

– Iguandyly enra. Egâ toenzepa kurâdo! Xurâmoem pyni peba, xykyhomo peba warâ tarâ. Âpa ezajilâ, âtâ anary iwaguepaom modoranlâ warâ asaemo igonokâ, âwinduatomoem, xykyhomoem warâ – kelymo.

<sup>13</sup> Jesus olâ warâ aguely:

– Tarâlâ nidâmo. Âmaemolâ ipyniry mo âunduwâtaungâ – kely.

– Nuduwâpyra xina nhuantomoem! Cinco pão, azagâ kanra âjihuyby alâ kulâ taunlo. Xina idâdyseka âmâ âyanlâ pyni xuize, asaemo kurâ domodo xuatoem? – kelymo.

<sup>14</sup> Toenzepa myani târâ kurâdo awyly, uguondo modo kulelâ cinco mil lelâ\*.

Aituo myani Jesus aguely tynynonro modoram:

– PU târâ, PU târâ, PU târâ warâ cinquenta, cinquenta warâ âzepajiwâdomoem aguwêtaungâ – kely.

<sup>15</sup> Jesus aguehobyry ara anhedylymo.

<sup>16</sup> Aituo myani Jesus cinco pão, azagâ kanra âjihuyby warâ sanânibyryem kayam MYK idyly. Deus agâ aguely:

– Koendonro lelâlâ âmâ, Pabai, awylygue xinaem xirâ pão, merâ kanra warâ mâunduly – kely.

Ilâpygueduo pão, kanra âjihuyby warâ nhepajiwâdyly. Tynynonro modoram nhuduly, kurâdoram nhepâdomoem. Nhepâdaymolâ kehoem myani Jesus pão epajiwâdyby, kanra âjihuyby warâ agui nhenehonly.

<sup>17</sup> Ize tato ara kehoem myani idânârâ kurâdo âwinduadyly; kanra âjihuyby nhâdylymo, pão nhedawynlymo, koendâ kehoem isolataynlymo warâ. Ilâpygueduo myani Jesus eynynonro modo pão, kanra âjihuyby warâ âsegubydâdaymy nhekanâdylymo cestu imâsedo odaji. Doze cestu tummye myani âsegubydâdyby nhekanâdylymo.

*Pedro, “Messiaslâ âmâ” Jesusram kehobyry*

*(Mt 16.13-20; Mc 8.27-29)*

\* 9:14 Pekodo modo, iamimeom modo warâ tapâguezeba myani.

<sup>18</sup> Alá myani Jesus idály mâkâ kulelâ, Deus agâ agueze. Eagâlâ myani eynynonro modo iwaguepalâ. Deus agâ agueppem tynynonro modoram aguely:

– Ânguy tâkezeka inanry kurâdo yam? – kely.

<sup>19</sup> Warâ myani eynynonro modo in-hoguly:

– Tâlâ inanry, “João Batista kurâem itondyby awâkâ Jesus” keim modo. Tâlâ inanry, “Elias, awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ – kelymo.

<sup>20</sup> – Âmaemo-ro? Ânguy tâkeze âmaemo yam? – kely Jesus.

Aituo Pedro in-hoguly:

– Messiaslâ âmâ, Deus ingonotyby – kely.

<sup>21</sup> – Mâkâlâ urâ. Iweâ kuru wao olâ Messiaslâ wawyly kâzegatuwâdaundâ – kely Jesus eyanmo.

*Jesus tyiguely wâgâ, kurâem tâitondyly wâgâ warâ aguehobyry  
(Mt 16.21-28; Mc 8.31-9.1)*

<sup>22</sup> Aituo myani Jesus eyanmo agueondyly:

– Urâ Uguondo Kaynâpa Âetyby, toenzepa âsenagazeze urâ. Kywymâry modo yizemo inkâba ise. Kurâdo eynynâ Deus agâ aguewâni modo iwymâry modo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehonrim. Yigueduo, azagâ<sup>†</sup> emedyly idyly wâgâ olâ ise kurâem witondyly – kely.

<sup>23</sup> Ilâpygueduo myani Jesus aguely idânârâ tonlo modoram:

– Ynynonroem ize mataymo, augueho ara aitaungâ. Kopaelâgâembaba ize wato lelâ aietaungâ; amânhedyse matomo mâkeba aietaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze.

<sup>24</sup> “Jesus eynynonro keba urâ” myguelymo, tyâzepa mitomoem kulâ watay, âdiempa kulâ ise xirâ anaym kurâem mawlymo. Âigueduomo, Deus enadoram mydâwâpyra ise âmaemo. Yeinwândylymogue mâdyolymo watay olâ, Deus enadoram idâze âmaemo; aunloenlâ ise eagâ mawlymo warâ.

<sup>25</sup> Tâwâlâ wâne âdydo imeom sodoem mawlymo, ize mato modope mawlymo warâ, Deus eydâ atoram mydâhomoem nepywabryra olâ awârâ modo. Deus agonro keba âmaemo watay, âdype matomo âdy mâkeba. Ânguy niguepa tâitoem nepywadaymba. Tâdâsenagazedo amaxi ise mydâlymo.

<sup>26</sup> Uguondo Kaynâpa Âetyby urâ. Idâze urâ Deus eydâ atoram. Odopâze olâ urâ Deus dompyryem. Kodopâdyly ise Kunwym eon-honru tânehonze. Anju domodo mâkâ ingonotyby ehazelugue tânâimize kehoem ise kêawly. Kurâ domodo enanaym ywypazeni modo, kêanomedâdo iwypazeni modo warâ, kodopâduo, iwypazeze lâpylâ urâ.

<sup>27</sup> Asaemo ydataynrinbyry modo ewy Deus lelâ pymâem idyly enipe ise. Xirâ mâuntudyzemo kuru wato – kely myani Jesus.

*Iwy wâgâ Jesus âkeloem itobyry  
(Mt 17.1-13; Mc 9.2-13)*

<sup>28</sup> Tokalâ semana awârâem ipygueduo myani Jesus iwy onwa âkuly, Deus agâ agueze. Pedro, Tiago, João warâ kulâ myani tagâ nhakyly.

<sup>29</sup> Deus agâ aguely ume myani Jesus âkeloem idyly. Emydy âkeloem idyly, ety iwogonro toenzepa kehoem sapeku, ehozelu idyly.

<sup>30</sup> Aituo myani azagâ uguondo modo târâ âepanâguely, Moisés, Elias warâ myani.

<sup>31</sup> Aguelymo myani Jesus agâ Jerusalémdâ âzenagazeoly wâgâ, iguely wâgâ warâ, Deus aguehobyry ara.

<sup>32</sup> Pedro, eagonro modo warâ toenzepa ekozeybyem tawlygue myani xykylymo, azagâ Deus donropyry âepanâgueday. Xuaguelymo. Jesus âkeloem itybyem nhedylymo, tohozele kehoem. Azagâ uguondo eagâ nhedylymo.

<sup>33</sup> Jesusdâpa Moisés, Elias warâ âxiguelymo. Âxiguelymo ume myani Pedro aguely:

– Koendâ kehoem tarâ kydawyly, Pymâ. Azagâ tokalâ warâ âtâ imeimbyryla xina nitâdâ, âmâem, Moisés-em, Elias-em warâ – kely.

Âdara tâkely awyly nutuba kulâ arâ aguely.

<sup>34</sup> Pedro aguely umelâ myani eunu âepanâguely. Nhamanâdyly. Pedro, Tiago, João warâ toenzepa kehoem âsenedylymo tydâ iamatuo.

<sup>35</sup> Eunu duay Deus aguely indadylymo myani:

– Ymery merâ, Messias-em kâingonotyby, “Igonose urâ” uguehobyry. Aguely idataungâ – kely.

<sup>†</sup> 9:22 Nota de pé Mateus 12.40dâ egâ.



<sup>36</sup> Deus aguepygueduo myani mâkâ kulelâ Jesus awyly nhedylymo, Moisés, Elias warâ xuzatybymoem. Jesus eynynonro modo awârâ ânguyram inepa aguepamo, negatubamo warâ myani.

*Jesus salokuzenomo odano kadopâ nhâkyhobyry*  
(Mt 17.14-21; Mc 9.14-29)

<sup>37</sup> Kopaelâgâem myani Jesus eagâ idâppy modo warâ iwy wâgâpa xytâguylymo. Tytâguybygueduo myani toenzepa kurâdo Jesus inwânwâni modo nhedylymo.

<sup>38</sup> Aituo myani uguondo kurâdo duay adaenkely:

– Ymery tokaleom kua iekâ wao, Pymâ! Kadopâ ymery odano nhâkygâ.

<sup>39</sup> Kadopâ iodaxi âwândyly watay, inakanhe tyese lelâ inanry. Toenzepa tadaenkeze, tadapânize, tytabigonzeze warâ inanry. Ymery tânagazeze kuru awâkâ kadopâ. Iguezeseeaji tyese kehoem, âdaunloenlâ nimopa-ro warâ.

<sup>40</sup> Âynynonro modoram sekadai wâne, kua nhetomoem. Kua niepyramo olâ enra – kely salokuzenomo nhunwym.

<sup>41</sup> Aituo Jesus aguely:

– Âdy einwâni kebalâ myanze âmaemo! Ânguydo kulâ âmaemo! Agâmo lâwâne urâ, yeinwâmpyra olâ âmaemo. Ynadaize yeinwâmpyra lelâ mawlymogue – kely.

Aituo aguely mâkâ salokuzenomo nhunwynram:

– Enekâ âmery xarâ – kely.

<sup>42</sup> Jesusram salokuzenomo saindyly ume myani onro onwa adameoly kadopâram. Adapânily, ekomadyly warâ. Ton-honre kehoem Jesus kadopâram aguely:

– Igasegâ iweâ lelâlâ merâ salokuzenomo odaypa, kadopâ! Todopâzeba ikâ-ro warâ! – kely.

Aguely tindatuo kadopâ egasely, idâly. Salokuzenomo kua idyly. Kua tiempygueduo nhunwynram nhuduly.

<sup>43</sup> Idânârâ âsewânilymo, Jesus Deus eon-honrugue anhetyby tientuomo.

*Jesus tyiguely wâgâ agueontobyry*  
(Mt 17.22-23; Mc 9.30-32)

Jesus salokuzenomo kadopâbeom kua tiempygueduo, tynynonro modoram aguely:

<sup>44</sup> – Koendâne xirâ âyanmo aguely idataungâ. Kâzenanânehonwâdaundâ. Urâ Uguondo Kaynâpa Âetyby yizepaom modo emaxi âzegameoze urâ. Akaemo ise yâen-honri – kely.

<sup>45</sup> Idamâmo wâne, âdakeze aguely awyly nutubamo olâ myani, Deus nhutuhomoem aniempyra awylygue. “Xina nutuba enra âdakeze amyguely awyly. Xinaram wao aguekâ” keze tyanemo olâ myani.

*Ânguyka tynrenseim kuru?*  
(Mt 18.1-5; Mc 9.33-37)

<sup>46</sup> Jesus eynynonro modo ânguy tyduaymo tynrenseim kuru awyly wâgâ âtunâguedylymo.

<sup>47</sup> Âjigie aguehomo xutuimbyryem olâ myani Jesus. Aituo iamudo tonlo ingâsedyly. Iamudo âetuo, tatadoram nhedyly,

<sup>48</sup> aguely:

– Deus xurâem, âduaymo tynrenseim kuru, mâkâ âwâlâ kulâ âtyrendânry. Inanajimo, merâ iamudo âdy keba-ro waunlo ara wâne. Auguely olâ xirâ âyanmo. Pymâem xynru waunlo keba merâ iamudo. Mâkâ ynynonro xurâem koendâ amânhedylymo, tynrenseim keba awyly umelâ warâ watay, urâenlâ amânhedylymo. Âdylâ urâem amânhetuomo, ugononibyry xurâenlâ ise amânhedylymo lâpylâ – kely Jesus.

*Deus eynynâ aini izepa kipyra kine, âkelo modo duano lelâlâ wâne*  
(Mc 9.38-41)

<sup>49</sup> Aituo myani João aguely:

– Xina Enomedâni, âunâry egatuze tâtâly ume, uguondo on-honrugue kadopâ nhâkyrim xina nedâ. “Jesus eon-honrugue kadopâ modo kâjiânky” xina nygue eyam. Xina ewy keba awylygue keankâ arâ xina aguely – kely.

<sup>50</sup> Aituo Jesus aguely.

– “Adâiseba ikâ” tâkezeba itaungâ. Kuduery keba watay, kataen-holâ mâkâ – kely.

*Samaria donro modo Jesus tynkyândyzeba itomobyry*

<sup>51</sup> Iwaguepa myani Jesus tunwym enadoram odopâdo. Âda tâieholy awyly tutuzelâ myani aralâ olâ Jerusalémram idâly lelâ.

<sup>52</sup> Tâtâdaymolâ myani uguondo modo ewy ingonodyly.

– Idâwâtaungâ waunroem, kykyho xuize – kely.

Idálymo. Saindylymo âtâ anary Samaria eynynonroram. Saintrybyem myani tykyho nhuinlymo.

<sup>53</sup> Tonlo modo olâ myani Jesus ingonotyby modoram warâ aguelymo:

– Judeu âmaemo. Tarâ xinadâ âykydzyzebamo enra xina, Jerusalémram mydâlymo awylygue – kelymo.

{Arâ aguelymo, Samaria donro modo Judeu domodo izepa tawlymogue. Samariadâma myani Deus ehoguedo, enanajimo.}

<sup>54</sup> Ingonotaymby modo odopâdyly Jesus agâ oxioze. Eagâ toxioduomo myani aguelymo:

– Samaria donro modo kykydzyzeba tâtymo anaym – kelymo.

Tiago, João warâ awârâ tindatuo myani aguelymo:

– Saguhoem Deus ingonokyly myakâwândy peto kau odano, tyizepanro modo tyainhoem. Âdara amyguely, Konomedâni? Deusram peto ingonotoem xina nhekadyzeka âmâ, mârâ âtâ anano modo iguehomoem? – kelymo.

<sup>55</sup> Aituo myani Jesus MYRYK idyly. Âzeuholymo. Arâ kehoem aguelymo nehoguebyra. Eyanmo aguely:

– Âizepanromoem inakanhe adâiseba itangâ – kely.

<sup>56</sup> Aituo myani eagonro âtâ anaxi xykyze idálymo.

*Jesus kicinwândyly-ro watay, kicinwândyly kinmopa kine*

*(Mt 8.18-22)*

<sup>57</sup> Jesus, eynynonro modo warâ ânwa oze idálymo ume myani uguondo eyam aguely:

– Âynynonroem widyse urâ. Âdym mydâhobyryram idâze lelâ urâ, agâ kâsenomedâdoem – kely myani.

<sup>58</sup> Aituo Jesus aguely:

– Ton-honre ise enra. Idânârâ ânguydo imeom tâjikune lelâ, xykyhomobe warâ; poroho, tawâguneim modo warâ tâjikune lelâ. Urâ, Uguondo Kaynâpa Âetyby olâ, iekobyzeguehoenlâ tâtyemba – kely.

<sup>59</sup> Aituo myani Jesus aguely eagonro uguondoram:

– Âekâ yagâ, âdym udâhobyrydâ, ywâgâ mâsenomedâdoem – kely.

Mâkâ olâ warâ aguely:

– Pymâ, saguhoem pabai uguelho wao ise kâenkyly, niguepa awyly ara. Igueduo, epyâbygueduo ise âynynonroem widyly – kely.

<sup>60</sup> Warâ olâ myani Jesus eyam aguely:

– Yeinwântânry modo igueypy ara kulâ mawânkâ xirâ onro anano wâgâ kulâ âtynanâdylymo. Xirâ onro anano modo wâgâ âtynanâni modolâ igueypy nepyâdâ. Deus kywymâry awyly wâgâ aguera – kely Jesus.

<sup>61</sup> Eagonro uguondo aguely:

– Âynynonroem widyse urâ. Âdym mydâhobyryram idâze lelâ urâ. Saguhoem kodopâdyly wao olâ ise ypemugudoram âsedaanguze. Ilâpyryem ise udâly agâ – kely.

<sup>62</sup> – Ynynonroem lelâlâ ize matay, ize maty modo enanânehongâ, augueho ara amitoem. Mâinmoyby mâynanâdombyra âmâ-ro watay, Deus emary koendonro ise âmâ, agonro modo duay Deus eydâ atodâ. Ânwa aieni âgânâynra âsemyombâzededyly-ro watay, tâkâine kulâ anhedily, inakanhe kulâ warâ – kely Jesus.

## 10

*Jesus setenta e dois uguondo modo Deus itaumbry egatuze ingonotyby*

<sup>1</sup> Ilâpygueduo myani Kywymâry setenta e dois lelâ uguondo modo induakewâdyly. Azagâ myarâ, azagâ myarâ, azagâ myarâ warâ ingonodylymo. Eyanmo aguely:

– Yraynâ idâwâtaungâ âji udâho modo ara. Xidadâ modoram idâwâtaungâ, poji anakâ kurâdope atoram warâ – kely Jesus.

<sup>2</sup> Kurâdo xuruse ingonodylymo myani. Âji modoram idálymo iraynâ myani aguely:

– Anji ekaunâdo odano ara ise yeinwântaynrim modo. Anji odo ara awâkâ Deus. Anji ekaunâni ara awâkâ Deus xunâry egatuim modo. Aguiamo kulâ olâ. Deusram ekadaungâ, tâinkâ lelâba tâwanuneim modo unâ egatuze ingonotoem.

<sup>3</sup> Deus xunâry egatuze ogonodyly, kaneru, auwa modo duaxi igonodyly ara.

<sup>4</sup> Dinheru kadataundâ. Owsarymo kadataundâ warâ. Owogonromo kulelâ âhurumo etary sataungâ, eagonro kadataundâ. Ânwa oze monhontybymo agâ iweâpa tâtunâguezeba itangâ.

<sup>5</sup> – Âtâ odaji âwântybyem “Deus agâmolâ ise” kewâtaungâ tonlo modoram.

<sup>6</sup> Deus xurâem tâidyse donrobe târâ-ro watay, eagâmolâ ise Deus, amyguehomobyry ara. Deus xunâry tindadyseba tonlo modo watay olâ, agâmo kulelâ ise Deus, eagâmopa.

<sup>7</sup> Mârâ âtâ saguhoem kuru mâzekaunâohomobyry odaylâ itaungâ. Nhegamebymo einwâtaungâ, enywâdaungâ alelâ. Âdylâ nhuduypymo einze tywypazeba itaungâ, Deus xunâry mâengatulymoguelâ, mawânâ âpyniryimo mâempywadylymo. Âtâ modo odaji tâtuguezezeba itaungâ, âji iwâkuru koendonro waunlo xuize.

<sup>8</sup> – Âdaunlo âjiram aindylimo, tonlo modo koendâ idaenkulymo warâ watay, târâlâ itaungâ, nhuduypymo einwâtaungâ lelâ.

<sup>9</sup> Tonlo tâwânuneim modo kua ietaungâ. “Iweâpa nitaymba ise Deus ton-honru nhenehony âduaymo” kewâtaungâ tonlo modoram.

<sup>10</sup> Âdaunlolâ âjiram mydâlymo, tonlo modo amyguelymo tindadyseba-ro watay, warâ aguewâtaungâ igasedaymo:

<sup>11</sup> “Xirâ âji anano onro sawionu tuhuru etary onwa ityby xina nhutoleguguely, Deus aguehobyry mâindadyseba mawylmogue âsenagazeze xutuhoem, Deus xunâry âyanmo xina egatuze âetobyry mâindadyseba matomobyry wâgâ. Mâkâ Deus eon-honru enehorim izepa matomobyry wâgâ” kewâtaungâ târâpa mâxiguelymo ume.

<sup>12</sup> Sodoma donro modo mykâinane tumunruneim kehoem; awylygue myakâwândy Deus peto in-hugueândyly nhonwamo adain-homoem. Xypyryem, idânârâ turâ keba ara enagazeze. Deus itaumbryr mâengatulymo tindadysebaom modo olâ ise Sodoma donro modo âsenagazedobyry takaze kehoem âsenagazeze. Xirâ mâuntudzemo kuru wato – kely Jesus.

*Jesus einwântânry modo âsenagazedo*

*(Mt 11.20-24)*

<sup>13</sup> Aituo myani Jesus eyanmo aguely:

– Warâ auguedyse wawly unâry izepaom modoram. Toenzepa kehoem ise mâsenagazedylimo, âmaemo Corazim donro, Betsaida donro modo warâ. Toenzepa adyenyro modo kehoem ajiedâ âjidadârymodâ, Deus eon-honru kênehohoem. Yeinwândyseba olâ mataunaguynre. Tumunruneim modo akâwândy Tiro, Sidom warâ donro modo. Deus eon-honru enehonze âjidadârymodâ awitobyry ara ânguylâ aidyly-ro watay, inakanhe adâidylymo tumozemo olâ tâise. Deus tâinwânsemo warâ. Tâzetydâzemo tâise âtâem saku tyxieim sakâjibygue, pelupâ tyangahumo onwa tyesimo tâise warâ, inakanhe adâitomyryr wâgâ tâjityendyly tienehon-homoem, imoimbyryem tawlyly tienehon-homoem warâ. Deus eon-honrugue awidyly tâense lelâlâ wâne âmaemo. Inakanhe amidylimo mâinmopa olâ âmaemo.

<sup>14</sup> – Tâdâsenagazedo saintuo, âmaemo ynyânbaom modo toenzepa ise mâsenagazedylimo, Tiro, Sidom warâ donro modo âsenagazedo takaze kehoem. Medâmolâ Deus eon-honrugue awidyly. Akaemo olâ akâwândy nepyramo.

<sup>15</sup> Koendonro, tynreim warâ âmaemo, Cafarnaum donro modo, inanajimo. Deus eydâ atoram mydâlymo warâ wâne, inanajimo. Arâpa olâ. Satanâs eydâ atoram ise mâjigonoholyo – kely Jesus.

<sup>16</sup> Aituo myani aguely tynynonro modoram:

– Pabai Deus ugonotobyry aralâ, ogonodylymo. Ywâgâ ise unâ mâengatulymo, Pabai Deus wâgâ kêngatuhô ara. Awylygue amyguelymo idani modo, auguelylâ indakylymo waunlo ara lelâ ise. Amyguelymo tindadysebaom modo watay, ydadyseba awylymolâ ise. Auguely izepaom-ro watay, Deus xunârylâ ise izepa atomo – kely Jesus.

*Setenta e dois lelâ Deus xunâry egatuwâni modo odopâdobyry*

<sup>17</sup> Deus xunâry egatuze idâppyem myani setenta e dois uguondo modo odopâdylimo; Jesusram aguelymo:

– Tuomare kehoem xina. Toenzepa kurâ domodo kadopâbeom xina kua niedâ. Kadopâ modo egasewâdyly keankâ, Jesus ezedy xina agueduo, “Jesus eon-honrugue xina aidyly” xina keduo – kelymo.

<sup>18</sup> Jesus aguely myani:

– Satanâs takaze kehoem won-honru. Târâlâ wakâwândy, Deus, Satanâs eon-honru nhetyday. Ielu kau wâgâpa ihuguely ara akâwândy mâkâ Deus ezaypa ihuguely kêandyly.

<sup>19</sup> Idataungâ. On-honrumo xudu, âgâu, ielawada, awâkâ modo mankadobuom, mâdâhoba mitomoem. On-honrumo xudu; Satanâs eon-honru mankadomoem.

<sup>20</sup> Âdâinkâba kadopâ modo mânhâkyhomobyry wâgâ omarumo. Deusram idâwâni modo ezedy iwenihô wâgâ izedy mo iwenibyem awylygue olâ omarumo kuru nidâ – kely Jesus.

*Jesus, “Koendonro awâkâ Deus” kehobyry*

*(Mt 11.25-27; 13.16-17)*

<sup>21</sup> Xirâ umelâ kehoem, Deus Ispiritury Jesus nhomazeândyly. Aituo myani Jesus aguely Deusram:

– Kau odano modo, onro wogonro modo warâ sodo âmâ, Pabai! Âdaunlo modoanlâ ânânarybyry mutuen-ho, tonomegueim modoram lelâ inkâba, enomedâdaymby modoram lelâ inkâba warâ. Amânhedyse mato aralâ ise aidyly – kely.

<sup>22</sup> Deus agâ adâkebygueduo myani Jesus agueondyly tonlo modo agâ:

– Pabailâ idânârâ won-honru, ienomery warâ xuduim. Mâkâ kulelâ koendâ kuru utunri. Urâ lelâ lâpylâ Pabai Deus koendâ kuru xuturim warâ. Eyam kâuntuen-hoymby lâpylâ olâ koendâ Deus xutuze – kely.

<sup>23</sup> Aituo myani Jesus âsemygâiguely. Tynnonro modoram aguely:

– Tuomareim kuru olâ akaemo won-honru tânugue etaynrin modo, mâentomo ara.

<sup>24</sup> Awidyly tâense; aguely tydase warâ âmaemo. Saguhu Deus xunâry egatuwânibyry modo, saguhu pymâ domodo warâ mâenkylimo tiendyse tâisemo myakâwândy, nhetomoem anipyra olâ myakâwândy. Mâindakylimo tindadyse tâisemo myakâwândy, nidapyramo olâ myakâwândy. Xirâ mâuntudyzemo kuru wato – kely Jesus.

*Samaria donro uguondo koendonro xunâry*

<sup>25</sup> Aituo myani Moisés inweniby wâgâ enomedâni saindyly Jesus iopaji. Jesus nhapâiguely myani, tâzewenrymo eynynâ, eynynâba warâ Jesus in-hoguly awyly tiuntuhoem kulâ.

– Âdaraka awidyly, Deus eydâ atoram udâhoem, aunloenlâ eagâ witoem, Konomedâni? – kely.

<sup>26</sup> Jesus in-hoguly myani:

– Moisés inweniby tutuzelâ âmâ. Âdakelyka mârâ wâgâ iweniby? – kely.

<sup>27</sup> Uguondo in-hoguly myani:

– Deus itaumbry awo wâgâ iweniby iwâkuru kuru: “Kywymâry Deus iwynedaungâ âdydo imeom, kurâ domodo warâ mâinwynedomo takaze kehoem. Idânârâ ize matomo, Deus ize ato ara lelâ nidâ. Idânârâ amânhekylymo, Deus ize ato ara lelâ nidâ. Idânârâ angahumo oday ânânâgomo warâ.” “Agonromo agâ âpynedaungâ; koendâ mâteto ara, arâ lâpylâ agonrodo agâ koendâ âzetaungâ” kewândymy Deus – kely uguondo.

<sup>28</sup> – Âkealâ amyguely. Arâ amidyly-ro watay, Deus eydâ atoram idâze âmâ, typygueba kehoem eagâlâ mitoem – kely Jesus.

<sup>29</sup> Moisés inweniby wâgâ enomedâni uguondo koendonroem myani âdutuly. Awylygue myani Jesus nhapâiguely:

– Ânguyka ise koendâ kêenkylly? – kely.

<sup>30</sup> Aituo myani Jesus unâ tienomedâdoem nhegatyly. Aguely:

– Tâlâ myani uguondo judeu Jericóram idânri, Jerusalém donropyryem. Tâmagaduneim modoram isejigy âzomagazeoly. En-hem kepalâ kehoem nhetyguelymo. Idinheruru nhemakelymo. Nhapiogulymo. Iguezesaji kehoem inmolymy.

<sup>31</sup> Mârâ ânwa oze lâpylâ Deus ety oday kurâdo eynynâ Deus agâ agueim idâly myani. Târâ uguondo âdyâppyem ânwa edazekâ nhedyly. Aituo innmyly.

<sup>32</sup> Ilâpyryem Deus ety oday tâwaneim, levita kelygue tâzekeim, idâly mârâ ânwa ozelâ. Uguondo âdyâppyem tientuo, sakadyly lelâ, âdaniepyralâ.

<sup>33</sup> – Ilâpyryem myani uguondo Samaria donro sakadyly mârâ ânwa ozelâ. Samaria donro modo, judeu domodo warâ âjizetonro keba, eagâmo tâtunâguedylylâ izetonro keba. Alâ olâ, mâkâ Samaria donro judeu âdyâppyem tientuo, epagudyly, toenzepa kehoem intyendyly.

<sup>34</sup> Iopaji saindyly. Âdyâhobryr nhokodyly azeitigue, vinhugue warâ onwa nhedyly. Âdyâhobryr tionkobygueduo myani nhaunâdyly. Tâgu onwalâ nhalokuândyly; nhadyly tâdykyho odaji. Târâ myani emedyly ara kehoem nhonse awyly.

<sup>35</sup> Emetybyem myani uguondo Samaria donro azagâ dinheru tâwânenseim nhetyly tysejigy tiankobâdo odaypa. Tâdykyho sodo nhepywadyly. Aituo myani aguely: “Udâzesedyly ise enra. Koendâ waone merâ nhonkâ. Anra dinheru âdyâlâ sanâto awâkâ xurâem. Xuduze lelâ wâne keanra kua mânhetoem. Nudupa takaze idyly-ro watay, kodopâday ise kêampywadyly” kewânmy – kely Jesus.

<sup>36</sup> Xirâ unâ tiengatubygueduo myani Jesus aguely Moisés inweniby wâgâ enomedâniram: – Âdykonloka mâkâ âdyâppyem koendâ eni: Deus ety oday kurâdo eynynâ Deus agâ agueim? Levita? Samaria donro? – kely.

<sup>37</sup> – Mâkâ itenybyry – kely Moisés inweniby wâgâ enomedâni.

– Mâkâ ara aikâ. Kaikânro modo ityengâ – kely Jesus.

*Maria, Marta warâ etyram Jesus idâhobryr*

<sup>38</sup> Ilâpygueduo myani Jesus tynnonro modo agâ idâzesedyly Jerusalémram. Ânwa oze awylymo ume myani Marta, Maria warâ etydâ epagudylymo.

<sup>39</sup> Marta pyni anhedily ume myani iwidy Maria, Jesus iopay ekadyly, nhenomedâdo idase, tywary nemawydâbyra idyly.

<sup>40</sup> Saintaymby modo wâgâ toenzepa myani Marta ewanu. Tywidy tâmawydâdyze myani. Awylygue Jesus iopaji saindyly, aguely:

– Egâ ywidy, Pymâ. Urâ kulelâ yânly, Toenzepa iewanu ume, emynru kulâ tarâ. Igonokâ iemawydâze – kely.

<sup>41</sup> Aituo myani Jesus eyam aguely:

– Iozepa kulâ awârâ amyguely, Marta. Toenzepa kuru âtâ oday iwanogue mâtynanâdyly.

<sup>42</sup> Iwanu, amânhedyse mato kuru, ydadysse mawly takaze. Maria olâ kêanomedâdo tydase. Xirâ tutuzeim kuru, amânhekly takaze. Ânguy merâ kêanomedâdobyry nhangahu odayba netywâbyra ise – kely Jesus.

## 11

*Jesus Deus agâ aguykehoem konomedâdobyry*

*(Mt 6.5-15; 7.7-11)*

<sup>1</sup> Alâ myani Jesus Deus agâ aguely. Deus agâ aguepygueduo, eynynonro modo ewy eyam aguely:

– Deus agâ xina aguehoem, xina enomedâgâ, Pymâ. João Batista tynynonro modo nhenomedâdobyry ara, xina enomedâgâ lâpylâ – kelymo.

<sup>2</sup> Aituo Jesus aguely:

– Deus agâ amyguedaymo, warâ aguewâtaungâ:

“Pabai, idânârâ tynrenseim lelâlâ mawly, izedy awyly warâ idânârâ nhutudyzemo xina.

Ânguy âwankuem âepyra nidâ.

Tarâ xina iwymâryem ikâ

Xina xirâ onro anano modo ize mato ara lelâ xina aiedyse awyly,

târâ kaynâ agonro modo ize mato ara aito ara lelâ.

<sup>3</sup> Âmâlâ kopaëlâgâembaba xina ipyniry âundugâ.

<sup>4</sup> Inakanhe xina aitobyry xygakegâ,

âkelomo inakanhe tynynâ aitobyry xina nhenanânehon-ho ara.

Satanâs, izepa mato aienehonze keduo, xina agâlâ ikâ, izepa mato xina aniempyra itoem” warâ aguewâtaungâ Deusram – kely Jesus.

<sup>5-6</sup> Aituo myani Jesus aguely tynynonro modoram:

– Idataungâ. Ataen-ho itynra kuetâji saindyly tâwinze watay; âdylâ mâunduly peba. Aituo ity apanonra mydâly, âzekainze: “Yataen-ho ietyram naintai. Âdy nheinly, nhenly warâ peba olâ urâ. Âdylâ wao kâwantoem âundugâ” myguely tâise.

<sup>7</sup> Warâ olâ tâise ity apano janela enahuyby oze aguely: “Kuetâji awârâ! Pealâ enra tâdâzekainly. Ykyly xirâ xatay ynanâdâ. Kadiadupe ietybyem pyanta. Idânârâ xina âtâ odano modo xykyly lâpylâ warâ! Yaupyra ise aze mâenkadyby xuduze kulâ” kely tâise.

<sup>8</sup> Aituo, mâenkazedyly watay, xuduze tause mâkâ. Etaen-hoem mawlygueba olâ nhuduly, mâenkazedyly imaze. Xirâ mâuntudyzemo kuru wato.

<sup>9</sup> – Ekadaungâ. Mâenkaduomo, emakeze lelâ âmaemo. Xuiwâtaungâ. Mâwinduomo, soenkeze lelâ âmaemo. Pyantaylâ âtâ sodo igâsedaungâ, enahungueze lelâ mawânkâ. Xirâ mâuntudyzemo kuru wato.

<sup>10</sup> Idânârâ ekanibyry modo emakeze. Xuirimpyry modo soenkeze. Âtâ sodo tygâsenibyryram enahungueze.

<sup>11</sup> Âmerymo kanra âjihuyby nhekaduo, âgâu mâunduwâpyra âmaemo eoduem.

<sup>12</sup> Aukuma nhoru idâtyby nhekaduo, ielawada mâunduwâpyra âmaemo.

<sup>13</sup> Inakai wâne âmaemo, iwâkuru modo olâ âmerymoram mâundulymo. Kunwym kaynonroma kuru koendonro-ro. Awylygue ise Tyispiritury ingonodyly ekanibyry modoram! – kely Jesus.

*“Satanâs eon-honru kainly lakuru Deus eon-honrugue” Jesus kehobyry*

*(Mt 12.22-32; Mc 3.20-30)*

<sup>14</sup> Tâlâ myani uguondo kadopâram tytaremba âiehoiby. Aituo myani idâly Jesusram, kadopâ nhâkyhoem.

– Merâ uguondo odaypa igasegâ; todopâzebane ikâ iodaxi – kely Jesus.

Kadopâ egaseduo, uguondo koendâ âjitaingly idyly. Toenzepa tonlo modo mâkâ uguondo tytarenrybyry âjitaingly, âsewânylymo.

<sup>15</sup> Tonlo modo ewy Satanâs eon-honrugue kua nhedyly-ro waunlo ara, enanajimo, Deus eon-honrugueba. Awylygue âjigie aguelymo:

– Belzebu eon-honrugue kulâ awâkâ kadopâ modo nhâkyly – kelymo; kewâdylimo kulâ olâ myani. (Satanás ezedy eagonro awârâ “Belzebu.”)

<sup>16</sup> Kurâ domodo wâne myani Jesusram aguelymo:

– Deus anhekyly lelâ aiekâ, on-honru mâenehon-hoem, Satanás eon-honru warâpa – kelymo.

<sup>17</sup> Âdara xunâgumo awyly tutuze myani Jesus. Aituo aguely:

– Âjigüe âzety anano modo âseguebyly-ro watay, mârâ âtâ anary tadainze. Âjiukonoem, âjiwaigoruem warâ âjigüe âseguebylymo-ro watay, tunwyndo sodokewâzemo. Tagonro agâ koendâ nâzepyramo, âjidiueryem tâisemo mawânkâ.

<sup>18</sup> Kadopâ modo iwymâryma Satanás. Kadopâ modo âjiguelâ âseguebyly, tygüe tygüe idylimo warâ watay, ton-honremba tâise Satanás. Tywymâgüeba tâisemo mawânkâ.

<sup>19</sup> “Jesus kadopâ modo ingonodyly olâ, Belzebu mawânkâ aitoem eon-honru xudunri” tâkeze âmaemo. “Belzebu eon-honrugue kulâ kadopâ mânâkylymo” mygüepa olâ âmaemo âynnonromoam. Arâ âynnonromoram amygüepa âmaemo watay, arâ yam adâkezeba lâpylâ itaungâ.

<sup>20</sup> Deus eon-honruguelâ kadopâ modo kânânkylly. Won-honru tiunduypyguelâ nhutuennonly tarâ pymâem tawlyly – kely Jesus.

<sup>21</sup> – Uguondo ton-honreim, typyeim koendâ tâty nhenuagaendily watay, idânârâ tâlâ ato âdapa lelâ. Ânguy negawântaymba isejiguy emagazeze.

<sup>22</sup> Uguondo mâkâ takaze ton-honreim âewyly watay olâ, mâkâ nemaemba. Aituo mâkâ âtâ odo ipy âsemagüeho âzemaekoly, isejiguy idânârâ adaholy, tataen-ho agâ mâkâ uguondo ton-honreimbyry kuru nhepajigädily warâ. Satanás takaze ton-honreim wawylygüe, xurâ modo kainly.

<sup>23</sup> – Ynynâba âmaemo-ro watay, ynnonroem inkâba âmaemo. Kurâ domodo Deus nheinwântoem iemawyadâbyra âmaemo watay, neinwâmpyra itomoem amânhenhonlymo lakuru. Ydâ iwagüe mânhenhonlymo, mâindätugylymo tâise koendonro kuru – kely Jesus.

*Kadopâ odopâdobyry*

*(Mt 12.43-45)*

<sup>24</sup> Aituo myani Jesus aguely:

– Tâlâ myani kadopâ kurâ odaypa nhânkyby. Mâkâ kadopâ adakobädily myani paru peba ato einkâ, tâjidy xuize. Tâjidy nepyra olâ myani. Aituo mâkâ kadopâ tâwâlâ aguely: “Iegasehobyryanlâ ise kodopädily mâkâ saguhoem inakanhe kânhybyyanlâ” kely.

<sup>25</sup> Adâkeduo ituo odopädily. Nodopâbyra awyly ara, koendâ myani mâkâ uguondo, eagonro kadopâram nâdynanâoba, âtâ koendâ kehoem nhontyby, taxiemba wâne myara.

<sup>26</sup> Aituo myani mâkâ kadopâ sete lelâ tataen-hodo inakai modo kuru ese idâly, mâkâ uguondo odaxi tâxiedomoem. Aituo mâkâ uguondo ago kehoem kuru inakanhe itondily, tokalâ kadopâbe tatobyry takaze kehoem – kely Jesus.

*Tuomareim kuru ise Deus aguely einwântaynrim modo*

<sup>27</sup> Jesus aguepygueduo myani pekodo kurâdo duano ago kehoem aguely:

– Tuomareim mâkâ pekodo igaseânibyry, tywanrygüe âkuirimbyry warâ – kely.

<sup>28</sup> Aituo myani Jesus aguely:

– Tuomareim kuru olâ Deus itaumbyry idani, einwânmy warâ – kely.

*“Adyesenry aiekâ” kehomobyry Jesusram*

*(Mt 12.38-42; 16.1-4; Mc 8.11-13)*

<sup>29</sup> Kurâdo âtädyguybyem atay myani Jesus aguely:

– Iumunrumi âmaemo xirâ umeno modo! Yam, “Adyesenry aiekâ, Deus Ingonotyby lelâlâ mawlyly xina nhutuhoem” tâkeze âmaemo. “Amânhepyra âmâ watay, xina ainwâmpyra ise” mygüelymo warâ. Jonas aityobyry enanâgüewâdaungâ.

<sup>30</sup> Nínive donro modoram Jonas agüewânmy: “Deus inagazenehonzemo, inakanhe amidylmogüe” kewândymy. Urâ, Uguondo Kaynâpa Âetyby, Deus Ingonotyby lâpylâ urâ; Jonas unâ nhगतybylâ âyanmo kângatuly lâpylâ. “Deus inagazenehonzemo, yeinwâmpyra mawlymogüe” uguely.

<sup>31</sup> – Enanâgüewâdaungâ mâkâ pekodo Sabâdâ pymâpyry. Taypa myani mâkâ idâly, âkelo anaymba, Salomão enomery idase. Ienomery olâ Salomão enomery takaze kehoem. Tarâ âduaymo lelâlâ wâne urâ, arâlâ olâ inomedâdomo mâindadyseba, mâuntudyzeba warâ mawlylymo. Awlylygüe ise, xypyry etay, Deus enadoram mâepanâgüeduomo, warâ ise mâkâ pekodo pymâ aguely Deusram: “Tâwâlâ akaemo kurâ domodo, Jesus tonomedädily tindadyseba atomobyry ara nâsenagazedâmo” keze.

<sup>32</sup> Kanra imâsedo odanopyryem myakâwândy Jonas idâly Niniveram, Deus itaumbyry egatuze. Jonas aguely tindatuomo myakâwândy, mârâ xidâdâ odano modo Deus

nheinwândylymo. Âjityendylymo, inakanhe tawly inmolymo warâ. Akaemo emyenro keba olâ âmaemo. Urâ, Jonas takaze won-honru. Xirâ mâuntudyzemo kuru wato. Aguely mâindadyseba, mâinwândyseba warâ olâ âmaemo. Awylygue ise xypyry etay Deus enadoram mâepanâguelymo-ro watay, warâ ise Nînive donro modo Deusram aguelymo: “Tâwâlâ akaemo kurâ domodo Jesus aidyly, aguely warâ einwântanrybyry modo nâsenagazedâmo” kezemo – kely Jesus.

*Kodo iajimanâni*  
(Mt 5.15; 6.22-23)

<sup>33</sup> Aituo myani Jesus aguely:

– Lamparina kienmanâdyly watay, âdylâ iaxi kioentaymba kurâ. Cestu iaxi kiempyra kurâ-ro warâ. Nhesagon-hodâ kienkanâdyly, egawântaynrim modo koendâ kehoem nhetoem.

<sup>34</sup> Kânugue mawânâ kytâho kiendyly, iajino oze kytâly. Koendâ kiendyly-ro watay, ânwa iozeno oze lelâ kytâly. Koendâ kiempyra kurâ-ro watay, tuzase kurâ, iamu duay tâduzato ara. Epy xurâem toenzepa lelâlâ iamu – kely Jesus.

{“Kânu agâlâ mawânâ kyangahu âsewanily” keze Jesus aguely. Deus ize ato aguiendyse kurâ-ro watay, iozeno lelâ aguienkyly. Arâ aguiendyseba kurâ-ro watay, iozeno keba kulâ aguienkyly. Toenzepa ise kydâsenagazedyly, aguehobyry kienwâmpyra kurâ-ro watay.}

<sup>35</sup> Inanaynmolâ itaungâ. Yeinwânniem mawlymo xutuwâdaungâ. Esagonrim ara xirâ unâry mâindakylymo. Yeinwâmpyra âmaemo-ro watay olâ iamu odano ara kulâ âmaemo.

<sup>36</sup> Yeinwântâ kuru mataymo, koendâ utuze, koendâ ugononibryry xutuze warâ âmaemo. Ânwa tyajineim oze idânri ara ise âmaemo – kely.

*Fariseu domodo wâgâ, Moisés inweniby wâgâ enomedâni modo wâgâ warâ Jesus aguehobyry*

(Mt 23.1-36; Mc 12.38-40)

<sup>37</sup> Jesus aguepygueduo myani fariseu aguely eyam:

– Âwinduakârâ ietyram – kely.

Jesusmy idâwâm. Âwântybyem mesa onwa ekadyly, nâzemaunguebalâ judeu domodo ezewenry ara.

<sup>38</sup> Awârâ tientuo myani fariseu tyangahu oday aguely:

– Inakanhe kulâ merâ uguondo aidyly. Nâzemaunguewâbyra merâ, kâzewenry ara – kely.

<sup>39</sup> Aituo myani Jesus aguely eyam:

– Âmaemo fariseu domodoram xirâ aguely. Moisés inweniby ara amidyse mawlymo umelâ, inakanhe kulâ adâsêlâ âmaemo tyewiâpazelâ warâ. Tâdâjitogyly tâkeze minasemo, ize matomo mâenmakehomoem. Tâlâ wâne kopu, prato warâ sagokeim ikaynâ kulâ nhagokely, ioday iwyku netyba waunlo, myara kulâ âmaemo. Deus ize ato ara adâjidyly mâuntuba âmaemo.

<sup>40</sup> Tuândy kulâ âmaemo! Tâsenoguze âmaemo, agahumo oday inakanhe ânârymo soense myguewâdylymogoe. Deuslâ kodo xugunipyry, mâkâlâ lâpylâ kyangahu oday kunâry xudunri warâ.

<sup>41</sup> Deus ize ato kuru âdy pebanro modoram pyni mâundulylo. Awylygue ipanro modoram ânduwâtaungâ, arâ ise tywykeba mawlymo, Moisés inweniby agueho ara.

<sup>42</sup> – Toenzepa âsenagazeze âmaemo fariseu domodo! Dez lelâ âsejiguyimo ewy, tokalâ inanry mâundulylo Deusram, Moisés inweniby agueho ara. Âpa ezano ewy pyni ekubâzeândo Deusram mâundulylo inanry, hortelâ, arruda, awârâ modo mâentâdybymo. Moisés inweniby kuru olâ inanry amânhepyra âmaemo. Âdypebaom, kaikânro modo warâ mâintyembyra olâ minasemo. Deus mâinwântaymba âmaemo. Tâwâlâ âsejiguyimo dez ieto ewy tokalâ ânduwâtaungâ Deusram, âdypebaom modo mâintyendylymo mâenanânehombamolâ.

<sup>43</sup> – Toenzepa âsenagazeze âmaemo, fariseu domodo! Kurâdoram mâdyren-hondyze mawlymogoe. Âtâ tâdâtâdygyho odaji mydâduomo, waunroem kehoem inanry ikadylymo pymâ modo xurery wâgâ kehoem. Kurâdo âwankuem âedyseba minasemo madakobâdomodâ warâ.

<sup>44</sup> – Toenzepa âsenagazeze âmaemo, fariseu domodo! Âkelo modoram koendonroem kehoem wâne mâzehodyze mawlymo. Koendonro keba olâ âmaemo. Âguedy etadâdobyry tywâkureim emyenro âmaemo. Einkâ kakadyly watay, âdy ioday tywângueim awyly kiuntuba olâ kurâ – kely Jesus.

<sup>45</sup> Agueduo myani Moisés inweniby wâgâ enomedâni Jesusram aguely:

– Arâ amyguelygue, xina lâpylâ mâunâguegyly, fariseu domodo kulelâ inkâba amygueho – kely.

<sup>46</sup> Aituo myani Jesus aguely:

– Toenzepa âsenagazeze lâpylâ âmaemo Moisés inweniby wâgâ enomedâni modo. Amygue-homobyry ara amitaymba lâpylâ âmaemo. Tâjienwyeno tâmânreim tâmaenzeba ato ara awârâ mâenomedâdomo, tâmaenzeba awyly. Tyekeim emawyadâdânry emyenro âmaemo.

<sup>47</sup> Toenzepa âsenagazeze âmaemo, Moisés inweniby wâgâ enomedâni modo, âdamudomo aralâ tumunreim mawylmogoe. Saguhoem myakâwâm Deus itaumbryr egatuwâni modo nhâlymo. Koendonroem kehoem wâne mâzehodyze mawylmo. Awylgyue akaemo Deus itaumbryr egatuim saguhobyryr eguepybyryr etadâdobyryr modo mâinwâkudâdylmo iwerâ.

<sup>48</sup> Arâ amidylmogoe âdamudomo aitobyryr ara lâpylâ amidylmo tânehonze âmaemo. Deus itaumbryr egatuwâni modo xyâwânmomoy. Eguepymobyryr etadâdomobyryrdâ iwâkudâni âmaemo.

<sup>49</sup> Deus toenzepa tonomegugue, aguely: “Igonose urâ âyanmo iemaryr modo ytaumbryr egatuwâni modo, ywâgâ aguewâni modo warâ. Egoiguezemo, xyâzemo warâ âmaemo” kewâm Deus.

<sup>50-51</sup> – Abel, Adâo imerylâ myakâwândy saguhoem kuru Deus itaumbryr wâgâ agueim enday âdyoypy. Alâ sakazedydyl, toenzepa Deus eynynâ aguewâni modo lâpylâ âdyowâdyl myakâwândy. Xypyryem xyâypy Zacarias, Joiada imery. Deus etydâlâ myakâwândy âdyoly, mesa Deusram egameyby ekanâdo, Deus Âpanâgueho iwyantary warâ ontay. Idânârâ âdamudomo aitobyryr modo wâgâ ise mâsenagazedylmo. Xirâ mâuntudyzemo kuru wato.

<sup>52</sup> – Toenzepa âsenagazeze âmaemo, Moisés inweniby wâgâ enomedâni modo! Deus imakedyze inkâba âmaemo, ânguyram unâ tâdâsemagueho mâengatudyzeba lâgâlâ âmaemo warâ. Pyanta kadiadupe ieni, ilema xave nhoendyl-ro waunlo emyenro âmaemo, igawâmpyra mitomoem, eagonro modo mâenkaunânehomba mitomoem lâpylâ warâ – kely Jesus.

<sup>53</sup> Agueypyem myani Jesus egasely âtâ odayba. Fariseu domodo, Moisés inweniby wâgâ enomedâni modo warâ toenzepa kehoem iewiâpadaynlymo, Jesus tywâgâ agueduo. Aituo egaseduo, nhapâiguelymo mârâgue lelâba.

<sup>54</sup> Tyangahumo oday xunâgumo:

– Inakanhe aguehoem aguiendyl-ro watay, kienwentâdobe ise kurâ, kyân-hoem – kelymo.

## 12

*Idânârâ soentyby âjjeipanâgueoze  
(Mt 10.26-27)*

<sup>1</sup> Toenzepa kehoem myani kurâdo âtâdyguyly Jesus eydâ atoram. Tokonozemo kehoem. Aituo myani Jesus aguely tynynonro modoram, kurâdo indatoem:

– Fariseu domodo arapa itaungâ. Koendonro aramo wâne, koendonro keba olâ akaemo. Fermentu massa nholiho ara akaemo inakanhe ato imâem idyly.

<sup>2</sup> Idânârâ soentaymyby âjjeipanâgueowâze lelâ. Idânârâ koendâ tydasenrybyryr MON warâ âjidahoze. Âdaunloem mawylmo âzehoze, koendonro, inakai warâ mawylmo.

<sup>3</sup> Âdylâ amyguelymo kopae iguetubygeduomo watay, emetybyem idânârâ amygueho-mobyryr âdutuoz. Ity oday amyguehomobyryr, idânârâ kurâ domodoram âzegatuoze – kely Jesus.

*Deus lelâ kydynrene  
(Mt 10.28-31)*

<sup>4</sup> Jesus aguely myani:

– Ârinno kâdytadaundâ; igadopyrymo âdaunloenlâ adaindânry tyân-hoem ton-honremba mawânkâ. Tâwâlâ lelâlâ wâne inagazedylmo. Ton-honremba olâ Satanâs eydâ atoram ogonosemo.

<sup>5</sup> Deus anhekyly xytadaungâ. Awâkâ kulelâ mawânkâ âgueduomo, Satanâs eydâ atoram ogonosemo ton-honreim. Augueondylly xirâ: Deus lelâ xytadaungâ. Xirâ mâuntudyzemo kuru wato, yataen-hodo.

<sup>6</sup> – Idânârâ tâense awâkâ Deus. Imâem tâwâentuneba konopio. Azagâ moeda imeimbyryr tâwâensenygue, cinco konopio tanâse lelâ kurâ. Deus olâ koendâ edyly nimopa.

<sup>7</sup> Nhetâmo lâpylâ Deus. Koendâ kehoem tutuze, angahumo wâgâ âdara angahudumo awyly. Awylgyue tâseguâdâzeba itaungâ. Deus konopio tâense, âmaemoma kuru nhesemo lâpylâ. Xurâem, âmaemo tywyneim kuru, konopio modo takaze – kely Jesus.

*“Jesus eynynonro urâ” keze tyanenryr modo  
(Mt 10.32-33; 12.31-32; 10.19-20)*

<sup>8</sup> Wakely myani Jesus:



– Tâjiduay, “Jesus eynnonro urâ” myguelymo-ro watay, “Ynynnonrolâ asaemo” keze lâpylâ urâ. Pabai, anju domodo warâ enado ise aguely: “Ynynnonrolâ akaemo” uguely. Xirâ mâuntudyzemo kuru wato.

<sup>9</sup> Tâjiduay, “Jesus eynnonro keba urâ” myguelymo-ro watay olâ, Pabai Deus, anju domodo warâ enado, “Ynynnonro mâkeba asaemo” keze lâpylâ urâ.

<sup>10</sup> Urâ Uguondo Kaynâpa âetyby izepa wato amânhedylimo, amyguelymo warâ watay, idânârâ awârâ inakai modo xygakeze Deus, mâenkadylymo watay. Deus Ispirityu ewanu wâgâ inakanhe kulâ amyguehomobry olâ ise Deus nygakeba.

<sup>11</sup> Âizepanromo, pymâ modo enadoram, âtâ tâdâtâdygyuho odaji pymâdo enadoram warâ adylimo ise, iwentâdomoem. Myarâ madahoduomo, tadahulizeba itaungâ. “Kâsemagueho peba ise aze. Âdara uguely kâuntuba urâ pymâdo enanaym nhowentâduomo” tâkezeba itaungâ.

<sup>12</sup> Deus Ispirityrâ ise mârâ ume amyguehomoem inomerymo xudunri – kely Jesus.

*Âdydo imeom sodoem tadawly koendonro kuru keba*

<sup>13</sup> Kurâdo duano ewy uguondo aguely myani Jesusram:

– Pabai tyigueduo, idânârâ niâm paigoem, urâem warâ, Konomedâni. Paigoram aguekâ: “Âukono agâ unwâm xurâpyry epajigâgâ” kekâ – kely mâkâ uguondo.

<sup>14</sup> Aituo myani Jesus aguely:

– Unwâm isejiguybyry ânguy xurâ awly agueim mâkeba urâ. Âmâ, âwaigoru warâ xurâ wâgâ augewâpyra ise urâ – kely Jesus eyam.

<sup>15</sup> Aituo myani Jesus tonlo modoram aguely:

– Auguely idataungâ; tâmaynelâ itaungâ. Idânârâ âdydo imeom sodoem lelâ waypa itaungâ. Toenzepa âdype tadawly kulâ aunloenlâ kuomazeândaymba, aunloenlâ kitoem aguyetaymba warâ – kely Jesus.

<sup>16</sup> Aituo Jesusram unâgue âzenomedâolyomo:

– Tâlâ myani uguondo toenzepa âdydo imeom sodo. Idânârâ ipi ezay etâdaymby modo koendâ kehoem ago itaynly. Eagâ tâwanuneim modo toenzepa kehoem nhekaunâdylimo.

<sup>17</sup> Toenzepa kehoem tientuo, mâkâ âdydo imeom sodo aguely tyangahu oday: “Toenzepa kehoem xirâ tâkaunâzeim. Ekanâdoem ejidy peba urâ. Âdara kukeanra ise agânhedyly” kely.

<sup>18</sup> Tyangahu oday tâwâlâ myani xunâgu: “Ah, xutuagui. Âdydo imeom etadâdo imeimbyry modo ise yagâ tâwanuneim modo nhakalaguely, imâsedo tintâdomoem.

<sup>19</sup> Tâwâlâ ise aguely. “Tâlâ urâ idânârâ ize wato iweâpa iniem. Âdygue kâseguâdâbyra ise urâ. Iekobyzeguely ise. Kâwinduadyly, kadakuily warâ. Tuomare ise urâ warâ” kely mâkâ uguondo tâwâlâ tyangahu oday.

<sup>20</sup> Aituo myani eyam Deus aguely: “Tuândy âmâ! Xirâ kopaelâ ise âiguely. Âkelo ise mâenkanâdyby sodo, âmâ mâkeba” kely. Arâ myani mâkâ âdydo imeom sodo iguely. Tâlâ atobyry modo idânârâ âxiânly.

<sup>21</sup> – Auguely xirâ âyanmo. Adâise lâpylâ mâkâ âdydo imeom toenzepa turâem ekanânybyry modo. “Âdypeom xina” warâ aguelymo. Deus xurâem olâ âdypeom keba mâkâ agueim – kely Jesus.

*Ize kydato wâgâ kulâ kydadahuliba kine, Deus tuduze kurâem ize kydato awylygue (Mt 6.25-34)*

<sup>22</sup> Agueypyem myani Jesus aguely tynnonro modoram:

– Warâ âyanmo aguely. Tâseguâdâzeba itaungâ, pyini wâgâ, itymo owogonromogue warâ.

<sup>23</sup> Pyini keba, âtâ tâjiwogonro keba warâ tywyneim kuru. Deus ize matomo xuduze lelâ, âpyniry, itymo owogonromo warâ.

<sup>24</sup> Etaungâ konopio modo. Typiembamo. Typyniry netâbyramo, nekaunâbyramo warâ. Typyniry netadâbyramo etary odaji warâ wâne. Deus olâ ipyniryto tuduze. Deus xurâ âmaemo. Tawâgunaim modo ipyniry tiunduho ara, âyanmo xuduze lâpylâ.

<sup>25-26</sup> Mâungukedânrymo wâgâ tâseguâdâzeba itaungâ. Âdara âiguelymo wâgâ tâseguâdâzeba itaungâ. Kyigueho odaji ituo, kyigueda kitoem aguiantaymba kurâ. Deuslâ kyigueho xutuim. Âigueho tâwâlâ mâungukehoem nudupa-ro watay, itymo owogonromo, âpyniry, awârâ modo wâgâma kuru toenzepa tâpaunzezeba itaungâ. Deuslâ idânârâ ize kydato xuduim.

<sup>27</sup> – Mâzetydâdomogue, mâpâgudâdomogue warâ tâseguâdâzeba itaungâ. Etaungâ poji anano tadawanku. Nâsewanibamo, tâty tywogonro tianâtomoe. Kâdâkerâ nawâpyramo, tâtyty tywogonro adientomoem warâ wâne. Deuslâ olâ iwâkudâni. Kydamu Salomão toenzepa âdypeom myakâwândy, toenzepa lelâlâ. Iwâkuru modo myakâwândy ety iwogonro. Poji anano sawanku olâ Salomão ety iwogonro takaze kuru, tywâkurein-ro warâ.

<sup>28</sup> Iweâpa nipyra olâ awârâ poji anano sawanku. Iwerâ koendâ, tywâkure warâ, kopaelâgâem ipa, iladybyem lelâ. Awârâ sawanku tâense Deus watay, nhesemo lâpylâ. Itymo owogonromo xuduze. Mâinwâmpyra olâ âmaemo!

<sup>29</sup> Pyni wâgâ, okumo wâgâ warâ tâseguâdâzeba itaungâ.

<sup>30</sup> Deus einwântânry modo typynirymo, tokumo, tâty tywogonro wâgâ warâ kulâ inanry âtynanâdylimo. Âmaemo olâ, awârâ wâgâ tâtynanâzeba itaungâ. Tunwyn-em âmaemo Deugue. Tutuze mâkâ idânârâ ize matomo. Âpynirymo, okumo, itymo owogonromo, awârâ modo xuduze lelâ.

<sup>31</sup> Awlylygue âwymârymo Deus ize ato modo waunroem aietaungâ. Mâkâ ize ato wâgâ waunroem mâpaunzeduo, idânârâ ize matomo xuduze Deus – kely Jesus.

*Koendonro kaynâ ekanâdyby*

*(Mt 6.19-21)*

<sup>32</sup> Jesus aguely myani:

– Aguipa, ton-honremba warâ wâne âmaemo, tyanepa olâ itaungâ, âmaemo nynonro modo. Kunwym Deus âduakewânmo, yagâ pymâem mitomoem.

<sup>33</sup> Âsejiguymo modo vende ietaungâ; ebyry âdy pebaom modoram xuduwâtaungâ warâ. Âzeon-hondâdaungâ, Deus ize ato amânhetomoem. Arâ ise koendonro ekanâdybybe mawlylmo târâ kaynâ. Tâmagazeim modo nemagazebyra ise. Âdaunloenlâ tuonro nygataymba ise warâ.

<sup>34</sup> Xirâ anano tâenseim wâgâ kulâ mâpaunzedylimo watay, mârâ wâgâ kulâ âwaunkymo. Deus xurâ toenzepa ize matomo-ro watay olâ ise, ize ato ara lelâ ise amidylimo – kely Jesus.

*Jesus odopâdily inwânwântaungâ*

<sup>35</sup> Jesus aguely myani tynynonro modoram:

– Inanaynmolâ itaungâ kodopâdo odaji ituo, ohondybyem lelâ. Tâzetary koendonro mawânkâ eagâ tâwano odopâdo oday ohondybyem, saindily tynwânwânselâ, âzetydâdybyem, âjihuretadâdybyem, iwaxxiery ekâjibyem, lamparina tyatygueim emaym warâ. Alâpylâ ohondaungâ, kodopâdily mâinwânwântomoem.

<sup>36</sup> Inomedâdomoem ise xirâ unâ âyanmo kêngatuly. Tâlâ myani pymâ kopae todohogüin-ho etyryam idâim. Warâ myani aguely tagâ tâwaneim modoram, âtynra tâtâly iraynâ: “Kodopâdily tynwânwânselâne itaungâ” kely. Agueypyem idâly. Âzetyguedyly. Iweâpa itybyem odopâdily. Odopâdybyem, pyanta TON TON nhedyly, ingâsedily. Aituo eagâ tâwaneim modo nhenahunguely.

<sup>37</sup> Tuomareim mâkâ tâwaneim modo. Tywymâry odopâdily tynwânwânselâ waunlo. Awlylygue toenzepa âzehogueolyo iwymârymoram. Pymâlâ ise on-honi akaemo tuantoem. Tâty iwâkuru etyze, tâdâsewanihongue ise âzetydâdily, ipynirymo tiunduhoem. Mesaram ekadomoem aguely âwinduatomoem. Mâkâlâ pyni aieni, xuanimo warâ.

<sup>38</sup> Âdara odopâdily awyly nutubamo myani, kuetâji atay, pealâ atay warâ. Arâlâ olâ, nykyba awylymo. Tânanaym lelâ awylymo, ohondybyem lelâ. Aituo iwymârymoram koendâ kehoem âzeholyo – kely Jesus.

<sup>39</sup> – Âdara tâmagazeim âewly awyly nutuwâbyra âtâ sodo. Tutuze watay, tânuenze tâise, tânanaynlâ warâ, tysejiguy tienmakehoem. Xirâ mâuntudyzemo kuru wato.

<sup>40</sup> Kodopâdily tânuenzelâ itaungâ; inanaynmo lâpylâ itaungâ warâ. Ienuendylimo ume inkâba ise urâ Uguondo Kaynâpa Âetyby kodopâdily – kely Jesus.

*Tâwaneim koendonro wâgâ, inakai wâgâ warâ Jesus unâ nhegatuhoery*

*(Mt 24.45-51)*

<sup>41</sup> Aituo myani Pedro aguely:

– Megatuaguilâ awârâ tâwaneim eagâ tâwano inwânwânse pyantay atobyry. Ânguyranka amyguely, xinaram kulâ, idânârâam, Konomedâni? – kely Pedro.

<sup>42</sup> Aituo myani Jesus in-hoguly:

– Tâwaneim koendonro, eagâ tâwano tânuenze myara ienuendaungâ. Fazenda sodo taypa tâtâly iraynâ, tagâ tâwaneim tonomegueim, koendonroram watâkeze: “Udâly wao ise. Âmâ ise iety, ysejiguy, yagâ tâwanuneim modo warâ eni. Kopaelâgâembaba ise akaemo mâwandily. Âdy ize atomo âundugâ” tâkeze mâkâ eagâ ewano, tâtâday.

<sup>43</sup> Fazenda sodo aguehoery ara aidily-ro watay, koendâ ise iwymâry eagâ awyly, todopâduo.

<sup>44</sup> Tâmaryam aguely ise: “Koendonro lelâlâ âmâ. Koendâ lelâ tâwanuneim modo medâ. Awlylygue idânârâ ysejiguy modo eniem ise âmâ” kely.

<sup>45</sup> — Koendâ tâwaneim keba mâkâ-ro watay olâ eagâ tâwano aguehobyry ara anipyra. “Ah, tahule nodopâdaymba ise mâkâ xirâ sodô” kely tyangahu oday. Adâkeduo, koendâ tagonro modo nepyra. Pekodo modo, uguondo modo warâ târâ tâwanuneim tapioguzemo tâise. Âtydâ kulâ, âwinduadyly, adakuily, toku ikaji kehoem idyly tataen-ho inakai modo agâ.

<sup>46</sup> Mâkâ tâwaneim tynwânwândyly umepa iwymâry saindyly. Eagâ ewano mâkâ tâwaneim agâ tyewiâpaze, tâdâsenagazedoram talehoze-ro warâ, Deus einwântânry modo âsenagazedoram.

<sup>47</sup> — Tâwaneim, eagâ tâwano aguehobyry aietânry, toenzepa âsenagazeze, adienkyly tutuzelâ aniempyra-ro waunlo.

<sup>48</sup> Mâkâ tywymâry aiedyse ato nutuba tawylygue aniempyra awyly waunlo âdiempa kulâ ise âsenagazedyly, adyeseim aniempyra itobyry wâgâ. Tâwaneim, adyeseim tutuze kulâ, aietânry olâ, iwymâry toenzepa enagazenehonze aniempyra atobyry wâgâ — kely Jesus.

*Jesus wâgâ âjizepa isemo*  
(Mt 10.34-36)

<sup>49</sup> Jesus aguely myani:

— Peto wâne saxiondâ saxium nhaduândyly, nhainly warâ-ro mârâ emyenro urâ. Inakanhe tadawlyly sainze xirâ anaxi kêawlyly, yeinwânri modo ioday inakanhe awyly sainze. Koendâ awyly kuru tâise “Aiekâne” kehobyry ewanikeimbyryem urâ-ro watay.

<sup>50</sup> Toenzepa âsenagazeze urâ, igueze warâ. Toenzepa kadahulily, anipyra awyly ara.

<sup>51</sup> Kâetuo, inakanhe tadawlyly, tâdâsegyebyly warâ adainly keanra keankâ, inanajimo. Arâpa olâ. Yeinwântânry modo, yeinwânri modo izepamo ise. Ynynâbaom modo, ynynonro modo enagazezemo, tâwâlâ wâne âjipemugüem awylymo.

<sup>52</sup> Âtâ odakâ yeinwânri, yeinwântânry modo warâlâ âewiâmunezemo. Tygue tygue itaynzemo, âjigüe âjitoguyzemo.

<sup>53</sup> Tâjiunwym, tymeombyry iewiâseze. Tâjimery, tunwym iewiâseze. Tâjise, tâxirydo iewiâseze. Tâzexiry, tyze iewiâseze. Tâjimenhundu, tyweise ynynonro iewiâseze. Tâjiweise, tymenhundu ynynonro iewiâseze warâ — kely Jesus.

*Xirâ ume aini modo saindyly xutuho*  
(Mt 16.1-4)

<sup>54</sup> Aituo Jesus aguely kurâdoram:

— Kau emyguymadyly mâendylymo-ro watay, inepa kehoem kopâ ihuguerin-em awyly mâuntulyly, tâihugueze lelâlâ-ro warâ. Kopâ ihuguely xutuho awârâ eunu kau wâgâ emyguymadyly watay.

<sup>55</sup> Sul ynynâba sapezenu âewyly mâuntulylymo-ro watay, “Âdâpigu adaguly isenra” myguelymy. Âdâpigu adaguho tainse lelâlâ-ro warâ. Âdâpigu adaguho xutuho awârâ sapezenu sul eynynâba âeni\*.

<sup>56</sup> Tonomegueinhe wâne mâdutulylymo, tonomegueba olâ âmaemo. Kau mâendylymo-ro watay, kopâ ihugueze, nihugueba warâ awyly tutuze âmaemo. Se modo sawanseduo, tutuze âmaemo, âdâpigu saindyly awyly. Âdaituo Deus eon-honrugue agânhedyly awyly olâ mâuntuba lelâ âmaemo.

*Koendâ lelâ âizepanromoem aitaungâ*  
(Mt 5.25-26)

<sup>57</sup> Jesus aguely myani:

— Âdaituoka tâwâlâ âdykonlo koendonro, inakai warâ awyly mâuntuba mawylymo lâpylâ.

<sup>58</sup> Etaungâ, ânguylâ agâmo tyewiâse. Âwankuem mânhetomobyry wâgâ watay, iwentâguedylymo. Aguely: “Pymânra ise adylymo, itadânehon-homoem” kely. Myarâ adylymo iraynâlâ, eagâ koendâ âtunâguedaungâ, tyewiâseba ietaungâ warâ. Amyguepa âmaemo eagâ watay, tuxize kehoem pymânra asemo. Aituo ise pymâ itadânehonlymo, pyanta nhenahuen-honly warâ.

<sup>59</sup> Pymâ aguehobyry ara idânârâ mâempyabyra âmaemo watay, igasewâbyra âmaemo târâpa. Arâ lâpylâ Deus agâ koendâ itaungâ koendâ mitomobe awyly umelâ — kely Jesus tonlo modoram.

## 13

*Jesus tyeinwântoem inakanhe adâidyly imodânry Deusram nâtâwâbyra ise*

<sup>1</sup> Îlâ ume kurâdo ewy Jesus iopaji idâlymo. Aguelymo myani:

\* 12:55 Târâ Israeldâ sapezenu sul eynynonro taunlo agâ âzeki. Aituo taunlo sapezenu âdâpigu nhenewyly ume, taunlo igâwynu nhenewyly.

– Tutuze âmâ, Galiléia domodo târâ Jerusalémdâ aietomobyry. Deus ety oday ânguydo imeom xyâppy egameze ataymo, Pilatosram âzegaemeolymo xyâhomoem. Inakanhe awyly-moguelâ âdyolymo. Âdara inanaji? – kelymo.

<sup>2</sup> Aituo myani Jesus aguely:

– Inanajimo arâ Galiléia domodo âdyoly, tagonrodo takaze inakai awylymoguel.

<sup>3</sup> Arâpa olâ! Tagonrodo takaze koendâpa awylygue inkâba myani akaemo iguely. Inakanhe mawylymo mâinmopa âmaemo yeinwântoem watay, Deus eydâ atoram mydâwâpyra ise âmaemo âgueduomo.

<sup>4</sup> Tânanâguzelâ keanra âmaemo, dezoito uguondo Siloé donro modo mârâ torre tuonwa ihugueduo iguewâtyby modo. Jerusalém donro modo takaze inakaigumogue akaemo iguely, inanjimo.

<sup>5</sup> Arâpa olâ. Awârâ wâgâ inkâba myani arâ iguelymo. Igueze lâpylâ âmaemo. Deus izepa ato aiedyly mâinmopa âmaemo yeinwântomoem-ro watay, Deus eydâ atoram mydâwâpyra ise âmaemo. Deus agâ iwaguelâ ise âmaemo. Xirâ mâuntudyzemo kuru wato – kely Jesus.

*Jesus figueira ewisedânry wâgâ unâ nhegatuohobyry*

<sup>6</sup> Ilâpyryem Jesus unâ nhegatu, enomedâzemo. Aguely:

– Tâlâ myani nady figueira, âtâ inatay, nady tâwituneim modo duay etâdyby. Âdaunloenâ newiseba olâ myani mârâ figueira. Aunlolâ mykâinane sodo, ewiseyby ese idâzesedyly wâne. Newiseba lelâ olâ myani.

<sup>7</sup> Aituo myani aguely mâkâ nady modo eniram: “Egâ awârâ figueira. Azagâ tokalâ warâ anu awârâ ewisely kêempyra wawyly. Ewiseho odaji ituo kêewyly ese. Âdalâ ewituo kêempyra urâ. Satâgâ. Newisewâbyra awârâ. Alâ kulâ awârâ onro nhuan-huly târâ” kely.

<sup>8</sup> Warâ olâ myani mâkâ tâwaneim aguely: “Alâ wao nidâ tokalâ anu lelâ. Tânmize esagueze lelâ urâ. Toenzepa adubu iese urâ-ro warâ.

<sup>9</sup> Awârâ anu âeni wâgâ ewiseze wâne keanra awârâ figueira. Newiseba lelâ-ro watay maise tâwâlâ mantâen-honly” kely myani – kely Jesus.

*Jesus tâzekobyzegueho oday pekodo tâwâneim kua nhetobyry*

<sup>10</sup> Tâzekobyzegueho oday myani Deus xunârygue Jesus kurâdo nhenomedâdyly âtâ tâdâtâdygyho oday.

<sup>11</sup> Pekodo dezoito anu tâwâneimpe myani târâ, tykadâungueim. Âdara kua ini-emba.

<sup>12</sup> Tientuo myani Jesus tyam ingâsedyly. Eyam Jesus aguely:

– Kua âese urâ, koendâ âkary itoem – kely.

<sup>13</sup> Aguepyem myani Jesus tâmary nhonwa nhedyly. Ilâ umelâ kehoem tykadâungue adakobâdybyem koendâ ikary idyly. Deus wâgâ aguely:

– Koendonro awâkâ Deus urâem! – kely.

<sup>14</sup> Âtâ tâdâtâdygyho iwymâry toenzepa kehoem iewiâpadyly, Jesus mâkâ tâzekobyzegueho oday kua nhetobyry wâgâ. Aituo myani kurâdoram aguely:

– Seis emedyly lelâ tâdâsewaniho. Kua midyse mataymo, tâzewano oday âetaungâ. Tâzekobyzegueho oday kua ise tâeseba itaungâ – kely.

<sup>15</sup> Aituo myani Kywymâry Jesus aguely:

– Koendonroem wâne mâdutulylo, koendonro keba olâ âmaemo. Tâdâzekobyzegueho oday tâsewanize lâpylâ âmaemo! Iguymo tapirâ, jumentu warâ paru nhenyhoem tywykâjiguzze tâzekobyzegueho odaylâ.

<sup>16</sup> Merâ pekodo, kydamu Abraão iwery. Dezoito anu Satanâs merâ pekodo inakanhe ieseze awyly, âzewykehoemba awyly. Tâzekobyzegueho oday lelâlâ merâ kua kânhedyly – kely Jesus.

<sup>17</sup> Awârâ tindatuo myani Jesus izepanro modo âpybazedlymo. Izetonro modo olâ iomaru lelâ Jesus Deus eon-honrugue aidyly tientuo.

*Jesus mostarda ewy wâgâ aguehobyry*

(Mt 13.31-32; Mc 4.30-32)

<sup>18</sup> Jesus aguely myani:

– Unâ segatuji wao âdara Deus kywymâryem lelâlâ idyly awyly mâuntuhomoem.

<sup>19</sup> Tutuzelâ âmaemo, âpa ezay mostarda ewy tâtâzeim, imeimbyry kulâ awyly. Mostarda ewy imeombyry kuru, nady ewy modo enday. Tâtâduo olâ tyazeze, ago tâise, imâsedo modoem kehoem tywatazeze warâ. Awylygue tawâguneim modo iwatary wâgâ tâty anhoem nhuduly – kely myani Jesus.

{“Myara lâpylâ saguhoem kuru aguiapa kurâdo kulâ Deus tywymâryem awyly einwânni modo. Ilâpygueduo olâ agui tâise” keze Jesus aguely.}

*Jesus fermentu wâgâ aguehobyry**(Mt 13.33)*<sup>20</sup> Jesus agueondyly:

– Xirâ unâ lâpylâ segatuji wao, âdara Deus kywymâryem lelâlâ idyly awyly mâuntuhomoem.

<sup>21</sup> Pekodo pão aieni imâem trigu nhedyly; fermentu olâ âdiempa kulâ nhedyly. Mârâ fermentu pão ioliho âdiempaomybyry olâ trigu tuolize imâem kehoem – kely Jesus.

*Jesus pyanta tâtabigueim wâgâ aguehobyry**(Mt 7.13-14,21-23)*

<sup>22</sup> Ilâpyryem myani Jesus Jerusalémram idály. Âtâ anary inâsedo anakâ, imeomybyry anakâ warâ sakadyly, kurâdo tonomedâdaynze.

<sup>23</sup> Aituo myani adapâigueoly:

– Pymâ, aguipa kulâ ise tâmakezeim modo? Aguipa kulâ mawânkâ ise Deus izepa ato aiedyly imowâni modo, inakanhe atomobyry nhygakehoem? – kely.

<sup>24</sup> Aituo myani Jesus in-hoguly:

– Auguely xirâ âyanmo. Deus agueho mâinwântomoem âzeon-hondâdaungâ, izepa ato amânhepyra mitomoem. Tagarane kehoem pyanta tâtabigueim oze kâgawântoem, ara lâpylâ eon-honru, inakai modo aiedyly mâinmohomoem. Toenzepa wâne inakanhe tawyly imoze kewâni modo, nimopamo olâ.

<sup>25</sup> – Âtâ odo pyanta enahunze xavegue kehoem. Kuoholâ ise âmaemo. Aituo ise mâingâsedylymo: “Tâwâlâla xina negawândâ, Pymâ” keze âmaemo. “Igwâmpyra ise mataunaze. Âdykâ nynonrobyry mâkeba âmaemo” keze sodô.

<sup>26</sup> Aituo ise amyguelymo: “Agâlâ ani xina âwinduadyly, adakuily warâ. Xina ijidadârydâ ani mâenedâdyly” myguelymo ise.

<sup>27</sup> Aguely ise: “Âtutwâbyramo urâ. Ydâpa itaungâ, âmaemo inakanhe aitaynrim modo!” keze.

<sup>28</sup> Abraão, Isaque, Jacó, eagonro modo, Deus eynynâ aguewâtyby modo warâ, Deus eydâ atodâ akaemo iwerâ. Âmaemo olâ ise eydâ atomoram mydâpamo. Mâpyneândylymogue, eogumase âmaemo âtynrumogue. Toenzepa mâsenagazedylymogue ârymo saguze âmaemo.

<sup>29</sup> Deus ize ato lelâ aienibyry modo olâ eagâ iwerâ. Tâinkânro modo lelâba ise âtâdyguynri Deus pymâem atodâ. Xixi egaseho eynynonro modo, egawânto eynynonro modo, sul nynonro modo, norte nynonro modo warâ ise âtâdyguelymo. Yagâ ise âwinduadylymo; Deus tywymâryem awyly nhomaendylymo.

<sup>30</sup> Iwerâ âgânnonrobyry modo, ilâem waunroem ise. Waunropyry modo ise âgânâyam ise warâ – kely Jesus.

*Jesus Jerusalém domodo wâgâ toenzepa kehoem itywandobyry**(Mt 23.37-39)*<sup>31</sup> Jesus aguely ume myani fariseu domodo ewy iwaguepa saindylymo, aguelymo:

– Idâ. Tarâpa ikâ. Âehondyze enra Herodes – kelymo.

<sup>32</sup> Aituo Jesus aguely:

– Wakewâtaunda mâkâ, poroho todû enokuni ara konokuniram: “Jesus itanrubyry xirâ âyam. ‘Iweâpa witaymba ise urâ. Kâsewanily, kâempagunâbyra olâ ise urâ. Tâwânuneim modo kua iese urâ. Kadopâgue taseim modo kua iese warâ. Iwerâ, kopaelâgâ warâ ise awârâ modo agânhedyly. Azagâ tokalâ warâ iguandyly bygueduo ise aiese kâjigonohohobyry modo kâenwanikely’ keanry” kewâtaunda.

<sup>33</sup> Awylygue iwerâ, kopaelâgâ, kopaelâgâbygueduo warâ ise Jerusalémram idâzeseze wawyly. Jerusalémâ lelâ mawânkâ Deus eynynâ aguewâni modo iguely – kely Jesus.

<sup>34</sup> Ilâpygueduo myani Jesus aguely Jerusalém donro modo wâgâ, eydâmolâ-ro waunlo ara lelâ:

– Âmaemo, Jerusalém donro modoram xirâ auguely. Iweâparoem, âjidadârymo donro modo Deus itaumbry egatuwânybyry modo xyâwânromy. Agui Deus ingonotaymby modo tuhugue tyâzemo myani. Arâlâ olâ toenzepa âwynedylymo. Aukuma wâne tymeomybyry tawâry laxi tydâtyguyze, tuan-hun-hoem, myara toenzepa idânârâ nhedysemo wawyly. Agui olâ âmaemo ewy yizepaom modo.

<sup>35</sup> Deus odokezemo. Saguhomo wâne ani koendâ agâmo myarapa ise Deus. Âtâ sodokeyby ara ise âmaemo. Ietondaymba ise âmaemo, “Koendonro lelâlâ âmâ Deus Ingonotyby” yam myguehomo odaji idyly ara. Xirâ mâuntudyzemo kuru wato – kely Jesus.

<sup>1</sup> Tâzekobyzegueho oday myani fariseu domodo iwymâry ewy Jesus tâtyram âwinduase idâhoem ingâsedily. Aituo Jesus idâly. Idânârâ tonlo modo Jesus nhenuagaendilymo, âdylâ anhedily tientomoem. “Âdylâ adyesenry aiese lelâlâ enra tâzekobyzegueho oday” tâkeduomo.

<sup>2</sup> Târâ uguondo tâwâneimbe, ewâry, ixinary warâ toenzepa myani sakygu. Mâkâ tâwâneim Jesus iopaji saindily.

<sup>3</sup> Tientuo myani Jesus aguely fariseu domodoram, Moisés inweniby wâgâ enomedâni modoram warâ:

– Âdaraka Moisés inweniby aguely tâzekobyzegueho oday tâwâneim kua iedyly wâgâ? Tâwâlâ, tâwâlâpa kua iedyly? – kely Jesus.

<sup>4</sup> Nihogubamo olâ. Aituo myani Jesus tâwâneim onwa tâmary MÂ' nhedily. Adyetuo, tâwâneim kua idily. Kua tiempygueduo eyam aguely:

– Idâ lelâ itynra – kely.

<sup>5</sup> Aituo myani Jesus aguely fariseu domodoram:

– Tâsewanize lâpylâ âmaemo tâzekobyzegueho oday. Âmerymo atay, iguymo tapirâ atay warâ, tâtagueim odaji ihuguely tâzekobyzegueho oday-ro watay, kopaelâgâem mânhenenwâbyra âmaemo. Ilâ umelâ mâentylymo, tâzekobyzegueho oday awyly umelâ – kely Jesus.

<sup>6</sup> Âdara kepamo lâgâlâ, âkealâ Jesus aguely awyly tutuze tawylmogoue.

*Agonrodomo takaze mawyllymo mâkeba inananomo nidâ*

<sup>7</sup> Igâsedaymby modo mesa wâgâ tâjidy koendonro lelâ induakelymo tânuagaenze myani Jesus. Mure âty sododâ iwaguepanro kehoem induakelymo, tynreim modo ekadodâ kehoem. Awârâ tientuo myani Jesus aguely:

<sup>8</sup> – Mâwinduatomoem mājigâseolyo-ro watay tynruneim modo ekadodâba ikadaungâ, akadâmo tynreim, mure sodo modo sainse mawânkâ.

<sup>9</sup> Aituo ise âty sodo âyanmo aguely: “Eagonrodâ ikadomo xuiwâtaungâ. Xirâma akadâmo tynreim modo ekado-ro” keze âgâsenimobyry. Aituo ise toenzepa kehoem mâpybazedilymo. Mure âty sodo xurerydâ iwague ise mâzekanâolyo, kurâdo âdaunlo modo agâ kulâ. Arâ mawânkâ “Tynrenseim urâ” kewâni modo aieholly.

<sup>10</sup> – Mâwinduatoem mājigâseolyo-ro watay, iwaguelâ âty sododâ ikadaungâ, kurâdo âdaunlo modo duaylâ. Awylygue mawânkâ ise âgâsenimobyry warâ âyanmo aguely: “Âetaungâ wopaji, yataen-ho modo. Xirâ pymâ modo ekado onwa ikadaungârâ” kely. Awârâ tientuo, idânârâ igâsedaymby modo tynrenseim mawyllymo xutuze.

<sup>11</sup> Deus enanjima, kurâ domodo tâwâlâ kulâ âtyrenni watay, âdaunlo modo kulâ awâkâ aunlo. Âtyendânry modo olâ Deus xurâem, tynreim kehoem – kely Jesus.

<sup>12</sup> Ilâpygueduo myani Jesus aguely igâsedaymby modoram:

– Âty odo âmaemo-ro watay, ataen-homo lelâ inkâba, âukonodo lelâba, âwaigorudo lelâba, âpemugudo lelâba, âdydo imeom sodo modo lelâba warâ igâsedaungâ. Ilâpygueduo, âgâsezemo lâpylâ mawânkâ âdaralâ tâtyram. Âgâseni modo kulelâ mâingâseguyllymo-ro watay, ânguy mâenmawiyadâdilymo mâkeba awârâ.

<sup>13</sup> Itydâ âty ize mataymo, âdy pebaom modo, kurâdo tywykuneim modo, ixigalama-daymby modo, epy modo warâ lâpylâ âingâsedaungâ.

<sup>14</sup> Mâkâ kurâ domodo mâingâsedilymo-ro watay, toenzepa omaromoem Deus aiese. Akaemo olâ ise eagâmo mâtetyguedomoem âgâsebyramo, mâingâsebygueduomo âdy âyanmo tiunduly peba tawylmogoue. Deuslâ ise omarumo xudunri. Xypyry etay, Deus tynynonro modo kurâem nhetonduo, ipywyazemo lelâ. Âdy pebanro modo koendâ mâentomobyry wâgâ âzepywaoze âmaemo Deusram – kely Jesus.

*Jesus âty imâsedodâ adâjitobyry nhगतuhobyry*

*(Mt 22.1-14)*

<sup>15</sup> Awârâ tindatuo myani uguondo târâ âwinduani aguely Jesusram:

– Koendonro ise Deus pymâem atoram idâwâni modo, iomarumo eagâ âwinduase – kely.

<sup>16</sup> Aituo myani Jesus unâ nhगतuly, tienomedâdomoem, idânârâ igâsedaymby modo ara Deus eydâ atoram nâtâwâbyra ise kely.

– Âdydo imeom sodo myani âty imâsedoem adientoem ton-honze. Toenzepa kurâdo tygâseze myani, tâtyram âwinduase idâhomoem.

<sup>17</sup> Alâ ituo, tagâ tâwaneim ingonodyly myani, ingâsedaymby modoram “Alâ iweâma. Yagâ âzetyguedaungârâ” keze.

<sup>18</sup> Eagâ tâwaneim idâly. Ingâsedaynly. Igâsedaymby modo olâ tâtâdyzeba. Awylygue idânârâ âdatuo nâtâba tawylly wâgâ aguelymo. Saguhô aguely myani mâkâ emaryram: “Ypi

agânheto ejidy sanâdâ. Iweâ lelâlâ udâly ise ese. Kekâne âty sodoram, yagâ newiâpabyra itoem” kely.

<sup>19</sup> – Eagonro aguely: “Dez tapirâ sanâdâ, ygarosary epâgueinhe. Koendâ âsewanyli kêendily wao ise. Kekâne âty sodoram, yagâ newiâpabyra itoem” kely.

<sup>20</sup> – Eagonro aguely: “Iweâ kulâ enra kohogüinly. Awlylygue ise udâpa wawlyly. Kekâne âty sodoram, yagâ newiâpabyra itoem” kely.

<sup>21</sup> – Aituo myani mâkâ emary odopâdyly. Idânârâ nhगतuly âty sodoram. “Agâ tâzetyguedyzeba mâingâsedaymby modo” kely. Awârâ tindatuo, âty sodo toenzepa kehoem tyewiâpaduo aguely: “Idâ inepa taseragâ; âdaunlo ânwa ozelâ idâ, âdy pebaom modo etyram. Âdy pebaom modo xarâ enekâ, kurâdo tywykuneim modo, epy modo, sautânry modo warâ eagâmo kâwinduatoem” kely.

<sup>22</sup> – Emary idâly myani. Odopâdyly kurâdo âdaunlo modo agâ kulâ. “Idânârâ senetai, ese ugonotobyry modo. Ity tummykebalâ olâ; toenzepa âjipelâ” kely.

<sup>23</sup> – Aituo myani âty sodo aguely: “Kurâdo iwagueno modo eta, iwerâ yagâ âwinduatoem. Âpa ezaji, xidadâ iwaguenonra warâ idâ. Idânârâ monhontaynly modoram yagâ âwinduase âetomoem aguekâ. Tâewyseba awlylymogue kulâ, eagâmo amyguepa tâiseba olâ ikâ, agâ âewylymo mâentoem. Iety xumydyze urâ kurâdogue” kely tâmaryam.

<sup>24</sup> Idânârâ tonlo modoram aguely: “Âkeâ lelâlâ xirâ auguely âyanmo, kâingâsedaymby âetânrybyry modo yagâ nâzetyguedaymbya ise” kely mâkâ âty sodo – kely myani Jesus.

*Jesus eynnonro modo âsenagazeze*

*(Mt 10.37-39)*

<sup>25</sup> Jesus Jerusâlemram idâly ume toenzepa myani kurâdo nhapgyue awlyly. Aituo âsemyombâdyly. Eyanmo aguely:

<sup>26</sup> – Ynnonroem midyse mataymo, yeinwândyse mataymo, unwânmo, âzemo, âwydymo, âmeombyrymo, âwaigorumo, âukonomo, nhaundumo warâ takaze kehoem ywynedaungâ. Yakadâ âdaunlo kurâdo kulâ mâinwynegylymo-ro watay, ynnonroemba ise âutulymo. Ize wato aietaungâ, ize matomo takaze.

<sup>27</sup> Ynnonroem lelâlâ midyse mataymo, ize matomo ara kulâ amidilymo imowâdaungâ. Mâsenagazedilymo umelâ auguely idataungâ; yeinwântaungâ, âiguehomo odaji kehoem, kruz manâdilymo-ro waunlo ara. Arâpa-ro watay, ynnonroemba ise mataunaze.

<sup>28</sup> – “Jesus eynnonro urâ” myguelymo iraynâ, tâmaenze mawlylymo xutuwâdaungâ wao, yeinwâmpyra mîpyra mitomoem. Saguhoem kuru âtâ itâni tintâdyly iraynâ, idânârâ âtâ isejiguy nhuduly wao nhekily tintâdoem. Idânârâ âtâ isejiguy peba-ro watay, âtâ nitâdaymbya mâkâ.

<sup>29</sup> Âtâ itâdyly nhaguly idânârâ âtâ isejiguy, sary warâ peba kulâ-ro watay, mârâ âtâ nadahuba wawlyly etaynrîm modoram âwankuem âiehoze, âjeileoze warâ. Aguelymo ise:

<sup>30</sup> “Etaungâ awârâ âtâ. Sodo wâne itâdyly nagu, newanikeba olâ” kezemo.

<sup>31</sup> – Âsegyebyze tâtâly iraynâ, sodadu modo iwymâry saguhoem kuru tuduery agâ tienmaenly, tienmaemba warâ tawlyly wao nhutuly. Dez mîl kulâ izodadury, vinte mîl lelâ iduery izodadury-ro warâ watay, tyangahu odaylâ agueze: “Kienmaen-hoem ton-honre wânkâ ise kurâ âsegyebyze?” keze.

<sup>32</sup> Tâwâlâ aguely watay: “Kienmaemba ise kydaze” kely-ro watay, tuduery iwague awlyly umelâ ise eyam ageuim ingonodyly, nâsegyebyba tâitomoem âtunâgueze.

<sup>33</sup> – Koendâ lâpylâ angahumo oday âdutuwâdaungâ, yeinwândyse, yeinwândyseba warâ mawlylymo. Ynnonroem mataymo, ize matomo ara amidilymo imowâdaungâ, urâem lelâ amitomoem – kely Jesus.

*Peku tanepa ityby*

*(Mt 5.13; Mc 9.50)*

<sup>34</sup> Jesus aguely myani:

– Koendonro wâne peku, pyni tâkubâzeânze, podo niwânzeânehomba warâ. Peku, onro agâ on-hoam ityby olâ pyni ikaji ietoem nudupa.

<sup>35</sup> Âdaitoem ânguy ize inkâba mârâ aunlo. Samely lelâ. Xirâ koendâ mâuntudyze mataymo, koendâ idataungâ, xutuwâdaungâ warâ – kely myani Jesus.

## 15

*Jesus enomedâzemo, kaneru xuzatyby wâgâ aguehobyry*

*(Mt 18.10-14)*

<sup>1</sup> Impostu epywadobyry emakewâni modo, judeu domodo ezewenry ara aitânry modo warâ saindylymo Jesus iopaji, aguely idase.

<sup>2</sup> Fariseu domodo, Moisés inwenibiy wâgâ enomedâni modo warâ myani Jesus nhunâguedylymo. Aguelymo:  
 – Kurâdo inakai modo agâ tadawyly keduoontro. Eagâmo tâdâwinduadyly keduoontro warâ merâ uguondo – kelymo.

<sup>3</sup> Aituo myani Jesus warâ aguely, enomedâzemo:

<sup>4</sup> – Cem ovelhape âmaemo watay, tokalâ xuzatuo, tuize tâise âmaemo. Noventa e nove tâtadâze tâise âmaemo etadâdo odaji xuzatyby xuize mydâhomoem.

<sup>5</sup> Mâentuomo, tuomazeze tâise âmaemo. Âewandaymo tâise mâenewylymo.

<sup>6</sup> Itymoram aintuomo, itymo apano modo, ataen-hodo warâ mâingâsedelylymo tâise. Amyguelymo: “Ohomaendaungâ yagâ. Ieguy xuzatybyma setai” myguelymo tâise – kely Jesus.

<sup>7</sup> – Deus, eagâ kaynonro modo warâ toenzepa tohomaenzemo lâpylâ, tokalâ kurâ inakanhe adâidyly inmoly, Deus tyeinwântoem watay, mâkâ tâinwânni modo nhomaendyly takaze kehoem. Xirâ mâuntudyzemo kuru wato – kely Jesus.

*Jesus enomedâzemo, moeda samen-hoymy wâgâ aguehobyry*

<sup>8</sup> Jesus aguely myani, enomedâzemo:

– Tokalâ pekodo dez moedapeom, tokalâ tiamehonduo, tiamehoymy tuize myani. Lamparina tohobanâze, âtâ tawinkoenze warâ.

<sup>9</sup> Tientuo, tataen-hodo, tâty apano modo warâ ingâsedelyly. Aguely: “Yagâ ohomaendaungâ. Ymoedary kamehoymybima setai” kely. Warâ myani pekodo aidyly tiamehoymybima tientuo, iomaru.

<sup>10</sup> – Deus emary kaynonro modo iomazezemo toenzepa kehoem, tokalâ kurâ âjityendyly, inakanhe adâidyly inmoly warâ watay. Xirâ mâuntudyzemo kuru wato – kely Jesus.

*Jesus tâjimyry tunwym sodokeimbyry odopâdyby wâgâ unâ nhegatuhoobyry*

<sup>11</sup> Aituo myani Jesus unâ nhegatyly, tienomedâdomoem:

– Tâlâ myani uguondo, azagâ tymegueim.

<sup>12</sup> Alâ myani imery iukono tunwynram aguely: “Âigueduo, mânhâympy modo urâem, paigoem warâ ise âzepajiwâdyly. Âiguely kâinwânwândyseba aze. Urâem ini mâundudyse urâ inepa kehoem” kely salokuzenomo. Aituo myani nhunwym tâlâ tato ara nhepajiwâdyly iukonoem, iwaigoruem warâ.

<sup>13</sup> Inepa myani mâkâ iukono idânârâ turâ âjigue nhedyly. Taypa âkelo âtâ anaxi idâly. Myarâ taintuo myani etygu kulâ. Kywypado, inakai modo warâ anhedyly. Idânârâ tunwym dinheru nhuduypy nhainly myani.

<sup>14</sup> – Idinheruru adaimpyem myani âdara typyniry nhanâto peba idyly. Awylygue toenzepa myani mâkâ salokuzenomo tâwindygue âsenagazedelyly. Mârâ xidadâdâ aekuru pyni peba lâpylâ; toenzepa lâpylâ tâwinzeim modo.

<sup>15</sup> Aituo myani âdylâ tâwanu xuize idâly tâwinduatoem. Uguondo tonlonra agueze idâly. Aguely myani eyam: “Âmâem âsewanize urâ, kâwinduatoenlâ. Âdy kâinly peba aze” kely mâkâ salokuzenomo. Aituo myani uguondo aguely: “Tâwâlâ yfazendaryram âsewanira. Ieguy pâsega modo ise mâenkyly” kely. Aituo myani idâly fazendaram, uguondo eguy pâsega eniem.

<sup>16</sup> Toenzepa myani ewindy. Ânguy olâ myani nuapryra. Awylygue myani toenzepa pâsega ipyniry ewy tieindyse idyly.

<sup>17</sup> – Toenzepa myani âsenagazedelyly. Aituo aguely: “Inakanhe awitobyry wâgâlâ xirâ kâsenagazedelyly. Pabai agâ tâwanuneim modo tâsegubydâzelâ kehoem ipyniry. Ilâ enday urâ tarâ kâsewinzedelyly!

<sup>18</sup> Pabairam kodopâdyly ise. Warâ ise eyam auguely: ‘Deus enanaym, inakanhe awidâ. Agâ inakanhe awidâ lâpylâ warâ, Pabai. Idânârâ mâunduyypyma saim.

<sup>19</sup> Awylygue âmery ara inkâba iegâ. Agâ tâwaneim ara kulâ iegâ’ warâ ise saintybyem pabairam auguely” kely mâkâ salokuzenomo.

<sup>20</sup> Aituo myani târâpa odopâdyly tunwym etyram.

– Âtâdâ iwague endaylâ, nhunwym nhedyly. Tientuo, toenzepa kehoem intyendyly. Tâgase kehoem tymery iose idâly. Oxiodybyem inwymogoyly. Nhonugudyly.

<sup>21</sup> Aituo myani mâkâ salokuzenomo aguely: “Deus enanaym, inakanhe awidâ. Agâ inakanhe awidâ lâpylâ warâ, Pabai. Idânârâ mâunduyypyma saim. Awylygue âmery ara inkâba iegâ” kely.

<sup>22</sup> – Aituo myani nhunwym tagâ tâwanuneim modoram aguely: “Iokobadaungâ, âtâ iwogonro iwâkuru kehoem enetaungâ. Etydâdaungâ. Ane iwâkuru emary ewily onwa ietaungâ. Ihuru etary ihuru onwa ietaungâ warâ.

<sup>23</sup> Kâtygu ise! Tapirâ kiandyzeântyby xyâwâtaungâ warâ. Kydâwinduane! Kydohomaene!



<sup>24</sup> Ymery mawânkâ nodopâdai. Igueypy ara keankâ merâ, kagâlâ olâ iwerâ! Xuzatyby ara keankâ, xarâ kyam olâ nâepanâgueondai” kely nhunwym. Ilâpygueduo myani etyrymo adaguly lelâ.

<sup>25</sup> – Ilâ ume myani iwaigoru saindily âpa ezay tâwaneimbyryem. Âtâ iwaguepa saintybyem myani tydzeim modo aguely indadyly, tâdâidyly indadyly warâ.

<sup>26</sup> Aituo myani tâwaneim ingâsedily, nhapâiguely: “Âdyka awârâ? Âdaituoka âidylymo, âdydo imeom indylymo warâ?” kely.

<sup>27</sup> – Aituo mâkâ tâwaneim in-hoguly: “Âukono nodopâdai. Unwâm tapirâ kiandyzeântyby nyâen-hoagui. Âukono odopâdobyry xina nhetygueguly” kely.

<sup>28</sup> – Awârâ tindatuo myani iwaigoru iewiâpadyly. Tâgawândyseba idyly. Tiuntuduo myani nhunwym egasely kuohoram. Idâly eydâ atoram. “Igwânkâ. Xina agâ ohomaengâ, Mery” kely.

<sup>29</sup> Imery olâ warâ aguely eyam: “Iweâpa agâ âsewanizeze wawuly. Âdykâ amyguehobyry kankadaymba urâ. Tokalâ bodylâ yam mâundupa olâ âmâ, yataen-ho modo agâ kâzetyguedoem.

<sup>30</sup> Koendâpa aityby keankâ awâkâ âmeryma-ro. Idânârâ tydinheruru mâundupy naim, pekodo inakai modo agâ tâitoem kulâ. Sainrimpyryem pylâ odopâdily. Tapirâ sadyzeântyby mâyâen-honly, âty aietoem” kely myani iwaigoru.

<sup>31</sup> – Aituo nhunwym aguely: “Yagâlâ minase, Mery. Idânârâ tâlâ wato, âmâ xurâ lâpylâ.

<sup>32</sup> Xirâ âty agânhedyse wawuly olâ enra, kuomaru kênehohoem. Âukono mawânkâ nodopâdai. Igueypy ara keankâ mâkâ, kagâlâ olâ iwerâ! Xuzatyby ara keankâ, xarâ kyanlâ olâ nâepanâgueondai” kely nhunwym – kely Jesus.

## 16

*Jesus tâwaneim konokuni wâgâ unâ nhegatuhoobyry*

<sup>1</sup> Aituo myani Jesus unâ nhegatyly, tynnonro modo tienomedâdomoem:

– Uguondo tydinherugueim toenzepa âdydo imeom sodo myani mâkâ. Tâlâ lâpylâ myani uguondo mâkâ âdydo imeom sodo isejiguy eni. Eagonro tâwanuneim modo tywymâryam agueze idâlymo, mâkâ isejiguy eni wâgâ. “Inokudyly kulâ mâkâ âsejiguy eni. Âdinheruru nhainly kulâ awâkâ” kelymo.

<sup>2</sup> Awârâ tindatuo myani sodo mâkâ tâwaneim ingâsedily. Eyam aguely: “Iwerâ ise-ro? ‘Ienokudyly kulâ myinanry. Koendâ ysejiguy mâentaymba âmâ’ nyguemo. Âkealâka? Pape wâgâ iwenigâ idânârâ mâentaynly modo igondago, âdara yagâ deve awylymo kâuntuhoem. Yagâ mâsewaniombyra ise maze” kely.

<sup>3</sup> – Aituo myani tâwaneim âpaunzedily: “Tâwanepa widyly ise enra. Âdaraka ise iwerâ awidyly! Ton-honreba urâ, âpa ezay tâwaneinhe. Tywypaze urâ, âkelomoram âzekainze.

<sup>4</sup> Ah! Awidyly xutuagui iweâma. Tutuze urâ, âdara ywymâry agâ tugontaguneim modo eataen-hoem widyly lelâ ise. Awituo ise akaemo yagâ koendâ awylymo. Tarâpa kâjigonoholy watay, ypyñiry, ipa wato modo warâ xuduzemo” kely myani mâkâ tâwaneim tyangahu oday.

<sup>5</sup> – Aituo myani idânârâ mâkâ uguondo âdydo imeom sodo agâ tugondagueim modo ingâsedily. Saguhoram aguely: “Âdara lelâka eagâ iewano agâ ogondagu?” kely. Mâkâ in-hoguly myani: “Imâem enra kêempywaguly, quatro mil litros azeiti ioseaji” kely.

<sup>6</sup> “Anra ogondary iwenibyem. Xugukeze urâ imâemba. Eagonro pape wâgâ imâembalâ ise kâinwenily. Azagâ mil litros azeiti lelâ ogondary, quatro mil mâkeba. Ikgâ. Izedy iwenigâ xirâ pape iwelo wâgâ” kely mâkâ tâwaneim.

<sup>7</sup> – Ilâpyryem myani eagonroram aguely: “Âmâ-ro, âdara lelâka eagâ iewano agâ ogondagu?” kely. Aituo myani in-hoguly: “Toenzepa ugondagu. Cem trigu etary lelâ” kely. “Xugukeze urâ ogondary. Oitentâ etary lelâ ise ogondary iwerâ. Tarâ xirâ pape iwelo wâgâ izedy iwenigâ” kely mâkâ tâwaneim konokuni.

<sup>8</sup> – Aituo myani iwymâry aitobyry nhutuly. Aituo aguely: “Ienokudâ wâne. Tonomegue lelâlâ olâmy makynre. Angahu oday, âdara âpyñiry, ipa mato modo mâendily mutu, yagâpa iwanu ipygueduo. Koendâ kehoem amidâ, waunroem mâzetoem” kely myani tâwaneinram. Warâ myani tâwaneim konokuni aidily – kely Jesus.

Aituo myani Jesus agueondily:

– Deus einwântânry modo tyangahu oday, âdara waunroem adâidyly awyly tutuzemo. Turâem pyni, ipa tato modo warâ xuduwâni modo eataen-hoem tâise lelâ. Arâ adâjidylyem lakuru enomegumo, Deus eynnonro modo takaze kehoem.

<sup>9</sup> Tonomegue âdinheruru tâlâ matomo aietaungâ, agonromo mâenmawyadâdomoem. Âdinherurumo adainly watay, Deus eydâ atodâ tâjike lelâ ise âmaemo.

<sup>10</sup> Âdiempa tâlâ tatogue, âkelomo emawyadâninra xuduze Deus toenzepa tâwâenseim târâ eydâ tatodâ. Âdiempa tâlâ tatogue, âkelomo emawyadânnyram olâ ise Deus nudupa tâwâenseim târâ eydâ tatodâ.

<sup>11</sup> Âiguelymo iraynâlâ, koendâ âdinherurumo aiedyly mâuntuba âmaemo watay, Deus iwâkuru modo nudupa lelâlâ ise, âigueduomo.

<sup>12</sup> Koendâ nhudyppy amânhepyra âmaemo tarâ onro anaym watay, nudupa lâpylâ ise koendonro modo târâ eagâ mataymo.

<sup>13</sup> – Azagâ tywymâgueim kurâ watay, nuduwâpyra azakâlâ agueho arâ aguietoem; merâ âdylâ aguiendyse, mâkâ âdylâ aguiendyse lâpylâ. Aituo tokalâ aguehobyry lelâ aguienkyly. Arâ lâpylâ mawânkâ awâkâ Deusgue tywymâgu ize tawyly umelâ toenzepa dinheru izetonro modo, Deusgue iwymâgüem nudupa awyly – kely Jesus.

*Jesus kurâdo nhenomedâdomobyry  
(Mt 11.12-13; 5.31-32; Mc 10.11-12)*

<sup>14</sup> Toenze kulâ dinheru izetonro mâkeba fariseu domodo. Aituo, “Deus ize ato amânhekylymo atay, toenzepa âdype midylymo wâgâ mâpaunzedylymo atay warâ idu-akewâdaungâ” Jesus kely tindatuomo, aguehobyry wâgâ âwankuem nhedylymo.

<sup>15</sup> Aituo myani Jesus aguely:

– Âkelomo enanaji, koendonro âmaemo. Deus olâ tutuze koendonro keba mawylymo. Tywângueim ara kulâ kurâdo iomazeândoem amânhekylymo Deus xurâem.

<sup>16</sup> – Saguhoem kydamudo âdara Deus ize ato adiyndyly nhutulymo myakâwâm kâzewenry Moisés inweniby wâgâ, Deus eynynâ aguewâni modo nhenomedâdo wâgâ warâ. Warâ mykâinane kydamudo aidyly, até João Batista ume. Iwerâ ozelâ ani, âdara Deus pymâem idyly wâgâ João Batista aguely. Arâ lâpylâ urâ unâ koendonro kâengatuly, âdara Deus kywymâryem idyly wâgâ. Toenzepa kurâdo Deus tywymâryem ize awyly, pymâem atoram tâtâdyze awylymo warâ.

<sup>17</sup> – Onro, kau warâ adainze. Deus aguiendyse ato Moisés iweniby olâ nâtugueba. Âdaunloenlâ tokalâ ezewenry iweniby ewy tâtywâduneba ise warâ.

<sup>18</sup> – Eagonro pekodo agâ mohogüinlymo, saguho âwydymo mâinmopygueduomo-ro watay, inakanhe midylymo awârâ. Aituo Deus izepa ato ara amidylymo. Deus xurâem, waunro tâjiiwydylâ, iwydy kuru, nhatano keba. Pekodo imoyby agâ ohogüimby watay Deus izepa ato ara kulâ lâpylâ aidyly. Deus xurâem, waunroem eagâ ohogüimbylâ mawânkâ iso kuru – kely Jesus.

*Jesus uguondo âdydo imeom sodo wâgâ, Lázaro wâgâ warâ unâ nhegatuohobyry*

<sup>19</sup> Aituo myani Jesus unâ nhegatuondyly, enomedâzemo:

– Uguondo âdydo imeom sodo myani. Kopaelâgâembaba âtâ tywogonro iwâkuru, tâwâenseim warâ nhedyly. Âtybeom ara lelâ myani etydâ. Aunlolâ myani etydâ pyni tâwâenseim, tâkubâguneim modobe awyly.

<sup>20</sup> – Tâlâ pylâ myani uguondo âdy pebaom Lázaro keho. Toenzepa myani iwâgâ pinuri modo egasely. Kopaelâgâembaba myani adaholy, mâkâ âdypeom ety iwyantaji.

<sup>21</sup> Aunlolâ myani âsewinzedyly. Mâkâ âdypeom typyniry egupyry nnameyby, iwenzary wâgâpa ihugueyby modo kulâ myani nheinzesequyly. Kaxorodoram iwinuriry âjilugainholy.

<sup>22</sup> – Aituo mâkâ kaikâ iguely. Anju domodoram myani egadopyry adaholy, kydamu Abraão eyam iwaguepa, Deus ize ato ara lelâ aini modoram. Tuomare kehoem myani târâ awyly. Mâkâ âdypeom tâigueze lâpylâ myani. Eguepybyry myani igueypy modo etadâdo odaji adaholy.

<sup>23</sup> Deus ize ato aietânry modo egadopyry idâhoram myani adaholy. Toenzepa târâ âsenagazedyly. Tâsenagazeday, iwaguelâ Abraão nhedyly, eagâ Lázaro warâ.

<sup>24</sup> Aituo myani adenkely: “Tako Abraão, ytyendâlâ ikâ! Toenzepa tarâ peto onwaym kâsenagazedyly. Lázaro tâmary ewily paikaji inkuihoem aguekâ wao, ulu nhâkânwanâze âetoem. Kâenmaemba aze tarâ âdâpigu!” kely mâkâ âdypeombyry.

<sup>25</sup> – Warâ olâ myani Abraão eyam aguely: “Âiguepa mawyly ume, toenzepa ani âdinherugu, âdydo imeom iwâkuru modope mawyly warâ. Lázaro ani âdy peba, toenzepa âsenagazedyly. Iwerâ mâkâ saguhoem âsenagazedyby Deus enado, awârâ modo nhewâ nukely. Âmâ toenzepa âsenagazeni iwerâ.

<sup>26</sup> Eydâ matoram merâ idâhoem nuduwâpyra, kuontay tâtagueim imeâgâemba kehoem tâsanigueimbe. Awyarâ tâzekuâdyze donro modo âzekuâdomoem nuduwâpyra. Atonlo modo xayam nâzekuâbyra lâpylâ warâ” kely Abraão mâkâ âdypeombyryam.

<sup>27</sup> – Aituo myani mâkâ aguely: “Xirâem olâ ytyendâ ikâ, tako Abraão. Pabai ety donro modo xuruse Lázaro igonokâ.

<sup>28</sup> Cinco lelâ konodope urâ târâ. Tâwâlâ Lázaro xurusemo nâtâ, niguepa tawylimo umelâ, inakanhe adâidyly inomohomoem. Deus izepa ato aiedyly nimopamo-ro watay, âese lâpylâ akaemo xarâ, xirâ âji toenzepa kehoem tâdâsenagazedoam” kely.

<sup>29</sup> – Aituo myani Abraão aguely: “Tâlâ Moisés aguehobyry iweniby Deus aguiendyse ato wâgâ kuruni. Tâlâ lâpylâ, saguhoem kuru Deus wâgâ aguewâni modo aguehobyry, âdara Deus agâ koendâ kitoem aguidyly wâgâ. Ilâ agueholâ âukonodo, Deus ize ato adiyendyse tatay, neinwândâmo” kely.

<sup>30</sup> – “Tako Abraão, Deus itaumbryry saguhobyry tindadysebamo, tyeinwândysebamo warâmo olâ inanry. Tâlâ Deus einwânniem itomoem aieto. Ânguylâ igueypy kurâem itondyby Deus wâgâ eyanmo agueze idâly-ro watay, inakanhe adâidyly imozemo, Deus tyeinwântoem” kely.

<sup>31</sup> – Aituo myani Abraão aguely: “Moisés aguehobyry nidapyramo, saguho Deus wâgâ aguewâni modo aguehobyry nidapyramo warâ watay, neinwâmpyra awylymolâ ise, ânguylâ igueypy kurâem itondyby Deus wâgâ aguenri awyly umelâ” kely Abraão – kely myani Jesus.

## 17

*Deus einwânnipyryem neinwâmpyra ienehoim toenzepa ise âsenagazedyly  
(Mt 18.6-7,21-35; Mc 9.42)*

<sup>1</sup> Aituo myani Jesus aguely tynynonro modoram:

– Aunlolâ kurâ domodo Deus neinwâmpyra ienehoim modo aidyly. Toenzepa kehoem âsenagazeze mâkâ yeinwânni yeinwâmpyra ienehoim.

<sup>2</sup> Koendâ tâise mâkâ iguely, yeinwânni yeinwâmpyra tienehonly iraynâlâ. Koendâ tâise tuhu imâsedo iwymy onwa ekâjily, parutabâ ikaji samehoem, yeinwânni yeinwâmpyra idyly iraynâlâ.

<sup>3</sup> Tâmaynelâ aitaungâ, aguewâtaungâ warâ. Yeinwânni modo ewy âynynâ inakanhe aidyly-ro watay, eyam aguewâtaungâ: “Deus izepa ato ara midyly awârâ. Adâiseba ikâ. Deus einwânkâ” kewâtaungâ eyam. Inakanhe adâidyly inmoly-ro watay, enanânehonwâdaungâ aitobyry.

<sup>4</sup> Inakanhe adâidyly wâgâ âjityendyly watay, “Awitombryra ise urâ” keduo, inakanhe awyly enanânehonwâdaungâ. Toenzepa inakanhe aidyly umelâ, sete lelâ tokalâ iguandyly ara, inakanhe awyly enanânehonwâdaungâ – kely Jesus.

*Jesus einwânni-ro watay, eon-honrube lelâ*

<sup>5</sup> Jesus induakeyby modo aguelymo myani eyam:

– Xina âinwândyly imâem iekâ, Pymâ – kelymo.

<sup>6</sup> Aituo myani aguely:

– Mostarda ewy imeimbyry aralâ, âdiempa yeinwândylymo watay, toenzepa on-honrumo xuduze urâ. Figueiraram, “Onkegâ. Parutabâ ikaji âzetâda” mygueduomo, aise amyguehobyry ara – kely Jesus.

*Jesus tâwaneim wâgâ unâ nhegatuhoobyry*

<sup>7</sup> Aituo myani Jesus unâ nhegatuly, tienomedâdomoem:

– Etaungâ. Âduaymo tâlâ uguondo emary poji anaym tâwaneim, eguy kaneru eni warâ watay, mâkâ poji anaymba saintuo, iwymâry eyam, “Ikobyzeguegâ. Ikgâ mâwinduatoem” kewâpyra tâise.

<sup>8</sup> Wakely tâise: “Iokobagâ, ypyniry aiekâ. Mesa onwa enekâ. Ohondybyem lelâ ikâ, kâwinduadyly ume, kadakuily ume warâ kâenkadyby mâenetoem. Kâwanikebygueduo ise tâwâlâ mâwinduadyly, madakuily warâ” kely tâise tâmaryam.

<sup>9</sup> Pymâ tâmaryam wakepa: “Koendonro âmâ; xirâma urâem amientai” kepa. Aguehobyry aieni kulâ mâkâ emary.

<sup>10</sup> Deus emary âmaemo. “Aiekâ” kehobyry amânhedylymo watay, iwanumolâ mârâ amânhekylymo. “Koendonro âmaemo” kely kâzenuedaundâ. “Amyguehobyry aieni kulâma xina” kewâtaungâ Deusram – kely Jesus.

*Jesus dez uguondo tâjimituguelygue tâwâneim kua nhetobyry*

<sup>11</sup> Jerusalémram tâtâly ume myani Jesus Samaria, Galiléia warâ ontagâ sakadyly.

<sup>12</sup> Âtâ anary imeimbyry odaji saindyly ume myani dez uguondo tâjimitugueygue tâwânuneim modo idâllymo iose. Iwaguelâ epagudylymo, awârâgue tâwânuneim modo iopaji ânguy naimpyra awylygue.

<sup>13</sup> Târâ endaylâ adaenkelymo:

— Xina tytyenzelâ ikâ, Jesus. Xina kua iekâ, Pymâ — kelymo.

<sup>14</sup> Tientuomo myani Jesus aguely:

— Kurâdo eynynâ Deus agâ aguewâni modoram âzehowâdaunda, kua ietybyem mawylymo nhutuhomoem — kely Jesus.

Aituo myani mâkâ dez uguondo modo ânwa oze idâllymo umelâ, kua idylymo Jesus eon-honrugue.

<sup>15</sup> Kua itybyem tawlyly tientuo myani tokalâ mâkâ uguondo modo ewy odopâdyly Jesusram. Todopâdyly ume myani mâkâ kaynâ kehoem xunâgu:

— Koendonro awâkâ Deus! Ton-honreim awâkâ Deus! — kely myani.

<sup>16</sup> Jesus eydâ atoram saintondybyem, enado âzeguhoam itybyem aguely:

— Koendonro lelâlâ âmâ. Toenzepa agâ womaru, kua yetaima — kely.

Samaria donro lelâlâ wâne, alâ olâ myani Jesusram odopâdyly, kua tyetuo.

<sup>17</sup> Aituo myani Jesus aguely:

— Dez uguondo lelâ kua xietai. Akaemo nove lelâ odopâdylymo lâpylâ olâ tâise koendonro.

<sup>18</sup> Âkelo anano merâ: “Koendonro âmâ, kua yetaima” keim. Ytyrnru olâ, judeu modo ewy yam âdalâ keze nodopâbyra awylygue — kely.

<sup>19</sup> Aituo myani Jesus aguely uguondo kua itybyram:

— Aukâ. Idâ. Koendâ kehoem kua itybyem âmâ, ton-honre wawlyly mâinwântobry wâgâ — kely.

*Âdara Deus pymâem idyly wâgâ Jesus aguehobyry  
(Mt 24.23-28,36-44)*

<sup>20</sup> Aituo myani fariseu domodo ewy Jesus nhapâiguely:

— Âdaraka ise Deus pymâem tawlyly nhenehony xirâ anaym? — kelymo.

Jesus in-hoguly:

— Kienkyly mâkeba ise, Deus pymâem idyly adaguly.

<sup>21</sup> Kuodaylâ mawânâ Deus pymâem ato. Ânguylâ wakewâpyra ise: “Etaungâ, anra tarâ. Anri târâ” kewâpyra. Odaymolâ mawânâ Deus pymâem ato. Tâenseim keba mawânâ Deus kuoday anhekyly — kely Jesus.

<sup>22</sup> Jesus aguely myani tynynonro modoram:

— Âsenagazeze âmaemo. Toenzepa ise agâmo wawyse mawylymo, on-hondâzemo. Tâwâlâ wâne âdiempa kulâ awyly. Urâ Uguondo Kaynâpa Âtyby tarâ agâmo witoem nudupa olâ ise.

<sup>23</sup> Âyanmo aguelymo ise: “Nhaum, anra Jesus” kezemo. Tâlâ pylâ, “Jesus târâ” kewâni modo. Kâzeinwântaundâ. Uize tâgasezeba itaungâ aguehomobyryam. Tarâ inkâba ise urâ.

<sup>24</sup> Urâ Uguondo Kaynâpa Âtyby kodopâduo, idânâra iesemo. Ielu wâne kau xypyryram, xypyryram warâ tâzehirugueze, tâzehoze warâ, myara ise kodopâduo, idânâra yaindyly âzehoze.

<sup>25</sup> Awârâ iray, âzenagazezeze olâ urâ. Toenzepa ise tywymâryem yizepanro modo ilâ ume.

<sup>26</sup> — Noé umenobyry ara, arâ lâpylâ ise urâ Uguondo Kaynâpa Âtyby kodopâduo.

<sup>27</sup> Saguhoem myakâwândy, paru inwenlygue tadainlymo iray, kurâdo xara tatomo aralâ mykâinane. Âwinduadylymo. Adakuilymo. Salokuzenomo modo, âwynsaundo modo warâ ohogüinlymo warâ mykâinane aidylymo, Noé pepi imâsedo âtâ emyenro tyngatyby odaji âxiedyly iray. Âxiebygeduomo olâmy Deus inepa kehoem kopâ ihugueânâ, adain-homoenlâ-ro warâ.

<sup>28</sup> — Lô umemy aimâ myara aitonze. Mârâ umeno modo xaralâ mykâinane aisezedylymo. Âwinduadylymo. Adakuilymo. Âdydo imeom nhanâdylymo. Vende nhedylymo. Typi nhetâdylymo. Tâty intâdylymo.

<sup>29</sup> Sodomadâpa Lô âxigueduo olâ myakâwândy Deus peto kau odaypa tyihugueânze. Kopâ ihuguely ara kehoem tuhu tohoreim emyenro enxofre ihuguely. Idânâra kehoem iguelymo lelâ.

<sup>30</sup> — Arâ lâpylâ ise urâ Uguondo Kaynâpa Âtyby kodopâduo, aguipa kulâ ise ywânwânni modo.

<sup>31</sup> Kaynâ itymo nhangatay ilajiry wâgâ mataymo, âytâgyuwâdaungâ. Âwientaungâ. Âsejiguyomo enanânehonwâdaungâ. Âpa ezay âsewanize mataymo, inepa âwientaungâ. Todopâzeba itaungâ âtânra âsejiguyomo ese.

<sup>32</sup> Enanâgüewâdaungâ, Ló iwidy aito byry. Deus, “Inepa âwientaungâ” keduo, neinwâmpyra myakâwândy. Xidadâram odopâze kewândymy.

<sup>33</sup> – Tâwâlâ âdutuze keim âmaemo watay, mâzemaewâbyra ise âmaemo. Âgueduo, Deus agâ mohomaendaymba ise âmaemo. Deusram tâenseim mataymoma âzemaekoze âmaemo. Âgueduomo, Deus agâ tpygyenryem ise omarumo.

<sup>34</sup> Kodopâduo, nynnonro modo sase urâ. Ynynâbaom modo olâ ise urâ kampyra. Azagâ kurâ âjigamary wâgâ xykyim, nynnonro ynynâbaom warâ watay, nynnonro adahoze Deusram, eagonro olâ âjionze.

<sup>35</sup> Azagâ pekodo trigu sakoim, nynnonro, ynynâbaom warâ watay, nynnonro adahoze Deusram, eagonro olâ âjionze.

<sup>36</sup> [Azagâ uguondo âpa ezay âsewanirim, nynnonro, ynynâbaom warâ watay, nynnonro adahoze Deus eydâ atoram, eagonro olâ âjionze]\* – kely Jesus.

<sup>37</sup> Awârâ tindatuo myani eynnonro modo nhapâigüely:

– Âdykâ ise awârâ aidyly, Pymâ? – kelymo.

Aituo Jesus in-hoguly; âdykâ awyly aguepalâ:

– Tywângueimpe atoram elaho modo âtâdyguly, ânguy, “Târâ igueypybe” keduo inkâba. Arâ lâpylâ ise kurâdoram kodopâdyly âdutuoly, ânguy âdakepalâ – kely Jesus.

## 18

*Jesus pekodo pypâ, juiz warâ wâgâ unâ nhegatuhyory*

<sup>1</sup> Aituo myani Jesus unâ nhegatuly, tynnonro modo tienomedâdoem, Deusram tâwâlâ ize tato nhekazedoem, aunlolâ eyam nhekadomoem warâ.

<sup>2</sup> – Tâlâ myani xidadâ oday uguondo, kurâdo ewentâdyly, tâwentâzeba warâ awyly wâgâ tâwaneim, awylygue juizgue ezeku. Koendonro keba olâ myani mâkâ, Deus ize ato ara aini keba, kurâ domodo koendâ eni keba, tienmawyadâdyzedonro keba warâ.

<sup>3</sup> Tâlâ myani mârâ xidadâ oday pekodo pypâ. Aunlolâ myani juizram idâzesedyly, eagâ aguezeseze. “Mâkâ urâem inakanhe aityby agâ wao aguekâ” kezesydyly juizram.

<sup>4</sup> – Iweâpa myani juiz mâkâ pypâ aguely indasezedyly kulelâ. Ilâpyryem olâ myani âpaunzedyly: “Âkealâ, Deus ize ato agânhedysedonro keba lelâlâ urâ. Kurâdo kâenmawyadâdyzeba warâ.

<sup>5</sup> Ynadyly olâ pypâ yam nhekazededylygue. Awylygue ise aguehobyry agânhenehony. Agânhepyra urâ-ro watay, aguezesydylygue xynazema urâ” kely. Aituo juiz, mâkâ pypâ nhekadyby anhedily – kely Jesus.

<sup>6</sup> Jesus aguely:

– Âpaunzedaungâ juiz aguehobyry wâgâ.

<sup>7</sup> Adiendyseba lelâlâ wâne, pypâ nhekazededyly olâ aiemâ. Mâkâ juiz ânguydo kulâ pypâ aiedyse ato aiemâ, nhekazededylygue; Deusma kuru ise koendonro tawylygue, tyam ekazezenibyryram xuduze. Koendonro ise anhekyly, aunlolâ ekani modo xurâem.

<sup>8</sup> Tynnonro modo emakeze; inepa kehoem ise awârâ modo anhedily. Urâ Uguondo Kaynâpa Âetyby kodopâduo olâ ise aguipa kulâ yeinwânni modo. Xirâ mâuntudyzemo kuru wato – kely Jesus.

*Jesus fariseu wâgâ, impostu epywadobyry emakerim wâgâ warâ unâ nhegatuhyory*

<sup>9</sup> Jesus unâ nhegatuly myani “Tagonro takaze kehoem koendonro urâ” keim modo wâgâ. Eyanmo aguely:

<sup>10</sup> – Azagâ uguondope myani. Tokalâ myani fariseu, judeu domodo ezewenry Moisés inweniby ara lelâ adâidyse. Eagonro myani impostu epywadobyry emakerim, pymâ tonhonreim Roma donro xurâem. Azakâlâ idâlymo myani Deus etyram eagâ agueze.

<sup>11</sup> XYDYK itybyem myani fariseu. Deus agâ adâkely waunlo ara myani tânanaji; tywâgâ kulâ olâ myani aguely. Aguehobyry Deusram naimpyra. “Tuomare urâ, yagonrodo takaze koendonro urâ. Ânguy enokuni keba urâ. Ânguy kâenmagazedaymba urâ. Moisés inweniby agueho ara lelâ awidyly. Ywydy lelâ kâynanâgyuly, eagonro pekodo lâpylâ warâpa. Tuomare urâ, mâkâ pymâ Roma donro xurâem impostu epywadobyry emakeim araba wawylygue.

<sup>12</sup> Azagâ iguandyly lelâ inanry semana oday kâwinduapya widyly wao, imâem agâ auguehoem. Dez lelâ âdylâ kâenmakely-ro watay, aunlolâ inanry tokalâ âyam kâunduly” kely fariseu.

<sup>13</sup> – Impostu epywadobyry emakeim olâ myani toenzepa âpybazeni, inakanhe aini tawylygue. Awylygue myani enagozeybyem lelâ awyly, iwaguelâ Deus agâ aguewâni

\* 17:36 Idânârâ livru saguho modo wâgâ inwenibyemba xirâ versîculu 36.

mododâ awyly. Âjihogainly tytyrungue. Aguely: “Inakanhe aini kulâ urâ, Deus. Ytyendâlâ ikâ” kely.

<sup>14</sup> – Deus agâ adâkely ewanikeimbyryem, fariseu tâtyram odopâdyly. Impostu epywadobryr emakeim tâtyram odopâdyly lâpylâ. Warâ myani aidylymo. Impostu epywadobryr emakeim inakanhe aitobryr lelâ myani Deus nhygakely. Deus xurâem, mâkâma koendonro kuru, fariseu keba. Koendonroem tawly wâgâ aguewâni modo, tynrempa âiehoze. Koendonroem tawly wâgâ aguedânry ise âdyren-hoim. Xirâ mâuntudzemo kuru wato – kely Jesus.

*Jesus iamimeom agâ atobryr*  
(Mt 19.13-15; Mc 10.13-16)

<sup>15</sup> Ilâpygueduo tâjiunwyndo Jesusram tymeom nhadylymo.

– Asaemo nhangahu onwa imary iekâ. Deusram koendâ âzehohomoem ekagâ asaemo xurâem – kelymo Jesusram.

Awârâ tientuo Jesus eynynonro modo iamudo sanipyry modoram aguely:

– Jesus kâdyanâdaundâ – kelymo.

<sup>16</sup> Aguelymo tindatuo olâ myani Jesus tynynonro modoram aguely:

– Arâ adâkezeba itaungâ! Tâwâlâ yam iamimeom nâedâ. Kodopâdaundâmo. Iamimeom wâne enra ohondybyem lelâ yam tâetoem, myara lâpylâ kurâ domodo nohondâ, yeinwântomoem, Deus iwymârymoem itoem.

<sup>17</sup> Yam tâetoem ohondânry modo Deusgue tywymâgunebamo ise, iamimeom wâne enra ohondybyem lelâ yam tâetoem myarapa tawlymogoue. Xirâ mâuntudzemo kuru wato – kely.

*Uguondo toenzepa âdypeom agâ Jesus aguehobryr*  
(Mt 19.16-30; Mc 10.17-31)

<sup>18</sup> Ânwa oze myani uguondo tysejiguyeim aguely Jesusram:

– Koendonro lelâlâ âmâ, Pymâ. Âdaraka awidyly, Deusram udâhoem, aunloenlâ eagâ witoem warâ? – kely.

<sup>19</sup> Aituo Jesus in-hoguly:

– Amyguely tutuzeka âmâ? Âdaituoka “Koendonro lelâlâ âmâ” myguely yam? Kurâ koendonro lâpeba, Deus lelâ koendonro.

<sup>20</sup> Tutuzelâ âmâ, âdy Deus aguiendyse ato awyly Moisés inweniby wâgâ: “Eagâ mohogüinhobryr lelâ xynanâgâ. Ânguy kâdyâ. Tâmagazeba ikâ. Aitobryr wâgâpa kulâ âkelomo kâzewentâdâ. Unwâm, âze warâ einwânkâ, xyrenkâ warâ” – kely Jesus.

<sup>21</sup> Aituo myani uguondo aguely:

– Salokuzenomoem wawly umelâ idânârâ Moisés inweniby ara awidyly, adyesezelâ urâ – kely.

<sup>22</sup> Uguondo aguely tindatuo myani Jesus aguely:

– Tâlâ lâpylâ olâ amânhekyly. Âsejiguy modo idânârâ vende ieta. Ebyry ise âdy pebaom modoram mâunduly-ro warâ. Awârâ amânhedly-ro watay, tâlâ lelâ ise âmâ mârâ koendonro Deus eydâ atodâ ekanâdyby. Idânârâ tâlâ mato mâunduduo, odopâgâ, ynynonroem mitoem – kely Jesus.

<sup>23</sup> Jesus arâ aguely tindatuo myani toenzepa kehoem uguondo itywandily, tysejiguy modo vende tiendyseba tawlygyue. Tytyntre kehoem idâlâ.

<sup>24</sup> Mâkâ toenzepa âjityendily tientuo Jesus aguely:

– Ton-honre lelâlâ âdypeom modo yeinwântoem, Deusgue tywymâgomoem warâ, tysejiguy kulâ ize atomo kuru awlygyue.

<sup>25</sup> Ton-honre camelu agüie ihu oze sakadoem, arâ lâpylâ ton-honre âdypeom modo tâlâ tato inmohomoem eon-honru, Deusgue tywymâgomoem warâ – kely.

<sup>26</sup> “Ton-honre âdypeom modo Deusgue iwymâgomoem” Jesus keduo idani modo toenzepa kehoem âseguâdâdylymo, âdypeom modo lakuru Deus eydâ atoram idâim waunlo ara enanajimo awlygyue. Aituo aguelymo:

– Arâ atayma ise ânguy nâsemaguewâbyra-ro – kelymo.

<sup>27</sup> – Deus olâ kurâ domodo anhetânry adyese lelâ – kely Jesus.

<sup>28</sup> Jesus aguely tindatuo, Pedro aguely:

– Xina-ro? Idânârâ tâlâ tato xina niâm, âynynonroem tâitoem – kely.

<sup>29-30</sup> Aituo myani Jesus eyanmo aguely:

– Idânârâ tâlâ matomo mânhânlymo, ynynonroem mitomoem watay, Deus xuduze lelâ ipa matomo. Itymo mânhânduomo, âykyhomoem ijidylo xuduze. Âwydymo, âwaigoromo, âukonomo, nhaundumo, unwânmo, âzemo, âmeombyrymo warâ mânhânduomo, Deus âpemugumo nhetomo ara kehoem nhenimo, âwynenimo warâ xuduze lelâ. Iwâgâ

mânâympymo takaze ise Deus nhuduly. Âigueduomo aunloenlâ ise Deus agâ mawlylmo. Xirâ mâuntudzemo kuru wato – kely Jesus.

*Jesus, “Yigueduo, kurâem itonze urâ” keontobyry  
(Mt 20.17-19; Mc 10.32-34)*

<sup>31</sup> Jesus doze tynnonro modo aguiom duaypa nhejikely, aguely:

– Idataungâ wao aguely. Jerusalémram xirâ kytâly. Deus itaumbryr aguwâni modo aguehobyry ara ise agâieholo, urâ Uguondo Kaynâpa Âetyby. Arâ ise târâ aidyly idânârâ aguehomobyry ara.

<sup>32</sup> Judeu keba modoram ise kâzegameoly. Âwankuem yesemo. Unâguezemo. Iedakudâzemo.

<sup>33</sup> Yapiogüen-honzemo. Ilâpyryem ise yâen-honlymo. Azagâ emedyly idyly wâgâ kurâem itondybyem lelâ olâ ise urâ – kely.

<sup>34</sup> Âdakeze aguely awyly nutubamo myani eynnonro modo. Nutuba itomoem aietybyem waunlo ara.

*Jesus epy Jericó donro kua nhetobyry  
(Mt 20.29-34; Mc 10.46-52)*

<sup>35</sup> Jesus, eynnonro modo warâ âtâ anary Jericóram saindylymo ume, epy ânwa edazekâ ekadybyem. Sakadaynrim modoram aguely myani:

– Ytyendâlâ itaungâ. Ydinheruru âunduwâtaungâ – kely.

<sup>36</sup> Târâ ekadybyem tatay, toenzepa kurâdo sakadyly indadyly. Aituo mâkâ lelâba nhapâiguely:

– Âdyka awârâ? Ânguyka sakani? – kely.

<sup>37</sup> – Jesus Nazaré donro awâkâ sakani – kehonly.

<sup>38</sup> Adâkehonduo, adaenkely:

– Ytyendâlâ ikâ, Jesus! Âadamu Davi ara pymâ ton-honreim âmâ! – kely.

<sup>39</sup> Jesus eatado idâwâni modo aguelymo eyam:

– MYK alelâ ikâ! Tadaenkezeba ikâ! – kelymo.

Agueduomo lakuru myani ago kuru epy adaenkely:

– Ytyengâ, Davigue tydamudogueim! – kely.

<sup>40</sup> Aituo myani Jesus epagudyly. Aguely tonlo modoram:

– Epy yam enetaungâ – kely.

Tuopaji saintuo myani Jesus nhapâiguely:

<sup>41</sup> – Âdyka âmâem agânhedyse mato? – kely.

– Kâentondyze urâ, Pymâ! – kely.

<sup>42</sup> – Etonze lelâ âmâ. Kua âeniem wawyly mâinwântobyry wâgâ – kely Jesus.

<sup>43</sup> Ilâenlâ kehoem myani epy nhetondyly. Ânwa oze Jesus nhapyguenoem idyly lelâ. Tâtâly ume aguely myani:

– Koendonro lelâlâ Deus! Ton-honreim awâkâ Deus! – kely.

Idânârâ tonlo modo, kua itybyem awyly tientuo, aguelymo:

– Âkealâ, ton-honreim lelâlâ Deus! Koendonro lelâlâ awâkâ! – kelymo.

## 19

*Zaqueu Jesus tiendyse atobyry*

<sup>1</sup> Aituo myani Jesus xidadâ Jericóram saintybyem, sakadyly xidadâ odakâ

<sup>2</sup> Kurâ domodo duay tâlâ myani uguondo âdypeom, Zaqueu. Impostu epywadobyry emakewâni modo iwymâry myani mâkâ.

<sup>3</sup> Jesus tiendyse. Imâkeba tawlylygue olâ myani tâjiduay nepyra awyly.

<sup>4</sup> Aituo tâgase waunroem idâly. Se imâsêdo sicômoro keho, figueira emyenro, onwa âkuly, Jesus iwaguepa tientoem sakadyly ume.

<sup>5</sup> Se iaxi taintuo myani Jesus kayam MYK idyly. Se iwatary wâgâ ekadybyem nhedyly. Tientuo aguely:

– Zaqueu, iokobagâ âytâguygâ. Itydâ ise aze iwerâ – kely Jesus.

<sup>6</sup> Ilâ tindatuo myani Zaqueu inepa kehoem se sicômoro wâgâpa xytâguely. Toenzepa myani iomaru. Aituo Jesus tâtyram nhadyly.

<sup>7</sup> Tonlo modo myani Jesus Zaqueu ety odaji egawândyly tientuo aguelymo:

– Etaungâ! Jesus negawântai inakanhe aini ety odaji, eagâ âwinduase. Anipyra tâise awâkâ! – kelymo.

<sup>8</sup> Zaqueu tâpague myani Jesus enado, aguely:

– Idakâ, Pymâ. Tâlâ wato epajiwâze urâ âdy pebaom modo agâ. Impostu epywadobyry kâenmakely ume, epywado imâem kehoem kâenkadyby watay, dinheru xuduonse urâ

eyanmo. Tokalâ moeda kâenmagazedby watay, quatro moeda ise eyanmo kâunduly. Azagâ moeda kâenmagazedby watay, oito moeda ise eyanmo kâunduly. Warâ ise awidyly – kely Zaquau.

<sup>9</sup> Aituo myani Jesus aguely:

– Xirâ âtâ sodo inakanhe aitoabyry xygakeagui. Inakanhe aityby lelâlâ wâne, judeulâ olâ merâ Abraão iwerypyrylâ.

<sup>10</sup> Tâjiunwym wâne tymery xuzatyby xuize tâtâze myara xuzatyby modo kâwinly, Deusdâ iwagueno modo, inakanhe awylymo kâyngakehoem, kâenmakehomoem warâ – kely Jesus.

*Tâwanuneim modo mârâ moeda âdara nhetyby awyly wâgâ unâ nhegatuhobyry  
(Mt 25.14-30)*

<sup>11</sup> Xidadâ imâsedo Jerusalém iwaguepa Jesus. Aituo tonlo modo aguely:

– Inepa wânkâ ise Jesus Jerusalémdâ pymâem idyly? – kelymo âjigüe.

Arâ xunârymo tiuntuduo myani Jesus unâ nhegatuly, idanipyry modo tienomedâdoem.

<sup>12</sup> – Tâlâ myani uguondo pymâ tynreim iwerypyry. Taypa kehoem myani âjigâseoly, pymâ iwagueno agâ agueze. Pymâ iwagueno aguely: “Âmâ ise ity anano modo eni” kely.

<sup>13</sup> Taypa kehoem tâtâly iraynâ, dez lelâ tagâ tâwaneim modo ewy ingâsedaynly. Mâkâem, mâkâem warâ tokalâ moeda ourugueto tiunduday, aguely: “Anra moeda. Xirâ dînherugue âdylâ anâtaungâ, manâtomobyry takaze vende mânhetomoem. Warâ ydînheruru imâem mânhenhon-homoem kodopâdylly ara” kely myani mâkâ uguondo. Agueypyem idâly.

<sup>14</sup> Ety anano modo izepa ato myani mâkâ. Awylygue myani kurâdo ingonodylymo pymâ iwaguenonra agueze: “Awâkâ uguondo izepa xina tywymâryem” keze.

<sup>15</sup> – Mâkâ pymâ iwagueno olâ aguely: “Merâ ise âwymârymo, izepa lelâlâ wâne âmaemo” kely. Ilâpygueduo pymâ iwelo tâty anaxi odopâdylly lelâ. Sainitybyem myani, tagâ tâwanuneim modo ingâsenehonly, âdara lelâ dînheru imâem ienehonrimbyryem awylymo tiuntuhoem.

<sup>16</sup> Saguho sainityby aguely: “Tokalâ moeda ourugueto tâwânseim yam mudu. Mârâgue âdydo imeom sanâdâ; kanâtyby vende xiedâ. Aunlolâ keankâ arâ awidyly imâem itoem. Iwerâ dez moeda, toenzepa tâwânseimbe urâ. Anra tarâ idânârâ âmâem” kely.

<sup>17</sup> – “Koendâ tâwaneinlâ myanze âmâl ‘Aiekâ’ uguehobyry amiendâ. Koendonro amiendâ âdiempa kâunduyppyge. Awylygue ise dez lelâ xidadâ anano modo eniem âduakely” kely.

<sup>18</sup> – Ilâpyryem nhatano tâwaneim âewyly. Aguely: “Tokalâ moeda tâwânseim yam mudu. Mârâgue âdydo imeom sanâdâ; kanâtyby vende xiedâ. Aunlolâ keankâ arâ awidyly imâem itoem. Iwerâ cinco moeda, toenzepa tâwânseimbe urâ. Anra tarâ idânârâ âmâem” kely.

<sup>19</sup> – Aguely tindatuo myani, mâkâ uguondo tâwaneinram aguely: “Koendonro amiendâ âdiempa kâunduyppyge. Awylygue ise cinco lelâ xidadâ anano modo eniem âduakely” kely.

<sup>20</sup> – Ilâpyryem eagonro tâwaneim idâly. Aguely: “Anra xirâ moeda tokaleom mâunduypy, pymâ. Âtâ tâjiwogonrogue xitunwym. Sekanâdâ warâ.

<sup>21</sup> Âytadâ urâ. Uguondo ânguydo kulâma âmâ. Mâsewanihobyrygueba âdype midyly. Xina âsewanirim; âmâ pylâ xina ewanopyrygue âdylâpe ini-ro” kely.

<sup>22</sup> – Arâ agueduo myani, eagâ ewano aguely: “Inakanhe tâwaneim lelâlâ âmâ. ‘Uguondo ânguydo kulâ âmâ’ mygueanse. Mâsewanihobyrygueba âdype midyly. Xina âsewanirim; âmâ pylâ xina ewanopyrygue âdylâpe ini-ro’ mygueanse. Iweâ lelâlâ xutuze âmâ, amyguehobyry ara lelâlâ wawyly.

<sup>23</sup> Ydînheruru imâem itoem âdy amânhedyseba matay, dînheru xynanâdaynrim modoram metadânehondyze banco odaji. Imâem ydînheruru tyenehonzema tâise akaemo. Arâ tâise kodopâduo imâem kâenmakely” kely.

<sup>24</sup> – Aituo mâkâ uguondo tonlo modoram aguely: “Merâ inakanhe tâwaneim emaymba moeda emakewâdaungâ. Dez lelâ moedapeonram xuduwâtaungâ” kely.

<sup>25</sup> – “Dez moedapelâ awâkâ, pymâl!” kelymo.

<sup>26</sup> – Iwymâry aguely: “Mâkâ toenzepa tâlânro, imâem emakeze, iwerâ tâlâ tato takaze. Mâkâ agui ipaom olâ, âzemarkoeze iwerâ aguipa tâlâ ato. Xirâ mâuntudyzemo kuru wato.

<sup>27</sup> Iwerâ, yizepanro modo xarâ enetaungâ, iwymâryem wawysebaombyry modo. Xarâ enenimobyryem, ienanaym xyâwâtaungâ” kely mâkâ iwymârymoem itoem iduakeyby. Warâ xirâ unâ kêangatuly inomedâzemo – kely Jesus.

*Jesus Jerusalémram saintobyry  
(Mt 21.1-11; Mc 11.1-11; Jo 12.12-19)*

<sup>28</sup> Agueypyem myani Jesus waunroenlâ idâly Jerusalémram.

<sup>29</sup> Iwy Se Oliveira Ekaram saindylymo. Azagâ âtâ anary imeimbyry Betfagé, Betânia warâ iwaguepamo myani. Iwyrâ taintuo, Jesus tynnonro ewy azagâ waunroem ingonodyly.

<sup>30</sup> Warâ myani eyanmo aguely:



– Idâwâtaungâ âtâ anary waunroenoram. Aindylymo umelâ ise, jumentinhu ekâjibyem mâendylymo, âdykâ ânguy nhahozeândyby mâkeba ise mâkâ. Ekâjigüewâdaungâ. Enetaungâ xarâ.

<sup>31</sup> “Ine wao. Âdaituoka awâkâ mandylymo?” myguehonlymo watay, “Kywymâry merâ izetonro. Inepa ise nhopânehonly” myguelymo lelâ ise – kely Jesus.

<sup>32</sup> Idâlymo. Saintybyem jumentinhu nhedylymo, Jesus aguehobyry ara.

<sup>33</sup> Nhekâjigüelymo ume myani, adapâigueolyo jumentinhu sodo modoram:

– Âdaituoka mâenkâjigüelymo? – kelymo.

<sup>34</sup> – Kywymâry merâ izetonro – kelymo.

<sup>35</sup> Aituo myani jumentinhu nhadylymo Jesusram. Saintybyem myani tygaparyguelâ jumentinhu inkawendâdylymo. Aituo Jesus jumentinhu onwa âkuly.

<sup>36</sup> Jesus jumentinhu wâgâ âkuybyem idâly ume, toenzepa kurâ domodo tygapary ânwa oze PO PO nhedylymo, Jesus iray, tynrense tawlyly tienehon-homoem, pymâ ton-honreim kehoem iray adâitomo ara.

<sup>37</sup> Jerusalêmdâ iwaguepa awyly ume, ânwa iwy Se Oliveira Eka enagozehodâ, toenzepa kurâ domodo nhapygueni modo. Toenzepa tuomarumogue, tygâky nhagulymo, Jesus anhetyby tientomobyry wâgâ:

– Ton-honreim awâkâ Deus! Koendonro awâkâ! Tâense xina âdykâ âdaunlo uguondo anhetânry anhedyly – kelymo.

<sup>38</sup> Aituo myani adaenkelymo:

– Koendonrolâ awâkâ Kywymâry Jesus, Deus ingonotyby! Awâkâ wâgâ kurâ domodo koendâ itybyem Deus agâ. Koendonro awâkâ Deus kaynâ tâtyreim! – kelymo.

<sup>39</sup> Tâlâ lâpylâ myani kurâ domodo duay fariseu domodo ewy. Akaemo aguely tindatuo, Jesusram aguely:

– Idakâ ampygueni modo saenlu, Konomedâni. “MYK alelâ itaungâ” kekâ eyanmo – kelymo Jesusram.

<sup>40</sup> Aituo Jesus aguely:

– MYK idylymo-ro watay, Deus tuhu itainhehonze, yrentomoem, iehoguedomoem warâ. Xirâ mâuntudyzemo kuru wato – kely Jesus.

*Jesus eogumatobyry, Jerusalém donro modo âsenagazeniem awylymo tiuntuduo*

<sup>41</sup> Jerusalém iwaguepa itybyem Jesus xidadâ nhesedyly. Târâ tâtyuneim modo eongüendyly myani, toenzepa tintyendylymogue.

<sup>42</sup> Târâmolâ-ro waunlo ara kehoem eyanmo aguely:

– Kaikâ âmaemo-kâ Jerusalém donro modo! Yeinwântuomo lelâ Deus imakelymo awyly, mâuntudyzemo wâne urâ. Mâuntuba olâ âmaemo!

<sup>43</sup> Mâsenagazedomo sainse. Âizepanromo modo âjidadârymo sahodâze. Ahodâduomo, onro, se satâwâdyby warâ muralha ipebaji idâtyguyzemo, tâkuhomoem, tâgawântomoem warâ. Tâinkâ lelâba ise sodadu modoape awyly, âdaunlolâ judeu nâsemagueba itoem. Ânguydo imeom mydy oday tawâseim ara ise âmaemo.

<sup>44</sup> Âdyoze, itymo adakalagueoze warâ. Tuhu angatonro lâpeba ise. Âsenagazeze âmaemo, iweâ lelâlâ Deus imakedyzemo awyly mâuntudyzeba mawlylymogue. Deus âwymârymoem idysebama keankâ âmaemo – kely Jesus.

*Jesus ânguydo imeom vende ieni modo Deus ety odayba nhegaseândobyry*

*(Mt 21.12-17; Mc 11.15-19; Jo 2.13-22)*

<sup>45</sup> Aituo myani Jesus egawândyly Deus ety idaseraji. Âdydo imeom vende ieni modo nhedyly. Deus etydâ aidylymo tientuo myani, Jesus nehoguebyra arâ aidylymo. Ânguydo imeom vende ieni modo nhegaseândaynly.

<sup>46</sup> Aituo eyanmo aguely:

– Deus itaumbyry awo wâgâ iwenibyem: “Xirâ iety yagâ agueho xirâ” kewândymy Deus. Kurâ domodo mâenmagazedlymo kulâ olâ. Ânguydo imeom Deusram tiundulymo nhanâdylymo watay, toenzepa mâenwâentanâdylymo. Dinheru âmaemoenlâ mânhedylymo. Deus ety, tâmagazeim modo otoendoem mânhedylymo kulâ – kely myani Jesus.

Ilâpyryem myani Deus ety odaypa egasely.

<sup>47</sup> Kopaêlâgâembaba Jesus idâly Deus ety idaseraji, Deus wâgâ kurâ domodo enomedâze. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, kurâ domodo iwymâry warâ Jesus tyândysemo myani.

<sup>48</sup> Âdara adiyndyly awyly nutubamo olâ. Tyanemo myani Jesus sawânehonze; kurâ domodo tyizepa idyly tyntadylymogue. Kurâ domodo mawânkâ myani Jesus aguely tohoguezemo.

## 20

*Deuslâ Jesus igononi, âdaunlo kulâ mâkeba  
(Mt 21.23-27; Mc 11.27-33)*

<sup>1</sup> Kopaelâgâem myani Jesus Deus etydâ awyly. Tonlo modo myani nhenomedâguyly. Unâ koendonro nhegatuly âdara Deusram âzêmakeolyo wâgâ. Târâ Jesus awyly ume, kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, judeu domodo iwymâry modo lâpylâ warâ âewylymo.

<sup>2</sup> Aituo nhapâiguelymo:

— Ânguyka tarâ Deus etydâ arâ amânhetbyby amânhetuem agueim? — kelymo.

<sup>3</sup> Aituo Jesus in-hoguly:

— Apâiguelymo lâpylâ ise. Uhoguwâdaungâ wao.

<sup>4</sup> Ânguyka ani João Batista, inakanhe adâitobyry wâgâ âjityendyby modo batiza nhetoem aguenri? Deuslâ? Âdaunlo uguondo kulâ? — kely Jesus.

<sup>5</sup> Aituo myani âjigie aguelymo:

— Iwerâ ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mâinwâmpyra mawylymo?” keze.

<sup>6</sup> “Uguondo kulâ ani João aitoem agueim, Deus mâkeba” kykeduo, taunlo modo kagâ iewiâpadaynze. “Deuslâ, João Batista igononi” tâkezemo inanry. Aituo ise tuhugue tamytâze kyâlymo — kelymo.

<sup>7</sup> Awylygue warâ in-hogulymo:

— Xina nutuwâbyra, João batiza nhetoem ânguy agueim awyly — kelymo.

<sup>8</sup> — Arâ atayma auguepa lâpylâ ise urâ, ânguy xirâ agânhetoem ugononi awyly — kely.

*Tâwaneim modo koendâpa aitobyry wâgâ Jesus unâ nhegatuhobyry  
(Mt 21.33-46; Mc 12.1-12)*

<sup>9</sup> Ilâpyryem myani Jesus tonlo modo enomedâze unâ nhegatuly.

— Tâlâ myani uguondo uva etâdybybeom. Uva ejidy etaynrîm modope iemâmy. Warâ myani eyanmo aguely: “Ypi mâendylymo-ro watay, uva xutuduo, epajigâze urâ agâmo” kely. Koendâ lelâ myani in-hogulymo. Aituo myani idânârâ âtunâguedybyem, âtâ anary iwaguenonra idâly. Iweâpa myani târâ awyly.

<sup>10</sup> — Uva ekaunâdo odaji ituo myani tâmary ingonodyly akaemo tâwaneim modoram, nhekaunâdybymo ewy turâ emakeze. Uva ewily ekaunâni modo mâkâ ingonotyby saintuo, nhawâdilymo, nhapiogulymo alelâ. Âdy nudupamo âpa ezary sodoram nhatoem.

<sup>11</sup> Saguho âdy peba odopâduo myani eagonro tâmary ingonotondyly. Uva ewily ekaunâni modo olâ nhawâdilymo, nhapiogulymo, kywypadoem kulâ anhedilymo. Âdy nudupamo lâpylâ âpa ezary sodoram nhatoem.

<sup>12</sup> Aituo myani eagonro ingonodyly wâne. Uva ewily ekaunâni modo olâ nhawâdilymo. Nhapiogulymo lâpylâ. Sapiogunrimbyryem, ingonodylymo. Âdy nudupamolâ.

<sup>13</sup> — Aituo uva sodo âpaunzedily, aguely: “Iwerâ ise-ro? Âdaraka ise awidyly? Ah, xutuagui. Ymery tokaleom kâinwyneguely ise kâingonokily. Ypi etaynrîm modo âda nientaymbamo ise” kely. Aituo tymery tokaleom ingonodyly myani.

<sup>14</sup> — Sodo imery saindyly umelâ myani âpa ezay tâwanuneim modo nhedyly. Âjigie aguelymo: “Uva sodo imery mâkâ âeni. Tunwym igueduo, mâkâ ise ipibyry sodo. Kydyânrene, nhunwym ipibyry kurâenlâ itoem” kelymo.

<sup>15</sup> — Aituo myani mâkâ uva ejidy sodo imery nhawâdilymo, âpa ezayba nhedylymo, tyânhoem — kely Jesus.

Aituo myani Jesus adâkely idani modo nhapâiguely:

— Âdyka ise mâkâ uva ejidy sodo akaemo âpa ezano modoem anhekyly?

<sup>16</sup> Agueze urâ âyanmo. Todopâduo, uguondo modo xywâwase mâkâ uva sodo. Ilâpyryem ise etaybyano modo nhuinly uva ejidy eni — kely Jesus.

Aituo aguelymo:

— Arâne Deus anienehomba nidâ! — kelymo.

<sup>17</sup> Jesus koendâ kehoem akaemo nhedyly. Agueondyly:

— Warâ Deus itaumbryry awo wâgâ aguely:

“Tâlâ myani tuhu imeâgâkeba, âtâ itâdo.

Idânârâ itâdaynrîm modo mârâ tuhu tâensemo,

mârâgue âtâ tintâdyzebamo olâ.

Deus xurâem olâ mârâ tuhu tywyneim kuru!”

warâ iwenibyem awyly.

18 – Ânguyâ mârâ tuhu onwa ihugueyby, âdyâze. Ânguy onwalâ mârâ tuhu ihugueduo, samiunze – kely myani Jesus.

{ Mâkâ uva sodo imery emyenro, tuhu âtâ itâni modo izepa atobyry emyenro warâ awâkâ Jesus. }

*Impostu epywadyly wâgâ Jesus nhapâiguehomobyry  
(Mt 22.15-22; Mc 12.13-17)*

19 Moisés inweniby enomedâni modo iwymârydo, kurâdo eynynâ Deus agâ aguewâni modo iwymârydo warâ awârâ unâ Jesus nhegatuly indadylymo myani. Ilâ tindatuo, toenzepa kehoem iewiâpadylymo, tyanlâ Jesus aguely awyly tiuntuduomo. Jesus agâ tyewiâsemo wâne myani, nawânêhombamo olâ, “Kianwânêhonly iwerâ watay, kurâdo kagâ iewiâpaze” tâkeduomo, âdaunlo kurâ domodolâ mawânkâ Jesus izetonro awylygue.

20 Aituo Jesus anhekyly, agueho warâ nhenuagaendylymo, pymâ Pilatos enanaym tienwentâdomoem. Uguondo modo ingâsedylymo. Eyanmo aguelymo:

– Jesus agâ aguewâtaunda. Sapâiguewâdaunda. Mâuntudyze mawlymogue mapâiguelymo waunlo ara lelâne nidâ. Kâzewenkeba aguehoem kulâ ise mampâiguelymo kelymo. Agueduo ise kianwânêhonly. Roma iwymâry induakeybyram ise kiunduen-honly. Awâkâ ise xyân-hoin-ro warâ – kely myani pymâ domodo.

21 Saintrybyem, ingonotyby modo Jesusram aguelymo:

– Pymâ, konokuni keba mawyly, tutuze xina. Deus ize ato wâgâ âkealâ xina mâenomedâdily. Iozeno lelâ amygueho, ânguy izepa awyly umelâ. Pymâdo tynrenseim modo ize ato amânhetemo kulâ amygueho mâungukewâbyra âmâ.

22 Awylygue âdara impostu wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu epywadyly? Koendâpa? – kelymo.

23 Tâwentâdomoem kulâ tapâiguelymo awyly, tutuze olâ myani Jesus. Aituo myani aguely:

24 – Moeda enetaungâ – kely.

Moeda nhadylymo. Jesusram adapâigueolyo myani:

– Ânguy emydy ekudoka xirâ wogonro? Ânguy ezedy iwâgâ iweniby warâ? – kely.

Aituo in-hogulymo:

– Roma donro kywymâry César emydy, ezedy warâ – kelymo.

25 Jesus aguely:

– César xurâ, Cesaranalâ xuduwâtaungâ. Deus xurâ, Deusranlâ xuduwâtaungâ warâ – kely.

26 Jesus tienokudyzedo modo âda tiendily nutuba idylymo, tâzenanaym tienwentâguedoem anienehomba tawylygue. Tonomegue kehoem in-hoguly awyly tiuntuduo myani akaemo âdakepa idylymo.

*Iguewâtyby modo kurâem itondyly wâgâ nhapâiguehomobyry  
(Mt 22.23-33; Mc 12.18-27)*

27 Saduceu domodo ewy Jesus agâ âtunâgueze idâlymo myani. Judeu domodo ewy akaemo. Iguewâtyby modo kurâem itondyly einwântânry ani akaemo. Jesus iopaji saindylymo myani.

28 Aguelymo:

– Idakâ, Pymâ. Moisés ezewenry tutuzelâ âmâ iweâpa kydamudoram inweniby: “Uguondo tywydy namypalâ iguely-ro watay, iukonobyrylâ nohogüim iwidyppyry agâ, imezeândoem. Aituo, iamudo iazeypy, igueypy imeryenlâ âdutuoly” kelype.

29 Xina olâ ise warâ nhegatuly. Tâlâ myakâwâm sete uguondo modo âjiuwaigoruem, âjiukonoem waunlo. Iwaigoru ohogüinly myakâwâm. Tywydy namypalâ iguely.

30 Iukonobyrylâ myakâwâm ohogüinrim pypâ agâ. Mâkâ lâpylâ myakâwâm tywaigoru iwidyppyry namypalâ iguely.

31 Azagâ tokalâ ietomo iukono ohogüinly myakâwâm pypâ agâ. Mâkâ lâpylâ iguewâm, tywaigoru iwidyppyry namypalâ. Tywaigoru iwidyppyry namypalâ lâpylâ myakâwâm quatro ietomo, cinco ietomo, seis ietomo, sete ietomo warâ iguewâdylymo. Sete uguondo lelâ myakâwâm mâkâ pekodo agâ ohogüimby.

32 Idânârâ mâkâ uguondo modo iguewâpygueduo myakâwâm mâkâ pekodo iguely lâpylâ.

33 – Xirâ xina apâiguedyze ato. Âkealâ kuru igueypy kurâem itondyly-ro watay, âdaunlo uguondo akaemo sete ewy iwidyenka ise mâkâ, kurâem itonduomo? Idânârâ akaemo sete lelâ iwidyem ityby mawânkâ! – kelymo.

34 Jesus in-hoguly:

– Iozepa kulâ âunâgumo. Xirâ anaym kulâ uguondo, pekodo warâ ohogüinly.

35 Igueduo olâ ohogüin-homobyry tâtygagueze. Târâ Deus ezaylâ ise tagâ iniem Deus nhutuyby modo. Tarâ onro anaym ohogüimby modo, târâ nohogüin-ondaymbamo ise.

<sup>36</sup> Iguewátyby modo kurâem itonze lelâlâ, nigueompyra tâitomoem. Anju domodo nohoguïnwábyra. Alâpylâ iguewátyby modo, kurâem itonduo, nohoguïn-ondaybamo ise. Tymeombyry ara lelâ ise Deus nhedylymo, mâkâlâ kurâem ietonimo awylygue.

<sup>37</sup> – Izeno kuru iguewátyby modo kurâem itondyly kely mâintaimbaka minasemo? Enanâguewâdaungâ Moisés inweniby igueypyem kurâem tâjintondyly wâgâ, se imeimbyry niadupalâ tyatygueindâ Deus aguehobyry: “Deus urâ, Abraão, Isaque, Jacó warâ iDeusry; tarâlâ akaemo ywâgâ” kewândymy Moisésram.

<sup>38</sup> Arâ aguehobyry wâgâ Deus einwântaynrim modo nigueompyra awyly kiuntuly. Kurâdo enanaji olâ Deus einwânni iguewátyby modo iguewátybyem lelâlâ. Deus xurâem olâ akaemo igueypyemba, târâlâ akaemo Deus eydâ atodâ – kely Jesus.

<sup>39</sup> Aituo myani Moisés inweniby wâgâ enomedâni modo ewy aguely:

– Koendâ mihoguagui, Konomedâni – kelymo.

<sup>40</sup> Aituo saduceu domodo MYK idylymo. Ády napâigueombyra idylymo.

*Jesus, “Ânguyka Messias?” kehobyry*

*(Mt 22.41-46; Mc 12.35-37)*

<sup>41</sup> Deus Ingonotyby Messias wâgâ âpaunzedylymo myani Jesus ize ato. Awylygue warâ aguely:

– Moisés inweniby enomedâni modo, “Uguondo kulâ Messias, Davi iwerypyry tarâ onro anaym kulâ ise pymâem awyly” kelymo. Áyanmo auguely olâ, âkealâ awyly mâuntuhomoem – kely.

<sup>42</sup> – Tutuzelâ myakâwândy Davi, âdaunlolâ kurâ takaze kehoem ton-honreim Messias awyly. Messias wâgâ Davi tywenize myakâwândy pape Salmos wâgâ:

“Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,

<sup>43</sup> âduery modo eon-honru kainly ara,

âdydo ara kulâ âhuru laxi kânhedylymo ara’ kewândymy Deus”

kely myakâwândy Davi.

<sup>44</sup> Davilâ myakâwândy Messias tywymâryem awyly agueim. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze – kely Jesus.

*Moisés inweniby wâgâ enomedâni modo wâgâ Jesus aguehobyry*

*(Mt 23.1-36; Mc 12.38-40)*

<sup>45</sup> Aituo myani kurâdo indatoem, Jesus aguely tynnonro modoram:

<sup>46</sup> – Tonomeguelâ itaungâ, Moisés inweniby wâgâ enomedâni modo aito ara amipyra mitomoem. Koendonro aramo wâne, koendonro kebamo olâ. Earamopa itaungâ. Kurâ domodoram tâzehogueoly kulâ izetonro. BOH waunlogue lelâ etyunmo, Deus eynnonroem tawyly tienehon-homoem. Ádykâlâ kurâdo âtdygyuyho einkâ takaduomo, mâkâ modo tâdaenkudzemo, tynrendysemo warâ inanry. Âtâ tâdâtâdygyuyho odaji tâtâduomo, tâgareim ekado wâgâ lelâ ekadylymo, arâ lâpylâ âty mododâ.

<sup>47</sup> Pekodo pypâ modoram aguelymo inanry: “Xinalâ ise âsejiguymo eni, tusonebama âmaemo” kelymo. Isejiguymo turâem tientomoem kulâ nhenokudylymo. Deus agâ adâkedaymo, imeâgâemba kehoem aguelymo, koendâ tâgaromoem kulâ. Awylygue ise Deus nhenagazedylymo, eagonrodo takaze kehoem – kely myani Jesus.

## 21

*Pypâ âdy pebanro Deusram tydinheruru nhuduhobyry*

*(Mc 12.41-44)*

<sup>1</sup> Jesus myani Deus ety idaseray, kurâdo enuagaenze. Tokalâ, tokalâ warâ dinheru kaixa odaji ieni modo myani nhenuagaendyly. Toenzepa tydinherugueim modo toenzepa dinheru nhedyly.

<sup>2</sup> Pypâ âdy pebanro kaixa odaji azagâ moeda imeimbyry, tâwâensenry nhetadâdyly emâmy lâpylâ.

<sup>3</sup> Awârâ tientuo myani Jesus aguely:

– Deus xurâem olâ mâkâ pypâ nhetadâdyby tâwâenseim kuru, akaemo âdypeom modo nhetadâdyby takaze. Xirâ mâuntudzemo kuru wato.

<sup>4</sup> Dinheru âsegubydâdyby akaemo nhuduly. Mâkâ olâ idânârâ tâlâ tato ara nuduaki, typyniry tianâto alelâ – kely.

*“Deus ety adakalagoeze” Jesus kehobyry*

*(Mt 24.1-2; Mc 13.1-2)*

<sup>5</sup> Kurâ domodo ewy aguelymo myani Deus ety wâgâ:

– Iwâkuru kehoem Deus ety! Iwâkuru kehoem tuhu imâsedo âtâ itâdobyry! Iwâkuru kehoem ekudyby modo, tuhu imeimbyry tâwânseim kehoem iwâkudâdoem kurâ domodo nhuduypy warâ! – kelymo.

Aituo myani Jesus aguely:

<sup>6</sup> – Arâ wâne, âdykonlo umelâ olâ ise awârâ mâenkylymo adakalagueoly. Idânârâ adakalagueoze lelâlâ. Angato inkâba ise awârâ tuhu modo; ihuguewâze awârâ onro onwa – kely Jesus.

*Jesus tâdâsenagazedily wâgâ aguehobyry*

*(Mt 24.3-14; Mc 13.3-13)*

<sup>7</sup> Jesus aguehobyry tindatuomo myani tonlo modo nhapâiguelymo:

– Âdara kaise xypyry iwaguepa idyly, xina nhutuly? Âdy kaise tâenseim Deus ety adakalagueoho odaji itybyem awyly xutuhoem? – kelymo.

<sup>8</sup> Aituo myani Jesus in-hoguly:

– Inanaynmolâ itaungâ, kodopâdo wâgâ ânguy inokubyramo itoem. Xypyry etaji idyly ume, toenzepa ise “Messias urâ, Deus Ingonotyby” kewâni modo, “Messias naintai” kewâni modo warâ. Kâzeinwântaundâ olâ! Kâjiampyguedaundâmo warâ.

<sup>9</sup> Tâinkâ lelâba âseguelymo, âdyâwâdylymo warâ kely idase âmaemo. Tywymâry agâ kurâdo âseguely kely idase âmaemo warâ. Tadahulizeba olâ itaungâ, awârâ modo egary mâindadylymogue. Aise lelâlâ awârâ modo, âdypydâdo keba olâ ise – kely Jesus.

<sup>10</sup> – Âkelo anano modo âdyâwâsemo, âjitanwebaom modo âdyâwâsemo warâ.

<sup>11</sup> Tâinkâ lelâba ise onro âzekânily. Tâinkâ lelâba pyni peba ise. Toenzepa ise tâwânuneim modo tâzewânu inakaigue mâkâ onwa, mâkâ onwa inigue ewânu. Âdydo imeom inakai modo kulâ ise aini. Kau wâgâ esemo âdypydâdo iwague kuruba awyly xutuho.

<sup>12</sup> – Tonomeguelâ itaungâ. Awârâ modo aidyly iraynâ yizepanro modo inagazezemo yeinwândylymogue. Adahoze âmaemo âtâ tâdâtâdygyho iwymâry modoram. Kadeia odaxi âiehoze âmaemo. Yeinwândylymogue, pymâ domodoram adahoze âmaemo.

<sup>13</sup> Enadomo mataymo, tâwâlâ ise amyguelymo âdara imakehomobyry wâgâ.

<sup>14</sup> Tadahulizeba olâ itaungâ amyguehomo wâgâ, pymâ domodo enadoram madaholyomo iraynâ.

<sup>15</sup> Urâlâ ise amyguehomo xudunri mâsemaguehomoem. Amyguelymo tindatuo, âizepaom modo âkealâ amyguelymo xutuzemo. Âdakeontaymbamo ise âyanmo.

<sup>16</sup> – Âpemugudomolâ ise yeinwâmpyra tawylmogue igamenrimo yizepanro modo emaxi. Unwânmolâ, âwaigorumulâ, âukonomolâ, âpemugudomolâ, ataen-homolâ warâ ise inwentâguenimo pymâ domodo enanaym. Âmaemo ewy xyâen-honze pymâ domodo.

<sup>17</sup> Ynynonroem mawylmogue, toenzepa ise mâjiewiâseolyo.

<sup>18</sup> Mâsenagazedilymo ume, âiguelymo ume, warâ olâ, “Deus ienanânehoangui” tâkezeba itaungâ. Idânârâ Deus emaynlâ ise âmaemo, angahudumolâ âda tyetuneba ise.

<sup>19</sup> Yeinwândyly kâjimwâdaundâ! Yeinwândyly mâinmopa âmaemo-ro watay, Deus imakezemo lelâ – kely Jesus.

*Jesus Jerusalém adainholy wâgâ aguehobyry*

*(Mt 24.15-28; Mc 13.14-23)*

<sup>20</sup> Aituo Jesus aguely:

– Sodadu domodoram âduahuoybyem Jerusalém mâendylymo-ro watay, inepa ise adainholy awyly mâuntulyo.

<sup>21</sup> Jerusalém adainholy xutuho saintuo, Judéia donro modo iwyrâm nâwiendâmo, otoenze. Jerusalém oday tâtyuneim modo inepa negasemo. Poji anano modo xidadâram nâwâmpyramo nidâ.

<sup>22</sup> “Yeinwântânry modo toenzepa enagazeze urâ, tâdâsenagazedo ume” kewândy Deus tytaumbyry awo iweniby wâgâ. Aituo ise xirâ ume Deus eynynonro keba modo toenzepa âsenagazedily.

<sup>23</sup> Toenzepa âsenagazeze pekodo modo ioday tymegueim, tuhuazeim modo warâ. Tahule âwienniembamo mawânkâ ise. Kurâdo taunlo Jerusalém donro modo toenzepa âsenagazeze. Toenzepa ise Deus eagâmo iewiâky.

<sup>24</sup> Tâdâseguelyday âdyorim modope ise. Tâlâ ise âzetadâoze taseim eagonro âtâ anaxi. Israelita domodo keba ise Jerusalémâ xutuim, arâ aïtomo âwanikeho ara – kely Jesus.

*Uguondo Kaynâpa Âetyby odopâdyly xutuho*

*(Mt 24.29-31; Mc 13.24-27)*

<sup>25</sup> Aituo Jesus aguely:

– Xixi, nunâ, ximukâ warâ ise xypyry etay awyly xutuen-hoim. Tâinkâ lelâba kurâdo âdara tidyly nutuba ise, âseanezemo mawânkâ. Ton-honre kehoem ise parutabâ sahugânu.  
<sup>26</sup> Tâinkâ lelâba ekomadainzemo tyanumogue, âdaituo aidyly awyly tiuntuduomo. Idânârâ kaynâ tyngataymby modo ejikehonze Deus.

<sup>27</sup> Aituo ise kêpanâguely urâ Uguondo Kaynâpa Âetyby. Eunu duay ise ytâguely. Pymâem lelâla wawyly; toenzepa won-honru enehonze urâ.

<sup>28</sup> Awârâ modo aidyly adaguly-ro watay, tytywanzeba itaungâ, âzeon-hondâdaungâ lakuru. Tuomare lelâ itaungâ. Inepama ise kodopâdyly imakezemo – kely Jesus.

*Jesus odopâdo xutuhobe ise*  
 (Mt 24.32-35; Mc 13.28-31)

<sup>29</sup> Aituo Jesus aguely enomedâzemo:

– Se sawanku mâendylymoenlâ mâuntulymo âdy iume idyly awyly, kopâ ume atay, âdâpigu ume atay warâ. Figueira sary wâgâ atay, se modo sawanku wâgâ atay warâ mâuntulymo.

<sup>30</sup> Sary ilusewâdyly mâentuomo, iwaguepa kopâ ihugueho awyly tutuze âmaemo.

<sup>31</sup> Myara lâpylâ ise xirâ auguehobyry modo aidyly adaguly mâentuomo, mâuntulymo. Deus on-hondybyem awyly, mâkâlâ pymâ kuru tawyly tienehon-hoem.

<sup>32</sup> Aise xirâ âdydo imeom, idânârâ xirâ onro anano modo iguelymo iraynâ.

<sup>33</sup> Kau, onro warâ adainze. Auguehobyry olâ ise nadaimpa, nâtugueba warâ; aunloenlâ ise. Xirâ mâuntudzemo kuru wato – kely Jesus.

*Kânanaynlâ kine Jesus odopâdo wâgâ*

<sup>34</sup> Aituo Jesus aguely:

– Inanaynmolâ itaungâ. Âtydâ lelâ waypa itaungâ. Adakuize kulâ waypa itaungâ, okumo ikaji mipyra mitomoem. Pyni wâgâ tâtynanâzeba itaungâ, itymo owogonromo wâgâ, kopaelâgâembaba iwanumo wâgâ warâ. Awârâ modo wâgâ kulâ mâtynanâdylymo-ro watay, awârâ kulâ ise anghumo odano, yaindyly mâkeba.

<sup>35</sup> Ânguydo imeom mydy onwa ihugueduo adapâendyly ara, ise âdykâingâlâ adapâendylymo kodopâduo, ywânwâmpyry tawylymogue.

<sup>36</sup> Awylygue, yaindyly tânuenzelâ itaungâ, uguely. Deus agâ amyguepa tâiseba itaungâ. On-honrumo ekadaungâ tâdâsenagazedyly mâenmaen-homoem. “Warâ ise agâmo aidylymo” keze kurâdoram, ienado ton-honre mitomoem ekadaungâ – kely Jesus.

<sup>37</sup> Kopaelâgâembaba myani Jesus kurâdo nhenomedâdyly Deus ety idaseray. Kopae olâ idâly iwiy imeimbyry, Se Oliveira Ekaram xykyze.

<sup>38</sup> Emedyly wâgâ myani kurâ domodo idâly Deus etyram, Jesus aguely idase. Târâlâ myani toenzepa kehoem kurâ domodo.

## 22

*Jesus xyâly wâgâ aguehomobyry*  
 (Mt 26.1-5; Mc 14.1-2; Jo 11.45-57)

<sup>1</sup> Iwaguepa myani judeu domodo etyry saintoem Pão Ioliho Pebaom etyguedoem. Páscoa kelygue tâzekeim lâpylâ myani mârâ âty.

<sup>2</sup> Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ âjigie âtunâguedylymo myani âdara Jesus xyâly wâgâ. Akaemolâ âdara Jesus tyâen-honly wâgâ agueim, kurâ domodo nhutudyzebamo olâ myani, tagâ iewiâpadylymo tyntadylygue.

*Jesus tiengamehoem, Judas dinheru nhemakehobyry*  
 (Mt 26.14-16; Mc 14.10-11)

<sup>3</sup> Aituo myani Satanás, Judas xidâdâ Queriote donro, Jesus eynynonro, nhangahu odaji xunâry inakanhe nhedyly.

<sup>4</sup> Kurâdo eynynâ Deus agâ aguewâni modo iwymârydo agâ, guarda iwymâry modo agâ warâ Judas agueze idâly. Jesus tiengamehoem âseinwândyly eagâmo.

<sup>5</sup> Judas agueduo myani, toenzepa kehoem iomazelymo.

– Xina emaxi Jesus mâengamely-ro watay, ipywaze xina – kelymo myani.

<sup>6</sup> – Inepa ise kêengamely – kely myani Judas.

Eagâmo agueypyenlâ myani Judas, âdara Jesus tiengamely awyly nhugudyly, kurâdo nutubalâ Jesus tiengamehoem.

*“Ohondaungâ, Páscoa kientyguedoem” Jesus kehobyry*  
 (Mt 26.17-25; Mc 14.12-21; Jo 13.21-30)

<sup>7</sup> Judeu domodo pão ioliho pebaom nhedawyn-homo, kordeiru nhâhomo warâ, Páscoa saindyly, Egitodâba tydamudo âsemaguehobyry tienanâguehomoem.

<sup>8</sup> Aituo myani Pedro, João warâram Jesus aguely:

– Iwerâ kopae ise Páscoa kientyguedyly. Kypyniry, âji, kydâwinduato warâ nhonehonwâdaunda – kely Jesus.

<sup>9</sup> – Aituo aguelymo:

– Âdykâka ise xina anhenehondyze mawily? – kelymo.

<sup>10</sup> Jesus in-hoguly:

– Idâwâtaungâ xidadâ Jerusalmram. Myarâ aintuomo, uguondo âmugâ oday paru sani iose âmaemo. Idâwâtaungâ eagâ. Igawântaungâ egawântobyry âtâ odaji.

<sup>11</sup> Mârâ âtâ sodo agâ aguewâtaungâ: “Pymâ mawânkâ âty Páscoa tientyguedyze tarâ xirâ kopae. Âdykonlo âtâ sahomery oday kaise tynnonro modo agâ kordeiru nhunru nhâdyly, pão ioliho pebaom nhedawynly warâ?” kewâtaungâ âtâ sodoram.

<sup>12</sup> Eagâlâ ise mâkulymo, âtâ sahomery kaynonro odaji. Târâ ise sahomery imeâgâ keba nhenehonly. Tâlâ ise târâ mesa, tâzekado, idânârâ ize kydato modo. Târâ ise kypyniry amânhenehonlymo – kely myani Jesus.

<sup>13</sup> Aituo myani azagâ uguondo idâly. Saindylymo xidadâram. Saintybyem myani Jesus aguehobyry ara lelâ nhedylymo. Mâkâ uguondo agâ oxiodylymo myani. Âtâ nhedylymo, pyni modo anhenehonlymo warâ, Páscoa tientyguedomoem. Pyni modo aienehonrimbyryem myani odopâdylymo Jesus eydâ atoam.

*Kywymâry Jesus iguehobyry enanâgueho*

*(Mt 26.26-30; Mc 14.22-26; 1Co 11.23-25)*

<sup>14</sup> Kopae tâdâwinduato odaji ituo myani Jesus idâly myarâ tynnonro modo agâ. Saintybyem myani ekadylymo âwinduase.

<sup>15-16</sup> Aituo myani Jesus aguely:

– Páscoa kâentyguedyly xypyrylâ ise xirâ tarâ onro anaym. Awilygue toenzepa agâmo kâwinduadyse wawily, yiguely iraynâ. Xirâpyryem kâentyguedondyly ise, Deus tynnonro modo idânârâ târâ pymâem tatodâ nhemakeduo lelâ – kely Jesus.

<sup>17</sup> Aituo myani Jesus kopu vinhugue taseim tâmaxi nhedyly. Deusram aguely:

– Koendonro âmâ, Pabai, xirâ vinhu mâundulygue – kely.

Aguenripyryem myani tynnonro modoram aguely:

– Mâkâ, mâkâ warâ xirâ vinhu enywâdaungâ.

<sup>18</sup> Páscoa kâentyguedondaymbe ise urâ agâmo, vinhu kâenyombyra ise urâ warâ, Deus eynnonro modo myarâ pymâem atoram saindylymo ara. Xirâ mâuntudyzemo kuru wato – kely Jesus.

<sup>19</sup> Ilâpyryem myani pão tâmaxi nhedyly. Deusram aguely:

– Koendonro âmâ, Pabai, xirâ pão mâundulygue – kely.

Agueypyem myani pão nhepajiwâdyly. Mâkânra, mâkânra warâ nhuduly, nhedawynhomoem. Aituo myani eyanmo aguely:

– Wodolâ xirâ. Iwaguepama âmaemoem yigueho. Xirâ pão mâendawynduomo, âmaemoem yiguehobyry enanâguewâdaungâne – kely.

<sup>20</sup> Pão tiendawypygueduo myani Jesus kopu vinhugue taseim tâmaxi nhedyly. Aguely:

– Unulâ xirâ. Tâunkeze ise yiguely imakezemo. “Ynnonro modo emakeze urâ” Deus kehobyry mawânâ. Awilygue ise unu tyapâze yigueduo, iwelo tâdâsemaguehobe Deus nhedyly.

<sup>21</sup> Eagonro ise xirâ augueho. Tarâ yagâ ekadybyenlâ merâ iegamerim.

<sup>22</sup> Igueze urâ. Urâ, Uguondo Kaynâpa Âetyby âdyoze urâ, Deus “Warâ ise” kehobyry ara. Toenzepa âsenagazeze olâ yizepaom modo emaxi iegamerimbyry – kely.

<sup>23</sup> Awârâ tindatuo myani eynnonro modo âjigüe aguelymo:

– Ânguy wânkâ ise konomedâni egamenri-ga? – kelymo.

*“Ânguyka xina enday tynrenseim kuru?” Jesus eynnonro modo kehobyry Jesusram*

<sup>24</sup> Ilâpygueduo myani Jesus eynnonro modo âjigüe aguelymo:

– Ânguyka kurâpyry enday, kurâ domodo enanaji, tynrenseim kuru? – kelymo.

<sup>25</sup> Aituo myani Jesus aguely:

– Idânârâ pymâ domodo tâdyren-honze lelâ, ton-honreim awilymogue, “Warâ aiekâ” kerim awilymogue warâ. Tâlâ lâpylâ olâ pymâdo koendonroem tawily adâkehohoem kurâdo ewanirim tiemawydâdoem.

<sup>26</sup> “Tynrenseim urâ” tâkezeba itaungâ. Tynrenseimbe âduanomo watay, tynrensenryenlâ nidâ. Mâkâ “Aietaungâ” keze ton-honreim âduaymo, aieni ara lâpylâ nidâ.

<sup>27</sup> Ânguyka tynrenseim kuru? Mesa onwa âwinduase ekadyby? Ipyniry mesa onwa ieni? Urâ olâ âdaunlo kurâ ara kulâ âduaymo wawily, âmaemoem aise, urâem amitomoem inkâba.

<sup>28</sup> – Kâsenagazedyly ume wodokeba keankâ âmaemo.

<sup>29</sup> Yeinwândyly mâinmopa mawwylmogue ise on-honrumo kâunduen-honly pymâem mitomoem, Pabai won-hondâdâ pymâem witoem myara.

<sup>30</sup> Deus agâ pymâem wawuly ume, târâ yagâlâ ise âmaemo. Âdaunlolâ pymâ eataen-ho modo wâne tâwinduase, tadakuize warâ eagâ myara lâpylâ ise mâwinduadylymo, madakuilymo warâ yagâ Pabai enado. Pymâem wituo, pymâem lâpylâ ise âmaemo. Pymâdo xurery wâgâ ise ikadylymo, kypemugudo israelita domodo iwymâryem mitomoem – kely Jesus.

*Jesus Pedroram, “Azagâ tokalâ warâ ‘Kâuntuwâbyra urâ awâkâ’ keze âmâ” kehobyry (Mt 26.31-35; Mc 14.27-31; Jo 13.36-38)*

<sup>31</sup> Ilâpyryem myani Jesus aguely Simão Pedroram:

– Yeinwândyly mâinmohomoem adiendyse Satanás, Simão. Pekodo trigu nhahogudyly ume, sary sapezenruram tadahoze, ewily koendonro olâ tâxiânze. Arâ lâpylâ ise, nynonro modo âxiânly yeinwândylymogue. Ynynâbaom modo olâ iaduwâse.

<sup>32</sup> Deusram on-honru nhuduhoem sekadâ, yeinwândyly mâinmopa mitomoem, Pedro. “Jesus eynonro keba urâ” keze âmâ. Inepa olâ ise yeinwântondyly. Yeinwântonduo, ataen-ho modo eon-hondâgâ, yeinwândyly nimopa itomoem – kely Jesus.

<sup>33</sup> Agueduo myani Pedro aguely:

– Âinwândyly kâimowâbyra ise urâ, Pymâ! Agâ kadeia odaxi âzetadâoze, âdyoze warâ wâne urâ, odokeba olâ ise urâ! – kely.

<sup>34</sup> Jesus olâ myani warâ eyam aguely:

– Anguely xirâ âyam, Pedro. Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely – kely.

*Jesus tynnonro modo nhurutoebyry*

<sup>35</sup> Xirâpygueduo myani Jesus tynnonro modo nhapâiguely:

– Enanâgiewâdaungâ Deus xunârybyry egatuze ogonotomobyry. “Dinheru, âsejiguy etary, âhurumo etary eagonro warâ kadataundâ” ugue âyanom. Âdy peba midâmoka ilâem? – kely.

– Âdy ipaom lâpeba keankâ. Idânârâ xina ize ato tâlâ keankâ – kelymo.

<sup>36</sup> Aituo myani Jesus aguely:

– Iwerâma, tywoietygue, dinherupe warâ mataymo, sataungâ. Espada mâsemaguehomo peba-ro watay, anâtaungâ. Espada sanâto peba-ro watay, âgamizarymo vende ietaungâ, manâtomoem.

<sup>37</sup> Idânârâ Deus itaumbryry awo wâgâ ywâgâ iwenihobyry ara kehoem ise aidyly: “Kyâim ara ise kâzeholy” warâ. Inepa ise arâ ayedylymo – kely.

<sup>38</sup> Aituo myani eynonro modo aguely:

– Azagâ espada tâdâsemaguehobe xina – kelymo.

– Âdainkâba ise – kely Jesus.

*Jesus Tunwym agâ Se Oliveira Ekadâ aguehobyry*

*(Mt 26.36-46; Mc 14.32-42)*

<sup>39</sup> Warâ tynnonro modoram aguenripyryem myani Jesus xidadâ odaypa idâly. Kopae tâtâho aralâ myani idâly iwy imeimbyry Se Oliveira Ekaram, tynnonro modo agâ.

<sup>40</sup> Myarâ saintybyem myani Jesus aguely tynnonro modoram:

– Satanás inakanhe amidysemo. Âynanâduomo, Deus eon-honru ekadaungâ, Satanás ize ato ara amipyra mitomoem – kely.

<sup>41</sup> Ilâpyryem myani Jesus âxiguely iwague kubalâ eydâmopa, trinta metros awârâem. Târâ myani âzehuoam idyly, Deus agâ adâkehoem:

<sup>42</sup> – Pabai, toenzepa kuru kâsenagazedyly warâ izepa wâne urâ. Ize wato araba olâ aidyly wawuly, ize mato aralâ – kely myani.

<sup>43</sup> [Aituo Deus anju ingonodyly eon-hondâze.

<sup>44</sup> Toenzepa tytyrungue, Jesus aguezesedyly Deus agâ, ton-honre kehoem. Tadahulilygue myani tune kehoem ikobizely ihuguely onro onwa.]\*

<sup>45</sup> Deus agâ agueypyem myani saudyly. Akaemo tynnonro modo âxiân-homobyryam idâly. Toenzepa tytyrumogoue xykylymo myani.

<sup>46</sup> Xykylymo tientuo myani âduagueân-honlymo. Aguely:

– Tykyzeba itaungâ. Âwaguewâtaungâ. Deusram ekadaungâ, Satanás ize ato amânhepyra mitomoem – kely.

*Jesus nhawâtomobyry*

*(Mt 26.47-56; Mc 14.43-52; Jo 18.3-12)*

\* 22:44 Xirâ tywenizeba saguhoem gregüem iweniby modo ewy wâgâ.



<sup>47</sup> Jesus aguely ume, Judas saindyly. Jesus eynynonrolâ kâinane mâkâ. Toenzepa myani kurâdo eagâ âewyly. Aituo Judas saindyly Jesus iopaji. Tadataen-ho modo agâ adâito ara iwaparydâ nhonugudyly tiendaenkuday.

<sup>48</sup> Arâ aituo myani Jesus eyam aguely:

– Judas, koendâ inkâba, urâ Uguondo Kaynâpa Âetyby ayedyly. Yataen-ho âmâ-ro waunlo ara lelâ wonugudyly, iegamehoem – kely.

<sup>49</sup> Eynynonro modo awârâ indadyly, aidyly nhedyly warâ myani.

– Xirâ espadague ise kydâsemaguely, Pymâ? – kelymo.

<sup>50</sup> Aituo myani tokalâ akaemo ewy tydahoru ety odayba nhetyly. Kurâdo eynynâ Deus agâ aguewâni modo iwymâry kuru agâ tâwaneim iwantazagâmâmy. Tâzewyze myani mâkâ tâsemaguhoem. Aituo pylâ iwantary aho eynynonro nhatâly-ro warâ.

<sup>51</sup> Aituo myani Jesus eyam aguely:

– Adâiseba ikâ! – kely.

Aituo Jesus, uguondo iwantary satâhobyrydâ MÂ' nhedyly. MÂ' nhetuo, kua idyly lelâ.

<sup>52</sup> Ilâpyryem myani Jesus aguely kurâdo eynynâ Deus agâ aguewâni modo iwymârydoam, Deus etydâ guarda domodo iwymârydoam, Judeu domodo iwymârydo tawâse âetybyram warâ:

– Espadague, segue warâ tâmase kehoem yawâse mâewylymo, tâmagazeim urâ-ro waunlo ara.

<sup>53</sup> Yawâtomo tuduzelâ keankâ saguhoem, kyâho pebalâ. Kopaêlâgâembaba keankâ Deus ety idaseray, agâmo agueze wawyly. Târâlâ yawâpyra olâ mataunaguynre. Yawâto odayba awylygue keankâ ilâenlâ yawâpyra mawylymo. Iweâma yawâtomo odaylâ. Iweâma Deus iduery ton-honreim ize tato anheto odaji itybyem. Iamu odano modo aito odaji itybyem iweâma-ro – kely Jesus.

*Pedro, “Jesus kâuntuwâbyra urâ” kehobyry*

*(Mt 26.69-75; Mc 14.53-54,66-72; Jo 18.15-18,25-27)*

<sup>54</sup> Ilâpygueduo myani Jesus nhadylymo kurâdo eynynâ Deus agâ aguewâni modo iwymâry kuru etyram. Myarâ nhataymo myani iwaguelâ Pedro idâly âgânâ.

<sup>55</sup> Saintrybyem myani peto nehobanâdylymo taseray. Âunse peto tânâmize ekadybyenmo myani. Pedro idâly myani. Eydâmo ekadyly.

<sup>56</sup> Pekodo târâ tâwaneim ewy Pedro nhedyly, peto opay âundyly ume. Koendâ kehoem enipyryem myani aguely:

– Jesus eynynonro modo ewylâ awâkâ uguondo – kely.

<sup>57</sup> – Mâkâ mâkeba urâ! Kâuntuwâbyra urâ awâkâ! – kely Pedro.

<sup>58</sup> Ilâpygueduo uguondoram âzeholy, aguehonly lâpylâ:

– Jesus eynynonro ewy âmâ – kely.

Mâkâ aguely tindatuo, Pedro agueondyly:

– Jesus eynynonro mâkeba urâ. Kâuntuwâbyra urâ awâkâ – kely.

<sup>59</sup> Tokalâ hora sakabygueduo myani eagonroram âzeholy, aguehonly lâpylâ:

– Jesus eynynonrolâ âmâ! Tutuze xina, Galiléia donro mawyly, earamolâma amyguely – kely.

<sup>60</sup> Aituo Pedro agueondyly:

– Âdy wâgâ amyguely awyly kâuntuwâbyra urâ! Kâuntuwâbyra urâ awâkâ! – kely.

Pedro aguely umelâ myani aukuma igâtudyly.

<sup>61</sup> Aituo myani Jesus MYK idyly Pedroam. Pedro MYK idyly lâpylâ Jesusram. Pedro âsenanâguely tyam aguehobyry wâgâ: “Aguely xirâ âyam, Símao. Xirâ kopae, aukuma igâtudyly iraynâ, azagâ tokalâ warâ ise ‘Jesus kâuntuwâbyra urâ’ myguely” Jesus kehobyry.

<sup>62</sup> Aguehobyry tienanâgueduo myani Pedro itynwandlyly. Târâpa âxiguely. Tâjityenze kehoem eogumadyly.

*Sodadu Roma donro modo Jesus nhapioguhobyry*

*(Mt 26.67-68; Mc 14.65)*

<sup>63-64</sup> Sodadu domodo Jesus âwankuem nhedylymo myani. Nhenuahulymo, nhapioguly idylymo.

– Ânguyka apiogurim? Apiogurimbyry xutugâ, âkealâ kuru Deus Ingonotyby matay – kelymo.

<sup>65</sup> Toenzepa myani aguelymo eyam, tienagazedoem.

*Jesus judeu domodo iwymârydoram satobyry*

*(Mt 26.57-68; Mc 14.53-65; Jo 18.19-24)*

<sup>66</sup> Emetuo myani Judeu iwymârydo, kurâdo eynynâ Deus agâ aguewâni modo iwymârydo, Moisés ezewenry wâgâ enomedâni modo warâ âtâdyguylimo. Âjigwe aguelymo myani.  
 – Jesus kânado enenehonze kurâ – tâkehobyryem, anhedylymo.

<sup>67</sup> Aguelymo:

– Messiaslâka âmâ, Deus Ingonotybylâ? Xina kâzenokudâ! – kelymo.

Aituo myani Jesus in-hoguly:

– Âkealâ uguely-ro watay, yeinwântaymba ise âmaemo.

<sup>68</sup> Apâiguelymo-ro watay, “Deus Ingonotyby wawyly tâinwânse âmaemo?” uguely-ro watay, uhoguwâbyra ise âmaemo.

<sup>69</sup> Inepa ise urâ Uguondo Kaynâpa Âetyby Deus eydâ atoram udâly. Târâ ise tynrenseinhe wawyly. Mâkâ Ton-honreim kuru ahoru eynynâ ise ekadybyem wawyly. Târâ ise wonhonru âzeholy – kely.

<sup>70</sup> Aituo myani nhapâiguelymo:

– Deus imeryka âmâ? – kelymo.

– Mâkâlâ urâ, amyguehomo aralâ – kely.

<sup>71</sup> Agueduo myani aguelymo:

– Ânguy kingâsedondaymba ise kurâ, Jesus ewentâniem. “Deus imerylâ urâ” kelyma kyjidatai – kelymo myani.

## 23

### *Pilatosram Jesus satobyry*

(Mt 27.1-2,11-14; Mc 15.1-5; Jo 18.28-38)

<sup>1</sup> Ilâpyryem myani idânârâ pymâ domodo âtâdyguywâdyby, sautaynlymo, tâtunâguedyly âwanikebyem awylygue. Pilatosram nhaleholymo, pymâ Roma donro ingonotybyram.

<sup>2</sup> Myarâ saintybyem myani Jesus ewentâdyly nhagulymo. Aguelymo:

– Kywymâry Roma donro iewiâseni awâkâ uguondo. Kywymâry modo idueryem kurâdo tiendyse awâkâ. “Roma iwymâry César-ram impostu kâzepywadaundâ” nygue. “Messias urâ, Deus Ingonotyby” nygue lâpylâ. “Urâ ise âwymârymo kuru” nygue – kelymo.

<sup>3</sup> Aituo myani Pilatos, Jesus nhapâiguely:

– Judeu domodo iwymâry kuruka âmâ? – kely.

Jesus in-hoguly:

– Mâkâlâ urâ, amygueho ara – kely.

<sup>4</sup> Aituo myani Pilatos aguely kurâdo eynynâ Deus agâ aguewâni modo iwymârydoram, kurâdo tonlo modoram warâ:

– Urâem, âdy ewentâdo lâpeba merâ uguondo. Âdy wâgâ enagazedo lâpeba – kely.

<sup>5</sup> Jesus izepaom modo olâ xunâguedyly nimopamo myani.

– Tâinkâ lelâba inanry idâly kurâdo xuruse: “Pymâ Roma donro aguely kâjidataundâ” nygue. Judéia eynynâ adakobâdyly inanry. Galileiadâ ani Deus wâgâ aguely adaguly; iwerâ tarâ Jerusalémdâ – kelymo myani.

### *Herodes enadoram Jesus satobyry*

<sup>6</sup> Jesus Galileiadâ aitobyry tindatuo, Pilatos nhapâiguely myani:

– Galiléia donroka merâ uguondo? – kely.

<sup>7</sup> – Tonlo awâkâ – kelymo.

Galiléia donro Jesus awyly tiuntuduo myani Pilatos, Herodesram Jesus ingonodyly. Pilatos tutuze lâpylâ myani Herodes Jerusalémdâlâ awyly.

<sup>8</sup> Jesus egary tydaselâ myani Herodes. Iweâpa myani tiendyse awyly. Âkealâ kuru Jesus egary tiuntudyze. Awylygue âdylâ Deus eon-honrugue anhedyse awyly tientoem. Awylygue myani toenzepa iomazely, Jesus tânadoram satuo.

<sup>9</sup> Aituo myani Herodes toenzepa Jesus nhapâiguely aitobyry wâgâ, aguehobyry wâgâ warâ. Jesus olâ nihoguba.

<sup>10</sup> Kurâdo eynynâ Deus agâ aguewâni modo iwymârydo, Moisés inweniby enomedâni modo warâ târâlâ lâpylâ myani. Toenzepa kehoem Jesus nhewentâdylymo.

<sup>11</sup> Herodes, izodadury modolâ warâ Jesus âwankuem nhedylymo myani. Izepa tawylygue lelâlâ anhedylymo. Âwankuem tiendylymo umelâ myani iwâkuru kehoem âtâ pymâ ety emyenro nhonwa nhedylymo. Ilâpyryem myani Herodes nhopânehonly Pilatos enadoranlâ.

<sup>12</sup> Herodes, Pilatos warâ saguhoem âjizepaombyrymoem. Xirâ ume myani adataen-hoem idylymo.

*“Nigue lelâ awâkâ Jesus” Pilatos kehobyry*

(Mt 27.15-26; Mc 15.6-15; Jo 18.39-19.16)

<sup>13</sup> Ilâpygueduo myani Pilatos, kurâdo eynynâ Deus agâ aguewâni modo iwymârydo, judeu domodo iwymârydo, kurâ domodo warâ indâtyguily.

<sup>14</sup> Aituo myani eyanmo aguely:

– Merâ uguondo yam menetondaimo. “Pymâ domodo kâdytadaundâ’ kely kurâdoram” mygueansemo. Awârâ wâgâ sapâigueagui idânârâ inanaynmo. Ienanaji, mâenwentâdomoem inakanhe anipyra, aguepa warâ merâ.

<sup>15</sup> Herodes xurâem âdy inakanhe aitobyry lâpeba lâpylâ warâ. Awlylygue yam ingono-tondyly. Âdaityby mâkeba merâ uguondo iguehoem.

<sup>16</sup> Ewentâdo kâuntuba lelâlâ wâne urâ, alâ olâ kampiogüen-honly, omazeândomoem. Sapiogüen-honze urâ, imoen-honze urâ alelâ – kely Pilatos.

<sup>17</sup> [Aunlolâ mykâinane Pilatos, Pâscoa etyry ume etadâdyby modo ewy tokalâ nhetague-honly, âdaunlolâ kurâdo nhekadybylâ.]\*

<sup>18</sup> “Kâinmoen-honly” Pilatos keduo myani idânârâ adaenkewâdylymo:

– Kruz onwa sakâjien-hongâ awâkâ uguondo, iguehoem! – kelymo!

– Barrabás xina mâentaguehondyze ato – kelymo.

<sup>19</sup> Jerusalém donro modo, pymâ romano domodo agâ âsegyebyby ewy myani mâkâ Barrabás. Kurâ domodo pymâ agâ iewiâpaday, uguondo modo tyâze myani. Awlylygue myani kadeia odaxi âzetadâoly.

<sup>20</sup> Pilatos myani Jesus timoen-hondyze. Awlylygue myani agueondyly kurâdoram:

– Jesus sapiogüen-honze, imoen-honze warâ urâ – kely.

<sup>21</sup> Adaenkezededylymo lakuru toenzepa kehoem:

– Kruz wâgâ nigüe! Kruz onwa sakâjien-hongâ, iguehoen-ro warâ! – kelymo.

<sup>22</sup> Aituo myani azagâ tokalâ warâ Pilatos aguely idyly:

– Âdaituo? Ienanaji, âda nitaymba merâ iguehoem! Xikotygue sapiogüen-honze urâ. Ilâpyryem ise kâinmoen-honly-ro warâ – kely.

<sup>23</sup> Ageduo olâ myani kurâdo toenzepa adaenkeondylymo:

– Kruz wâgâ nigüe! Kruz onwa sakâjien-hongâ, iguehoem! – kezeselâ kurâ domodo.

Nadaenkeba nipyramo. Toenzepa kehoem myani adaenkelymo.

<sup>24</sup> Aituo myani Pilatos nhekadomobyry ara anhenehonly.

<sup>25</sup> Sodadu domodoram aguely myani:

– Kadeiaram idâwâtaungâ. Mâkâ Barrabás etaguewâdaunda, kyârimpyry, kurâdo, pymâ Roma donro izepa ienehonrimbyry. Ilâpyryem ise Jesus kruz onwa sakâjize mandylymo – kely Pilatos.

Aituo myani Pilatos, judeu domodo iwymârydoram aguely:

– Mâenkadybymo ara enra sodadu modoram agânhenehonly – kely.

*Jesus kruz wâgâ iguehoem sakâjihobyry*

*(Mt 27.32-44; Mc 15.21-32; Jo 19.17-27)*

<sup>26</sup> Aituo myani sodadu domodo Jesus nhawâdylymo, nhadylymo, kruz onwa sakâjize iguehoem. Ânwa oze tâtâdaymo myani uguondo Simão agâ oxiodylymo. Xidadâ Cirene donro myani mâkâ. Poji ananobyryem myani odopâdyly. Tiontuo myani sodadu domodo kruz Jesus tiankâjihomoem eyam nahanênehonlymo.

– Xirâ kruz sakâ, Jesus nhapygue – kelymo myani.

<sup>27</sup> Toenzepa myani kurâ domodo nhapyguemo awyly, pekodo modo lâpylâ warâ. Toenzepa ohogüendylymo, igueho awyly tiuntuduomo.

<sup>28</sup> Jesus MYK idyly pekodo modoram. Aituo eyanmo aguely:

– Agâieholygue tohogüenzeba itaungâ, pekodo modo Jerusalêmdâ tâtyruneim modo. Âwâgâmolâ, âmeombyrymo wâgâlâ warâ ohogüendaungâ.

<sup>29</sup> Xidadâ oday tâtyuneim modo toenzepa ise âsenagazedaynlymo. Tâsenagazedylymogue ise pekodo imezedânry modoram aguelymo: “Koendâ ise âmaemo, âdykâ tymegueba mawlylymogue, âdykâ âwanrymogue iamudo makuiba mawlylymogue warâ” kezemo.

<sup>30</sup> Toenzepa tâsenagazedylymogue iwyrarm wakezemo: “Âihuguegâ xina onwa, xina xyâze, tâsenagazedyly xina nepyra itoem” kezemo Jerusalém donro modo. “Xina epyâze âihuguegâ” kezemo iwy wogonro tuhu imâsedo modoram.

<sup>31</sup> Iwerâ, urâ âdykâ inakanhe aitanry kâsenagazedyly. Âmaemo inakanhe aitaynrim modo lakuru olâ ise toenzepa âsenagazeni. Wauguely: “Peto emanâdyby, peto iladânrygue kionguandyly watay, tyatygzela peto iladybygue kionguatuoma kuru-ro!” – kely Jesus.

<sup>32</sup> Azagâ uguondo inakai aienibyry samâ lâpylâ sodadu domodo, kruz onwa tiankâjihomoem, Jesus agâ iguehomoem.

\* 23:17 Xirâ tywenizeba saguhoem gregüem iweniby modo ewy wâgâ.

<sup>33</sup>Iwy Calvarioram myani saindylymo. Myarâ saintybyem Jesus nhakâjilymo kruz onwa. Azagâ kyârimpyry nhakâjilymo eagâ, tokalâ aho eynynâ, eagonro pâem eynynâ warâ.

<sup>34</sup>[Aituo Deus agâ Jesus aguely:

– Pabai, awâkâ kurâdo kâzenagazedâ. Inakanhe aitomobryry xygakegâ. Âdara tâidyly nutuwâbyra asaemo – kely Jesus.]†

Sakâjirimbyryem myani sodadu domodo Jesus ety iwogonropyry nhepajiwâdylymo mâkâem, mâkâem warâ. Dadu nhamelymo, ânguy, ânguy warâ Jesus ety iwogonropyry emakeim awyly tiuntuhomoem.

<sup>35</sup>Târâ aidyly esezelâ myani kurâdo, tywymârymo Jesus âwankuem nheta. Pymâdo eyam aguelymo myani:

– Âkelo modo nemakewâdâ; tâwâlâ nâsemagueba olâ! Deus Ingonotyby tatay pylâ tâwâlâ nâsemague – kelymo.

<sup>36</sup>Sodadu domodo âwankuem nhedyly, nheinledyly idylymo myani. Iopaji idâllymo. Aguelymo myani:

– Anra vinhu mâenyhoem – kelymo.

<sup>37</sup>– Judeu domodo iwymâry kuru matay, kruz wâgâpa âytâguygâ, âiguepa mitoem – kelymo.

<sup>38</sup>JESUS MERÂ, JUDEU DOMODO IWYMÂRY KURU kely iweniby sakâjiwânmony Jesus nhang-awaym kruz wâgâ. Mârâ iwenibyem awyly myani, gregu, romano, judeu warâ itanwe.

<sup>39</sup>Tokalâ inakanhe aityby ewy kruz wâgâ sakâjiby Jesusram aguely myani:

– “Cristo urâ, Deus Ingonotyby” mygueanse. Kâinwâmpyry olâ urâ. Cristo matay pylâ, tâwâlâ âsemaguegâ. Kruz wâgâpa adakâjiguegâ, âytâguygâ warâ. Xina emakegâ lâpylâ-ro warâ – kely.

<sup>40</sup>Aituo eagonro aguely:

– Arâ adâkezeba ikâ. Deus mâynrentaymba âmâ! Azakâlâ awâkâ ara kydâsenagazedyly. Azakâlâ ise kyiguely, awâkâ ara lâpylâ.

<sup>41</sup>Kurâma âkealâ aguydâieholo-ro inakanhe itybyma kurâ. Âkealâ aguydâieholo. Awâkâ olâ âdaityby keba – kely myani.

<sup>42</sup>Aituo Jesusram aguely:

– Pymâem modopâduo, âinwânnyryem wawyly enanâguegâ – kely.

<sup>43</sup>Aituo myani Jesus in-hoguly:

– Âkealâ xirâ âyam aguely. Kyiguely ise xirâ, Iwerâlâ olâ ise yagâ mydâly Deus eydâ atoram – kely.

*Jesus iguehobyry*

*(Mt 27.45-56; Mc 15.33-41; Jo 19.28-30)*

<sup>44</sup>Kuotatay myani xixi tohoreba idyly. Azagâ tokalâ warâ horas ara lelâ idânârâ iamataynly.

<sup>45</sup>Deus tynrenseim etydâ, Deus, kurâdo agâ tygue ito xuahuru iotagâ adauguely kaynon-robyryem, on-yam.

<sup>46</sup>Aituo myani Jesus adaenkely ago kehoem:

– Pabai, imaxi iegadopyry kâengamely – kely myani.

Aguelypyem myani, iguely. Ipa idyly.

<sup>47</sup>Sodadu Roma donro modo iwymâry myani idânârâ aidyly eselâ. Aidyly tientuo myani aguely:

– Koendonro keankâ merâ uguondo. Âda nitaymba keankâ merâ, xyâhoem – kely.

<sup>48</sup>Toenzepa myani kurâdo târâ awyly mârâ ese. Iguely enipyryem myani tâtyram odopâdylymo. Tâjihogainze myani idâllymo, tytyrumogue.

<sup>49</sup>Idânârâ Jesus eataen-ho modo iwaguemolâ myani, pekodo modo lâpylâ, Jesus agâ Galileiadâbalâ âetaymyby modo. Jesus kruz wâgâ nhedylymo.

*Jesus eguepybyry tuhu imâsedo tâtaguem odaji nhetaâdomobyry*

*(Mt 27.57-61; Mc 15.42-47; Jo 19.38-42)*

<sup>50-51</sup>Tâlâ myani târâ Judeiadâ uguondo José; Arimatéia donro mâkâ, koendâ lelâ, Deus agueho ara lelâ aini warâ. Idânârâ kurâdo iwymâryem Deus idyly sainto tânuenze mykâinanane. Judeu domodo iwymâry Sinédrio kelygue tâzekeim ewy myani. Tataen-ho modo, Jesus xyâen-honze keduomo, eagâmo nâseinwâmybyra myani.

<sup>52</sup>Aituo myani José, Pilatosram idâlly aguely:

– Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtaguem odaxi kâenkanâdoem. Tâwâlâ kâyntâguyândyly? – kely.

† 23:34 Xirâ tywenizeba saguhoem gregüem iweniby modo ewy wâgâ.

<sup>53</sup> – Tâwâlâ – Pilatos keduo, José idâly myani.

Ilâpyryem myani José, Jesus eguepybyry kruz wâgâpa nhytâguyândyly. Xytâguyânybyryem, intuwynly âtâ linhugue. Ilâpygueduo, eguepybyry nhetadâdylimo tuhu imâsedo tâtagueim esagueyby odaji. Ânguy etarybyry keba myani mârâ.

<sup>54</sup> Sexta-feira oday myani Jesus iguely, tâzekobyzeguehoem todohondo iguandyly ume. Iguandylylâ myani âguedy myarâ nhetadâdomo, tâzekobyzegueho adagulylâ.

<sup>55</sup> Pekodo modo Jesus agâ Galileiadâpa âetaymby modo José nhapygue idâwânmo lâpylâmy. Âdykâ Jesus eguepybyry etadâdylily awyly emâmomy warâ.

<sup>56</sup> Tiempygueduo myani tâtyram odopâdylimo. Tyânringueim modo, óleo tyânringueim warâ nhondylimo, âguedy ituwyn-ho onwa, tiampâdomoem. Ohondybyem myani ekobyzeguelimo, judeu domodo ezewenryem mawânâ tâzekobyzegueho oday ânguy nâsewaniba.

## 24

*Jesus kurâem itondobyry*

*(Mt 28.1-10; Mc 16.1-10; Jo 20.1-10)*

<sup>1</sup> Domingo pealâ myani pekodo modo Jesus eguepybyry etadâdobyryram idâlymo. Uriza tyânringueim tiontaymby modo nhadylymo.

<sup>2</sup> Saintrybyem myani, tâtagueim enahun-ho tuhu imâsedo ejikeybyem awyly nhedylymo.

<sup>3</sup> Tâwânsemo myani tâtagueim odaxi. Âwântybyem myani Kywymâry Jesus eguepybyry târâpa awyly nhedylymo.

<sup>4</sup> Toenzepa myani âseguâdâdylimo. Iwaunkymo ume myani azagâ uguondo\* âepanâguely eyanmo, tohozeleingue kehoem tâteyim.

<sup>5</sup> Pekodo modo âseanedylily myani; toenzepa lelâlâ myani âseanedylimo. Tyanumogugue uguondoram MYK nipyramo myani, enagozeybymoem lelâ. Aituo myani uguondo modo aguely:

– Kurâem itondybyr kâduiwâtaundâ iguewâtyby modo ejidydâ.

<sup>6-7</sup> Tarâ inkâba mâkâ. Ipa, kurâem nitondai. Saguhoem Galileiadâ agâmo tatay aguehobyry enanâguewâdaungâ: “Urâ Uguondo Kaynâpa Âetyby tumunreim modo emaxi âzegameoze urâ. Iemakâjizemo, ienagazezemo. Yakâjizemo kruz onwa, yiguehoem. Igueze urâ. Azagâ† emedyly idyly wâgâ olâ ise kurâem witondyly” kehobyry – kelymo myani.

<sup>8</sup> Aguehobyry nhenanâguely myani pekodo modo.

<sup>9</sup> Tâtagueim odayba egaselymo. Odopâdylimo. Saintrybyem myani akaemo onze lelâ Jesus eynynonro modoram, kurâ domodoram warâ nhegatulylymo, idânârâ tientybymo ara.

<sup>10</sup> Asaemo: Maria (Magdala donro), Joana, Maria (Tiago ise), eagonro pekodo modo warâ myani Jesus eguepybyry etadâdobyryram idâppy. Tientybymo ara, tindatybymo ara warâ myani akaemo nhegatulylymo.

<sup>11</sup> Pekodo modo aguely indadylymo. Neinwâmpyramo olâ myani, kewâdylimo kulâ waunlo ara awylygue.

<sup>12</sup> Pedro olâ myani saudyly. Tâgase kehoem idâly Jesus eguepybyry etadâdobyryram. Saindyly. Koendâ târâ tientoem âzewily. Ituwyn-hobyry lelâ nhekyly. Aituo myani tâpaunzeze odopâdylily tâtyam.

– Iwerâ ise-ro? Âdaituo kuruka arâ aidily? – kely.

*Emaúsram idâwâni modoram Jesus âepanâguehobyry*

*(Mc 16.12-13)*

<sup>13</sup> Pekodo modo, “Jesus kurâem nitondai” kehobyry iguandyly ume myani azagâ uguondo Jesus nhapyguenibyry modo tuhuru wâgâ idâlymo Emaúsram. Dez kilômetros awârâem Jerusalémdâpa awyly.

<sup>14</sup> Idânârâ Jesus agâ aitaymby modo wâgâ, pekodo modo nhegatuyby wâgâ warâ xunâgumo.

<sup>15</sup> Awârâ wâgâ tunâgue idâlymo ume myani Jesus saindyly iopajimo. Eagâmo idâly myani.

<sup>16</sup> Nhedylymo wâne, mâkâem awyly nutubamo olâ myani. Jesuslâ awyly nutubamo.

<sup>17</sup> Aituo myani Jesus eyanmo aguely:

– Âdyka ânwa oze âunâgomo? – kely.

Uguondo tagâ aguely tindatuo myani epagudylymo, tytynre kehoem.

<sup>18</sup> Aituo myani Cleopas aguely:

– Jerusalémdâ aitaymby modo wâgâ kulâ enra xina xunâgu. Âmâ kulelâ keanra xirâ modo wâgâ âdy xutudânry! – kely.

\* 24:4 Anju domodo myani akaemo azagâ uguondoem âepanâguem. † 24:6-7 Nota de pé Mateus 12.40dâ egâ.

<sup>19</sup> Aituo myani Jesusram adapâigueolyo:

– Ádyka amyguehomo? – kely.

In-hogulyo:

– Jesus Nazaré donro aietobyry wâgâ enra xina aguely. Deus eynynâ agueim keankâ mâkâ. Uguondo anhetânry aieni keankâ mâkâ, Deus anhekily aieni warâ. Koendâ keankâ Deus wâgâ kurâdo nhenomedâdily. Deus, kurâ domodo alelâ keankâ nhomazeânguly, adienkylygue, adâkehogue warâ.

<sup>20</sup> Kywymâry modo olâ keankâ izepa. Awylygue keankâ kurâdo eynynâ Deus agâ aguewâni modo iwymârydo, eagonro pymâ modo warâ nhegamelyo pymâ Romadâpa ingonotyby emaxi. Pymâ Roma donro induakeyby nakâjien-ho kruz wâgâ iguehoem.

<sup>21</sup> Mâkâlâ wâne keankâ xina israelita domodo tânagazeni modo emaymba tâmakeinhe nhutuly. Kopaëlâgâbygueduo olâ keankâ iguely.

<sup>22</sup> – Toenzepa olâ iwerâ xina âseguâdâdily, unâ âkelo tindatobyry wâgâ. Iwerâ pealâ pekodo modo nâtyagui Jesus eguepybyry etadâdobyryram.

<sup>23</sup> “Eguepybyry târâpa” keanrymo olâ-ro warâ. Nodopâdaimo. “Anju kaynonro nâpanâgueagui târâ. Xina agâ agueakimo” keanrymo. “Jesus kurâem nitondai” keanrymo xinaram warâ. Warâ enra pekodo modo xinaram nhegatuly.

<sup>24</sup> Awârâ tindapygueduo, eynynonrobyry ewy nâtyagui Jesus eguepybyry etadâdobyryram. Koendâ kuru pekodo modo aguehobyry ese. “Ipa târâ eguepybyry” keanrymo olâ – kely Cleopas.

<sup>25</sup> Aituo myani Jesus aguely eyanmo:

– Tahule âdy einwânni kebalâ mataunaze! Saguho Deus itaumbry egatuwânibry modo aguehobyry mâinwândilyo-ro watay, akaemo pekodo modo aguehobyry tâinwânse tâise âmaemo.

<sup>26</sup> “Âsenagazedily, iguely warâ ise Deus Ingonotyby” tâkeze myakâwâm saguho modo Deus itaumbry egatuwâni modo. “Kurâem itonze warâ. Deus enado ise xynru, Deus tagâ eonhonru âzekiba ienehonze” tâkezero myakâwâm – kely Jesus.

<sup>27</sup> Idânârâ tywâgâ, Deus itaumbry awo wâgâ inweniby koendâ kehoem nhegatuly myani. Moisés, Deus eynynâ aguewâtyby modo lâpylâ warâ, tywâgâ inwenibymo, koendâ kehoem nhegatuly myani.

<sup>28</sup> Emaús iwaguepa saindilyo myani. Jesus sakadyly lelâ waunlo ara enanjimo.

<sup>29</sup> Aituo myani idâdysebamo aguelyo:

– Xina agâlâ ikâ; kogonekâ awârâ, iguandyly ise – kelymo.

Aituo myani Jesus mâkâ azagâ tagonropyry agâ etymo odaji egawândily.

<sup>30</sup> Âwinduase ekadilyo myani. Jesus pão nhanâdily. Deus agâ aguely myani:

– Tuomare xina, pão mâunduhobyry wâgâ, Pabai – kely.

Deus agâ agueypyem myani pão nhepajiwâdily; mâkânra, mâkânra warâ nhuduly.

<sup>31</sup> Pão nhuduly ume kulâ myani mâkâ uguondo Jesuslâ awyly nhutulymo. Akaemo tutuduo myani âtygaguely.

<sup>32</sup> Aituo myani akaemo azagâ aguelyo:

– Ânwa oze kydatay, Deus itaumbry agueduo toenzepa kuomazeaguilâ – kelymo.

<sup>33</sup> Aituo myani saudilyo inepa kehoem. Jerusalémram odopâdilyo. Saintrybyem myani idâlyo Onze lelâ Jesus eynynonrobyry modo, kurâdo Jesus einwânni modo warâ âtâdyguyhobyryram.

<sup>34</sup> Akaemo azagâ saintrybynra aguelyo myani:

– Kywymâry kurâem nitondai lelâlâmy! Igueypyem inkâba. Kurâem nitondaimy! Simão netai – kelymo myani.

<sup>35</sup> – Tutuzelâ xina! Xina netai lâpylâ! Xina Emaúsram idâday, uguondo nâpanâgueagui. Xina agâ Emaúsram nâtyagui warâ. Kywymâryem awyly xina nutuagui, pão nhepajiwâday – kelymo myani.

*Jesus tynnonro modoram âpanâguehobyry*

*(Mt 28.16-20; Mc 16.14-18; Jo 20.19-23; At 1.6-8)*

<sup>36</sup> Nhegatudaymo myani Jesus âpanâgueuly eyanmo.

– Koendâ lelâ âmaemo – kely.

<sup>37</sup> Tientuo myani adapâendilyo, âseandedilyo warâ. Jesus egadopyry kulâ waunlo ara enanjimo.

<sup>38</sup> Jesus olâ myani eyanmo aguely:

– Tâseanezeba itaungâ. “Jesus egadopyry awâkâ” tâkewâzeba itaungâ.

<sup>39</sup> Urâlâ urâ! Etaungâ iemary, uhuru warâ. MÃ’ ietaungâ, kadopâemba wawyly mâetomoem, kurâem wawyly mâinwântomoem warâ. Igueypy egadopyry mawânkâ tunrempa, tybyguepa warâ xara ietomo ara – kely myani.

<sup>40</sup> Agueypyem myani tâmary, tuhuru warâ nhenehonly.

<sup>41</sup> Mâkâlâ kuru awyly neinwâmpyramolâ. Takalaguemolâ warâmo wâne myani, toenzepa olâ iomarumo, ekuâgumo lâpylâ warâ.

Aituo myani Jesus eyanmo aguely:

– Âdylâ tânzeimpe tarâ? – kely.

<sup>42</sup> Kanra âjihuyby epajigâdyby nhudulymo.

<sup>43</sup> Enanaynmolâ kanra âjihuyby nhâdyly.

<sup>44</sup> Tâwinduapygueduo myani Jesus aguely:

– Yiguely iraynâ agâmo watay, âyanmo augue. “Deus itaumbry awo wâgâ Moisés ywâgâ inweniby ara ise awidyly. Deus unâry egatuwânibyry modo ywâgâ aguehobyry ara ise awidyly. Deus xurâem tygâtuneim modo ywâgâ inweniby ara ise awidyly” ugue wâne-ro – kely Jesus.

<sup>45</sup> Warâ Deus aguehobyry nhutuen-honly; nhangahumo odaji nhedyly.

<sup>46</sup> Aguely:

– Warâ inwenibyem awyly: “Deus Ingonotyby âsenagazeze, igueze warâ. Azagâ<sup>‡</sup> emedyly idyly wâgâ olâ ise kurâem itondyly” kely.

<sup>47</sup> “Tâinkâ lelâba ise einwânni modo xunârybyry egatuze idâly. Aguezemo: ‘Inakanhe kulâ amidylymo wâgâ âjityendaungâ. Deus izepa ato aiedyly imowâdaungâ. Arâ ise Deus inakanhe mitomobyry nhygakely, Ingonotyby tâinwânse mawylmogue’ kezemo. Jerusalêmdâ ise nhegatulymo adaguly, ilâpyryem ise tâinkâ lelâba-ro warâ” warâ inwenibyem awyly.

<sup>48</sup> Âmaemo awidyly enipyry modo, auguely idanipyry modo warâ, aituo xirâ modogue kurâ domodoram aguewâtaunda.

<sup>49</sup> “Yspiritury igonose urâ” nygue Deus. Urâlâ ise Deus “Igonose urâ” kehobyry igononi. Deus eydâpa ise ywâgâ amyguehomoem on-honrumo eneni âewyly. Saindyly ara tarâ xidadâdâlâ itaungâ – kely Jesus.

*Jesus Deus eydâ atoram âkuhobyry*

*(Mc 16.19-20; At 1.9-11)*

<sup>50</sup> Aituo myani Betanianra idâlymo Jesus agâ. Târâ tâmary IUK ienipyryem aguely myani:

– Pabai, eagâmolâne ikâ, âda kâienehomo warâ – kely.

<sup>51</sup> Adâkely umelâ myani Jesus eydâmopa âxiguely. Eydâ tatoram Deus nhalokuândyly.

<sup>52</sup> Awârâ modo tindatuo, tientuo warâ myani aguelymo:

– Koendonro mâkâ Jesus! Deuslâ mâkâ! Ânguy mâkâ emyenro lâpeba! – kelymo, tiynrentomoem.

Ilâpygueduo myani tuomamune odopâdaynlymo Jerusalêmmram.

<sup>53</sup> Kopaêlâgâembaba myani idâlymo Deus etyram. Târâ Deus koendonroem awyly wâgâ aguelymo, igâkymo iwâgâ warâ.

Alâ kulâ.

Lucass

## JOÃO

### Unâ Koendonro Jesus Cristo Wâgâ João Inweniby

Xirâ livru wâgâ inwenily João nhangahu odaji iemâny Deûs. Awylygue Deûs itaumbryrlâ xirâ João nhegatyby. Jesus induakeyby myakâwândy mâkâ João. Jesus toenzepa inwynecyly myakâwândy mâkâ. Mâkâ lelâlâ tientybylâ xirâ livru wâgâ nhegatyly.

Kâmakerim Jesus Cristo wâgâ kiuntuhoem myakâwândy Deûs xirâ livru inwenien-honly. Xirâ iweniby wâgâ tytainze kurâ, Deûs kiuntuho mâkâ awyly. Idânârâ xugudyly iraynâlâ tâlâ myakâwândy mâkâ, tutuze kurâ; xirâ onro anaxi tâetoem olâ myakâwândy kurâem idyly. Kâmakeze iguein-em myakâwândy âewyly, judeu domodo kaneru nhâlymo inakanhe adâitomobyry xygakehoem myara.

Jesus adyesenry modo kehoem anhetobyry, pekodo Samaria donro agâ aguehobyry, Lázaro igueduo kurâem nhetondobyry wâgâ warâ adâkeze xirâ livru.

Xirâ livru xypyrydâ, capítulo 14dâ Jesus, tyiguely iraynâ, tynnonro modoram aguehobyry, Deûs Spiritury tingonodyly wâgâ enomedânimoem, eon-hondânimoem warâ kehobyry tytainze kurâ. Capítulo 17dâ, Jesus Tunwym agâ xunâgobyry tutuze lâpylâ kurâ. Iguehobyry wâgâ, igueypyem kurâem tâitombygueduo turâ modoram âepanâguehobyry warâ tytainze kurâ.

Âdaituo xirâ iwenily awyly xutuhobe xirâ livru wâgâ: Jesus Deûs imeryem awyly, kâmakeinhe Deûs ingonotyby awyly warâ kieinwântoem.

*Jesus wâgâ mawânkâ Kunwym Deûs kiuntuly*

<sup>1</sup> Idânârâ âtugudyly iraynâ, âdy peba awyly ume, tâlâ myakâwândy kyam Deûs Xutuen-hoim. Tunwym Deûs agâlâ myakâwândy mâkâ.

<sup>2</sup> Idânârâ nhugudyly iraynâ, Deûs Xutuen-hoim Deûs agâlâ myakâwândy.

<sup>3</sup> Deûs Xutuen-hoimlâ, idânârâ tâlânro modo adâkelygue kulâ xugunehonri. Mâkâ aguepa watay, âdy peba, ânguy peba warâ tâise.

<sup>4</sup> Deûs Xutuen-hoim mawânkâ xirâ anaym tâlâ kyenehonri. Mâkâ wâgâlâ ise Deûs eydâ atoam kytâlâ, kieinwândylygue. Iajinu wâne kytâho kientoem ânwa tâsagonze, myara lâpylâ Deûs wâgâ kiuntuhoem anhenehonly.

<sup>5</sup> Iajinu emyenro mâkâ, inakanhe aguitobyry xutuen-hoim. Iamu, iajinu tohoreba nietaymba, arâ lâpylâ inakanhe tadawyly Deûs wâgâ kiuntuly nianlâpyra awyly.

<sup>6</sup> Jesus Deûs wâgâ aguely adaguly iraynâ, Deûs eagonro uguondo unâ egatuim igonomâmy, João Batistalâ.

<sup>7</sup> Iajinu oze kytâduo, âdyam kytâlâ awyly tutuze kurâ, arâ lâpylâ Jesus âdara Deûsram kaintyly awyly nhutuen-honly. Jesus wâgâ agueze myani João âewyly. Idânârâ adâkely indatomoem, Jesus nheinwântomoem warâ myani João aguely.

<sup>8</sup> Deûs Xutuen-hoim kuru mâkeba myani João. Jesus mawânkâ kyam Deûs Xutuen-hoim kuru; mâkâ wâgâ ani João aguely.

<sup>9</sup> Jesus xirâ onro anaxi âewyly myakâwâm, Deûs kyam xutuen-honze. Mâkâ wâgâ mawânâ âdara mâkâ xurâem kydawyly xutuly.

<sup>10</sup> Mâkâ kyam Deûs Xutuen-hoim onro anaxi âemâ; tarâ kuduaylâ akâwâm. Mâkâ lelâlâ idânârâ onro anano modo tytanruegue kulâ xugunipyry, Deûs xurâ keba modo olâ Messiaslâ mâkâ awyly nutubamo. Deûs Ingonotyby.

<sup>11</sup> Typemugudo judeu domodo duaxilâ wâne myani âewyly. Ipemugudo judeu domodo ewy olâ myani, eynnonroem tâidysebamo.

<sup>12</sup> Tâlâ olâ myani einwânni lâpylâ, awylygue akaemo Deûs xurâem nhenehonly.

<sup>13</sup> Tâjimery tyze odaypalâ iazely, nhunwynlâ xuguni warâ. Arâpa olâ Deûs tymeryem kyedyly. Eynnonroem kydawylygue tymeryem kyedyly.

<sup>14</sup> Deûs kyam Xutuen-hoim Jesus Cristo karalâ akâwâm kurâem awyly. Kuduaylâ akâwâm xirâ onro anaym awyly. Kagâ koendonro lelâlâ mâkâ. Mâkâlâ mawânkâ âkealâ kuru âdaunlo Deûs awyly xutuen-hoim. Deûs imery tokaleom tawylygue, koendâ, ton-honre warâ mâkâ. Tâense kurâ koendonro kehoem awyly, ton-honre awyly warâ.

<sup>15</sup> Mâkâ Deûs kyam Xutuen-honri wâgâ myakâwâm João Batista aguely:

– Saguhoem iwâgâ auguehobyrylâ merâ. Auguehobyry enanâguedaungâ, “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ olâ myakâwândy merâ yazely iraylâ” uguehobyry – kely.

<sup>16</sup> Koendonro lelâlâ mâkâ, koendâ lelâ inanry, idânârâ kagâ awyly. Aunlolâ inanry kurâem koendonro anhesezedyly.



<sup>17</sup> Saguhoem kuru Moisésram myakâwandy Deus kâzewenry nhegatuem-honly, kydamudo judeu domodo ezewenry. Jesus Cristo wâgâ olâ iwerâ Deus koendonroem tawly, tonhonre tawly warâ nhenehonly. Jesus Cristo wâgâ mawânâ âdaunlo Deus awyly kiuntuly.

<sup>18</sup> Ânguy Deus netaymba. Mâkâ imery tokaleom olâ tâense, Deus agâ âzekibalâ tawlygyue. Tunwym agâlâ mâkâ. Mâkâlâ ani koendâ kuru âdaunlo Deus awyly xutuen-honri.

### *João Batista aguehobyry*

<sup>19</sup> Judeu domodo iwymârydo Jerusalém donro, kurâdo eynynâ Deus agâ aguewâni modoram, emary modoram warâ aguelymo myakâwâm:

– Joôram idâwâtaungâ. Sapâiguewâdaunda: “Âmâ-ro? Ânguyka âmâ? Âwâgâlâ amyguely? Messiaslâ âmâ, Deus ingonokyly tynwânwânseinlâ?” kewâtaunda – kelymo.

<sup>20</sup> Aituo idâlymo; João nhapâiguelymo. Tapâiguehobyry koendâ kehoem in-hoguly:

– Messias mâkeba urâ, mâkâ Deus ingonokyly kurâdo inwânwânkyly mâkeba – kely.

<sup>21</sup> Aituo nhapâigueondylymo:

– Messias keba matay, Elias kurâem itondyby âmâ? – kelymo.

Aituo João in-hoguly:

– Elias mâkeba urâ – kely.

– Moisés ara Deus itaumbyry egatuim tynwânwânseinlâ âmâ? – kelymo.

– Mâkâ keba aze – kely.

<sup>22</sup> Aituo agueondylymo Joôram:

– Arâ atay, ânguy pylâka âmâ? Tugononibryram mâin-hoguhobyry tiandyse xina. Âdara tâkezeka âmâ âwâgâlâ? – kelymo.

<sup>23</sup> Aituo João in-hoguly, saguhoem lelâlâ Isaías inweniby arâlâ:

– Âdy peba atodâ Messias wâgâ agueinlâ urâ. “Ohondaungâ Kywymâry Deus Ingonotyby saintodâ, taseray tuonse wâne pymâ ton-honreim saintoem myara. Inakanhe amidylymo imowâdaungâ” keim urâ – kely João.

<sup>24-25</sup> Aituo, sapâigueze ingonotyby modo duano, fariseu domodo, Joôram aguelymo:

– Messias keba, Elias kurâem itondyby keba, unâ egatuim Deus ingonokyly tynwânwânsein keba warâ âmâ-ro watayma kurâ domodo batiza iese ton-honruneba âmâ-ro – kelymo.

<sup>26</sup> Aituo João aguely eyanmo:

– Urâ parugue batiza âenimo. Âduaymolâ olâ awâkâ, eon-honru mâuntudânrymo.

<sup>27</sup> Urâ pygueduo lelâlâ wâne Deus xurâem tâwanu nhaguly, awâkâ olâ yakadâ kuru tynrenseim. Mâkâ mawânkâ Deus wâgâ agueim kuru. Mâkâ ara iedylymo watay, âdy mâkeba urâ. Ihuru kâingokehoem ihuru etary etyrinhe witoenlâ nudupa lâgâlâ – kely.

<sup>28</sup> Betaniadâ myakâwâm awârâ aidyly, âtunâguedylymo, paru Jordão kuynâ, João, Deus eynnonroem tâdysedo modo batiza nhetondâ.

### *João Jesus wâgâ aguehobyry*

<sup>29</sup> Kopaêlâgâem João, Jesus nhedyly. Tyam idâly tientuo tonlo modoram aguely:

– Etaungâ Deus Ingonotyby. Awâkâ wâgâ ise Deus inakanhe aguitobyry nhygakely. Saguhoem, kordeiru tyâze, tyaduânse warâ mykâinane kurâdo eynynâ Deus agâ aguewâni modo. Awârâ tientuo mykâinane Deus, inakanhe aguitobyry nhygakely. Arâ lâpylâ ise awâkâ âeni kâtaybyay iguely. Awâkâ iguehobyry wâgâ ise, inakanhe aguitobyry Deus nhygakely.

<sup>30</sup> Auguehobyry enanâguedaungâ: “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ olâ myakâwandy awâkâ yazely yraynâlâ” uguehobyry – kely.

<sup>31-34</sup> Aituo João nhegatyly ânguy Deus Ingonotyby awyly.

– Âdaunlo uguondo wâgâ inakanhe aguitobyry xygakely awyly kâuntuwâbyra wakynre, kordeiru ara inakanhe aguitobyry epywaze tyâzeim. “Kurâdo parugue batiza iekâ” nyguelâ Deus. “Yspiritury uguondo onwa âewyly ese âmâ. Mâkâ ise Yspiritury xuduim, ânguy ynynonro awyly tienehon-hoem, iwerâ wâne enra kurâdo batiza mânhedily, ânguy ynynonro awyly âzehohoem myara” nygue Deus, ânguy Ingonotyby awyly kâuntuhom. Deus aguehobyry ara, Deus Spiritury kaynâpa xytâgyly kâendyly papaem Jesus onwa. Aituo lelâlâ ânguy Messias, Deus Ingonotyby awyly kâuntuly. Messias âewyly iray on-honi modo parugue batiza iedyly mawânâ iewanu, ânguy mâkâ awyly israelita domodo nhutuhom. Awylygyue “Deus imery awâkâ Jesus” uguely – kely João.

### *Jesus tynynonroem André, Simão Pedro warâ iduakehobyry*

<sup>35</sup> Kopaêlâgâem târâlâ João azagâ tynynonro modo agâ.

<sup>36</sup> Jesus sakadyly tientuo, João aguely:

– “Kordeiru Deus Ingonotyby” keholá awâkâ, mâkâ iwâgâ auguehobyrylâ – kely.

<sup>37</sup> Agueduo, akaemo azagâ Jesus nhapygue idâlymo âgânâ.

<sup>38</sup> Aituo Jesus MYK idyly tykayam. Tyampygue idâlymo awyly tientuo, aguely:

– Âdaituoka yampyguedylymo? – kely.

– Konomedâni, âdykâka mâxidâdyly? – kelymo.

<sup>39</sup> Jesus in-hoguly:

– Âetaungâ. Inoro eydâ watoam – kely.

Kogoneyam, quatro horas awârâem, Jesus agâ idâlymo. Nhedylymo âdykâ Jesus âxidâdybem awyly. Eagâlâ iguandylymo.

<sup>40</sup> João Batista eynnonrolâ akaemo azagâ uguondo modo. Jesus aguely tindapygueduo olâ eagâ idâlymo lelâ, iwâgâ tâsenomedâdomoem. Akaemo azagâ uguondo modo ewy André, Simão Pedro iukono, myani mâkâ.

<sup>41</sup> Jesus agâ adâkebygueduo myani André tywaigoru nhuinly, aguely:

– Paigo, Deus Ingonotyby Messias xina netai – kely.

(“Cristo” keze “Messias” kely gregüem.)

<sup>42</sup> Aituo tywaigoru nhadyly Jesusram. Jesus Simão enipryem, aguely:

– Simão izedy, João imery. Iwerâ olâ ise izedy iwelo Cefas – kely.

(Pedro kezêlâ gregüem Cefas kely, “tuhu imâsêdo” kezêlâ.)

*Jesus tynnonroem Filipe, Natanael warâ induakehobyry*

<sup>43</sup> Kopaelâgâem Jesus Galiléia yan-yam tâtâdyze idyly. Tâtâly iraynâ, Filipe agâ oxiodyly; eyam aguely:

– Yagâ âekâ, nynnonroem mitoem – kely.

<sup>44</sup> Betsaida donro myani mâkâ Filipe, André, Pedro warâ ety anano.

<sup>45</sup> Filipe, Natanael agâ agueze idâlly.

– Saguhoenlâ Moisés pape kâzewenry awo wâgâ inweniby Deus Ingonokyly wâgâ aguehobyry xina netai. Deus itaumbry egatuimbyry modo tywenizemo lâpylâ mâkâ âeni wâgâ. Jesuslâ, Deus Ingonotyby, José imery, xidadâ Nazaré donro – kely.

<sup>46</sup> Awârâ tindatuo, Natanael aguely:

– Âdy koendonro lâpeba târâ Nazarédâ! Nazaré donro ewy Messias awyly kâinwântaymbara urâ – kely.

– Âekâ. Egârâ – kely Filipe.

<sup>47</sup> Natanael saindyly tientuo, Jesus aguely tagonro modoram:

– Israelita lelâlâ awâkâ saini. Ânguy enokuni mâkeba awâkâ – kely.

<sup>48</sup> Jesus aguely tindatuo, Natanael, Jesus nhapâiguely:

– Âdaraka utuly? Waunroem kydoxiodylylâma xirâ! – kely.

Aituo Jesus in-hoguly:

– Kâenkyllyemba lelâlâ wâne enra iwague mawyly, Filipe. Âgâsedyly iraylâ olâ enra se figueira iay ekadybem mawyly kâendyly – kely.

<sup>49</sup> Natanael inwauntudyly, aguely:

– Konomedâni, Deus imery âmâ! Israelita domodo iwymâry kehobyry! – kely.

<sup>50</sup> Jesus aguely:

– “Figueira iay enra nhedyly” uguehobyry wâgâ kulâ yeinwândyly! Ago kuru yeinwânse olâ âmâ, awârâ modo takazeno agânhedyly mâentuo – kely.

<sup>51</sup> Aituo idânârâam aguely:

– Kau âzenahunguely-ro waunlo ara ise mâendylymo. Anju domodo yagâ xytâguely, âkuly warâ ese âmaemo, urâ Uguondo Kaynâpa Âetyby agâ. Xirâ mâuntudzemo kuru wato – kely.

## 2

*Jesus Canadá todohogüinday, adyesenry anhetobyry*

<sup>1</sup> Azagâ iguandyly ipygueduo, Canadá todohogüinlybe akâwâm, Galiléia eynynâ. Târâlâ akâwâm Jesus ise, todohogüin-hodâlâ.

<sup>2</sup> Jesus agâ xina idâwâm lâpylâ, igâsedybem tawylygue.

<sup>3</sup> Aituo vinhu adainly, âty nadaimpalâ. Awârâ tiuntuduo Jesus ise eyam aguely:

– Mery, igâsedyby modo sakuihoem vinhu lâpeba – kely.

<sup>4</sup> Jesus aguely:

– Âdaituoka yam amyguely? Iewanu kanguhu oday inkâba awârâ – kely.

<sup>5</sup> Arâ aguepygueduolâ Jesus ise âty sodo emary modoram aguely:

– Ymery aguehobyry arane aitaungâ – kely.

<sup>6</sup> Tâlâ ani âtâdâ seis poty tuhugue xygatyby modo, paru ekanâdo. Oitenta, cem litros warâ mârâ modo nhawâdily. Tâzewenry ara, tâzemaunguehomoem, tywykeba tâitomoem warâ judeu domodo parugue nhumytâguylymo myani mârâ.

<sup>7</sup> Jesus aguely vinhu epâni modoram:

— Xirâ poty modo parugue xumytâdaungâ — kely.

Aituo parugue poty nhumytâdilymo.

<sup>8</sup> Ilâpyryem aguely:

— Xirâ poty odano ewy paru âentywâdaungâ. Sataungâ âty iwymâryam — kely.

Aguehobyry ara aidilymo. Paru nhetylymo, nhadylymo.

<sup>9</sup> Jesus olâ mârâ paru vinhuem ienehonrimbyryem. Aituo âty iwymâry mârâ xuduypy nhekudyly. Ipa, mârâ paru, vinhuem itybyem lelâ. Âdykâ mârâ vinhu nhetylymo awyly nutuba mâkâ. Emary modo olâ mârâ paru poty odano modo vinhuem ietybyem awyly tutuze. Akaemolâ mawânkâ mârâ tânyzeim poty odayba etyim. Aituo âty iwymâry uguondo ohogüinrim ingâsedyly, aguely:

<sup>10</sup> — Kâzewenryem vinhu tâkubâgueim mawânâ waunroem tâpâzeim igâsedyby modoram.

Ize tato ara nhenybygueduomo pylâ eagonro vinhu ewy epâdily-ro warâ. Âmâ olâ vinhu tâkubâgueim mekanâdai; âty adainze idâly ume kulâ pylâ mâempâdily-ro! — kely.

<sup>11</sup> Târâ Canadâ, Galiléia eynynâ, saguhoem kuru adyesenry anhedylylâ ani Jesus Deus eon-honru tienehon-hoem. Xina Jesus eynynonro modo Jesus anhetyby tientuo, einwânâ.

<sup>12</sup> Awârâpygueduo xidadâ Cafarnaumram Jesus idâly. Ise, iukonodo warâ eagâ idâwânmo, xina lâpylâ warâ. Iweâpa xina nipyra ani târâ.

*Jesus ânguydo imeom vende ieni modo Deus ety odayba nhegaseândobyry*

*(Mt 21.12-17; Mc 11.15-19; Lc 19.45-48)*

<sup>13</sup> Âty Pâscoa etyguedo saindily iray Jesus idâly xidadâ Jerusalémram, mârâ âty aitoam, kydamudo Egitodâpa âsemaguehomobyry enanâgueho. Eagâ xina idâwâm.

<sup>14</sup> Deus ety idaseraji egawântybyem kurâ domodo nhedyly. Uguondo modo tapirâ, ovelha, papa, awâkâ modo vende nhedylymo. Tanâseim ani mâkâ modo, xyâhoem, iaduântoem warâ, Deusram egamehoem. Mesa wâgâ ekadyby modo kurâdo idinheruru troca nhedyly, nhedyly lâpylâ. Târâ adyeseim keba anhekilymo.

<sup>15</sup> Aituo kordague xikoty anhedyly. Vende ieni modo Deus etydâba inwenkewâdily, ovelha, tapirâdo warâ agâlâ. Dinheru troca ieni modo iwenzary nhamunedily. Aituo idinherurumo adapâguyly onro wâgâ.

<sup>16</sup> — Tarâpa merâ modo etywâdaungâ — kely papa vende ieni modoram.

— Pabai xyrento xirâ âtâ, âdydo imeom vende ieto, sanâto warâ mâkeba — kely.

<sup>17</sup> Xina Jesus eynynonro modo nhenanâguyly saguhoem Deus itaumbry awo Salmos wâgâ iweniby: “Deus, toenzepa âtâ âyrento ize wawily. Woday peto yaduândily-ro waunlo ara kehoem ity kâinwynedyly. Awârâ ise yiguehoem aienehonrim” warâ iwenibyem awyly.

<sup>18</sup> Jesus anhetyby tientuo myani, pymâdo aguely:

— Âdylâ Deus eon-honrugue amânhedyly tiendyse xina, Deuslâ, Deus keba tarâ amitoem aguenri mawily tiuntuhoem — kelymo.

<sup>19</sup> — Xirâ âtâ mankalagueduomo, azagâ\* emedyly idily ara, saunâtonze urâ — kely Jesus.

<sup>20</sup> — Nuduwâpyra! Quarenta e seis anu samâ xirâ âtâ itâdoem. “Azagâ† emedyly ara saunâtonze urâ” myguyly. Mygüewâdily kulâ! — kelymo.

<sup>21</sup> Deus ety wâgâ wâne Jesus aguely, tywâgâlâ olâ aguely lâpylâ.

<sup>22</sup> Igueypyem, kurâem itonduo, Deus ety azagâ emedyly ara tiaunâdily wâgâ aguehobyry xina enanâgüewâm. Tienanâgueduo, âkealâ Jesus aguehobyry awyly xina nhutuly, Deus itaumbry awo wâgâ iweniby âkealâ awyly lâpylâ warâ.

*Idânârâ kyangahu oday kunâry tutuze lelâ Jesus*

<sup>23</sup> Pâscoa etygueday Jesus Jerusalêmdâ awyly ume, toenzepa kurâdo Jesus nheinwândily, Deus Ingonotyby Messiaslâ awyly, adyesenry modo kehoem anhedyly tientuom.

<sup>24</sup> Jesus olâ kurâdo neinwâmpyra, koendâ kehoem akaemo âdaunloem awyly tutuze tawilygue; tutuze agui akaemo ewy tyizepa awyly.

<sup>25</sup> Idânârâ kurâdo tutuze lelâ Jesus ânguy eyam negatubalâ. Idânârâ tyangahu oday xunâgomo tutuze, ânguy eyam aguepalâ.

### 3

*Nicodemos Jesus agâ agueze idâhobyry*

\* 2:19 Nota de pé Mateus 12.40dâ egâ. † 2:20 Nota de pé Mateus 12.40dâ egâ.

<sup>1</sup> Tâlâ myakâwâm uguondo Nicodemosgue tâzekeim. Fariseu myakâwâm mâkâ, judeu domodo iwymâry.

<sup>2</sup> Kopae idâly Jesus agâ agueze.

– Tutuze xina, konomedâni mawlyly, Deus ingonotyby. Agâpa Deus watay, adyesenry kehoem amânhetaymba tâise âmâ – kely.

<sup>3</sup> Jesus aguely:

– Azeompyra kulâ, Deusgue tywymâguneba âmâ. Arâ lelâ mawânâ Deus xurâem tâjidyly. Xirâ mâuntudyze kuru wato – kely.

<sup>4</sup> – Awâ! Ânguy xutuybyem itybyem niazeontaymba! Nuduwâpyra kyze idâhu odaxi kydodopâdoem, kyazeontoem – kely Nicodemos.

<sup>5</sup> Jesus aguely:

– Deus Ispirturyam iweloem kydâiehoba, parugue kyazeontaymba kurâ warâ watay, Deusgue tywymâguneba. Xirâ mâuntudyze kuru wato.

<sup>6</sup> Kyze idâhu odayba kâgaseduo, kurâenlâ kyazely. Awârâ keba olâ Deus einwânni modo Deus xurâem ienehoim, Deus Ispirturylâ iweloem kyenehoim.

<sup>7</sup> Awylygue tâseguâdâzeba ikâ, “Azeontaungâ” uguelygue.

<sup>8</sup> Sapezenru igâky tydase, ponwary, se iwatary warâ nhekânily tâense warâ âmaemo, sapezenru kuru olâ mâempyra âmaemo. Arâ lâpylâ Deus Ispirtury, Deus einwântaynrim modo wâgâ aidyly mâempyra mawlylmo; aitobyry modo lelâ mâenkylymo – kely.

<sup>9</sup> Nicodemos aguely:

– Kâuntuba lelâ aze. Âdara kuruka amyguehobyry aidyly, Deus Ispirturygue xina iazeondyly? – kely.

<sup>10</sup> Jesus in-hoguly:

– Kâzewenry enomedâni âmâ, awârâ olâ mâuntuba âmâ!

<sup>11</sup> Idakâ. Tiuntuybylâ xina Deus eynynonro âyanmo agueho, tentybylâ xina âyanmo nhegatyly warâ. Arâlâ olâ xina agueho mâinwâmpyra mawlylmo.

<sup>12</sup> Xirâ onro anano wâgâ augueduo mâinwâmpyra âmaemo, Deus wâgâ augueduo lakuru ise mâinwâmpyra kuru mawlylmo.

<sup>13</sup> Ânguy xirâ anano kulâ Deus ezaxi nâkuwâbyra, iwâgâ egatuze nodopâbyra warâ. Urâ, Uguondo Kaynâpa Âetyby lelâ târâpa xytâgyby. Urâ lelâ Deus wâgâ aguenriem xurutyby – kely Jesus.

<sup>14</sup> Aituo aguely:

– Enanâguegâ, saguhoem kydamudo Deus einwântânry modo âji âdy peba ato einkâ adakobâday, âgâuram sâtobyry. Deus, Moisés âgâu bronzegueto anheoem, se wâgâ nhaunâtoem warâ aguewâm, mâkâ âgâuram MYK ityby modo kua itoem. Mâkâ âgâu bronzegueto saunâtoebyry ara, arâ lâpylâ ise urâ, Uguondo Kaynâpa Âetyby keho, se wâgâ kadaunâhonly,

<sup>15</sup> idânârâ yeinwântaynrim modo, aunloenlâ Deus agâ itomoem.

<sup>16</sup> Idânârâ Deus kywynedyly. Awylygue urâ tymery tokaleom ugonodyly. Idânârâ yeinwântaynrim modo eyam âzemaakeoze. Deus agâpa tyetunebamo ise, aunlolâ ise eagâ awylymo.

<sup>17</sup> Deus ugonodyly, xirâ anano modo igueduo tienagazedoem inkâba, idânârâ yeinwântaynrim modo tienmakehoem.

<sup>18</sup> – Urâ Deus imery yeinwântaynrim modo âji tâdâsenagazedoam nâtâwâbyramo ise. Yeinwântânry modo olâ idâze mârâ âji tâdâsenagazedoam, urâ Deus imery tokaleom yeinwâmpyra atomobyry wâgâ, aunloenlâ Deus agâpa ietomoem.

<sup>19</sup> Iajinu MAH nheto ara xirâ anaym Deus wâgâ koendonro segatu, urâ Deus imery; Deus xurâ keba modo olâ Deus izepa ato adiendyllylâ ize atomo, awylygue yizepa awylymo. Iamu duay adakobâni aramo kulâ, iajinu oday adakobâni ara inkâba. Awârâ mawânâ yeinwântânry modo aunloenlâ âsenagazedomoem egamehonrimo.

<sup>20</sup> Inakai aieni modo yizemo inkâba; ydâpa tâwiensemo lelâ. Yam idâlymo-ro watay, inakai anhekylymo tâdutuoze tâise. Inakanhe adâidyly timodyzebamo tawylygue, adienkyly nhoendylymo, ânguy nutuba itoem.

<sup>21</sup> Deus ize ato aieni modo olâ wopaji tainsemo. Iajinu aguienkyly nhesagon-ho ara, idânârâam koendâ anhekylymo âzeholy, Deuslâ anhetomoem eon-honrumo xuduim awyly nhutulymo warâ – kely.

*Jesus wâgâ João Batista aguehobyry*

<sup>22</sup> Awârâpygueduo, Judéia einkâ Jesus adakobâdyly. Eagâlâ xina idâly. Iweâpadobe târâ xina awyly, inakanhe adâitobyry wâgâ âjityeni modo, adâidyly timodyzedo modo warâ parugue batiza âiehoday.

<sup>23</sup> João lâpylâ Enomdâ parugue batiza nhetaynlymo, Salim iwaguepa, târâ toenzepa paru awylygue. Toenzepa myani kurâdo idâly eyam batiza âiehoze.

<sup>24</sup> (Tâdadâzeba João ilâem.)

<sup>25</sup> Judeu agâ João eynynonro modo ewy âjihoguly. Deus enanaym âdara tywykeba tâjidyly wâgâ aguelymo.

<sup>26</sup> João eynynonro modo eyam agueze idâly.

— Tânanâgueze âmâ mâkâ uguondo paru Jordão kuynâ agonropyry, iwâgâ amyguehobyry. Toenzepa kurâdo eyam idâly batiza âiehoze, âyam âeni modo takaze — kelymo.

<sup>27</sup> João aguely:

— Tuomare urâ, kurâdo eyam idâlygue. Deuslâ awârâ aienehonrim.

<sup>28</sup> Auguely midadâmolâ: “Messias mâkeba urâ” ugue. Iraynâlâ olâ kâjigonoholy, sainto koendâ konhontoem.

<sup>29</sup> Todohogüinday, uguondo ohogüinrim xurâ mawânkâ pekodo. Eataen-ho tuomazeze lâpylâ olâ, ohogüinrim ohomaenduo. Arâ lâpylâ kohomaendily, toenzepa kurâ domodo Jesus nheinwândily kâuntuduo. Mâkâ mawânkâ Messias, urâ keba.

<sup>30</sup> Agui Jesus aguely idase idâlymo ize wato, auguely idase âewlyymo mâkeba — kely João.

*Deus eydâpa âetyby awâkâ Jesus*

<sup>31</sup> Deus eydâ atodâlâ Messias âewlyy. Idânârâ duay tynrenseim awâkâ Messias. Xirâ onro anano kulâ kurâ, xirâ ananolâ kiuntuly. Kydâ iwaguepa aityby kulâ kiuntuly. Tarâ kientyby, kindatyby warâ kulâ aguykeho. Messias olâ idânârâ duay tynrenseim kuru.

<sup>32</sup> Deus eydâ atodâ tientyby wâgâ, tindatyby wâgâ warâ aguely. Arâlâ olâ, agui aguely einwântânrybe awyly.

<sup>33</sup> Warâ einwânni modo aguely: “Âkeâ lelâlâ ‘Jesus, Deus imery awyly’ Deuslâ mawânkâ ageuim” kelymo.

<sup>34</sup> Deus aguedyse ato, mâkâ Deus ingonotyby agueho, Deus Ispiritury eagâpa nitaymba.

<sup>35</sup> Kunwym Deus toenzepa lelâlâ tymery inwynedyly. Awylygue emaxilâ idânârâ nhuduly. Deuslâ idânârâ aitaynrim modo iwymâryem itoem ageuim.

<sup>36</sup> Awylygue ise, Deus imery einwântaynrim modo Deus agâpa tyseba awylymo. Tyigueduo, Deusram idâzemo, aunloenlâ eagâ tâitomoem. Deus imery einwântânry modo olâ ise, Deus agâ nipyramo. Tyigueduo, âji tâdâsenagazedoam idâzemo, aunloenlâ Deusdâ iwague itomoem.

## 4

*Jesus pekodo Samaria eynynonro agâ aguehobyry*

<sup>1</sup> Jesus nhenomedâdo idani modo aguiom kuru, João aguely idani modo takaze, Jesus agui kurâdo batiza nhenehonly, João batiza nhetyby takaze, kely tydase myani fariseu domodo.

<sup>2</sup> (Jesus keba olâ tâinwânni modo batiza leni, xina eynynonro modo.)

<sup>3</sup> Unâ tywâgâ, João wâgâ warâ tiuntuduo, Jesus Judéia eynynâba idily, Galileiaranlâ odopâdily. Eagâlâ xina idâly.

<sup>4</sup> Samaria einkâ takadyze Jesus. Awylygue tâinkâ xina sakadyly.

<sup>5</sup> Samaria donro xidadâ Sîcar kehoam iwaguepa xina saindily. Mârâ xidadâ iwaguepa, onro saguhoem lelâlâ kydamu Jacó tymery Josêram nhuduyybe târâ.

<sup>6</sup> Mârâ onrodâ paru etyho Jacó nhesaguehoymbybe. Kuotatay awârâem paru etyhoram xina saindily. Toenzepa adakobâdybem tawylygue, Jesus ekozeybyem. Aituo paru etyhodâ ekadyly tokobyzeguehoem.

<sup>7</sup> Târâ awyly ume, pekodo Samaria donro paru etyze idâly; Jesus eyam aguely:

— Parugue yakuigâ wao — kely.

<sup>8</sup> (Târâpa ani xina Jesus eynynonro modo, pyni sanâse xidadâam idâypyem.)

<sup>9</sup> Pekodo aguely:

— Judeu âmâ, samaritana urâ warâ. Ypemugudo, âpemugudo agâ âjizetonro mâkeba; koendâ oxioni keba warâ. Xina adakuihobyry oday, madakuidyzedo mâkeba âmaemo. Awylygue ywalu etary odano ewy mâenyhoem mâenkaduo, kâseguâdâdily — kely pekodo.

Mâkâ pekodo arâ aguely, judeu domodo, samaritano domodo warâ âjizetonro keba awylymogue. Samaria donro modo adakuihobyry oday nadakuiwâbyra judeu domodo.

<sup>10</sup> Aituo Jesus aguely:

— Deus âmâem nhuduly mâuntuly ânguy paru ekani awyly warâ mâuntuly watay, yam paru tâkaze tâise âmâ mâenyhoem. Yam mâenkaduo, âyam tuduze tâise urâ. Mâenyly-ro watay, iweloem tâiehoze tâise âmâ; âgueduo, aunloenlâ Deus agâ mitoem eyam tâtâze tâise âmâ — kely Jesus.

<sup>11</sup> — Tâsanigue xirâ paru etary, etyho peba âmâ-ro warâ. Nuduwâpyra paru iweloem yetoni yam mâunduoem, mârâ aunloenlâ Deus agâ witoem ayenehoim.

<sup>12</sup> Saguhoenlá myakâwândy kydamu Jacó xirâ paru etyho nhesaguehonly. Mâkâ, imeom, eguy modo warâ taunlolâ myakâwândy paru nhenylymo, tâigueuwâsemo olâ. “Mâenyly-ro watay, iweloem tâiehoze tâise âmâ” mygueduo, “Jacó takaze ton-honreim urâ” myguelylâ awârâ – kely pekodo.

<sup>13</sup> Aituo Jesus aguely:

– Tâwâlâ lelâlâ wâne tatuanzeim modo xirâ paru ewy nhenylymo, inepa lâpylâ olâ ise satuandondylymo.

<sup>14</sup> Paru kâunduyppy enywânibryro modo olâ ise natuandombyra. Inatagâdo oze aunlolâ paru egasely myara xirâ paru iwâgâ agueho. Deus agâpa nipyra tyenehonzeno mawânâ kâunduyppy. Iguelymo-ro watay, Deusram idâzemo, aunloenlâ eagâ tâitomoem – kely.

<sup>15</sup> Aituo pekodo aguely:

– Awârâ paru ewy yam âundugâ wao. Arâ ise yatuambyra wawyly. Xirâ paru ese kâetombyra wawyly – kely.

<sup>16</sup> – Oso igâseda. Xarâlâ eagâ odopâgâ-ro warâ – kely Jesus.

<sup>17</sup> – Tusonuneba urâ – kely pekodo.

Jesus aguely:

– Âkealâ, “Tusonuneba urâ” myguely.

<sup>18</sup> Cinco lelâ tusoneimbyry mawyly, tutuze urâ. Iwerâ ohogüimbyem inkâba âmâ uguondo eagâ mato agâ. Âkealâ amyguely – kely Jesus.

<sup>19</sup> Âdaunloem tawyly Jesus agueduo, pekodo âseguâdâdly. Eyam aguely:

– Iweâma tutuze urâ, Deus wâgâ ageuim mawyly.

<sup>20</sup> Xina idamudo Deus nhehoguedyly mykâinane xirâ iwy wâgâ. Âmaemo, judeu domodo olâ “Jerusalémdâ lelâ ehoguedo” tâkeze. Âdaunlo unâka iozeno kuru? – kely.

<sup>21</sup> Aituo Jesus in-hoguly:

– Sainse mârâ Deus einwânni modo kuru âdykâingâlâ nhehoguedo, tarâ xirâ iwy Samaria donro wâgâ kulelâba, Deus ety Jerusalém donrodâ kulelâba warâ ise Deus ehoguedyly.

<sup>22</sup> Âmaemo, Samaria donro modo, Deus ehogueze tâkewâze wâne âmaemo, mâuntuba olâ âmaemo mâkâ kuru. Xina judeu domodo olâ tutuze, tâinwânse warâ. Judeu ewylâ mawânkâ Deus Ingonotyby imakerinmoem.

<sup>23</sup> Sainse mârâ Deus eynynonro modo, Deus ize ato ara kehoem nhehoguedo. Anri awârâ aidyly adaguly-ro warâ. Âdara ioze ehoguedyly awyly xutuen-honze eagâmolâ ise Deus Ispiritury. Deus wâgâ enomedâzemo mâkâ. Awâkâ ioze lelâ ehogueni modo mawânkâ Deus ize ato tohogueniem.

<sup>24</sup> Tâentuneim mâkeba Deus. Tyispirituryenlâ mâkâ ekaduo nhuduly. Deus Ispiriturygue lelâ Deus nhehoguedyly, ize ato ara kehoem, âkealâ adâkehobryro nhenehon-ho ara – kely.

<sup>25</sup> Pekodo aguely:

– Tutuzelâ urâ, âdaralâ Messias, Deus Ingonotyby, saindyly awyly. Âewyly-ro watay, idânârâ kehoem ise Deus wâgâ kiuntudyze ato aguely – kely.

<sup>26</sup> – Urâ agâ tunâgueim, Messiaslâ urâ – kely Jesus.

<sup>27</sup> Mârâ ume kehoem xina odopâdyly, pyni sanânibryrem. Jesus pekodo agâ xunâgu tientuo, tâseguâdâze ani xina. Xina ezewenry keba mawânâ pekodo tiuntudânry agâ tâdunâgu.

– Âdyka merâ agâ ize mato? – xina kepa olâ ani pekodoam.

– Âdaituoka awâkâ pekodo agâ âunâgu? – xina kepa gâlâ Jesusram warâ.

<sup>28</sup> Aituo pekodo idâly, tywalu etary târâlâ nhânly. Xidadâam odopâdyly. Tonlo modoram aguely:

<sup>29</sup> – Paru ese watay, uguondo âdykâ kâentyby keba xiotai. Idânârâ agânhetaymbyro modo wâgâ agueanry olâ. Etaungârâ. Messiaslâ keanra mâkâ – kely.

<sup>30</sup> Aituo agui kurâdo xidadâ odaypa egaselymo. Idâlymo Jesus eydâ atoam.

<sup>31</sup> Pekodo idâpygueduo, xidadâ odano modo saindyly ume, xina aguely Jesusram:

– Anra xina nhanâtyby pyni. Kydâwinduane, Konomedâni – xina kely.

<sup>32</sup> Jesus olâ aguely xinaram:

– Mâenetybymo kâinwâpyra ise urâ. Tâlâ urâ mâenetybymo takaze kehoem, pyni koendonro. Âdy agueho awyly mâuntuba lelâ olâ âmaemo – kely.

<sup>33</sup> Aituo xina aguely:

– Ânguylâ keanra ipyniry nenetai – xina kely.

<sup>34</sup> – Ânguy pyyniry nenetaymba. Mâkâ ugononibryro agânhetoem aguehobryro aiedylylâ pyyniry. Idânârâ ize ato agânhetuo, âdy izetonze inkâba urâ, tuomare lelâ, âwinduatybyen-ro waunlo ara lelâ.

<sup>35</sup> Wamyguelymo inanry: “Quatro nunâ pygueduo kientâdyby kienkaunâdyly lelâ ise” myguelymo. Etaungâ akaemo âeni modo. Trigu ekaunâdo odaxi ityby emyenro akaemo. Iwerâ koendâlâ Deus itaumbry eyanmo egatuhoem; iweâpa tâiseba itaungâ.

<sup>36</sup> – Etânybyry, ekaunânybyry warâ tâzeywaozemo. Koendâ lelâ âzekaunâdyly watay, tohomaenzemo. Arâ lâpylâ, waunroem ywâgâ egatuwânibyry modo, ilâpyryem ywâgâ imâem kuru enomedânibyry modo warâ ohomaendyly ise, aguelymo idani modo yeinwândylygue.

<sup>37</sup> Âkealâ wakehonly: “Mâkâ etâni, eagonro pylâ ekaunâni-ro” kehonly.

<sup>38</sup> Ogonodylymo, ywâgâ mâengatuhoem. Eagonro ewanugue kulâ âgâmylymo, eagonro nhetâdyby kulâ mâenkaunâgylymo waunlo ara. Saguhoenlâ mawânkâ Messias saindyly wâgâ eagonro modo aguwâm. Unâ mâengatulymo idani modo yeinwânsemo, amyguelymo tindadylygue kulâba olâ, saguhoem ywâgâ aguely tindatybymo tiananâgueduomo – kely Jesus.

<sup>39</sup> Samaria eynynonro, âtâ anary Sicar donro modo ewy agui myani Jesus Messiaslâ awyly einwânni modo, “Uguondo âdykâ kêentânry xiota. Idânârâ agânhetaymy modo wâgâ agueanry olâ” pekodo keduo.

<sup>40</sup> Imâem myani Jesus wâgâ tiuntudyze awylymo. Awylygue Jesusram taintuomo, tagâlâ itoem nhekadylymo. Aituo azagâ iguandyly Sicardâ nhakadyly.

<sup>41</sup> Mâkâ lelâlâ aguely tindatuomo, kurâ domodo nheinwândylymo Messiaslâ mâkâ awyly.

<sup>42</sup> Pekodoam aguelymo:

– Mâkâ tâinwânse xina iwerâ, mâengatuyby wâgâ kulelâba olâ, xina lelâlâ nhenomedâdo tindatobyry wâgâ. Tutuze xina, idânârâ tâinwânni modo emakeze âetyby awyly – kelymo.

*Jesus pymâ emaryem tâwaneim imery kua nhetobyry*

<sup>43</sup> Târâ azagâ iguandyly sakanibyryem, Jesus agâ Samaria eynynâba xina egasely. Galiléia yan-yam eagâlâ xina idâlly.

<sup>44</sup> “Deus itaumbry egatuim tâinwântuneba ety anano modoram kuru” kely ani Jesus.

<sup>45</sup> Galileiarum xina saintuo olâ ani tonlo modo koendâ kehoem xina nhedaenkulymo. Jerusalémram tâtâzemo myani, Pâscoa etygueze. Tâensemo myani târâ Jesus anhetaymy modo. Awylygue koendâ nhedaenkulymo.

<sup>46</sup> Aituo mârâ âjidâpa Jesus âxiguely, xidadâ Canánra odopâdondyly, Galiléia eynynonroam, paru vinhuem tienehon-hombryyam. Tâlâ ani Cafarnaumdâ tâjikeim pymâ emary. Toenzepa myani imery ewânu.

<sup>47</sup> “Judeiadâpa Jesus naindâ; Galileiadâ iwerâ” kely tindatuo myani pymâ emary Canánra idâlly Jesus agâ agueze:

– Toenzepa ymery ewânu târâ Cafarnaumdâ. Yagâ wao inoro, kua mânhetoem – kely.

<sup>48</sup> Jesus aguely eyam:

– Adyesenry agânhedyly mâentuomo lelâ yeinwândylymo – kely.

<sup>49</sup> Tâwâneim nhunwym aguely:

– Iguezeseaji enra iegaseday. Iokobagâ inoro, iguely iraynâlâ! – kely.

<sup>50</sup> – Tadahulizeba ikâ. Ityam odopâgâ lelâ. Ipa, âmery kua nitai, niguwâpyra ise – kely Jesus.

Tâwâneim nhunwym Jesus tymery kua ienipyryem awyly nheinwândyly, eydâ iwague awyly umelâ. Aituo odopâdyly tâtyam.

<sup>51</sup> Ânwa oze tâmary modo agâ oxidyly. Aituo aguehonly:

– Âmery niguwâpyra! – kelymo.

<sup>52</sup> Aituo adapâigueolyo:

– Âdara hora awyly umeka keankâ ymery koendâ idyly? – kely.

Aituo in-hogulymo:

– Kopaelâgâ, kogoneyam tokalâ hora awyly umelâ keankâ iaturu inmoly – kelymo.

<sup>53</sup> Aituo iamudo nhunwym mârâ kogonekâlâ Jesus “Âmery kua nitai. Niguwâpyra ise” kehobyry nhenanâguely. Aituo Jesus einwânniem idyly, idânârâ ety odano modo lâpylâ warâ.

<sup>54</sup> Judéia yan-yam tâtâly iraynâ adyesenry aiemâlâ Jesus Canádâ paru vinhuem tyenehonze. Galiléia yan-yam odopâdondybyem, azagâ adyesenry anhedily idyly ani Canádâ, pymâ emary imery kua nhedyly.

## 5

*Jesus uguondo adakobâdânry kua nhetobyry*

<sup>1</sup> Pymâ emary imery kua ienipyryem Jesus idâlly Jerusalémram, âtyam.

<sup>2</sup> Jerusalémdâ, Ovelha Modo Iwyantary keho iwaguepa tâlá mawânâ paru etary. Hebraiku-em, “Betezata” mârâ paru etary ezedy. Cinco lelâ varanda modo, târâ mawânkâ tâwânuneim modo emynru eguetunu warâ.

<sup>3</sup> Mârâ âjiam Jesus idâday, toenzepa tâwânuneim modo onwâgâ awyly: epy modo, nadakobâbyra ityby modo, tywykelâ iazeypy modo warâ. [Paru sahugânyly inwânwândylymo.

<sup>4</sup> Anju Deus ingonotyby mawânkâ mykâinane tytâguyze mârâ paru sahugânize. Anju anhepygueduo mawânkâ tâwânuneim modo ihuguely; paikaji waunroem ihugueybylâ olâ kua ini.]<sup>\*</sup>

<sup>5</sup> Tâlâ ani iduaymo uguondo iweâpa tâwâneim; trinta e oito anu myani mâkâ ewânu; nadakobâbyra awyly.

<sup>6</sup> Eguetudybyem awyly ume Jesus nhedyly. Iweâpa arâ ewânu awyly nhutuly. Aituo eyam aguely:

– Kua midyse âmâ? – kely.

<sup>7</sup> Uguondo in-hoguly:

– Ânguy paikaji yeni peba adahugâniouduo. Iegawândyse wâne urâ, eagonro tâwâneim olâ inanry uwakadâ lelâ – kely.

<sup>8</sup> Jesus aguely eyam:

– Aukâ. XYDYK ikâ. Iguetudobyry sanâkâ. Idâ ityam tadakobâze – kely.

<sup>9</sup> Ilâ umelâ kehoem, uguondo kua idyly Jesus eon-honrugue. Tâguetudobyry nhanâdyly, adakobâdyly. Sábado oday ani awârâ aidyly, kokobyzegueho âdaunloenlâ kydâsewaniho keba ume.

<sup>10</sup> Judeu domodo iwymâry ewy mâkâ uguondo tâguetudobyry nhanâdyly nhedylymo. Awylygue eyam aguelymo:

– Kokobyzegueho iwerâ. Kâzewenry ara inkâba awârâ amidyly, âdy aieto mâkeba iwerâ awârâ iguetudobyry kadadâ – kelymo.

<sup>11</sup> Aituo aguely:

– Uguondo kua yenipyry agueanry: “Iguetudobyry sanâkâ. Idâ ityam tadakobâze” keanry – kely.

<sup>12</sup> – Ânguyka enra arâ amitoem agueim? – kelymo eyam.

<sup>13</sup> Kua tyenipyry ezedy nutuba olâ mâkâ uguondo, tonlo modo duaylâ Jesus idâypyem awylygue.

<sup>14</sup> Ilâpygueduo Jesus kua tientyby nhedyly Deus etydâ. Aguely eyam:

– Auguely wao idakâ. Kua itybyem âmâ. Deus izepa ato kulâne akâiedâ, arâ matobyry takaze kehoem amipyra mitoem – kely.

<sup>15</sup> Jesus aguepygueduolâ mâkâ uguondo târâpa âxiguelly. Kua tyenipyry wâgâ agueze idâly judeu domodo iwymâryam.

<sup>16</sup> Jesus nhewiâsedylymo nhenuagaendylymo warâmo myani, tâzekobyzegueho oday kua nhedyly awylygue. Awylygue eynynâ inakanhe aguelymo:

<sup>17</sup> Jesus aguely eyanmo:

– Kopaêlâgâembaba Pabai âsewanily; ara lâpylâ iewanu kêmpagunâbyra wawyly – kely.

<sup>18</sup> “Pabai uguêho” Jesus keduo, Deuslâ uguêho awyly tutuzemo ani. Awylygue toenzepa iewiâpadylymo, âdara tyânly awyly wâgâ âseinwândylymo, tâzekobyzegueho oday kua nheto-byry wâgâ kulelâba, Deus “Pabai uguêho” kehobyry wâgâ lâpylâ. Arâ adâkeduo, Deus agâ âzekiba tawyly mawânkâ Jesus uguêho.

*Deus imery idânârâ anhedily, Deuslâ anhetuem agueim awylygue*

<sup>19</sup> Jesus aguely:

– Deus imery lelâlâ wâne urâ, won-honrugueba olâ âdydo imeom agânhedyly. Pabailâ agânhetuem agueim. Pabai anhedily kêankyly lelâ agânhekyly. Mâkâ anhekily, adyese urâ, imery wawylygue. Xirâ mâuntudyzemo kuru wato.

<sup>20</sup> Imery wawylygue, toenzepa Pabai ywynedyly. Awylygue idânârâ adienkyly modo nhenehonly. Agânhetyby modo tâense âmaemo. Pabai yam nhenehonly aiese olâ urâ, mârâ iwâkuru kuru. Mârâ agânhetuo, âsewânize lelâlâ âmaemo.

<sup>21</sup> Iguewâtyby modo, kurâem tyetonze Pabai. Turâ xurâ modo aunloenlâ tagâ tyenehonze mâkâ. Pabai anhetu aralâ agânhedyly. Aituo ise aunloenlâ Deus agâ kânhenehonly, mâkâ eagâ kânhenehondyze wato lelâ.

<sup>22</sup> Xypyry etay Pabai mâkeba ise ânguy tâmakezeim, tâmakezenry warâ awyly agueim. Aunloenlâ eagâ ini modo kâinduakehoem, âji tâdâsenagazedoam idâwâni modo kâinduakehoem warâ agueypyenlâ mâkâ.

\* 5:4 Idânârâ livru saguho modo wâgâ iwenibyemba xirâ.



<sup>23</sup> Arâ Pabai agânhetoem aguely, idânârâ yrendylymo mawânkâ ize ato, mâkâ mâynrentomo ara lâpylâ. Yrempyra âmaemo-ro watay, Pabai ugononibyry mâynrentaymba lâpylâ âmaemo – kely.

<sup>24</sup> Jesus aguely:

– Aguely indadyly, ugononibyry nheinwândyly waunlo âdaunloenlâ Deus agâpa tyetuneba ise. Iguely-ro watay, aunloenlâ ise Deus agâ awylymo. Âdalâ âji tâdâsenagazedoam nâtâwâbyramo ise. Xirâ mâuntudyzemo kuru wato.

<sup>25</sup> Idataungâ aguely. Anri adaguly, Deus eynynâbaom modo augueho indato. Deus xurâempa awylymogue, igueypy aramo kulâ. Aguely indadylymo, yeinwândylymo warâ watay olâ, igueypyem, kurâem itondyby aramo ise.

<sup>26</sup> Âdaunloenlâ Deus agâpa tyetunebamo ise, iguely iraynâ, igueduo alelâ, ton-honre mawânkâ Pabai awârâ adientoem. Ynynonro modo Deus agâpa kânhenehomba witoem aguewâm lâpylâ.

<sup>27</sup> “Uguondo Kaynâpa Âetyby mawylygue, aguely âyam, âynynonro modo xurâem koendonro lelâ mâunduhoem; âynynonro keba modo pylâ ise mâenagazenehonly-ro” kewâm.

<sup>28</sup> – Xirâ âyanmo augueho wâgâ tâseguâdâzeba itaungâ. Anri saindyly, idânârâ iguewâtyby modo ytaumbyry indato.

<sup>29</sup> Kurâem itonzemo. Âji tâpyâdomobyrydâpa âzepeyâguezemo, egasezemo-ro warâ. Deus ize ato aienibyry modo aunloenlâ ise Deus agâ awylymo, âdaunloenlâ eagâpa tyeseba itomoem. Deus izepa ato aienibyry modo olâ âzewentâozemo. Âjigonohonzemo âji tâdâsenagazedoam, aunloenlâ târâ itomoem – kely Jesus.

#### *Deus Ingonotyby tawyly wâgâ Jesus aguehobyry*

<sup>30</sup> Jesus aguely:

– Unâry wâgâ kulâ inkâba idânârâ agânhekyly modo agânhedyly. Deus aguehobyrylâ agânhekyly. Yeinwântaynrim modoram koendonro lelâ ise kâunduly; yeinwântâny modo pylâ kâenagazenehonly-ro warâ. Pabai aguehobyry lelâ mawânâ agânhekyly. Ize wato kulâ mâkeba agânhekyly, mâkâ ugononibyry ize atolâ.

<sup>31</sup> – Ywâgâlâ aguely-ro watay, “Deus ingonotyby urâ” ugeduo, aguehobyry âdyem nitaymba, âkealâ keim kepa watay.

<sup>32</sup> Tâlâ yynâ ageim, Deus, Pabai ugueho. Ânguy wawyly tutuze mâkâ. Ywâgâ agueho âkealâ awyly tutuze urâ-ro warâ.

<sup>33</sup> Ânguy wawyly mâuntuhomoem, João Batista tapâiguen-honze ani âmaemo. Âkealâ ani mâkâ ywâgâ aguely.

<sup>34</sup> Ywâgâ aguenriem ânguygue kâtuiwâbyra urâ, ânguyem wawyly mâuntuhomoem. Arâlâ olâ yynâ João aguehobyry âyanmo kâenanâguehonly. Aguehobyry mâinwândylymo, yeinwândylymo-ro warâ watay, âzmakeoze lelâ âmaemo.

<sup>35</sup> – Lamparina koendâ kehoem tyatygueim wâne, kytâho nhesagonly, myara ani João aguehobyry mâuntulymo âdara Deus ezaxi tâdâtâly wâgâ. Mâkâ aguehobyry mâindatuomo omazemo.

<sup>36</sup> Âdiempa mutumo ywâgâ. Iwerâma adyesenry kehoem agânhedyly tâense âmaemo, âkealâ kuru Deus Ingonotyby wawyly mâuntuhomoem. Pabai Deus adyesenry modo kehoem agânhetoem anygue. Mâentuomo, xutuze âmaemo, Ingonotybylâ wawyly.

<sup>37</sup> Pabai ywâgâ adâkeze lâpylâ, mâkâlâ ugononi awylygue. Agueho mâindadyseba olâ âmaemo, nhutuen-honly mâuntudyzebamo warâ. Âdykâ mâkâ itanru mâindapyra, emydy mâempyra warâ olâ âmaemo.

<sup>38</sup> Ywâgâ Pabai aguehobyry mâinwândylymo-ro watay, yeinwântâ tâise âmaemo. Yeinwâmpyra, ywâgâ Pabai agueho mâinwâmpyra warâ olâ âmaemo.

<sup>39</sup> Âdara mâsemaguelymo awyly mâuntudyze mawylymogue, Deus itaumbyry awo wâgâ iweniby mâintainlymo. Mâsenomedâdylymo, âdara aunloenlâ Deus agâ tâjidyly kyigueduo awyly mâuntuhomoem wâne. Iweniby modolâ ywâgâ âkealâ ageim, ywâgâ lelâ mawânâ Deus eydâ atoam tâdâtâly.

<sup>40</sup> Aralâ olâ, yeinwândylyseba mawylymo, aunloenlâ Deus agâ mitomoem.

<sup>41</sup> – Koendâ wawyly wâgâ, won-honru wâgâ warâ kurâdo aguepa awylygue kâseguâdâdaymba urâ.

<sup>42</sup> Koendâ âutudâmo urâ, anghumo oday âunârymo alelâ. Deus izetonro ara midylymo kulâ awyly, tutuze urâ.

<sup>43</sup> Pabai ugueho ingonotybyenlâ xirâ kâewyly, yizepa, yeinwândylyseba warâ olâ âmaemo. Pabai ingonotybyemba âeni watay olâ âmaemo tâinwânse.

<sup>44</sup> Ataen-homo âwâgâmo koendâ aguely ize matomo. Deus tokaleom âwâgâmo koendâ aguehoem, koendâ lelâ amidylimo mipyra olâ âmaemo. Awylygue mawânâ nudupa awyly yeinwântomoem.

<sup>45</sup> Kâzewenry Moisés inwenihoem Deus aguehobyry mâinwânkylimo. Awylygue, “Aunloenlâ Deus agâ tâitoem idâze xina” myguelymo. Xypyry etay, idânârâ kurâ domodo Pabai enado âepanâgueduo, urâ keba ise agueim, Moiséslâ ise agueim: “Deus neinwâmpyra atomobyry wâgâ asaemo ise tâwentâzeim” kerim.

<sup>46</sup> Ywâgâlâ myakâwândy Moisés inwenily urâ Deus Ingonotyby wâgâ. Moisés inweniby tâinwânse lelâlâ âmaemo-ro watay, yeinwântâ lâpylâ tâise âmaemo.

<sup>47</sup> Inweniby mâinwâmpyra mawylmogoue, augueho mâinwâmpyra mawylimo – kely Jesus.

## 6

*Jesus cinco mil uguondo modo cinco pão, azagâ kanra âjihuyby warâgue nhuantobyry (Mt 14.13-21; Mc 6.30-44; Lc 9.10-17)*

<sup>1</sup> Arâ agueypyem, Jesus Galiléia iwalu nhekuâdily pepi oday; Tiberíades kelygue tâzekeim lâpylâ mârâ paru. Eagâlâ ani xina.

<sup>2</sup> Târâ Jesus awyly tiuntuduomo, agui kurâ domodo myarâ idâly, toenzepa tâwânuneim modo kua nhedyly tientomobyry wâgâ. Adyesenry anhedily tientondyze tawylmogoue, nhapygue idâlymo.

<sup>3</sup> Jesus âkuly iwiy onwa xina agâ. Târâ xina ekadyly.

<sup>4</sup> Páscoa etyguedo iwaguepa idyly ani.

<sup>5</sup> Jesus wayam wayam warâ MYK idyly. Tyampygue toenzepa kurâ domodo iwiy onwa âkuly nhedyly. Aituo Filiperam aguely:

– Âdykâ kaise pyni kianâdily merâ kurâ domodo ipyniryem? – kely.

<sup>6</sup> Kurâdo tuantoem âdy adienkyly awyly tutuzelâ olâ myani Jesus-ro warâ. Âdara Filipe in-hoguly awyly tiuntuhoem kulâ arâ aguely.

<sup>7</sup> Aituo Filipe in-hoguly:

– Duzentas moedas pratagueto tainze tâise kurâ, pyni sanâtoem, mâkâem, mâkâem warâ pão epajiwâdoem, tydinheruguepa kurâ – kely.

(Tokalâ iguandyly âwanopyry epywado mawânâ tokalâ moeda pratagueto.)

<sup>8</sup> Aituo Simão Pedro iukono André idâly Jesus agâ agueze.

<sup>9</sup> – Tâlâ tarâ iamudo cinco pão cevadagueto, azagâ kanra âjihuyby warâpeom. Nudupa olâ ise toenzepa kurâ domodo xuatoem – kely.

<sup>10</sup> Aituo aguely Jesus xinaram:

– Âji iwâkurudâ ekadomoem aguewâtaungâ – kely.

Poji wâgâ ekadomoem âji iwâkurube ani târâ. Aituo idânârâ ekadaynlymo. Toenzepa târâ kurâdo awyly, uguondo modo kulelâ cinco mil lelâ.

<sup>11</sup> Aituo Jesus cinco pão sanânibyryem, Deus agâ aguely:

– Koendonro lelâlâ âmâ, Pabai; awylygue xinaem xirâ pão mâunduly – kely.

Arâ agueypyem, pão nhepajiwâdily; xina nhepâdoem nhuduly. Xina nhepâdaynly umelâ kehoem Jesus pão epajiwâdyby agui nhenehonly. Ilâpygueduo, Jesus azagâ kanra âjihuyby nhanâdily, Deus agâ aguely:

– Koendonro lelâlâ âmâ, Pabai; awylygue xinaem merâ kanra mâunduly – kely.

Arâ agueypyem, kanra nhepajiwâdily, xina nhepâdoem nhuduly. Xina nhepâdaynly umelâ kehoem, kanra agui nhenehonly.

<sup>12</sup> Ize tato ara kehoem idânârâ kurâdo âwinduadyly. Kanra âjihuyby nhâdilymo; pão nhedawynlymo; koendâ kehoem iolataynlymo warâ. Koendâ kehoem âwinduapygueduomo, xinaram aguely:

– Âsegubydâdyby modo saunkuwâdaungâ, nâxiumebyra itoem – kely.

<sup>13</sup> Ilâpyryem pão, kanra âjihuyby warâ âsegubydâdyby xina nhetadâdily. Doze cestu tumyke lelâ xina nhekanâdily.

<sup>14</sup> Awârâ adyesenry Jesus anhedily enipyry modo aguelymo:

– Âkealâ mynra, Deus itaumbry egatuim kinwânwânkylilâ mynra merâ. Roma donro takaze kehoem merâ kywymâryem kyjiene! – kelymo.

<sup>15</sup> Tywymâryem tyese kelymo tiuntuduo, mâkâ kulelâ târâpa âxiguely, eagonro âjiam idâly. Pymâ onro anano keba tawyly, tutuze mawânkâ.

*Jesus paru wâgâ adakobâdobyry (Mt 14.22-33; Mc 6.45-52)*

<sup>16</sup> Iguandyly ume, târâ Jesus cinco pão, azagâ kanra warâgue kurâ domodo nhuantobyrydâpa xina xytâguyly. Galiléia iwaluam xina idâly.

<sup>17</sup> Jesus xina agâ nãepyra. Pepi odaxi xina âxiedyly, paru tienkuâdoem, xidadâ Cafarnaumram tâtâhoem. Xina idâzesedyly umelâ, iamadyly.

<sup>18</sup> Tahuleim kulâ adapezeinly ton-honre kehoem xina yan-yam; toenzepa kehoem paru adahugânily.

<sup>19</sup> Sagunudâpa âxiguebybem, cinco, seis kilômetros awârâem xina awyly ume, paru wâgâ Jesus adakobâdyly xina nhedyly. Xina iwepiry iwaguepa saindyly. Jesus paru wâgâ adakobâdyly tientuo, toenzepa xina âseanedyly.

<sup>20</sup> Warâ olâ Jesus aguely xinaram:

– Tãseanezeba itaungâ! Jesuslâ urâ! – kely.

<sup>21</sup> Aituo Jesus pepi odaji âxiedyly. Toenzepa xina iomazely, mâkâ tagâ awylygue. Inepa xina saindyly eyam tâtâhoam.

*Kurâdo Jesus nhuin-hobyry*

<sup>22</sup> Emetybybem, Jesus tuizemo myakâwâm târâ paru emelay, xina pepi odaxi âxiedobyrydâ.

– Âdykâ Jesus? – kelymo.

– Tokalâ kulâ keankâ pepi taunlo. Jesus olâ keankâ iodaxi nâxiebyra. Eynynonro modo lelâ keankâ âxieni. Mâkâ pebalâ keankâ idâlymo. Iwerâ olâ tarâpa – kelymo.

<sup>23</sup> Aguelymo ume, xidadâ Tiberiadesdâpa âetyby modo paru nhekuâdylymo. Tywepiry odaypa âzetywâdylymo, Jesus kurâ domodo tuantoem, “Koendonro lelââ âmâ, awylygue xina ipyniry mâunduly” kehobyry iwaguepa. Xuize idâwânmomy, nepyramo olâ myakâwâm.

<sup>24</sup> Jesus, xinalâ warâ târâpa awyly tientuomo, Tiberiadesdâpa âetaymy modo tywepiry odaji âxiedaynlymo, paru tienkuâdoem. Cafarnaum iduantaji saintybybem xuize idâlymo.

*Jesus ize kydawyly, pyni kyiguepa kitoem ize kydato ara*

<sup>25</sup> Paru ekuânibyryem, Cafarnaumram saintybybem, Jesus agâ oxiodylymo. Eyam aguelymo:

– Âmâ enra xina nhuinly, Jesus. Âdaraka xarâ aindyly? – kelymo.

<sup>26</sup> – Kopaelâgâ pãogue âwatombory wâgâ kulâ uilymo, âdaituo adyesenry modo kehoem agânhedyly awyly mâuntuhomoem inkâba. Pão agui kânhenehonly medâmo lelââ wâne, adâituo agânhedyly awyly mâuntuba olâ âmaemo.

<sup>27</sup> Pyni inepa adainrim, inakanhe ini warâ wâgâ inkâba âpaunzedaugâ. Tâlâ ise pyni emyenro âmaemoem, âdaunloenlâ inakanhe itânry. Emakewâni modo aunloenlâ Deus agâpa tyetuneba ise. Igueduo, aunloenlâ eagâ tâitoem eyam idâzemo. Âzeon-hondâdaungâ, xirâ augueho tâlâ mitomoem. Urâ, Uguondo Kaynâpa Âetyby kelygue tâzekeim, xuduze urâ âyanmo, yeinwândylymo-ro watay. Awârâ agânhetoem kêewyly awyly nutuen-ho Pabai Deus – kely Jesus.

<sup>28</sup> Aituo Jesus nhapâiguelymo:

– Âdyka Deus xina anhedyse ato awârâ amyguehobyry xina nhemakehoem, awârâ pyni emyenro? – kelymo.

<sup>29</sup> Aituo Jesus in-hoguly:

– Âdaunlo âwanu mâkeba ise amânhekylymo. Yeinwândylymo kulâ Deus ize ato, urâ mâkâ ingonotyby – kely.

<sup>30</sup> – Adyesenry pylâ aiekâ, Messiaslâ mawyly, xina nheinwântoem. Âdyka ise amânhekyly, Deus Ingonotyby mawyly mâenehon-hoem?

<sup>31</sup> Iweâpa kydamudo Egîtodâba egaseday, âji âdy peba ato einkâ adakobâdaymo, manâ myakâwândy ipyniry. Iwenibyem Deus itaumbry awo wâgâ: “Pão kaynâpa eyanmo ingonokyly nhedawyn-homoem” – kelymo Jesusram.

<sup>32</sup> Aituo Jesus aguely:

– Kaynâpa Deus ingonotyby manâ kehogue, kydamudo tuamâmy Moisés. Pabai Deus lelâ mawânkâ pyni kuolanâni emyenro xudunri. Xirâ mâuntudyzemo kuru wato.

<sup>33</sup> Deus, kydamudo tâwindygue niguepa itoem manâ kau odaypa tingonotobyry, ara lâpylâ mâkâ ugonodyly xarâ onro anaxi. Pyni ize kurâ kyiguepa kitoem, arâ lâpylâ yeinwântaungâ, aunloenlâ Deus agâ mitomoem, âdaunloenlâ eagâpa mipyra mitomoem – kely.

<sup>34</sup> – Pymâ, aunlolâ awârâ amygueho xinaram xudugâ, awârâ pyni mygueho – kelymo.

<sup>35</sup> – Urâlâ mawânâ mârâ pyni emyenro. Urâlâ ise yeinwânni modo aunloenlâ Deus agâ ienehonri, eagâpa ienehondânry warâ. Ynynonro modo nãsewinzedondaymba natuandondaymba warâ ise.

<sup>36</sup> Deus eon-honrugue agânhelyly mâendylymo umelâ olâ auguehobyry mâinwândyseba mawylymo.

<sup>37</sup> Idânârâ yeinwânniem Pabai ize ato modo, urâ xurâ lelâ. “Yam âetaungâ, aunloenlâ yagâ mitomoem” warâ aguely yeinwândysedo modoram. Yam âetaymby modo âdaunloenlâ izepa witaymba urâ.

<sup>38</sup> — Deusdâpa ani kêewyly, ize ato agânhetoem, ize wato aiese inkâba.

<sup>39</sup> Pabai koendâ yeinwântaynrim modo kêendyse awyly. Ynynonro modo tydâpa iedyly ize inkâba mâkâ. Xypyry etay, ynynonro modo kurâem kânhetondyze mâkâ, aunloenlâ eagâ itomoem.

<sup>40</sup> Pabai ize ato mawânâ idânârâ tymery einwânni modo, aunloenlâ eagâ awyly, eagâpa nipyra. Aguehobyry awylygue ise xypyry etay kurâem kânhetondylymo — kely Jesus.

<sup>41</sup> Judeu domodo ewy nehoguebyra Jesus tywâgâlâ aguely: “Urâlâ Deus tydâpa ingonotyby pyni emyenro” kehobyry.

<sup>42</sup> Aituo aguelymo:

— José imery kulâ awâkâ Jesus. Nhunwym, ise warâ tutuze kurâ. Alâ “Deusdâpa kêewyly” kely. Kewâdyly kulâ awâkâ. Nuduwâpyra awâkâ Deusdâpa âetoem! — kelymo.

<sup>43</sup> Jesus aguely eyanmo:

— Inakanhe kulâ amyguelymo imowâdaungâ.

<sup>44</sup> Âwâlâ kulâ ânguy yeinwântaymba, Pabai ugononibyry yeinwântomoem aniempyry watay. Pabai ugononibyry mawânkâ kurâdo yeinwântoem aienehoim. Xypyry etay olâ kurâem itondomoem aienehonze urâ.

<sup>45</sup> Saguhoem Deus itaumbryr aguewâni modo ewy warâ akâwândy inwenily: “Idânârâ ise Deusram âzenomedâolyo, âdara einwândyly awyly wâgâ.” Idânârâ Pabai nhenomedâdo idani modo, tyangahu odaji ieni modo warâ yeinwânsemo.

<sup>46</sup> Ânguy xirâ anano modo Pabai ugueho netaymba. Urâ lelâ mâkâ eni. Eydâlâma kêewyly.

<sup>47</sup> — Idataungâ aguely. Yeinwântaynrim modo Deus agâpa nitaymbamo ise. Igueduo, Deusram idâzemo, aunloenlâ eagâ itomoem.

<sup>48</sup> Pyni emyenro urâ. Urâlâ ise yeinwântaynrim modo aunloenlâ Deus agâ ienehoim.

<sup>49</sup> Âji âdy peba ato einkâ takobâdyly ume manâ myakâwândy kydamudo ipyniry. Manâgue âduahonwânmo lelâlâ wâne, iguewânmo olâ.

<sup>50</sup> Deusdâ âetyby einwânni modo, iguezemo lelâlâ wâne, nadaimpamo olâ ise. Idâzemo aunloenlâ Deus agâ tâitomoem. Pyni emyenro mawânkâ Deus Ingonotyby.

<sup>51</sup> Pyni emyenrolâ urâ on-hondâzemo Deus ingonotyby. Yeinwântaynrim modo Deus agâpa tyetuneba ise. Iguelymo-ro watay, idâzemo Deusram, aunloenlâ eagâ tâitomoem. Yiguely ise, ynynonro modo aunloenlâ Deus agâ itomoem. Ynynonro modo eonhondâniem, wodo pylâ ipynirymoro-ro waunlo ara ise — kely Jesus.

<sup>52</sup> Aituo idanipyry modo âjigüe aguelymo:

— Kypyniryem nitaymba ise awâkâ sodo! — kelymo.

<sup>53</sup> Jesus aguely eyanmo:

— Wodo mâmpyra âmaemo, unu mâenypa âmaemo warâ-ro watay, aunloenlâ Deus agâ mitaymba ise âmaemo.

<sup>54</sup> Wodo sâni, unu enyim warâ olâ aunloenlâ ise Deus agâ awylymo, eagâpa tyesebamo. Xypyry etay ise kurâem âiehondylymo-ro warâ. Xirâ mâuntudyzemo kuru wato — kely.

<sup>55</sup> Jesus aguely:

— Pyni lelâlâ wodo, tânyzeim lelâlâ unu warâ.

<sup>56</sup> Wodo sâni, unu enyim warâ watay, aunloenlâ ise yagâ awyly. Eagâlâ ise urâ; yagâlâ ise warâ.

<sup>57</sup> Pabai ugononibyry igueypyem inkâba; aunlolâ mâkâ tâlâ awyly. Eagâ wawylygue, kadainwâpyra ise urâ; tâlâ lelâ. Wodo sâni modo lâpylâ yagâpa nipyramo, nadainwâpyramo warâ ise, tâlâ lelâ. Iguelymo-ro watay, eydâ watoam idâzemo, aunloenlâ yagâ tâitomoem.

<sup>58</sup> Waunlo urâ pyni emyenro Deus eydâ atodâ igonotyby. Kydamudo ipynirybyry manâ emyenro keba urâ. Manâ tânzemo lelâlâ wâne myakâwândy kydamudo, iguewâm olâ. Deus ezaypa xytâgybylâ urâ. Wodo sâni, unu enyim warâ yagâpa nâiehowâbyramo ise. Tyigueduo, idâzemo aunloenlâ Deus agâ tâitomoem — kely Jesus.

<sup>59</sup> Cafarnaumdâ Jesus xirâ modo aguely, âtâ tâdâtâdygyho oday tienomedâdylymo ume.

*Jesus mawânkâ aunlolâ Deus agâ kyenehoim*

<sup>60</sup> Awârâ tindatuo, Jesus nhapygueni modo ewy aguelymo:

— Arâ agueduo kiuntuwâbyra kurâ âdakeze aguely awyly. Kleinwântoem nuduwâpyra awârâ! — kelymo.

<sup>61</sup> Akaemo agueho ânguy negatuba lelâlâ wâne Jesusram, tonomedâdomo izepa awylymo tutuze olâ Jesus. Awylygue eyanmo aguely:

— Iwerâ yeinwântaymba âmaemo, augueho mâindadyseba midylymo warâ.

<sup>62</sup> Âdaise wânkâ âmaemo, eydâ watobyryanlâ kâkuly mâentuomo?

<sup>63</sup> Deus Ispirityu wâgâ mawânkâ ynyonro modo yeinwândylymo, âdalâ yagâpa nâiehoba taitomoem. Igeduemo, Deus ezaxi idâze awylymo tutuen-honze Deus Ispirityu. Ânguy tâwâlâ kulâ âsemageim lâpeba; ânguy tâwâlâ anientaymba Deus eydâ atoam tâtâhoem. Auguehobyry einwânni, aieni modo warâ agâlâ mawânkâ Deus Ispirityu. Deus Ispirityu agueduo lelâ akaemo âzemaakeoly, aunloenlâ Deus agâ taitoem tyigueduo.

<sup>64</sup> Alâ olâ âmaemo ewy yeinwâmpyra mawylymo – kely.

Tâinwâmpyramo awyly wâgâ Jesus aguewâm, tutuzelâ mawânkâ akaemo ewy tâinwâmpyra awyly. Ânguy tâgameim awyly xutuwâm lâpylâ.

<sup>65</sup> Jesus aguely:

– Âmaemo idânârâ inkâba yeinwândylymo. Awylygue âyanmo auguely. Pabai, yeinwântoem aguehobyry modo lelâ yeinwânni – kely.

<sup>66</sup> Awârâ tindatuo, Jesus aguely idase nhapygueni modo ewy agui eagâpa tâisemo ani.

<sup>67</sup> Aituo Jesus xina nhapâiguely:

– Âmaemo-ro? Mydâdyse lâpylâ âmaemo? – kely.

<sup>68</sup> Simão Pedro in-hoguly:

– Agâpa tâidyse inkâba xina, Jesus. Âmâ lelâ âdara aunloenlâ Deus agâ xina idyly awyly wâgâ enomedâni, âdalâ eagâpa xina nipyra itoem.

<sup>69</sup> Âmâ lelâ xina nheinwânkily. Deus Ingonotyby mawyly, tutuze xina – kely.

<sup>70</sup> Jesus aguely:

– Kâinduakeyby âmaemo, doze lelâ. Tokalâ âmaemo ewy olâ Diabu emary – kely.

<sup>71</sup> Judas wâgâ Jesus aguely, Simão Queriote donro imery. Jesus eynonro lelâlâ wâne Judas, arâlâ olâ izeparro modo emaxi Jesus nhagamely nhâhomoem.

## 7

### *Jesus, iukonodo warâ*

<sup>1</sup> Arâ adâkely ewanikeimbyryem, Galiléia eynynâ Jesus adakobâdyly. Judéia eynynâ nadakobâbyra awyly, tonlo pymâ domodo mawânkâ tyândyse.

<sup>2</sup> Âty Âtâ Wakurigueto etyguedo iwaguepa ani, kydamudo âji âdy peba ato einkâ adakobâdaymo, âtâ wakurigueto oday kulâ xykyhomobyry enanâgueho.

<sup>3</sup> Aituo Jesus iukonodo eyam aguelymo:

– Tarâpa ikâ. Judeiaram idâ, xidadâ Jerusalémram, Judeiadâ matay ampyguenibyry modo amânhekily nhetomoem.

<sup>4</sup> Mâkâ kurâ tâdutuodyze donro, adienkily noentaymba, kurâ domodoram tâzehohoem. Aunlolâ inanry adyesenry kehoem amânhedily; kurâ domodo enanaym pylâ aiekâ – kelymo.

Âwankuem tiendylymogue kulâ, arâ aguelymo.

<sup>5</sup> Iukonodo lelâlâ wâne, Jesus Messiaslâ awyly neinwâmpyramo olâ.

<sup>6</sup> Jesus aguely:

– Âtyam udâho oday inkâba awârâ. Âmaemo olâ âdalâ mydâlymo.

<sup>7</sup> Yeinwântânry modo âizemo lelâ, urâ olâ yizepam. Anhekylymo inakai wâgâ augue-lygue, yizepa awylymo.

<sup>8</sup> Âmaemolâ âtyam idâwâtaungâ. “Idâ” mygueduemo kulâ inkâba ise âtyam udâly; Pabai ugonotuo ise udâly – kely.

<sup>9</sup> Arâ adâkebygueduo, Galileiadâlâ wao Jesus iweâpa kuba olâ târâ awyly.

### *Jesus âtâ wakurigueto etyryam idâhobyry*

<sup>10</sup> Âtyam tukonodo idâpygueduo, Jesus idâwâm lâpylâ. Tutuzabalâ idâly, kurâdo nutubalâ.

<sup>11</sup> Judeu domodo iwymâry âtydâ nhuinlymo. Tonlo modo nhapâiguelymo:

– Âdykâ Jesus? – kelymo.

<sup>12</sup> Toenzepa iwâgâ aguewâni modo. Aguelymo:

– Koendonro lelâlâ mâkâ – keim.

Tâlâ,

– Koendonro mâkeba mâkâ, konokuni kulâ – kewâni modo warâ.

<sup>13</sup> Tutuzenryenlâ Jesus wâgâ aguelymo, pymâdo indadyseba tawylymogue. Jesus wâgâ adâkeduo, tânagazedily tyntadylymogue.

<sup>14</sup> Âty quatro iguandyly sakadybyem awyly ume, Jesus idâly Deus etyam. Târâ taseray âtâdyguyby modo nhenomedâdyly.

<sup>15</sup> Pymâdo Jesus aguely tindatuo âsewânilymo; warâ aguelymo:

– Kydâsenomedâdobyry ara nâsenomedâdaymba awâkâ, toenzepa olâ enomegu! Âdaraka awâkâ enomegu? – kelymo.

<sup>16</sup> Aituo Jesus in-hoguly:

– Unárygue kulá inkâba xirâ kâenomedâdylimo. Deus ugononibyry, “Aguekâ” kehobyrylâ, augueho.

<sup>17</sup> Pabai ize ato aieni modo xutuzemo Deus “Aguekâ” kehobyry augueho awyly; yangahu oday unâry kulâ mâkeba augueho awyly.

<sup>18</sup> Tunâry tyangahu odano kulâ tagonroam egatuim tonomery wâgâ koendâ adâkehonhoem kulâ aguely. Aunlo mâkeba olâ urâ. Unâ egatuim konokuni keba watay, tunâry kulâ mâkeba agueho, tugononibyry aguehobyrylâ. Tugononibyry mâkâ ehoguedyze ato, mâkâ mâkeba. Unâ egatuin-em Deus ingonotyby urâ.

<sup>19</sup> Moisés myakâwândy Deus aguiendyse ato kâzewenry iweninri. Âmaemo olâ kâzewenry agueho mâinwâmpyramo. Yâze myguelymo, âdawipyralâ – kely.

<sup>20</sup> Kurâ domodo aguely:

– Tuândy kulâ âmâ! Diabu agonro keanra âmâ, arâ amyguehoem! Ânguy âze kewâpyra – kelymo:

<sup>21</sup> – Iweâ kulâ keankâ adyesenry agânhedyly. Tâwâneim kua kânhedyly. Tâzekobyzegueho oday agânhedyly awylygue mâseguâdâdâmo, yagâ âewiâpadâmo-ro warâ.

<sup>22</sup> Deus aguiendyse ato kâzewenryem saguhoenlâ Moisés iweniwâm. Warâ tâzewenry wâgâ iwenibyem awyly: “Iamudo iwelo egaseyby tokalâ semana ipygueduo ilery ety iopiry satâwâdaungâ, Judeu tawyly nhenehonhoem” kely. Moisés agâ inkâba kâzewenry tâjilery ety iopiry satâly adaguly, kydamudo agâlâ. Iamudo tokalâ semana ipygueduo, kâzewenry agueho arâ ilery ety iopiry mantâlymo, tâzekobyzegueho umelâ.

<sup>23</sup> Iamudo ilery iopiry ety tâzekobyzegueho odaylâ kehoem tatâze âmaemo watay, nhewentâdaundâ, tâzekobyzegueho odaylâ tâwâneim kua kânhedylygue.

<sup>24</sup> Inakanhe aini mâentuomo, inepa kâzewentâdaundâ. Âkealâ, âkealâba warâ awyly koendâ mâuntuduomo lelâ ewentâdaungâ – kely.

*“Messiaslâka awâkâ Jesus?” kurâdo kehobyry*

<sup>25</sup> Aituo târâ Jerusalémdâ aguelymo:

– Kywymârydo tyândyse atolâ awâkâ uguondo.

<sup>26</sup> Etaungâ! Notoendaymba awâkâ. Tarâlâ idânârâam aguely. Ânguy etadâze kewâpyra. Kywymârydo nutumo keanra Deus Ingonotyby Messiaslâ awâkâ awyly.

<sup>27</sup> Kurâem olâ awâkâ Messias keba. Tutuzema kurâ awâkâ âdykonlo awyly. Messias âewyly watay, MOK alelâ ise âepanâguely. Ânguy âdykonlo mâkâ awyly nutuwâbyra ise – kelymo.

<sup>28</sup> Deus ety idaseray tienomedâday, kaynâ kehoem Jesus aguely:

– Koendâ kehoem utudâ, âdykonlo wawyly tutuze warâ wâne âmaemo, inanjimo. Iozepa olâ arâ âunâgumo. Unâry wâgâ kulâ inkâba xirâ onro anaxi kâewyly; igonotybyem tarâ wawyly. Kewâdily kulâ nitaymba mâkâ ugononibyry; tâinwânseim lelâlâ mâkâ agueho. Mâuntuba olâ âmaemo.

<sup>29</sup> Urâ olâ tutuze ingonotybyenlâ mawânâ kâewyly – kely.

<sup>30</sup> Aguely tindatuo, sawâse kelymo. Ânguy olâ tâmary nhonwa niepyra, sawâto odayba awylygue.

<sup>31</sup> Tonlo modo ewy agui Jesus tâinwânsemo myakâwâm. Aguelymo:

– Messias âewyly-ro watay, adyesenry kehoem ise anhekyly, tâkezemo inanry. Awâkâ anhekyly takaze ânguy anientaymba. Arâ atayma Messiaslâ awâkâ-ro – kelymo.

*Fariseu domodo guarda ingonotomobyry, Jesus nhawâtoem*

<sup>32</sup> Fariseu domodo, “Messiaslâ awâkâ Jesus” kely indadylymo. Aguely izepamo. Aituo kurâdo eynynâ Deus agâ aguewâni modo iwymârydo agâ aguelymo. Deus ety donro guarda modoram warâ aguelymo:

– Jesus sawâtaunda; enetaungâ xarâ-ro warâ – kelymo.

<sup>33</sup> Arâ âturudaymo, Jesus aguely tonlo modoram:

– Âdiempa kulâ ise agâmo wawyly. Inepa ise kodopâdily mâkâ ugononibyryanlâ.

<sup>34</sup> Uize âmaemo, iepyra olâ ise âmaemo, udâhoram mydâpa mawylmogogue – kely.

<sup>35</sup> Aituo aguelymo:

– Âdyanka ise awâkâ idâly, kiempyra kitoem? Eagonro xidadâ modoam ise idâly, judeu keba modo ety anaxi enomedâzemo? – kelymo.

<sup>36</sup> – Âdakezeka enra awâkâ aguely: “Uize âmaemo, iepyra olâ ise âmaemo” kely? Xina nutuba enra awârâ – kelymo.

*“Yam âetaungâ, tatuanzeim paru enyze âeto ara” Jesus kehobyry*

<sup>37</sup> Âty xypyry tohoguezeim kuru ume Jesus saudyly. Kaynâ kehoem aguely:

– Yeinwântaungâ, âmaemo kâunduly mâenmakedyze donro modo. Yam âetaungâ, tatu-anzeim paru enyze âeto ara.

<sup>38</sup> Xirâ Deus itaumbyry awo wâgâ iweniby enanâgüewâdaungâ: “Yeinwânni modo iweloem âiehozemo, âdaunloenlâ Deus agâpa nâiehoba itomoem. Paru sawedânry ara ise iodaymo eon-hondânimobe awyly aunlôlâ” – kely.

<sup>39</sup> Deus Ispiritury tâinwântaynrim modoam ingonokyly wâgâ ani Jesus aguely. Xirâ modo ume Deus Ispiritury eyanmo tugonoseba ani, xirâ anaynlâ Jesus awylygue, Tunwym tynrenseim ezaxi nâtâba awylygue.

*Jesus einwânni, einwântânry warâ*

<sup>40</sup> Aguely idanipyry modo aguelymo:

– Âkealâ, Deus eynynâ agueinlâ awâkâ uguondo. Messias kinwânwânkylylâ awâkâ – kelymo.

<sup>41</sup> Einwântânry modo olâ aguelymo:

– Messias mâkeba awâkâ. Galileiadâ kulâ mawânkâ âewyly. Mârâ eynynâ inkâba ise Messias âewyly.

<sup>42</sup> “Davi ipemugu ewy ise Messias” tâkeze myakâwândy Deus lelâlâ. Iazely ise Belémdâ, Davi iazehobyrydâ. Arâ mawânâ Deus itaumbyry awo wâgâ iwenibyem awyly – kelymo. Belémdâlâ iazeypy Jesus awyly nutuba tawylmogogue, arâ aguelymo.

<sup>43</sup> Jesus einwânni, einwântânry idylymo.

<sup>44</sup> Ânguy olâ myakâwâm nawâpyra. Einwântânry modo ewy Jesus tianwâdysemo ani.

*Judeu domodo iwymârydo Jesus neinwâmpyra atomobyry*

<sup>45</sup> Deus ety iguardary modo Jesus sawâse igonotyby modo odopâdylymo, fariseu domodo, kurâdo eynynâ Deus agâ aguewâni modo iwymârydo warâ eydâ atomoam. Aituo aguehonlymo:

– Âdaituoka Jesus mâenepyra mawylymo? – kehonlymo.

<sup>46</sup> Aituo in-hogulymo:

– Ânguy mâkâ agueho ara kehoem aguewâpyra – kelymo.

<sup>47</sup> Fariseu domodo iewiâpadaynly, aguelymo:

– Mâkânra mâzenokuoaguimo lâpylâmy!

<sup>48</sup> Kywymârydo mâkâ neinwântaymba. Xina fariseu domodo ewy tokalâ mâkâ neinwântaymba.

<sup>49</sup> Âdaunlo modo kulâ mâkâ einwânni. Kâzewenry wâgâ nâsenomedâdaymba akaemo, xina âsenomedâdo ara. Inakanhe âiehoze akaemo Deusram – kelymo.

<sup>50</sup> Akaemo duay tâlâ myani fariseu Nicodemos keho, kopae Jesus agâ agueze idâypy. Tataen-hodo aguely tindatuo, aguely:

<sup>51</sup> – Idânârâ kehoem kâzewenry tutuze kurâ. Koendâpa ânguylâ iguehoem aguely, eagâ aguykeba kulâ, warâ awyly tutuzelâ kurâ. Âdy anhytyby kiuntuba kulâ âsenagazedoem kienwentâdaymba kurâ. Xarâ kyjigâsene, tâsemaguehoem, âdara kely awyly kindatoem – kely.

<sup>52-53</sup> – Galiléia donro modo mâkâ eynynonro ewy ara amyguely. Tutuzelâ âmâ, Galileiadâ Deus itaumbyry egatuim âdaunloenlâ ipa awyly – kelymo.

## 8

*Pekodo isoamba kulâ âdynanâoyby*

<sup>1</sup> [Aituo kurâ domodo tâtyam idâwâdylymo. Jesus olâ idâly iwy Se Oliveira Ekaram.

<sup>2</sup> Kopaelâgâem pealâ Jesus odopâdyly Deus etyam. Ekadyly, tydâtyguyim modo enomedâdyly nhaguondyly.

<sup>3</sup> Nhenomedâdyly ume, fariseu domodo, Moisés inweniby enomedâni modo iwymârydo warâ Jesusram pekodo nhenewylymo. Eagonro uguondoam âdynanâoly emâmomy. Pekodoam aguelymo:

– Tarâ ikâ idânârâ nhetodâ – kelymo.

<sup>4</sup> Jesusram aguelymo:

– Konomedâni, ohogüimby merâ pekodo, eagonro uguondoam âdynanâoly xina netai olâ.

<sup>5</sup> Imeâgâemba kehoem merâ inakanhe aitobyry. Moisés kâzewenryem inweniby wâgâ: “Tuhugue tamytâze xyâwâtaungâ pekodo isoamba kulâ âdynanâoim” kelype. Âmâ-ro, âdara tâkeze âmâ? Tâwâlâ tuhugue xina nhâly? – kelymo.

<sup>6</sup> Awârâ arâ nhapâiguelymo, Jesus âdalâ kulâ in-hoguly-ro watay tienwentâdomoem. “Tyâzepe awâkâ pekodo nidâ” kely-ro watay, “Kâzewenry neinwântaymba awâkâ Jesus” tâkezemo tâise. (“Xyâly lelâ awâkâ pekodo” kely-ro watay, “Nityendaymba awâkâ” tâkezemo

tâise warâ.) Nhapâiguehomo nihoguba Jesus; enagozely lelâ, tâmary ewilygue onro wâgâ inwenily lelâ warâ.

<sup>7</sup> Mâkâ pekodo wâgâ sapâiguezezemolâ. Aituo iwykaudyly, aguely:

— Âmaemo ewy âdaunloenlâ inakanhe aitânrybe-ro watay, tâwâlâ waunroem merâ pekodo onwa tuhu name — kely.

<sup>8</sup> Agueypyem âzewyondyly. Onro wâgâ inweniondyly.

<sup>9</sup> Jesus arâ agueduo, idânârâ tutuzemo mawânkâ Deus izepa ato aieni lelâ tawylymo. Aituo tokalâ, tokalâ warâ âxigüewâdylymo, agaityom modo waunroem kuru âxigüeim. Ânguy peba idyly, Jesus, pekodo alelâ âxiâim.

<sup>10</sup> Aituo Jesus iwykaudyly, nhapâiguely:

— Âdykâ âiguehoem iwentâni modo nitaimo? — kely.

<sup>11</sup> — Ânguy lâpeba, Pymâ! — kely pekodo.

— Âhoem augewâpyra lâpylâ urâ. Iweâma idâ, inakanhe adâitonzeba olâ ikâ — kely Jesus.]\*

*Jesus mawânkâ âdara Deusram kytâly awyly xutuen-hoim*

<sup>12</sup> Jesus agueondyly Deus ety idaserano modoram:

— Iajinu wâne kydadakobâdo tâsagonze, myara lâpylâ ywâgâ âdara Deusram tadaindyly xutuly. Yeinwântaynim modo Deus agâpa tyetunebamo ise. Igeduomo, idâzemo lelâ aunloenlâ eagâ tâitomoem. Ize ato ara adâidyly xutuzemo. Iamu odaypa ise adakobâdylymo, ânwa tyajineim odakâ adakobâdylymo waunlo ara ise — kely.

<sup>13</sup> Fariseu domodo eyam aguely:

— Âwâgâlâ awârâ amyguely. Ânguy âkealâ amyguely awyly eon-hondâni lâpeba. Awylygue amyueho âdyem nipyra awyly — kelymo.

<sup>14</sup> Aituo Jesus aguely:

— Âkealâ ywâgâ auguely, tâinwânseim xirâ augueho. Idataungâ auguely. Tutuze urâ, âdykâba kêewyly, âdyam udâly warâ awyly. Âmaemo olâ mâuntubamo âdykâba kêewyly, âdyam udâly warâ awyly.

<sup>15</sup> Ywâgâ koendâ mâuntuba lelâlâ wâne âmaemo, arâlâ olâ nhewentâdylymo. Ânguy ewentâze inkâba kêewyly, emakeze lakuru.

<sup>16</sup> “Inakanhe kulâ mâkâ aidyly” uguely watay olâ; âkeâ lelâlâ auguely. Yagâlâ Pabai ugononibyry; auguehobyry modogue yagâ tâseinwânze mâkâ-ro warâ.

<sup>17</sup> Nâzwenry wâgâ iwenibyem: “Azagâ kurâ âkealâ aguelymo-ro watay, aguehomobyry tâseinwân-honze” warâ iwenibyem awyly.

<sup>18</sup> Tâlâ azagâ âkealâ ywâgâ agueim, urâ, Pabai ugononibyry warâ. Awylygue xina agueho tâinwânseim lelâlâ awyly — kely.

<sup>19</sup> Akaemo aguely:

— Âdykâka Pabai mygueho? — kelymo.

Aituo Jesus in-hoguly:

— Ânguy wawyly mâuntuwâbyra âmaemo. Pabai koendâ mâuntuwâbyra âmaemo warâ. Utulymo-ro watay, Pabai tutuze lâpylâ tâise âmaemo — kely.

<sup>20</sup> Jesus xirâ modo wâgâ aguely, Deus ety idaseray tienomedâdaymo. Deusram dinheru xuduypy etadâdo kaixa iwaguepa. Tâwâlâ wâne izepaom modo agueho izepa awylymo, ânguy olâ nawâpyra, sawâto odaypa awylygue.

*Xirâ anano keba tawyly wâgâ Jesus aguehobyry*

<sup>21</sup> Jesus aguely:

— Idâze urâ; uize âmaemo-ro warâ. Inakanhe amitomobyry tygakezebalâ ise âiguelymo. Awylygue ise udâhoram mydâpa mawylymo — kely.

<sup>22</sup> Aituo judeu domodo adapâiguelymo:

— Âdyanka ise awâkâ idâly, kytâba kitoem? Âdyâly ise? — kelymo.

<sup>23</sup> Jesus aguely:

— Taunlo onwogonrolâ âmaemo. Urâma kaynonro. Xirâ ananolâ âmaemo, urâ olâ xirâ anano keba.

<sup>24</sup> Yeinwâmpyra lelâ âmaemo-ro watay, inakanhe amitomobyry tygakeduneba ise. Inakanhe amitomobyry wâgâ tâzewentâgueozelâ ise âiguelymo, URÂLÂ URÂ kelygue tâzekeim mâinwâmpyra âmaemo-ro watay — kely.

<sup>25</sup> Aituo nhapâiguelymo:

— Ânguyka âmâ? — kelymo.

Aituo in-hoguly:

\* 8:11 Idânârâ livru saguho modo wâgâ iwenibyemba xirâ.



– Tutuzelâ âmaemo, aunlolâ inanry ywâgâ auguezesedily.

<sup>26</sup> Toenzepa âwâgâmo auguehobe wâne urâ. Augueho mâinwâmpyra olâ âmaemo, Deus ize ato amânhepyra mawlymo kâuntuen-hondyze wato. Mâkâ ugononibyry olâ kewâdily kulâ waypa. Xirâ anano modoam auguehoem aguehobyrylâ augueho – kely.

<sup>27</sup> Nutubamo myani mâkâ “Ugononibyry” keduo, tunwym Deus wâgâlâ aguely awly.

<sup>28</sup> Awlylygue Jesus aguely:

– Iwerâ ânguyem wawly mâuntuwâbyra âmaemo. Yiguehoem kruz onwa yakâjibygueduomo, xutuze âmaemo, Uguondo Kaynâpa Âetyby wawly, mâkâ URÂLÂ URÂgue tâzekeinlâ wawly. Xutuze âmaemo, Pabai auguehoem aguehobyrylâ kâenomedâdo awly, yangahu oday unâry kulâ mâkeba.

<sup>29</sup> Yagâlâ ugononibyry, urâ kulelâ yânwâpyra, ize ato lelâ mawânâ agânhekyly – kely.

<sup>30</sup> Arâ aguely tindatuomo, agui kehoem einwânâmomo.

*Deus eynynonro wâgâ, Diabu eynynonro wâgâ warâ Jesus aguehobyry*

<sup>31</sup> Aituo Jesus aguely:

– Augueho mâinwândilymo-ro watay, yagonroem lelâlâ ise âmaemo.

<sup>32</sup> Ânguy wawly koendâ mâuntulymo-ro watay, xutuze âmaemo, aguely âkealâ awly. Mâuntuduomo, âzemakeoze âmaemo, mâkâ âturimo emaymba – kely.

<sup>33</sup> Aituo aguelymo:

– Abraão iweompyrylâ xina. Âdykâ ânguyam xina nâdutuoba, xina tawâseba warâ. Âdaituoka “Mâkâ âturimo emaymba âzemakeoze âmaemo” myguely? – kelymo.

<sup>34</sup> – Diaburam kulâ Deus izepa ato aietaynrin modo âdutuoly. Inakanhe adâjidyly nimopamo. Diabu mawânkâ Deus izepa ato aiesezeni modo iwymâry; Satanâsgue tâzekein lâpylâ mâkâ. Xirâ mâuntudyzemo kuru wato.

<sup>35</sup> Mâkâ kurâ adanâhoymby, tâwâlâ vende âieholy eagonro emaryem. Mâkâ imery olâ, aunlolâ imeryem awly; âdaunoenlâ tunwym xurâempa nipyra.

<sup>36</sup> Deus imery urâ. Diabu emaymba imakelymo-ro watay, mâkâ mâinwântondaymba ise âmaemo. Aunlolâ inakanhe amitomoem aguehobyry amânhetombyra ise âmaemo.

<sup>37</sup> Abraão iweompyry lelâlâ wâne âmaemo. Arâlâ olâ, yâdyse mawlymo, inomedâdomo mâinwândyseba mawlymogue.

<sup>38</sup> Pabai yam nhenehoymby inanry augueho. Amânhekylymo olâ, Diabu amânhetomoem aguehobyry kulâ – kely.

<sup>39</sup> Aituo aguelymo:

– Abraão iweompyry xina. Mâkâ aitobyry aralâ mawânâ xina aidily – kelymo.

Aituo Jesus aguely:

– “Abraão iweompyry xina” tâkeze wâne âmaemo, Abraão aitobyry arapa olâ amidilymo. Abraão aitobyry ara amidyse âmaemo-ro watay, Deus ize ato tâise amânhekylymo.

<sup>40</sup> Âkealâ Deus aguehobyry kâindatyby inanry âyanmo augueho. Arâlâ olâ, yâze myguelymo. Awârâ amânhedyse matomo emyenro anientaymba akâwândy Abraão!

<sup>41</sup> Unwânmo Diabu aito ara kulâ amidilymo – kely.

Aituo aguelymo:

– Diabu imeom mâkeba xina! Tokalelâ xina nhunwym, Deus lelâ. Deus imeom lelâlâ xina – kelymo.

<sup>42</sup> Aituo Jesus aguely:

– Deuslâ unwânmo-ro watay, ywynedâ tâise âmaemo, Deus ingonotybyenlâ mawânâ tarâ wawly. Âwâlâ kulâ inkâba kâewly. Deuslâ mawânkâ ugononi.

<sup>43</sup> Âyanmo augueho tydase lelâlâ wâne âmaemo, inomedâdyzemo wato mâuntudyzeba olâ âmaemo.

<sup>44</sup> Diabu imeom kulâ âmaemo; ize atolâ mawânâ amânhedyse matomo. Adagudaylâ Diabu kyârin-em awly. Iozeno modo iduery kulâ mâkâ. Aunlolâ mâkâ kewâdily kulâ awly. Kewâdily kulâ-ro watay, tâzewenrylâ mâkâ agueho. Augueondily, konokuni kulâ mâkâ, idânârâ tâdâsenogudo modo adaguholâ mâkâ.

<sup>45</sup> Uguewâdily kulâ witaymba urâ, âmaemo olâ yeinwândysebamo.

<sup>46</sup> Idânârâ âmaemo, inakanhe awipyra wawly, tutuze âmaemo. Ânguy ienwentâni lâpeba. Awlylygue augueho einwântaugâ.

<sup>47</sup> Deus xurâ modo mawânkâ Deus agueho tâinwânsemo. Mâkâ mâinwâmpyra mawlymo, xurâ keba mawlymogue – kely.

*Abraão wâgâ Jesus aguehobyry*

<sup>48</sup> Aituo tonlo modo judeu domodo eyam aguelymo:

– “Âkealâ enra Samaria donro modo emyenro kulâ âmâ kadopâbeom” xina kely – kelymo.

<sup>49</sup> Aituo Jesus aguely:

– Kadopâbeom mâkeba urâ. Pabai uguého tynrense urâ; âmaemo olâ yrempyramo âmaemo.

<sup>50</sup> Won-honru wâgâ, koendonroem wawyly wâgâ warâ auguepa wâne urâ. Pabai olâ ywâgâ koendâ adâkeze.

<sup>51</sup> Idânârâ auguehobyry einwântaynrim modo niguwêpyramo ise. Xirâ mâuntudzemo kuru wato – kely.

<sup>52</sup> Arâ Jesus aguely tintaduo, judeu domodo iwymârydo, aguelymo:

– Iweâma tutuze xina, kadopâ agâ kulâ mawyly! Iweâpa myakâwândy kydamu Abraão iguely. Idânârâ saguhoem Deus eynynâ agueim modo lâpylâ iguewânmo. Warâ olâ amyguely: “Idânârâ auguehobyry einwântaynrim modo niguwêpyramo ise” myguely.

<sup>53</sup> Kydamu Abraão, saguhoem Deus itaumbry egatuwânibyry modo alelâ iweâpalâ myakâwândy iguelymo. Akaemo takaze tynrenseim mâkeba âmâ! Uguondo tynrenseim mawyly tâgaese wâne âmâ, âdy keba olâ âmâ – kelymo.

<sup>54</sup> Aituo Jesus aguely:

– Ywâgâ kulâ koendâ auguely-ro watay, uguého modo âdyem nitaymba tâise. Urâ lelâ ywâgâ koendâ aguein-ro watay, ânguy auguehobyry neinwântaymba tâise. Pabai olâ ywâgâ koendâ agueim, mâkâ “Xina iDeusry” myguehomolâ.

<sup>55</sup> Âdykâ Deus mâentaymba âmaemo, urâ olâ tâense. “Kâuntuba urâ” uguely âyanmo-ro watay, uguewâdyly kulâ tâise. Koendâ kehoem tutuze, tâinwânse warâ olâ urâ yam uguého modo.

<sup>56</sup> Kydamu Abraão toenzepa iomazewâm, tarâ xirâ onro anaym wawyly tientuo – kely.

<sup>57</sup> – Âwâ! Cinquenta anu peba kuru maze-ro. Iweâpa lelâlâ myakâwândy Abraão iguely, azely iraynâlâ. Abraão mâentaymba âmâ! – kelymo.

<sup>58</sup> Aituo Jesus aguely:

– Abraão iazely iray, tâlâ wakâwâm – kely.

<sup>59</sup> Jesus aguely tindatuomo, tyândyse idylymo. Tuhu nhanâdylymo, nhonwa tiamehoemoem. Totoenze olâ ani. Aituo Deus etydâba egasely.

## 9

### *Jesus epy kua nhetobyry*

<sup>1</sup> Alâ ani tadakobâday Jesus uguondo epyem iazepyry nhedyly.

<sup>2</sup> Aituo xina Jesus nhapâiguely:

– Konomedâni, âdaituoka awâkâ uguondo epyem iazely? Izepa tato aieniem awyly xutuwâm Deus? Nhunwyndo inakanhe aitobyry wâgâ? – xina kely.

<sup>3</sup> Aituo Jesus in-hoguly:

– Awârâ modo wâgâ inkâba. Awâkâ arâ iazely, Deus eon-honru iwâgâ âzehohoem.

<sup>4</sup> Tâmaryem akâwâm Deus xirâ anaxi ugonodyly. Peto oday lelâ kydâsewanily. Arâ lâpylâ Deus aguiendyse ato aguyjiene, kydâsewaniho nhuduly umelâ. Inepa mawânârâ ise xurâem aguiyrya kito saindyly.

<sup>5</sup> Xirâ anaym wawyly ara, âdara Deusram tâdâtâly awyly wâgâ konomedâdâ urâ; âdyam kytâlly awyly kientoem iajimanâni emyenro urâ – kely.

<sup>6</sup> Arâ aguenripyryem, Jesus KUITÚ kely onro onwa. Onro tâdakugue nhepizeândyly. Aienibyryem epy enu onwa PYRY PYRY nhedyly.

<sup>7</sup> Aguely:

– Idâ, Siloé donro paru etaryam âzemelagoguera – kely.

(“Mâkâ igonotyby” keze Siloé kely.)

Epy idâlly âzemelagogueze. Odopâdyly, tâense lelâ, Jesus kua nhetobyryem.

<sup>8</sup> Ety iwaguepa tâtyuneim modo mâkâ epyemba awyly nhedylymo. Saguhoem dinheru nhekadyly enipyry modo lâpylâ koendâ tâense awyly nhedylymo. Aituo âseguâdâdylymo, aguelymo:

– ÂH! Mâkâ epy ekadybyem, sakani modoam dinheru ekanibyrylâ awâkâ – kelymo.

<sup>9</sup> – Mâkâlâ – kewâdylymo.

– Mâkâ mâkeba. Emyenro kulâ awâkâ – kelymo.

Mâkâ olâ warâ aguely:

– Mâkâlâ urâ, epyem iazepyrylâ – kely.

<sup>10</sup> Aituo nhapâiguelymo:

– Âdaraka amidyly kua mitoem? – kelymo.

<sup>11</sup> Aituo in-hoguly:

– Mâkâ uguondo Jesus keho enra ikila ienu onwa PYRY PYRY ieni. “Idâ, Siloé donro paru etaryam âzemelagoguera” keanry-ro warâ. Aituo enra udâlly. Kâzemelagogueagui. Iwerâ tâense urâ – kely.

12 – Âdykâka mâkâ uguondo? – kelymo.  
– Kâuntuba aze – kely.

*Fariseu domodo epyem iazeypy kua ietyby nhapâiguehomobyry*

13-14 Tâzekobyzegueho oday Jesus epy kua nhedyly. Aituo mâkâ kua ietyby fariseu domodoram adaholy.

15 Fariseu domodoram adapâigueoly:

– Âdaraka kua midyly? – kelymo.

– Mâkâ uguondo kua yenipyry onro enra ienu onwa PYRY PYRY nhekyly. Parugue kâzemelagoguehoem agueanry. Âzemelagogueybyenlâ enra kâendyly-ro warâ – kely.

16 Fariseu domodo ewy aguely mâkânra:

– Mâkâ kua ânenipyry, tâzekobyzegueho oday mâkâ aidyly. Arâ atayma Deus ingonotyby mâkeba mâkâ uguondo-ro; adyosenry mawânkâ anientai tâzekobyzegueho oday – kelymo.

Tâlâ olâ fariseu domodo ewy wakeim:

– Deusram aguehomba adyosenry anhetoen-ro watay, Deus eon-honru tienehon-hoem adienkyly anientaymba tâise – keim.

Jesus Messias awyly einwânni, einwântânry tâisemo ani.

17 Aituo eyam ageondylymo:

– “Epyemba yetai mâkâ” mygueanse. Âdara mâkâ wâgâ âunâry? – kelymo.

– Ienanaji, Deus eynynâ agueinlâ mâkâ – kely.

18 Pymâ domodo mâkâ aguely neinwâmpyramo. Aituo aguelymo:

– Myguewâdyly kulâ. Epyem inkâba ani azely – kelymo.

Awylygue sodo modo ingâsedylymo.

19 Sodo modo saintuo, nhapâigueulymo:

– Âmerymoka awâkâ, epyem iazeypy myguehomo? Âdaituo pylâka iwerâ nhedyly? – kelymo.

20 Aituo in-hogulymo:

– Xina imerylâ awâkâ. Tutuze xina epyem iazeypy awyly.

21 Âdara kua itobyry olâ xina nutuba. Ânguy kua ieni awyly xina nutuba lâgâlâ warâ. Xutybyem mawânkâ. Awâkâlâ sapâiguewâdaungâ. Awâkâlâ ise âyanmo egatuim – kelymo.

22 Arâ sodo modo aguely olâ mârâ âta tâdâtâdyguyho odaypa tâzegaseonlymo xytaze, “Jesuslâ Messias” kelymo-ro watay. “Deus Ingonotyby Jesus awyly einwânni-ro watay, âta tâdâtâdyguyho odaxi negawâmpyra ise” tâkeze akâwâm pymâ domodo.

23 Awylygue mawânkâ: “Xutybyem awâkâ. Awâkâlâ sapâiguewâdaungâ” kelymo.

24 Aituo mâkâ uguondo kua ietyby ingâsenehondylymo. Aguelymo eyam:

– Amyguely idaselâ awâkâ Deus. Awylygue âkeâ lelâlâ xinaram aguekâ. Tutuze xina, Deus izepa ato aieni awâkâ kua ânenipyry awyly – kelymo.

25 Aituo in-hoguly:

– Deus izepa ato adyese, aniempyra warâ awyly kâuntuwâbyra urâ. Kâuntuly epybyryem wawyly, iwerâ tâense urâ, mâkâ kua nhetybyem – kely.

26 Aituo nhapâigueondylymo:

– Âdaraka enra aidyly? Âdaraka enra epyemba âedyly? – kelymo.

27 Aituo uguondo in-hoguly:

– Azagâ lelâ âyanmo augueaki, yeinwâmpyra olâ âmaemo. Auguehobyry kompâzedyly-ro watay, mâinwâmpyra mawylymo, tutuze urâ. Mâkâ kua yenipyry mâinwândysemo lâpylâ âmaemo? – kely.

28 Aituo mâkâ agâ toenzepa kehoem iewiâpadylymo, aguelymo:

– Âmâlâ mâkâ eynynonro, xina mâkeba! Moisés inweniby lelâ xina nheinwânkuly.

29 Deuslâ, Moisés kydamudo nhenomedâdoem agueim awyly, tutuze xina. Âdy Jesus wâgâ xina nutuwâbyra. Ânguy aguehoem igononi awyly xina nutuwâbyra warâ – kelymo.

30 Aituo mâkâ uguondo aguely:

– Âwâ! Kua nhetybyem wawyly tâenselâ âmaemo. Toenzepa kâseguâdâdyly, Deus ingonotybylâ mâkâ awyly mâuntuba mawylymoguel!

31 Deus tynynonro keba modo nhekadyby nudupa awyly, tutuzelâ kurâ, izepa ato aieni nhekadyby nuduwâpyra. Tynynonro modo nhekadyby lelâ anhekyly – kely.

32 – Kaudyly umelâ ânguy epyenlâ egaseyby kua tyese kely tydatuneba. Ânguy awâkâ uguondo ara aieni lâpeba.

33 Iwerâ olâ Jesus kua yetai. Deus keba igononi-ro watay, kua yetaymba tâise – kely uguondo.

34 – Epyem azely Deus izepa ato aienilâ mawylygue. Awylygue xinaram arâ kehoem adâkezeba ikâ – kelymo.

Aituo, âtâ tâdâtâdyguyho odaypa nhégaseândylymo.

*Jesus agueho tyeinwândysebaom modo*

<sup>35</sup> Âtâ tâdâtâdyguyho odaypa uguondo egaseândobyry xutuwanmy Jesus. Awylygue nhuinly. Tientuo, nhapâiguely:

— Mâkâ Uguondo Kaynâpa Âetyby tâinwânse âmâ? — kely.

<sup>36</sup> Aituo uguondo aguely:

— Kâinwândyse urâ. Ânguy awyly yam aguekâ, ânguy amygueho awyly kâuntuhoem — kely.

<sup>37</sup> — Tâenselâ âmâ! Eagâlâ amyguely! Urâlâ Uguondo Kaynâpa Âetyby — kely Jesus.

<sup>38</sup> Jesus aguely idanipyryem, âzeguhoam idyly enado, tynrentoem, aguely:

— Pymâ, âinwântâ urâ — kely.

<sup>39</sup> Jesus aguely:

— Xirâ anaxi kêewyly, ânguy yeinwânni, yeinwântânry warâ awyly âdutihomoem. Epy modo wâne tyajine awyly nutuba myara Deus xurâ kebaom modo, nutuba awylymogue. Yeinwântaynrin modo olâ Deus xutuzemo, epybyryem kua ietybymoem-ro waunlo ara — kely.

<sup>40</sup> Fariseu domodo ewy eydâ iwaguepalâ. Aituo aguely indadylymo.

— “Epy ara” mygueduo, xinaranlâ enra amyguely? — kelymo.

<sup>41</sup> Aituo Jesus in-hoguly:

— “Xina Deus nutuwâbyra, tiuntudyze olâ xina” myguelymo-ro watay, Deus tygakeze tâise izepa ato amânhetomobyry. Tâwâlâ kulâ olâ, “Koendâ Deus tutuze xina” myguelymo, yeinwâmpyra kulâ. Arâma inakanhe amitomobyry tygakezeba awyly tânehonze awârâ. Deus xurâem, epy emyenro kulâ âmaemo — kely Jesus.

## 10

*Kaneru sodo koendonro wâgâ Jesus nhégatuhobyry*

<sup>1</sup> Jesus aguely:

— Idataungâ auguely. Kaneru sodo kura odaxi pyanta oze egawândyly. Tâmagazeinma tâzegawânto ozepa egawândyly, sahodâdobyry nhakagulyly.

<sup>2</sup> Kaneru sodo tâzegawânto oze egawânni.

<sup>3</sup> Egawântoem pyanta tâzenahugueoze. Ezedy wâgâ sodo tâguy ingâsedaynly. Todo itanru tydase kaneru. Kura odaypa nhetaguewâdyly. Poji nhaguhomoem nhadyly.

<sup>4</sup> Waunroem idâly, eguydo nhapygue-ro warâ, todo itanru tydase tawylymogue.

<sup>5</sup> Tiuntudânry kulâ niampyguedaymba. Itanru âkeloem awylygue, tâwenkeze lelâ — kely Jesus.

<sup>6</sup> Kaneru todo nhutuho ara, “Yeinwânni modo utuly” keze ani Jesus aguely. Kaneru wâgâ kulelâba aguely awyly, nutubamo olâ-ro warâ.

*Deus eydâ atoam tâzegawântolâ Jesus*

<sup>7</sup> Aituo Jesus aguely:

— Kura iwyantary emyenro urâ. Pyanta oze kaneru domodo tâtary odaypa egasely poji aguze, egawântondyly tâxidâdomoem warâ. Arâ lâpylâ ywâgâ lelâ Deusram tâdâtâhoem wawyly. Xirâ mâuntudyzemo kuru wato.

<sup>8</sup> Xirâ onro anaxi kêewyly iraynâ, toenzepa akâwâm “Deus Ingonotyby urâ” kewâni modo. Kewâdylymo kulâ olâ-ro warâ. Kaneru emagazeni emyenro kulâ akâwâm akaemo kewâdyly kulâ waunlo modo. Ynynonro modo olâ akâwâm aguelymo niwantaguebyramo.

<sup>9</sup> Deus eydâ atoam tâzegawântolâ urâ. Tâsemaguehoem wâne kaneru kura odaxi tâgawânse myara ynynonro modo kâenmakely. Kaneru sodo tâguy poji anaym awyly ume tânuagaenzelâ myara lâpylâ ynynonro modo kâendyly.

<sup>10</sup> Kaneru domodo emagazeze, inwenkeze, xyâze warâ kulâ tâmagazeim âewyly. Urâ olâ ynynonro modo emakeze kêewyly, igueduomo Deus agâ aunloenlâ itomoem lakuru.

*Kaneru sodo koendonro*

<sup>11</sup> — Kaneru sodo koendonro emyenro urâ. Koendâ tâguy nhedyly; emakezemo tâigueze warâ.

<sup>12-13</sup> Tâlâ olâ dinheru tienmakehoem kulâ kaneru eni, sodo keba olâ mâkâ. Auwa âepanâguely watay, todokeze lelâ. Aituo auwa kaneru nhawâdyly, ipemugudo adapâeguely.

<sup>14-15</sup> Mâkâ kaneru odo koendonro emyenro urâ. Utudâ Pabai; Pabai tutuze urâ warâ. Ynynonro modo tutuze lâpylâ urâ, kaneru odo koendonro tâguydo nhutuho ara. Onhondybyem urâ, ynynonro modoem yiguehoem.

<sup>16</sup> Tâinkâ lelâba ynynonro modobe awyly. Utuzemo, yeinwânsemo warâ. Tokalâ âjiam lelâ ise ynynonro modo kâindâtygulyly, kâentomoem, kaneru odo koendonro, tientoanlâ tâguy indâtyguyho ara.

<sup>17</sup> – Toenzepa Pabai ywynedyly, yeinwânmi modo emakeze iguein-em wawylygue. Yigueduo, kurâem itonze urâ.

<sup>18</sup> Ynynonro modo emakezelâ ise yiguely, awidyse wawylyguelâ. Aypa-ro watay, ânguy yâwâpyra tâise. “Igueze âmâ, kurâem itonze âmâ warâ” Pabai kehobyry aralâ ise awidyly – kely.

<sup>19</sup> Awârâ tindatuo, judeu domodo nâseinwâmbyra idylymo Jesus wâgâ, aguelymo:

<sup>20</sup> – Kadopâbe itybyem awâkâ! Awylylygue âindâ kulâ awyly! Aguely kâjiwantaguedaundâ – kelymo.

Tâlâ olâ warâ aguwâni modo:

<sup>21</sup> – Kadopâ agonro arâ aguwâpyra, epy kua nietaymba warâ! – kewâni modo.

*Judeu domodo Jesus izepa itomobyry*

<sup>22</sup> Azagâ nunâ sakabygueduo, kopâ ihuguely adaguly ume, âty “Deus Ety Koendâ Ietobyry Enanâgueho” saindyly.

<sup>23</sup> Deus ety ivarandarydâ Jesus adakobâdyly, Salomão intânehomybydâ.

<sup>24</sup> Târâ atay, eydâ âtâdyguyby modo aguely:

– Xina kâzenokudâ. Deus Ingonotybylâ âmâ? Mâkâ keba? Koendâ aguekâ, xina nhutuhoem – kelymo.

<sup>25</sup> Aituo Jesus in-hoguly:

– Deus Ingonotybylâ urâ, ugue. Yeinwâmpyra olâ mataunaguynre. Pabai eon-honrugue adyesenry modo ajiedâ, mâkâ ingonotybylâ wawyly kânehohoem. Agânhekyly modo mâkâlâ ugononi awyly xutuen-hoim.

<sup>26</sup> Ynynonro keba mawylmogue olâ Deus Ingonotyby wawyly mâinwâmpyra mawylmo.

<sup>27</sup> Ynynonro modo ytanru tydase; idânârâ utudâmo warâ. Kaneru todo itanru tindatuo, eyam tâtâze myara ynynonro tawyllygue, auguehobyry anhedilymo.

<sup>28</sup> Ynynonro modo aunloenlâ Deus agonroem ienehonze urâ. Igueduomo eagâmolâ ise Deus. Typygueim keba ise eagâ wawylymo. Iemakoaymo waunlo ara kehoem ise; ânguy iemaymba nhemakelyemba kehoem.

<sup>29</sup> Pabai won-honru nhuduypy, idânârâ takaze kehoem inâmem awyly; ânguy mâkâ emaymba nhemakelyem inkâba.

<sup>30</sup> Tokalêlâ xina Pabai agâ – kely Jesus.

<sup>31</sup> Jesus aguely tindatuo, iopano modo tuhu nhanâtondylymo Jesus tyân-homoem.

<sup>32</sup> Aituo Jesus eyanmo aguely:

– Inumo angataylâ keankâ koendonro modo agânhedyly, Pabai “Aiekâ” kehobyry ara. Âdaunlo agânhedyly wâgâka tuhugue yâdyse mawylmo? – kely.

<sup>33</sup> In-hogulymo:

– Koendonro amânhedylygue inkâba xina âdyse awyly, Deus mâunâguedylygue. Xina emyenro kulâ âmâ, uguondo, Deus agâ âzekiba ise kerim. Awylylygue xina tuhugue âdyse awyly – kelymo.

<sup>34</sup> Aituo Jesus eyanmo agueondyly:

– Warâ Deus itaumbry awo wâgâ iwenibyem awyly: “deuslâ âmaemo” kely Deus eyanmo.

<sup>35</sup> Âkealâ Deus itaumbry awo wâgâ iweniby aguely awyly, tutuze kurâ. Deuslâ akaemo deusgue ezetâni awyly, tutuze kurâ, saguhoem kuru iwâgâ aguwâtyby modo.

<sup>36</sup> Deuslâ xirâ onro anaxi ugononi, aguehobyry aiese. “Deus imery urâ” ugueduo kulâ, “Deus nhunâguedyly awâkâ” myguelymo.

<sup>37</sup> Pabai “Aiekâ” kehobyry agânhepyra urâ-ro watay, âdy wâgâ yeinwântaymba tâise âmaemo.

<sup>38</sup> Auguelygue kulâ yeinwâmpyra âmaemo-ro watay, agânhedyly mâentuomolâ einwântaungâ. Pabai Deus agâlâ wawyly, yagâlâ Pabai Deus awyly warâ – kely.

<sup>39</sup> Aguely tindatuomo tyanwâdyse idylymo. Âsemaguwâm lelâ olâ.

<sup>40</sup> Aituo Jesus târâpa âxiguely. Paru Jordão kuyam idâondyly, João kurâdo batiza nheto-byryam.

<sup>41</sup> Toenzepa myani xuiwâni modo aguely:

– Merâ uguondo adyesenry modo anhedily ara, âdy aniempyra wâne ani João. Âkealâ olâ mykeankâ merâ uguondo wâgâ aguely – kelymo.

<sup>42</sup> Agui tonlo modo Jesus tâinwânsemo myakâwâm.

<sup>1</sup> Tâlâ ani uguondo, Lázaro keho, Betânia donro, Maria, Marta warâ iwiry. Tâwâne myani mâkâ.

<sup>2</sup> (Mâkâ Maria, Pymâ Jesus ihuru onwa uriza nhapâdyly, tyangahudugue in-hugoguely itybylâ mâkâ.)

<sup>3</sup> Paru Jordão kuynâ Jesus awyly ume, Lázaro eaundudo kurâ ingonodylymo Jesusram:

– “Pymâ, toenzepa enra ataen-ho mâinwynegyuly ewânu!” kera.

<sup>4</sup> Aguely tindatuo, Jesus aguely:

– Tutuze urâ, Lázaro ewânu toenzepa awyly. Tâwânugue igueze, igueypyem lelâ nâtâzezebyra olâ ise. Mâkâ aidyly tientuo, toenzepa ise aguelymo: “Koendonro, ton-honreim warâ awâkâ Deus. Koendonro, ton-honreim warâ lâpylâ imery” kezemo. Aituo ise urâ, Pabai Deus warâ xina âdyren-honly – kely.

<sup>5</sup> Toenzepa Jesus inwynegyuly mykâinane Maria, Marta, Lázaro warâ.

<sup>6</sup> Toenzepa Lázaro ewânu kely tindatuo, myarâ idâze nadahulebyra ani; azagâ emedyly takaze wao mârâ âjidâ.

<sup>7</sup> Aituo xinaram aguely:

– Judéia yan-yam kydodopâne – kely.

<sup>8</sup> Xina olâ warâ aguely:

– Konomedâni, iweâ kulâ keankâ kypemugudo, judeu domodo, tuhugue âze kelymo. Myarâ kydodopâbyra koendâ kydawlyly – xina kely.

<sup>9-10</sup> Aituo Jesus xinaram aguely:

– Odopâdonze urâ. Kopaëlâgâembaba xixi iatygu doze horas ara lelâ. Peto oday adakobâni modo nâjihodaigâdaymaba, xixi wâgâ. Kopae adakobâni modo olâ tâjihodaigâze, iamu oday tâtâho nepyra tawylygue – kely.

<sup>11</sup> Aituo Jesus xinaram agueondyly:

– Xykyly kulâ mâkâ kataen-ho Lázaro. Xuagueânse olâ urâ – kely.

<sup>12</sup> – Pymâ, xykyly kulâ watayma, koendâ ise lelâ-ro – xina kely.

<sup>13</sup> “Igueypyem Lázaro” keze olâ ani Jesus aguely. Xina nutuba olâ âdakeze aguely awyly. Lázaro xykyly kulâ-ro waunlo ara, xina enanaji.

<sup>14</sup> Aituo koendâ xina nhutuhoem Jesus aguely:

– Lázaro nigue. Ipa kuru nidâ.

<sup>15</sup> Lázaro iguely iraynâ udâpa wawyly keankâ, won-honru mâentomoem. Âkealâ kuru yeinwântuomo, toenzepa ise womaru. Inoro, âguedy kyzeta – kely.

<sup>16</sup> Aituo Tomé, Azagonropyry kelygue tâzekeim, xinaram aguely:

– Inoro lâpylâ Jesus nhâduomo eagâlâ kyigueloem – kely.

### *Jesus igueypy modo kurâem itoni*

<sup>17-18</sup> Aituo xina Betânia iwaguepa saindyly. Jerusalêmdâ iwague kuruba mârâ âji, três kilômetros awârâem. Âguedy eaundudopyry etyam xina saindyly iraynâ, uguondo saindyly xinaram agueze:

– Ipa Lázaro nigue. Eguepybyry tuhu imâsedo odaji xina nhetadâdobyry quatro iguandyly idyly iwerâ – kely.

<sup>19</sup> Toenzepa eaundudopyry itynrumo. Toenzepa ipemugudo idâly, âkelo kurâ domodo warâ etubanâzemo, iwiry mo iguehobyry tiuntuduo.

<sup>20</sup> Jesus tâtyam saindyly egary tindatuo myani Marta iose idâly, Maria olâ âtâdâlâ.

<sup>21</sup> Aituo Marta Jesusram aguely:

– Tarâlâ âmâ-ro watay, wi nigewâpyra tâise keankâ!

<sup>22</sup> Igueypyem lelâlâ wâne, tutuze olâ urâ, Deusram mâenkaduo amyguehobyry adyese awyly – kely.

<sup>23</sup> Aituo Jesus eyam aguely:

– Igueypyem lelâ idâzesedyly nitaymaba ise âwiry. Kurâem itonze lelâ – kely.

<sup>24</sup> – Xypyry etay kurâem itondyly, tutuze urâ – kely Marta.

<sup>25</sup> Aituo Jesus aguely:

– Iguewâtyby modo kurâem itoni urâ, aunloenlâ tpygyenryem itomoem. Tâwâlâ ise yeinwânni modo iguely.

<sup>26</sup> Yagâpa nitaymabamo ise yeinwânni modo. Deusram ise, tyigueduo, idâlymo aunloenlâ eagâ tâitomoem, nigueontaymbamo ise. Tâinwânse âmâ? – kely Jesus.

<sup>27</sup> – Idânârâ amyguehobyry modo tâinwânse urâ. Deus, “Xirâ onro anaxi igonose urâ” kehobyrylâ mawyly tâinwânse urâ. Deus imery lelâlâ mawyly tâinwânse urâ warâ – kely Marta.

### *Jesus eogumatobyry*

<sup>28</sup> Agueypyem Marta idâly tywidyam agueze. Tydawere aguely, ânguy nidapyra itoem.

— Idy, Jesus naintai. Âgâsedily-ro warâ — kely.

<sup>29</sup> Awârâ tindatuo myani Maria inepa kehoem saudyly. Jesus agâ oxioze idâly.

<sup>30</sup> Etymoam kuru Jesus naimpyralâ, Marta agâ xina oxiodobryrdâlâ.

<sup>31</sup> Târâ âtâ oday Maria etubanâze idâypy modope myani. Mâkâ saudyly, tâmaeozo kehoem egasely tientuo, tâgasezemo lâpylâ myani. Aituo nhapygue idâlymo,

— Âguedy etadâdobyryam keanra idâly ohogüenze — tâkewâduomo.

<sup>32</sup> Jesus eydâ atoam saintybyem, Maria âzeguhoam idyly enado. Aitybyem eyam aguely:

— Tarâlâ âmâ-ro watay, wi niguwâpyra tâise keankâ! — kely.

<sup>33</sup> Aituo Jesus, Maria eogunru nhedyly; eagonro modo eogunru nhedyly lâpylâ warâ. Aituo Jesus toenzepa itywandyly, tuoday âsewânily warâ.

<sup>34</sup> Aituo nhapâiguelymo:

— Âdykâka keankâ Lázaro eguepybyry mâentadâdylymo? — kely.

— Egârâ, Pymâ — kelymo.

<sup>35</sup> Jesus eogumadyly.

<sup>36</sup> Aituo tonlo modo aguely:

— Lázaro tywyneze lelâlâ galâ awâkâ Jesus! — kelymo.

<sup>37</sup> Tâlâ olâ wakenri:

— Epy kua niedâ awâkâ. Ton-honreba olâ keankâ Lázaro niguepa itoem aiese — kerim.

### *Jesus Lázaro kurâem nhetondobyry*

<sup>38</sup> Jesus idâly Lázaro eguepybyry etadâdobyryam, tâtagueim tuhugue tânahugueinram. Toenzepa kehoem itywandyly.

<sup>39</sup> Aituo aguely:

— Awârâ tuhu etywâdaungâ! — kely.

Aituo âguedy eaundupyry Marta aguely Jesusram:

— Alâ nidâ! Tywângue awâkâ! Etadâdobyry quatro iguandyly idyly iwerâ — kely.

<sup>40</sup> Aituo Jesus aguely:

— “Yeinwântâ lelâlâ âmâ-ro watay, Deus eon-honru ese âmâ” uguehobyry mâenanâguebaka âmâ? — kely.

<sup>41</sup> Aituo mârâ tuhu imâsedo nhetylymo. Jesus kayam MYK idyly, aguely:

— Pabai, tuomare urâ, âyam auguely tydase mawlylygue.

<sup>42</sup> Ydatâlâ mawlyly tutuze urâ, tâwâlâ lelâlâ wâne yangahu oday kulâ unâgu. Ago olâ iwerâ auguely, merâ kurâ domodo auguely indatoem, âmâlâ ugononi awyly nheinwântomoem warâ — kely Jesus.

<sup>43</sup> Arâ adâkebygueduo adaenkely:

— Lázaro, igasegâ kuohoram! — kely.

<sup>44</sup> Aituo Lázaro kurâem itondyly, egasely. Ituwyn-hobyry aralâ, ixinary, ihuru, ewârý, emary alêlâ. Panugue emyan-huymbyem awyly. Aituo Jesus aguely:

— Awârâ ituwyn-hobyry etywâdaungâ, adakobâdoem — kely.

### *Jesus xyâlý wâgâ aguehomobyry*

(Mt 26.1-5; Mc 14.1-2; Lc 22.1-2)

<sup>45</sup> Jesus Lázaro kurâem nhetonduo, judeu domodo Maria etubanâze idâwâtyby modo ewy nheinwândyly lâpylâ.

<sup>46</sup> Tâlâ olâ myakâwâm fariseu domodoram aitobyry egatuze idâim.

<sup>47</sup> Aituo fariseu domodo, kurâdo eynynâ Deus agâ aguewâni modo iwymârydo, judeu domodo iwymârydo warâ âtdygyulylymo. Âjigüe aguelymo:

— Âdakiendylyka awâkâ Jesus? Adyosenry modo kehoem awâkâ anhekyly. Kurâ domodo aidyly tohoguezemo-ro warâ.

<sup>48</sup> Alâ aguienehonzedily-ro watay, idânârâ kurâ domodo awâkâ einwânsemo lâpylâ. Aituo ise kywymâry Roma donro modo kagâ iewiâpadaynlymo. Kagâ âseguelybyze âsesemo, kainzemo, Deus ety sakalaguezemo warâ — kelymo.

<sup>49</sup> Ilâem Caifás myakâwâm kurâdo eynynâ Deus agâ aguewâni modo iwymâry kuru. Aituo myani aguely:

— Âdy mâuntuwâbyra âmaemo!

<sup>50</sup> Jesus kydyâen-honre, kydadainhopa kitoem! Tokalâ iguelylâ ise koendonro, idânârâ kyigüepa kitoem — kely.

<sup>51</sup> Âdatâkely awyly nutuwâbyra myani mâkâ. Kurâdo eynynâ Deus agâ aguewâni modo iwymâry lâwâne mâkâ ilâem, Jesus izetonro keba olâ myakâwâm. Alâ wâne, Deus nhutuen-honly, Jesus, judeu domodoem iguely awyly. Tyangahu odano kulâ mâkeba myani mâkâ agueho, Deus nhutuen-hoymbylâ.

<sup>52</sup> Kurâ judeu domodoem kulelâ inkâba Jesus iguely, idânârâ kurâdo onro anano mo-domoem. Mâkâ iguely, idânârâ tâinwânni modo tâinkonro lelâba, mâkâ nheinwântomoem, tokaleom ara lelâ itoem.

<sup>53</sup> Ilâ umelâ myani judeu domodo iwymârydo Jesus xyâhoem aguelymo.

<sup>54</sup> Awlylygue Jesus kurâdo tâentoem kehoem nadakobâbyra awlyly. Judeiadâpa âxiguely. Âtâ anary Efraim kehoam idâly; âji âdy peba ato iwaguepa myani mârâ âji. Xina agâlâ akâwâm târâ awlyly.

<sup>55</sup> Iwaguepa akâwâm Pâscoa etyguedo. Toenzepa poji anaym tâtyuneim modo Jerusalémram idâly âty iraynâ. Kâzewenry ara aguidyly, kydokoguely wao warâ kydzâzetyguedoem. Tâzetyguedoem ohonze myani idâlymo.

<sup>56-57</sup> Fariseu domodo, kurâdo eynynâ Deus agâ aguwâni modo iwymârydo warâ, “Jesus âdykâ awlyly mâuntulymo-ro watay, xina xurutaungâ, xina nhawânehon-hoem” kehomobyry wâgâ, myani ohonze idâpyy modo Jesus nhuinlymo. Âjigüe adapâiguelymo:

– Âdara inanajimo? Âese wânkâ mâkâ âtyam? – kelymo.

## 12

*Maria Jesus ihuru onwa uriza nhapâdobyry*  
(Mt 26.6-13; Mc 14.3-9)

<sup>1</sup> Seis iguandyly Pâscoa etyguedoem awlyly ume, Jesus agâ xina idâly Betanianra, Lázaro etyram, iguepyyem awlyly ume kurâem nhetondyby.

<sup>2</sup> Xina saindyly ani. Kopae Jesus ipyniry anhedylymo. Marta pyni epâni. Lázaro pe lâpylâ Jesus agâ mesa wâgâ âwinduase.

<sup>3</sup> Xina âwinduadyly ume Maria uriza etary meio litru tâmânreim tâmaxi nhedyly. Nady nardo iwindy ekurugue aietyby ani mârâ uriza. Âjigüeto myani mârâ, âdy agâ itugândyby keba. Awlylygue toenzepa ewâendyly. Jesus ihuru onwa uriza nhapâdoly. Aitybyem tyangahudugue in-hugoguely. Toenzepa âtâ oday nhârânzely.

<sup>4</sup> Judas Queriote donro ani Maria aidyly nehoguebyra. (Jesus eynynonro modo ewy izepaom modo emaxi egamenribyrylâ awâkâ Judas.) Aituo Judas aguely:

<sup>5</sup> – Toenze tâwâenseim keba awârâ uriza! Awâkâ nhumegyuly! Awârâ uriza vende iedyly-ro watay, âdy pebaom modoram tâise ebyrypyry xuduly\* – kely.

<sup>6</sup> Âdy pebaom modo tintyendylygue inkâba ani arâ aguely, tâmagazeim tawlylygue. Dinheru Jesusram xuduypy etary eni ani mâkâ. Turâem tâtyze olâ mârâ odaji ietyby ewy.

<sup>7</sup> Aituo Jesus xinaram aguely:

– Arâ adâkezeba itaungâ Maria wâgâ. Kâjiwypazenehonwâdaundâ. Yigueduo ieguepybyry onwa tiampâdoem keankâ merâ pekodo xirâ nhekanâdoly. Niwânwâmpyra olâ, awlylygue iweâlâ wonwa nhapâdoly.

<sup>8</sup> Aunlolâ ise âdy pebaom modope awlyly. Urâ olâ ise âdiempa kulâ agâmo wawlyly – kely Jesus.

*Lázaro xyâly kehomobyry*

<sup>9</sup> Agui kurâdo Jesus Betaniadâ kely indadylymo myani. Aituo myarâ idâlymo; Jesus ese kulelâba olâ idâlymo, Lázaro ese lâpylâ, mâkâ Jesus eon-honrugue kurâem itondyby.

<sup>10-11</sup> Aituo, kurâdo eynynâ Deus agâ aguwâni modo iwymârydo âjigüe aguelymo:

– Lázaro kydyâen-honre lâpylâ warâ. Mâkâ kurâem itondyby tientuo, toenzepa kurâdo Jesus nheinwândylymo, kienomedâdomo neinwâmpyra idylymo. Âdara pylâka ise xyâhoem aguiendyly? – kelymo.

*Jesus Jerusalémram saintobyry*

(Mt 21.1-11; Mc 11.1-11; Lc 19.28-40)

<sup>12</sup> Kopaelâgâem Jerusalémram Pâscoa etygueze idâwâtyby modo, Jesus saindyly kely indadylymo.

<sup>13</sup> Toenzepa myani iomarumo, saindyly tiuntuduomo. Wakuri sary nhatâwâdoly; xidadâ odaypa egaselymo, tuomare kehoem Jesus iose.

– Hosana Deusram! – kelymo. (“Tohoguezeim Deus” keze aguely.)

Tohoguezeim kuru awâkâ Deus eon-honru enehonze âeni!

Koendâ lelâ ise Deus israelita domodo iwymâryem ini agâ

– kely kurâ domodo.

<sup>14</sup> Aituo Jesus jumentinhu nhawâdoly. Nhonwa âkuly. Iwâgâ idâly. Deus itaumbryry iweniby agueho ara aidyly:

\* 12:5 Tokalâ anu ara kehoem ewanopyry ewâendyly ara myani mârâ uriza ewâendyly ilâem.



15 “Âmaemo Jerusalém donro modo tyanepa itaungâ.

Etaungâ. Âwymârymo saindyly.

Pymâ ton-honreim kawaru wâgâ sainto ara inkâba ise âewyly;  
jumentinhu wâgâ ise saindyly!”

kely myakâwândy iweniby.

16 Jesus agâ tatay tâense, tydase warâ ani xina awârâ modo aidyly; âdakeze aguely awyly xina nutuba olâ. Igueypyem, Jesus kurâem itombygueduo, Deus eydâ atoam odopâduo warâ lelâlâ ani xina nhenanâguely, aise Deus kehobyry ara aituo.

17-18 Toenzepa kurâdo Jesus iose idâwâdylymo, xidadâ odaxi sainse idâly ume. Awârâ iraynâ, Lázaro igueypyem awyly ume kurâem nietondâ kely idamâmomy. “Lázaro, awâtârâba igasegâ” keduo aitobyry egatuly nimopamo myani enipyry modo.

19 Jesus wâgâ koendâ kurâ domodo aguely tindatuo, fariseu domodo âjigie aguelymo:

– “Jesus kâzeinwântaundâ” kykely neinwântaymbamo. Etaungâ! Idânârâ eagâ idâlymo – kelymo.

*Gregu domodo ewy Jesus agâ agueze idâhomobyry*

20 Gregu ewy idâypybe myakâwâm Jerusalémram âty aiese idâwâtyby modo duay. Judeu kebamo wâne, alâ olâ Deus nhyrendylymo.

21 Yataen-ho Filipe, Galiléia eynynonro, Betsaidadâ tâtyreim iose myakâwâm idâlymo. Aituo aguelymo Filiperam:

– Jesus agâ adâkedyze xina – kelymo.

22 Aituo myani Filipe, Andréram aguely.

– Gregüem aguewâni modo ewy Jesus agâ adâkedyze – kely.

Aituo azakâlâ Jesus agâ agueze idâlymo, Filipe, André alelâ.

– Judeu keba modo ewy agâ adâkedyze – kelymo.

23 Jesus aguely:

– Adainkâba, tâwâlâ nâedâmo. Iwaguepa, won-honru, koendâ wawyly warâ idânârâ kurâdo nheto.

24 Idataungâ aguely. Nady ewy tâtâzeba watay, agui nitaymba, tokalâ kulâ. Ondaxi etâduo olâ, tyazeze, ago tâise, tâwiseze, ewyem tâise warâ. Arâ ewy agui idyly – kely.

{“Yiguely, kurâem witondyly wipygueduo, toenzepa kurâ domodo yeinwânsemo” keze myakâwâm Jesus arâ aguely.}

25 Aituo Jesus aguely:

– “Ize wato aralâ ise awidyly. Tâwâlâ Deus nidâ” myguelymo-ro watay, âgueduomo, Deus agâ inkâba ise âmaemo. Eydâ atoam mydâwâpyra ise âmaemo. “Deus ize ato ara lelâ ise awidyly, ize wato ara kulâba, tâwâlâ ise kâsenagazedily, yiguely warâ” myguelymo watay olâ, Deus eydâ atoam idâze âmaemo, aunloenlâ.

26 Tywymâryem yizetonro modo, yeinwântaungâ. Auguely idataungâ warâ. Eydâ watodâ lâpylâ ise âmaemo. Pabai Deus koendâ ise yeinwânmi modo wâgâ aguely – kely.

*Jesus tyiguely wâgâ aguehobyry*

27 Aituo Jesus aguely:

– Takalague urâ iwerâ. Inepa kâzenagazeoly awyly, tutuze urâ. “Kâsenagazedo amaymba yekâ” keze urâ Pabairam? Arâ auguepa ise aze! Xirâ onro anaxi igueze âetybylâ urâ.

28 “Koendonro typygueim keba warâ on-honru enehongâ” keze olâ urâ Pabairam – kely.

Aituo kaynâ tâjitanru aguely:

– Koendonro typygueim keba warâ won-honru senen-ho. Kânehondyly ise-ro warâ – kely.

29 Atonlo modo tâjitanru kau odaypa âeni indadyly. Aituo akaemo modo ewy aguely:

– Kopâ awârâ agueim! – kelymo.

Eagonro modo warâ agueim:

– Kopâ keba agueim. Anju eagâ agueim – kelymo.

30 Warâ olâ Jesus aguely:

– Kopâ keba, anju keba warâ agueim. Urâem inkâba Pabai târâ kaynâ aguely âmaemoenlâ.

31 Inepa kehoem Deus agueze xirâ onro anaym yeinwântânry modoram: “Âmaemo tâwentâzeim inakanhe amidylymogue” kely ise. Inepa ise Deus, Diabu pymâem ato xirâ anaym nhainly. Adidendyse tato anientaymba ise Diabu.

32 Kruz wâgâ sakâjibyem kadaunâhonduo, eon-honru sainze urâ. Idânârâ nynonro modo igâseze urâ, yeinwântomoem – kely Jesus.

33 Adâkezelâ ani Jesus tyiguely iraynâ, âdara tyiguely awyly wâgâ.

34 Atonlobyry modo aguelymo:

– Nigüewâpyra ise Messias, tâkezema kâzewenry iweniby wâgâ. Aunloenlá ise awâkâ Deus Ingonotyby, tâkeze warâ. “Urâ Uguondo Kaynâpa Âetyby yigüehoem kruz onwa âiehoze urâ” mygüeaki olâ. Messiaslá âmâ-ro watay, âdaituo pylâka “Igueze urâ” mygüely? – kelymo.

<sup>35</sup> Aituo Jesus in-hoguly:

– Kydadakobâdo tâense wâne kydaze peto oday, myara ise Deus ize ato ara adâjidyly inomedâdomobyry mâuntulymo. Yeinwântaungâ, yeinwântomo nhuduly umelâ. Âdiempa kulâ ise agâmo wawyly. Yeinwântaungâ, iamu odaxi âsenagazeze mydâpa mitomoem. Iamu oday adakobâni modo wâne âdyam tâtâly nepyry, myara ise awâkâ yeinwântânry modo tâsenagazedoam tâtâly nutubamo awyly.

<sup>36</sup> Agâmo wataylâ, auguely einwântaungâ. Arâ ise peto oday adakobâni ara mawylymo – kely.

*Toenzepa judeu domodo ewy Jesus neinwâmpyry atobyry*

Agueypyem Jesus târâpa âxigüely, kurâdo tâempyry itoem.

<sup>37</sup> Jesus aidyly tâensemo lelâlâ wâne myakâwâm, arâlâ olâ agui judeu domodo neinwâmpyry awylymo.

<sup>38</sup> Saguhoem Deus wâgâ agueypy Isaías aguehobyry ara kehoem aidyly:

“Deus, agui kurâdoram xina âtaumbyry negatu,

aguipa kulâ olâ keankâ xina aguehobyry einwânni.

Tâensemo lelâlâ wâne toenzepa on-honrugue amânhetyby,

aguipa kulâ olâ âinwânni modo”

kely iweniwâm Isaías.

<sup>39</sup> Deus izepa tawlylmogue neinwâmpyry awylymo. Saguhoem Isaías inwenihobyry ara iwerâ aidyly:

<sup>40</sup> “Deuslá mawânkâ tienkyly modo nutuba itomoem aienehonrim, nhangahumo nhuanwanâdyly waunlo ara.

Warâ neinwâmpyry awylymo,

Deus ton-honru tânehonzelâ wâne,

Tytaumbyry nhegatuem-hoymby nidadâmolâ wâne warâ.

Tâinwânsemo wâne watay,

tâsemaguezemo tâise”

kely Isaías.

<sup>41</sup> Deus, Jesus wâgâ aitaynrim modo nhenehonduo, mâkâ arâ inwenily. Awylygue arâ Jesus wâgâ inwenily.

<sup>42</sup> Agui myani judeu iwymârydo Jesus einwânni modo, ânguyram negatubamo olâ myakâwâm. Fariseu domodo tâdâtâdyguyhoam tâkaunâbyra awyly nhytaguylymo.

<sup>43</sup> Kurâ domodo kulâ tohoguedyze atomo, Deus keba tohogueniem ize atomo.

*Jesus kâmakeze âetobyry*

<sup>44</sup> Ton-honre kehoem Jesus aguely:

– Urâ kulelâ inkâba yeinwânni modo nheinwânklyly, mâkâ ugononibyry lâpylâ warâ.

<sup>45</sup> Utuwâni modo ugononibyry tutuzemo lâpylâ.

<sup>46</sup> Urâ iajimanâni emyenro xirâ onro anaxi kâewyly, yeinwânni modo Deus itaumbyry nhutuhomoem. Kâewyly ani, yeinwânni modo iamu odaypa iese.

<sup>47</sup> Ânguy ewentâze inkâba xirâ onro anaxi kâewyly. Xirâ onro anano modo emakeze kâewyly, enagazezemo inkâba.

<sup>48</sup> Augueho tindadyseba neinwâmpyry waunlo olâ xypyry etay, tâdâsenagazedoam igonose Deus.

<sup>49</sup> – Unâry wâgâ kulâ inkâba awidyly. Pabailâ ugononi, awitoem, auguehoem warâ.

<sup>50</sup> Deus aguehobyry ara lelâ amidylymo-ro watay, eagâpa mitaymba ise âmaemo. Âgüeduomo, idâze âmaemo aunloenlá eagâ mitomoem. Tutuze urâ, xirâ âkealâ awyly; Pabai “Aguekâ” kehobyrylâ xirâ augueho – kely Jesus.

## 13

*Jesus, tynynonro modo in-hugoguehobyry*

<sup>1</sup> Tokalâ iguandyly kulelâ, Páscoa etyry adaguhoom. Tutuze myani Jesus tyigüeho saindyly awyly, xirâ onro anaymba tâito, tunwynram todopâdo. Toenzepa xina inwinedyly tânehonze kâinane, tyigüeho odaxi kehoem.

<sup>2</sup> Kopae Jesus agâ xina âwinduadyly ani. Awârâ iraynâ, Diabu, Judas Queriotte donro, Simão imery, nhangahu odaji xunâry nhedyly, Jesus tyândyze donro modoram nhegamehoem.

<sup>3</sup> Idânârâ adienkyly modo adientoem Tunwym ton-honru tuduze awyly, tutuze akâwâm Jesus. Deusdâpa tâewyly, eyam todopâdyly warâ, tutuze myani.

<sup>4</sup> Xina âwinduadyly umelâ Jesus saudyly. Tâty BOH waunlo nhetyly. Ilâpygueduo toalha nhanâdyly, âzepagâjily.

<sup>5</sup> Adâpygueduo, paru bacia odaji XU nhedyly. Tokalâ, tokalâ warâ xina ihuru ingokely. Ilâpygueduo, toalhague xina in-hugoguwâdyly\*.

<sup>6</sup> Simão Pedroam saintuo, mâkâ tuhuru igokedyzeba, âdykâ pymâ ânguy ihuru ingokely nepyra tawylgyue. Aituo Jesusram aguely:

– Urâem tâwaneim mâkeba âmâ, Pymâ. Awylgyue uhuru mâingokedyzeba wawylly – kely.

<sup>7</sup> Aituo Jesus eyam aguely:

– Iwerâ mâuntuba wâne âmâ âdaituo arâ awidyly awyly. Xutuze olâ âmâ – kely.

<sup>8</sup> – Uhuru mâingokewâbyra ise âmâ – kely Pedro.

Aituo Jesus eyam aguely:

– Âhuru kâingokeba urâ-ro watay, ynynonro mâkeba ise âmâ – kely.

<sup>9</sup> Jesus agueduo, Pedro aguely:

– Pymâ, arâ atayma, uhuru lelâba igokegâ-ro, iemary, yangahu alelâ-ro! – kely.

<sup>10</sup> Aituo Jesus aguely:

– Kipygueduo, Idânârâ kodo tywykuneba, kuhuru lelâ tugozezeim, itybyem kaimpygueduo. Deus inakanhe matomobyry nhygakeduo, iweâ kulâ ityby ara âmaemo. Idânârâ tywykuneba wâne âmaemo; tokalâ olâ tywykeim Deus xurâem – kely Jesus.

<sup>11</sup> Tutuze myakâwâm Jesus, ânguy tuduery emaxi tyâhoem tâgamenri awyly. Awylgyue “Idânârâ tywykuneba wâne âmaemo; tokalelâ olâ tywykeim” kely, Judas agueho.

<sup>12</sup> Xina ihuru ingokebygueduo, Jesus tâty BOH waunlo nhetondyly. Mesa onwa ekadondyly. Xinaram aguely:

– Âdaituo âhugoguelymo mâuntuba mawyllymo.

<sup>13</sup> “Xina iwymâry”, tâkeze, “xina enomedâni” tâkeze warâ âmaemo yam. Âkealâ amyguelymo.

<sup>14</sup> Âwymârymo lelâlâ urâ, inomedânyo lelâlâ warâ, âhurumo olâ xigokeagui, tagonro emawydâni wâne myara. Agonromo ihugoguwâdaungâ lâpylâ, âsemawydâni mawyllymo mânehon-homoem.

<sup>15</sup> Aetomobyry ara amitomoem, âsemawydâdaungâ, imawydâdomobyry ara.

<sup>16</sup> Idataungâ auguely. Tâzemary, tywymâry takaze kehoem tynrentuneba; unâ sani, igononbyry takaze kehoem tynrentuneba.

<sup>17</sup> Âmaemoma midataimo auguely. Awidyly metaimo warâ. Âjigie mâsemawydâduomo, koendâ kehoem ise Deus agâmo.

<sup>18</sup> – Âmaemo kâinduakeyby modo âtudâmo urâ. Tutuze urâ, tokalâ âmaemo ewy agâ Deus koendâpa awyly. Deus itaumbry iweniby ara ise aidyly: “Uduery ise yagâ âwinduani” kely iweniby.

<sup>19</sup> Agâieholy wâgâ xirâ auguely, yizepanro modo emaxi kâzegameoly iraynâ, “Aise” uguehobyry aidyly-ro watay, URÂLÂ URÂ kelygue tâzekeim wawylly mâinwântomoem.

<sup>20</sup> Kâingonotaymy modo koendâ edaenkunri, urâlâ nhedaenkuly waunlo ara lelâ. Koendâ iedaenkunri, mâkâ ugononbyrylâ koendâ nhedaenkuly. Xirâ mâuntudzemo kuru wato – kely.

*Tâgamenri wâgâ Jesus aguehobyry*

*(Mt 26.17-25; Mc 14.12-21; Lc 22.7-13,21-23)*

<sup>21</sup> Agueypyem, toenzepa kehoem Jesus adahulily. Xinaram aguely:

– Idataungâ wao. Tokalâ âmaemo ewy ise yâdysedo modo emaxi iegamerim – kely.

<sup>22</sup> Aituo xina âzedyly. Toenzepa xina âseguadâdyly, ânguy agueho xina nutuba tawylgyue.

<sup>23</sup> Urâ Jesus toenzepa inwynegyuly iwaguepa ani iopay ekadybyem wawylly.

<sup>24</sup> Simão Pedro PUK PUK idyly, ânguy wâgâ Jesus aguely awyly auguehoem.

<sup>25</sup> Aituo ago Jesus iopaji udâly, kampâiguehoem:

– Pymâ, ânguyka ise âdysedonro modo emaxi igameim? – uguely.

<sup>26</sup> Jesus in-hoguly:

– Mâkâ pão ikuiby kâunduhobyry – kely.

Aituo pão SAGAI ietyby nhanâdyly, inkuily prato odanogue, Judasram nhuduly, Simão Queriotê donro imeryram.

<sup>27</sup> Judas pão nhemakely. Ilâenlâ Satanás emaxi idyly, Satanás “Aiekâ” kehobyry anetoem. Aituo Jesus eyam aguely:

\* 13:5 Tâwaneinhe sanâtyby modo myani adakobâni modo ihuru etary ekâjigieim, etyim, ihuru igokeim warâ.

– Amânhedyse mato inepa aiekâ – kely.

<sup>28</sup> Xina mesa wogonro modo nutuwâbyra akâwâm âdaituo Jesus arâ aguely awyly.

<sup>29</sup> Judas dinheru etary eni awylygue ani xina ewy tyangahu oday aguely:

Tâlâ pylâ wakeim modo:

– Jesus gâlâ keanra Judas pyny nghanâdyse âtyem warâ? – keim.

Eagonro modo aguely:

– Âdy pebaom modoram âdylâ nhuduen-honly lâgâlâ keanra Jesus – warâ kely.

<sup>30</sup> Pão emakeimbyryem, inepa kehoem Judas idâly. Iamu odaylâ egasely, kopae awylygue.

*Koendâ lelâ âjigie itaungâ, âpynedaungâ warâ*

<sup>31</sup> Judas âxigiebygueduo Jesus xinaram aguely:

– Iwaguepa urâ Uguondo Kaynâpa Âetyby yigueho. Yigueday ise won-honru, koendâ wawyly, Deus koendâ awyly, eon-honru warâ kênehonly.

<sup>32</sup> Deus koendâ awyly, eon-honru warâ enehonze urâ. Alâpylâ awâkâ, koendâ wawyly, won-honru warâ enehonze. Inepa ise awârâ aidyly.

<sup>33</sup> Tâjijunwym tymery inwynedo ara lâpylâ âwynedylymo. Âdiempa kulâ ise agâmo wawyly. Udâpygueduo, uize âmaemo. Judeu domodo iwymârydoam uguemy myara olâ âyanmo aguely: “Udâhobyryam mydâpa olâ ise âmaemo.”

<sup>34</sup> Iwelo tâzezewenry ise xirâ: “Mâkâ agâ, mâkâ agâ warâ âpynedaungâ, âwynedylymo ara.”

<sup>35</sup> Mâpynedylymo-ro watay, idânârâ kurâdo xutuze ynyonro mawylymo – kely.

*Jesus Pedroram, “Azagâ tokalâ warâ ‘Kâuntuwâbyra urâ awâkâ’ keze âmâ” kehobyry (Mt 26.31-35; Mc 14.27-31; Lc 22.31-34)*

<sup>36</sup> Aituo ani Simão Pedro Jesus nhapâiguely:

– Âdyanka ise mydâly, Pymâ? – kely.

Aituo Jesus in-hoguly:

– Iwerâma ise âmâ udâhobyryam mydâpa. Iweâkuba ise mydâly – kely.

<sup>37</sup> Pedro nhapâiguedyly:

– Âdaituoka iwerâ mydâhoram, udâpa wawyly? Kâmayno amaymba imakeze iguein-em kâdutuly! – kely.

<sup>38</sup> Aituo Jesus eyam aguely:

– Âkeaka? Xirâ enanâguegâ. Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely – kely.

## 14

*Jesus ânwa Kunwyn-am tâdâtâho*

<sup>1</sup> Aituo Jesus xinaram aguely:

– Tytyremba, tâseguâdâzeba warâ itaungâ. Deus einwântaungâ, yeinwântaungâ lâpylâ warâ.

<sup>2</sup> Pabai eydâ atodâ toenzepa âtâ modo mâxidâdomoem. Ijidylo nhonse udâly. Aypa-ro watay, auguewâpyra tâise urâ.

<sup>3</sup> Ijidylo nhonse idâppyem, odopâze urâ, nhesemo, yagâ eydâ watoam mydâhomoem.

<sup>4</sup> Tutuze âmaemo ânwa eydâ watoam kani – kely.

<sup>5</sup> Aituo Tomé aguely:

– Xina nutuwâbyra âdyam mydâly awyly, Pymâ. Tutuzeinhe inkâba awârâ ânwa âyam tâdâtâho – kely.

<sup>6</sup> Aituo Jesus aguely:

– Ânwa Pabairam tâdâtâholâ urâ. Yagâ lelâ âdy iozeno awyly âduuoly. Ywâgâ lelâ Deus eydâ atoam tadayly. Yeinwânni modo lelâ ise Pabairam idâim. Yeinwâmpyra âmaemo-ro watay, Pabairam aintaymba âmaemo. Yeinwântuomo lelâ eyam aindylymo.

<sup>7</sup> Iwerâ utudâ âmaemo. Pabai xutuze lâpylâ âmaemo. Ietâ, utudâ warâ mawylymogue, Pabailâ mâuntulylo, mâenkylymo warâ – kely.

<sup>8</sup> Aituo Filipe aguely Jesusram:

– Pymâ, Kunwym Deus enehongâ. Awârâ kulâ xina nhekagulyly, tuomazehoem – kely.

<sup>9</sup> Aituo Jesus aguely:

– Filipe, iweâpa lelâlâ wâne agâmo wawyly. Ânguy wawyly mâuntuba lelâ waunlo ara olâ âmâ! Ieni modo, Pabai tâensemo lâpylâ. Awylygue ietâ kulâ, “Pabai mygueho enehongâ” tâkezeba ikâ.

<sup>10</sup> Pabai agâ tokalâ wawyly; yagâ tokalâ Pabai awyly warâ tâinwânse wânkâ âmâ, Filipe? – kely.

Aituo Jesus xinaram aguely:

– Yangahu odano kulâ mâkeba xirâ augueho, Pabai “Aguekâ” kehobyrylâ. “Aiekâ” kehobyrylâ agânhekyly warâ.

<sup>11</sup> Auguely einwântaungâ. Einwântaungâ Pabai agâ tokalelâ wawyly. Auguely wâgâ yeinwândyseba mataymo, Pabai Deus eon-honrugue agânhetaymby modo mâentybymo wâgâlâ yeinwântaungâ.

<sup>12</sup> Idataungâ auguely. Idânârâ yeinwânni modo agânhetaymby modo aiese. Yara adyenyenry modo anhetoom agueypyem urâ, adyenyenry ton-honreim lelâlâ. Inepa ise Pabairam udâly. Urâ lelâlâ agânheto nuduompyrama ise.

<sup>13</sup> Agânhetoom mâenkadybymo aiese urâ, iezedy wâgâ idânârâ kehoem agânhetoom amyguehomobyry. Pabai ton-honreim, koendonro warâ awyly kênehohoem ise awidyly.

<sup>14</sup> Idânârâ iezedy wâgâ mâenkadybymo aiese urâ – kely Jesus.

“*Deus Ispiritury igonose urâ*” *Jesus kehobyry*

<sup>15</sup> Aituo Jesus aguely:

– Ywynedâ mataymo, auguehobyry lelâ aietaungâ.

<sup>16</sup> Pabairam ekaze urâ, âurunimo ingonotoem. Odokewâbyramo ise; alâ ise agâmo awyly. Deus Ispiriturylâ ise mâkâ. Mâkâ ise Deus wâgâ âkealâ kuru agueim.

<sup>17</sup> Deus eynynâboom modo agâ inkâba Deus Ispiritury. Nutuwâbyramo netaymbamo warâ ise. Âmaemo olâ xutuze. Alâ mawânkâ agâmo awyly.

<sup>18</sup> – Âxiguze wâne urâ, omopamo olâ ise urâ. Agâmo witoem odopâze urâ.

<sup>19</sup> Inepa ise Deus eynynâboom modo iepyra idylymo. Âmaemo olâ iese. Igueypyem kurâem witondobyry wâgâ ise Deus agâpa mâseagongueba mawylymo; igueypyem, yagâlâ ise âmaemo.

<sup>20</sup> Kurâem witonduo ise mâuntulymo, Pabai agâpa wipyra wawyly. Yagâpa mipyra mawylymo, agâpamo wipyra wawyly warâ mâuntulymo.

<sup>21</sup> – Yeinwânni modo, auguehobyry idani modo warâ ywynedâ tawyly tânehonzemo. Ywyneni tywyneze Pabai. Iwynezemo lâpylâ urâ, koendâ utuhomoem aiese urâ – kely.

<sup>22</sup> Aituo Judas, Jesus nhapâiguely, Queriote donro keba olâ, eagonro:

– Âdaituoka ise xinaram kulelâ mâenehonly; Deus eynynâboom modo pylâ nepyramo-ro warâ awyly? – kely.

<sup>23</sup> Aituo Jesus in-hoguly:

– Ywyneni modo auguehobyry lelâ ise anhekylymo; Pabai iwynezemo lâpylâ. Eagâmolâ ise xina-ro warâ.

<sup>24</sup> Ywynedânry modo auguehobyry takazemo lelâ. Urâ kulâ mâkeba xirâ mâindakylymo agueim, Pabai aguehobyryenlâ xirâ auguely.

<sup>25</sup> – Agâmo wawyly umelâ xirâ auguely.

<sup>26</sup> Âxiguze urâ. Âurunimo âyanmo âese olâ. Deus Ispiritury ise mâkâ, Deus ingonotyby ietaybyaji agâmo itoem. Idânârâ âyanmo auguehobyry enanâgueze, inomedâzemo warâ auguehobyry modo mâuntuohomoem.

<sup>27</sup> – Yara madahuliba âese. Xirâ onro anano modo toenzepa ise adahulilymo, eanumo warâ. Âmaemo olâ tadahulizeba itaungâ, tyanepa warâ.

<sup>28</sup> “Idâze wâne urâ, odopâze olâ urâ” uguely midataimolâ. Toenzepa awârâ mâindatuomo madahulilymo. Tadahulizeba itaungâ. Urâem koendâ lelâ aidyse mataymo, tâjityenzeba itaungâ; tuomare itaungâ, Pabai ugononibyryam kodopâdyly awylygue. Yakadâ ton-honreim kuru mâkâ lelâ, unâ sodo ton-honreim kuru, egatuim takaze.

<sup>29</sup> Pabairam udâly iraynâ xirâ auguely âyanmo. Udâduo ise, auguehobyry âkealâ awyly mâinwândylymo.

<sup>30</sup> Agâmo alâ auguezesedyly witaymba ise urâ. Deus eynynâboom modo iwymâry Diabu saindyly mawânkâ. Ton-honreba olâ ise mâkâ yagâ.

<sup>31</sup> Idânârâ, Pabai “Aiekâ” kehobyry lelâ agânhekyly, Pabai tywyneze lelâlâ wawyly, eynynâboom modo nheinwântomoem.

– Autaungâ. Inoro tarâpa – kely ani Jesus.

## 15

*Uva ipery emyenro awâkâ Jesus*

<sup>1</sup> Jesus xinaram aguely:

– Uva ipery emyenro urâ. Pabai pylâ uva eni emyenro-ro warâ. Se tywindyen-ro watay, iwatary modo niguwâpyra, arâ lâpylâ urâ, ynynonro modo niguepa itoem aienehonrim wawyly.

<sup>2</sup> Deus aguehobyry adienydysebaom modoma uva iwatary ewisedânry emyenro. Uva iwatary ewisedânry eni tatâwâze myara, ise Pabai tydatânry modo tygue nhedyly. Uva iwatary ewisenri watayma eni tâense, tuonse warâ. Inakai modo lelâ nhatâwâguely, iwatary toenzepa ewiseondoem. Arâ lâpylâ Pabai, tynynonro modo odaypa izepa tato nhetyly, ize tato lelâ anhetomoem.

<sup>3</sup> Pabai inakanhe amimito nhygakely ani, inomedâdomobyry mâinwântomobyry wâgâ.

<sup>4</sup> Yeinwânsezedaugâ lelâ, yagâpa mâiehewâbyra ise âmaemo; agâpamo wipyra ise urâ warâ. Uva iwatary wâne ipery wâgâ atay lelâ ewisely myara lâpylâ âmaemo, yeinwântuomo lelâ Deus ize ato ara amidlymo.

<sup>5</sup> – Uva ipery emyenro urâ, uva iwatary emyenro âmaemo-ro warâ. Ipery wâgâ wâne uva iwatary koendâ kehoem PE warâ awyly, myara ise yagâpa itânry modo koendâ lelâ Deus ize ato ara aidyly. Urâ peba kulâ, mâkâ ize ato ara amipyra âmaemo.

<sup>6</sup> Uva sodo iwatary satârimbyryem, âpa ezaypa nhamely. Aituo iwatary modo iladyly. Ilâpygueduo, indâtyguely, nhaduândyly. Awyara ise, yagâpanro modo Deus iopayba iedyly. Petomâ onwanxi ise samely, mârâ uva iwatary ewisedânry iaduânto ara.

<sup>7</sup> – Yagâpa mipyra âmaemo, âyanmo auguehobyry mâinwânsezedylymo lelâ watay, emakeze lelâ âmaemo idânârâ Pabairam mâenkadybymo.

<sup>8</sup> Koendonro amânhedysemo wato amânhedilymo watay, uva iwatary tâwiseim emyenro ise âmaemo. Deus koendâ awyly, eon-honru warâ enehonze âmaemo amânhekilymo wâgâ. Arâ ise ynynonro kuru mawilymo mâenehonlymo.

<sup>9</sup> Pabai ywynedyly ara lâpylâ âwynedylymo. Auguehobyry ara lelâ aitaungâ, âwynedâmo wawylygue.

<sup>10</sup> Pabai agânhedyse ato agânhepyra witaymba urâ. Awylygue kadahuliba wawyly, ywynedâ awyly tutuze urâ. Arâ lâpylâ, “Aietaungâ” ugueho mâinmopa âmaemo-ro watay, madahuliwâbyra ise âmaemo, âwynedâmo wawyly enanâgueze âmaemo.

<sup>11</sup> – Madahulidyzemo inkâba urâ, awylygue ârudilymo, tuomare lelâ mitomoem.

<sup>12</sup> Xirâ auguehobyry ara aitaungâ: “Agonromo agâ âpyndaungâ; koendâ mâzetomo ara lâpylâ agonromo agâ koendâ âzetaungâ.”

<sup>13</sup> Mâkâ tataen-ho emakeze iguerim mawânkâ tataen-ho iwyneni kuru.

<sup>14</sup> Auguehobyry amânhedilymo watay, yataen-ho âmaemo.

<sup>15</sup> “Yataen-ho” uguely âyanmo; “iemarky” uguely mâkeba. Awylygue agâmo unâgu ywâgâ aini wâgâ. Pymâ tywâgâ aguewâpyra tâmarydoam. Âyanmo olâ auguely, idânârâ Pabai “Aguekâne” kehobyry.

<sup>16</sup> – Âmaemo mâkeba keankâ atâen-homoem witoem uduakeim; urâlâ keankâ âduakenrimo, Deus ize ato amânhetomoem, yeinwândyly mâinmopa mitomoem. Arâ ise uva iwatary tâwiseim ara mawilymo, ewily inakanhe itânry. Ywâgâ mâenkadylymo-ro watay, idânârâ mâenkadybymo xuduze lelâ Pabai.

<sup>17</sup> Awylygue, xirâ auguely: “Agonromo agâ âpyndaungâ; koendâ mâzetomo ara lâpylâ agonromo agâ koendâ âzetaungâ.”

*Jesus nheinwândylymogue eynynonro modo âzenagazeoze*

<sup>18</sup> Jesus xinaram aguely:

– Ynynâbaom modo âizepamo watay, enanâguewâdaungâ, âizepamo idyly iraynâ yizepa atomobyry.

<sup>19</sup> Deus eynynâbaom modo eynynâlâ âmaemo-ro watayma tâise âwynedylymo. Saguhoem Deus eynynâba wâne ani âmaemo, alâ olâ âduakelymo urâ xurâem mitomoem. Awylygue iwerâ Deus eynynâbaom modo anhekyly amânhedyseba mawilymo. Awylygue âizepamo awylymo, inagazedilymo warâ.

<sup>20</sup> – Auguehobyry enanâguewâdaungâ. Tâzemarky, tywymâry takaze kehoem tynrentuneba. Pymâ eto ara lâpylâ ise emary modo âzeholy. Ienagazeni modo inagazezemo lâpylâ. Kâunrutomobyry anhedilymo-ro watay, mâunrutomo aiesemo lâpylâ.

<sup>21</sup> Mâzenagazeoly mo ise, ynynonroem mawilymogue. Mâkâ ugononibyry nutubamo mawânkâ.

<sup>22</sup> Xirâ onro anaxi kâewyly, Deus wâgâ agueze. Tindatuo, neinwântaymbamo ani. Kâepyra urâ, eyanmo auguepa warâ watay, tâwâlâ tâise aguelymo: “Âdykâ Deus itaumbry xina nidataymba. Tânazageduneba xina, tindatânry kulâ neinwâmpyra tawylygue” kelymo tâise. Auguely tydase, agânhekily tâense warâ akaemo, yeinwâmpyramo olâ; xypyry etay Deus enagazezemo.

<sup>23</sup> – Yizepanro modo, Pabailâ izepa atomo lâpylâ.

<sup>24</sup> Enanaynmolâ adyesenry modo kehoem agânhedyly. Idânârâ olâ yeinwâmpyramo. Xirâ adyesenry modo agânhepyra urâ-ro watay, “Tâwentâguezeinhe mawilymo” aguewâpyra tâise

Deus. Akaemo iwerâ tâwentâguezeim, agânhetyby tâensemolâ mawânkâ, yeinwâmpyramo olâ. Yize inkâba akaemo, Pabai izepamo lâpylâ warâ.

<sup>25</sup> “Warâ ise aidyly” tâkezelâ Deus. Iwenibyem itaumbry awo wâgâ: “Âdaituoba kulâ yizepa awylymo” kely iwenibybe.

<sup>26</sup> – Âurunimo âese, Deus Ispiritury keho, Deus eydâpalâ âeni. Deus wâgâ âkealonro ise inomedâdomo. Pabaidâpalâ ise âyanmo kâingonodyly, ywâgâ agueze lâpylâ mâkâ.

<sup>27</sup> Xirâ onro anaym iewanu kanguly umelâ yagâ mawylymo. Awylygue ise ywâgâ mâindatybymo, mâentybymo warâ mâengatulymo – kely Jesus.

## 16

<sup>1</sup> Jesus xinaram aguely:

– “Ynynonro modo, ynynâbaom modoram âzenagazeoze” tâkeze urâ. Aidyly-ro watay, âtywambyramo, yeinwândyly mâinmopamo warâ mitomoem olâ auguely.

<sup>2</sup> Âtâ tâdâtâdyguyho odaypa igaseânzemo, akaemo âhomo sainse. Âlymo-ro watay, Deus ize ato aralâ adâidyly waunlo ara ise enanjimo. Iozepa kulâ olâ arâ âpaunzedilymo.

<sup>3</sup> Arâ aidylymo olâ ise, utuba, Pabai nutuba warâ tawylymogoue.

<sup>4</sup> Aidyly iraylâ olâ xirâ âyanmo auguely, mâzenagazeoduomo, madapâendyba mitomoem. “Kyam Jesus aguehobyrylâ xirâ aini” keze âmaemo – kely.

*Deus Ispiritury ewano*

Jesus aguely:

– Yeinwâmpygueduomo, âdara mâzenagazeolyo awyly wâgâ auguepa ani urâ, agâmolâ wawylygue.

<sup>5</sup> Inepa olâ ise udâly, mâkâ ugononibyryam. Âmaemo ewy olâ yapâigueba: “Âdyanka ise mydâly?” myguepamo.

<sup>6</sup> Toenzepa âtynrumo, “Âydâpamo widyly” uguely mâindatuomo. Tâseguâdâzeba itaungâ.

<sup>7</sup> – Idataungâ auguely. Udâly lakuru âmaemoem koendonro. Udâpa urâ-ro watay, Âurunimo nâetaymba ise. Udâduo olâ, âyanmo igonose urâ.

<sup>8</sup> Deus Ispiritury âetuo, agueze mâkâ ynynâbaom modoram: “Wamyguelymo: ‘Tutuze xina, Deus ize ato, izepa ato warâ. Tutuze xina, koendonro, koendonro keba warâ. Tutuze xina, Deus ânguy nigonopyra awyly tâdâsenagazedoam âsenagazedoem’ myguelymo. Iozepa olâ amyguelymo” kely ise eyanmo.

<sup>9</sup> – “Tutuze xina, Deus ize ato, izepa ato warâ” kelymo. Iozepa kulâ aguelymo, yeinwâmpyramo mawânkâ.

<sup>10</sup> “Koendonro, koendâpaom warâ tutuze xina” kelymo. Iozepa kulâ aguelymo. Pabairam idâze urâ; ietombyra ise âmaemo-ro warâ. Myarâ kodopâduo ise koendonro lelâ wawyly mâuntulymo. Ietombyra ise âmaemo-ro warâ.

<sup>11</sup> “Tutuze xina, Deus ânguy nigonopyra awyly tâdâsenagazedoam âsenagazedoem” kelymo. Iozepa kulâ aguelymo lâpylâ. Saguhoenlâ Deuslâ agueim: “Urâ xurâ keba modo iwymâry aunlolâ ise infernudâ âsenagazedily” keim. “Ynynâbaom modo lâpylâ aunlolâ infernudâ Deus enagazenehonze” keim lâpylâ.

<sup>12</sup> – Tâlâ urâ toenzepa âyanmo augueho, mâuntuomoem nudupa olâ, toenzepa mawânâ iwerâ âtynrumo.

<sup>13</sup> Deus Ispiritury âetuo olâ, âyanmo xutuen-honze, idânârà âkealonro Deus mâuntudyzemo ato. Âdy aini awyly wâgâ ise mâkâ aguely. Tyangahu odano kulâ mâkeba ise mâkâ agueho. Mâkâ agueho olâ ise Kunwym Deus tyam aguehobyrylâ.

<sup>14</sup> Auguehobyry, âyanmo enanâguehonze mâkâ. Arâ ise mâkâ, koendâ wawyly, won-honru warâ nhutuen-honly.

<sup>15</sup> Idânârà agueho modo, Pabai aguehobyrylâ. Deus Ispiritury auguely idase, âyanmo egatuzero warâ – kely.

*Tâjitynru, tojiomaru warâ*

<sup>16</sup> Jesus xinaram aguely:

– Iweâ lelâlâ ise iepyra midylymo. Inepa olâ ise, ietondylymo – kely.

<sup>17</sup> Xina âjigue aguely:

– Âdakeze aguely awyly kiuntuwâbyra kurâ, “Iweâ lelâlâ ise iepyra midylymo. Inepa olâ ise ietondylymo” keduo. Wakeanry lâpylâ: “Iepyra mawylymo ise, Pabairam udâly awylygue” keanry.

<sup>18</sup> Âdakezeka “Inepa olâ ise, ietondylymo” kely? Kiuntuwâbyra kurâ awârâ – xina kely.

<sup>19</sup> Agueho koendâ xina nutuba awyly, tutuzelâ olâ Jesus. Awylygue aguely:

– Idataungâ auguely. Adâkeonze urâ warâ. “Iweâ lelâlâ iepyra ise âmaemo. Inepa olâ ise ietondylymo.” Xirâ kebaka agonromo agâ madapâiguehomo?

<sup>20</sup> Toenzepa âjityenze, eogumase warâ âmaemo. Ynynâbaom modo iomamunumo ume, tytynre ise âmaemo; omarumoem ise olâ awârâ.

<sup>21</sup> Tymery egaseday, pekodo tuomaruneba ewânugue. Iamudo iazepygueduo olâ toenzepa tuomazeze, tymegeu mawânkâ.

<sup>22</sup> Arâ ise âtynrumo aunloenlâ nipyra awyly. Tytynre âmaemo iwerâ, “Iweâ lelâlâ ise iepyra midylymo” ugeduo, nhetonzemo olâ urâ. Aituo ise toenzepa omarumo. Ânguy tuomareba ânehonwâbyramo ise.

<sup>23</sup> – Âurunimo âetuo, inomedâzemo mâkâ. Agâmopa lelâlâ wâne ise urâ, mâkâ olâ ise agâmolâ. Tâwâlâ mapâiguelymo mâuntudânrymo wâgâ. Idataungâ auguely. Iezedy wâgâ Pabai uguelhoem mâenkadylymo-ro watay, xuduze mâkâ âyanmo.

<sup>24</sup> “Jesus ezedy wâgâ xina nhekadyly” myguepa lelâ olâ âmaemo Deus agâ. Ekadaungâ. Mâenkadybymo emakeze âmaemo, toenzepa omaromoem. Xirâ mâuntudyzemo kuru wato – kely.

*Jesus eon-honru, Diabu eon-honru takazeno kuru*

<sup>25</sup> Jesus aguely:

– Tutuzenryem xirâ unâ kêengatuly, âdaunlo Deus awyly wâgâ inomedâdomoem. Tutuzeinhelâ inomedâdomo sainse olâ. Mâindakylymoenlâ mawânâ ise âyanmo Pabai wâgâ auguely.

<sup>26</sup> Mârâ ume, Deus agâ amyguedaymo, “Xina xirâ nhekadyly Jesus ezedy wâgâ” keze âmaemo. Âmaemoem auguezesedyly witaymba ise urâ. Âmaemolâma ise eagâ ageuim.

<sup>27</sup> Pabai âwynedâmo awylygue, koendonro xuduze mâkâ âmaemoem. Ywynedylymogue, Deusdâpa kêewyly tâinwânse mawylymogue warâ âwynedylymo.

<sup>28</sup> Xirâ anaxi kêatoem, Deus ingonotyby urâ. Inepa ise tarâpa widyly. Pabairam ise udâlly – kely Jesus.

<sup>29</sup> Aituo xina aguely:

– Iweâma tutuzeinhelâ amyguely. Amyguedyse mato moempyra âmâ.

<sup>30</sup> Idânârâ tutuze mawyly, tutuze xina. Xina apâiguely iraynâlâ, tutuze âmâ, xina adâkedyze ato. Awylygue Deuslâ ogononi awyly xina nhutuly – xina kely.

<sup>31</sup> Jesus aguely:

– Deus ingonotyby wawyly tâinwânse lelâlâ wâne âmaemo, arâlâ olâ koendâ yeinwâmpyra mawylymo.

<sup>32</sup> Inepa ise wodokelymo. Adapâeguywâze âmaemo, itymoam, itymoam ise âmaemo. Urâ kulelâ ise yânylymo. Urâ kulelâba olâ ise urâ, Pabai yagâlâ awylygue.

<sup>33</sup> Xirâ modo wâgâ auguely aidyly iraynâlâ, âtywambyra mitomoem. Yeinwântâ mawylymogue, koendâ lelâ itaungâ, tâseguâdâzeba. Xirâ anaym mawylymo ara ton-honre ise âmaemoem; âsenagazeze âmaemo. Tâegane olâ itaungâ. Won-honruma ynynâbaom modo iwymâry Diabu eon-honru takazeno kuru – kely Jesus.

## 17

*Jesus Tunwym agâ aguehobyry*

<sup>1</sup> Aguenripyryem, Jesus kauram MYK idyly. Deus agâ aguely:

– Pabai, amyguehobyry aralâ ise inepa yiguely. Âmery wawylygue, enehongâ koendonro wawyly, won-honru warâ. Arâ awidyly, koendonroem mawyly, on-honru warâ kêenehohoem lâpylâ.

<sup>2</sup> Idânârâ iwymâryem witoem amyguewâm. Kâenkily lelâ asaemo. Âmâlâ lâpylâ asaemo ynynonroem ienehonrimo. Awylygue ise ynynonro modo agâpa kânhenehomba wawyly; igueduomo, aunloenlâ agâ nidâmo.

<sup>3</sup> Akaemo aunloenlâ agâ itaynrim modo, idânârâ koendâ kehoem âtudâmo, âmâ lelâ Deus tokaleom mawyly. Utudâ lâpylâ asaemo, Jesus Cristo mâingonotyby wawyly. Kagâpa tyetuneba ise asaemo; igueduomo, idâzemo aunloenlâ kagâ itomoem.

<sup>4</sup> – Koendonro mawyly, on-honru warâ senen-ho, xirâ anaym wawyly ara. Âwanu aiese ugonotobyry sewanike warâ.

<sup>5</sup> Pabai, târâ agâ wawyly ume, tâdyren-honze akâwândy urâ, onro peba awyly ume. Tâwâlâ kâdyren-hondonji, izay watay kâdyren-hon-hobyry ara.

<sup>6</sup> – Pabai, ynynonroem mânhenehonwâdyby modoram ânguy mawyly senen-ho. Âmâ xurâ lâpylâ asaemo. Âmâlâ ynynonroem ienehoinmo. Amygueho tâinwânse asaemo.

<sup>7</sup> Tutuze asaemo, idânârâ agânhetaymby modo, won-honru mâunduypyguelâ agânhetaynly awyly.

<sup>8</sup> Unâ eyanmo kêengatuhoem amyguehobyry segatu. Auguehobyry neinwândâmo. Eydâ matodâlâ mâingonotybyenlâ kêewyly awyly, tutuze asaemo.



<sup>9</sup> – Pabai, âyam kâenkadyly, koendâ asaemo mâentoem. Yeinwântânry modo mâentoem kâenkadaymba urâ. Ynynonro modo olâ koendâ egâ. Âynynonro lâpylâ mawânkâ asaemo.

<sup>10</sup> Idânârâ ynynonro modo, âynynonro lâpylâ. Idânârâ âynynonro modo, ynynonro lâpylâ. Adâkeday, adientay warâ tânehonzemo, koendonro wawyly, ton-honre wawyly warâ.

<sup>11</sup> – Inepa ise udâly eydâ matoam. Xirâ anaymba ise urâ; asaemo olâ ise tarâlâ, yeinwântânry modo duaymo ise-ro warâ. Pabai, koendonro lelâlâ âmâ; inakanhe amitaymba âmâ. Toenzepa ton-honreim lâpylâ âmâ, on-honrugue awitoem yam amygue. Asaemo ynynonro modo egâ on-honrugue, tokaleom ara lelâ itomoem, urâ, âmâ warâ tokaleom kydawlyly ara.

<sup>12</sup> Ijipyay, xirâ anaym eagâmo watay, on-honrugue tâensemo keankâ urâ. Asaemo ewy tokalâ kulâ keankâ ynynâba ini. Âunâry awo wâgâ iweniby aralâ keankâ aidyly, aise kehobyry aralâ.

<sup>13</sup> – Inepa ise eydâ matoam udâly. Tarâ xirâ anaym wawyly ara, ynynonro modo xurâem agâ auguely, nâjityembyra itomoem, tytyremba wato ara, imâem kehoem iomarumo nidâ.

<sup>14</sup> Eyanmo kâengatuhoem amyguehobyry segatu. Tâinwânse asaemo. Ynynâbaom modo adientyse ato, adientyse inkâba asaemo, ynynâbaom modo anhekyly, agânhedyseba wato ara lâpylâ. Awylygue, ynynâbaom modo izepa idylymo.

<sup>15</sup> – Pabai, ynynâbaom modo duaypa mâentyhomoem kâenkadaymba urâ. Diaburam nâdynanâoba itomoem xuahurumoem ikâ wao, uguely olâ.

<sup>16</sup> Ynynâbaom modo adientyse ato agânhedyse inkâba urâ, arâ lâpylâ asaemo adientysebamo awyly.

<sup>17</sup> Amyguehobyry ara lelâ anidâmo; idânârâ amygueho âkealâ mawânârâ.

<sup>18</sup> Âynynâbaom modo duaxi ugonotobyry ara, arâ lâpylâ asaemo kâingonodyly ynynâbaom modo duaxi.

<sup>19</sup> Âyam kâtuly, idânârâ agânhedyse mato agânhetoem, kâenmakehomoem. Arâ awidyly âmâ xurâem itomoem, ize mato anhetomoem warâ.

<sup>20</sup> – Asaemo lelâba mâentoem kâenkadyly. Asaemo ywâgâ aguely tindatuo yeinwânni modo olâ egâ lâpylâ.

<sup>21</sup> Pabai, kâenkadyly, idânârâ yeinwânni modo tokaleom ara lelâ itomoem. Tokaleom ara kagâ itomoem kâenkadyly, yagâ mawyly ara, agâ wawyly ara warâ nidâmo. Tokaleom nidâmo, yeinwântânry modo âmâlâ ugononi awyly nhutihomoem.

<sup>22</sup> Ton-honre witoem, koendonroem witoem warâ amyguehobyry ara lâpylâ eyanmo auguely, eon-honromoem, koendonroem itomoem warâ. Arâ awidyly, tokaleom ara lelâ itomoem, yagâ tokaleom mawyly ara, agâ wawyly ara warâ.

<sup>23</sup> Augueondyly, Pabai. Tokaleom waunlo ara eagâmo wawyly; tokaleon-ro waunlo ara yagâ mawyly. Aituo tokaleom ara lelâ kagâ awylymo. Arâ tientuo, ynynâbaom modo xutuzemo, âmâ ugononi awyly, ywynedo ara lâpylâ mâinwynedylymo warâ.

<sup>24</sup> – Pabai, âdykâ watodâlâ, yagâ ize urâ ynynonroem mânhenehonwâdyby modo. Kytanrugue kulâ onro kiungudyly iray ywynemâ. Ywynedylygue, koendonroem, ton-honreinhe warâ witoem amyguewâm. Urâ xurâ modo won-honru, koendâ wawyly warâ nhedysemo urâ.

<sup>25</sup> Pabai, âdykâ inakanhe amitaymba âmâ. Yeinwântânry modo âutuwâbyra. Urâ olâ âutudâ. Akaemo yeinwântoem amânhenehoyby modo tutuzemo âmâ ugononi awyly.

<sup>26</sup> Akaemoam âtuên-ho, alâ ise awisezedyly, âdara tagonro agâ tâpynedyly nhutihomoem, ywynedâ âmâ ara, urâlâ eagâmo witoem, nhutihomoem warâ – kely Jesus tunwym Deusram.

## 18

*Jesus nhawâtomobyry, nhemakâjihomobyry warâ  
(Mt 26.47-56; Mc 14.43-50; Lc 22.47-53)*

<sup>1</sup> Deus agâ agueypyem, Jesus xina agâ idâly. Xina xytâguely; paru egatudo Cedrom xina nhekuâdyly; xina salokuly. Xina idâly toenzepa se modope atoam.

<sup>2</sup> Judas, Jesus iduery modo emaxi egamenribyry, tutuze lâpylâ ani mârâ âji Se Oliveira Eka. Tâtâzezema kâinane xina myarâ Jesus agâ.

<sup>3</sup> Târâ awyly tutuze tawlylygue, Judas idâly Se Oliveira Ekaram sodadu pymâ romano ingonotyby modo agâ. Fariseu domodo, kurâdo eynynâ Deus agâ aguewâni modo iwymârydo warâ, Deus ety iguardary modo ingonodylymo Judas agâ. Espada, se, esagonho, tyatygueim warâgue tâmatunemo lelâ.

<sup>4</sup> Tutuzelâ Jesus idânârâ âdy aini awyly. Eagâmo oxioze idâly. Nhapâiguelymo:

– Ânguyka mâwinlymo? – kely.

<sup>5</sup> – Jesus Nazaré donro – kelymo.

– Mâkâ mâwinlymolâ urâ! – kely Jesus.

Eagâmolâ akâwâm Judas, Jesus egamenribyry.

<sup>6</sup>“Mâkâ mâwinlymolâ urâ” Jesus keduo, âjihujiguylymo, onro onwa ihuguewâdyllymo.

<sup>7</sup>Ihugueybyem, sautuomo, Jesus agueondyly:

– Ânguyka mâwinlymo? – keondyly.

– Jesus Nazaré donro – keondylymo.

<sup>8</sup>– “Mâkâlâ urâ” ugueanselâma. Urâ mâwinlymo atay, asaemo yagonro modo tâwâlâ nâtâmo – kely.

<sup>9</sup>Deus agâ adâkeday, “Tâensemo urâ. Tokalelâ olâ keankâ yagâpa ini” tâkehobyry wâgâ. Guarda domodoram nhekadyly tynynonro modo nawâpyra itomoem.

<sup>10</sup>Simão Pedro tyspadary nhetyly ety odayba, kurâdo eynynâ Deus agâ aguewâni modo iwymâry kuru ety oday tâwaneim Malco keho iwantary aho eynynonro nhatâly.

<sup>11</sup>Aituo Jesus aguely Pedroam:

– Adâiseba ikâ. Âdâhoru ekanâgâ. Pabai aguehobyry ara âsenagazeze urâ. Tâwâlâ lelâlâ wâne tâdâsenagazedly eon-honru, tânyzeim tudureim kâenyly-ro waunlo ara kehoem – kely.

*Jesus Anás enado satobyry*

<sup>12</sup>Îlâpygueduo, sodadu domodo iwymâry, sodadu domodo warâ Jesus nhawâdyllymo, nhemakâjilymo. Deus ety iguardary domodo eagâmo adâiseimo lâpylâ ani.

<sup>13</sup>Wauonroem kuru nhadylymo Anás etyram, Caifás imeindamunra. Mârâ ume kurâdo eynynâ Deus agâ aguewâni modo iwymâry kuru Caifás.

<sup>14</sup>Caifâslâ awârâ iraynâ judeu domodo iwymârydoam agueim: “Tokalâ iguelylâ ise koendonro, idânârâ kyigüepa kitoem” keim.

*Pedro, “Jesus kâuntuwâbyra urâ” kehobyry*

*(Mt 26.69-70; Mc 14.66-68; Lc 22.54-57)*

<sup>15</sup>Simão Pedro, urâ warâ xina idâly Jesus sani modo nhapygue âgânâ. Tâdutuoze ani urâ, kurâdo eynynâ Deus agâ aguewâni modo iwymâryam. Awylygue kâzekaunâoly lelâ âtâ idaseraji Jesus nhapygue.

<sup>16</sup>Pedro olâ kuoholâ tâxiânze, pyanta iwaguepa. Pedro yagâ negawâmpyra awyly kâentuo, iegasely, aguely pekodo agâ, pyanta taseraji tâzegawânto enahungueim agâ:

– Tâwâlâ yataen-ho negawândâ – uguely.

Augueduo pekodo pyanta nhenahunguely, Pedro egawântoem.

<sup>17</sup>Aituo pekodo eyam aguely:

– Awâkâ uguondo eynynonro modo ewylâ âmâ – kely.

Adâkehonduo:

– Mâkâ mâkeba urâ! Kâuntuwâbyra urâ awâkâ! – kely Pedro.

<sup>18</sup>Kopae igâwynugue târâ tâwanuneim modo, guarda domodo warâ taseray peto emanânimobyryem. XYDYK, XYDYK warâ peto tânâimize awylymo, tâuntomoem. Pedro âundyly lâpylâ eagâmo.

*Jesus, kurâdo eynynâ Deus agâ aguewâni modo iwymârybyry enado aguehobyry*

*(Mt 26.57-68; Mc 14.53-65; Lc 22.54,66-71)*

<sup>19</sup>Anás Deus agâ aguewâni modo iwymârybyry Jesusram aguely:

– Akaemo agonropyry modo wâgâ aguekâ yam. Ânguyka akaemo? Âdyka keankâ mâenomedâdomo? – kely.

<sup>20</sup>Jesus in-hoguly:

– Totoenzeba keankâ auguezesedyly. Âtâ tâdâtâdyguyho modo oday, Deus etydâ idânârâ kurâdo âtâdyguyho oday warâ kâenomedâdaymo, toense kulâ inkâba keankâ aguely.

<sup>21</sup>Ydataynrinbyry modo tutuzemo âdy kâenomedâdomobyry awyly. Akaemo sapâigüegâ, urâ mâkeba – kely.

<sup>22</sup>Arâ Jesus agueduo, Deus ety iguardary ewy eydâ iwaguepaom inwapagainly, aguely warâ:

– Arâ adâkezeba ikâ kurâdo eynynâ Deus agâ aguewâni modo iwymârybyryam! – kely Jesusram.

<sup>23</sup>– Iozepa augueaki watay, iozepa auguehobyry aguekâ. Iozelâ augueaki watay olâ, âdaituoba kulâ ywapagainhagui – kely Jesus.

<sup>24</sup>Awârâpygueduo, Anás aguely guarda domodoram:

– Caifâsram Jesus sataungâ, kurâdo eynynâ Deus agâ aguewâni modo iwymâry kuruum – kely.

Aituo Caifâsram Jesus nhadylymo, emakâjibyenlâ.

*Pedro, “Jesus kâuntuwâbyra urâ” keontobyry*

*(Mt 26.71-75; Mc 14.69-72; Lc 22.58-62)*

<sup>25</sup> Târâlâ Pedro, peto opay âundyly. Aituo aguehonly:

– Awâkâ uguondo eynynonro modo ewylâ âmâ – kehonly.

– Mâkâ mâkeba urâ! Kâuntuwâbyra urâ awâkâ! – kely Pedro.

<sup>26</sup> Caifás etydâ tâwaneim ewy Pedro nhedyly, aguely. (Pedro iwantary nhatâby ipemugu ani mâkâ.)

– Nhentai waunlo ara olâ Jesus agâ Se Oliveira Ekadâ – kely.

<sup>27</sup> – Mâkâ mâkeba urâ! Kâuntuwâbyra urâ awâkâ! – keondyly Pedro.

Pedro aguely umelâ, aukuma igâtudyly.

*Pilatosram Jesus satobyry*

*(Mt 27.1-2,11-14; Mc 15.1-5; Lc 23.1-5)*

<sup>28</sup> Caifás ety dombryem Jesus nhadylymo Pilatos ety imâsedo idaseraji, pymâ Romadâpa ingonotyby etyram emedyly wâgâ. Judeu domodo iwymâry Pilatos ety odaji tâgawândysebamo, judeu keba awylygue. Aguelymo:

– Kâzewenry ara, judeu keba modo ety odaji kâgawântaymba kurâ. Kâgawândyly-ro watay, tywykeim ara kulâ ise Deus kâendyly. Aituo ise xirâ kopae Pâscoa kientyguebyra kurâ – kelymo.

<sup>29</sup> Aituo Pilatos ety odaji akaemo tâgawândyseba awylygue, Pilatoslâ egaserim, eagâmo oxioze. Eyanmo aguely:

– Âdara nidâka awâkâ uguondo, ienado mâenwentâguedomoem? – kely.

<sup>30</sup> – Inakanhe aitobyry wâgâ merâ ewentâdyly. Inakanhe anipyra-ro watay, xarâ xina nenetaymba tâise. Xina ezewenry neinwântaymba merâ – kelymo.

<sup>31</sup> – Âwymârymoanlâ sataungâ. Izewenrymo ara anipyra-ro watay, akaemolâ nenagazeneho – kely Pilatos.

Aituo judeu domodo iwymârydo aguely:

– Xinama ânguy nyâen-homba. Âmaemo Roma donropyry modo lelâ aieniem aguehoymby – kelymo.

<sup>32</sup> Judeu domodolâ xyâen-hoin-ro watay, kruz wâgâ inkâba tâise iguely, romano domodo lelâ mawânkâ ewentâdyby modo kruz wâgâ takâjize xyâen-honrim. Arâ aidyly olâ Jesus “Warâ ise yiguely” kehobyry adahowandoem.

<sup>33</sup> Pilatos tâty odaji egawântondyly. Sodadu domodoram aguely:

– Xarâ Jesus enetaungâ – kely.

Âtâ odaji Jesus nhadylymo. Târâ Pilatos aguely:

– Judeu domodo iwymâry kuruka âmâ? – kely.

<sup>34</sup> Jesus in-hoguly:

– Awârâ yapâigueho angahu odanolâ awârâ? Eagonro modo awârâ ywâgâ âyam agueim? – kely.

<sup>35</sup> Aituo Pilatos aguely:

– Judeu mâkeba urâ. Yangahu oday inkâba xirâ unâry âtugudyly. Âpemugudolâ, kurâdo eynynâ Deus agâ aguewâni modo iwymârydolâ warâ inwentâni. Âdara midâka, akaemo iwentâdoem? – kely.

<sup>36</sup> Aituo Jesus in-hoguly:

– Pymâ lelâlâ wâne urâ, xirâ anaymba olâ pymâem wawyly. Xirâ anano pymâlâ urâ-ro watay, ynynonro modo tâjitoguyzemo tâise, iemakehomoem, ienwentâguei judeu domodo emaxi kâzegameomba witoem – kely Jesus.

<sup>37</sup> Jesus aguely tindatuo, Pilatos aguely:

– Pymâ kuru âmâ? – kely.

Jesus in-hoguly.

– Pymâlâ urâ, amygueho aralâ. Xirâ onro anaynlâ yazely. Unâ iozeno egatuze keankâ kâewyly. Idânârâ unâ iozeno tindadysedo modo koendâ tydasemo, tutuzemo warâ augueho – kely.

<sup>38</sup> Aituo Pilatos aguely:

– Âdyka unâ iozeno mygueho? – kely.

*“Nigue lelâ awâkâ Jesus” Pilatos kehobyry*

*(Mt 27.15-31; Mc 15.6-20; Lc 23.13-25)*

Egaseybyem Pilatos agueondyly Jesus ewentâni modoram:

– Ienanaji, merâ iguehoem! – kely.

<sup>39</sup> – Izewenkemo alá inanry Páscoa mâentyguedylymo ume etadâdyby ewy tokalâ kâentaguehonly, âdaunlo uguondo mâinduakeybymolâ. Âwymârymo Jesus âdara kânhenehonlyka ize matomo? Kâimmoen-hondyzeka âmaemo? – kely.

<sup>40</sup> Aituo idânârâ in-hogulymo:

– Alâ awâkâ nidâ! Barrabás etaguehongâ! – kelymo.  
Tâmagazeim, kyâim warâ myakâwâm Barrabás.

## 19

<sup>1</sup> Ilâpyryem myani tonlo Roma donro sodadu domodoram Pilatos aguely:

– Jesus sapioguwâdaungâ xikotygue – kely.

<sup>2</sup> Agueduo, sodadu domodo Jesus nhapiogulymo. Ilâpyryem Jesus âwankuem nhedylymo. Tygyureim koroaem xygatyby myakâwâm Jesus nhangahu onwa nhekylymo, pymâ domodo nhangahu wogonro ara. Âtâ BOH waunlo tapabileingue nhetydâdylymo, pymâdo âzetydâdo ara, âwankuem tientomoem.

<sup>3</sup> Iopaji saindylymo.

– Tynrenseim âmâ, judeu domodo iwymâry kuru! – kelymo, âwankuem nhedylymo.

Tywapagainzemo myakâwâm.

<sup>4</sup> Pilatos egaseondyly. Kurâdoram aguely:

– Idataungâ aguely! Jesus enehondonze urâ xarâ, xyâhoem urâem âdygue ewentâdo lâpeba mâkâ awyly mâuntuhomoem – kely.

<sup>5</sup> Aituo sodadu domodo Jesus nhenetondylymo, âtâ BOH waunlo tapabileingue etydâdybyem, koroa tygyureim xygatyby nhangahu wâgâ warâ.

Pilatos aguely:

– Etaungâ awâkâ uguondo! – kely.

<sup>6</sup> Aituo kurâdo eynynâ Deus agâ aguewâni modo iwymârydo, Deus ety iguardary modo warâ Jesus tientuomo, adaenkelymo:

– Kruz wâgâ nigue! Kruz onwa sakâjien-hongâ, iguehoem! – kelymo.

Aituo Pilatos aguely:

– Âmaemolâ sataungâ, kruz onwa sakâjiwâdaungâ warâ, iguehoem. Urâenma awâkâ âdanipyra – kely.

<sup>7</sup> Târâ âtâdyguywâdyby modo aguelymo:

– Tâwâlâ awâkâ nigue! Uguondo kulâ awâkâ, “Deus agâ âzekibaom urâ” nygue olâ. “Deus imery urâ” nygue lâpylâ warâ. Xina ezewenryem, Deus ara tâidyse donro xyâly lelâ – kelymo.

<sup>8</sup> “Deus imery urâ” nygue Jesus” kely tindatuo lakuru Pilatos, xyâen-honze âsenedyly kuru.

<sup>9</sup> Tâty odaxi egawântondyly, Jesus târâlâ awylygue, nhapâiguely:

– Âdykonloka âmâ? – kely.

Nihoguba olâ Jesus.

<sup>10</sup> Aituo Pilatos aguely:

– Uhogugâ! Tarâ Jerusalêmdâ pymâ kuru wawyly enanâguegâ. Ize urâ-ro watay, omoen-hondâ urâ, kruz wâgâ âehondâ urâ warâ – kely.

<sup>11</sup> – Deus amânhedyse ato lelâ yagâ amânhekyly. Deus aguepa kulâ, âdy yagâ amânhetaymba âmâ. Yâen-honly-ro watay, inakanhe kulâ awârâ, tutuzelâma âmâ, âdara wipyra wawyly yiguehoem. Âsenagazeze âmâ ayenehon-homybyry wâgâ. Mâkâ âyam iegamerimbyry olâ ise akadâ kehoem kuru âsenagazeni – kely Jesus.

<sup>12</sup> Jesus aguely tindatuo, Pilatos aguely:

– Omoen-hoze urâ – kely.

Judeu domodo târâ âtâdyguywâdyby aguelymo:

– “Pymâ ton-honreim urâ” keanry Jesus. Romadâ kywymâry kuru toenzepa tyewiâpaze, tâjipyay pymâ kuruem ise kewâni modo agâ. Awâkâ uguondo mâimmoen-honly-ro watay, pymâ Roma donro agâ iewiâpaze – kelymo.

<sup>13</sup> Aguelymo tindatuo, Pilatos ekadyly tâwentâze, tâwentâzeba warâ awyly agueho mure onwa. Hebraiku-em, “Gabatâ” awârâ âji ezedy: “Tadakobâdo tuhugue xygatyby” keze aguely.

<sup>14</sup> Kuotataji iseaji Páscoa etyguedo iray akâwâm awârâ aidyly, âtyem todohondyly ume. Tonlo modoram Pilatos aguely:

– Etaungâ! Anra tarâ âwymârymo kuru! – kely.

<sup>15</sup> Akaemo olâ adaenkelymo lelâ:

– Kruz wâgâ nigue! Kruz onwa sakâjien-hongâ, iguehoem! – kelymo.

Aituo Pilatos eyanmo aguely:

– Âwymârymo kâyâen-hondyzeka âmaemo? – kely.

Kurâdo eynynâ Deus agâ aguewâni modo iwymârydo olâ warâ in-hogulymo:

– Xina iwymâry mâkeba awâkâl! César lelâ pymâ kuru, Roma donro pymâ ton-honreim!  
– kelymo.

<sup>16</sup> Aituo Pilatos, Jesus nhegamelý sodadu domodoram. Kruz onwa Jesus sakâjize nhadylymo, iguehoem.

*Jesus kruz wâgâ iguehoem sakâjihobry  
(Mt 27.32-44; Mc 15.21-32; Lc 23.26-43)*

<sup>17</sup> Kruz takâjihô tanâse Jesus idâly âji Calvário kehoram. (“Gólgota” keze aguely hebraikuem.)

<sup>18</sup> Myarâ saintybyem Jesus nhakâjilymo kruz onwa. Azagâ uguondo kyârimpyry nhakâjilymo lâpylâ, tokalâ aho eynynâ, eagonro pâem eynynâ warâ.

<sup>19</sup> Tâbua wâgâ iweniehonwânmy Pilatos: JESUS NAZARÉ DONRO MERÁ, JUDEU DOMODO IWYMÁRY KURU kely akâwâm mârâ wâgâ iweniby azagâ tokalâ warâ itanwe: hebraiku-em, latin-em, gregüem warâ. Kruz wâgâ Jesus nhangawaym sodadu domodoram nhakâjienhonly.

<sup>20</sup> Agui judeu domodo mârâ tâbua wâgâ iweniby tytainzemo myakâwâm. Xidadâ iwaguepalâ mârâ âji Jesus nhakâjihomobry awylygue, toenzepa sakadaynlymo-ro warâ.

<sup>21</sup> Kurâdo eynynâ Deus agâ aguewâni modo iwymârydo aguelymo Pilatosram:

– “Judeu domodo iwymâry kuru” kely keba tâise mâinwenien-honly. “ ‘Judeu domodo iwymâry kuru urâ’ nygue merâ” kely tâise mâinwenien-honly – kelymo.

<sup>22</sup> Pilatos aguely:

– Kâinwenien-hoymby, iwenibyênlâ ise! – kely.

<sup>23</sup> Kruz onwa Jesus tiankâjibygueduo, quatro sodadu domodo Jesus ety iwogompyry nhanâdilymo, nhepajiwâdilymo lelâ. Ilâpyryem, ety iwogonro BOH waunlo takâjizenry nhanâdilymo.

<sup>24</sup> Aituo âjigüe aguelymo:

– Ety BOH waunlo kiainguepa kine. Dadu kydyânre, mâkâ tyzortygueim ise âtâ BOH waunlo sodo – kelymo.

Aituo arâ aidilymo. Saguhoenlâ myakâwândy Deus itaumbry awo wâgâ iwenibyem awyly: “Mâkâem, mâkâem warâ iety ywogonropyry nepajiwâdâmo. Ânguy ietybyry BOH waunlo sodoem ini awyly tiuntuhoem dadu namemo” warâ iwenibyem awyly. Arâ aituomo iwenihobry ara kehoem aidily.

<sup>25</sup> Kruzdâ iwaguepalâ akâwâm quatro pekodo modo: Maria, Jesus ise; Maria iwary; Maria (Magdala donro); Maria (Cleopas iwudy) warâ.

<sup>26</sup> On-yam MYK itybyem Jesus tyze nhedyly, iedyly warâ, urâ toenzepa inwynegyuly. Aituo aguely tyzeram:

– Âmerylâ-ro waunlo ara ise awâkâl João nhedyly – kely.

<sup>27</sup> Aguely lâpylâ yam:

– Awâkâlâ yze. Egâ, âzelâ mâenkyly-ro waunlo ara lelâ – kely.

Agueduo, yze aralâ mâkâ kâendily-ro warâ Jesus ize awyly. Ilâpyryem ietyram kandyly kâentoem.

*Jesus iguehobry  
(Mt 27.45-56; Mc 15.33-41; Lc 23.44-49)*

<sup>28</sup> Ilâpygueduo tutuze myakâwâm Jesus kâmakehoem aiese tâetobryrâ âwanikely awyly. Saguhoenlâ Deus itaumbry awo wâgâ iweniby aguehobry ara aidily aitoem aguely:

– Tatuante urâl! – kely.

<sup>29</sup> Tâlâ akâwâm vinhu nhewantybygue etary tumykeim. Mârâ ikaji esponja inkuilymo. Se hissopo wâgâ ekâjibyem, Jesus itaryam nhalokuândilymo, nhugakâin-hoem.

<sup>30</sup> Mârâ xugakâinrimbyryem, aguely.

– Iweâma alâ aiese kâetobryrâ!

Arâ aguely kâmakehoem aiese tâetobryrâ âdypygüeândily awylygue. Agueypyem, enagozely, iguely lelâ.

*Lançague Jesus eledydâ ihoguyhobry*

<sup>31</sup> Aituo judeu domodo iwymârydo Pilatosram idâlymo, aguelymo:

– Kruz modo onwa sakâjiwâdyby izepa enra xina târâ awyly xirâ kopae, kopaelâgâ warâ. Sodadu domodoram ixinarymo xukawânehongâ, inepa iguehomoem, eguepy-mobry niguampyrâlâ etyhoem – kelymo eyam.

Tâzekobyzegueho adagulylâ mawânâ tynrenseim lelâlâ ani mârâ tâzekobyzegueho-ro warâ, Páscoa etyguedo awylygue. Inakanhe mawânâ tâise âty tynrenseim ume kehoem âguedy sakâjibyem awyly. Awylygue târâpa enâtâguyly, sadyly warâ ize awylymo.

<sup>32</sup> Aituo nhekadybymo ara Pilatos anhenehonly. Sodadu domodo idály. Jesus eapay kruz wâgâ sakâjijwâdyby modo ixinary nhukawâdylymo, mârâ ewânugue inepa iguehomoem.

<sup>33</sup> Jesus iopaji saintybyem olâ, igueypyem awyly nhedylymo. Awylygue ixinary nuk-agâbyra awylymo.

<sup>34</sup> Sodadu domodo ewy olâ akâwâm eledydâ Jesus tuhoguyze tylançarygue. Inepa kehoem inunu paru agonro ihuguely.

<sup>35</sup> Urâ Jesus kruz wâgâ iguely enipyrylâ xirâ egatuim. Urâ kâentyby lelâlâ xirâ kâengatuly, mâinwântomoem lâpylâ. Âkealâ xirâ kâinwenily. Kâinwenily ara kehoem akâwâm aidyly.

<sup>36</sup> Warâ myakâwândy saguhoenlâ iwenibyem awyly Deus itaumbry awo wâgâ: “Ibyry ewy âdaunloenlâ tukagâduneba ise” warâ iwenibyem awyly. Aralâ akâwâm aidyly-ro warâ.

<sup>37</sup> Arâ lâpylâ Deus itaumbry awo wâgâ iwenibyem awyly: “Esemo mâkâ lançague tinhonguybymo” warâ iwenibyem awyly. Awârâ aituo saguhoenlâ Deus inwenien-hoymby ara kehoem aidyly.

*Jesus eguepybyry tuhu imâsedo tâtaqueim odaji nhetadâdomobry*

*(Mt 27.57-61; Mc 15.42-47; Lc 23.50-56)*

<sup>38</sup> Aituo myakâwâm José Arimatéia donro Pilatosram idály agueze:

— Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtaqueim odaji kâenkanâdoem. Tâwâlâ kâyntâguyândyly? — kely.

— Tâwâlâ — Pilatos keduo, José idály myakâwâm.

Jesus einwânni lelâlâ myakâwâm José, ânguyram negatuba olâ-ro warâ, pymâdo tyntadylygue. Aituo myakâwâm José, Jesus eguepybyry kruz wâgâpa nhytâguyândyly, nhaleholy-ro warâ.

<sup>39</sup> Nicodemos kopae Jesus agâ agueze idâypy, José agâ idâwâm lâpylâmy. Toenzepa myakâwâm Nicodemos aloés, mirra warâ nhadyly, trinta e cinco kilos lelá, mârâ edunu tyânânguneim âguedy onwa tienoem, inepa eguepybyry niwânzepa itoem.

<sup>40</sup> Jesus eguepybyry nhadylymo, intuwynlymo, panu Nicodemos nhatyby tyânânguneimpe tientybygue; kâzewenry awârâ, kâguepybyry kiontoem.

<sup>41</sup> Kruz wâgâ Jesus iguehobyry iwaguepa, tâlâ myakâwâm âji toenzepa se imâsedo modo etâdyby, jardim keho. Mârâ jardindâ tâlâ myakâwâm tâtaqueim iwelo esagueyby tuhu imâsedo oday ânguy igueypy tâtadâzêba myarâ, iweloem awylygue.

<sup>42</sup> Iwaguepalâ myani mârâ jardim, Calvariodâ. Awylygue José, Nicodemos warâ Jesus eguepybyry myarâ nhetadâdylymo, tâzekobyzegueho adagulylâ awylygue.

## 20

*Jesus kurâem itondobry*

*(Mt 28.1-8; Mc 16.1-8; Lc 24.1-12)*

<sup>1</sup> Domingo, pealâ koendâ nemepyra awyly umelâ myani Maria Magdala donro Jesus eguepybyry etadâdobryyam idály. Saintybyem, tâzegawânto enahun-ho tuhu ejikeybyem awyly nhedyly.

<sup>2</sup> Aituo tâgase kehoem xinaram idály. Toenzepa urâ Jesus inwynegyly, Pedro warâ xina eydâ atoam idály. Mâkâ xinaram aguely:

— Kywymâry Jesus eguepybyrymy etadâdobryydâba netymo. Âdyam nhetomobry tutuzeba-ro warâ — kely.

<sup>3</sup> Aituo Pedro, urâ warâ âguedy etadâdobryyam xina idály.

<sup>4</sup> Xina egatudyly. Pedro takaze olâ akâwâm iegaky awylygue waunroenlâ yaindyly.

<sup>5</sup> Ioday kâentoem kâzewyly; panu linhuguetu kâendyly, iegawâmpyra olâ akâwâm urâ.

<sup>6</sup> Yaimpygueduo akâwâm Pedro saindyly, egawândyly alelá. Târâpa Jesus eguepybyry. Panu âguedy ituwyn-hobyry lelá nhekyly.

<sup>7</sup> Panu apiduby Jesus nhangahu wongropyry lelá warâ nhekyly. Mârâ Jesus ituwyn-hobyry modo duaypa nhangawyn-hobyry, âikâlâ.

<sup>8</sup> Urâ, waunroem saintyby, tâtaqueim odaji iegawândyly lâpylâ, âguedy etadâdobryyam. Âguedy târâpa awyly kâentuo, kâinwândyly Jesus kurâem itondobry.

<sup>9</sup> Iwenibyem Deus itaumbry awo wâgâ, Messias igueypyem kurâem itonze, kely. Tâenselâ, tydaselâ warâ lelâlâ wâne xina. Arâlâ olâ xina awârâ nutuba lelá awyly.

<sup>10</sup> Koendâ kehoem enuagaenibyryem, tâtyam xina odopâdyly.

*Jesus Maria Magdala donroram âpanâguehobyry*

*(Mt 28.9-10; Mc 16.9-11)*

<sup>11</sup> Âguedy etadâdobry kuoholâ myakâwâm Maria Magdala donro ohogüendyly. Tuogunru umelâ, âzewyly, IU idyly.

<sup>12</sup> Azagâ anju nhedyly, âta tapekeingue âzetydâdybyem, Jesus eguepybyry etadâdobyrydâ ekadybymoem; târâpa itybyem olâ Jesus eguepybyry. Tokalâ ekadybyem awyly nhangahu ejidyppyrydâ, eagonro ekadybyem awyly ihuru ejidyppyrydâ warâ.

<sup>13</sup> Anju domodo pekodo nhapâiguelymo:

– Âdaituoka ogunru? – kelymo.

Aituo pekodo in-hoguly:

– Ywymâry eguepybyry nadâmomy. Âdyam nhetomobyry kâuntuba olâ urâ-ro warâ – kely.

<sup>14</sup> Awârâ agueypyem, MYRYK idyly. XYDYK warâ uguondo nhedyly. Jesuslâ myakâwâm; nutuba olâ mâkâem awyly.

<sup>15</sup> Aituo Jesus aguely:

– Âdaituoka ogunru? Ânguyka mâwinly? – kely.

Mârâ âji enilâ-ro waunlo ara mâkâ enanaji. Awylygue in-hoguly:

– Âmâlâ eguepybyry tarâpa etyin-ro watay, âdyam mânhetobyry yam aguekâ. Urâ ise eagonro âjiam sanehoim – kely pekodo.

<sup>16</sup> – Maria! – kely Jesus eyam.

Tâzedy wâgâ tygâseduo, Jesus lelâlâ awyly nhutuly, aguely:

– Rabôni! – kely. (Hebraiku-em, “Ywymâry” keze awârâ aguely.)

<sup>17</sup> Jesus aguely:

– Yawâdâ. Pabairam kodopâdaymba lelâ urâ. Ynynonro modoram idâ, akaemo konodo ara kehoem kâinwyneguly modoram. Warâ eyanmo aguekâ: “Pabairam ise kodopâdyly, mâkâ Pabai myguehomo, âDeusrymo warâam’ keanry Jesus” kera eyanmo – kely.

<sup>18</sup> Aituo Maria Magdala donro xina eydâ atoram idâly; xinaram aguely:

– Kywymâry Jesus kurâem itondybyem setai – kely.

Tyam Jesus aguehobyry xinaram nhegatuly.

*Jesus tynynonro modoram âepanâguehobyry  
(Mt 28.16-20; Mc 16.14-18; Lc 24.36-49)*

<sup>19</sup> Mârâ domingo, kopaelâ, âjigue âtâdyguybyem xina Jesus eynynonro modo. Pymâdo tawânehonly tytaze akâwâm xina. Awylygue pyanta modo koendâ kehoem enahunwâdybyem awyly. Xina enahuymbly ozelâ Jesus egawândyly; âepanâguely xina ontay kehoem. Xinaram aguely:

– Tâseguâdâzeba itaungâ, tyanepa warâ – kely.

<sup>20</sup> Ilâppyryem xinaram tâmary kruz onwa takâjihobyry nhenehonly; sodadu lançague tuhoguyhobyry nhenehonly warâ. Emarydâ, eledydâ whê xâhobyry tientuo, tutuze akâwâm xina, Jesus lelâlâ mâkâ awyly. Awylygue toenzepa akâwâm xina ohomaendyly.

<sup>21</sup> Aituo Jesus agueondyly:

– Tâseguâdâzeba itaungâ, tyanepa warâ. Pabai ugonotobyry ara lâpylâ ogonodylymo, inâry mâengatuhomoem – kely.

<sup>22</sup> Ilâppyryem xina onwa ÂBU kely, aguely:

– Tâwâlâ Deus Ispiritury âyanmo nâedâ.

<sup>23</sup> Deus izepa ato aienibyry modoam, “Deusram ekaze urâ, inakanhe amitomobyry nhygakehoem” mygueduom, Deus xygakeze lelâ. “Inakanhe amitomobyry Deus nygakeba itoem ekaze urâ” mygueduom olâ, Deus nygakeba ise – kely xinaram.

*Jesus Toméram aguehobyry*

<sup>24</sup> Xinaram Jesus âepanâgueday, xina agâ inkâba akâwâm Tomé; xina eataen-ho Jesus eynynonro lâpylâ mâkâ. “Azagonropyry” kely lâpylâ mâkâ ezedy.

<sup>25</sup> Ilâpygueduo, saimpygueduo, eyam xina aguely:

– Kywymâry Jesus kurâem itondyby xina netai – xina kely.

Xina neinwâmpyra olâ mâkâ.

– Mâkâ kurâem itondybyem awyly kâinwântaymba urâ. Kâinwândyly ise, pregugue emarydâ sakâjihobyry kâendyly, iemarygue MÂ kânhedyly, sodadu tylançarygue eledydâ in-hoguyhobyry iemarygue MÂN kânhedyly warâ watay lelâ ise kâinwândyly – kely.

<sup>26</sup> Tokalâ semana sakanibyryem xina âtâdyguyondyly târâ, pyanta modo enahunwâdybyem kadiadugue. Ilâ ume Tomé târâlâ xina agâ. Pyanta enahuymbly ozelâ Jesus egawândyly xina ontaji lelâ. Idânârâ xinaram aguely:

– Tâseguâdâzeba itaungâ, tyanepa warâ – kely.

<sup>27</sup> Ilâppyryem Toméram aguely:

– Egâ iemary ihoguyhobyry; imary nhonwa iekâ. Iwâry saunâkâ, ieledydâ ihoguyhobyry onwa imary iekâ. Mâinwâmpyra mawwily imogâ. Kurâem itondybyem wawwily einwânkâ – kely.

<sup>28</sup> Aituo Tomé eyam aguely:

– Ywymâry, yDeusry warâ âmâ! – kely.

<sup>29</sup> – Kurâem itondybyem wawyly mâinwândyly, ietuo kulâ, tuomare âmâ-ro warâ. Tuomareim kuru olâ ise iepyralâ yeinwânni modo! – kely Jesus.

*Âdaituo João, Jesus wâgâ inwenily awyly xutuho*

<sup>30</sup> Xina eynynonro modo tâense akâwâm toenzepa lelâlâ ton-honrugue anhetyby. Xirâ pape wâgâ kâinwenipa olâ urâ idânârâ kehoem adyesenry modo Jesus anhetyby.

<sup>31</sup> Xirâ pape kâinwenily olâ, Jesus tâinwânsezêlâ mitomoem, Deus Ingonotyby Messias awyly mâuntuhomoem. Deus imery awâkâ Jesus. Tâinwânse âmaemo-ro watay, aunlolâ ise agâmo awyly. Âguelymo watay, Deusram idâze âmaemo, aunloenlâ eagâ mitomoem.

## 21

*Jesus âepanâguehobyry sete lelâ tynynonro modoram*

<sup>1</sup> Awârâpygueduo, Jesus âepanâguely tynynonro modoram. Saimu imâsedo Tiberiades emelay xina awyly ume Jesus âepanâgueondyly xinaram. (“Saimu Galiléia” kelygue lâpylâ mârâ ezekeu.) Aityby ise âyanmo kâengatuly.

<sup>2</sup> Xina sete lelâ âjigüe târâ xina awyly: Simão Pedro, Tomé (Azagonropyry kelygue tâzekeim), Natanael (Caná, Galiléia eynynonro), urâ João, paigo Tiago, azagâ xina eataen-ho lâpylâ warâ.

<sup>3</sup> Aituo Simão Pedro aguely xinaram:

– Pepi oday kanra saweze ise udâly – kely.

– Agâ kanra saweze idâze lâpylâ xina – xina kely.

Aituo idânârâ xina idâly saimu emelaji. Pepi odaji xina âxiedyly. Emedyly ara kehoem âedâ paikaji samezeseze xina awyly, ânguy niwympa olâ.

<sup>4</sup> Emedyly wâgâ, paru emelay uguondo xina nhedyly. Jesuslâ akâwâm mâkâ, xina nutuba olâ.

<sup>5</sup> Aituo Jesus ago kehoem aguely xinaram:

– Âdara kanra maweakimo? Agui maweakimo? – kely.

Xina in-hoguly:

– Ânguy xina nawewâpyra enra! – xina kely.

<sup>6</sup> Xinaram aguely:

– Pepi eahoru yan-yam âedâ samewâdaungâ. Toenzepa sawâse âmaemo – kely.

Aituo xina âedâ nhamely. Inepa kehoem kanra modo inwynly. Toenzepa awylygue, pepi odaji epâguely xina nemaemba akâwâm.

<sup>7</sup> Aituo urâ João, Jesus toenzepa inwynegyly, Pedroram aguely:

– Kywymâry Jesus mâkâ! – uguely.

Simão Pedro aguely tindatuo, tâty BOH waunlo nhetondyly, kanra tianwâtoem tientyby. Paikaji adamely. Sagunuram idâly tywâre, inepa Jesusram taintoem.

<sup>8</sup> Pepi oze xina idâly, tykâgüeze, âedâ kanrague tummyke tâpâgüeze, cem metros awârâem kulâ saintoem sagunu onwa.

<sup>9</sup> Pepi odayba âzetybyem, peto ehoru kanra pylâ nhangatay âjihuly-ro warâ xina nhedyly. Pâobe lâpylâ akâwâm peto opay.

<sup>10</sup> Aituo xinaram Jesus aguely:

– Awâkâ kanra manwâtybymo ewy âenetaungâ – kely.

<sup>11</sup> Aituo Simão Pedro pepi odaji âxiedyly. Âedâ sagunu wâgâ nhuxidyly. Tummyke kehoem mârâ âedâ, cento e cinquenta três kanra imâsedo modogue, nadatâwâbyra olâ mârâ âedâ.

<sup>12</sup> – Âwinduataungârâ – kely Jesus.

Jesuslâ awyly tutuzelâ akâwâm xina, tywypaze olâ akâwâm xina, mâkâlâ awyly tiuntuhoem eyam agueze.

<sup>13</sup> Aituo Jesus iopaji xina saindyly. Pâo nhanâdyly. Xina ara nhepajiwâdyly. Xina ara lâpylâ kanra âjihuyby nhepajiwâdyly.

<sup>14</sup> Jesus kurâem itondybyem, azagâ tokalâ warâ âepanâguely idyly akâwâm xina tynynonro modoram.

*Jesus Pedroam aguehobyry*

<sup>15</sup> Xina âwinduapygueduo, Jesus Simão Pedro nhapâguely:

– Simão, João Betsaida donro imery, toenzepa lelâlâ ywynedâ âmâ âdydo imeom takaze kehoem? – kely.

Aituo Pedro in-hoguly:

– Tutuzelâ âmâ, toenzepa âize wawyly – kely.

– Arâ atayma ywâgâ aguekâne iwelo yeinwânni modoram. Tâguy ovelha imery nheto ara egâmo – kely Jesus.



<sup>16</sup> Aituo Jesus agueondyly:

– Simão, toenzepa lelâlâka ywynedyly? – kely.

– Tutuzelâ âmâ, toenzepa âize wawyly – kely Pedro.

– Arâ atayma ywâgâ aguekâne yeinwânni modoram. Ovelha eni ovelha nheto ara lâpylâ egâmo – keondyly Jesus.

<sup>17</sup> Jesus agueondyly, saguhoem adâkehobyry araba:

– Simão, toenzepa yize mawyly? – kely.

Awârâ tindatuo, Pedro itywandily, in-hoguly:

– Idânârâ xuturinlâ âmâ; toenzepa âizetonro wawyly tutuzelâ âmâ – kely.

Aituo Jesus agueondyly:

– Arâ atayma ywâgâ aguekâne yeinwânni modoram. Ovelha eni, ovelha nheto ara egâmo – kely Jesus.

<sup>18</sup> – Salokuzenomoem mawyly ume, ton-honre ani âmâ, ize matobyryam mydâhoem. Xirâ âyam augueho olâ ise âkealâ. Agaityoem mituo âzemakâjioze âmâ. Mydâdyseba matoam ise madaholy – kely Jesus.

<sup>19</sup> Awârâ arâ adâkeday, Jesus nhutuen-honly, âdara Pedro iguely awyly. Arâ Pedro tyiguelo odaji kehoem Deus nheinwântobyry wâgâ ise Deus âzehogueoly Pedro eon-honru nhuduhobyry wâgâ.

Aituo Jesus Pedroram aguely:

– Ynynonroenlâne ikâ – kely.

*Jesus João agâ aguehobyry*

<sup>20</sup> Pedro ikaynâ akâwâm urâ, urâ toenzepa Jesus inwyneguuly. Kopae Páscoa ume xina âwinduatay, urâlâ akâwâm Jesus eatado ekani; urâlâ, “Ânguyka ise igamenri âehondyzedo modo emaxi?” kerim.

Âdara tyiguely awyly wâgâ Jesus aguely idanipyryem, Pedro MYRYK idily. Tykaynâ iedyly.

<sup>21</sup> Jesus nhapâiguely:

– Ádyka ise João agâ aini? – kely Pedro.

<sup>22</sup> Jesus in-hoguly:

– Awârâ wâgâ tâtynanâzeba ikâ. “Kodopâdo odaji niguepa nidâ” uguely watay, mâuntuly mâkeba awârâ. Yeinwânsezedyly wâgâ lelâ âtynanâgâ – kely Jesus.

<sup>23</sup> Awylygue âjigie Jesus einwânni modo aguelymo: “ ‘Kodopâdo odaji niguewâpyra ise João’ nygue Jesus” kelymo. “Âiguewâpyra ise âmâ” kewâpyra akâwâm Jesus ywâgâ. Warâ ani aguely: “ ‘Kodopâdo odaji niguepa nidâ’ uguely watay, awârâ modo wâgâ tâtynanâzeba ikâ” kely Pedroram.

<sup>24</sup> Kâentyby, kâindatyby warâ xirâ kâinwenily Jesus eynynonrolâ urâ João toenzepa inwyneguuly. Idânârâ yataen-ho modo tutuzemo âkealâ xirâ pape wâgâ kâinwenily awyly.

*Iwenihobyry xypyry*

<sup>25</sup> Tâlâ wâne xirâ pape wâgâ kâinwenily. Tâlâ olâ toenzepa âdydo imeom modo Jesus anhetaymby. Idânârâ kehoem anhetyby, aguehobyry warâ iwenily watay, toenzepa lelâlâ tâise livrupe awyly! Idânârâ onro anaym pape iwenily ejidy lâpeba tâise.

João

## ATOS

### Tunâry Egaturin-em Jesus Induakewâdyby Modo Aitobyry

Xirâ livru wâgâ Lucas inweniby Deuslâ myakâwândy nhangahu odaji ieni. Awylygus Deus itaumbryrlâ xirâ, Lucas olâ iweninri, Deus eydâ atoam Jesus odopâbygueduo, Jesus wâgâ egatuimbyry modo wâgâlâ Deus anhekyly modo kiuntuhoem.

Jesus tunâry egatudyze awyly myakâwândy xidadâ Jerusalémdâ, Judéia, Samaria warâ eynynâ, âtâ anary iwagueno mododâ lâpylâ warâ. Tytaineze kurâ, unâ koendonro tâdâsemagueho Jerusalémdâ nhegatuhomobyry, Pentecostes etyguedo ume Deus Ispirityry xytâguyhobyry, Pedro, João, Filipe, Barnabé warâ ewanomopyry warâ.

Jesus nheinwândyly iraynâ, Saulo myakâwândy Paulo ezedy; Jesus eynynonro modo enagazeni myakâwândy mâkâ. Damascoram Jesus einwânni modo etadâze idâday myakâwândy Jesus eyam âepanâguelly. Ilâpygueduolâ myakâwândy nhangahu oday xunâry âtuguguelly. Jesus einwânniem idyly lelâ-ro warâ.

Paulo tataen-ho modo agâ iwague âxiguelwâmy, Jesus xunâry egatuze. Deus Ispirityry ewanu wâgâ tutuze kurâ xirâ livru wâgâ. Mâkâ mawânkâ turâ modo Jesus xurâem ewanumo ume sagâikeinmo, eon-hondânimo warâ.

Xirâ livru wâgâ mawânâ Deus itaumbryry egatuhobyry kintainly, judeu keba modoram âzeinwân-hon-hombyry warâ. Paulo, Silas warâ Jesus wâgâ agueduomomo âzetadâonwânmy kadeia odaxi. Judeu domodo, romano domodo warâ iwymârydo enadoram âepanâguelwâmy. Jesus tyeinwândylygus eyanmo unâ tâdâsemagueho egatuly nimopa olâ myakâwândy.

#### *Aguely adaguho*

<sup>1-2</sup> Âyam xirâ pape kâinwenily, Teófilo. Azagâ ieto xirâ kâinwenily. Waunro kâinweniby wâgâ Jesus tarâ onro anaym tâwanu nhaguday anhetyby, nhenomedâdobyry warâ, kayam idâhobyryam. Deus eydâ atoram tâtâly iraynâ, Deus Ispirityry eon-honrugue, tunâry egaturin-em tinduakeyby modo eon-honru xuduwâmy, aitoomem, aguehomoem warâ.

<sup>3</sup> Kurâem tâitomygueduo, quarenta emedyly ara tâepanâguezzelâ myani tunâry egatuwâni modoram. Toenzepa adyosenry modo Deus eon-honrugue adyese myani, igueypyemba tawly tienehon-hoem. Âdara Deus pymâem kuru idyly awyly wâgâ myani eagâmo aguely.

<sup>4</sup> Tunâry egaturin-em tinduakeyby modo agâ Jerusalémdâ tatay, warâ myani Jesus eyanmo aguely:

– Tâgasezeba wao itaungâ xirâ âtâ anaymba. Tarâlâ wao itaungâ, Deus Ispirityry âyanmo saindyly ara. Saguhomem âyanmo, “Deus Tyispirityry igonose” uguelâ. Saindyly inwânwântaungâ wao.

<sup>5</sup> Saguhomem João batiza nhedyly ani parugue. Iweâpa nipyrâlâ olâ ise Deus Ispirityrygus batiza mâieholymo, ynynonroem mawlymo mâenehon-homoem – kewâmy Jesus.

#### *Deus eydâ atoam Jesus âkuhobyry*

<sup>6</sup> Tunâry egaturin-em tinduakeyby modo agâ âtâdyguybyem myani Jesus. Aituo myani akaemoram adapâigueoly:

– Pymâ, anri ise iweâma kypemugudo israelita domodo eon-honru mâunduly, âjiguelâ kywymâgoem, Roma donro modo keba kywymâry itoem? – kelymo.

<sup>7</sup> Aituo myani Jesus in-hoguly:

– Tâseguâdâzeba itaungâ awârâ wâgâ. Pabai Deus “Warâ ise aidyly” kehobyry saintuo, idânârà aguehobyry ara aise. Mâuntulymo keba ise anhekyly modo; âdara aidyly awyly mâuntuwâbyra ise âmaemo. Pabai kulelâ xuturim.

<sup>8</sup> Deus Ispirityry âyanmo saintuo olâ, on-honrumo xuduze, unârybyry mâengatuhomoem. Waunroem kuru tarâ Jerusalémdâ ise unârybyry mâengatulymo. Ilâpyryem ise Judeiaram, Samariaram warâ mydâlymo unârybyry egatuze; ilâpyryem ise idânârà kurâdo onro anano modo ara-ro warâ – kely myani Jesus.

<sup>9</sup> Tunâry egaturin-em induakeyby modo agâ awyly umelâ myani Deus eydâ tatoram nhalokuânehonly. Âkuly umelâ myani eunu duaxi xuzadyly. Aituo myani nepyra idylymo.

<sup>10</sup> Târâ Jesus âkuhobyrydâ nhesedylymo ume myani azagâ anju, uguondoem tapekeingue tâtyem âepanâguelly; Deus emary myani akaemo. Jesus tunâry egaturin-em induakeyby modoram myani âewlymo. Aituo myani aguelymo:

<sup>11</sup> – Nhaum, Galiléia donro modo, âdaituoka kaynâ lelâ inurumo? Âydâmpa nitai wâne mâkâ Jesus odopâze olâ. Iwerâ âkuly mâentomobyry ara lâpylâ ise odopâdyly, âzeholy – kelymo.

*Judas etaybyanoem Matias induakehomobyry*

<sup>12</sup> Aituo myani Jesus tunâry egaturin-em induakeyby modo odopâdayn Jerusalémram, iwryy Se Oliveira Eka dombyryem. Tokalâ kilômetro myani mârâ âtâ anaymba awyly.

<sup>13</sup> Âtâ anaxi saintybyem myani âtâ tâxidâdomobyryanlâ idâlymo. Salâ imâsedo kaynonro odaymo myani. Pedro, João, Tiago (Alfeu imery), André, Filipe, Tomé, Bartolomeu, Mateus, Tiago warâ, Simão, (tâty anary izetonro lelâlâ, tawylgyue Roma donro kulâ tywymâryem izepaom modo ewy), Judas (Tiago imery) warâ myani akaemo.

<sup>14</sup> Aunlolâ myani târâ pekodo modo agâ âtâdyguylymo Deus agâ adâkehoem. Jesus ise, iukonodo warâ târâmolâ lâpylâ myani. Aunlolâ myani akaemo idânârâ idâly, Deus agâ agueze.

<sup>15</sup> Iweâpa nipyralâ myani toenzepa kehoem kurâdo Jesus einwânni modo âtâdyguyly, cento e vinte awârâem myani kurâdo. Âtâdyguybyem awylymo ume myani Pedro saudyly, aguely:

<sup>16</sup> – Nhaum, ydataungâ, Cristo eynynâ ypemugudo. Davi iweniwânmy iweâpa mâkâ Judas aitobyry wâgâ. Deus Ispiritury, Daviram inwenien-hoymby ara kehoem keankâ aidyly. Mâkâ Judas keankâ Jesus egamenri.

<sup>17</sup> Xina duano lâpylâ keankâ mâkâ, xina agâ tâwaneinhe iduakeyby mawânkâ keankâ.

<sup>18</sup> Âmaemo, Jerusalém donro modo tutuze âmaemo Judas dinheru nhemakehobyry, Jesus iduery modoram tiengamehoem. Mârâ dinheruguelâ mykeankâ onro adanâholy. Târâlâ mykeankâ kaynâpa tâihugueduo, atuly. Atuduo, idânârâ kehoem ekomiry modo egasewâdyly warâ.

<sup>19</sup> Idânârâ Jerusalém donro modo aityby nutumo. “Aceldama” kelygue mârâ âji nhezêtâdylymo. (“Xyâhoem egamehobyry ebyrygue sanâtyby” keze aguely) – kely myani Pedro.

<sup>20</sup> Aituo myani Pedro aguely:

– Arâ lâpylâ livru Salmosdâ iwenibyem awyly:

“Ânguy lâpeba ise ety oday.

Ânguy lâpeba nidâ ioday”

– warâ kelype.

Alâpylâ Salmosdâ iweniby:

“Âkelo ejipyano nidâ, anhekyly kehobyry anhetoem”

warâ myakâwândy saguhoem Deus itaumbury iweniby.

<sup>21</sup> – Arâ atay, uguondo kinduakenre, Judas Queriote donro ejipyano Jesus xunâry egaturin-em. Jesus kurâem itondybyem awyly xuturim, enipyry. Pymâ Jesus kiampygueday kyampyguenibyry,

<sup>22</sup> Jesus ewanu adaguday, âdypygueânday warâ eagâ idâypy, Jesus Joôoram batiza âieholy enipyry, Deusram adalokuonly enipyry ise kinduakely – kely myani Pedro.

<sup>23</sup> Aituo myani idânârâ tonlo modo âseinwândylymo. Aguelymo:

– José Barsabás (“Justo” keho) atay, Matias atay warâ nidâ – kelymo.

<sup>24-25</sup> Âdykonlo akaemo azagâ enday iduakeyby awyly tiuntuhoem myani, Deus agâ aguelymo. Warâ myani aguelymo:

– Pymâ, tutuze âmâ idânârâ kurâ domodo âdaunlo awyly. Enehongâ âdykonlo mâinduakeyby awyly. Âdykonloka asaemo azagâ enday xina agâ mâingonokily, Judas etaybyay ânâry egatuze? Xirâ âwanu mawânkâ Judas nimo. Ejidy mâinduakeybyanlâ nâtâ warâ – kelymo.

<sup>26</sup> Ânguy akaemo azagâ uguondo enday tuduakezeim awyly tiuntuhoem aiemâmomy. Arâ myani Matias induakelymo. Aituo mâkâ Jesus xunâry egaturin-em iduakeyby modo arâ aguenriem idyly.

**2***Deus Ispiritury xytâguyhobyry*

<sup>1</sup> Pentecostes etyguedo ume myani idânârâ Jesus einwânni modo tâjidydâ âtâdyguylymo. Trigu ekaunâdyly israelita domodo nhetyguedo myani mârâ âty.

<sup>2</sup> Ilâ ume myani Deus Ispiritury nhonwamo xytâguyly. Sapezenru ton-honreim ara kehoem myani Deus eydâ atodâba ipyru xytâguyly indadylymo. Idânârâ kurâdo âtâ oday ekadaymby modo idamâmomy.

<sup>3</sup> Aituo myani peto iatgyu emyenro nhedylymo. Agui myani mârâ aunlo âzepajiwâdyly, mâkâ angawaym, mâkâ angawaym, mâkâ angawaym warâ.

<sup>4</sup> Deus Ispiritury nhonwamo âewyly, koendâ kehoem enomerymo xuduze. Aituo myani Deus Ispiriturybe tâituomo, âkelo anano modo itanwe aguelymo lâpylâ, tytanwe lelâba.

<sup>5</sup> Târâ Jerusalémdâ toenzepa myani judeu domodo Deus einwânni. Mârâ ananobyry lelâba myani myarâ saini.

<sup>6</sup> Jesus einwânni modo âkelo anano modo itanwe aguely tindatuo myani akaemo eagonro anano modo ewy âtâdyguylymo. Mârâ tâjitanrugue nâsenomedâbyralâ myani aguelymo. Idase âtâdyguywâdyby modo toenzepa myani âsewânilymo. Koendâ kehoem mawânkâ myani aguehomo indadylymo.

<sup>7</sup> Toenzepa myani âsewânilymo, awylygue âjigüe aguelymo:

— Galiléia donro asaemo aguewâni modo.

<sup>8</sup> Kytanwelâ olâ aguelymo kindakylly! Âdara kuruka arâ kehoem aguelymo?

<sup>9</sup> Âzeydonro keba, âjitanweom keba warâma kurâ. Pártia donro, Média donro, Elão donro, Mesopotâmia donro, Judéia donro, Capadócia donro, Ponto donro, Ásia donro warâ kurâ.

<sup>10</sup> Tâlâ kuduay Frigia donro, Panfilia donro, Egito donro warâ. Tâlâ tarâ kuduay Líbia eynynonro modo, Cirene iwaguepanro. Tâlâ kurâ Romadâpa âetyby.

<sup>11</sup> Tâlâ tarâ kuduay judeu domodo lelâlâ, Israel iweompyry. Tâlâ lâpylâ tarâ âkelo kurâdo; akaemoma Israel iweom keba; judeu domodo ezewenry iweniby tâinwânsemo olâ. Creta donro, Arâbia donro warâpe tarâ kuduay. Âdara tâjitanru tiuntudânrygue aguelymo? Kytanwelâ asaemo, Deus koendâ anhetaymby modo wâgâ aguely — kelymo.

<sup>12</sup> Âseguâdâdilymo myani. Âdara tâkeho nutuba idylymo. Aituo myani âjigüe adapâguelymo:

— Âdaituoka awârâ awyly? — kelymo.

<sup>13</sup> Kurâdo olâ myani Jesus einwânni modo tyeilezemo lelâ. Warâ myani aguelymo:

— Toku ikay tawylygue kulâ asaemo arâ aguely — kelymo.

*Pedro kurâdoram aguehobyry*

<sup>14</sup> Aituo myani Pedro agueze saudyly. Târâ lâpylâ myani akaemo onze lelâ Jesus tunâry egaturin-em induakeyby modo. Ago kehoem myani târâ âtâdyguyby modoram, Jerusalémdâ tâtayneim modoram, saintaymby modoram warâ aguely:

— Nhaum, koendâ auguely idataungâ.

<sup>15</sup> Toku ikay inkâba xina, amyguehomo ara inkâba. Emedyly wâgâ kulâ awârâ, nove hora kulâ. Emedyly wâgâ xina judeu domodo vinhu nenywâbyra.

<sup>16</sup> Warâ âyanmo auguely, xina arâ aguely mâindatombory wâgâ. Deus itaumbory egatuimbyry Joel Deus aguehobyry inwenibylâ xirâ aini.

<sup>17</sup> Warâ myakâwândy Deus aguely:

“Xypyry iray ise xirâ agânhedyly.

Mârâ ume, Yispiritury idânârâ kurâdoram igonose urâ, âturimoem.

Judeu domodoram, judeu keba modoram alelâ ise kâingonodyly.

Âweompyrymo unâry egatuze, uguondo modo, pekodo modo alelâ.

Salokuzenomo modo, âwynsaundo modo warâ Yispiritury anhekyly nhetomoem aienehonze urâ.

Agaityom modoram, aripidoram warâ ywâgâ auguely ise nhâenkymoem.

<sup>18</sup> Ynynonro modoram ise mârâ ume Yispiritury kâingonodyly.

Pekodo modo agâ, uguondo modo agâ alelâ ise.

Ywâgâ ise mârâ ume aguelymo.

<sup>19</sup> Kyaneni kau wâgâ iepanâgueze urâ, ton-honre wawyly kâenehohoem.

Onro anaym adyesenry modo aiese lâpylâ urâ,

won-honru kâenehohoem.

Toenzepa ise munru apâdyly.

Toenzepa âjiaduâhonzemo petoam.

Nâepaiguebamo ise eunu wâgâ.

<sup>20</sup> Xixi tohoreba ise.

Munru ara ise nunâ, sapabilu.

Kywymâry sainto iray ise awârâ aidyly.

Toenzepa ton-honre tawyly tânehonze ise âewyly.

<sup>21</sup> Idânârâ, ‘Xina emakegâ, Pymâ’ keypy emakeze”

kely iweniwânmy Joel, Deus itaumbory egatuimbyry — kely myani Pedro.

<sup>22</sup> Aituo myani Pedro agueondyly tonlo modoram:

— Nhaum, Israel donro modo, idataungâ xirâ auguely. Jesus Nazaré donro wâgâ xirâ auguely. Tyiguely iraynâ, agâmo tatay, inanaynmolâ keankâ âdaunlo uguondo kulâ anhetânry modo anhedily. Kyzedâlâ koendonro modo, adyesenry modo warâ kientoem anhedily. Deuslâ keankâ mârâ koendonro modo, adyesenry modo warâ Jesusram aienehonrim, tingonotyby kuru awyly tienehon-hoem.

<sup>23</sup> Âmaemolâ olâ keankâ Jesus egamenri, tumunreim modoram kruz onwa adakâjiohoem, iguehoem warâ. Deus aguehobyry aralâ olâ keankâ awârâ modo aidyly. Tutuzelâ myani arâ amidylymo awyly.

<sup>24</sup> Jesus igueypyem awyly ume, Deus olâ kurâem nietondâ. Nigueompyra ise mâkâ-ro warâ. Nudupa lelâlâ tâise mâkâ iguewâtyby modo ejidydâ etadâdyby ara itoem.

<sup>25</sup> Kydamu Davi iweniwânmy Jesus wâgâ:

“Ywymâry aunlolâ yagâ awyly, tutuze urâ.

Yagâpa nitaymba.

Tyanunepa urâ, yagâlâ awylygue.

<sup>26</sup> Awylygue toenzepa womaru.

Auguepa witaymba urâ Deus koendonroem awyly wâgâ, womazeândylygue.

Iguein-em wawyly umelâ, kâinwâmpyra wîpyra wawyly.

Iekobyzeguehobe wawyly tynwânwânse wawylygue.

<sup>27</sup> Tutuze urâ, alâ igueypyenlâ yenehomba mawyly.

Wodo mâinwânzeânehomba mawyly warâ, Pymâ.

Âynnonroem wawylygue,

imary wawylygue warâ, igueypy modo duay yenehonwâbyra ise âmâ.

<sup>28</sup> Âdara aunloenlâ kyiguepa kitoem aguidyly wâgâ ienomedâdâ.

Toenzepa ise womaru, aunloenlâ agâ wawylygue”

kely iweniwânmy Davi – kely Pedro.

<sup>29</sup> Aituo myani Pedro agueondyly:

– Ypemugudo, koendâ mâuntuhoem awârâ Davi inweniby wâgâ agueze urâ. Tywâgâ inkâba myakâwândy aguely. Iweâpa mawânkâ myakâwândy kydamu Davi iguely. Eguepybyry sadyly myakâwândy, tâtagueim esagueyby tuhu imâsedo odaji. Târâ myakâwândy inwânzely. Iwague inkâba mâkâ Davi eguepybyry etadâdobyry tâtagueim tarâ awyly.

<sup>30</sup> Deus itaumbryr egatuim myakâwândy mâkâ, niguepa tatay. “Tokalâ âwerymo ewy ise pymâem kânhekyly. Judeu domodo iwymâry wâne maze myara ise pymâem awyly. Agânhekyly modo lelâlâ xirâ âyam augueho” kewânmy Deus, Daviram.

<sup>31</sup> Awylygue myakâwândy Davi tutuze lelâ awyly Deus ingonokylybe awyly. Deus Ingonotybyr igueypyem, kurâem itondyly Deus eon-honrugue awyly tutuze myakâwândy. Awylygue myakâwândy,

“Igueypyem lelâ mânhenhomba,

eguepybyry mâinwânzeânehomba warâ ise âmâ” kely.

<sup>32</sup> – Âkealâ olâ Deus eon-honruguelâ keankâ Jesus kurâem itondyly. Tutuze xina âkealâ awyly. Jesus iguepyemba awyly xina nedâ. Âkealâ tâkeze xina: “Kurâem itondybyem mawânkâ!”

<sup>33</sup> Eydâ tatoram olâ Deus nadâ. Pymâ tynrenseinhe mâkâ iwerâ, Tunwym ahuru eynynâ ekadybyem awyly. “Ispîritu igonose urâ” tâkehobyry Jesus nigonotai xinaram iwerâ. Sapezenru ton-honreim ara kehoem âjipyruely midataimolâ. Peto iatygu ara kehoem xina wâgâ metaimolâ. Âtanwemo xina aguely midataimolâ warâ. Iwerâ Ispîritu Jesus ingonotybylâ awârâ modo aieni.

<sup>34</sup> Tywâgâ inkâba myakâwândy kydamu Davi aguely. Deus eydâ atoram nâtâwâbyra myakâwândy eguepybyry. Jesus wâgâ myakâwândy awârâ Deus aguehobyry Davi inwenily: “Yahoru eynynâ ikagâ tynrensein ekadodâ,

<sup>35</sup> âduery modo eon-honru kainly ara,

âdydo ara kulâ âhuru iaxi kânhedilymo ara”

kewândymy Deus.

<sup>36</sup> – Nhaum, Israel domodo, koendâ ydataungâ. Kywymâryem Deus ingonotybyr keankâ mâkâ Messias kruz onwa mankâjien-honlymo, Deus Ingonotybyr “Âese” kehobyrylâ – kely myani Pedro târâ âtâdygyby modoram.

<sup>37</sup> Arâ Pedro aguely tindatuo myani idânârâ kehoem itywandilymo, Jesus tienagazenehon-hobyry wâgâ. Aituo myani Pedro domodoram aguelymo:

– Âdaraka ise xina aidyly iwerâ? – kelymo.

<sup>38</sup> Aituo Pedro in-hoguly:

– Âjityendaungâ inakanhe kulâ amitomobyryr wâgâ. Deus izepa ato aiedyly imowâdaungâ. Jesus einwântaungâ warâ, Deus inakanhe amitomobyryr nhygakehoem. Batiza âiehowâdaungâ, Jesus eynnonroem mawylymo mâenehon-homoem. Tyispirituryr igonose mâkâ, aunloenlâ agâmo itoem – kely myani.

<sup>39</sup> – “Âyanmo, âmeombyrymoam, âweompyrymoam, idânârâ âtâ anary onro anano modoram warâ ise kâingonodyly” nygue mawânkâ. Deus tynnonroem tingâsedaymby modoram Tyispiritury igonose – kely myani Pedro.

<sup>40</sup> Eyanmo aguezesezelâ myani Pedro; aguely:

– Inakanhe amidilymo imowâdaungâ. Jesus einwântaungâ, imakehomoem, Jesus einwântânry modo ara mâsenagazebyra mitomoem – kely.

<sup>41</sup> Agui tonlo modo ewy Pedro aguely tâinwânsemo myani. Jesus nheinwântuomo myani batiza âieholymo, Jesus eynnonroem tawly tienehon-homoem. Ilâem toenzepa kurâdo Jesus tâinwânsemo myani, trêš mil awârâem.

<sup>42</sup> Koendâ kehoem myani Jesus tunâry egaturin-em induakeyby modo aguely indadylymo. Tindatuo myani toenzepa kehoem nheinwândilymo, Jesus wâgâ nhenomedâdilymo warâ. Âdy pebaonram tâlâ tato nhudulymo. Deus agâ agueze âtâdygulymo. Âwinduase âtâdygulymo lâpylâ warâ, Jesus iguehobyry tiananâguehomoem.

*Jesus einwânni modo aitobyry*

<sup>43</sup> Deus eon-honrugue adyesenry modo kehoem myani Jesus tunâry egaturin-em induakeyby modo anhekyly. Awârâ modo anhedylymo tientuo, idânârâ kurâdo Deus tynrensemo tawly enehonwânmmomy.

<sup>44</sup> Idânârâ Jesus einwânni modo âjigie nâtâdyguyba nipyramo myani. Tâlâ tato nhépâdilymo ipaom modoram.

<sup>45</sup> Tonrorumo, âdydo imeom tâlâ tato warâ vende nhedylymo. Ebyry tienmakeybygue, âdy pebanro modo xurâem âdylâ nhanâdilymo warâ myani aidilymo.

<sup>46</sup> Kopaelâgâembaba myani Deus ety idaseray âtâdygulymo. Alâpylâ myani tâtydâ âtâdygulymo âwinduase, Jesus kruz wâgâ iguehobyry tiananâguehomoem. Âjigie iomarunumo. Tâwânrempamo myani, âkelomo agâ tâzepajigâzemo lelâ.

<sup>47</sup> Deus nhomaendilymo.

– Deus koendonro kehoem âmâ xina agâ – kezesedylymo.

Jerusalém donro modo myani akaemo ehogueni. Kopaelâgâembaba myani kurâdo Jesus einwânni âtâdyguly, agui isezedylymo.

### 3

*Pedro, João warâ Deus eon-honrugue adakobâdânry kua nhetobyry*

<sup>1</sup> Trêš horas kogonekâ, judeu domodo Deus agâ agueho oday myani Pedro, João warâ Deus ety odaji idâllymo.

<sup>2</sup> Târâ myani uguondo adakobâdânry nhedylymo, ihuru, ipaunru warâ tywyke iazeypy. Kopaelâgâembaba myani eataen-ho modo nhadyly Deus ety iwyantaji, “Portão Iwâkuru” kehoram. Târâ myani ekadybyem tawly ume, Deus ety odaji egawânni modo nhekaendily: – Tyendaungâ. Ydinheruru wao âunduwâtaungâ – kely.

<sup>3</sup> Aituo myani Pedro, João warâ egawândily. Akaemo tientuo myani aguely:

– Ydinheruru wao âunduwâtaungâ – kely.

<sup>4</sup> Agueduo azakâlâ eyam MYK idilymo. Pedro aguely eyam:

– Xinaram MYK ikâ – kely.

<sup>5</sup> Agueduo myani mâkâ uguondo MYK idily eyanmo.

– Ydinheruru nhudulymo wâne isenra – kely tyangahu oday.

<sup>6</sup> Warâ olâ myani Pedro aguely:

– Tydinherugunepa urâ. Dinheru takaze kehoem koendonro olâ ise âyam kâunduly. Jesus Cristo Nazaré donro eon-honrugue âyam aguely: “Aukâ. Adakobâgâ warâ” – kely.

<sup>7</sup> Agueypyem myani Pedro mâkâ uguondo emary aho eynnonro wâgâ nhawâdily, sautoem. Ilâ umelâ kehoem myani mâkâ uguondo saudyly, adakobâdily warâ.

<sup>8</sup> Kua itybyem tawlygyue, tuomarugue tadameze kehoem myani Deus ety idaseraji idâly, Pedro, João warâ agâ. Warâ myani aguely:

– Deus, koendonro kehoem âmâ, kua yetai – kely.

<sup>9</sup> Idânârâ tonlo modo emâmomy mâkâ adakobâdily, adamely warâ. Deus koendonroem awyly wâgâ aguely tydasemo lâpylâ myani.

<sup>10</sup> Âseguâdâmâmomy mâkâ koendâ adakobâdily tientuomo. Aituo myani âjigie aguelymo:

– Mâkâ pyantano adakobâdânrybyrylâ awâkâ. Aunlolâ inanry sakadaynrim modo nhekaendily. Etaungâ! Adakobâdily, adamely warâ aidily! Ânguy nheinwânkylyemba lâgâlâ! – kelymo.

*Deus ety idaseray Pedro aguehobyry*

<sup>11</sup> Mâkâ uguondo adakobâdânrybyry Pedro, João warâ agâ tâise lelâ myani; Alpendre de Salomão keho taserano oday myani akaemo azagâ tokalâ warâ. Mâkâ kua itobyry wâgâ tâsewânilymogue myani kurâ domodo tâgaune kehoem idâlymo eyanmo, kua ityby ese.

<sup>12</sup> Târâ toenzepa kurâdo âtâdyguyly tientuo myani Pedro aguely eyanmo:

– Nhaum, koendâ ydataungâ, kydamu Israel iweom. Tâseguâdâzêba itaungâ. Xina arâ kâzessedandâ. Ton-honrugue inkâba enra xina merâ adakobâdânrybyry kua nhedyly. Xina koendonroem awylygue inkâba merâ adakobâdyly.

<sup>13</sup> Kydamudo Abraão, Isaque, Jacó warâ iDeusry enra Jesus eon-honrugue kua itoem aieni, koendonro, ton-honreim waunlo Jesus awyly tienehon-hoem. Tâmaryem myani Deus, Jesus ingonodyly.

– Alâ olâ keankâ pymâ modoram mâengamelymo, kruz wâgâ iguehoem. Pymâ Pilatos wâne keankâ tienagazenehondyzeba. “Kruz onwa sakâjien-hongâ iguehoem!” mygweuwâtaundâmo olâ.

<sup>14</sup> Koendonro, âdaini keba keankâ mâkâ Jesus. Pilatos nenagazenehomba itoem âkeâ myguepa olâ mataunaguyne. “Kyârîm Barrabás etaguehongâ. Jesus kruz onwa sakâjien-hongâ” myguelymo lelâ keankâ.

<sup>15</sup> Kyigueânêhondânry keankâ iguedyse matomo.

– Deus kurâem nietondâ olâ-ro warâ. Jesus kurâem itybyem awyly, tutuze xina, tientobyry wâgâ, aguely tindatobyry wâgâ warâ.

<sup>16</sup> Merâ uguondo âdaunlopyry awyly koendâ tutuzelâ âmaemo. Jesus eon-honrugue olâ enra kua idyly. Koendâ adakobâdyly metaimolâ. Inumo angataylâ enra Jesus eon-honrugue kua idyly, Jesus adyese awyly xina nheinwândylygue.

<sup>17</sup> – Ypemugudo, âwymârymo agâ Jesus kruz onwa mankâjien-hondaymo, Jesus, Messiaslâ awyly mâuntuwâbyra keankâ akaemo. “Kruz wâgâ sakâjien-hongâ” myguedaymo, Deus Ingonotyby mâkâ awyly mâuntuba mawylymo xutu.

<sup>18</sup> “Kâinduakeyby âzenagazeoze, igueze warâ” kewânmy Deus, tytaumbyry egatuwâni modo aguehoem. Arâlâ keankâ anhenehonly, adâkehobyry ara aitoem.

<sup>19</sup> Âjityendaungâ, inakanhe amitomobyry wâgâ. Deus izepa ato aiedyly imowâdaungâ. Jesus einwântaungâ, inakanhe amitomobyry Deus nhygakehoem.

<sup>20</sup> Arâ aitaungâ, Pymâ Deus kua âetomoem lâpylâ, Jesus âyanmo ingonotoem warâ. Deus, “Messias igonose urâ einwânni modoram” kewânmy.

<sup>21</sup> – Iwerâ Jesus târâ Deus eydâ atodâ. Tytaumbyry egatuim modo aguehoem aguewânlâmy Deus: “Auguehobyry saintuo, idânârâ iweloem iese urâ” kewânmy. Adâkehobyry saintuo, Jesus igonotonze mâkâ.

<sup>22</sup> Iweâpa Moisés inweniby ara ise aidyly: “Tokalâ kypemugu âyanmo igonose Kywymâry Deus. Deus wâgâ ise mâkâ âyanmo aguely. Tunâry egatuze ugonodâ myara ise mâkâ ingonodyly lâpylâ. Idânârâ aguehobyry ara aitaungâ.

<sup>23</sup> Inakanhe kehoem ise Deus idânârâ tâinwândysebanrobyry modo nhenagazenehonly. Deus eynnonro modo duaipa ise akaemo tyguelâ. ‘Ynynonro keba asaemo’ keze mâkâ-ro warâ” kewândymy Moisés. Jesus onro anaxi naimpyra ataylâ myakâwândy inwenily.

<sup>24</sup> – Idânârâ myakâwândy akaemo saguhoem Deus itaumbyry egatuwânybyry modo Deus Ingonokyly saintuo aitaynrîm modo wâgâ aguelymo. Samuel, eagonro modo warâ xirâ wâgâ aguewânmomy.

<sup>25</sup> Deus itaumbyry egatuwânybyry modo iweompyrylâ kurâ, âmaemo, xina lâpylâ warâ. “Koendonro âmaemoem xuduze urâ” kewândymy Deus kydamudoram. Eyanmo lelâba myakâwândy aguely, kyam lâpylâ warâ. Kydamu Abraôoram aguehobyry enanâguewâdaungâ: “Tokalâ âwerypyry ewy wâgâlâ ise idânârâ onro anano modo agâ koendâ wawyly” kehobyry.

<sup>26</sup> – Iweâpalâ “Messias igonose urâ” tâkehobyrylâ myakâwândy Deus, ingonokyly kurâ israelita domodoram. Koendâ kyese, kieinwântoem, inakanhe kydawlyly kinmohom warâ myani ingonodyly – kely myani Pedro târâ âtâdyguyby modoram.

## 4

### *Pedro, João warâ pymâdorom satobyry*

<sup>1</sup> Pedro, João warâ aguelymo ume myani kurâdo eynynâ Deus agâ aguewâni modo iwymârydo saindyly. Deus ety iguardary iwymâry, saduceu domodo warâ saindylymo, aguelymo idase.

<sup>2</sup> Pedro, João warâ,

“Tyigueduo, Jesus kurâem nitondâ. Awylygue lakuru mawânârâ idânârâ iguewâtyby modo kurâem itonze awyly kiuntuly” kelymo tindatuo myani toenzepa kehoem iewiâpadylymo.

<sup>3</sup> Aituo myani guarda domodoram aguelymo:

— Awâkâ azagâ uguondo sawâtaungâ. Ekâjiwâdaungâ. Sataungâ kadeia odaxi. Târâlâ wao nemedâmo. Nudupa enra iwerâ, juizram satomoem — kelymo.

<sup>4</sup> Toenzepa myani akaemo, azagâ uguondo Jesus wâgâ aguehomobyry idataynrinmyry modo Jesus nheinwândylymo. Cinco mil uguondo modo awârâem myani Jesus einwânni, iwelo einwânni modo agâ, pekodo modo, lamimeom warâ tapâguezeba.

<sup>5</sup> Kopaelâgâem myani pymâ Jerusalém donro modo âtâdyguylimo, judeu domodo iwymâry, agaityom modo, Moisés ezewenry wâgâ iweniby enomedâni modo warâ.

<sup>6</sup> Târâlâ myani Anás. Kurâdo eynynâ Deus agâ aguewâni modo iwymâry kuru myani mâkâ. Ipemugudo tarâlâ lâpylâ myani, Caifás, João, Alexandre, eagonro modo warâ.

<sup>7</sup> Aituo myani sodadu domodoram aguelymo:

— Pedro, João warâ enetaungâ xarâ — kelymo.

Aituo myani ese idâlymo, nhadylymo. Saintuomo myani pymâdo tânadoram ingâsedylymo. Tânadoram idâduomo myani nhapâiguelymo:

— Ânguy unâry wâgâka keankâ uguondo adakobâdânrybyry kua mânhedylimo? Ânguy eon-honrugueka keankâ koendâ adakobâdoem amânhedylimo? — kelymo.

<sup>8</sup> Deus Ispiritury ton-hondâni awylygue tyanepa kehoem eyanmo Pedro wakely:

— Idaenkulymo wao, pymâ domodo.

<sup>9</sup> Mâuntudyze âmaemo merâ uguondo adakobâdânrybyry xina kua nhetobyry, âdara xina kua nhetobyry awyly warâ.

<sup>10</sup> Egatuze urâ, mâuntuhomoem, idânârâ judeu domodo nhutuhoem lâpylâ warâ. Uguondo kua idyly keankâ, Jesus Cristo Nazaré donro eon-honrugue, mâkâ kruz wâgâ mâyâmpymo, Deus kurâem nhetondyby eon-honruguelâ.

<sup>11</sup> Jesus izepa keankâ âmaemo. Tâlâ âwâgâmo Deus aguehobyry iweniby. Warâ aguely:

“Tâlâ myani tuhu imeâgâkeba, âtâ itâdo.

Idânârâ itâdaynrin modo mârâ tuhu tâensemo,

mârâgue âtâ tintâdyzebamo olâ.

Deus xurâem olâ mârâ tuhu tywyneim kuru!”

warâ iwenibyem awyly. Âtâ itâni modo tuhu âtâ saunâto kuru izepa atomobyry ara ise mâkâ imakerinmo izepa mawylymo.

<sup>12</sup> Jesus kulelâ kâmakerim, eagonro lâpeba. Ânguy eagonro nigonotaymba Deus kâmakerin-em — kely myani Pedro.

<sup>13</sup> Tyanepa kehoem Pedro, João warâ aguelymo tindatuo myani pymâ tyruneim modo toenzepa kehoem âsewânilymo. Tutuzemo mawânkâ myani âsenomedâdyby keba, âdy keba warâ awylymo; tonomegueim agueho ara kehoem agueduomo olâ Jesus eynynonrobyry asaemo — kelymo.

<sup>14</sup> Eagâmolâ myani mâkâ uguondo adakobâdânrybyry epagu. Awylygue myani Pedro, João warâ wâgâ âdakepa awylymo.

<sup>15</sup> Aituo myani Pedro, João, uguondo kua nhetybymoram warâ aguelymo:

— Âxiguewâdaungâ wao tarâpa — kelymo.

Âxiguebygeduomo myani akaemo pymâ domodo âjigie aguelymo:

<sup>16</sup> — Âdakiendylyka ise akaemo azagâ uguondo modo? Idânârâ Jerusalémdâ tâjikeim modo tutuzemo, adyesenry anhetomobyry, mâkâ uguondo kua nhetomobyry. “Adakobâdânrybyry kua nietaymbamo” kykely-ro watay, kurâdo kyeileze.

<sup>17</sup> Kyjigâsedon-nemo wao, “Mâkâ uguondo kua ityby wâgâ, Jesus wâgâ warâ ânguyram adâkezeba itaungâ” kykehoem. “Jesus wâgâ amyguesesedylymo-ro watay, toenzepa kehoem inagazenehonzemo xina” kykely ise eyanmo — kelymo myani.

<sup>18</sup> Aituo myani akaemo azagâ ingâsenehonlymo, aguelymo:

— Jesus xunârybyry aguely imowâdaungâ. Ânguyram iwâgâ adâkezeba itaungâ. Âdaunloenlâ Jesus xunârybyrygue ânguy kâzenomedâdondaundâ — kelymo myani.

<sup>19</sup> Agueduomo Pedro, João warâ aguelymo lâpylâ:

— Deuslâ keankâ, “Jesus xunâry egatuwâdaunda” kerim. Âmaemo pylâ “Kâzegatuwâdaunda” kerin-ro. Ânguyka ise xina nheinwânkylly kuru? Âmaemo? Deus?

<sup>20</sup> Jesus aidyly xina nedâ. Nhenomedâdo xina nidadâ warâ. Awylygue ise iwâgâ adâkely xina nimopa awyly — kelymo.

<sup>21</sup> Arâ agueduomo myani pymâ domodo eyanmo aguely:

— Tarâpa itaungâ. Jesus xunâry ânguyram kâzegatuondaundâ olâ-ro warâ. Iwâgâ amyguesesedylymo-ro watay, toenzepa kehoem inagazenehonzemo enra xina — kelymo.

Warâ olâ myani kurâ domodo mârâ âtâ anano modo aguelymo:

— Koendonro awâkâ Deus. Ton-honru nudu akaemo azagâram, mâkâ adakobâdânrybyry kua nhetomoem — kelymo.



Agueduomo myani pymâ domodo akaemo azagâ tienagazenehon-ho nutuba idylymo.

Aituo myani aguelymo:

— Kienagazenehonlymo-ro watay, kurâdo kagâ iewiâpadaynzemo — kelymo.

<sup>22</sup> Quarenta anos takaze myani mâkâ uguondo Deus eon-honrugue kua ityby.

*Jesus einwânni modo Deus agâ aguehomybry*

<sup>23</sup> Âzetagueoybyem myani Pedro, João warâ idâlymo Jesus einwânni modoram. Idânârâ kurâdo eynynâ Deus agâ aguewânni modo iwymârydo, judeu domodo iwymârydo warâ aguehomybry tâgatuzemo myani.

<sup>24</sup> Nhegatybyymo tindatuo myani idânârâ kehoem Deus agâ aguelymo:

— Pymâlâ âmâ, Deus, idânârâ xugunipyrylâ, kau, onro, parutabâ, paru warâ. Idânârâ tâlânro modo âmâlâ xuguni.

<sup>25</sup> Âspirituryguelâ myakâwândy imary Davi xirâ aguely inwenily:

“Judeu keba modo tyewiâpazemo;

judeu domodo inakanhe âedyly wâgâ tyangahu oday tunâgue warâ.

<sup>26</sup> Idânârâ pymâdo on-hoam isemo.

Kywymâry Deus agâ âseguelyze kezemo.

Deus Ingonokyly idueryem isemo warâ”

kely myakâwândy Davi inwenily.

<sup>27</sup> — Davi aguehomybry ara kehoem keankâ aidyly. Herodes, Pôncio Pilatos warâ, judeu domodo agâ, judeu keba modo agâ warâ nâtâdyguywâdaundâmo, tarâ Jerusalémdâ âmery Jesus tienagazedomoem. Inakanhe aityby keba lelâlâ wâne keankâ; alâ olâ keankâ Máingonotyby nhenagazenehonlymo.

<sup>28</sup> Tutuzelâ makynre arâ aniem awylymo, “Warâ ise aidyly” myguehomyrylâ awylygue. Idânârâ awârâ modo aidyly on-honruguelâ, arâ ize mawylyguelâ warâ.

<sup>29</sup> — Pabai, tutuzelâ âmâ, pymâ domodoram xina âjiewiâseolyo. Xina tienagazedzyze akaemo. Imary tawylygue xina on-honru nhekadyly, tyanepa xina âwâgâ aguezesedemo.

<sup>30</sup> On-honru xinaram xudugâ, tâwânuneim modo kua xina nhetoem, adyesenry modo kehoem xina anhetoem warâ, xina agâlâ mawyly xutuhoem. Warâ xina imarydo aiekâ, Jesus âdykâ inakanhe ityby keba eon-honrugue xina aitoem — kelymo myani Deusram.

<sup>31</sup> Deus agâ adâkely nhewanikebygueduomo myani mârâ âtâ âtâdyguyhomo âzekânily; Deus Ispiritury eyanno âewyly, eon-hondâzemo. Aituo myani idânârâ kurâdo eon-honru âduduoly, Jesus xunâry egatuze tyanepa itomoem.

*Jesus einwânni modo tâlâ tato âdyppenry modoram nhepâdomomybry*

<sup>32</sup> Koendâ kehoem myani idânârâ Jesus einwânni modo âzetaynlymo. Aguimo wâne, tokaleom aramo lelâ olâ myani. Turâem lelâ waypamo myani, tâlâ tato modo ipaom modoram nhepâdyllymo.

<sup>33</sup> — Pymâ Jesus nigue wâne. Iwerâ olâ kurâem itondybyem. Kurâem itondybyem awyly ume xina nedâ — kezeseamolâ myani.

Deus toenzepa eon-honrumo tuduze myani, tunâry nhegatuhoem. Koendâ lelâ myani akaemo Jesus einwânnipyry modo agâ.

<sup>34</sup> Tâty ioday tato vende iemâmomy. Tonroguneim modo tonroru vende ietaunmâmomy warâ. Ebyryppyry myani Jesus tunâry egaturin-em induakeyby modoram nhudulymo.

<sup>35</sup> Akaemo myani dinheru xudunri âdy pebaom modoram. Arâ myani akaemomybry âdy peba nipyra awyly. Idânârâ ipa tato aralâ mykâinane nhemakelymo.

<sup>36</sup> Tâlâ myani uguondo José keho. (Akaemo Jesus xunâry egatuwânni modo olâ myani “Barnabé” kerim eyam. “Kon-hondânni” keze aguely.) Ilha Chipre anaym iazeypy, Levigüe tydamudogeym warâ myani mâkâ.

<sup>37</sup> Tonroru vende iemâmy. Ebyryppyry Jesus tunâry egaturin-em induakeyby modoranlâ myani nhuduly, âdy pebanro modoram nhuduhoem.

## 5

*Ananias, Safira warâ Deus enokuze kehomomybry*

<sup>1</sup> Tâlâ myani Jesus einwânni Ananias, iwydylâ Safira warâ. Tonroru vende iemâmomy.

<sup>2</sup> Aituo myani Ananias tywydyram aguely:

— Âdiempa xirâ dinheru ewy kurâem kienkanâne. Jesus tunâry egaturin-em induakeyby modoram kiunduday, olâ “Idânârâ xirâ dinheru xina eonronru ebyryppyry tarâ awyly” keze lelâ kurâ — kelymo myani.

Aituo myani Ananias, Jesus tunâry egaturin-em induakeyby modoram dinheru nhadyly. Warâ myani saintybyem aguely:

— Anra dinheru. Idânârâ tarâ onro ebyryppyry kâenmakeyby awyly — kely.

<sup>3</sup> Aituo myani Pedro ton-honre kehoem eyam aguely:

– Satanás amidyse ato ara kulá amidily. Deus Ispiritury enokuze myguely. “Idânârâ tarâ onro ebyrpyry kâenmakeyby awyly” myguely wâne. Xirâ dinheru ewy mâenkanâdybymo tâlâ olâ âmaemo – kely myani Pedro.

<sup>4</sup> – Ânguy “Onroru vende iekâ” kewâpyra keankâ. Vende mânhepygueduo ânguy lâgâlâ keankâ “Idânârâ dinheru mâenmakeyby âdy pebanro modoram xudugâ” kepa warâ. Âmâ xurâlâ keankâ mârâ onro, tâwâlâ ize mato ara amânheteroem. Vende mânhepygueduo, âmâ xurâlâ keankâ dinheru warâ, tâwâlâ ize mato ara amânheteroem. Inakanhe inkâba dinheru mâempajigâdily âmaemoem. Iwâgâ tâdâsenogudily myguely olâ inakai. Xina kulelâ mâkeba enokuze mygueho, Deus lâpylâ warâ! – kely myani Pedro.

<sup>5</sup> Pedro aguepygueduolâ kehoem myani Ananias onro onwa ihuguely. Iguely lelâ-ro warâ. Idânârâ Ananias aitobyry xutuwânibyry modo toenzepa kehoem myani âseanedilymo.

<sup>6</sup> Aituo myani salokuzenomo modo ewy idâly, Ananias eguepybyry ituwynze. Tintuwym-bygueduo myani tâdâzeypâdoam nhadylymo.

<sup>7</sup> Trêshoras sakabygueduo myani Ananias iwydyppyry saindily Pedro eydâ atoram. Tuso igueypyem awyly nutuba myani.

<sup>8</sup> Aituo myani Pedro eyam aguely:

– Oso dinheru onro ebyrpyry mâenmakeybymo yam nenetai, âdy pebanro modoram kâunduoem. Idânârâ mâenmakeybymo ara nenetai? – kely.

– En-hem, idânârâ xina nhemakeyby aralâ enra mâkâ âyam nhuduly – kely lelâ myani iwydyppyry.

<sup>9</sup> Aituo myani Pedro aguely:

– Âmâ, oso warâ myguedwâdilymo kulâ. Deus Ispiritury enokuze myguehomobyry wâgâ mâsenagazebyra warâ keanra keankâ inanajimo. Idakâ ihurumo aguely. Salokuzenomo modo oso eguepybyry tâdâzeypâdoam sanipyry modo akaemo odopâni. Âmâ ise iwerâ nhakilymo! – kely.

<sup>10</sup> Aguepygueduolâ kehoem myani iguely. Pedro enadoram kehoem myani ihuguely. Salokuzenomo modo saindilymo myani. Egawândilymo. Âwântbyem, pekodo igueypyem lelâly awyly nhedylymo. Aituo myani eguepybyry nhadylymo iso eatadoanlâ.

<sup>11</sup> Idânârâ myani Jesus einwânni modo nhutulymo, Ananias, iwydylâ warâ Deus enokuze kehomobyry wâgâ iguehomobyry. Jerusalêmdâ tâtuneim modo egary tydasemo myani. Aituo myani toenzepa kehoem âseanedilymo. Idânârâ kehoem Deus eon-honru nhytadylymo.

*Jesus tunâry egaturin-em induakeyby modo Deus eon-honru nhenehon-homobyry*

<sup>12</sup> Jesus tunâry egaturin-em induakeyby modo Jerusalêmdâ Deus eon-honru tânehonzemo myani. Âdykâ ânguy anhetânry kehoem myani anhekylymo Deus eon-honrugue. Alâ myani idânârâ Jesus einwânni modo Deus etydâ âtâdyguelymo Galpão de Salomão oday.

<sup>13-14</sup> Agui isezedyly myani pekodo modo, uguondo modo warâ Jesus einwânni modo. Iwelo einwântaynim modo akaemo saguhoem einwânnipyry modo agâ tâtâdyguyzemo myani. Idânârâ Jerusalêmdâ donro modo koendâ myani iwâgâmo aguely. Jesus einwântânry modo olâ myani tyane eagâmo âtâdyguyze.

<sup>15</sup> Deus eon-honrugue tâwânuneim modo kua tyese myani Jesus tunâry egaturin-em induakeyby modo. Awlylygue mykâinane Pedro ânwa oze sakadyly tiuntuduomo, sakadodâ typemugu tâwâneim nheguetunâdilymo. Pedro sakady, egadopyry iwâgâmo sakaduo, kua tyese mykâinane.

<sup>16</sup> Jerusalêmdâ iwaguepa tâtuneim modo, toenzepa myani tâwânuneim modo, kadopâgue taseim modo warâ nhadylymo Pedro eydâ atoram. Mâkâ modo kua tyetaynze lelâ myani Deus eon-honrugue.

*Jesus tunâry egaturin-em induakeyby modo enagazedobyry*

<sup>17</sup> Toenzepa myani akaemo kurâdo eynynâ Deus agâ aguewâni modo iwymâry kuru, eataen-homolâ saduceu domodo warâ iewiâkymo tâsewânilymogue, ânguy adâkely nidapyra awlylygue, kurâdo, akaemo Jesus tunâry egaturin-em induakeyby modo aguely lelâ nheinwânkilymo awlylygue warâ.

<sup>18</sup> Aituo myani pymâdo aguely Deus ety iguardary modoram:

– Sawâtaungâ akaemo Jesus xunâry egatuwâni modo. Kadeia odaxi sataungâ – kelymo.

Aituo myani nhawâdilymo, nhetaâdilymo warâ.

<sup>19</sup> Mârâ kopaelâ olâ myani anju Deus eydâ atodâba xytâguely. Saintybyem myani kadeia iwyantary modo nhenahunguewâdily, tientaguehomoem. Egasebygueduomo koendâ

kehoem pyanta modo tânahuonze olâ myani. Eagâmo kuohoram idâwânmy. Aituo myani eyanmo aguely:

<sup>20</sup> – Emedyly wâgâ idâwâtaungâne Deus etyam. Jesus unârybyry egatuwâdaungâ akaemo tonlo modoram unâ tâdâsemagueho – kely myani Pedro domodoram.

<sup>21</sup> Aituo myani Jesus tunâry egaturin-em induakeyby modo mâkâ anju aguehobyry ara emedyly wâgâ Deus etyram idâlmyo. Deus ety idaseraji egawândylymo warâ. Kâmakerim Jesus wâgâ kurâdo enomedâdily nahuondylymo myani.

Kurâdo eynynâ Deus agâ aguewâni modo iwymâry kuru, eataen-ho modo lâpylâ warâ idânârâ judeu iwymâry modo ton-honreim tygâsezemo myani; idânârâ âtdygylymo. Pedro domodo tâtaguelâ-ro waunlo ara myani enanajimo. Awylygue myani Deus ety iguardary modoram aguelymo:

– Akaemo Deus itaumbry egatuwâni modo etaunda – kelymo.

<sup>22</sup> Aituo myani guarda domodo kadeiaram idâlmyo. Myarâ saintybyem olâ myani, Jesus tunâry egaturin-em induakeyby modo nepyramo. Tiempyramo tituo myani odopâdilymo pymâdo âtdygyhobyryam. Aituo myani aguelymo:

<sup>23</sup> – Ânguy lâpeba târâ kadeia oday! Idânârâ pyanta modo koendâ kehoem enahunwâdybyenlâ, pyanta eni modopelâ warâ olâ enra. Xina pyanta nenahungueagui. Kadeia oday xina netai warâ. Akaemo etadâdyby modo peba olâ enra târâ. Ânguy xina nepyra enra – kelymo.

<sup>24</sup> Kurâdo eynynâ Deus agâ aguewâni modo iwymârydo, guarda iwymâry warâ kadeiaram idâwâtyby modo aguely idamâmomy. Tindatuo, âseguâdâmâmomy âdara ito-mobyry awyly nutuba tawlymogoe. Aituo myani âjigie aguelymo:

– Âdaraka enra akaemo Jesus xunâry egatuwâni modo aidily? Âdykâmo wânkâ? – kelymo.

<sup>25</sup> Aguelymo ume myani egatuim saindily. Aguely:

– Idataungâ! Akaemo uguondo modo kopaelâgâ mâentadânehoybymo anrimo târâ, Deus ety idaseray. Jesus wâgâ kurâdo nhenomedâdondylymo – kely.

<sup>26</sup> Mâkâ aguely tindatuo myani akaemo Deus ety iguardary iwymâry, izodadury modo warâ Jesus tunâry egaturin-em induakeyby modo sawâtonze idâlmyo. Sawâtonibyryem, nenagazebyramo olâ myani.

– Asaemo kienagazedily-ro watay, kurâ domodo tuhu kuonwa samezemo. Toenzepa kurâdo asaemo nhehoguedily – kelymo myani tyangahu oday.

Awylygue myani âdaniepyra kehoem nhadylymo pymâdo âtdygyhobyryam.

<sup>27</sup> Pymâdo enadoram myani nhadylymo. Aituo myani kurâdo eynynâ Deus agâ aguewâni modo iwymâry kuru aguely eyanmo:

<sup>28</sup> – “Jesus wâgâ kurâdo kâzenomedâdaundâ” xina nygue wâne-ro. Etaungâ! Idânârâ asaemo taunlo Jerusalém donro modo iwâgâ unâ indadylymo. Amyguelymogoe kurâ domodo xina ewentâgueze Jesus iguehobyry wâgâ – kelymo.

<sup>29</sup> Aituo myani Pedro domodo aguely:

– Deus aguehobyry ara lelâ xina aidily, kurâdo aguehobyry ara inkâba.

<sup>30</sup> Jesus iguehoem kruz wâgâ makâjien-homo. Deus kydamudo nhyrentyby olâ kurâem nietondâ.

<sup>31</sup> Deus Ingonotybylâ mâkâ Jesus pymâem itoem. Deus ahoru eynynâ mâkâ iwerâ, pymâ tynrenseim ejidydâ. Kâmakerim mâkâ. Kurâ Israel iweompyry modo inakanhe kydawyly kinmoheom myani Deus, awârâ modo anhedyly. Kurâ judeu modo Jesus kienwânnyse mâkâ, inakanhe kydawyly tyngakehoem.

<sup>32</sup> Jesus aidily enipyry modolâ, aguely idanipyry modolâ warâ xina, iwâgâ aguenri. Deus olâ Tyispiritury tuginose lâpylâ tâinwântaynrim modoram, Jesus wâgâ ton-honre aguehomoem. Awylygue xina adâkeho nthutuly – kely myani Pedro.

<sup>33</sup> Arâ kehoem Pedro aguely tindatuo myani akaemo pymâ tynrenseim modo toenzepa kehoem iewiâpadylymo. Akaemo Jesus xunâry egatuwâni modo xyâze kelymo warâ.

<sup>34</sup> Aituo myani tokalâ akaemo ewy saudyly. Fariseu domodo ewy myani mâkâ, Gamaliel keho. Moisés inweniby wâgâ enomedâni myani mâkâ, idânârâ nhyrenkylymo warâ. Aituo myani guarda domodoram aguely:

– Asaemo uguondo modo wao kuohoram sataungâ – kely.

Egasebygeduomo myani tagonrodoram aguely:

<sup>35</sup> – Nhaum, idataungâ, kydamudo Israel iweompyry. Koendâne akaemo uguondo modo âdara kiendily awyly kydutunre.

<sup>36</sup> Uguondo Teudas aitobyry enanâguewâdaungâ. “Uguondo tynrenseim urâ. Aguely idataungâ” tâkeze myani. Toenzepa myani uguondo modo eagâ idâwâtyby modo awyly, quatrocentos awârâem. Tâdoye olâ myani. Igueduo, idânârâ eagonropyry modo

tâwenkezemo, tâtyram todopâdaynzemo warâ myani. Mâkâ Teudas aiese kewâtobyry, ton-honremba tâise myani.

<sup>37</sup> – Judas aitobyry enanâguewâdaungâ lâpylâ. Galiléia donro myakâwâm mâkâ. Kurâdo sapâgueho ume myakâwâm âepanâguey. Toenzepa kehoem kurâdo Judas agâ tâtâzemo myakâwâm. Tâdoyze lâpylâ olâ myakâwâm mâkâ. Igueduo, idânârá eagonropyry modo tâwenkezemo lâpylâ myakâwâm. Adiendyse atobyry ton-honremba tâise lâpylâ myakâwâm.

<sup>38</sup> Awlylygue olâ âyanmo auguely. Jesus wâgâ aguewâni modo âdalâ kulâ aguiempyra kine, uguely. Kyzetaguehonremo lelâ. Alâ nâtâzazedaymbamo ise, ton-honrumogue kulâ, kurâdo nhenomedâdylimo-ro watay.

<sup>39</sup> Deus eon-honrubemo-ro watay olâ ise âdakiempyramo kurâ, Deus agâ kydâseguebyly awlylygue – kely.

Gamaliel aguely tindatuo myani idânârá âseinwândylimo.

<sup>40</sup> Aituo myani guarda domodoram aguelymo:

– Xará enetondaungâ akaemo Jesus xunâry egatuwâni modo – kelymo.

Aituo myani pymâdo enadoram adahondylimo. Nhapiogüen-honlymo lelâ myani. Tiampiogüen-hombygueduo myani eyanmo aguelymo:

– Ânguyran-ne Jesus wâgâ adâkeonzeba itaungâ – kelymo.

Agueypyem myani inmoen-honlymo.

<sup>41</sup> Aituo myani Jesus tunâry egaturin-em induakeyby modo târâpa âxiguelymo. Toenzepa kehoem iomazelymo, Jesus Cristo wâgâ adâkeduo tâzenagazeolyo awlylygue.

<sup>42</sup> Jesus wâgâ aguepa nipyramo olâ myani. Kopaelâgâembaba myani iwâgâ aguelymo. Deus ety oday kurâdo nhenomedâdylimo warâ. Âtâ odakâ adakobâdylimo lâpylâ, Jesus unâry egatuze, Jesus wâgâ agueze.

– Kâmakerim mâkâ, Deus Ingonotyby – kelymo mykâinane.

## 6

*Jesus tunâry egaturin-em induakeyby modo emawyadâni induakehomobyry*

<sup>1</sup> Mârâpygueduo toenzepa myani kurâdo Jesus einwâni modo. Judeu gregu itanwe aguewâni modo, judeu hebraiku itanwe aguewâni modo aidyly nehoguebyramo myani. Awlylygue pyni âdy pebaom modoram xuduly wâgâ aguelymo:

– Aunlolâ inanry typyniguenry modo xuatay, pypâ hebraiku itanwe agueim modo lelâ imâem nhuankylymo awlyly, pypâ gregu itanwe agueim takaze kehoem – kelymo myani.

<sup>2</sup> Aituo myani doze lelâ Jesus tunâry egaturin-em induakeyby modo idânârá Jesus einwâni modo indâtyguylimo. Âtâdygyduomo myani eyanmo aguelymo:

– Deus itaumbry egatuly xina ewanu. Koendâ inkâba, Jesus wâgâ adâkely xina inmoly, pypâ modoram pyni timpâdoem kulâ.

<sup>3</sup> Nhaum, sete lelâ uguondo âinduakewâdaungâ, âdy pebaom modoram pyni epâniem. Koendonro modo iduakewâdaungâ, Deus Ispirityry agueho ara aini, tonomegueim warâ. Mâinduakeybymo ise kopaelâgâembaba pyni epâni.

<sup>4</sup> Jesus xunârybyry egatuly, eagâ adâkely warâ xina nimopa mawânâr ise. Awârâ kulelâ ise xina ewanu, âdy pebanro modoram pyni epâdly keba – kelymo.

<sup>5</sup> Idânârá tonlo modo, Jesus tunâry egaturin-em induakeyby modo agueho ara izemo lelâ myani. Saguhoem kuru induakelymo myani Estêvão. Jesus einwâni myani mâkâ, Deus Ispirityry aguehobyry ara lelâ aini warâ. Ilâpyryem myani Filipe, Prócoro, Nicanor, Timom, Pármenas, Nicolau warâ induakelymo. Antioquia donro myani mâkâ Nicolau, judeu keba, Moisés inweniby tâinwânse olâ myani.

<sup>6</sup> Akaemo iduakerimbyryem myani nhadylymo Jesus tunâry egaturin-em induakeyby modoram. Aituo myani Deus agâ aguelymo:

– Pabai, asaemo uguondo modo agâ ikâ; eon-honrumo xudugâ, âmâem aitomoem – kelymo.

Jesus tunâry egaturin-em induakeyby modo iduakewâdyby modo nhangahu onwa tâmary nhedylymo myani, ewanumo iwelo xudurimpyryem Deus awlyly xutuhomem.

<sup>7</sup> Jerusalémdâ agui idyly myani Deus itaumbry idataynrim modo, toenzepa lâpylâ Jesus einwâni modo warâ. Agui lâpylâ myani kurâdo eynynâ Deus agâ aguewâni modo ewy Jesus einwâni modo. Jesus einwâni modo agui isezedyly.

*Estêvão ewentâdobyry*

<sup>8</sup> Koendâ myani Deus, Estêvão agâ awlyly. Eon-honru tuduze mykâinane Deus, adyesenry modo anhetoem. Anhekyly tientuo, tutuze myani kurâ domodo Deus eagâlâ awlyly.

<sup>9</sup> Tâlâ olâ myani judeu domodo ewy Estêvão iewiâseni, Jesus wâgâ aguelylygue. Mârâ âtâ Etadâdyby Modo Etagueyby Âtâdygyho kelygue tâzekeim oday âtâdygywâni modo myani

akaemo, Cirene, Alexandria, Cilícia Ásia warâ donropyry modo. Aituo myani tyewiãse kehoem Estêvão nhapâiguelymo.

<sup>10</sup> Koendâ lelâ olâ myani in-hoguly, Deus Ispiritury aguehoem xurunipyryem awylygue. Pymâdo enado tâwentâdoem âdalâ kulâ aguely nitaymba myani mâkâ.

<sup>11</sup> Aituo myani kurâdo ewy nhepywadylymo, âdalâ kulâ Estêvão wâgâ aguehomoem:  
– “Mâkâ uguondo, Moisés nhunâguedyly, Deus nhunâguedyly warâ xina nidadá” myguelymo ise – kelymo myani.

<sup>12</sup> Arâ myani akaemo aguely Estêvão wâgâ. Arâ aguelymo tindatuo myani kurâdo Estêvão agâ iewiâpadaynly, pymâ domodo, Moisés inweniby wâgâ enomedâni modo warâ. Inepa kehoem myani idâlymo myarâ Estêvão eydâ atoam. Estêvão sawânipyryem, nhadylymo lelâ myani pymâdo ton-honreim âtâdyguyhobyryam.

<sup>13</sup> Akaemo kewâdyly kulâ waunlo modo idâwânmmomy lâpylâ myarâ. Aituo myani aguelymo:

– Xinalâ keankâ awâkâ uguondo Deus nhunâguedyly idani. Deus ety, Moisés inweniby warâ xunâguedyly nimowâbyra awâkâ.

<sup>14</sup> “Jesus Nazaré donro Deus ety sakalaguzee; idânârâ Moisés kurutoem inweniby xugukeze warâ Jesus” nygue – kelymo myani.

<sup>15</sup> Idânârâ târâ pymâdo âtâdyguyho odano modo ara myani aguelymo indadylymo. Agueduomomy myani, toenzepa kehoem Estêvão nhesedylymo. Anju emydy ara kehoem myani emydy nhedylymo, Deus eagâlâ awylygue.

## 7

### *Estêvão pymâdo enanaym aguehobyry*

<sup>1</sup> Aituo myani kurâdo eynynâ Deus agâ aguewâni modo iwymâry kuru Estêvão nhapâiguely:

– Âkealâka âwâgâ aguelymo? – kely.

<sup>2</sup> Aituo myani Estêvão in-hoguly:

– Ydataungâ, pymâ domodo, kurâ domodo warâ. Kydamu Abraão agâlâ mykâinane Deus ton-honreim. Kydamu Abraão Mesopotâmia eynynâ atay, Harâram idâly iraynâ, Deus idâwânmy eyam aguzee:

<sup>3</sup> “Ity anaymba âxiguegâ. Âpemugudo nhângâ. Mârâ âtâ anary âyam kêenehonly anaxi idâ” kewândymy Deus.

<sup>4</sup> – Aituo myakâwândy kydamu âxiguely “Caldéia” kehodâba. Harâ anaxi myakâwândy âxidâze idâly typemugudo agâ. Harâ anaynlâ myakâwândy nhunwym iguely. Ilâpyryem myakâwândy Deus Abraão ingonodyly xirâ eydâ kydato anaxi.

<sup>5</sup> Canâdâ lelâlâ wâne myakâwândy kydamu ejiku, eonronruempa olâ myakâwândy. Deus olâmy eyam, “Ity anarylâ ise xirâ” kewândymy. “Âigueduo, âweompory ety anaryenlâ ise” kewândymy warâ. Deus arâ agueday, kydamu Abraão tymegeuneba myakâwândy.

<sup>6</sup> “Tarâpa âxiguzee âweompory modo. Âkelo anaxi idâzemo. Âkelo kurâdo duaxi âxidâze, idâzemo warâ. Iweâpa ise tâty anaymba awylymo, quatrocentos anos awârâem. Mârâ âtâ anary idâhomobyry iwymâry modo âweom enagazezemo. Âweom mârâ âtâ anaym âsewanihobyry tâpywaduneba ise. Kaikâem kulâ ise enagazedilymo” kewândymy Deus – kely.

<sup>7</sup> – “Âweom enagazedaynrin modo enagazeze lâpylâ olâ urâ. Ilâpygueduo ise odopâdylymo mârâ âtâ anaymba, tarâ yrentomoem” kewândymy Deus kydamu Abraôram.

<sup>8</sup> “Uguondo imeimbyry iazely-ro watay, ilery ety iopiry satâgâ, israelitalâ awyly xutuhoem” kewândy lâpylâmy. “Ynynonro modo aito ara aikâ” kewândymy kydamuam. Aituo myakâwândy Isaque iazely, Abraão imery. Sete emedyly itybyem atay myakâwândy nhunwym ilery ety iopiry nhatâly, Deus, “Aiekâne” kehobyry ara. Isaque uguondoem itybyem, Jacôgue tymezeduo ilery ety iopiry satâwâm lâpylâmy. Uguondoem itybyem, doze lelâ myakâwândy Jacô imeom uguondo modo. Sete emedyly itybyem myakâwândy tymeombyry iazely agâ ilery ety iopiry nhatâwâdyly, israelitalâ awylymo xutuhoem. Akaemo doze uguondo modolâ idânârâ israelita modoem iepani – kely myani Estêvão.

<sup>9</sup> Aituo myani Estêvão agueondyly:

– Tâlâ myakâwândy Jacô imery, José keho. Mâkâ myakâwândy inwynegyly kuru, eagonro tymeombyry takaze. Awylygue myakâwândy ipemugudo iwâgâ âsewânilymo. Aituo myakâwândy José vende nhedylymo Egitoram idâwâni modoram. José agâlâ olâ myakâwândy Deus. Tâenselâ târâ Egitodâ.

<sup>10</sup> José âzenagazeaduo, Deuslâ myakâwândy eon-hondâni. Toenzepa kehoem myakâwândy enomery nhuduly. Salokuzenomo koendonroem tyenehonze myakâwândy. Awylygue

myakâwândy Egito donro modo iwymâry “Faraó” keho, toenzepa José ize awyly, pymâem nhenehonly warâ. Tâty, tysejiguy warâ eniem nhedyly myakâwândy.

<sup>11</sup> — Mârâ ume myakâwândy âpa ezay etâdyby iladaynly, iguewâdyly warâ Egitodâ. Tâlâ myakâwândy toenzepa âsewinzeni modo. Pyni tadainze lâpylâ myakâwândy tarâ Canaãdâ. Kydamudo typynigueba idyly myakâwândy.

<sup>12</sup> Egitodâ trigu ekanâdybybe kely tindatuo myakâwândy kydamu Jacó tymeombyry ingonodyly sanâse. José iwaigorudo saguhoem myarâ idâlymolâ myakâwândy.

<sup>13</sup> — José esedaunmâmomy, ânguyem awyly nutubamo olâ myakâwândy. Idânârâ idâontomobyry wâgâ myakâwândy, “José urâ, unwânmo imery” kely eyanmo. “ÿpemugudo asaemo” kewândymy Faraóram.

<sup>14</sup> Canaãram odopâdylymo iraynâ myakâwândy eyanmo José aguely: “Pabai agâ, âwydymo agâ, âmeonmo agâ warâ xarâ âetaungâ” kely. Aituo myakâwândy idânârâ kydamudo Egitoram idâlymo. Setenta e cinco lelâ myakâwândy kurâdo myarâ idânri.

<sup>15</sup> — Târâlâ myakâwândy José nhunwym iguely. Imeom, iweom warâ tâigueze lâpylâ myakâwândy târâ.

<sup>16</sup> Iweâpa ipygueduo myakâwândy kydamudo ibyrypyry âzenehonly Siquémram, xarâ Canaã anaxi. Iweâpalâ olâmy Abraão onro sanâmâ Hamor imeombyry emaym, type-mugudo eguepybyry tuhu esagueyby odaji etadâdoem. Aituo myakâwândy târâ kydamudo ibyrypyry etadâdyly — kely.

<sup>17</sup> Aituo myani Estêvão agueondyly, tydamudo âdara itobyry awyly nhenanâguehomoem: — Iweâpalâ Deus, Abraão ram aguehobyry adahowando odaxi itybyem myakâwândy, xirâ onro anaxi odopâdomo odaji itybyem. Egitodâ tataymo, toenzepa tyepaze olâ myakâwândy kydamu Jacó iweompyry modo.

<sup>18</sup> Mârâ ume eagonro myakâwândy pymâem ini Egitodâ. Mâkâ pymâ iwelo toenzepa myakâwândy kydamudo nhenagazedly, târâ xyrentyby José ipemugu awylymo umelâ. Iweâpa mawânkâ myakâwândy kydamu José iguely, mâkâ pymâ iwelo ipa ataylâ.

<sup>19</sup> — Kydamudo enokumâmy, enagazemâmy warâ mâkâ pymâ iwelo. “Âmerymo iazely uguondo-ro watay, samewâdaungâ paikaji iguehoem” kewândymy eyanmo. Israelita domodo agui idysebâ myakâwândy.

<sup>20</sup> Mârâ ume myakâwândy kydamu Moisés iazely. Iamudo iwâkuru kehoem myakâwândy mâkâ. Azagâ tokalâ warâ nunâ myakâwândy nhunwym, ise warâ soenseze awyly âtâ oday.

<sup>21</sup> — Ago idyly olâ myakâwândy, toensein-empa idyly. Aituo myakâwândy cestu odaji nhedylymo, paikaji ingonodylymo warâ. Niguepa olâ myakâwândy. Pymâ exiry myakâwândy cestu oday awyly ume eni. Aituo tymeryem nhadyly. Tymery ara lelâ nhenamanâdyly.

<sup>22</sup> Pymâ iwey ara kehoem myakâwândy. Awylygue myakâwândy idânârâ Egito donro modo ezewenrygue, enomerygue warâ nhenomedâdyly. Uguondoem itybyem atay, toenzepa myakâwândy enomegu. Tonlo modoram tâdyren-honze myakâwândy — kely.

<sup>23</sup> Aituo myani Estêvão agueondyly, Moisés wâgâ, tydamudo wâgâ warâ:

— Uguondoem myakâwândy Moisés, quarenta anos, typemugudo israelita domodo tiendyse myakâwândy.

<sup>24</sup> Aituo myakâwândy eydâ atomoram idâly. Târâ tatay, âdaituoba kulâ israelita Egito donroam adapioguoly tâense myakâwândy. Awylygue myakâwândy typemugu emakeze idâly, Egito donro xyâwânmy warâ.

<sup>25</sup> “ÿpemugudo keanra tutuze emakerimoem Deus induakeyby wawyly” kely myakâwândy Moisés. Akaemo olâ myakâwândy Moisés neinwâmpyramo.

<sup>26</sup> Kopaelâgâem myakâwândy azagâ israelita domodo âseguebyhoram idâly. Âseguebylymo epagunâze kely myakâwândy. Awylygue eyanmo aguely: “Tâseguebyzeba itaungâ. Âjipemugulâ âmaemo” kely.

<sup>27</sup> — Mâkâ tagonro enagazeni myakâwândy Moisés agâ iewiâpani, âjitoguylymo epagunâze keduo. Ihohu wâgâ igononibryem myakâwândy aguely: “Xinaram adâkezeba ikâ. Xina iwymâry mâkeba âmâ! Xina mâuntuwâbyra âmâ!

<sup>28</sup> Tutuze urâ, kopaelâgâ egípcio mâyân-hobyry. Iwerâ urâ mâyândyse mato?” kely myakâwândy Moisésram.

<sup>29</sup> Agueduo Moisés âseanedly. Tâzenagazeoly nhytadyly, egípcio tyân-homyry wâgâ. Aituo Egitodâba âwiendly. Midiâ anaxi idâly. Pekodo Midiâ anano agâlâ myakâwândy ohogüiny. Azagâ lelâ imeom iazely târâ.

<sup>30</sup> Quarenta anos sakabygueduo, târâ âji aguipa kurâdo atodâlâ myakâwândy Moisés, iwy Sinai iwaguepa. Moisés tuhogueim iatygu emâmy. Mârâ iatygu duay myakâwândy anju âepanâguely. Âdaunloenâ iwatarylâ, sary warâ niadupa olâ myakâwândy.

<sup>31</sup> Mârâ arâ tientuo myakâwândy Moisés âseguâdâdly. Iwaguepa saindyly, koendâ tientoem. Iwaguepa saintybyem myakâwândy Deus aguely indadyly.

<sup>32</sup> “Deus urâ, âdamudo Abraão, Isaque, Jacó warâ iDeusry” kely. Aguely tindatuo myakâwândy Moisés adapâniily tyanugue. Tiendyseba idyly.

<sup>33</sup> – Aituo myakâwândy Kywymâry Deus aguely: “Tarâlâ urâ. Âhuru etary etygâ. Ienado ihuru tâtagueba ikâ, yrentâ mawlyl mânehon-hoem.

<sup>34</sup> Tutuze urâ, nynonro modo Egitodâ âzenagazeoly. Alâ inanry saenlumo kâindadyly. Emakezemo kâewyly. Inepa ise Egitoram ogonodyly emakezemo” kewândymy Deus eyam – kely myani Estêvão.

<sup>35</sup> Aituo myani Estêvão agueondyly:

– Kydamudo iwymâryem, Egitodâba emakerimoem warâ myakâwândy Deus Moisés induakely. Deus anju igonomâmy emawyadâze, mâkâ anju tuhogueim tyatygueim duay âepanâgueyby. Kydamudo olâ myakâwândy Moisés izepa, aguely tindadysebamo warâ. “Ânguy xina emakerin-em âduakewâbyra keankâ. Ânguy aguewâpyra keankâ xina iwymâryem mitoem” kelymo lelâ myakâwândy Moisésram.

<sup>36</sup> Moiséslâ myakâwândy kydamudo sani Egitodâba. Adyesenry modo aiemâmy Deus eon-honrugue, Deus tagâlâ awyly tienehon-hoem. Egitodâ tataylâ myakâwândy nhenehonly Deus eon-honru tagâ awyly. Parutabâ Tapabileim kelygue tâzekeim takadomoem iotagâ wayam, wayam tienehonday, Deus eon-honru enehonwâm lâpylâmy. Kydamudo quarenta anos âji âdy peba ato einkâ adakobâday myakâwândy Deus ton-honru nhenehonly Moisésram.

<sup>37</sup> Moiséslâ myakâwândy kydamudoram agueim: “Kyweompyryram igonose Deus tytaumbyry egatuim. Kypemugulâ ise mâkâ. Uduake wâne Egitodâpa imakerinmoem myara lâpylâ ise mâkâ kâmakerim ingonodyly” kerim.

<sup>38</sup> Kydamudo iwymâry myakâwândy Moisés, mârâ âji âdy peba ato einkâ adakobâdaymo. Deus ingonotybylâ myakâwândy mâkâ anju târâ iwy Sinaidâ, Moisés agâ agueim. Xirâ unâ izoeno agueho tâinwânselâ kurâ até iwerâ – kely myani Estêvão.

<sup>39</sup> Aituo myani Estêvão akaemo âsenanâguehoem Moisés wâgâ agueondyly.

– Kydamudo olâ myakâwândy Moisés aguehobyry ara adâidysebamo, tywymârymoem izepamo warâ. Awylygue myakâwândy Egitoram odopâze kelymo.

<sup>40</sup> – Aituo myakâwândy Arâoram aguelymo, Moisés iwaigoruram, Moisés târâ iwy Sinaidâ atay: “Xina ideusry modo xygakâ; xina nhyrenkyly, xina iwanroruem itoem. Âukono Egitodâba xina nejike. Tarâpa olâ mâkâ iwerâ. Iwy Sinairam nâtâ. Xina nutuba âdara itybyem awyly” kewândymomy.

<sup>41</sup> Aituo myakâwândy bizeru ekudo nhygadylymo. Mâkâ enado kaneru, tapirâ warâ tyâzemo myakâwândy. Enado âzeguhoam tâisemo myakâwândy, tynrentomoem. “Kyze-tyguene merâ kydeusry” kelymo myakâwândy. Agueypyem nhetyguedylymo. Deus ara kehoem myakâwândy nhyrendylymo, mâkâ tâmarygue tyngatybymo kulâ.

<sup>42</sup> – Awylygue myakâwândy Deus, saguhoem tientomobyry ara, nepyramo idyly. “Tâwâlâ inakanhe anidâmo, ize tato ara” kely myakâwândy Deus. Awylygue myakâwândy xixi, nunâ, ximukâ, awârâ modo kulâ nhyrenkylymo awyly. Saguhoem Deus itaumbyry egatuwâni modo iwâgâmo inwenihomobyry ara kehoem myakâwândy aidyly.

“Israel domodo, urâ mâkeba akâwâm âdamudomo nhyrenkyly, quarenta anos ara mârâ âji âdy peba ato einkâ tadakobâdaymo.

Yam inkâba akâwâm ânguydo imeom xyâppy, iaduântyby warâ nhegamelymo.

<sup>43</sup> Yrentaymbamo akâwâm;

tydeusry tyngatybylâ akâwâm nhyrenkylymo.

Urâlâ-ro waunlo ara kehoem akâwâm nhyrendylymo.

Moloque ekudo xygamâmo.

Âtâ imeimbyry odaji iemâmo warâ, tynrentomoem.

Mârâ âtâ imeimbyry takobâzelâ akâwâm akaemo,

âji âdy peba ato einkâ tadakobâdaymo.

Ximukâ Raifâgue tâzekeim tynrensemo,

ekudo adyesemo warâ lâpylâ akâwâm akaemo.

Awylygue ise toenzepa inagazedilymo âdamudomo aralâ mawlylymogue.

Itymo anaymba taypa ogonosemo urâ, Babilônia yan-yam”

kewândymy Deus – kely myani Estêvão.

<sup>44</sup> Aituo myani eyanmo agueondyly:

– Moisésram Deus tânehonzelâ myakâwândy âtâ tâjitybygueto âdara aiedyly awyly, kydamudo Deus nhyrentomoem. Âdy âtâ odaji tyeseim awyly wâgâ tâduruhozelâ myakâwândy

warâ. Deus, Moisésram aguehobyry ara myakâwândy anhedylimo. Mârâ âtâ oday myakâwândy azagâ tuhu tukumeleim wâgâ Moisés inweniby ekanâdily. Mârâ âtâ Deus xyrento takobâzemo myakâwândy kydamudo, mârâ âji âdy peba ato einkâ tadakobâdaymo.

<sup>45</sup> Kydamudo Egitodâba âxigüewâdyby modo igueduo myakâwândy imeombyry, iweompyry warâ mârâ âtâ nhenewylimo xarâ, Canaâram, onro Deus nhuduypy anaxi. Josué myakâwândy iwymârymo iwelo. Canaâram saintybyem myakâwândy âkeoem tytanruneim modo nhedylymo. Deus kydamudo eon-honru nhuduly myakâwândy, akaemo tâty anano modo nhejikehomoem, akaemolâ tarâ tâxidâdoem. Kydamudo Deus tynrensemo myakâwândy mârâ âtâ tâjitybygueto oday, iwymârymo Davi igueypyem awyly umelâ.

<sup>46</sup> – Toenzepa myakâwândy Deus Davi inwynedily. Koendâ kehoem myakâwândy eagâ awyly warâ. “Âtâ imâsedo, iwâkuru warâ kâintâdyze urâ, ityem. Ydamu Jacó âinwântâ myakâwândy, urâ lâpylâ warâ. Awylygue ise ity kâintâdily” kely myakâwândy Davi Deusram.

<sup>47</sup> Deus olâ myakâwândy Davi intâdyzeba. Awylygue myakâwândy Davi keba Deus ety itâni awyly. Salomão Davi imery myakâwândy âtâ imâsedo Deus etyem itâni.

<sup>48</sup> – Kurâdo âtâ intâdyby odano kulâ keba olâ Deus Ton-honreim. Deus aguehobyrylâ enanâgüewâdaungâ, Deus itaumbyry egatuim inweniby:

<sup>49</sup> “Tâinkâ lelâba tâlâ wawyly.

Mure iekado awârâ kau, onro pylâ uhuru kâenkobyzegueândo-ro warâ.

Âtâ mâintâdybymo oday witoem nuduwâpyra.

<sup>50</sup> Âdy iwelo urâem amânhekylimo lâpeba,  
urâlâ idânârâ xuguni wawylygue”

kewândymy Deus – kely myani Estêvão.

<sup>51</sup> Aituo myani Estêvão eyanmo agueondily:

– Eganumi lelâlâ mataunaze! Deus xurâem ânguydo kulâ âmaemo! Jesus wâgâ mâindadyse inkâba âmaemo. Nhenomedâdobyry mâuntadyze inkâba âmaemo, mâinwândyise inkâba warâ. Deus Ispirityry aguely mâinwantaguedyze inkâba âmaemo, âdamudomo aralâ.

<sup>52</sup> Deus itaumbyry egatuwâni modo enagazemâmo, xyâwânmo warâ. “Koendonro Deus Ingonokily sainse” tâkeze myakâwândy akaemo unâ egatuwâni modo. Mâkâ Koendonro âduaximo naindâ, Jesus. Izepaom modo emaxi muduwâtaundâmo olâ. Âmaemolâ keankâ kruz onwa sakâjien-honri.

<sup>53</sup> Deuslâ myakâwândy kâzewenry xudunri. Emary kaynonro myakâwândy Moisésram agueim. Agueho ara amidyseba olâ âmaemo – kely myani Estêvão eyanmo.

*Estêvão xyâhobyry*

<sup>54</sup> Estêvão aguely tydase myani akaemo pymâ domodo. Tindatuo, toenzepa kehoem myani iewiâpadaynlymo, tyewiâkygue, tyery nhagulymo warâ.

<sup>55</sup> Estêvão olâ myani nâseguâdâbyra; Deus Ispirityry idânârâ myani enomery nhuduly, aityanrim modo nhemaen-hoem. Kayam MYK idyly myani. Deus Ton-honreim eydâ ato nhedyly. Jesus nhedyly lâpylâ XYDYK warâ, Deus eahoru eynynâ.

<sup>56</sup> – Kau âzenahungueyby kâenkily. Jesus kâenkily, Uguondo Kaynâpa Âetyby XYDYK warâ Deus eahoru eynynâ! – kely myani Estêvão.

<sup>57</sup> Agueduo myani pymâ domodo toenzepa kehoem iewiâpadaynlymo. Âjiwantahulymo, aguely nidapyra tâitomoem. Toenzepa kehoem adaenkelymo; idânârâ kehoem Estêvão onwa idâllymo myani.

<sup>58</sup> Sawânipyryem myani âtâ anaymba nhegaseândilymo, tyân-hoem. Târâ myani tuhugue tamytâze nhâllymo. Tuhu tiamehomoem tâty BOH waunlo nhetylymo; salokuzenomo Saulo myani akaemo ety iwogonro eni.

<sup>59</sup> Tuhu nhamelymo ume myani Estêvão, Jesusram aguely:

– Pymâ Jesus, wonkâne yigueduo, âyam yaintuo – kely myani.

<sup>60</sup> Ilâpyryem myani âzeguhoam idyly. Toenzepa kehoem adaenkely:

– Pymâ Jesus, xirâ inakanhe aitomobyry xygakegâ – kely myani.

Agueypyem myani iguely.

## 8

<sup>1-2</sup> Estêvão eguepybyry tuhu imâsedo esagueyby odaji nhetadâdilymo myani akaemo Jesus einwânni modo ewy. Toenzepa myani igueduo eogunrumo. Saulo olâ myani, Estêvão igueypyem awyly tientuo, toenzepa iomar.

*Saulo Jesus einwânni modo nhenagazedobyry*



Estêvão xyâpygeduolâ myani akaemo Jesus einwântânry modo, Jesus einwânni modo toenzepa enagazedylimo nhaguly. Aituo myani âwientaynlymo Jerusalémdâpa. Judéia yan-yam idâimpe myani. Samaria yan-yam idâimpe lâpylâ myani. Jesus tunâry egaturin-em induakeyby modo olâ myani nâwiempyramo, târâmolâ.

<sup>3</sup> Saulo, Jesus einwânni modo nhenagazedylady adaguly myani. Idânârâ myani tyândysemo awyly. Sawâsemo âtâ odakâ adakobâdylady myani. Uguondo modo, pekodo modo alelâ myani tuxize kehoem kadeia odaxi nhakly.

*Samariadâ unâ iwâkuru Jesus wâgâ egatuhobyry*

<sup>4</sup> Akaemo Jesus einwânni âwientaymy modo tâinkâ lelâba myani unâ iwâkuru Jesus wâgâ nhegatulymo, Judéia eynynâ, Samaria eynynâ warâ.

<sup>5</sup> Jesus einwânni modo enagazedylady ume myani Filipe Jerusalémdâpa âwiendylady. Âtâ anary imâsedo Samaria kehoram idâly. Tonlo modoram,

– Messias mâkâ Jesus, Deus Ingonotyby – kewânmy.

<sup>6</sup> Koendâ kehoem myani kurâdo Filipe aguely inwantaguedylimo, Deus eon-honrugue adyesenry modo anhedyly tientuo.

<sup>7</sup> Deus eon-honrugue toenzepa kadopâbeom modo kua iemâmy. Tadaenkeze kehoem myani kadopâ modo kurâdo odaypa egasewâdylady. Alâpylâ adakobâdânry modo, ixigalamadaymy modo warâ kua nhetaynly.

<sup>8</sup> Warâ myani mârâ âtâ anano modo iomazewâdylady.

<sup>9</sup> Târâ tâtyeimbe myani uguondo Simão keho. Âmeodo myani mâkâ. Mâkâ anhekyly tientuo, toenzepa myani samaritano domodo mâkâ nhehoguedylimo. Toenzepa myani adawily tâwâlâ kulâ, “Ton-honreim urâ” tâkewâdylgyue.

<sup>10</sup> Tonlo modo myani aguely inwantaguedylimo lelâ.

– Deus eon-honrube merâ uguondo! Mâkâ Toenzepa Lelâ Ton-honreim kelygue tâzekeim eon-honrube! – kelymo.

<sup>11</sup> Iweâpa myani arâ aieseze awyly. Koendâ kehoem myani kurâdo mâkâ anhekyly nhenugaendylimo; iweâpalâ mawânkâ myani anhekyly wâgâ âsewânilymo.

<sup>12</sup> Mârâ ume myani Filipe Samariadâ Jesus wâgâ unâ nhegatuly. Deus kywymâryem itybyem awyly wâgâ myani eyanmo aguely. Unâ iwâkuru myani eyanmo nhegatuly. Tindatuo, toenzepa myani kurâdo Jesus nheinwândylady, uguondo modo, pekodo modo warâ. Einwânnipyryem myani batiza âieholymo, Jesus Cristo eynynproem tawylimo tienehon-homoem.

<sup>13</sup> Simão lâpylâ Jesus tâinwânse, batiza tâiehoze warâ myani. Deus eon-honrugue Filipe adyesenry modo anhedyly tâense myani. Toenzepa tâsewânize myani, mârâ tientuo. Aituo myani aguely:

– Âdara kuruka Filipe awârâ modo anhedyly? – kely myani Simão.

<sup>14</sup> Jerusalémdâlâ myani Jesus tunâry egaturin-em induakeyby modo, “Samaria donro modo Jesus nheinwândylimo” kely indadylymo. Ilâ tindatuo myani Pedro, João warâ myarâ ingonodylymo.

<sup>15-16</sup> Saintryem myani idâlymo Jesus einwânni modo eydâ atoram. Pymâ Jesus eynynroem tawily tienehon-homoem batiza âiehozyem myani akaemo iwelo einwânni modo. Deus Ispiryry nâepya wao olâ myani akaemo onwa. Aituo myani Pedro, João warâ Deus agâ aguelymo:

– Pabai, Âspiryryry igonokâ asaemo Samaria donro Jesus einwânni modo onwa – kelymo.

<sup>17</sup> Aguepyem myani tâmary nhangahumo onwa nhedylymo, Deus Ispiryryry tonlo modo onwa âetoem.

<sup>18</sup> Tâense myani Simão, Deus Ispiryryry âewyly, Jesus tunâry egaturin-em induakeyby modo mâkâ kurâdo nhangahu onwa tâmary nhetuom. Ton-honru ize myani myara tâitoem. Aituo myani eyanmo dinheru xuduze kely.

<sup>19</sup> – On-honrumo ara kehoem ize wawylady. Ângulylâ nhangahu onwa imarymo mânhetuom, Deus Ispiryryry tâense mâkâ kurâ onwa. Anra dinheru, ipywadomo, Deus Ispiryryry igâseze ton-honre witoem – kely myani.

<sup>20</sup> Aituo myani ton-honre kehoem Pedro eyam aguely:

– Âmâ, âdinheruru alelâ adainwâtaungâ! Ioze inkâba kulâ amidylady. Deus Ispiryryry eon-honru dinherugue tanâseinka, inanaji?

<sup>21</sup> Xina ara Deus emaryem mitoem nuduwâpyra. Konokuni kulâ âmâ, Deus xurâem.

<sup>22</sup> Âjityengâ, inakanhe amitobyry wâgâ. Inakanhe amito imogâ warâ. “Pymâ Deus, inakanhe kulâ enra yangahu oday unâgu; inakanhe awito xygakegâ” kekâ Deusram.

<sup>23</sup> Ádara mawwily, tutuze urá. Xina Deus Ispiritury ingâsedily metailâ. Aituo enra toenzepa xina wâgâ mâsewânily. Deus xurâem olâ, inakanhe kulâ mâsewânily. Etadâdyby wâne nâsemagueba myara inakanhe amidily mâinmopa mawwily – kely.

<sup>24</sup> – Urâem wao Pymâ Jesusram ekadaungâ, amyguehomo ara ienagazebyra itoem – kely myani Simão.

<sup>25</sup> Jesus xunâry wâgâ agueypyem, Pedro, João warâ odopâdilymo myani Jerusalmram. Âtâ anary Samaria anano modo einkâ takaday, Jesus wâgâ unâ iwâkuru tâgatuzemo myani.

*Filipe uguondo Etiópia donro agâ Jesus wâgâ aguehobyry*

<sup>26</sup> Mârâpygueduo myani anju âepanâguely. Aguely Filiperam:

– On-hongâ, Filipe. Sul einkâ idâ, ânwa Jerusalm, Gaza warâ ontano oze – kely.

(Kurâdo aekuru sakado keba myani mârâ ânwa.)

<sup>27</sup> Aituo myani tâtâhoem ohondily. Ânwa oze myani uguondo Etiópia donro agâ oxiodily. Ety anaym tynrenseim myani mâkâ uguondo. Pekodo pymâ Candace idinheruru, isejiguy warâ xutuim myani mâkâ. Jerusalmram idâypyem, tâty anaxi todopâdily ume myani Filipe agâ oxiodily.

<sup>28</sup> Tygarosary oday ekadybyem myani ago kehoem Deus itaumbryr intainly. Deus itaumbryr egatuimbyry Isaías inweniby myani intainly.

<sup>29</sup> Aituo myani Deus Ispiritury aguely Filiperam:

– Ainkâ mârâ karosaram iwaguepa. Mâkâ uguondo iota – kely.

<sup>30</sup> Deus Ispiritury agueduo myani Filipe egatudyly mârâ karosa iose. Iopaji saintybyem myani mâkâ uguondo Isaías inweniby intainly indadyly. Aituo myani nhapâiguely:

– Tutuze âmâ awârâ mâintainly? Ânguy wâgâ aguely tutuze âmâ? – kely.

<sup>31</sup> – Kâuntuwâbyra urâ – kely. – Ânguy negatuba kulâ kâuntuwâbyra ise urâ. Ygarosary odaxi âkugâ. Yatado ikagâ – kely myani uguondo Etiópia donro.

<sup>32</sup> Warâ myani Deus itaumbryr ewy mâkâ Etiópia donro intainly aguely:

“Kaneru wâne tyâday, tuhudu satâday warâ âdanipyra,  
myara myani mâkâ âdanipyra awyly tâsemaguehoem.

Tâwâlâ wâne âzenagazeoly,  
âdakepa olâ myani tyizepaom modoram.

<sup>33</sup> ‘Inakanhe kulâ merâ aidily’ nyguemo, inakanhe anipyra awyly ume kulâ.

Ânguy eynynâ aguwâpyra myani, tienmakehoem.

Toenzepa âsenagazemâmy.

Tyâen-honzemo myani.

Tarâ onro anaym ato tadainze myani”

– kely myani mâkâ Etiópia donro intainly.

<sup>34</sup> Aituo myani Filiperam aguely:

– Xirâ Isaías inweniby wao koendâ yam egatugâ. Ânguy wâgâka xirâ aguely? Tywâgâlâ myakâwândy inwenily? Eagonro uguondo wâgâ? – kely.

<sup>35</sup> Aituo myani Filipe nhegatuly koendâ kehoem Isaías inweniby.

– Jesus wâgâ myakâwândy inwenily – kely eyam.

Aituo myani ago Deus itaumbryr wâgâ aguely. Koendâ kehoem unâ iwâkuru Jesus wâgâ aguenri nhegatuly warâ.

<sup>36</sup> Tâtâdaymo myani paruum saindilymo. Aituo myani mâkâ Etiópia donro aguely:

– Egâ. Paru iwatarybe tarâ. Tâwâlâpaka wânâ batiza yedyly, Jesus eynynonroem wawily kâenehohoem? – kely.

<sup>37</sup> [– Jesus tâinwânse lelâlâ âmâ-ro watay, batiza âese lelâ urâ, Jesus eynynonroem mawwily xutuhom – kely myani Filipe.

– Tâinwânse urâ, Deus imery Jesus Cristo awyly. Iweâ lelâlâ ise kâinwândily – kely myani uguondo.]\*

<sup>38</sup> Aituo myani mâkâ Etiópia donro aguely karosa saniram:

– Tarâ kawaru epagunâgâ – kely.

Agueduo myani kawaru nhepagunâdily; azakâlâ xytâguylymo karosa odayba, paru iwataryam tâtâhoem. Târâ myani Filipe, Etiópia donro batiza nhedyly.

<sup>39</sup> Paikayba âjikaguedaymo myani Deus Ispiritury, Filipe nhadyly. Netombyra lelâ myani mâkâ uguondo Etiópia donro. Idâwâm lelâ olâmy. Toenzepa myani iomaru, Jesus tyeinwântuo.

<sup>40</sup> Ilâpyryem myani Filipe âepanâguely âtâ anary Azoto kehodâ. Târâpa âxiguybyem Jesus wâgâ unâ iwâkuru tâgatuze myani âtâ anary takado modo anakâ, Cesareianra taindily iraynâ.

\* 8:37 Idânârâ livru saguho modo wâgâ iwenibyemba xirâ.

## 9

*Saulo Jesus nheinwântobyry*

*(At 22.6-16; 26.12-18)*

<sup>1</sup> Toenzepa myani Saulo iewiâky Pymâ Jesus einwânnipyry modo agâ. Tyânwâdysemo myani idânârâ kehoem. Aituo myani kurâdo eynynâ Deus agâ aguewâni modo iwymâry kururam agueze idâly.

<sup>2</sup> – Damascoram udâdyse urâ, Jesus einwânni modo xuize. Pape iwenigâ, izedy iwenigâ warâ, âmâlâ ugononi awyly nhutihomoem. Myarâ saintybyem, âtâ tâdâtâdyguyho modoram idâze urâ. Iwymârymoram pape xuduze urâ, mâkâ utuhoem. Sawânehonzemo urâ idânârâ Jesus einwânni modo, uguondo modo, pekodo modo alelâ. Xarâ Jerusâlemram enesemo urâ – kely myani Saulo.

<sup>3</sup> Aituo myani pymâ pape nhuduly, Saulo idâhoem. Damascoram sainseaji awyly ume myani toenzepa kehoem kau wâgâ iatygudyly; Saulo eydâ atodâ toenzepa kehoem iajimadyly.

<sup>4</sup> Mârâ iatygugue toenzepa kehoem myani Saulo âseaneduly. Tâseaneduo myani Saulo onro onwa ihuguely. Tâjitanru idamâmy.

– Saulo! Saulo! Âdaituoka ienagazeduly? – kely.

<sup>5</sup> – Ânguyka âmâ, aguenri? – kely myani Saulo.

– Jesus urâ, toenzepa mâenagazegulyly.

<sup>6</sup> Aukâ. Idâ âtâ anaxi. Târâ ise mâduruholy amânhekyly wâgâ – kely myani Pymâ Jesus.

<sup>7</sup> Saulo agâ idâwâni modo lâpylâ toenzepa âseanedaunmâmomy. Âdakepamo lâgâlâ myani. Ânguy nepyramo myani. Aguely lelâ indakylimo.

<sup>8</sup> Onwâgâpa sautybyem, âdy nepyra lelâ myani Saulo, epyem itybyem tawylygue. Aituo myani eagonro modo emary wâgâ nhawâdylimo, âtâ anaxi tiantoem.

<sup>9</sup> Azagâ tokalâ warâ iguandyly ara nepyra myani. Arâ tawylygue myani nâwinduapyra, nadakuiba warâ awyly.

<sup>10</sup> Uguondo Ananias kehobe myani Damascodâ. Jesus einwânni myani mâkâ. Deus agâ adâkeday, tânu oday Jesus âepanâguely nhedyly myani.

– Ananias! – kely myani Jesus.

– Talâ urâ. Âdaselâ, Pymâ – kely myani Ananias.

<sup>11</sup> Aituo myani Jesus eyam aguely:

– Aukâ. On-hongâ. Judas etyram idâ. Tutuzelâ âmâ, ânwa LÂ Itânry kelygue tâzekeim. Uguondo Saulo târâ xuiâ. Âtâ anary Tarso kehodâ iazepyy mâkâ. Deus agâ mâkâ aguely iwerâ.

<sup>12</sup> Eyam aindyly, âtâ eydâ ato odaji mâwândyly warâ netai. Âmâlâ enra nhekyly. Nhetondoem imary nhonwa mânhedlyly netai. Idâ myarâ – kely.

<sup>13</sup> Jesus aguely tindatuo myani Ananias aguely:

– Pymâ, toenzepa kurâdo aguely tydase urâ mâkâ uguondo Saulo wâgâ. Toenzepa âinwânni modo Jerusâlemdâ tânagazeze, tâkezemo.

<sup>14</sup> “Iwerâ ise xarâ Damascoram âewyly, âynnonro modo sawânehonze” nyguemo. “Kurâdo eynynâ Deus agâ aguewâni modo iwymâry kuru iwaperybe mâkâ emaym, Jerusâlemram kâdadaze katoem” nyguemo – kely.

<sup>15</sup> Aituo myani Pymâ Jesus eyam:

– Idâ eydâ atoram. Ynnonroem mâkâ iwerâ, iemaryem kâinduakeyby wâgâ aguehoem. Judeu keba modoram, iwymârymoram, judeu modoram lâpylâ warâ agueze mâkâ ywâgâ.

<sup>16</sup> Urâlâ ise Sauloram, “Yeinwântânry modoram toenzepa âzenagazeoze maze” kerim – kely.

<sup>17</sup> Aituo myani Ananias, Saulo âxidâdobyryam idâly. Âtâ odaji egawândyly. Tâmary nhangahu onwa ienipyryem eyam aguely:

– Saulo, Cristo eynynâ ypemugu, Pymâ Jesus âyam ugononi. Mâkâ ânwa oze mâentybylâ xarâ ugononi. Mâentondoem agânhedyse olâ. Deus Ispiritury nhese âetoem kâenkadyze – kely.

<sup>18</sup> Aguely umelâ kehoem myani kanra satuby emyenro modo Saulo enu wâgâpa ihuguewâdlyly. Mârâ ihugueduo myani epyemba idyly, koendâ kehoem nhetondyly idyly warâ. Ilâpygueduolâ kehoem myani eydâ tatodâba saudyly; batiza âieholo, Jesus einwânniem tawyly nhenehon-hoem.

<sup>19</sup> Ilâpyryem myani âwinduadyly. Tâwinduatuo eon-honwandondyly. Jesus einwânni modo agâlâ myani Damascodâ.

*Damascodâ Saulo Jesus wâgâ aguehobyry*

<sup>20</sup> Saulo, Damascodâ tatay, Jesus wâgâ aguepa nipyra myani. Âtâ tâdâtâdygyho modoram tâtâze myani. Warâ myani,

– Deus imery mâkâ Jesus – kely.

<sup>21</sup> Idânârâ Saulo aguely idataynrim modo toenzepa myani âseguâdâdylimo.

– Etaungâ. Jesus einwânni modo Jerusalêmdâ enagazenibyry, akaemo ewy xyên-horimbyry warâ awâkâ. Taunlo Jesus einwânni modo sawânehonze âetybylâ awâkâ. Kurâdo eynynâ Deus agâ aguewâni modo iwymârydoram etadânehonzemo tiandysemo keankâ Jerusalêmmram – kelymo.

<sup>22</sup> Tyanepa kehoem olâ myani Jesus wâgâ Saulo aguely. Alâ myani judeu Damasco donro modoram aguely:

– Messias kinwânwântybylâ mâkâ Jesus, Deus Ingonotyby – kely.

Koendâ kehoem myani Jesus wâgâ aguely, nhangahumo odaji tientoem. Tutuze kehoem myani aguely, Jesus einwântânry modo aypa kehoemba lâgâlâ.

<sup>23</sup> Iweâpa ipygueduo myani judeu domodo iwymârydo âtâdygyuly.

– Kydyânre mâkâ Saulo. Toenzepa kuru aguelygwe kurâdo Jesus nheinwândyly – kelymo.

<sup>24</sup> Kopaelâgâembaba myani âtâ anary odaypa tâzegaseho modo ara enipe nhedylymo, Saulo tianwâtomoem. Peto oday, kopae alelâ myani nhenuagaendylymo. Xutuwm olâmy Saulo.

<sup>25</sup> Jesus einwânni modo olâ myani âsemaguehoem emawyadâni. Kopae myani cestu imâsedo odaji nhedylymo. Nhytâgyândylymo mârâ âtâ anary ahodâdobyry etago TURUK waunlo oze. Warâ myani Saulo âwiendyly judeu domodo iwymârydo amaymba.

*Saulo Jerusalêmmram odopâdobyry*

<sup>26</sup> Aituo myani Damascodâba, Jerusalêmmram Saulo odopâdylly. Saintrybyem, Jesus einwânni modo duaxi tâidyse myani. Neinvâmpyramo olâ myani Jesus eynynonroem awyly. Awylygue myani nhytadylymo.

<sup>27</sup> Barnabé kulelâ myani Saulo Jesus eynynonroem awyly einwânni. Aituo myani Saulo nhadyly Jesus tunâry egaturin-em induakeyby modoram.

– Jesus einwânnipyryem merâ. Damascoram idâday mykeankâ Pymâ Jesus eyam âepanâguely. Aituo mykeankâ Jesus eyam aguely. Agueduo mykeankâ Saulo nheinwândyly. Damascodâ tatay tyanepa kehoem mykeankâ unâ Jesus wâgâ nhegatyly – kely.

<sup>28</sup> Barnabé aguely tindatuo myani Jesus tunâry egaturin-em induakeyby modo Saulo, Pymâ Jesus einwânnipyryem awyly nhutulymo. Eagâmo Deus wâgâ aguenriem idyly lelâ myani-ro warâ. Âtâ anakâ myani adakobâdylly, Jesus wâgâ agueze. Tyanepa myani Jesus anhytyby, aguehobyry warâ wâgâ agueze.

<sup>29</sup> Judeu âkelo âtâ anaym enamadyby modoram Jesus wâgâ adâkeze lâpylâ myani. Tyam agueho neinvâmpyra olâ myani akaemo. Awylygue myani eagâ iewiâpadylymo, xyâze kelymo warâ.

<sup>30</sup> Jesus einwânni modo Saulo xyâze kelymo kely egary indadylymo myani. Aituo myani idâlymo eagâ myarâ âtâ anary Cesareianra. Târâ myani âtâ anary Tarsoram ingonodylymo, enamadobyryanlâ.

<sup>31</sup> Mârâ ume âdapa myani Jesus einwânni modo. Saguhoem enagazedomobyry ara tânagazezebamo myani Judeiadâ, Galileiadâ, Samariadâ warâ. Imâm kuru nhutulymo myani Jesus wâgâ, âdara ize ato ara adâjidyly wâgâ warâ. Toenzepa myani kurâdo Jesus nheinwândyly. Deus Ispiriturylâ myani, Deus ize ato ara aitomoem enomedânimo. Eagâmolâ myani, iomazeânzemo.

*Enéias kua ietobyry*

<sup>32</sup> Tâinkâ lelâba myani Pedro adakobâdylly, Jesus einwânni modo eon-honwanâze. Âtâ anary Lida kehoram idâwânmy.

<sup>33</sup> Uguondo Enéias kehoem myani târâ. Ixigalamadyby myani mâkâ. Oito anos myani mâkâ egueky.

<sup>34</sup> Eyam IŪ ise idâppyem myani Pedro aguely:

– Iweâ lelâlâ ise Jesus Cristo kua âedylly, Enéias. Aukâ. XYDYK ikâ. Iguetudo nhonkâ mâxiguehoem – kely.

Pedro aguely umelâ kehoem myani Enéias ixinary kua idyly. Inepa myani saudyly, koendâ adakobâdylly warâ.

<sup>35</sup> Toenzepa Lida donro modo, Sarom donro modo warâ Enéias ese idâwânmmomy. XYDYK warâ sautybyem awyly ese, adakobâdylly ese warâ myani idâlymo. Idâppyem myani Pymâ Jesus nheinwândylymo. Inakanhe adâidyly inmolymo, Jesus tyeinvântomoem.

*Pedro Jesus eon-honrugue Dorcas igueppem awyly ume kurâem nhetondobyry*

<sup>36</sup> Pekodo Tabita kehobe myani mârâ âtâ anary Jope anaym. (“Dorcas” keze gregu itanwe aguely.) Jesus einwânni myani mâkâ pekodo. Âdy pebaom modo eni, emawyadâni warâ myani mâkâ. Aunlolâ myani koendonro modo anhedyly.

<sup>37</sup> Pedro, Lidadâ ataylâ myani Dorcas ewâmadyly, iguely warâ. Igueduo myani pekodo modo mâkâ eguepybyry ingokelymo. Ilâpyryem mesa onwa nhedylymo âtâ sahomery kaynonro oday.

<sup>38</sup> Jopedâ iwaguepa myani Lida. Lidadâlâ Pedro awyly tiuntuduo myani, azagâ uguondo ingonodylymo Dorcas iguehobyry egatuze. Saintybyem myani akaemo igonotaymy modo Pedroram aguelymo:

– Dorcas nigueaki. Inepa âekâ xina agâ Joperam – kelymo.

<sup>39</sup> Aituo myani Pedro inepa kehoem ohondyly, eagâmo tâtâhoem. Saintuo myani tonlo modo nhadyly Dorcas eguepybyry mesa wâgâ atoram. Toenzepa myani târâ pypâbyry modo awyly. Eogunrumo myani. Âguedy koendonropyry awyly Pedroram nhegatulymo, tâty tywogonro nhakâjiby nhenehonlymo warâ.

<sup>40</sup> Aituo myani Pedro aguely:

– Idânârâ âmaemo tarâpa âxiguewâdaungâ wao – kely.

Idânârâ egasebygueduomo myani Pedro âzeguhoam idyly, Deus agâ adâkehoem. Aguen-ripyryem myani âguedyram MYK idyly, eyam aguely:

– Tabita, aukâ! – kely.

Agueduo myani MOK âzenutaiguely idyly.

<sup>41</sup> Emary wâgâ Pedro nhawâdily XYDYK itoem. Ilâpyryem aguely:

– Tâwâlâ idânârâ igawântaungâ – kely pypâbyry modoram, idânârâ Jesus einwânni modoram warâ.

– Anra igueypy. Kurâem nitondai – kely.

<sup>42</sup> Idânârâ Jope donro modo ewy Dorcas Jesus eon-honrugue kurâem itondybyem awyly egary tydasemo myani. Awârâ modo tiuntuduo, toenzepa kurâdo Jesus tâinwânse myani.

<sup>43</sup> Iweâpa myani Pedro târâ Simão etydâ awyly. Ânguydo imeom itubygue âdydo imeom xygahudâni myani mâkâ Simão.

## 10

### *Pedro, Cornélio warâ*

<sup>1</sup> Uguondo Cornélio kehobe myani âtâ anary Cesareiadâ. Sodadu domodo “Itália donro modo” iwymâry myani mâkâ, judeu keba.

<sup>2</sup> Koendonro myani mâkâ. Deus einwânni warâ, judeu keba tatodâ. Ety odano modo Deus tâinwânsemo lâpylâ myani. Aunlolâ myani judeu âdy pebanro modo nhedyly, nhemawyadâdily warâ. Kopaelâgâembaba myani Deus agâ aguely.

<sup>3</sup> Aituo myani três horas awârâem kogoneyam Deus agâ aguely. Tânu oday âtygadoo myani koendâ kehoem anju nhedyly. Eyam saintybyem myani aguely:

– Âdara, Cornélio? – kely.

<sup>4</sup> Anju tientuo, aguely tindatuo warâ âseanemâmy Cornélio.

– Âdaiseka mâewyly? – kely myani.

Aituo anju in-hoguly:

– Deus itaumbryry âyam enese kâewyly. Aunlolâ inanry Deus eagâ amyguely indadyly. Tutuze mâkâ, âdy pebaom modoem koendâ adyese mawyly.

<sup>5</sup> Uguondo modo ewy âtâ anary Jope kehoram igonokâ, uguondo Simão Pedro igâseze.

<sup>6</sup> Ânguydo imeom itubygue âdydo imeom xygahudâni Simão ety oday mâkâ âxidâdybyem awyly. Parutabâ iwaguepa mâkâ ety – kely.

<sup>7</sup> Agueypyem myani anju odopâdily. Aituo myani Cornélio azagâ tokalâ warâ uguondo modo ingâsedily. Azagâ myani emarylâ, tokalâ myani sodadu, Jesus einwânni.

<sup>8</sup> Anju tyam aguehobyry eyanmo egatuimbyryem myani Cornélio aguely:

– Iweâ lelâlâ idâwâtaungâ Joperam – kely.

<sup>9</sup> Aguepygueduolâ myani târâpa âxiguelymo. Ânwa oze tuguantobyryrdâlâ myani xykylimo. Kopaelâgâem myani idâondylymo. Kuotatay myani saindylymo. Saintaymo, Pedro âkuly myani âtâ kaynonro idaseraji, Deus agâ agueze.

<sup>10</sup> Târâ Deus agâ adâkeday, Pedro ewindupadyly myani. Pekodo modo pyni anhetay, tânu oday âdydo imeom nhedyly myani.

<sup>11</sup> Kau âzenahunguely nhedyly lençol imâsedo nhedyly, quatro iopirydâ ekâjibyem warâ. Onro onwa myani mârâ lençol xytâguyly.

<sup>12</sup> Toenzepa myani ânguydo imeom mârâ oday awyly. Idu odano, âtâ inatano, ânguydo imeom ârahujini modo, tawâguneim modo warâ myani nhekyly. Idânârâ myani mârâ oday judeu domodo ezewenryem tâsenry modo awyly.

<sup>13</sup> Ânguydo imeom tiendyly ume myani Pedro, Deus tyam aguely indadyly.

– Aukâ, Pedro! Awâkâ mâenkyly ewy xyâgâ, sâkâ warâ – kely.

<sup>14</sup> – Awipyra ise aze, Pymâ! Xina ezewenry eynynâ tâseim keba kulâ kântaymba ise urâ – kely myani Pedro.

<sup>15</sup> Aituo myani Deus agueondyly:

– “Sâkâ” uguely-ro watay, “Kâmpyra ise urâ” tâkezeba ikâ – kely.

<sup>16</sup> Aituo myani Deus eyam agueondyly:

– Xyâgâ, sâkâ warâ awâkâ lençol duano modo – keondyly.

– Kâmpyra ise aze, Pymâ! Xina ezewenry eynynâ tâseim keba awylygue ise kâmpyra wawyly – keondyly myani Pedro.

Ilâpygueduo myani,

– Xyâgâ, sâkâ warâ awâkâ – keondyly Deus.

– Xina ezewenry eynynâ tâseim keba awylygue ise kâmpyra wawyly – keondyly Pedro.

Ilâpygueduo myani mârâ lençol kau odaxi odopâdyly.

<sup>17</sup> Aituo myani Pedro âseguâdâdyly. Âdara tâidyly nutuba idyly tientyby wâgâ.

– Âdyka Deus kâuntudyze ato awârâ tienehoymby wâgâ? – kely myani.

Mârâ wâgâ âpaunzedaylâ myani azagâ tokalâ warâ uguondo Cornélio ingonotaymby modo saindyly myarâ âtâ anaxi.

– Âdykâka ânguydo imeom itubygue âdydo imeom xygahudâni Simão ety? – kelymo myani Jope donro modoram.

Âtânra saintybyem aguelymo:

<sup>18</sup> – Ânguydo imeom itubygue âdydo imeom xygahudâni Simão etylâ xirâ? – kelymo. – Tarâlâ lâpylâ uguondo Simão Pedro âxidâdybyem awyly? – kelymo.

– Tarâlâ – kehonlymo.

<sup>19</sup> Mârâ tientyby wâgâ kulâ myani Pedro âpaunzededyly. Aituo myani Deus Ispiritury eyam aguely:

– Azagâ tokalâ warâ uguondo âwinri nâetai.

<sup>20</sup> Âytâguygâ. Idâ eagâmo. Judeu kebamo lelâlâ wâne, âdamyguepalâ eagâmo idâ. Urâlâ keankâ âgâsenehonrim – kely myani Deus Ispiritury.

<sup>21</sup> Aituo myani Pedro xytâguyly Cornélio ingonotaymby modoram.

– Pedrolâ urâ, mâwinlymolâ – kely. – Âdaitoenka uize mâewylymo? – kely myani Pedro.

<sup>22</sup> Aituo myani aguelymo:

– Xina iwymâry Cornélio xina igononi. Uguondo tynrenseim mâkâ, cem lelâ sodadu domodo iwymâry. Koendonro mâkâ. Âmaemo judeu domodo mâinwânkylymo, Deuslâ mâkâ nheinwânkyly. Koendâ lelâ mâkâ aidyly, idânârâ judeu xina ijjadâry anano modo enanaji. Iweâ kulâ mykeankâ anju eyam âewyly. “Cornélio, Pedro igâsega. Itynra mâkâ nâedâ, âda midyly awyly aguehoem” kely mykeankâ – kelymo Pedroram.

<sup>23</sup> – Kopaelâgâ ise kytâly. Tarâlâ wao itaungâ – kely myani Pedro.

Mârâ kopae târâlâ myani xykylymo. Kopaelâgâem myani Pedro on-hondyly, eagâmo tâtâhoem. Jopedâ Jesus einwânnipyry modo ewy eagâmo tâtâzemo lâpylâ myani.

<sup>24</sup> Iguandyly ara kehoem myani idâzesedylymo. Ânwa oze tuguantobryrdâlâ myani xykylymo. Kopaelâgâem myani Cesareianra saindylymo. Cornélio tynwânwândyly umelâ myani etyram saindylymo. Typemugudo, tataen-hodo, tiuntuly modo warâ tygâsenehonze myani, Cornélio, Pedro saindyly tienuendoem.

<sup>25</sup> Pedro saintay, Cornélio iose tâtâze, enado âzeguhoam tâise warâ myani. Warâ olâ myani Pedro eyam aguely:

<sup>26</sup> – Aukâ. Ienado âzeguhoam tâiseba ikâ. Uguondo imyenro kulâ urâ. Deus mâkeba urâ – kely.

<sup>27</sup> Eagâ tunâgu umelâ myani Pedro âtâ odaji âwândyly. Toenzepa kurâdo âtâdygyby modo tâense myani.

<sup>28</sup> Aituo myani eyanmo aguely:

– Urâ, asaemo yagonrodo warâ, judeu xina, tutuzelâ âmaemo. Âmaemoma judeu keba. Xina judeu domodo ezewenry eynynâ, agâmo adataen-hoem xina nipyra, etymo odaji xina nâwâmpyra warâ. Xirâ tutuze âmaemo. Deus olâ, xina anhekyly iozepa awyly wâgâ anyuge. Idamudo wâgâ kulâ ânguy izepa wipyra witoem nutuen-ho warâ.

<sup>29</sup> Awylygue âdauguepalâ kêewyly – kely myani Pedro.

Aituo myani Cornelioram aguely:

— Adaitoenka keankâ ygâsenehonly? — kely.

<sup>30</sup> Aituo myani Cornélio in-hoguly:

— Três iguandyly sakadyby kâtunâguedyly keankâ tarâ ietydâ, três horas kogoneyam, awito ara. Eagâ unâgu ume keankâ anju ydâ âepanâguely. Uguondo keankâ, tapekeingue âzetydâdybem.

<sup>31</sup> Aituo keankâ yam aguely: “Deus tydase inanry eagâ amyguely. Tutuze mâkâ, judeu âdy pebaom modo tâmawyadâze mawlyly.

<sup>32</sup> Uguondo modo ewy âtâ anary Jope kehoram igonokâ, uguondo Simão Pedro igâseze. Ânguydo imeom itubygue âdydo imeom xygahudâni Simão ety oday mâkâ âxidâdybem awlyly. Parutabâ iwaguepa mâkâ ety” kely keankâ yam.

<sup>33</sup> Awlylygue keankâ inepa kehoem âgâseni modo kâingonodyly. Tuomare urâ, inepa mâetobyry wâgâ. Pymâ Deus xinaram amyguehoem aguehobyry idase xina tarâ âtâdygybyem awlyly — kely myani.

*Pedro Cornélio etydâ âtâdygyby modoram Jesus wâgâ aguehobyry*

<sup>34</sup> Judeu keba modoram myani Pedro aguely:

— Iweâma tutuze urâ, Deus xurâem âzekiba kydawlyly, judeu, judeu keba alelâ.

<sup>35</sup> Koendâ lelâ awâkâ Deus, idânârâ ize ato ara aitaynrim modo nhedyly, âdykonlo anano modolâ. Einwânni modo tâwâlâ eynynonroem awlyly, judeu, judeu keba alelâ.

<sup>36</sup> Xina Israel iweom modoram saguhoem Deus aguehobyry, tutuzelâ âmaemo. Inakanhe aguitobyry tygakeze Deus, Pymâ Jesus kieinwândyly-ro watay. Inakanhe aguitobyry nhygakeybyem watay, âdy mâkâ kâwentâdo lâpeba ise. Warâ unâ iwâkuru xina indatyby.

<sup>37</sup> — Jesus wâgâ unâ tydaselâ âmaemo, idânârâ israelita domodo ety anarydâ aguehoymby. Jesus nhenomedâdyly iraynâ, João Batista aguely myani: “Inakanhe amidylymo imowâdaungâ. Batiza âiehowâdaungâ, Deus einwânnipyryem mawlylymo mâenehon-homoem. Inepa ise ânguy Messias awlyly mâuntulymo” kely. Galiléia eynynâ ani Jesus wâgâ egatuly adaguly.

<sup>38</sup> Deus Ingonotybylâ ani mâkâ Jesus Nazaré donro. Tyispiriturylâ eyam ingonokyly, Jesus eon-honru nhuduhoem. Koendâ ani Jesus aidyly, tadakobâdo modo einkâ. Kadopâgue taseim modo kua tyese ani. Idânârâ awârâ modo tutuze âmaemo.

<sup>39</sup> Urâ, yagonropyry modo warâ, xina Jesus nedâ âtâ anary Jerusalém anaym, Israel eynynâ warâ anhekyly. Aituo ani iduery modo kruz onwa nhakâjien-honlymo. Kruz wâgâ ani iguely.

<sup>40</sup> — Azagâ\* emedyly idyly wâgâ olâ ani Deus kurâem nhetondyly. Kurâem itondybyem ani xinaram âepanâguely.

<sup>41</sup> Idânârâ kurâdorampa ani âepanâguely, xinaram kulelâ. Jesus wâgâ aguenriem Deus induakeyby xina. Jesus agâ xina nâwinduadâ, nadakui warâma, Deus kurâem nhetombygueduo. Awlylygue iwerâ kurâem awlyly, xina nhutuly.

<sup>42</sup> Mâkâlâ ani xina igononi. “Idâwâtaungâ unâ koendonro ywâgâ egatuze, tâinkonro modoram. Pypyry etay, urâlâ ise igueypy modo, iguedânry modo warâ âdara âieholy wâgâ aguenri. Auguehobyry ara ise idânârâ aidyly. Deuslâ, mawânkâ ‘Aikâ’ kerim awitoem” nygue Jesus.

<sup>43</sup> Deus itaumbry egatuwâni modo Jesus wâgâ aguewânmomy. “Deus Ingonotyby âese. Mâkâlâ ise tâinwânni modo inakanhe aitobyry xygakerim” tâkezemo myani — kely Pedro.

*Deus Ispirityry judeu keba modo onwa âetobyry*

<sup>44</sup> Pedro aguely ume, idânârâ akaemo unâ idataynrim modo onwa xytâgyuwânnymy Deus Ispirityry.

<sup>45</sup> Jesus einwânni Pedro agâ âetaymby modo tâsewânizemo myani. Warâ myani aguelymo: — Etaungâ! Deus Ispirityry judeu keba modo onwa nâetai! — kelymo.

<sup>46</sup> Judeu keba modo Cornélio etydâ âtâdygywâdyby tâjitanru âkelo Deus Ispirityrydâba âenigue âjittainlymo myani.

— Ton-honreim, koendonro warâ âmâ, Deus — kelymo myani.

Warâ myani judeu domodo, akaemo judeu keba modo onwa Deus Ispirityry âetybyem awlyly nhutulymo. Aituo myani Pedro agueondyly judeu domodoram:

<sup>47</sup> — Jesus tâinwânse asaemo iwerâ. Etaungâ. Kuonwa tâetobyry ara, Deus Ispirityry nnonwamo nâetai. Tâwâlâ batiza âieholymo, Jesus tâinwânsemo awlyly xutuhomem — kely.

<sup>48</sup> Aituo myani judeu keba modoram aguely:

— Batiza âiehowâdaungâ, Jesus Cristo tâinwânse mawlylymo mâenehon-homoem — kely.

Batiza âiehowâdaungâ, Pedroram aguelymo myani:

— Tarâ xina agâlâ waone ikâ — kelymo.

\* 10:40 Nota de pé Mateus 12.40dâ egâ.

Târâ eagâmolâ wao myani Pedro, iweâpa nipyra olâ myani târâ.

## 11

*Pedro Cesareiadâ aityby modo Jerusalémdâ nhegatuhoobyry*

<sup>1</sup> Jesus tunâry egaturin-em induakeyby modo, Judéia eynynâ Jesus einwânni modo warâ indadylymo myani Cesareiadâ aityby modo egary. “Judeu keba modo Deus itaumbryry tindatuo, Jesus neinwândâmo” kely myani indakylymo.

<sup>2</sup> Pedro Jerusalémram odopâduo myani Jesus einwânni modo ewyram âdunâgueoly.  
– Idânârâ Jesus einwânni modo, judeu domodo ezewenry lelâ neinwândâmo, judeu, judeu keba alelâ. Judeu keba modo tâsemaguedyzemo-ro watay, kara lâpylâ tylery ety iopiry natâen-homo – kelymo.

Pedro, Cesaréia donro modo ilery ety iopiry natâen-homba awylygue myani, eagâ iewiâpadylymo.

<sup>3</sup> – Koendâ inkâba mykeankâ Cesareiadâ mawly. Judeu keba ety odaji igawândâ. Eagâmo mâtâdyguy, mâwinduadâ warâmy, Koendâpa awârâ arâ – kelymo myani.

<sup>4</sup> Aituo myani Pedro koendâ kehoem idânârâ aityby modo nhegatyly, târâ Jopedâ tatay aitaymy modo ara myani nhegatyly.

<sup>5</sup> – Târâ Jopedâ Deus agâ augueday kogonekâ ienu oday âtygaduô sedâ, lençol imâsedo keankâ, quatro iopiry wâgâ ekâjibyem. Wopaylâ keankâ mârâ.

<sup>6</sup> Koendâ mârâ ioday senuagaendâ. Toenzepa ânguydo imeom sedâ, idu odano, poji anano, âtâ inatano, onro wâgâ ârahujini, kaynâ tawâguneim modo warâ. Idânârâ mâkâ modo kâzewenry eynynâ tâsenry lelâ keankâ.

<sup>7</sup> Ilâpygueduo keankâ Deus yam aguely kâindadyly. “Aukâ, Pedro! Xyâgâ, sâkâ warâ awâkâ mâenkyly ewy” kely keankâ Deus.

<sup>8</sup> “Kâmpyra ise aze, Pymâ! Xina ezewenry eynynâ tâseim keba kulâ kântaymba ise urâ” uguely keankâ.

<sup>9</sup> – Aituo keankâ Deus agueondyly: “‘Sâkâ’ uguely-ro watay, ‘Kâmpyra ise urâ’ tâkezeba ikâ” kely.

<sup>10</sup> Aituo keankâ Deus agueondyly yam: “Xyâgâ, sâkâ warâ awâkâ ewy” kely. “Kâmpyra ise aze, Pymâ! Xina ezewenry eynynâ tâseim keba awylygue ise kâmpyra wawlyly” uguely keankâ. Azagâ tokalâ ieto wâgâ keankâ Deus yam agueondyly: “Xyâgâ, sâkâ warâ awâkâ ewy” kely. “Xina ezewenry eynynâ tâseim keba awylygue ise kâmpyra wawlyly” uguely lelâ keankâ azagâ tokalâ ieto wâgâ. Ilâpygueduolâ keankâ mârâ lençol imâsedo odopâdyly kau odaxi.

<sup>11</sup> – Ilâpygueduo keankâ azagâ tokalâ warâ uguondo saindyly âtâ eydâ watoram. Judeu keba keankâ akaemo. Cornélio Cesaréia donro mykeankâ ygâseze igononimo.

<sup>12</sup> Eagâmo Cornelioram udâhoem nhekaduomo keankâ Deus Ispiritury yam aguely: “Âdamyguepalâ eagâmo idâ” kely. Seis uguondo modo Jope donro Jesus einwânni modo xina agâ nâtâmo lâpylâ Cesareianra. Cornélio ety odaji keankâ xina egawândyly.

<sup>13</sup> Aituo keankâ yam aguely: “Deus agâ aguely ume, anju yam nâepanâgue. ‘Uguondo modo ewy âtâ anary Jope kehoram igonokâ, uguondo Simão Pedro igâseze.

<sup>14</sup> Mâsemaguehomo wâgâ ise âyanmo, âpemugudomoam warâ aguely” kely keankâ anju” nygue Cornélio yam.

<sup>15</sup> – Târâ unâ iwâkuru Jesus wâgâ kâengatyly umelâ keankâ Deus Ispiritury nhonwamo xytâguyly. Saguhoem kurâ judeu modo kuonwa tâetobyry aralâ keankâ judeu keba modo onwa xytâguyly.

<sup>16</sup> Aituo keankâ Pymâ Jesus aguehobyry kâenanâguely: “João kurâdo batiza nhedyly parague. Iweâpa nipyra olâ ise Deus Ispiriturygue batiza mâieholymo, nynonroem mawlylymo mâenehon-homoem” Jesus kehobyry.

<sup>17</sup> Kurâ judeu domodo pymâ Jesus Cristo kieinwântuo, Deus Tyispiritury kuonwa nigonodâ. Cesareiadâ wawlyly umelâ keankâ Tyispiritury ingonodyly judeu keba modo nhonwa, kuonwa tingonobyry ara. Deus anhetyby izepa widyse inkâba urâ – kely myani Pedro.

<sup>18</sup> Jesus einwânni Jerusalém donro modo awârâ tindatuo Pedro agâ tyewiâseba idylymo myani.

– Koendonro Deus! Judeu keba modo kara tynonroem itoem anygue lâpylâ. Inakanhe tawlylymo inmolymo Jesus tyeinwântoen-ro watay, eydâ atoram idâzemo tyigueduomo. Kudutuagui awârâ – kelymo.

*Antioquia donro modo Jesus nheinwântobyry*

<sup>19</sup> Estêvão xyâpygueduo myani toenzepa Jesus einwânni modo Jerusalémdâpa âwientaynlymo. Jesus eynynâboam modo myani enagazenimo. Taypa ânwienipe myani. Fenícia anaxi idânripe, ilha Chîpre anaxi idânripe warâmo myani. Tâlâ pylâ myani Antioquia



anaxi idânri modo. Tâtâhobyrydâ myani unâ Jesus wâgâ agueim nhegatylymo. Judeu domodoram kulelâ olâ myani aguelymo, judeu keba modoampa.

<sup>20</sup> Tâlâ pylâ Chipre donro, Cirene donro warâ Jesus einwânni modo Antioquiarum tâtâzemo lâpylâ myani, Jesus wâgâ agueze. Unâ iwâkuru Pymâ Jesus xunâry myani nhegatylymo judeu keba modoram.

<sup>21</sup> Antioquiarum idâypy modo agâlâ myani Jesus eon-honrumo xuduzelâ. Jesus egary tindatuomo, toenzepa kurâdo inakanhe adâidyly tumozemo myani, Pymâ Jesus tyeinwântomoem.

<sup>22</sup> Jerusalémdâ Jesus einwânni modo, Antioquiadâ aityby modo egary indadylymo myani. Judeu keba modo Jesus tâinwânsemo kely myani indakylymo. Aituo myani Barnabé ingonodylymo myarâ.

<sup>23</sup> Saintrybyem myani akaemo agâ koendâ kehoem Deus awyly nhedyly. Awylygue myani toenzepa iomaru. Aituo myani mâkâ Jesus einwânni modoram aguely:

– Koendâ kehoem Pymâ Jesus wâgâ xutuwâdaungâ. Mâinwâmpyra tâiseba itaungâ – kely.

<sup>24</sup> Koendonro myani mâkâ Barnabé. Jesus tâinwânse lelâlâ myani mâkâ; Deus Ispirityru aguehobyry adyese lelâlâ warâ. Toenzepa kurâdo Pymâ Jesus nheinwântomoem adyenehonze myani.

<sup>25</sup> Târâpa âxigueybyem myani Barnabé Tarsoram idâly, Saulo ese.

<sup>26</sup> Tiontuo myani eagâlâ odopâdyly Antioquiarum. Tokalâ anu myani târâ awylymo, Jesus einwânni modo agâ. Toenzepa kurâ domodo tonomedâzemo myani Jesus wâgâ. Târâ Antioquiadâ myani Jesus einwânni modo “cristão” kelygue âzetzêolylymo. “Cristo eynynonro” keze awârâ âze aguely. Waunroem kuru Jesus einwânni modo arâ âzetzêolyly myani mârâ.

<sup>27</sup> Barnabé, Saulo warâ târâ ataylâ myani Deus wâgâ aguewâni modo myarâ Antioquiarum saindylymo. Jerusalémdâpa myani idâlymo.

<sup>28</sup> Tonlo modo Jesus einwânni modo agâ myani âtâdygylylymo. Deus wâgâ aguewâni modo ewy tokalâ uguondo Ágabo kehobe myani. Deus Ispirityru aguehobyrybe tawylygue myani saudyly adâkehoem:

– Toenzepa ise ânwym; Judéia donro modo toenzepa âsenagazezemo – kely myani.

(Cláudio pymâem awyly ume ani aguehobyry ara aidyly.)

<sup>29</sup> Ágabo aguely tindatuo myani tonlo Jesus einwânni modo Judéia donro modo nhemawyadâdylymo.

– Judéia donro modo Cristo eynynâ kypemugunra dinheru kyjigonone, typyniry nhanâtomoem – kelymo myani.

Imâem tydinherugeim modo imâem myani nhudulylymo, imâemba tydinherugeim modo myani imâembalâ warâ. Tâlâ tato aralâ myani nhudulylymo.

<sup>30</sup> Idânârâ dinheru idâtyguyimbyryem myani Judeiadâ Jesus einwânni modo iwymâryram ingonodylymo. Barnabé, Saulo warâ myani sani.

## 12

*Tiago xyâhobyry, Pedro kadeia odaxi etadâdobyry warâ*

<sup>1</sup> Barnabé Antioquiadâ atay myani pymâ Herodes Jesus einwânni modo ewy nhenagazenehonly.

<sup>2</sup> Tyzodadury modoram myani aguely:

– Tiago, João iwaigoru, xyâwâtaunda – kely.

Aguehoymbyem tawylygue myani espadague Tiago nhangasagâdylymo.

<sup>3</sup> Toenzepa myani judeu domodo Jesus einwântânry, Tiago xyâduo, iomarumo. Kurâ domodo Tiago xyâhobyry wâgâ iomarumo tientuo myani Herodes, Pedro nhawânehonly. Âty, judeu domodo tydamudo Egitodâba âsemaguehomobyry nhenanâguehomo etyry ume myani mârâ aidyly. Pão ioliho pebaom myani mârâ âty ume nhedawynlymo.

<sup>4</sup> Nhawâpygueduomo myani Herodes eyanmo aguely:

– Kadeia odaxi etadâdaungâ. Quatro lelâ ise eni ize wawyly. Ilâpyryem ise quatro lâpylâ, ilâpyryem quatro, ilâpyryem quatro warâ – kely.

Warâ myani Pedro nhetomoem eyanmo aguely.

– Egitodâba âsemaguehomobyry etyguebygueduo ise, Pedro kâenenehonly kurâdo enanaym kâenwentâdoem – kely myani Herodes tyangahu oday.

<sup>5</sup> Warâ myani Pedro etagu, sodadu domodo enanaynlâ. Târâ atay, Jesus einwânni modo, xurâem Deus agâ adâkezemo myani. Kadeia odaypa nhetaguehohoem myani nhekadylymo. Ton-honre kehoem myani iwâgâ Deusram aguezesedylymo.

*Deus Pedro kadeia odaypa nhetaguehon-homyry*

<sup>6</sup> Kopae tâwentâguedo iray, azagâ sodadu ontay myani Pedro xykyly, ekâjibyem. Azagâ korenty metalguetogue myani tâynâ, taynâ warâ ekâjibyem awyly. Azagâ sodadupe lâpylâ myani kuoho kadeia iwyantary eni. Kopaelâgâem kurâdo enanaym wâne myani Herodes tyândyse awyly.

<sup>7</sup> MOK alelâ kehoem myani anju Pedro iopaji âepanâguely. Toenzepa kehoem myani nhesagonly târâ Pedro eydâ atodâ. Pedro nhewanday myani mâkâ anju MÂ' nhedyly, xuaguehoem. Xuagueduo myani eyam aguely:

– Iokobagâ aukâ, Pedro! – kely.

Agueduo myani korenty modo ewâry wâgâpa ihuguewâdily, saudyly warâ.

<sup>8</sup> – Iokobagâ âzetydâgâ. Âwanxiery sagamigâ, âwenkadary iekâ warâ – kely myani anju.

Aguehobyry ara myani Pedro ohondyly.

– Ity BOH waunlo iekâ, kuohoram igasehoem. Âekâ yagâ – kely myani anju.

<sup>9</sup> Koendâ tohombygueduo myani Pedro egasely tâtadâdobyrydâba. Anju nhapyguelâ myani egasely. Tâzetagueoly awyly nutuba olâ myani; tyâenky kulâ-ro waunlo ara myani, enanaji.

<sup>10</sup> Saguho sodadu nhakadylymo myani, nhatanolâ nhakadylymo warâ. Pyanta imâsedo metalguetoram tainsemo myani, aruanra tâzegasehoram. Myarâ saintuomo myani kuohoram egasehomoem Deus pyanta imâsedo tâwâlâ âzenahunguehoem anhedily. Târâlâ myani anju idâly. Mâkâ kulelâ myani Pedro târâ kuoho âxiânly.

<sup>11</sup> Târâ kehoem myani Pedro tâsemaguehobyry âkealâ kuru awyly nhutuly.

– Iweâma yâenkyum keba awyly xutuagui. Kuoho lelâlâ urâ. Deus anju nigonotai, kadeia odaypa ietagueze, Herodes âdayepyra itoem. Judeu, Jesus eynynonro keba modo yâze nygüe wâne, Deus olâ iemakeagui – kely myani.

<sup>12</sup> Koendâ tiuntuduo myani Pedro idâly Maria, João Marcos ise etyram. Toenzepa myani Jesus einwânni modo târâ awyly, Pedro nhetaguehoem Deusram ekaze.

<sup>13</sup> Mârâ âtânra saintybyem myani Pedro pyanta TON TON nhedyly, nhenahunguehoem, ingâsedily warâ. Târâ tâwaneim Rode myani ânguy pyanta aieni awyly ese idâim.

<sup>14</sup> Itanru tindatuo myani Pedroem awyly nhutuly. Toenzepa kehoem myani iomazely. Tuomarugue, pyanta nenahunguebalâ myani odopâdily tâgase kehoem, târâ âtâdyguyby modoram egatuze:

– Pedro awâkâ kuohonro! – kely myani.

<sup>15</sup> Aguely neinwâmpyramo olâ myani.

– Myguewâdily kulâ – kelymo lelâ.

– Ugely mâkeba! Pedrolâ! – kely lelâ mâkâ pekodo.

– Egadopyry kulâ keanra – kelymo.

<sup>16</sup> Aguelymo ume, kuoholâ myani Pedro pyanta TON TON nhesezedily, nhenahunguehomoem. Pyanta tienahungueduomo myani, mâkâlâ awyly nhedylymo. Toenzepa myani adapâendilymo, âseguâdâdilymo warâ.

<sup>17</sup> Tâmarygue myani MYK alelâ itomoem aidily. Aitybyem myani âdara Deus kadeia odaypa tâtaguehobyry nheगतuly:

– Awitobyry Tiagoram, Jesus einwânni modoram warâ egatuwâdaunda – kely.

Adâkebygueduo inepa kehoem myani târâpa âxiguely. Âkelo âjiram idâly.

<sup>18</sup> Emetybyem myani sodadu domodo Pedro ese idâlymo. Nepyramo olâ myani, Âdaitobyry awyly nutubamo warâ.

– Âdykâka wânkâ? – kelymo myani.

Tâseguâdâzemo myani toenzepa kehoem.

<sup>19</sup> – Xuiwâtaungâ – kewânmy Herodes.

Âdykâlâ nepyramo olâ myani. Aituo guarda domodo ingâsedily.

– Âdara kuruka Pedro kadeia odaypa egasely? – kely.

Tin-hoguo nutubamo myani. Aituo myani akaemo nhâen-honly, mâkâ kadeia odanopyry nhemakehon-homobyry wâgâ. Ilâpygueduo myani Herodes âxiguely Judêia eynynâba. Cesareianra idâly wao.

### *Herodes iguehobyry*

<sup>20</sup> Toenzepa myani Herodes iewiâky, âtâ anary Tiro donro modo agâ, Sidom donro modo agâ warâ. Awylygue myani ipyniryimo nigonopyra idily. Aituo myani mârâ âtâ anary donro uguondo modo ewy Herodesram ingonodylymo, awârâ modo wâgâ agueze. Idâpyyem saguhoem kuru aguelymo myani Blasto agâ. Pymâ agâ tâwaneim myani mâkâ.

– Xina agâlâ waone ikâ, Herodes xina agâ tyewiâseba idily ara – kelymo myani.

<sup>21</sup> Eagâmo adâkeho saintuo myani idânârâ tadanebygueduo, Herodes tâty iwâkuru kehoem nhedyly, pymâ modo lelâ ety. Mure pymâ tynreim ejidy wâgâ myani ekadyly egawântybyem. Ekadybyem myani aguely adaguly.

<sup>22</sup> Aguely tindatuo myani kurâdo adaenkely:

– Deus awâkâ aguenri, uguondo keba! – kelymo myani.

<sup>23</sup> Deus xyrento ara tynrentuo myani âzehoguedyly lelâ. Awylygue myani Deus anju ingonodyly, toenzepa kehoem Herodes nhewâmanâdoem. Ioday myani nhânehonly iwondoruam. Inepa myani iguely.

<sup>24</sup> Toenzepa myani kurâdo Deus itaumbry tindadysedo modo. Tâinkâ lelâba myani Jesus einwânni modo Jesus wâgâ aguely.

<sup>25</sup> Barnabé, Saulo warâ, Jerusalémdâ Jesus einwânni modo iwymâryam dinheru tuduzemo myani, tonlo modo âdy pebanro modo xurâem nhuduhoem. Dinheru xuduimpyryem myani Antioquiarum odopâdylimo. João Marcos tagâ tasemo myani.

## 13

*Barnabé, Saulo warâ Jesus xunâry egatuze ingonotomobry*

<sup>1</sup> Antioquiadâ, Jesus einwânni modo ewy Jesus wâgâ kurâdo enomedânibe myani. Barnabé, Simeão, Lúcio, Manaém, Saulo warâmo myani. Tâmyguyneim kelygue tâzekeim lâpylâ myani mâkâ Simeão. Cirene donro myani mâkâ Lúcio. Galliléia donro modo iwymâry Herodes agâ enamadyby myani mâkâ Manaém.

<sup>2</sup> Tâtâdyguzemo myani Jesus einwânni modo, Pymâ Jesus xyrense, iomaenze warâ. Nâwinduaprya tâisemo myani, Deus agâ adâkehomoem. Târâ âtâdygybyem awylymo ume myani, Deus Ispiritury eyanmo aguely:

– Barnabé, Saulo warâ xiduake, Jesus xunâry egaturin-em. Igonotaungâ akaemo, Jesus wâgâ aguehomoem – kely.

<sup>3</sup> Aituo myani tonlo modo nâwinduaprya idylymo, Deus agâ adâkehomoem. Deus agâ adâkebygueduom myani Jesus einwânni modo, mâkâ, mâkâ warâ, Barnabé, Saulo warâ nhangahu onwa tâmary nhedylymo, Deus induakeyby awylymo xutuhoem.

*Barnabé, Saulo warâ Chipredâ Jesus wâgâ aguehomobry*

<sup>4</sup> Deus Ispiritury tuduakebygueduo myani Barnabé, Saulo warâ idâlymo âtâ anary Seléusia kehoram. Târâpa idâlymo myani Chipreram.

<sup>5-6</sup> Salamina iduantaji saintybyem myani Jesus wâgâ aguelymo. Âtâ judeu domodo âtâdygyho odakâ Jesus xunâry tâgatzemo myani. Pafosram saindylymo. Deus ewanugue akaemo emawydâzelâ mykâinane João Marcos.

Târâ myani judeu BarJesus nhodylymo. Konokuni aieni mykâinane mâkâ. “Deus eynynonro urâ” tâkelygue, kurâdo enokuni mykâinane.

<sup>7</sup> Chipre donro pymâ Sérgio Paulo eataen-ho myani mâkâ. Tonomegueim, Jesus wâgâ aguely tindadysedo warâ mykâinane mâkâ pymâ. Awylygue myani Barnabé, Saulo warâ ingâsedyly, eagâmo adâkehoem.

Aituo myani eagâ agueze idâlymo.

<sup>8</sup> BarJesus (gregüem Elimas keho olâ myani) tataen-ho Sérgio Paulo, Jesus nheinwândyseba. Aituo myani toenzepa kehoem iewiâpadyly akaemo Jesus unâry egatuwânni modo agâ.

<sup>9</sup> Deus Ispiritury olâ myani koendâ kehoem Saulo nhurudyly aguehoem. (Itanwemo “Saulo” myani ezedy. “Paulo” myani romano domodo itanwe.) Aituo myani Paulo, Elimas nhesedyly, eyam aguely warâ:

<sup>10</sup> – Diabu ara konokuni kulâ âmâ! Tumunreim kehoem âmâ! Koendonro ize-tonro mâkeba âmâ! Pyrâu tâkâineim wâne kianmehoram naimpyra myara, ataen-hodo amânhedyly, Jesus neinwâmpyra itomoem, Deus eydâ atoram naimpyra itomoem warâ.

<sup>11</sup> Arâ mawylygue, Pymâ Jesus inagazeze. Epyem âese. Iweâpa nekâ ise âdy mâempyra mawyly. Xixi ehorulâ mâentaymba ise âmâ – kely.

Ilâ umelâ kehoem myani Elimas nepyra idyly. Tyame lelâ myani xurâem. Ânguy emarylâ myani nhawâkyly takobâdoem.

<sup>12</sup> Paulo adyesenry anhedyly tientuo myani mâkâ mârâ ilha iwymâry toenzepa kehoem âsewânily. Aituo Jesus wâgâ Paulo aguehobry nheinwândyly.

*Paulo, Barnabé warâ Antioquiarum idâhomobry, Pistidia yan-yam*

<sup>13</sup> Sérgio Paulo agâ adâkebygueduo myani Paulo domodo Pafosdâba âxiguelimo. Pepi imeâgâkeba oday Panfília yan-yam myani idâlymo. Perge iduantaji myani saindylymo. Târâ myani João Marcos eagâpamo idyly. Jerusalémram odopâdylimo.

<sup>14</sup> Perge donropyryem myani Paulo, Barnabé warâ Antioquiarum idâlymo, Pisidia eynnonroam.

Tâzekobyzegueho oday myani mârâ âtâ judeu domodo Deus agâ agueze âtâdyguyhoam idâlymo. Egawântbybem myani ekadylymo.

<sup>15</sup> Adâitomo ara myani târâ âtâdyguyby modo Deus itaumbry intainlymo ago kehoem. Moisés inwenibydâ myani intainlymo. Deus itaumbry egatuwâni modo inweniby ty-tainzemo lâpylâ myani. Pape itaimbygueduo myani tonlo pymâ modo, Pauloram, Barnabéram warâ aguelymo:

– Nhaum, xinaram amyguehomobe mataymo, aguewâtaungâ. Xina eon-honwanâze amyguelymo atay, xinaram aguewâtaungâ lelâ – kelymo.

<sup>16</sup> Aituo myani Paulo saudyly, tâmarygue MYK alelâ itomoem aidyly. Tytamuneba ituomo myani aguely adaguly:

– Judeu domodo, âmaemo judeu keba modo taunlo Deus xyreni modo warâ ydataungâ.

<sup>17</sup> Iweâpa myakâwândy Deus israelita domodo induakely. Deus tâinwânsemo myakâwândy. Egitodâ tataymo, agui tâisemo myakâwândy. Koendâ mykâinane Deus eagâmo awyly. Ton-honruguelâ myakâwândy akaemo nhetyly târâ âsenagazedomodâpa.

<sup>18</sup> Quarenta anos ara, inakai modo Deus izepa ato kulâ mykâinane anhekylymo. Nepyramo nipyra olâ myakâwândy Deus.

<sup>19</sup> Sete lelâ tygueto modo, Canaã eynynâ tâjikeimbe myakâwândy. Deus olâ myakâwândy tainhehonzemo, kydamudo mârâ âji sodoem itomoem. “Kydamudo” uguely, judeu domodo idamudo.

<sup>20</sup> Quatrocentos e cinquenta anos lelâ takaze myakâwândy kydamudo Egitodâ. Ilâpygueduo myakâwândy Canaãram odopâdylymo. Mârâpygueduo juizes myakâwândy Deus iwymârymoem nhekyly. Kurâdo tâense, âdydo imeom taunâkeze warâ mykâinane akaemo juiz domodo. Pymâ ton-honreim kuru “rei” kelygue tâzekeingue tywymâguyepamo myakâwândy – kely.

<sup>21</sup> Aituo myani Paulo agueondyly:

– Samuel juizem awyly ume myakâwândy kurâdo aguely: “Pymâ tynrenseim, ton-honreim kuru warâ xina tywymâryem ize ato, ‘rei’ keho, âkelo anary modo iwymâry ara” kewândymomy. Awylygue myakâwândy Deus saguhoem kuru Saul induakely, kydamudo iwymâryem. Uguondo Quis imery myakâwândy mâkâ, kydamu Benjamim iepadyby ewy. Quarenta anos myakâwândy Saul kydamudo iwymâryem awyly.

<sup>22</sup> Deus itanru nhakaduo myakâwândy Saul pymâemba âieholo Deusram. Davi myakâwândy Deus induakely ejippyanoem. Warâ myakâwândy Deus aguely Davi wâgâ: “Koendâ tutuze urâ awâkâ Davi, Jessé imery kâinwynegyuly. Auguehobry ara lelâ ise aidyly” kewândymy Deus.

<sup>23</sup> – Iweâpalâ myakâwândy Deus, Jesus wâgâ aguely: “Davi iweom ewy igonose urâ, judeu domodo emakeze” kely. Jesuslâ myani Deus “Igonose urâ” keho.

<sup>24</sup> Jesus kurâdo Deus itaumbrygue nhenomedâdylymo iraynâ, João Batista judeu domodoram adâkezelâ myani: “Âjityendaungâ inakanhe amitomobry wâgâ. Deus izepa ato aiedyly imowâdaungâ. Batiza âiehowâdaungâ, inakanhe amitomobry imoimbyryem mawlymo mânehon-homoem” kewânmy.

<sup>25</sup> “Imakerinmo igonose urâ” Deus kehobry keba olâ myani mâkâ João Batista. Deus, “Aiekâ” kehobry tienwanikely ume myani João aguely: “Deus Ingonotybyka urâ, inana-jimo? Mâkâ mâinwânwânkylimo mâkeba urâ. Urâ pygueduo ise mâkâ âewyly. Ton-honreim mâkâ, iemyenro keba. Mâkâ ise yakadâ kuru ton-honreim. Âdy mâkeba urâ. Ihuru etary ekâjiguerin-enlâ witoem nudupa lâgâlâ, ihuru kâingokehoem” kewânmy João – kely myani Paulo.

<sup>26</sup> Aituo myani Paulo agueondyly:

– Ypemugudo, Abraão iweom, âmaemo, judeu keba modo Deus xyrentaynrim modo warâ ydataungâ. Âdara kydâsemaguely awyly wâgâ kiuntudyze Deus.

<sup>27</sup> Nutuba lelâlâ myani akaemo Jerusalém donro modo, iwymârymo warâ, Jesus kâmakerin-em igonotyby awyly. Tâzekobyzegueho oday tydasemo myani, Deus itaumbry wâgâ aguewâni modo Deus Ingonokely Messias wâgâ inwenibymo. Nutubamo olâ myani, Jesuslâ Messias awyly. Jesus xyâhoem tâkazemo myani. “Warâ ise amidylymo” Deus kehobry ara kehoem myani akaemo aidyly.

<sup>28</sup> Xyâhoem Pilatosram nhekadylymo, âdy wâgâ xyâho pebalâ.

<sup>29</sup> Awârâ aidyly iraynâ, Deus itaumbry egatuwâni modo adâkezelâ myakâwâm Jesus wâgâ. “Warâ ise Messias aidyly” kely iweniwânmy. Saguhoem inwenihomobry ara kehoem myani aidyly. Kruz wâgâ igueduo eguepybyry tuhu imâsedo tâtagueim odaji nhetadâdylymo.

<sup>30</sup> – Deus olá kurâem tyetonze.

<sup>31</sup> Kurâem tâitombiyueduo Jesus tâepanâgueze tyampyguenibry modoram. Iguelly iraynâ tâtâzemo myani eagâ, Galiléia donropyryem Jerusalémram nhenomedâdily ume. Kurâem tâitombiyueduo iweâpa myani Jesus akaemo modo agâ awyly. Enipyry modo, judeu domodoram kurâem itondybyem awyly wâgâ adâkezemo myani – kely myani Paulo.

<sup>32</sup> Paulo myani eyanmo agueondily:

– Unâ iwâkuru Jesus wâgâ agueim âyanmo egatuze lâpylâ tarâ xina awyly.

<sup>33</sup> Iweâpa Deus kydamudoram “Warâ ise aidily” kehobyrylâ xirâ iwerâ aini. Jesus kurâem tyetonze myani. Saguhoenlâ myakâwândy iwenibryem awyly Messias wâgâ Salmosdâ:

“Ymery âmâ; unwâm urâ warâ;

kurâdoram ymery mawyly kênehonly warâ”

kewândymy Deus, Jesus wâgâ.

<sup>34</sup> – “Kâingonotyby igueduo, kurâem ietonze urâ, eguepybyry niwânzepa itoem” kewândymy Deus.

“ ‘Koendâ ise urâ agâ’ uguely akâwândy Daviram.

Davi agâ koendâ watobyry ara ise agâmo koendâ wawyly.

Xirâ auguehobyry ara aiese urâ”

kewândymy Deus.

<sup>35</sup> – Warâ lâpylâ myakâwândy Davi iwenibryem awyly, Deus aguehobyry Messias eguepybyry wâgâ:

“Imarybyry, toenzepa âinwânnipyry eguepybyry

mâinwânzeânehomba ise âmâ”

kewândymy Davi Deusram – kely myani Paulo.

<sup>36</sup> Aituo myani agueondily:

– Tywâgâpa Davi aguely awyly, tutuze kurâ, arâ aguehobyry wâgâ. Deus tâinwânse, koendâ kydamudo iwymâryem awyly warâ mykâinane. Iguewâm olâmy. Idamudo eguepybyry etadâdobyry odajilâ myakâwândy eguepybyry âzetadâoly. Târâlâ myakâwândy eguepybyry iwânzely.

<sup>37</sup> Jesus eguepybyry olâ myani niwânzepa. Deus myani kurâem tyetonze – kely.

<sup>38</sup> Warâ tâkeze myani Paulo:

– Ypemugudo, mâuntudyzemo urâ, Jesus kienwântuo lelâ inakanhe aguitobyry Deus nhygakely awyly. Jesus wâgâlâ iwerâ xina âyanmo aguely.

<sup>39</sup> Jesus mâinwântuomo lelâ inakanhe amitomobyry âdygakeoly. Inanajimo olâ inakanhe amitomobyry âdygakeoybem, Moisés inwenibry ara amidilymogoe kulâ. Arâpa olâ. Jesus mâinwântuomo lelâ âdygakeoly.

<sup>40</sup> Saguhoem Deus wâgâ aguewâni modo, “Deus Ingonokily eynynâbaom modo âsenagazeze” tâkezemo myakâwândy. Eynynâ itaungâ, mâsenagazebyra mitomoem. Warâ myakâwândy Deus aguehobyry Habacuque inwenily:

<sup>41</sup> “ ‘Aguely mâinwântaymba âmaemo.

Âwankuem yedâmo lelâ.

Âpaunzedaungâ, âseanedaungâ warâ!

Âdyoze âmaemo, ytaumbyry mâindadyseba mawylmogoe.

Iwerâ agânhekyly ise mâuntulymoemba kuru,

tâwâlâ wâne koendâ âyanmo egatuly’ kewândymy Deus”

– kely myani Paulo.

<sup>42</sup> Adâkebygueduolâ myani Paulo, Barnabé warâ egaselymo mârâ âtâ tâdâtâdyguyho odayba. Idâdaymo myani tonlo modo eyanmo aguely:

– Imâem tindadyse xina Jesus wâgâ. Tâzekobyzegueho oday âetondaungâne, xinaram agueonse – kelymo myani.

<sup>43</sup> Idâdaymo toenzepa judeu domodo, Paulo, Barnabé warâ tyampyguezemo myani. Judeu keba, judeu nheinwânkily einwâni modo eagâmo tâtâzemo lâpylâ myani. Paulo, Barnabé warâ eyanmo aguely myani:

– Kagâ koendâ tawyly Deus nimowâbyra. Einwânsezedaungâ lakuru awylygue anhekyly modo âmaemoenlâ awyly – kelymo.

<sup>44</sup> Tâzekobyzegueho saintuo myani toenzepa tonlo modo âtâdyguyondilymo, Paulo, Barnabé warâ Pymâ Jesus wâgâ aguely idase.

<sup>45</sup> Toenzepa aguelymo idataynrim modo tientuomo myani judeu domodo iwymârydo iewiâpadylymo Paulo, Barnabé warâ agâ. Tâsêwânilygue kulâ myani akaemo pymâ domodo, Paulo, Barnabé warâ aguely nhakaladâdilymo:

– Inokudylymo kulâ asaemo azagâ uguondo modo – kelymo.

<sup>46</sup> Akaemo pymâ modo nytabyra olâ myani Paulo, Barnabé warâ. Tâegane kehoem aguelymo lelâ:

– Judeu âmaemo. Awlygyue âyanmo xina saguhoem kuru unâ Jesus wâgâ aguely. Xina agueho mâinwândyseba olâ âmaemo. Jesus mâinwântuomo lelâ mâsemaguelymo kely mâinwântaymba âmaemo. Awlygyue xina omolyo. Judeu keba modoram ise xina Jesus xunâry nhegatyly iwerâ.

<sup>47</sup> Iweâpa Deus aguwânmy:

“Judeu keba modoram ytaumbyry egaturin-em âduakelymo.

Esagon-ho kytâho nhesagon-ho ara ise ywâgâ mâuntuen-honlymo,  
yam idâhomoem.

Tâinkâ lelâba ise âdara tâdâsemaguely awly wâgâ amyguelymo”

kewândymy Deus.

– Awlygyue ise judeu keba modoram xina Jesus wâgâ aguely – kely myani Paulo judeu domodoram.

<sup>48</sup> Judeu keba modo awârâ tindatuo, toenzepa kehoem myani iomazelymo.

– Koendonro mâkâ Pymâ Jesus xunâry – kelymo myani.

Idânârâ Deus induakeyby modo myani Jesus tâinwânsemo, aunloenlâ eagâ tâitomoem.

<sup>49</sup> Aituo myani akaemo Jesus einwânmi modo Jesus wâgâ adâkely nimopamo. Tâinkâ lelâba myani xunârybyry nhegatylymo.

<sup>50</sup> Agui olâ myani judeu domodo Paulo, Barnabé warâ tyewiâpanâzemo. Tonlo pymâ modo, pekodo modo âdypeom modo warâ eagâmo iewiâpadylymo myani. Jesus neinwâmpyra myani akaemo pekodo modo; Moisés inweniby ara lelâ aidylymo. Idânârâ pymâ domodo agâ myani judeu domodo, Paulo, Barnabé warâ nhunâguedylymo, akaemo târâpa ejikehomoem.

<sup>51</sup> Târâpa tâtâdaymo myani Paulo, Barnabé warâ tuhuru etary nhutoleguguelymo, tonlo modo Deusram tânagazezem awly xutuho myani mârâ, aguehobyry tindadyseba atomobyry wâgâ. Ilâpyryem myani Paulo, Barnabé warâ Iconioram idâlymo.

<sup>52</sup> Antioquiadâ Jesus einwânmi modo, toenzepa myani iomarumo, eynynonroem tawlylmo. Deus Ispiryty aguehobyry ara lelâ myani aidylymo; eagâmolâ myani-ro warâ.

## 14

*Paulo, Barnabé warâ Iconioram idâhomobyry*

<sup>1</sup> Antioquiadâ adâitomobyry ara lâpylâ myani Iconiodâ aidylymo. Paulo, Barnabé warâ myarâ saintybyem âtâ judeu domodo âtâdyguyhoam tâtâzemo myani. Jesus wâgâ unâ nhegatylymo myani. Aguelymo tindatuo, toenzepa judeu domodo, judeu keba modo alelâ Jesus tâinwânsemo myani.

<sup>2</sup> Awlygyue myani judeu Jesus einwântânry Icônio donro modo Jesus einwânmi modo idueryem nhenehonlymo.

<sup>3</sup> Alâ olâ myani Paulo, Barnabé warâ târâpa nâxigueba awlylymo. Toenzepa myani kurâ domodo Jesus einwânmi. Awlygyue myani iweâpa idylymo târâ. Tyanepa kehoem myani Pymâ Jesus wâgâ aguelymo:

– Agâmo koendâ kehoem Deus – kelymo myani tonlo modoram.

Deus Paulo, Barnabé warâ eon-honru tuduze myani, koendonro modo, adyesenry modo warâ anhetomoem. Deus arâ anhedily myani, tonlo modo tunârybyry âkealâ awly nheinwântomoem.

<sup>4</sup> Âikâ âikâ warâ myani âpaunzedilymo Deus itaumbyry wâgâ. Tâlâ myani Paulo, Barnabé warâ eynynonro. Tâlâ lâpylâ myani judeu domodo ewy Jesus einwântânry.

<sup>5</sup> Aituo myani tonlo modo ewy Paulo, Barnabé warâ iduery pymâ modo agâ adâkehoem âturudylymo tienagazenehon-homoem.

– Tuhugue kydamytânemo – kelymo myani.

<sup>6</sup> Awârâ tiuntudomo myani Paulo, Barnabé warâ Listraram, Derberam, âtâ anary iwaguepaom modoram warâ ânwiendilymo, Licaônia yan-yam.

<sup>7</sup> Âdym tâtâhobyrydâ Jesus wâgâ adâkezemo lelâ myani.

*Listradâ Paulo onwa tuhu nhamohomobyry*

<sup>8</sup> Uguondo adakobâdânrybe myani târâ Listradâ. Ihurudâ tywyke myani iazely. Awlygyue myani nadakobâbyra awly, ekadybyem lelâ awly warâ.

<sup>9</sup> Mâkâ uguondo myani Paulo, Jesus wâgâ aguely indadyly. Mâkâ uguondo adakobâdânry koendâ kehoem enipyryem myani Paulo tuoday aguely:

– Deus kua tyedyly tâinwânse merâ uguondo – kely.

<sup>10</sup> Aituo myani eyam aguely:

– Aukâ! XYDYK ikâ! – kely.

Inepa kehoem myani mâkâ uguondo saudyly. XYDYK idyly, adakobâdyly warâ. Kua imâmy ihuru.

<sup>11</sup> Toenzepa myani kurâdoram âzeseoly, Paulo, Deus eon-honrugue kua nhetybyem awylygue. Tientuomo myani adaenkelymo tytanwe. Paulo nutuba myani âdakeze aguelymo awyly.

– Etaungâ. Aunlo kulâ uguondo mâkeba asaemo; deus asaemo azagâ – kelymo.

<sup>12</sup> – Ton-honruneim modo asaemo azagâ, ize kydato modo – kelymo myani.

“Júpiter” kelygue myani Barnabé nhezetâdylymo, Paulo pylâ “Mercúrio” kelygue-ro warâ, mâkâ tagonro takaze kuru agueim awylygue.

<sup>13</sup> Âtâ anaxi tâzegawântodâlâ myani tydeusry Júpiter nhyrentomo âtâ. Mârâ âtâ oday tâwaneim myani tadawanku koroaem xygatyby, tapirâ warâ âtâ anaxi tâzegawântoam tase. Tonlo modoram aguely myani:

– Tapirâ modo kyjiwâkudâne xirâ sawanku koroaem xygatybygue. Iweâma ise kyânly-ro warâ, asaemo azagâram nhunru kiengamehoem, kydeusry modoram kiengamezezedo ara – kelymo myani.

<sup>14</sup> Akaemo Deus ara tyese tâkehony tiuntuduo myani Paulo, Barnabé warâ adahulilymo. Tâty tauguezemo myani, tytynrû tienehon-homoem. Kurâdo duaxi egatudybyem myani adaenkelymo:

<sup>15</sup> – Adâiseba itaungâ, Nhaum! Deus mâkeba xina. Imyenromo kulâ xina! Âyanmo Jesus wâgâ agueze xina xarâ âewyly, onro xygatyby modo kulâ mâinwâmpyra mitomoem, iwâgâ amyguelymo mâinmohomoem warâ. Âdyem nitaymba akaemo. Âdy âmaemoem anientaymba ise. Deus iguedânry einwântaungâ, kau, onro, parutabâ, idânârâ xugunipyry. Awâkâlâ idânârâ âdydo imeom xuguni.

<sup>16</sup> – Saguhoem, ize tato aietaynrû modo tâwâlâ aitomoem adyenehonze mykâinane Deus.

<sup>17</sup> Koendâ lelâ olâ mykâinane eagâmo awyly. Warâ mykâinane Deus-em lelâlâ tawyly nhenehonly, kopâ igonomilâ, âpa ezay mâentâdybymo iazeânehoinlâ. Mâkâlâ âpyniryxo xudunri, idânârâ ize matomogue tuomare lelâ mitomoem xuduim warâ. Warâ mâkâ koendâ awyly agâmo, mâinwântomoem – kelymo.

<sup>18</sup> “Deus mâkeba xina” kelymo umelâ kehoem myani tonlo modo akaemo tienhoguedoem, âty adiendyse awylymo, deuslâ akaemo-ro waunlo ara. Paulo, Barnabé warâ tadahulizemo myani, kurâdo arâ anipyra itomoem, âdara tidyly nutuba tawylymogue.

<sup>19</sup> Ilâpygueduo myani judeu Antioquia donro modo ewy, Içônio donro modo ewy warâ Listraram saindylymo. Jesus eynynonro keba myani akaemo. Paulo, Barnabé warâ agâ kurâdo tyewiâpanânehonzemo, izepamo tyenehonzemo warâ myani akaemo Listraram saintyby modo. Aituo myani kurâ domodo tuhugue Paulo nhamytâdylymo. Tyamytâbygueduomo myani âtâ anaymba nhuxidylymo, igueypyen-ro waunlo ara myani, enanjimo. Târâlâ myani inmolymo.

<sup>20</sup> Jesus einwânni modoram tâjidâtyguyoze myani inmohomobyrydâ. Tâensedylymo umelâ myani Paulo saudyly, âtâ anaxi idâondyly. Emetuo myani Barnabé agâ idâlymo âtâ anary Derbe kehoram.

*Paulo, Barnabé warâ Síria yan-yam odopâdomobyry*

<sup>21</sup> Târâ Derbedâ myani Paulo, Barnabé warâ unâ iwâkuru Jesus wâgâ aguelymo. Toenzepa myani kurâdo mârâ âtâ anano modo ewy Jesus nheinwândylymo, mârâ unâ tindatuo. Tonlopyryem myani akaemo azagâ odopâdylymo Listraram, Iconioram, Antioquia Pisídia eynynonroam warâ.

<sup>22</sup> Âtâ anary modo anakâ takaday, Jesus einwânni modo tuomazeânzemo, turusemo warâ myani, Jesus neinwâmpyra nipyra itomoem.

– Jesus mâinwâmpyra tâiseba itaungâ. Deusgue tywymâgueim âmaemo. Awylygue ise toenzepa kurâdo Jesus izepaom modo, âewiâsedylymo, inagazedilymo warâ. Arâ ise Deus agonro modo aieholly – tâkezemo mykâinane.

<sup>23</sup> Âtâ anary modo odakâ takadaymo, Paulo, Barnabé warâ uguondo modo tuduakezemo myani, mârâ âtâ anaym Jesus einwânni modo iwymâryem. Tinduakebygueduomo myani nâwinduapya idylymo wao, akaemo pymâ iwelo modo eynynâ Jesusram tienkadomoem.

– Asaemo koendâ âinwânni modo iwymâryem xina induakewâdyby modo koendâ egâ. Âinwântâ asaemo – kelymo myani Jesusram.

<sup>24</sup> Aituo myani Paulo, Barnabé warâ âtâ anary Pisídia eynynonro modo odakâ sakadylymo. Panfília yan-yam myani saindylymo.

<sup>25</sup> Tâinkâ takadaymo Pergedâ unâ iwâkuru Jesus wâgâ negatuba nipyramo myani. Ilâpyryem myani âtâ anary Atália iduantaji idâlymo.

<sup>26</sup> Târâ myani pepi odaji âxiedylymo, Antioquia Síria eynnonroam todopâdodomoe. Iweâpa myani mârâ âtâ anaymba âxigueybyem awylymo, Jesus xunâry egatuze. Deus ewanu aiese idâlymo iraynâ myani Jesus einwânni modo, Deus agâ xurâmoem aguelymo:

– Koendâ asaemo imary modo egâ, âunâry egatuze idâdaymo – kelymo myani tonlo modo.

Deus itaumbry egatuimbryem myani Paulo, Barnabé warâ myarâ odopâdylymo.

<sup>27</sup> Saintrybyem myani Jesus einwânni modo agâ âtâdyguylymo, idânârâ Deus anhetyby tiengatuhomoem.

– Deus xina neon-honwanâdâ, xunârybyry xina nhegatuhoem. Judeu keba modo Jesus nheinwântomoem anieneho – kelymo myani.

<sup>28</sup> Iweâpa myani Paulo, Barnabé warâ târâ Jesus einwânni modo agâ awylymo.

## 15

*Jerusalémdâ Jesus einwânni modo iwymâry modo âtâdyguyhomobyry*

<sup>1</sup> Paulo, Barnabé warâ Antioquiadâ awyly ume myani uguondo modo ewy Judeiadâpa, Antioquiaram idâlymo. Saintrybyem myani aguelymo Jesus einwânni modoram:

– Moisés inweniby ara, iamudo iazeypy ilery ety iopiry tatâtâoze lelâ, iamudo judeu awyly xutuhoem, Deus xurâem awyly xutuhoem warâ. Awylygue, âmaemo judeu keba modo mâsemaguedyze mataymo, xina ezewenry ara aitaungâ. Xina ezewenry ara amipyra âmaemo-ro watay, Deus imakewâbyramo ise – kelymo.

<sup>2</sup> Arâ aguelymo tindatuo, Paulo, Barnabé warâ aguelymo nehoguebyramo myani. Aituo myani aguelymo:

– Ize inkâba kulâ amyguelymo. Judeu keba modoem adyeseim mâkeba awârâ tâjilery ety iopiry satâly – kelymo.

Toenzepa myani âjihogulymo Judéia donro saintyby modo agâ aguehomobyry wâgâ. Aituo myani Antioquia donro modo judeu satâhogue tatâze, tatâzeba warâ tawlyly nutuba idylymo.

– Uguondo modo ewy Jerusalémram igonose kurâ, awârâ modo koendâ xutuze, myarâ Jesus tunâry egaturin-em induakeyby modo agâ, Jesus einwânni modo iwymâry agâ warâ agueze idâhomoem – kelymo.

Agueypyem myani Paulo, Barnabé, eagonro modo lâpylâ warâ Jerusalémram idâwânni modo induakelymo.

<sup>3</sup> Ilâpygueduo myani Paulo, Barnabé, Jesus einwânni modo ewy iduakewâdyby modo warâ Antioquiadâpa idâlymo Jerusalémram. Fenícia einkâ, Samaria einkâ warâ myani sakadylymo. Âtâ anakâ takadaymo alâ mykâinane Jesus einwânni modo agâ âtâdyguylymo.

– Agui judeu keba modo âdy tyeinwânkily tumozemo, Jesus tyeinwântomoem – kelymo mykâinane.

Aguelymo tindatuo myani âtâ anary sakadomodâ Jesus einwânni modo iomazewâdylymo.

<sup>4</sup> Paulo domodo Jerusalémram tainsemo myani. Koendâ lelâ myani âzedakenkuolyo Jesus einwânni modoram, Jesus tunâry egaturin-em induakeyby modoram, pymâ domodoram warâ. Idânârâ Deus eon-honrugue adientybymo ara myani Paulo eyanmo nhegatu.

<sup>5</sup> Fariseu domodo ewype myani târâ. Jesus einwânnipyrymoem myani, Fariseu-em tatomodâ. Paulo aguely tindatuo, neinwâmpyramo myani. Awylygue sautybyem aguelymo:

– Judeu keba modo Jesus nheinwândylymo-ro watay, kâzewenry ara nidâmo, Moisés inweniby ara. Tylery ety iopiry natâmo, Deus xurâem tawlyly tienehon-homoem. Warâ tâise Jesus einwânni modo iwelo kienomedâdyly, judeu, judeu keba modo alelâ – kelymo.

Aguehomo arâ izepa myani Paulo.

<sup>6</sup> Aituo myani idânârâ Jesus tunâry egaturin-em induakeyby modo, Jesus einwânni iwymâry modo warâ tâtunâguedomoem âtâdyguylymo.

– Tâwâlâ, tâwâlâpa judeu keba modo kara satâly? – kelymo myani âjigüe.

<sup>7</sup> Toenzepa myani adâjidyly wâgâ aguelymo. Aguelymo idanipyryem myani Pedro agueze saudyly:

– Nhaum, iweâpalâ ani Deus uduakely, judeu keba modoram Jesus wâgâ aguenriem, tunâry indatomoem, nheinwântomoem warâ. Xirâ tutuzelâ âmaemo.

<sup>8</sup> Kurâ domodo nhangahu oday âdara xunâgumo awyly tutuze Deus. Judeu keba modoram Tyispiritury nigonodâ lâpylâ, kyam tingonotobyry ara, judeu keba modo tinwynedyly tienehon-hoem.

<sup>9</sup> Idânârâ âzekiba lelâ kurâ, Deus xurâem, judeu, judeu keba alelâ. Judeu keba modo Jesus nheinwândylymo-ro watay, inakanhe aitomobyry xygakeze mâkâ, inakanhe aguitobyry nhygakehobyry ara.



<sup>10</sup> — “Judeu domodo ara tatåduneba judeu keba modo nidâ” tâkeze Deus. Awylygue “Kara nadatâomo” mygueduomo, Deus aguehobyry sakaze myguelymo kulâ awârâ. Idânârâ kâzewenry ara kuru anitaymba myakâwâm kydamudo. Kâzewenry ara kehoem aguitoem nuduwâpyra lâpylâ iwerâ. Âdaituo pylâka judeu keba modo kâzewenke aidyse mawlylmo? Tâmanreingue mânhetâdylymo-ro waunlo ara awârâ. Koendâpa arâ adâjidyly.

<sup>11</sup> Inakanhe aini lelâlâ wâne kurâ, Jesus koendonro awylygue olâ kydzemakeoly. Arâ lâpylâ judeu keba modo nhemakely, “Warâ itaungâ” kepalâ — kely myani Pedro eyanmo.

<sup>12</sup> Pedro aguely tindatuo myani tonlo modo âdakepa idylymo. Barnabé, Paulo warâ adâitobyry nhegatulylmo indadylymo myani.

— Deuslâ ani judeu keba modoram Jesus wâgâ agueze xina igononi. Eon-honrugue adyosenry modo, koendonro modo warâ xina aniendâ — kelymo.

<sup>13</sup> Paulo, Barnabé warâ nhegatuybymo einwânâmâmy Tiago. Aguepygueduomo myani aguely:

— Nhaum, ydataungâ.

<sup>14</sup> Simão Pedro aguehobyry midataimolâ. “Inepa kehoem Deus koendonro tawlyl nhenehonly judeu keba modoram” keanry. “Tienkylyem Deus tuduakeze myani akaemo judeu keba modo ewy” keanry.

<sup>15</sup> “Aiese urâ” tâkehobyry aralâ Deus aidyly. Iwenibyênlâ myakâwândy Deus itaumbryry awo wâgâ:

<sup>16</sup> “Deus urâ.

Odoâze urâ âyanmo.

Davi iweom nynnonroemba isemo lelâlâ wâne,  
yeinwântondomoem, yrentomoem warâ aietonze olâ urâ.

Âtâ ihugueyby saunâtondyly wâne,  
myara ise iweloem kânhetondyly nhangahumo oday.

<sup>17</sup> Warâ ise agânhedyly, judeu keba modo urâem itoem.

Kâingâsedyby watay, yeinwânsemolelâ,  
urâem tawlylmogue.

<sup>18</sup> Warâ aguely urâ âwymâry.

Xirâ âyanmo xutuen-honze urâ.

Saguhoem auguehobyrylâ xirâ unâ”

kewândymy Deus, tunâry aguewâni modoram — kely myani Tiago.

<sup>19</sup> Aituo myani Tiago agueondyly:

— Ienanaji, kienkuâdâbyramo tâise kurâ akaemo judeu keba modo, Jesus tyeinwântoem, tydamudo ezewenry imoimbyryem awylygue.

<sup>20</sup> Kiunrutomoem pape eyanmo kyjiweninre. Warâ ise kinwenily: “Onro xygatyby, se xygatyby warâam ângulylâ nhunru xuduypy kâdâtaundâ. Uguondo tywydy lelâ nyanânâdâ; pekodo tursoram lelâ nâdynanâo warâ. Ânguydo imeom idu odano modo, âtâ inatano modo warâ mântomoem tâwâlâ wao iunu napâdâ; iunu kâzenywâdaundâ warâ.” Warâ ise kiunrudulylmo.

<sup>21</sup> Iweâpalâ myakâwândy judeu domodo Moisés inweniby indadyly. Até iwerâ âtâ anakâ tâzekobyzegueho oday tâtâdyguyzemolâ lâpylâ. Judeu domodo newiâpabyra itoem, xirâ pape aguehobyry ara ise judeu keba modo aidylymo — kely myani Tiago.

### *Judeu keba modoram pape igonotobyry*

<sup>22</sup> Jesus tunâry egaturin-em induakeyby modo, idânârâ Jesus einwânmi modo, iwymârymo modo warâ Tiago aguely tohoguezemo myani. Aituo myani iwymârymo pape inwenily, ingonodyly warâ Antioquiadâ Jesus einwânmi modoram. Pape iwenily tienwanikebygueduo myani azagâ uguondo modo induakelymo pape sanieim, Silas, Judas warâ. (Barsabás kelygue tâzekeim lâpylâ myani mâkâ Judas.) Jesus einwânmi modo xurâem, koendonro myani akaemo azagâ. Paulo, Barnabé warâ myani eagâmo idâim.

<sup>23</sup> Warâ kely myani pape inwenilymo:

“Âmaemo judeu keba modoram xirâ pape xina inwenily. Âdapa lâwâne âmaemo idânârâ? Xinaem, xina ipemugu âmaemo, xina ara Jesus einwânmi mawlylmogue. Antioquiadâ, Síria eynynâ, Cilícia eynynâ warâ mâintain-homoem keankâ xirâ xina inwenily.

<sup>24</sup> “Tutuze xina, taunlo uguondo modo ewy awyarâ idâhomobyry. Xina ingonotybyemba olâ keankâ idâlymo-ro warâ. ‘Mâsemaguedyze mataymo, judeu domodo satâhogue adatâowâdaungâ. Moisés inweniby ara lelâ aitaungâ warâ’ nyguemomy âyanmo. Âda midylymo awyly mâuntuba mitaundâmomy, aguelymo mâindatuomo. Ânguy ‘Aguewâtaungâ’ keduo inkâba keankâ akaemo arâ aguely.

<sup>25</sup> Áyanmo aguehomobyry tindatuo xina nâtâdyguy, awârâ unâ wâgâ adâkehoem, koendâ tâseinwândoem warâ. Xina nâtunâguedâ âdara amidilymo wâgâ. Azagâ uguondo xina niduake awyarâ idârin-em xinaem agueze. Paulo, Barnabé warâ agâ ise idâlymo. Xina ipemugu lâpylâ asaemo Paulo, Barnabé warâ, xina ara Jesus einwânni lâpylâ awlymogue.

<sup>26</sup> Âdyoze tâkeze ani asaemo, Pymâ Jesus Cristo xunârybyry egatuze idâdaymo.

<sup>27</sup> Awlylgue Judas, Silas warâ xina ingonodyly, xina âtunâguedobyry wâgâ âyanmo aguehomoem. Koendâ kehoem âyanmo egatuzemo xirâ pape wâgâ iweniby modo.

<sup>28</sup> “Deus Ispiritury aguehobyry, xina aguehobyry warâ amânhedysemo xina ato. Tonhonre kehoem inkâba ise xirâ modo amânhetomoem; âdylâ tuonugueim âenwyenmo manâdilymo ara kulâ ise.

<sup>29</sup> ‘Onrogue, segue warâ xygatyby modoram ânguylâ nhunru xuduypy kâdâtaundâ. Ânguydo imeom idu odano modo, âtâ inatano modo warâ mântomoem tâwâlâ wao iunu napâdâ; munru kâzenywâdaundâ warâ. Uguondo tywydy lelâ nynanâdâ; pekodo tusoram lelâ nâdynanâo warâ. Xirâ kulâ xina âyanmo agueho. Tuomare ise âmaemo, xina agueho ara amituomo. Koendâ lelâ itaugâ. Xirâ xina âyanmo inwenily. Alâ kulâ.”

Warâ myani Jesus einwânni modo inwenily judeu keba modoram.

<sup>30</sup> Silas, Judas warâ pape Antioquiarum sase tâjigonohonzemo myani. Myarâ saintybyem myani Jesus einwânni modo indâtyguylymo, pape tiunduhomoem.

<sup>31</sup> Pymâ tonlo modo ago kehoem myani pape intainlymo indatomoem. Tindatuo myani iomazelymo mârâ pape iweniby wâgâ.

<sup>32</sup> Jesus wâgâ agueim myani akaemo, Judas, Silas warâ. Jesus wâgâ agueduomo, tohonwanze myani tonlo modo. Tuomaremo lelâ myani Jesus tyeinwânsezedilymogue.

<sup>33</sup> Iweâpa myani akaemo azagâ târâ awlyly. Todopâdomoem, ohondaymo myani tonlo modo eyanmo aguely:

– Mydâdaymo nhesemo Deus – kelymo.

Aituo myani Judas, Silas warâ odopâdilymo tugonobyry modoram.

<sup>34</sup> [Silas tâxiândyze wâne myani târâ.]\*

<sup>35</sup> Antioquiadâ myani Paulo, Barnabé warâ iweâpa idilymo. Pymâ Jesus wâgâ myani, Jesus wâgâ enomedâni modo agâ lâpylâ, unâ nhegatulymo.

*Paulo, Barnabé agâ âseagonguehomobyry*

<sup>36</sup> Târâ iweâpa itybyem myani Paulo, Barnabéram aguely:

– Âtâ anary kytâhobyry modoram kydodopâne, Pymâ Jesus einwânni modo iomazeânze. Tâinwânselâ awlylymo kâuntudyze urâ, ize ato ara aidilymo awlyly warâ – kely myani.

<sup>37</sup> – Inoro. João Marcos kagâ idâze lâpylâ – kely myani Barnabé.

<sup>38</sup> Paulo olâ myani João Marcos tagâmo idâdyseba.

– Kagâ nâtâbane awâkâ nidâ – kewânmy Paulo.

Wanroem kuru unâ Jesus wâgâ egatuze idâdaymo, João Marcos eagâmo tâtâze myani. Idâhomo xypyryam kehoem nipyra olâ myani. Panfilia eynynâ ataymo myani João Marcosram âjionlymo. Awlylgue myani Paulo tagâmo idâdyseba awlyly.

<sup>39</sup> Barnabé myani mâkâ salokuzenomo tagâmo idâdyse. Toenzepa myani mâkâ wâgâ Paulo agâ aguely. Tonhonre kehoem myani âseudylymo; nâseinwâmbyramo olâ myani. Awlylgue myani âseagonguelymo. Barnabé, João Marcos tagâ tase myani. Ilha Chipream myani idâlymo.

<sup>40</sup> Silas myani Paulo induakely tagonroem. Âxiguelymo iraynâ, Antioquiadâ Jesus einwânni modo adâkezemo myani Deus agâ xurâmoem:

– Âunâry egatuze asaemo idâly, Pymâ. Eagâmolâ ikâ, xuahuzemo – kelymo myani.

<sup>41</sup> Aguepygeduomo myani Paulo, Silas warâ idâly. Sírîa einkâ, Cilícia einkâ warâ myani sakadylymo. Tâinkâ lelâba myani Jesus einwânni modo nhomazeândilymo.

## 16

*Paulo, Silas warâ agâ Timóteo idâhobyry*

<sup>1</sup> Paulo, Silas warâ idâondilymo myani Derberam, Listraram warâ. Tâlâ myani salokuzenomo Timóteo keho Listradâ. Jesus einwânni myani mâkâ. Judeu myani mâkâ ise, Jesus einwânni lâpylâ. Gregu olâ myani nhunwym.

<sup>2</sup> Listradâ, Iconiodâ warâ Jesus einwânni, koendonroem Timóteo awlyly wâgâ adâkezemo myani.

<sup>3</sup> Paulo myani Timóteo tagâ tiandyse. Tutuze olâ myani, tâtâhodâ toenzepa judeu domodope awlyly judeu keba modo duay. Tutuze myani akaemo, Timóteo iamudoem atay,

\* 15:34 Idânârâ livru saguho modo wâgâ iwenibyemba xirâ.

judeu domodo satâho ara tatâzeba awyly, nhunwym gregu awylygue. Aituo myani tiandyly iraynâ, Paulo judeu satâho ara nhataen-honly, judeu domodo newiâpabyra itoem.

<sup>4</sup> Ilâpygueduo myani Paulo, Silas warâ Listradâba âxiguelymo. Timóteo tasemo myani tagâ. Tâinkâ lelâba âta anakâ takadaylâ myani, Jesus einwânni modo indâtyguylumo tiunrutomoem:

– Jerusalémdâ, Jesus tunâry egaturin-em induakeyby modo, pymâ domodo warâ pape inwenibymo agueho ara lelâ aitaungâ – kelymo myani.

<sup>5</sup> Paulo aguely tindatuo myani Jesus einwânni modo eon-honwanzezedylumo. Toenzepa myani kurâdo Jesus nheinwândylumo. Kopaelâgâembaba myani kurâdo Jesus nheinwânsezedily; toenzepa isezedylymo lakuru myani.

*Troadedâ Paulo enu oday uguondo Macedônia donro âtygadobyry*

<sup>6</sup> Deus Ispiritury Pauloram, eagonro modoram warâ aguely myani:

– Ásia yan-yam inkâba wao idâwâtaungâ Jesus xunâry egatuze – kely.

Awylygue myani Frigia einkâ, Galácia einkâ alelâ Jesus wâgâ agueze idâlymo.

<sup>7</sup> Mísia yan-yam iwaguepa tainsemo myani. Âta anary Bitínia kehoam idâze kelymo eme myani Deus Ispiritury eyanmo aguely:

– Myarâ mydâdysebamo aze – kely.

<sup>8</sup> Aituo myani Mísia einkâ lelâ sakadylymo, Trôade iduantaji taintomoem.

<sup>9</sup> Mârâ kopae myani Paulo enu âtygadyly. Uguondo Macedônia donro myani nhekyly XYDYK warâ.

– Âekâ Macedoniarom, Jesus xunâry xinaram egatuze – kehonly myani Paulo.

<sup>10</sup> Tânu âtygadobyry Paulo nhegatu duo ani inepa kehoem Macedoniarom tâtâhoem xina ohondyly. Deuslâ tonlo modoram Jesus wâgâ unâ iwâkuru agueze tugononi awyly, tutuze tawlylygue.

*Pekodo Lídia keho, Jesus nheinwântobyry*

<sup>11</sup> Troadedâpa xina egasely ani pepi imâsedo oday. Ilha Samotrâcia kehoam ani xina idâly. Kopaelâgâem ani xina saindyly Neápolis iduantaji.

<sup>12</sup> Târâpa xina idâly ani tuhuru wâgâ Filiposram. Toenzepa kurâdope ani mârâ anaym, Romadâpa saintyby modo. Macedônia eynynâ, tâgareim ani mârâ âta anary Filipos keho. Iweâpa ani xina târâ awyly.

<sup>13</sup> Tâzekobyzegueho oday ani xidadâ odaypa xina âxiguely. Paru emelaji ani xina idâly, judeu domodo Deus agâ agueze idâhoram. Pekodo modope ani târâ âtâdyguyhomodâ. Ekadybyem, pekodo modo agâ ani xina âtunâguedyly Jesus wâgâ.

<sup>14</sup> Pekodo Lídia kehobe myani iduaymo. Âta anary Tiatira anano myani mâkâ, âta tâwânseim, nawy emyenro modo vende ieni, Deus eynynonro lâpylâ olâ-ro warâ. Alâ mykâinane aguezesedyly eagâ. Paulo agueho koendâ nhutuhoem aiemâ Pymâ Jesus. Paulo aguely idanipryem, Jesus tâinwânse ani mâkâ.

<sup>15</sup> Awylygue ani ety odano modo agâlâ kehoem batiza âieholy, Jesus eynynonroem tawlylymo tienehon-homoem. Ilâpyryem ani Lídia xinaram aguely:

– Pymâ Jesus einwânnipryem wawyly tutuze âmaemo. Awylygue iety odaji âxidâdaungârâ – kely.

Tygâseduo ani etyram âxidâze xina idâly, târâ Filiposdâ tatay.

*Paulo, Silas warâ Filiposdâ etadâdomobyry*

<sup>16</sup> Filiposdâ tatay, Deus agâ agueze tâdâtâho idâwaym, âwynsaundo kadopâgue taseim tâense ani xina. Diabu eon-honrugue myani waunroem aini modo nhutuly. Âdy aini tutuze awylygue, toenzepa myani dinheru nhemakely. Uguondo modoram adanâhoybyem olâ myani mâkâ. Awylygue myani idânârâ dinheru nhemakeyby xurâempa awyly.

<sup>17</sup> Xina niampyguebyra nipyra olâ ani mâkâ âwynsaundo. Taenle kehoem ani mâkâ xina nhapyguedyly:

– Deus emary asaemo uguondo modo! Kaynonro Deus emary asaemo. Âdara Deus kâmakely awyly egatuim asaemo! – kely ani.

<sup>18</sup> Iweâpa ani arâ aguezeze awyly. Aituo ani Paulo iewiâpadyly, âwynsaundoam MYK idyly, mâkâ iodano kadopâram aguely warâ:

– Jesus Cristo eon-honrugue xirâ âyam auguely. “Awâkâ âwynsaundo odaypa ikâ. Idâ” uguely – kely.

Agueduo inepa kehoem mâkâ odaypa egasely.

<sup>19</sup> Mâkâ âwynsaundo âdy wayam waunroem aini modo nutuombyra awyly tiuntuo ani sodo modo, Paulo, Silas warâ agâ iewiâpadylymo. Aituo Paulo, Silas warâ nhawânehonlymo. Nhuxinehonlymo praçaram, pymâ domodo âtâdyguyhoam.

<sup>20</sup> Ilâpyryem ani pymâ Roma donro modoram nhaleholymo. Warâ ani eyanmo aguelymo:

– Judeu asaemo azagá. Káty anary inakanhe ienehonze kely asaemo.

<sup>21</sup> Kázewenry arapa kulá konomedádylymo. Roma donro kurá. Alá kulá inkába ákelo modo nheinwánkylly kyzeinwáne. Kázewenrylá kyzeinwáne – kelymo ani.

<sup>22</sup> Aguelymo tindatuo ani kurádo átádyguyby modo Paulo, Silas wará agá iewiápadlymo. Aituo ani pymá domodo, tonlo modoram aguelymo:

– Asaemo azagá etyguewádaungá, mampioguhomem – kelymo.

<sup>23</sup> Toenzepa kehoem ani adapioguoilymo. Sapioguybyem ani kadeia odaxi ázetadáolyo.  
– Koendáne asaemo enahungá, nâsemagueba itomoem – kewánmy pymá domodo etadádyby modo eniram.

<sup>24</sup> Aguehoymyem kadeia xypyryam kehoem nhadylymo. Târâ myani ihurumo nhakubyândylymo, se ihoguywádyby modo odaji, nâsemagueba itomoem.

<sup>25-26</sup> Paulo, Silas wará Deus agá aguelymo, igákymo wará myani. Kadeia odaxi etadádyby modo myani tydase. Kuetâji, akaemo azagá Deus agá agueday, igátuday wará myani toenzepa kehoem onro ázekânyly. Onro ázekâniduo, kadeia itádboryry tuhu tatuwáze myani; kadeia tázekânize lâpylá myani wará. Mârâ umelâ myani idânârá pyanta modo ázenahunguewádyly. Korenty metalgueto ekâjihomobryry adatáwádyly wará.

<sup>27</sup> Aituo myani etadádyby modo eni xuaguely, saudyly. Kadeia iwyantary idânârá kehoem tânahungueba awyly nhedyly myani. Idânârá kadeia odano modo áwientybyem waunlo ara myani enanaji. Awylygye myani tydahoru nhetyly tadyáhoem.

<sup>28</sup> Ádyáze kely ume olá myani Paulo toenzepa kehoem adaenkely:

– Tâdyázepa iká! Tarâlâ xina idânârá! Ánguy nâwientaymba! – kely.

<sup>29</sup> Paulo aguely tindatuo myani mâkâ etadádyby modo eni esagon-ho nhenetomoem nhekadyly. Esagon-ho sawâniptyryem myani tágase kehoem áwândyly. Paulo, Silas wará eydá atoram idály. Tyanugue tapâne kehoem myani enadomo ázeguhoam idyly.

<sup>30</sup> Ilâpyryem myani kadeia odayba nhetaguelymo. Eyanmo aguely myani:

– Ádaka ise awidyly, kâsemaguehoem, inakanhe awitobryry xygakehoem wará? – kely.

<sup>31</sup> Aituo myani in-hogulymo:

– Pymá Jesus lelâ einwánkâ, mâsemaguehoem. Ápemugudo Jesus nheinwândylymo-ro watay, ásemaguezemo lâpylá – kelymo.

<sup>32</sup> Etadádyby modo eniram, idânârá ety odano modoram wará Jesus xunâry tágatuzemo myani.

<sup>33</sup> Kuetâjilâ myani, mâkâ etadádyby modo eni, Paulo, Silas wará sapioguhomobryry áunkehobryry ingokely. Inepa kehoem myani, mâkâ, ipemugudo alelá batiza áieholymo, Jesus einwânniem awylymo xutuhoem.

<sup>34</sup> Ilâpyryem myani mâkâ uguondo Paulo, Silas wará nhadyly tâtyam, tuantomem. Toenzepa myani iomarumo, Deus tâinwânse tawlymogue, Jesus eynynonroem tawlymogue wará.

<sup>35</sup> Emetybyem myani pymá Roma donro modo, polícia ingonodylymo etadádyby modo eni agá agueze.

– Etaguegá akaemo azagá uguondo modo – keze ingonodylymo.

<sup>36</sup> Pymâdo itaumbryry tienmakeduo myani etadádyby modo eni idály Paulo, Silas wará agá agueze.

– Pymâdo itaguehoanguimo. “Tutuzebalâ idâwâtaungá” keanrymomy – kely myani.

<sup>37</sup> Tutuzeba kulá tâtagedyzeba olá myani Paulo. Awylygye myani policiaram aguely:

– Roma donro modo mâentomo ara xina etaungá. Judeu wâne xina, Romadâ tázake lâpylá olá xina. Pymá kuru Roma donro aguehobryry xina ádyká nakadaymba. Alá olá keankâ tâzenanaym xina adapioguoily. Xina inakanhe aitobryry wâgá aguepa kulá keankâ pymâdo xina kadeia odaxi nhetadânehonly. Iwerá pylâ xina etaguehonze kelymo, tutuzebalâ-ro. Arâ aguipyra kine! Akaemolâ nâedâ xará, tâzenanaym xina etagueze – kely.

<sup>38</sup> Inepa kehoem myani polícia domodo odopádyly Roma donro pymá modoram Paulo aguehobryry egatuze. Paulo, Silas wará Romadâ tázake awyly tiuntuduo myani toenzepa áseanedylymo.

<sup>39</sup> Inepa kehoem myani kadeiaram idálymo, Paulo, Silas warâram agueze:

– Toenzepa xina ájityendyly inagazenehon-homobryry wâgá. Áynynâmo xina inakanhe aitobryry enanânehonwádaungá – kelymo myani.

Adâkebygueduomo myani idânârá tâzenanaym kadeia odaypa Paulo, Silas wará nhadylymo kuohoram. Wará myani tientaguebygueduomo, aguelymo:

– Xina ety anaymba itaungâne – kelymo.

<sup>40</sup> Kadeia odaypa egaseybyem myani Paulo, Silas wará Lídía etyram idálymo. Târâ myani Jesus einwânni modo nhodylymo. Aituo myani eyanmo aguelymo:

– Jesus tâinwânselâ itaungá. Ize ato ara lelâ aitaungá wará – kelymo.

Iomazeânimobyryem, eon-hondânimobyryem warâ myani Filiposdâba idâlymo.

## 17

*Paulo, Silas warâ Tessalonicaram idâhomobyry*

<sup>1</sup> Filiposdâba egaseybyem myani Paulo, Silas warâ Anfipolis einkâ, Apolônia einkâ warâ sakadylymo. Ilâpyryem myani âtâ anary Tessalônica kehoam saindylymo. Judeu domodo Deus agâ agueze âtâdyguyhobe myani mârâ âtâ anaym.

<sup>2</sup> Adâito ara, tâzekobyzegueho oday myani Paulo myarâ idâly. Azagâ tokalâ warâ tâzekobyzegueho ara myani Deus itaumbry iweniby wâgâ tonlo modo agâ xunâgu.

<sup>3</sup> Messias wâgâ saguhoem kuru Deus itaumbry egatuim modo inweniby wâgâ myani aguelymo.

– “Messias âsenagazeze, igueze warâ, ilâpyryem kurâem itonze olâ” kely myani inwenilymo. Merâ Jesus âyanmo augueho, Messiaslâ merâ, Deus Ingonotybylâ – kely myani Paulo.

<sup>4</sup> Arâ Paulo aguely tindatuo myani judeu domodo ewy Jesus nheinwândylymo. Paulo, Silas warâ eagâ idylymo lelâ. Gregu domodo ewy Deus einwânnipe myani mârâ âtâ anaym, judeu domodo nheinwânto ara. Toenzepa akaemo ewy Jesus tâinwânsemomyani Paulo, Silas warâ aguehobyry wâgâ. Pekodo tynrenseim toenzepa tutuzeim modo Jesus tâinwânsemomyani. Jesus einwânniem itaymby modo, Paulo, Silas warâ agâ on-hoam itaunmâmomy.

<sup>5</sup> Toenzepa typemugudo modo ewy Jesus tyeinwântoem, tâzewenrymo imolyo tientuo myani judeu domodo Jesus einwântânry, Paulo, Silas warâ agâ iewiâpadylymo. Aituo inakanhe aitaynrim modo ewy agâ âtâdyguylymo. Paulo, Silas warâ wâgâ inakanhe kulâ aguelymo myani. Aituo myani akaemo inakai modo tâwanunenry modo iewiâpadylymo, adaenkelymo adaguly. Inepa kehoem Jasão etyram idâlymo Paulo, eagonro modo warâ âxidâdobyryam. Tianwâdysemomyani, pymâ domodo enadoram tiantomoem, tienagazedoemoem warâ.

<sup>6</sup> Paulo domodo niompyramo olâ myani târâ. Tyewiâpaduomomyani Jesus einwânni modo, Jasão warâ tâtâdyzebalâ pymâ domodo enadoram nhadylymo. Adaenkelymo myani:

– Koendâpa akaemo Jesus wâgâ aguewâni modo. Idâhomobyrydâ, kurâ domodo tyewiâpanânehonze lelâ pymâ agâ. Iwerâem kulâ keankâ kâty anaxi saindylymo.

<sup>7</sup> Jasão ety odaymo keankâ. Kywymâry Roma donro ezewenry neinwântaymbamo keankâ. “Jesus kywymâry kuru, mâkâ Roma donro pymâ mâkeba” nyguemo – kelymo.

<sup>8</sup> Awârâ aguelymo myani Tessalônica donro modo, pymâ domodo warâ nehoguebyramo. Toenzepa kehoem myani iewiâpadylymo.

<sup>9</sup> Aituo myani pymâ domodo Jasãooram, Jesus einwânni modoram warâ aguelymo:

– Xinaram dinheru âunduwâtaungâ. Akaemo Jesus wâgâ aguewâni modo âdy tarâ inakanhe nienehombamo-ro watay, âyanmo xuduonse lelâ xina – kelymo.

Agueduomomyani Jasão, eataen-ho modo warâ dinheru eyanmo nhudulymo, tumohomoem.

*Paulo, Silas, eagonro modo warâ Bereiarum idâhomobyry*

<sup>10</sup> Iguantuo myani Tessalonicadâ Jesus einwânni modo, Paulo, Silas, eataen-ho modo warâ Bereiarum ingonodylymo. Myarâ saintybyem myani, judeu domodo âtâdyguyho âtâ odaji idâlymo.

<sup>11</sup> Târâ myani tonlo modo Pauloram âzenomedâolyo Jesus wâgâ. Tessalônica donro modo emyenro keba myani tonlo modo. Toenzepa myani Paulo tiengatadyze ato tindadyse awylymo. Kopaelâgâembaba myani Deus itaumbry iweniby wâgâ âsenomedâdylymo, âkealâ kuru Paulo aguely awyly tiuntuomoem.

<sup>12</sup> Agui judeu domodo ewy, gregu uguondo modo ewy, pekodo tynrenseim toenzepa tutuzeim modo ewy warâ Jesus tâinwânsemomyani târâ.

<sup>13</sup> Judeu Tessalônica donro modo, “Bereiadâ Paulo, Jesus wâgâ aguely” kely tindatuomomyani idâlymo myarâ, Jesus wâgâ aguely izepa tawlymogue. Awlygyue myani nhunâguedylymo, tonlo modo Jesus xunâry egatuwâni modo agâ iewiâpadomoem.

<sup>14</sup> Jesus einwântânry modo iewiâpaduo myani, tonlo Jesus einwânni modo Paulo paru emelaji nhadylymo, âwientoem. Silas, Timóteo warâ Paulo agâ nâtâbamo myani. Târâ Bereiadâlâ myani âxiânlymo.

<sup>15</sup> Paulo âwientoem sanipyry modo eagâlâ myani Atenasram idâlymo. Bereiarum odopâdylymo iraynâ myani, Paulo eyanmo aguely:

– Silas, Timóteo warâ xarâ inepa âetomoem-ne aguewâtaungâ, inepa xarâ Atenasram yagâ oxioze âetomoem – kely.

Ilâpygueduo myani Beréia donro modo odopâdyly lelâ tâty anaxi.

*Atenasdâ Paulo Jesus wâgâ aguehobyry*

<sup>16</sup> Silas, Timóteo warâ inwânwânse Atenasdâ tatay, Paulo toenzepa xygatyby modo nhyrenkylimo, nhetygueguylymo tâense myani. Deus ara kehoem nhyrenkylimo. Toenzepa myani xygatyby modo, toenzepa lelâlâ âji sahuimbelâ kehoem myani. Tientuo, toenzepa myani Paulo âjityendyly.

<sup>17</sup> Kopaelâgâembaba myani Jesus xunâry nhagatuzezedyly. Âtâ tâdâtâdyguyho oday myani Jesus wâgâ judeu domodoram, judeu keba modoram alêlâ aguezesedyly. Judeu domodo iDeusrylâ myani akaemo judeu keba modo nhyrenkylimo lâpylâ. Kopaelâgâembaba lâpylâ myani praçaram idâly, Jesus wâgâ aguezeseze myarâ adakobâze idâwâni modoram.

<sup>18</sup> Agui myani kurâdo tonomeguneim modo mârâ âtâ anaym, imâem âsenomedâdaymby modo warâ. Akaemo tonomeguneim modo ewylâ myani “epicureus” keho modo, “estóicos” keho modo warâ. Aunlolâ myani akaemo ewy Paulo agâ Jesus wâgâ xunâgumo.

– Jesus tâigueze lelâlâ myani, iwerâ olâ kurâem itondybyem – tâkeze myani Paulo eyanmo.

Arâ Paulo aguely tindatuo myani akaemo ewy aguely:

– Ânguydo kulâ awâkâ Jesus wâgâ aguenri. Iozepa kulâ, nutuba kulâ warâ awâkâ aguely – kelymo.

Tâlâ pylâ olâ,

– Kewâdyly kulâ mâkeba. Âkelo âtâ anano modo iDeusry wâgâ awâkâ aguely, kiuntudânry modo wâgâ – keim modo.

<sup>19</sup> Aituo myani akaemo tonomeguneim modo Paulo nhadylymo myarâ iwelo modogue tâdâsenomedâdoam, Areópago kehoram. Târâ myani nhapâiguelymo:

– Iwelo mâengatuly tiuntudyze xina.

<sup>20</sup> Âdykâ awârâ amygueho xina nidataymba. Tiuntudyze olâ xina âdy awyly. Koendâ wao xinaram egatugâ – kelymo myani.

<sup>21</sup> Idânârâ myani kurâdo Atenas donro modo unâ iwelo idadyly izetonroem awyly. Târâ enamadyby modo, âkelo âtâ ananobyry modo alêlâ myani unâ izetonroem awylymo.

<sup>22</sup> Aituo myani enanaynmolâ Paulo saudyly, Areopagodâ adâkehoem:

– Nhaum, Atenas donro modo, ydataungâ. Toenzepa kuru tâzekudo tuhu xygatyby, se xygatyby warâ mâynrendylymo tarâ Atenasdâ. Awâkâ Deus myguewâtomo mâinwânkylymo awyly, tutuze urâ.

<sup>23</sup> Âtâ anakâ kadakobâday, toenzepa kurâ ekudo xygatyby modo, âtâ ekudo modo, ânguydo imeom ekudo warâ sedâ. Awâkâ modo mâen-hoguedomo ejidydâ sedâ lâpylâ olâ “Deus tutuzenry xyrento xirâ” kely iwenibybeom âji. Deus mâuntudânrymolâ iwâgâ augueho.

<sup>24</sup> – Tytanrugue kulâ myani Deus onro, kau, paru warâ nhugudyly, idânârâ onwogonro, kau wogonro, paikano, âdydo imeom, ânguydo imeom, kurâ domodo warâ. Idânârâ tiungutyby sodo, xuturim warâ mâkâ. Kintâdyby oday kulâ tâjikeim mâkeba mâkâ.

<sup>25</sup> Tâmawyadâzeim mâkeba mâkâ, mâkâlâ aieni awylygue. Mâkâlâ kyigüeânheondânry. Mâkâ peba-ro watay, kydâepaiguewâbyra tâise kurâ. Awâkâlâ olâ tâlâ kydato modo xudunri.

<sup>26</sup> Saguho uguondo xygamâ. Mâkâ uguondo iepadybylâ awâkâ kurâ domodo onro anakonro. Deuslâ myakâwândy tâinkâ lelâba ejitânimo. Waunro kuru uguondo tyngadyly iraynâlâ myakâwândy Deus aguely âdykâ ejidydo awyly wâgâ. Aguewândymy âdara onro anaym awylymo wâgâ, âdara agui idylymo, âdara aguiâ idylymo wâgâ, âdara lelâ tynrenseim modo wâgâ, âdara lelâ tynrensenry modo wâgâ warâ.

<sup>27</sup> – Koendâ iwâgâ kiuntuhoem, kieinwântoem warâ myani idânârâ kugudyly. Iwaguepalâ awâkâ Deus, kagâ awyly. Kurâdo tuiotodâlâ awâkâ.

<sup>28</sup> Saguhoem aguehonwânmy: “Awâkâ Deus kâendylygue olâ tâlâ kydawwily. Mâkâlâ kydadakobâdoem kon-honru xuduim” kewânmy uguondo gregu. “Deus imeom kurâ idânârâ” kewânmy saguhoem uguondo modo tonomeguneimbyry modo ewy. Aguehobyry tutuzelâ âmaemo.

<sup>29</sup> Kurâma Deus imeombyry. Kurâma ourugue xygatyby keba, pratague xygatyby keba, tuhugue xygatyby keba warâ. Awylygue tâzekudo xygatybyam “Deus merâ” kykeba kydawwily.

<sup>30</sup> – Kaudyly ume myakâwândy saguhobyry modo koendâ Deus wâgâ nutubamo. Awylygue myakâwândy Deusram toenzepa nâzenagazeoba awylymo. Iwerâ olâ idânârâam Deus aguenrippyrem: “Âjityendaungâ inakanhe amitomboery wâgâ, amitomboery mitomoem” keimpyryem.

<sup>31</sup> Xutuimbyrenlâ Deus âdara tynnonro modo, tynynâbaom modo warâ âikâam, âikâam tientoem. Uguondo Deus induakeyby koendâ tutuze ânguy âji tâdâsenagazedoam idâim, ânguy eagâ ini lelâlâ warâ. Tâigueze lelâlâ myani, Deus olâ kurâem tyetonze. Awârâ

adientuo, Deus tânehonze myani Jesuslâ kâmakerin-em tinduakeyby awyly – kely myani Paulo.

<sup>32</sup> “Jesus kurâem tyetonze myani, igueypyem lelâlâ awyly ume” Paulo kely tindatuo, tâlâ myani âwankuem ieni modo. Tâlâ pylâ olâ myani,

– Âdaralâne awârâ xinaram egatuongâ. Jesus wâgâ imâem tiuntudyze xina – keim modo.

<sup>33</sup> Adâkebygueduo myani Paulo egasely Areópogodâba.

<sup>34</sup> Tonlo modo ewy Jesus tâinwânsemo myani, Paulo aguely tindatuo. Uguondo Dionísio myani Jesus einwânni modo ewy; tonomegueim kehoem myani mâkâ; târâ Areopagodâ xuturim ewy myani mâkâ. Pekodo Damáris Jesus tâinwânse lâpylâ myani.

## 18

### *Corintodâ Paulo Jesus wâgâ aguehobyry*

<sup>1</sup> Ilâpygueduo myani Paulo, Atenasdâba idâly Corintoram.

<sup>2</sup> Târâ myani uguondo judeu Áquila nhodyly, Ponto eynynâ enamadyby. Priscila myani iwidy ezedy. Iweâpa kuba myani Itáliadâba saindylymo, âtâ anary Roma dompyryem. Pymâ kuru Cláudio, “Idânârâ judeu taunlo modo nâxiguemo” keduo myani Romadâpa âxiguelymo.

<sup>3</sup> Tâjitubygue âtâ xygani myani mâkâ, Paulo emyenro lâpylâ. Târâ tatay, Áquila etydâlâ myani Paulo âxidâdily, eagâ tâsewanihoem.

<sup>4</sup> Aunlolâ myani tâzekobyzegueho oday Paulo idâly judeu domodo Deus agâ agueze âtâdyguyho odaji. Jesus wâgâ myani târâ aguely, judeu domodo agâ, gregu judeu domodo ezewenry modo agâ warâ. Jesus nheinwântomoem wâne myani aguely.

<sup>5</sup> Silas, Timóteo warâ Macedoniadâpa saindyly inwânwânselâ myani Paulo Corintodâ awyly. Saintuomo myani, Paulo tâjitubygue âtâ xygadily inmoly, Jesus wâgâ unâ tiengatuhoem. Jesuslâ Messias, Deus Ingonotyby awyly nheinwântomoem judeu domodoram adâkezemo lâwâne myani.

<sup>6</sup> Paulo aguely tindatuo, eagâ tyewiâpazemo myani. Eagâ tâsezemo, tywykezemo warâ myani. Aituo myani Pauloram ododokeolymo. Tiondokedaymo, enanaynmolâ myani tâty tywogonro nhurounukely, Deus izepa ato ara kulâ aitomobyry tienehon-hoem. Aituo eyanmo aguely:

– Jesus mâinwâmpyra âmaemo watay, âigueduomo, Deus eydâ atoram mydâwâpyra ise âmaemo. Mâsenagazedilymogue tâwentâzeba ise urâ-ro warâ. Âyanmo unâ Jesus wâgâ segatuaguilâma. Iwâgâ mâuntudyzeba mawylymogue, iwerâ judeu keba modo ise kâenkily kuru. Jesus wâgâ unâ iwâkuru ise eyanmo kâengatuly – kely myani.

<sup>7</sup> Agueypyem myani mârâ âtâ odayba egasely. Tício Justo etyram myani idâly. Tâdâtâdyguyho eynynâlâ myani mâkâ ety. Judeu keba myani mâkâ, Deus tâinwânse olâ myani. Etydâlâ myani âtâdyguyby modoram Paulo Jesus wâgâ aguely.

<sup>8</sup> Târâ Paulo aguely tindatuo myani tâdâtâdyguyho iwymâry Crispo Jesus nheinwândily, idânârâ ety odano modo lâpylâ warâ. Toenzepa mârâ âtâ anary Corinto donro modo Jesus tâinwânsemo myani, Paulo Jesus wâgâ aguely tindatuomo. Awylygue myani batiza âieholymo, Jesus einwânnyryem tawyly tienehon-hoem.

<sup>9</sup> Paulo eâenkyem Jesus âepanâgüewânmy eyam.

– Tyanepa ikâ, Paulo. Unâry mâengatuba tâiseba ikâ. Aguekâ lelâ. MYK tâiseba ikâ.

<sup>10</sup> Agâlâ urâ, nhetalâ, ânguy âda âepyra itoem. Xirâ âtâ anaym agui kurâdo yeinwânse, amyguely tindatuo – kely myani.

<sup>11</sup> Iweâpa nekâ myani Paulo târâ Corintodâ awyly, tokalâ anu, tuotagueze awârâem Jesus wâgâ unâ egatuze tonlo modoram. Koendâ kehoem myani Jesus wâgâ tonlo modo nhenomedâdily.

<sup>12</sup> Tokalâ anu, tuotagueze sakabygueduo toenzepa judeu domodo eagâ tyewiâpazemo myani. Tawâsemo myani, Gálio enadoram tasemo warâ, tienwentâguedomoem. Acaia eynynonro modo iwymâry iwelo Romadâpa igonotyby myani mâkâ Gálio.

<sup>13</sup> Warâ myani judeu domodo eyam aguely:

– Kâzewenke inkâba merâ uguondo kurâdo Deus yan-yam iese kely – kelymo.

<sup>14</sup> Paulo agueze kely umelâ myani Gálio, judeu domodoram aguely:

– Ydataungâ, Nham. Kâenagazedaymba ise urâ merâ uguondo. Roma donro pymâ xunâry nhakaduoma tâise urâ tânagazeze. Inakanhe aitybyem warâ watay tâise kâenagazedily, amyguehomo ara.

<sup>15</sup> Mâindadyseba matomo aguelygue kulâ olâ mâenwentâdilymo, inakanhe aitobyry wâgâba. “Messiaslâ awâkâ Jesus” kelygue kulâ olâ mâenwentâdilymo, inakanhe aitobyry wâgâba. Izewenrymolâ awârâ âdaituoba kulâ tâzewentâdily, Roma donro pymâ agueho

mâkeba. Izewenkemoba kulâ aguely, inanjimo-ro watay, âmaemolâ enagazedaungâ. Awârâ kâindatondyzeba aze! – kely myani Gálio.

<sup>16</sup> – Tarâ tâdâsewendâdodâpa itaungâ inepa kehoem – kely myani.

<sup>17</sup> Târâpa tâgaselymo ume, âtâ judeu domodo âtâdyguyho iwymâry Sóstenes tawâsemo myani. Pymâ Gálio enanaynlâ myani nhapiogulymo. Awârâgue kulâ nâtynanâbyra olâ myani Gálio.

*Paulo Antioquiarum odopâdobyry*

<sup>18</sup> Iweâpa myani Paulo Corintodâ awyly, Jesus einwânni modo agâ. Târâ tatay, Deusram “Âdylâ âmâem aiese urâ” kewânmy. Ilâpygueduo myani âsedaenguly tâxiguehoem. Tuhuru wâgâ myani Cencreiarum idâly. Áquila, iwydylâ Priscila warâ myani eagâ idâim. Cencreia iduantaji tainsemo myani. Mârâ tuantayba tâtâly iraynâ, Paulo tyangahudu tatâen-honze myani, judeu domodo ezewenry aralâ, Deusram adâkehobyry aralâ adâituo. Paru oze myani idâlymo, Cencreiadâpa.

<sup>19</sup> Efesoram saintybyem myani Áquila, iwydylâ warâ âxiânlymo. Târâpa tâxiguely iraynâ, Paulo idâwânmy judeu domodo âtâdyguyhoam. Myarâ egawântybyem myani tonlo modo agâ Jesus wâgâ xunâgu.

<sup>20</sup> Aituo myani akaemo Pauloram aguely:

– Xina agâlâ wao ikâ – kelymo.

– Nudupa gâlâ enra udâly awylygue – kewânmy Paulo.

<sup>21</sup> Tâtâly ume myani aguely:

– Odopâze urâ, Deus ize atay – kely.

Aituo myani Paulo pepi imâsedo odaji âxiedyly. Efesodâpa idâly.

<sup>22</sup> Cesareianra saintybyem, inepa kehoem Jerusalemmram idâly. Târâ âdiempa kulâ myani Jesus einwânni modo agâ awyly. Inepa kehoem myani Antioquiarum idâly, Síria yan-yam.

*Apolo Jesus xunâry nhegatuhoobyry Efesodâ, Corintodâ warâ*

<sup>23</sup> Iweâpa nipyralâ myani târâpa âxiguely lâpylâ. Tuhuru wâgâ myani idâondyly Jesus einwânni modoram, Galácia yan-yam, Frigia yan-yam warâ, Jesus xunârygue tonlo modo enomedâze, iomazeânzemo warâ, Pymâ Jesus ago kuru nheinwântomoem.

<sup>24</sup> Paulo Galácia yan-yam, Frigia yan-yam warâ idâpygueduo myani judeu Apolo keho idâly Efesoram. Âtâ anary Alexandria donro myani mâkâ. Kurâdo agâ tâdâtunâguedyly koendâ kehoem myani nhutuly. Koendâ kehoem lâpylâ myani nhutuly, Deus itaumbryry egatuwânibyry modo inwenibyry.

<sup>25</sup> Tuomare kehoem myani aguely kurâdoram Jesus wâgâ. Ioze lelâ myani nhenomedâdylymo. Mâkâ lelâlâ koendâ kuru Jesus wâgâ nutubalâ myani. João Batista aguehobyry lelâ myani nhutuly: “Âjityendaungâ inakanhe amitomobyry wâgâ. Deus izepa ato aiedyly imowâdaungâ. Batiza âiehowâdaungâ, inakanhe amitomobyry imoimbyryem mawlymo mâenehon-homoem” kehoobyry lelâ nhutuly.

<sup>26</sup> Alâ olâ myani Efesoram saintybyem, judeu domodo âtâdyguyho oday tyanepa kehoem nhenomedâdylymo. Áquila, Priscila warâ Apolo aguely tydasemo myani. Aituo myani tâtyam nhadylymo, koendâ kuru Pymâ Jesus wâgâ tienomedâdomoem. Koendâ kehoem myani nhegatulymo, Jesus kieinwântuo lelâ Deus eydâ atoram kaintyly awyly wâgâ.

<sup>27</sup> Aituo myani Apolo, Acaia yan-yam tâtâdyze idyly, Jesus wâgâ agueze. Tiuntuduo myani Jesus einwânni modo Êfeso donro ingûizeândylymo, eon-honwanâdylymo warâ. Acaiadâ Jesus einwânni modoram inwenilymo:

– Apolo xirâ kata sani. Jesus einwânni merâ, xunâry egatuim warâ. Koendâne Apolo edaenkuwâdaungâ – kely igatarymo.

Myarâ saintybyem Apolo, mâkâ Jesus einwânni modo tonomedâze myani Deus eagâmo koendâ atobyry wâgâ.

<sup>28</sup> Tâzenanaynlâ myani Jesus wâgâ aguely judeu domodoram.

– Messias mâkeba Jesus, Deus Ingonotyby mâkeba – tâkezemo myani judeu domodo.

Apolo olâ myani saguhoem Deus itaumbryry egatuwânibyry modo Messias wâgâ inwenibyry tytainze. Awylygue myani aguely:

– Idataungâ. “Warâ ise Messias aieholly” kewânmy Deus. Jesus agâ aityby modo, Deus aguehobyry ara kehoem aidyly. Awylygue Jesuslâ Messias awyly, Deus Ingonotyby – kely.

Koendâ lelâlâ myani aguely. Aituo pylâ myani judeu domodo âdakepa awyly-ro warâ.



<sup>1</sup> Apolo, Corintodâ awyly ume myani Paulo Efesoram idâly; vale de Cayster einkâ myani idâly. Efesoram saintybyem myani Jesus eynnonro modo agâ oxiodyly.

<sup>2</sup> Aituo myani nhapâiguelymo:

– Jesus mâinwântuomo Deus Ispiritury âyanmo nâedâ? – kely.

– Ângyuka awâkâ Deus Ispiritury amygueho? Awâkâ wâgâ ânguy aguely xina nidataymba – kelymo.

<sup>3</sup> Aituo myani Paulo aguely:

– Âdaituo pylâka keankâ batiza mâieholymo? – kely.

Aituo myani in-hogulymo:

– Xina batiza âieholy, inakanhe adâitobyry wâgâ tâjityenze tawyly tienehon-hoem, João Batista aguehobyry ara – kelymo.

<sup>4</sup> Aituo myani Paulo aguely:

– En-hem, inakanhe adâitobyry wâgâ âjityeni modo, Deus izepa ato aiedyly imoimbyry modo warâ myani João batiza nhekyly. Adâkeze lâpylâ myani judeu domodoram: “Urâ pygueduo âeni einwântaungâ kuru” tâkeze myani. Jesus einwândyly wâgâlâ myani mâkâ aguely – kely Paulo.

<sup>5</sup> Paulo aguely tindapygueduo, batiza âieholymo myani Pymâ Jesus tâinwânse tawylymo tienehon-homoem.

<sup>6</sup> Paulo nhangahumo onwa tâmary nhedyly myani. Aituo Deus Ispiritury nhonwamo âewyly. Tâjitanru âkelo Deus Ispiriturydâba âenigue âjitarynylymo. Deus itaumbryry nhegatalymo.

<sup>7</sup> Doze uguondo modo lelâ myani mârâ ume tonlo modo.

<sup>8</sup> Azagâ tokalâ warâ nunâ ara lelâ myani Paulo idâzeseze awyly judeu domodo âtâdyguyho odaji. Tyanepa myani Jesus wâgâ âtunâguedylymo. Pauloram adapâigueolylo, in-hogulylo warâ myani.

– Deus kywymâryem idyse kydatay, Jesus lelâ kyzeinwâne – kely Paulo.

<sup>9</sup> Tâlâ myani Paulo aguely idani modo ewy tâeganeim modo aguely tyeinwândysebaom modo warâ. “Jesus kieinwântuo lelâ Deus eydâ atoam kytâlly” Paulo kelygue myani idânârâ kurâ domodo enanaym Paulo nhunâguedylymo.

Aituo myani Paulo, eagonro modo Jesus eynnonro modo warâ târâpa idylymo. Târâ Jesus wâgâ Paulo nenomedâbyramo idyly. Idâly myani uguondo Tirano kurâdo nhenomedâdoram. Kopaelâgâembaba myani Paulo kurâdo âtâdyguyby modo agâ Jesus wâgâ aguely.

<sup>10</sup> Azagâ anos myani Paulo târâ Ásia eynynâ Pymâ Jesus wâgâ unâ egatuzeze awyly. Toenzepa myani judeu domodo, judeu keba modo warâ idaseze awylymo.

*Uguondo Ceva imeombyry kadopâ nhânkyze kewâtomobyry*

<sup>11</sup> Deus eon-honrugue myani Paulo ânguy anhetâny modo kehoem anhedily.

<sup>12</sup> Tâwânuneim modo, kadopâbeom modo warâ Paulo tukobizehobyry nhyguyho atay, ety iwogonro ewano atay warâ MÂ' nhedylymo watay, kua tâiehozemo myani Deus eon-honrugue.

<sup>13</sup> Judeu domodo ewy kadopâ nhânkyrim modope lâpylâ myani. Myarâ, myarâ warâ myani kadopâ nhânkyze adakobâdylymo. Pymâ Jesus neinwâmpyra tawylymo umelâ, Jesus eon-honrugue aise kelymo, Paulo aito ara. Warâ myani kadopâ modoram aguelymo:

– Jesus eon-honrugue igasehomoem auguely, mâkâ Paulo agueho eon-honrugue – kelymo.

<sup>14</sup> Ceva imeom myani akaemo sete uguondo modo arâ aini. Kurâdo eynynâ Deus agâ aguewâni modo iwymâry myani akaemo nhunwym. Alâ myani kadopâram aguelymo:

– Jesus eon-honrugue xina ogonodyly, Paulo agueho eon-honrugue – kelymo.

<sup>15</sup> Warâ olâ myani kadopâ aguely eyanmo:

– Jesus tutuze urâ. Ânguy Paulo awyly tutuze urâ. Âmaemo olâ âutubamo urâ – kely.

<sup>16</sup> Aituo mâkâ uguondo kadopâbeom nhonwamo adamely. Ton-honre kehoem nhapiogulylo. Etymo nhaunguewâdyly. Toenzepa kehoem âdyolylo. Awylygue tâunkeze, etymo sauguewâtybyem warâ kehoem mârâ âtâ odayba âwiendylymo.

<sup>17</sup> Idânârâ kehoem tonlo Éfeso donro modo nhutulymo Ceva imeom aietobyry. Judeu domodo, judeu keba modo warâ awârâ egary indadylymo. Aituo âseanedylymo. Pymâ Jesus toenzepa ton-honreim awyly wâgâ lelâ aguelymo.

<sup>18</sup> Toenzepa Jesus einwânni modo tâtâzemo myani tâdâtâdyguyhoam. Jesus eynnonroem tâidyly iraynâ inakanhe adâitobyry noempyramo myani. Tâzenanaynlâ myani âkadulylo.

<sup>19</sup> Toenzepa kuenwenwâni modo, âmeodo modo warâ Jesus eynnonroem tâisemo myani. Jesus tyeinwântuo myani tywapery modo nhenewylymo, kurâ domodo kua tientomoem,

tiengamehomoem warâ tâsenomedâdobyry. Tâzenanaynlâ myani mârâ pape nhaduândylymo, kuenwenriempa, âmedoempa warâ itybyem tawly tienehon-homoem. Tâwânseim mârâ pape; nhapâgueduomo, cinquenta mil moeda pratagueto tâise tyaduânseba watay ebyry nhuduly.

<sup>20</sup> Arâ myani unâ Jesus wâgâ toenzepa âji mododâ âzegatuoly. Deus eon-honrugue, toenzepa myani kurâ domodo Jesus nheinwândyly.

*Éfeso donro modo iewiâpadobyry*

<sup>21</sup> Ilâpygueduo myani Paulo tyangahu oday xunâzely:

– Macedônia einkâ, Acaia einkâ warâ ise yakadyly, Jesus einwânni modo tâense. Tonlopyryem ise Jerusalémram udâly. Ilema ise Romaram udâly-ro warâ – kely.

<sup>22</sup> Tâtâly iraynâ olâ Timóteo, Erasto warâ saguhoem kuru Macedoniarum ingonokyly. Jesus wâgâ enomedâni lâpylâ myani akaemo. Mâkâ kuru olâ myani iweâpa Ásia eynynâ awyly.

<sup>23</sup> “Jesus kieinwântuo lelâ, Deus eydâ atoram kytâly” Paulo keduo myani Éfeso donro modo iewiâpadylymo Jesus einwânni modo agâ. Tyewiâkygue, toenzepa myani âtâ anaym koendâpa nhenehonylmo. “Deus eydâ atoram kalehoim einwânni modo” kelygue myani Jesus einwânni modo nhezetâdylymo.

<sup>24</sup> Uguondo Demétrio kehobe myani târâ. Tydeusary Diana ety ekudo imeimbyry metalgueto xyganî myani mâkâ. Mârâ vende tientuo, toenzepa myani dinheru nhemakely, emawyadâni modo lâpylâ warâ.

<sup>25</sup> Aituo myani idânârâ tagâ tâwanuneim modo ingâsedyly, Diana ety ekudo imeimbyry metalgueto xygataynrîm modo lâpylâ warâ ingâsedyly. Eyanmo aguely:

– Ydataungâ, Nhaum. Toenzepa dinheru kienmakely deusa Diana ety ekudo imeimbyrygue.

<sup>26</sup> Ádadyly awyly tutuze âmaemo, Paulo Jesus wâgâ agueduo. Aguely tydaselâ âmaemo. “Deus kuru mâkeba awâkâ uguondo modo kulâ nhygatyby; tohoguezeim mâkeba tâise awârâ metalgueto, segueto warâ” tâkeze inanry Paulo. Taunlo modo ewy aguidoape aguely neinwândâ. Aituo deusa Diana einwândyly inmolylo. Xirâ âtâ anano modo lelâba keankâ kurâdo, Ásia eynynonro modo warâ, Paulo aguely idataynrîm modo. Kiyngatyby modo einwândyly inmolylo keankâ.

<sup>27</sup> Koendâpa ise enra awârâ kurâem. Alâ awârâ aisezedyly-ro watay, tâwanepa ise kydzaze. Dinheru kienmakeba ise. Tynrenseba ise awârâ âtâ, Diana ety. “Ekudyby modo xina nanâpyra ise” keze kurâdo. Taunlo modo aguely-ro watay, idânârâ Ásia eynynonro modo agueze lâpylâ. Awârâ lelâba-ro warâ, Deusa Diana kieinwânkylly ânguy ize inkâba ise, neinwântaymba ise warâ – kely myani Demétrio.

<sup>28</sup> Demétrio aguely tindatuo myani kurâdo iewiâpadaynly. Adaenkewâdylymo:

– Tynreim awâkâ deusa Diana kieinwânkylly! Idânârâ kurâ taunlo Éfeso donro modo tâinwânse kurâ! – kelymo.

<sup>29</sup> Idânârâ kehoem myani adaenkelymo ton-honre kehoem. Saenlumo tindatuo myani toenzepa kurâdo âtâdyguylymo mârâ âtâ anano modo ara. Âdakulâmo myani, saenlumo, okonodylymo warâ, inakanheho lelâlâ myani. Gaio, Aristarco warâ nhawâdylymo, Macedônia donro, Paulo agâ Efesoram âetyby modo. Mârâ âtâ imegâkeba kurâdo âtâdyguyhobyryam tuxize nhadylymo.

<sup>30</sup> Tagonrodo sawâtobyry tiuntuduo myani Paulo mâkâ lelâlâ tâgawândyse idyly, kurâdo agâ agueze. Jesus einwânni modo olâ myani warâ eyam aguelymo:

– Awyarâ tâtâzeba ikâ – kelymo.

<sup>31</sup> Pymâ Ásia eynynonro modo ewy Efesoam âetaymby modo, tataen-homo Pauloram tytaumbyry ingonodylymo myani:

– Awyarâ kurâdo tyewiâtuneim modo âtâdyguyhobyryam tâtâzeba ikâ – kelymo myani.

<sup>32</sup> Toenzepa myani kurâdo saenlunu, okonodylymo warâ. Âikâ, âikâ warâ taenluem aguelymo. Agui myani akaemo ewy âdaituo târâ âtâdyguybyem tawlyly xutudânry.

<sup>33</sup> Judeu tonlo modo ewy tyangahu oday aguelymo:

– Kânagazeze asaemo kurâdo, judeu kydawlylygue, Paulo ara – kelymo.

Aituo myani uguondo Alexandre kehoram aguelymo:

– Kurâdo agâ aguekâ. “Inakanhe xina anitaymba âmaemoem” kekâ eyanmo – kelymo.

Aituo myani Alexandre kurâdo âdakepa itoem tâmarygue aidyly, “Xina judeu domodo âda nitaymba âmaemoem” tâkehoem.

<sup>34</sup> Judeu mâkâ awyly tiuntuduo myani on-hoam lelâ adaenkelymo ton-honre kehoem:

– Tynreim awâkâ deusa Diana kieinwânkylly! Idânârâ kurâ taunlo Éfeso donro modo tâinwânse kurâ! – kelymo.

Azagâ horas myani arâ adaenkezeze awylymo.

<sup>35</sup> Aituo myani mârâ âtâ anary iwymâry emary, koendâ kehoem kurâdo MYK alelâ itomoem aguely. Aituo eyanmo aguely:

– Nhaum, ydataungâ! Idânârâ tutuze kurâ, tarâ kyjidadârydâ âtâ imâsedo, iwâkuru warâpe awyly, kiyrenkily kydeusary Diana kientyguedo. Anra lâpylâ mârâ tuhu kau odaypa ihugueyby, Diana ekudo emyenro. Âtâ, tuhu warâ eni kurâ.

<sup>36</sup> Idânârâ tâdtuoze kykewâdyly kulâ keba awyly. Awlylygue MYK alelâ itaungâ. Tadahulizeba itaungâ. Âdy koendâ kiuntuba kulâ aguienaymba kine.

<sup>37</sup> Asaemo azagâ uguondo modo xarâ menetaimo. Âdy nemagazedaymba asaemo deusa ety oday. Eyam inakanhe kulâ aguepamo gâlâ warâ.

<sup>38</sup> Demétrio, emawadâni modo warâ iwâgâ adâkehobe-ro watay, pymâ modoram agueze nâtâmo. Aitoem mawânkâ pymâ awârâgue tâwaneimpe awyly. Tâtâdyguyho saintuo lelâ âtâdyguylymo awyly tutuzelâ olâ âmaemo.

<sup>39</sup> – Eagonro unâ amyguedyse âmaemo-ro watay olâ, tâwâlâ kurâ domodo âtâdyguyhoam aguwâtaunda, pymâ kuru Roma donro aguehobyry aralâ.

<sup>40</sup> Tarâ aityby modo, Pymâ Roma donro nhutuly-ro watay, tienzepa tâise kagâ iewiâky. “Âdaituoka madahulilymo, aenlumo warâ? Âdaituoba kulâ tâzewentâdyly myguelymo! Auguehobyry keankâ mankaguylymo” keze. Âdara kin-hoguba ise kurâ – kely myani pymâ emary.

<sup>41</sup> Adâkebygueduo, âtâdyguywâdyby modo etyram ingonotaynly.

## 20

### *Macedoniadâ, Acaiadâ warâ Jesus wâgâ Paulo nhegatuhoary*

<sup>1</sup> Tyewiâtuneim modo tâtyram odopâbygueduo myani Paulo akaemo Jesus einwânni modo ingâsenehonly. Nhurudylymo myani Jesus lelâ nheinwântomoem, ize ato ara lelâ aitomoem warâ. Ilâpyryem, âsedaenguly, Macedônia yan-yam tâtâhoem.

<sup>2</sup> Jesus einwânni modope ato âtâ anakâ takazemo myani. Jesus tâinwânselâ itomoem, ize ato ara lelâ aitomoem warâ myani akaemo nhurudylymo. Aituo Acaiarum saindyly.

<sup>3</sup> Azagâ tokalâ warâ nunâ myani târâ awyly. Paru oze Siriaram idâze kely ume myani judeu tonlo modo aguelymo:

– Tainkâ sakaday ise kyânly – kelymo.

Arâ xunârymo awyly tiuntuduo myani Paulo odopâdyly tuhuru wâgâlâ Macedônia einkâ.

<sup>4</sup> Jesus einwânni modo ewy eagâ tâtâze myani: Sópatro, Pirro imery (Beréia donro), Aristarco, Segundos warâ (Tessalônica donro), Gaio (Derbe donro), Timóteo (Listra donro), Tíquico, Trófimo warâ (Ásia eynynonro). Warâ myani Paulo nhapygueno Filiposram idâday.

<sup>5</sup> Urâ, Paulo warâ Filiposdâlâ ani xina, akaemo sete lelâ waunroem Troaderam xina inwânwânse idâday.

<sup>6</sup> Pão Ioliho Pebanro etyguenibryem ani xina Filiposdâba âxiguely. Cinco emedyly itybyem ani xina eagâmo oxiodyly Troadedâ. Tokalâ semana ani târâ xina awyly.

### *Jesus unâry Paulo nhegatuhoary Troadedâ*

<sup>7-8</sup> Kopae, tâzekobyzegueho oday ani xina âtâdyguyly tonlo Jesus einwânni modo agâ. Pão edawynze ani xina âtâdyguyly, Jesus iguehobyry tienanâguehoem. Paulo ani Jesus wâgâ xina enomedâni. Târâlâ nipyra ani mâkâ, kopaelâgâem idânri tawlylygue. Awlylygue ani kuetâjilâ aguely. Agui ani lamparina emanâdyby târâ xina âtâdyguyhodâ, âtâ sahomery kaynonro oday.

<sup>9</sup> Salokuzenomo Êutico janela wâgâ ani ekadybyem awyly. Paulo aguezesedyly idaselâ myani xuedunu âewyly, MYN alelâ myani xykily, janela wâgâpa ihuguely lelâ onro onwa. Ihuguehobyryram xina xytâguywâm. Xina saunâmâ wâne; ipa olâ ani mâkâ igueypyem.

<sup>10</sup> Aituo ani Paulo xytâguyly. Âguedy angataji eguetudyly, inwymogoyly, Deus eonhonrugue kurâem nhenehondyly. Warâ ani aguely:

– Tâseguâdâzeba itaungâ. Deus kurâem ietonze lelâ – kely xinaram.

<sup>11</sup> Ilâpyryem ani xina âkuondyly sala tâtâdyguyhobyry odaji. Aituo Paulo pão nhepajiwâdyly tonlo modo ara kehoem. Xina eagâ nhedawynly, Jesus turâem iguehobyry tienanâguehoem. Mârâpygueduo emedyly ara kehoem Paulo aguezesese awyly. Emetybyem ani idâly ânwa oze tuhuru wâgâ.

<sup>12</sup> Mâkâ salokuzenomo janela wâgâpa ihugueybyem igueypy, kurâem itondybyem ani etyram nhadylymo. Idânârâ ani iomamunumo, kurâem itondybyem awyly tientuo.

### *Trôade donropyryem Paulo Mileoram idâhobyry*

<sup>13</sup> Paulo tuhuru wâgâ idâday, paru oze ani xina Assosram idâly inwânwânse. Tâxiguely iraynâ “Assosdâ ise kydoxiodyly” keypyem ani tuhuru wâgâ Assosram idâly.

<sup>14</sup> Aguehobyry ara ani xina aidyly. Târâ ani xina nhodyly. Xina agâ idâly paru oze âtâ anary Mitilene kehoram.

<sup>15</sup> Târâpa xina âxiguebygueduo, kopaelâgâem ani xina sakadyly ilha Quios iwaguepa. Kopaelâgâem emedyly wâgâ ani Samosram xina saindyly. Tokalâ iguandyly sakabygueduo ani Mileto iduantaji xina saindyly.

<sup>16</sup> Xina nâtâombyra ani Efesoram, iweâpa tâidyseba ani Paulo Ásia eynynâ. Toenzepa ani sahulu Jerusalémram taintoem. Pentecostes etyry iraynâlâ ani târâ tawlyly ize awyly.

*Éfeso donro Jesus einwânni modo iwymâry agâ Paulo aguehobyry*

<sup>17</sup> Miletodâ tataylâ ani Paulo âjitaumbyguely Éfeso donro Jesus einwânni modo iwymâry modoram:

– Âetaungâ xarâ Miletoram. Inepa yagâ oxiodaungârâ – kely.

<sup>18</sup> Saintuomo ani Paulo aguely eyanno:

– Nhaum, tutuzelâ âmaemo idânârâ awitobyry. Ásia eynynâ yaintobyryenlâ ani,

<sup>19</sup> kopaelâgâembaba Pymâ Jesus wâgâ aguely. Agâmo watay, sawoem wityamba ani urâ; ywâgâ inkâba aguely. Âjidadârymo anano modo inakanhe aitobyry kâentuo, kohogüendâ. Judeu domodo inagazedâmo toenzepa kehoem.

<sup>20</sup> Jesus wâgâ âyanmo auguepa wipyra olâ wakynre. Kurâdo âtâdygyho âtâ oday inomedâdâmo idânârâ kurâdo enanaym. Itydâmolâ inomedâdâmo lâpylâ warâ.

<sup>21</sup> “Âjityendaungâ inakanhe amitomobyry wâgâ. Jesus zepa ato aiedyly imowâdaungâ. Deus aguely idatondaungâ. Pymâ Jesus einwântaungâ warâ” tâkezeze ani urâ judeu domodoram, judeu keba modoram alelâ.

<sup>22</sup> – Iweâma udâly Jerusalémram, Deus Ispiritury myarâ ugonotuo. Kâuntuba urâ, âdy târâ ani awyly.

<sup>23</sup> Âsenagazeniem wawyly lelâ kâuntuly. Ietadâzemo awyly, tutuze urâ. Mârâ anaxi, mârâ anaxi warâ udâly umelâ ani Deus awârâ kâuntuhoem aguely.

<sup>24</sup> Tyanepa olâ urâ-ro warâ. Yâze keduomo kadahuliwâbyra ise urâ. Pymâ Jesus ugononi, tywâgâ unâ koendonro egatuze. Wakeho xirâ unâ kâengatuly: “Deus koendonro lelâlâ. Tâwâlâ lelâlâ wâne aguehobyry sakanibyryem kydawly, Deus olâ kâmakeze, Jesus kieinwândylygue” keze ugonodâ. Iewanuem nhuduypylâ xirâ kâenwanikely – kely.

<sup>25</sup> Aituo ani Paulo eyanno agueondyly:

– Agâmo wawyly ume, segatu Deus kywymâryem awyly wâgâ. Xirâ kâengatuly âyanmo, Jesus mâinwântomoem. Idâze urâ. Tutuzelâ urâ, tarâ onro anaym ietombyra mawlymo.

<sup>26-27</sup> Itymo anakâ udâday, koendâ kehoem âurudâmo, âdara Deus itaumbyry awyly, Jesus einwânni modo tienmakehoem. Idânârâ Jesus wâgâ âyanmo augue. Koendâ kehoem segatu. Jesus einwântânry modo Satanâs eydâ atodâ âzenagazeoly-ro watay, urâ mâkeba ise enagazenehorim. Jesus wâgâ eyanno auguelâma tindadysebamo keankâ. Xirâ tutuzelâ âmaemo.

<sup>28</sup> Ârudylymolâ xirâ-ro warâ, âmaemo Jesus einwânni iwymâry modo. Deus ize ato ara lelâ aitaungâ. Jesus eynynonro modo tâenselâ itaungâ. Akaemo eniem Deus Ispiritury induakeyby âmaemo. Pastor tâguy kaneru koendâ nhedyly wâne myara Jesus einwânni modo etaungâ. Deus xurâ modo akaemo, inakanhe aitomobyry epywaze myani Jesus iguely.

<sup>29</sup> – Tutuze urâ, agâpamo widyly-ro watay, tumunrunem modo âduaximo âese awyly. Auwa tyewiâseim kaneru xyâze kely myara ise inokuzemo kelymo, Jesus mâinwâmpyra mitomoem.

<sup>30</sup> Iozepa kulâ ise Jesus wâgâ mâzenomedâolyo. Iozepa inomedâdomo kulâ ise mâinwândylyse atomo warâ.

<sup>31</sup> Inanaynmolâ itaungâ, mâzenokuoba mitomoem akaemoram. Enanâgüewâdaungâ; tâsenagazeze kehoem ani azagâ tokalâ warâ anos Jesus wâgâ inomedâzemo wawyly – kely.

<sup>32</sup> Aituo ani Paulo eyanno agueondyly:

– Koendâ Deus nhedylymo ize wato. Xunârybyry angahumo odaji itaungâ. Deus aguehobyry angahumo odaji mânhedylymo-ro watay, imâem xutuze âmaemo ize ato ara adâjidyly. “Idânârâ aguehobyry modo aienibyry modo agâ koendâ lelâ ise urâ” tâkeze Deus. Itaumbyry angahumo odaji mânhedylymo-ro watay, koendâ ise agâmo awyly, adâkehobyry ara.

<sup>33</sup> “Ydinheruru âunduwâtaungâ. Iety ywogonro âunduwâtaungâ. Tâlâ matomo yam âunduwâtaungâ” ugupepa wakynre ânguyram, târâ agâmo watay.

<sup>34</sup> Iemaryguelâ keankâ kâsewanily. Âtâ tâjitybygueto kâyngadyly. Vende kânhedyly, ebyrpyrygue pyni kanâtoem, âdy xina ize ato modo kanâtoem lâpylâ warâ, tutuzelâ âmaemo.

<sup>35</sup> “Âsewaniwâdaungâ, âpynirymo, itymo owogonromo, âdy ize matomo warâ mâentomoem. Âdy pebaom modo ipa ato âunduwâtaungâ” tâkezelâ ani urâ âyanmo. Pymâ Jesus unârybyry enanâguewâdaungâ: “Tuomera kurâ, âdylâ kyam xududuo. Kuomaru kuru olâ, âdylâ kiunduduo” kewânmy – kely Paulo.

<sup>36</sup> Agueypyem ani Paulo âzeguhoam idyly, Jesus einwânni modo iwymârydo agâ, Deus agâ adâkehomoem.

<sup>37-38</sup> Idânârâ ani itynrumo, “Ietondaymba ise âmaemo” Paulo kehobyry wâgâ. Toenzepa ani eogunrumo. Inwymogoynlumo, nhonugudylymo idylymo ani. Ilâpyryem ani xina agâ idâlymo tuantaji pepi imâsedoram.

## 21

### *Paulo Jerusalémram idâhobyry*

<sup>1</sup> Éfeso donro Jesus einwânni modo iwymârydo agâ âsedaengübyem ani pepi imâsedo odaji xina âxiedyly. Ilha Côs einkâ ani xina sakadyly. Kopaelâgâem Rodesram xina idâly-ro warâ. Âdiempa kulâ ani xina târâ Rodes iduantay epagudyly. Tonlopyryem, xina idâly lelâ ani âtâ anary Pátara kehoram.

<sup>2</sup> Mârâ iduantaji saintybyem, pepi imâsedo Feniciaram idânri xina nhodyly. Aituo ani mârâ oday xina idâly.

<sup>3</sup> Ilâpyryem ani sul eynynâ xina ilha Chipre nhakadyly. Ilha sakanibyryem Siriam ani xina idâly. Âtâ anary Tiro keho Síria eynynonroram xina saindyly ani. Târâlâ ani mârâ pepi imâsedo âdydo imeom nhapaguely. Awlylygue ani xina âzetaguely lâpylâ, pepi imâsedo sapaguely, sapadondyly warâ inwânwânse.

<sup>4</sup> Pepi odayba âxiegyebyem, tonlo modo Jesus einwânni xina nhuinly. Akaemo ewy xina tuiose ani. Tokalâ semana ani xina eagâmo awyly. Saguhoenlâ Deus Ispiritury eyanmo adâkeze myani Paulo âsenagazedly wâgâ Jerusalémâ. Aituo ani eyam aguelymo:

– Jerusalémram tâtâzeba ikâ – kelymo.

<sup>5</sup> Myarâ idârin-em tawlyly tutuzelâ olâ ani Paulo. Aituo xina idâly. Jesus einwânni modo tâtâze ani xina idâhoram. Uguondo modo, tywydy agâ, tymeom agâ warâ tuantaji tâtâzemo ani xina agâ. Târâ sagunu wâgâ idânârâ ani xina âzeguhoam idyly, Deus agâ adâkehoem.

<sup>6</sup> Ilâpygueduo ani, xina âsedaengüly eyanmo. Aituo ani xina pepi imâsedo odaxi âxiedondyly, akaemo odopâdyly tâtyram warâ.

<sup>7</sup> Xina idâly Tirodâpa, Ptolemaidanra. Myarâ saintybyem xina âxiegyely. Tonlo Jesus einwânni modo edaenkuze xina idâly. Tokalâ iguandyly ara ani eagâmo xina awyly.

<sup>8</sup> Kopaelâgâem xina pepi imâsedo odaxi âxiedondyly, Cesareianra tâtâhoem. Xina Cesareiam saindyly ani. Saintybyem Filipe etyram ani xina idâly. Mârâ anaxi, mârâ anaxi warâ Jesus wâgâ aguely myani mâkâ ewanu. Sete uguondo modo Jerusalémâ iduakeyby ewylâ myani mâkâ, Filipe, âdypebaom modoram pyni epâni.

<sup>9</sup> Quatro lelâ ani exiry âwynsaundo modo. Unâ Jesus wâgâ tâgatuze lâpylâ ani akaemo.

<sup>10</sup> Iweâpadobe ani xina târâ awyly. Târâ xina ataylâ ani uguondo Ágabo âewyly Judeiadâpa. Deus aguehobyry agueim lâpylâ myani mâkâ.

<sup>11</sup> Xinaram saindyly; Paulo iwaxiery nhawâdyly. Tuhuru, tâwâry warâ nhekâjily mârâgue. Aguely:

– Paulo, xirâ arâ âyam aguely ise, Deus Ispiritury kâuntuhoem aguehobyry aralâ. Judeu Jerusalém donro modo awâse, âhugâjize, iwâkâjize warâ. Kâzekâjiagui wâne myara ise mâzekâjioly âmâ xirâ panxi-em sodo. Ilâpyryem ise judeu keba modo emaxi âudulymo. Warâ ise amâieiholy – kely ani.

<sup>12</sup> Awârâ agueduo ani xina, tonlo Jesus einwânni modo warâ, Paulo Jerusalémram nâtâba itoem xina aguely.

<sup>13</sup> Tohogüenze lâpylâ ani xina, arâ aieholy awyly tiuntuduo.

– Âdaituoka arâ ogunrumo? Jerusalémram udâpa witoem unâry xugukehonze myguelymo? Pymâ Jesus “Aiekâ” kehobyry lelâ agânhedyse wato. Jerusalémram idâze lelâ urâ, iekâjihomoem kulâ inkâba, yiguehoem lâpylâ, Jesuslâ arâ izetonro atay – kely ani xinaram.

<sup>14</sup> Xina aguely tindadyseba ani. Aituo ani xina âdakepa idyly.

– Jesus ize ato aralâ nidâ – xina kely lelâ.

<sup>15</sup> Iweâpa târâ itybyem ani tysejiguy tiankyly xina nhodyly, Jerusalémram tâtâhoem.

<sup>16</sup> Cesareiadá Jesus einwânni modo ewy xina agâ tâtâzemo ani. Jerusalémram saintybyem Menasom etyram ani xina adaholy, târâ xina itoem. Chipredâ iazeypy myani mâkâ; iweâpalâ myani Jesus nheinwândyly.

*Paulo, Tiago agâ âtunâguedobyry*

<sup>17</sup> Jerusalémram xina saintuo, Jesus einwânni modo xina tientuo tuomazezemo ani. Koendâ kehoem ani xina nhedaenkulymo.

<sup>18</sup> Kopaelâgâem ani Paulo agâ xina idâly, Tiago agâ agueze; Jesus einwânni modo iwymâry myani mâkâ. Idânârâ Jesus einwânni modo iwymârydo âtâdyguybyem ani târâ.

<sup>19</sup> Aituo ani Pauloram âzedaenkuolyo. Ilâpygueduo, idânârâ adâitayn-hobyry nhegatyly ani eyanmo.

– Toenzepa judeu keba modo Jesus neinwândâ, iwâgâ eyanmo augueduo – kely.

<sup>20</sup> Tindatuo, idânârâ iomazewânmo. Aituo ani aguelymo:

– Koendonro, ton-honreim warâ Deus – kelymo.

Aituo ani Pauloram aguelymo:

– Idakâ, xina ipemugu âmâ Cristo eynynâ. Tutuzelâ âmâ, agui judeu modo Jesus tâinwânse awyly. Enanajimo, koendonro kuru Moisés inweniby einwândyly, tâwâlâ lelâlâ wâne Jesus eynynonroem awylymo.

<sup>21</sup> Moisés inweniby izepa âmâ, waunlo ara olâ enanajimo. “Paulo, judeu domodo âkelo âtâ anakonro modoram aguely: ‘Moisés inweniby imowâdaungâ. Âmerymo ilery ety iopiry kadatâwâdaundâ. Kydamudo ezewenrypyry imowâdaungâ’ nygue Paulo” warâ kely keankâ indakulymo. Kewâdily kulâ olâ mârâ aguehomobyry.

<sup>22</sup> Saintybyem mawylymo xutuzemo lelâlâ enra. Tâpaunzeze xina, âdy xurâmoem amânhekily wâgâ, kewâdily kulâ mawânârâ âwâgâ indatybymo.

<sup>23-24</sup> – Tarâ xina ijidadâry oday tâlâ quatro uguondo modo, “Âdylâ ise xina anhekily Deus xurâem” keimpyry modo. Judeu akaemo, Jesus einwânni modo. Tutuzelâ âmâ, adâkehobyry nhewanikelymo awyly, kâzewenry ara, okoguelymo ise, âjiangaxilugueolyo ise warâ. Awârâ iraynâ, Deusram tiunduly enesimo wao olâ kâzewenry ara. Âdypeom keba olâ akaemo, tydinheruguepamo warâ, Deusram tiunduly nhanâtomo peba. Warâ xina âurudyly. Eyanmo dinheru âundugâ, Deusram tiunduly nhanâtomoem. Adâkehobyry ara aituomo, okogueduomo warâ eagâmo okoguegâ lâpylâ. Kâzewenry ara amituo, judeu taunlo modo igary tindatomobyry kewâdily kulâ awyly xutuzemo. Moisés inweniby mâinmopa mawyly xutuzemo warâ.

<sup>25</sup> – Judeu keba modo Jesus einwânni olâ tâwâlâ Moisés inweniby ara anipyra awylymo. Anhekilymo wâgâ tiunrutomo pape xina nigonodâ lâwâne. “Onrogue, segue warâ xygatyby modoram ânguylâ nhunru xuduypy kâdâtaundâ. Ânguydo imeom idu odano modo, âtâ inatano modo warâ mântomoem tâwâlâ wao iunu napâdâ; munru kâzenyâwâdaundâ warâ. Uguondo tywydy lelâ nyanâdâ; pekodo tusoram lelâ nâdynanão warâ” kely keankâ tygary wâgâ xina nhurutomo – kelymo ani Pauloram.

– Âdâinkâba. Amyguehomobyry ara aise lelâ urâ – kewâm Paulo.

<sup>26</sup> Kopaelâgâem ani Paulo akaemo quatro uguondo modo agâ Deus ety odaji idâly. Moisés inweniby ara, Deusram “Aiese xina” tâkehobyry adientuomo, akaemo okogueday, eagâmo tokogueze lâpylâ myani Paulo. Kurâdo eynynâ Deus agâ aguewânni modoram aguely myani:

– Sete emedyly sakaduo lelâlâ ise koendâ kuru tywykeba xina idyly, Moisés inweniby agueho ara. Awârâpygueduo ise mâkâ tokalâ, mâkâ tokalâ warâ Deusram tiunduhoem tianâtyby xina nhuduly-ro warâ, kâzewenry ara – kely Paulo.

*Deus etydâ judeu domodo Paulo nhawâtobyry*

<sup>27</sup> Sete emedyly ituo myani, Paulo idâly Deus etyram. Judeu domodo Ásia eynynâba âetaymy modo Paulo nhedylymo myani, mârâ tasera, “Judeu domodo idaserary” kelygue tâzekeindâ. Târâ Paulo tientuo, toenzepa kehoem myani iewiâpadylymo, Paulo tagâ judeu keba modo nhenetybybe-ro waunlo ara tienehonduomo, judeu keba âwânto keba mârâ tasera awylygue.

<sup>28</sup> Aituo myani adaenkelymo judeu tonlo modoram:

– Nhaum, etaungâ! Awâkâ uguondo, tâinkâ lelâba inakanhe enomedâni kulâ awâkâ! Judeu domodo eynynâba kulâ aguely. Moisés inweniby eynynâba kulâ aguely. Xirâ Deus ety eynynâba kulâ aguely waunlo. Iwerâ judeu keba modo nhenewyly xarâ kydaseraji. Âji tywykeim ara nhedyly kulâ awâkâ xirâ Deus ety! – kelymo myani.

<sup>29</sup> Arâ aguelymo myani Paulo, Trófimo, judeu keba, Deus ety idaseraji sanipyryen-ro waunlo ara tienehonduomo. Êfeso donro myani mâkâ uguondo. Paulo eagâ Jerusalémâ adakobâdily tâensemolo olâ myani.

<sup>30</sup> Tâinkâ lelâba ani awârâ modo egary âtâ anakâ. Aituo ani tonlo modo tâgaune kehoem idâlumo. Paulo nhawâdylymo; nhuxidylymo Deus etydâba; judeu domodo idaserayba nhejikelymo. Ilâppyrem idânârâ pyanta nhenahunlymo.

<sup>31</sup> Roma donro sodadu iwymâry, “komandanty” keho, awârâ egary tydase myani.

– Idânârâ tonlo Jerusalém donro modo iewiâmunu. Paulo tyândyse atomo – kely indadyly.  
<sup>32</sup> Awârâ unâ tindatuo myani sodadu domodo ingâsedly, iwymârymo warâ. Inepa kehoem myani eagâmo idâly kurâdo eydâ atoram. Saindylymo myani kurâdo Paulo nhapioguly ume. Sodadu domodo tywymâry agâ tientuomo, inepa kehoem napioguba idylymo myani.

<sup>33</sup> Aituo myani komandanty Paulo opaji saindyly. Sodadu domodoram aguely warâ:

– Sawâtaungâ merâ uguondo. Ewâkâjiwâdaungâ azagâ korentygue – kely.

Nhewâkâjiwâbygueduomo myani kurâdoram aguely:

– Ânguyka merâ uguondo? Âdaidylyka merâ? – kely.

<sup>34</sup> Tadaenkeze lelâ myani in-hogulymo. Âikâ, âikâ warâ myani taenluem aguelymo. Agui mawânkâ myani âdaituo tâtâdygulylymo awyly xutudânry modo. Âikâ, âikâ warâ tadaenlu tindatuo myani, sodadu domodo iwymâry âdara tâjidyly nutuba idyly. Aituo myani sodadu domodo ejidylnâ nhaleholy. Toenzepa myani kurâdo nhapygue idâly.

<sup>35</sup> Tâdâkuhoram taintuo myani sodadu domodoram adanâholy, tyewiâtuneim modoram âda nâiehoba itoem.

<sup>36</sup> Tadaenkeze kehoem myani kurâdo nhapygue idâly.

– Xyâgâ! Xyâgâ! – kelymo.

*“Inakanhe awitaymba urâ” Paulo kehobyry*

<sup>37</sup> Sodadu domodo ety odaji tâkaunâze kelymo ume kehoem myani Paulo aguely komandantyrâ, gregüem:

– Tâwâlâ agâ aguely? – kely.

Aituo myani sodadu iwymâry aguely:

– Âdaraka gregüem aguely mâuntuly? – kely.

<sup>38</sup> – Mâkâ egîpcio saguhoem xina agâ iewiâpadyby kebaka âmâ? “Pymâ domodo Roma donro xina neinwântaymba ise” nygue tagonro modoram. Quatro mil kyâwâni modo iwymâry ani mâkâ. Tagâ poji anaxi tasemo ani. Mâkâ keba âmâ? – kely.

<sup>39</sup> Aituo myani Paulo in-hoguly:

– Mâkâ mâkeba urâ. Judeu urâ. Tarsodâ iazeypy, Cilícia eynynonro âtâ anary imâsedo anaym. Tâwâlâ wao kurâdo agâ augueji – kely myani.

<sup>40</sup> – Tâwâlâ aguekâ – kewâm lelâmy komandanty.

Aituo myani Paulo XYDYK idyly tâdâkuho wâgâ. Tâmarygue myani kurâ domodo MYK itoem aguely. Tytamuneba ituomo myani Paulo aguely hebraiku-em, judeu domodo itanwe.

## 22

<sup>1</sup> – Nhaum, idataungâ. Ypemugudo, idataungâ âyanmo aguely, âdy inakai aieni keba wawyly mâuntuhomoem – kely myani Paulo.

<sup>2</sup> Hebraiku-em aguely tindatuo mo myani âdakepa kuru idylymo, koendâ tindatoem.

<sup>3</sup> Aituo myani Paulo agueondyly:

– Judeu urâ. Tarsodâ yazely, Cilícia eynynâ. Tarâ Jerusalémdâ olâ ienamadyly. Gamaliel ani ienomedâni. Koendâ kehoem ani ienomedâdyly Moisés inweniby wâgâ. Koendâ kehoem ani ienomedâdyly kydamudo ezewenrygue warâ. Deus ize ato ara awidyse ani urâ, amidyse matomo ara.

<sup>4</sup> Izepa ani urâ, asaemo “Jesus kieinwântuo lelâ Deus eydâ atoram kytâly” kewâni modo. Jesus einwânni modo senagazedâ. Sawânehomo. Uguondo modo, pekodo modo warâ kadeia odaxi setadâneho, xyâen-homo warâ.

<sup>5</sup> Kurâdo eynynâ Deus agâ aguewâni modo iwymâry kuru, idânârâ pymâ tonlo modo warâ, Jesus einwânni modo enagazenibyry wawyly, tutuzemo. Kata modo tâmakeze ani urâ, judeu Damasco donro modoram kantoem. Jesus einwânni modo kanwâdyly, kâenagazedly witoem aguenri ani mârâ kata. Sawâsemo, ekâjibyem xarâ Jerusalémram kâenewylymo witoem ani udâdyse wawyly myarâ. Toenzepa ani kâenagazedyzemo wawyly, Jesus nheinwândylymogue – kely myani Paulo.

*Paulo Jesus tyeinwântobyry wâgâ aguehobyry*

*(At 9.1-19; 26.12-18)*

<sup>6</sup> Aituo myani Paulo agueondyly:

– Damasco iwaguepa udâly ume kuotatay awârâem ani toenzepa kehoem iatygydyly kau wâgâ ienâmidâ kehoem. MAH warâ kehoem ani ydâ iajimadyly.

<sup>7</sup> Aituo ani ianugue onro onwa yihuguely. Tâjitanru kâindadyly. “Saulo! Saulo! Âdaituoka ienagazedily?” kely.

<sup>8</sup> – “Ânguyka âmâ, aguenri?” uguely ani.

– “Jesus Nazaré donro urâ, toenzepa mâenagazeguylylâ” kely ani.

<sup>9</sup> – Emâ akaemo yagâ idâwâtyby modo mârâ tohoreim. Aguely lelâ ani indakylimo, âdakeze aguely nutubamo olâ ani.

<sup>10</sup> Aituo ani kampâiguely: “Âdyka agânhedysse mato, Pymâ?” uguely.

– “Aukâ. Idâ âtâ anary Damascoram. Târâ ise mâduruholy amânhekely wâgâ, Deus amânhedysse ato wâgâ” kely ani yam.

<sup>11</sup> – Epyem yemâ mârâ tohoreim. Awlylygue ani yagonrodo iemary wâgâ yawâtâ Damascoram yadylymo.

<sup>12</sup> Uguondo Ananias Deus xyrenipe myani târâ. Moisés inweniby ara lelâ aini myani mâkâ. Idânârâ judeu Damasco donro modo ize ato myani mâkâ.

<sup>13</sup> Uize tâtâze ani. Wopaji saintybyem ani aguely: “Iweâ lelâlâ Deus mâentoem aiese” kely.

– Aguely umelâ kehoem kâentondyly. Mâkâ wopay kâendyly warâ.

<sup>14</sup> Aituo ani yam aguely: “Saulo, kydamudo iDeusry âduakely tâmaryem. Adienkylylâ âyam tiuntuen-hondyze ato. Jesus mâendysse mâkâ, Jesus âdykâ inakanhe aitânry. Jesus lelâlâ âyam aguely mâindadyse mâkâ.

<sup>15</sup> Jesus wâgâ aguenri ise âmâ. Idânârâ mydâhobyry einkâ ise mâentyby, mâindatyby modo warâ mâengatuly.

<sup>16</sup> Aukâ. Inepa Pymâ Jesus inakanhe amitobyry nhygakehoem ekagâ, xygakeze lelâ” kely ani Ananias yam – kely myani Paulo.

*Paulo igonotobyry judeu keba modoram Jesus unâry egatuze*

<sup>17</sup> Paulo aguely:

– Aituo ani xarâ Jerusalémram kodopâdyly. Deus etyram udâly, eagâ agueze. Eagâ augueday ani ienu oday Jesus kâynganehonly.

<sup>18</sup> Warâ ani yam aguely: “Inepa Jerusalémdâpa âxiguegâ. Taunlo modo ywâgâ amyguely neinwântaymba ise” kely ani.

<sup>19</sup> – “Utunri, saguhoem âdaunlopyry wawily, tutuzelâ akaemo. Âtâ tâdâtâdyguyho odakâ âinwânnyry modo xuize, sawâse, sapioguze warâ kadakobâdobyry, tutuzelâ akaemo.

<sup>20</sup> Estêvão nhândaymo, womaru lelâ ani. Eon-honrumo kâunduly lelâ ani nhân-homoem. Nhonwa tuhu samewâni modo ety iwogonro nhoniem tâise lelâ ani urâ” uguely ani Jesusram.

<sup>21</sup> – “Tarâpa âxiguegâ, Paulo. Taypa ise ogonodyly, judeu keba modoram unâry egatuze” kely ani Jesus yam – kely myani Paulo.

<sup>22</sup> “Jesuslâ ugononi, judeu keba modoram tunâry egatuze” keduo myani iewiâpadylymo. Ago kehoem adaenkelymo:

– Xyâwâtaungâ awâkâ! Nigue awâkâ! – kelymo.

<sup>23</sup> Ago kehoem adaenkelymo; tâty BOH waunlo nhetylymo; kayam PUGU PUGU nhedylymo; sagunu kayam nhamelymo idylymo myani. Arâ aidylymo myani, Paulo aguely nehoguebyra tawily tienehon-homoem.

<sup>24</sup> Kurâdo arâ aidyly tientuo myani komandanty tyzodadury modoram aguely:

– Eydâ kydatoram merâ uguondo sataungâ. Târâ ise mampiogulymo, inakanhe adâitobyry nhegatuhoem. Egatuze lelâ keanra, toenzepa mawânkâ judeu domodo eagâ iewiâky – kely.

<sup>25</sup> Tiampioguoem nhekâjilymo ume olâ myani Paulo aguely cem lelâ sodadu Roma donro iwymâryam, eydâ iwaguepalâ tawilylygue:

– Kurâ Romadâ tâzekeim tapioguwâduneba, kelype mawânâ. Romadâ tâzeke lâpylâ urâ. Awlylygue yapioguba tâise âmaemo, âdawitobyry wâgâba kulâ – kely myani Paulo.

<sup>26</sup> Mâkâ sodadu modo iwymâry arâ Paulo aguely tindatuo, idâly myani tywymâry komandanty agâ agueze:

– Awâkâ uguondo âdakâieneho! Romadâ tâzeke lâpylâ mynra awâkâ! – kely myani.

<sup>27</sup> Aituo myani komandanty Paulo sapâiguesse idâly.

– Romanoka âmâ? Âkealâka “Romadâ tâzeke lâpylâ urâ” myguely? – kely.

Aituo myani Paulo in-hoguly:

– En-hem, Romadâ tâzekelâ urâ – kely.

<sup>28</sup> Komandanty aguely:

– Romadâ tâzeke lâpylâ urâ. Imâem sepywadâ, târâ iezedy iwenihoem – kely.

– Urâma âdy kâempywadaymba. Yazepygueduolâma Romadâ iezeku. Romadâlâ mawânkâ pabai ezeke, awlylygue târâlâ iezeku lâpylâ – kely myani Paulo.



<sup>29</sup> Awârâ tindatuomo, inepa kehoem myani Paulo sapâigüewâni modo iopayba idylymo. Paulo Romadâ tâzeke awyly tiuntuduo myani, komandanty âseanedily, sapiogühoem ekâjien-hoimbyryem tawlylygue.

*Judeu domodo iwymâry modo enadoram Paulo satobyry*

<sup>30</sup> Roma donro komandanty tiuntudyze myani âdaituo judeu domodo Paulo nhewentâguedylymo awyly. Aituo myani kopaelâgâem aguely:

– Idânârâ judeu domodo xutuwâni kuru, kurâdo eynynâ Deus agâ agüewâni modo iwymârydo warâ âtâdyguylymo ize wato – kely.

Idânârâ pymâ domodo âtâdyguyduo myani komandanty tyzodadury modoram aguely:

– Paulo etaguewâdaungâ. Xarâ pymâ domodo âtâdyguyhobyryam enetaungâ – kely.

Aguehobyry ara myani aidylymo. Judeu domodo xutuwâni kuru enadoram Paulo nhadylymo.

## 23

<sup>1</sup> Aituo myani Paulo pymâ domodo âtâdyguywâdybyam MYK idyly, aguely warâ:

– Nhaum, âdalâ kulâ awitaymba wakynre. Izepa ato agânhepyra wawlyly, tutuze Deus – kely.

<sup>2</sup> Agueduo myani Ananias, kurâdo eynynâ Deus agâ agüewâni modo iwymâry kuru, toenzepa kehoem iewiâpadyly. Paulo iopano modoram aguely:

– Itagainwâdaungâ – kely.

<sup>3</sup> Aituo myani Paulo aguely Ananiasram:

– Deus inagazenehonze arâ kehoem ayetobyry wâgâ. Koendonro emyenro wâne âmâ, koendonro keba olâ âmâ! Parede wâne pinta tâiehoze atuhobyry xuahuhoem mârâ emyenro kulâ âmâ. Moisés inweniby araba awitobyry wâgâ agueze tarâ mawlyly. Âmâlâ olâ kâzewenry ara aitânry. Âdawitobyry wâgâba kulâ ytagainhehonly – kely Paulo.

<sup>4</sup> Paulo agueduo myani iopano modo aguely:

– Kurâdo eynynâ Deus agâ agüewâni modo iwymâry kuru mâunâguedyly awârâ – kelymo.

<sup>5</sup> – Nhaum, auguehobyry modo wao enanânehonwâdaungâ. Kâuntuwâbyra enra urâ awâkâ, kurâdo eynynâ Deus agâ agüewâni modo iwymâry kuru awyly. Tutuzelâ urâ-ro watay, arâ auguewâpyra tâise enra urâ. Moisés iweniby wâgâma “Inakanhe adâkezeba itaungâ âwymârymoram” tâzeke – kely myani Paulo.

<sup>6</sup> Saduceu domodo ewy, fariseu domodo ewy warâ myani pymâ domodo. Arâ awyly tiuntuduo myani ago kehoem Paulo aguely:

– Ypemugudo, fariseu urâ. Fariseu lâpylâ ani pabai. Tarâ urâ kâzewentâoly, igüewâtyby modo kurâem itondyly kâinwândylygue kulâ – kely.

<sup>7</sup> Arâ agueduo myani fariseu domodo, saduceu domodo warâ âjihogulymo adaguly. Pymâ domodo nâseiwâmbyra idylymo myani. Fariseu domodo myani, Paulo eynynonro; saduceu domodo myani Paulo iduery warâ âjipagadylymo myani-ro warâ.

<sup>8</sup> Saduceu domodo nheinwânkyly myani tâentuneim modo lelâ. Enanajimo myani, igueypy modo kurâem nitombyra; kaynâ Deus emary modo “anju” keho ipa, ispiritu koendonro tarâ onro anaym ipa warâ xurâmoem. Kadopâ modo peba enanajimo. Fariseu domodo olâ myani tâinwânsemo tâenseny modope awyly. Awylygue igueypy modo kurâem itondyly nheinwândylymo lâpylâ. Anju domodope awyly, ispiritu koendonro tarâ onro ananope awyly warâ xurâmoem. Kadopâbe awyly tâinwânsemo lâpylâ myani.

<sup>9</sup> Arâ myani ago kehoem fariseu domodo, saduceu domodo warâ adaenkelymo. Fariseu domodo ewy Moisés inweniby enomedânibe lâpylâ myani târâ. Akaemo ewy ago kehoem aguely idyly myani:

– Xina enanaji, awâkâ uguondo âdy inakai aguepa, âdy inakai aniempyry warâ. Ângyulâ kientânry keanra awâkâ aguehoem xunâry xuduim, anju atay, ispiritu koendonro atay warâ – kelymo.

<sup>10</sup> Warâ myani fariseu domodo, saduceu domodo alelâ ago kehoem adaenkelymo. Fariseu domodo tyewiâpazemo myani saduceu domodo agâ. Saduceu domodo toenzepa lâpylâ myani iewiâkymo. Aituo myani komandanty aguely:

– Iweâma wânkâ ise Paulo âdyoly-ro – kely.

Aituo myani tyzodadury modoram aguely:

– Paulo etywâdaungâ awâkâ kurâdo duaypa. Sopâdaungâ eydâ kydatoram, myarâ kienmakehoranlâ – kely.

<sup>11</sup> Kopae myani Pymâ Jesus, Paulo agâ agueze âepanâguely.

– Tyanepa ikâ. Tarâ Jerusalêmdâ ywâgâ amyguehobyry ara lâpylâ ise Romadâ ywâgâ amyguely – kely myani Jesus.

*Judeu domodo Paulo xyâze kehobyry*

<sup>12</sup> Kopaelâgâem myani judeu domodo ewy âtâdyguily, tâtunâguedomoem. Aguelymo myani:

– Paulo kydyânre. Âdy kieimpa, kienypa warâ ise kurâ, kyânly iraynâ. Tâwâlâ ise Deus kânagazedily, aguykehobyry ara aguiypya kurâ-ro watay – kelymo myani.

<sup>13</sup> Agui myani xyâze kewâni modo, quarenta takaze kehoem.

<sup>14</sup> Idânârâ âjihogûbyem myani idâlymo agueze kurâdo eynynâ Deus agâ aguwâni modo iwymâry modo agâ, eagonro pymâ modo agâ warâ. Eyanmo aguelymo myani:

– Âseinwândybyem xina Paulo tyân-hoem. Âdy xina neimpa ise Paulo tyânly iraynâ. Tâwâlâ ise Deus xina nhenagazedily, adâkehobyry ara xina anipyra-ro watay!

<sup>15</sup> Warâ xina xunâry. Âmaemo, eagonro pymâ domodo warâ komandantypam âjitaumbyguewâdaungâ. “Judeu domodo iwymârydo Paulo agâ adâkedyze. Iwâgâ imâm tiuntudyze asaemo. Enetaungâ, eagâmo aguehoem” kewâtaungâ komandantypam. Ânwa odaylâ ise xina inwânwândily, tyân-hoem. Xarâ naimpyralâ – kelymo.

<sup>16</sup> Paulo idykauru olâmy idamâ, toru xyâly kelymo. Aituo myani inepa kehoem idâly sodadu domodo etypam, toru xuruse. Saintrybyem myani Pauloram aguely:

– Judeu domodo ewy âdyse. Ânwa oday ise âwânwândilymo, âhoem – kely.

Idânârâ aguehomobyry ara myani toruram nhegatyly.

<sup>17</sup> Aituo myani Paulo sodadu tonlo modo ewy ingâsedily.

– Merâ salokuzenomo sakâ komandantypam. Eyan nhegatylybe merâ – kely.

<sup>18</sup> Aituo myani sodadu mâkâ nhadyly komandantypam.

– Mâkâ etadâdyby Paulo ygâsedai, merâ salokuzenomo âyam kâenetoem. Unâ nhegatylybe mynra merâ – kely myani.

<sup>19</sup> Aituo myani komandanty salokuzenomo âdiempa iwague nhejikely, ânguy adâkely nidapyra itoem. Târâ myani nhapâiguely:

– Âdya yam mâengatudyze mato? – kely.

<sup>20</sup> Aituo myani Paulo idykauru in-hoguly:

– Judeu domodo ewy kugu Paulo tyândyse. Kopaelâgâ ise mâingonotoem nhekadylymo. “Paulo xinaram igonokâ, tonomedâdo wâgâ xina nhapâiguoem” kelymo ise.

<sup>21</sup> Awârâ kâzeinwândâ olâ. Kewâdylymo kulâ ise. Quarenta uguondo awârâem ise sakadodâ âtuahuybyem awyly. Paulo sakadyly nhenuendilymo ise tyân-hoem, myarâ saindily iraynâlâ. “Âdy xina neimpa, nenypa warâ ise, Paulo tyânly iraynâ. Tâwâlâ ise Deus xina nhenagazedily, tyâmpalâ xina âwinduadyly, adakulyly warâ-ro watay” keanrymo. Onhondybyem akaemo adâtomomoem. Paulo mâingonodyly kulâ inwânwânkylymo – kely myani Paulo idykauru.

<sup>22</sup> Aituo myani komandanty aguely:

– Tâwâlâ idâ lelâ. Xirâ yam mâengatuyby olâ ânguyram kâzegatu – kely.

Salokuzenomo idâly.

*Paulo tywâgâ aguehobyry pymâ Felixram*

<sup>23</sup> Aituo myani komandanty, azagâ sodadu domodo iwymâry ingâsedily; mâkâ cem, mâkâ cem warâ sodadu domodo xutuim myani akaemo. Saintuomo myani eyanmo aguely:

– On-hondaungâ ozodadurymo agâ Cesareiaran mydâhomoem. Kopae, nove horas, ise tarâpa igaselymo. Duzentos sodadu tuhuru wogonro modo, setenta kawaru wogonro modo, duzentos sodadu koendâ pyrâu samewâni modo warâ lâpylâ sataungâ.

<sup>24</sup> Paulo sawo lâpylâ kawaru nhontaugâ, isejiguy sani lâpylâ warâ. Koendâne mâkâ uguondo sataungâ pymâ Felixram – kely.

<sup>25</sup> Ilâpyryem myani komandanty kata inwenily Felixram. Eagâmo tingonokyly.

<sup>26</sup> “Âyam xirâ kata kâingonodyly, pymâ tynrenseim. Cláudio Lísias urâ, komandanty taunlo Jerusalém donro. Idaenkuho kâingonodyly.

<sup>27</sup> “Âyam merâ uguondo tâwentâguezeim kâingonodyly, Paulo keho. Tarâ judeu domodoram nadawâho. Nhâlymo agâ keankâ. Romadâ tâzeke awyly kâuntuduo keankâ yzodaduryam kâenmakehonly.

<sup>28</sup> Âdy wâgâ nhewentâdylymo awyly kâuntudyze keankâ urâ. Awylygue keankâ judeu domodo iwymâry âtâdyguyhoranlâ kanleholy.

<sup>29</sup> ‘Xina ezewenry araba aidily’ nyguemo. Urâem olâ, pymâ Roma donro aguehobyry nakabyra merâ. Etadâdoem xyâhoem warâ âdy anientaymberâ merâ.

<sup>30</sup> Taunlo judeu domodo ewy merâ tyândysemo kehonly tarâ Jerusalémdâ. Kâuntuduo, inepa kehoem keankâ âyam kâingonodyse widily. ‘Âmaemoem Paulo inakanhe aitybyen-ro watay, pymâ Felixram aitobyry egatuwâdaunda’ ugue lâpylâ izepaom modoram.

“Xirâ kulâ âyam kâengatuly”

kely myani komandanty Cláudio Lísias inwenily.

Kata tinwenipygueduo myani sodadu domodoram nhuduly, pymâ Felixram nhato-moem.

<sup>31</sup> Aituo myani sodadu domodo tywymâry aguehobyry ara aidylymo. Paulo nhadylymo kopae âta anary Antipátride kehoram.

<sup>32</sup> Kopaelâgâem myani sodadu tuhuru wâgâ idâwâtyby modo odopâdylymo Jerusalémram. Paulo, sodadu kawaru wogonro modo agâ idâwâm lelâmy.

<sup>33</sup> Cesareiaram saintybyem myani idâlymo pymâ Félix etyram. Eyam aguelymo:

– Anra Paulo Jerusalémdâ ewentâguedyby. Anra lâpylâ kata xina iwymâry inweniby âyam – kelymo.

<sup>34</sup> Aituo myani pymâ kata intainly. Itainrimbyryem myani Paulo nhapâiguely:

– Âdykâ ynynonroka âmâ? – kely.

– Cilícia eynynonro urâ – kely myani Paulo.

<sup>35</sup> Aituo myani mâkâ pymâ aguely:

– Inwentâguedaynrim modo saintuo, âwâgâ aguelymo idase urâ. Âdamyguely awyly idase lâpylâ urâ-ro warâ – kely.

Aituo myani tyzodadury modoram aguely:

– Kadeia odaxi ietaungâ, pymâ Herodes etydâ. Etaungâne, nâsemagueba itoem – kely.

## 24

*Judeu domodo Paulo nhewentâdobyry pymâ Félix enanaym*

<sup>1</sup> Cinco emedyly ipygueduo myani kurâdo eynynâ Deus agâ aguewâni modo iwymâry kuru, Ananias, Cesareiaram saindyly, judeu iwymâry modo ewy agâ. Uguondo “Tértulo” keho, romano modo ezewenry xuturim, eagâ tâtâze lâpylâ myani. Saintybyem myani pymâ Felixram, Paulo aitobyry egatuze idâlymo. Mâkâ pymâ Paulo ingâsedyly.

<sup>2</sup> Paulo myarâ âepanâgueduo myani Tértulo mârâ lelâba aguely, tienwentâguedoem pymâ Félix enanaym:

– Idaenkuly saguhoem kuru, Pymâ. Koendâ xina iwerâ, xina nâseguebyba, pymâ koendonro mawylygue. Tonomegueim âmâ. Toenzepa âdydo imeom xina judeu domodoem adyese âmâ.

<sup>3</sup> Pymâ, toenzepa xina agâ iomaru, idânârâ mâunduwâtyby modo wâgâ. Koendâ minase xina agâ, âdykâlâ, âdaralâ, âdykâingâ xina atodâlâ warâ.

<sup>4</sup> Aekuru kuru iwanu tienkuâdâdyzeba gâlâ xina warâ. Xina adâkedyze ato mâindadyse wao olâ xina.

<sup>5</sup> – Ânguydoem kulâ merâ Paulo xina duay awyly. Âdykâ tadakobâdobyry einkâ Jesus wâgâ nhenomedâdyly. Awylygue xina judeu domodo nhewiâpanâdyly. Jesus Nazaré donropyry einwânni modo iwymâry lâpylâ mawânkâ awâkâ.

<sup>6</sup> Deus ety âwankuem niedâ awâkâ. Judeu keba kulâ myarâ nadâ. Awylygue keankâ xina nhetadânehonly. Xina ezewenry xuturim modo enado lâwâne keankâ tienwentâdyze xina awyly, romano domodo nyanânbyralâ.

<sup>7</sup> Tonlo sodadu iwymâry Lísias olâ xina emaymba Paulo nemake.

<sup>8</sup> Aituo keankâ mâkâ sodadu iwymâry xarâ xina ingonodyly. “Inanajimo, Paulo inakanhe aitybyen-ro watay, pymâ Felixram egatuwâdaunda, tâwentâgue, tâwentâgueba warâ Paulo awyly aguehoem” nygue xinaram. Awylygue xina âyam âewyly, Pymâ. Paulo agâ aguekâ. Aguely mâindatuo ise, uguondo inakai awyly mâuntuly, xina agueho ara – kely myani Tértulo pymânra.

<sup>9</sup> Judeu domodo Tértulo aguehobyry tohoguezemo myani. Awylygue myani aguelymo:

– Âkealâ awârâ Tértulo aguehobyry modo – kelymo idânârâ.

*Adientyby, adâkehobyry warâ Paulo Félix enanaym nhegatuhoery*

<sup>10</sup> Aituo myani mâkâ pymâ tâmarygue Pauloram “Aguékâ” kely. Aituo myani Paulo aguely adaguly:

– Idaenkuly, Pymâ. Tutuze urâ, iweâpa xina judeu domodo iwymâryem mawyly. Awylygue ise koendâ kehoem agânhetyby modo, kâenomedâdobyry modo warâ kâengatuly âyam.

<sup>11</sup> Idânârâ xirâ aguehomo, doze emedyly ara târâ Jerusalémdâ wawyly ume kulâ keankâ aidyly. Deus agâ agueze, ehogueze warâ keankâ Jerusalémram udâly. Tâwâlâ mapâiguely Deus ety odanopyry modo, âkealâ aguely awyly mâuntuhoem.

<sup>12</sup> Deus etydâ watay ânguy agâ kâseudaymba wakynre, kurâ domodo kâynanâdaymba wakynre warâ, Deus etydâ, tâdâtâdygyho mododâ, âdykâingâlâ kadakobâday warâ. Kurâdo kâynanâdyly netaymba keankâ asaemo yizepaom modo.

<sup>13</sup> Ienwentâguedylymo wâne inakanhe awitobyry wâgâba olâ. Kewâdylymo kulâ olâ. Toenzepa wâne ise asaemo ienwentâdyly, kewâdylymo kulâ olâ ise.

<sup>14</sup> – Kâinwânklylly ise âyam kâengatuly. Deus kâinwânklylly, xina idamudo nheinwântyby. Idânârâ Moisés inweniby tâinwânse urâ, earamo. Idânârâ saguhoem Deus eynynâ aguewâni modo inweniby tâinwânse urâ, nheinwântomo ara. Jesus kicinwântuo lelâ Deus eydâ atoram kytâly awyly tâinwânse olâ urâ. Judeu domodo ewy olâ neinwâmpyramo Jesus kâmakerim awyly.

<sup>15</sup> Tâinwânse urâ, Deus xypyry etay idânârâ iguewâtybylly modo kurâem nhenehonly, einwânni modo, einwântânrybyry modo alelâ. Agui judeu domodo kâinwânwânto ara lâpylâ inwânwândylymo.

<sup>16</sup> Deus enado âepanâgueze wawyly tutuze wawylygue, idânârâ agânhedyse urâ, Deusram, kurâdoram warâ kâzewentâgueoba witoem – kely myani Paulo.

<sup>17</sup> Paulo agueondyly myani:

– Iweâpa âtâ anakâ Jesus wâgâ unâ egatuze idâypyem, Jerusalémram kodopâdâ. Judeu âdy pebaom modoem dinheru kâindâtyguyby enese, Deusram auguehobyry xuduze warâ keankâ udâly.

<sup>18</sup> Deusram “Aiese urâ” uguehobyry olâ keankâ agânhelyly. Awylygue keankâ Deus etyram udâly, okogeeze, xina ezewenry ara. Agui pa kulâ keankâ kurâ domodo târâ awyly. Ânguy âdalâ kulâba gâlâ keankâ warâ.

<sup>19</sup> – Deus etydâ wawyly ume ienipyry modo lâpeba tarâ, akaemo judeu Ásia eynynonro modo. Enanajimo inakanhe awidâ-ro watay, nâedâ akaemo, awitobyry egatuze.

<sup>20</sup> Judeu domodo iwymâryam keankâ kadaholy, pymâ domodo âtâdygyuhoam. Pymâdo enado watay, âdylâ inakanhe awitobyry wâgâ ienwentâguebyramo keankâ. Tutuzelâ asaemo tarâ ienwentâni modo. Kâinwânklylly wâgâ kulâ keankâ kâzewentâoly.

<sup>21</sup> Xina iwymârydo enado wawyly ume, ago kehoem augue: “Iwerâ ienwentâguedylymo, iguewâtybylly modo xypyry etay kurâem itonze kely kâinwândylygue kulâ” ugue – kely myani Paulo pymâ Felixram.

<sup>22</sup> Koendâ kehoem myani Félix xurutybyem awyly Jesus eynynonro modo nheinwânklylly wâgâ. “Jesus kicinwântuo lelâ Deusram kytâly” kely tydase myani. Âkealâ, âkealâba warâ Paulo ewentâguedyly awyly adâkehoem tynwânwânse wao myani. Aituo myani Pauloram aguely:

– Sodadu iwymâry Lísias saintuo, aguely idase wao urâ. Mâkâ aguely kâindapygueduo ise, âdara âedyly awyly kâuntuly – kely myani.

<sup>23</sup> Arâ adâkebygueduo myani cem sodadu iwymâryam aguely:

– Ozodadury modoram aguekâ, Paulo nhetadâdomoem. Ihugâjiho, ewâkâjiho warâ olâ etyen-hongâ, kadeia oday tawyly ume tâwâlâ adakobâdoem. Tâwâlâ eataen-ho modo âdy ize ato nenedâmo – kely myani pymâ Félix.

*Félix, Drusila warâram Paulo adâitobyry nhegatuhoery*

<sup>24</sup> Iweâpa ipygueduo myani pymâ Félix Cesareiaran idâondyly tywydy Drusila agâ. Judeu myani mâkâ pekodo. Pymâ Félix, Paulo ingâsenehonly myani, mâkâ nheinwânklylly wâgâ tindatondyze tawylygue. Aituo myani, Jesus Cristo wâgâ aguely.

<sup>25</sup> – Koendâ kine, Deus aguiendyse ato lelâ aguyjiene. Deus izepa ato aiese kykeduo, “Agânhepyra ise aze” tâkezelâ kine. Xypyry etay idânârâ ise Deus enadoram kytâly. Jesus eynynonro modo typygueba kehoem iomazeânehonze. Jesus eynynâbaom modo ise typygueba kehoem nhenagazenehonly – kely myani Paulo.

Agueduo myani pymâ adahulily, Jesus eynynonro keba tawylygue. Aituo myani Pauloram aguely:

– Idâ. Âdalâ ise âgâsedondyly – kely.

<sup>26</sup> Félix tynwânwânse myani, Paulo tyam dinheru nhuduly tâtaguehobyry ebyryem. Awylygue myani ingâsezedyly, eagâ tâtunâguedoem. Paulo dinheru nudupa olâ myani.

<sup>27</sup> Azagâ anos sakabygueduo myani Félix pymâemba idyly Cesareiadâ. Paulo kadeia odaypa netaguehomba myani, judeu domodo tienwiâpanâdyzeba tawylygue. Pórcio Festo myani pymâ iwelo, Félix ejipyano.

## 25

*Festoram Paulo adâitobyry nhegatuhoery*

<sup>1</sup> Aituo myani Festo idâly Cesareiaran pymâem. Azagâ tokalâ warâ iguampygueduo myani târâpa egasely. Jerusalémram idâly.

<sup>2</sup> Saimpygueduo myani kurâdo eynynâ Deus agâ aguewâni modo iwymârydo, judeu domodo iwymârydo warâ idâlymo eagâ agueze. Paulo tienwentâdo nhegatulymo myani eyam.

<sup>3</sup> – Xarâ Jerusalémram Paulo igonokâ – kelymo myani.

Ânwa ozelâ tyân-hoem kulâ olâ myani aguelymo.

<sup>4</sup> Aituo myani Festo aguely:

– Cesareiadâlâ Paulo etagu nidâ. Inepa ise myarâ kodopâdyly.

<sup>5</sup> Kodopâduo, âwymarimo yagâ igonotaungâ. Târâ ise nhewentâdylymo, enanjimo inakanhe aitobyrybe-ro watay – kely.

<sup>6</sup> Dez emedyly awârâem Jerusalémâ itybyem myani Festo odopâdyly Cesareianra. Judeu domodo iwymârydo eagâ idâwânmony. Kopaelâgâem myani Festo idâly tribunalram. Myarâ saintybyem myani ekadyly, aguely.

– Xarâ Paulo enetaungâ – kely.

<sup>7</sup> Paulo myarâ âepanâgueduo myani judeu, Jerusalém donropyry modo tânâmize âtâdyguelymo lelâ. Inakai modogue kehoem myani nhewentâdylymo. Warâ olâ myani Festo aguely:

– Amyguelymo tydase urâ. Âdara pylâka ise amyguelymo âkealâ awyly kâuntuly – kely.

Agueduo myani âdara tâkely nutuba idylymo Paulo tienwentâdobyry modo wâgâ.

<sup>8</sup> Aituo myani Paulo tywâgâ aguely:

– Âdy inakai agânhetaymba urâ. Xina ezewenry iweniby arapa kulâ awitaymba urâ. Deus ety âwankuem kânhetaymba urâ. Âdykâ kywymâry Roma donro kâunâguedaymba urâ warâ – kely myani.

<sup>9</sup> Judeu domodo tienwiâpanâdyzeba olâ myani Festo. Aituo myani Pauloram aguely:

– Jerusalémram mydâdyse âmâ? Xirâ unâ wâgâ amyguedyse âmâ târâ, âkealâ, âkeaba warâ iwentâguedylymo awyly auguehoem? – kely.

<sup>10</sup> Aituo myani Paulo in-hoguly:

– Udâdyse inkâba urâ myarâ. Tarâ inado urâ iwerâ. Roma donro pymâ kuru César aguehobyrylâ âmâ. Tarâlâ aguekâ, koendâ, koendâpa warâ awitobyry awyly wâgâ. Judeu domodo kurâem inakanhe awitaymba urâ, tutuzelâ âmâ. Awylygue ise kodopâbyra wawyly Jerusalémram.

<sup>11</sup> Âdalâ inakanhe awitobyrybe yiguehoem kehoen-ro watay, yâen-hongâ. Judeu domodo kewâdyly kulâ watay olâ, ienagazenehomba nidâmo, kywymâry Roma donro agueho ara. Awylygue ise kywymâry Roma donro César-ram kâenkadyly. Ugonokâ pylâ mâkânra. Tâzekelâ urâ târâ. Mâkâ lelâlâ ise aguenri, inakanhe, inakanhembra warâ awitobyry wâgâ – kely myani Paulo.

<sup>12</sup> Arâ agueduo myani Festo âtunâguedyly turuni modo agâ. Eagâmo adâkebygueduo myani Pauloram aguely:

– “Kywymâry César-ram ugonotaungâ, Roma donroram. Mâkâ ise inakanhe awitobyry wâgâ aguenri” mygueaki. Arâ ise aedyly. Romaram ise ogonodyly – kely myani Festo.

*Paulo wâgâ Festo aguehobyry*

<sup>13</sup> Iweâpa ipygueduo myani pymâ Agripa âewyly tyaundu Berenice agâ Cesareianra, Festeram adakobâze.

<sup>14</sup> Iweâpa myani târâ awylymo. Aituo myani Festo aguely eyam Paulo wâgâ:

– Tâlâ tarâ uguondo, Félix kadeia odaxi nhetadânehoymy, pymâem tawyly ume. Paulo mâkâ ezedy.

<sup>15</sup> – Jerusalémram udâduo, kurâdo eynynâ Deus agâ aguewâni modo iwymârydo, judeu domodo iwymârydo warâ yagâ agueze nâtâmo. Inakanhe aitobyry wâgâ keankâ Paulo nhewentâguedylymo. Nekadâmo kâyâen-hohoem.

<sup>16</sup> Aituo keankâ Paulo agâ tyewiâtuneim modoram auguely: “Ânguy tyâwâtuneba saguhoem, aguely tydaseba kulâ” uguely.

<sup>17</sup> – Aituo keankâ xarâ Paulo eydâ atoam âewylymo. Saintuomo inepa keankâ aguelymo kâindadyly. Kopaelâgâem keankâ udâly tribunalram. Myarâ saintybyem iekabygueduo keankâ Paulo kâingâsenehonly.

<sup>18</sup> “Inakai modogue kehoem isenra nhewentâguedylymo” uguely keankâ yangahu oday. Arapa olâ keankâ aguelymo.

<sup>19</sup> Tâzewenrymo ara anipyra atobyry wâgâ kulâ keankâ nhewentâdylymo. Mâkâ uguondo Jesus keho iwerâ igueppyemba awyly nheinwândylygue kulâ nhewentâdylymo.

<sup>20</sup> – Xirâ wâgâ koendâ kâuntuhoem âdara awidyly awyly kâuntuba olâ wakynre. Aituo keankâ Paulo kampâiguely: “Jerusalémram mydâdyse âmâ? Xirâ unâ wâgâ amyguedyse âmâ târâ, âkealâ, âkealâba warâ inwentâguedylymo awyly auguehoem?” ugue eyam.

<sup>21</sup> Tâtâdzyeba olâ keankâ. “Kywymâry Roma donro César-ram ise kâenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhembra warâ awitobyry” nygue yam. Aituo yzodadury modoram aguely keankâ: “Koendâ merâ etaungâ. Pymâ Roma donroram ise kâingonodyly” ugue eyanmo – kely myani Festo, Agripam.

<sup>22</sup> Aituo myani pymâ Agripa aguely Festoram:

- Mâkâ uguondo aguely kâindadyse urâ – kely.
- Kopaelâgâ ise mâindadyly – kely myani Festo.

<sup>23</sup> Kopaelâgâem myani Agripa, Berenice warâ idâlumo pymâ modo âtunâguedoram. Egawântuomo myani tuomare kehoem âzedaenkuolyo, pymâ ize tadato edaenkuho ara kehoem. Festo agâ, sodadu iwymârydo agâ, uguondo tynruneim modo agâ warâ myani âwândylymo. Âwâmpygueduomo myani Festo, Paulo ingâsenehonly.

<sup>24</sup> Paulo âetuo myani Festo aguely:

– Idaenkuly, pymâ Agripa. Idaenkulyo, pymâdo, uguondo modo xirâ âtâ anakonro modo warâ. Anra Paulo. Aguidope judeu domodo izepa ato merâ. Jerusalémdâ watay, judeu domodo yagâ anyuemo, tienwentâguedomo wâgâ. Nâedâmo lâpylâ akaemo ewy xarâ, iwâgâ yagâ agueze. Aunlolâ inanry kâyâen-hohoem aguezesedylymo.

<sup>25</sup> Urâem olâ âdaitobyry wâgâba kulâ tyâzepa. “Kywymâry Roma donro César-ram ise kâenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhembra warâ awitobyry wâgâ” nygue. Awlylygue ise myarâ kâingonodyly.

<sup>26</sup> – Kywymâryram kata igonose urâ, âdaituo eyam kâingonodyly awlyly nhutuhoem. Âdy kâinwenily awlyly kâuntuba olâ urâ, âdaitybyem awlyly kâuntuba wawlylygue. Awlylygue xarâ kâenenehonly, aguely mâindatomoem. Pymâ Agripa, amyguely kâindadyse urâ. Sapâiguegâ, in-hoguly idakâ warâ. Arâ keanra ise kata wâgâ kâinwenilype awlyly.

<sup>27</sup> Koendâ inkâba uguondo tâwentâzeim igonodyly kywymâry Roma donroram, ewentâdo wâgâ aguehomba kulâ – kely myani Festo târâ âtâdygyby modoram.

## 26

*Adientyby, adâkehobyry warâ Paulo, Agripa enanaym nhegatuhoery*

<sup>1</sup> Aituo myani pymâ Agripa aguely Pauloram:

- Amânhetaymby modo xinaram egatugâ – kely.

Aituo myani Paulo tâmary nhaunâdily, pymâ Agripa tiendaenkuhoem. Aitybyem adâitobyry egatuly nhaguly.

<sup>2</sup> – Pymâ Agripa, idaenkuly wao. Tynreim âmâ. Tuomare urâ, inanaym aguely awlylygue. Âyam kâkaduly ise xirâ, judeu domodo agueho araba awidyly awlyly mâuntuhoem.

<sup>3</sup> Judeu domodo ezewenry tutuzelâ âmâ, idânârâ kehoem. Tutuze lâpylâ âmâ, xina izepa ato, xina nâseinwâmbryra ato warâ. Awlylygue olâ ydakâ wao. Auguely ara uguely – kely.

<sup>4</sup> Aituo myani Paulo agueondyly:

– Idânârâ judeu domodo tutuze, salokuzenomoenlâ Moisés inwenily ara aiseze wawlyly. Cilícia eynynâ yzehobyrydâ, Jerusalémdâlâ alelâ âdykâ xina ezewenry aiedyly kâinmowâbyra urâ.

<sup>5</sup> Judeu taunlo modo âkealâ aguely kezemo. Tutuzelâ akaemo, salokuzenomoenlâ fariseu-em wawlyly. Xina judeu domodo ezewenry einwânni kuru mawânkâ fariseu domodo.

<sup>6</sup> Iweâpalâ myani Deus aguely xina idamudoram: “Iguewâtyby modo kurâem ietonze urâ” kely. Tâinwânse urâ, Deus adâkehobyry ara aidyly. Awârâ tâinwânse wawlylygue, yizepaom modo xarâ ienewylymo, ienwentâze.

<sup>7</sup> Judeu domodo tâinwânse, Deus xypyry etay igueypy kurâem nhetondyly. Awlylygue xina judeu modo, Deus xyrendyly xina nimopa awlyly. Peto oday, kopae alelâ xina “Aiekâ” kehobyry anhedily. Deus iguewâtyby modo kurâem ietonze kely kâinwândylygue kulâ judeu domodo ienwentâdily, Pymâ – kely myani Paulo.

<sup>8</sup> Idânârâ tonlo modoram myani Paulo aguely:

– Kleinwâmpyra kitoem nuduwâpyra Deus iguewâtyby modo kurâem tyetonze awlyly. Einwântaungâ – kely.

<sup>9</sup> Idânârâ tonlo modo indatoem myani Paulo aguely Agripam:

– Saguhoem, urâlâ kâinane Jesus Nazaré donro einwânni modo enagazeni. Idânârâ adyese winane, kâenagazedomoem.

<sup>10</sup> Jerusalémdâ Jesus einwânni modo toenzepa senagazenehonwâm. Kurâdo eynynâ Deus agâ aguewâni modo iwymârydo kadeia odaxi kâentadânehohoem aguewânmo. Tawânehonzemo, kadeia odaxi tâtadânehonzemo warâ winane urâ. Iguehoem aguehonlymo watay, en-hem tâkeze kâinane urâ warâ.

<sup>11</sup> Jesus einwândyly inmodityemo wâne winane. Âtâ tâdâtâdygyuho modoram aunlolâ kâinane sawâsemo udâly. Tyewiâsezemo winane. Taypa kâinane udâly sawâsemo. Konhontuomo, toenzepa kehoem kâinane kâenagazedlymo – kely myani Paulo.

*Jesus tyeinwândyly wâgâ Paulo aguehobyry*  
(At 9.1-19; 22.6-16)

<sup>12</sup> Paulo tywâgâ agueondyly myani:

– Aituo ani Damascoram udâdyse widyly, Jesus einwânni modo etadâze. Kurâdo eynynâ Deus agâ aguewâni modo iwymâry modo ani udâhoem agueim.

<sup>13</sup> Pymâ Agripa, ânwa oze udâday awitobyry ise kâengatuly. Udâday, kuotatay, kau wâgâ toenzepa kehoem ani ydâ iatygyduly. Xixi takaze kehoem ani iatygu. Ienâmidâ ani iatygu; yagonro modo tânâmize lâpylâ warâ.

<sup>14</sup> Aituo ani idânârâ xina onro onwa ihuguewâdyly, toenzepa tâseaneduo. Ytanwelâ ani Jesus yam aguely kâindadyly, hebraiku-em. “Saulo! Saulo! Âdaituoka ienagazedly? Tâwâlâ kulâ mâsenagazedly, tapirâ wâne tani emano se tuosebileim onwa âjihugameduo tâdyâze myara midyly kulâ” kely ani.

<sup>15</sup> Aituo ani kampâiguely: “Ânguyka âmâ, aguenri?” uguely. “Jesus urâ, toenzepa mâenagazegylylâ.

<sup>16</sup> Aukâ. XYDYK ikâ. Iemaryem mitoem âduakely. Ywâgâ egaturin-em âduakely. Iwerâ mâentyby wâgâ egatugâ, waunroem aini wâgâ âyam kâengatuly wâgâ warâ.

<sup>17</sup> Ywâgâ amyguedyse urâ judeu domodoram, judeu keba modoram alelâ. Kâmaynoem midyly watay, imakeze urâ, urâlâ eyanmo ogononi awylygue.

<sup>18</sup> Ywâgâ aguenri ise âmâ. Ywâgâ eyanmo amygueduo, yeinwânsemo. Satanâs einwândyly imozemo. Deus ise nheinwânklymo. Iwerâma lamu oday âzepâimbyem adakobâni ara kulâ akaemo. Yeinwântuomo, Deus inakanhe aitomo xygakeze. Peto oday adakobâni ara ise akaemo nhedyly. Xirâ nhutuhoem ywâgâ amyguedyse wawyly” kely ani Jesus yam. Warâ ani aidyly, Damascoram udâday – kely Paulo.

*Jesus ewanuem adâidyly wâgâ Paulo aguehobyry*

<sup>19</sup> Aituo myani Paulo agueondyly:

– Pymâ Agripa, warâ ani Jesus aguehobyry ara awidyly, kaynâpa yam âetuo.

<sup>20</sup> Warâ ani unâ iwâkuru Jesus wâgâ aguely kanguly. Saguhoem kuru iwâgâ aguely Damascodâ. Ilâpyryem Jerusalémdâ, idânârâ Judéia eynynâ warâ ani xunârybyry kâengatuly. Judeu domodoram, judeu keba modoram alelâ inanry iwâgâ aguely. “Âjityendaungâ, inakanhe amitomo wâgâ. Deus izepa ato aiedyly imowâdaungâ. Jesus einwântaungâ. Koendonro lelâ aietaungâ, Jesus eynynroem mawlymo, inakanhe amidyly imoimbyryem warâ mawlymo xutuhoem” uguzesedyly inanry.

<sup>21</sup> Xirâ unâ kâengatudio keankâ, judeu domodo yagâ iewiâpadyly. Deus etydâ wawyly ume keankâ yawâdylymo. Toenzepa keankâ yâdyse awylymo, Jesus wâgâ auguelygue.

<sup>22</sup> – Iepyra nipyra olâ keankâ Deus, iemakedâlâ. Awylygue olâ tarâ wawyly, Jesus unârybyry idânârâ âyanmo egatuze, kurâdo âdaunlo modoanlâ, tâgareim modoram warâ. Jesus aguehobyry, anhetyby warâlâ xirâ unâry. Moisés xunârybyrylâ, saguhoem Deus itaumbry egatuwâni byry modo xunârybyrylâ warâ xirâ kâengatuly. Deus onro anaxi ingonokly wâgâ myani aguelymo. Iwerâ aguely âetobyry wâgâ.

<sup>23</sup> “Deus Ingotyby âzenagazeoze, âdyoze warâ; tyigueduo, kurâem itonze” kewânmmomy. Awylygue, kyigueduo, kurâem itonze kydawlyly, kiuntuly. Kytâho kientoem esagonrim, arâ lâpylâ ise Messias, Deusram kytâhoem, nhutuen-honly judeu domodo, judeu keba modo alelâ – kely myani Paulo.

<sup>24</sup> Paulo adâitobyry, adâkehobyry warâ nhegatuly ume myani Festo adaenkely:

– Toenzepa mâsenomedâdâ. Aituo âindâam midyly! – kely.

<sup>25</sup> Aituo myani Paulo, Festoram aguely:

– Âindâam witaymba urâ, pymâ ton-honreim. Koendâ kâpaunzedyly. Âkealâ aguely-ro warâ – kely myani Festoram.

<sup>26</sup> Aituo myani Paulo agueondyly:

– Pymâ Agripa, âkealâ aguely awyly, tutuze âmâ. Koendâ kehoem Jesus wâgâ tutuze âmâ. Âdy totoenze kulâ anientaymba myani mâkâ; tâzenanaym lelâ myani anhedyly.

<sup>27</sup> Pymâ Agripa, saguhoem Deus eynynâ aguewâtyby modo tâinwânse âmâ. Arâ atayma Messias âewyly tynwânwânse âmâ-ro – kely Paulo.

<sup>28</sup> Aituo myani Agripa aguely:

– Ine wao. Inepa kehoem Jesus kâinwândyse mawlyly – kely.

<sup>29</sup> – Koendâ tâise Jesus mâinwândyly, iweâlâ atay, iweâpa atay warâ. Koendâ tâise âmâ lelâba mâinwândyly, asaemo idânârâ ydataynrin modo warâ. “Idânârâ taunlo modo yara

nidâmo, Jesus neinwândâmo” tâkeze winase Deusram. Yara korentygue mâzekâjiodyzebamo olâ urâ-ro warâ – kely myani.

<sup>30</sup> Awârâ aguely tindatuomo, pymâ Agripa, pymâ Festo, Agripa eaundu Berenice, idânârâ târâ ekadaymby modo warâ saudylymo myani tâgasehomoem.

<sup>31</sup> Tâgaselymo ume, tindatyby wâgâ aguelymo.

– Âda nitaymba awâkâ Paulo etadâdoem, xyâhoem warâ – kelymo myani.

<sup>32</sup> Aituo myani Agripa, Festoram aguely:

– “Kywymâry Cêsar Roma donroram ise kêenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhembra warâ awitobyry wâgâ” kepa-ro watay, tâtaguneba tâise mâkâ, inakanhe anitaymba mâkâ, ienanaji – kely myani.

## 27

### *Festo Romaram Paulo ingonotobyry*

<sup>1</sup> Aituo ani Festo, Paulo ingonodyly Romaram, Itália anaxi xidadâ imâsedoram. Júlio cem sodadu iwymâryam aguely:

– Âmâ ise etadâdyby modo, Paulo warâ sani Romaram – kely.

(“Cêsar izodadury” kelygue myani izodadury modo ezeku; mâkâ ewy myani Júlio.)

<sup>2</sup> Pepi imâsedo Adramítiodâpa âetyby, Ásia yan-yam idâim odaxi ani xina âxiedyly. Aituo ani xina idâly adaguly. Aristarco idâwâm lâpylâ xina agâ. Macedônia eynynonro âtâ anary Tessalônica donro ani mâkâ.

<sup>3</sup> Kopaelâgâem ani xina saindyly Sidom iduantaji. Koendâ ani Júlio, Paulo nhedyly. Pauloram aguely:

– Tâwâlâ ise myarâ ataen-ho modoram adakobâze mydâly. Pyni, âdydo imeom warâ nhududuomo, tâwâlâ emakegâ lelâ – kely ani eyam.

<sup>4</sup> Ilâpyryem ani xina idâly Sidomdâpa. Târâpa idâypyem ani Chipre inortyry einkâ xina idâly, sapezenru xina yan-yam âewyly awylygue.

<sup>5</sup> Cilícia, Panfilia warâ edazekâ ani xina idâly. Xidadâ Mirra kehoam xina saindyly ani Lícia eynynonroam.

<sup>6</sup> Târâ ani xina pepi imâsedo odayba âzetyly. Sodadu domodo iwymâry myani pepi imâsedo eagonro tâense Alexandria donropyryem Italiaram idâim. Aituo ani xina mârâ iodaxi âxiedyly.

<sup>7</sup> Toenzepa ani sapezenru eon-honru xina yan-yam. Awylygue ani kura kehoem xina idâly. Tâpyneânze kehoem ani âtâ anary Cnido iduenrâ xina saindyly. Ton-honre kehoem sapezenru xina iduenrâ âewyly awylygue ani xixi egawânto yan-yam xina nâtâba awyly. Aituo ani sul yan-yam xina MYRYK idyly. Ilha Salmona einkâ ani xina sakadyly. Xina idâly lelâ ani sul einkâ. Ilha imâsedo Creta einkâ ani xina sakadyly, sapezenru ton-honre kuba ato einkâ.

<sup>8</sup> Creta edazekâ ani xina idâly. Tâpyneânze kehoem ani xina idâly. “Tuanta koendonro” kelygue tâzekeinram xina saindyly ani. Xidadâ Laséia kehodâ iwaguepa ani mârâ.

<sup>9</sup> Cesareiadâpa xina egasehobyry iweâpa itybyem, âty Deus Inakanhe Aguitobyry Nhygakehon-ho keho sakadybyem awyly ume ani. Paru oze tâdâtâhoem kâmaynoem idyly. Aituo ani Paulo aguely:

<sup>10</sup> – Nhaum, kâmaynoem enra xirâ ume paru oze kytâly. Pepi imâsedo xytyze. Iodano modo myenranxi idâze. Kurâ nhese lâpylâ warâ enra – kely.

<sup>11</sup> Pepi odo, pepi iogâikeim warâ olâ ani aguelymo:

– Kâmaynoem inkâba awârâ tâdâtâhoem. Tarâ tuantayba kydâxiguenre – kelymo.

Aituo ani sodadu domodo iwymâry akaemo azagâ aguely indakyly kuru, Paulo aguehobyry keba.

<sup>12</sup> Koendâpa ani mârâ tuantay tadawyly kopâ tapezenreim ume. Agui pepi oday âsewaniwâni modo ani târâ xina eydâ atodâ inepa tâxiguedyze awylymo. Awylygue ani aguelymo:

– Tâlâ tarâ Cretadâ eagonro tuanta Fenice keho. Mârâ tuantadâ ise sapezenru kopâ agonro kiankadyly – kelymo.

Sapezenru ton-honreim tuanta Fenice einkâ nakabyra awyly, nordeste, sudeste warâ eynynâ awylygue.

### *Kopâ tapezenreim saintobyry*

<sup>13</sup> Tuanta Koendonrodâ xina awyly umelâ ani, sul eynynâ adapezeinly ton-honre kubalâ. Mârâ sapezenru wâgâ pepi oday tâwanuneim modo aguelymo ani:

– Inoro. Kytâdyze kydatoram ise xirâ sapezenru kadyly – kelymo.



Aituo ani pepi epagunâdo, âncora keho, nhaunâdylimo. Ilâ aienibyryem ani xina âxiguely Tuanta Koendonrodâpa. Creta edazekâlâ ani xina sakadyly.

<sup>14</sup> Inepa kehoem ani sapezenru âtuguguely. Xina yan-yam adapezeinly idyly. Nordeste eynynâba ani sapezenru âewyly, xina enâmize.

<sup>15</sup> Toenzepa kehoem ani xina yan-yam adapezeinly. Pepi oday tâwanuneim modo nhatoem nudupa lâgâlâ. Aituo napyra idylimo. Sapezenrulâ pepi sani tâtâho yan-yanlâ.

<sup>16</sup> Ilha imeimbyry Cauda isulry eynynâ ani xina sakadyly. Tâinkâ ani sapezenru ton-honre kuba awyly. Pepi imâsedo ihu wâgâ, pepi imeimbyry ekâjibybe ani. Paru tâsaniguenry oze tâdâtâho ani mârâ pepi imeimbyry. Tahuleba kehoem ani pepi imâsedo oday tâwanuneim modo pepi imeimbyry sasery nhawâdylimo, pepi imâsedo odaji tiempâguehomoem.

<sup>17</sup> Pepi imeimbyry sawânipryem ani pepi imâsedo odaji nhedylymo. Líbia iwaguepa, paru tâsaniguenrybe myani toenzepa myenraym sagunupe atodâ. Aituo ani aguelymo:

– Sapezenru pepi nhadyly paru tâsanigueba atoam watay, pepi epaguze sagunu myen-rano wâgâ. Kientyba ise kurâ-ro warâ – kelymo.

Aituo ani panu imâsedo modo, vela keho, nhenâtâguylymo. Sapezenruanlâ pepi adaholy.

<sup>18</sup> Sapezenru ton-honreim nakabyra lelâ. Paikaylâ pepi âzekânioly ton-honre kehoem. Kopaelâgâem ani pepi odano modo tâmânreim modo paikaji nhamelymo, tâmânrugue pepi nytyba itoem.

<sup>19</sup> Aisezedyly lelâ ani sapezenru. Kopaelâgâem ani tâwanuneim modo pepi oday tâwaneizeim modo nhamuilymo paikaji, korenty modo, sapezenru sawâto modo, awârâ modo. Kâmaynoenlâ olâ ani xina.

<sup>20</sup> Kopaelâgâembaba ani iamu. Peto oday xina xixi nepyra. Kopae xina ximukâ nepyra warâ, ton-honrelâ kopâ tapezenreim ihuguely awylygue.

– Kydâsemaguewâbyra ise kurâ. Idânârâ ise kityly – xina kely ani.

<sup>21</sup> Iweâpa ani pepi imâsedo oday tâwanuneim modo toenzepa âseguâdâdylimo. Âwinduatomoenlâ nudupa lâgâlâ ani. Aituo Paulo XYDYK idyly akaemo enado. Eyanmo aguely:

– Nhaum, Cretadâ kydatay aguehobyry enanâguewâdaungâ: “Toenzepa âsenagazeze kurâ, kâpagubyra kurâ-ro watay” ugue. Tuanta Koendonro keho Cretadâlâ kâpagudyly-ro watay, xirâ pepi isejiguy modo, âdydo imeom pepi odanopyry modo warâ kianmewâbyra tâise kurâ; arâ kehoem kydâsenagazedaymba tâise kurâ warâ.

<sup>22</sup> Tâegane itaungâ! Ânguy niguwâpyra ise. Pepi lelâ ise adakalagueim – kely.

<sup>23</sup> – Deus eynynâ wato aini modo yam nutuen-hoanguil. Kopae anju kaynonro nâepanâgueagui yam.

<sup>24</sup> Warâ enra aguely: “Paulo, tyanepa ikâ. Iwerâ kehoem âiguwâpyra ise âmâ. Pymâ kuru Roma donro enadoram idâze wao âmâ. Koendonro awâkâ Deus. Awylygue ise nhetâlâ awyly. Âmâ, agâ idâwâni modo warâ nhesemo lelâ” keanry yam.

<sup>25</sup> Awylygue olâ ton-honre itaungâ, uguely. Deus einwânni urâ. Anju aguehobyry ara aiese mâkâ.

<sup>26</sup> Âsemagueze lelâ kurâ idânârâ. Xirâ pepi âdykâlâ myenraym sagunu wâgâ epaguze – kely ani Paulo.

<sup>27</sup> Azagâ semana ani mârâ sapezenru ton-honreim xina saseze awyly parutabâ Mediterrâneo oze. Kuetâji awârâem ani pepi oday tâwanuneim modo onro iwaguepa taindyly awyly nhutulymo.

<sup>28</sup> Aituo ani târâ paru esanigu nhekudylymo. Tâdyreim paikaji nhamelymo, iopirydâ emâihobeom, tâsanigue awyly eto; trinta e seis metros myani esanigu. Ilâpygueduo ani nhekudondylimo. Tâsanigue kuruba myani, vinte e seis metros kulâ.

<sup>29</sup> Onro onwa tâidyly awyly nhutulymo kuru ani. Paru emelay pepi tuhu imâsedo onwa âsemyly waunlo ara tienehonduomo ani toenzepa kehoem âseanedylimo. Awylygue quatro lelâ pepi epagunâdo nhekâjilymo; pepi ihu wâgâ paru ikaji nhamelymo, âdanipyra itoem.

– Inepa imekâ, xirâ korenty pepi epagunâdo ekâjiho adatâly iraynâlâ – kelymo myani.

<sup>30</sup> Pepi oday tâwanuneim modo pepi odayba tâsemaguedyzemo ani. Aituo ani pepi imeimbyry paikaji nhamelymo, ioday tâwientoem. Tywymâry enokuze kelymo myani. Warâ myani eyam aguelymo:

– Pepi ioruram xina idâly, xirâ tâmânreim epagudo xytâguyândonze, nâxigueba itoem – kelymo; kewâdylimo kulâ olâ myani.

<sup>31</sup> Pepi imâsedo odayba âwiense kelymo awyly tutuze olâ myani Paulo. Aituo ani Roma donro sodadu domodo iwymâryram aguely:

– Xirâ pepi oday tâwanuneim modo âwiense kelymo. Ânguy nâwiempyra nidâ. Âwiendylimo-ro watay, âdara mâsemaguewâbyra ise âmaemo – kely.

<sup>32</sup> Agueduo ani sodadu domodo pepi imeimbyry ekâjiho nhatâlymo, tâwâlâ idâhoem.

<sup>33</sup> Emedylylâ ani Paulo idânârâ tonlo modoram aguely:

— Âwinduataungâ wao. Iweâpa keankâ xirâ koendâpa kydawwyly azagâ semanabe. Xirâ ara koendâ mâwinduapyra mawwylymo.

<sup>34</sup> Âwinduataungâ wao, on-honwandomoem. Tyanepa itaungâ. Ânguy niguwâpyra ise. Âda kydâiehowâbyra ise kurâ. Tokalâ kyangahudulâ kianmehonwâbyra ise kurâ — kely ani Paulo eyanmo.

<sup>35</sup> Agueypyem ani Paulo pão nhanâdyly.

— Tuomare urâ, xirâ pyni mâunduhobryr wâgâ, Pabai — kely ani Deusram, idânârâ kurâdo enanaym.

Adâkebygueduo ani pão nhepâdyly, nhedawynly lâpylâ warâ.

<sup>36</sup> Nhedawynly tientuo ani ago kuru egamadylymo. Nhedawynlymo lâpylâ.

<sup>37</sup> Agui ani xina mârâ pepi imâsedo oday awyly, duzentos setenta e seis kurâdo lelâ.

<sup>38</sup> Xina nhedawympygueduo ani, trigu saku odano modo idânârâ kehoem nhamelymo paikaji, pepi ionupadoem.

#### *Pepi imâsedo atuhobryr*

<sup>39</sup> Emetybyem ani pepi oday tâwanuneim modo iwague kuruba onrodâ tawly nhedylymo, âdykâ tawly nutubamo olâ ani. Paru epagudyby emyenro sagunupeom ani nhekyllymo.

Aituo ani aguelymo:

— Kaintuo, pepi târâ kyzepagunâne — kelymo.

<sup>40</sup> Pepi epagunâdo ekâjiho tatâzemo ani. Pepi imâsedo ihugâiguerim “leme” keho ekâjiguwânmo lâpylâ, pepi sase tâkewâdomoem. Ilâpygueduo ani panu imâsedo nahlokuândylymo lâpylâ, sagunu onwa sapezenru pepi imâsedo nhatoem.

<sup>41</sup> Pepi olâ ani sagunu onwa naimpyra. Paru tâsaniguenrydâ epagudyly lelâ. Sagunu myenrano onwalâ sakubyly. Ioru ton-honre kehoem myani sakubyly âzetyrin-emba kehoem. Paru sahgânû olâ ani ton-honre kehoem pepi onwa idâly. Awylygye ani ihudâ nhatyly.

<sup>42</sup> Sodadu domodo ani akaemo etadâdyby modo idânârâ xyâwâse kelymo, tywâre sagunu onwa nâsemagueba itomoem.

<sup>43</sup> Iwymârymo Júlio olâ ani Paulo iguedyseba-ro warâ. Awylygye ani tyzodadury modoram aguely:

— Kâdyâwâtaundâmo — kely.

Warâ ani tâtaguneim modoram aguely:

— Adamewâdaungâ paikaji, sagunu onwa mydâhomoem — kely tywâruneim modoram.

<sup>44</sup> Ilâpyryem ani aguely tywârenry modoram:

— Paikaji adamewâdaungâ. Tâbua wâgâ, pepi epiry adakalagueyby wâgâ warâ adawâtaungâ, sagunu onwa mydâhomoem — kely ani eyanmo.

Warâ ani xina idânârâ saindyly sagunu onwa; ânguy niguepa ani pepi atuduo.

## 28

### *Ilha Malta kehodâ Paulo atobryr*

<sup>1</sup> Onroram xina saintuo, tonlo modo xina iose tâtâzemo ani.

— Âdy kehoka xirâ ilha? — xina keduo,

— “Malta” xirâ ezedy — kewânmo.

<sup>2</sup> Koendâ kehoem ani xina nhedaenkulymo. Kopâ ihuguely, toenzepa igâwynu warâ ani. Awylygye ani peto nhatygylymo sagunu wâgâlâ.

— Âetaungâ. Âuntaungârâ — kelymo xinaram.

<sup>3</sup> Se iladyby tindâtygyby Paulo nhamely peto onwanji. Âgâupe myani mârâ peto duay. Peto âdâpigu tiuntuduo keanra ani mâkâ âgâu se iladyby modo duaypa egasely. Paulo se peto onwanji nhamely ume ani emarydâ âdâholy.

<sup>4</sup> Tonlo modo Paulo emary wâgâ âgâu adasedâdyby tientuo ani aguelymo:

— Kyârimary keanra awâkâ uguondo. Paru tâsanigueindâ tâiguely ume nâsemagueagui wâne, âgâu nhântybyem olâ ise nâsemagueba — kelymo.

<sup>5</sup> Aituo ani Paulo mâkâ âgâu nhahogudyly peto onwanji. Tâtobryr newânebyra ani.

<sup>6</sup> Emary sakyzely, iguely warâ myani nhenuengulymo. Âdalâ idyly enuenzezemolâ myani. Paulo olâ ani âdanipyra. Âdapa awyly tientuo myani, tunâry nhugukelymo.

— Uguondo mâkeba awâkâ! Kiyrenkyly deus awâkâ! — kelymo.

— Aramo, uguondolâ urâ — kewâm olâ Paulo.

<sup>7</sup> Aituo ani mârâ ilha donro pymâ, Públio keho, xinaram aguely:

– Inoro ietyram – kely.

Uguondo tynrenseim myani mākâ pymâ. Eonronrudâ iwaguepalâ myani xina âundyly sagunu wâgâ. Aituo etyram xina idâly. Koendâ kehoem ani xina nhedaenkuly. Azagâ tokalâ warâ iguandyly ara ani târâ xina awyly.

<sup>8</sup> Nhunwym tâwâne myani. Tykyho wâgâlâ myani egueky, iaturu, ixigu warâ. Tâwâneim eguetonra Paulo tâwânse ani, Deus agâ agueze:

– Deus, tutuzelâ âmâ merâ uguondo ewânu. Kua iekâ wao – kely.

Deus agâ agueypyem, nhangahu onwa tâmary MÂ' nhedyly. Warâ Deus eon-honrugue kua nhedyly.

<sup>9</sup> Toenzepa ani târâ Maltadâ tâwânuneim modo. Pymâ Públio nhunwym kua ienipyryem awyly tiuntuduomo ani Pauloram âewylymo idânârâ kehoem. Aituo kua âieholymo Deus eon-honrugue.

<sup>10</sup> Tonlo modo ani koendonro kuru xina agâ. Toenzepa âydo imeom xinaram xuduwânmo. Târâpa xina idâly ume, idânârâ xina ize ato modo xuduwânmo.

*Malta donropyryem Paulo Romaram idâhobyry*

<sup>11</sup> Azagâ tokalâ warâ nunâ ani xina Maltadâ awyly. Pepi imâsedobe ani târâ tuantay. Xidadâ Alexandria donropyryem saintyby myani mârâ sapezenru ton-honreim adaguly iraynâlâ. Akaemo ideusry gêmios ekudobe ani mârâ pepi iorudâ, Zeus imeom azagonropyry ekudo, Castor, Pólux warâ.

<sup>12</sup> Aituo ani xina mârâ pepi imâsedo odaji âxiedyly. Xina saindyly ani Siracusaram. Azagâ tokalâ warâ emedyly ara ani xina târâ awyly.

<sup>13</sup> Siracusa dompyryem ani xina Regioram idâly. Myarâ saintybyem, kopaelâgâem ani sapezenru âewyly xina ikaynâ. Régiodâpa egaseybyem, azagâ iguandyly wâgâ ani xina saindyly Pozuoliram\*. Pepi odayba xina âzetyly. Tuhuru wâgâ xina idâly.

<sup>14</sup> Jesus einwânmi modo ewy xina iomâ târâ. Ekamâmo eagâmolâ xina itoem. Aituo ani tokalâ semana târâ eagâmo xina nhakadyly. Tonlopyryem ani tuhuru wâgâ xina idâly Romaram.

<sup>15</sup> Romadâ Jesus einwânmi modo xina saindyly egary tydasemo myani. Tâlâ xina inwânwânse idâwâtyby modo praça Âpio keho idâwaym. Tâlâ lâpylâ “Azagâ tokalâ warâ âydo imeom vende ieto” kehodâ xina inwânwânmi modo warâ. Akaemo tientuo, Paulo iomazely. Aituo Deusram aguely:

– Koendonro âmâ xina agâ, Pabai – kely.

*Romaram Paulo saintobyry*

<sup>16</sup> Romaram xina saindyly ani. Aituo ani Pauloram aguelymo:

– Xina kadeia odaxi itadâdaymba ise. Tâwâlâ âtâ mâxidâdoem mâempywaguly ânwingâ. Sodadulâ ise inuagaeni, mâsemagueba mitoem – kehonly.

<sup>17</sup> Azagâ tokalâ warâ emepygueduo myani Paulo judeu domodo iwymâry modo Romadâ tâtyuneim modo ingâsedaynly, eagâmo adâkehoem. Tyam idâduomo, warâ myani eyanmo aguely:

– Nhaum, tydaselâ keanra âmaemo judeu domodo Jerusalémdâ ienwentâdo. Kype-mugudo judeu tonlo modo idueryem âdawipyra olâ urâ. Kydamudo aitobyry aralâ awidyly. Arâ awidyly umelâ olâ keankâ tonlo judeu domodo yagâ iewiâkyomo. Ietadâdâmo târâ Jerusalémdâ. Pymâ domodo Romadâpa igonotaymby modoram iegamemo warâ.

<sup>18</sup> Idânârâ agânhetyby wâgâ yapâiguemo, idânârâ yapâiguehomobyry xihogu-ro warâ. Auguely tindatuomo, “Âdy inwentâdo lâpeba âmâ” nyguemo. Umoze nyguemo. “Âda mitobyry lâpeba âmâ âiguehoem” nyguemo warâ.

<sup>19</sup> – Judeu domodo olâ keankâ ietaguedyzebamo. Aituo keankâ tonlo pymâ modoram aguely: “Romaram ugonotaungâ Kywymâry César-ram. Mâkâ lelâlâ ise aguenri, inakanhe, inakanhempa warâ awitobyry wâgâ” uguely keankâ eyanmo. Awylygue tarâ Romadâ wawyly, ywâgâlâ agueze, ihoguze warâ, ypemugudo judeu domodo ewentâgueze inkâba.

<sup>20</sup> Awylygue âgâsedylymo, agâmo kâatunâguedoem. Tutuzelâ âmaemo, iweâpalâ kydamudo Deus Ingonokyly saindyly inwânwânseze awylymo. Deus Ingonotyby eynynonro urâ. Kydamudo inwânwântyby kâinwândylygue olâ, iwerâ korentygue kehoem ekâjibyem wawyly – kely myani Paulo.

<sup>21</sup> Aituo myani aguelymo:

– Xina olâ awârâ âdykâ nidapyra. Âdylâ katalâ nigonotaymba inanry xina ipemugudo Judéia eynynonro âwâgâ aguenri. Judeu tonlopyry modo xarâ âetyby ânâguedaymbamo inanry.

\* 28:13 Poteoli lâpylâ myakâwândy mârâ âji ezedy.

<sup>22</sup> Xina nhutuly, tâinkâ leləba, mâinwânto ara einwânni modo eynynâ inakanhe aguelymo lelə. Awlylygue mâinwânkyly wâgâ âmâlâ amyguely xina tindadyse ato – kelymo myani.

<sup>23</sup> Aituo Paulo agâ âseinwândylymo, Paulo agueho tindatomoem. Adâkehomybry saintuo, Paulo eydâ atoram idâondylymo. Iweâpa Paulo eagâmo agueze awyly. Emedyly wogonropyrylâ, até kopae kehoem Jesus wâgâ unâ egatuzeze awyly, enomedâzemo. Kywymâryem Deus idyly wâgâ myani aguely eyanmo. Deus, “Igonose urâ” kehobry wâgâ Moisés inweniby, Deus eynynâ aguewâni modo inweniby warâ tânanâguen-honze myani.

– Deus Ingonotyby awâkâ Jesus – kely myani eyanmo.

<sup>24</sup> Tâlâ myani Paulo, Jesus wâgâ aguehobry einwânni modo; tâlâ pylâ olâ myani Jesus, Deus Ingonotyby awyly einwântânry modo.

<sup>25</sup> Aituo idânârâ idâlymo, âjigüe tâtunâgueze. Egasedaymo myani Paulo eyanmo aguely:

– Kydamudoam Deus Ispiritury aguehobry Isaías inweniby enanâguewâdaungâ:

<sup>26</sup> “Âpemugudoram aguera:

‘Deus aguely idadylyem tydase âmaemo,  
mâuntuba olâ âmaemo.

Edylyem Deus anhekyly tâense âmaemo,  
âdaidyly mâuntuba olâ âmaemo’ kekâ eyanmo.

<sup>27</sup> ‘Unâry mâinwâmpyra âmaemo,  
mâinwândyseba mawylymoguelâ.

Âyanmo auguedyse wato mâindapyra âmaemo,  
mâindadyseba mawylymogue.

Agânhekyly mâuntuba âmaemo,  
mâuntudyseba mawylymoguelâ.

Mâjiwantahulymo, mâzepâinlymo waunlo ara lelə.  
Arâpa watay, augueho tydase tâise âmaemo.

Agânhekyly tutuze tâise âmaemo.

Ynynonroem tâitonze tâise âmaemo.

Imakedâmo tâise urâ-ro warâ’ ”

kewândymy Deus, Isaíasram – kely myani Paulo.

<sup>28</sup> Paulo eyanmo agueondyly myani:

– Judeu keba modo Deus itaumbry tydase awyly xutuwâdaungâ. “Kâmakerin-em Jesus iguely” kely indadylymo-ro watay, einwânsemo. Deus inakanhe aitomobry xygakeze warâ – kely myani Paulo.

<sup>29</sup> [Paulo aguepygueduo myani judeu domodo idâly. Ton-honre kehoem âjihogulymo Paulo eynynonro modo, Paulo eynynonro keba modo warâ.]†

<sup>30</sup> Azagâ anos ani Paulo Romadâ awyly, âtâ tâpywazeim oday. Koendâ lelə myani tyam idâwâni modo nhedaenkuly.

<sup>31</sup> Idâduomo myani Deus pymâem idyly wâgâ aguely eyanmo. Pymâ Jesus Cristo wâgâ tonomedâzemo lâpylâ myani. Tyanepa myani aguely eyanmo. Unâ koendonro Jesus wâgâ aguenri negatuen-homba nipyra myani akaemo pymâ domodo.

Alâ kulâ kâinwenily.

Lucas

† 28:29 Idânârâ livru saguho modo wâgâ iwenibyemba xirâ.

## ROMANOS

### Paulo Kata Inweniby Roma Donro Modoram

Xirâ kata wâgâ inwenily Paulo nhangahu odaji iemâmy Deus. Awlylygue Deus itaumbryrÿlâ xirâ Paulo inweniby. Jesus einwânni modoram myakâwândy inwenily-ro warâ. Unâ Jesus Cristo wâgâ agueim koendâ akaemo nhutudyze myakâwândy Paulo. Romaram nâtâba tawlyly umelâ myakâwândy xirâ kata inwenily. Awlylygue myarâ tâtâdyze tawlyly wâgâ inwenily, eyanmo IU ise.

Xirâ kata wâgâ Paulo tywenize âdara kydâsemaguely awlyly. Idânârâ kurâ Deus izepa ato adyese lelâ kurâ. Awlylygue Deusdâ iwague kydawlyly. Jesus iguely myakâwândy, inakanhe aguitobyry xygakehoem. Toenzepa kywynedylygue Deus kâmakely. Jesus kieinwântuo lelâ kydâsemaguely, âdy kydâsemaguehoem aguienkyly lâpeba. Deus nhemakeybyem kydawlylygue; Satanâs aguiendyse ato aguientaymba kurâ iwerâ. Deus Ispirityry kagâlâ awlylygue, Deus kieinwândyly, ize ato aguiendyly warâ. Jesus einwânniem kituo, Moisés tâzezewenry inweniby amaymba kidyly. Kata xypyryem, Paulo tywenize, âdara Jesus einwânni modo tagonro agâ âzedlyly awlyly wâgâ, pymâdo aguehobyry kiankabyra kydawlyly wâgâ warâ.

#### *Paulo xunâry adaguho*

<sup>1</sup> Urâ Paulo, xirâ kata âyanmo iweninri, Cristo Jesus emary. Mâkâ wâgâ aguenriem igonotyby urâ. Deuslâ uduakeim, ygâseni warâ, tânkâ lelâba unâ iwâkuru tâdâsemagueho kâengatuhoem.

<sup>2</sup> Deus aguewândymy: “Unâry koendonro tânkâ lelâba ise âzegatuoly” kewândy. Saguhoem mâkâ itaumbryry egatuwâni modolâ mykâinane xirâ unâ egatuim, Jesus saindyly iraynâlâ, Deus itaumbryry awo wâgâ iwenibyem.

<sup>3</sup> Jesus Cristo Deus imery kywymâryem idyly wâgâ. Onro anaynlâ iazely karalâ. Davi iwerÿpyry mâkâ; saguhoem judeu domodo iwymâry tynrenseim myakâwândy Davi.

<sup>4</sup> Kurâem wâne myakâwâm Jesus, Deus lâpylâ olâ mâkâ. Tunwym agâ âzekiba, eon-honru, enomegu, xynru warâ; âdaunloenlâ Deus izepa ato anientaymba. Iguewâm lelâlâ, toenzepa ton-honruguelâ olâ Deus, kurâem ietonmâ. Deus imerylâ lelâlâ Jesus awlyly xutuholâ myakâwâm mârâ.

<sup>5</sup> Deus yagâ koendâ tawlyly nhenehonly, mâkâ iemakely warâ, âdy agânhetyby wâgâ inkâba, yagâ koendâ tâidyse tawlylygue. Cristo wâgâ ani Deus ugonodyly judeu keba modoram xurâem agueze. Idânârâ âtâ anakonro modo tytaumbryry indadyly, tâinwândyly, adâkehobyry anhedylymo warâ mâkâ ize awlyly.

<sup>6</sup> Âmaemo Roma donro modo myakâwândy Deus ingâseguly, Jesus Cristo xurâem mitomoem.

<sup>7</sup> Awlylygue xirâ kata âyanmo kâinwenily. Toenzepa âwynedylymogue, Deus âduakelymo xurâem mitomoem.

Âynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânimo peba nhetoem warâ.

#### *Paulo Deus agâ aguehobyry*

<sup>8</sup> Warâ kely ise ygary kanguho. Tânkâ lelâba âmaemo Roma donro modo toenzepa Jesus mâinwândylymo kely egary. Awlylygue, Jesus Cristo kurâem anhetyby kâenanâguelygue inanry, Deus agâ âwâgâmo auguely kâinmoly wipyra wawlyly: “Toenzepa womaru, âynynonro Roma donro modo egary kâindatuo. Koendâ inanry eagâmo mawlyly, Pabai” uguely inanry.

<sup>9</sup> Idânârâ yangahu oday unâry tutuze Deus; âkealâ auguely awlyly tutuze. Tutuze Deus, kopaelâgâembaba âynynâmo eagâ auguely awlyly. Inanânehonwâbyramo urâ. Tygüigue kehoem inanry Deus imery Jesus Cristo wâgâ unâ iwâkuru kâengatuly aguedyse wawlylygue kehoem.

<sup>10</sup> Deusram auguely: “Udâdyse winase Romaram, tonlo modo âynynonro modoram adakobâze, nudupa olâ inanry. Âmâlâ udâdyse donro watay, inepa udâhoem kâenkadyly” uguely inanry eyam.

<sup>11</sup> Toenzepa nhedysemo wawlyly, Deus Ispirityry ienomedâdobyrygue inomedâdomoem, ton-honre lelâ Jesus mâinwântomoem, Deus aguehobyry aiese ton-honre mitomoem warâ.

<sup>12</sup> Arâ kagonro agâ kydâzeon-hondâne, koendâ lelâ Deus aguiendyse ato aguienmoem. Ton-honre lelâlâ ise Jesus mâinwândylymo, urâem anhetyby egary mâindatuo. Ton-honre lâpylâ ise kâinwândyly, âmaemoem anhetyby egary kâindatuo.

<sup>13</sup> Cristo eynynâ ypemugudo, mâuntudyzemo urâ, toenzepa lelâlâ udâdyse wawyly, aun-lolâ udâpa witoem aienehoimbe olâ. Ywâgâlâ, Jesus mâinwânsezedomoem Deus anhenehondyze urâ, tâinkâ lelâba judeu keba modo agâ aitobyry ara. Xirâ mawânâ iewanu mâkâ xurâem.

<sup>14</sup> Tâinkâ lelâba iwâgâ auguehoem ugonomâ Jesus Cristo. Awylygue idânârâam kêngatuly tonomegheim modoram, tonomeguenry modoram, pape itainly, iwenily warâ xutuwâni modoram, xutudânry modoram alelâ.

<sup>15</sup> Awylygue Romaram udâdyse wawyly, unâ koendonro Jesus wâgâ kêngatuhoem, âmaemo atonlo modo koendâ mâuntuhomoem lâpylâ.

*Kydâsemaguehoem unâ iwâkuru Jesus wâgâ kyjidane*

<sup>16</sup> Tâinwânse urâ, âkeâ lelâlâ, unâ iwâkuru Jesus wâgâ einwânni modo tâmakeze Deus awyly. Ton-honrugue mâkâ kâmakely. Awylygue tywypazeba xunâry kêngatuly; tadawize urâ xirâ kêngatulygue. Waurnoem kuru xirâ unâ âzegatuoly myakâwâm judeu domodoram, ilâpyryem pylâ judeu keba modoran-ro warâ.

<sup>17</sup> Jesus wâgâ egatuyby kindatuo lelâ mawânâ âdara Deus xurâem tâwentâguezeba ky-dawly kiuntuly. Mâkâlâ mawânkâ wakeim: “Jesus einwânni modo lelâ kênmakely” keim. Aituo mâkâ Jesus einwânni nheinwânsezedily-ro watay, Deusram nâzewentâowâbyra ise. “Deus tâwentâguezeba kêendily, mâkâ kieinwândilygue lelâ, âdaunloenlâ eagâpa kydâiehowâbyra ise kurâ-ro warâ, onro anaym kydawlyly ume, kyigueduo alelâ” kely iwenibyem Deus itaumbry wâgâ.

*Deus izepa ato aiedily wâgâ agueho*

<sup>18</sup> Toenzepa kurâdo inakanhe aidylygue Deus tyewiâky enehonze. Awylygue âsenagazedomoem anhenehonly, âdalâ kulâ aidilymogue, aguelymogue, nhangahumo oday xunâgomo wâgâ warâ. Deus itaumbry âkealonro tâinwânseim tindadysebamo, mâkâ izepa ato aiedily timodyzeba tawylygue, kurâ domodo unâ indadysebamo lâpylâ warâ. Indadylymo-ro watay, tutuzemo tâise âdara tâsemaguely awyly Jesus tyeinwântuo.

<sup>19</sup> Tâlâ tawyly, koendonro tawyly, ton-honru, tonomegu warâ xutuen-honwânâ Deus, xirâ anano modo olâ tiuntudyzeba. Awylygue ise Deusram âzenagazeolylo.

<sup>20</sup> Kaudily umelâ, tiungutyby modo wâgâlâ Deus âdaunloem tawyly nhutuen-honly. Tâenseim keba lelâlâ wâne, nhugutyby kientuo olâ, tutuze kurâ, toenzepa ton-honreim awyly, âdaunloem awyly warâ. Onro wogonro modo, kau wogonro modo, paikano modo warâ kientuo, tutuze kurâ, Deuslâ idânârâ xugunipyry awyly. Awylygue ânguy, “Âdaunloem tawyly kiuntuhoem nenehonwâbyra Deus” kehoem nuduwâpyra.

<sup>21</sup> Deus tâlâ awyly, tutuzemolâ wâne, xurâ keba modo olâ nyrempyramo. “Koendonro lelâlâ âmâ; koendonro adyese âmâ xina xurâem” kepamo warâ Deusram. Tâkuâguemolâ Deus wâgâ imâem kehoem; âdakulâ nhangahumo oday xunârymo. Iamu oday adakobâni âdykâingâ tâtâly awyly xutudânry aramo, koendâ Deus wâgâ nutuba tawlymogue.

<sup>22</sup> Tonomegue wâne âdutulylo, tuândyem lelâlâmo olâ. Deus wâgâ koendâ tutuze wâne, tânanajimo, iozepa kulâ arâ tyangahu oday xunâgumo.

<sup>23</sup> Deus Iguedânry tâise nhehogueguylylo, ânguydo imeom ekudo xygatyby kulâ olâ nhehogueguylylo; kurâ ekudo, konopio ekudo, onwâgâ ârahujini ekudo warâ kulâ nhehogueguylylo. “Deus merâ” tâkeze tyngapygueduomo.

<sup>24</sup> Tynrempyramo awyly tientuo myakâwândy Deus aguely: “Auguehobyry lelâ aniempyra awlymogue, tâwâlâ inakai, kywypado warâ adiendyse tato aniendâmo. Adâitobyry aralâ ise âsebywadylylo” kely. Awylygue mawânkâ akaemo toenzepa kywypado tagonro agâ anhedylymo.

<sup>25</sup> Deus idânârâ tâlânro modo xugunipyry tâise nhehogueguylylo. Aypa olâ, tâwâlâ tyngatyby modo kulâ nhehoguedilylo. Iozeno Deus agueho neinwâmpyramo, iozepaom tyeinwântoem. Deus mawânkâ aunloenlâ tohoguezeim kuru.

<sup>26</sup> Arâ aidilymogue myakâwâm Deusram ododokeolylo. Aguely myakâwâm: “Tâwâlâ kywypado, tywykeim warâ adiendyse tato aniendâmo. Adâitobyry arâlâ ise âsebywadylylo” kely. Awylygue kywypado anhedylymo. Pekodo modo, uguondo lelâ waypa nhy-nanâguylylo; pekodo, pekodo agâ kulâ idily.

<sup>27</sup> Kywypado adyese lâpylâ uguondo modo. Uguondo, uguondo agâ kulâ idily warâ. Peto ehoru nhântânry emyenrope ioday-ro waunlo ara akaemo. Awylygue pekodo lelâ waypa nhy-nanâguylylo awyly. Kywypado kulâ anhekylymo; todo kulâ olâ inakanhe nhekylymo. Arâ adâidylymogue tâwâlâ tâsenagazedo kulâ ise anhekylymo. Ewâmasemo mawânkâ inakai adientyby wâgâ.

<sup>28</sup> “Tuândy lelâ Deus wâgâ tiuntudyzedo; kyzenanânehonre mâkâ” kelymo. Aituo Deus âdakepa idily: “Tâwâlâ kywypado, inakai kehoem adiendyse tato aniendâmo. Adâitobyry aralâ ise âsebywadylylo” kely.

<sup>29</sup> Toenzepa lelâlâ inakaigumo. Toenzepa inakanhe adâito timodyzebamo. Pymâ domodo, Deus warâ aiedyseba ato adienysemo. Toenzepa âdyem tâidysemo. Tâdâtyzedily kelymo. Tâdâdyâly kelymo. Iduekumo; aunlolâ âjihogulymo. Iozepa aguelymo, konokudylymo. Inepa kehoem iewiâpadylymo adâkely einwântânry modo agâ. Âkelomo kulâ nhoraguekylymo, tynnonro keba kulâ âtynanâdomo.

<sup>30</sup> Âkelomo nhunâgedylymo. Âdaunloenlâ Deus izepamo. Inwykelymo, tyewiâse lelâ tâjitanru in-hogulymo. Sawoem idylymo. Tywâgâ toenzepa aguelymo; “Tutuzeim xina” kelymo. Toenzepa inakai adienkyly wâgâ kulâ âpaunzedilymo. Tunwym, tyze warâ aguely neinwâmpyramo.

<sup>31</sup> Koendonro tiuntudyzebamo; koendonro watay, xurâmoem inakai; inakai pylâ xurâmoem koendonro-ro warâ. “Aiese urâ” tâkehobyry aniempyramo. Ânguy izetonro kebamo. Turâem inakanhe aityby nenanânehombamo, tâpeânzemo. Ânguy nityembyramo.

<sup>32</sup> “Arâ kulâ aitaynrim modo âsenagazeze. Tyigueduo, ydâ iwaguemo ise” keppyem, Deus awyly tutuzemolâ. Arâlâ olâ, Deus izepa ato aiedily nimopa awylymo. Adâito ara âkelo modo aituo iomarumo lelâ.

## 2

### *Izepa tato aieni modo enagazenehonze Deus*

<sup>1</sup> Âmaemo xirâ kâinweniby itainrim modo, “Inakai aieni modo tâwâlâ nâsenagazedâmo” tâkeze wâne âmaemo. “Tâwâlâ nâsenagazedâmo” mygueduomo, inwentâdomo lâpylâ olâ amyguehomo, earamo lâpylâ mawylmoguo. Akaemo inakanhe aito araba wâne ilema-ro.

<sup>2</sup> Izepa tato aieni modo nhenagazenehonduo, tutuze kurâ, Deus iozeno lelâ aieni awyly.

<sup>3</sup> “Akaemo inakanhe aito ara ini modo akaemo alelâ ise Deus nhewentâguyly. Urâma ise kâsenagazebyra” tâkeze âmaemo. Tâdâsenagazedo amaymba mâsemagueba olâ ise âmaemo, Deus mâinwâmpyra matomobyry wâgâ.

<sup>4</sup> “Izepa wato anhedylymoguo kulâ inepa kehoem kâenagazenehonlymo witaymba ise urâ” kepyem Deus. Awylygue mawânkâ mâkâ agâmo koendâ awyly, alâ kulâ newiâpabyra awyly warâ, izepa ato amânhetuomo. Arâ awyly, xurâem modopâdomoem, inakanhe amitomobyry wâgâ mâjityendilymo mawânkâ ize ato, amânhepyra midilymo-ro warâ. Âmaemo olâ mâuntubamo, âdaitoem Deus inepa inagazenehombamo awyly. Awylygue amyguelymo: “Deus izepa ato aguyjiesezeze lelâ; kânagazenehomba awylylâ ise mâkâ” myguelymo.

<sup>5</sup> Toenze kulâ tâeganeim keba olâ âmaemo. Izewenrymo Deus izepa ato aiedily mâinmodyzeba âmaemo. Inakanhe amisezedilymoguo, mâsenagazedomo imâem mânhesezedylymolâ. Xypyry etay, âdaunloem kydawyly Deus nhetay, ioze lelâ ise mâkâ aidily, tâinwântânrybyry modo nhenagazenehonly, tynnonro modoram ise koendonro nhuduly warâ.

<sup>6</sup> Onro anaym aguityobyry ara, aguykehobyry ara warâ ise kydâsebywadyly.

<sup>7</sup> Tâlâ Deus ize ato aiedily imodânry modo. Mâkâ aguehobyry tiankadyze inkâbamo. Iweloem tâitondily ize atomo, imâem Jesus Cristo ara tâitomoem. “Koendonro âmaemo” tâkehonduzemo Deusram. Deus tâmakedyzemo, typygueba kehoem eagâ tâitomoem.

<sup>8</sup> Tâlâ olâ Deus ize ato adienysebaom modo. Deus itaumbry âkealonro tyeinwândyse inkâbamo. Adienyse tato kulâ anhekylymo; adienkyly Deus ize, izepa warâ awyly tiuntudyzemo inkâba. Arâ kulâ aitaynrim modo agâ tyewiâseba nitaymba Deus, enagazenehonzemo-ro warâ.

<sup>9</sup> Idânârâ adâkehobyry sakanibyry modo enagazenehonze Deus. Adahulizemo, âjityenzemo warâ, judeu domodo, judeu keba modo alelâ.

<sup>10</sup> Tâinwânni modo xurâem olâ ise Deus nhuduly ehogumo, iomarumo, ekobyzeguelymo warâ, Jesus Cristo ara itomoem, judeu, judeu keba alelâ.

<sup>11</sup> Âzekiba lelâ mawânkâ Deus idânârâ nhedyly, âkeloem mâkâ nhedyly, mâkâ âkeloem warâpa.

<sup>12</sup> Deus, Moisésram tâzezewenry inwenien-hoymby lâpeba judeu keba modo. Alâ olâ ise Jesus einwântânry watay, aunloenlâ Deus agâpa âieholo. Judeu domodoma mârâ tâzezewenry iwenibybe. Alâpylâ ise Moisés inweniby nhakadomobyry wâgâ Jesus einwântânry watay, aunloenlâ ise Deus agâpa âieholo warâ.

<sup>13</sup> Aguely idadyly kulâ âdy mâkeba Deus xurâem. Ize ato aiedily koendonro kuru. Arâ mawânkâ kâwentâbyra awyly, aguely.

<sup>14</sup> Judeu domodo ezewenry inweniby nâduuopa myakâwâm judeu keba modoram. Arâlâ olâ agui akaemo ewy âwâlâ anhedylymo Deus ize ato. Nhangahu odaylâ mârâ tâzezewenry iwenibyem awyly-ro waunlo ara, Deus ize ato nhutuhomoem, tywenezabalâ.

<sup>15</sup> Idânârâ kurutobyry kuodaxi ienipyryem Deus. Deus ezewenry iweniby pebaom modo Deus ize ato anhetuo, tânehonzemo, mâkâ aguehobyry tutuze tawly. Aidilymolâ mawânâ enehoin. Akaemolâ xutuim, âdara Deus ize ato adiyndyly awyly, aniempyry tawly warâ.

<sup>16</sup> Idânârâ aguientaymby modo, kyangahu oday kunâgobyry modo warâ xutuze Deus. Xypyry etay, âdaunloem kydawlyly Deus nhetuo ise aguitobyry, aguykehobyry warâ Cristo Jesus wâgâlâ kydâsebywadoem, Deus anhenehony, koendonro, inakai alelâ. Xirâ inanry unâ iwâkuru tâdâsemagueho kâengatoday, agueho.

*Judeu domodo ezewenry Deus Moisésram inwenien-hoymby*

<sup>17</sup> Âmaemo judeu domodo, tohomaenze âmaemo. “Xina iDeusryma Deus lelâlâ. Deus xurâem koendonro xina, xina idamudoram lelâ mawânkâ myakâwândy tâzezewenry nhuduly” tâkeze âmaemo.

<sup>18</sup> Âdara Deus ize awlyly tutuze mawlylmo, âdy iozeno, iozepaom warâ awlyly, tâzezewenry Moisés inwenibygue tâsenomedâze mawlylmoogue.

<sup>19</sup> “Judeu keba modo Deus itaumbryry nutuwâbyra. Xina lelâ koendâ xuturim. Epy sakobâni emyenro xina, iamu odano iajimanâni, iajinu emyenro warâ xina” tâkeze âmaemo.

<sup>20</sup> “Xina lelâ Deus itaumbryry xutudânry modo enomedâni. Xina lelâ iamudo ara âdy xutudânry modo enomedâni. Deus xinaem tâzewenry inwenibybe tawlylgyue, idânârâ tutuze xina, mâkâ wâgâ tutuze xina, iozeno lelâ-ro warâ” tâkeze âmaemo.

<sup>21</sup> Âkelo modo turuse âmaemo; âwâlâ mâturubyra olâ âmaemo. “Iwâkuru keba tâzemagagy” myguelymo âmaemolâ tâmagazeim.

<sup>22</sup> “Eagâ mohogüin-homobyry lelâ xynanâdaungâ” tâkeze âmaemo. Âmaemolâ eagâ mohogüin-homobyry keba kulâ xynanâni. “Deus lelâ xina nhehoguegyly; ekudyby modo etyguedyly tumoze xina” tâkeze âmaemo. Agueypyenlâ xygahudâdyby modo ehoguedo âtâ odaji igawândylymo, xurâem satyby modo mâenmagazedylmo. Awârâ arâ amidylmo, xygatyby modo ehoguedyly mâinmopa mawlylmo tânehonze.

<sup>23</sup> “Xina idamudoram lelâ Deus tâzewenry nhuduly” tâkeze âmaemo. Tâzezewenry agueho ara amipyra olâ âmaemo. Arâ kulâ amidylmoogue, Deus âwankuem âieholo eynynâbaom modoram.

<sup>24</sup> Deus itaumbryry awo wâgâ iwenibyem: “Inakanhe amidylmo tientuo, judeu keba modo Deus âwankuem nhedylymo, itaumbryry âdyem nipyra waunlo ara tyenehonzemo mawânkâ” kely iwenibyem.

<sup>25</sup> Deus, Moisésram tâzezewenry inwenien-hoymby ara lelâ judeu domodo aidylmo watay lelâ judeuem awlyly xutuhogye satâly koendâ awlyly. Koendonro anhekyly wâgâ mawânkâ nhenehonly, Deus xurâ tawlyly. Mârâ tâzezewenry Deus inwenien-hoymby ara lelâ anipyra-ro watay, adatâoly kulâ mâkâ. Judeu domodo xutuhogye satâlybyem lelâlâ wâne, inakanhe kulâ aito olâ tânehonze Deus xurâ keba awlyly.

<sup>26</sup> Judeu domodo ara tatâduneba judeu keba modo. Deus aguehobyry ara anhedylymo watay olâ satâlyby modo ara lelâ Deus xurâem awlylmo.

<sup>27</sup> Awlylgyue ise judeu keba modo aguely: “Deus xurâ modo xutuhopeba, judeu domodo ezewenrymo iweniby peba warâ lelâlâ wâne xina, Deus aguehobyry ara lelâ olâ xina aidyly. Satâlybyem lelâlâ wâne, judeu domodo ezewenry iwenibybe warâmo wâne, Deus aguehobyry aniempyramo olâ. Awlylgyue ise âzenagazeolymo” kelymo.

<sup>28</sup> Judeuem kuru tadawlyly Deus xurâem kuru tâjidyly warâ, Deus einwântuo lelâ. Ilery ety iopiry satâlybyem lelâlâ wâne judeu domodo, Deus neinwâmpyramo watay olâ, adatâoly kulâ.

<sup>29</sup> Deus xurâ modo kuru mâkâ iweloem ietyby, saguhobyry ara anipyra waunlo. Tuoday Deus xurâem Deus Ispiritury iweloem nhetybyem warâ tawlyly xuturim. Ilery ety iopiry satâlybyemba wâne Deus xurâem tawlyly tutuze olâ waunlo. “Koendonro akaemo” tâkeze Deus. Idânârâ Deus einwânni modo xurâlâ, judeu, judeu keba alelâ.

### 3

<sup>1</sup> Tâlâ warâ tunâgueim tyangahu oday: “Idânârâ Jesus einwânni modo Deus xurâ lelâ watayma âdyem nitaymba judeuem, ilery ety iopiry satâlybyem tadawlyly-ro” keim.

<sup>2</sup> Âdyem nipyra nitaymba! Judeuem tadawlyly koendonro lelâlâ. Waunroem kuru Deus itaumbryry egatuhobyry myakâwândy judeu domodo idamudo. Deuslâ myakâwândy judeu keba modoram nhegatuhomoem aguenri.

<sup>3</sup> “Tâlâ olâ myakâwândy judeu domodo idamudo ewy mâkâ aguehobyry ara lelâ aitânry. Akaemo tâinwâmpyra atobyry wâgâ keanra Deus judeu domodo agâ koendâpa awlyly” tâkeze keanra âmaemo.

<sup>4</sup> Aypa olâ, aypa lelâlâ. Adienkylyem adâkehobyry aiesezelâ Deus. Idânârâ onro anakonro modo konokudâ lelâ, Deus olâ konokuni keba! Deus itaumbryry awo wâgâ iwenibyem:



“Deus, amygueduo idânârâ tutuzemo, âkealâ amyguely awyly.  
Inwentâdyzemo wâne, âdygue inwentâdo peba olâ âmâ.  
Koendonro lelâlâ idânârâ amânhekyly modo”  
warâ iwenibyem awyly.

<sup>5</sup> Aguehobyry kiankaduo, Deus kânagazenehonly watay, toenzepa ise: “Tozelâ Deus aidyly, adâjibobyry nhenagazeduo” keim modo. Awylygue, tâlâ ise wakeim: “Inakanhe aguitobyry Deus tâgaenehonze watayma koendâ inkâba mâkâ kânagazenehonly aguehobyry kiankaduo. Inakanhe aguitobyrygue lakuru mawânkâ ojiomaeonly kuru” keimpe. Arâ mawânkâ kurâdo aguely.

<sup>6</sup> Aypa olâ, aypa lelâlâ! Kewâdyly kulâ aguehomo. Koendonro keba mâkâ-ro watay, xirâ onro anam aguitobyry modo wâgâ kâpywaniem nitaymba tâise xypyry etay.

<sup>7</sup> Ânguylâ wâne keanra warâ tunâgue: “Ugiewâdyly kulâ watay, idani modo aguezemo: ‘Kewâdyly kulâ awâkâ, Deus olâ âkealâ aguely, kewâdyly kulâ waypa. Koendonro Deus’ kezemo. Awylygue tâwâlâ kienokudylymo, Deus wâgâ koendâ aguehomoem. Arâ-ro watay, koendâ inkâba Deus ienagazenehonly ugiewâdyly kulâ-ro watay” tâkewâzemo keanra.

<sup>8</sup> Tâlâ keanra: “Inakanhe aguine, Deus koendonro awyly xutuhoem” keim. Âdaunloenlâ arâ aguykewâbyra kine! Tâlâ arâ auguely egaeni modo, âdykâ arâ auguepa olâ urâ. Awârâ wâgâ nhewentâgueni modo âsenagazezemo, enagazedemo keho ara kehoem.

*Ânguy koendonro aieni lâpeba, idânârâ inakai aieni kurâ*

<sup>9</sup> Tâlâ keanra wakeim: “Judeu domodoma judeu keba modo takaze koendonro Deus xurâem?” keim. Aypa olâ! Idânârâ Deus aguehobyry sakanibyryem lelâ kurâ. Aguietoem Deus aguehobyry takaze lelâ kurâ Idânârâ, judeu, judeu keba alelâ.

<sup>10</sup> Warâ iwenibyem awyly Deus itaumbry awo wâgâ:  
“Idânârâ kurâ xirâ anano modo Deus aguehobyry sakanibyryem lelâ;  
ânguy âdaitânry lâpeba!

<sup>11</sup> Ânguy âdy koendonro, inakai warâ awyly xutuim lâpeba kurâ.

Ânguy Deus koendâ tiuntudyzedonro lâpeba warâ.

<sup>12</sup> Idânârâ Deus tânanânehonzemo,  
mâkâ ânwa iozeno imyimbyry xuzatyby ara,  
arâ lâpylâ idânârâ Deus ize ato tiuntudyzeba awylymo.

Ânguy koendonro aieni lâpeba, ipa lelâlâ.

<sup>13</sup> Tâzeguepybyry etadâdyby enahungueduo, inwânry inakanhe kulâ,  
kywilupanâdâ kehoem, ânguy nhemaenlyemba, myara kehoem aguehomo inakanhe awyly.

Tâdâsenogudyly nimopamo.

Âgâu kâtobyry inakanhe kyetâ kyiguehoem kehoem,  
myara aguehomo inakanhe kyedyly.

<sup>14</sup> Toenzepa itanrumo iwyku;  
ânguy izepamo warâ.  
Awylygue aunlolâ Deusram nhekazedylymo, izepa tato modo nhenagazenehon-  
hoem.

<sup>15</sup> Tyewiâpadyly-ro watay, inepa kânagazedylymo, kyâlymo warâ.

<sup>16</sup> Âdyam idâhomobyrydâ inakai adyesemo.  
Tuomaruneim modo tuomareba tyenehonzemo;  
tytynwânânehonzemo inakanhe kyetâmo lelâlâ-ro warâ.

<sup>17</sup> Âdaunloenlâ Deus agâ koendâ tadawyly nutubamo, ize ato aiedyly warâ.

<sup>18</sup> Deus âwankuem tyesemo, âdy Deus anhekyly tiuntudyzemo inkâba”  
warâ iwenibyem awyly Deus itaumbry awo wâgâ.

<sup>19</sup> Tutuzelâ kurâ, idânârâ tâzezewenry Moisésram Deus inwenien-hoymby, judeu domodo nheinwântoem awyly. Itaumbry tâlâ awyly, âdara aguidyse Deus awyly idânârâ kiuntuhoem. Ânguy olâ Deus ize ato aunlolâ anhedily nipyra. Awylygue judeu, judeu keba alelâ âzenagazeoze Deusram neinwâmpyra atobyry wâgâ.

<sup>20</sup> Mârâgue tâdâsemaguehoem inkâba myakâwândy Deus tâzezewenry Moisésram inwenien-honly. Mâkâ ize ato ara aguiypra kydawlyly kiuntuhoem myakâwândy inwenien-honly.

*Jesus kieinwântuo lelâ kydâsemaguely*

<sup>21-22</sup> Iwerâma Deus nutuen-ho tâwentâzeba kâento. Judeu domodo ezewenry Moisésram inwenien-hoymby Deus kâwentâbyra itoem anienehonwâbyra. Saguho tâzezewenry kintainlygue, saguhoem Deus itaumbry egatuwâni modo inweniby kintainlygue tutuze kurâ,

âdara Deus kâmakely awyly. Jesus Cristo nheinwântuo lelâ mawânkâ Deus idânârâ Jesus einwânni modo nhemakely, judeu, judeu keba alelâ. Deus xurâem idânârâ âzekiba lelâ kurâ.

<sup>23</sup> Idânârâ Deus izepa ato adyese lelâ warâ. Awylygue Jesus kieinwândyly iraynâ Deus koendonrodâ iwaguelâ kydawyly.

<sup>24</sup> Inakanhe aguitobyry xygakeze myakâwâm Cristo Jesus iguely. Awylygue Jesus kieinwântuo lelâ Deus tywykeba kâendyly, koendonro emakerin-emba kydawyly umelâ. Kydâsemaguehoem âdy kiempywgagyly lâpeba. Jesus kâmakely, kâmakedyze tawylyguelâ.

<sup>25-26</sup> Deusmy aienehonwâm Jesus tunu tyapâze Jesus iguehoem, Deus agâpa kydâiehoba kitoem. Jesus iguely myakâwâm, inakai aguienkyly Deus nhygakehoem, Jesus kieinwântuo. "Inakanhe tadawyly ebyryem tâjiguely" kewânmy Deus. "Aiese urâ" tâkehobyry aiemâ. Kurâlâ tâise Deus ingueânehonly inakanhe aguitobyry wâgâ, Jesuslâ olâ myakâwâm kâtaybyay ingueânehonly. Saguhöem adâkely sakanibyry modo newentâbyra myakâwâm Deus, kâmakerin-em aguehobyry nigonopyra tawylygue. Iwerâ olâ, Jesus iguehobyry wâgâ saguhöem Deus einwânnipyry modo inakanhe aitobyry xygakeybyem awyly.

<sup>27</sup> Kurâem kruz wâgâ Cristo aitobyry wâgâ tâwentâguezeba Deus kâendyly, kydâsemaguehoem aguitobyry wâgâ inkâba. Mâkâ kieinwândylygue lelâ kydâsemaguely. Awylygue kywâgâ koendâ aguykeho lâpeba kurâ, kydâsemaguehoem.

<sup>28</sup> Augueondyly. Deus tâwentâzeba kâendyly, Jesus Cristo kieinwândylyguelâ, judeu domodo ezewenryem inwenien-hoymby aguiendylygue inkâba.

<sup>29</sup> Judeu domodo iDeusry kulelâ mâkeba Deus, judeu keba modo iDeusry alelâ.

<sup>30</sup> Tokalelâ Deus idânârâ xurâem. Deus xurâem, idânârâ Jesus einwânni modo inakanhembamo, judeu, judeu keba alelâ.

<sup>31</sup> Warâ olâ, "Jesus kieinwântuo lelâ kydâsemaguely awylygue, âdyem nitaymba judeu domodo ezewenry Moisésram Deus inwenien-hoymby" kykeba kine. Deus aguehobyry kieinwântuo, Moisés iweniby kiankadyly mâkeba, Deuslâ mawânkâ myakâwândy inwenihoem agueim.

## 4

### *Ewentâdo lâpeba Abraão Deus xurâem*

<sup>1-2</sup> Abraão-ro? Judeu domodo idamu myakâwândy mâkâ. Mâkâ myakâwândy waunroem kuru ilery ety iopiry tatâzeim. Awârâ wâgâpa olâ myakâwândy mâkâ tâwentâguezeba awyly, Deus xurâem. Awârâ wâgâ-ro watay, Abraão sawoem tise tâise: "Tâwentâzeba Deus iedyly, koendonro wawylygue" tâkeze tâise. Awârâ wâgâpa olâ myakâwândy Deus xurâem ewentâguedo peba awyly.

<sup>3</sup> Iwenibyem Deus itaumbyry awo wâgâ: "Abraão enra Deus tâinwânse. Nheinwândylygue, Deus xurâem ewentâguedo peba awyly" warâ iwenibyem awyly.

<sup>4</sup> Kydâsewanily-ro watay, xuduly mâkeba mârâ kydâzepywaoho. Kâwanopyry ebyrylâ kienmakely.

<sup>5</sup> Deus emaymba kienmakely olâ tâbygueim keba. Koendâ aguientyby wâgâ inkâba Deus tâwentâgueba kâendyly, Jesus kieinwântuo lelâ.

<sup>6</sup> Arâlâ myakâwândy Davi aguely adienkyly wâgâba tâmakely Deus einwânni modo iomaru wâgâ.

<sup>7</sup> Aguely myakâwândy:

"Tuomareim mâkâ, inakanhe aitobyry Deus nhygakeyby, nhenanânehoymby warâ.

<sup>8</sup> Tuomareim mâkâ,

'Âdy inwentâguedo lâpeba âmâ' Kywymâry keho"

warâ myakâwândy Davi inwenily.

<sup>9</sup> Judeu domodo satâhobyry ara satâwâdyby modo lelâ wânkâ tuomareim, kykely? Ainkâba! Tatâzenry modo Jesus einwânni tuomaremo lâpylâ. Iwenibyem mawânâra Deus itaumbyry awo wâgâ: "Abraão Deus tâinwânse awylygue myakâwândy, 'Âdy inwentâguedo lâpeba âmâ' kehonly Deusram" warâ iwenibyem awyly.

<sup>10</sup> Deus mâkâ tâwentâzeba awyly nhedyly myakâwândy satâly iraynâlâ.

<sup>11</sup> Deus nhewentâguedo peba aguepygueduo myakâwândy Abraão satâly-ro warâ. Nheinwândylygue myakâwândy mâkâ adatâoly. Arâ tadatâoduo, tânehonze myakâwândy Deus tâinwânse lelâ tawyly. Arâ awylygue judeu keba modo idamuem lâpylâ awyly, Deus tâinwânse mawânkâ akaemo. Tâwentâguezebamo-ro warâ nadatâobamolâ, tadatâly iraynâlâ Abraão nheinwântobyry ara.

<sup>12</sup> Alâpylâ judeu domodo Jesus nheinwândylymo watay, tâwentâgueduneba akaemo Deus xurâem. Âdygue tâwentâguezeba awyly aguehoymbyenmo, Jesus nheinwântomobyry wâgâ, satâbyem awylymogue inkâba. Abraão akaemo idamuem awyly, eara satâbyem awylymogue inkâba, mâkâ Deus nheinwântobyry ara, nheinwântomobyry wâgâ.

*Deus, “Xuduze urâ” kehobyry kienmakeÿ, kieinwântuo lelâ*

<sup>13</sup> Iweâpalâ myakâwândy Deus aguely Abraãoram: “Koendâ ise agâ wawyly. Tâinkânro modo lelâba iwaunroru ise âmâ. Pymâem ise lâpylâ âweompyrydo warâ” kely. Deus, Abraãoram arâ aguely myakâwândy, Deus nheinwântobyry wâgâ, âdygue tâwentâguezeba awyly wâgâ warâ, Moisés tâzezewenry inweniby ara aidylygue inkâba.

<sup>14</sup> Judeu domodo ezewenry einwântaynrim modo lelâ Deus aguehobyry emakeim watayma iguely kulâ myakâwâm Jesus-ro. Ânguy Deus tâzezewenry aguehobyry idânârâ kehoem aieni peba mawânkâ.

<sup>15</sup> Tâzezewenryem adâkehobyry aietânry modo enagazenehonze. Deus mârâ tâzezewenry Moisésram niwenehomba-ro watay, kiuntuwâbyra tâise kurâ mâkâ izepa ato adyese ky-dawly. Kurupyra Deus-ro watay, “Aaguehobyry mankadylimo awârâ” kewâpyra tâise mâkâ kyam.

<sup>16</sup> Koendonro Deus. Awylygue myakâwândy Abraãoram aguely: “Koendâ ise agâ wawyly” kely. Adienkilyem adâkehobyry adyese lelâlâ Deus. Abraãoram lelâba, idânârâ tâinwânni modoram, koendonro modo xuduze Deus, judeu mododoram, judeu keba modoram alelâ. Deus tâinwânse myakâwândy Abraão, tâinwânse lâpylâ kurâ. Aituo Deus xurâem, idânârâ kurâ Jesus einwânni modo Abraão iwerypyry lelâ kurâ, eara satâby, tatâzenry alelâ.

<sup>17</sup> Abraão wâgâ iwenibyem Deus itaumbyry awo wâgâ: “Toenzepa kurâdo âkelo modo ‘Tako’ keze âyam” kely iwenibyem. Deus, aunlolâ adâkehobyry ara lelâ aidyly. Deuslâ myakâwândy Abraão nheinwânkyly kuru. Mâkâ mawânkâ igueypp modo kurâem ingtoni, saguhoem ipaombyry modo tâlâ ienehoimbyry warâ.

<sup>18</sup> Deus einwânsezelâ myakâwândy Abraão. Deus aise kehobyry anipyra awyly umelâ, Deus aguehobyry einwândyly nimopa myakâwândy mâkâ. “Toenzepa ise âepadyly. Toenzepa âweompyry iepanânehonze urâ” kewândymy Deus mâkânra. Neinwâmpyra nipyra myakâwândy Abraão, tymezyly tynwânwânse myakâwândy, agaityon-em tawyly umelâ.

<sup>19</sup> Cem anu ioseaji myakâwândy Abraão. Âpaunzedyly myakâwândy: “Agaityon-em urâ, ymezehoem. Ywydy Sara adamyim keba, aripiem warâ” kely. Deus aguehobyry ara aise awyly tâinwânseze olâ myakâwândy.

<sup>20</sup> Deus einwândyly âdaunloenlâ inmoly nitaymba myakâwândy. Adâkehobyry aieniem Deus awyly tâinwânsezelâ myakâwândy. Nheinwânto imâem isezedyly lakuru. Deus koendonroem awyly wâgâ, eon-honru wâgâ warâ adâkely nimopa myakâwândy.

<sup>21</sup> “Tutuze urâ, Deus kymezehoem aienehonze awyly, aguehobyry ara” adâkely nimopa mykâinane tywydy agâ.

<sup>22</sup> Einwândyly nimopa myakâwândy, adâkehobyry aieniem Deus awyly tiuntulygue. Arâ awylygue Deus xurâem ewentâguedo peba myakâwândy mâkâ.

<sup>23</sup> Warâ Deus itaumbyry awo wâgâ iwenibyem awyly: “Urâem, âdy inwentâguedo lâpeba âmâ” kewândymy Deus, Abraãoram kulelâ inkâba Deus aguely.

<sup>24</sup> Kyam lâpylâ myakâwândy aguely kiuntuhoem. Tâinwândylygue myakâwândy Deus mâkâ tâwentâguezeba awyly nhedyly, arâ lâpylâ mâkâ tâwentâguezeba kâendyly, Jesus kieinwândylygue. Kywymâry Jesus igueduo kurâem ingtonibyrylâ Deus.

<sup>25</sup> Arâ aitoem agueyppenlâ myani Deus, Jesus iguehoem inakanhe aguitobyry xygakehoem. Deus, Jesus igueduo, kurâem tyenehondonze myani, tâwentâguezeba xurâem ky-dawly tienehon-hoem.

## 5

*Deus xurâem, kâwentâguedo lâpeba*

<sup>1</sup> Tâwentâguedoneba Deus kâendyly iwerâ, Kywymâry Jesus Cristo tâinwânse ky-dawlylygue. Saguhoem inakanhe kulâ ky-dawlylygue Deusram kaintaymba akâwâm kurâ. Inakanhe ky-dawlyly xygakeze Cristo kruz wâgâ aitobyry wâgâ olâ, Deus agâ iwaguepa ietybyem ky-dawlyly; âdapa lelâ mâkâ agâ ky-dawlyly.

<sup>2</sup> Jesus einwânnyppenlâ kurâ. Awylylygue Deus agâpa tyeseba ky-dawlyly. Jesus kurâem anhetyby wâgâ, Deus koendâ lelâ kâendyly, arâ tâensein-emba ky-dawlyly umelâ. Kurâ kydohomaendyly, mâkâ agâ kidyly tutuze ky-dawlylygue, eon-honru kiendyly ise warâ.

<sup>3</sup> Xirâ onro anaym ky-dawlyly ara, mâkâ xurâ keba modo âwankuem kyetâmo, kânagazedâmo. Ton-honre lelâlâ wâne kurâem, tohomaenze lelâ olâ kienmaeny; ky-dâsenagazedyly odaylâma kiuntuzezedyly âdara Jesus einwândyly awyly kinmopa kitoem kienmaen-hoem.

<sup>4</sup> Einwândyly kinmopalâ kienmaenduo, kagâ tuomare Deus. Kagâ tuomare awylylygue, “Xuduze urâ” kehobyry kienmakeÿ kinwânwândyly.

<sup>5</sup> Awârâ wâgâ kytyrwâdaymba ise kurâ, adâkehobyry adyese lelâlâ mawânkâ Deus. Ty-ispiriturylâ Deus ingonokily kagonroem, Deus toenzepa kywynedâ tutuen-honze mâkâ Ispiritury.

<sup>6</sup> Âwâlâ kydâsemaguehoem ton-honremba akâwâm kurâ. Awlylygue Deus aitoem aguehobyry odaji ituo, Jesus Cristo kurâem iguely myakâwâm, koendonro keba kulâ aieni modoem.

<sup>7-8</sup> Ânguy tâeganuneba kâzewenry einwânni etaybyay tyiguehoem. Tâlâ keanra tâise kurâ koendonro etaybyay igueze tâeganeim ilema-ro. Cristo olâ iguewâm inakai aieni modo etaybyaji. Toenzepa kywynedâ tawily tienehon-hoem, Deus, Cristo tugonose myakâwâm kurâem iguehoem, izepa ato aguiendily umelâ.

<sup>9</sup> Jesus Cristo tunu tyapâze, kurâem iguehobyry wâgâ, Deus tâwentâguezeba kâendily. Awlylygue ise xypyry etay Deus tynynâbaom modo nhenagazenehonday, kydâsemaguely, Cristo kurâem anhetyby wâgâ.

<sup>10</sup> Deus iduery akâwâm kurâ, tataen-hoem kyetâ olâ akâwâm, tymery Jesus Cristo iguehobyry wâgâ. Iwerâ Deus eataen-hoem kydawylygue, âsemagueze kydawyly tutuze lelâ kurâ, Jesus mawânkâ kurâem tâitonze, igueypyemba iwerâ-ro warâ.

<sup>11</sup> "Yataen-ho âmaemo, âwymârymo Jesus Cristo âmaemoem anhetyby wâgâ" tâkeze Deus kyam. Awlylygue toenzepa kuomazely, koendâ Deus agâ kydawylygue.

*Adâo ara Deus aguehobyry kiankadyly; Cristo wâgâ olâ kydâsemaguely*

<sup>12</sup> Adâo myakâwândy waunro uguondo Deus aguehobyry sakani. Mâkâ arâ aitobyry wâgâ Deus izepa ato adyese lâpylâ kurâ idânârâ. "Auguehobyry sakanibyry modo idânârâ iguewâse" kewânny Deus. Awlylygue myakâwândy Adâo iguely, kyguely lâpylâ warâ, Deus izepa ato aieni kydawylygue.

<sup>13</sup> Judeu domodo idamudo ezewenry inwenien-honly iraynâ, idânârâ xirâ anano modo Deus aguehobyry takazemo lelâ myakâwândy. Tâzewenry nhakadybymo wâgâ inkâba myakâwândy Deusram âzewentâolymo, mârâ tâzewenry Moisésram inwenien-hoymby peba mawânâ myakâwândy ilâem.

<sup>14</sup> Toenzepa myakâwândy kurâdo, toenzepa lelâlâ, Adâo umenobyryem, Moisés iazeho odaji. Idânârâ kehoenmy iguewânmo, Adâo inakanhe aitobyry ara kehoem aitânny modo alelâ.

Âkelo myakâwândy Adâo, Messias Deus ingonotyby agâ. Adâo aitobyry wâgâ mawânâ inakanhe tadawily, ânguy nâseinwâmbrya awily warâ adaguly. Jesus, Messias keho, anhetyby wâgâ einwânni modo âsemaguely adaguly.

<sup>15</sup> Adâo aitobyry emyenro mâkeba Kâmakeim Jesus Cristo aitobyry. Adâo inakanhe aitobyry wâgâ iguein-em kydawyly. Jesus Cristo koendâ atobyry wâgâ, Deus xurâem, tâwentâguezeba Jesus einwânni modo awily warâ. Inakanhe aitynrim modo agâ koendâ lelâ Deus awlylygue, tâbyguepalâ nhemakelymo.

<sup>16</sup> Augueondily. Adâo aitobyry emyenro mâkeba Kâmakeim Jesus Cristo aitobyry. Adâo tâinwâmpyra itobyry wâgâ, "Idânârâ tâwentâgueduneim modo lelâ" kewânny Deus. Agui olâ Deus nhemakely modo, Jesus nheinwântuomo. Xirâ mawânâ Deus tâbyguepalâ kurâem anhekily, emakerin-emba kydawyly umelâ, itaumbry sakanibyryem kydawylygue.

<sup>17</sup> Âkealâ xirâ, tokalâ uguondo, Adâo, myakâwândy Deus aguehobyry sakani. Mâkâ aitobyry wâgâ mawânâ tâjiguely adaguly. Ânguy iguedânry lâpeba. Tokalâ uguondo, Jesus Cristo, aitobyry wâgâ olâ koendonro kienmakely, Awlylygue mawânkâ Deus xurâem tâwentâguezeba Jesus einwânni modo awily, tâbyguepalâ kâmakely warâ. Xurâ kydawylygue, aunloenlâ ise Deus agâ kydawyly, Jesus agâ ise pymâem kydawyly-ro warâ.

<sup>18</sup> Tokalâ uguondo, Adâo, myakâwândy Deus aguehobyry sakani. Adâo Deus neinwâmpyra atobyry wâgâ idânârâ tâzewentâoze lelâ kurâ. Deus xurâem, Adâo iweompny mawânkâ kurâ. Tokalâ uguondo olâ myakâwâm koendonro, ioze lelâ Deus xurâem aini, Jesus Cristolâ. Inakanhe aguitobyry epywaze Jesus iguehobyry wâgâ, inakanhe aguitobyry Deus xygakewânny. Deus xurâem, kâwentâguedo lâpeba kurâ. Kyigueduo Jesus agâlâ ise kurâ, âdaunloenlâ kydaaimpa kitoem.

<sup>19</sup> Tokalâ uguondo Deus neinwâmpyra atobyry wâgâ inakanhe tadawily adaguly; iwerâ Deus izepa ato adyese lelâ kurâ idânârâ. Tokalâ uguondo Deus nheinwântobyry wâgâ olâ tâwentâzeba Deus kâendily, Jesus Cristo kurâem iguehobyry wâgâ.

<sup>20</sup> Adâo pygueduo, iweâpa lelâlâ myakâwândy judeu domodo ezewenry Deus Moisésram inwenien-honly. Âdara Deus ize ato ara lelâ adâidyly awily inwenien-honly. Deus aguehobyry takazezemolâ olâ myakâwândy. Arâlâ olâ Deus koendâ awily; imâem isezedyly tâmakezein-emba tutuzeim modo agâ.

<sup>21</sup> Deus agueho kiankadyly kinmopa kydawylygue mawânâ kyguely. Deus koendâ ato olâ iwâkuru kuru; kagâ koendâ lelâ olâ Deus, koendâ ato emakerin-emba kydawyly umelâ.

Kywymâry Jesus Cristo inakanhe aguitobyry tygakeze, Deus xurâem tâwentâguezeba kitoem adyenehonze warâ. Awârâ wâgâ mawânâ ise Deus agâ aunloenlâ kydawlyly.

## 6

*Jesus kieinwântuo, iweloem kydâiehondyly*

<sup>1</sup> Kagâ koendâ lelâ Deus, izepa ato aguiendyly umelâ. Tâlâ keanra ânguylâ warâ tunâgeim: “Deus izepa ato aguyjiesezene lelâ, imâem lelâlâ mâkâ kagâ koendâ awlyly itoem” keim.

<sup>2</sup> Arâ inkâba! Igueypy wâne xirâ anano modo wâgâ nâtynanâbyra, myara lâpylâ Deus izepa atogue kulâ kydâtynanâdaymba kine. Nuduwâpyra, Deus aguehobyry kiankazedoem.

<sup>3</sup> Batiza kydâiehoduo, kienehonly Cristo Jesus agâ tokaleoem kydawlyly. Deus izepa ato imoimbyryenlâ kurâ, igueypy xirâ anano modo imoho ara. Xirâ tutuzelâ âmaemo.

<sup>4</sup> Jesus Cristo igueypygueduo, eguepybyry etadâdybyem awlyly ume, kurâem tyetonze myakâwâm Kunwym Deus. Arâ lâpylâ Deus iweloem kyetondyly. Ize kydato, kyangahu oday kunâry warâ iweloem ietandybyem. Deus izepa ato aguiendyse kydawlyly tumoze kurâ. Batiza kituo, iweloem ietandybyem kurâ, kâzewenry saguhobyry imoimbyryem kydawlyly tânehonze warâ.

<sup>5</sup> Jesus Cristo agâ tokaleoem kydawlylygue, Cristo igueduo, kyiguely lâpylâ waunlo ara. Cristo agâ on-hoam lelâ kydawlylygue, kyigueduo kurâem kyetonze Deus, Jesus kurâem tientondobyry ara, mâkâ agâ aunloenlâ kitoem.

<sup>6</sup> Cristo xurâem kidyly iraynâ, Deus izepa ato aiedyly kinmowâbyra akâwâm kurâ. Inakai aguiendyse kydato aguietoem aguykehonly waunlo ara, tâwaneim wâne tywymâry aguehobyry adyese lelâ myara, awârâ modo saimpyem olâ. Jesus aglâ kruz wâgâ adainwâm. Awlylygue iwerâ Deus aguehobyry kiankadyze kidyly-ro watay, aguienyamba kine.

<sup>7</sup> Igueypy Deus izepa ato adiyendyse tawlyly tumoze. Awlylygue Deus izepa ato aguienyamba kine.

<sup>8</sup> Cristo agâlâ igueypyem kydawlyly-ro waunlo ara, mâkâ kurâem itondobyry wâgâ, mâkâ agâ on-hoam itybyem lâpylâ kurâ, âdaunloenlâ mâkâ agâpa kipyra kitoem.

<sup>9</sup> Deus, Cristo igueduo kurâem ietonnâm. Âdaunloenlâ nigueompyra ise-ro warâ. Ânguy âdaunloenlâ Jesus Cristo peba itoem anienehonwâbyra.

<sup>10</sup> Inakanhe aguitobyry xygakeze myakâwâm Jesus iguely tokalelâ. Awlylygue âdaitoem igueondyly nitaymba. Igueypyemba mâkâ iwerâ Deus ize ato aiesezelâ.

<sup>11</sup> Igueypy xirâ anano modo wâgâ nâtynanâdaymba; ara lâpylâ, Cristo Jesus agâ igueypyem mawlylmogue, âdydo imeom Deus izepa ato akâiedaundâ. Cristo agâ tokalelâ mawlylmo. Deus emaryem, iomaenim warâ.

<sup>12</sup> Deus izepa ato akâiedaundâ, amânhedyse mawlylmo umelâ. Deus izepa ato aiedyly keba âturimo nidâ.

<sup>13</sup> Odomo ewy inakanhe amitomoem akâiedaundâ. Deusram âtuwâdaungâ, koendonro modo lelâ amânhetomoem. Iweloem ietondybyem âmaemo. Igueypy ara akâwâm âmaemo saguhoem, iwerâ olâ. Jesus mâinwântuomo, kurâem itondybyem âmaemo.

<sup>14</sup> Deus xurâem, tâwentâgueduneba âmaemo iwerâ, Jesus mâinwândylylmogue. Saguhoem tâzewenry Moisésram inwenin-hoymby ara lelâ amidylylmogue inkâba arâ mawlylmo. Aituo Deus ize ato ara lelâ aguiene iwerâ, kagâ koendonro mâkâ awlylygue, koendâ ato emakerin-embra kydawlyly umelâ.

*Deus xurâem kydawlylygue ize ato lelâ aguyjiene*

<sup>15</sup> Iwerâ ise-ro? Koendonro tawlylygue Deus kâmakely, tâzewenry ara aguidylygue inkâba. Arâ awlylygue âdalâ kulâ aguidyly kitoemba lâpylâ olâ.

<sup>16</sup> Tutuzelâ âmaemo, ânguyanlâ tâbyguepa tâwaneinhe mâtulylmo watay, mâkâ xurâem mawlylmo. Mâkâlâ ise âturimo. Arâ lâpylâ Satanâs aguehobyry mâinwântomoem emaxi mâtulylmo-ro watay, âiguelymolâ ise ibyrymo. Deus aguehobyry mâinwântomoem emaxi mâtulylmo watay olâ imakezemo ipywadomoem.

<sup>17</sup> Saguhoem Deus izepa ato amânhedyse matomo kulâ akâwâm amânhekylylmo. Unâ iozeno, Jesus kieinwântuo tâdâsemaguely wâgâ agueim tydase olâ âmaemo, tâinwânse ani âmaemo warâ. Egatuyby mâindatomobyry ara lelâ iwerâ amidyse mawlylmo. Awlylygue: “Koendonro lelâlâ âmâ, akaemo Roma donro modo âmâ xurâem mânhetobyry wâgâ” xina kely inanry Deusram.

<sup>18</sup> Deus imakelymo ani, saguhoem inakanhe amitomobyry amânhepyra mitondomoem. Inakanhe tadawlyly mâkeba âturimo iwerâ. Deus xurâem âmaemo iwerâ, ize ato lelâ amânhetomoem.

<sup>19</sup> Cristo xurâem midylylmo iraynâ, Satanâsram ani mâtulylmo, “Aiekâ” kehobyry amânhetomoem. Idânâ odomo wogonro tâwanize ani âmaemo Deus izepa ato

amânhetomoem. Inakanhe tadawlyly ani âturimo. Awlylygue inakanhe amidyse matomo aralâ akâwâm amidilymo. Iwerâ olâ Deusram lelâ âtuwâdaungâ, “Aiekâ” kehobyry amânhetomoem, iozeno, koendonro warâ amânhetomoem.

<sup>20</sup> Saguhoem inakanhe tadato âturimo awlyly ume, mâtynanâdaymba ani âmaemo koendonro modo wâgâ, Deus izepa ato kulâ ize matomo.

<sup>21</sup> Inakanhe amitomobyry âmaemoem koendonro nuduwâpyra ani, mârâ amitomobyry tywypazeze âmaemo iwerâ. Mârâ ebyry tâjiguely lelâ, aunloenlâ Deus agâpa tâjidilyly warâ.

<sup>22</sup> Inakanhe tadawlyly mâkeba âturimo iwerâ. Deus izepa ato amânhedyse mawlylymo mâinmohomoem aietybyem. Jesus xurâem mitomoem Deus imakelymo, aguehobyry aieniem. Emakeybyem mawlylymogoe, aunlolâ ise Deus agâ mawlylymo; âdaunloenlâ eagâpa tyetuneba ise âmaemo.

<sup>23</sup> Inakanhe tadawlyly epywado, tâjiguely; Deus nhuduly olâ aunloenlâ eagâ kydawlyly, Kywymâry Jesus Cristo agâ tokaleom kydawlylygue.

## 7

### *Deus kuturim, judeu domodo ezewenry iweniby mâkeba*

<sup>1</sup> Cristo eynynâ ypemugudo, pymâ domodo tâzezewenry inweniwâdyby tutuzelâ âmaemo. Kyigupea kydawlyly ara kulâ mârâ tâzezewenry ara aguidily. Kyigueduo olâ, mârâ tâzezewenry modo âdyem nipyra.

<sup>2</sup> Pekodo ohogüimby wâgâ ise auguely, âdara Deus agâ kydawlyly wâgâ kâenomedâdo mâuntuhomoem. Kâzewenry agueho ara, pekodo ohogüimby iso xurâenlâ. Eagonro agâ tohogüin-hoem, mâkâ inmoly nitaymba. Tuso igueduoma tâwâlâ eagonro agâ ohogüinly, tâzezewenry nhakadyly keba mawânkâ.

<sup>3</sup> Mâkâ pekodo, uguondo eagonroram âdynanâoly, tusonu umelâ watay olâ tâzewentâgueoze mâkâ, tâzezewenry iweniby wâgâ agueho ara. “Iso igueduo olâ tâwâlâ ohogüinly” tâkeze tâzezewenry iweniby. Arâ watay, eagonro agâ ohogüinduo, inakanhe idyly mâkeba.

<sup>4</sup> Mârâ tâzezewenry Moisésram inwenien-hoymby wâgâpa mâsemaguelymo awlyly wâgâ ise iwerâ kâinwenily, âdara iweloem mitondilylymo awlyly mâuntuhomoem. Kyigueduo, tâzezewenry amaymba tâise kurâ; arâ lâpylâ Jesus einwânniem kituo, tâzezewenry amaymba kidily. Cristo agâ tokaleom kydawlylygue, mâkâ agâlâ kydâdyoly. Awlylygue Cristo xurâ kurâ, igueypyem awlyly ume, Deus kurâem nhetondyby. Iweloem kydâiehondyly myani, Deus aguiendyse ato aguientoem.

<sup>5</sup> Iweloem tyeseba kydawlyly ume, inakanhe aguidily kulâ ani ize kydato. Tâzezewenry tydase ani kurâ, mârâ aguiendyseba ato aguiendyse lelâ olâ ani kurâ. Idânârâ kodo wogonrogue ani Deus izepa ato aguiendily, Deus kintywanânehon-hoem. Tâjiguely awârâ nhuduly-ro warâ, se tâwiseim tâwilylâ nhuduho ara.

<sup>6</sup> Judeu domodo xurâem tâzezewenry inwenien-hoymby ani aiese kykewâdo saguhoem. Arâ Deus xurâem tâwentâguezeba kydawlyly waunlo ara ani kânânaji, idânârâ mârâ aguientoem nudupa olâ ani. Toenzepa wâne ani kieinwândyse kydawlyly, toenzepa lâpylâ olâ ani adyosenry aguiendily. Iwerâ, kydâsemaguehoem, mârâ saguho tâzezewenry aguientaymba kurâ. Kâtadâdobyrydâ kydzêkâjiguelo waunlo ara. Cristo igueduo, kyiguely lâpylâ waunlo ara akâwâm. Tutuze kurâ, iwerâ Deus “Aiekâ” kehobyry aguiendily, Deus Ispiritury aguientoem aguehobyry wâgâ.

### *Judeu domodo ezewenry wâgâ iwenihobyry*

<sup>7</sup> Tâlâ keanra warâ tunâgueim modo: “Arâ atayma judeu domodo ezewenryem, Moisésram inwenien-hoymby koendonro mâkeba-ro” keim. Arâ adâkezeba itaungâ! Koendonrolâ mârâ tâzezewenry. Mârâ peba-ro watay, kâuntuwâbyra tâise urâ, Deus izepa ato ara kulâ awidyly awlyly. Ywâgâlâ wâne auguely, idânârâ olâ inakai aguiendily. Warâ tâzezewenry wâgâ iweniby: “Âkelomo xurâ tâlâ mawyse tâiseba ikâ” kely. Aguely peba-ro watay, kâuntuwâbyra tâise urâ, âkelo xurâpe widyse wituo, Deus izepa ato ara kulâ awidyly awlyly.

<sup>8</sup> Xirâ kâenanâgueduo, âkelo isejiguy emyenrobe widyse tâise lâpylâ urâ. Inakai modo kulâ agânhedyse witoem adyese lâpylâ ani. Tâzezewenry peba-ro watay, awârâ kâuntuba lâpylâ tâise urâ; tâwentâguezeinhe kulâ tâise urâ.

<sup>9</sup> Deus xurâem uguondo koendonro urâ-ro waunlo ara ani ienanaji saguhoem. Tâzezewenry iweniby kâuntuduo olâ ani Deus izepa ato ara kulâ awidyly awlyly kâuntuly. Deus aguehobyry takaze wawlylygue, xurâem koendâpa wawlyly tutuze ani urâ.

<sup>10</sup> Deus xurâem iwague ani urâ, idânârâ tâzezewenry iweniby kâinwântoem nudupa awlylygue. Aituo, Deusdâ iwaguepa yenehoin-em iweniby, mâkâ agâpa kâiehoem adyenehonze ani.

<sup>11</sup> Enokudyby urâ; tâzezewenry kâinwântuo, kâsemaguely waunlo ara ani ienanaji. Judeu domodo ezewenry inwenien-hoymby agueho ara awituo aunloenlâ Deus agâ widyly, warâ ani yangahu oday unâry. Idânârâ kehoem mârâ tâzezewenry iweniby agânhepyra wawyly, tutuze olâ ani urâ. Tâjiguelygue, aunloenlâ eagâpa kydâieholo warâ mawânâ Deus aguehobyry sakaduo ebyry.

<sup>12</sup> Deus, Moisésram judeu domodo ezewenry inwenien-hoymby olâ iozeno, Deuslâ mawânkâ xuduim, mâkâ lelâ mawânkâ iozeno. Iozeno, koendonro warâ mâkâ aguehobyry, Deus itaumbrylâ mawânâ.

<sup>13</sup> Aituo, tâlâ warâ keim: “Mârâ tâzezewenry inwenien-hoymby koendonroka Deus agâpa witoem aienehoim?” keim. Arâ inkâba! Kâinwâmpyra watobyrylâ Deus agâpa witoem aienehoim. Deus izepa ato agânhetuo, Deus aguehobyry kâenanâguely: “Xirâ akâiedâ. Awârâ akâiedâ” kehobyry. Arâ tâzezewenry nhenanâguen-honly inakanhe awitayn-hobyry modo. Deus xurâem inakanhe kehoem kâinwâmpyra watobyry nhenanâguen-honly.

*Deus ize ato ara aguidyse kydawyly umelâ, izepa ato aguiendyly*

<sup>14</sup> Tutuze kurâ, Tyispirituryenlâ Deus, Moisésram tâzezewenry inwenien-honly awyly. Kurâ kulâ urâ; won-honruguelâ mâkâ koendonro agânhedyse ato agânhetaymba urâ. Tâwaneim, tywymâry aguehobyry adiyndyseba tawyly umelâ, adyese. Arâ lâpylâ urâ, Deus izepa ato agânhedyseba wâne urâ, adyese olâ urâ.

<sup>15</sup> Koendonro agânhepyra urâ-ro watay, âwâlâ inanry auguely: “Âdaituoka enra agânhedyse wato agânhepyra wawyly?” uguely. Deus izepa ato agânhedily watay, âwâlâ inanry auguely: “Âdaituoka enra agânhedyseba wato agânhedily?” uguely.

<sup>16</sup> Deus aguehobyry kankadyly watay, âwâlâ inanry auguely: “ ‘Inakai kulâ awârâ agânhetby awyly’ adâkeze Deus.” Deus itaumbryry iozeno, iozeno lelâlâ.

<sup>17</sup> Urâlâ ize wawylygue inkâba, Deus izepa ato agânhedily. Wodaylâ agânhedyse wawyly âtugudyly. Mârâlâ utunri-ro waunlo ara aedyly.

<sup>18</sup> Kurâ kulâ urâ; xirâ onro ananolâ urâ, inakai modo aieni urâ. Awylygue won-honruguelâ, koendonro agânhedily wipyra wawyly. Agânhedyse wâne urâ, agânhetoem nudupa olâ.

<sup>19</sup> Inakai agânhedyseba wato adyese urâ; koendonro agânhedyse wato olâ urâ agânhepyra.

<sup>20</sup> Inakai agânhedyseba wato agânhedily watay, tânehonze awârâ, won-honrugueba Deus izepa ato agânhedily awyly. Wodaylâ Deus aguehobyry kankadyze wawyly âtugudyly, ize ato agânhepyra widyly-ro warâ.

<sup>21</sup> Tutuze urâ, arâ yagâ aidyly awyly. Koendonro agânhedyse wâne urâ, inakai aiedyly lelâ olâ kâuntuly.

<sup>22</sup> Ize wato Deus tâzezewenry aguienroem inwenien-hoymby.

<sup>23</sup> Agânhetoem Deus agueho ize wato, iweloem yetondâ mawânkâ mâkâ; iwelo modo iwerâ ize wato, yangahu oday unâgo warâ. Tâlâ olâ woday Deus aguehobyry arapa ayenehorim. Koendonro agânhedyse wato, inakanhe agânhedyse wato agâ woday âtuebadylymo-ro waunlo ara. Etadâdyby, kadeia oday tâeni ize ato anhekyly, ize tato mâkeba, arâ lâpylâ urâ, inakanhe awidyse urâ-ro watay, awidyseba wipyra urâ.

<sup>24</sup> Tuomareim mâkeba urâ! Âwâlâ inanry kadapâguely: “Ânguy wânkâ ise Deus izepa ato aiedyly kâinmohoem aienehoim, yigueduo, âji tâdâsenagazedoam udâpa witoem?” uguely inanry.

<sup>25</sup> Kywymâry Jesus Cristolâ mawânkâ kâmakeim! Inakanhe awidyse wato agânhepyra witoem won-hondâdâ mâkâ. Awylygue inanry, “Yagâ koendonro lelâlâ âmâ, Jesus Cristo anhekyly wâgâ” uguely Deusram.

Arâ urâ iwerâ. Toenzepa Deus ize ato agânhedyse wawyly. Jesus Cristo yagâpa-ro watay, Deus izepa ato lelâ tâise agânhekyly. Arâ lelâ olâ kurâ idânârâ.

## 8

*Deus Ispiritury Kuturim*

<sup>1</sup> Awylygue Cristo Jesus agâ tokaleom modo âdaunloenlâ Deusram ewentâdo peba awyly.

<sup>2</sup> Cristo Jesus xurâem kidyly iraynâ, Deusdâ iwague kydawyly. Awylygue Deus izepa ato aiedyly kinmohoem nudupa awyly. Deus olâ kâmake. Iweâma Deus Ispiritury kagâlâ. Deus izepa ato aiedyly kinmohoem kon-honru tuduze mâkâ, Jesus Cristo agâ tokaleom ara itybyem kydawylygue.

<sup>3</sup> Ton-honre Moisésram inwenien-hoymby idânârâ aguienroem. Awylygue mârâ tâzezewenry wâgâ kulâ kydâsemaguehoem nudupa awyly. Deus lelâ ton-honreim, inakanhe aguitobyry xygakeze. Tymery Jesus Cristo igonomâ. Karâlâ akâwâm iazely xirâ onro anaym. Kâmyenro lelâlâ wâne, âdaunloenlâ Deus izepa ato aniempyra olâ. Deus imery

iguely myakâwâm, inakanhe aguitobyry xygakehoem. Inakanhe tadawly emaym kurâ-ro waunlo ara akâwâm, mâkâ olâ inakanhe tadawly emaymba kâmakêdâ, Satanás “Aiekâ” kehobyry aguiempyra kitoem.

<sup>4</sup> Mâkâ iguely myakâwâm, Deus aguehobyry kiankabyra kitoem. Deus Ispirityru kuru-tobyry ara lelâ aguidyly iwerâ, ize kydato ara kulâ inkâba. Awlylygue Deus aguehobyry adyese lelâ kydawly. “Aikâ” kehobyry aralâ aguidyly.

<sup>5</sup> Ize tato aralâ adâidyse modo doma mârâanlâ âdutuolyo. Deus Ispirityru aguehobyry ara aini modo olâ mâkâranlâ âdutuolyo.

<sup>6</sup> Ize tato aralâ adâidyse donro modo aunloenlâ ise Deus agâpa âieholymo, igueduomo. Deus Ispirityru âdutuoyim olâ ise nadahulibamo, xurâmoem koendâpa awlyly umelâ. Tyigueduo Deus agâ isemo eydâ atodâ.

<sup>7</sup> Ize tato aralâ adâidyse modo Deus iduerylâ akaemo. Deus agueho neinwântaymbamo; mâkâ ize ato aiedyly nutubamo lelâlâ.

<sup>8</sup> Ize tato aralâ adâidyse modo Deus niomazeândaymba; nuduwâpyra Deus ize ato ara atoemoem.

<sup>9</sup> Âmaemo olâ aunlo keba. Agâmolâ kuru Deus Ispirityru-ro watay, amânhetomoem aguehobyry adyese âmaemo. Inakanhe amidyse matomo amânhetaymba âmaemo. Deus Ispirityru agâpaom, Cristo xurâ mâkeba.

<sup>10</sup> Cristo agâmo awlylygue, iweloem itondybyem mawlylymo, âdaunloenlâ Deus agâpa mâiehoba mitomoem. Igueze âmaemo inakanhe amitomobyry wâgâ. Arâlâ olâ ise Deus agâpa tyeseba mawlylymo. Târâ Deus eydâ atodâ, kurâem ânehondonzemo Deus Ispirityru, Deus xurâem, âdy inwentâguedomo peba mawânâ.

<sup>11</sup> Deus Ispirityru, Jesus Cristo igueypyem awlyly ume, kurâem itondoem adyese myakâwâm, tâkanâdobyrydâba egasehoem. Arâ lâpylâ, mâkâ kieinwândyly watay, xypyry etay kurâem kitondoem aiese mâkâ, kâpyâdobyrydâpa kâgasehoem. Tyispirityru agonromoguelâ ise Deus awârâ anhedlyly.

<sup>12</sup> Cristo eynynâ ypemugudo, ize kydato ara inkâba kine.

<sup>13</sup> Ize kydato aralâ aguidyly-ro watay, kyigueduo ise eagâpa kydawlyly. Deus Ispirityru kagâlâ awlylygue, mâkâ izepa ato aiedyly kinmoly-ro watay olâ âdaunloenlâ Deus agâpa kydâiehoba ise kurâ, xirâ onro anaym kydatay, kyigueduo alelâ.

<sup>14</sup> Deus Ispirityru âdutuoyim Deus imerylâ.

<sup>15</sup> Saguhoem Deus aguehobyry aiese kykewâdyly, kânagazenehonly kiyntadylygue kulâ. Tâwaneim, tânagazezeba tâitoem tywymâry aguehobyry aieni ara kulâ ani kurâ. Iwerâ olâ âwâlâ kyenehorimbyryem Deus Ispirityru; saguhobyry ara inkâba kurâ iwerâ. Deus Tyispirityru ingonotyby kagâlâ awlylygue, tyanunepa kurâ. Tutuzema kurâ, inakanhe aguituo kydâsemaguehobe awlyly; aunloenlâ Deus kânagazenehomba awlyly warâ. Deus Ispirityru kyam tutuen-honze, Deus imery kydawlyly. Awlylygue, Deus agâ aguykeday, “Kunwym” kykely.

<sup>16</sup> Deus imeryem kydawlyly, tutuze kurâ, mâkâ Ispirityrlylâ mawânkâ awârâ xutuenhoim; “Âkealâ” tâkeze mâkâ.

<sup>17</sup> Deus imery kydawlylygue ise, tynnonro modoem nhekanâdyby kienmakely. Cristo agâlâ ise koendonrope kidyly. Xirâ onro anaym kydawlyly ara, Deus xurâ keba modo kânagazezemo, Cristo tienagazedobyry ara. Cristo pymâem awlyly ume, âdyren-honly ume warâ, pymâem ise, âdyren-honze warâ lâpylâ olâ kurâ mâkâ agâlâ.

#### *Deusram kytâduo ise kuomaru kuru*

<sup>18</sup> Inakanhe lelâlâ wâne, tarâ onro anaym kydâsenagazedlyly, sakani kulâ olâ awârâ. Târâ Deus eydâ kydawlyly ume, kurâem aini olâ ise sakani keba, typygueim keba warâ. Kydâsenagazedaymba ise kurâ târâ.

<sup>19</sup> Idânârâ Deus nhugutaymby modo tynwânwânse xypyry etay Deus tynnonro modo nhutuen-honly.

<sup>20</sup> Adaguday, idânârâ koendâ lelâ myakâwândy. Ilâpyryem olâ idânârâ tâlanro modo inakanhe isezedyly. Idânârâ iguewâdyly. Âwâlâ kulâ inkâba arâ aidyly, arâlâ Deus aguehobyry awlylygue, waunroem xugutyby iso, iwydy warâ mâkâ itaumbyry nhakabygue-duolâ. Awlylygue, idânârâ iweloem tyedyly inwânwândyly.

<sup>21</sup> Idânârâ xirâ onro anano modo inakanhe itaynly iwerâ; iguezemo, iwânnezemo warâ. Xypyry etay, tynnonro modo, idânârâ tiungutaymby modo warâ iweloem ienehonze Deus. Mâkâ ize ato ara lelâ ise akaemo, âdaunloenlâ inakanhe nipyra tâitomoem, niguepa, niwânzepa warâ tâitomoem.

<sup>22</sup> Idânârâ xirâ onro anano modo tâsenagazeze, iweloem tyetondyly enuenze, pekodo tymery iazely tienuenday saenlu wâne myara.



<sup>23</sup> Awârâ modo kulelâba ise iweloem tyeseim. Kurâ idânârâ koendonro “Xuduze urâ” kehobyry emakeze kydawwily kiuntuhoem Deus Tyispiritury ingonobyryr modo tynwânwânse lâpylâ kurâ. Toenzepa iweloem kydâieholo kinwânwândyly mârâ kodo âdaunloenlâ iguedânrygue. Kuodaylâ kydâpyneândyly, inepa kehoem aidyse.

<sup>24</sup> Inakanhe aguityobyry, Jesus kieinwântuo, xygakeinhe Deus awyly tynwânwânse ani kurâ, awylygue mâkâ kâmakely. Kâmakely tâinwânse lelâlâ wâne kurâ, awârâ âdypygueândyly kuru olâ ise xypyry etay, kodo iwelo âdaunloenlâ adaindânrygue iweloem kydâiehoduo. Awârâ mawânâ kinwânwânkyly. Iwerâ tâlâ kydato kinwânwântaymba kurâ.

<sup>25</sup> Kinwânwânsezedyly lakuru olâ iweloem kydâieholo. Tâmaenze kurâ, emakeze kydawwily kieinwândyly kinmopalâ Deus aguehobyry.

<sup>26</sup> Deus agâ aguykely kiuntuba kurâ-ro watay, Deus Ispiritury kagâlâ konomedâze, aguykely kiuntuhoem. Kunwyn-am kytaumbyry nhadyly; tutuzenryem kehoem eagâ aguely.

<sup>27</sup> Âdy Deus ize ato tutuze Deus Ispiritury. Awylygue, Deus xurâ modo eynynâ eagâ agueduo, Deus ize ato aralâ nhekadyly.

<sup>28</sup> Idânârâ tinwynegyuly modo xurâem koendonro modo, inakai modo alelâ koendâ itoenlâ Deus anhenonly, ize ato anhentomoem ingâsedyby awylygue.

<sup>29</sup> Onro tiungudyly iraynâlâ myakâwândy Deus ânguy, ânguy warâ tynynonroem ini modo nhutuly. Akaemo tudakeze myakâwândy. “Ymery Jesus Cristo ara koendonroem itomoem igâseze urâ. Iwaigorumo ise mâkâ, kâinduakewâdybyr modo ise iukonodo, eaundudo warâr-ro” kewândymy Deus.

<sup>30</sup> Tinduakewâdybyr modo Deus tynynonroem igâsemâ. Ingâsedylymo kulâ warâpa olâ, turâem ewentâgedomo peba tyenehonze lâpylâ myakâwâm Deus. Tâwentâguezeba nhedylymo kulelâ mâkeba myakâwâm; xypyry etay Deus imery agâ kynroem, koendâ kitoem warâ aiemâ lâpylâ mâkâ.

#### *Cristo wâgâ Deus kywynedyly*

<sup>31</sup> Deus Ispiritury kagâlâ awyly kiuntulygue, xypyry etay inakanhe tadawwily wâgâ kâwentâguebyra Deus itoem, kydadahuliwâbyra kurâ. Kynynâ Deus awylygue, ânguy âda kyetaymba ise.

<sup>32</sup> Tymery Jesus Cristo âsenagazedly nimanâbyra myakâwâm Deus. Âsenagazedoem, kruz wâgâ iguehoem warâ adyenehonze lelâ myakâwâm mâkâ, kurâ idânârâ mâkâ einwânni modo mâkâ agâpa kydâiehoba kitoem. Toenzepa kywynedylygue myakâwâm Deus tymery kywâgâ iguehoem ingonodyly; tâinwânseim kuru koendonro kyam nhuduly adâkehobyry ara.

<sup>33</sup> Kurâ Deus induakewâdybyr modo ânguy kâwentâguedaymba ise. Tâwentâguezeba kydawwily wâgâ adâkeze Deus, mâkâlâ mawânkâ inakanhe aguityobyry xygakeim.

<sup>34</sup> Cristo Jesus iguely myakâwâm, inakanhe aguityobyry xygakehoem. Tyigueduo, kurâem tâitonze myakâwâm. Igueypyem inkâba iwerâ. Kunwyn Deus ezay mâkâ, târâ pymâem awyly, kurâem Deusram nhekadyly warâ. Awylygue ise xypyry etay, ânguy kygonopyra awyly âji tâdâsenagazedoam.

<sup>35</sup> Toenzepa lelâlâ Jesus Cristo kywynedyly. Âdy kulâ mâkâ kywynebyra itoem anienehonwâbyra! Takalague, tâsenagazeze, xurâ keba modoram tâzenagazeoze, typynigueba tâise, âdy peba tâise, kâmaynoem tâise, tyigueze lelâlâ warâ wâne kurâ. Arâlâ olâ, âdy Jesus kywynebyra itoem anienehomba awyly. Idânârâ aitaynrimr modo wâgâ Jesus kâempyra nitaymba.

<sup>36</sup> Deus itaumbyry awo wâgâ iweniby ara lelâ aidyly:

“Âmâ xurâem tawylygue,

kopaelâgâembaba xina âdyoze kely.

Kaneru domodo tyâhoram idâim ara kulâ xina âzenagazeoly âmâ xurâ keba modoram”

kely myakâwândy Deus inwenien-honly.

<sup>37</sup> Arâ wâne aguydâieholo, âdy Jesus kieinwâmpyra kitoem aienehoim peba olâ. Tâegane lelâ kienmaenly, kywynebyra nipyra mawânkâ Cristo. Sodadu tudueryr modo samuneni ara kurâ.

<sup>38</sup> Ton-honre kehoem xirâ Deus kywynebyra nipyra ise, uguely. Tâwâlâ ise igueypyem, kyiguepa warâ kydawwily, kywynebyra nipyra olâ ise. Anju domodo, kadopâ modo, awâkâ modo kulâ kywynebyra itoem anienehonwâbyra ise. Iwerâ aitaynrimr modo, waunroem aitaynrimr modo warâ kulâ kywynebyra nienehonwâbyra ise.

<sup>39</sup> Kau wogonro modo, onwogonro modo warâ Deus kywynebyra itoem anienehonwâbyramo. Deus nhugutyby ewy, Deus kywynedyly nekuâdâdaymba. Kywymâry Cristo Jesus wâgâlâ mâkâ kywynedyly nhenehonly, mâkâ agâlâ kydawwilygue.

## 9

*Deus induakeyby modolâ judeu domodo*

<sup>1-2</sup> Cristo xurâ wawlylygue, uguewâdily kulâ witaymba urâ. Woday tutuze urâ, âkealâ awyly. Inokubyramo wawlyly kâuntuhomem, yam tutuen-honze lâpylâ Deus Ispiritury. Toenzepa lelâlâ kâjityendily, agui mawânkâ ypemugudo ewy Cristolâ kâmakeim awyly einwântânry modo. Toenzepa akaemo Cristo nheinwândyseye wawlyly. Ydamudo iweom lâwâne akaemo; tokalelâma xina idamu.

<sup>3</sup> Auguely tâise Kunwyn-am: “Urâlâ nhewentâguegâ, judeu domodo âsemaguehoem. Tuduzelâ watay, urâlâ Cristo agâpa yenehongâ, ypemugudo mâkâ agâpa tyeseba itomoem” warâ tâise Deusram auguely.

<sup>4</sup> Ypemugudo judeu domodo Deus iduakewâm turâem itomoem. Eagâmolâ myakâwândy Deus, ton-honru, tohogu warâ enehonwânmy eyanmo. “Toenzepa koendonro âyanmo xuduze urâ. Toenzepa ise âepadylymo. Onro iwerâ eydâ matomodâ sodolâ ise âmaemo” warâ iweâpa lelâlâ Deus Abraâoram aguezesedobryr sakabygueduo myakâwândy Moisésram Deus ypemugudo ezewenry inwenien-honly, ize ato ara adâidyly nhutuhomoem. Deusram âduruholylymo, âdara tohoguedomoem aidilylymo nhutuhomoem. “Igonose urâ Messias âyanmo, imakehomoem” kewândymy Deus.

<sup>5</sup> Iweâpa lelâlâ Abraão, Isaque, Jacó (Israelgue tâzekeim lâpylâ) warâ umepa myakâwâm Jesus iazely judeuenlâ akaemo ewypyry awylylygue. Uguondo tyrnenseim modo iweypyrylâ mâkâ. Deus mâkâ, idânârâ xuturim, eni, aunlolâ tohoguezym warâ.

<sup>6</sup> “Urâ xurâ ise Israel domodo. Aunloenlâ ise kâendily” kewândymy Deus. Idânârâpa olâ israelita domodo Jesus einwânny, aguipa kulâ. “‘Aiese urâ’ tâkehobyry anientaymba Deus” kykeba olâ kine. Idânârâpa mawânkâ israelita iunupeom modo Deus induakeybyem awyly.

<sup>7</sup> Agui myakâwândy Abraão iweom, idânârâpa olâ Abraão iweompyry Deus xurâem awyly. Warâ myakâwândy Deus aguely: “Âpemugu ewy enday, âmery Isaque iweompyry lelâ ise kâenmawadâgyuly, kâenkily warâ, âmeombyry eagonrodo iweompyry mâkeba” kewândymy Deus, Abraâoram.

<sup>8</sup> Awylylygue kiuntuly, idânârâpa Abraão iweompyry Deusram iduakeyby awyly. Tâlâ myakâwândy Abraão imeom eagonrodo, akaemo agâ koendâ tawlyly keba olâ myakâwândy Deus agueho. Sara, Abraão iwydy adamyly iraynâlâ, Deus aguely myakâwândy Abraâoram: “Âmâ, Sara warâ imezeze âmaemo” kely. Deus aguehobyry ara myakâwândy imery Isaque iazely. Awylylygue Isaque iweompyry lelâ Deus koendâ nhekyly awyly; akaemo lelâ Deus “Kâinduakeyby” keho.

<sup>9</sup> Aguewâm mawânkâmy Deus Abraâoram: “Auguehobyry odaxi ituo, won-honru enehonze urâ. Anu iwelo âeni wâgâ, âwydy Sara imery uguondo iazeze” kewândymy.

<sup>10</sup> Aguepyyem tawlylygue myakâwândy Deus, Isaque, Rebeca agâ imeom ewy tokalelâ induakely; azagonro myakâwândy imeomo, âzetaylâ iazezpy.

<sup>11-12</sup> Akaemo iamimeom azagonro iazely iraylâ, Deus aguewânmy isemoram: “Âmery azagonro xutulymo-ro watay, iukono ise tywaigoru xutuim” kewândymy. Mâkâ arâ aguely myakâwândy, tyze idâhu oday awylymo umelâ, koendonro, inakai warâ aniempyrya awylymo umelâ. Arâ Deus adâkehobyry nhonwa kuru nhedyly myakâwândy arâ ize tawlylyguelâ, âdalâ idyly wâgâ inkâba.

<sup>13</sup> Iwenibyem Deus itaumbyry awo wâgâ, mâkâlâ aguehobyry: “Jacó, tâjiukono, kâinduakeyby; Esaú, tâjiwaigoru olâ kâinmetyby” kewândymy.

<sup>14</sup> Ângulylâ wâne keanra warâ tâkeze: “Koendâ inkâba Deus, tokalâ induakely, eagonro pylâ imekyly-ro warâ” tâkeze. Aypa olâ!

<sup>15</sup> Saguhoem myakâwândy Deus aguely Moisésram: “Koendâ wawlyly, eagâ koendâ wawyse wato agâlâ. Eagâ koendâ wato iduakeim urâ” kely.

<sup>16</sup> Awylylygue Deus kuduakely, ize kydawlylyguepa, aguienkyly wâgâpa warâ. Ize tawlylylygue lelâ Deus kuduakely.

<sup>17</sup> Deus itaumbyry awo wâgâ iwenibyem mâkâ lelâlâ Faraóram aguehobyry: “Urâlâ akâwâm âduakenri, tarâ Egitodâ pymâem mîtoem, aitaynrim modo wâgâ won-honru kâenehohoem. Arâ awidyly, tâinkâ lelâba urâ lelâ Deus awyly nhutuhomoem” kewândymy Deus.

<sup>18</sup> Deus ânguy agâlâ koendonroem tâidyse watay, adâise mâkâ. Ângulylâ tâeganeinhe tiendyse watay, adyese lâpylâ.

*Deus induakeyby modo, imetyby modo warâ*

<sup>19</sup> Tâlâ ise âmaemo ewy wakenri: “Deus aise kehobyry ara lelâ idânârâ aidilyly watayma, koendâ inkâba Jesus einwântânry modo infernuram ingonodyly-ro. Ânguy Deus ize ato anipyra itoem anientaymba.”

<sup>20</sup> Arâ inkâba, yataen-ho domodo, aguewâni modo! Âdy mâkeba kurâ; Deus agâ kydâjihoguoem ton-honruneba kurâ. Âmugâ xyganilâ âdaunlo tyngakylly awyly xutuim, “Warâ ise” tâkehobyry aralâ nhygadyly. Âmugâ tyganipyryram: “Arâpa tâise ayedyly” kewâpyra.

<sup>21</sup> Âmugâ xygani ize tato aralâ nhyanâdyly. Ikila tiamitybygue âmugâ iwâkuru kehoem adyese, iwâkudâdobe kehoem warâ, eagonro iwâkudâdo peba adyese aunloem kulâ tâwanizeinhe. Mâkâlâ xuturim, âmugâ keba.

<sup>22</sup> Arâ lâpylâ Deus kuduakely, kurâ mâkâ nhugutyby mâkeba iduakeim. Tyewiâky, ton-honru warâ tienehondyze tâinwântânry modoran-ro watay, arâ adyese lelâ mâkâ. Arâ awylygue, âdanipyralâ inakanhe aitomo nhemaenly. Mârâ xypyry etay olâ, infernuram igonosemo âsenagazedomoem arâ atomobyry wâgâ.

<sup>23</sup> Toenzepa tywâkuru, tohogu, ton-honru, koendonro tawyly warâ tienehondyze mâkâ tâinwânmi modoram watay, tânehonze lelâ. Toenzepa akaemo tytyenze mâkâ. Adaguly umelâ xutuwânmy mâkâ, akaemo târâ tuomareinhe awyly, “Xuduze urâ” kehobyry koendonro emakerin-em awyly warâ.

<sup>24</sup> Deus kygâsedely myakâwândy xurâem kitoem, judeu, judeu keba alelâ.

<sup>25</sup> Saguhoem Deus aguewâm tytaumbyry iweninribyry Oséias iwapery wâgâ: “Ynynâbaombyry modo ynynonroem isemo.

Kâinwynedânrybyry modo toenzepa ise kâinwynedylymo’ kely Deus.”

<sup>26</sup> Warâ lâpylâ myakâwândy Oséias inwenily Deus itaumbyry:

“Âmaemo judeu keba modo watâkehonze:

‘Deus eynynonro mâkeba âmaemo’ tâkehonze ani.

‘Deus iguedânry imery’ kehonze olâ âmaemo” kely.

<sup>27</sup> Saguhoem Deus itaumbyry iweniwâm lâpylâmy Isaías:

“ ‘Aguiom lelâlâ judeu domodo.

Sagunu sapâguehoem nudupa wâne

myara lâpylâ akaemo agui awyly sapâguehomoem nudupa.

Tuduakeze kulâ olâ ise âsemaguerim modo, idânârâpa’ kely.

<sup>28</sup> Aunlolâ nhemaenzesedyly nitaymba ise Deus,

xirâ anaym tynynonro keba modo âdalâ kulâ aisezedyly.

Adâkehobyry odaji ituo, enagazenehonzemo”

warâ iwenibyem awyly.

<sup>29</sup> Isaías iweniwâm lâpylâmy Deus aguehobyry aini modo wâgâ:

“Saguhoem Deus tâgupygueba kehoem Sodoma, Gomorra warâ donro modo

tainhehonze myakâwâm,

mâkâ aguehobyry nhakaduomo.

Deus Ton-honreim kypemugudo nityembyra-ro watay,

idânârâ tâise judeu domodo igueypyem awyly,

mârâ azagâ xidadâ saguhobyry sain-hobyry ara”

warâ myakâwândy Isaías inwenily.

*Judeu domodo ewy Jesus izepaom*

<sup>30</sup> Aituo-ro? Âdara kaise aguykely judeu keba modo âsemagueuly wâgâ? Warâ ise kâin-hoguly. Saguhoem judeu keba modo tâdâsemagueuly wâgâ âdy nutuwâbyramo akâwâm. Awylygue Deus nuimpa awylymo, tâmakehomoem, tâwentâguezeba tâitomoem warâ. Jesus nheinwândylymo watay olâ, âzemakeozemo, tâwentâzebamo warâ Deus xurâem.

<sup>31</sup> Judeu domodo olâ tâzezewenry Moisésram inwenien-hoymby, tâsemaguehoem, tâwentâguezeba tâitomoem warâ einwânse kelymo. Âsemaguehomoem nudupa olâ awârâ.

<sup>32</sup> Tâlâ keanra ângulylâ warâ agueim: “Âdaituoka akaemo nâzemaleoba awyly, tâzezewenry nheinwândylymo umelâ?” keim. Warâ kâin-hoguly: “Deus xurâem tâwentâguezenry mâkeba akaemo, Jesus neinwâmpyramo awylygue” uguely. Âwâlâ adâidylygue kulâ âsemagueze kewâdylymo, Deus ingonotyby tyeinwândylygue inkâba. Mâkâ tâgaseim, tuhu onwa tâjihodaigâze, tâihugueduo tâgato xypyryram naimpyra, myara akaemo Deus ezaxi naimpyra awylymo, Jesus neinwâmpyra awylymogue. Tuhu ihuguehomoem ihodaigânimobe-ro waunlo ara ise.

<sup>33</sup> Warâ iwenibyem awyly Deus itaumbyry awo wâgâ:

“Koendâ idataungâ.

Mâkâ kâingonokylly Siãoram igonose urâ.

(Jerusalémgue tâzekeim lâpylâ mârâ.)

Mâkâ einwântânry modo yam naintaymbamo ise.

Tuhu ara ihuguehomoem ihodaigânimobe ise.

Mâkâ einwânni modo olâ urâ xurâ modoram kâunduly emakezemo;  
 alâ kulâ inkâba ise nheinwândylymo”  
 warâ iwenibyem awyly Messias wâgâ.

## 10

<sup>1</sup> Cristo eynynâ ypemugudo, toenzepa lelâlâ Deus, judeu domodo nhemakedyze wawyly. Eyam ekadyly kâinmopa winase. “Pabai, ypemugudo emakegâ. Israel iweompyry Jesus nheinwântomoem aiekâ” ugezesevely.

<sup>2</sup> Deus ize ato adienyde awylymo, tutuze urâ, nutubamo olâ âdara koendâ aiedyly awyly.

<sup>3</sup> Tâmakehoem âdara Deus itaumbry awyly nhutuhomobe wâne, awârâ tiuntudyzebamo olâ. Jesus kieinwântuo lelâ kydâsemaguely awyly tiuntudyzemo inkâba. Tâzezeweny Moisés inweniby saguhobyry tyeinwândylygue âwâlâ kulâ âsemagueze kewâdylymo. Deus itaumbry ara adâidyse inkâba akaemo, mâkâ xurâem tâwentâguezeba tâitoem.

<sup>4</sup> Jesus Cristo iguely myakâwâm, tâzezeweny wâgâpa kydâsemaguely awyly itoem. Mâkâ kieinwândyly-ro watay, Deus xurâem tâwentâzeim mâkeba kurâ. Agui olâ judeu domodo warâ agueim: “Deus xurâem tâwentâguezeba kydawlyly, kâzeweny saguhobyry ara aguituo lelâ” keim, iozepa kulâ olâ arâ aguelymo.

*Tâsemaguedyze donro modo tâzmakeoze, Jesus nheinwântuom*

<sup>5</sup> Xirâ myakâwândy Moisés inwenily tâzezeweny einwândyly wâgâ Deus xurâem tâwentâguezeba tâidyse modo wâgâ: “Ânguylâ koendonro awyly aunloenlâ watay, inakai aniempyra tokalâ watay, arâ lelâ ise âzmakeoly, tâwentâguezeba ise-ro warâ” warâ myakâwândy inwenily.

<sup>6-7</sup> Warâ olâ Deus itaumbry awo wâgâ iwenibyem awyly, Jesus kieinwântuo kydâsemaguely wâgâ. “Angahumo oday tunâgueba itaungâ: ‘Ânguy kaise Deus eydâ atoam âkuim, kâmakeim kyam tienetoem? Ânguy kaise iguewâtyby modo ejidyram idâim, kyam mâkâ tienetoem?’ tâkezeba itaungâ” warâ iwenibyem awyly. Deus eydâpa âemâlâ Jesus. Iguewâm, kurâem itonmâ warâ. Awylygue myarâ, myarâ warâ kytâwâbyra kurâ, âdara kydâsemaguely awyly xutuze. Mâkâlâ mawânkâ kâmakeim.

<sup>8</sup> Warâ lâpylâ myakâwândy inwenien-honly: “Deus itaumbry âyanmo toentuneba. Ty-dase âmaemo; iwâgâ toenzepa tâpaunzeze âmaemo-ro warâ” warâ iwenibyem awyly Deus itaumbry awo wâgâ. Xirâ unâ mawânâ xina nhegatuly, kydâsemaguehoem Jesus xunâry kieinwândyly.

<sup>9</sup> “Ywymâry mâkâ Jesus” myguelymo tâjiduay, igueduo kurâem ietonibyryem Deus awyly tâinwânse âmaemo warâ watay, âsemagueze âmaemo.

<sup>10</sup> Jesus kieinwândyly-ro watay, Deus xurâem tâwentâgueduneba kurâ. Mâkâ tâinwânse kydawlyly aguykely tâjiduay-ro watay, tâsemagueze kurâ.

<sup>11</sup> Deus itaumbry awo wâgâ iwenibyem: “Deus einwânni modo âdaunloenlâ tonokudunebamo inwânwânklylymo wâgâ. Adienkylyem adâkehobyry adyese lelâ Deus awylygue” warâ iwenibyem awyly.

<sup>12</sup> Tâwâlâ idânârâ nheinwândylymo, judeu, judeu keba alelâ. Idânârâ iwymâry tokalelâ. Koendonro mâkâ tagâ agueim agâ, koendonro lelâlâ.

<sup>13</sup> Warâ iwenibyem lâpylâ Deus itaumbry awo wâgâ: “Mâkâ Kywymâryam tâmakehoem ekanibyry, mâkânra âzmakeoze” warâ iwenibyem awyly.

<sup>14</sup> Tâmakehoem nekadaymbamo ise, tâdâsemagueho tâlâ awyly neinwâmpyramo watay. Neinwântaymbamo ise, unâ Kâmakerim wâgâ nidapyramo watay. Nidapyramo ise, unâ tâdâsemagueho eyanmo tâgatuzeba-ro watay.

<sup>15</sup> Âtâ anary iwaguenonra unâ egatuim Jesus wâgâ agueze nâtâba, tuğunoseba warâ watay. “Tuomazeze kurâ, unâ egatuim, unâ iwâkuru enese saintuo” warâ Deus itaumbry awo wâgâ iwenibyem awyly.

<sup>16</sup> Unâ iwâkuru Jesus wâgâ agueim egatuly xina nimopa lelâlâ wâne, idânârâpa olâ einwânni modo, aguiapa kulâ. Warâ Isaias inweniby Deus itaumbry awo wâgâ. “Âwâgâ xina agueday, toenzepa tindadysebaom modo, Pymâ” kewândymy mâkâ Deusram.

<sup>17</sup> Waunroem unâ Jesus wâgâ agueim wao kindadyly, ilâpyryem pylâ mâkâ kieinwândyly-ro warâ.

<sup>18</sup> Tâlâ ânguylâ warâ tunâgueim: “Judeu domodo keanra Jesus wâgâ aguehonly nidapyra” tâkezemo. Mâkâ wâgâ aguehonly tydaselâ myakâwândy akaemo. Deus itaumbry ara aidyly:

“Tâinkâ lelâba Deus itaumbry MOH itybyem awyly.

Onro anaym MOH warâ unâ egatuwâni modo xunâry âjidaholy”  
 warâ iwenibyem awyly.

<sup>19</sup> Ânguylâ wakeze: “Judeu domodo wânkâ xirâ unâ nutubamo?” keze. Judeu domodo tydase, tutuze warâ lelâlâ Deus aguehobyry. Tutuzemolâ myakâwâm; unâ kâmakeim izepa tawylimo, judeu keba modo nheinwândylymo ume. Warâ Moisés inweniby Deus itaumbry awo wâgâ aguely:

“Israelita domodo, kâinduakeyby modo âmaemo.

Israel iweompyry kebaom modo urâem itomoem aiese lâpylâ olâ urâ,

akaemo saguhoem urâem itânrybyry modo.

Akaemo wâgâ âsewânize, iewiâseze warâ olâ âmaemo”

warâ Deus aguehobyry iwenibyem awyly.

<sup>20</sup> Iweâpa itybyem awyly ume, tyanepa myakâwândy Isaiás, Deus aguehobyry egatuze:

“Uidânrypyry modo woenkezemo,

mâkâ tiuinly keba kulâ soenkenri ara.

Ygâsedânry modoram âpanâgueze urâ’ Deus kehobyry”

Isaiás inwenibybe.

<sup>21</sup> Judeu domodo wâgâ Deus aguehobyry iweniwâm lâpylâ olâmy Isaiás:

“Peto oday, kopae alelâ kâinane judeu domodo yeinwântondyly kâinwânwândyly.

Tâjiunwym, tymery iweâpa âxiguyby saindyly inwânwânto ara akâwâm

tâwâtarique kehoem kâinwânwândylymo.

Kâingâseduomo tindadysebamo olâ akâwâm.

Izepa tâisemo lelâ akâwâm, eyanmo augueho tyeinwândysebamo akâwâm warâ’ Deus kehobyrybe.”

## 11

### *Deus judeu domodo intyendobyry*

<sup>1</sup> Wakeimbe ise: “Turâem tinduakeyby judeu domodo nhodokely lelâlâ wânkâ Deus?” keim. Arâ inkâba! Urâ, judeulâ urâ, Israel iweypyrylâ urâ. Saguhoem pymâ tynrenseimbyry Abraão iweypyrylâ urâ. Benjamim iepadyby ewylâ urâ.

<sup>2</sup> Adaguly iraynâlâ myakâwândy Deus xina induakely. Iwerâ xina agâpa nipyra mâkâ-ro warâ. Tutuzelâ âmaemo, Deus itaumbry awo wâgâ iweniby Elias aguehobyry typemugudo wâgâ. Enanaji myakâwândy idânârâ israelita domodo Deus neinwâmpyra itybyem. Type-mugudo tâwentâze myakâwândy, Deus agâ adâkeday wakely:

<sup>3</sup> “Pymâ, âtaumbry egatuwâni modo nyâwâdâmo. Âyam xuduypy ekanâdo tuhu nhangatygyby nakalaguemo. Urâ kulelâ âinwânni. Idânârâ eagonro modo âinwândyly nimo. Yâze tâkezemo-ro warâ” kewândymy Deusram.

<sup>4</sup> Warâ olâ myakâwândy Deus aguely eyam: “Âmâ kulelâ mâkeba yeinwânni. Tâlâ aguilâ yeinwânni modo; sete mil uguondo modo kâinduakeybybe, yeinwânsezedomoem. Eagonro modo ‘Deus’ kehomu Baal nehoguedaymba akaemo” kewândymy Deus.

<sup>5</sup> Elias ume tâlâ myakâwândy judeu domodo ewy Deus einwândyly imodânry modo, arâ lâpylâ xina iwerâ judeu domodo ewy Jesus einwânni, aguipa wâne, tâlâ olâ. Ize tawylgyue Deus nhekyly xina awylgyue.

<sup>6</sup> Xina tytyenze tawyl tynehon-hoem Deus ypemugudo ewy induakely, anhetyby wâgâ inkâba. Kagâ koendâ Deus awylgyue lelâ kydâsemaguely. Koendâ aguienkyly wâgâ kâmakely watayma tâise, Deus koendonroem awylgyuepa kydâsemaguely-ro.

<sup>7</sup> Agui israelita domodo ewy unâ tâsemagueho xutudânry, saguho tâzezewenry einwântuo lelâ tâdâsemaguely waunlo ara enanajimo awylgyue. Aguipa kulâ akaemo ewy Deus induakeyby Deus xurâem tâwentâguzenry, mâkâ Ingonotyby tâinwânse awylmogoue. Agui olâ Deus tygâsedyly tindadysebaom modo.

<sup>8</sup> Deus itaumbry iwenihobyry ara aidyly:

“Deus itaumbry tymese akaemo;

neinwâmpyra itomoem aiemâ mawânkâmy.

Âindâ kulâ itomoem aiemâmy,

tygâsedyly nidapyramo itoem.

Iwerâ Deus anhetyby tâensemo lelâlâ wâne,

itaumbry tydasemo lelâlâ wâne warâ,

nutubamo olâ tyam âdakeze Deus aguely awyly,

epy, kydatânry ara kulâ akaemo”

warâ iwenibyem awyly.

<sup>9</sup> Warâ Davi inweniby Deus itaumbry awo wâgâ:

“Âwâlâ kulâ ise âsenogudylymo.

Toenzepa mawânkâ âdydo imeompe awylymo,

toenzepa ipynigumo âty imâsedo adientomoem.

Tagâ Deus iomaru waunlo ara ise enanajimo. Arâpa olâ.  
Enagazenehonzemo mâkâ, inakanhe aidylymogue.

Âpa ezano sagurim wâne inra odaxi tâihugueze,  
tâigueze warâ myaramo ise.

<sup>10</sup> Epy wâne âdykâingâ tâtâly nutuba,  
myara inepa Deus tânagazenehonlymo nutuba awylymo.  
Tynynâ koendâpa idyly tientuo adahulizemo olâ,  
tyenwyem tâmânreim sanâni âzewyho ara itaynlymo ise”  
warâ myakâwandy Deus, Daviram inwenien-honly.

<sup>11</sup> Waugely: “Agui judeu domodo Jesus tyeinwândysebaom awylygue, aunloenlâ Deusram âjimolyo? Xurâem itondomoem nudupa ise? Ihugueyby sautânry ara akaemo?”  
uguely. Arâ inkâba! Jesus wâgâ lelâ tâdâsemaguely. Neinwâmpyra atomobyry wâgâ kulâ judeu domodo âjimoly wao. Awylygue, judeu keba modo âsemaguehoem Deus anhedyly. Judeu keba modo xurâem koendonro modo Deus anhedyly tientuomo, ypemugudo Jesus einwânsemo, mâkânra koendâ tâzehohoem lâpylâ.

<sup>12</sup> Agui judeu domodo Deus ingonotyby kâmakeim neinwâmpyramo. Awylygue Deus aguely: “Arâ atayma judeu keba modo Jesus einwânni ise kâenmakely, eagâ koendâ wato warâ-ro” kely. Judeu keba modoem toenzepa âdydo imeom koendonro Deus anhedyly. Judeu domodo kâmakerim inmetobyry koendâ tâjitoem anieneho watay, agui judeu domodo, agui lelâlâ mâkâ nheinwântuomo, koendonro kuru aiese Deus!

*Judeu keba modo emakeho*

<sup>13</sup> Âmaemo judeu keba modoram xirâ kâinwenily. “Unâ iwâkuru Jesus Cristo wâgâ agueim egatura Judeu keba modoram” Deus kehobyry urâ. Arâ kâsewanilygue, toenzepa kohomaendyly, xirâ iewanu wâgâ.

<sup>14</sup> Tynwânwânse urâ, judeu keba modo Deus xurâem kely tindatuo, ypemugudo Jesus tyeinwândyse idyly tâsemaguehoem lâpylâ. Iwerâ tâlâ matomo, akaemo tâlâ idysemomo wato.

<sup>15</sup> Jesus tyeinwândysebaom awylygue, ypemugudo Deusram âjimolyo wao. Toenzepa judeu keba modo, Jesus tyeinwântuo, Deus eataen-hoem tâisemo ani. Xypyry etay, agui judeu domodo Jesus einwânripe-ro watay, toenzepa lelâlâ ise tojiomaru. Akaemo Deus agâpa ietaymby modo, igueypy kurâem itondyby ara ietybyem ise, mâkâ agâ awylymo.

<sup>16</sup> “Deus, âmâ xurâ xirâ” kykely-ro watay, idânârâ mârâgue xygatyby modo Deus xurâ lâpylâ. Deus xurâ trigu-ro watay, pão mârâgue xygatyby mâkâ xurâ lâpylâ. Nady kientâduo, “Deus, âmâ xurâ xirâ” kykely-ro watay, nady ipery, ipebary, iwatary, sary, idânârâ mâkâ xurâem awyly. Judeu domodo idamudo Deusram âjduakeoly-ro watay, MOH warâ akaemo iweompypyro modo mâkâ xurâem awyly.

<sup>17</sup> Etaungâ se oliveira ipery iweâpa âpa ezay etâdyby. Oliveira idu odanogue tianseudyze sodo-ro watay, iwatary tatâwâze, mârâ ejipyay pylâ idu odano iwatarygue nhaseudyly-ro. Adientuo niguewâpyra mârâ azakâlâ, iwindylâ mawânârâ igueânehondânry. Se oliveira idu odano emyenro âmaemo judeu keba modo; judeu domodo pylâ âpa ezano emyenro-ro. Idu odano iwatary tadatâoze, âpa ezano ipery onwa saseudoem, arâ lâpylâ âmaemo judeu keba modo, judeu domodo ejipyay mawylymo, Jesus imenibyry modo ejipyay. Judeu domodoram “Xuduze urâ” Deus kehobyrygue iwerâ koendâ mâzeholyo, se iwatary saseudyby niguepa itoem, iwindy wâgâ awyly ara.

<sup>18</sup> Awylygue iwerâ judeu domodo xurâpyrybe mawylymogue kulâ sawoem tâiseba itaungâ. “Deus kagâ koendâ awylygue, Deus xurâem judeu domodo takaze koendâ kydawly iwerâ” tâkezeba itaungâ. Iwindy mawânârâ se esebydâni, nihugueba itoem, iwatary keba. Abraão, iweom warâ wâgâlâ Deus agâmo koendâ awyly. Âwâgâmo inkâba myakâwâm mâkâ; akaemo judeu domodo idamudo agâ koendâ awyly.

<sup>19</sup> Wamyguelymo: “Iwatary idu odano saseudoenlâ myakâwâm âpa ezano iwatary satâly. Iwatary satâwâdyby emyenro kulâ akaemo judeu domodo, xina pylâ âkelo iwatary-ro, awârâ mawânârâ enehoim Deus xurâem tynrenseinhe xina awyly, judeu domodo takaze” myguelymo.

<sup>20</sup> Deus, judeu domodo tumoze wao, Jesus tyeinwândyseba awylymogue. Se âpa ezano iwatary satâwâdyby ara lelâlâ ypemugudo. Jesus mâinwântuomo olâ, Deus se oliveira iwatary saseudyby ara âedylymo. Awârâ wâgâ kulâ olâ judeu domodo takaze koendonroem mawylymo kâzegaetaundâ. Tâmaynelâ itaungâ, mâinwâmpyra mipyra mitomoem.

<sup>21</sup> Se oliveira iwatary kuru emyenro judeu domodo nityendaymba myakâwâm Deus, tâinwâmpyra awylymogue. Âmaemo se iwatary saseudyby emyenroma kuru ise mâkâ nityendaymba, mâkâ mâinwâmpyra midylymo-ro watay.

<sup>22</sup> Koendâ xirâ auguely inwantaguedaungâ. Koendonro Deus tâinwânni modo agâ, tâinwântânry modo olâ tânagazenehonze. Awylygue koendonro, kânagazeni alelâ Deus

awyly. Agâmo koendâ olâ mâkâ, mâkâ einwânsezêlâ âmaemo watay; imâem lelâlâ ise mâkâ agâmo koendâ awyly. Mâinwânsezebyra âmaemo watay olâ mâinwâmpyra matomobyry wâgâ inagazenehonzemo lâpylâ, se iwatary satâbyby ara lâpylâ ise âmaemo.

<sup>23</sup> Judeu domodo, Jesus neinwâmpyra tawlyly inmolymo watay, Deus xurâem itonze lelâ akaemo. Se iwatary satâbyby ejidydâlâ saseudyly wâne mârâ ara ise akaemo. Tyam odopâdomoem adyenehonze Deus.

<sup>24</sup> Judeu mâkeba âmaemo; saguhoem Deus xurâem inkâba akâwâm âmaemo. Iwerâ olâ xurâem olâ âmaemo. Se idu odano iwatary, se âpa ezano ipery onwa saseudyby emyenro âmaemo. Deus turâem âetâmo. Agui judeu domodo Jesus nheinwântoem adyese lâpylâ mâkâ, xurâem itondomoem. Deus xurâem ânagado mâkeba awârâ. Mârâ iwatary satâbylâ, nnonwa saseudondyly myara.

*Deus koendonro lelâ idânârâ agâ*

<sup>25</sup> Cristo eynynâ ypemugudo, koendâ idataungâ. Deus induakeyby modo wâgâ saguhoem tâgatuzenry modo mâuntudyzemo wato. Judeu domodo ewy Jesus kâmakeim awyly neinwântaymbamo ise. Arâlâ ise aisezedyly, judeu keba modo Jesus einwâni modo agui idyly ara, Deus turâem ize ato ara. Judeu domodo aunloenlâ eganumo nipyramo olâ ise. Iweâpa lelâlâ Deusmy judeu keba modo ewy iduakewâm turâ xurâem itomoem. Idânârâ akaemo judeu keba modo Deus induakeyby Jesus nheinwântuo, agui judeu domodo Jesus neinwâmpyra tawlyly imozemo, einwânsemo-ro warâ. Xirâ mâuntulymo watay, judeu domodo takaze koendâ mawlylymo angahumo odaji mânhetaymba ise âmaemo.

<sup>26</sup> Arâ ise Deus toenzepa judeu domodo nhemakely, toenzepa lelâlâ. Aituo ise wakehonly: “Idânârâ Israel domodo âzêmakeoybyem” kehonly. Aituo judeu domodo âzêmakeoly. Deus itaumbryry iweniby ara ise aidyly: “Siãodâ ise kâmakeim âewyly.

Jacô iweompyry inakanhe aitobyry xygakeze mâkâ.

<sup>27</sup> Inakanhe aitomobyry kângakeduo,

eagâmo kâseinwândo aienibyryenlâ ise urâ”

Deus kehobyry iwenibyem awyly judeu domodo wâgâ. (Jacô iweompyrylâ israelita keho, judeu keho warâ.)

<sup>28</sup> Tuduery ara Deus judeu domodo ewy nhedyly, unâ iwâkuru Jesus wâgâ agueim inmetomobyry wâgâ. Awlylygue mawânâ âmaemo, judeu keba modo, Deus xurâem mawlylymo. Deus olâ judeu domodo izepa nipyra. Kaudyly umelâ myakâwândy Deus, akaemo induakely turâem itoem. Xina ipemugudo iwymâry saguhobyry modoram aguwânmy: “Âmaemo, âmeombryrymo, âweompyrymo warâ yataen-hodo lelâ” kewândymy Deus eyanno.

<sup>29</sup> Induakewâdyby modo tymetuneba ise. Koendonro Deus emaym nhemakeybymo, tâtyonduneba ise.

<sup>30</sup> Awlylygue iwerâ, judeu domodo Deus neinwâmpyra awlylygue, toenzepa mâkâ agâmo koendâ awyly, saguhoem mâkâ einwânnipyry keba mawlylymo umelâ.

<sup>31</sup> Arâ lâpylâ judeu domodo agâ aidyly. Wayam waunroem akaemo ityenze mâkâ, âtyendomo ara. Akaemo agâ koendâ ise mâkâ, iwerâ neinwâmpyra awlylymo umelâ.

<sup>32</sup> Etadâdyby ara itomoem aiemâmy Deus, tâinwâmpyra awlylymogue. Tâinwânnipyry olâ tytyenze, tytyenzeinhe awlylymo umepalâ, idânârâ inakanhe atomobyry tygakeze warâ.

*Deus koendonro awyly wâgâ agueho*

<sup>33</sup> Koendonro lelâlâ Deus. Tonomegueim lelâlâ mâkâ. Âdy nhutudâny lâpeba; âdy indatânry lâpeba warâ. Nuduwâpyra mâkâ âpaunzedo kiuntuhoem; konomery takaze mâkâ enomery. Mâkâ adyendyse ato, âdara aidyly awyly warâ kiuntuwâbyra kurâ.

<sup>34</sup> Warâ iwenibyem awyly itaumbryry awo wâgâ:

“Ânguy Kywymâry Deus nhangahu oday xunâry nutuwâbyra, adyendyse ato nutuba warâ.

Ânguy mâkâ xuruse tonomeguneba.

<sup>35</sup> Âdylâ Deusram xuduhoem nuduwâpyra, idânârâ sodolâ mawânkâ mâkâ.

Ânguy ‘Iepywagâ’ kehoem nuduwâpyra”

warâ iwenibyem awyly.

<sup>36</sup> Mâkâlâ mawânkâ idânârâ xuguni. Mâkâ aguehobyryenlâ mawânâ idânârâ tâlâ awyly. Mâkâ peba-ro watay, iwerâ tâlânro modo ipa tâise. Idânârâ tâlâ awyly, mâkâ ize ato aietoem. “Deus, koendonro âmâ. Ânguy imyenro lâpeba” kykezezene mâkânra. Arâlâ nidâ.

<sup>1</sup> Warâ âurudylymo, Cristo eynynâ ypemugudo. Kytyendâ lelâlâ Deus; kagâ koendâ lelâlâ warâ. Awlygye Deusram mâtuhomoem kêenkadyly, âwanu adiyendyse tato âmaemoguelâ anhetoem. Saguhoem mykâinane ânguydo imeom nhâllymo, Deusram nhegamelymo warâ etydâ, mâkâ tionmazeândoem. Eyam kydtatuly olâ mâkâ ize ato iwerâ, mâkâ ize ato aguietoem. Awârâ mawânkâ iomazeâni.

<sup>2</sup> Deus xurâ keba modo anhekyly, agueho warâ arapa aitaungâ. Âwâlâ Deus angahumo oday âunârymo nuguke, mâkâ aralâ angahumo oday âunâgomoem. Arâ-ro watay, âdy Deus ize ato awyly xutuze âmaemo. Koendâ lelâ aguiendyly mâkâ ize ato; iozepa kulâ aguiendyly, aguykely warâ izepa; iomazeâni aguiendyly ize ato.

<sup>3</sup> Deus yagâ koendâ awlygye, ienomery nhuduly, iwâgâ auguehoem, iwâgâ kêanomedâdoem warâ. Awlygye arâ âurudylymo. Sawoem inkâba itaungâ. Deus inomerymo âyanmo nhuduypygye koendâ xutuwâdaungâ xurâem amitomoem. Deus enomeryguelâ âdylâ aietaungâ, imâsedo, imâsedo keba alelâ. Mâkâ xurâem âdylâ imâsedo amânhetomoem Deus inomerymo xudurimpyryem watay, mâkâ eon-honruguelâ aietaungâ. Agonromo takaze kehoem tynrenseinhe mâdutulymo waypa olâ itaungâ.

<sup>4</sup> Tokalelâ kodo, agui olâ isejiguy. Âzekiba lelâ inkâba mârâ modo ewanu.

<sup>5</sup> Arâ lâpylâ kurâ Jesus einwânni modo, agui lelâlâ wâne kurâ, tokaleom ara lelâ olâ kurâ, Jesus Cristo agâ on-hoam kydawlygye.

<sup>6</sup> Kagâ koendonro lelâlâ Deus. Awlygye idânârâ kyam konomery nhuduly, mâkâ xurâem aguietoem. Âzekiba lelâba olâ konomery âduduoly. Awlygye Deus aguietoem kon-honru nhuduhobry aralâ aguyjiene. Itaumbry egatuin-enlâ kon-honru nhuduly-ro watay, kyzegatunre.

<sup>7</sup> Emawyadâniem kon-honru nhuduly-ro watay, tâmawyadâzeim kyzemawyadâne. Kienomedâdoem kon-honru nhuduly-ro watay, kyzenomedânemo.

<sup>8</sup> Deus ize ato xutudânry modo kiunrutoem kon-honru nhuduly-ro watay, kudurunemo. Âdy pebaom modo emawyadâniem kon-honru âduduoly-ro watay, tâwânrempa tâlâ kydato kyduunre. Pymâem kitoem kon-honru nhuduly watay, tâmayne kehoem kâwanu aguyjiene, koendâ lelâ. Kagonro modo ityeniem kon-honru nhuduly watay, tuomare kehoem awârâ aguyjiene.

<sup>9</sup> “Kâinwyneguely âmâ” myguelymo kulâ keba nidâ, koendâ amidylmoguelâ tywyneze lelâlâ mawlymo enehonwâdaungâ. Inakai izepa itaungâ, Deus ize ato koendonro ize matomo nidâ.

<sup>10</sup> Âpemugumo âwankuem mânhepyra mitomoem âzeon-hondâdaungâ. Âmaemo Cristo eynynâ âjipemugu modo âpynedaungâ.

<sup>11</sup> Tynepa itaungâ. Tuglûigie lelâ âsewaniwâdaungâ warâ, tuomare lelâ Kywymâry xurâem amitoemoem.

<sup>12</sup> Tuomare itaungâ, târâ eydâ atodâ mâenmakelymo mâinwânwântaymo. Takalague âmaemo-ro watay, idânârâ emawwâdaungâ, Jesus mâinwâmpyra mipyramolâ. Deus agâ amyguelymo kâjimowâdaundâ.

<sup>13</sup> Cristo eynynâ âpemugudomo kaikânro modoram âsejiguy mo ewy âunduwâtaungâ. Jesus einwânni modo iwague âetyby modo xuataungâ, ejidy mo xykyhomoem âunduwâtaungâ warâ.

<sup>14</sup> Deus xurâ keba modo inakanhe âedylymo watay, “Pabai, koendâ lelâ ikâ eagâmo” kewâtaungâ Deusram. Mâpeândomoem kâzekadaundâ; Deus eagâmo koendâ itoem lakuru ekadaungâ.

<sup>15</sup> Tuomaruneim modo agâ mataymo, eagâmo ohomaendaungâ; tuoguruneim modo agâ mataymo, eagâmo ohogüendaungâ.

<sup>16</sup> Mâkâ agâ, mâkâ agâ alelâ koendâ itaungâ. Sawoempa itaungâ. Âdaunlolâ âwanu amânhetomoem amyguehonlymo watay, “Agânhepyra ise urâ, aunlo kulâ keba wawlygye” tâkezeba itaungâ. Âkelo modo takaze kehoem tonomegueinhe mâdutuly mo waypa itaungâ.

<sup>17</sup> Inagazenimo inagazedomobry ara lâpylâ mâpeândyly tâiseba itaungâ. Âzeon-hondâdaungâ, koendonro amânhetomoem koendâ amyguehon-homoem.

<sup>18</sup> Koendâ lelâ aitaungâ, ânguy agâ tamekygueba, idânârâ agâ koendâ lelâ mitomoem.

<sup>19</sup> Cristo eynynâ ypemugudo, inakanhe kulâ amâieholymo watay, tâpeânzeba itaungâ. “Pabai, mâkâ ayetobry, tutuzelâ âmâ” kewâtaungâ Deusram. Mâkâlâ mawânkâ ise inagazenimo enagazenehoim. Warâ Deus itaumbry awo wâgâ iwenibyem awly:

“Inweânimoem kehobry urâ.

Urâem ityby modo enagazeni, enagazeze urâ kewândymy Deus.”

<sup>20</sup> Deus aguehobry ara lelâ aitaungâ:

“Âduery tâwinze-ro watay, xuakâ.



Tatuanze-ro watay, parugue sakuigâ.  
Arâ amidyly watay,  
âewiâsedily imoze mâkâ âduery, âpybazeze-ro warâ”  
warâ iwenibyem awyly.

<sup>21</sup> Tâpeânzeba itaungâ, inagazenimo agâ olâ koendâ itaungâ. Aitomo ara aise myguelymo-ro watay, akaemo ara inakanhe ise lâpylâ âmaemo; koendâ âduerymo etaungâ; atâen-homoem ietaungâ lelâ.

## 13

### *Pymâ domodo aguely kyzeinwâne*

<sup>1</sup> Pymâ domodo aguehobyry einwântaungâ, uguely idânârâam. Idânârâ pymâdo, pymâem awyly arâlâ Deus ize awylygue. Deus arâ izepa watay, pymâ lâpeba tâise. Awylygue idânârâ pymâdo, pymâem awyly, Deus aguehobyryenlâ awylygue.

<sup>2</sup> Mâkâ pymâ aguehobyry einwântânry, Deus pymâem itoem aguehobyrylâ mâkâ nheinwântânry. Pymâ einwântânry modo âsenagazeze.

<sup>3</sup> Inakanhe aini modo mawânkâ pymâdo xytani, koendâ aini modoma nytabyra.

Awylygue, pymâdo mâyntabyra mitomoem, koendonro lelâ aietaungâ. Aguelymo makabyra âmaemo watay, koendonroem mawylymo agueze.

<sup>4</sup> Deus ewanu aieni akaemo pymâdo, koendâ mitomoem. Inakai adyese âmaemo watay olâ, akaemo xytadaungâ. Âturimo tawylygue inagazenehondâmo lelâlâ mawânkâ. Arâ aituomo, Deus aguehobyrylâ anhekylymo.

<sup>5</sup> Awylygue arâ ârudylymo. Pymâdo aguely kadakadaundâ. Deus inagazebyramo itoem kulâ inkâba akaemo aguely einwântaungâ; iozelâ arâ adâjidyly mâuntulymoguelâ.

<sup>6</sup> Deuslâ pymâdo xuruni, kurâdo edylyem âsewanihomoem. Awylygue impostu mâempywadomoem nhekadylymo-ro watay, epywadaungâ lelâ, tâwanu anhetomoem lâpylâ.

<sup>7</sup> Augueondyly, mâempywagulylymobe watay, epywadaungâ. Impostu watay, impostulâ epywadaungâ, pymâdo tâwanu anhetomoem. Idânârâ pymâdo xyrentaungâ, âwankuem kêietaundâmo warâ.

### *Kagonro agâ kydâpynene*

<sup>8</sup> Mâempywagulylymobe watay, epywadaungâ. Aunlolâ âpynezedezaungâ, âdylâ epywadyly âwanikedânry ara. Arâ mâpynedylymo-ro watay, idânârâ tâzezewenry Deus Moisésram inwenien-hoymbylâ amânhekyllymo.

<sup>9</sup> Warâ mawânâ Moisésram Deus inwenien-hoymby: “Eagâ mohogüin-hobyry lelâ xynanâgâ, eagonro lâpylâ waypa. Ânguy kâdyâ. Tâmagazeza ikâ. Âkelomo isejiguy wâgâ tâsewânizeba ikâ” kewândymy Deus. Tâlâ lâpylâ olâ eagonro tâzezewenry modo. Tâzezewenry enday tutuzeim kuru olâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” warâ iwenibyem awyly.

<sup>10</sup> Agonromo agâ tâpyneze lelâlâ âmaemo watay, idânârâ koendonro aiese âmaemo. Xurâmoem inakanhe amidylymo mitaymba ise âmaemo. Kagonro agâ tâpyneze kurâ-ro watay, idânârâ Deus aguehobyrylâ kieinwânkylly.

### *Tonomeguelâ kine, Deus aguehobyry aguietoem nhuduly umelâ*

<sup>11</sup> Awylygue Deus ize ato ara lelâ aietaungâ, Kywymâry Jesus âeto iwaguepa isezedyly mawânâ. Xykywâni modo araba itaungâ. Tonomeguelâ itaungâ, Deus aguehobyry amânhetomoem nhuduly umelâ. Jesus âetuo, Deusram âzemaekooybyem ise kurâ. Iwaguepa idyly Jesus âeto. Iweâpa nidâlâ mawânâ kieinwântobyry.

<sup>12</sup> Kywymâry âetuo, idânârâ inakanhe tadato modo sainze, xixi egaseduo wâne tyamepa idyly myara. Awylygue akaemo iamu oday anhekyly kyjimonre, xixi egaseduo, sodadu typy tâmaxi tyese, on-hondybyem tuduery tinwânwântoem myara. Koendonro lelâ Deus aguiendyse ato aguietoem on-hondybyem kine.

<sup>13</sup> Koendonro modo lelâ aguyjiene, kydâzeseoedu kydâpybazebyra kitoem. Toku ikaji kipyra kine. Eagâ kydhogüin-hobyry keba kulâ kiynanâbyra kine. Kywypado aguiempyra kine. Tâdâjitogulyly kykeba kine. Âkelomo isejiguy wâgâ kydâsewâniba kine.

<sup>14</sup> Aguiendyse kydato kulâ aguienkyly watay, Deus izepa ato adyese kurâ. Awylygue inakai aguiendyse kydato aguiempyra kine. Kywymâry Jesus Cristo olâ kyzeinwânesezene, mâkâ ize ato aguietoem.

## 14

*Cristo eynynâ kypemugudo kiunâguebyra kine*

<sup>1</sup> Tâlâ âduaymo ton-honremba kulâ Jesus einwânni, koendâ Deus ize ato xutudânry modo warâ. Kododokewâdaundâmo, kâdunâguedaundâmo warâ. Eagâmo tyewiâpazeba itaungâ, nhutudânrymobe watay.

<sup>2</sup> Tâlâ mâkâ ton-honre kehoem Jesus einwânni modo, Awylygue, âdy nheindânry peba, nhâtânry peba warâ. MON alelâ typynigue Deus tânagazebyra awyly tutuze tawylygue. Tâlâ pylâ ton-honre Jesus einwântânry modo. Awylygue podo nâpyra awylymo. Tâzewily modogue lelâ ipynigumo.

<sup>3</sup> Warâ auguely âyanmo, âmaemo MON alelâ typynigueim modoram: “Tâzewily modogue kulâ typynigueim modo kâdunâguedaundâ. ‘Tuândy kulâ âmaemo, podo mampyra mawyly-mogue’ ” tâkezeba itaungâ eyanmo. Alâ tâzewily modogue typynigueim modoram auguely: “Podo sâni modo kâdunâguedaundâ. ‘Deus izepa ato kulâ amânhekylymo’ tâkezeba itaungâ.” Deus mawânkâ newentâguebyramo.

<sup>4</sup> Cristo eynynâ âpemugu Deus emary mâkâ, imarymo keba. Deuslâ mâkâ xutuim. Mâkâ nheinly, nheindânry warâ wâgâ ewentâgueze ton-honruneba âmaemo. Deus ize ato anhedyly-ro watay, iwâgâ koendâ agueze Deus. Deus izepa ato anhedyly-ro watay, mâkâlâ ise xuruni. Kywymâry Jesuslâ mawânkâ ise tânudâ kehoem itoem aienehoim.

<sup>5</sup> Tâlâ mâkâ Jesus einwânni: “Tâlâ iguandyly tynrenseim kuru” keim. Mârâ oday lelâ Pymâ Jesus nhehoguedyly, nâsewaniba warâ. Tâlâ pylâ Jesus einwânni wakeim: “Idânârâ iguandyly âzekiba lelâ” keim. Awylygue kopaelâgâembaba Jesus agâ aguely, nhehoguedyly warâ. Mâpaunzedylymo âkealâ kuru olâ etaungâ.

<sup>6</sup> “Tâlâ iguanto tynrenseim kuru Deus ehoguedo” kewâni modo, awârâ umelâ Kywymâry Jesus koendâ kehoem nhehoguedo lâpylâ. MON alelâ typynigueim, tâzewilygue lelâ typynigueim modo warâ. Kywymâry Jesus tyeinwândyze tawylygue arâ aidylymo. Tâwinduadylymo iray, “Kunwym Deus, koendonro lelâlâ âmâ, merâ podo xina nhânkly mâundulygue” tâkezemo Deusram. Alâpylâ podo sâtânry modo auguely: “Kunwym Deus, koendonro lelâlâ âmâ, xirâ tâzewily kain-hoem mâunduhobyry wâgâ” tâkezemo lâpylâ Deusram warâ.

<sup>7</sup> Jesus mawânkâ kâeni, kuturim warâ. Tarâ onro anaym kydawyly, mâkâ ize ato aiese, ize kydato aiese inkâba. Kyigueho, kyiguepa kito warâ kinduakewâbyra kurâ, ize kydawylygue kulâ.

<sup>8</sup> Tarâ onro anaym kydawyly ara, Kywymâry Jesus ize ato ara lelâ aieniem tarâ kydawyly, ize kydato ara kulâ ainiem inkâba. Kyigueduo kulâ mâkâ agâpa kidyly kitaymba ise kurâ; kâensezelâ mawânkâ ise mâkâ. Awylygue Kywymâry Jesus xurâempa kipyra kydawyly ise, igueypyem, igueypyemba alelâ.

<sup>9</sup> Jesus Cristo tâigueze, kurâem tâitonze olâ akâwâm, kuturin-em itoem. Iguewâtyby modo, iguedânry modo alelâ iwymâry mâkâ.

<sup>10</sup> Idânârâ âmaemo Cristo eynynâ âjipemugu lelâ. Tâwâlâ wâne tâzewily modogue typynigueim mawylymo, podo sâni mawylymo warâ, idânârâ âyanmo auguely. “Tâtonâguezeba itaungâ. Cristo eynynâ âpemugumo kâzewentâdaundâ. Xirâ enanâguedaungâ. Xypyry etay idânârâ ise Deus enado kydawyly, kywâgâ agueday.”

<sup>11</sup> Deus itaumbyry iweniby agueho ara ise aidyly:  
 “Idânârâ onro anano modo ienado âzeguhoam isemo,  
 iwymârymo wawyly enehonze akaemo.  
 “Deus lelâlâ âmâ, eagonro lâpeba” kezemo yam.

Urâlâ “Warâ ise aidyly” keim’ kewândymy Deus”  
 warâ iwenibyem awyly Deus itaumbyry awo wâgâ.

<sup>12</sup> Augueondyly, idânârâ ise Deusram kydâkaduwâdyly aguitobyry, aguykehobyry warâ wâgâ.

*Âkelomo Deus izepa ato anhetoem akâiienonwâdaundâ*

<sup>13</sup> Awylygue, kagonro kiunâguedyly kyjimondre. “Cristo eynynâ ypemugu Kywymâry aguehobyry nhakadoem aienehoim agânhepyra ise urâ” kykenre tâwâlâ. Âjihodaigâdoem tuhu idâwanxi iedyly waunlo ara mawânârâ.

<sup>14</sup> Kywymâry Jesus âpaunzedo aralâ kâpaunzedyly. Awylygue MON alelâ kâinly, kândyly warâ; pyni tâinzenry, podo tâsenry warâ lâpeba. Tâlâ olâ Jesus einwânni wakeim modo: “Podo kiântuo, Deus kagâ iewiâpaze” keim. Awylygue âdaunloenlâ podo nhunru nâpyramo. Tiântuom, Deus ezewenry sakanibyryem âdutulymo.

<sup>15</sup> Warâ âyanmo auguely, pyni MON alelâ einrim modoram. Mâkâ tâzewilygue lelâ typynigueim, podo mândylymo nhedyly watay, tiândyze tâise mâkâ. Nhâdyly-ro watay, âjityenze mâkâ, tâsenryem awyly tiuntuduo. Arâ amânhenehonduomo, Cristo eynynâ âpemugumo xurâem koendâ amidylymo mâkeba. Mânlymogue kulâ, mânkylymogue kulâ

warâ âpemugumo inakanhe aitoem akâienehonwâdaundâ. Emakeze Cristo iguehobyry xurâem koendonro aietaungâ.

<sup>16</sup> Âmaemoem koendonro wâgâ ânguy inakanhe kulâ aguehoem akâienehonwâdaundâ.

<sup>17</sup> Aguehobyry kiankabyra kydawyly, âkelo agâ kyewiâpabyra kydawyly, Deus Ispiritury kagâ awylygue kuomaru warâ, Deus kywymâryem awyly enehonri, kieinly, kienlyly warâ mâkeba.

<sup>18</sup> Kagâ tuomare Deus, aguehobyry ara lelâ aguissezedyly-ro watay, kurâ domodo kywâgâ koendâ lelâ aguezemo lâpylâ.

<sup>19</sup> Aituo kagonro agâ koendâ kyenehoim lelâ aguyjiene, kagonro agâ âdapa lelâ kitoem. Kagonrodo Jesus nheinwândyly imâem ieni lelâ aguyjiene.

<sup>20</sup> Idânârâ kurâ Jesus einwânni modo agâlâ Deus, mâkâ kyize ato ara lelâ kitoem. Aituo, Cristo eynynâ âpemugu Deus xurâem inakanhe nhutuly akâiedaundâ, tâsenry, tâinzenry warâ lâpeba. Mânkylmogoe, mâinlymogoe warâ, âpemugumo adienyseyba ato amânhenehondumo olâ iozepa amidylumo.

<sup>21</sup> Iozeno âpemugu Cristo eynynonro xurâem adyesenry amânhenehomba mawlyly. Iozeno kuru podo mâmpyra mawlylymo, vinhu mâenypa mawlylymo warâ, âdylâ Cristo eynynâ âpemugumo inakanhe aitoem amânhenehomba mawlylymo warâ. Arâ amidylumo, Deusram mâenwentânehomba mitomoem.

<sup>22</sup> Awârâ modo wâgâ arâ ânûngumo-ro watay. Deus, âmâ alelâ xutuim nidâ. Awârâ modo wâgâ agonrodo agâ mâtunâguebyra mitomoem. Kuoday tutuzema kurâ Deus ize ato adyese kydawyly, kydadahuliwâbyra kurâ.

<sup>23</sup> “Âdara wânkâ urâ sâse, kâmpyra” myguelymo watay, mântuomo, Deus mâinwâmpyra midylumolâ, ago lelâ mâinwâmpyra mâtomobyry wâgâ. Kieinwâmpyra kulâ aguidyly watay, Deus kieinwâmpyra kydawylylâ mawânâ awârâ.

## 15

### *Kagonro modo kyzon-honwanâne*

<sup>1</sup> Kurâ ton-honre lelâlâ Jesus einwânni modo mâkâ ton-honremba einwânni modo kien-wiâsedaymba kine. Kydurunemo lakuru, koendâ nhutihomoem, ton-honrenry isejiguy sanâdyllyem kienmawyadâdylly-ro waunlo ara. Xurâmoem koendonro aguyjiene, kurâem lelâ waypa.

<sup>2</sup> Cristo eynynâ kypemugudo xurâem koendonro aguyjiene, iomazeânimo warâ. Awârâ aguiendyly, imâem Jesus Cristo nheinwânsezedomoem.

<sup>3</sup> Turâem kulelâ aidyly nitaymba akâwâm Cristo; warâ Salmos wâgâ iwenibyem awyly: “Âwykedaymo, ywykelymo-ro waunlo ara lâpylâ ani” warâ iwenibyem awyly.

<sup>4</sup> Idânârâ Deus itaumbyry iweniby modo, konomedâdoem myakâwâm âjiwenioly. Iweniby kintainduo, tâzeon-hondâze kurâ, kydâsenagazedylly kienmaen-hoem, Jesus einwândyly kin-mopalâ.

<sup>5</sup> Deuslâ kon-honwanâni, kydâsenagazedylly kienmaen-hoem, einwândyly kinmopa kitoem warâ. Deus agâ adâkeze inanry urâ âwâgâmo: “Pabai, Roma donro modo âynynonro modo eon-honwanâgâmo, tagonro xurâem koendâ lelâ aitoemoem, Jesus Cristo aitobyry ara” uguely.

<sup>6</sup> Arâ âwâgâmo Deusram auguely, tokaleom âmaemo-ro waunlo ara, Kywymâry Jesus Cristo nhunwym monhomaendomoem.

### *Unâ koendonro idânârâ kurâ domodoem tâzegatuoze*

<sup>7</sup> Cristo eynynâ âpemugumo kâjimetaundâ, âkeloem agâmo ezewenrymo watay. Tâpyneze lelâ itaungâ eagâmo, Cristo âwynedomo ara. Koendâ mâzedyllymo tientuo, idânârâ ise Deus nhehoguedyllymo.

<sup>8</sup> Saguhoem Deus aguewândymy xina idamudo Abraâoram, Isaquenra, Jacóram warâ: “Igonose urâ âpemugudo emawyadâni, emakeim warâ” kewândymy. Awylygue, Cristo âewyly judeu domodo emawyadâniem, emakeinhe warâ itoem, adâkehobyry adyese lelâlâ tawyly Deus nhenehon-hoem eyanmo. Âewyly myakâwâm judeu domodo xurâem koendonro aiese.

<sup>9</sup> Âewyly myakâwâm judeu keba modo, “Pabai, koendonro lelâlâ âmâ, xina tytyenze mawyllygue” Deusram kehomoem. Deus itaumbyry awo wâgâ iwenihobyry ara ani aidyly. “Judeu keba modo duay wawlyly ume,

âwâgâ koendâ agueze urâ.

Igâtuze urâ, omazeândoem”

warâ Davi inwenibyem awyly.

<sup>10</sup> Xirâ Moisés aguehobyry iwenibyem lâpylâ Deus itaumbyry awo wâgâ:

“Âmaemo judeu keba modo,

Deus induakeyby modo agâ ohomaendaungâ”  
warâ iwenibyem awyly.

<sup>11</sup> Davi aguehobyry Deus itaumbryry awo wâgâ iwenibyem lâpylâ:

“Idânârâ âmaemo judeu keba modo,

Kywymâry iomazeândaungâ.  
Idânârâ kurâ domodo,

Deus koendonro awyly wâgâ imâem aguewâtaungâ”  
warâ iwenibyem awyly.

<sup>12</sup> Isaias inwenibyem lâpylâ Deus itaumbryry awo wâgâ:

“Jessé ipemugu âese”.

Judeu keba modo iwymâryem ise Deus ingonodyly.

Mâkâ tâmakely inwânwânsemo”

kely myakâwândy inweniby Jesus wâgâ.

{Xirâ saguhobyry modo inweniby kâinwenily, saguhoem inwenibymolâ xirâ ume aini awyly mâuntuhomoem.}

<sup>13</sup> Deuslâ olâ xutuen-hoim mârâ kydâsemagueho emakeze lelâlâ kydawwily, mârâ kinwânwânkyly. Mâkâ tâinwânse mawwylmogoe, toenzepa omazeânehondyzemo wawwily; tâkuâgueba ânehondyzemo urâ warâ, âdy ikuâdânimo peba itoem. Deus Ispiritury agâmolâ. Ize urâ, mâuntuly mo lelâlâ idânârâ Deus koendonro âmaemoem “Xuduze urâ” tâkehobyry aiese awyly.

*Paulo judeu keba modoram unâ iwâkuru egatuim*

<sup>14</sup> Cristo eynynâ ypemugudo, koendâ tutuze urâ, agonromo agâ koendâ lelâ mâzedily mo awyly. Deus wâgâ koendâ tutuze mawwily mo, agonromo xurudyly, eon-honwanâdily warâ mawwily mo.

<sup>15</sup> Warâ olâ keankâ kâpaunzedily: “Deus wâgâ koendâ tutuzemo lelâlâ wâne, tiuntuyby nenanânehomba itomoem olâ kâinwenily” uguely keankâ âwâlâ. Awylygue xirâ âyanmo kâinweniday, âdy koempyry wawwily, Deus mawânkâ xirâ iewanu koendonro agânhetoem uduakeim.

<sup>16</sup> Jesus Cristo emaryem akâwâm Deus uduakely, judeu keba modoram tâdâsemaguely wâgâ unâ kâengatuhoem. Jesus mâinwântuomo, Deus imakely mo tâgatuze urâ. Arâ lâpylâ mawânkâ Deus mâkâ xurâem itomoem anhedyly mo. Deus Ispiritury wâgâ akaemo ty-wykenry ara awwily mo, Deus xurâem. Deus enado kurâ domodo eynynâ aguewâni modo, mâkâ xurâem koendonrolâ eyam nhegamely mo, arâ lâpylâ Jesus einwânni modo Deusram kâengamely-ro warâ.

<sup>17</sup> Jesus Cristo agâ tokaleoem wawwilygue, toenzepa womaru xirâ âwanu, Deus aguehobyry agânhedylygue.

<sup>18</sup> Tyanunepa auguely ywâgâ Cristo anhetyby wâgâ. Agui judeu keba modo Deus nheinwântoem adyenehonze mâkâ. Auguely tydasemo, agânhekyly tâensemo warâ; tien-tuomo, xurâem tâidyse idily mo lâpylâ. Awârâ aidily aguehobyry wâgâ, awitobyry wâgâ warâ.

<sup>19</sup> Deus Ispiritury yagâlâ itoem aguewâm. Awylygue mâkâ eon-honrugue adyesenry modo, kurâ domodo adawihioem aieni warâ agânhedyly. Aituo imâem tiuntudyze idily mo Deus wâgâ. Tadakobâze kâinane urâ, unâ koendonro Jesus wâgâ egatuze. Âdykâingâ udâhobyrydâ, tâgatuze lelâ urâ; Jerusalémdâlâ kadaguly, iepagudyly Iliria eynynâ.

<sup>20</sup> Toenzepa xirâ unâ kâengatadyze wawwily, Cristo wâgâ aguely idatânry modoram. Idanipyry modoanlâ kâengatuly-ro watay, âkelo nhaunâtyby âtâ itâdily kâenwanikely waunlo ara kulâ tâise.

<sup>21</sup> Warâ iwenibyem awyly Deus itaumbryry awo wâgâ:

“Âzehoze Deus âdykâ aguely idatânry modoram, xutzuzemo warâ.

Nhutulymoenlâ maisse âzegatuoly”

kely myakâwândy Deus, Isaiasram inwenien-honly.

*Paulo Romaram tâtâdize itobyry*

<sup>22</sup> Toenzepa udâdize tâise urâ âyanmo IU ise; nudupa olâ udâhoem, myarâ, myarâ warâ Cristo wâgâ unâ idatânry modoram egatuze udâly awylygue.

<sup>23</sup> Iweâma olâ Kywymâry Jesus xurâem tarâ kâsewaniho nâdypygueândâ. Inepalâ wâne keanra ise udâly; iweâpalâma nhesemo udâdize wawwily.

<sup>24</sup> Espanharam udâhogue iweâpa widyze urâ agâmo, âwynupygueândomoem. Myarâ yaindily iray, âdylâ ipa wato yam mâunduly mo ize lâpylâ ise urâ, koendâ lelâ udâhoem.

\* 15:12 Davi nhunwym myakâwândy Jessé.

<sup>25</sup> Áyanmo udály iraynâ, Jerusalémram wao ise waunroem udály, tonlo Deus xurâ âdy pebaom modo idinheruru xuduypy sase.

<sup>26</sup> Jesus einwânni modo Macedônia eynnonro, Acaia eynnonro modo warâ mawânkâ dinheru tindátyguyby xuduim, tonlo modo Cristo eynynâ typemugudo xurâem. Ize tawlymoguelâ arâ aidylymo.

<sup>27</sup> Ânguy aitomoem agewâpyra. Tiundudyse tawlymoguelâ nhudulymo. Macedônia donro modo, Acaia donro modo warâ judeu mâkeba akaemo; Jesus tâinwânsemo olâ ani, judeu domodo Jesus wâgâ unâ nhगतuly tindatuo. Saguhom akaemoem âdy ipa atomo tuduze ani judeu domodo; “âdy ipa atomo” ugueho, Jesus xunâry augueho. Iwerâ akaemo judeu keba modo, judeu domodo ipa ato xuduim. Iozelâ akaemo judeu domodoram dinheru nhudulymo. Turâem anhetbymolâ nhemyombâguylymo tâlâ tatomogue.

<sup>28</sup> Jerusalémram yaindyly-ro watay, idânârâ dinheru idátyguyby eyanmo xuduze urâ. Târâ iewanu kâympygueânduo, Espanha yan-yam ise udály. Udâdaylâ ise âydâmo iepagudyly.

<sup>29</sup> Awyarâ yaintuo, ohomaenze kurâ, idânârâ kurâem koendonro lelâ Cristo anhetby wâgâ.

<sup>30</sup> Kywymâry Jesus Cristo kagâlâ awlylygue, kagonro agâ kydâpynedoem Deus Ispiritury adyehonze awlylygue warâ, ynnâ Deusram mâenkadomoem âurudylymo. Ynnâ Deus agâ amyguepa tâiseba itaungâ, âurutomobyry ara.

<sup>31</sup> “Pabai, Paulo mâempyra tâiseba ikâ, Judéia eynynâ Jesus einwântânry modoram nâzenagazeoba itoem. Jerusalêmdâ Deus xurâ modo tuomare lelâ mârâ dinheru igonotyby mâkâ nhaklyly nemakemo warâ” kewâtaungâ Deusram.

<sup>32</sup> Mâenkadylymo, Deus ize ato ara-ro watay, tuomare lelâlâ ise awyarâ yaindyly. Ekobyzegueze wao urâ agâmo; eon-honwadybyem ise iegasely, Kywymâry Jesus ewanu aieseze.

<sup>33</sup> Deusram kâenkadyly, koendâ mawlylymo ume, koendâpa mawlylymo ume alelâ, koendâ âetomoem, mâkâ mawânkâ koendâ tadawlyly sodo agâmolâ mâkâ warâ.

## 16

### *Paulo âsedaenguhobyry*

<sup>1</sup> Cristo eynynâ kypemugu Febe âyanmo kâingonokly. Pekodo koendonro merâ. Jesus einwânni Cencreiadâ âtâdyguyim modo emawydâni merâ.

<sup>2</sup> Awyarâ saintuo, koendâ etaungâ, Kywymâry Jesus xurâ lâpylâ mawânkâ merâ. Koendâ edaenkuwâdaungâ, Deus eynnonro modo tagonro agâ âsedaenguhô ara. Ânguy nemawydâbyra nîpyra merâ, toenzepa tâmawydâze, iemawydâdâ lâpylâ. Awlylygue, âdylâ ize-ro watay, eyam âunduwâtaungâ.

<sup>3</sup> Priscila, isolâ Áquila warâ ywynu nawâdâmo. Cristo Jesus xunâry egatulyem iewanu ume toenzepa iemawydâdâ akaemo.

<sup>4</sup> Ienagazeze kewâni modo amaymba iemakeze tâkewâday âdyolylo agâ ani. “Koendonro lelâlâ âmaemo, urâem amânhetybymo wâgâ” uguely eyanmo. Idânârâ judeu keba modo Jesus einwânni, yagâ tâseinwânzemo awârâ wâgâ.

<sup>5</sup> Ywynu sawâtaungâ uguely lâpylâ Jesus einwânni modo Áquila, Priscila warâ etydâ Deus itaumbry idase âtâdyguywâni modoram.

Yataen-ho kâinwynegyly Epêneto ywynu nawâdâ, Ásia eynynâ waunroem kuru Cristo einwânni.

<sup>6</sup> Maria lâpylâ kâendaenkuly, âmaemoem toenzepa âsewaniby.

<sup>7</sup> Andrônico, Júnia warâ lâpylâ kâendaenkuly. Yara, judeu lâpylâ akaemo. Jesus wâgâ augueduo kadeia odaxi kâiehybygueduo, yagâlâ ani akaemo etagu. Jesus kâinwâmpyra wawlyly umelâ akâwâm akaemo Jesus nheinwândyly. Toenzepa âdutorim akaemo Jesus xunâry egatuim awlylymogue.

<sup>8</sup> Ampliato ywynu nawâdâ, yataen-ho kâinwynegyly Kywymâry Jesus einwânni.

<sup>9</sup> Urbano ywynu nawâdâ lâpylâ. Cristo ewanuem xina atay, xina agonrolâ ani mâkâ. Yataen-ho kâinwynegyly Estâquis kâendaenkudyze lâpylâ urâ.

<sup>10</sup> Apeles kâendaenkuly lâpylâ. Cristo tâinwânse lelâlâ tawlyly enehoimbyry. Aristóbulo ety odano modo kâendaenkuly lâpylâ.

<sup>11</sup> Herodião kâendaenkuly lâpylâ, yara judeu lâpylâ mawânkâ. Narciso ety odano modoram ywynu kawânehonly lâpylâ, Cristo eynynâ ypemugudo lâpylâ mawânkâ.

<sup>12</sup> Trifena, Trifosa warâ kâendaenkuly. Imâem tâsewanize akaemo pekodo modo Kywymâry Jesus xurâem. Yataen-ho Persideam ywynu kawânehonly, Jesus xurâem imâem tâsewanize lâpylâ mawânkâ.

<sup>13</sup> Rufoam ywynu kawânehonly, Kywymâry Jesus xurâem tâsewaniday, ton-honre lelâ mâkâ âsewanily, tâkeze einwânni modo. Rufo ise kâendaenkuly lâpylâ; tymery ara kehoem wonnipyry.

<sup>14</sup> Asíncrito, Flegonte, Hermes, Pátrobas, Hermas, idânârâ Cristo eynynâ ypemugudo ywynu nawâdâmo.

<sup>15</sup> Filólogo, Júlia, Olimpas, Nereu, eaundulâ warâ kâendaenkuly. Idânârâ Deus xurâ modo ywynu nawâdâmo.

<sup>16</sup> Awaparymodâ tohonuguze agonromo agâ âsedaenguwâdaungâ, agonromo agâ tâpyneze mawlymo mâenehon-homoem\*. Idânârâ Jesus einwânni modo idaenkulymo lâpylâ.

*Tâdâturudo xypyry*

<sup>17</sup> Árudilymo, âmaemo Cristo eynynâ ypemugudo. Jesus einwânni modo âjigüe kulâ âtuebadoem aienehonze kewâni modo agâ, Jesus einwândyly ekuâdâni modo agâ, Kywymâry Jesus wâgâ enomedâdobyry mâindatybymo wâgâ inakanhe agueim modo agâ warâ tonomeguelâ itaungâ; sodokewâdaungâ.

<sup>18</sup> Arâ aini modo, Kywymâry Jesus Cristo aidysemo ato ara inkâba aidylymo, adidyse tato kulâ anhekylymo. Tunâgoengue kehoem tâinwântoem aguelymo; kewâdylymo kulâ olâ. Warâ tâsemaguely xutudânry modo nhenokudylymo.

<sup>19</sup> Âkelo anaym einwânni modo adâkezemo: “Jesus xurâ Roma donro modo Jesus aguehobyry aniempyry nipyramo” tâkezemo. Âmaemo Roma donro modo Jesus einwânni modo arâ igarymo kâindadylygue, toenzepa womaru. Koendonro modo lelâ olâ koendâ mâuntudyzemo wato, amânhekylymoem. Inakai amânhedysebamo urâ, eagonro modoram akâienehonwâdaundâ lâpylâ warâ.

<sup>20</sup> Deus mawânkâ koendâ tadawyly sodo. Inepa ise mâkâ Satanás eon-honru nhainly, âdaunloenâ inokubyramo itoem.

Âmaemoem Kywymâry Jesusram kâenkadyly, koendâ nhetomoem.

<sup>21</sup> Timóteo idaenkulymo. Yagâ Jesus xurâem tâwaneim merâ. Lúcio, Jasão, Sosípatro warâ iwynumo manwâtomoem aguelymo; judeu lâpylâ asaemo, urâ Paulo judeuem wato ara.

<sup>22</sup> Urâ, Tércio, xirâ kata Paulo aguehobyry iweninri. Ywynu sawâtaungâ uguely âyanmo, urâ, aramo, Jesus xurâ lâpylâ wawlylygue.

<sup>23</sup> Urâ Paulo augueondyly. Gaio idaenkulymo lâpylâ, ety oday wato. Merâ etydâlâ inanry Jesus einwânni modo âtâdygylymo Deus itaumbry idase. Erasto tywynu nhawânehonly lâpylâ. Xirâ xidadâ oday dinheru xynanâni merâ. Quarto, Cristo eynynâ kypemugu, idaenkudzemo lâpylâ.

<sup>24</sup> [Idânârâ âynynâmo Kywymâry Jesus Cristoram kâenkadyly, koendâ lelâ nhetomoem. Âkealâ xirâ.]†

*Deus wâgâ koendâ aguykenre*

<sup>25</sup> Deus wâgâ koendâ aguykenre. Mâkâ kulelâ ton-honre Jesus einwândyly kinmopa kitoem aienehoim. Xirâ wâgâ auguezesedyly, unâ iwâkuru tâdâsemagueho Jesus Cristo wâgâ kâengatuduo. Saguhoem iweâpa lelâlâ xirâ unâ iwâkuru Jesus Cristo wâgâ tutuwâduneba myakâwâm, toenseim, tâgatuzenry emyenro mykâinane.

<sup>26</sup> Saguhoem, Deus itaumbry egatuwâni modo tâdâsemagueho wâgâ aguehomo koendâ tutuzeba myakâwândy. Akaemolâ nutubamo mawânkâ myakâwândy âdy mârâ tiengatuly awyly. Iwerâ olâ xutuen-honribyryem Deus Iguedânry koendâ kehoem âdy tâgatuzeim awyly. Tâinkâ lelâba tytaumbry iwâkuru xutuoem, idânârâ nheinwântomoem agueho, nakabyra itomoem warâ.

<sup>27</sup> Tokalelâ Deus. Tonomegueim awyly wâgâ, koendonro awyly wâgâ, tohogueim awyly warâ aguykeho itoem aunlolâ, kurâem Jesus Cristo anhetyby wâgâ.

Xirâ kulâ âyanmo kâinwenily.

Alâ ise.

Paulo

\* **16:16** Saguhoem tohonuguze âsedaengulymo. Iwerâma tâpymogoynze tâdâsedaenguly. † **16:24** Idânârâ livru saguho modo wâgâ iwenibyemba xirâ.

## 1 CORÍNTIOS

### Paulo Saguho Kata Inweniby Corinto Donro Modoram

Xirá kata wâgâ inwenily Paulo nhangahu odaji iemâmy Deus. Awylygye Deus itaumbyrylâ xirâ Paulo inweniby, âdara Deus xurâem adâjidyly wâgâ Corinto donro modo nhutuhoem. Jesuslâ myakâwândy tywâgâ Paulo aguehoem agueim. Jesus xunâry egatuze azagâ tâgasely ieto wâgâ Corintoam myakâwândy Paulo idâly (Atos 18dâ). Dezoito nunâ awârâem myakâwândy eagâmo nhakadyly. Agui myakâwândy Jesus einwânni modo, Deus ize ato wâgâ koendâ nutubamo olâ myakâwândy. Awylygye Jesus tyeinwândyly umelâ, izepa ato anhedlymo. Awylygye xirâ kata wâgâ mârâ xidadâ oday Jesus einwânni modo xurutobyrybe awyly.

Pauloram iweniwânmomy, mârâ modo wâgâ lelâba turutoem. Imâem myakâwândy tiuntudyze awylymo Deus ize ato ara tâitomoem. Capítulo 7dâ todohogüinly wâgâ, capítulo 8dâ xygatyby modoram pyni egameyby sâdyly wâgâ, âdalâ kulâ Jesus einwânni modo aidyly wâgâ warâ myakâwândy Paulo inwenily. Capítulo 12dâ, 14dâ warâ, Deus enomerymoem nhuduypy wâgâ Paulo eyanmo iweniwânni. Capítulo 13dâ âdara kagonro agâ kydâpnyedily awyly wâgâ Paulo inweniby tâjaitainhoze. Capítulo 15dâ Paulo inweniby âdara, kyigueduo, Deus kurâem kyetondyly wâgâ aguely, kiuntuhoem.

#### *Aguely adaguho*

<sup>1</sup> Urâ Paulo, xirâ kata âyanmo iweninri. Cristo Jesus mawânkâ uduakeim, ugononi warâ, mâkâ xurâem aguenriem; xirâ âwanu mawânâ Deus agânhedyse ato. Sóstenes, Cristo eynynâ kypemugu, idakenkulymo lâpylâ.

<sup>2</sup> Âmaemo Corintodâ Jesus eynynonro modoram xirâ kâingonodyly, Deus eynynonro modoram. Deus induakeyby âmaemo, xurâem mitomoem, Cristo Jesus agâ tokaleom ara mawylymogue. Âmaemo kulelâ inkâba, tâinkâ lelâba, idânârâ Kywymâry Jesus Cristo ehogueni modo Deus induakeybybe lâpylâ, Deus xurâem itomoem. Kurâ kywymâry mawânkâ Jesus, akaemo iwymâry lâpylâ warâ.

<sup>3</sup> Âynynâmo Kunwym Deusrâ, Kywymâry Jesus Cristoram warâ kâenkadyly koendâ nhetomoem, akaladânimo peba nhetoem warâ.

#### *Jesus einwânni modoram Deus koendâ awyly egatuhobyry*

<sup>4</sup> Aunlolâ Deus agâ auguely: “Pabai, koendonro lelâlâ âmâ, âynynonro Corinto donro modoem koendonro amânhetiby wâgâ, Cristo Jesus tâinwânse awylymogue” tâkeze winase.

<sup>5</sup> Jesus Cristo xurâem mawylymogue, Deus imâem anhedily âmaemoem, ize ato ara mitomoem. Itaumbyry imâem mâuntuhomoem, mâengatuhomoem warâ inomedâdâmo.

<sup>6</sup> Agâmo tawyly ume, Cristo xunâry âyanmo xina negatu. Meinwândâmo, Deus aguehobyry ara amidylymo magumo-ro warâ. Mâinwântuom, mâtuguehomobyry tânehonze xirâ unâ iozeno, tâinwânseim lelâlâ awyly.

<sup>7</sup> Awylygye Deus Ispiritury inomerymo nhuduypybe mawylymo, Deus ewanuem amitoem, Kywymâry Jesus Cristo odopâdyly mâinwânwândylymo ara.

<sup>8</sup> Nhetâmolâ ise Kywymâry Jesus Cristo odopâdo odaji einwândyly mâinmopa mitomoem, tâwentâguezeba enadoram mâepanâguehomoem.

<sup>9</sup> Âduakemo Deus, imery Kywymâry Jesus Cristo agâ tokaleom mitomoem. Adâkehobyry adyese lelâlâ Deus. Awylygye nhesemo lelâlâ, Jesus odopâduo tâwentâguezeba mitomoem.

#### *Corintodâ Jesus einwânni modo tunâry wâgâ nâseinwâmbyra atobyry*

<sup>10-11</sup> Cristo eynynâ ypemugudo, Kywymâry Jesus Cristo aguehobyryem wawylygye, tonhonre kehoem ârudylymo. Cloé ipemugudo ewy âwâgâmo yam negatomo. “Corintodâ Jesus einwânni modo tuduekemo, nâseinwândaymbamo warâ” nyguemo. Awylygye, koendâ lelâ itaungâ; agronro agâ koendâ lelâ âseinwândaungâ; tokalelâ angahumo oday âunârymo nidâ warâ.

<sup>12</sup> “Mâseinwâmbyramo” uguely, tâlâ mawânkâ, “Paulo eynynonro kurâ; mâkâ aguely lelâ kyjidane” kewâni modo. Tâlâ, “Apolo eynynonro kurâ; mâkâ aguely lelâ kyjidane” kewâni modo. Tâlâ lâpylâ, “Pedro eynynonro kurâ; mâkâ aguely lelâ kyjidane” kewâni modo. Tâlâ, “Cristo eynynonro kurâ. Âdaunlo uguondo aguely kulâ kindataymba ise kurâ” kewâni modo warâ.

<sup>13</sup> Idânârâ tâinwânni modo emakeim Cristo. Mâseinwâmbyra mawylymogue, Cristolâ mâempajiwâgylymo-ro waunlo ara. Koendonro keba awârâ-ro warâ! Urâ kebama akâwâm imakezemo kruz wâgâ igueim, Cristolâ! “Paulo kâinwânkyly” myguelymo kebama ani,

batiza mitaymo. “Jesus Cristo tâinwânse urâ” myguelymo. Awylygue, âjigüe mâseinwâmbyra mawlylmo imowâdaungâ.

<sup>14</sup> Alâ olâ ani Crispo, Gaio warâ kulâ batiza kânhekly awyly, Corintodâ wawyly ume.

<sup>15</sup> Agui batiza kânhedily-ro watay, “Paulo eynynonro urâ, batiza yetobryr wâgâ” tâkezemo mawânkâ keanra tâise.

<sup>16</sup> (Estêfanas, ety odano modolâ warâ batiza tyese lâpylâ mynra urâ. Ilâpyryem olâ ânguy batiza kânhetobryr kêenanâgueba urâ.)

<sup>17</sup> Unâ tâdâsemagueho wâgâ agueim kêengatuhoem ani Cristo ugonodyly, agui kurâ domodo batiza kânheoem inkâba. Iwâgâ augueday, idânârâ nhutulyenlâ auguely, nhutudânrymoem kehoem inkâba. Imâm âsenomedâdyby modo agueho ara, tutuzenryem kehoem auguely-ro watay, unâ kâmakeze Cristo iguehobryr nutuwâbyramo tâise. Âdaitoemba kulâ Cristo iguely-ro waunlo ara tâise.

*Cristo kruz wâgâ iguehobryr wâgâ Deus tonomery, ton-honru warâ nhenehonly*

<sup>18</sup> Cristo einwântânry modo kruz wâgâ iguehobryr unâ tindatuomo, “Âdy mâkeba awârâ unâ. Tuândy modo xunâry kulâ awârâ” tâkezemo. Awylygue ânwa iozeno imyim ara awylymo; typygueba kehoem Deus agâpa tâjito oze akaemo. Kurâ tâmakeduneim modo olâ tutuze awârâ unâ âkeá lelâlâ awyly. “Cristo kieinwântuo, Deus eon-honrugue kâmakely awyly” adâkeze kurâ.

<sup>19</sup> Warâ iwenibyem Deus itaumbyr awo wâgâ:

“Tâpaunzedo lelâ iozeno awyly âdutuwâni modo iozepa âpaunzedo awyly enehonze urâ. Tonomeguneim modo enomery âdyem nipyra itoem aiese urâ” kewândymy Deus.

<sup>20</sup> Tâlâ lelâlâ toenzepa tonomegueim modo; enomerymo keba olâ emakerimo. Tâlâ lelâlâ tâzezewenry Moisés inweniby koendâ kehoem xutuim; awârâ keba olâ emakerimo. Tâlâ lelâlâ koendâ kehoem tunâgueim modo; awârâ keba olâ emakerimo. “Tuândy” tâkeze Deus, tonomeryguelâ âsemagueze kewâni modoram, enomerymo âdyempa ienipyryem tawylygue.

<sup>21</sup> Tonomegueim lelâlâ Deus. Idânârâ tiungutay, warâ myakâwândy xunâry: “Tâwâlâ ise toenzepa enomegumo, tonomerygue kulâ utubamo olâ ise” kewândymy. Jesus einwâni modo tienmakely myakâwândy nhutuly. Xirâ unâ tâdâsemagueho mawânâ xina nhegatuly. Deus eynynâbaom modo xurâem olâ âdy keba awârâ unâ.

<sup>22</sup> Tâlâ toenzepa judeu domodo ewy Jesus wâgâ xina agueho einwântânry. “Deus eon-honrugue pylâ adyesenry aietaungâ. Arâ ise Deus itaumbyr mâengatulymo xina nheinwândyly” kelymo. Toenzepa lâpylâ judeu keba modo xina nhegatuly einwântânry. Koendâ kehoem tunâgueim aguely waunlo lelâ tindadyse atomo. Xurâmoem, Jesus einwândylygue tâdâsemaguely kely âdy mâkeba.

<sup>23</sup> Cristo inakanhe aguitobryr xygakeze kruz wâgâ iguehobryr olâ xina nhegatuly. Judeu domodo enanaji, inakai kulâ xirâ unâ, Messias Deus Ingonotyby kruz wâgâ iguehobryr neinwâmpyra awylymogue. Judeu keba modo xurâem, âdy mâkeba xirâ unâ, “Kâmakeze arâ anitaymba tâise Deus” tâkezemo.

<sup>24</sup> Deus turâem ingâsedaymy modo olâ tutuze unâ iwâkuru lelâlâ awyly, judeu, judeu keba alelâ. Cristo kruz wâgâ iguehobryr wâgâ myakâwâm, Deus ton-honru, tonomery warâ nhenehonly.

<sup>25</sup> Tâlâ, “Deus xunâry, Cristo kruz wâgâ iguehobryr warâ âdyem nitaymba” kewâni modo. Arâ kâmakehoem Deus xunâry olâ koendonro kuru, xirâ anano modo xunâry takaze kehoem. Tâlâ wakewâni modo: “Ton-honreim mâkeba myakâwâm Deus, kruz wâgâpa Jesus netyba mawânkâ myakâwâm” kewâni modo. Deus eon-honru olâ idânârâ kurâ domodo eon-honru takaze kehoem.

<sup>26</sup> Cristo eynynâ ypemugudo, enanâguewâdaungâ âdaunlopyry mawlylmo; kaikânrobryr kulâ âmaemo, Deus âgâsedilymo iraynâ. Agui pa kulâ akâwâm âduaymo âsenomedâdyby modo, pymâ modo, pymâdogue tydamudogueim modo warâ. Arâ mawlylmo umelâ olâ ani Deus imakelymo.

<sup>27</sup> Tonomeguenryem tutuzeim modo mawânkâ Deus turâem induakewâguely. Arâ aidyly olâ tonomegueim modo âpybazedoem tuduakeba awylygue. Deus tâgaesenry modo, tydînherugenyry modo warâ turâem induakely, tâgaruneim modo, tydînherugeneim modo warâ âpybazedoem, Deus tuduakeba awylygue.

<sup>28</sup> Deus turâem induakely tâgarenry modo, kurâdo âdyempa tâenseim modo warâ, xurâ keba modo âdyempa tâenseim, imâsedoem tientoem; âdyem nhetânrymo, âdyenlâ tientoem warâ.

<sup>29</sup> “Deus iemakely, tonomegueim, ton-honreim warâ wawylygue” ânguy kepa itoem, arâ aidyly.



<sup>30</sup> Cristo agâ on-hoam lelâ mawylimo, Deus induakeyby mawylimogue. Cristo wâgâma Deus xurâem koendonroem kydawily, xurâem kydawily, idânârâ inakanhe aguitobyry xygakely warâ.

<sup>31</sup> Jeremias inweniby Deus itaumbry awo wâgâ enanâgüewâdaungâ: “Mohomaendyze mataymo, Kywymâry anhetyby wâgâ lelâ ohomaendaungâ” warâ iwenibyem awily.

## 2

### *Kâmakeze Cristo kruz wâgâ iguehobyry egatuho*

<sup>1</sup> Cristo eynynâ ypemugudo, âyanmo Deus itaumbry egatuze Corintoam idâypyem, mâuntulymoenlâ ani auguely. Tutuzenryem inkâba ani auguely, akadâmo tonomegueim ara inkâba.

<sup>2</sup> Âyanmo udâly iray, warâ ani âwâlâ auguely: “Corintodâ wawily ume, Jesus Cristo wâgâ lelâ ise auguely. Kâmakeze kruz wâgâ iguehobyry ise augueho” uguely ani.

<sup>3</sup> Âduaymo wawily ume, ianugue, tadapânize ani urâ; ton-honremba ani kâdutuly.

<sup>4</sup> Tonomegue tawily egaeni modo ara inkâba ani unâ kêengatuly. Ienomery kêenehohoem kulâ imâem kehoem auguely witaymba ani urâ, akaemo aito ara. Ywâgâ koendâ amyguehomoem kulâ ize matomo kulâ mâkeba keankâ augueho. Deus itaumbry âyanmo kêengatudo, ywâgâ inkâba ani mâinwândilymo, Deus Ispiriturylâ ton-honrugue, mâinwântomoem aienehoim.

<sup>5</sup> Awilygue Jesus Cristo mâinwândilymo, tonomegueim modo aguely mâindatuomo inkâba, ton-honrugue âduaymo Deus anhetyby wâgâ olâ mâinwândilymo.

### *Deus tonomegueim kuru*

<sup>6</sup> Jesus einwânni modo koendâ Deus itaumbry xutuim modoram olâ Deus tâzenomery nhutuen-hoymby wâgâ adâkeze urâ. Deus ize ato agâ âseinwândânry modo enomery keba, xirâ anaym pymâ modo enomery keba warâ olâ xirâ tâzenomery kêengatuly. Idânârâ pymâ domodo pymâenlâ idâzesedyly nipyramo mawânkâ ise.

<sup>7</sup> Awilygue xirâ tâzenomery Deus saguhoem ânguyram nhutuen-hondânrybyry wâgâ kêengatuly. Kurâem Deus nhekanâdyby koendonro wâgâ kêengatuly. Mâkâ agâ kydawily ume, eagalâ ise kydâzehogeeoly. Arâlâ myakâwândy xunâry, onro tiungudyly iraynâ.

<sup>8</sup> Xirâ onro anaym pymâ domodo nutuwâbyramo myakâwâm âdara Deus xunâry awily. Tutuzemolâ-ro watay, Kywymâry Jesus Cristo koendonro, ton-honreim warâ kruz wâgâ nyâen-howâbyramo tâise.

<sup>9</sup> Deus itaumbry awo wâgâ iwenihobyry ara kehoem olâ aitybyem awily.

“Tywyneni modoem Deus nhekanâdyby koendonro, mârâ tywyneim lelâlâ,

âdykâ ânguy nhetyby keba, indatyby keba,

ânguy tyangahu oday xunâgobyry keba”

kely myakâwândy iweniby.

<sup>10</sup> Iwerâ olâ kurâ Deus xurâ modo tutuze, saguhoem Deus nhutuen-hondânrybyry, Ispiritury mawânkâ kagalâ xutuen-honze. Tutuze mâkâ idânârâ Deus âpaunzedo, Deus ânguyram nhutuen-hondânry alelâ.

<sup>11</sup> Kurâ lelâ âdy kyangahu oday kunâry xuturim, ara lâpylâ Deus nhangahu oday xunâry xutuim Deus Ispiritury lelâ awily.

<sup>12</sup> Kyangahu oday kunâgo, ize kydato warâ Deus eynynâbaom modo ara inkâba. Deus mawânkâ Tyispiritury igonomâ, tyangahu odano tunârygue konomedâdoem, kyam koendonro modo nhuduly wâgâ aguehoem warâ.

<sup>13</sup> Unâ xina nhegatuday, Deus Ispiritury tonomedâdobyrylâ xina agueho, kurâ konomery mâkeba. Arâ mawânâ âdakeze Deus Ispiritury tyam aguehobyry awily, Deus Ispiritury-beom modoram xina nhenomedâduly.

<sup>14</sup> Mâkâ Deus Ispiritury pebaom, Deus Ispiritury agueho tindadyse inkâba, xurâmo keba mawânâ, âdy mâkeba xurâem. Deus Ispiritury lelâ iwâgâ kiuntuhoem konomedâni.

<sup>15</sup> Mâkâ Deus Ispiriturybeom idânârâ Ispîritu nhenomedâdo tutuze. Mâkâ Deus Ispiritury pebaom olâ, Deus Ispiriturybeom modo nhangahu oday xunâry nutuba.

<sup>16</sup> Warâ iwenibyem Deus itaumbry awo wâgâ: “Ânguy mâkâ Kywymâry Deus âpaunzedo nutuwâbyra. Ânguy tonomeguneba, mâkâ xuruniem” warâ iwenibyem awily. Kurâ kydâpaunzedoly olâ Cristo âpaunzedo ara, Deus Ispiritury kagâ awilygue.

## 3

### *Paulo, Apolo warâ Deus itaumbry egatuim*

<sup>1</sup> Cristo eynynâ ypemugudo, Corintodâ agâmo wawily ume, Deus Ispiriturybeom modo kêenomedâdo ara inomedaâbyramo wakynre. Iamudo iwelo iazeypy ara kulâ ani âmaemo,

Jesus Cristo einwândyly wâgâ mâuntuba mawlymogue. Awlylygue ani Deus Ispiritury pebaonram augueho aralâ auguely.

<sup>2</sup> Tâjise tywanry lelâ tymery iwelo iazepyram nhuduly, pyni modo neimpa awlylygue, myarâ ani inomedâdylimo Cristo kieinwândyly adaguly ume konomedâdoguelâ, mântulymoenlâ. Ohondybyembama âmaemo mântudânrymogue kehoem inomedâdomo idase.

<sup>3</sup> Arâlâ âmaemo-ro warâ. Amânhedyse matomo âdyeselâ âmaemo; Deus amânhedysemo ato amânhedyseba âmaemo.

Agonromo tâlâ ato wâgâ tâsewânizelâ âmaemo, agonromo agâ tâtuebazelâ âmaemo warâ. Deus amânhedysemo ato keba amânhekylymo awlyly tânehonze awârâ. Jesus einwânni modo aito ara inkâba amidylymo.

<sup>4</sup> Tâlâ âmaemo ewy, “Paulo eynynonro kurâ” kewâni modo; tâlâ lâpylâ, “Apolo eynynonro kurâ” kewâni modo warâ. Deus ize ato agâ âseinwândânry modo ara kulâ amidylymo awlyly tânehonze awârâ.

<sup>5</sup> Xirâ enanâgewardaungâ. Urâ, Apolo warâ Deus aguehobyry aieni kulâ xina. Deus âyanmo xina ingonodyly ani, itaumbryry âyanmo egaturin-em, Jesus mâinwântomoem. Tâwanuem Kywymâry nhuduypylâ xina anhekyly.

<sup>6</sup> Nady ewy emyenro mawânâ Deus itaumbryry; urâ pylâ nady ewy etâni emyenro-ro, waunroem kuru Deus itaumbryry âyanmo egatuimbyry wawlylygue, Jesus mâinwântomoem. Apolo pylâ kâentâdyby ikuirim emyenro-ro; awyarâ âyanmo nâtâ; inomedâdâmo, imâem mâuntuhomoem. Etâni keba, ikuirim keba warâ olâ ago ieni, Deuslâ. Alâpylâ Deuslâ âugunimo, ize ato ara lelâ amisededomoem.

<sup>7</sup> Deus tynrenseim kuru, mâkâ nady etâni keba, ikuirim keba warâ. Arâ lâpylâ, urâ, Apolo warâ Deus itaumbryry egatuim, inomedâni warâ kulâ xina. Deuslâ mawânkâ kurâ domodo adâkehobyry nheinwânsezedoem aienehoim.

<sup>8</sup> Urâ Deus itaumbryry âyanmo egatuly sagüimpyry, Apolo inomedâzezenimobyry warâ, Jesus mâinwântomoem, Deus ize ato lelâ amânhetomoem warâ. Deus aguehobyry lelâ xina anhekyly, xina epywaze mâkâ-ro warâ, ewanuem xina aitobyry ara.

<sup>9</sup> Urâ, Apolo warâ adataen-ho kulâ xina, on-hoam lelâ olâ, Deus aguehobyry xina anhedily. Mâkâ nady ewy etâni, eagonro pylâ ikuirin-ro waunlo emyenro xina; âmaemo awâtârâ Corintodâ pylâ âpa ezary emyenro-ro, xina âsewanihoem Deus nhuduypy.

Âmaemo Jesus einwânni modo, âtâ Deus intânehoymy emyenro âmaemo.

<sup>10</sup> Yagâ koendonro kehoem Deus; ienomedâdâ ewanu agânhetomo. Deus ewanu waunroem kuru aiedily kanguly ani awâtârâ Corintodâ. Unâ tâdâsemagueho ani âyanmo kâengatuly. Koendâ âtâ ehugâni emyenro urâ; isejiguy, enu modo, nhewardary warâ epadâni emyenro nihugueba itoem. Urâ pygueduo pylâ eagonro modo idâly-ro, Deus wâgâ imâem inomedâzemo, ago kehoem mâinwânsezedoem. Âtâ itâdily ewanikeim, sarytâni, ipedâni warâ emyenro akaemo. Âtâ itâni modo wâne tâmayne kehoem tâwanu anhedilymo, myara lâpylâ olâ Deus xurâem tâwaneim modo, xurâem adienkyly koendâ aniendâmo.

<sup>11</sup> Jesus Cristo einwântuo lelâ tâdâsemaguely, tâkezêlâ urâ. Cristo kieinwântuo lelâ kydâsemaguely. Mâkâlâ mawânkâ kâsebydâni. Eagonro tâdâsemaguehobe kely kieinwândyly watay, âtâ enu modo sakyzeybygue âtâ kintâdily waunlo ara kulâ tâise.

<sup>12-13</sup> Tâlâ âtâ tintâday, isejiguy modo iweâpa emænringue itâni modo: ourugue, pratague, tuhu tohogueingue warâ. Tâlâ pylâ tuanrenrygue kulâ âtâ itâni modo: se ton-honrenrygue, se satubygue, enregue warâ. Peto emanâdyby, âtâam saindily warâ watay olâ tâzehoze âdaunlo âtâ isejiguy tuanreingue itâdyby; tuanreinguepa itâdyby warâ awlyly. Mârâ tuanrenrygue itâdyby inepa mawânâ iaduly. Deus itaumbryry egatuwâni modo, âtâ itâni emyenro akaemo. Tâlâ mâkâ unâ koendâ lelâ egatuim modo, idani modo nheinwântoem, Jesus nheinwântomoem lâpylâ warâ, tuanreingue âtâ itâni emyenro. Tâlâ mâkâ iozepa kulâ unâ egatuwâni. Aituo pylâ idani modo Jesus tyam âdara keze aguely awlyly nutubamo-ro warâ. Âtâ isejiguy tuanreinguepa kulâ itâni emyenro akaemo. Cristo odopâduo, âzehoze, Deus aguehobyry koendâ aienibyryem, aguiempyra warâ kydawlyly.

<sup>14</sup> Deus aguehobyry ara lelâ aieni modo mârâ ume koendonro emakezemo.

<sup>15</sup> Ize ato ara aitânry modo Deus ize ato lelâ aienibyry modo nhemakely nemakeba ise. Deus agâpa tyeseba olâ ise âzmakeoze. Tâty âdugeday tysejiguy idânârâ iaduânehoimbyry ara ise.

<sup>16</sup> Tutuze âmaemo, Deus ety mawlylymo. Deus Ispiritury mawânkâ agâmolâ.

<sup>17</sup> Awlylygue âduaymo Jesus einwânni modo nâseinwâmbyra ienehoimbe-ro watay, toenzepa ise Deusram âzenagazeoly. Koendonro mawânâ Deus ejidy, xurâlâ warâ; âmaemo eynynonro modo, mâkâ etylâ âmaemo.

<sup>18</sup> “Tonomegueim urá, ádydo imeom koendâ tutuze wawylgye” keim modo âwâlâ kulâ mâsenogudylymo imowâdaungâ. Tonomegueinhe lelâlâ midyse mataymo, xirâ anano modo wâgâ kulâ mâpaunzedlylymo imowâdaungâ. Deus ize atogue lelâ inomegumo nidâ, tâwâlâ lelâlâ wâne eynynâbaom modo âwankuem âedylymo, tuândyem âedylymo warâ.

<sup>19</sup> Xirâ onro anano modo enomery, Deus xurâem âdy mâkeba. Saguhoem Deus itaumbry iweniby agueho ara aidyly: “Inwânwândylymo umepa ise Deus tonomegue âdutuwâni modo enomery nhainly, ânguydo imeom inwânwândyly umepalâ mydy odaxi ihugueho ara” warâ iwenibyem awyly.

<sup>20</sup> Warâ lâpylâ Deus itaumbry awo wâgâ inwenibyem awyly: “Tonomegue lelâlâ wâne âdutulymo, enomerymo âdyem nipyra awyly, tutuze olâ Kywymâry” warâ iwenibyem awyly.

<sup>21</sup> Uguondo modo anhekyly wâgâ kulâ sawoem tâiseba itaungâ. Tâwâlâ lelâlâ wâne kurâ koendonro awyly. Idânârâ tynynonro modoram Deus nhuduypy âmaemo xurâlâ mawânârâ, xurâ mawylmogoue.

<sup>22</sup> Urâ, Apolo, Pedro warâ Deuslâ xina igononi âyanmo koendonro nhuduly wâgâ xutuenhonze. Xirâ onro anano modo Deus nhugudyly myakâwândy, koendâ lelâ âmaemoem itoem. Iwerâ aini modo, âgueduomo aini modo warâ âmaemoem koendonro lelâ ise. Idânârâ xirâ omarumo, inomerymo warâ Cristo lelâ xuduim.

<sup>23</sup> Cristo xurâ âmaemo; Cristo pylâ Deus xurâ-ro warâ.

## 4

### *Cristo xurâem tâwaneim modo*

<sup>1</sup> Cristo xurâem tâwaneinhe xina etaungâ, Deus itaumbry saguhoem tutuzenrybyry egaturin-em aguehoymby xina.

<sup>2</sup> Kâwanu âduduoly watay, aguiendyly lelâ kywymâry “Aiekâ” kehobyry ara.

<sup>3</sup> Jesus xurâem iewanu tohogueze, mâen-hoguebyra warâ mawylmo wâgâ kâtynanâdaymba urâ. Tâwâlâ âkelo modo Jesus xurâem iewanu nhehoguedyly, nehoguebyra warâ awyly awârâ wâgâ kâtynanâdaymba urâ. Tâwâlâ koendâ, koendâpa warâ wawyl wâgâ auguewâpyra lâpylâ urâ warâ. Jesuslâ koendâ, koendâpa warâ “Aiekâ” kehobyry agânhedyly awyly agueim.

<sup>4</sup> Jesus xurâem kâsewaniday, âdy inakanhe agânhetyby kâenanâguewâbyra urâ. Mâkâ xurâem kâsewanily ume, “Âdy iozepa agânhepyra urâ” uguely keba olâ. Kywymâry Jesuslâ ise, xypyry etay: Idânârâ “Aiekâ” kehobyry aienibyryem, agânhepyra warâ wawyl agueim.

<sup>5</sup> Cristo xurâem tâwaneim modo mâunâguedylymo imowâdaungâ. Âdaituo akaemo aidyly, uguely warâ awyly mâuntuwâbyra âmaemo, Cristo olâ tutuze. Odopâduo, idânârâ kyangahu oday kunâry, koendonro, koendonro keba warâ soense kykeho xutuenhonze. Aguehobyry adientay koendâ tyangahu oday tunâgueimbyry modo ise Deus nhawily. Aguehobyry adientay koendâ tunâguenrybyry modo olâ ise nawipa.

<sup>6</sup> Cristo eynynâ ypemugudo, ywâgâlâ, Apolo wâgâlâ warâ kâinwenily, xina wâgâlâ âdara Deus emaryem tadawylly mâuntuhomoem, “Deus itaumbry awo wâgâ iweniby agueho kadakadaundâ” âdakeze aguely mâuntuhomoem. Arâ ise idânârâ Deus itaumbry egatuwâni modo uguely mâindadylymo, tokalâ mâinwynegylymo, eagonro pylâ mâinwynebyramo waypa.

<sup>7</sup> Deus itaumbry egatuim kâdunâguedaundâ, agonromo takaze kehoem tynrenseim mâkeba âmaemo. Idânârâ inomerymo, tâlâ matomo warâ Deuslâ âyanmo xuduim; tâwâlâ inkâba awârâ modo tâlâ mawylmo. Deuslâ xuduim, ize ato amânhetomoem. “Koendonro agânhedyly, koendonro wawylgye” myguelymo-ro watay, Deus keba inomerymo xuduinro waunlo ara amyguelymo. Ânguy sawoem itoem nuduwâpyra.

<sup>8</sup> Âdygue takazeba mâdutulymo; idânârâ Deus agueho tutuze; âdypeom modoem lelâ; ton-honre kehoem mâdutulymo, eagonro modo takaze kehoem! Xina unâ tâdâsemagueho egatuim modo ton-honremba, ekuâdânibe warâ tâise inanry xina. Koendâ lelâlâ tâise âkealâ kuru on-honrumo watay; arâma tâise xinaem koendâ awyly on-hoam lelâ kon-honru itoem xypyry etay.

<sup>9</sup> Urâem, pymâ domodo ara inkâba xina âzeholy! Cristo wâgâ aguenriem ingonotyby lelâlâ wâne xina, arâlâ olâ xypyryem kehoem xina ienipyryem waunlo ara Deus awyly, waunroempa. Idânârâ kurâdoram âwankuem tyeseinhe kulâ xina âdutuly. Kurâ domodo xina iguely nhotoem, ânguydo imeom tyewiâseinram tamezeim ara kulâ xina âdutuly. Arâ auguely, xirâ anano modo, anju Deus ezano modo warâ xina aieholy tâensemolâ mawânkâ.

<sup>10</sup> Cristo xurâem xina aidylygye, “tuândy” kehoem xina. Âmaemo olâ xurâ mawylmogoue, tonomegueinhe mâdutulymo; iozepa kulâ olâ arâ angahumo oday âunâgumo. Deus ewanu aiese ton-honruneba xina âdutuly; âmaemo olâ ton-honre mâdutulymo. Toenzepa tohoguezeim âmaemo, ânguy xina nehoguebyra awyly ume.

<sup>11</sup> Tâsewinzeze, tatuanze warâ xina. Âtâbâgue kulâ xina âzetydâdily. Tadapioguoze xina. Myrarâ myrarâ warâ xina idâly Cristo xunâry egatuze, âdatay âdykâ tykyly awyly xina nutuba.

<sup>12</sup> Tâzetoem toenzepa tâsewanize xina. Âwankuem tâieholy-ro watay, “Koendâ Deus agâmo nidâ” tâkeze lelâ xina tunâgueni modoram. Cristo tyeinwândilygue xina âzenagazeoly-ro watay, idânârâ tâmaenze xina, âpeânze xina kepalâ.

<sup>13</sup> Xina wâgâ inakanhe aguelymo-ro watay, alâ iwâgâmo koendâ lelâ xina aguely. Tywykeim ara kulâ xina âzeholy. Arâlâ akâwâm saguhoem; arâlâ iwerâ warâ; tywykeim, âdyem itânry tamezeim ara kulâ xina âdutuoly.

<sup>14</sup> Arâ kâinwenily, mâpybazedomoem inkâba, âurutomoem lakuru, Deus izepa ato amânhesezebyra mitomoem. Ymery kâinwynegyly emyenro âmaemo, awylygue xirâ kâinwenily, inomedâdomoem.

<sup>15</sup> Agui lelâlâ wâne Cristo Jesus wâgâ inomedâzemo idâypy awyarâ Corintoam; urâ olâ unwânmo emyenro kuru, urâma ani Jesus kieinwântuo lelâ kydâsemaguely awyly egatunym waunroem kuru. Tâjiunwym tymery xuruni arâ lâpylâ auguely, mâindatuomo, meinwândâmo, Kunwym Deus xurâem mitomoem.

<sup>16</sup> Awylygue awito ara lelâ amitomoem kâenkadyly.

<sup>17</sup> Awylygue Timóteo kâingonodyly âyanmo. Kywymâry Jesus einwânni, ymery ara kehoem kâinwynegyly. “Aiekâ” uguehobyry, aiese. Awâkâ kâingonodyly, agâmo wawyly ume auguehobyry âyanmo nhenanâguehon-hoem, Cristo Jesus einwânni wawylygue koendâ awidyly awyly nhenanâguehon-hoem warâ. Xirâ mawânârâ tâinkâ lelâba udâhobyrydâ, einwânni modoram augueho, arâlâ ise aguely lâpylâ.

<sup>18</sup> Tâlâ âduaymo sawoem ityby modo; âyanmo udâompyra-ro waunlo ara, enanajimo.

<sup>19</sup> Kywymâry Jesus ize-ro watay olâ, inepa âyanmo idâze urâ. Aituoma ise akaemo sawoem ini modo egary kâindatyby âkealâ, âkealâba warâ awyly, kâuntuly. Aguehomo ara, Deus xurâem adâise lelâlâ awylymo, xutuze urâ, xurâem anipyra tawyly ume kulâ aguelymo awyly, xutuze urâ warâ.

<sup>20</sup> “Deuslâ ywymâry, mâkâ eon-honruguelâ agânhekyly modo agânhedily” tâkely umelâ, Deus izepa ato aieni, tânehonze Deus xurâ keba tawyly, mâkâ keba tywymâry awyly warâ.

<sup>21</sup> Âmaemo ise âdara ârudilymo awyly xutuim, udâduo. Deus aguehobyry sakadyly mâinmopa lelâ âmaemo-ro watay, ton-honre ise ârudilymo, xikotygue apiogulymo-ro waunlo ara kehoem. Arâ mawylymo mâungukelymo, Jesus tâinwânselâ âmaemo-ro warâ watay olâ, koendâ ise agâmo wawyly; âwynedâmo wawyly enehonze urâ-ro warâ. Âmaemolâ olâ ise xutuim, âdara ârudilymo awyly.

## 5

### *Tynanâgulyly keba kulâ xynanâni xuruto*

<sup>1</sup> Tâlâ âmaemo Jesus einwânni modo duay inakai kulâ aieni, kely tydase urâ. Tunwym iwydy kulâ nhyranâgulyly, kely. Deus einwântânry modo anitaymba arâ kehoem!

<sup>2</sup> Sawoem mawylymogue, âdy inakai aini peba âduaymo-ro waunlo ara lelâ mânhenhonlymo. Sawoem mawylymo mâkeba tâise, âtynrumo, ogunrumo warâ tâise âduaymo inakanhe aini wâgâ. Mâkâ uguondoam, “Inakanhe amitoobyry wâgâ mâjityembyra mawyly ara, Jesus einwânni modo âtâdyguyhoam tâtâzeba ikâ” myguelymo tâise.

<sup>3-4</sup> Warâ ârudilymo. Corintodâ agâmopa lelâlâ wâne urâ, arâlâ olâ agâmolâ kâdutuly. Kywymâry Jesus emary wawylygue, mâkâ uguondo inakanhe aini mâenagazedomoem auguely xirâ kata wâgâ. Ârudilymo amânhekylymo wâgâ. Âtâdyguywâdaungâ, âdara mâkâ aityby amânhedilymo awyly mâuntuhomoem. Agâmolâ urâ-ro waunlo ara lelâ ise auguely. Kywymâry Jesus ioze lelâ amânhetomoem aienehonze.

<sup>5</sup> Satanâs emaxi egamewâdaungâ awâkâ uguondo, mâkâ emaym tawyly ara, âsenagazedoem. Kywymâry Jesus odopâduo olâ âzemaleoze. Xypyry etay turâ xurâ modo ise nhemakely; tynynâbaom modo olâ enagazeze.

<sup>6</sup> Âduaymo inakanhe aitybybe awyly ume kulâ, koendonroem mawylymo wâgâ adâkezeba itaungâ. Wakely tutuzelâ âmaemo: “Âdiempa fermentu toenzepa kehoem massa tuolienhonze” kely. Arâ lâpylâ tokalâ kurâ inakanhe aini, tagonro modo Deus izepa ato anhetoem anhenhonly.

<sup>7</sup> Judeu domodo Pâscoa tientyguedyly iraynâ, fermentu tâty oday ipa itoem tamuinzemo, arâ lâpylâ awâkâ uguondo inakanhe aityby mâtâdyguyhomodâ âduaximo kâjienehonwâdaundâ. Arâ ise âduaymo Deus izepa ato adiyndyedo peba awyly; fermentu pebaom ara ise. Iweloem ânimopyrenlâ mawânkâ Deus, inakanhe amitomobyry xygakerimbyryem warâ. Pâscoa etyguedyly ume, kordeiru tyâzemo mykâinane inakanhe

aitomobyry Deus nhygakehoem, arâ lâpylâ myakâwâm Jesus Cristo iguely inakanhe aguitobyry xygakeze.

<sup>8</sup> Awylygue, Deus xurâem kydawwily kyzenanâguenre, ize ato lelâ aguyjiene warâ. Ânguy kienokubyra kine, âkeâ lelâlâ aguykenre warâ, Páscoa tientyguedyly ume, judeu domodo fermentubeom nedawympa atomo ara. Pão fermentu pebaom edawynly, Pymâ Jesus lelâ einwândyly xutuho.

<sup>9</sup> Kata kâingonotyby wâgâ âurudylymo keankâ: “Tohogüin-hobyry keba kulâ xynanâni uguondo, pekodo warâ agâ tataen-hoemba itaungâ” uguely keankâ âyanmo.

<sup>10</sup> “Uguondo, pekodo warâ tohogüin-hobyry keba kulâ xynanâni modo, tydinherugu, âdydo imeompe tâidyly kulâ izetonro modo, tâmagazeim modo, xygatyby ehogueni modo warâ eataen-hoemba itaungâ” ugeduo, “Deus einwântânry modo duaypa itaungâ” uguely mâkeba keankâ. Toenzepa xirâ onro anaym awâkâ aunlo modope awyly. Eagâmopa mitomoem nuduwâpyra. Eagâmopa midylymo tâise onro anaymba mituomo lelâ. “Awâkâ inakanhe aini modo eataen-hoemba itaungâ” kely kâinweniduo, Jesus einwâni modo arâ aini wâgâ aguely awyly mâuntudyzemo urâ.

<sup>11</sup> “Cristo eynynâ âpemugumo urâ” tâkely umelâ, eagâ tohogüin-hobyry keba kulâ xynanâni modo, toenzepa âdype tâidyse modo, ekudyby ehogueni modo; aunlolâ toku ikaji ini modo; kywykeim modo, tâmagaduneim modo warâ watay, eataen-hoem tâiseba itaungâ, uguely olâ. Âmaemo Jesus einwâni modo âjigüe mâwinduatomoem mâtâdyguelymo-ro watay, mâkâ aunlo modo âduaximo kâienehonwâdaundâ.

<sup>12-13</sup> Urâ mâkeba Jesus eynynâbaom modo ewentâgueni, euni warâ. Deuslâ ise tynynonro modo ewentâgueni, sagâikerim warâ, urâ mâkeba. Awâtârâ Corintodâ Jesus einwâni modo inakanhe aisezelâ watay, âmaemolâ eyanmo ton-honre aguewâtaungâ. “Deus aguehobyry takaze âmaemo. Arâ adâjidyly imowâdaungâ” kewâtaungâ eyanmo. Deus itaumbryry awo wâgâ iweniby aietaungâ: “Mâkâ inakanhe aini âduaymopa ietaungâ” warâ iwenibyem awyly.

## 6

*Âjigüe kydâseinwâmbyra kydawwily wâgâ tâdâturudo*

<sup>1</sup> Âmaemo Jesus einwâni modo âjigüe mâtuebadylymo watay, Jesus eynynonro kebanra kulâ amitomobyry wâgâ âurutomoem adâkezeba itaungâ. Jesus einwâni modoanlâ amitomobyry wâgâ âurutomoem aguewâtaungâ.

<sup>2</sup> Tutuzelâ âmaemo, Cristo odopâduo, Deus xurâ modo ise onro anano modo xuruniem, juizem warâ ini. Mârâ ume ton-honre ise âmaemo kurâ domodo wâgâ agueze. Âdaituo pylâka Cristo eynynâ âpemugumo âtuebadyby mâunrupyry mawwilymo?

<sup>3</sup> Tutuzelâ âmaemo, kurâ Jesus einwâni modo, anju domodo iwymâryem kitoem aguehonze kydawwily, mârâ ume. Arâ awylygue, xirâ onro anaym tâdâtuebadobyry wâgâ xuruniem ton-honre âmaemo.

<sup>4</sup> Awylygue, mâseinwâmbyra âmaemo-ro watay, âmaemo Jesus einwâni modo ewy keba kulâ kâjiduakewâdaundâ âurutomoem. Âdaunlo Jesus einwânnianlâ aguewâtaungâ, tâwâlâ wâne âdy keba awyly. Amyguelymo idase, âurusemo warâ olâ koendâ lelâ mitondomoem.

<sup>5</sup> Âpybazedauungâ, arâ âyanmo auguelygue. Âjigüe kulâ mâtuebadylymo, âdaunloenlâ âurunimo peba âduaymo waunlo ara amidylymo. Koendâ kuruni modope awyly, tutuze olâ urâ.

<sup>6</sup> Aypa olâ âmaemo, âjigüe mâtuebaduomo, mydâlymo juiz Jesus eynynâbaom modoram, âduekumo wâgâ agueze. Koendâpa awârâ!

<sup>7</sup> Kywypadoem kulâ mâtuebazezedylymo. Deus ize ato araba amidylymo tânehonze awârâ. Cristo eynynâ âpemugumo inakanhe aidyly âmaemoem watay, eagâmo âewiâpabyramo tâise koendâ mawwilymo, mâenmaenlymo lelâ.

<sup>8</sup> Aypa olâ âmaemo. Tâlâ awâtârâ âduaymo inakanhe aitaynrim modo, Cristo eynynâ âpemugumo emagazeni modo warâ. Kywypadoem kulâ awârâ, Jesus einwâni modo âjigüe nâpynebyra awyly!

<sup>9</sup> Tutuzelâ âmaemo, inakanhe aini modo Deus agâpa ise, mâkâ pymâem atodâ. “Tâwâlâ âdylâ inakai aguiendyly; idânârâ kurâ domodo Deus eydâ atoam idâim mawânkâ” kelygue tâsenoguzeba itaungâ. Tohogüin-hobyry keba kulâ xynanâni modo; xygatyby modo kulâ ehogueni modo; uguondo, uguondo warâ kulâ âtynanâni modo, pekodo, pekodo warâ kulâ âtynanâni modo;

<sup>10</sup> tâmagaduneim modo; toenzepa âdype tâidyse modo; toku ikaji ini modo; kywykeim modo; pyrâgue tâmase tâmagaduneim modo warâ Deus pymâem atoram nâtâwâbyramo ise.

<sup>11</sup> Jesus Cristo mâinwâmbyra mawwilymo ume, aunlope lâpylâ ani âmaemo ewy. Deus olâ iweloem âetonimobyryem, arâ amipyra mitomoem aienibyryem warâ. Tywykeba

kitoem kydokogueho ara ani inakanhe mawylimo nhygakely. Mâkâ xurâem lelâlâ mitomoem, ize ato amânhetomoem warâ adyese ani. Saguhoem inakanhe amitomobyry wâgâ tâwentâguezeba mitomoem aiemâ mâkâ; iwerâma mâkâ xurâem tâwentâguezeba âmaemo. Deus idânârâ awârâ modo anhedyly ani âmaemoem, Kywymâry Jesus Cristo kruz wâgâ iguehobyry wâgâ, Ispirityry odanomo eon-honru wâgâ warâ.

*Odomogue amânhekylymo Deus koendâ aguehon-ho nidâ*

<sup>12</sup> Tâlâ âmaemo ewy warâ keim. “Tâwâlâ idânârâ ize wato agânhedily, Jesus einwânni wawylygue” keim. Âkealâ wâne, âmaemoem koendonro lelâ waypa olâ. Agânhepyra witoem Deus aguepa atobyry tâwâlâ âdylâ agânhedily. Tâlâ olâ koendâ adyeseim, aiesezedily watay, imanâdily kiuntudânry. Awylygue urâem koendâpaom agânhepyra wawyly, uguely.

<sup>13</sup> Tâlâ âmaemo ewy warâ keim: “Deus pyni nhugudyly, kodo eon-honwanâniem. Kodo nhugudyly pyni iwyneniem.” Wakeze xirâ aguely: “Kydâwinduadyse kurâ-ro watay, kydâwinduadyly lelâ koendonro” kelymo. Warâ olâ aguely: Deulâ kodo, pyni modo warâ xuguni. Xypyry etay olâ Deus azakâlâ sainze: kodo, pyni modo alelâ. Ize ato aguentoem Deus kodo nhugudyly, kydohogüin-hobyry keba kulâ kiynanâdoem inkâba, kywâpado modo aguentoemba warâ. Mâkâ xurâ mawânâ xirâ kodo.

<sup>14</sup> Deus ton-honrugy Jesus Cristo kurâem tyetonze myakâwâm, arâ lâpylâ ise xypyry etay kodo iwelogue kurâem kyetondily.

<sup>15</sup> Tutuzelâ âmaemo, Cristo sodo ewylâ odomo awyly. Mâkâ mâinwântuomo, mâkâ agâ tokaleon-em tâise ani âmaemo. Awylygue, pekodo alâ kulâ adyeseim kiynanâdoem kodo kiempyry kydawyly.

<sup>16</sup> Pekodo alâ kulâ adyeseim agâ uguondo eguetudyly-ro watay, Deus xurâem, tokalelâ akaemo, âjihuaaji itybyem awylymogue. Iwenibyem mawânâ Deus itaumbry awo wâgâ: “Uguondo pekodo agâ idily watay, tokaleoem tâise” warâ inwenibyem awyly.

<sup>17</sup> Kywymâry Jesus agâ kydawyly, Ispirityry mawânkâ eagâ kyeni; aituo pylâ Deus xurâem, tokaleoem kidyly-ro warâ.

<sup>18</sup> Uguondo modo, âwydymo lelâ xynanâdaungâ; pekodo modo, osomoram lelâ âdynanâowâdaungâ. Osomo agâpa kulâ, âwydymo agâpa kulâ warâ tâjidyly imowâdaungâ. Mâkâ tohogüin-hobyry keba kulâ xynanâni Deus aguehobyrylâ nhakaguly, todolâ mâkâ inakanhe nhekyly warâ.

<sup>19</sup> Enanâguewâdaungâ: Jesus einwânni modo sodo odaylâ Deus Ispirityry ejiku, Deulâ mawânkâ igononi kagâ itoem. Awylygue mawânâ âwâlâ mâdutuba mawylimo, Deulâ âturimo.

<sup>20</sup> Deus, Jesus ingonodyly myakâwâm âmaemoem iguehoem. Imakehomoem tâwânse myakâwâm mâkâ awârâgue nhepywadyly. Idânârâ odomogue amânhekylymo, Deus koendâ aguehon-ho lelâ nidâ.

## 7

*Todohogüinly wâgâ tâdâturudo*

<sup>1</sup> Iwerâ mârâ mâinwenibyemo wâgâ ise aguely:

Wamyguemo yam: “Uguondo nohogüimba keanra koendâ awyly” myguemo.

<sup>2</sup> Wauguely olâ: “Koendâ lelâlâ wâne. Koendâ kehoem olâ âyanmo aguely idataungâ.” Âdalâ kulâ ânguy anipyra itoem, koendâlâ uguondo modo, pekodo modo warâ ohogüinwâdilymo, tokalelâ uguondo iwyu itoem, tokalelâ pekodo isonu itoem warâ. Nohogüimbamo-ro watay, âdalâ kulâ ise aidilymo, adyeseim keba kulâ anhedylymo warâ.

<sup>3</sup> Uguondo ohogüinly-ro watay, tywydyam nâtyzebyra nidâ. Pekodo ohogüinly-ro watay, tusoam nâtyzebyra nidâ warâ. Iso, iwydy warâ aitola mawânâ.

<sup>4</sup> Pekodo ohogüimby modo, osomo awârâ odomo sodo, âmaemo mâkeba. Awylygue tâwâlâ osomo âynanâdâmo, ize tâitobyry aralâ. Uguondo ohogüimby modo, âwydymo awârâ odomo sodo, âmaemo mâkeba. Awylygue mâynanâbyramo tâiseba itaungâ, tynanâdye awyly une watay.

<sup>5</sup> Ohogüinwâdyby modoram xirâ aguely. Âwydymo agâ, osomo agâ warâ mâtynanâbyra tâiseba itaungâ. Agonromo, “Kydâtnanâbyra wao kine, imâem Deus agâ aguykehoem” keduo olâ âdapa. Azakâlâ mâseinwânduomo lelâ olâ awârâ aidily, iweâpa kehoem waypa lâpylâ. Iweâpa mâtynanâbyra midilymo-ro watay, âdaunlo modo agâ kulâ midyse mitomoem aienehonze keze Satanâs. Arâ ise awârâ Deus izepa ato amânhedilymo-ro warâ.

<sup>6</sup> “Tohogüinzeba itaungâ” uguely keba; “Ohogüinwâdaungâ” uguely keba warâ âyanmo.

<sup>7</sup> Yara mohogüimbamolâ tâise idânârâ koendâ mawylimo. Deulâ mohogüindyzedonromo watay olâ on-hondâzemo mâkâ, eagâ mohogüin-hobyry lelâ mâynanâdomoem. Mohogüindyzebamo Deus-ro watay, on-hondâzemo lâpylâ, ânguy mâynanâbyra mitomoem.

<sup>8</sup> Ohogüindânry modoram koendâlá mohogüimba mawwlymo yara uguely. Pypâ modoram koendâlá mohogüin-ombyra mawwlymo yara, uguely.

<sup>9</sup> Arâ mâenmaen-homoem nudupa-ro watay olâ ohogüinwâdaungâ lelâ. Mohogüimba âmaemo-ro watay, peto tyânläsenry ara ise awârâ; âdaunlo modolâ mâynanâdyze mawwlymo. Awlylygue mohogüinlymolâ koendonro.

<sup>10</sup> Iwerâ aguely Jesus einwânni ohogüinwâdyby modoram. Kywymâry Jesuslâ arâ agueim, urâ kulâ mâkeba. Pekodo modo, osomo kâjimowâdaundâ.

<sup>11</sup> Mâinmolymo-ro watay, eagonro uguondo agâ mohogüin-ombyralâ koendâ mawwlymo; tâwâlâ olâ osomoam modopâdondylymo. Uguondo modo, âwydymo kâjigonotaundâ, uguely.

<sup>12</sup> Iwerâ kâinwenily ise Jesus einwânni, einwântânry agâ ohogüimby anhekyly wâgâ. Xirâ modo aguepa myakâwâm Kywymâry Jesus tarâ onro anaym tatay, yam kâuntuhoen nhutuen-hoymby olâ iwerâ âurutomo. Âmaemo Jesus einwânni ewy pekodo Jesus einwântânry agâ ohogüimbyem âmaemo. Âwydymo enlâ ize awyly-ro watay, kâjimowâdaundâ.

<sup>13</sup> Pekodo modo Jesus einwânni, Jesus einwântânrygue tusoneim âmaemo-ro watay, kâjimowâdaundâ, osomo enlâ ize awyly-ro watay.

<sup>14</sup> Osomo agâ tokaleom ara lelâ Deus nhedyly. Aituo, osomo Jesus neinwâmpyramo lelâlâ wâne, koendâ olâ Deusram âzeholy, nhetomo ara lâpylâ. Alâpylâ pekodo Jesus einwântânry Jesus einwânni agâ ohogüimby Deusram âzeholy, iso tiento ara. Aypa-ro watay, imeomo Deusram nâzehowâbyramo tâise. Arâ awlylygue olâ Deusram âzeholy.

<sup>15</sup> Jesus einwântânry agâ ohogüimbyem âmaemo, omodyzemo mâkâ-ro watay, tâwâlâ omolyo. Nâtâba itoem mâenkazedylymo tâiseba itaungâ. Deus ize inkâba iso, iwydy warâ âewiâmunedyly. Osomo, âwydymo warâ Jesus einwântânry omolymolâ koendonro, âewiâkyomo, inakanhe kulâ amidylymo mipyra mitomoem.

<sup>16</sup> Pekodo Jesus einwânni, Jesus einwântânrygue tusoneim, uguondo Jesus einwânni, Jesus einwântânrygue tyweim warâ, mâximobamolâ koendâ mawwlymo. Koendâ amidylymo tientuo, tindatuo warâ, Jesus einwânse, neinwâmpyra warâ awyly mâuntubama âmaemo.

#### *Deus âizemo atobyry aralâ itaungâ*

<sup>17</sup> Jesus mâinwântuomo, Deus turâem âduakedaymo arâ matomobyry aralâ itaungâ: itymo anary, iwanumo, ânguy mawwlymo warâ kâdugukewâdaundâ. Xirâ mawânâ Jesus einwânni modo âtâdygyhodâ kâenomedâdo, mârâem udâday.

<sup>18</sup> Deus tynynonroem âgâsedylimo iraynâ judeu domodo ezewenke satâbybem âmaemo-ro watay, atâhomobyry soense tâkezeba itaungâ. Deus âgâsedylimo iraynâ judeu domodo ezewenry ara madatâoba âmaemo-ro watay, madatâolyo tâiseba itaungâ.

<sup>19</sup> Deus xurâem, tâwâlâ satâbybem, tatâzeba warâ awyly. Mâkâ ize ato, "Aiekâ" kehobyry aguiendyly.

<sup>20</sup> Iwelo Jesus einwânni modo âdyenlâ tato nhugukely nitaymba nidâ.

<sup>21</sup> Jesus mâinwândylymo iraynâ, tâbyguepa âsewanirin-em sanâtyby âmaemo-ro watay, tâseguâdâzeba itaungâ arâ mawwlymogue. Anânimobyry, "Tarâpa mydâdyseka âmâ, tâwâlâ âsewanize mydâhomoem?" kely-ro watay, mydâdyse mataymo, tâwâlâ idâwâtaungâ.

<sup>22</sup> Âmaemo tâbyguepa âsewanirin-em sanâtyby modo, anânimobyry xurâ âmaemo; akaemo emaymba mâsemagueba âmaemo-ro warâ. Arâlâ olâ, Cristo agâ tokaleon-em mawwlymogue, mâzmakeolyo; Satanâs eon-honru emaymba tâzmakeoze âmaemo. Turâenlâ âsewanirim modo lâpylâ Cristo xurâ âmaemo, mâkâ "Aiekâ" kehobyry aieni warâ.

<sup>23</sup> Iwerâ Cristo xurâem âmaemo, Deus mawânkâ tâwânse kehoem âmaemoem epywanibiryem, kruz wâgâ Jesus Cristo iguehobyry wâgâ. Awlylygue Deus aguely lelâ inwantageaungâ, mâsemaguehoem kurâdo ezewenry mâkeba.

<sup>24</sup> Cristo eynynâ ypemugudo, waunroem auguehobyrylâ augueonto. Deus turâem âduakedaymo arâ matomobyry aralâ itaungâ.

#### *Ohogüindânry modo, pypâ modo warâ xuruto*

<sup>25</sup> Iwerâ augueho ise ohogüindânry xuruto modo. Kywymâry Jesus Cristo tarâ onro anaym tawly ume, xirâ wâgâ aguepa myakâwâm. Urâlâ ârunimo. Augueho koendâ idataungâ, Kywymâry mawânkâ iemakedâ, ienomery tuduze warâ.

<sup>26-27</sup> Toenzepa xirâ ume Jesus einwânni modo âpyneândyly, âsenagazydyly warâ. Awlylygue einwânni modo kâunrudyly, ohogüimbyem âmaemo watay, tâximozeba itaungâ. Mohogüimba âmaemo watay, alâ itaungâ.

<sup>28</sup> Mohogüinlymo watay, Deus xurâem, inakai mâkeba awârâ. Tutuze lâpylâ olâ âmaemo, ohogüimby modo toenzepa ekuâdânibe awyly. Mohogüimba âmaemo-ro watay olâ, ikuâdânimo peba, ohogüimby modo ara, uguely âyanmo.

<sup>29</sup> Warâ ârudysemo wawyly, Cristo eynynâ ypemugudo. Iweâpa nitaymba ise Cristo odopâdyly. Awlylygue, xirâ anaym kydawyly ara, xirâ anano modogue kulâ

kydâpaunzedaymba kine. Uguondo ohogüimby modo, âdy ikuâdâbyramo nidâ, Kywymâry Jesus ewanu amânhetomoem. Pekodo ohogüimby modo, Deus xurâem amidylymo kâjimowâdaundâ.

<sup>30</sup> Âtynrumo umelâ, amânhetomoem Deus aguehobyry aietaungâ; tutuzelâma âmaemo, âtynrumo aunloenlâpa awyly. Omarumo ume, amânhetomoem Deus aguehobyry aietaungâ lâpylâ; tutuzelâ âmaemo, omarumo aunloenlâpa awyly. Âdydo imeom vende mânhedylymo umelâ, amânhetomoem Deus aguehobyry aietaungâ, aunloenlâ nipyra mawânâ ise âsejiguymo.

<sup>31</sup> Tâwâlâ lelâlâ wâne toenzepa iwanumo; amânhetomoem Deus aguehobyry olâ amânhepyra tâiseba itaungâ. Idânââ âdydo imeom adainze mawânâ. Xirâ onro inepa ise adainly, iwogonro modo alelâ.

<sup>32</sup> Âdy ikuâdânimpe beba wâne ize wawyly. Uguondo Jesus einwânni tywyepa-ro watay, Kywymâry Jesus xurâem tâwanu lelâ mâkâ nhynanâgyuly, mâkâ lelâ mawânkâ tionmazeândyze ato.

<sup>33</sup> Uguondo Jesus einwânni tyweyin-ro watay olâ, xirâ onro anano modogue tâseguâdâze, tywydy âdy beba nipyra itoem, tuantoem, tyentydâdoem, tinseljuyendoem warâ.

<sup>34</sup> Awylygue azagâ tydâwanguem ara awyly. Kywymâry Jesus xurâem tâsewanidyze, tywydy tientoem tâsewanidyze warâ mawânkâ.

Alâpylâ pekodo pypâ, âwynsaundo warâ; Kywymâry Jesus xurâem lelâ ize awylymo. Mâkâ mawânkâ tionmazeândyze atomo, adienkylygue, tâpaunzedogue warâ. Pekodo tusoneim olâ xirâ onro anano modogue tâseguâdâze lâpylâ, tuso tiontoem, ipyniry adientoem warâ, koendâ tuso tagâ itoem.

<sup>35</sup> Xirâ auguely, âdy âmaemoem koendonro awyly mâuntuhomoem. Tâwâlâ mohogüinlymo; tâwâlâ mohogüimba mawlylymo warâ. Âmaemo mawânâ xutuim, urâ keba. Ârudysemo wawyly olâ, Kywymâry Jesus ize ato ara lelâ amitomoem. Agueho ara lelâ amânhedysemo wawyly. Xirâ onro anano modogue mâseguâdâdylymo izepama urâ, kopaelâgâembaba amânhekyly wâgâ warâ, Deus ewanu amânhetaymo.

<sup>36</sup> Iwerâ ârudylymo salokuzenomo, âwynsaundo warâ tohogüin-hoem ohondyby, nohogüimba tâitomoem âtunâguedyby modo wâgâ. Mâkâ salokuzenomo xunâzely: “Toenzepa mâkâ pekodo ize wawyly. Mâkâ agâlâ kohogüindyze wawyly” kely watay, âdinkâba. Tâwâlâ ohogüinlymo. Deus xurâem, tâwentâduneba akaemo.

<sup>37</sup> Mâkâ salokuzenomo tunâry nhugukely. “Tywyepalâ koendâ wawyly. Tâwâlâ âjimanâze urâ, pekodo modo kâynanâbyra witoem, awârâ mâkeba Deus agânhedyse ato” kely watay, iozelâ mâkâ adâkehobyry ara aidyly. Âdinkâba ise mâkâ pekodo agâ nohogüimba awyly.

<sup>38</sup> Todohogüinlybe, todohogüinly beba warâ koendâ lelâ. Koendonro kuru olâ, kâwano Kywymâry Jesus xurâem imâem agüentoem kydohogüimba kydawyly.

<sup>39</sup> Xirâ aguedyse wato pekodo tusoneim modoram. Osomo niguepa awyly ara, âwâlâ inkâba âmaemo, mâkâ âturimo awylygue. Mâkâ iguely-ro watay lelâ, tâwâlâ midylymo; ize mataymo tâwâlâ mohogüin-ondylymo warâ. Jesus einwânni agâ olâ ohogüinwâdaungâ.

<sup>40</sup> Ienanaji omaru kuru olâ ise, mohogüin-ombyralâ. Arâma kâuntuly, Deus Ispiritury yam nhutuen-hoymby.

## 8

### *Xygyatyby modoram podo egameyby*

<sup>1</sup> Warâ yapâiguelymo: “Tâwâlâ Jesus einwânni modo xygyatyby enadoram ietyby podo nhâdyly, tâwâlâpa?” myguelymo. Awârâ wâgâ ise iwerâ ârudylymo. Kurâ Jesus einwânni modo, einwântânry modo takaze Deus wâgâ kiuntuly. Tâmaynelâ olâ kine, sawoem kipyra kitoem. Sawoem kidyly-ro watay, ize kydato kulâ aguienkyly, kagonro modo kienmawypadâbyra kurâ. Cristo eynynâ kypemugu kinwynedyly watay olâ, Deus ize ato imâem lelâlâ anhetomoem adyenehonze kurâ.

<sup>2</sup> Idânââ kehoem tutuze âdutunri watay, idânââ nutuwâbyra mâkâ, imâem nhutulybelâ.

<sup>3</sup> Mâkâ Deus iwyneni Deus ize ato adyese; tînduakeyby awyly tutuze Deus warâ.

<sup>4</sup> Arâ iweninribryem, kâinweniondyly xygyatybyam nhunru egameyby tâdâhoze, nâdâhoba warâ awyly wâgâ. Tutuzelâ kurâ, segue, tuhugue, metalgue warâ ekudyby modo âdy keba awyly; kiynrentaymba, kiyntadaymba warâ kine. Tokalelâ mawânkâ Deus, kurâ einwânni modo kiuntuly; mâkâ mawânkâ kiynrenkyly.

<sup>5</sup> “Kau oday, onro anaym warâ eagonro deus modope” tâkezemo lelâlâ wâne, mâkâ “deus” tâkehomo tuomaenzemo, “pymâ” tâkezemo lelâlâ warâ wâne.

<sup>6</sup> Kurâ olâ tokalelâ Deus kykeho kien-hoguegyuly kuru, Kunwym, idânââ tâlânro modo xugunipyry. Mâkâ kiuntuhoem lelâ tarâ xirâ onro wâgâ kydawyly, “Aikâ” kehobyry



aieniem wará. Tokalelá Kywymâry, Jesus Cristo lelá, idânârâ kurâ domodo iwymâry. Jesus wâgâlâ Deus idânârâ tâlânro nhugudyly. Mâkâ wâgâlâ iweloem ietybyem kydawwily.

<sup>7</sup>Tâlâ olâ Jesus einwânni modo ewy awâkâ segue, tuhugue warâ xygatyby âdy keba awily xutudânry. Jesus tyeinwândyly iraynâ, xygatyby ehogueniem sahozeybyenmo mawânkâ. Jesus tyeinwântuo, nutumo mâkâ xygatyby ehoguedyly koendâpa awily. Awilygue xygatyby modoram egameyby tiândyly-ro watay, inakanhe, tâwentâguezeinh warâ âdutulymo. Xurâmoem, xygatyby modoram egameyby einly, mâkâ ehoguedylylâ waunlo ara enanajimo.

<sup>8</sup>Xygatyby enado egameyby tâse, kiâmpyra warâ kydawwily, âdy mâkeba Deus xurâem. Mâkâ podo kiândyly watay, Deus tuomareba nietaymba; kiâmpyra kurâ-ro watay, Deus tuomareba nietaymba lâpylâ warâ.

<sup>9</sup>Âmaemo Deus itaumbry koendâ kuru xuturim, tutuze âmaemo, ekudyby enadoram podo egameyby kiântuo, Deus izepa ato ara aguidyly keba awily. Tâlâ olâ mâkâ egameyby sâdily, Deus xurâem koendâpa awily, aguwâni modo. Awilygue podo mântuomo mâkâ ageim modoram kâduduwâtaundâ, nhâtomoem. Eagâmo âmaemo-ro watay, kâdâtaundâ lâpylâ warâ, adyenyryem nhutulymo, amânhenehomba mitomoem. Adakobâni âjihodaigâdoem tuhu ânwa ontaji ieni ara inkâba itaungâ.

<sup>10</sup>Tâmaynelâ itaungâ, Cristo eynynâ âpemugumo Deus aguehobry nhakadoem aienehoim amânhepya mitomoem. Âmaemoma tutuze, xygatyby âdy keba awily. Awilygue xygatybyam podo xuduypy sanâtonra mydâlymo, manâdylymo, mândylymo warâ mawilymo. Ton-honreba kulâ Jesus einwânni târâ watay olâ kâdâtaundâ, mâkâ enanaji tâseim keba mawânkâ. Mândylymo watay, mândylymo tientuo, âpaunzeze: “Xygatybyam xuduypy tâsemo watay, sâse lâpylâ urâ” keze. Aituo ise egamadyly, nhâdyly, tânanaji tâseim keba awily umelâ.

<sup>11</sup>Amidylymo tientuo aitobry wâgâ, âmaemo mâkâ Cristo eynynâ âpemugumo inakanhe ienehoim; Jesus Cristo einwândyly koendâ nutuba mawânkâ awilygue; emakeze Cristo iguehobry lâpylâ mawânkâ. Âmaemo “imâem xutuim” modo, amidylymo tientuo aitobry wâgâ, Cristo eynynâ âpemugumo kâmaynoem mânhenenlymo. Koendâ Cristo einwândyly wâgâ nutubamo awily tutuzelâ âmaemo.

<sup>12</sup>Cristo eynynâ âpemugumo xurâem inakanhe arâ amidylymo, adyenyryem nhutulymo, anhetoem amânhenehonlymo watay, Cristo xurâenlâ amidylymo waunlo ara awârâ.

<sup>13</sup>Kândyly tientobry wâgâ, mâkâ Cristo eynynâ ypemugu nhâdyly lâpylâ, turâem tâseim keba awily tiuntuly umelâ watay, âdaunloenlâ kântondaymba ise urâ, Cristo neinwâmpyra nipyra itoem. Cristo eynynâ ypemugu mârâ adyenyry anhetoem agânhedyly, mydy odaxi ihuguehoen-ro waunlo ara mawânâ.

## 9

### *Tywâgâ aguenriem Cristo ingonotyby aito, anhekyly warâ*

<sup>1</sup>Kywymâry Jesus nhutuly wawilygue, kurâdo kulâ utuwâbyra. Mâkâlâ uduakeim, iwâgâ aguehoem. Tâlâ olâ azagâ lelá yeinwântomoem agueho. Damasco idâwaym yam âepanâguehobry; iwâgâ kâengatduo, mâinwântomobry warâ.

<sup>2</sup>“Jesus tywâgâ aguenriem ingonotyby mâkeba awâkâ Paulo” kewâni modope lelâlâ wâne, tutuze olâ âmaemo mâkâ ingonotyby wawily. Mâkâ wâgâ auguely mâindatuomo, tâinwânse ani âmaemo, awârâ mawânâ mâkâ ingonotyby wawily xutuen-hoim.

<sup>3</sup>Awilygue, “Tywâgâ aguenriem Cristo ingonotyby mâkeba keanra awâkâ Paulo” kewâni modoram auguely.

<sup>4</sup>Kywymâry Jesus xurâem tâwaneim wawilygue, pyni, tânywâduneim modo warâ kâenkadyly, âduaymo iewanopyry ebyryem watay, iozelâ tâse arâ awidyly. Arâ awipyra olâ urâ.

<sup>5</sup>Pedro, eagonro modo, Jesus iukonodo warâ tywysaro agâlâ Jesus wâgâ agueze idâhomobrydâ tâduahozemo iwysaromo agâlâ, nhenomedâguylymo modoram. Tâwâlâ lâpylâ tâse ywydy kandyly yagâ, kandyse urâ-ro watay, ydataynrim modoanlâ tâse âduaholy, âdy ize atogue.

<sup>6</sup>Urâ, Barnabé warâ âdinkâba tâse xina tydani modoram typyniry âduduhoem nhekadyly, tâdâsemaguely wâgâ egatuwâni modo âduahohomo aralâ, âyanmo xina nekabyra olâ.

<sup>7</sup>Sodady tseyjiguy tâwano modo nepywadaymba. Fazenda sodjo uva tientâdyby ewise- duo, ewily tâinze, nepywabyralâ. Tapirâgue tâguyeim inwanry tânyze, nepywabyralâ warâ.

<sup>8</sup>Myara lâpylâ Jesus einwânni modo Jesus wâgâ ageim modo nhuandyly, ewanopyry ebyryem. Kurâdo xunâry kulâ mâkeba xirâ. Deus itaumbry awo wâgâ iwenibyenlâ xirâ aguely.

<sup>9</sup> Warâ myakâwândy Moisés inwenihoem Deus aguely: “Tapirâ kâjitagâjiwâdaundâ trigu âekyguehoem nhakabely ume” warâ iwenibyem awyly. Tapirâ tintyendylygue kulâ inkâba olâ myakâwândy Deus arâ aguely.

<sup>10</sup> Deus itaumbry egatuwâni modo edyly, xuadyly warâ wâgâ konomedâze myakâwândy xirâ unâ iwenily, tapirâ trigu âekyguehoem sakabeim wâgâ kulêlâ inkâba. Iozelâ etânibyry, ekaunânibyry warâ âduaholy; alâpylâ iozelâ Deus itaumbry egatuim nhenomedâgyuly modoram âduaholy.

<sup>11</sup> Deus itaumbry âyanmo xina negatu, mutumo-ro warâ. Arâ awylygue: “Xina ipyniry, xina eoku, âdylâ warâ âunduwâtaungâ” tâkeze tâise xina âyanmo. Arâ aguenriem lelêlâ wâne ani xina, âduaymo tawyly ume, âdaunloenlâ pyni, âtâ, awârâ xina nekabyra olâ ani.

<sup>12</sup> Jesus xunâry âyanmo egatuze idâwâtyby modo ipyniry, eokumo warâ tuduze ani âmaemo. Koendâlâ ani amidylymo.

Iozelâ tâise xina tâzeto nhekadyly âyanmo. Xinama ani waunroem kuru Jesus wâgâ âyanmo egatuim; xina arâ agepa olâ ise. Xina nhekadyly-ro watay, “Paulo xunâry kindataymba kine, dinheru tienmakehoem kulâ awâkâ aguely” tâkeze keanra tâise âmaemo. Awylygue, âdy xina âyanmo nekabyra awyly, unâ koendonro xina nhegatyly nekuâdâbyra itoem.

<sup>13</sup> Deus ety oday tâwanuneim modo tâzeto tâmakezemo. Deusram tâgamezeim ânguydo imeom xyâwâni modo mâkâ nhunru ewy tâmakeze lâpylâ warâ. Xirâ tutuzelâ âmaemo.

<sup>14</sup> Arâ lâpylâ myakâwâm Kywymâry Jesus aguely: “Unâ koendonro tâdâsemagueho egatuwâni modo ipa ato xuduim aguely idataynrim modolâ” kewânmy.

<sup>15</sup> Arâlâ olâ ani unâ kêngatoday, âyanmo âdy kênkabyra wawyly. Xirâ arâ kâinwenily iwerâ, iepywadyly manguhoem kênkadoem inkâba. “Jesus xunâry kêngatoday, ânguyram âdy kênkadâyba keankâ urâ” tâkezezelâ winase, tuomare urâ awârâ wâgâ-ro warâ. Iewindygue, yatuanidylygue warâ yiguelylâ tâise ize wato, âyanmo kâzekaimbalâ.

<sup>16</sup> Tâwâlâ kadawehoem inkâba unâ tâdâsemagueho kêngatuly. Kêngatuba wito keba xirâ-ro warâ. Kywymâry Jesus “Egatugâ” kehobyry awylygue. Kaikâlâ ise urâ, kêngatuba wito!

<sup>17</sup> Urâlâ kuru xirâ unâ koendonro tâdâsemagueho kêngatuhoem iduakein-ro watay, auguely idataynrim modoram iepywadoem tâkaze tâise urâ. Jesus induakeyby olâ urâ, arâ emaryem awitoem. Awylygue tâbyguepa tâwaneim ara wawyly, kâzepywaoly kâinwânwâmpyra wawyly.

<sup>18</sup> Jesus wâgâ augueday âdyka iebry? Womazeâni tâbyguepalâ kênomedâdylymo. Arâ awylygue, auguely idataynrim modoram iepywadoem kênkadâyba urâ.

<sup>19</sup> Kurâ domodo itanru wâgâ kulâ aini mâkeba urâ. Idânârâ kênmawyadâdoem tâtuze olâ urâ, Cristo einwâni modo agui isezedoem lakuru. Awylygue iwâgâ kêngatuly.

<sup>20</sup> Jesus wâgâ kêngatuhoem judeu domodo duay urâ-ro watay, ezewenrymo aralâ awidyly, Jesus nheinwântomoem. Tâzewenrymo Moisés inweniby aiesezelâ mawânkâ akaemo. Awylygue, eagâmo wawyly ume, earamolâ awidyly, Jesus nheinwântomoem kênkudâdâbyramo witoem. Moisés ezewenry kâinwântuoba kâsemaguely kâuntuly umelâ aïtomo ara awidyly.

<sup>21</sup> Judeu keba modo duay wawyly ume, earamolâ lâpylâ awidyly, Jesus nheinwântomoem. Moisésram tâzewenry iweniehoymby arapa akaemo aidyly, judeu domodoram mawânârâ xuduly, judeu keba modoampa. Aïtuo urâ, judeuem wawyly umelâ, judeu keba modo agâ urâ-ro watay, xina ezewenry agueho ara awipyra urâ. Deuze ize ato agânhepyra widyly keba olâ, Jesus Cristo konomedâdobyry aralâ mawânârâ awidyly.

<sup>22</sup> Ton-honreba kulâ Jesus einwâni modo agâ urâ-ro watay, xurâmoem inakai agânhetaymba urâ, Jesus nheinwântomoem. Âdykâlâ unâ tâdâsemagueho kêngatuhodâ, ezewenrymo aralâ awidyly, nhuduhobyry aralâ, agui âzmakeohomoem, imâem Jesus wâgâ nhutuhomoem warâ.

<sup>23</sup> Arâ awidyly, MOH warâ âtâ anakâ Jesus einwântuo lelâ tâdâsemaguely kely indatoem. Arâ ise ytaumbry einwâni modoem koendonro “Xuduze urâ” Deus kehobyry xina nhemakely akaemo nhemakely warâ.

<sup>24</sup> Tutuzelâ âmaemo, agui wâne egatuni modo, mâkâ waunroem saintyby lelâ olâ mârâ tâmakezeim emakeim. Jesus ize ato ara lelâ aitaungâ, myarâ Deus eydâ atoam kayam aïntuom, idânârâ koendonro tynnonro modoram nhuduly mâenmakehomoem.

<sup>25</sup> Tâgaseinhe izetonro toenzepa mâkâ ohonzedyly awylygue, aunlolâ ton-honre egatuzedyly, waunroem saindyly-ro watay, tâjiangahu wogonro ponwarygue xygatyby inepa ilani mâkâ nhemakely. Kurâ Jesus Cristo aguehobyry einwâni modo olâ izepa ato aguiempyra kitoem kydâzeon-hondâne. Deus nhuduly adaindânry kienmakely awyly, tutuze kurâ.

<sup>26</sup> Awylygue tâgaseim tadaintodâ lelâ eseni ara wawyly.

Adaimpâni koendâ enomedâdyby ara warâ, tadaimpâday, koendâ lelâ aidyly, nâzetyoba tâitoem; arâ lâpylâ ioze lelâ awidyly, xypyry etay Deus koendâ ywâgâ aguehoem.

<sup>27</sup> Tâsenagazeze urâ; wodo tymanâze warâ, Deus itaumbryrê âkelo modoram egatuimbyryenlâ Deus “Xuduze urâ” kehobyryrê kâenmakeba wipyra witoem.

## 10

*Xygatyby modo ehoguedyly wâgâ agueho*

<sup>1</sup> Cristo eynynâ ypemugudo, enanâguewâdaungâ judeu domodo idamudo aitobyry, Deus lelâlâ einwândyly imoduomo. Moisés myakâwândy iwymârymo, Egitodâba egasedaymo. Eunu imâsedo idâhomo enehoin-em, xuahurinmoem warâ Deus anhetby myakâwândy nhapygueguylymo. Parutabâ Tapabileim emelaji myakâwândy saindylymo. Mârâ parutabâ iotagâ tawênehonze myakâwândy Deus, ilâ ontagâ idânârâ âzukuâdomoem.

<sup>2</sup> Mârâ eunu iay idâlymogue, parutabâ Tapabileim ontagâ âzukuâduomo warâ, Moisés eynynonro awylymo tâzehoze myakâwândy, (Jesus Cristo eynynonro kydawyly kienehonhoem, batiza kydâieho ara.)

<sup>3</sup> Idânârâ myakâwândy Deus nhuduypy pyni nheinlymo kaynâ âetyby, manâ keho.

<sup>4</sup> Idânârâ myakâwândy paru nhenylymo Deus nhuduypy, Moisés tamatagorugue HÂ nhetuo, tuhu imâsedo odaypa egaseyby. Mârâ tuhu mâkeba eyanmo paru xuduim. Cristolâ, mâkâ mawânkâ eagâmo idâim, enimo warâ.

<sup>5</sup> Deus aguehobyryrê sakanî modope olâ myakâwândy. Akaemo agâ tuomareba myakâwândy Deus. Awylygue myakâwândy Egitodâba egasewâdyby modo ewy agui iguewâdyly, âdy peba ato einkâ adakobâdylymo ume. Tâinkâ lelâba idâhomobryrydâ tâdâzepyâdobyrybe lelâ myakâwândy.

<sup>6</sup> Konomedâdolâ awârâ iwerâ, akaemo Deus neinwâmpyra awylygue aitomobyryrê.

<sup>7</sup> Xygatyby modo kâzehoguedaundâ, akaemo modo ewy nhehoguedobyryrê ara. Warâ mawânârâ Deus itaumbryrê awo wâgâ iwenibyem awyly: “Deus turâem induakewâdyby modolâ myakâwâm bizeru ekudo xygatybyrê etyguedyly sagurim. Ekamâmomy, âwinduase, adakuize warâ. Ilâpyryem saudylymo; mârâ xygatybyrê tânâmize tâitomoem” warâ iwenibyem awyly.

<sup>8</sup> Akaemo aitobyryrê ara agui pyra kine. Toenzepa myakâwândy akaemo ewy eagâ tohogüin-hobyryrê keba kulâ nhynanâdylymo. Awylygue myakâwândy Deus vinte e três mil awârâem kurâdo iguehoem anhenehonly tokalâ emedyly wâgâ kulelâ.

<sup>9</sup> Kywymâryrê izepa ato aguiensezebyra kine, kagâ tyewiâse lelâlâ awyly kiuntuhoem kulâ. Akaemo aitobyryrê kiampâizebyra kine. Deus nhuduypy typyniryto kopaelâgâembaba mârâlâ tieinlymogue myakâwândy ilahurumo. Awylygue myakâwândy Deus âgâ modo ingonodyly, sânimooem. Aguimy iguewânmo.

<sup>10</sup> Âwymârymoem Deus induakeybyrê kâzeusedaundâ, judeu domodo idamudo tywymâry Moisés, Arão warâ tâusezemo myakâwândy. Awylygue myakâwândy Deus anju kyârim ingonodyly, akaemo ewy nhâhoem.

<sup>11</sup> Saguhobyryrê modo Deus aguehobyryrê nhakaduomo enagazedomobyryrê kienanâgueduo, akaemo ara kipyra kitoem. Xirâ iwenibyem awylyrê kintain-hoem, Deus izepa ato agui entuo kagâ aini kienanâguehoem warâ. Iwague inkâba xirâ onro anano modo adain-ho.

<sup>12</sup> Awylygue mâkâ, “Koendonro urâ. Âdaunloenlâ akaemo saguhobyryrê modo aitobyryrê ara awitaymba ise urâ” keim, tâmaynelâ nidâ, tâweseduo, nihugueba tâitoem.

<sup>13</sup> Inakanhe amidyse mituomo, amyguedyse mituomo warâ, saguho mâkeba âmaemo awârâ modo aiese keim. Ton-honre olâ itaungâ. Deus einwândylyrê kâjimowâdaundâ. Mâenmaenlymoemba kehoem ton-honreim anienehonwâbyra ise Deus. Adâkehobyryrê adyese lelâ mâkâ. Awylygue ise, mâenmaenduomo, Deus on-honrumo nhuduly, idânârârê mankadomoem.

<sup>14</sup> Yataen-hodo kâinwynegylyrê modo, xygatybyrê modo ehoguedylyrê imowâdaungâ.

<sup>15</sup> Âyanmo kâinwenilyrê olâ, tonomegueim mawylymogue. Xutuze âmaemo âkealâ auguelyrê awyly-ro warâ.

<sup>16</sup> Jesus Cristo iguehobyryrê kienanâguehoem kydâtâdyguyduo, tokalâ kopu odano lelâ vinhu idânârârê tânyzeim. Jesus iunu kruz wâgâ apâdybyrê enanâgueholârê mârâ. Kienlyrê iraynâ, “Koendonro âmâ, xina inakanhe aitobyryrê xygakeze âiguehobyryrê wâgâ” tâkeze kurârê Jesusram. Pão tâpâze, tâdawynze warâ kurâ. Kruz wâgâ mâkâ sodo enagazedobyryrê enanâgueholârê mârâ. Jesus Cristo agâ tokaleoem kydawylylâ, arâ kienehonly.

<sup>17</sup> Tokalâ pão epajiwâdybyrê agui edawynwâni modo; tokalelâ olâ kurâ, Deus xurâem, Jesus kienwânkyllyrê awylygue.

<sup>18</sup> Enanâguewâdaungâ israelita domodo aito, ânguydo imeom Deusram tiengameday. Deus etyram tienetybyrê podo ewy tâse akaemo, ânguydo imeom xyâimpyryem, podo Deusram

egameimbyryem warâ. Arâ adâituo, Deus xurâem tawlyl tânehonzemo, tagonro agâ onhoam lelâ tawlylmo warâ\*.

<sup>19</sup> Augueondyly, xygatyby modo enadoram tyeseim, podo sâdyl, tâseba warâ awyly wâgâ. Xygatyby modo âdy mâkeba mâkâ; xygatyby kulâ. Podoma podolâ, nhunru tâseinlâ warâ.

<sup>20</sup> Warâ âyanmo auguedyse wawlyl. Xygatyby ehogueni modo tâguy tyâzemo, nhunru ewy xygatyby modoram egamehoem. Kadopâ modoram kulâ nhudulymo, Deusram inkâba. Kadopâ modo mâynanâdzemo inkâba urâ, Cristo xurâ mawlylmogue!

<sup>21</sup> Nuduwâpyra Kywymâry Jesus xurâ, kadopâ modo xurâ agâ onhoam itoem. Kadopâ modo nhetyguedaymo eagâmo mâwinduadylymo, madakuilymo warâ, ilâpyryem pão mâendawynlymo, vinhu mâenylymo warâ Jesus iguehobyry mâenanâguehomoem warâ watay, Jesus, kadopâ modo alelâ ehoguze myguehomo. Koendâ inkâba awârâ Deus xurâem; Jesus lelâba mawânkâ mâinwânkylmo.

<sup>22</sup> Jesus iewiâpanâze myguelymo wâne, Kywymâry Jesus, kadopâ alelâ mâenoguedyilmogue. Mâkânra tânagazezeba mawlylmo koendonro kuru. Mâkâ takaze kehoem ton-honruneba kurâ!

*Kurâem lelâ inkâba koendonro aguyjiene, kagonro xurâem lâpylâ warâ*

<sup>23</sup> Tâlâ warâ aguewâni modo: “Tâwâlâ idânârâ ize wato agânhedyl, Jesus einwâni wawlylgye” keim. Âkealâ, idânârâ koendonro lelâ waypa lâpylâ olâ. “Idânârâ ize kydato adyese lelâ kurâ” keim. Âkealâ tâlâ lâpylâ olâ aguienkyly ewy Cristo eynynâ kypemugudo nheinwânto imâem ienhondânry. Awlylgye Cristo eynynâ kypemugudo Jesus nheinwândyly ekuâdâni aguiempyra kine.

<sup>24</sup> Kurâem kulelâ inkâba koendonro aguyjiene, kagonro xurâem lâpylâ warâ.

<sup>25</sup> Tâwâlâ podo sanâtodâ sanâtyby sâdyl, xygatybyam egameybyem, egameybyemba warâ awyly tapâiguzebalâ.

<sup>26</sup> Iwenibyem Deus itaumbyry awo wâgâ: “Onro, idânârâ iwogonro modo warâ Kywymâry Deus xurâ lelâ” kely. Awlylgye tâwâlâ podo modo kiândyl, sâtoem xuduypylâ mawânkâ kezelâ aguely.

<sup>27</sup> Jesus einwâni keba tâtyam âgâsedylmo mâwinduatoem watay, mydâdyse mataymo, tâwâlâ idâwâtaungâ. Odumoem nhuduypy sâtaungâ lelâ, âdamyguepamolâ. “Tâwâlâ kulâ xygatybyam egameyby keanze merâ podo?” tâkezeba itaungâ.

<sup>28-29</sup> “Xygatybyam egameyby merâ podo kiânkyl” myguehonlymo watay olâ, kâdâtaundâ. Arâ ise iwelo Jesus einwâni modo adyosenryem nhutuly amânhepyra mawlylmo. Mâkâ podo tâsenryem nhutulymo nhâtoem amânhenhomba ise âmaemo warâ. Xirâ auguedyse wato. Mânkylmo inakanhe awlylgye inkâba mâmpyra mawlylmo, âkelo xurâem inakanhe amipyra mitomoem. Tutuzelâ âmaemo tâwâlâ mândylmo awlyl.

Tâlâ wakeim: “Urâlâ xutuim âdaunlo podo kânkyl, kântânry warâ awlyl. Ânguy kântoem, kâmpyra witoem warâ aguewâpyra.

<sup>30</sup> Kâwinduatay, ‘Pabai, koendonro lelâlâ âmâ, xirâ pyni mâunduhobyry wâgâ’ uguely Deusram watay, ânguy yam: ‘Podo mântuo, pyni mâinduo warâ Deus mityeneho’ kehoem nuduwâpyra. ‘Deus aguehobyry sakaze âmâ’ kewâpyra warâ. Awârâ wâgâ Deus agâ agueypyenma urâ’ keim.

<sup>31</sup> Âkealâ. Mâwinduadylymo, madakuilymo, âdylâ amânhedylmo warâ watay olâ Deus ehoguedoem lelâ aitaungâ.

<sup>32</sup> Ângylâ Jesus neinwâmpyra itoem aienehoim akâiedaundâ, tâwâlâ judeu, judeu keba warâ awlyl. Cristo eynynâ âpemugumo Deus aguehobyry nhakadoem aienehoim akâiedaundâ.

<sup>33</sup> Awito ara lelâ aitaungâ. Ânguy kâintywanânehondyze inkâba urâ. Idânârâ augueho, agânhekyly warâ âmaemoem koendâ itoenlâ ize wawlyl. “Âdyka ise urâem koendonro?” uguewâpyra urâ. “Âdyka ise eagonro modo xurâem koendonro?” uguely lakuru. Arâ awidyly, agui Jesus einwâni itoem, âzemakehomoem warâ.

## 11

<sup>1</sup> Tarâ onro anaym tawlyl ara Cristo aitobyry ara wâne inanry awisededyly. Awlylgye awito ara lelâ aitaungâ, uguely.

*Âdara pekodo modo Jesus einwâni modo âtâdyguyhodâ awlyl xutuho*

<sup>2</sup> “Aunlolâ xina inanâguely, xina mâunrutobyry adyese xina warâ” kely miwenimo, mârâ Jesus einwâni modo aito âyanmo kâengatyby. Koendâlâ arâ amidylmo.

\* 10:18 Israelitas kelylgye lâpylâ judeu domodo âzezekeoly.

<sup>3</sup> Arâ awyly umelâ, tâlâ koendâ mâuntudyzemo wato. Uguondo mawânkâ tywydy xuturim, Cristo, uguondo xuturim, Deus pylâ Cristo xuturin-ro warâ.

<sup>4</sup> Âmaemo uguondo modo izewenrymolâ Deus agâ amyguedaymo, itaumbryr mâengatudaymo warâ, angawentâdybyemba mawylimo. Awylygue, izewenrymo aralâ aitaungâ. Tâdâtâdyguyhodâ uguondo angawentâdyly-ro watay, Cristo âwankuem nhedyly kulâ.

<sup>5-6</sup> Pekodo modo olâ tâdâtâdyguyhodâ angawentâdybyem lelâ nidâ. Deus agâ adâkeday, Deus itaumbryr tiengatuday warâ, tusolâ tywymâry awyly tânehonzemo mawânkâ arâ watay. Pekodo ohogüimby tâjiduaxi idâly, tyangawengue watay, tâdutuoze isolâ mâkâ xutuim awyly. Pekodo isoram lelâba âdynanâoim mawânkâ angawentâdânry. Awylygue tâdâtâdyguyhodâ pekodo modo tyangawengue lelâ awyly. Tyangawenguepa watay, tuso tywypazenehonze, tâwâlâ tâpybazeze warâ. Anipyra-ro watay, nhangaxilugueybyem, uguondo ara nhangahu du satâbyem waunlo aralâ mâkâ âzeholy\*.

<sup>7</sup> Uguondo olâ tâdâtâdyguyhodâ nangawentâbyra nidâ. Tara enomegoem, pymâem itoem, agenriem warâ myakâwândy Deus waunro uguondo nhugudyly. Pekodo angawentâdybyen-ro watay olâ uguondo tutunri awyly tânehonze.

<sup>8</sup> Xirâ xutuwâdaungâ. Kaudyly ume, pekodo iguturuguepa myakâwândy Deus waunro uguondo nhugudyly; waunro pekodo nhugudyly olâ myakâwândy, uguondo iguturugue.

<sup>9</sup> Uguondo keba myakâwândy Deus nhugukyly pekodo emawyadâniem. Pekodo myakâwândy nhugukyly uguondo emawyadâniem.

<sup>10</sup> Aituo, Jesus einwânni modo âtâdyguyduo, pekodo modo angawentâdybyem lelâ nidâ, tuso tutunri awyly tienehon-homoem. Arâ mawânkâ tuso tâinwânse awyly âzeholy, âtâdyguywâdyby modoram lelâba-ro warâ, anju domodo aguidyly enuagaeni modoram lâpylâ warâ.

<sup>11</sup> Alâ olâ Jesus Cristo agâ tokaleoem tawyly umelâ, uguondo pekodo inwynedyly, tâmawyadâniem. Pekodo, uguondo inwynedyly, ton-hondâniem warâ awyly.

<sup>12</sup> Uguondo iguturo ewy myakâwândy Deus nhetyly, saghuo pekodo tiyngatoem. Awârâ pygueduo olâ uguondo iazely pekodo odaylâ. Idânârá xugunipyry Deus, uguondo, pekodo alelâ.

<sup>13</sup> Âdaitoem âurutaymbamo urâ, Deus iomazeândodâ Deus agâ adâkehoem pekodo modo angawentâdyly wâgâ. Tutuzelâ âmaemo pekodo modo awârâ aieniem awyly.

<sup>14</sup> Tâenselâ âmaemo, uguondo modo tusegueba awyly, pekodo modo nhangahu arapa awyly. Imâem xusegumo-ro watay, kywypadoem kulâmo tâise, pekodo ara tâidyse awylimo mawânkâ.

<sup>15</sup> Tywâkure lelâlâ pekodo imâem tusegueim. Nhangahu etydânielâ myakâwândy Deus xusery nhugudyly.

<sup>16</sup> Ânguylâ, “Paulo, awârâ unâ wâgâ iozepa kulâ amyguely, Deus agâ aguehodâ angawentâdyly nitaymba pekodo” kely watay, warâ auguely “Xina Deus itaumbryr egatuwâni modo agueho, Deus agâ aguehodâ tâzezewenrylâ xina agueho pekodo angawentâdyly wâgâ” uguely.

*Pão edawyn-ho, vinho enyho warâ Jesus iguehobyry enanâguehoem  
(Mt 26.26-30; Mc 14.22-26; Lc 22.14-20)*

<sup>17</sup> Agâmo tuomareba lâgâlâ aze, koendâ âurutomobyry araba kulâ Kywymâry Jesus iomaenze mâtâdyguyhomodâ amidilymogue.

<sup>18</sup> Âmaemo Corinto donro modo, Jesus Cristo iomaenze mâtâdyguyduomo, âewiâpadylmo; ize matomo agâ lelâ on-hoam mawylimo, mâtuebadylmo warâ amidilymo, kely tydase urâ. Adâise lelâlâ awârâ modo awyly tâinwânse urâ-ro warâ.

<sup>19</sup> Koendâpa awârâ ize matomo agâ lelâ on-hoam mawylimo. Arâ amituomo olâ ânguy Kywymâry Jesus ize ato aieni, izepa ato aieni warâ awyly tâdutuoze.

<sup>20</sup> Tâtâdyguyze lelâlâ wâne âmaemo, Kywymâry Jesus iguehobyry mâenanâguehomoem, pão edawynze, vinho enyze warâ, aguehobyry arapa olâ amidilymo.

<sup>21</sup> Idânârá saindyly mâinwânwâpyramolâ tâdâwinduadyly mangulymo. Waunroem saintyby modo ize tato ara kehoem âwinduadylymo. Âgânâ saintyby modo xurâem pylâ nâsegubydâbyra-ro; tâwinze lâpylâ akaemo. Tâlâ toku ikaji tâitomoem toenzepa vinho enyrim modo.

<sup>22</sup> Ioze inkâba awârâ! Tâwinze mataymo, itymodâlâ âwinduatybyem, adakuiwâdybyem warâ, tâdâtâdyguyhoam idâwâtaungâ. Tâdâtâdyguyhodâ toenzepa mâwinduadylymo, toku ikaji

\* 11:5-6 Mârâ ume pymâ domodo pekodo MON warâ adyeseim, aieholy ume âzeholy watay, tyangaxiluguehonzemo mykâinane. Aituo, pekodo nhangaxilugueybyem âzeholy watay, pekodo MON warâ adyeseim awyly âdutuoly idânâriam. Awylygue pekodo nhangaxilugueyby toenzepa âpybazedylly.

midylymo warâ watay, Jesus einwânni âetyby modo tohogueba mânhedilymo kulâ, âdy pebaom mâinwypazenehonylymo kulâ warâ, nhenekylymo peba awylygue. Arâ amidylymogue tuomareka urâ, inanajimo? Omaendaymbamo urâ.

<sup>23</sup> Âyanmo kêngatuly ise Kywymâry Jesus ienomedâdobyry, iguehobyry enanâguehoem tâdâtâdyguyho wâgâ. Mârâ kopae, pymâdoam tâzêgameoly iraynâ myakâwâm tynnonro modo agâ âwinduadyly. Pão nhandyly myakâwâm.

<sup>24</sup> Sanânybyryem, Deus agâ aguely: “Koendonro âmâ, Pabai, xirâ pão mâundulygue” kely. Agueypyem pão nhepajiwâdyly, mâkânra, mâkânra warâ, nhedawyn-homoem. Aituo myakâwâm aguely eyanmo. “Wodolâ xirâ. Iwaguepama âmaemoem yigueho. Xirâ pão edawynze mâtâdyguyduomo, âmaemoem yiguehobyry wâgâ âpaunzedangâne” kely.

<sup>25</sup> Pão tiendawynpygueduomo myakâwâm Jesus kopu vinhugue taseim tâmaxi nhedyly, aguely: “Unulâ xirâ. Tâunkeze ise yiguely, toenzepa kurâdo emakeze. ‘Ynnonro modo emakeze urâ’ Deus kehobyry mawânra. Awylygue ise unu tyapâze yigueduo, iwelo tâdâsemaguehobe Deus nhedyly. Xara amitomoem mâtâdyguylymo mâinmopa âizemo wawyly; mâtâdyguyduomo, âmaemoem awitobyry wâgâ ise mâpaunzedilymo” kely myakâwâm Jesus.

<sup>26</sup> Awylygue xirâ pão mâendawynlymo, vinhu mâenilymo warâ-ro watay Kywymâry iguehobyrylâ ise mâenanâguelymo, odopâdyly ara.

<sup>27</sup> Mâkâ pão tiendawynny, vinhu tienyday warâ adâjito araba kulâ aini Deus aiedyseba ato kulâ anhekyly. Jesus kruz wâgâ âdyoopy, iunu apâdyby warâ âdyempa nhedyly kulâ. Inakanhe tâjidylylâ awârâ!

<sup>28-29</sup> Mâkâ Kywymâry Jesus kruz wâgâ iguely kâmakezelâ awyly wâgâ nâpaunzebyra kulâ pão nhedawynly, vinhu nhenyly waunlo, Deus enagazenehonze. Awylygue, Jesus iguehobyry enanâguehoam mydâlymo iraynâ âwâlâ adapâiguedaungâ: “Tâlâ wânra inakanhe awito Deus nhygakehoem kêenkadânry?” kewâtaungâ. Tâlâ-ro watay, xirâ umelâ ekadaungâ, nhygakehoem. Arâma ise tâwâlâ pão mâendawynlymo, vinhu mâenilymo warâ.

<sup>30</sup> Tâlâ âmaemo ewy Deusram âkadudânry modo. Awylygue ewâmadylymo, ton-honremba idilymo, iguelymo warâ.

<sup>31</sup> Awylygue, pão kiendawynly, vinhu kienly warâ iraynâ, âwâlâ kydadapâiguenre, Deus izepa ato aienibyryem kydawyly wâgâ; nhygakehoem kyzekane-ro warâ. Arâ aguipygueduoma tâwâlâ kiendawynly, kienly warâ; âdygue Deus kâwentâbyra mawânkâ ise.

<sup>32</sup> Deus agueho kiankadyly-ro watay, kurutoem ton-honre adâkeze mâkâ, kânagazenehondâ-ro warâ. Arâ aguyedyly, inakanhe aguitobyry kiengatuhoem, aguidyly kinmohoen-ro warâ. Xataylâ mâkâ kagâikely, xypyry etay, aunloenlâ mâkâ agâpa kydâiehoba kitoem, Jesus einwântânry modo aiehoho ara aguyepyra itoem.

<sup>33</sup> Awylygue augueondyly âyanmo, Cristo eynynâ ypemugudo. Kywymâry Jesus iguehobyry enanâgueze mâtâdyguylymo-ro watay, idânârâ anelymo wao iwânwântaungâ, mâendawyn-homoem, mâenlymo warâ.

<sup>34</sup> Ânguylâ tâwinze-ro watay, tâtydâlâ nâwinduadâ, tâdâtâdyguyhodâ Deus tânagazedoem inakanhe kulâ anipyra itoem.

Awyarâ udâduolâ ise koendâ âurudylymo.

## 12

### *Deus Ispiritury tynnonro modo enomeryem nhudupy*

<sup>1</sup> Cristo eynynâ ypemugudo. Deus Ispiritury âikâ âikâ warâ konomery nhuduly wâgâ ise aguely, âdy âkealonro awyly mâuntuhomoem.

<sup>2</sup> Tutuzelâ âmaemo, Jesus Cristo mâinwândylymo iraynâ âdara matomobyry. Deus lelâlâ kehoem waunlo ara ani xygatyby modo mâen-hoguedylymo. Tytareim keba, kydani keba waunlo kulâ mâkâ xygatyby modo. Aunlolâ ani Satanâs inokudylymo, xygatyby modo kulâ mâen-hoguedomoem.

<sup>3</sup> Xirâ mâuntudyzemo wato. Deus Ispirituryam âzehoim Jesus eynynâ inakanhe aguewâpyra. “Jesus mawânkâ ywymâry, utunri warâ” kely lelâ.

<sup>4</sup> Tokalelâ Deus Ispiritury, âikâ âikâ warâ olâ konomery nhuduly, ewanu aguietoem.

<sup>5</sup> Âikâ âikâ warâ wâne Kywymâry emaryem kydawyly, tokalâ kywymâry xurâenlâ olâ aguidyly, Jesus Cristo xurâem.

<sup>6</sup> Âikâ âikâ warâ âwanu modo adyeseim; Deuslâ olâ idânârâ aguietoem konomery xuduim.

<sup>7</sup> Deus âdy aguienkyly awyly tuduakeze, Tyispiritury kagâlâ awyly tienehon-hoem. Aguienkylyem nhudupy aguyjiene, idânârâ iwâgâ imâem nhutuhomoem, ize ato koendâ anhetomoem warâ.

<sup>8</sup> Deus Ispiritury tynnonro modo ewy tonomedâze kuruni tonomegueinhe itomoem. Eagonro modo tonomedâze lâpylâ tytaumbryr nhutuhomoem, nhegatuhoem warâ.

<sup>9</sup> Eagonro modo tonomedâze lâpylâ Jesus nheinwândylymo imâem itoem. Eagonro modo nhenomedâdily tâwânuneim modo kua nhetomoem.

<sup>10</sup> Eagonro modo nhenomedâdily adyosenry Deus eon-honrugue lelâ adyeseim anhetomoem. Eagonro modo nhenomedâdily Deus aguehobyryr nhegatuhoem, âdy waunroem aini modo awyly nhutuhomoem warâ. Eagonro modo nhenomedâdily ânguy Deus tonomedâdobyrygyue aini awyly; ânguy Diabu tonomedâdobyrygyue aini warâ enuagaeniem. Eagonro modo tonomedâze mâkâ, âkelo tâjitanru Deus Ispiriturydâba âenigue aguehomoem. Eagonro modo tonomedâze, âdakeze mârâ tâjitanru aguely awyly egaturin-em.

<sup>11</sup> Deus Ispiritury lelâ arâ konomedâni. Âkeloem, âkeloem warâ konomeryr nhuduly, ize ato aralâ aguietoem.

*Tokalelâ kodo kuru, agui olâ isejiguy*

<sup>12</sup> Tokalelâ kodo, agui olâ isejiguy Arâ lâpylâ kurâ Cristo eynnonro modo; Cristo agâ tokalelâ Deus kâendily, âikâ, âikâ warâ aguidily umelâ.

<sup>13</sup> Toenzepa kurâ, judeu domodo, judeu keba modo alelâ. Tâlâ tâbyguepalâ tâwaneim modo; tâlâ turâenlâ tâwaneim modo warâ. Idânârâ kagâlâ Deus Ispiritury awylygyue koendâ lelâ kurâ, katuandyly ume paru kienyduo, koendâ kidyly ara.

<sup>14</sup> Tokalâ kulâ inkâba kodo isejiguy. Âzekiba lelâba olâ kodo isejiguy ewanu.

<sup>15</sup> Tâjihuru, "Tâzetary keba wawylygyue, âdy mâkeba urâ" kely watay, iozepa kulâ tâise aguely. Tywyneim lâpylâ kuhuru tuhugueba kulâ kydadakobâdaymba tâise kurâ.

<sup>16</sup> Tâjiwantary, "Tâzenu keba wawylygyue, âdy mâkeba urâ" kely watay, iozepa kulâ tâise aguely. Tywyneim lâpylâ kywantary; tywantagueba kurâ-ro watay, kindataymba tâise kurâ.

<sup>17</sup> Tâzenu modo lelâ kodo wogonro watay, âdy kindataymba tâise kurâ. Tâjiwantary lelâ kodo wogonro watay, âdy nhârângu kindataymba tâise kurâ warâ.

<sup>18</sup> Ize tato aralâ myakâwândy Deus kodo onwa isejiguy nhejitâdaynly.

<sup>19</sup> Tâjiwantary lelâ, tâzenu lelâ, tâzetary lelâ warâ watay, kodo lâpeba tâise.

<sup>20</sup> Awylygyue toenzepa kodo isejiguyum âikâ, âikâ warâ. Arâ lâpylâ, toenzepa Jesus einwânni modope awyly, tokalelâ olâ Deus xurâem.

<sup>21</sup> Tâzenu, tâzetaryam, "Âdaitoem âize inkâba urâ" kehoem nuduwâpyra. Tâjiangahu, tâjihuruam "Âdaitoem âize inkâba urâ" kehoem nudupa warâ. Idânârâ kodo isejiguy modo tywyneim lelâ, kodo koendâ lelâ âsewanihoem.

<sup>22</sup> Tâlâ kodo isejiguy ton-honrenryem kienkyly. Mârâ olâ tywyneim kuru. Mârâ peba kulâ koendâ kodo nâsewaniba mawânâ. Arâ lâpylâ idânârâ einwânni modo tywyneim lelâ awyly, tâwâlâ lelâlâ wâne koendâ nutuba awylymo Jesus wâgâ.

<sup>23</sup> Tâlâ kodo isejiguy tohoguezenry ara kienkyly; mârâ olâ kien-hoguegyly kuru. Tâlâ lâpylâ kodo wâgâ tânehonzenry awylygyue koendâ suahuly, iwâkudâdily warâ awyly.

<sup>24</sup> Kodo wâgâ iwâkuruem tâenseim iwâkurugue kientydâbyra kurâ. Arâlâ Deus kodo anhedily, koendonro keba kykeho koendâ kiontoem, kinwâkudâdoem warâ. Arâ lâpylâ âjigie kydâzene, tâwâlâ lelâlâ wâne Jesus einwânni modo Deus itaumbryr koendâ xutudânry modope awyly. Arâlâ olâ eagâmpa kipyra kine. Kyzeon-hondânemo lakuru, koendâ nheinwântomoem, nhutuhomoem warâ.

<sup>25</sup> Arâlâ myakâwândy Deus kodo isejiguy modo anhedily, idânârâ koendâ lelâ kodo wâgâ âsewanihoem. Arâ lâpylâ kurâ kagonrodo kiendily kienwiâsebyramo.

<sup>26</sup> Tokalâ kodo wogonro isejiguy ewâmadyly-ro watay, idânârâ kehoem kodo ewâmadyly. Arâ lâpylâ tokalâ Jesus einwânni âsenagazedily-ro watay, idânârâ kydâsenagazedily lâpylâ. Kodo wogonro isejiguy koendâ aguehonly watay, tohmaenze kurâ, idânârâ kodolâ mawânâ tohoguezeim. Arâ lâpylâ, Jesus einwânni wâgâ koendâ aguelymo-ro watay, kydohomaene mâkâ agâ.

<sup>27</sup> Idânârâ Jesus einwânni modo Jesus agâ tokalelâ Deus xurâem. Mâkâ xurâ kurâ, tokalâ kodo toenzepa isejiguyum ara.

<sup>28</sup> Konomeryr tuduze Deus tynnonro modoem koendâ lelâ aietoem. Waunroem kuru enomeryr nhuduly Cristo induakewâdybyr modo, eynynâbaom modoram iwâgâ aguenriem, Nhatano nhenomedâdo Deus itaumbryr egatuly Jesus einwânni modoram, nhatano itaumbryr âdakeze aguely awyly enomedâdily einwânni modoram, âdara Deus iomazeândily awyly nhutuhomoem agueim. Ilâpyryem eagonro modo nhenomedâdily adyosenry Deus ton-honrugue lelâ adyeseim aieniem. Eagonro modo nhenomedâdily tâwâneim kua ieniem. Eagonro modo nhenomedâdily, âdy pebaom modo, kaikânro modo warâ emawydâniem. Eagonro modo nhenomedâdily Jesus einwânni modo iwymâryem.

Eagonro modo nhenomedädily âkelo tâjitanru Deus Ispiriturydâba âenigue aguewâni modo. Âdara keze mârâ tâjitanru aguely aguehoem agueim modo warâ tonomedâze lâpylâ.

<sup>29</sup> Âikâ âikâ warâ einwâni modo âzenomedâoly, âwanu anhetomoem. Idânârâ Cristo ingonotybyem eynynâbaom modoram iwâgâ aguenriem lelâ mâkeba kurâ; tâdâtâdyguyhodâ iwâgâ aguenriem lelâpa, Deus itaumbry einwâni modoram âdakeze aguely awyly enomedâniem lelâpa, adyesenry Deus eon-honrugue lelâ adyeseim aieniem lelâpa,

<sup>30</sup> tâwâneim kua ieniem lelâpa, âkelo tâjitanru Deus Ispiriturydâba âenigue aguykehoem, mârâ tâjitanru âdakeze aguely awyly egatuin-em lelâpa warâ kurâ. Ize ato aguietoem Deus nhuduypylâ konomery.

<sup>31</sup> Inomerymo xududyse mawylimo, “âwanu koendonro” amânhetomoem. Deus Ispirituryam ekadaungâ, âwanu amânhekylymo wâgâ inomedâdomoem.

Awârâ takaze koendonro ise âyanmo augueho iwerâ.

## 13

*Âdara kydâpynedyly wâgâ agueho*

<sup>1</sup> Xirâ onro anaym tâjitanru idânârâ aguely,  
anju kau odano modo agueho tâjitanru aguely lelâlâ wâne,  
agueho idani modo kâinwynebyra kulâ aguely-ro watay,  
ytaumbry modo âdyem nitaymba tâise.

Sinu, gongu warâ koendâ tydyzenry ipyru ara kulâ tâise.

<sup>2</sup> Tâwâlâ lelâlâ wâne koendâ Deus aguehobyry kâengatuly,  
âdy mâkeba awârâ, ydataynrim modo kâinwynebyra kulâ aguely watay.  
Tâwâlâ lelâlâ wâne koendâ kâuntuly saguhoem kyam Deus nhutuen-hondânrybyry,  
idânârâ wâgâ koendâ kâuntuly warâ,

âdy mâkeba awârâ, ydataynrim modo kâinwynebyra kulâ aguely watay.  
Kâinwândylygue iwy ejidydâpa tâjikehonze lelâlâ wâne urâ,  
âdy keba olâ awârâ, yagonro modo kâinwynebyra urâ-ro watay.

<sup>3</sup> Idânârâ tâlâ wato modo âdy pebaom modoram tuduwâse wâne tâise urâ;  
tâwâlâ wâne tâise kâsenagazedily, Jesus eynynâbaom modoram kâdyoly,  
wodo âjiaduân-honly warâ,  
xurâmoem koendâ awito âdyem nipyra olâ Deus xurâem,  
kâinwynebyramo kulâ awidyly-ro watay.

<sup>4</sup> Idânârâ agâ tâpyneze kurâ-ro watay,  
idânârâ tâmaenze kurâ kydâpeâmbyralâ;  
kytyenilâ kurâ;  
âsewâninri keba kurâ;  
sawo keba kurâ;  
âkelo modo takaze koendonro kydawyly wâgâ âduituim keba kurâ warâ.

<sup>5</sup> Tâpyneze kurâ-ro watay,  
kywypado aguykeba, aguiempyra warâ kurâ.

Tâpyneze kurâ-ro watay,  
âkelo wâgâ tâpaunzeze kurâ, kywâgâ kulelâ inkâba kydâpaunzedily;

Tâpyneze kurâ-ro watay,  
alâ kulâ kyewiâpadyly kitaymba kurâ.

Tâpyneze kurâ-ro watay,  
kurâem inakanhe aitobyry inepa kienanânehonly.

<sup>6</sup> Tâpyneze kurâ-ro watay,  
tâjityenze kurâ, iozepa kulâ kagonro aituo;  
ioze lelâ aituo olâ tohomaenze kurâ.

<sup>7</sup> Tâpyneze kurâ-ro watay,  
âdara awyly umelâ kagonro keon-hondädily.  
Kyam nhegatuly tâinwânse lelâ kurâ.

Deus izepa ato aienibyryem awyly kiuntuduo,  
Deus nheinwântondily kinwânwâmpyra kipyra kurâ;  
kynynâ anhekyly kyzemaenre lelâ.

<sup>8</sup> Tâlâ Deus itaumbry koendâ egatuho,  
adainze olâ awârâ,

Tâlâ âkelo tâjitanru Deus Ispiriturydâba âenigue aguehoem enomedâdo,  
adainze lâpylâ olâ awârâ,

Tâlâ toenzepa âdydo imeom xutuhô,  
adainze lâpylâ olâ awârâ.



Tâdâpynedyly olâ ise âdaunloenlâ nadaimpa!

<sup>9</sup> Âdydo imeom xuturin-em Deus Ispiritury nhenomedâdyby modo idânârâ koendâ kuru âdakeze aguely awyly nutuwâbyramo; tâlâlâ nhutudânrymo.

Deus itaumbyry egaturin-em Deus Ispiritury nhenomedâdyby modo idânârâ koendâ kuru nutuwâbyramo, âdiempa kulâ nhutulymo.

<sup>10</sup> Târâ Deus eydâ atodâ Deus agâ kydoxioduo olâ, idânârâ mâkâ kiuntudyze ato ara xutuze kurâ, mâkâ kyize ato ara lelâ ise kurâ.

<sup>11</sup> Iamudoem wawyly ume, iamudo agueho aralâ kâinane aguely; iamudo tyangahu oday xunâgo aralâ kâinane unâgu yangahu oday; iamudo ize atolâ kâinane ize wato warâ.

Xutuypyem olâ urâ iwerâ; iamudoemba itybyem.

Iamudo ara inkâba awidyly iwerâ.

<sup>12</sup> Ispelhu tywykeim oday, koendâ kydâzetaymba kurâ; tâzese wâne kurâ, koendâ kuruba olâ, koendâpa awylygue, myara lâpylâ, Deus wâgâ koendâ kehoem kuru kiuntuba kydawyly iwerâ.

Deus agâ kydoxioduo olâ, koendâ kehoem ese, xutuze warâ kurâ.

Iwerâ âdiempa kulâ kiuntuly.

Ilâ ume olâ mâkâ koendâ xutuze kurâ, iwerâ kutuho ara.

<sup>13</sup> Deus kieinwândyly,

Deus idânârâ “Xuduze urâ” kehobyry kinwânwândyly,

Kydâpynedyly warâ nadainwâpyra ise.

Kydâpynedyly olâ mârâ kuru.

## 14

*Âkelo tâjitanru Deus Ispiriturydâba âenigue agueby, Deus itaumbyry egatuly warâ wâgâ agueho*

<sup>1</sup> Toenzepa âpynedaungâ. Deus Ispiritury inomedâdomoem ekadaungâ, mâkâ inomedâdomobyry ara xurâem amitomoem. Itaumbyry mâengatuhomoem inomerymo nhuduhoem ekadaungâ kuru.

<sup>2</sup> Âkelo tâjitanru Deus Ispiriturydâba âenigue aguein-ro watay, Deus lelâ âdakeze mâkâ aguely awyly xutuim. Deus Ispiritury eon-honrugue mawânkâ tutuzenry kehoem aguely.

<sup>3</sup> Mâkâ tutuzeinhelâ Deus itaumbyry egatuim olâ Jesus nheinwântomo imâem tyenehonze, tâsenagazedily nhemaen-homoem ton-hondâzemo. Tytyreim, kaikânro modo warâ tuomazeânzemo lâpylâ warâ.

<sup>4</sup> Mâkâ unâ âkelo tâjitanru Ispiritudâba âenigue agueim watay, âwâlâ kulâ mâkâ âturudyly. Mâkâ kurâdo indaklylenlâ Deus itaumbyry egatuim olâ idânârâ idataynrim modo turuse, Deus wâgâ imâem nhutuhomoem.

<sup>5</sup> “Âkelo tâjitanru Deus Ispiriturydâba âenigue adâkezeba itaungâ” uguely mâkeba. Tâwâlâ tâise idânârâ amyguelymo, idânârâ enomedâdybyenlâ watay. Koendonro kuru olâ idânârâ Deus itaumbyry tâjitanru tutuzeinhelâ mâengatulymo; arâma idânârâ âjidaholy âdakeze aguely awyly. Âkelo tâjitanru Ispiritudâba âenigue egatuyby âjidaholy ise, âdakeze aguely awyly egatuimbe-ro watay lelâ. Arâ ise Jesus einwânni modo ton-honre lelâ nheinwândylymo.

<sup>6</sup> Âyanmo adakobâze udâondyse wawyly, tutuzelâ âmaemo, Cristo eynynâ ypemugudo. Agâmo wawyly ume, âkelo tâjitanru Ispiritudâba âenigue aguely-ro watay, âdyem nitaymba tâise awârâ âmaemoem, âdakeze aguely mâuntubama tâise âmaemo. Âyanmo kâengatuhomoem yam Deus nhutuen-hoymby kâengatuly watay, Jesus mâinwântomo wâgâ aguely watay, Deus itaumbyry awo wâgâ iwenyby kâengatuly watay, âdy Jesus einwânni modo nheinwânkly, anhekyly warâ wâgâ inomedâdylymo watay, Jesus mâinwândylymo imâem iese âmaemo, mâindaklylymoenlâ augueduo lelâ olâ.

<sup>7</sup> Etaungâ awârâ flauta, harpa warâ tydywâtuneim modo. Koendâ idyly xutudânry kulâ idyin-ro watay, inakanhe kulâ âzeremutâdyly. Aituo pylâ tygâseim modo, âni modo warâ nhakaladânehonly-ro warâ.

<sup>8</sup> Mâkâ trombeta idyim koendâ nidypa watay, sodadu domodo nohondaymba tâseguebyhomoem.

<sup>9</sup> Arâ lâpylâ tâdâtâdygyuhodâ Deus wâgâ âkelo tâjitanru Deus Ispiriturydâba âenigue amyguelymo-ro watay, âdakeze aguely awyly nutuba awylymo. Sapezenruam amyguehomoobyry adaholy-ro waunlo ara kulâ ise!

<sup>10</sup> Toenzepa xirá anaym tâjitanru âkelo modope awyly. Mârâ tâjitanru xutuwanî modoem âdakezelâ mârâ aguely; xutudânry modo xurâem olâ mârâ âdakely keba-ro waunlo ara kulâ.

<sup>11</sup> Ânguylâ ytainly tâjitanru kâuntulygueba-ro watay, âkelo anano mâkâ awyly tutuze urâ. Iduanomo keba wawyly, tutuze mâkâ warâ, ytanru nutuba tawylygue.

<sup>12</sup> Tutuze urâ, toenzepa Deus Ispirituryam mâzenomedâodyze mawylymo. Einwânni modo imâem Jesus wâgâ nhutuhomoem amânhetomoem olâ ekadaungâ.

<sup>13</sup> Âkelo tâjitanru Deus Ispiriturydâba âenigue adâkeze âmaemo-ro watay, Deusram ekadaungâ; “Pabai, ienomedâgâ, tâjitanru tutuzenry auguehobyry âdakeze aguely awyly auguehoem” kewâtaungâ.

<sup>14</sup> Tâdâtâdyguyhodâ, âkelo tâjitanru Deus Ispiriturydâba âenigue Deus agâ aguely-ro watay, auguehobyry kâuntuba wawylygue, yangahu oday lelâ nitaymba auguehobyry. Deus Ispiritury mawânkâ yispiritury agâ ageuim, auguehoem.

<sup>15</sup> Âkelo tâjitanru Deus Ispiriturydâba âenigue auguepa widyly keba olâ, arâ auguehoem Deus Ispiritury ienomedâdily watay. Âkelo tâjitanru Deus Ispiriturydâba âenigue, ytanwe lâpylâ warâ Deus agâ ageuze olâ urâ. Âkelo tâjitanru Ispiritudâba âenigue iwâgâ igâtuze urâ, ytanwe igâtuze lâpylâ olâ urâ.

<sup>16</sup> Tâdâtâdyguyhodâ, âkelo tâjitanru Deus Ispiriturydâba âenigue Deus agâ amyguelymo watay, amygehomoam “Âkealâ awârâ” kewâpyramo idataynrim modo, nutuba tawyly-mogue.

<sup>17</sup> Tâwâlâ lelâlâ wâne amyguehomo koendonro awyly, nutubamo watay, Deus wâgâ amygueho nutuwâbyramo ise. Aituo ise amyguehomobyry âdyem nipyra-ro warâ.

<sup>18</sup> Âkelo tâjitanru Ispiritudâba âenigue adâkeze urâ, akadâmo kehoem. “Âkelo tâjitanru Âispiriturydâba âenigue auguehoem amânhetobyry wâgâ koendonro lelâlâ âmâ, Pabai” ugupepa wipyra winase Deusram.

<sup>19</sup> Einwânni modo âtâdyguyhodâ olâ, nhutulymoenlâ aguely, Jesus einwândily wâgâ kâenomedâdaymo. Unâ imâempa egatulylâ koendonro kuru, imâem egatuyby âkelo tâjitanru Ispiritudâba âenigue takaze kehoem. Jesus wâgâ augueday cincolâ auguedyse wawyly, ânguy nhutudânry wâgâ toenzepa kehoem auguepa witoem.

<sup>20</sup> Cristo eynynâ ypemugudo, âwâgâmo kulelâ inkâba âpaunzedaungâ, iamudo âpaunzedo araba. Iamudo iwelo egaseyby inakanhe tâjidily wâgâ lâpaunzedaymba, myara lâpylâ itaungâ. Xutuyby âdy koendonro, âdy inakai warâ awyly xutuim ara âpaunzedaungâ.

<sup>21</sup> Warâ myakâwândy Deus itaumbryry awo wâgâ iwenibyem awyly:

“ ‘Âkelo âtâ anano modo igonose urâ,

âkelo tâjitanrugue ynynonro modoram aguehomoem.

Kâunrudysemo wato, niwantaguebyramo isenra’ kely Deus”

warâ myakâwândy Kywymâry Deus, Isaíasram inwenien-honly\*.

<sup>22</sup> Âkelo tâjitanru Deus Ispiriturydâba âenigue onomedâdyby aguely watay, Jesus eynynâbaom modoem mârâ aguehonly, einwânni modoempa. Tâjitanru tutuzeinhelâ Deus itaumbryry egatuhoem tâzenomery Deus Ispiritury nhuduly olâ, Jesus einwânni modoem, mâkâ wâgâ koendâ nhutuhomoem, koendonro xurâmoem mâkâ anhekyly awyly nhutuhomoem warâ. Einwânni modoram nhutuen-honly, einwântânry modoamba.

<sup>23</sup> Tâdâtâdyguyhodâ idânârâ âmaemo âkelo tâjitanru Deus Ispiriturydâba âenigue amyguelymo-ro watay, Jesus einwântânry modo, ton-honremba kulâ Jesus einwânni modo warâ egawândilymo-ro watay, akaemoam âwankuem âiehoze âmaemo. “Tuândy kulâ mynra akaemo” kehonze âmaemo.

<sup>24</sup> Âtanwemolâ Deus itaumbryry mângatulymo-ro watay olâ, Jesus einwântânry modo, ton-honremba kulâ Jesus einwânni modo warâ amyguehomo xutuzemo. Inakanhe aini tawyly xutuzemo. Deus aguehobyry takaze tawyly; mâkâ xurâem, tâwentâguezeim tawyly warâ xutuzemo.

<sup>25</sup> Aituo ise âkadulymo Deus izepa ato adientyby modo wâgâ. Âzeguhoam isemo, Deus ehoguzemo warâ. “Âkealâ, tarâ agâmolâ mynra Deus” kezemo.

*Tâdâtâdyguyhodâ âdara adâjidily awyly xutuhu*

<sup>26</sup> Cristo eynynâ ypemugudo, Deus mâen-hoguedomoem mâtâdyguyduomo, warâ ise amidilymo. Deus tien-hoguedoem igâtuni modo, tâwâlâ nigâtudâmo. Deus wâgâ onomedâni modo, tâwâlâ nenomedâdâmo. Unâ Deus nhutuen-hoymby egatuim modo, tâwâlâ negatumo. Âkelo tâjitanru Deus Ispiriturydâba âenigue unâ egatuim, tâwâlâ negatumo; âdakeze

\* 14:21 Awylygue myakâwândy akaemo ingonodyly eonronrumodâpalâ, âkelo anano modo ety anaxi âsenagazedomoem.

aguely awlyly agueimpe olá nidâ. Arâ aitaungâ, agonromo koendâ Deus wâgâ nhutuzezedomoem.

<sup>27</sup> Âduaymo âkelo tâjitanru Ispíritudâba âenigue adâkedyze donro modope-ro watay azagâ, azagâ tokalâ warâlâ anygue, âjiantaylâ. Âdakeze aguely awlyly agueimpe nidâ-ro warâ.

<sup>28</sup> Ânguy agueim peba-ro watay, âmaemo âkeloem agueze keim modo MYK alelâ itaungâ. Odaymolâ âkelo tâjitanru Ispíritudâba âenigue Deus agâ aguewâtaungâ, tydaseinhe inkâba.

<sup>29</sup> Azagâ, azagâ tokalâ warâlâ Deus aguehobyry egatuim nidâ. Idataynrin modo koendâ niwaunsedâmo aguehomobyry, Deus wâgâ, Deus wâgâpa warâ aguely awlyly tiuntuhoem.

<sup>30</sup> Mâkâ tâmyreim ewy Deus tyam nhutuen-hoymby adâkedyze-ro watay, mâkâ Jesus wâgâ egatuim adâkeho newanike wao, nekadâ tureronwa, mâkâ adâkedyze donro XYDYK itoem, aguehoem warâ.

<sup>31</sup> Idânârâ âmaemo egatuly xutuwâni modo tâwâlâ egatuwâdaungâ. Tokalâ, tokalâ warâ olâ ise amyguelymo. Arâ ise koendâ âdakeze Deus aguely awlyly, idânârâ einwânni modo nhutulymo. Aituo ise imâem Jesus nheinwânsezedilymo.

<sup>32</sup> Deus itaumbry egatuly xutuim modo adâkely tâpagunâzelâ nidâ, tagonrodo agueho tiunduhoem.

<sup>33</sup> Koendâ lelâ Deus ize awlyly tâdâtâdyguyhodâ, on-hoam lelâ agueim modo aguely warâ inkâba.

<sup>34</sup> Âmaemo Jesus eynynonro modo mâtâdyguyduomo, pekodo modo tunâgueba nidâmo, kâzewenry ara idânârâ tâdâtâdyguyho modo oday. Iso akaemo xutuim, kâzewenry aralâ. Aituo pekodo modo âjigie tunâgueba nidâmo, Deus itaumbry egatuly nekuadâbyra itoem.

<sup>35</sup> Mârâ unâ nutubamo-ro watay, tusolâ napâiguemo, tâtym saintybyem. Kywypadoem kulâ pekodo Deus itaumbry egatuly ume itabygu.

<sup>36</sup> Xirâ augueho wâgâ yagâ koendâ mâseinwâmbyra âmaemo-ro watay, amyguehomo augueho nakadaymba. Enanâguewâdaungâ, waunroem kuru Deus itaumbry egatuimbyry keba mawlymo, waunroem idanipryry keba mawlymo warâ.

<sup>37</sup> Deus itaumbry mâengatuhomoem Ispirituryam enomedâdybyenlâ âmaemo, Deus ewanu aieniem enomedâdybyenlâ âmaemo warâ watay, tutuzelâ âmaemo, Kywymâry Jesus kâinwenihoem aguehobyryenlâ kâinwenily awlyly.

<sup>38</sup> Xirâ augueho iwaunsedânry, einwântânry warâ watay, tâwâlâ niwantaguebyra awlyly, agueho kâjiwantaguedaundâ olâ.

<sup>39</sup> Cristo eynynâ ypemugudo, toenzepa Deus Ispirituryam ekadaungâ, Deus itaumbry egatuim-em mitomoem. Âkelo tâjitanru Deus Ispiriturydâba âenigue adâkedyzedonrobe-ro watay olâ, "Adâkezeba ikâ" tâkezeba itaungâ eyam.

<sup>40</sup> Deus iomaenze mâtâdyguyduomo, âdalâ kulâ inkâba tâdâtâdyguyhodâ aitaungâ. Adâkeho saintuo lelâ agueim watay, anygue; amyguehomo iwânwântaungâ.

## 15

### *Igueypyem inkâba Cristo, kurâem itondybyem*

<sup>1</sup> Unâ tâdâsemagueho âyanmo kêengatyby mâenanâguedyzemo wato iwerâ, Cristo eynynâ ypemugudo. Kâmakezelâ Cristo iguely kely mâindatuomo, tâinwânse ani âmaemo. Unâ iwâkuru âyanmo kêengatyby mâinwândilymo; mâinmowâbyra âmaemo.

<sup>2</sup> Xirâ unâ mâinwântuomo, Jesus mâinwântuomo warâ lelâ Deusram mâzmakeolyo. Mâinwâmpyra kulâ, "Jesus tâinwânse urâ" myguelymo watay, âdyem nitaymba awârâ; tâmakezeba ise âmaemo-ro warâ.

<sup>3</sup> Unâ yam egatuybylâ ani âyanmo kêengatuly, unâ tutuzeim lelâlâ. Inakanhe aguitobyry xygakeze myakâwâm Cristo iguely. Deus itaumbry awo wâgâ "Arâ ise aidily" kehobyry aralâ myakâwâm mâkâ Kywymâry aidily.

<sup>4</sup> Tuhu imâsedo esagueyby odaji myakâwâm eguepybyry âzetadâoly. Azagâ emedyly idily wâgâ myakâwâm Deus kurâem nhetondily, itaumbry awo wâgâ iweniby aralâ\*.

<sup>5</sup> Kurâem itondybyem myakâwâm Pedroam âepanâguely. Ilâpyryem doze lelâ tywâgâ aguenriem tinduakeyby modoram âepanâguely.

<sup>6</sup> Ilâpyryem myakâwâm quinhentos tâinwânni modo âtâdyguyhomobyryam âepanâguely. Akaemo ewy tâigueze; aguilâ olâ iguedânry. Akaemo mawânkâ iwerâ Jesus igueypyemba awlyly wâgâ agueim.

<sup>7</sup> Ilâpyryem Tiagoram âepanâguely. Ine kubalâ idânârâ tywâgâ aguenriem tinduakeyby modoram âepanâguely.

\* 15:4 Nota de pé Mateus 12.40dâ egâ.

<sup>8</sup> Idânârâam tâepanâguebygueduo, xypyryem akâwâm yam âepanâguely lâpylâ. Mâkâ kâinwândyly akâwâm, akaemo nheinwâmpygueduo iweâpa kehoem. Awylygue iamudo adakadybyem iazepy emyenro urâ.

<sup>9</sup> Jesus agâ adakobâdyby keba urâ; tywâgâ aguenriem induakeyby modo enday, âdy mâkeba urâ. Jesus Induakeyby kelygue tâzekeim mâkeba gâlâ tâise urâ warâ, mâkâ kâinwândyly iraynâ, toenzepa eynnonro modo enagazenibyry wawylygue.

<sup>10</sup> Arâ wawyly umelâ, yagâ koendâ olâ akâwâm Deus. Iweloem yetondâ mâkâ, unâ egatuin-em Jesus induakeybyem witoem, iwâgâ auguehoem. Alâ kulâ inkâba ani uduakely, xirâ agânhetuem. Toenzepa kâsewanily, koendâ lelâ mâkâ xurâem kâsewanihoem. Eagonro modo, Kywymâry Jesus induakeyby modo takaze ton-honre kehoem kâsewanily. Auguely idanipyry modo toenzepa mâkâ tâinwânse. Urâ keba olâ akaemo nheinwântoem âienehoim; Deuslâ awârâ aieni. Yagâ koendâ tawylygue, mâkâ arâ ayedyly.

<sup>11</sup> Koendonro kuru olâ unâ tâdâsemagueho egatuly, xina agueim atay, eagonro modo ageuim atay warâ. Xirâ unâ âyanmo xina negatu; meinwândâmo-ro warâ.

*Kurâem itonze kurâ kyigueduo*

<sup>12</sup> Igueypyem, Cristo kurâem itobyryma ani xina nhegatuly âyanmo. Tâlâ olâ âduaymo wakeim: “Cristo igueduo kurâem tyetonze lelâlâ wâne akâwâm Deus, kyigueduo kurâem kyetombyra olâ ise” keim. Arâ adâkezeba itaungâ!

<sup>13</sup> Kyigueduo kurâem kitombyra kurâ-ro watayma Cristo myakâwâm kurâem nitondaymba-ro.

<sup>14</sup> Cristo kurâem nitombyra watay, Deus itaumbryry âyanmo xina nhegatuly lâpeba tâise, âdy mâinwânkylymo peba tâise warâ.

<sup>15</sup> Iguewâtyby modo kurâem nitombyra watay, konokuni kulâ tâise xina. “Deus olâ myakâwâm Cristo, igueduo, kurâem tyetonze” adâkeze lelâlâ xina warâ. Igueypy modo kurâem nitombyra kely âkealâ watay, Deus, Jesus kurâem nietondaymba tâise.

<sup>16</sup> Iguewâtyby modo kurâem nitombyra-ro watayma myakâwâm Cristo kurâem nitondaymba lâpylâ-ro, tâkanâdobyrydâ negaseba warâ-ro.

<sup>17</sup> Igueypyenlâ mâkâ watay, âdyem nitaymba mâinwândylymo, amitaynlymo kulâ. Igueypyenlâ mâkâ-ro watay, inakanhe amitomobyry nygakewâbyra tâise Deus, âji tâdâsenagazedoanlâ tâise mydâlymo, âigueduomo.

<sup>18</sup> Cristo kurâem itondybyemba watay, idânârâ mâkâ einwânni iguewâtyby modo tâise tâdâsenagazedodâ, aunloenlâ Deus agâpa ietybymoem, inakanhe aitomobyry tygakezeba awylygue.

<sup>19</sup> Iguewâtyby modo kurâem nitombyra, kyigueduo Deus agâ kipyra kurâ warâ watay, kaikâ lelâlâ tâise kurâ, kewâdyly kulâ kieinwântobyry wâgâ. Idânârâ tarâ onro anaym Cristo xurâem aguitayn-hobyry modo, kâwanopyry, kuomarobyry, awârâ modo âdyem nitaymba tâise.

<sup>20</sup> Igueypyemba olâ Cristo iwerâ! Igueypyem awyly ume, kurâem tyetonze myakâwâm Deus. Awylygue tutuze lelâlâ kurâ, kurâem kyetonze lâpylâ mâkâ awyly.

<sup>21-22</sup> Idânârâ iguewâse kurâ, saguho uguondo Adão iweom kydawwilygue. Alâpylâ Jesus Cristo xurâem kydawwilygue, kyigueduo kurâem itonze kurâ. Adão, Deus izepa ato anhetobyry wâgâlâ myakâwândy Deus agâpa kidyly, kyiguely adaguly warâ. Alâpylâ Jesus Deus ize ato ara lelâ aitobyry wâgâ Deus agâ kyenehondyly.

<sup>23</sup> Deus aguehobyry ara kehoem idânârâ aidyly. Waunroem kuru Deus, Jesus Cristo kurâem nhetondyly, igueypyem awyly ume. Cristo odopâduo ise kurâ eynnonro modo kurâem kitondyly.

<sup>24</sup> Aituo maise onro anaym xypyrylâ idânârâ Deus iduery modo eon-honru, ton-honremba ienehonze Cristo. Awârâ adiempygueduo, “Pabai, agânhetuem amyguehobyry idânârâ ajietai. Âmâ lelâ Pymâ iwerâ. Imaym lelâ iwerâ idânârâ” keze Deusram.

<sup>25</sup> Deus aguewâm, Cristo pymâem itoem. Iwerâ Deus eynnâbaom modo ton-honreim xypyry etay Cristolâ ise iwymârymo. Tuduery modo eon-honru sainze mâkâ. Sodadu wâne tuduery tiameyby tywykabeze sawânipyryem tawyly tienehon-hoem, myara ise Cristo tynnâbaom modo eon-honru nhainly.

<sup>26</sup> Xypyryem kuru tainzeim ise tâjiguely. Kuduery awârâ tâjiguely, kyiguely tytaze kydawwilygue. Cristo olâ tâjiguely sainze.

<sup>27</sup> Iwenibylenlâ myakâwândy Deus itaumbryry awo wâgâ: “Idânârâ iwymâryem ise mâkâ âeni âewyly” kely myakâwândy iweniby. Cristo pymâem awylylâ agueho. Idânârâ iwymâryem lelâlâ Cristo. Tunwym Deus iwymâryem nipyra olâ; Deuslâ mawânkâ pymâem ieni.

<sup>28</sup> Idânârâ iwymâryem Cristo awyly, aguewânmy Deus. Idânârâ Deus izepaom modo eon-honru tyaimpygueduo, “Pabai, agânhetuem amyguehobyry idânârâ ajietai. Âmâ lelâ Pymâ

iwera” keze tunwym Deusram. Warâ ise idânârâ Deus emaym lelâ idyly, ize ato ara lelâ itoem.

<sup>29</sup> Tâlâ iguewâtyby modo eynynâ batiza ini modo. Iguewâtyby modo kurâem itondyly neinwâmpyramo-ro watay, arâ anitaymbamo tâise.

<sup>30</sup> Xina myarâ, myarâ warâ Jesus xunâry egatuze adakobâni modo kâmayno einkâ takaze inanry xina. Iwâgâ xina aguepa nipyra olâ; tutuzema xina, tyâly-ro watay, xypyry etay kurâem itonze tawlyly. Arâpa-ro watay, âdaunloenlâ xirâ âwanu xina aniensezedaymba tâise.

<sup>31</sup> Cristo eynynâ ypemugudo, kopaëlâgâembaba inanry Jesus eynynâbaom modo yâly nhegaedylymo. Âkealâ xirâ auguely. Toenzepa olâ inanry kâzehoguedyly, âduaymo Kywymâry Cristo Jesus anhetyby wâgâ.

<sup>32</sup> Tarâ Efesodâ kâmaynoem keankâ kâdutuly. Ânguydo imeom tyewiâseim modo agâ kâjityguyly waunlo ara keankâ, Jesus Cristo wâgâ augueday, yizepaom modope awylygue. Yigueduo kurâem witondyly kâinwâmpyra urâ-ro watay, âdyem nitaymba tâise arâ kâsenagazedlyly. Aituo “Ize kydatolâ kyzeinre, toku ikaji kitoem kehoem kydadakuinre warâ, kopaëlâgâlâ igueze mawânkâ kurâ” Deus eynynâbaom modo keho ara awidyly lelâ tâise koendonro.

<sup>33</sup> Aypa olâ! Arâ aguewâni modo aguelygue tâsenoguzeba itaungâ. “Xypyry etay iguewâtyby modo kurâem nitaymba ise” kewâni modo agâ on-hoam midylymo-ro watay, earamolâ ise mâinwândylymo. Tutuzelâ âmaemo wakely: “Tadataen-ho inakai, koendâ aini modo inakanhe tyese” kely.

<sup>34</sup> Koendâ angahumo oday âunâgumo nidâ, saguhoem âunâgomobyry ara inkâba. Deus izepa ato aiedyly imowâdaungâ. Warâ auguely, mâpybazedomoem; tâlâ mawânkâ âduaymo Deus ize ato koendâ xutudânry modo.

*Igueypyem kurâem itybyem âdara kydawlyly xutuho*

<sup>35</sup> Tâlâ ise sapâiguwâni modo: “Âdaraka ise kurâ, Deus kurâem kyetonduo? Âdaraka ise kodo? Xirâ kodo iwerâ tâlânro aralâka ise?” keim modo.

<sup>36</sup> Tuândy domodo! Kodo âdugukeoze, kodo iwerâ tâlânro ara inkâba ise. Ewy igueduo mawânâ âpa ezay etâdyby ilusely.

<sup>37</sup> Âdylâ ewy etâdyly, trigu ewy atay warâ, âtugugueim araba wâne, ondaxi ietybyem olâ tyazeze, ago tâise, taryseze, tâwiseze warâ.

<sup>38</sup> Âikâlâ, âikâlâ warâ nady ewy modo Deus aguehobyry aralâ. Awylygue tâwy modo aralâ etâdyby modo iazely awyly.

<sup>39</sup> Alâpylâ tâjiunru modo âzekiba lelâba awyly. Kurâ nhunru âikâlâ. Ânguydo imeom nhunru âikâlâ, tawâguneim modo nhunru âikâlâ warâ. Kanra nhunru âikâlânro kuru-ro warâ.

<sup>40</sup> Arâ lâpylâ kau wogonro modo, onwogonro modo agâ âkeloem awyly. Idânârâ kau wogonro modo iwâkuro, taunlo onro wogonro modo iwâkuro agâ âkeloem.

<sup>41</sup> Xixi, nunâ, ximukâ warâ ehoru âzekiba lelâ inkâba lâpylâ, tâwâlâ lelâlâ wâne idânârâ iwâkuruem lelâ awyly. Idânârâ ximukâ modo, âzekiba lelâ ehorunu nitaymba.

<sup>42</sup> Arâ lâpylâ ise kurâ iguewâtyby modo kurâem Deus kyetonduo, âkeloem ise kodo iweloem, iwerâ tâlâ kydato agâ. Kodo iwerâ tâlâ kydato igueze mawânâ. Kodo iwelo olâ ise igueim keba.

<sup>43</sup> Mârâ kodo tâpyâzeim ton-honreim keba, inakanhe ini kulâ. Kodo iweloem ietyby olâ ise ton-honreim, tywâkureim warâ.

<sup>44</sup> Mârâ kodo tâpyâzeim xirâ anano kulâ. Kurâem kitonduo olâ kodo iweloem ietondybyem ise Deus Ispirituryam. Tâlâma kodo xirâ anano kulâ. Tâlâ lâpylâ olâ ise kodo iweloem ietondyby Deus Ispirituryam.

<sup>45</sup> Warâ Deus itaumbry awo wâgâ iwenibyem awyly: “Wauyroem âpeagueim kurâ Deus nhugukyly myakâwândy Adão, tunre, tybygue warâ” warâ iwenibyem awyly. Tâlâ olâ mâkâ, “Adão xypyry” keho, Jesus Cristo. Mâkâ wâgâ kydzêmakeoly. Mâkâ wâgâ iweloem kydâieholy, aunloenlâ Deus agâ kitoem.

<sup>46</sup> Kodo Deus Ispiritury iweloem nhetondyby koendonro kuru, kodo adainrim takaze. Kodo tunreim, tybygueim warâguema saguhoem kydzêduguholy. Ilâpyryem pylâ kodo Deus Ispirituryam iweloem ietybybe kidyly-ro.

<sup>47</sup> Kaudyly ume, waunro uguondo nhugudyly myakâwândy onro edunugue. Mâkâpygueduo iweâpa lelâlâ myakâwâm Deus eagonro uguondo onro anaxi ingonodyly, mâkâ Adão takazeno kuru.

<sup>48</sup> Idânârâ kurâ domodo xirâ onro anano modo Adão sodo aralâ sodomo, onro edunugue xygatyby aralâ. Cristo xurâem itaynrim modo sodo olâ ise Cristo kurâem itondybyem myani sodo ilâ emyenro. Iweloma ise kodo, Cristo Deus ezaypa âetyby sodo iwelo ara.

<sup>49</sup> Uguondo onro edunugue xygatyby aralâ kurâ, arâ lâpylâ ise uguondo Deus eydâ atodâba âetyby ara kydawyly.

<sup>50</sup> Xirâ mâuntudyzemo wato, Cristo eynynâ ypemugudo. Pymâem kuru Deus atoram kâgawântaymba kurâ kodo iwerâ tâlâ kydatogue. Âji ânguy nadaimpa, niguepa warâ atodâ itoem nudupa mawânâ; xirâ kodo iwerâ tâlâ kydato tâwâmase, tadainze warâ awylygue. Kodo iwerâ tâlâ kydato âdugukeoze olâ. Arâ ise aunloenlâ Deus agâ kydawyly, tâwânepa kydawyly, âdaunloenlâ kydadaimpa kydawyly warâ.

<sup>51-52</sup> Koendâne âyanmo kâengatuly idataungâ, xirâ saguhoem tutuzenrybyry. Idânârâ inkâba ise kyiguelly, Jesus odopâdyly iray. Xypyryem itybyem awyly xutuho trombeta âjidyly-ro watay, kânu PÂGÂIM MOK idyly ara kulâ ise idânârâ kydâdugukeoly inepa kehoem. Trombeta âjidyly-ro watay, Jesus einwânni modo iguewâtyby kurâem itonzemo, todo âdaunloenlâ adaindânrygue, kodo iweloem aiehowâze lâpylâ.

<sup>53</sup> Xirâ kodo iwerâ tâlâ kydato tadainze lelâlâ wâne, âdaunlo emedyly wâgâlâ olâ ise âdaunloenlâ adaindânryem âieholly, kâty kywogonro iduatyby, iwelo agâ kiungukely ara.

<sup>54</sup> Kodo adainrim adaindânryem âiehoduo, Deus itaumbryry iweniby agueho aralâ ise aidyly:

“Tâjiguelly adainlylâ ise!

Satanâs eon-honru tâjiguelly anheto adainhoze, idânârâ kehoem”

warâ myakâwândy Deus inwenien-honly Isaiâsram, saguhoenlâ.

<sup>55</sup> “Tâjiguellyam wakykenre:

‘Saimpyem âmâ!

Ielawada ipy etyby ara kulâ âmâ.

Âytadaymba xina iwerâ’ kykenre”

warâ myakâwândy Deus inwenien-honly, saguhoenlâ.

<sup>56</sup> Deus aguehobyry sakanibryryem lelâ kurâ idânârâ. Deus, Moisésram tâzezewenry inwenien-hoymby kindadylygue, mâkâ izepa ato aienibryryem kydawyly kiuntuly. Awylygue ani kyiguelly kiyntadyly, kyigueduo kydâsenagazedily kiyntadylygue. Iwerâ olâ tyanepa kurâ, inakanhe aguitobyry xygakeybyem awyly kiuntulygue.

<sup>57</sup> Kon-honwanâdâ olâ Deus, izepa ato aguiempyry kitoem, Kywymâry Jesus Cristo kurutobyry ara lelâ aguidyly awylygue. Awylygue mâkâ agâ aguykeba kipyry kine: “Pabai, iwâkuru lelâlâ âmâ! Idânârâ koendâ awyly takaze koendâ mawyly!” kykenre. Aunlolâ Deus kyzehoguene.

<sup>58</sup> Ypemugudo Cristo eynynâ kâinwynegyly modo, Jesus toenzepa einwândyly kâjimowâdaundâ. Deus kodo iweloem ietonze awyly einwândyly kâjimowâdaundâ. Kywymâry Jesus amânhetomoem aguehobyry, amânhepyry tâiseba itaungâ. Alâ kulâ inkâba ise xurâem amitomobyry, amyguehomobyry warâ, eagâ kydawyly ume.

## 16

*Corinto donro modo dinheru nhuduhobyry Judeiadâ einwânni modo âdy pebaom modoem*

<sup>1</sup> Iwerâ auguelly ise Jerusalêmdâ Jesus einwânni modoram mâingonoklylmoem dinheru mâindâtyguylmo wâgâ. Einwânni modo Galácia eynynâ âtâdyguynri modo kâunrutobyry ara lâpylâ âurudylymo.

<sup>2</sup> Domingo oday, domingo oday warâ âdinherurumo ewy âentywâdaungâ mâunduhomoem. Tâlâ matomo aralâ xuduwâtaungâ. Imâem emakeim, imâem nhuduly; imâemba emakeim, imâembalâ nhuduly warâ. Yaindyly kâjiwânwâtaundâ arâ adâjidyly maguhomoem, yaintuo tâlâ lelâ itoem.

<sup>3</sup> Yaindyly iraylâ, iduakewâdaungâ âmaemo ewy Jerusalêmrâ dinheru sani. Yaindyly-ro watay, kata iwenize urâ, mâinduakeybymo nhakyly dinheru agâ. Jerusalêmdâ einwânni modo iwymâryam ise nhudulymo, dinheru sanilâ akaemo awyly nhutuhomoem.

<sup>4</sup> Udâhoem nhuduly watay, on-hoam lelâ ise xina idâly lâpylâ.

*Paulo Corintoam tâtâdyze atobyry*

<sup>5</sup> Waunroem kuru Macedônia yan-yam udâdyse wawyly, târâ âji modo einkâ Jesus einwânni modo agâ âdiempa witoem. Ilâpyryem ise udâly, agâmo witoem.

<sup>6</sup> Yaindyly-ro watay, âydâmo iweâpa iniem mawânâ kâdutuly, até igâwynu sakadyly ara. Awârâpygueduo, âdyanlâ udâhoem âmaemolâ ise âdy ipa wato xuduim.

<sup>7</sup> Yakaday kulâ inkâba nhedysemo wawyly. Kywymâry Jesus ize-ro watay, iweâpa widysey wâne urâ agâmo.

<sup>8</sup> Awylygue ise tarâ Efesodâlâ wawyly wao Pentecostes etyguedo odaji idyly ara.

<sup>9</sup> Toenzepa Jesus wâgâ auguehoem tuduze ani tarâ; Deus pyanta enahungueimbyryem iegawântoem, kâsewanihoem waunlo ara. Toenzepa asaemo taunlo modo Jesus

nheinwândylymo, iwâgâ auguely indadylymo warâ. Awylygue ise tahule kuru tarâpa iegaseba wawyly wao. Toenzepa Jesus xurâem agânhekyly, ekuâdâze kewâni modope awyly umelâ.

<sup>10</sup> Timóteo awyarâ saindyly-ro watay, koendâ edaenkuwâdaungâ; agâmo itoem igâsedaungâ, xuataungâ warâ. Kywymâry Jesus xurâem kâsewaniho ara lâpylâ awâkâ âsewanily.

<sup>11</sup> Ânguyram âwankuem kâienehowâdaundâ. Âdy ipa ato xuduwâtaungâ, âdyam idâhobyryram koendâ lelâ idâhoem, xarâ odopâdoem warâ. Kypemugu Cristo eynynonro modo agâlâ odopâdyly kâinwânwândyly.

<sup>12</sup> Cristo eynynâ kypemugu Apoloam adâkezeze wâne winase, Cristo eynynâ kypemugudo agâ âyanmo IU ise idâhoem. “Iwerâ kuru udâpa ise urâ” tâkeze olâ inanry. Tâtâhoem nhududuolâ ise idâly.

*Kata xypygueândo*

<sup>13</sup> Tonomegulâ itaungâ, Satanás inokubyramo itoem. Ton-honre lelâ Jesus einwânsezedaugâ. Tâdâsenagazedily, âdylâ ton-honreim warâ mâenmaen-homoem, âsegamiwâdaungâ, âzeon-hondâdaungâ warâ. Ton-honre lelâ Deus mâinwândylymo nidâ.

<sup>14</sup> Idânârâ koendonro amânhekylymo aiedily, mâpynedylymo warâ kâjimowâdaundâ.

<sup>15</sup> Cristo eynynâ ypemugudo, Estêfanás tutuzelâ âmaemo, ety odano modo warâ. Acaia eynynonro enday saguhoem kuru Jesus einwânnypyry akaemo. Deus eynynonro modo emawyadâze tâzeon-hondâzemo, xurâmoem koendonro aiedily nimopamo warâ. Deus xurâem adâitoem toenzepa âsewanilymo.

<sup>16</sup> Akaemo âurutomo aietaungâ. Akaemo agâ Jesus ewanuem âsewanirim modo âurutomo aietaungâ lâpylâ.

<sup>17</sup> Estêfanás, Fortunato, Acaico warâ xarâ saintuomo womaze. Iemawyadâze tarâ yagâpa lelâlâ wâne âmaemo, akaemolâ olâ itaybyaymo iemawyadâni.

<sup>18</sup> Toenzepa akaemo iegamanâdâ, toenzepa igamanâdâmo lâpylâ awyly, tutuze urâ. Koendâ kehoem urâ igarymo koendonro nhenetybymo kâenmakehobyry wâgâ. Asaemo ewano wâgâ koendâ aguykely lelâ koendonro.

<sup>19</sup> Jesus einwânny modo Ásia eynynonro tywynu nhawânehonlymo lâpylâ. Áquila, iwydylâ Priscila, Deus itaumbry idase etymodâ âtâdyguywâni modo warâ idaenkuylimo lâpylâ. Agâmo tokaleom ara lelâ asaemo idaenkuylimo, Kywymâry Jesus xurâ tawylmogogue, mâkâ xurâem matomo ara lâpylâ.

<sup>20</sup> Idânârâ Cristo eynynâ kypemugudo taunlo modo idaenkuylimo lâpylâ.

Âwaparymodâ tohonuguze âsedaenguwâdaungâ, Cristo eynynâ âjipemugu mawylymo mâenehon-homoem\*.

<sup>21</sup> Iemarygulâ xirâ âyanmo kâinwenily, idaenkuhomoem. Urâlâ xirâ wâgâ iezedy Paulo kely iweninri.

<sup>22</sup> Kywymâry Jesus iwynedânry modo tâwâlâ Deusram tânagazezeinhelâ nidâ.

*Marana tá!* uguely. (“Inepa odopâgâ, Pymâ!” keze aguely.)

<sup>23</sup> Kywymâry Jesus koendâ nhetomoem kâenkadyly.

<sup>24</sup> Idânârâ âmaemo toenzepa âwynedâmo wawyly mâuntudyzemo wato, idânârâ kurâ Jesus Cristo xurâ lelâ kydawlylygue.

Xirâ kulâ wao ise âyanmo augueho.

Paulo

\* 16:20 Saguhoem Jesus einwânny modo tohonuguze âsedaengulymo. Iwerâma tâpymogoyne kydâsedaenguly.

## 2 CORÍNTIOS

### Paulo Kata Azagâ Ieto Inweniby Corinto Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby Corintodâ Jesus einwânni modoram. Jesus Cristo wâgâ aguenriem induakeyby myakâwândy mâkâ. Waunro kata tinweniby wâgâ ton-honre kehoem myakâwândy aguely Jesus einwânni modo Deus izepa ato aieni modoram. Tâlâ myakâwândy Paulo turudylygue iewiâpani modo. Arâ kehoem tyam aguenriempa myani mâkâ nhutulymo. Xirâ kata wâgâ, Jesus wâgâ aguenriem induakeybyem tawlyly adâkeze olâ myakâwândy mâkâ-ro warâ; capítulos 10-11 warâdâ, Jesuslâ tywâgâ aguenriem igononi awyly tâgatuze myani. Xirâ kata wâgâ iweniwânmy mâkâ, saguhoem Deus iduery ky-dawlyly. Jesus kieinwântuo olâ, Deus kugukedâ, eataen-hoem kitoem. Xirâ kata wâgâ tytainze kurâ, Corinto donro modo dinheru ingonotobyry, Jerusalêmdâ Jesus einwânni modo âdy pebaom modo xurâem.

#### *Aguely adaguho*

<sup>1</sup> Urâ Paulo, xirâ kata âyanmo iweninri, Cristo Jesus induakeyby tywâgâ aguenriem, Deus aiedyse atobyry ara. Timóteo, Cristo eynynâ kypemugu tarâ yagâlâ merâ, idaenkulymo lâpylâ. Âyanmo xirâ kata kâingonodyly Corintodâ Jesus eynynonro modoram; idânârâ Acaia eynynonro Deus xurâ modoram lâpylâ xirâ kata idâly-ro warâ.

<sup>2</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânimyo peba nhetomoem warâ.

#### *Koendonro lelâlâ Deus, koendonro lelâ anhekyly warâ*

<sup>3</sup> Aunlolâ Deus kyjiomaene, Kywymâry Jesus Cristo nhunwym, iDeusry warâ. Koendonro mâkâ kagâ. Kytynru ume, kuomazeâni warâ.

<sup>4</sup> Xina âsenagazeday, Deuslâ xina eon-hondâni, âsenagazeni modo xina eon-hondâdoem, tonhonru nhuduhobyry ara lâpylâ.

<sup>5</sup> Cristo âsenagazedobyry ara lâpylâ xina âsenagazedilyly, xina nheinwândylyly. Jesus Cristo tâzeon-hondâoze myani nhunwynram arâ lâpylâ xina âzeon-hondâoly Jesusram.

<sup>6</sup> Âmaemoem koendâ itoenlâ xina âsenagazedilyly. Tâsenagazedilyly ume, Deus tâmawyadâduo, tutuze xina âdara on-hondâdylyly awyly, mâsenagazedilyly ume. Xutuze âmaemo âdara on-hondâdylyly awyly. Arâ ise mâuntulyly âdara mâsenagazedilyly mâenmaenlyly awyly. Tonhonre lelâlâ ise Jesus mâinwândylyly. Xypyry etay Deus âizemo ato ara ise âmaemo.

<sup>7</sup> Koendâ tutuze xina, Jesus einwândyly mâinmopa mawylyly. Awylygue, xina ara mâsenagazedilyly-ro watay, on-hondâzemo lelâlâ Deus, xina teon-hondâdobyry ara.

<sup>8</sup> Cristo eynynâ ypemugudo, Ásia eynynâ xina âsenagazedobyry mâuntudyzemo wato. Tonhonre lelâlâ ani xina âsenagazedilyly; tâmânreim kehoem tykary wâgâ xina nhanâkyly-ro waunlo ara ani; âdara tyiguely amaym tâsemaguely xina nutuwâbyra ani.

<sup>9</sup> “Iweâmaze kyiguelo naintai” tâkeze ani xina. Mârâ xina âsenagazedobyry olâ imâem kehoem xina Deus nheinwântoem adyenehonze, âwâlâ kulâba xina âseinwândoem. Deus lelâ kâmayno amaymba kâmakeim, iguwâtyby modo kurâem ietoni warâ.

<sup>10</sup> Kâmayno amaymba xina tâmakeze ani mâkâ, xina emakezezelâ ise-ro warâ. Awârâma xina nheinwânkyly, inwânwânkyly warâ.

<sup>11</sup> Xina eynynâ Deus agâ aguwâtaungâ. Amyguelyly idase lelâ, kâmaynoem xina awyly ume xina tienmakehoem. Arâ ise koendonro tawlyly xinaram nhenehonly. Toenzepa ise, “Koendonro lelâlâ Deus. Koendâ mawânkâ Paulo, eataen-ho modo warâ agâ awyly” kehonly.

#### *Paulo Corintoram tâtâho nhugukehobyry*

<sup>12</sup> Deus tynynonro modo aidyse ato ara lelâ xina aidyly, arâ ani mâkâ ize ato xina anhedily, iozepa kulâ âdy adiyendyseba, ânguy tienokudyseba warâ. Arâ ani xina aidyly, Corintodâ agâmo tawlyly ume. Koendonro lelâ, iozeno lelâ warâ ani xina anhekyly, tonomegugue kulâ inkâba, arâlâ mawânkâ ani Deus xina nhenomedâdyly. Arâ ani xina, Deus xurâem koendonro nhenehonly.

<sup>13-14</sup> Tutuzeinhelâ âyanmo xina inwenily, âdy tutuzenry lâpeba. Tâlâ âduaymo âdakeze xina aguely awyly koendâ xutuim; tâlâ lâpylâ olâ xutudânry modo. Koendâ mâuntulyly olâ ize wato. Arâma ise xina mâen-hoguedilyly, Kywymâry Jesus odopâduo, xina ihoguedomo ara.

<sup>15-16</sup> Tutuze wakyne udâduo, koendâ iedaenkulyly, tuomare lelâ mawylyly warâ. Awylygue Macedônia yan-yam udâday, kodopâday warâ Corintodâ iepagudyze wawyly wâne, âyanmo IU witoem. Agâmo urâ-ro watay, mohomaendomoem adyese tâise urâ, Deus



itaumbryry âyanmo kêngatulygue. Tâlâ matomogue uwatâ tâise ani âmaemo warâ, Judeiaram udâhoem.

<sup>17</sup> Udâhoem nudupa olâ ani mârâ ume. Awylygue tâlâ keanra âmaemo ewy wakeim: “‘Kyam IU ise tâewyly’ adâkeze Paulo, âdara âeniemba tawyly umelâ” keim. Arâpa olâ. Uguewâdily kulâ witaymba urâ. Agânhedyseba wato kulâ “Aiese urâ” uguewâpyra urâ. Unâry xugukehoimbe; awylygue ani udâpa widyly.

<sup>18</sup> Âdaunloenlâ konokudaymba Deus. Tutuze mâkâ âyanmo auguehobyry inokudomo keba awyly. “Aiese urâ” uguehobyry, agânhedyly; “Agânhepyra ise urâ” uguehobyry, agânhepyra wawyly warâ.

<sup>19</sup> Urâ, Silas, Timóteo warâ agâmo xina atay, Jesus Cristo wâgâ âyanmo xina adâkeze ani, Deus imery wâgâ. Ioze lelâ ageim mâkâ; âdaunloenlâ tâdâsenogudyly kewâpyra. Adâkehobyry, adyese lelâ. Adâkehobyry nhugukely nitaymba.

<sup>20</sup> Cristo wâgâlâ, Deus idânârâ “Aiese urâ” tâkehobyry anhedily, koendâ aguehonly warâ. “Koendonro lelâlâ âmâ, Cristo wâgâlâ mawânârâ idânârâ amyguehobyry amânhedyly” tâkezela kine Deusram. Arâ aguykeduo, idânârâ aguehobyry âkealâ awyly kiuntulylâ. Awylygue “Amém” kykely, (“Arâlâ” kezema aguely.)

<sup>21</sup> Deuslâ kohondâni, Cristo kienwânsezedoem. Deus kuduakewâm, xurâem kitoem.

<sup>22</sup> Tyispiriturylâ akâwâm Deus ingonokyly, kagâ itoem, mâkâ xurâem kydawyly xutuhoem, kysejigy wâgâ kâzedy kinwenily kurâ xurâem awyly xutuhoem myara. Âdylâ tâwânseim kianâdyse kurâ-ro watay, âdiempa tâpywaze wao kurâ, idânârâ epywaze kydawyly xutuhoem, arâ lâpylâ akâwâm Deus Tyispiritury ingonodyly, adâkehobyry modo xuduze mâkâ awyly kiuntuhoem.

<sup>23</sup> Xirâ kâinwenily, âkealâ awyly tutuze Deus. Uguewâdily kulâ-ro watay, Deus ienagazeze. Unâry kâungukeduo ani, Corintoam udâpa widyly. Udâly-ro watay, âmaemo ewy Deus izepa ato aieni modo ton-honre tâusemo tâise ani urâ. Awylygue mawânârâ ani âyanmo udâompyra wawyly, âtyenehondyzebamo wawylygue.

<sup>24</sup> Pymâ ara tâitoem inkâba xina âyanmo tâtâdyze awyly, topize kehoem xina agueho mâinwântomoem aienehonze inkâba. Tutuze urâ, imâem Jesus tâinwânse mawwilymo. Ozo-honru wâgâ kydawyly olâ ize wato, âurutomoem, mâinwânsezedomoem lakuru, mohomaendomoem, mâkâ ize ato lelâ amânhedylymogue.

## 2

<sup>1</sup> Awylygue ani “Idâze urâ” keypyenlâ, nhesemo udâpa widyly, âtyenehombamo witoem.

<sup>2</sup> Udâly lelâ-ro watay, tâjityenze lâpylâma tâise urâ, iutomobyry wâgâ. Aituo tâise awâtârâ won-hondâni modo peba, idânârâ mawânârâ tâise tuomareba mawwilymo.

<sup>3</sup> Awylygue ani katalâ âyanmo kâingonokyly awyly, udâpa witoem. Unâzema yangahu oday: “Eyanmo udâly-ro watay, toenzepa âjityenze keanze urâ, kâunrutomo nidapyramo mawânkâ ise. Katalâ wao ise kâingonokyly. Kâunrutomo indadylymo watayma ise, tuomare kehoem eyanmo udâly. Arâ ise womazely, Deus ize ato anhedilymogue; iomazezemo lâpylâ tyeinwândilymogue warâ” uguema.

<sup>4</sup> Deus izepa ato aieni modope iduaymo kely kâindatuo, kâjityendobyry wâgâ keankâ, mârâ kata kâingonodyly. Toenzepa âwâgâmo kâseguâdâdilygue, kohogüendâ mârâ kata kâinweniday. Mârâ kata mâenmakeduomo mâjityembyra midysemo. Âtywandomoem, tohogueba mitomoem warâ inkâba keankâ kâinwenily, toenzepa âwynedâmo wawyly mâuntuhomoem lakuru.

*Inakanhe adâitobyry wâgâ âjityeni watay, aitobyry kyzenanânehonre*

<sup>5</sup> Âduanomo ewy Deus izepa ato aienibyry urâ kulelâ mâkeba intywanâguyly, mâkâ aitobyry âtywanâdâmo lâpylâ. Inakanhe aitobyry wâgâ aguehonly keba olâ; iwerâ aitobyry enanânehonly.

<sup>6</sup> Mâkâ âsenagazedoem amiendâmolâ.

<sup>7</sup> Iweâma inakanhe aitobyry enanânehonwâdaungâ, iomazeândaungâ warâ, toenzepa kehoem nâjityembyra itoem.

<sup>8</sup> Koendâ kehoem xutuen-honwâdaungâ mâkâ tywyneze lelâlâ mawwilymo.

<sup>9</sup> Saguhoem âyanmo kâinweniby wâgâ ârudâmo, mâkâ uguondo mâeuntomoem, mâenagazenehon-homoem warâ. Arâ âyanmo kâinwenily ani ikudomoem, mâkâ uguondo wâgâ âurutomobyry ara adâise lelâlâ mawwilymo kâuntuhoem.

<sup>10</sup> Âmaemo mâkâ inakanhe aitobyry mâenanânehonlymo-ro watay, enanânehonze lâpylâ urâ, mâkâ inakanhe aitobyry tânanânehonzeimbe-ro watay. Âmaemoenlâ arâ awidyly, agânhedyly warâ tutuze lelâ mawânkâ Cristo.

<sup>11</sup> Adientyby wâgâ âjityeni, kienanânehon-hoem ekani inakanhe aitobyry kienanânehomba kurâ-ro watay, Satanâs tohogueze. Koendâ kehoem tutuzelâ kurâ awârâ. Awylygue

mâkâ inakanhe aitobyry kyzenanânehonre, Satanás ize ato kytywanânehonrim aguiempyra kitoem.

*Troadedâ Paulo âseguâdâdobyry*

<sup>12</sup> Troaderam udâly ani, tonlo modoram unâ koendonro Jesus Cristo wâgâ egatuze. Târâ wawyly ume, mâkâ wâgâ aguehoem adyenehonze ani Deus, pyanta nhenahunguely iegawântoem waunlo ara kehoem. Toenzepa tonlo modo Jesus tâinwânsemo ani.

<sup>13</sup> Ienanaji, Cristo eynynâ kypemugu Tito târâlâ ywânwânselâ waunlo ara ani; târâpa olâ myani mâkâ. Awylygue ani iwâgâ kâseguâdâdily. Aituo eagâ koxiobyra wituo ani inepa târâpa kâxiguely, Macedônia yan-yam udâhoem.

*Unâ koendonro tâinkâ lelâba Jesus wâgâ egatuhobyry*

<sup>14</sup> “Xina agâ koendonro lelâlâ âmâ, Deus!” tâkeze urâ. Cristo agâ tokalelâ xina awylygue, xina sakaladâze kewâni modope awyly umelâ, xina ewanopyry koendâ tyese olâ Deus. Tâdâjitoguyhodâ emaendânrybyry modo âwâlâ tâtuzemo, myara lâpylâ xina Cristoram âtuly, mâkâ xina iwymâry itoem. Deus tâinkâ lelâba xina ingonodyly, Jesus Cristo kieinwântuo lelâ kydâsemaguely kely wâgâ xina aguehoem, myara tyânârângueim nhârângu MON warâ idadyly wâneam myara idatoem.

<sup>15</sup> Deus itaumbryry xina nhegatuduo, Cristo wâgâ xutuly. Itaumbryry xina nhegatuduo, Deus tuomazeze; uriza nhârângu taypalâ kehoem idato ara mawânâ xina agueho âjidaholy. Tâlâ xina aguely izetonro, Jesus tâinwânsemo, tâzemahezemo-ro warâ. Tâlâ xina aguely einwântânry modo; Jesus tyeinwândysebanro. Aunloenlâ ise Deus agâpa âieholymo-ro warâ.

<sup>16</sup> Jesus einwântânry modo xurâem olâ xirâ unâ inakai lelâlâ, tywângueim kyâim ara kehoem, enanajimo. Jesus einwânri modoem olâ, xina nhegatuly modo koendonro lelâlâ; tyânârângueim ara; tâinwânsemo-ro warâ, typygueba ise Deus agâ awylymo. Ânguy ton-honrugue kulâ Jesus einwântuo lelâ tâdâsemaguely kely unâ negatuwâbyra; Deusram enomedâdyby modo lelâ.

<sup>17</sup> Turâem âdylâ tienmakehoem kulâ Deus itaumbryry egatuum modo emyenro keba xina. Deus ewanuem xina aidyly, mâkâ ingonotyby tawylygue, âdype tâitoem inkâba. Cristo eonhonrugue lelâ xina âsewanily, adâkely tydase, adienkyly tâense warâ Deus awyly tutuze tawylygue.

### 3

*Kurâdo agâ iwelo Deus âseinwândobyry*

<sup>1</sup> Deus xurâem tâwanu wâgâ xina agueduo, tâwâlâ kulâ xina âzehoguedyly mâkeba. Âdaunlo xina awyly koendâ tutuzelâ âmaemo. Awylygue kata ânguy tawyly agueho pebalâ xina adakobâdily; eagonro modo aito arapa. Tâinkâ lelâba mawânâ Jesus einwânri modoram xina âdutuoly. Awylygue mâinwenibymo xina napyra lâpylâ warâ.

<sup>2</sup> Kata iweniby emyenro âmaemo, Deus emary xina awyly nhutuhomoem. Aunloenlâ xina nhangahu oday mawlymo. Jesus mâinwântuomo iweloem mâiehomobyry wâgâ mawânâ, âwanu âduaymo xina anhetyby idânârâam âzeholy.

<sup>3</sup> Xina aguehobyryenlâ Cristo mâinwântomobyry wâgâ, Cristo aguehobyryenlâ xina ewanu awyly xutuholâ âmaemo, mâkâ kata sanî ewanu xutuly wâne myara. Kurâdo kata inweniwâdyby modo wâgâ kulâba ani Jesus Cristo einwânriem midylymo. Mâkâ mâinwândylymo ani Deus âdaunloenlâ iguedânry Ispirityry wâgâ. Saguhom judeu domodo ezewenry tuhu wâgâ iweniby mâintainlymogue kulâ inkâba ani mâzemahezoly. Deus Ispirityry odaximo Cristo mâinwândylymo nhenehon-homyry wâgâ.

<sup>4</sup> Tâwano wâgâ âduaymo xina arâ aguely, tywâgâ aguenriem Cristo induakeyby tawyly tutuzema xina. Deus tutuze, tâwanu wâgâ xina agueho iozenolâ awyly.

<sup>5</sup> “Ton-honruguelâ, tonomeryguelâ warâ xina, Jesus Cristo xunâry nhegatuly” xina kewâpyra. Deuslâ xina enomedâni, xurâem xina aitoem.

<sup>6</sup> Jesus einwântuo lelâ tâdâsemaguely kely mawânâ iwelo tâdâseinwândo. Awârâ wâgâ xina nhegatuhom xina enomedânybyryem Deus-ro warâ. Xirâ iwelo tâdâseinwândo Deus xurâ mawânâ inanry xina agueho. Moisés myakâwândy mârâ saguhobyry tâzezewenry iweninri; iwelo tâdâseinwândo olâ Deus Ispirityry aguehobyry. Saguhô tâzezewenry Deus agâpa kyenehondâ, ânguy mawânkâ idânârâ mârâ tâzezewenry agueho ara anipyra. Xirâ iwelo tâdâseinwândo olâ kydâsemaguehoem adyese; Jesus einwânri-ro watay, aunloenlâ ise Deus agâ typygueba kehoem awyly.

<sup>7-8</sup> Saguhom Deus tâzezewenry inwenily myakâwândy azagâ tuhu wâgâ, Moisés iwya onwa âkubohyrydâ. Târâ myakâwândy Deus âpanâguely Moisésram iajinu tohozeleim kehoem agâ. Mârâ ehozelu Moisés emydy tohozelanâze lâpylâ myakâwândy. Iwy wâgâpa azagâ tuhugue

tuhaze xytâguydaylâ myakâwândy emydy tohozeleba isezedyly. Arâ awyly umelâ, ton-honrelâ olâ myakâwândy emydy ehoezely; ipemugudo emydyam MYK itomoem nudupa, ezewenry iweniby nhegatuday. Mârâ tâzezewenry tywâkure, ton-honre warâ âemâ watay; Deus Ispiritury anhekyly makuru koendonro kuru.

<sup>9</sup> Mârâ saguho tâzezewenry kâmakeðânry tâzeinwân-honze-ro watay, kâmakeim iwelo Deus agueho kieinwândy koendonro kuru, tâwentâgueba Deus kâendyly awylygue.

<sup>10</sup> Tâzezewenry judeu domodo xurâem Moisésram Deus inwenien-hoymby ton-honreim, tohogueim warâ lelâlâ myakâwândy. Iwerâ tâdâsemagueho iwelo olâ imâsedo, toenzepa ton-honreim, tohogueim warâ, saguhobyry takaze kehoem. Ipa mârâ saguho tâzezewenry ton-honremba ietybyem tâdâsemagueho iwelo agâ.

<sup>11</sup> Saguho tâzezewenry inepa ton-honremba ini tohoguezemo myakâwândy. Iwerâ iwelo tâdâseinwândo eon-honru olâ tohoguezem kuru, saguho tâzezewenry takaze kehoem, âdaunloenlâ nadaimpa mawânâ ise.

<sup>12</sup> Iwerâ xina nhegatuly tyanepa kehoem, Deus kâmakehoem tunâry nugukeba awyly xina nhutulygue.

<sup>13</sup> Moisés tâzemyan-hunze myakâwândy âtâgue, Israel domodo tâmydy ehoezely xuzadyly nepyra itomoem. Xina olâ âdy nhoenkly peba, unâ tâdâsemagueho tiengatuday.

<sup>14-15</sup> Deus ezewenrymoem inwenien-hoymby tiuntudyzebamo myakâwândy. Nutuba itomoem, nhangahumo oday xuahuhobe ietybyen-ro waunlo aramo myakâwândy. Alâpylâ iwerâ Deus itaumbry itainduo, nhutuhomoem nudupa awyly. Nhangahumo oday xuahuybyenlâ-ro waunlo ara mawânâ. Koendâ nhutulymo ise Cristo nheïnwântuomo lelâ.

<sup>16</sup> Kywymâry Jesus nheïnwândylymo watay olâ, akaemo neinwâmpyra itoem aienehoim tâzetyoze lelâ, Moisés wâgâ Deus itaumbry awo wâgâ iwenibyem ato ara: “Tâmydy xuahuim etywânmy, Pymâ Deus agâ oxiodybyem todopâdyly ume” kely iwenibyem.

<sup>17</sup> “Pymâ” kely tarâ kâinwenily-ro watay, Deus Ispiriturylâ agueho. Deus Ispiritury kagâlâ ituo, koendâ tutuze kurâ, âzemaakeoybyem kydawlyly, mâkâlâ mawânkâ agueim.

<sup>18</sup> Kurâ Jesus einwânny modoem olâ âdy kâkuâðâni peba mâkâ wâgâ kiuntuhoem. Kopaelâgâembaba kydâdugueoly, mâkâ ara kizezedoem. Deus Ispiritury kagonro awylygue, Kywymâry Jesus ehogu, eon-honru warâ tânehonze kurâ, ispelhu kâgadopyry nhenehon-ho ara.

## 4

### *Paulo aitobryry Kywymâry Jesus emaryem*

<sup>1</sup> Kytyena tiwalylygue ani Deus xina induakely itaumbry egaturin-em. Awylygue xina tugûgyuepa nipyra awyly, toenzepa eon-honru umelâ, tâsenagazedly umelâ warâ.

<sup>2</sup> Kywypado toense adyeseim modo adiydyseba xina. Âdy konokuni xina aientaymba. Cristo wâgâ xina aguehoem, Deus aguehobyry xina nugukewâbyra. Idânâra xina nhegatuly Deus tyam aguehobyrylâ. Tâentâ, tydatâ warâ Deus awyly tiuntulygue, iozeno modo lelâ xina agueho, âdaunloenlâ konokuni keba xina awyly xutuhoem.

<sup>3</sup> Ânguylâ tâdâsemagueuly wâgâ xina agueho nutuba-ro watay, Deus agâpa ietybyem mâkâ, typygueba kehoem tâdâsenagazedoam kulâ idâhoem.

<sup>4</sup> Akaemo nutuba awyly, Satanás, Deus eynynâbaom modo iwymâry mawânkâ nutuen-homba ienehoim. Kurâ enuan-huyby âdy netaymba, tâwâlâ lelâlâ wâne tyajine awyly, myara mâkâ nutuba itomoem anhenonly. “Koendonro, ton-honreim warâ Cristo. Mâkâ lelâ Deus âdaunlo awyly xutuen-hoim” xina keduo, nutuba akaemo.

<sup>5</sup> “Jesus Cristo einwântaungâ, mâsemaguehomoem. Jesus âturimo nidâ” warâ xina kely. Xirâ unâ xina nhegatuly Kywymâry Jesus anhetyby wâgâ lelâ, xina anhetyby wâgâ kulâ inkâba. Jesus emary xina. Mâinwântuomo, mâsemagueulymo awyly egatuim kulâ.

<sup>6</sup> Kaudyly ume myakâwândy Deus aguely: “Tyajine nidâ iamu oday” kely. Mâkâ Deuslâ kyangahu oday iajimanâni Jesus Cristo kiuntuduo, âdaunlo Deus awyly kiuntuhoem.

<sup>7</sup> Toenze kulâ tâwânseim mâkeba xirâ unâ Jesus Cristo wâgâ xina nhegatuly, xina xirâ egatuwâni modo olâ âmugâ âjimatyry emyenro kulâ. Arâ Deus anhedyly akâwâm, eon-honruguelâ aguienkyly modo aiedyly awyly tienehon-hoem, kon-honrugueba awyly tienehon-hoem.

<sup>8</sup> Âdatay xina Deus xunâry egatuwâni modo, toenzepa tâsenagazeze, tuomareba xina nipyra olâ. Âdatay xina âda tâidyly nutuba tâise, xina nadahuliba olâ.

<sup>9</sup> Toenzepa lelâlâ wâne xina izepanro modepe awyly, Deus olâ âdykâ xina nodokeba. Âdatay toenzepa sapioguybyem xina awyly, xina niguepa olâ.

<sup>10</sup> Aunlolâ xina izepaom modo xina xyâze kely, izepaom modo Jesus nhyân-hombyry ara. Deus olâmy Jesus kurâem ietomâ. Idânâra awârâ modo aidyly, Jesus iguedânry xina agâlâ awyly enehon-hoem.

<sup>11</sup> Tarâ onro anaym xina awyly ume, aunlolâ xina kâmaynoem awyly tyâly wâgâ, Jesus emaryem xina awylygue. Kâmayno modo tiankadylygue tânehonze xina. Jesus xina agâlâ awyly.

<sup>12</sup> Aunlolâ xina tyiguely amaym, kâmaynoem awyly. Awârâ modo âsebywadoem olâ âzemaekoze âmaemo, aunloenlâ ise Deus agâ mawylymo warâ.

<sup>13</sup> Saguhoem Deus itaumbry awo wâgâ iwenibyem: “ Deus tâinwânse urâ. Awylygue iwâgâ auguely’ kewândymy Davi” warâ iwenibyem awyly. Arâ lâpylâ Davi ara Deus tyeinwândylygue, aunlolâ iwâgâ xina aguely.

<sup>14</sup> Kywymâry Jesus igueypyem awyly ume, kurâem ingtonybyry Deus. Tutuze xina, tyigueduo, kurâem itonze lâpylâ tawyly, Jesus agâ tokaleom ara lelâ xina awylygue. Aituo ise agâmolâ xina adaholy eydâ atoram.

<sup>15</sup> Xina âsenagazedily, âmaemoem koendâ itoem, unâ iwâkuru Deus nhuduypy mâindatomoem, agâmo Jesus einwânni modo agui isezedoem warâ. Arâ ise Deus ehoguedily, iomaendily warâ.

*Tâenseny modo wâgâ kydâpaunzene, tâentuneim modo wâgâ kulâ inkâba*

<sup>16</sup> Awylygue xina tâegane lelâ awyly. Kopaelâgâembaba lelâlâ wâne xina iduadyly, tonhonremba xina idyly warâ, xina egadopyry olâ xina odoy kopaelâgâembaba iweloem isezedyly lakuru, Deus xurâem adâjidyly xina nimopa itoem.

<sup>17</sup> Tarâ onro anaym tawyly ara tâsenagazeze lelâlâ xina; âdy keba olâ awârâ. Deus mawânkâ koendonro âdaunloenlâ adaindânry xuduze. Inakanhe lelâlâ wâne tarâ xina âsenagazedily. Mârâ koendonro xina nhemakely agâ, âdy keba waunlo ara kulâ olâ ise awârâ xina âsenagazedobyry.

<sup>18</sup> Tâentuneim modo wâgâ inkâba xina âpaunzedily, tâenseny modo wâgâ. Adainrim kulâma awârâ tâenseim modo, onro anano modo kulâ awârâ. Deus nhuduly olâ ise âdaunloenlâ adainrim keba.

## 5

<sup>1</sup> Âtâ wakurigem taryeim ara kulâ kodo tarâ onro anaym. Tutuze olâ kurâ, xirâ kodo adainduo, Deus iwelo kodo xuduonse awyly. Târâ kaynâ kodoem Deus nhudulyma ise adainrim keba, âtâ adaindânryem itâdyby emyenro. Deuslâ kodo iwelo aieni, kurâ mâkeba,

<sup>2</sup> Âdatay tynaze kurâ. Toenzepa Cristo odopâdyly kienuendily. Târâ eydâ atodâ inepa kodo iweloepa kidyse kydawyly.

<sup>3</sup> Tynwânwânse kurâ xirâ; târâ eydâ iweloem maise kodo. Kâgadopyry lelâba ise; kodope lâpylâ ise. Kydadaimpa ise kurâ-ro warâ.

<sup>4</sup> Tarâ onro anaym kodo tâlâ kydato aunloenlâ nitaymba ise. Tarâ tynaze kurâ, kodo tonhonremba awylygue, tâwâmase, tyduase warâ mawânâ. Inepa kyiguedyse kydawylygue inkâba kynadyly. Deus kodo iwelo kyam nhuduly inepa tâlâ kidyly olâ ize kydato. Aituoma ise kodo iduatyby ipa idylylâ; iwelo adaindânry maise kodo.

<sup>5</sup> Jesus kieinwântuo mawânkâ Deus turâem kyedyly, târâ kaynâ kodo iwelo tiunduhoem. Tyispiritury igonomâ, tiunduly tâkehobyry xuduze awyly kiuntuhoem.

<sup>6</sup> Deus eydâ atodâ tâitoem âdugukeoze tawyly tiuntuduo, aunlolâ xina iomaru. Tarâ onro anaym tawyly ara, Kywymâry ejidydâ iwaguema xina.

<sup>7</sup> Tarâ xirâ onro anaym tawyly ara, xina Jesus netaymba, tâinwânse olâ xina.

<sup>8</sup> Tutuze xina, iweloem âiehoze tawyly. Toenzepa wâne xina iwelo todope tâidyse awyly, Kywymâry Jesus agâ tâitoem! Koendâ lelâlâ ise xirâ xinaem.

<sup>9</sup> Adienkylygue, adâkehogue warâ Kywymâry iomazeândily olâ xina ize ato kuru, tarâ onro anaym todo iduanigue, târâ eagâ todo iwelogue alelâ.

<sup>10</sup> Idânârâ Cristo enadoram âjidâtyguyoze kurâ; aguitobyry ara ise mâkâ âdy kagâ aini awyly aguely. Idânârâ ise kienmakely, koendonro atay, inakai atay warâ, tarâ onro anaym kydawyly ume aguitobyry ara.

*Jesus Cristo wâgâ Deus eataen-hoem kidyly*

<sup>11</sup> Kywymâry Jesus âwankuem xina nietaymba. Tutuzema xina, enadoram âepanâgueze kydawyly. Awylygue wâne xina kurâdo nhurudyly, Deus ize ato lelâ aiedily nhutuhoem. Deus tutuze alâ kulâ xina âdy aniempyry awyly. Arâ lâpylâ âkealâ auguely awyly mâuntulymo.

<sup>12</sup> Arâ kâinweniduo, tâwâlâ kulâ xina âzehoguedily mâkeba augueho. Âduaymo Deus eon-honrugue adientyby wâgâ auguely, awârâ wâgâ madawihomoem, xina xunâgueni modo aguely watay, mâin-hogulymo mâuntuhoem. Xina xunâgueni modo adienkyly wâgâ tâzehogueoly kulâ ize atomo. Deus tohoguedo wâgâ nâseguâdâbyramo olâ.

<sup>13</sup> “Tyangahugoengueim mâkeba Paulo domodo” tâkezemo. Tyangahugoengueim keba kehomô wâne xina; xina nhenomedâdo olâ Deus xurâenlâ. Koendâ xina xunâgu tyangahu oday watay, âynynâmo xina âsewanihoenlâ.

<sup>14</sup> Jesus Cristo toenzepa tywynedylygue, koendâ kehoem xurâem xina âsewanily. Koendâ tutuze xina, Cristo iguewâm idânârâ xurâem. Mâkâ iguehobyry wâgâ, eagâlâ idânârâ kyguely lâpylâ waunlo ara Deus xurâem.

<sup>15</sup> Idânârâ kurâ domodoem myakâwâm mâkâ iguely. Kurâ mâkâ einwânni modo iweloem tâiehoze kurâ; eagâ tokaleoem ietybyem kurâ. Iomazeânzelâ aguidyly mâkâ ize ato. Kâmakeze mawânkâ myakâwâm iguely, kurâem itondyly warâ. Âwâlâ kulâ kydâzehoguedoem, ize kydato kulâ aguietoem warâ inkâba, mâkâ kyze awyly.

<sup>16</sup> Cristo idânârâ tywyneze awyly kiuntuduo, ânguy kiunâguedaymba kurâ, Deus ize ato modo agâ âseinwândânry modo aguehomo ara. Cristo kieinwâmpyra kydatay, âdalâ kulâ ani aguykewâdyly Jesus wâgâ, einwântânry modo agueho ara kulâ. Iwerâ olâ kurâ arâ aguykeba.

<sup>17</sup> Jesus einwânni modo iweloem ietybymoem mawânkâ. Nhangahu oday xunâry saguhobyry, anhekyly warâ adaimpyem, idânârâ kehoem iweloem ietybyem awyly.

<sup>18</sup> Deus lelâ mawânkâ iweloem kyeni. Saguhom Deus agâpa kyenipe akâwâm. Jesus kruz wâgâ iguehobyry wâgâ olâ, Deus iduerypyryem, eataen-hoem kidyly. Eagonro modo eataen-hoem itomoem lâpylâ aguykehoem adâkeze akâwâm Deus.

<sup>19</sup> Cristo iguely myakâwâm inakanhe aguitobyry xygakeze. Awylygue tâwentâgueduneba kurâ. Xirâ mawânâ unâ xina nhegatyly: Jesus mâinwântuom, Deus iweloem âetondâmo lelâ, mâkâ eataen-hoem mitomoem. Deus aguehobyry aralâ xina nhegatyly.

<sup>20</sup> Cristo ezedy wâgâ ageim xina. Deuslâ ageim, arâ xina aguehoen-ro waunlo ara, xina agueho mâindatomoem. Cristo ezedy wâgâ ageim xina awylygue, “Deus âmaemoem adienyde ato kâjimetâundâ” xina kely. “Tâwâlâ Deus âgukemo, eataen-hoem mitomoem, âmaemo saguhom eynynâbaombyry modo” xina kely.

<sup>21</sup> Cristo âdaunloenlâ Deus izepa ato kulâ aientaymba. Âdy ewentâguedo peba awyly umelâ, inakanhe aguitobyry wâgâ âsenagazedoem aiemâ Deus. Cristo iguely myakâwâm, kieinwântuo, eagâ tokalelâ kituo warâ tâwentâgueba Deus kâentoem.

## 6

<sup>1</sup> Deus emary modo xina itaumbyry egatuim; awylygue âyanmo aguezesedyly xina nimopa awyly: “Âmaemoem koendonro lelâlâ Deus; Cristo tâinwânse âmaemo-ro warâ. Aituo Deus ize ato lelâ aietaungâ, agâmo koendâ ato alâ kulâba itoem” xina kely.

<sup>2</sup> Isaiâs iweniwânmy Deus aguehobyry:

“Koendonro wawlyl kâenehondyze wato saintuo, mâenkadybymo tuduze ani urâ.

Imakehomo saintuo, imakemo’ kely Deus.”

Koendâ xutuwardaungâ. Koendonro tawlyl Deus nhenehon-ho naintai. Iweâ lelâlâ agâmo koendâ tâidyse! Iwerâlâ imakedyzemo awyly!

<sup>3</sup> Deus xurâem tâwanopyry xunâguedyze inkâba xina. Awylygue Jesus tyeinwândyde donro modo ekuâdâni adienydeba xina awyly.

<sup>4</sup> Idânârâ adienkyly wâgâ Deus emary tawlyl tânehonze xina. Awylygue toenzepa tâsenagazedyly, âdy peba tawlyl, kâmaynoem tawlyl warâ xina nhemaenly, Jesus tyeinwândyly xina nimopa olâ.

<sup>5</sup> Toenzepa tâmaenze xina tapioguly, tâtadâdyly, tudueryem ityby modo tânagazedyly warâ. Tokozely takaze kehoem tâsewanily, nykyba tawlyl, typynigueba tawlyl warâ tâmaenze xina. Arâlâ olâ Jesus Cristo einwândyly xina nimopa awyly.

<sup>6</sup> Iozeno lelâ xina anhekyly. Deus âdaunlo awyly, anhekyly, koendâ awyly warâ tutuze xina. Idânârâ tâsenagazedyly tâmaenze xina, “Kienmaemba enra kurâ” xina kepalâ. Idânârâ agâ koendâ lelâ xina. Tywynezemo tawlyl tânehonze xina. Deus Ispiritury xina agâlâ. Idânârâ awârâ modo tânehonze, Deus emary xina awyly.

<sup>7</sup> Unâ âkealonro xina nhegatyly. Deuslâ xina eon-hondâni warâ xurâem xina âsewanihoem. Deus ize ato xina anhekyly watay, âsemagueze xina tuduery modo amaymba, tâsemagueho, tâpeândo warâpe tawlylygue.

<sup>8</sup> Tâlâ xina wâgâ koendâ aguewâni modo; tâlâ lâpylâ inakanhe aguewâni modo warâ. Tâlâ xina iwykewâni modo, tâlâ lâpylâ xina ehogueni modo warâ. Tâlâ, “Konokuni akaemo” keim modo. Âkealâ olâ xina aguely.

<sup>9</sup> Tywâgâ aguenriem Cristo ingonotybylâ xina awyly xutudânry modope. Tâlâ lâpylâ olâ ingonotybylâ xina awyly xutuwâni modo. Xina âdyoze tâkeze inanry, xina nâdyopa olâ. Xina âzenagazeoly wâne, xina niguepa olâ.

<sup>10</sup> Ádatay tytywanze wâne xina; tuomareba xina nipyra olâ. Ády peba wâne xina. Xina aguely idataynrim modo Jesus nheinwântuomo olâ Deus nhuduly koendonrope tâiseimo. Ády peba lelâlâ wâne xina, Deus olâ idânârâ xina ipa ato tuzuze; aituo pylâ tydinherugueim ara lelâlâ xina awyly-ro warâ.

<sup>11</sup> Jesus einwânni Corinto donro modo, toenzepa âwynenimo wawylygue, xirá kata wâgâ ády augueho koentaymba urâ. Ádara yangahu oday unâry awyly mâuntudyzemo wato, xina ádara aieholo awyly warâ.

<sup>12</sup> Áwynedylymo xina nimowâbyra; âmaemolâ olâ xina iwynedyly imorim.

<sup>13</sup> Tâjiunwym tymery tinwyneguilyam inweniho ara âyanmo kâinwenily. Toenzepa xina âwynedylymo, arâ lâpylâ xina iwynedaungâ uguely.

*Kywymâry Jesus einwântânry modo agâ on-hoam tâiseba itaungâ*

<sup>14</sup> Jesus eynynâbaom agâ kulâ tokaleom ara tâiseba itaungâ; tapirá, kawaru agâ adatado iwykâjiby araba. Jesus einwânni, einwântânry warâ ize ato âzekiba nitaymba. Koendonro, koendâpaom agâ âzekiba nitaymba. Iajinu âzekiba nitaymba iamu agâ. Jesus xurâ, Satanás xurâ warâ âzekiba inkâba.

<sup>15</sup> Cristo, Diabu agâ nâseinwândaymba. (Diabu keho lâpylâ Satanás ezedy.) Cristo einwânni, einwântânry agâ nâseinwândaymba.

<sup>16</sup> Deus ety, xygatyby modo etyem tyetuneba. Kurâ Jesus einwânni modo Deus âdaunloenlâ iguedânry ety kurâ. Deuslâ arâ agueim:

“Iwerâ ynnonro modo agâ ise urâ;

aunlolâ ise eagâmo wawyly.

IDEusrymo ise urâ; akaemo ise ynnonro-ro warâ”

kewândymy Deus saguhoem.

<sup>17</sup> Iwenibyem lâpylâ Kywymâry Deus aguehobyry:

“Yeinwântânry modo sodokewâdaungâ,

akaemo ara inakanhe kulâ amipyra mitomoem.

Anhekylymo inakai modo kâdynanâdaundâ.

Yynynâbaom modo anhekyly mâinmolyo-ro watay,

tuomare kehoem ise;

yam modopâdylymo kâinwânwândyly.

<sup>18</sup> Unwânmo ise urâ.

Ymeombyry ise âmaemo warâ”

tâkeze Kywymâry Deus ton-honreim, warâ iwenibyem awyly Deus itaumbry awo wâgâ.

## 7

<sup>1</sup> Yataen-hodo kâinwyneguily, arâ mawânkâ Deus Kunwyn-em tawyly aguely, kurâ pylâ xurâ-ro warâ. Awylygue idânârâ Deus agâpa kyenehorim modo aedyly kyjimonre. Ize ato wâgâ lelâ kydâpaunzene; ize ato lelâ aguyjiesezone. Deus âwankuem kiempyra kine. Eyam kydâtunre, kieinwântoem.

*Paulo iomazehobyry*

<sup>2</sup> Xina tywyneze mawylymo enehonwâdaungâ. Agâmo Corintodâ tawyly ume, ânguyem xina inakai anientaymba keankâ. Ânguy Deus izepa ato anhetoem xina anienehonwâbyra keankâ. Ânguy xina nenokudaymba keankâ, idinherurumo tienmakehoem kulâ warâ.

<sup>3</sup> Idânârâ, xina mâunâguedylymo arâ uguely mâkeba. Toenze kulâ xina inwyneguily mâkeba âmaemo, tâwâlâ lelâlâ wâne âdylâ aidyly, xina iguehoem atay, xina niguepa itoem atay warâ. Ânguy kulâ, ády kulâ warâ olâ ise xina âwynedomo naimpa.

<sup>4</sup> Tâinwânse lelâlâ urâ, Cristo tâinwânse lelâlâ mawylymo. Arâ mawylymogue, ihoguedâmo urâ-ro warâ. Tuomare lelâlâ urâ âwâgâmo. Toenzepa lelâlâ wâne xina ekuâdânibe awyly, tuomareba wipyra olâ urâ.

<sup>5</sup> Xará Macedônia yan-yam saintybyem, âdalâ xina nekobyzeguewâbyra keankâ. Tâinkâ lelâba keankâ inakanhe tadawyly. Deus eynynâbaom modo xina agâ iewiâkymo. Tâdâjitoguyhodâ-ro waunlo ara keankâ xina âdutuly. Toenzepa keankâ xina eanu tuoday.

<sup>6</sup> Deus, tytyroneim modo iomazeâni olâ keankâ xina iomazeâni. Tito mawânkâ nigonodâ âydonromopyryem xará xinaram.

<sup>7</sup> Saintobyry wâgâ lelâba olâ keankâ xina iomaru, âwâgâmo xinaram nhegatyby wâgâ warâ. “Corintodâ Jesus einwânni modo womazeândâmo, eagâmo wawyly ume. Âmâ, agâ idâwâtyby modo warâ tywyneze lelâlâ akaemo. Tytynre akaemo, tuduanomo ewy inakanhe aitobyry wâgâ. ‘Aietaungâ’ myguehobyry adientysemo lelâ. Âynynâ adâkedyzemo lelâ âynynâba kulâ aguewâni modoram” kely keankâ Tito xinaram, xará saintybyem. Agueduo, urâ, yagonro modo warâ toenzepa lelâlâ xina niomaze.

<sup>8</sup> Mârâ kata saguhoem âyanmo kâingonotyby mâintainduomo, âurutomobyry wâgâ tâjityenze ani âmaemo. Arâlâ olâ, arâ âyanmo kâinwenihobyry wâgâ âdapa lelâ wawyly. Âtywânênehon-homobyry wâgâ saguhoem kâjityendâ lelâlâ wâne ilema-ro.

<sup>9</sup> Iwerâ olâ tuomare urâ, “Izepa mato adientobyry wâgâ tâjityenze xina. Xina inakanhe aitobyry xygakegâ” Deusram mygehomobyry wâgâ. Izepa ato amânhetomobyry wâgâ mâjityendylmolâ mawânkâ Deus ize ato. Awilygue mârâ kata wâgâ kâinweniduo inakanhe awidyly mâkeba keankâ âmaemoem.

<sup>10</sup> Kydâjityenduo, inakanhe aguitobyry kinmoduo warâ, Deus tygakeze mârâ inakanhe aguitobyry, nhygakehoem kienkaduo. Aituo Deus kâmakely, xurâem lelâ kitoem. Awilygue kuomazely mâkânra kydzemakeoduo. Jesus einwântânry modo olâ tâjityendylmo umelâ, Deusram inakai adienkyly timohomoem nekabyramo. Awilygue ise Deusram nâzemakeoba awylymo. Aunloenlâ ise eydâ iwague awylymo.

<sup>11</sup> Âmaemo mâjityendomobyry olâ Deus xurâem alâ kulâba. Awilygue ani inepa kehoem kata wâgâ âurutomobyry ara amidylmo. Toenzepa ani inakanhe mawylymo, inepa kehoem Deus nhygakezyde mawylymo. Toenzepa âewiâpadâmo inakanhe aini wâgâ. Âduaymo aityby wâgâ Deus inagazenehonlmo tytaze ani âmaemo. Iedyse ani âmaemo. Iozeno lelâ ani amânhedyse matomo warâ. Awâkâ uguondo murudâmo, magâikemo, menagazedâmo warâ. Idânârâ amânhetybymo wâgâ, tâwentâzeba mawylymo menehomo.

<sup>12</sup> Mâkâ inakanhe aini mâenagazedoem kulâba, inakanhe ietyby mâenmawiyadâdomoem kulâba warâ ani kâinwenily, Deus enanaym, tâwâlâ âmaemolâ toenzepa xina tywyneze, tâinwânse warâ mawylymo mâenehon-homoem olâ ani kâinwenily kuru.

<sup>13</sup> Igarymo tindatuo, toenzepa xina niomaze. Igarymo wâgâ kulelâba olâ xina iomaru, Tito, xarâ saintybyem âwâgâmo iomarugue lâpylâ warâ. Agâmo tatay mykeankâ, toenzepa eganu âwâgâmo.

<sup>14</sup> Tito Corintoam idály iraynâ, koendâ ani âwâgâmo auguely eyam. “Kata kâinweniby wâgâ kâunrutomobyry ara ise aidylmo” uguely ani eyam. Auguehobyry ara kehoem myani aidily-ro warâ. Koendâ mawânkâ medaenkumo; kata wâgâ âurutomobyry aralâ amidilmo. Idânârâ âyanmo auguehobyry âkealâ, Titoram âwâgâmo auguehobyry âkealâ lâpylâ warâ.

<sup>15</sup> Atârâ agâmo tatay, âurutomobyry koendâ lelâ mâindatomobyry, âwankuem mânhepyra matomobyry warâ tienanâgueduo âwynedâmo inanry Tito. Âwâgâmo aguely koendâ eagâ matomobyry wâgâ.

<sup>16</sup> Toenzepa kohomaendily; tutuzema urâ, auguehobyry aieniem mawylymo.

## 8

### *Tâwânrempa kehoem âdypebaom modoram tâlâ tato ewy nhuduhomobyry*

<sup>1</sup> Cristo eynynâ ypemugudo, koendâ lelâ Deus Macedônia eynynâ Jesus einwânni modo agâ, xirâ mâuntudyzemo wato.

<sup>2</sup> Toenzepa tâzenagazeozemo Jesus eynynâbaom modoram. Arâlâ olâ, toenzepa ohomaendylmo. Âdy pebaom modo xurâem imâem kehoem tâlâ tato ewy nhudulymo tâwânrempa kehoem, âdy peba tawyly umelâ.

<sup>3</sup> Tutuze urâ, tâlâ tato takaze kehoem nhudulymo, tâwâlâ ize tawylyguelâ.

<sup>4</sup> Aunlolâ ani “Toenzepa xina dinheru tiundudyse awyly Judéia eynynâ âdy pebaom modo Jesus einwânni modoram” kezesedylymo.

<sup>5</sup> “Imâemba kulâ isenra nhudulymo” xina nygewardâ. Imâem olâ ani dinheru nhudulymo. Waunroem kuru warâ aguelymo: “Kywymâry Jesus ize mato xina anhetomo amyguehobyry lelâ xina adienyde ato” kelymo. Xinaram aguelymo ani: “Amyguehobyry ise xina anhekely, awârâ mawânâ Deus xina anhedyse ato” kelymo.

<sup>6</sup> Tito awyarâ âyanmo idâypyem, dinheru mâunduyyomo emakely nagu. Ize mawylymoguelâ mâundulymo, tâwânrempa kehoem! Aituo xina aguely Titoram: “Magiÿpyne kâjimo. Eagâmo mataymo, dinheru âdypebaom modoram tiundudyse atomo emakelyem emawiyadâgâmo, iomazehomoem” xina kely.

<sup>7</sup> Koendâ lelâlâ Deus xurâem iwanumo amânhedulymo. Jesus Cristo tâinwânse lelâlâ âmaemo. Tutuze âmaemo koendâ unâ iwâkuru tâdâsemagueho egatuly, koendâ tutuze âmaemo Deus wâgâ. Tuomare âmaemo Deus xurâem mâsewanidaymo. Toenzepa lâpylâ xina mâinwynedylymo. Awilygue, koendâ Deus xurâem amânhekelymoguelâ, âdy pebaom modoram ipa atomo xuduwâtaungâ, mâundupa tâiseba itaungâ.

<sup>8</sup> Arâ kâinweniduo, âutudyzemo wawyly mâkeba. Macedônia eynynâ Jesus einwânni modo tuomare lelâ dinheru nhuduhomobyry olâ mâuntudyzemo wato. Arâ ise mâuntulymo Cristo einwânni modo agâ mâpynedomo âkealâ, âkealâba warâ awyly.

<sup>9</sup> Tutuzelâ âmaemo, Kywymâry Jesus Cristo kywyneni awyly. Târâ kaynâ tunwym agâlâ idânârâ sodoem tawyly umelâ, nhânwânmy. Uguondo âdy pebaon-em imâ tarâ onro anaym,

ará aidyly myakâwâm, toenzepa kywynedylygue. Arâ aitobyry wâgâ idânârâ koendonro modo Deus nhuduly mâenmakelymo.

<sup>10</sup> Urâ yangahu oday unâry. Koendâ tâise mârâ anu sakadyby wâgâ magüypymo mâenwanikelymo, uguely. Âmaemolâ ani âdy pebaom modoram tuduzeinhe dinheru emakely wâgâ waunroem tyangahueim. Âmaemolâ lâpylâ ani waunroem kuru xuduly sagurin-ro warâ.

<sup>11</sup> Aituo magüypymo ewanikewâdaungâ. Tuomare ani âdinherrumo ewy âdy pebaom modoem mâundulymo mangulymo. Tuomare lelâ lâpylâ dinheru eyanmo tugonoseim mâundulymo ewanikewâdaungâ, tâlâ matomo aralâ.

<sup>12</sup> Deusram âdylâ kiundudyse kurâ-ro watay, tâlâ kydato aralâ kiundudyse awyly; ipa kydato nekadaymba.

<sup>13-14</sup> “Âdy pebaom modoram âunduwâtaungâ” ugeduo; “Âdy peba itaungâ” uguely mâkeba âyanmo. Âzekiba mawlymo xina ize ato. Jerusalêmdâ Jesus einwânni modo ipa ato sanâtoem dinheru âunduwâtaungâ olâ, âdy peba mawânkâ akaemo, tâlâ âmaemo-ro warâ. Wayam âmaemo pylâ ipa mituomo, xudzuzemo lâpylâ mawânkâ. Âzekiba ise mâsemawadâdilymo.

<sup>15</sup> Warâ myakâwândy Deus itaumbry awo wâgâ iwenibyem awyly, Israelita domodo typyniry “maná” nhaunkudaymo.

“Mâkâ imâem saunkuimbyry nâsegubydâbyra akâwâm xurâem.

Mâkâ imâembalâ saunkuimbyry olâ akâwâm ipa nipyra.”

*Tito, eagâ tâwaneim modo warâ*

<sup>16</sup> “Koendonro lelâlâ âmâ, Pabai, Tito Corinto donro modo tienmawadâdize itoem amânhenhon-homyry wâgâ, xina akaemo tienmawadâdize ato ara lâpylâ” tâkeze xina.

<sup>17</sup> Corintoam idâontoem xina agueduo, “Idâze lelâ urâ” nygue. Eyam xina aguely iraynâlâ, toenzepa keankâ nhetondyzemo awyly.

<sup>18</sup> Cristo eynynâ kypemugulâ eagâ xina ingonokily lâpylâ. Tarâ Jesus einwânni modo koendâ inanry aguelymo awâkâ Tito agâ idâim wâgâ. Deus emary koendonro mawânkâ, Jesus einwântuo lelâ tâdâsemaguely awyly wâgâ agueim awylygue.

<sup>19</sup> Koendâ mawânkâ Jesus Cristo xurâem ewanu. Awylygue Jesus einwânni modo niduakemo xina agâ Jerusalêmmram idâhoem, dinheru Deus eynynonro modoram xuduyppy sase. Xina aiese awârâ, Kywymâry Jesus koendâ egaetoem, einwânni âdypebaom modo tienmawadâdize xina awyly xutuhomem lâpylâ warâ.

<sup>20</sup> Imâem ise xina dinheru nhadyly. “Turâem kulâ akaemo mârâ dinheru nhadyly” ânguy kepa itoem ise xina kulelâba xina idâly awyly.

<sup>21</sup> Kywymâry Jesus xurâem, kurâ domodo xurâem warâ iozeno lelâ xina adiendyse ato.

<sup>22</sup> Tito domodo agâ tokalâ Cristo eynynâ kypemugu ewy xina ingonodyly lâpylâ. Kywymâry ewanuem xina tienmawadâdize tawyly tânehonzelâ mawânkâ. Âwâgâmo koendâ aguehonly tydase. Âdy pebaom modoram dinheru mâundudyse mawlymo, tâinwânse. Awylygue iomaru kuru âyanmo tâtâhoem.

<sup>23</sup> Yataen-holâ awâkâ Tito; Cristo einwândyly wâgâ âyanmo aguelyem iemawadânilâ. Cristo eynynâ kypemugu modo Tito agâ idâim, tâinkâ lelâba Jesus Cristo einwânni modo eynynâ aguenriem iduakeybylâ akaemo. Akaemo ewanu wâgâ ise Kywymâry Jesus koendonro awyly âzegaeholy.

<sup>24</sup> Akaemo iduakeyby modo idâly iraynâ, “Corinto donro modo koendâ ise idankenulymo. Mâenkadybymo ise anhekylymo. Koendâ lelâ ise akaemo tydinheruru âdy pebaom modoram nhudulymo” ugue eyanmo. Awylygue, saindylymo-ro watay, auguehobyry ara lelâne aitaungâ. Arâ ise tywynezemo mawlymo nhutulymo. Tâinkâ lelâba Jesus einwânni modo tutuzemo koendâ auguehobyry awyly.

## 9

*Jesus einwânni modo Judéia eynynonro âdy pebaom modoram dinheru nhuduhomobyry*

<sup>1-2</sup> Akaemo Jerusalêmm donro âdy pebaom Jesus einwânni modoram dinheru igonodyly wâgâ toenzepa tywenize urâ. Idânârâ tutuzelâma âmaemo ize mawlymoguêlâ eyanmo dinheru mâundulymo awyly. Jesus einwânni Macedônia eynynonro modoram auguelâ: “Corinto donro modo, xidadâ iwaguepa tâtyuneim modo warâ ize tawlymoguêlâ dinheru nhudulymo, Judéia eynynonro Cristo eynynâ typemugudo xurâem. Awârâ anu sakadybylâ dinheru idâtyguely nagumo” ugue eyanmo. Arâ amânhetybymo tiuntuduo, Macedônia donro modo, aramo adâidysemo lâpylâ.

<sup>3</sup> Âwâgâmo koendâ augue: “Corinto donro modo âdy pebaom modoram tâlâ tato ewy tiundudyse, tiundudysemo lelâlâ” ugue. Awylygue udâly iraynâlâ, Tito, eagonrodo warâ kâingonodyly dinheru mâindâtyguyhomoem omazeânzemo. Yaintuo, idânârâ nhontybyem



lelá ise kâendyse wawly, âynynâmo koendâ auguehobyry ara kehoem, auguehobyry âkeá lelá itoem.

<sup>4</sup> Dinheru nhontybyemba satoen-ro watay, urâ, Macedônia donro modo ewy yagâ idâim warâ saintuo, âpybazezema xina, âpybazeze lâpylâ âmaemo-ro warâ.

<sup>5</sup> Awlylygue keankâ Cristo eynynâ kypemugudo, udâly iraynâlá, kâingonodyly, dinheru xuduypy nhondylyem imawyadâdomoem, idânârá nhontybyem itoem, amyguehobyry ara. Arâ ise idânârá nhutulymo, tuomare lelá mâundulymo awly. Ânguy keba, “Jerusalém donro âdy pebaom modoram dinheru xuduwâtaungâ” keim awly warâ. Tâwâlâ mâundulymo, ize mawlymogue.

<sup>6</sup> Xirâ enanâgüewâdaungâ: “Mâkâ imâemba etânybyry, imâembalâ nhekaunâdily. Mâkâ imâem etânybyry, imâenlá nhekaunâdily warâ.” Arâ ise Deusram kydzêholy, âkelo modo kientobyry ara.

<sup>7</sup> Waunroem wao koendâ angahumo oday xutuwwâdaungâ, âdara dinheru mâundulymo awly. Tuomare kehoem mâundulymo xuduwâtaungâ, mâundudyse mawlymoguelâ, tytyremba, ânguy “Xudugâ” keduopa warâ. Mâkâ tuomare kehoem xuduim Deus inwynguyly kuru.

<sup>8</sup> Koendonro modo xuduze lelá Deus âyanmo, âdy peba mipyra mitomoem, âdy pebaom modoram mâundulymope lelá mitomoem lâpylâ warâ.

<sup>9</sup> Warâ Deus itaumbry awo wâgâ iwenibyem awly Deus ize ato aieni modo wâgâ:

“Tâwânrempa kehoem ipaom modoram nhuduly.

Aunloenlá ise Deus koendâ aitobyry nhenanâguely;

koendonroge lâpylâ ise nhepywadyly”

warâ iwenibyem awly.

<sup>10</sup> Etâni modoram ewy xuduim mawânkâ Deus, einrim modo ipyniry xuduim warâ. Arâ lâpylâ ise tâwânrempa kehoem âyanmo nhuduly, âmaemo âdy pebaom modoram tâwânrempa kehoem mâunduhobyry ara lâpylâ. Mâkâlâ ise tâlá matomo imâem ienehoim, âdy pebaom modoram mâundulymope mitomoem.

<sup>11</sup> Imâem ise âyanmo Deus koendonro nhuduly, tâwânrempa kehoem âdy pebaom modoram mâunduhomoem lâpylâ. Awlylygue ise agui Deus wâgâ koendâ agüewâni modo awly, dinheru tuomare lelá xuduypy eyanmo xina nhakyly wâgâ.

<sup>12</sup> Âdy pebaom modoram mâunduly-ro watay, ipa atomo kulelá inkâba mâunduly, Deus wâgâ koendâ aguehomoem adyenehonze lâpylâ âmaemo.

<sup>13</sup> “Koendonro leláâ Deus, xinaram âdinherurumo ewy mâingonotybymogüe xina âzedily awlylygue” kezemo. Deus ize atolâ amânhekylymo awly tânehonze awârâ. Mâunduyypmo emakeim modo koendâ ise Deus wâgâ agüelymo. “Koendonro leláâ âmâ, Deus, Corinto donro âynynonro modo unâ Cristo einwântuo tâdâsemagüely aguehomoem, amyguehobyry anhedilymogüe. Xinaram dinheru nudumo tâwânrempa kehoem. Xinaram lelâba, âkelo anano âdypebaom modoram nudumo lâpylâ warâ” kezemo Deusram.

<sup>14</sup> Aunlolâ ise akaemo Deus agâ agüely âynynâmo, tutuzemo mawânkâ Deus koendâ agâmo awly. “Corinto donro modo agâ koendâ leláâ âmâ, xina agâ koendâ itomoem amânhenhon-homybyry wâgâ” kezemo Deusram.

<sup>15</sup> Koendonro leláâ Deus, kâmakehoem tymery ingonotobyry wâgâ. Âdakykeho peba gâlâ kurâ.

## 10

### *Jesus Cristo Paulo induakehobyry, tywâgâ aguehoem*

<sup>1</sup> “Tarâ kydá tatay, MYK alâ kulâ ani Paulo, ton-honre kehoem agüely nitaymba. Iwague tawlylygue kulâ mâkâ kata wâgâ agueze eon-honru” tâkeze âmaemobyry ewy. Aypa olâ, aypa leláâ! Koendonro, kywyneni warâ Cristo; âdakepalâ ani tynynâbaom modo agâ koendâ awly. Mâkâ ara ize wawly. Koendâ kehoem augueho idataungâ, Cristo aguehobyryenlá agüely awlylygue.

<sup>2</sup> Awarâ yaindily-ro watay, ton-honre kehoem agâmo auguedyse inkâba urâ. Tutuze olâ urâ awâtârâ: “Deus eynynâbaom modo aito ara kulâ awâkâ Paulo aidily” keim modope awly. Arâ agüewâni modo agâ olâ ton-honre kehoem agueze urâ, kewâdilymo kulâ awlylygue.

<sup>3-4</sup> Kurâ xina aramolâ. Iozepa kulâ Cristo wâgâ agüewâni modoram xina agueduo olâ, tonokuze kulâ, tyewiâse kulâ warâpa xina aguehomo in-hoguly. Pyrâgue mawânkâ sodadu tuduery agâ âseguely, myarâ lâpylâ xina Deus eon-honrugue agüely, unâ tâdâsemagüeho tiengatuday. Tyangahu oday tunârygue kulâ inkâba xina agüely, Deus eynynâbaom modo agueho ara inkâba. Sodadu tuduery modo otoendo sahodâdily nhain-ho ara lâpylâ akaemo

nhangahu oday inakanhe xunâgomo xina nhainly, Deus eon-honrugue itaumbry xina tiengatuday.

<sup>5</sup> Deus tonomery nhuduypyguelâ xina, akaemo Cristo wâgâ nhenomedâdomo iozepa awyly nhutuen-honly, tyangahu odano kulâ tâpaunzedomo awyly nhutuhomoem. Deus itaumbry xina nhegatuly, âpaunzedomo iozepaom âtuguguehoem, Cristo lelâ nheinwântomoem.

<sup>6</sup> Iwerâ, agui âmaemo ewy âurutomo tindadysedonro modo. Tâlâ âduaymo auguely tyeinwândysebaom watay olâ yaintuo, ton-honre kehoem eusemo urâ, sodadu iwymâry ton-honre kehoem tâinwântânry nheuto ara.

<sup>7</sup> Koendâ mâuntuba kulâ kurâ koendonro, inakai warâ awyly amyguelymo, mâendylimgue kulâ. Awylygue mawânkâ, “Cristo tywâgâ aguenriem aguehobry xina” keim modope awyly. Mâkâ wâgâ aguehoem aguehoymbyem akaemo watay koendâ wao nâpaunzedâmo. Iwâgâ aguehoem aguehoymby lâpylâma xina!

<sup>8</sup> Saguhoem âyanmo auguelâ, iwâgâ kângatuhoem Kywymâry Jesus ingonotybyem wawyly. Tywypazeba, mâkâ wâgâ aguenriem wawyly, augueondyly, âkealâ mawânâ. Mâkâlâ aguenriem ugononi. Âihugueândomoem inkâba mâkâ uduakely, Deus Ispiritury amânhetomoem aguehobry mâinwânsezedomoem lakuru.

<sup>9</sup> Mâseanedomoem inkâba arâ kata kâinwenily.

<sup>10</sup> Tâlâ warâ aguwâni modo: “Tinweniby modo wâgâ, ton-honre kehoem Paulo kurduly, pymâ mâkâ-ro waunlo ara, kuduay watay olâ, adâkeho ara aguepa. Agueho âdyem nipyra” tâkezemo.

<sup>11</sup> Xutuwâdaungâ xirâ: Deus izepa ato aieni modoram augueho, eydâmo iwaguepa watay, kata âyanmo kâingonokily wâgâ alelâ âzekiba auguely.

<sup>12</sup> Âwâlâ kulâ tâzehoguedyze inkâba xina, Deus emary lelâlâ tawyly xutuhomoem kulâ, mâkâ xurâ keba modo aito ara. Deus agueho ara tâise aidylymo, akaemolâ olâ âdara adâidyly awyly agueim. Tagonro agâ tâsenuagaenzemo, tataen-ho modo takaze koendâ tawyly tientomoem. Ânguy Deus emary, ânguy Deus emary keba warâ adâkezemo. Arâ adâidylygue, ânguydo kulâ tawyly tânehonzemo.

<sup>13</sup> Konokudâ akaemo, Deus tugonotobryrdâba kulâ “Mâkâlâ xina igononi” tâkeduomo. “Deus xina nigonodâ mârâ âjiam, iwâgâ xina aguehoem” xina kely watay olâ, âkealâ. Iozelâ xina koendâ adientyby wâgâ aguely, mâkâ tugonotobry ara. Âkealâ, mâkâlâ âyanmo xina aguehoem agueim.

<sup>14</sup> Iozepa kulâ xina idatânry modo wakeduo: “Corintodâ adâtobry wâgâ tuomaruneba Paulo, awâtârâ Deus itaumbry egatuho keba mawânâ” keduomo. Âyanmo udâhoem Deus âkeâ kepa watay, aguehomo âkealâ tâise. Awyarâ xina nigonodâ olâ, unâ tâdâsemagueho egatuze.

<sup>15</sup> Urâ kulelâ inkâba, Deus itaumbry egatuim modope lâpylâ. Koendâ inkâba “Urâ kulelâ Kywymâry Jesus wâgâ agueim” uguely, atâingâ aguwâni modo ara. Tuomare kehoem olâ âduaymo watay, eagonro âji modoram Deus ugonotobryrdâ warâ agânhekyly modo wâgâ auguely. Toenzepa lelâlâ Cristo wâgâ mâuntuzedylymo, mâkâ ize ato ara amisezedylymo ize wato. Xirâ âwanu mawânâ agânhetoem Deus aguehobry.

<sup>16</sup> Aituo ise âkelo anaxi xina idâly itymo anary takaze lâpylâ, Jesus Cristo einwântuo lelâ tâdâsemagueho wâgâ unâ koendonro egatuze. Xirâ unâ ânguy negatuba atobryram lelâ ise xina idâly. Arâ ise koendâ kuru xina iomaru adientyby wâgâ, âkelomo aitobry wâgâ kulâba.

<sup>17</sup> Warâ myakâwândy Deus itaumbry awo wâgâ iwenibyem awyly: “Tadawidyse donro watay, Kywymâry Deus anhekyly wâgâ lelâ nadawi.”

<sup>18</sup> Tywâgâ agueim, tywâgâ kulâ koendâ agueduo, agueho âdyem nitaymba. Jesuslâ iwâgâ koendâ agueduo lelâ âkealâ awyly xutuly.

## 11

*Corinto donro modo iozepa enomedâni modoram âzenokuohobry*

<sup>1</sup> Xirâ ywâgâ augueho âdiempa emawânâdaungâ wao, tuândy ara kulâ agueday. Cristo wâgâ iozepa kulâ egatuim aguehomo mâenmaen-homo ara; agueho emawânâdaungâ lâpylâ wao.

<sup>2</sup> Toenzepa âwâgâmo kâseguâdâdyly, Deus âwâgâmo âseguâdâdo ara lâpylâ, iozeno keba kulâ amânhedilymo wâgâ. Âwynsaundo tunizenry tokalâ uguondoam lelâ nhunwym nhegamely, iwydyem itoem, idânâra uguondo modoram inkâba. Arâ lâpylâ Cristo lelâ mâinwândysemu wawyly.

<sup>3</sup>Akaemo iozepa enomedâni modo aguehobyry einwânnipyryem âmaemo watay olâ, Cristo iomazeândyly imoimbryryem keanra âmaemo. Satanás, âgâuem itybyem, Eva enokumâmy, myara lâpylâ keanra akaemoam mâzenokuolyo. Awârâ koendâpa yeni-ro warâ.

<sup>4</sup>Jesus Cristo wâgâ âyanmo tâgatuzelâ ani xina. Xina aguehobyry meinwândâmo, Jesus meinwândâmo, Deus Ispiritury âyanmo nâedâ-ro warâ. Iwerâ olâ iozepa kulâ Jesus wâgâ aguwâni modo aguely mâindakylymo. Tuomare kehoem âmaemo, unâ iozepaom kulâ idase, Satanás eynonro modo ârudylymo idase. Deus Ispirituryamba mâduruholyo. Toenzepa awârâ iekuâdâdyly.

<sup>5</sup>Iozepa inomedâni modo aguely kulâ mâindakylymo. Ienanaji, yakabyra olâ akaemo kâuntuly “Unâ egatuly tutuze kehoem egatuim” keho modo.

<sup>6</sup>“Tonomegueim agueho araba kulâ Paulo aguely” tâkezemo. Âkea lelâlâ keanra, koendâ kehoem auguepa lelâlâ wâne keanra urâ, Cristo wâgâ augueday. Koendâ Deus wâgâ tutuze olâ urâ, Jesus einwândylygue tâdâsemaguely wâgâ warâ. Awârâ âkealâ awyly, tutuze âmaemo, Corintodâ awitobyry, inomedâdomobyry mâenanâgueduoma.

<sup>7</sup>Unâ iwâkuru tâdâsemagueho âyanmo segatu, “Iepywadangâ” uguepalâ. Iewanopyryguelâ ani kâzedyly; uguondo tynrenseim anhetânry modo adyese ani urâ. Arâ awidyly ani, Deusram mâzehogueohomoem. Iozepa kulâ awidyly awyly adâkeze keanra âmaemo. Iozelâ olâ ani awidyly! Kaikâem widâ, koendâ amyguehon-homoem.

<sup>8</sup>Âduaymo unâ tâdâsemagueho kâengatuday, âkelo Jesus einwânni modo ani dinheru igononi kâzetoem. Tâmakeze lelâ ani urâ, âyanmo âdy kâenkabyra witoem. Akaemo âzeto ewy ani kâentyly, âmaemo mâzetoem ewy kâentyba witoem.

<sup>9</sup>Agâmo wawyly ume, âdy peba wituwo, âdy âyanmo kâenkadaymba ani urâ, ikuâdâbyramo witoem. Cristo eynynâ kypemugudo Macedônia eynynâba âetyby modo olâ ani idânâra ipa wato modo tase. Âyanmo dinheru kâenkadyzeba ani urâ; kâenkabyra ise urâ-ro warâ.

<sup>10</sup>Cristo xurâ wawylygue, augueho âkealâ awyly lâpylâ, Cristo agueho âkealâ awyly ara. Toenzepa inanry womaru, unâ iwâkuru tâdâsemagueho âyanmo kâengatuly tâbyguepalâ awylygue. Acaia einkâ udâday, tâpywazeba kulâ Deus itaumbryry kâengatuba witoem ânguy anienehonwâbyra ise.

<sup>11</sup>Tâlâ âduaymo wakeim: “Paulo kydinheruru tienmakedyzeba awyly, kywynebyra tawylygue” keim. Arâpa olâ! Âwynedâmo wawyly, tutuze Deus.

<sup>12</sup>Âdy yam mâunduhoem kâenkabyra gâlâ ise urâ warâ, iozepaom egatuwâni modo wâneam inomedâdomobyry epyryem dinheru nhekazedylymo myara. Iepywadomoem auguely-ro watay, “Paulo emyenrolâ xina. Inomedâdomobyry epyryem dinheru tâkaze lâpylâ mawânkâ mâkâ” tâkezemo lâpylâ tâise.

<sup>13</sup>“Cristoram aguehoymbyem xina, iwâgâ aguehoem” tâkezemo wâne, konokuze kulâ olâ aguelymo. “Mâkâ xurâenlâ xina aidyly” tâkezemo. Cristo emary aramo, koendonro aramo warâ wâne, tydani modo enokuze; konokuni kulâ lelâlâ olâ akaemo. Unâ Cristo wâgâ agueim nhegatuhoem aguehoymbyem inkâba akaemo!

<sup>14</sup>Koendonro aramo wâne, koendonro kebamo olâ. Tutuzenry keba olâ awârâ. Satanás, anju ara tohozele kehoem, Deus ingonotyby ara kehoem, tâepanâgueze, konokuze, arâ lâpylâ turâ modo tydani modo warâ nhenokudyly.

<sup>15</sup>Satanás arâ konokudâ-ro watay, emary modo koendonro ara tâise lâpylâ konokudoem. Deus olâ enagazenehonzemo, inakai anhetomobyry aralâ.

#### *Paulo âsenagazedobyry*

<sup>16</sup>Ywâgâ aguehobyrylâ ise augueonto. Ânguy tuândy ara iepyra nidâ. Tuândy ara lelâlâ wâne iedylymo, arâlâ olâ auguely idataungâ, yagâ aityby âyanmo kâengatuhoem, Cristo emary wawylygue.

<sup>17</sup>Koendonro agânhetyby wâgâ augueduo, tuândy ara kulâ auguely, tuândy mawânkâ âwâlâ kulâ âzehogueni. Kywymâry Jesus auguedyse ato araba agueho-ro warâ.

<sup>18</sup>Tâlâ mawânkâ âwâlâ kulâ âzehogueni modo, tywâgâ koendâ aguehonly kulâ ize ato wanlo modo. Awylygue alâpylâ ywâgâlâ kâinwenily, yagâ aityamby modo wâgâ kâzehoguedyly warâ.

<sup>19</sup>Tonomegue wâne mâdutulylymo. Arâlâ olâ, tuomare kehoem akaemo âdy xutudânry modo agueho mâinwantaguedylymo.

<sup>20</sup>“Deus ingonotyby xina” kewâni modo agueho tâmaenze âmaemo. Aguehomo mâinwântomoem adâkezemo. Âsejiguyimo tâmakezemo, turâem tientomoem. Inokudomo tâmaenze âmaemo, âdara myguepamolâ. Akadâmo kehoem âdutulylymo. Âwankuem âetâmo. Âwapagaindâmo. Arâ mâzeholyo umelâ, izepamo mipyra olâ âmaemo!

<sup>21</sup>Tuomare urâ, arâ aepyramo xina awylygue. Tywypaze tâise xina, akaemo inagazedomo ara inagazezemo.

Koendonro adienkyly wâgâ agueze ton-honreimbe-ro watay, tâegane lâpylâ urâ, Deus ewanuem koendâ awidyly wâgâ agueze, tuândy tâwâlâ âzehoguedo ara.

<sup>22</sup> “Hebreu xina, âkelo iunu lâpeba” kelymo; hebreu lâpylâ urâ. “Israel iweompyry xina” tâkezemo. Mâkâ iwerypyry lâpylâ urâ. “Abraão iweompyry xina” tâkezemo. Mâkâ iweompyry lâpylâ urâ.

<sup>23</sup> “Cristo emaryem âsewanirim xina” tâkezemo. Mâkâ emary lâpylâ urâ, akaemo takaze olâ koendâ wawyly. (Arâ augueduo, tuândy ara kuru auguely.)

Akaemo takaze tâsewanize lâpylâ urâ. Cristo wâgâ auguelygue ani akaemo takaze kâzetadãozezedily. Toenzepa tadapioguoze urâ, tokalâ kulâ inkâba. Toenzepa lâpylâ iguezeesaijî tâise urâ.

<sup>24</sup> Ypemugudo judeu domodo agui yapiogudâmo. Cinco vezes, trinta e nove ykarydâ kadapioguoly, judeu domodo ezewenry ara.

<sup>25</sup> Romano domodo segue yapiogudâmo lâpylâ azagâ tokalâ warâ. Tuhugue tadamytâoze urâ, yâdyse tawlymogue. Azagâ tokalâ warâ kehoem pepi imâsedo ioday wato tytyze urâ. Azagâ tokalâ ieto wâgâ ani pepi iotagâ kehoem atuly; tokalâ iguandyly, tokalâ emedyly warâ ani paikay ywâru.

<sup>26</sup> Cristo wâgâ egatuze udâzesedily ume, kâmaynoem lelâlâ ani urâ. Paru toenzepa tahugâneim tâkuezagâze urâ. Tâmagazeim modo idâwanry oze yakaday, yawâtâmo, utoguydâmo warâ. Judeu domodo, ypemugudo, yâze tâkezemo; judeu keba modo ewy yâze tâkezemo lâpylâ. Xidadâ oday, poji anaym, parutabâ ikay warâ kâmaynoem ani urâ. Kâmaynoem lâpylâ ani urâ, “Cristo eynynâ âpemugulâ urâ” keim modo agâ, Cristo einwânni modo kebamô olâ.

<sup>27</sup> Âwanu ton-honreim lelâlâ ani agânhekyly, kokozeâni kehoem. Âdatay koendâ ykyba tâise urâ. Âdatay ani âdy kâinly peba, âdy kâenly peba, toenzepa igâwynu ume âtâ kânhekyly peba tâise urâ warâ.

<sup>28</sup> Awârâ modo takaze kehoem, kopaelâgâembaba Jesus Cristo einwânni modo wâgâ iekuâgu. Tâinwânsezemolâ wânkâ, Deus ize ato adyeseamolâ kely inantry kâpaunzedo; ykary wâgâ tâmânreimbe-ro waunlo ara inantry xirâ kâpaunzedily.

<sup>29</sup> Ton-honreba kulâ Jesus einwânnipe-ro watay, iwâgâmo tâjityenze winase ton-hondâzemo warâ. Cristo eynynâ typemugu Deus izepa ato anhetoem aienehoimbe-ro watay olâ inantry toenzepa kehoem kadahulily.

<sup>30</sup> Ywâgâlâ auguedydonro mâkeba urâ, ywâgâlâ auguely inanajimo watay olâ. Tâwâlâ kâsemaguehoem ton-honremba watobyry wâgâ ise auguely.

<sup>31</sup> Uguewâdyly kulâ keba awyly, tutuze Deus. Deus lelâlâ mâkâ, Kywymâry Jesus Cristo nhunwym, iDeusry warâ. Aunlolâ koendonroem awyly wâgâ aguykely kinmopa kine.

<sup>32</sup> Damascodâ wawyly ume, Pymâ Areta pymâem induakeyby sodadu domodo xidadâ odaji tâdâwânto nhuan-huhoem adâkeze ani, iegasedaylâ yawâtomoem wâne.

<sup>33</sup> Yataen-ho modo olâ ani cestu imâsedo odaji ietadâdâmo. Xidadâ sahodâdo ewy tuhu etyhoobyry oze ani mârâ oday ienâtâguylymo. Warâ ani mâkâ pymâ yâze kerim amaymba kâsemagueuly.

## 12

### *Paulo enu oday âtygadobyry*

<sup>1</sup> Ywâgâ auguelylâ wao mynra koendonro, tywâgâ aguenriem Cristo ingonotyby wawyly kâenehoem, ywâgâ koendâ auguedyseba wawyly umelâ. Iwerâ kâengatuly ise uguondo enu oday âtygadyby wâgâ, Kywymâry Jesus eyam nhutuen-hoymby wâgâ warâ.

<sup>2</sup> Mâkâ uguondo, Jesus einwânni mâkâ. Mâkâ aitobyry tutuze urâ. Awârâ wâgâ âyanmo kâengatuly-ro warâ. Katorze anupe mârâ aitobyry. Deus âji kaynonroam nhadyly eydâ tatoam. Kâuntuba urâ, âdara nhatobyry, egadopyry atay, mâkâ lelâlâ atay warâ awyly. Deus lelâ âdy aityby xutuim kuru.

<sup>3-4</sup> Augueondily. BAUK alelâ myani mâkâ uguondo adaholy âji koendonroam, Deus ety anary, Paraisoram. Âdara aitobyry kâuntuba urâ. Egadopyry lelâ keanra ani idâim, mâkâ lelâlâ keanra idâim warâ, kâuntuba urâ; Deus lelâ xutuim. Târâ awyly ume myani tâjitanru ânguy agueho keba kehoem indadyly.

<sup>5</sup> Tuomare kehoem ise mâkâ uguondo agâ aityby wâgâ auguely. Mâkâ uguondo Deus ezaxi satybylâ urâ uguempa wawyly, tâwâlâ kulâ ywâgâ auguedyseba wawylygue. Âdaunlo kurâ aralâ ton-honremba wawyly enehoim wâgâ lelâ ise auguely.

<sup>6</sup> Tâwâlâ kâzehoguedily watay, tuândyem wawyly mâkeba tâise, âkealâma tâise auguely awitobyry wâgâ. Tâwâlâ kulâ kâzehoguedily izepa olâ urâ. Agânhetyby wâgâ, auguehobyry wâgâ warâ mawânâ ywâgâ koendâ aguehonly ize wawyly, ienu oday âtygadobyry wâgâpa.

<sup>7</sup>Toenzepa iwâkuru modo kâentobyry, kâindatobyry wâgâ warâ, yagonrodo takaze kehoem koendonroem kâdutuly wipyra witoem, tâwâmase ani urâ, tyguyreimpe unru oday-ro waunlo ara kehoem ani kâpyneândyly. Xirâ kâsenagazedo Satanás emary âeni yapioguze-ro waunlo ara, kâzehoguebyra witoem.

<sup>8</sup>Azagâ tokalâ warâ Kywymâry Jesusram tâkaze urâ, xirâ nhetyhoem.

<sup>9</sup>Warâ olâ ani Kywymâry Jesus aguely: “Kâentyba ise urâ. Agâ koendâ olâ ise urâ. Mâsenagazedyly mâenmaen-hoem on-honru xuduze urâ. Awârâ lelâ ise tâlâ mato. Ton-honreba mâdutuly-ro watay, agâlâ ise urâ on-hondâze” kely.

Awlygye tuomare auguely ton-honremba wawyly wâgâ. Arâ ise idânârâ nhutuly, Cristo xurâem awidyly, yagâlâ awlygye, won-hondâdâ awlygye warâ.

<sup>10</sup>Tuomare olâ urâ Cristo xurâem wawylygye, won-honrugue âdylâ aiese ton-honremba wawyly umelâ. Iwâgâ âwankuem yedylymo umelâ; kâmaynoem wawyly umelâ; Jesus einwânni wawylygye kâzenagazeoly umelâ, toenzepa iekuâdâni modope awlyly umelâ, tuomareba wipyra olâ urâ, Cristo aguehobyry aiese. Ton-honreba wituo lakuru, Cristo eon-honrugue kozohondâdily.

### *Corinto domodo wâgâ Paulo âseguâdâdobyry*

<sup>11</sup>Tuândy ara auguely, ywâgâlâ koendâ augueduo. Âmaemolâ olâ arâ auguehoem aienehoin. Ywâgâ koendâ amyguelymo-ro watay, ywâgâ auguewâpyra tâise keankâ urâ, uduery modo “Cristo ingonotyby keba mâkâ Paulo” keduomo. “Cristolâ xina iwâgâ aguehoem agueim” kewâni modolâ mâen-hogueguelymo. Yakabyra olâ akaemo! Akaemo Deus xurâem anhekyly, adyese lâpylâ urâ, akaemo anhekyly takaze olâ agânhedyly.

<sup>12</sup>Agâmo wawyly ume Deus eon-honru enehoin, adyese ani urâ. Ânguy anhetânry adyese ani urâ. Kurâ domodo adawihoeom aieni modo adyese ani urâ. Deus eon-honrugue adyeseim lelâ omazeânehoimmo adyese ani urâ. Awârâ modolâ Cristo itaumbry egatuze igonotyby wawyly xutuen-hoim. Toenzepa tâpyneânzelâ ani kâsewanizezedily.

<sup>13</sup>Âkelo xidadâdâ Jesus einwânni modoem agânhetyby, adyese lâpylâ urâ âmaemoem. Cristo wâgâ kâengatuhobyry iepywadomoem âdaunloenlâ kâenkabyra olâ urâ atârâ Corintodâ. Âyanmo “Iepywadaungâ” uguepa watobyry wâgâ yagâ tyewiâse âmaemo watay, enanânehonwâdaungâ wao.

<sup>14</sup>Azagâ lelâ âyanmo IU ise tâtâze urâ, udâontoem on-hondybyem urâ-ro warâ. Yaintuo, âdinherurumo ewy kâenkadayma ise urâ. Ywynedylymo, yataen-hoem mawlylymo warâ agâmo ize wato, âsejiguyumo mâkeba. Tâjiunwym mawânkâ tymery tienamanâdoem xuani, tâjimery keba tunwym xuani. Unwânmoem kâdutuly; ietomoem kâenkadyze inkâba urâ.

<sup>15</sup>Âyanmo udâly-ro watay, tuomare kehoem ise dinheru tâlâ wato kainly, nhetomoem. Âsewanize lâpylâ urâ, inomedâdomoem, imâem Jesus wâgâ mâuntuhomoem warâ. Toenzepa âwynedomobyry mâendilymo umelâka âdiempa kulâ ywynedylymo?

<sup>16</sup>“Âkealâ, Paulo kagâ tatay, tâzetoem dinheru nekadaymba” keze âmaemo. Tâlâ olâ ise warâ aguewâni modo: “Konokudyly xutuim olâ awâkâ. Jerusalém donro âdy pebaom modo xurâem dinheru tienmakeday, turâem kulâ aidily” keimpe ise. Arâpa olâ.

<sup>17</sup>Tutuzelâ âmaemo, âdaunloenlâ inokubyramo wawyly. Uguondo modo âyanmo xigonodâ, Jerusalémâ âdy pebaom modoram dinheru mâundudyse matomo emakerin-em. Âdykâ gâlâ mârâ dinheru ewy urâem kâentyba urâ.

<sup>18</sup>Tito âyanmo idâhoem augue. Cristo eynynâ kypemugu eagâ xigonodâ. Tutuzelâ âmaemo, âdaunloenlâ inokubyramo awlylymo lâpylâ. Urâ, Tito warâ âzekiba xina koendâ aidily, agâmo tawyly ume. Âzekiba lâpylâ ani xina inokudyzebamo awlyly.

<sup>19</sup>Xirâ kata mâintainlymo watay, wakeze âmaemo: “Paulo kyam niweni, tuduery modo aguelygye tâsemaguehoem kulâ” myguelymo. Arâpa olâ. Deus tutuze tarâ kâinwenily âdy awlyly. Cristo kâinwenihoem aguehobyrylâ kâinwenily. Idânârâ tarâ kâinwenily, imâem Jesus mâinwânsezedomoem.

<sup>20</sup>Toenzepa âwâgâmo yakalagu. Âyanmo yaintuo, ize wato araba kulâ keanra ise nhedylymo. Inudâbamo kulâ lâpylâ keanra ise augueho, agâmo agânhedyly warâ. Tâlâ keanra tuduekeim modo, tâdâtyzedily keim modo, iewiâpani modo, turâem lelâ warâ izetonro modo, tâdâseudyly keim modo, tâdâtunâguedily keim modo, sawoem ini modo, tadaladâdily keim modo warâ. Awârâ modo kâendily mawânârâ kâyntaguly, yaintuo.

<sup>21</sup>Tâlâ âduaymo inakai aieniem sahozeyby modo. Eagâ tohogûin-hobyry keba kulâ xynanâdily nimopa. Inakai modo, kywypado modo kehoem anhekylymo. Deus izepa ato adiendilygye âjityendânry, adiendily timodyzebamo-ro warâ. Yaintuo, toenzepa âjityenze urâ Cristo nheinwântoem agânhenehomyby modo arâ adâidylymo nimopa awlyly kâentuo, toenzepa âpybazeze urâ Deus enado.

## 13

*Tâdâturudo xypyry, tâdâsedaenguho-ro warâ*

<sup>1</sup> Azagâ tokalâ warâ âyanmo udâly idyly ise. Deus izepa ato aieni modo agâ ton-honre kehoem agueze urâ. Arâ auguely olâ ise, azagâ, azagâ tokalâ warâ inakanhe aitomobyry wâgâ agueimpe-ro watay lelâ. Arâ mawânâ Deus itaumbry awo wâgâ iwenibyem awyly: “Tokalâ kulâ inakanhe aitomobyry wâgâ agueim watay, âkealâ awyly tâinwântuneba. Azagâ, azagâ tokalâ warâ egatuin-ro watay lelâ einwândyly” kely.

<sup>2</sup> Agâmo wawyly ume, Deus izepa ato aieni modo adâidyly inmohomoem xurudâmo. Akaemo ewy inakanhe tawyly nimopa kely xidâdâ olâ. Ton-honre kehoem eagâmo agueonse urâ. Tâlâ pylâ kâxiguebygueduo Deus neinwâmpyra ityby modo.

<sup>3</sup> Wawylygue ise, udâondyly-ro watay, ton-honre kehoem auguely idânââ Deus aguely sakani modoram.

<sup>4</sup> Udâduo, inakanhe aini modo ton-honre kâenagazenehonduo, xutuze âmaemo Cristolâ auguehoem agueim awyly. Ton-honreba nitaymba Cristo. Âduaymo ton-honru enehonze mâkâ-ro warâ, inakanhe adâidyly imodânry modo kâenagazeduo.

<sup>5</sup> Âkealâ, kruz wâgâ sakâjjiday, ton-honremba myakâwâm, karalâ. Deus eon-honrugue olâ myakâwâm, kurâem itondyly, âdaunloenlâ nigueompyra tâitoem. Alâpylâ urâ ton-honreim keba lâpylâ. Arâlâ olâ, Cristo agâ tokaleom ara wawylygue, Deus eon-honrugue, ârudylymo imâem mâinwântomoem.

<sup>6</sup> Tâwâlâ adapâiguwâdaungâ, “Cristo tâinwânse lelâlâ wânkâ urâ? ‘Tâinwânse urâ’ uguely kulâ?” kewâtaungâ tâwâlâ. Cristo xurâ lelâlâ mawylymo xutuwâdaungâ. Jesus Cristo Tyispiritury nigonodâ odaximo âxidâze. Awylygue ise Cristo xurâem lelâlâ mawylymo aguely. Cristo xurâ mawylymo, xutuze âmaemo.

<sup>7</sup> Arâ lâpylâ Jesus Cristo xina agâlâ awyly, emary xina awyly warâ mâuntulymo ize wawyly.

<sup>8</sup> Aunlolâ Deusram xina nhekadyly âmaemoem, izepa ato amânhepyra mitomoem. Arâ xina nhekadyly, koendonro amânhesezedylymo ize xina awylygue, âduaymo Deus ewanuem adientyby wâgâ koendâ adâkehon-hoem kulâ inkâba. Deus izepa ato aiedyly mâinmolylo watay ise âyanmo ton-honre auguepa wawyly, yaintuo. Arâ-ro watay ise uduery modo aguelymo: “Tywâgâ aguenriem Cristo aguehobyry mâkeba awâkâ Paulo, Corinto donro modo duay ton-honru nenehomba mawânkâ. Koendâ tâwanu anientaymba” kelymo. Aguelymo umelâ Deus ize ato amânhedilylo olâ ize wato.

<sup>9</sup> Jesulâ tywâgâ aguenriem ugononi awylygue, konokuni kulâ agânhetaymba urâ. Iozeno lelâ agânhekely. Âwâlâ kulâ imâem yenehoim agânhetaymba urâ.

<sup>10</sup> Tuomare ise urâ, toenzepa Cristo mâinwândylymo, ize ato amânhedilylo warâ, myguehonlymo kâindatuo. Awylygue ise pymâ tyewiâseim ara awipyra wawyly, yaimpygueduolâ ton-honre agâmo auguepa watobyry wâgâ, uduery modo koendâpa awidyly wâgâ kywypadoem, ton-honrenryem warâ wawyly aguezemo. Awârâ modo wâgâ kulâ kâtynanâbyra olâ ise urâ. Awylygue aunlolâ warâ auguely Deusram: “Corinto donro modo koendâ iekâ, idânââ adienkely wâgâ, adâkeho wâgâ warâ nheinwântomoem” uguely inary.

<sup>11</sup> Awyarâ udâly iraynâlâ, xirâ kata kâingonodyly, âduanoem Deus izepa ato aieni modo xina saindyly iraynâlâ, inakai aiedyly inmohomoem. Idânââ xirâ âurutomo koendâ mâindadylymo-ro watay, udâduo, Kywymâry Jesus Cristo eon-honrugue inagazedaymbamo ise urâ. Jesus won-honru nhuduly ani igamanâdomoem, âtywanâdomoemba. Itâni emyenro xina, sakalagueim emyenro keba.

<sup>12</sup> Cristo eynynâ ypemugudo, kâsedaenguly ise xirâ. Deus amidysemo ato ara amidylymo etaungâ. Âurutomobyry koendâ inwantaguedaungâ. Tokalelâ angahumo oday âunârymo nidâ. Tâjihoguzeba, tâtuebazeba warâ itaungâ. Arâ-ro watay, Deus toenzepa kywyneni, tâkuâgueba kyeni warâ aunlolâ ise agâmo awyly.

<sup>13</sup> Âwaparymodâ tohonuguze âsedaenguwâdaungâ, Cristo eynynâ âjipemugüem mawylymo mânehon-homoem\*.

Idânââ Deus eynynonro modo idaenkulylo lâpylâ.

<sup>14</sup> Kywymâry Jesus Cristo koendâ nhetomoem, Deus âwynedâmo tawyly nhenehon-hoem, Deus Ispiritury agâmolâ itoem warâ kâenkadyly.

Alâ kulâ ise âyanmo kâinwenily.

Paulo

\* 13:12 Saguhoem Jesus einwânni modo tohonuguze âsedaengulylo. Iwerâma tâpymogoynze kydâsedaenguly.

## GÁLATAS

### Paulo Kata Inweniby Galácia Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Jesus Cristo wâgâ aguehoem iduakeyby mâkâ. Aituo Galácia eynynâ Jesus einwânni modoram inwenily. Galácia donro modo judeu keba myakâwândy akaemo. Tiuntudyze atomo kuru olâ “Judeu domodo satâhogue tatâzeka kurâ, kydâsemaguehoem?” kelymo. Awârâ aguely wâgâ Paulo tin-hoguhu kata iweniwânmy. Capítulo 2.16dâ, “Kieinwântuo lelâ Cristo kâmakely, aguienkyly, aguietânry warâ wâgâ inkâba” kely.

#### *Aguely adaguho*

<sup>1</sup> Urâ Paulo, xirâ kata âyanmo iweninri. Jesus wâgâ aguenriem aguehoymby urâ. Jesus Cristolâ, Kunwym Deuslâ warâ uduakeim. Jesus igueypyem awyly ume kurâem ietonibyry mâkâ Deus. Ânguy kulâ arâ aguehoem yam aguewâpyra, âdaunlo kurâ kulâ tugonotuneba ani warâ, xirâ unâ wâgâ aguenriem witoem yam agueze.

<sup>2</sup> Idânârâ Cristo eynynâ kypemugudo tarâ yagonro modo, âmaemo Galácia eynynonro modo Deus turâem induakewâdyby nhedaenkulymo lâpylâ.

<sup>3</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânimo peba itoem warâ.

<sup>4</sup> Inakanhe aguitobyry xygakezelâ myakâwâm Jesus Cristo iguely, xirâ anaym Satanâs amaymba kâmakehoem, Deus ize ato agâ âseinwândânry modo aguiempyry kitoem warâ. Tâwâlâ myakâwâm Jesus âtuly, kâmakehoem. Kunwym Deus ize ato aralâ myakâwâm aidyly.

<sup>5</sup> Aunloenlâ Deus ehoguedyly ize wato. Âkeâ lelâlâ xirâ. Alâ-ro warâ.

#### *Eagonro tâdâsemagueho lâpeba*

<sup>6</sup> Kâinwâmpyry aze, Jesus wâgâ unâ iozeno einwânnipyryem, inepa kehoem einwândyly mâinmolymo, turâem âgâsenimobyry Deus agâba midylymo warâ! Koendâ Jesus agâmo awyly ume, eagonro unâ tâdâsemagueho kulâ mâinwânkulymo. Iozepa kulâ amidylymo!

<sup>7</sup> “Eagonro tâdâsemagueho” uguely, âdy eagonro tâdâsemagueho lâpeba olâ. Jesus kieinwântuo lelâ kydâsemagueuly. Tâlâ olâ xirâ unâ tâdâsemagueho xugukeze kewâni modo. Toenzepa konokuni modo akaladâdylymo.

<sup>8</sup> Awâtârâ agâmo tawyly ume, “Jesus mâinwântuomolelâ ise Jesus imakelymo” xina kepa nipyra ani. Unâ âyanmo xina nhegatuyby âkeloem ânguylâ nhegatuly watay olâ mâkâ egatuimbyry peto nhântânry onwanji ise adameoly, tâwâlâ wâne ise xinabyry ewy awyly, anju Deus ezayba âeni awyly warâ.

<sup>9</sup> Âyanmo augue, augueondyly xirâ: Unâ âyanmo xina nhegatuyby âkeloem ânguylâ nhegatuly watay olâ mâkâ egatuimbyry peto nhântânry onwanji ise adameoly.

<sup>10</sup> Arâ auguely, kurâ domodo nhehoguedoem inkâba. Deus auguely nhehoguedyly ize wato. Kurâ domodo ywynedoem inkâba auguely. Kurâ domodo nhehoguedoem auguely-ro watay, Cristo emaryem witaymba tâise urâ.

#### *Cristo xunâry egaturin-em aguehoymbyem tawyly Paulo nhegatuhoibyry*

<sup>11</sup> Cristo eynynâ ypemugudo, mâuntudyzemo urâ, xirâ unâ iwâkuru tâdâsemagueho kâengatyby, kurâdo nhugutyby kulâ keba awyly; yangahu odano keba, agaityom modo nhegatuyby keba warâ xirâ.

<sup>12</sup> Jesus Cristolâ xirâ unâ xutuen-honri waunroem kuru yam. Ânguy yam aguewâpyra tâdâsemagueho wâgâ, ienomedâbyra warâ, Jesus Cristolâ ienomedâni.

<sup>13</sup> Tutuzelâ âmaemo, Jesus kâinwândyly iraynâ âdaunlopyry wawyly. Ydamudo, judeu domodo ezewenry kâinwândyly ume, âdy agânhesezeguyly awyly egary, tydaselâ ani âmaemo. Jesus einwânni modo toenzepa kâenagazedyly. Akaemo kâintyembyra wawyly warâ. Idânârâ ani kâyândysemowawyly.

<sup>14</sup> Ydamudo ezewenry agueho ara kulâ kâinane awidyly. Tâsenomedâze lelâlâ ani urâ, judeu domodo ezewenryem iwenibygue. Koendâ kehoem kâinane xina ezewenry iweniby kâuntuly; yataen-ho modo ydadiry agâ âzekibaom modo yara kehoem nhutulymo nitaymbamo kâinane. Toenzepa kâinane ydamudo ezewenry ize wawyly. Âdaunloenlâ kâinmodyze inkâba winane.

<sup>15</sup> Yagâ koendâ tawyly enehonwâm olâ Deus. Yazely iraynâlâ myakâwândy uduakely, emaryem witoem.

<sup>16</sup> Kâuntudyze ani Deus, tymery Jesus Cristolâ kâmakeze tingonotyby awyly. Jesus yam âpanâguely iraynâ, kâuntuwâbyra kâinane urâ, mâkâ kâmakerim awyly. Deuslâ awârâ modo

yam xutuen-hoim, judeu keba modoram Jesus wâgâ kêangatuhoem. Kâmakerim kehobyry Jesus awily kâuntuduo, ânguyram augewâpyra wakyre urutoem.

<sup>17</sup> Jerusalémram udâpa lâpylâ ani urâ, Jesus tywâgâ aguenriem induakewâdyby modo agâ agueze. Arâbia yan-yam lelâ ani udâly. Iweâpa wipyrâlâ ani Damascoram kodopâdyly.

<sup>18</sup> Azagâ tokalâ anu Jesus einwânniem wipygueduo ani Pedroram udâly urutoem, Jerusalémram. Azagâ semana ani eagâ wawily.

<sup>19</sup> Jesus tywâgâ aguenriem induakeyby modoma ani urâ kêempyry; eagâmo auguepa gâlâ warâ ani urâ. Tiago agâ lelâ ani auguely, Kywymâry Jesus iukono agâ.

<sup>20</sup> Uguewâdyly kulâ mâkeba xirâ kâinwenily; Deus tutuze âkeâ lelâlâ awily.

<sup>21</sup> Jerusalém donropyryem, Síria yan-yam, Cilícia yan-yam warâ ani udâly.

<sup>22</sup> Jesus einwânni modo Judéia eynnonro modo iepyramo gâlâ ani warâ, mârâ anaxi, mârâ anaxi warâ mawânâni ani udâly âkelo âji yan-yam.

<sup>23</sup> Iegary lelâ myani akaemo indakily: “Mâkâ kânagazenibyry Jesus kieinwântuo lelâ kydâsemaguely kely wâgâ mâkâ aguely iwerâ. Iweâma mâkâ tâinwânse, saguhoem sainze tâkehobyry” kelymo.

<sup>24</sup> Iegary tindatuo, Judéia donro modo aguelymo: “Pabai, koendonro lelâlâ âmâ, kânagazenibyry Jesus nheinwântoem amânhenehon-homyry wâgâ” kelymo.

## 2

*Jesus induakewâdyby modo agâ Paulo aguehobyry*

<sup>1</sup> Katorze anu Jerusalémram Pedro agâ agueze udâhobyry sakabygueduo, tâtânze urâ myarâ Barnabé agâ. Tito tagâ tase ani xina.

<sup>2</sup> Udâly ani, Deuslâ mawânkâ ani yam agueim, myarâ udâhoem. Jesus einwânni modo iwymârydo agâ lelâ ani târâ kâtnâguedyly. Eyanmo tâgatuze ani urâ, unâ iwâkuru judeu keba modoram kêangatuly wâgâ. Iewanu agânhetyby modo, iwerâ agânhesezeguily warâ, âdyem nipyra awily izepama ani urâ.

<sup>3</sup> Tutuzemolâ ani Tito gregu awily. Awilyguelâ xina ezewenry ara tatâzeba awily. Xina ezewenry ara adatâhoem aguepamo olâ ani.

<sup>4</sup> Îlâpyryem tygâsezebalâ kurâdo ewy egawântaynylmo ani xina âtâdyguyhobyryam. Xina âdakely awily idase kulâ myani idâlymo. Wakelymo: “Âpemugumolâ xina, Cristo eynynâ” kelymo; kewâdylymo kulâ olâ-ro warâ. Tutuzeba tâitoem kulâ aguelymo. Tito satâbyemba awily tiuntuduomo, aguelymo: “Jesus einwânni Tito watay, kâzewenry ara nadatâo pylâ” kelymo. Jesus Cristo kâmake, kieinwândylygue eagâ kydawily warâ. Jesus einwântânry modo olâ saguho tâzewenry kimoyby agüentondyze. Arâ agüidyly-ro watay, mâkâ kadeia odayba etagueyby, kadeia odaxilâ odopâdondyly myara kidyly kulâ.

<sup>5</sup> Âdaunloenlâ aguehomo ara izepa ani xina. “Idânâni Jesus einwânni modo judeu domodo ezewenry iwenily modo ara lelâ aidyly, judeu, judeu keba alelâ” xina kewâpyra. Arâ xina aguely watay, Deus aguehobyry tugukeze tâise xina, âmaemo judeu keba modo xina inokudylymo kulâ tâise warâ.

<sup>6</sup> Tâlâ Jesus einwânni modo duay iwymârymoem tutuzeim; âdyem nipyra olâ awârâ urâem. Deus nheinwândylymo, itaumbry âkealonro nhegatulylmo warâ lelâ urâem, Deus xurâem warâ âdyem ini. Iwelogue urutaymbamo ani akaemo pymâ domodo; âikâ iewanu nudupamo ani, iewanu aralâ awidyly.

<sup>7</sup> “Tutuzelâ xina, âmâ, Pedro warâ unâ iwâkuru Jesus einwândylygue tâdâsemaguely awily egatuze Deus ingonotyby mawilylmo. Judeu keba modoram egatuly âmâ iwanu, Pedro ewanu pylâ judeu domodoram egatuly-ro warâ” kelymo.

<sup>8</sup> Arâ aguelymo iraynâ, Jesus wâgâ judeu keba modoram kêangatuhoem adâkeze ani Deus yam, Jesus wâgâ judeu domodoram Pedro nhegatuhoem adâkehobyry ara lâpylâ.

<sup>9</sup> Tiago, Pedro, João warâ, Jesus einwânni modo iwymâryem tutuzeim, tutuzemo Deuslâ xirâ iewanu xuduim awily. Iemary, Barnabé emary warâ nhawâdylymo, Jesus ewanuem xina agâ koendâ lelâ tawily tienehon-homoem. Yam, Barnabéram warâ aguelymo ani: “Judeu keba modoram ise Jesus xunâry mângatulylmo kuru, xina ise judeu domodoram egatuin-ro warâ” kelymo.

<sup>10</sup> Xinaram nhegaguylylmo ani: “Xirâ âji Jerusalém anano judeu domodo Jesus einwânni modo ewy âdy pebaom modo xurâem âdylâ anhetangâ, âdy peba kehoem kuruba itoemoem” kelymo lelâ. Urâ olâ aunlolâ awârâ agânhedyse wawily, kâenmawadâdomoem.

*Paulo Pedroram, “Iozepa kulâ amidyly” kehobyry*

<sup>11</sup> Awârâpygueduo, Pedro Antioquiam IU ise âewily. Jesus einwânni modo enanaym tonhonre kehoem eyam auguely, iozepa kulâ aidyly awilylgyue. Âdy aityby egatuze urâ âyanmo.



<sup>12</sup> Myarâ saintybyem, judeu keba agâ âwinduadyly. Tiago ingonotyby uguondo modo myarâ saintuomo, “Judeu keba modo agâ judeu domodo nâwinduapyra nidâ” kelymo. Agueduomo, Pedro judeu keba modo agâ tâwinduadyly inmoly, nhodokelymo warâ. “Judeu keba modo Jesus einwânniem idyly-ro watay, judeu domodo ezewenry ara nadatâomo” kerim modo tiyntadylygue.

<sup>13</sup> Judeu domodo Jesus einwânni modo judeu keba modo agâ nâtâdyguyba, nâwinduapyra warâ tâisemo ani. Pedro aitobyry ara lâpylâ aidylymo. Barnabé judeu keba modo agâba tyenehonzemo lâpylâ ani, iozepa adâidyly awyly tiuntuly umelâ.

<sup>14</sup> Deus aidysemo ato araba aidylymo awyly kâuntuduo, idânârâ enanaynmolâ kehoem ton-honre Pedroram auguely: “Judeu âmâ, unwâm, âze warâ eynynâ. Akaemo Tiago ingonotaymby modo saindyly iraynâ, judeu keba modo agâ tâtâdyguyze, tâwinduase warâ keankâ âmâ, awârâlâ Cristo ize ato awyly mâuntulygue, kâzewenry saguhobyry agueho araba awyly umelâ. Judeu âmâ. Judeu domodo ezewenry iweniby araba amidyly-ro watay, ‘Xina ezewenry iweniby ara aitaungâ tãkezeba ikâ judeu keba modoram” uguely eyam.

*Jesus kieinwântuo lelâ Deus kâmakely*

<sup>15</sup> Urâ, ypemugudo warâ judeuem xina awyly, tunwym eynynâ, tyze eynynâ warâ. “Deus indakeyby kydawylygue, iamudoenlâ kâzewenry Deus inwenien-hoymby kiuntuly. Judeu keba modo emyenro keba kurâ, Deus ize ato nutubamo mawânkâ” xina kely kâinane.

<sup>16</sup> Tutuze olâ xina iwerâ, Jesus kieinwândylygue tâwentâzein-emba Deus kâendyly awyly, xina idamudo ezewenry iweniby kieinwândylygue inkâba tâdâsemaguely. Jesus Cristo kieinwântuo, Deus inakanhe kydawyly nhygakely; awylygue Deus xurâem âdygue tâwentâzeba kydawyly. Mârâ tâzewenry ara aini mâkeba Deus nhekyly.

<sup>17</sup> Jesus tyeinwândylygue tâsemaguely awyly, tutuze xina. Tydamudo ezewenry iweniby tyeinwândylygue inkâba ise xina âsemaguely. Xina ipemugudo ewy olâ xina tâwentâzemo. “Saguhobyry agueho ara amitaymba âmaemo, judeu keba modo ara kulâ” kelymo. “Cristo, Deus mâinwâmpyra mitomoem aienehoim” kelymo. Kewâdyly kulâ olâ awârâ aguehomo! Deus aguehobyry sakadoem anhenonhy nitaymba Cristo.

<sup>18</sup> Awârâ unâma kâengatzezeguyly. “Deus xurâem, âdy kâwentâdo peba awyly, Jesus kieinwândylygue, judeu domodo ezewenry iweniby ara aguidylygue inkâba” warâ uguely kâinmopa urâ. Augueho kâungukely watay: “Deus xurâem, kâwentâdo peba awyly judeu domodo ezewenry iweniby kieinwântuo” uguely watay, Deus aguehobyry kankadyly kulâ tâise, se iwânzeypyguelâ âtâ kaunâtondyly waunlo ara.

<sup>19</sup> “Âdygue tâwentâduneba urâ, ydamudo ezewenry tâinwânse wawylygue” uguely kâinane iozepa kulâ. Jesus einwânniem wituio olâ ani tâzewenry amaymba widyly, igueypy tâzewenry amaymba ato ara. Deus aguehobyry ara lelâ widyly. Cristo kruz wâgâ igueduo eagâlâ yiguely waunlo ara.

<sup>20</sup> Tâwâlâ myakâwâm Cristo âtuly, kruz wâgâ kurâem tyiguehoem. Mâkâ kâinwândylygue, ize wato ara kulâ inkâba awidyly. Eagâlâ igueypyem wawyly-ro waunlo ara, kâinwândyly iraynâ watobyry arapama urâ iwerâ. Yagâlâ iwerâ Cristo. Iwerâ toenzepa Jesus kâinwândyly, toenzepa ywyneni mâkâ. Yigueduo âdaunloenlâ Deus agâpa yenehomba ise.

<sup>21</sup> Toenzepa Deus kywynedyly, ize ato aguiempyra kydawyly umelâ. Kâsemaguehoem mârâ saguho tâzewenry agânhedlyly kâinwândyly watay, Deus ywynedyly wâgâ kâtynanâbyra wawylylâ tâise. Âdaunloenlâ arâ auguepa olâ urâ. Judeu domodo ezewenryguelâ inakanhe kydawyly xygakely watayma tâise âdyem nitaymba Cristo iguehobyry-ro.

### 3

*Cristo einwântuo lelâ tâdâsemaguely, judeu domodo ezewenry einwântuo inkâba*

<sup>1</sup> Âmaemo Galácia eynynonro modo, iozepa kulâ anghumo oday âunâgumo! Tâzenokuoze âmaemo; egueântybyem âmaemo-ro waunlo ara. Agâmo watay, koendâ kehoem segatulâ Jesus Cristo kruz wâgâ iguehobyry; kieinwântuo lelâ kydâsemaguely awyly warâ. Mâkâ tâinwânse ani âmaemo-ro warâ. Iwerâ olâ mâinwândyseba âmaemo.

<sup>2</sup> Mâenanâguedyzemo urâ; judeu domodo ezewenry iweniby mâinwândylymogueba âyanmo Deus Tyispiritury ingonodyly awyly, unâ iwâkuru Cristo wâgâ mâinwântuomo, xirâ enanâguedaungâ.

<sup>3</sup> Tuândy aito ara kulâ amidylymo. Deus Ispiriturygue ani Deus ize ato ara adâjidyly mangulylymo. Iwerâ olâ Deus iomazeânze myguelymo ize matomo âunârymogue kulâ.

<sup>4</sup> Jesus einwândyly mâinmolylo-ro watay, idânârâ Deus agâmo anhetyby modo iwâkuru modo, koendonro warâ, âdyem nipyra tyenehonze awârâ.

<sup>5</sup> Wauguely olá, koendá mâuntuybymo mâenanâguehomoem, Deus Tyispiritury ingonodyly agâmo itoem, âduaymo adyenyry modo kehoem anhedily warâ, judeu domodo ezewenry ara amidylmogoe inkâba! Mâkâ arâ anhedily, unâ tâdâsemagueho mâindatuomo, Jesus mâinwântomobyry wâgâ.

<sup>6</sup> Saguhoem Abraão emakehobyry aralâ iverâ mâzemakeolyo. Arâ mawânâ Deus itaumbry awo wâgâ iwenibyem awyly: “Deus tâinwânse myakâwândy Abraão. Nheinwândylygue âdygue tâwentâzeba myakâwândy Deus nhutuly.”

<sup>7</sup> Xirâ xutuwâdaungâ. Kywymâry Jesus einwânni modo mawânkâ Abraão iweompyry kuru.

<sup>8</sup> Idânârâ tiungudyly iraynâlâ myakâwândy Deus, judeu, judeu keba alelâ tienmakely nhutuly. Awylygue saguhoem Deus aguely Abraõoram: “Âwâgâ ise idânârâ kurâ domodo agâ koendâ wawyly” kely, warâ iwenibyem awyly Deus itaumbry awo wâgâ.

<sup>9</sup> Deus, Abraão agâ koendâ awyly myakâwândy, aunlolâ tâinwândylygue. Arâ lâpylâ ise Deus koendâ awyly idânârâ tâinwântaynrim modo agâ.

<sup>10</sup> “Âsemagueze urâ, tâzezewenry Moisésram inwenien-hoymby idânârâ tâinwânse wawylygue” kewâni modo enagazeze Deus. Wakelybe mawânâ Deus itaumbry awo wâgâ iweniby, “Tâzezewenry Moisésram inwenien-hoymby idânârâ einwântânry modo enagazeze Deus” kely. Aunlolâ idânârâ tâzewenry inwenien-hoymby ara ânguy anitaymba. Awylygue ise nâsemagueba awylymo, âsenagazedoram ise âjigonohonlymo Deusrum.

<sup>11</sup> Tutuze kurâ, ânguy tâmakezeba awyly Deusrum, tâzezewenry wâgâ kulâ. Wakely Deus itaumbry awo wâgâ: “Deus tâwentâguezeba kâendily, mâkâ kienwândylygue lelâ, âdaunloenlâ eagâpa kydâiehowâbyra ise kurâ-ro warâ, onro anaym kydawwily ume, kygueduo alelâ” kely.

<sup>12</sup> Tâzezewenry tyeinwândylygue tâsemagueuly einwânni modo Deus mâkeba tâmakerin-em nhutuly. Arâ âsemagueze kewâni modo idânârâ tâzezewenry agueho ara aidily tâise, “Emakeybyem mâkâ tâzezewenry idânârâ agueho ara aisezeni” kely, iwenibyem mawânâ Deus itaumbry awo wâgâ. Ânguy aniempyry awârâ-ro warâ.

<sup>13</sup> Tâwentâzeim lâpylâ ani kurâ, idânârâ tâzewenry Deus Moisésram inwenien-hoymby kienwâmpyry kydawwilygue. Cristo olâ kâwentâdobyry nygake. Kydâsenagazedogue nâsenagazedâ kâtaybyay, kruz wâgâ sakâjibyem, inakanhe kitobyry wâgâ Deus agâpa kipyry kitoem akâwâm arâ iguely. Iwenibyem mawânâ itaumbry awo wâgâ: “Kywypado mâkâ, se epadâdyby wâgâ iguehoem sakâjiby; Deusrum ewentâdyby mawânkâ” kely.

<sup>14</sup> Saguhoenlâ Abraõoram adâkeze myakâwândy Deus: “Yeinwântâ mawylygue, koendâ ise agâ wawyly. Âwâgâ ise idânârâ kurâ domodo agâ koendâ wawyly” kewândymy. Awylygue toenzepa lâpylâ Deus agâmo koendâ awyly, Cristo Jesus mâinwântuomo, tâwâlâ lelâlâ wâne judeu keba mawylymo. Jesus iguely myakâwâm, idânârâ inakanhe aguitobyry epywazelâ, judeu domodoem, judeu keba modoem alelâ. Jesus kienwândylygue, Deus Tyispiritury ingonodyly kagâ itoem, “Igonose urâ” tâkehobyrylâ awylygue.

*Deus Abraão agâ âseinwândobyry, tâzezewenry Moisés inweniby warâ*

<sup>15</sup> Cristo eynynâ ypemugudo, kopaelâgâembaba ainilâ ise kâengatuly, mâuntuohomoem. Egâ wâneam azagâ uguondo âseinwândily âdylâ adientoem watay, “Warâ ise aguidily” kehomobyry ânguy nugukewâbyra. Adâkehobyry aralâ aidilymo.

<sup>16</sup> Arâ lâpylâ myakâwândy Deus aguely Abraão agâ, iweombyry ewy tokalâ agâ koendâ tâitoem, warâ inwenibyem awyly. Cristolâ myakâwândy mâkâ agueho.

<sup>17</sup> Warâ auguedyse wawyly, koendâ mâuntuohomoem. Deus aguely myakâwândy Abraõoram: “Koendâ ise agâ wawyly” kely. Quatrocentos e trinta anubygueduo myakâwândy Moisés tâzezewenry inwenily, Deus “Iwenigâ” kehobyry. Deus, Abraão agâ âseinwândobyry nugukeba olâ mârâ Moisés inweniby, Abraõoram “Warâ ise” kehobyry nygakeba lâpylâ warâ.

<sup>18</sup> Warâ iozepa kulâ aguewâni modo aguely: “Moisés saguho kâzewenry inweniby ara aguiyrya kurâ-ro watay, koendonro ‘Xuduze urâ’ Deus kehobyry kienmakewâbyra ise kurâ” kelymo. Cristo eynynâ ypemugudo, ioze inkâba awârâ! Âkealâ-ro watay, tâzezewenry Moisésram inwenien-hoymby, Deus Abraõoram aguehobyry tygakeze tâise. Deus kagâ koendâ awyly, kienwândylygue, “Koendâ ise agâ wawyly, yeinwântâ mawylygue” Abraõoram tâkehobyry aralâ. Deus, Abraão agâ koendâ myakâwândy, tâinwândylygue, tâzezewenry nheinwândylygueba.

<sup>19</sup> Warâ keanra amyguelymo: “Awârâ tâzezewenry iweniby kienwântuoba Deus kâmakely watay, âdaituo pylâka myakâwândy Moisésram inwenien-honly?” myguelymo. Deus awârâ tâzezewenry inwenien-honly, ize ato, izepa ato warâ kiuntuohom. Warâ myakâwândy Deus tuodaylâ aguely: “Xirâ tâzezewenry Moisésram kâinwenien-hoymby âdypyguyândily ise,

Abraão iwerybyry káingonotuo, ‘Máká agâ koendâ ise urâ’ uguehobyry. Máká âetuo, awârâ judeu domodo ezewenry iweniby âdym nitaymba ise” kewânmy. Xina idamudoram awârâ tâzezewenry xududay, eagâmo kehoemba myakâwândy Deus aguely. Waunroem kuru Deus anju domodoram judeu ezewenry nhegatyly wao târâ eydâ tatodâ. Akaemo anju domodo pylâ tâzezewenry Moisésram egatuin-ro warâ. Moisés pylâ kurâdoram egatuin-ro; kurâ domodo wâgâ adâkeze myakâwândy Moisés Deusram.

<sup>20</sup> Abraãoram “Koendâ ise nhedyly” tâkeday olâ myakâwândy Deus aguely eagâ lelâlâ. Ânguy emaxi aguepa myakâwândy.

*Âdakeze tâzezewenry aguely*

<sup>21</sup> Deus, judeu domodo ezewenry Moisésram inwenien-hoymby, Abraãoram aguehobyry nugukewâbyra. Deus tâzezewenry ton-honreim nhygadyly kydâsemaguehoem watay, tâwentâzeba tâise kurâ, Deus xurâem, awârâ tâzezewenry kieinwândylygue kulâ.

<sup>22</sup> Deus itaumbryy awo wâgâ inweniby watâkeze. Deus izepa ato aguiendyse lelâ kurâ idânârâ. Etadâdyby emyenro kurâ, korentygue ekâjibyem waunlo ara. Deus izepa ato aguiendyseba lelâlâ wâne kurâ, âwâlâ inakanhe aguidyly kinmoly kipyra olâ kurâ. Jesus Cristo kieinwântuo “Xirâ amaymba kâmakely” aguewâm olâ Deus.

<sup>23</sup> Cristo onro anaxi âewyly iraynâ, warâ akâwâm xina judeu domodo xunâgu tyangahu oday: “Kâzewenry iweniby ara aguidyly watay, Deus xurâem âdy kâwentâdo lâpeba ise kurâ” xina kely. Etadâdyby âdara tâsemagueuly awyly xutudânry ara akâwâm xina. Tutuzelâ akâwâm xina, idânârâ tâzezewenry iweniby agueho ara anipyra tawlyly. Warâ akâwâm xina, Cristo tyeinwântuo lelâ tâsemagueuly awyly tiuntuly iraynâ.

<sup>24</sup> Egâ wâneam iamimeom eniranlâ âzeholy. Iamudoem atay, enimobe, xurunimobe warâ. Xutuduo olâ, eni kehoemba. Arâ lâpylâ akâwâm tâzezewenryam xina judeu domodo âduruholy, Cristo âewyly ara. Mákâ xina nheinwântuo olâ, Deus xurâem, tâwentâzeba xina.

<sup>25</sup> Iwerâ olâ, Jesus einwântuo âsemagueulybyem tadawylygue, mâkâ Ispiritury kurutâ. Awylygue Moisés inweniby tâzezewenry keba xina nheinwânkly awyly tâsemaguehoem. Tutuze xina iwerâ âdy adienklyly, adientânry warâ awyly.

<sup>26</sup> Cristo Jesus kieinwândylygue, Deus xurâem kydawyly; judeu, judeu keba alelâ, Deus imeryem kurâ iwerâ.

<sup>27</sup> Batiza mâieholymo ani, Cristo xurâem mawylymo mâenehon-homoem. Cristo ara mitoem ani iweloem mâieholymo.

<sup>28</sup> Tâwâlâ judeu, judeu keba; tâwâlânro, tâpywazenry; uguondo, pekodo warâ mawylymo, Deus xurâem olâ âzekiba lelâ âmaemo.

<sup>29</sup> Cristo xurâ mawylmogue, Abraão iweompyry lelâlâ waunlo ara âmaemo. Deus âyanmo xuduze, Abraãoram “Xuduze urâ” tâkehobyry.

## 4

<sup>1-2</sup> Mârâ unâ wâgâlâ ise augueondyly. Egâ wâneam tymery imeimbyryram nhunwym aguely: “Âtuly-ro watay, idânârâ âyam kâundudyse wato sodo ise âmâ, awârâ modo xuturim warâ. Iamudoem mawyly ara olâ, âmâ, âsejiguy warâ enipe ise âmâ. Âuruse, âtudio âsejiguy imaxi mânhetuo âdara amânhedyly awyly wâgâ inomedâze warâ” kely.

<sup>3</sup> Myara akâwâm kurâ, Jesus kâmakely iraynâ. Awâkâ tâensery modo eon-honru amaym kydawyly, kydâsemagueba, mâkâ kadeia oday ekâjiby ara.

<sup>4-5</sup> Adâkehobyry odaxi ituo, tymerylâ akâwâm Deus ingonoklyly, Maria oday iazehoem. Idânârâ judeu domodo ezewenry iweniby ara lelâ aidyly, judeuem tawlylygue. Mákâ iguely myakâwâm xina emakeze, xina Moisés inweniby tâzezewenry tyeinwântuo, tâsemagueuly inwânwânipyry modo. “Xina” ugueondyly, ypemugudo wâgâ auguely awylygue, judeu domodo. Deus, tymery ingonodyly myakâwâm tâinwânni modo nhemakehoem, Deus imeryem kitoem lâpylâ.

<sup>6</sup> Deus xurâem kydawyly etoem, xurâem kydawylygue, tymery Ispiriturylâ ingonoklyly kagâ itoem. Ispiritury kagâlâ awylygue, Deus agâ aguykeday, “Pabai kâinwynegyly âmâ” kykely.

<sup>7</sup> Iwerâ Cristo aitobyry wâgâ Deus tymeryem nhetybyem âmaemo; saguhobyry modo ezewenry amaymba emakeybyem. Imeryem itybyem mawylmogue, tynnonro modo xurâem tiunduly tienkanâdyby xuduze lâpylâ Deus âyanmo.

*Galácia donro modo wâgâ Paulo âseguâdâdobyry*

<sup>8</sup> Saguhoem kuru Deus mâuntuwâbyra ani âmaemo, tohoguezeim modo keba kulâ deus domodo myguewâtomo emaym mawylmogue.

<sup>9</sup> Iwerâ olâ Deus kuru tutuze âmaemo, âtudâmo mâkâ warâ. Âwâlâ kulâba mâuntulylo. Deuslâ aienehoim mâkâ mâuntuhomoem, mâkâlâ tynnonroem ânehoinmo warâ. Igarymo

xidadâ. Mârâ saguho tâzezewenry einwântonze myguelymo, âdy tâinzeim, âdy tâinzenry, âdy adyeseim, âdy adyesenry warâ wâgâ. Âdyem nitaymba mârâ tâzezewenry iwerâ, ton-honroneba warâ. Ânguydo kulâ olâ âmaemo, âdyem itânry aietonze myguelymogue, kadeia odayba etagueyby wâne myarâlâ todopâdonze myara. Arâ amidylymo mâkeba kâinwânwânkylly!

<sup>10</sup> “Judeu domodo ezewenry ara, nunâ iwelo, igâwynu, kopâ adaguho, anu iwelo warâ kientyguedyly-ro watay, Deus xurâem tâwentâgueduneba ise kurâ” myguelymo. Iozepa olâ awârâ.

<sup>11</sup> Toenzepa âwâgâmo iekuâgu, “Jesus einwândyly mâinmolymo watay, unâ tâdâsemagueho âyanmo kêngatuyby âdyem nitaymbaka keankâ” ugeduo.

<sup>12</sup> Cristo eynynâ ypemugudo, yara itaungâ. Judeu wawylygue, kêsemaguehoem uguewâtuo akâwâm xina ezewenry kâinwândyly. Iwerâ olâ mârâ tâzezewenry kâinwândylygue âsemagueze urâ uguely ximo. Imyenromolâ urâ. Arâ âyanmo auguely inakanhe amitomobyry wâgâ inkâba, âwynedylymogue lakuru. Awylygue yara mitomoem kêenkadyly.

<sup>13</sup> Tutuzelâ âmaemo, saguhoem kuru âyanmo udâhobyry, âydâmo iepagudyly ani, iewâmatuo. Ilâ umelâ ani âyanmo unâ iwâkuru Jesus einwândylygue tâdâsemagueho kêngatuly.

<sup>14</sup> Toenzepa ani iewânugue mâseguâdâdyllymo. Awylygue ani âdalâ kulâ ayepyra mawlymo, wynebyra mipyra mawlymo warâ. Koendâ lelâ ani iedylymo, anju Deus ingonotyby eto ara kehoem, Cristo Jesus eto ara warâ.

<sup>15</sup> Jesus wâgâ auguehobyry mâindatuomo, toenzepa tohomaenze ani âmaemo, agâmolâ wawylygue. Kua yetomoem âdylâ amânhedyse kehoem matomobyry, tutuze urâ. Inumo mâentydyze kehoem ani âmaemo, yam mâunduhomoem\*. Iwerâ olâ âtugugueybyem âmaemo.

<sup>16</sup> Âduerymo ara kulâ iedylymo, ataen-homo araba, iozeno auguehobyry mâindadyseba mawlymogue.

<sup>17</sup> Tynynonroem âedysemo mawânkâ akaemo, “Judeu domodo ezewenry einwântaungâ” kewâni modo. Âmaemoem koendonro keba olâ awârâ. Udueryem midysemo; auguely mâindadysebamô tienehondyzemo, aguelymo lelâ mâindatomoem.

<sup>18</sup> Deus itaumbryry ioze lelâ egatuwâni modo eynynâ tadawyllylâ koendonro. Aunlolâ arâ itaungâ, agâmo wawyly ume kulelâ inkâba.

<sup>19</sup> Pekodo tâsenagazeze, tâzeon-hoinze warâ tymery iazehoem, myarâ lâpylâ ani kâsenagazedily, kozeon-hoinly warâ Cristo xunâry âyanmo egatuze, âmaemo ymeombryry emyenro. Iwerâ tâsenagazelâ urâ, einwândyly mâinmolymo kely kâindatuo. Âsenagazelâ ise urâ, Cristo ize ato ara kehoem amitomomoem, agueho ara amyguehomoem warâ.

<sup>20</sup> Toenzepa iwerâ agâmo wawyse wawyly wâne, koendâ kehoem âyanmo auguehoem. Toenzepa iekuâgu, koendâpa wawyly warâ âwâgâmo!

*Azagâ Abraão imeom, Agar agâ, Sara agâ warâ*

<sup>21</sup> Warâ myguelymo keankâ: “Deus xurâem, tâwentâzeba kitoem, judeu domodo ezewenry iweniby kyzeinwâne” myguelymo. Deus, Moisésram tâzezewenry inwenien-hoymby koendâ mâuntuba olâ âmaemo.

<sup>22</sup> Azagâ Abraão imeom wâgâ myakâwândy Moisés inwenily, pekodo tâmaryem Abraão nhatyby Agar imery wâgâ, Sara Abraão iwydy lelâlâ imery wâgâ warâ.

<sup>23</sup> Deus kehobyryemba myakâwândy Agar adamyly. Awylygue idânârâ pekodo modo imery iazeho aralâ imery iazely. Sara olâ myakâwândy adamyim keba. Warâ olâ myakâwândy Deus Abraôram aguely: “Âwydy Sara imezeze lelâ, aripiem awyly umelâ” kely. Deus agueduo, Sara Abraão agâ imezelymo.

<sup>24</sup> Azakâlâ Abraão imeombryry wâgâ, azagâ pekodo wâgâ warâ auguely, Deus tynynonro modo agâ azagâ tâseinwândo anhetobyry mâuntuhomoem, Abraão agâ âseinwândobyry, Moisés agâ iwy Sinaidâ âseinwândobyry warâ. Egâ wâneam Agar, tâbyguepa âsewanioem sanâtyby. Etadâdyby ara mâkâ, tywymâry emaymba itoem nudupa, tâwâlâ nâdutuba warâ. Arâ lâpylâ, Sinaidâ âseinwândomobyry ara, judeu domodo tâzezewenry aiedily nimoba awylymo. Agar, iweompyry warâ mârâ Sinaidâ âseinwândomobyry enehonri akaemo.

<sup>25</sup> Augueondyly xirâ. Deus, Moisés ingâsedily myakâwândy iwy Sinairam, Arâbia yan-yam. Târâ myakâwândy judeu domodo ezewenry Moisésram inwenien-honly. Judeu domodo ijidadâry tynrenseim kuruma Jerusalém. Mârâ xidadâ etolâ mawânkâ Agar. Agar, iweompyry modo warâ etadâdyby ara, tywymâry ewanu inmohomoem nudupa, arâ lâpylâ judeu domodo etadâdyby ara awylymo, saguho tâzezewenry inmohomoem nudupa awylygue.

\* 4:15 “Tânulâ nhetyly” kely gregüem. “Tienmawadâdomoem âdylâ adyese mo tâise, akaemo duay tatay âdy peba awylymogue” keze aguely.

<sup>26</sup> Etadâdyby araba olâ kurâ. Jesus tâinwânse kurâ, Deus xurâem tâwentâguezeba kitoem. Kurâ xurâem, kâjidy xidadâ tohogeezim kuru olâ ise Jerusalém iwelo kaynonrodâ.

<sup>27</sup> Deus itaumbryy awo wâgâ warâ aguely:

“Âmâ pekodo tymeguenry, tuomare ikâ, adamyze mawlylygue!

Âmâ iamudo iazely ewânu xutudânrybyry, adaenkegâ omarugue, âmery iazeday.

Pekodo sodokeyby toenzepa ise imeongu, mâkâ tusoneim takaze kehoem” kely.

{Pekodo sodokeyby wâgâ adâkeday, xidadâ Jerusalém wâgâlâ myakâwândy Isaías aguely, mârâ anano modo eagonro anaxi etadâdybyem sadylymo wâgâ Jerusalémram tuomare odopâdondylymo wâgâ, warâ aguely.}

<sup>28</sup> Isaque ara âmaemo, Cristo eynynâ ypemugudo, Deus aguehobyry ara imeryem mawlymogue, aguehobyryem Isaque iazehobyry ara.

<sup>29</sup> Abraão iwidy kuru adamyhobyry mawânkâ “Âmery iazeze” Deus Ispiritury kehobyry, Agar imery keba. Agar imery, mâkâ Sara imery tânagazeze olâ myakâwândy. Arâ lâpylâ iwerâ Jesus eynynâbaom modo, Jesus einwânni modo tânagazezemo, nheinwândylymogue.

<sup>30</sup> Warâ iwenibyem awyly Deus itaunrubbyry awo wâgâ: “Pekodo kâtydâ tâbyguepa âsewanihoem manâtyby igonokâ, imery agâlâ. Âgueduo, âwydy kuru imery, mâkâ pekodo tâwaneim imery agâ tunwym isejiguybyry nepajigâbyra ise” kewândymy Sara tusoam.

<sup>31</sup> Cristo eynynâ ypemugudo, emakeybyem kurâ; etadâdyby araba kydawylygue. Sara Abraão iwidy lelâlâ iweombryy kurâ, Agar, Abraão etydâ âsewanihoem sanâtyby iweompyry keba.

## 5

*Kurâ Cristo einwânni modo etadâdyby emyenro mâkeba kurâ*

<sup>1</sup> Cristo kâmakewâm judeu domodo ezewenry iweniby ara aguipyra kitoem, Deus xurâem tâwentâgueba kitoem. Etadâdyby etagueyby ara kurâ. Awylygue Jesus einwândyly kâjimowâdaundâ. “Judeu domodo ezewenry einwântaungâ, Deus xurâem tâwentâguezeba mitomoem” kewâni modo kâjiwantaguedaundâ. Etadâdyby ara tâiehodonzeba itaungâ.

<sup>2</sup> Koendâ idataungâ! Warâ âyanmo auguely. “Deus xurâem tâwentâguezeba kitoem, judeu domodo ezewenry ara kydadatâonre” myguelymo watay, Jesus mâinwâmpyry mawlymo mânehonlymolâ. Âdyem âepyramo Cristo iguehobyry waunlo ara, awylygue ezewenrymo ara madatâoly.

<sup>3</sup> Augueondyly. Judeu domodo ara madatâlymo-ro watay, idânârâ Moisés tâzezewenry inweniby ara pylâ aitaungâ. Idânârâ Moisés inweniby ara amitomoem nudupa olâ ise.

<sup>4</sup> Âmaemo judeu domodo ezewenry mâinwândyse donro modo, Cristo agâba itybyem âmaemo tokaleoem âenimo modokewâdaundâmo. Âmaemolâ Deus agâmo koendâpa itoem aienehoim.

<sup>5</sup> Tutuze kurâ, âdalâ tâwentâzeim keba kydawyly, Deus enado kydawyly ume. Xirâ kinwânwânkylly. Deus Ispiriturylâ xirâ modo xutuen-hoim, Jesus tâinwânse kydawylygue.

<sup>6</sup> Cristo Jesus xurâem lelâlâ kurâ watay, âdyem nitaymba judeu domodo ara kydadatâoly, kydadatâoba warâ kydawyly. Deus xurâem koendonro, Jesus kieinwândylygue, kagonro modo agâ kydâpynedyly.

<sup>7</sup> Saguhoem Cristo lelâ ani mâinwânkyllymo, mâsemaguehomoem. Iwerâ olâ iozepa kulâ mâzenomedâohomobyry mâinwânkyllymo. Tâlâ keanra ânguylâ Deus mâinwâmpyry mitomoem aienehonze keim.

<sup>8</sup> Deus keba olâ keankâ mâinwâmpyry mitomoem aenehonrimo. Mâkâlâ keankâ âgâsenimo, xurâenlâ mitomoem.

<sup>9</sup> Wakelype mawânâ: “Âdiempa fermentu kulâ toenzepa kehoem massa tuolize” kely. “Aguipaom aguely kulâ âdy mâinwâmpyry mitomoem ânehonrim” kezelâ aguely.

<sup>10</sup> Tutuze olâ urâ, Kywymâry Jesus xurâem kydawylygue kâinwânto ara einwântonze mawlymo. Kewâdyly kulâ aguewâni modo kulâ ânagadoem ânehoimmo, Deus olâ mâkâ aguewâtyby modo enagazeze lâpylâ. Âdaunlo kurâ inokunimo enagazeze Deus.

<sup>11</sup> Cristo eynynâ ypemugudo, “Judeu keba modo nadatâo âsemaguehoem” uguely-ro watay, koendâ tâise Cristo nynâbaom modo iedyly. Xirâ olâ auguepa wipyra wato: “Âdaitoem tatâwaduneba judeu keba modo. Jesus Cristo kruz wâgâ iguely myakâwâm, kâmakeze, kieinwântuo lelâ” ugezesedo. Auguely kâinmoba mawlylygue pylâ, toenzepa judeu domodo ienagazedily, unâguedylymo warâ.

<sup>12</sup> Deus xurâem mawlymo mânehon-homoem madatâodyzemo mawânkâ iozepa kulâ unâ egatuwâni modo. Toenzepa ikuâdânimo tâdâturudo iozepaom modo. Koendâ tâise akaemo emukely!

<sup>13</sup> Warâ lâpylâ âyanmo auguely, Cristo eynynâ ypemugudo. Emakeybyem âmaemo. Judeu domodo ezewenry iweniby amaymba mitomoem ani mâjigâseolyo. Aituo, "Judeu domodo ezewenry amaymba wawylygue, ize wato ara iwerâ awidyly" tâkezeba itaungâ. Koendâ lelâ aitaungâ, agonromoem koendâ lelâ warâ, mâpynedylymogue.

<sup>14</sup> Saguhoem Moisés iweniwâm: "Agonromo agâ âpynedaungâ; koendâ mâzetomo ara lâpylâ agonrodo agâ koendâ âzetaungâ" kely. Tâpyneze lelâ agonro agâ mâzedylymo watay, idânârâ tâzezewenry ara amidylmolâ ise awârâ.

<sup>15</sup> Agonromo agâ âewiâpadylymo, mâtuagadylymo warâ watay, agonromo agâ mâpynedylymo imoimbyryem âmaemo. Ânguydo imeom tagonro agâ tâjigtoguyday tagonro tyâze myara lâpylâ ise amidylmo, mâpynebyra âmaemo-ro watay.

*Deus Ispiritury kurutobyry ara lelâ aguine*

<sup>16</sup> Wauguedyse urâ. Deus Ispiritury amânhetomoem aguehobyry ara lelâ aitaungâ. Arâ amidylmo-ro watay, inakai amânhedyse matomo amânhetaymba ise âmaemo.

<sup>17</sup> Inakai modo aguiendyse kydato, Deus Ispiritury aguiendyse ato agâ koendâ nâseinwândaymba; kuoday âjigtogyly waunlo ara. Deus Ispiritury aguehobyry ara amituomo inakai amânhedyse matomo anienehomba.

<sup>18</sup> Deus Ispiritury aguehobyry ara amituomo, Moisés ezewenry mâinwântaymba âmaemo, mâsemaguehomoem; mârâ tâzezewenry amaymba âsemagueybyem âmaemo.

<sup>19</sup> MON warâ awârâ Deus Ispiritury izepa ato modo âzeholy. Inakanhe adâjidyly. Tohogûin-hobyry keba kulâ xynanâdily; âdaunlo modulâ. Kywypadoem kulâ adâjidyly tynanâzeim modo agâ.

<sup>20</sup> Onro xygatyby enado âzeguhoam tâjidyly, se xygatyby enado lâpylâ, Deus lelâlâ-ro waunlo ara xyrendily. Tâdâseudyly. Inepa kehoem nâpynebyra tâjidyly; âdaituoba kulâ tâjiewiâpadyly. Tâdâtyzedily. Âdydo imeom turâem lelâ ize tadawily; tywâgâ lelâ tâdâpaunzedily. Âikâlâ, âikâlâ tâjidyly, tâdâseinwândily peba; tâdâseguelyly; tagâ âseinwândânry igonodyly.

<sup>21</sup> Âdypeom watay, toenzepa tâdâsewânily. Toku ikaji tâjidyly, tâjidolagu; kywypado aiedily. Toenzepa inakai modo kulâ aieholy; idânârâ auguepa galâ urâ. Awârâ aieni modo olâ ise Deusgue tywymâguebamo, aunloenlâ ise eagâpa awylymo.

<sup>22</sup> Deus Ispiritury konomedâdo olâ Deus kinwynedoem, kydâpynedoem; kuomaroem; kydâseanebyra kitoem, tâwâlâ lelâlâ wâne kâmaynoem kydawily; idânârâ kienmaen-hoem; idânârâ agâ koendonroem kitoem; kydâzeinwân-hon-hoem, "Aiese urâ" kykehobyry aguien-toem;

<sup>23</sup> kydâdunâgueoly watay, tyewiâseba kin-hoguhomoem; âwâlâ aguienkyly modo wâgâ kydâjimanâdoem warâ. Xirâ Deus Ispiritury aguehobyry amânhedilymo watay, âdaunlo tâzezewenry mankadilylymo mâkeba.

<sup>24</sup> Cristo Jesus xurâem kurâ-ro watay, Deus izepa ato aguiempyra kitoem ton-honre ise kurâ. Idânârâ aguiendyse kydato modo kruz wâgâ sakâjibyem mawânâ, Jesus kurâem igueduo.

<sup>25</sup> Deus Ispiriturylâ Jesus kieinwântoem aienehoim, Deus ize ato ara kitoem. Awylygue tâwâlâ Deus Ispirituryam kydâzenomedâonre, idânârâ ize ato ara aguien-toem.

<sup>26</sup> Sawoempa kine. Kienwiâpanâbyra kine. Âdypeom wâgâ kulâ kydâsewâniba kine warâ.

## 6

*Mâkâ, mâkâ warâ kydâsemawydâne*

<sup>1</sup> Cristo eynynâ ypemugudo, âyanmo auguely. Jesus einwânni modo Deus izepa ato anhedily watay, âmaemo Deus Ispiritury aguehobyry koendâ xuturim modo, Deus ize ato aiedily lelâ anhetondomoem, koendâ xurutaungâmo, enomedâdaungâmo warâ. Tyewiâseba olâ xurutaungâmo. Tonomeguelâ lâpylâ itaungâ, inakai amânhepyra mitomoem.

<sup>2</sup> Cristo eynynâ âpemugumo emawydâdaungâ, tytyenze mawylymo mâenehon-homoem. Âdylâ tâmânreim nhanâkyly nhewandayba mâenâtâguylymo, emaxi manâtomomoem waunlo ara.

<sup>3</sup> Âdy mâuntubamo kulâ, idânârâ âdy tutuze lelâ mâdutulylymo watay, tâwâlâ kulâ awârâ mâsenogudylymo.

<sup>4</sup> Tâwâlâ aguitobyry modo wâgâlâ kydâdunre, Deus ize ato ara, ize ato araba warâ kydawily. Aguitobyry koendâ-ro watay, tâwâlâ kydadawily aguitobyry wâgâ. Kagonro aitobyry wâgâ kulâba aguitobyry wâgâlâ.

<sup>5</sup> Eagonro anhekyly wâgâ kydâtynanâbyra kine, Deus aguien-toem aguehobyry lelâ aguyjiene.

<sup>6</sup> Jesus einwândyly wâgâ âsenomedâni modo âdydo imeom koendonro tâlâ tato modo ewy nudumo tonomedâni modoram.

<sup>7</sup> Ânguy Deus nenokudaymba! Âkealâ xirâ! Deus ize ato aienibyry koendonro emakeze lelâ. Ize ato aietânrybyry olâ ise koendonro nemakeba. Wakeho tutuze âmaemo: “Kientâdybylâ ise kienkaunâguyly” kely.

<sup>8</sup> Egâ wâneam, mâkâ nady onro inakai wâgâ etânibyry, koendâ nekaunâdaymba. Onro iwâkuru wâgâ typyniry etânibyry olâ koendâ tâkaunâze. Alâpylâ ise inakai aiedyly kulâ kânanano-ro watay, xypyry etay, tywângueim ara kulâ ise Deus tarâ onro anaym inakai aguientyby modo nhedyly. Deus Ispiritury ize ato ara lelâ aguidyly-ro watay olâ aunloenlâ ise kyigueduo Deus agâ kydawyly; koendonro emakeze kurâ.

<sup>9</sup> Awylygue koendonro Deus ize ato aiese kokozeba kine. Arâlâ aguissezyly watay, Deus “Warâ ise” kehobyry odaxi ituo, koendonro kyam xuduze Deus, âpa ezay tâwaneim koendâ pyni ekaunâni ara.

<sup>10</sup> Awylygue idânârâ xurâem koendonro aiedyly kinmoba kine, aguitoem nhuduly watay; akaemo Jesus kieinwânto ara einwânni modo xurâem koendonro aguyjiene kuru.

*Tâdâsedaenguho, tâdâturudo warâ xypyry*

<sup>11</sup> Urâ lelâlâ xirâ iemarygue iweninri, urâlâ âyanmo kata igononi awyly mâuntuhomoem. Imâsedo modoem kehoem kâinwenily.

<sup>12</sup> Akaemo iozepa kulâ unâ egatuwâni modo aguely âyanmo: “Adatâowâdaungâ tâzezewenry ara, Deus xurâem tâwentâguezeba mitomoem” kewâni modo; kewâdylymo kulâ. Kurâ domodo tyize itoem, koendâ tywâgâ aguehomoem warâ kulâ aguelymo. “Cristo kruz wâgâ igueypy kieinwântuo lelâ kydâsemaguely” kelymo-ro watay, judeu domodoram tâzenagazeozemo tâise.

<sup>13</sup> Moisés ezewenry ara adatâoybymoem wâne, idânârâ Moisés inweniby agueho ara anipyramo olâ. “Xina eynynonro akaemo” tâkehomoem kulâ, arâ madatâodyzemo awylymo.

<sup>14</sup> Kâzehoguedo kuru olâ Kywymâry Jesus Cristo kâmakeze iguehobyry kruz wâgâ. Igueypy modo xirâ onro anano modogue nâtynanâdaymba, arâ lâpylâ, mâkâ kruz wâgâ igueypy kâinwândylygue, Deus ize ato agâ âseinwândânry modogue kâtynanâbyra wawyly. Cristo eynynâbaom modo âpaunzedo ara inkâba kâpaunzedyly.

<sup>15</sup> Deus xurâem, tâwâlâ Moisés ezewenry ara satâbybem, satâbyyemba warâ kydawyly. Deus kiuntudyze ato olâ iweloem kyedyly, ize kydato nhugukely warâ.

<sup>16</sup> Deus agâ augueday wauguely: “Pabai, koendâ iweloem ietyby modo egâ; ekuâdânimo peba iekâ, koendâ lelâ itomoem aienehongâ warâ, uguely. Tytyenzemo lâpylâ ikâ” uguely inanry. Arâ Deus agâ auguely âmaemo Galácia donro modo wâgâ kulelâ inkâba; idânârâ Deus xurâ modoem lâpylâ auguely.

<sup>17</sup> Kâenwanikehoem kuru olâ warâ auguely. Ânguyne iweâma yakaladâdombyra nidâ. Deus xurâ keba modo yapiogumo, toenzepa ienagazedâmo, Jesus kieinwântuo lelâ kydâsemaguely uguelygue. Xirâ yapioguhobyry olâ Jesus emary lelâlâ wawyly tânehonze.

*Kywymâry nhesemo*

<sup>18</sup> Kywymâry Jesus Cristoram âynynâmo kâenkadyly, koendâ mâzehohomoem.

Alâ kulâ ise âyanmo kâinwenily.

Paulo

## EFÊSIOS

### Paulo Kata Inweniby Êfeso Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbryrâ xirâ Paulo inweniby xidadâ Efesodâ Jesus einwânni modoram. Paulo Jesus Cristo wâgâ aguenriem kehobyry, Romadâ etadâdybyem tawlyly ume, ingonotyby xirâ kata Deuslâ myakâwândy iweniehoim. Azagâ tokalâ warâ unâ egatuze tâtâly ieto wâgâ, agui âji modoram tâtâze Jesus wâgâ unâ egatuze. Agui nunâ takaze târâ Efesodâ Jesus wâgâ egatuze, enomedâzemo warâ. Xirâ kata inwenily olâ myakâwândy iweâpa târâ eagâmba itybyem.

#### *Aguely adaguho*

<sup>1</sup> Urâ Paulo xirâ kata âyanmo iweninri. Cristo Jesus tywâgâ aguenriem ingonotyby urâ, Deus aguehobyry ara. Âmaemo Êfeso donro modoram xirâ kâingonodyly, Deus eynynnonro modoram. Cristo Jesus einwândyly mâinmowâbyra âmaemo, mâkâ xurâ mawlylymogue.

<sup>2</sup> Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânimo peba itoem warâ.

#### *Cristo eynynnonro kydawlylygue, koendonro ise Deus kyam nhuduly*

<sup>3</sup> Deus kyzehoguene. Kywymâry Jesus Cristo iDeusry, nhunwym warâ mâkâ. Cristo agâ tokalêlâ kydawlylygue, kagâ koendâ lelâlâ mâkâ. Kydâsemaguehoem, inakanhe aguitobyry xygakehoem warâ toenzepa aienibyryem Deus.

<sup>4</sup> Âdydo imeom tiungudyly iraynâlâ myakâwândy Deus kuduakely, xurâem kitoem, âdygue tâwentâzeba kitoem. Cristo tâinwânse kydawlyly tutuzelâ myakâwândy mâkâ, kieinwândylygue mawânâ xurâem kidyly.

<sup>5</sup> Kywynedylygue myakâwândy Deus, tymeryem kuduakely, Jesus Cristo kurâem anhetyby wâgâ. Arâ Deus aidyly myakâwândy, arâlâ mawânkâ myakâwândy aidyse awlyly, adidyse tato aralâ.

<sup>6</sup> Kagâ koendonro lelâlâ Deus. Aguely kieinwâmpyra kydawlyly umelâ myakâwâm koendonro tawlyly kyam nhenehonly. Tymery tinwynegyuly kurâem aitobyry wâgâ akâwâm Deus toenzepa koendâ tawlyly nhenehonly. Awylygue koendonroem awlyly wâgâ Deus kionmaendyly.

<sup>7</sup> Kruz wâgâ mawânkâ myakâwâm Cristo iguely, tunu tyapâze, inakanhe aguitobyry xygakeze. Cristo kieinwândyly-ro watay, tâzemakeroze kurâ. Awylygue akâwâm Deus inakanhe aguitobyry nhygakely. Tywykenry ara mâkâ kâendyly iwerâ, âdygue kâwentâdaymba. Warâ akâwâm toenzepa kagâ koendâ tawlyly Deus nhenehonly!

<sup>8</sup> Tâwânrempa idânârâ koendonro modo kyam nhuduly, typygueba kehoem.

Tonomegueim lelâlâ Deus.

<sup>9</sup> Awylylygue, “Aiese urâ” tâkehobyry anhedily. Iweâpalâ myakâwândy âdara kâmakely awlyly nhutuly, Jesus Cristo iguehobyry mawânâ kydâsemagueho, kurâ keba inakanhe aguitobyry wâgâ kyigueloem. Saguhoem ânguy nutuwâbyra myakâwâm kâmakehoem arâ Deus xunâry awlyly. Iwerâ olâ kurâ tutuze, Deus mawânkâ enehonwâm.

<sup>10</sup> Warâ myakâwândy xunâry: “Aitoem kâinduakeyby iume ise Cristo idânârâ tâlânro modo iwymâryem itoem agânhenehonly, iezano modo, onro wogonro modo alelâ iwymâryem itoem” kewânny Deus.

<sup>11</sup> Idânârâ aidyly Deus ize ato aralâ, saguhoem “Aiese urâ” kehobyry aralâ. Kydâtugudyly iraynâlâmy Deus kuduakewâm, xurâem kitoem. Cristo einwânniem kydawlyly tiuntuduo myakâwândy kuduakely.

<sup>12</sup> Iweâpalâ myakâwândy xina judeu domodo Messias âeni keho xina nhenuendyly. Saintuo, judeu domodo akâwâm waunroem kuru tâmakezeim, mâkâ nheinwântobyry wâgâ, judeu keba modo nheinwândylymy iraynâlâ. Aituo Deus turâem anhetyby tientuo, “Tonhonreim, koendonro warâ lelâlâ Deus!” xina kely.

<sup>13</sup> Ilâpyryem âmaemo judeu keba modo Cristo meinwânmmâmo lâpylâ, Deus itaumbryry âkealonro âyanmo egatuduo. Cristo einwântuo lelâ tâdâsemagueuly awlyly mâuntuduomo, meinwânmmâmo. Mâinwântuomo, Tyispiritury Deus igonomâ, xurâem mawlylymo xutuhoem. Deus aguely myakâwândy: “Yispiritury igonose urâ, ynynnonro modo agâ itoem” kely. Kysejiguy wâgâ kâzedy tywenize kurâ, kurâ xurâ awlyly xutuhoem, myara lâpylâ Deus Tyispiritury ingonodyly kagâ itoem, xurâem kydawlyly xutuhoem.

<sup>14</sup> Âdylâ kianâdyly-ro watay âdiempa tâpywaze wao kurâ, idânârâ epywaze kydawlyly xutuhoem, myarâ lâpylâ akâwâm Deus Tyispiritury ingonodyly, xypyry etay “Xuduze urâ”



kehobyry emakerin-em kydawyly kiuntuhoem. Awylygwe koendâ kiuntuly, xypyry etay âzemakero kydawyly idânârâ inakai modo amaymba, xurâ kydawylygwe. “Toenzepa tonhonreim, koendonro warâ âmâ” kykenre Deusram.

*Paulo Deus agâ aguehobyry Jesus einwânni modo wâgâ*

<sup>15</sup> Kywymâry Jesus toenzepa tâinwânsezêlâ âmaemo, kely tydase winase. Idânârâ Jesus eynynonro modo mâinwynedylymo, kely lâpylâ warâ.

<sup>16</sup> Arâ igarymo kâindadylygwe, warâ inanry Deusram auguely: “Koendonro lelâlâ âmâ, âynynonro Êfeso donro modo Jesus nheinwântoem, âpynedomoem warâ amânhenehonhomyry wâgâ” uguely. Aunlolâ inanry âmaemoem eyam kâenkadyly.

<sup>17</sup> Deus agâ augueday, auguely: “Kunwym, tohogueim, tonhonreim warâ âmâ! Pymâ Jesus Cristo iDeusry âmâ. Âynynonro Êfeso donro modo enomery xudugâ, koendâ âtuhomoem. Âispiritury eon-honruguelâ âdutuogâ, âdaunlo mawyly enehongâ warâ eyanmo.

<sup>18</sup> Awârâ mâenehonly koendâ eyanlo xutuen-hongâ, koendonro xurâmoem xuduze mawyly nhutuhomoem. Âmâlâ iduakerinmo; awylygwe ise xurâmoem koendonro mâenkanâdyby nhemakelymo. Eydâ matodâ toenzepa âdydo imeom koendonro modo, âynynonro modoram mâunduly ekanâdybybe awyly nhutuhomoem aienehongâ.

<sup>19</sup> On-honru imâsêdo lelâlâ awyly nhutudyzemo urâ, mârâ tozohonru xina Jesus einwânni modoram mâunduyy” tâkeze winase Deusram.

<sup>20</sup> Ton-honruguelâ myakâwâm Deus, Cristo igueypyem awyly ume, kurâem nhetondyly. Mârâ ton-honruguelâ myarâ kayam tâzaxi nhadyly, eahoru eynynâ mâkâ ekadybyem awyly, tynrenseim ekado wâgâ.

<sup>21</sup> Tonlo modo takaze iwerâ Cristo pymâ tonhonreinhe awyly. Idânârâ anju domodo iwymârydo iwymâry mâkâ: anju adâjidyly enuagaeni modo, anju tonhonreim modo, anju tâwanumo anhetoem agueim modo iwymâry warâ. Iwerâ xirâ anaym pymâdo xutuim mâkâ; wayam wauroem pymâ domodo iwymârylâ ise mâkâ-ro warâ. Cristo olâ idânârâ takazeno pymâ kuru.

<sup>22</sup> Idânârâ iwymâryem Cristo itoem aiemâmy Deus, tynynonro modo iwymâryem warâ.

<sup>23</sup> Kurâ Cristo einwânni modo kyangahu Cristo, kurâ pylâ sodo-ro warâ. Mâkâ emaynlâ idânârâ. Cristo pymâemba, tonhonremba warâ watay, âdy lâpeba tâise. Mâkâ mawânkâ idânârâ âji modo einkâ xutuim.

## 2

*Iweloem kydâieholy, Cristo agâlâ kydawylygwe*

<sup>1</sup> Saguhom Deus aguehobyry mâinwâmpyra minanemo, ize ato amânhepyramo warâ. Awylygwe Deus agâpa mawylymo, xurâem, igueypyen-ro waunlo ara, mâkâ agâ moxiobyra mawylymogwe.

<sup>2</sup> Deus eynynâbaom modo aito ara kulâ kâinane amidylymo. Satanâs kâinane mâinwânkylimo. Kadopâ modo iwymâry mâkâ, onro kau warâ ontay tâjikuneim modo. Mâkâ amânhetomoem aguehobyry kâinane amânhekylymo; mâkâ mawânkâ Deus einwântânry modo xutuim.

<sup>3</sup> Jesus kieinwândyly iraynâlâ inakai aguiendyse kydato adyese akâwâm kurâ. Deus ize ato mâkeba kâinane aguienkyly, kyangahu oday kunâgo warâ. Jesus kieinwâmpyra kurâ watay, kânagazenehondâ tâise Deus, tynynâbaom modo nhenagazedyly ise myara. Izepa ato adyese kâinane kurâ, anhetomo ara.

<sup>4</sup> Idânârâ Deus izepa ato aienibyryem kurâ, kytyembyra nipyra olâ, kagâ koendâ lelâ. Toenzepa mâkâ kywynedyly.

<sup>5</sup> Deus izepa ato aguientobyry wâgâ Deus agâpa ietybyem kydawyly umelâ, mâkâ xurâem igueypy ara kydawyly umelâ warâ, koendâ lelâ akâwâm kâendyly. Iweloem kyemâ, kâmakewâm warâ, Cristo kieinwântuo.

<sup>6</sup> Deus, Cristo kurâem nhetonduo, kurâem kitondoem aiemâ lâpylâ, Cristo Jesus agâ tokaleoem kydawylygwe. Deus, Cristo igueduo kurâem tyetonze myakâwâm, târâ kaynâ pymâem itoem. Arâ lâpylâ, Cristo xurâ kydawylygwe, kyigueduo kurâem kyetonze Deus, Cristo agâ pymâem kitoem.

<sup>7</sup> Arâ akâwâm Deus kywynedâ lelâlâ tawyly nhenehonly. Jesus Cristo kruz wâgâ iguely myakâwâm, kâmakehoem kywynedylygwe, arâ kehoem tywynezein-emba kydawyly umelâ. Warâ awylygwe ise iwerâ idânârâ âdutuoly Deus koendonro lelâlâ awyly.

<sup>8-9</sup> Deus kâmakely, Cristo Jesus kieinwântuo. Mâkâ kâmakely, koendâ aguitobyry wâgâ inkâba, kagâ koendâ tawylyguelâ. Koendonro aguienkyly lâpeba Deus kâmakehoem. Arâparo watay, kywâgâlâ tâise koendâ aguykely. “Deusram kâzemakero, koendonro wawylygwe” tâkeze tâise kurâ. Tâbyguepalâ Deus kâmakely; kyam nhudulylâ mârâ.

<sup>10</sup> Deuslâ kâmakeim, iwerâ emakeybyem kitoem. Cristo Jesus agâ tokaleoem kydawlygue, Deusram iweloem kydâieholy, koendonro aguienkyly kehobyry lelâ aguien-toem.

*Deus tokaleoem ara kyedyly, Cristo xurâ kydawlygue*

<sup>11</sup> Enanâgüewâdaungâ, saguhoem Deus xurâempa matomboery, Jesus Cristo mâinwândylymo iraynâ. Judeu mâkeba âmaemo, awylygue “tatâzenry” kelygue mâjigâseolyo judeu domodoram, “satâyby” kelymo pylâ tyanlâ-ro warâ. Uguondo tâmarygue anhetyby kulâ olâ awârâ.

<sup>12</sup> Saguhoem Cristo mâuntuba ani âmaemo, xina idamu Israel iweomboery keba mawyly-mogue. Xina Deus turâem induakeyby modo ara, judeu keba âmaemo. Saguhoem xina idamudo agâ myakâwâm Deus âseinwândyly adienkyly wâgâ, âdamudomo agâpa. Deus, “Ynynonro modoram xuduze urâ” keho mâenmakelymo mâinwânwâmpyra ani âmaemo, mâkâ lelâ Deus awyly mâuntuba mawylymogue.

<sup>13</sup> Iwerâ olâ âmaemo arâpa. Cristo kruz wâgâ tunu tyapâze iguely. Mâinwântuomo, Deus turâem âedâmo, âmaemo eydâ iwaguenopyry modo.

<sup>14</sup> Saguhoem judeu domodo, judeu keba modo warâ âjizepamo kâinane, sahodâdybyem iontaymo waunlo ara. Idânârâ kurâem olâ myakâwâm Cristo iguely, judeu domodoem, judeu keba modoem alelâ. Kieinwândylygue tokalelâ kydawlyly iwerâ. Warâ akâwâm kyewiâky nhainly, sahodâdobyry nhetyly-ro waunlo ara.

<sup>15</sup> Agui judeu domodo ezewenry inweniby tâdâturudo, agui lelâlâ agueho ara adâjito. Tyigueduo olâ, Cristo mârâ tâzezewenry sainwâm. Mârâ kieinwândylygue inkâba Deus kâmakely. Akaemo on-hoam itânry modo on-hoam tyenehonze akâwâm, judeu domodo, judeu keba modo warâ âpynedomoem.

<sup>16</sup> Tyigüehobyry wâgâ Cristo, judeu domodo, judeu keba modo agâ on-hoam nhedyly, tokaleoem itomoem, Deusram nhenetondylymo-ro warâ.

<sup>17</sup> Xirâ onro anaxi âemâ Cristo, âdara Deus agâ koendâ kidyly awyly egatuze. Âmaemo judeu keba modo Deusdâ iwagueno modoram unâ iwâkuru tâdâsemagueho egatuwâm, xina judeu eydâ iwaguepaom modoram warâ. Aituo nidadâ Deus agonro modo, Deus agâpaom modo alelâ.

<sup>18</sup> Cristo igüehobyry wâgâ, Deus Ispiritury kadyly, Kunwym Deus ezaxi eagâ aguykehoem.

<sup>19</sup> Arâ awylygue xina judeu domodo xurâem xina nhutudânryemba âmaemo iwerâ, âkeloemba warâ. Iweâma âmaemo Deus xurâ, xina ara. Cristo eynynâ xina ipemugu âmaemo; âjiunwym wogonro kurâ iwerâ.

<sup>20</sup> Âtâ ipery saunâtoem wâne tuhu modo iaxi tâiehozé, mârâ wâgâ pylâ ipery saunâdyly myara lâpylâ akâwâm unâ Jesus wâgâ agueim âzegatuoly ingonotyby modoram, eagonro kurâdoram lâpylâ warâ, mâkâ einwânni modo, nheinwânto ton-honremba nipyra itoem. Tuhu âtâ ipery sawoem ietyby xigâlegueam nihugueba itoem esebydâni, myara lâpylâ Cristo Jesus tynynonro modo esebydâniem awyly. Mâkâ peba-ro watay, ânguy nâsemaguewâbyra tâise. Âtâ tuhu wâgâ saunâtyby emyenro âmaemo.

<sup>21</sup> Âtâ itâdoem isejiguy taseudaynze wâne-ro myara lâpylâ Kywymâry Jesus, judeu domodo, judeu keba modo agâ on-hoam nhedyly, âjigüeto ara lelâ itomoem. Arâ kurâ idânârâ Jesus einwânni modo âtâ tokaleoem Deus etyem kydawlyly. Jesus pylâ mârâ tuhu âtâ esebydâdo emyenro-ro warâ.

<sup>22</sup> Cristo xurâ mawylymogue, Deus Ispiritury etyem mâieholymo, idânârâ einwânni modo agâ. Awylygue tâwâlâ “Deus ety kurâ” kykely.

### 3

*Paulo judeu keba modoram igonotobyry, Jesus wâgâ agueze*

<sup>1</sup> Urâ Paulo, Cristo Jesus emary wawylygue tarâ ietagu, âmaemo judeu keba modoram unâ iwâkuru kâengatulygue.

<sup>2</sup> Tutuze lelâlâ âmaemo, yagâ koendâ tawylygue Deus uduakehobyry iewanu nhuduhobyry warâ, judeu keba modoem koendâ itoem.

<sup>3-6</sup> Adaguday warâ myakâwândy Deus ize awyly. “Kâinduakeyby awylygue ise judeu domodoram koendonro kâunduly. Judeu keba modo Cristo nheinwândylymo watay olâ, xurâmoem koendonro xuduze lâpylâ urâ. Judeu domodo, judeu keba modo warâ tokaleom ara lelâ ise kâendylymo, âikâlâ mâkâ, âikâlâ mâkâ warâpa” kewânmy Deus.

Saguhoem tâgatuwâduneba myakâwândy xirâ Deus xunâry; ânguy nutuwâbyra myakâwândy. Iwerâ olâ Tyispirituryguelâ xirâ unâ nhutuen-honly. Tinduakeyby modoram nutuen-ho, tywâgâ aguehoem tingonotyby modoram warâ. Yam nâzegatuo

lâpylâ xirâ unâ saguhoem tâgatuzyenrybyry, kâuntuhoem. Idânârâ Cristo Jesus einwânni modo wâgâ âdiempa tywenizelâ urâ. Deus xurâem, judeu domodo, judeu keba modo warâ âzekiba lelâ itomoem. Xirâ âyanmo kâinweniby mâintainduomo, xutuze âmaemo yam tunâry xutuenhoimbyryem Deus awyly. Xutuze lâpylâ âmaemo, Cristo Jesus einwânni modo tâsemagueze awyly, judeu, judeu keba alêlâ.

<sup>7</sup> Cristo xurâem iewano unâ iwâkuru egatuly mâkâ wâgâ. Yagâ koendâ akâwâm Deus, ienomedâmâ warâ, mâkâ eon-honruguelâ xirâ âwanu agânhetoem.

<sup>8</sup> Idânârâ Deus eynynonro modo takazeno mâkeba urâ. Arâlâ yagâ koendâ olâ akâwâm Deus. Unâ Cristo Jesus wâgâ agueim judeu keba modoram egatuly iewanuem xuduwâm, Cristo wâgâ Deus kurâem koendâ awyly wâgâ auguehoem. Cristo kiuntuduo, koendonro kienmakely mârâ typyguenry kehoem.

<sup>9</sup> Deus uduakewâm, idânârâ kurâdorom xirâ tutuzenry kâengatuhoem, âdara tynynonro modo nhemakely awyly wâgâ auguehoem. Adagudaylâ, idânârâ tâlânro modo nhugutay, nutuen-honwâbyra myakâwândy saguhobyry modoram.

<sup>10</sup> Anju domodo nutuwâbyramo myakâwândy, âdara Deus xunâry awyly kâmakehoem. Judeu domodo, judeu keba modo warâ on-hoam lelâ Cristo nheinwândylymo wâgâ, tokalelâ awyly wâgâ olâ ise nhutulymo kuru, Deus tonomegueim lelâlâ awyly.

<sup>11</sup> Deus âpaunzedily myakâwândy, kaudily iraynâlâ, “Mâkâ tâdâsemaguehoem kâingonokily einwânni modo urâem ietaynze urâ” kely. Awârâ mawânkâ mâkâ anhekyly iwerâ. Mâkâ kâmakely Cristo Jesus kieinwântuo lelâ.

<sup>12</sup> Cristo kieinwândylygue, xurâem kydawilygue warâ, tyanepa kurâ, Deus agâ aguykehoem enado. Tutuze kurâ, mâkâ kydatâ awyly, aguykeho tywantagueze awyly warâ.

<sup>13</sup> Iwerâ etadâdybyem kâsenagazedily, unâ koendonro Jesus wâgâ âyanmo kâengatulygue. Awârâ wâgâ kulâ âtywandylymo tâiseba olâ itaungâ. Mâsemaguehomoem omaromo warâ auguehobyry wâgâlâ xirâ kâsenagazedily.

*Paulo Efesodâ Jesus einwânni modo eynynâ Deus agâ aguehobyry*

<sup>14</sup> Deus anhetbyby modo wâgâ kâpaunzeduo, Kunwym enado âzeguhoam tâise urâ, eagâ auguehoem.

<sup>15</sup> Idânârâ kurâ domodo nhunwym lelâlâ Deus, târâ kaynâ tynynonro modo, tarâ onro wogonro modo alêlâ.

<sup>16</sup> Awylygue warâ auguely Deusram, âmaemoem: “Pabai, toenzepa koendonro modobe âmâ âynynonro modoem, toenzepa lelâlâ, sapâguely eki kehoem. Awylygue kâenkadyly, Âspiritury eagâmo adakobâniram âynynonro Êfeso donro modo eon-honwanâdoem, tonhonre lelâ itomoem, Cristo einwândily nimopa itomoem” uguely.

<sup>17</sup> Deusram kâenkaguly lâpylâ, aunloenlâ odaymo Cristo itoem, mâinwândylymoguelâ lelâlâ, aunlolâ âwynedomoem warâ. Arâ ise se âjiwindytâdyby, âtâ tâhugane kehoem aietyby warâ wâne nihugeba awyly myara mawylymo.

<sup>18</sup> Arâ ise âmaemo, idânârâ Deus eynynonro modo toenzepa kywynedâ Cristo awyly mâuntulymo. Toenzepa lelâlâ mâkâ kywynedyly, etaydygu, iwague awyly, kayam, ondaxi esanigu warâ ekudoem nudupa.

<sup>19</sup> Ânguy koendâ nhutulymba lelâlâ Cristo kywynedyly. Mâuntulymo olâ ize wato kuru, awylygue Deusram kâenkadyly âmaemoem, aito ara, agueho ara warâ lelâ amitomoem.

<sup>20</sup> Deus koendâ awyly wâgâ, eon-honru wâgâ warâ aguykenre. Anhetoem kienkagulyly takaze kehoem adyese Deus ton-honrugue. Ton-honre Deus imâsedo kehoem aiese; kienkadyby, kyangahu oday kunâgo warâ takaze kehoem adyese, mâkâ eon-honru kywâgâ aito ara.

<sup>21</sup> Deus koendâ awyly wâgâ aguykenre, kynynâ anhekyly wâgâ, Cristo Jesus anhekyly wâgâ warâ. Idânârâ anhekyly wâgâ aunlolâ aguykenre. Tâjiunwyndo negatumo tymeonram, tyweonram warâ. Arâlâ nidâ.

## 4

*Cristo xurâ kydawilygue, tokaleoem lelâ kurâ*

<sup>1</sup> Awylygue urâ, Kywymâry Jesus Cristo xurâem iewanugue kulâ etadâdyby, âurudylymo. Xurâem mitomoem Deus âgâsedaymo, mâkâ ize ato ara amidilymo, aguehobyry amânhedilymo warâ ani mâkâ ize awyly. Awylygue mâkâ xunâry ara lelâ aitaungâ.

<sup>2</sup> Agonromo sakaze tâkezeba itaungâ. Inepa kehoem tyewiâpazeba itaungâ. Mâzenagaeoduomo, inepa âpeânze tâkezeba itaungâ. Agonro agâ tâpyneze mawylymo enehonwâdaungâ. Inakanhe aitomo emaenwâdaungâ, eagâmo âewiâpabyramolâ.

<sup>3</sup> Æsegamiwâdaungâ agonromo agâ mâjihoguba, mâtuebabyra warâ mitomoem. Deus Ispirity tokaleoem âedâmo. Aituo, âzeon-hondâdaungâ agonromo agâ mâseinwâbyra mipyra mitomoem.

<sup>4</sup> Mârâ, mârâ warâ wâne kodo wogonro, tokalelâ olâ, arâ lâpylâ tokaleoem kydawyly, kurâ Jesus einwânni modo toenzepa kydawyly umelâ. Tokalâ kulâ Ispirity idânârâ kagonro olâ Deus Ispirity lelâ. Tokalelâ kydâsenuendo, Deus koendonro adâkehobyry ara kyam nhuduly lelâ.

<sup>5</sup> Tokalelâ Kywymâry. Tokalelâ unâ kieinwânkily, Deus itaumbry lelâ. Tokalâ wâgâ lelâ batiza kydâieholy, Jesus einwânnipyryem kydawyly kienehon-hoem lelâ.

<sup>6</sup> Tokalelâ Deus idânârâ kionmaenguly; idânârâ Kunwym, kywymâry, kagâlâ, kâentâ lelâ warâ mawânkâ.

<sup>7</sup> Cristo olâ âikâ, âikâ warâ konomery xuduim, Deus xurâem aguitoem. Ize tato ara âikâ, âikâ warâ konomery nhuduly.

<sup>8</sup> Deus itaumbry awo wâgâ iwenihobyry ara aidyly.

“Kayam tâkuday, tagâ tase akâwâm eagâ tâjitoguyday emaendânrybyry modo. Deus xurâ modoram koendonro modo tuduze akâwâm.”

<sup>9</sup> Âdakezeka “Kayam tâkuday” kely? Âji onwogonrodâpa, âji kaynonroam tâdâtâly agueho. “Cristo kayam âkuly” keduo, tâdutuoze onwâgâ awyly, onro onwa xytâguybyem awyly warâ. Uguondoem tâise myakâwâm, xirâ onro anaxi tytâguyhoem.

<sup>10</sup> Xytâguyby, âkuondybylâ mawânkâ mâkâ. Kayam âkuly, kau tâenseim takaze, Deus eydâ atoam lelâlâ. Mâkâ âkuly, idânârâam tâdyren-hon-hoem, kaynonro modoram, tarâ onro wogonro modoram alelâ.

<sup>11</sup> Cristolâ tynnonro modo enomedâni, turâem tâwaneinhe. Tarâ onro anaym tatay tagonropyry modo ewy iduakewâm, “apóstolos” kelygue tâzekeim akaemo. Cristo aguehobyry tindatyby egaturin-em, adâitobyry modo nhetybymo egaturin-em ani akaemo nhenomedâdily, ingonodyly warâ. Kurâdo ewy nenomedâdâ mâkâ, Deus tyam nhenehoymby, koendâ typemugudoram egaturin-em; “profetas” kelygue tâzekeim akaemo. Tâlâ mâkâ myarâ, myarâ warâ unâ tâdâsemagueho egaturin-em nhenomedâdily; “evangelistas” kelygue tâzekeim akaemo. Tâlâ lâpylâ tynnonro modo eniem, xuruniem, Deus itaumbry iwenibygue enomedâniem warâ nhenomedâdilyby “pastores” kelygue tâzekeim akaemo.

<sup>12</sup> Warâ Cristo konomedâdily, âjigie kydohondoem, Deus emaryem kitoem, arâ tonhonre kuru einwânniem kydawyly itoem warâ.

<sup>13</sup> Arâ kagonro agâ kydâsemawadâdily watay, kieinwândyse Deus ato ara ise Cristo kieinwândily, Deus imery kiuntuly imâem iese kurâ warâ. Egâ wâneam iamudo. Tyazepygueduo, imeimbyryem, ton-honremba warâ. Imâem tâise olâ, ton-honwanze warâ, xutuybyem tâituo. Arâ lâpylâ kurâ. Iwelo Cristo einwânniem kituo, mâkâ wâgâ imâem kiuntuwâbyra kurâ; imâem kiuntuly agâlâ pylâ ize ato ara lelâ aguissezedyly-ro warâ.

<sup>14</sup> Cristo koendâ kiuntuduo, iamudo âdylâ tindatyby einwânni arapa tâise kurâ. Kydâzenokuowâbyra kurâ, akaemo iozepa kulâ Cristo wâgâ egatuwâni modoram. Pepi wâne, tâynâ paru sahugânuram âzepâgueoly, taynynâ sapezenru ton-honrein-am âjigonoholy warâ myarapa kurâ. Akaemo iozepa kulâ unâ egatuwâni modo toenzepa tydani modo nhenokudyly, adâkely nheinwântomoem, ânwa iozeno ozepa nhedyly waunlo ara.

<sup>15</sup> Ânguy kienokubyra olâ kine. Ioze lelâ Deus wâgâ aguykenre; âjigie kydâpynene warâ. Arâ ise imâem kiuntuly, Cristo ara kydawyly, kyangahu mawânkâ kuturim.

<sup>16</sup> Idânârâ tynnonro modo on-hoam tyese Cristo, kânedy modo wâne idânârâ kuoday on-hoam tâise myara. Koendâ lelâ kodo âsewanily-ro watay, ton-honre lelâ ago idyly. Arâ lâpylâ Jesus einwânni modo âjigie tâpyneze lelâ watay, Cristo konomedâdobyry ara lelâ aguidyly watay, kieinwândily imâem idyly. Cristo kyize ato ara kydawyly. Iamudo ara kulâba kydawyly. MAH alelâ koendâ kehoem kindadyly, Deus kyam aguehobyry Cristo kohondâdobyry awylygue.

*Jesus eynynâbaom modo aito ara inkâba aitaungâ*

<sup>17</sup> Kywymâry Jesus xurâem agueim wawylygue, ton-honre kehoem âurudylymo. Jesus xurâ keba modo aito araba aitaungâ. Âdyem nitaymba akaemo tyangahu oday xunâgo.

<sup>18</sup> Deus âdaunlo awyly, aguehobyry warâ nutuwâbyramo; nhangahumo oday tyame. Eganumo; Deus agueho tindadysebamo warâ. Awylygue nutuba awylymo, Deus tygâsedily Jesus tyeinwântoem, tâsemaguehomoem.

<sup>19</sup> Âdy tâjiwypadyly keho awyly nutuba itybyem tawlylymogue, inakanhe adâidysemo watay, adâiseimo; kywypado adiendysemo watay, adyeseimo. Aunlolâ Deus izepa ato anhesezedylymo. Deus xurâem inakai aiedily nimowâbyra akaemo. Deus xurâem olâ tywângueim ara kulâ anhekylymo.

<sup>20</sup> Cristo einwânniem mituomo, tâduruhoze ani âmaemo, âdalâ kulâ amipyra mitomoem, amygepa mitomoem warâ.

<sup>21</sup> Jesus wâgâ aguely tydase ani âmaemo, eynynâ aguwâni modo agueduo. Tutuze urâ, ioze lelâ akaemo Jesus wâgâ inomedâdomobyry.

<sup>22-23</sup> Cristo eynynonroem midylo mo iraynâ, tâwâlâ kulâ akâwâm inakanhe midylo mo, inakai modo kulâ amânhedyse matomo awylygue. Inakanhe adâjitoam kulâ mâzenokuolyoro waunlo ara. Ânwa iozepa kulâ kani emyenro mârâ Deus izepa ato aiedyly amânhedyse matomo. Mâduruhowânmolâ olâ awârâ wâgâ. Awylygue, ekadaungâ Deusram, amânhedyse matomo, angahumo oday âunârymo warâ iweloem nhetondoem.

<sup>24</sup> Iweloem âedâmo Deus. Awylygue koendâ lelâ aitaungâ, Deus ize ato ara lelâ, eara kuru misezedomoem. Saguhoem amitomobyry imowâdaungâ, itymo tywykeim mâentylymo wâne, tywykenry mânhetomoem myara.

*Kieinwântuo, iweloem kyenehondâ Cristo*

<sup>25</sup> Iweloem ietybyem âmaemo. Awylygue tâdâsenogudyly imowâdaungâ. Âkeâ lelâlâ aguwâtaungâ Cristo eynynâ âpemugudo agâ, tokaleoem itybyma âmaemo, tokalelâ wâne kodo kâsebydâni myara.

<sup>26</sup> Âewiâpadylymo-ro watay, Deus izepa ato amânhedylymo tâiseba itaungâ, âewiâpaduomo kulâ. Inepa âewiâkymo nadaim, iguandyly ara kehoem waypa.

<sup>27</sup> Satanâs inokudomoem aienehoim âdy akâiedaundâ. Âewiâpadylymo-ro watay, Satanâs inokudomoem amânhenonhonylo kulâ mawânâ. Âduerymo egawântoem pyanta mâenahunguelymo waunlo ara, ton-honremba midylymo.

<sup>28</sup> Tâmagazeimbyry modo, tâmagaguy nimo. Nâsewanimo, idânârâ ize tatomobe lelâ itomoem. Arâ ise âdypebaom modoram nhudulymobe awyly.

<sup>29</sup> Amyguelymo idani modo tohogueba ienehonri, itywanânehonri, iewiâpanânehonri warâ adâkezeba itaungâ. Koendâ lelâ aguwâtaungâ, imâem Cristo nheinwântomoem. Koendâ lelâ âdanimoram aguwâtaungâ, amyguelymoguelâ moeon-hondâdomoem, mâunrutomoem warâ.

<sup>30</sup> Tyispiriturylâ ani Deus ingonokyly, agâmo itoem, xurâ mawylymo âdutuohoem. Deus Ispiritury agâmo awylygue, tutuze âmaemo, Cristo odopâduo, âsemagueze mawylymo; âigueompyramo, iwâmapyramo, mâjityembyramo warâ ise. Awylygue Deus Ispiritury izepa ato akâiedaundâ; kâjitywanânehonwâdaundâ.

<sup>31</sup> Âdylâ inakai âynynâmo aiedyly watay, “Kâenanânehomba ise urâ; koendâ witombyra ise urâ inakai urâem aienibyry agâ” tâkezeba itaungâ; âdylâ kytay tudureimpe-ro waunlo ara awârâ wâgâ kydâpaunzezeduo. Tyewiâpazeba itaungâ; tadaenkezeba itaungâ âewiâkymogue. Âjigüe tâtuagazeba itaungâ. Ânguy kâjiwykewâdaundâ. Tumunremba itaungâ.

<sup>32</sup> Âkelomo agâ koendâ itaungâ, ityendaungâ warâ. Âynynâmo inakai aietyby enanânehonwâdaungâ, Cristo anhetyby wâgâ Deus inakai amânhetybymo nhenanânehonhomyry ara, nhygakehobyry ara warâ.

## 5

*Deus xurâ modo âdara aidyly awyly xutuho*

<sup>1</sup> “Ymeom kâinwynegyuly modo” tâkeze Deus âyanmo. Awylygue mâkâ aito ara lelâ aitaungâ.

<sup>2</sup> Aunlolâ agonromo agâ âpynedaungâ, Cristo kywynedo ara. Toenzepa kywynedylygue myakâwâm iguely kâmakehoem, ânguydo imeom Deus etydâ egamehobyry ara. Ânguydo imeom tyam egameyby koendâ kehoem nhârângu tindatuo, toenzepa Deus ize awyly, arâ lâpylâ Cristo adâkehobyry anhetuo toenzepa ize awyly.

<sup>3</sup> Deus xurâ âmaemo. Awylygue, tâjiso modo, âwydymo keba kulâ kâdynanâdaundâ. Tâjijwydy modo lâpylâ osomo keba kulâ âynanâbyramo nidâ. Angahumo oday awârâ peba nidâ. Toenzepa âdype, dinherube warâ midylymo kulâ mâkeba ize matomo nidâ. Awârâ inakanhe âenehoimmo peba nidâ, Deus xurâ keba modo âdygue inwentâbyramo itoem.

<sup>4</sup> Amyguedaymo, inwankurumoenlâ inakai modo adâkezeba itaungâ. Kywypado modo kulâ mâengatulymo tâiseba itaungâ. Arâ agueim keba âmaemo. Agâmo koendâ Deus awyly wâgâ aguwâtaungâ; âmaemoem koendonro anhetyby egatuwâdaungâ.

<sup>5</sup> Xirâ mâuntudyzemo wato. Tohogüin-hobyry keba kulâ xynanâni modo, kywypado aieni modo, toenzepa âdype tâidysonro modo warâ, Deusram nekabyra adâitobyry modo nhygakehoen-ro watay, Cristo, Kunwym Deus warâ pymâem atoram negawântaymbamo ise, tyigueduomo. (Toenzepa âdype tâidysonro modo tâlâ tato kulâ mawânkâ inwynegyulymo kuru, Deus keba.)

*Kywymâry Jesus ize ato xutuwâdaungâ*

<sup>6</sup> “Tohogüin-hobyry keba xynanâni modo; toenzepa tysejiguybe tâidyse donro modo; kywypado aieni modo warâ Deus nenagazenehomba ise” keim modobe, kewâdylimo kulâ olâ. Agueim modoram tâzenokuozeba itaungâ. Izepa tato aietaynrim modo enagazenehonze Deus.

<sup>7</sup> Awylygue, Deus izepa ato anhekylymo akâiedaundâ.

<sup>8</sup> Saguhoem iamu oday adakobâni ara myakâwâm âmaemo, Deus mâuntuba mawlyly-mogue. Iwerâ olâ Kywymâry Jesus âyanmo nutuen-ho, iajimanâdybyem âmaemo iamu dunanopyryem. Awylygue koendonro lelâ aietaungâ, Deus xurâem mawlylymo mâenehonomoem.

<sup>9</sup> Cristo tonomedâdobyry ara lelâ aini mawânkâ tânehonze koendonro tawlyly, âdaini keba, âdaunloenlâ ânguy enokuni keba tawlyly warâ.

<sup>10</sup> Kywymâry Jesus ize ato xutuwâdaungâ.

<sup>11</sup> Âdaunloenlâ Deus eynynâbaom modo anhekyly akâiedaundâ, aguehomo ara adâkezeba itaungâ warâ. Iamu oday ânwa ozeba kulâ idânri emyenro akaemo. Anipyra itomoem, aguepa itomoem warâ xurutaungâmo, Deus agueho araba tawlyly nhutihomoem.

<sup>12</sup> Kywypadoem mawânâ totoenze anhekylymo wâgâ aguely.

<sup>13</sup> Âdylâ iajinuram kiandyly watay, âdy awyly tâzehoze, arâ lâpylâ, inakai anhekylymo kiuntuen-honduo, idânârâ âdutuoly akaemo inakai modo aieni awyly.

<sup>14</sup> Awylygue, Cristo tâinwânse kurâ-ro watay, iajinu oday adakobâni ara kurâ, iamu duay adakobâni araba. Warâ aguehonly:

“Âmâ xykyby emyenro, âwaguegâl

Igueypy emyenro, aukâl

Deus itaumbry mâuntuhoem mâindatoem warâ aienehonze Cristo,

iajinu soentyby nhenehon-ho ara”

kehonly.

<sup>15</sup> Tâmaynelâ itaungâ amânhekylymo wâgâ, amyguehomo wâgâ warâ. Tonomegueinhe itaungâ, ânguydoem kulâ inkâba.

<sup>16</sup> Âdiempa kulâ xirâ anaym kydawyly. Awylygue, Deus xurâem adâjitobe ataylâ, âzeonhondâdaungâ, mâkâ ize ato amânhetomoem. Toenzepa inakanhe kulâ adâjityn-ho modo iwerâ.

<sup>17</sup> Âdy xutudânry araba itaungâ; âdy Kywymâry Jesus ize ato awyly xutuwâdaungâ.

<sup>18</sup> Toku ikaji tâiseba itaungâ. Toku ikaji midyly-ro watay, kywypado kulâ ise amânhekylymo. Deus Ispirityry amânhetomoem aguehobyrylâ aietaungâ, omazehomoem.

<sup>19</sup> Tâzeremu Deus wâgâ agueingue âgâtudaungâ, agonromo agâ mâsegamihomoem. Deus itaumbry awo wâgâ iwenibygue âgâtudaungâ, livru Salmos wogonrogue. Deus wâgâ agueingue âgâtudaungâ, kurâem anhetyby wâgâ warâ. Deus Ispirityry tâjigâky nhuduypygue âgâtudaungâ. Tuomare kehoem âgâtudaungâ, âgâtudyze mawlylymogue kehoem, âkelo igâky mâindadylymogue kulâ warâ inkâba.

<sup>20</sup> Kunwym Deusram wamyguepa tâiseba itaungâ: “Koendonro lelâlâ âmâ, urâem Pymâ Jesus Cristo anhetyby modo wâgâ” kewâtaungâ eyam.

*Iso, iwidy warâ âdara aidyly awyly xutuhô*

<sup>21</sup> Agonromo einwântaungâ, Cristo tynrense mawlylymo mâenehon-homoem.

<sup>22</sup> Tâjiwysaro modo, osomo aguehobyry aietaungâ, Kywymâry Jesus aguehobyry ara.

<sup>23</sup> Tâjiso mawânkâ tywydy xuturim, Cristo tynynonro modo nhutuhô ara. Kâmakeim mâkâ Cristo, kieinwântuo. Kyangahu mâkâ Cristo, sodo emyenro pylâ kurâ-ro warâ.

<sup>24</sup> Cristo kieinwânto ara, arâ lâpylâ tâjiwysaro modo tuso neinwândâmo.

<sup>25</sup> Tâjiso modo, âwydymo koendâ etaungâ, iwynedaungâ, Cristo kywynedo ara. Kywynedylyguelâ myakâwâm iguely kâmakeze.

<sup>26</sup> Tâwentâzeba kitoem myakâwâm iguely, Deus xurâem tywykeba kitoem. Deus itaumbry kieinwândyly, Jesus kieinwândyly warâ watay, âsemagueybyem kurâ. Batiza kydâiehoduo, inakanhe kydawyly amaymba Jesus kyetobyry kienehonly.

<sup>27</sup> Koendâ tynynonro modoem aidyly, âdygue tâwentâzeba, tywykeba warâ. Arâ lâpylâ aunloenlâ xurâem eagâ kitoem ize awyly, tywykeba, pekodo tywâkureim, tygatygâgueny, pagu pebaom waunlo ara.

<sup>28</sup> Alâpylâ tâjiso modo, âwydymo iwynedaungâ. Tâwâlâ mâzetomo ara, mohondomo ara warâ etaungâ.

<sup>29</sup> Ânguy todo niompyra nitaymba. Tâwinduase kurâ, kodo tâwânepa itoem, ton-honre lelâ itoem warâ, Cristo tynynonro modo nheto ara.

<sup>30</sup> Kâentâ mâkâ, xurâ kydawylygue, sodo emyenro kydawylygue.

<sup>31</sup> Deus itaumbyry awo wâgâ iwenibyem: “Tohogüinduo, tunwym, tyze warâ agâpa tâise uguondo, tywydy agâ tokaleoem tâitoem” warâ iwenibyem awly.

<sup>32</sup> Iso, iwydy warâ tokalelá idyly wâgâ kyam Deus nhutuen-honly, Cristo kieinwântuo, eagâ tokalelá kidyly awlyly kiuntuhoem.

<sup>33</sup> Cristo agâ tokalelá kydawlyly wâgâ auguelâ wâne, xirâ auguely olâ ohogüinwâdyby modoromo, tokalelá mawânkâ ohogüimby modo. Awlylygue, tâjisodo, âwydymo nhontaungâ, tâwâlâ mohondomo ara. Tâjiwysarodoam xirâ augueondyly. Osomo xyrentaungâ, pymâ mâynrentomo ara.

## 6

### *Tâjimery, tâjiunwym warâ wâgâ agueho*

<sup>1</sup> Tâjimeombyry, Cristo einwânî mawlymogue unwânmo, âzemo warâ einwântaungâ. Aguehomo ara lelâ amidylymo koendonro kuru.

<sup>2-3</sup> Deus, Moisésram xirâ iweniehonwâm: “Unwânmo, âzemo warâ einwântaungâ. Arâ lelâ amidylymo-ro watay, iweâpa ise âmaemo onro wâgâ” kewândy. Agui tâzezewenry Deus, Moisésram inwenien-hoymby duay, xirâ lelâ warâ ise aidyly keim.

<sup>4</sup> Tâjiunwym modo, âmerymo kâjiewiâpanâdaundâ. Mâenamanâdaymo, koendâ enomedâdaungâmo, xurutaungâmo warâ, Kywymâry Jesus konomedâdobyry ara.

### *Pymâ, tâwanuneim modo warâ âdara aidylymo awlyly xutuho*

<sup>5</sup> Tâwanuneim modo, âwymârymo einwântaungâ; aguehobyry aietaungâ. Âwankuem kâietaundâ. Amânhedyse mawlymogueuêlâ aietaungâ, Cristo xurâenlâ amânhedilymo-ro waunlo ara lelâ.

<sup>6</sup> Aunlolâ mâkâ einwântaungâ, inuagaendylymo ume kulelâ inkâba. “Ywymâry ienuagaendyly ume lelâ ise, koendâ kâsewanily, koendâ ywâgâ aguehoem. Ienuagaembyra ituo, kâsewaniba ise urâ” tâkezeba itaungâ. Aypa, âsewaniwâdaungâ, amânhedyse mawlymogueuêlâ, Cristo xurâenlâ amidylymo-ro waunlo ara lelâ, arâ mawânkâ Deus aguidyse awlyly.

<sup>7</sup> Warâ angahumo oday âunârymo nidâ: “Kywymâry Jesus Cristo xurâenlâ awidyly, tarâ agânhetuem ageuim xurâem kulelâ inkâba. Awlylygue ise tuomare, tugüigue warâ kâsewanily” kewâtaungâ.

<sup>8</sup> Enanâguewâdaungâ, idânârâ kurâ domodo koendâ âsewaniwâdyby epywaze Kywymâry Jesus awlyly, tâwaneim, pymâ alelâ.

<sup>9</sup> Pymâ domodo, âmaemoem tâwanuneim modo agâ koendâ itaungâ. Mâeunsedylymo tâiseba itaungâ. Enanâguewâdaungâ, pymâ kurugue tywymâgueim mawlylymo, Kywymâry Jesus Deus enadonroque, âmaemo, agâmo tâwaneim modo alelâ. Âzekiba lelâ mâkâ idânârâ kâendyly.

### *Deus kuahuru nhuduho, Satanás kyanâbyra itoem*

<sup>10</sup> Kâinwenily kâympygueândoem kuru warâ auguely. Kywymâry Jesus agâ tokaleoem itaungâ, eon-honru imâsedogue mâzeon-hondâdomoem. Arâ ise, on-honrumo mâsemaguehomoem, Satanás, Deus mâinwâmpyra mitomoem aienehonze keduo.

<sup>11</sup> Deus âyanmo nhuduypygue, Satanás amaymba mâsemaguehomoem on-hondybyem lelâ itaungâ, sodadu tohonzê, tâzetydâze warâ tâseguebyday, tâsemaguehoem myara. Sodadu tuduery emaxi itânry ara ise âmaemo. Tonomegueim mawânkâ Satanás. Inokuzemo keze, todû eni wânê mydy tygase tywâly tienokudoem myara.

<sup>12</sup> Kurâ domodo agâpa mawânârâ kydâseguebyly, Satanás agâ, tâensenny inakai modo eon-honru agâ warâ. Iamyra domodo, kadopâ modo iwymârydo agâ warâ kydâseguebyly, âji inakaidâ, kyaneni, tyameim odano iwymârydo agâ. “Âji inakai, kyaneni, tyameim” uguely, idânârâ inakai Deus izepa ato târâlâ âewlyly awlylygue. Kadopâ modo tâjidydâba âeni modo agâ xirâ kydâseguebyly.

<sup>13</sup> Awlylygue Deus mâsemaguehomoem nhuduwâtyby modoguelâ âtuahuwâdaungâ. Arâ ise igatubyra mawlylymo, sodadu tâeganeim wânê âseguebyly lelâ myara, Satanás agâ mâseguebyhomoem, xypyry etaji kehoem. Madameoba ise âmaemo, ton-honre lelâ.

<sup>14</sup> On-hondybyem lelâ itaungâ. Âkeâ lelâlâ amyguehomo nidâ, amânhekylymo nidâ warâ. Arâ ise on-hondybyem mawlylymo sodadu tywanxiery ienipyry ara. Iozeno lelâ aietaungâ. Mârâ tuhohu, tykary warâ xuahuruem sodadu nhekyly wânê myara ise awârâ, ioze lelâ amidylymo watay.

<sup>15</sup> Unâ iwâkuru tâdâsemagueho mâengatuhomoem on-hondybyem itaungâ. Arâ-ro watay, koendâ lelâ ise Deus agâ mawlylymo, sodadu wâne tuhuru etary tyese, tâseguebyday neweseba tâitoem, myara ise awârâ tâdâsemagueho mâengatulylymo watay.

<sup>16</sup> Jesus Cristo einwândyly kâjimowâdaundâ. Satanás angahumo sagâikeze kely Jesus mâinwâmpyra mitomoem watay, aguely kâjidataundâ. Sodadu wâne âtuahuhobe tuduery ipy tohorein-am tyâzêpa tâitoem myara ise awârâ Jesus mâinwânsezedylymo âwahulymo.

<sup>17</sup> Âkeá kuru âsemaguerin-em mawylymo xutuwâdaungâ. Mâuntulymo watay, Satanás âyanmo, “Emakeybyem inkâba âmaemo” keduo, âdaunloenlâ agueho mâinwantaguedaymbe ise âmaemo, sodadu tyangahu ety tyese, tuduery tyangahudâ tyâpa itoem myara. Deus itaumbry Deus Ispiritury nhuduypy angahumo odaji ietaungâ, âduerymo agueho mâinhoguhomoem sodadu typygue âpeândo ara.

<sup>18</sup> Deus agâ amyguepa tâiseba itaungâ. Ekadaungâ mâkâ on-honwanâdomoem. Deus agâ amyguedaymo, agâmolâ Deus Ispiritury nidâ; mâkâlâ ise amyguehomoem agueim. Inanaynmolâ itaungâ. Âdara mataymolâ Deus agâ amyguepa tâiseba itaungâ. Aunlolâ eynynonro modo xurâem aguewâtaungâ.

<sup>19</sup> Urâem ekadaungâ lâpylâ. “Pabai, Paulo xunâry âundugâ, aguedyse mato, âwâgâ agueduo. Tyaneba âtaumbry aguehoem aienehongâ, unâ iwelo mâuntuen-honly, unâ iwâkuru Jesus kieinwântuo tâdâsemagueho” kewâtaungâ Deusram.

<sup>20</sup> Tarâ ietagu, xirâ unâ iwâkuru egaturin-em wawylygue, itaumbry egatuze Pymâ Jesus ugonotuo. “Pabai, Paulo eon-hondâgâ, Jesus wâgâ tyaneba aguehoem. Saguhom tutuzeba myakâwândy xirâ unâ, iwerâ olâ xutuen-hoimbyryem âmâ” kewâtaungâ Deusram.

*Paulo adâkely nhypygueândo*

<sup>21</sup> Tiquico ise iegary âyanmo egatuim, âdy tarâ yagâ aini awyly mâuntuhomoem. Jesus Cristo eynynâ kypemugulâ merâ, toenzepa kinwyneguylâ merâ. Kywymâry Jesus aguientoem aguehobyrygue kâmawyadâniem koendonro merâ.

<sup>22</sup> Xina wâgâ aguehoem merâ âyanmo kâingonodyly, tarâ xina agâ âdy aini awyly mâuntuhomoem, omazehomoem.

*Paulo Deus agâ aguehobyry*

<sup>23</sup> Âynynâmo Kunwym Deusram, Kywymâry Jesus Cristoram warâ kâenkadyly akaladâniemo peba itoem, âjigie mâpynedomoem, Jesus imâem mâinwânsezedoem warâ.

<sup>24</sup> Warâ âynynâmo Deusram kâenkadyly, koendâ nhetomoem, âmaemo Kywymâry Jesus Cristo iwynedyly imodânry modo.

Paulo



## FILIPENSES

### Paulo Kata Inweniby Filipos Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Paulo, Jesus Cristo wâgâ aguehoem aguehoymby xirâ kata igonomâ, Romadâ kadeia oday tâtagu ume. Deuslâ myakâwândy iweniehorim, xidadâ Filiposdâ Jesus einwânni modoram. Paulo xirâ kata inwenily myakâwândy dez a doze anu ipygueduo waunroem kuru Filiposram tâtâhobyry sakabygueduo. Pauloram dinheru tugonosemo myakâwândy. Xirâ kata wâgâ dinheru nhuduhomobyry wâgâ koendonroem awylymo adâkeze mâkâ. Jesus Cristo xurâem tawylygue, tuomare tawyly, tywenize myakâwândy Paulo, tâtagu umelâ iwâgâ adâkehobyry wâgâ. Filipos donro modo turuse myakâwândy tuomare lelâ itomoem, tâsenagazedylimo ume, kâmayno amaym tawylymo ume alelâ. Cristo wâgâ iozepa kulâ unâ egatuwâni modo agueho neinwâmpyra itomoem, turuse myakâwândy, âdara Cristo ize ato ara anhedylimo awyly wâgâ lâpylâ warâ.

#### *Aguely adaguho*

<sup>1</sup> Urâ Paulo xirâ kata âyanno iweninri, âmaemo Jesus Cristo agonro modoram. Tarâ yagâlâ merâ Timóteo. Cristo Jesus emary xina; ewanulâ xina anhekyly. Âmaemo Filipos donro modoram xirâ kata xina ingonodyly, tynynonroem Deus induakeyby modoram, Cristo Jesus eynynonro modoram, Cristo eynynonro modo iwymâryam, emawyadâni diâcono domodoram lâpylâ warâ.

<sup>2</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânimo peba mitomoem warâ.

#### *Paulo Deus agâ aguehobyry Filipos donro modo eynynâ*

<sup>3</sup> Inanâgueduomo watay, aunlolâ Deus agâ auguely: “Pabai, koendonro lelâlâ âmâ Filiposdâ âynynonro modo agâ, âinwântoem amânhenehon-hombryry wâgâ” tâkeze winase.

<sup>4</sup> Deus agâ âynynâmo augueday, tuomare kehoem inanry auguely.

<sup>5</sup> Tuomare urâ, unâ koendonro Jesus wâgâ kâengatuday iemawyadâdomobyry wâgâ; saguhoem kuru Jesus mâinwântaymo, won-hondâdâmo, unâ iwâkuru Jesus wâgâ kâengatuday, won-hondâzezelâ âmaemo-ro warâ.

<sup>6</sup> Jesus mâinwântuomo, Deus iweloem âetondâmo. Ize ato ara lelâ amitomoem aiesezelâ mâkâ. Koendâ tutuze urâ, tiangüypy, ewanikeze Deus awyly. Aituo ise Cristo Jesus âetonduo, mâkâ âizemo ato ara kehoem ise âmaemo.

<sup>7</sup> Aunlolâ inanry inanâguelymo. Toenzepa kâinwynegyly mawylmogogue. Koendâ lelâlâ Deus yagâ awyly, xurâem auguehoem ayenehon-homobyry wâgâ. Xirâ unâ egatuly wâgâ won-hondâdâ mawylmogogue. Saguhoem pymâdo enadoram kâjigâseoday, unâ koendonro Jesus wâgâ agueim wâgâ eyanno augueday won-hondâdâmo. Iwerâ tarâ ietadâdomobyry oday ekâjibyem wawyly ume won-hondâdâlâ âmaemo.

<sup>8</sup> Deus tutuze, âwynedâmo wawyly. Âwynedâmo urâ, Cristo Jesus âwynedomo ara lâpylâ. Âkealâ xirâ auguely; uguewâdyly kulâ mâkeba.

<sup>9</sup> Kâenkadyly inanry Deusram, imâem lelâlâ âjigie mâpynedomoem. Deus koendâ kehoem mâuntuzezedylimo lakuru ize wato; âdy koendonro, âdy koendâpaom warâ awyly mâuntuzezedylimo ize wato.

<sup>10</sup> Arâ ise koendâ mawylimo, koendonro lelâ amânhekylymo warâ. Aituo ise xypyry etay Cristo odopâduo, âdy inakague tâwentâzeba mawylimo. Tywykeba ise âmaemo mâkâ xurâem.

<sup>11</sup> Koendonro aiesezelâ ise âmaemo, Jesus Cristo lelâ anhekyly. Koendonro amânhekylymo wâgâ toenzepa ise Deus âzehogueoly, aguezemo eon-honru wâgâ, koendonroem awyly wâgâ warâ.

#### *Cristo xunâry egatuly*

<sup>12</sup> Cristo eynynâ ypemugudo, tâwâlâ lelâlâ wâne kâsenagazedylily, mâuntuzezemo olâ urâ, unâ iwâkuru Jesus wâgâ tâzegatuozelâ awyly; toenzepa kurâ domodoram âjidaholy awyly warâ.

<sup>13</sup> Cristo emary wawylygue ietagu. Idânârâ sodadu romano domodo, iwymâry kuru ety eni modo tutuzemo, kurâdo taunlo modo tutuzemo lâpylâ warâ.

<sup>14</sup> Taunlo modo Cristo eynynâ ypemugudo, Kywymâry Jesus tâinwânsezemolâ, Deus itaumbryry egatuze tyanepamo warâ. Ietagu umelâ, kâjityemybra wawyly tiuntuduomo, Jesus anhedysemo ato adysesemo, tâsenagazedylily umelâ nâjityemybramo.

<sup>15-17</sup> Tâlâ Jesus wâgâ agueim ewy yizepaom modo. Koendâ tawlylygue inkâba Jesus wâgâ aguelymo, akaemolâ tâdyren-honly-ro warâ ize tawlymogue, tydani modoram koendâ tâzepywaoly-ro warâ ize tawlymogue kulâ warâ. Tâdâtuagadyly, tâdâtuebadyly warâ kulâ adiendyse atomo. Warâ tuoday aguelymo: “Toenzepa ise Paulo âsewânily, kurâdo aguykely indadyly kely tindatuo” kelymo. Augueondyly, inakanhe adâkelygue kulâ Jesus wâgâ aguelymo.

Tâlâ pylâ Jesus wâgâ koendâ unâ egatuim modo. Iwâgâ aguelymo, mâkâ tinwynedylygue, ywynedylymogue warâ. Tutuzemolâ, Deus ietadânehonly tarâ, pymâdoam Jesus xunâry kâengatuhoem awyly.

<sup>18</sup> Akaemo tynrentoem kulâ, tâpywadoem kulâ Cristo wâgâ aguewâni modo wâgâ, kâsewânily witaymba urâ. Womaru lakuru, agui Jesus wâgâ aguely idataynrim modo idylygue. Cristo tinwynedylymogue iwâgâ aguelymo watay, tuomare lelâ urâ. Womazeâni kuru olâ Cristo xunâry egatuly.

<sup>19</sup> Tutuze urâ, idânârâ yagâ aitaynrim modo urâem koendâ itoenlâ aidyly awyly. Deusram urâem tâkazema âmaemo, Jesus Cristo ingonotyby Deus Ispirityry yagâlâ awylygue warâ.

<sup>20</sup> Ize wato kuru olâ Jesus Cristo kâinwypazenehomba wawyly. Awylygue, iwerâ, tyanepa Jesus wâgâ auguedyse wawyly, tâwâlâ lelâlâ wâne ise âdylâ yagâ aidyly. Yâzemo keanra, tarâ ietagodâ ietyzemo keanra warâ. Tâwâlâ ise wodo âdalâ âieholy, Cristo wâgâ koendâ aguehonly olâ ize wato.

<sup>21</sup> Yigüepa wawyly ara, won-honru Cristo nhuduypygyue idânârâ adyese lelâ urâ. Yigüely-ro watay, emakeze urâ koendonro urâem nhekanâdyby.

<sup>22</sup> Yâpamo-ro watay, Cristo xunâry egatuin-enlâ ise urâ. Âdy urâem koendonro awyly kâuntuba urâ, Cristo wâgâ auguezesedyly atay, yigüely atay warâ eagâ witoem.

<sup>23</sup> Azakâlâ urâem koendâ awyly. Toenzepa yiguedyse wawyly, toenzepa mawânârâ Cristo agâ widyse wawyly. Koendâ lelâ ise awârâ urâem.

<sup>24</sup> Âmaemoem koendâ awyly yigüepalâ, Cristo wâgâ inomedâzezedomoem.

<sup>25</sup> Tutuzelâ urâ, inepa yâpamo awyly; agâmolâ ise urâ. Agâmo itonze lelâ urâ, Cristo imâem mâinwântomoem inomedâzemo urâ, mâinwântuomoem omazehomoem.

<sup>26</sup> Cristo Jesus wâgâ inomedâzemo agâmo witondyly-ro watay, toenzepa ise omarumo. “Paulo agâ koendâ mawyly meneho” tâkeze ise Deus mâynrendylymo.

### *Kon-honru, tyanepa kehoem*

<sup>27</sup> Yagâ aini wâgâ tâtynanâzeba itaungâ. Cristo einwânni modo aito ara lelâ amidylymo mawânârâ koendonro kuru. Âyanmo idâze, udâpa warâ watay, tynnonro modo anhekylyem Cristo aguehobyry adyese mo myguehonlymo ise kâindadase wato. Xutuze lâpylâ urâ, ton-honre Cristo xunâry mâengatuhomoem on-hoam itybyem mawylymo, iozepa kulâ unâ egatuwâni modo ton-honre kehoem mâunrutomoem lâpylâ warâ.

<sup>28</sup> Cristo eynynâbaom modo kâdytadaundâ; tyanepa itaungâ. Ton-honre mawylymo tientuo, xutuzemo mawânkâ ton-honre mawlyly, Deuslâ imakerinmo awylygue.

<sup>29</sup> Koendonroem tawyly enehonwâm Deus âyanmo, Cristo, mâinwântomoem, emaryem mitomoem mâjidiukeoduomo warâ. Tutuzelâ akâwâm Cristo mâinwâmpygueuduomo, xurâ keba modoram tânagazezeinhe mawylymo. Mâkâ nhutuybylâ awârâ.

<sup>30</sup> Cristo eynynâbaom modo inagazedâmo; tâzenagazeze lâpylâ urâ. Adaimpâni tozohoinze tamezeba tâitoem myara lâpylâ kozohoinzededyly, Cristo xunâry kâengatuzezedoem. Filiposdâ wawyly ume, tâdâsenagazededyly semaenzededâ, Cristo wâgâ auguely kâinmopalâ. Iwerâ tydase âmaemo, iwâgâ aguezesezelâ wawyly, kâzenagazeoly egary umelâ.

## 2

### *Cristolâ uguondoem ini, onro anaxi tâetoem*

<sup>1</sup> Cristo agâ âmaemo iwerâ. Awylygue Jesus mâinwynedylymo, agonromo agâ mâpynedylymo warâ. Deus Ispirityrybe âmaemo; mâkâ mawânkâ nhenimo. Kurâ domodo xurâem koendonro aiedyly mâinmopalâ âmaemo. Tokalâ âmaemo ewy âsenagazededyly-ro watay, agonromo tytyenze âmaemo.

<sup>2</sup> Arâ watay, imâem agâmo tuomare witoem, agonromo agâ koendâ lelâ âzetaungâ. Ataen-homo agâ âpynedaungâ. Âzekiba ize matomo nidâ; merâ mâenmawadâgyulylymo, mâkâ mâenmawadâbyramo waypa.

<sup>3</sup> Âmaemoem lelâ amidylymo tâiseba itaungâ. Agonromo takaze mâdyren-hondyzemo waypa itaungâ. Tynrenseinhe lâpylâ agonromo etaungâ. Pymâem inkâba âdutuwâdaungâ; tâzetary ara kulâ itaungâ.

<sup>4</sup> Âmaemoem lelá koendâ ize mawylymo waypa itaungâ, eagonro modo xurâem lâpylâ ize itaungâ.

<sup>5</sup> Cristo tyangahu oday xunâgo ara lâpylâ angahumo oday âunâgumo nidâ. Turâem kulelâ aidyly nipyra mawânkâ myakâwâm.

<sup>6</sup> Onro âtugudyly iraynâlâ myakâwândy Cristo tâlâ awyly.

Âzekiba Tunwym Deus agâ awyly.

Arâlâ olâ, tarâ onro anaym tawyly ume,

Deus xyrento ara tynrendyse nipyra awyly.

<sup>7</sup> Mâkâlâ iduakeim nâdyren-homba tâitoem,

tunwym Deus enado tynrento ara.

Idânârâ tâlâ tato modo inmoly, kurâem tâitoem.

Pymâ tutuzeim lelâlâ wâne mâkâ,

tâzetary ara kulâ olâ aguehoymbyem onro anaxi âewyly.

<sup>8</sup> Âdaunloenlâ Tunwym Deus aguehobyry nakadaymba,

ize ato ara lelá idânârâ anhesezedyly.

Kâtaybyay myakâwâm mâkâ iguely kruz wâgâ,

Deusdâpa kipyra kitoem.

Arâ myakâwâm Jesus âwâlâ âewyly kâmakeze.

<sup>9</sup> Jesus igueduo,

kurâem tyetonze lelá myakâwâm Deus, tâzaxilâ odopâdoem.

Saguhoem xyrentobyry takaze kehoem xyrentoem anhenehonly;

idânârâ kurâdo xyrento takaze mâkâ xyrendyly iwerâ.

Jesus ezedy xyrentoem aienehonwânmy nhunwym,

idânârâ pymâ enday tynrenseinhe kuru itoem,

âdaunlolâ kurâ ezedy takaze kehoem.

<sup>10</sup> Arâ Deus anhedily, idânârâ tynreinseim modo takaze Jesus xyrendyly awyly xutuhoem.

Idânârâ kaynonro modo Jesus enado âzeguhoam isemo tynrentoem,

anju domodo, einwânni iguewâtyby modo alelâ.

Idânârâ kurâdo onro anano modo Jesus enado âzeguhoam isemo, tynrentoem.

Idânârâ onro iano modo enado âzeguhoam isemo lâpylâ, tynrentoem,

kadopâ modo, Jesus eynynâbaom iguewâtyby modo alelâ.

<sup>11</sup> Enado ise aguelymo:

“Jesus Cristo, idânârâ iwymâry âmâ.

Amânhetby wâgâ, idânârâ adâkezemo Kunwym Deus eon-honru, ehogu wâgâ warâ”

kelymo ise âzeguhoam itybyem Jesus enado.

*Deusram tâdâtâho enehonri kurâ*

<sup>12</sup> Yataen-hodo kâinwynegyuly modo, atârâ agâm awyly ume, inomedâdomo ara amipyra waypa akâwâm âmaemo. Iwerâ agâmopa wawyly ume, inomedâdomobyry aiedyly kâjimowâdaundâ. Idânârâ xurâem koendâ lelá amânhetomoem âzeon-hondâdaungâ. Deus xyrentaungâ; aguehobyry mankadylymo xytadaungâ warâ.

<sup>13</sup> Deuslâ ize tato aguiendyse kitoem aienehoim. Mâkâlâ kon-honru xuduim, ize ato ara lelá aguitoem, kyangahu oday kunâry itoem warâ.

<sup>14</sup> Âdylâ amânhetomoem amyguehonlymo watay, tâmireba, tylahureba warâ aietaungâ,

<sup>15</sup> Deus eynynâbaom modo aitomo araba amitomoem. Deus aguehobyry takazemo, aiedyze ato aniempyramo warâ. Âyanmo olâ auguely, koendâ itaungâ, idânârâ Deus xurâem mawylymo nhutuhomoem. Aguehobyry kadakadaundâ. Koendâ itaungâ, âdy inakaigye tâwentâzeba mitomoem. Deus xutudânry modo duay kehoem âmaemo; awylygue ximukâ tohoreim kau wogonro tâdâtâho enehorim ara itaungâ, âdara eyam tadayndyly mâenehon-homoem, uguely.

<sup>16</sup> Jesus wâgâ eyanmo agueze âmaemo, âdara tâdâsemaguely awyly nhutuhomoem. Won-honru nhuduhobyry ara kâsewani âyanmo Jesus wâgâ auguehoem, tâgaseim tâzeon-hoinze waunroem taintoem myara unâ Jesus wâgâ âyanmo kâengatuhomoem. Cristo odopâduo, tuomare ise eyam auguely: “Jesus, târâ Filiposdâ âmâem agânhetyby koendâ lelá âzeholy. Anra asaemo, âwâgâ kâengatuday, âinwânni modo” uguely.

<sup>17</sup> Âdalâ ise unu tyapâze, yiguely, vinhu ânguydo imeom xyâppy onwa iapâdyly Deusram egamehoem myara. Jesus mâinwântomobyry wâgâ âzenagazeoze lâpylâ âmaemo. Tuomare ise urâ, Jesus wâgâ âyanmo kâengatuhobyry wâgâ, lomazeze lâpylâ âmaemo mâinwântomobyry wâgâ warâ.

<sup>18</sup> Kâdyoly-ro watay, tâjityenzeba itaungâ. Ohomaendaungâ yagâ, uguely.

*Timóteo, Epafrodito warâ*

<sup>19</sup> Pymâ Jesus ize-ro watay, iweâpa nitaymba ise Timóteo âyanmo kâingonodyly, âdara mawlylmo kâuntuhoem, igarymo kâindatuo womazehoem.

<sup>20</sup> Timóteo âyanmo igonose urâ, merâlâ mawânkâ, koendâ mawysedonromo, âwynenimo warâ, yara lâpylâ. Merâ emyenro kuru omazeânimo, on-hondânimo kâingonokyly lâpeba.

<sup>21</sup> Eagonro modo turânâ mawânkâ koendâ awyse awylymo, Jesus Cristo ewanu wâgâ nâtnanâdaymbamo.

<sup>22</sup> Timóteo olâ emyenromo keba. Koendâ tâsewanize Jesus Cristo emaryem. Yagâ tawlyly ume, unâ koendonro Jesus wâgâ tâgatuze mawânkâ ani. Iamudo tunwym nhemawyadâdily myara merâ yagâ ewanu.

<sup>23</sup> Kâdyoly atay, ietagulylmo atay warâ kâuntuduo ise Timóteo âyanmo kâingonodyly, âdara yedylymo awyly mâuntuhoem.

<sup>24</sup> Pymâ Jesus kâzetagueoheom anhedilylmo tâinwânse olâ urâ âyanmo. Arâ-ro watay, urâlâ ise awyarâ idâim.

<sup>25</sup> Epafrodito igonose lâpylâ urâ. Âmaemoma keankâ yam igononi, kâpyneândilyly ume. Cristo eynynâ ypemugu kâinwynegylyly merâ. Sodadu âzekiba âsewanily ara, lâpylâ xina âsewanily merâ agâ, Jesus Cristo wâgâ unâ iwâkuru egatuze.

<sup>26</sup> Toenzepa idânâ nhetondyzemo awyly; toenzepa âseguâdâdilyly, newâmada kely mâindatomobyry wâgâ.

<sup>27</sup> Tâwâne lelâlâ keankâ, iguezeseaji kehoem. Deus olâ nityendâ. Awylygue olâ keankâ kua idilyly. Ytyendâ lâpylâ Deus. Epafrodito iguely-ro watay, toenzepa tâise kâjityendilyly.

<sup>28</sup> Awylygue ise âyanmo kâingonodyly, mâentondomoem, kua itybyem awyly mâentuomo, omazehoem. Arâ ise kâjityembyra wawyly, iwâgâ madahuliba mawlylmogue.

<sup>29</sup> Tuomare mâendaenkudzemo wawyly, âukonomo mâendaenkuhomo aralâ; Cristo eynynâ kypemugulâ mawânkâ. Cristo emary modo mâynrentomo ara lâpylâ xyrentaungâ.

<sup>30</sup> Tywâgâ nâtnanâdaymba keankâ merâ; ton-honre kehoem keankâ âsewanily. Newâmada, iguezeseaji nidâ warâ, Cristo xurâem tâwanu ume. Wondâ olâ merâ, arâ lâpylâ tâise tarâlâ âmaemo-ro watay wondylylmo.

### 3

*Jesus kienwândilyly kydâzêmakeoly, koendonro aguiendilyly inkâba*

<sup>1</sup> Cristo eynynâ ypemugudo, xirâ pape kâympygueândilyly iraynâ, warâ uguedyse urâ âyanmo. Tuomare itaungâ, Pymâ Jesus xurâem mawlylmogue! Ârudâmo lelâlâ wâne; augueondyly olâ urâ. Iwâgâ todohomaendilyly mâinmopa âmaemo. Einwândilyly mâinmopa âmaemo warâ watay, on-hondâzemo mawânâ auguehobyry.

<sup>2</sup> “Judeu domodo ezewenry ara adatâwâdaungâ, Deus xurâem mawlylmo xutuhoem” kewâni modo agâ tâmaynelâ itaungâ; iozepa kulâ aguehomo kâjidataundâ. Awâkâ arâ agueim modoram “Kaxoro tyewiâseim” tâkeze urâ, kâmayno awylylmogue.

<sup>3</sup> Kurâ Jesus einwânni modo, Deus xurâ lelâlâ kurâ, judeu domodo ezewenry ara kydataôly, kydataôba alelâ. Deus Ispiritury kuodanolâ mawânkâ xurâem kydawlyly xutuho, Cristo Jesus xurâem kydawlylygue Deus kien-hoguedoem aienhoim warâ. Tutuzelâ kurâ, judeu domodo ezewenry ara kydataôly, kydataôba warâ kydawlyly keba kâmakeim awyly, âdy aguienkyly lâpeba âwâlâ kydâsemaguehoem.

<sup>4</sup> Aguienkyly modo wâgâlâ kydâsemaguely-ro watay, âsemaguebyem tâise urâ koendonro modo agânhetaymy modo wâgâ. Aguienkyly modo wâgâpa olâ kydâsemaguely.

<sup>5</sup> Israelita lelâlâ urâ, judeu domodo idamu Benjamim iweompory ewylâ. Yazepygueduo, sete emedyly idilyly wâgâ myakâwâm yatâlylmo, xina ezewenry ara, idânâ iamimeom judeu satâho ara. Âkelo iunu lâpeba urâ, awylygue hebreu lelâlâ urâ. Moisés xina ezewenryem inweniby ara kâinane awisazedilyly, fariseu domodo ewy wawylygue.

<sup>6</sup> Saguhoem, Deus ize ato agânhekilyly waunlo ara akâwâm ienanaji, Cristo einwânni modo kâenagazeday. Xina ezewenry agueho ara adâise winase. Awylygue kâinane uguondo koendonro ara lelâ kâdutuoly.

<sup>7</sup> Idânâ âdara watobyry modo, agânhetyby warâ, iwerâ âdyem nitaymba urâem Cristo anhekyly modo wâgâ. Saguhoem urâem ize watobyry, âdyem nitaymba iwerâ.

<sup>8</sup> Iwerâ Cristo lelâ kâinwânkilyly, Deus xurâem, koendâ witoem. Cristo kâinwândilyly iraynâ Deus iomazeânze uguewâtay, idânâ agânhetaymy modo kâendilyly iwerâ saxium tamuizeim ara kulâ. Iwerâ urâem Kywymâry Cristo Jesus xurâem tâjidyly, iwâgâ koendâ xutuly warâ koendonro kuru, saguhoem agânhetaymy modo takaze kehoem.

<sup>9</sup> Iwerâ ize wato tokaleom ara lelâ Cristo agâ wawyly, Deus xurâem tâwentâzeba witoem, judeu domodo ezewenry iweniby kâinwândilylyguepa olâ, Cristo kâinwândilylygue. Agânhekilyly wâgâ inkâba Deus xurâem tâwentâzeba wawyly. Mâkâ xurâem tâwentâzeba wawyly Cristo kâinwândilylygue.

<sup>10</sup> Iwerâ ize wato, Cristo koendâ kâuntuzezedyly. Mâkâ igueypyem, kurâem itondyby eon-honrugue awidyse wawyly. Deus ize atolâ myakâwâm anhekyly, tâsenagazedlyly umelâ. Arâ lâpylâ ize wawyly-ro warâ. Turâem koendonro modo inmoly, kruz wâgâ tâguehoem, myara lâpylâ urâem koendonro modo kâinmodyze wawyly, Deus ize ato lelâ agânhetoem.

<sup>11</sup> Arâ ise Deus, iguewâtyby modo kurâem rhetondyly ume, kurâem witondyly kâenuendyly.

#### *Deus aguiendyse ato lelâ aguienkyly*

<sup>12</sup> “Deus yize ato ara lelâ urâ iwerâ” uguely mâkeba; “Jesus aitobyry ara lelâ aini urâ” uguely keba warâ. Awidyly olâ ize wato. Tâgaseim tadaintoam taintoem âzeon-hondâdilyly nepagubyra tâitoem myara lâpylâ kozohondâdilyly aunloenlâ kâinwânsezedoem, eydâ atoam udâly ara. Awârâ myakâwâm Cristo Jesus ize ato, turâem ygâseduo.

<sup>13</sup> Cristo eynynâ ypemugudo, Deus ize ato ara kehoem inkâba urâ, uguenselâ âyanmo. Tâgaseim agânâyam MYK nitaymba. Waunroem lelâ nhedyly, taintodâ lelâ. Arâ lâpylâ aitaymby modo wâgâ kâseguâdâbyra wawyly, enanânehoimbyryem wawylygue. Wayam waunroem aini modo agânhetoem lelâ iwerâ kozohondâdilyly; Deus agânhedyse ato aiese lelâ iwerâ kozohondâdilyly.

<sup>14</sup> Tâgaseim tâgaky tympygueândoam taintoem toenzepa âzeon-hondâdilyly, myara lâpylâ awiszedyly, idânârâ Deus ize ato ara lelâ witoem. Kozohoinly, tâgaseim waunroem saintyby tâpywado nhemakeho ara, urâem koendonro Deus nhuduly kâenmakehoem. Jesus Cristo wâgâ kâsemaquehoem ygâsedâ mawânkâ Deus aunloenlâ eagâ witoem.

<sup>15</sup> Idânârâ kurâ Jesus Cristo ton-honre einwânni modo, ize ato koendâ xutuwâni modo, Deus kyize ato ara lelâ aguissezene. Âduaymo awârâ wâgâ âkeloem tunâgueimbe-ro watay, Deus eyanmo koendâ xutu-en-honze lelâ.

<sup>16</sup> Awylygue Deus “Aietaungâ” kehobyry lelâ aguyjiene, saguhoem aguehobyry aralâ.

<sup>17</sup> Cristo eynynâ ypemugudo, urâ, yataen-hodo warâ agâmo xina atay, Deus ize ato ara lelâ ani xina aidyly, xina aitobyry ara amitomoem. Xina aitobyry ara aitaynrim modo enugaendaungâ; aitomo ara aitaungâ lâpylâ warâ.

<sup>18</sup> Tâlâ toenzepa Deus ize ato ara aitânry modo. Toenzepa âyanmo adâkezelâ urâ xirâ wâgâ, iwerâ augueondyly. Toenzepa olâ ytyrnru, wogunru warâ, kâinweniday. Inakanhe adâidylymogue, Cristo kruz wâgâ iguehobyry âwankuem nhedylymo awylygue.

<sup>19</sup> Tâmakezeba ise akaemo. Aunloenlâ Deus agâpa ietybyem, âji tâdâsenagazedoam ise âjigonoholyo. Ize tatomo inakai kulâ anhedilymogue. Tâzehoguezemo inakanhe adâidylymogue, nâpybazebyramo lâgâlâ warâ. Deus aiedyseba modo kulâ nhangahumo odano.

<sup>20</sup> Aunlo keba olâ kurâ, Cristo eynynâ ypemugudo. Tarâ wâne kurâ iwerâ; kâjidy kuru olâ târâ kau oday Deus eydâ atodâ. Târâpa ise Kywymâry Jesus Cristo âewlyly; toenzepa odopâdilyly kinwânwendyly-ro warâ.

<sup>21</sup> Jesus odopâduo, kodo xugukewâze, ton-honreingue kehoem eara kitoem; ewâmani keba, igueim keba, iwânzeim keba warâ mâkâ sodo iwerâ. Jesus pymâ kuru; ton-honru idânârâ xirâ anano modo tiuntulygue ise mâkâ kugukely.

## 4

#### *Tâdâturudo xypyry*

<sup>1</sup> Kywymâry Jesus einwânsezedoem lelâ, Cristo eynynâ ypemugudo. Toenzepa kâinwynegylyly âmaemo. Awylygue nhedyse wawyly. Toenzepa kadawilyly, womazeânheondâ mawylymogue.

<sup>2</sup> Warâ auguely Evôdia, Sintique warâam. Tutuze urâ, mâewiâmunedilylymo. Awylygue koendâ âzetaungâ, uguely. Kywymâry Jesus eynynâ âjipemugu âmaemo.

<sup>3</sup> Âmâ koendâ Cristo ewanuem yagâ tâwaneimbyryam, auguely. Xurukâ akaemo azagâ pekodo modo, adataen-hoem itondomoem, uguely. Awâtârâ Filiposdâ wawyly ume, yagâ, Clemente agâ, yataen-ho modo agâ warâ nâsewanimo mawânkâ, unâ koendonro Jesus Cristo wâgâ egatulyem, idânârâ anakâ idatoem. Idânârâ yataen-hodo yagâ âsewaniby modo ezedy iwenibyem pape wâgâ: Aunloenlâ Deus Agâ Ini Modo Ezedy sawo keho wâgâ.

<sup>4</sup> Ohomaenzezedaungâ, Kywymâry Jesus xurâem mawylymogue! Tuomare itaungâ, uguendyly-ro warâ.

<sup>5</sup> Idânârâ agâ koendâ itaungâ, agâmo koendonro agâ, koendâpaom agâ alelâ; inepa mawânkâ ise Kywymâry Jesus odopâdilyly.

<sup>6</sup> Âdy wâgâ kulâ tâseguâdâzeba itaungâ. Âdara mawylymo umelâ, Deus agâ aguewâtaungâ. Deusram ekadaungâ ipa matomo. Mâenkadybymo mâenmakeduomo, “Koendonro âmâ” kewâtaungâ.

<sup>7</sup> Arâ eagâ amygeduomo, tâkuâgueba, madahuliba warâ âesemo Deus, âdara anhedily awyly mâuntuba mawwlymo umelâ. Mâkâlâ mawânkâ anghumo oday âdalâ kulâ âunârymo ienehodânry, Cristo Jesus xurâ mawwlymogue.

<sup>8</sup> Xirâ kata kâenwanikeday, warâ uguedyse urâ âyanmo, Cristo eynynâ ypemugudo. Madahulilymo-ro watay, koendonro lelâ anghumo odaji âunârymo ietaungâ. Koendâ aguehoim wâgâ lelâ, iozeno wâgâ lelâ, âwankuem tyesenry wâgâ lelâ, tâwentâguezenry wâgâ lelâ, kuomazeâni wâgâ lelâ, kywypazenehondânry wâgâ lelâ warâ âpaunzedaugâ.

<sup>9</sup> Agâmo wawyly ume, âyanmo senen-ho, inomedâdâmo warâ, âdara Deus ize ato aiedyly wâgâ. Kâenehoymby ara, inomedâdomobry ara warâ lelâ aiesezedaugâ. Agâmolâ ise Deus. Ikuâdânimo peba âenehonzemo, koendonro aituo, inakai aituo alelâ.

*Paulo turâem koendâ aityby modo wâgâ aguehobry*

<sup>10</sup> Kywymâry Jesus agâ wawylygue, toenzepa womaru, dinheru mâingonotybymo wâgâ. Iweâpalâ iemawyadâdzye mawwlymo, tutuze urâ. Aunlolâ iemawyadâdzye mawwlymo; âdara dinheru mâingonotomo peba olâ ani.

<sup>11</sup> Âdy peba wawyly ume xirâ dinheru mâingonotomobry wâgâ kulâ inkâba auguely. Tâlâ watoguelâ kohomaendyly xutuimbyryenma urâ.

<sup>12</sup> Mârâ etay âdype, mârâ etay âdy peba warâlâ ani urâ. Awylygue typynigue, typynigueba warâ wawylygue, kâseguâdâbyra urâ. Âdy peba wituo, kadahuliwâbyra urâ. Augueondyly olâ, tâlâ watoguelâ kohomaendyly xutuimbyryem urâ, uguely.

<sup>13</sup> Idânârâ emaeze lelâ urâ, yagâlâ mawânkâ Cristo. Won-honru xuduze kâenmaen-hoem.

<sup>14</sup> Koendâ amidâmo, yagâ âdinherurumo mâempajigâduomo, kâsenagazedily ume.

<sup>15</sup> Macedônia eynynâba iegaseday, âyanmo unâ koendonro Jesus wâgâ egatuly kanguly lakuru ani, âmaemo kulelâ ani âdy ipa wato xuduim, tutuzelâ âmaemo, aramo ini lâpeba. Âmaemo lelâ keankâ arâ yam dinheru xuduim. Koendâ lelâ Deus agâmo nidâ.

<sup>16</sup> Tessalonicadâ wawyly ume, tydinheruguepa wituo, yam tugonose ani âmaemo, tokalelâba ani mâingonodylymo.

<sup>17</sup> Dinheru mâingonotondomoemba olâ xirâ auguely. Ize wato kuru Deus ize ato lelâ amânhedilylymo. Arâ ise ipa matomo Deus nhuduly.

<sup>18</sup> Xirâ kâinwenily, Epafrodito agâ mâingonotybymo emakerimbyryem wawyly mâuntuhomoem. Dinheru yam mâingonotybymo, toenzepa lelâlâ keankâ! Idânârâ ipa wato modo sanâdâ, nâsegubydâdâ warâ. Âdydo imeom tyânringueim tyam xuduwâtyby tohogueze Deus, tâmakeze warâ, arâ lâpylâ mâkâ urâem amânhetybymo nhehoguedily.

<sup>19</sup> Ipa wato yam muduwâtaundâmo. Awylygue Kunwym Deus âyanmo xuduze lâpylâ idânârâ ipa matomo. Idânârâ sodo mâkâ, tâwânreim keba warâ. Aunlolâ nhuduly Cristo Jesus eynynonro modoram.

<sup>20</sup> Kunwym Deus koendonro awyly wâgâ, eon-honru wâgâ warâ aunlolâ aguykenre. Aguykeba kipyra kine. Âkeâ lelâlâ xirâ.

*Tâdâsedaenguho xypyry*

<sup>21</sup> Idânârâ âmaemo Deus turâem induakeyby modo kâendaenkuly, Cristo Jesus xurâ modo. Cristo eynynâ kypemugudo tarâ yagonro modo idaenkuly mo lâpylâ.

<sup>22</sup> Idânârâ Deus xurâ taunlo modo lâpylâ idaenkuly mo, merâ Romadâ pymâ kuru ety oday tâwanuneim modo olâ idaenkurinmo kuru.

*Kywymâry nhesemo*

<sup>23</sup> Kywymâry Jesus Cristoram koendâ agâmo itoem kâenkadyly.

Alâ kulâ xirâ kâinwenily. Alâ.

Paulo

## COLOSSENSES

### Paulo Kata Inweniby Colossos Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbryrâ xirâ Paulo inweniby, Romadâ kadeia oday tawly ume, Colossos donro modoram, Jesus Cristo wâgâ nhutuhomoem. Deuslâ myakâwândy iweniehorim. Xirâ kata wâgâ nhurudyly, iozepa kulâ unâ egatuwâni modoram nâzenokuoba itomoem, “Uguondo koendonro lelâlâ Jesus, Deus imery keba olâ” kewâni modoram. Xirâ kata wâgâ Paulo adâkeze, Jesus uguondo awyly, Deuslâ awyly warâ.

#### *Aguely adaguho*

<sup>1</sup> Urâ Paulo xirâ kata iweninri, Cristo Jesus tywâgâ aguenriem induakeyby, Deus aguehobyry ara. Timóteo, Cristo eynynâ kypemugu tarâ yagâlâ merâ, idaenkulymo lâpylâ warâ.

<sup>2</sup> Âmaemo Colossos donro modoram xirâ kata kâinwenily, Deus eynynonro modoram. Cristo tâinwânse âmaemo; awylygue mâkâ eynynâ xina ipemugüem mawwilymo.

Âynynâmo Kunwym Deusram warâ kâenkadyly koendâ mâzehohomoem, akaladânimo peba mitomoem warâ.

#### *Colossos donro modo Jesus nheinwândylymo wâgâ, âpynedylymo wâgâ warâ agueho*

<sup>3-4</sup> Jesus Cristo tâinwânsezêlâ âmaemo, kely tydase xina. Idânârâ Jesus eynynonro modo mâinwynedylymo kely tydase lâpylâ xina warâ. Awylygue, Deus agâ âwâgâmo adâkeday, aunlolâ xina aguely, Pymâ Jesus Cristo nhunwym agâ: “Koendonro lelâlâ âmâ, Colossosdâ âynynonro modo xurâem amânhekyly wâgâ” xina kely.

<sup>5</sup> Tydaselâ ani âmaemo Jesus Cristo wâgâ unâ iozeno. Mâindatuomo, âdy Jesus eynynonro modo xurâem Deus anhekyly awyly mâuntulymo, myarâ eydâ atoram kaintuo. Adâkehobyry aieniem Deus awyly mâinwântomobyry wâgâ, tutuzelâ âmaemo, Deus eydâ atodâ ekanâdyby tâlâ mawwilymo. Awylygue Jesus einwândyly mâinmopa mawwilymo, eynynonro modo mâinwynedylymo warâ.

<sup>6</sup> Jesus wâgâ unâ iwâkuru tydaselâ âmaemo, Deus itaumbryry iozeno kuru âyanmo tâzegatuozelâ awylygue. Tâinkâ lelâba Deus koendonroem awyly âzegatuoly. Awylygue xirâ mâindapygueduomolâ, koendonro Deus âmaemoem anhedily mâendilymo; koendâ mâuntuzedylymo lakuru koendonroem awyly.

<sup>7</sup> Deus koendonroem awyly mâindadylymo ani, Epafras âyanmo nhegatuoduo. Xina ara, Cristo xurâem tâwaneim lâpylâ mawânkâ. Koendâ tâwaneim awylygue ani awyarâ idâly Jesus wâgâ unâ egatuze âyanmo.

<sup>8</sup> Odopâdybyem, âwâgâmo anygue xinaram: “Colossosdâ Jesus einwâni modo toenzepa âpynedylymo, Deus Ispiriturylâ arâ aienehoinmo awylygue” nygue.

<sup>9</sup> Igarymo tindapygueduo, aunlolâ xina nhekadyly âmaemoem Deusram. “Pabai, enomerymo xudugâ, âdy ize mato koendâ nhutuhomoem, anhetomoem warâ. Âspirituryly ise awârâ eyanmo xutuen-hoim” xina kely inanry Deusram.

<sup>10</sup> Deus ize ato mâuntuduomo, Pymâ Jesus ize ato ara ise âmaemo, iomazeâni aiese âmaemo warâ. Koendonro modo lelâ ise amânhekylymo. Aunlolâ ise Deus wâgâ mâuntuzedylymo.

<sup>11</sup> Deusram âwâgâmo tâkaze lâpylâ xina: “Pabai, koendonro lelâlâ âmâ. Toenzepa lelâlâ ton-honreim mawwilygue, Colossosdâ âynynonro modo eon-honwanâgâ, idânârâ tynynâ aitaynrim modo nhemaen-homoem tuomare lelâ, Jesus xurâ keba modo tânagazeday, âpeânze kepa itomoem” xina kely inanry Deusram.

<sup>12</sup> Kunwym wâgâ koendâ aguezesezelâ mitomoem. Mâkâlâ mawânkâ koendonro tawwilygue, tynynonro modoem tienkanâdyby târâ kaynâ pymâem tatodâ emakerin-em ânehonrimo.

<sup>13</sup> Saguhoem Satanâs emaym kulâ akâwâm kurâ, iamu oday. Deus olâ Satanâs amaymba kâmakerim, kagâikenri warâ, imery toenzepa inwynegylylygue kywymâgoem.

<sup>14</sup> Cristo mawânkâ kâmakerim. Kurâem kruz wâgâ iguehobyry wâgâ mawânâ inakanhe aguitobyry xygakeybyem awyly kiuntuly.

#### *Jesus Cristo wâgâlâ âdaunlo Deus awyly kiuntuly*

<sup>15</sup> Kunwym Deus kiempyra wâne kurâ. Jesus wâgâlâ olâ âdaunlo awyly kiuntuly. Deus imerylâ tawwilygue, tunwym agâ âzekiba mawânkâ Jesus. Mâkâlâ idânârâ xugutyby modo iwaunroru. Tâlâlâ myakâwândy mâkâ kaudyly iraynâ.

<sup>16</sup> Jesus tâlânro modo nhugunehon-hoem aiemâmy Deus, idânârâ xirâ anano modo, kau odano modo warâ. Agueduo myakâwândy âepanâguedyly idânârâ kienkyly, kientânry alelâ. Agueduo myakâwândy anju domodo âtugudaynly: anju ton-honreim modo, anju

tagonro modo iwymârydo, anju âdylâ anhotoem agueim modo warâ. Tunwym agâlâ idânârâ nhugudyly. Jesus tâlânro modo nhugunehon-hoem aiemâmy Deus. Jesus xurâem myakâwândy idânârâ âduguholy. Mâkâlâ xuguni; turâenlâ nhugutyby modoram tâdyren-honhoem warâ.

<sup>17</sup> Tarâ onro anaym, kau oday warâ âdy peba awyly ume, tâlâ myakâwândy Jesus Cristo. Onro anano modo, kau odano modo warâ mâkâlâ ejitâdaynrim, idânârâ ize ato ara aitoemoem warâ.

<sup>18</sup> Cristolâ mawânkâ tynnonro modo nhangahu, iwaunrorumo warâ. Iguewâm wâne, Deus olâ kurâem ietonmâ. Igueypyem mâkâlâ waunroem kuru kurâem itoni, todo âdaunloenlâ nigueompyra itoem. Awylygue pymâ tynrenseinhe lelâlâ awyly.

<sup>19</sup> Deuslâ ageoim: “Yagâ âzekibaonlâ ymery” keim. Deus imery tawlyguelâ mawânkâ, eagâ âzekiba Jesus Cristo awyly. Awylygue âdy Deus anhekyly, adyese lelâ, ageuho adâkeze lelâ warâ awyly.

<sup>20</sup> Kaudyly ume, koendâ lelâ myakâwândy idânârâ Deus agâ. Adão, Eva warâ Deus aguehobyry nhakaduo olâ myakâwândy mâkâ agâ koendâ tadawyly adainly. Idânârâ tagâ koendâ ietoniem, Cristo igonomâ olâ Deus, idânârâ kau odano, onro anano alelâ turâem itondoem. Kruz wâgâ tymery iguehobyry wâgâ myakâwâm awârâ anhedily.

*Jesus einwândyly kâjimowâdaundâ*

<sup>21</sup> Saguhoem iwague akâwâm Deusdâpa mawlymo, Deus izepa ato kulâ amânhekylymo awylygue, angahumo odanogue kulâ âunâgumo awylygue warâ.

<sup>22</sup> Deus agâ koendâ âmaemo iwerâ. Kruz wâgâ tymery iguehobyry wâgâ, Deus tataenhoem âedâmo xurâem mitomoem, âigueduomo, tânadoam atomoem. Âdygue tâwentâzeba, tywykeba warâ, mâkâ âizemo ato ara kehoem ise âmaemo.

<sup>23</sup> Arâ enadoam mydâhomoem, Jesus einwândyly kâjimowâdaundâ. Âtâ enu kiempadâdily tâhugane kehoem, nâzekâniba itoem myara koendâ kehoem Deus itaumbry einwântaungâ. Ton-honre lelâ angahumo oday âunârymo nidâ, mârâ etay mâinwândylymo, mârâ etay âkelo mâinwânkylimo warâpa mitomoem. Jesus wâgâ unâ koendonro midadâmo, meinwândâmo warâ; tutuzelâ âmaemo, Deus “Aiese urâ” tâkehobyry aieniem awyly. Awylygue mawânâ âigueduomo, Deus eydâ atoram idârin-em mawlymo mâuntulymo. Awylygue awârâ mâinwândylymo kâjimowâdaundâ. Xirâ unâ Jesus wâgâ ageuim mawânâ tâinkâ lelâba tâgatuzeim, xirâ egatulyem tâwaneim urâ-ro warâ.

*Paulo judeu keba modoram Jesus wâgâ aguehobyry*

<sup>24</sup> Tarâ kadeia oday ietagu, Jesus wâgâ unâ âyanmo kâengatulygue. Kâsenagazedily lelâlâ wâne, tuomare olâ urâ, Deus ize ato aralâ mawânâ yagâ aidily. On-hondybyem urâ, Cristo ize ato ara kâsenagazedoem, xurâem iewanu ara. Mâkâ einwândyly kâinmopalâ kâsenagazedily watay, mâkâ xurâ modo xutuzemo âdara einwândyly nimopalâ tâsenagazedily awyly. Arâ ise akaemo Cristogue tywymâguneim modo kângamanâdily, “Cristo sodo” kelygue tâzekeim modo.

<sup>25</sup> Jesus eynnonro modo koendâ kehoem Jesus wâgâ nhutuhomoem kânomedâdoem aguewâm Deus. Mâkâ aguehobyryem unâ koendonro kâengatuly âyanmo, judeu keba modoram. Awylygue tâinkâ lelâba Jesus wâgâ auguely, idânârâ auguehoem aguehobyry kâengatuly.

<sup>26</sup> Nhutuen-hoymby keba mykâinane xirâ unâ. Iwerâ olâ nhutuen-honly Jesus eynnonro modoram.

<sup>27</sup> Warâ myakâwâm Deus xunâry, judeu keba modo, judeu domodo alelâ tienmakely myakâwâm agueho. Xirâ mawânâ tynnonro modo nhutudyze ato, saguhobyry modoram tâgatuzyrybyry. Awylygue Cristo agâmolâ awyly tâwâlâ lelâlâ wâne judeu keba mawlymo. Cristo agâmolâ awylygue, tynnonro modoram tiundyly Deus kehobyry idânârâ tâlâ âmaemo. Âdydo imeom sodo âdy peba itânry emyenro âmaemo. Xypyry etay, Cristo xyrendily ume, tynwânwânse lâpylâ âmaemo, eagâlâ mâdyren-honlymo.

<sup>28</sup> Awylygue Cristo wâgâ xina aguely idânârâam, mâkâ wâgâ koendâ nhutuhomoem, iamudo âdy xutudânry arapa itomoem. Turusemo, tonomedâzemo warâ inanry xina Cristo wâgâ, Deus tonomery nhudyppygue. Awylygue, Deus ezaxi tâtâduomo, ize ato ara lelâ awylymo.

<sup>29</sup> Aguehobyry agânhotoem, toenzepa lelâlâ kâsewanily. Idânârâ yagâ aitaynrim modo kâenmaenly lelâ. Cristo won-honru nhudyppygue idânârâ adyese urâ, iewanu xudyppy kâympygueândoem.



## 2

<sup>1</sup> Mâuntudyzemo urâ, toenzepa âmaemoem kâsewanily, Laodicéia donro modoem, âji udâpa wato donro modoem warâ, Cristo wâgâ unâ koendonro koendâ mâuntuzedemoem, mâinwântomoem warâ.

<sup>2</sup> Arâ kâsenagazedily kâenmaenly, tâegane lelâ mitomoem, mâpynedylymogue tokalelâ mitomoem, Deus saguhoem nhutuen-hondânrybyry koendâ mâuntuhomoem, kâmakeim Cristo tingonodyly warâ. Mâkâ koendâ mâuntuzedylymo watay, toenzepa ise omarumo, mâsegamilymo warâ.

<sup>3</sup> Mâkâ mawânkâ âdy Deus konomedâdyze ato xutuen-hoim; mâkâlâ âdy Deus ize ato, izepa ato warâ xutuen-hoim lâpylâ. Koendonro lelâlâ xirâ xutuly, xave kaixa enahuybyry enahungueho emyenro mawânkâ Cristo; mâkâ wâgâ saguhoem Deus nhutuen-hondânry kiuntuly.

<sup>4</sup> Xirâ mawânâ âruruto, iozepa kulâ unâ egatuwâni modo inokubyramo itoem; tâwâlâ lelâlâ wâne iozeno ara kehoem aguelymo.

<sup>5</sup> Agâmopa lelâlâ wâne urâ, âwâgâmo kâpaunzezebyra wipyra olâ urâ. Tuomare urâ, onhoam lelâ âmaemo, Cristo einwânsezedyly mâinmopa âmaemo warâ, kely kâindadylygue.

*Cristo agâpa kipyra kine*

<sup>6</sup> Cristo Jesus âwymârymo atay, Deus ize ato modo lelâ aietaungâ, mâkâ agâlâ mawylimo mâenehon-homoem.

<sup>7</sup> Se tywindy imâsedo wâgâ âzeon-hondâdyly, sapezenru tamepa itoem myara lâpylâ Cristo einwânsezedaungâ, mâsenagazedaymo, ton-honre lelâ mitomoem. Aunlolâ âtâ itâni intâzedyly myara lâpylâ xutuzezedaungâ, imâem Cristo wâgâ. Mâinwândylymo imâem iesezedaungâ. Xirâ mawânâ inomedâdomobyry. “Koendonro âmâ urâem, yam mâunduypy modo wâgâ” kewâtaungâ lâpylâ eyam warâ.

<sup>8</sup> Tonomeguelâ itaungâ, iozepa kulâ unâ egatuwâni modoram tonokuzeba mitomoem, mâuntuybymo angahumo oday netyba itomoem warâ. Iozeno mâkeba konomedâdomoem, unâ âdyem itânry, tunâry kulâ nhegatulymo, Cristo nhenomedâdobyry wogonro mâkeba.

<sup>9</sup> Cristo mawânkâ Deus agâ âzekibaom kuru, tarâ onro anaym tawlyly ume nâtuguguewâbyra akâwâm, Deuslâ tawlylygue.

<sup>10</sup> Cristo agâlâ mawylimogue, Deus arâlâ lâpylâ âmaemo, Deus Ispiritury agâmo awlylygue. Idânârâ tozohonro kaynonro, onwogonro aelâlâ takaze kehoem mawânkâ Cristo eon-honru.

<sup>11</sup> Cristo mâinwântuomo, Deus xygakewâm inakanhe amidyse matomo, xurâem mawylimo tienehon-hoem, Deus ize ato lelâ amânhetomoem tadatâlygue inkâba. Awârâ uguondo anhekyly tadatâhogue, uguondoram xina adatâoly. Cristo olâ inakanhe kidyse kydato xygakeim.

<sup>12</sup> Batiza mâiehodaymo, Cristo agâ igueypyem, epyâdybyem waunlo ara makyrenmo. Cristo kurâem itonmâ, myara lâpylâ paikayba onokuduomo, iweloem ietybyem mawylimo menehomo. Xirâ ton-honru imâsedoguelâ Deus Cristo kurâem nhetondobyrygue, iweloem aetondomoem ton-honre Deus awlyly meinwânâmâmo.

<sup>13</sup> Deus aguehobyry mankadomobyry wâgâ, izepa ato amânhetomobyry wâgâ warâ Deusdâpa makâwâm. Deus xurâem, igueypyem âmaemo. Iwerâ olâ, Deusram iweloem itybyem âmaemo; Cristo agâlâ iweloem ietybyem mawylimo. Jesus kieinwândyly ume, Deus idânârâ inakanhe aguitobyry tygakeze.

<sup>14</sup> Deus agâ kiempywgauylybe akâwâm kurâ, izepa ato aguiendylygue kygondagu waunlo ara. Kygondary kiempywabyra kydawlylygue, aunloenlâ tâise Deusdâ iwague kydawyly. Deus olâ kygondary tainze; kagâ koendâ lelâ mâkâ iwerâ; Cristo mawânkâ iguewâm kruz wâgâ kygondary epywaze.

<sup>15</sup> Cristo, kruz wâgâ tygueduo, Satanás eon-honru, idânârâ kadopâ modo Satanás nhutuly eon-honru warâ sainwâm. Egâ wâne sodadu domodo, tuduery modo agâ ton-honreimbyry âpybazedomoem ekâjibyem tâzenanaym adakobâdomoem aguely, idânârâ kurâdoram âzehohomoem myara lâpylâ akâwâm Cristo idânârâ enanaym Satanás eon-honru, kadopâ modo eon-honru warâ nhainly; mâkâ lelâ ton-honreim tawlyly enehowân-ro warâ.

<sup>16</sup> Awlylygue, “Mâdytadaymba âmaemo. Podo tâsenry tâse âmaemo. Tânyzenry tânyze âmaemo. Xina agâ mâzetyguebyra âmaemo. Xina aito ara nunâ iwelo mâentyguebyra âmaemo. Kokobyzegueho oday, aguientânry adyese âmaemo warâ” keim modo wâgâ tâseguâdzêba itaungâ.

<sup>17</sup> Pyni tânzenry modo, âty adyeseim modo warâ judeu domodo ezewenry agueho; Messias âeni wâgâ nhutuhomo kulâ myakâwâm âewlyly ara. Iweâma awârâ modo kulâ kâmakerin-em kieinwâmpyra kurâ, Cristo mawânkâ âemâlâ; kâmakeze iguewâm warâ.

<sup>18</sup> Tâlá wakeim modo: “Deus tyize itoem, tâwâlâ tadapioguze, todo tatâwâze warâ xina. Deus tyize itoem âzeguhoam tâise xina anju domodo tynrense warâ. Xina aito ara amipyra mawylmogue, koendonro mâkeba âmaemo Deus xurâem” keim modo. Akaemo agueho modo kulâ olâ kâjiwantaguedaundâ. Akaemo agueho amânhedylimo watay, koendonro Deus âmaemoem nhekanâdyby mænmakewâbyra ise âmaemo. Wakelymo lâpylâ: “Deuslâ xinaram âepanâgueim xina nhâenkyem. Tânugue tâense xina” kelymo. “Xina nenomedâdâ âdara xina aidyly awyly, tyize itoem. Awylygue akadâmo imâem iwâgâ xina nhutuly” kelymo. Kewâdylimo kulâ olâ. Deus xurâ mâkeba nhenomedâdomo; tytaumbry kulâ nhenomedâdomo. Âdy adawihomo lâpeba.

<sup>19</sup> Pymâ Jesus einwândyly imoimbyrymoem; tywaunroru imoimbyry xuzatyby aramo kulâ. Awylygue mawânkâ alâ kulâ awylymo, aguelymo warâ. Cristo mawânkâ kyan-gahu; sodo pylâ kurâ-ro warâ. Egâ wâne kydadaseudo modo wâgâ kodo wayam wayam idyly, eon-honwadyly warâ myara lâpylâ Cristo wâgâ Deus kon-honwanâdyly, ize ato ara aguissezodoem.

*Iweloem ietondybyem kydawylgyue, saguhoem kydatobry ara inkâba kurâ*

<sup>20</sup> Cristo igueduo, eagâlâ âiguelymo waunlo ara akâwâm âmaemo. Awylygue kurâdo ezewenry kulâ keba âuturimo awyly. Deus xurâ kebaom modo anhekyly aiese todopâzeba itaungâ. Aguehomo kâjiwantaguedaundâ. Akaemo ezewenry aieniem mâkeba âmaemo iwerâ. Tâlâ olâ âmaemo ewy akaemo aito ara aini.

<sup>21</sup> Wakelymo: “Tawâsenry keho imarymogue kadawâtaundâ. Tâsenry keho kâdâtaundâ. MÂ’ tyesenry keho MÂ’ kâiedâ. Deus agâmo tyewiâseba itoem, âurutomo einwântaungâ” kelymo. Kewâdylimo kulâ olâ.

<sup>22</sup> Inepa adainrim modo wâgâ kulâ ezewenrymo aguely; kurâdo tâzezewenryem nhutuyby kulâ aguehomo.

<sup>23</sup> Koendonro ara wâne kurutomo, koendonro keba olâ. “Deus ehoguedaungâ” kelymo, ize atomo ara lelâ adâjitoem; tohoguedyze Deus ato araba. “Sawoempa itaungâ” kelymo, akaemolâ olâ sawoem ini tâzewenrylâ tyeinwândylygue. “Âwâlâ adapioguwâdaungâ, adatâwâdaungâ warâ” kelymo, ara aguepa olâ Deus. Awârâ ezewenrymo olâ ânguy Deus izepa ato aniempyra itoem anienehomba.

### 3

<sup>1</sup> Iguewâm, kurâem itonmâ warâ Cristo. Iwerâ Deus eahoru eynynâ ekadybyem awyly, pymâ ekadodâ. Deusram iweloem âiehoibyem âmaemo, igueypyem Cristo agâ kurâem mitondylymo waunlo ara. Awylygue Deus xurâ modo lelâ, aiedyse ato modo lelâ warâ angahumo odano nidâ.

<sup>2</sup> Aunlolâ Deus xurâ wâgâ âpaunzezedaugâ; xirâ anano wâgâ inkâba âpaunzezedaugâ.

<sup>3</sup> Saguhobyry arapa âmaemo iwerâ; tadainze mârâ. Iweloem âiehoibyem âmaemo iwerâ, Cristo agâ tokaleom ara itybyem. Deus xurâ keba modo nhutuhomoem nuduwâpyra iweloem mâiehoihomobyry.

<sup>4</sup> Cristo tâinwânse mawylmogue iweloem mâiehondylymo. Xarâ onro anaxi odopâduo, eagâlâ ise âmaemo. Eagâlâ ise âwâkurumo, on-honrumo, âynrumo warâ. Tywâkureim, ton-honreim warâ mâkâ; eara ise âmaemo-ro warâ.

*Koendonro lelâ aguyjiene, inakai modo keba*

<sup>5</sup> Igueypy inakai adiyndyly inmolylâ, arâ lâpylâ inakai amânhedyse matomo imowâdaungâ; Deus xurâem tywykeim ara âenehoinmo akâiedaundâ. Eagâ mohogüinhomobyry keba kulâ mâynanâdyzemo tâiseba itaungâ. Kywypado amânhedyse tâiseba itaungâ. Inakai modo amânhedyse tâiseba itaungâ. Toenzepa âsejiguyunmoze tâiseba itaungâ. Toenzepa kysejiguybe kidyly kulâ ize kydato watay, ilâ modo kulâ ize kydato, Deus takaze kehoem.

<sup>6</sup> Adâkehobyry sakanibyry modo agâ Deus iewiâpaze, enagazenehonzemo-ro warâ.

<sup>7</sup> Saguhoem Jesus mâinwândylymo iraynâ idânârâ inakai modo amânhedyse matomo amiesezedâmolâ.

<sup>8</sup> Iwerâ olâ awârâ modo imowâdaungâ; âdyem itânry manmelymo-ro waunlo ara samewâdaungâ; tâjiewiâky, ânguydoem tadawlyly, ânguy izepa tadawlyly, tâdâtunâguedyly, tâdâpyguely warâ.

<sup>9</sup> Mygüewâdylymo kulâ tâiseba itaungâ. Izewenrymo saguhobyry inakai modo aiedyly imoimbyryenma âmaemo.

<sup>10</sup> Kurâ iwelo âmaemo. Itymo owogonromo iwelo keba samerimbyryem, iwelo onwamo mânhedylimo-ro waunlo ara, iweloem ietondybyem mawylimo. Deuslâ aunlolâ iweloem âesezenimo, eara mitomoem, iwâgâ mâuntudyze matomo idânârâ mâuntuhomoem.

<sup>11</sup> Awylygue Deus xurâem judeu, judeu keba warâ kydawwyly, judeu domodo satâhogue satâybyem, tatâzeba warâ kydawwyly, xidadâ odano, idu odano, pymâ, tâwaneim warâ kydawwyly âdyem nitaymba awyly. Cristo koendonro kuru awylygue, idânârâ takaze tynrenseim awyly, tynynonro modo agâlâ warâ.

<sup>12</sup> Deus xurâ âmaemo. Âwynedylmogue myakâwândy âduakelymo turâem. Awylygue kaikâ kewâtaungâ. Ânguydoempa, koendonroem tâdutuzeba, tyewiâpazeba warâ itaungâ.

<sup>13</sup> Inakanhe amâieholymo emaeuwâdaungâ lelâ; âpeânze tâkezeba itaungâ. Pymâ Jesus inakanhe amitomobry tygakeze, arâ lâpylâ inakanhe amâieholomobry enanânehonwâdaungâ.

<sup>14</sup> Awârâ modo takazeno kuru tâdâpynedyly. Kagonro agâ toenzepa kydâpynedyly mawânâ on-hoam lelâ kynehorim, kytanru, kâzewenry warâ âkeloem awyly umelâ.

<sup>15</sup> Cristo wâgâ mawânâ agonromo agâ âdapa lelâ mawwlymo. Agâmolâ mâkâ; mâkâlâ inakanhe amidyse matomo xygakerim. Koendâ lelâ mitomoem, mâpynedomoem, mâseinwâdomoem warâ Deus âgâsedylmo. Awylygue koendonroem awyly wâgâ anhekyly wâgâ warâ amyguepa tâiseba itaungâ Deusram.

<sup>16</sup> Aunlolâ Cristo xunâry odaymope nidâ, idânârâ amânhekylymo, âtaumbyrmo warâ Cristo aguehobyry ara lelâ itoem. Agonromo enomedâdaungâ, xurutaungâ warâ, idânârâ tâzenomery Deusdâpa âeni mâuntuybymogue. Deus itaumbyry awo wâgâ iwenibygue âgâtudaungâ, livru Salmos wogonrogue. Deus wâgâ agueingue âgâtudaungâ, kurâem anhetybygue warâ. Deus Ispiryry tâjigâky nhuduypygue âgâtudaungâ. Tuomare kehoem Deus xurâem âgâtudaungâ, ânguyem awyly wâgâ agueingue, anhekyly wâgâ agueingue warâ.

<sup>17</sup> Kywymâry Jesus emary mawwlymogue, mâkâ amyguedysemo ato ara aguewâtaungâ, mâkâ amânhedysemo ato ara aietaungâ warâ. “Koendonro âmâ, xinaem amânhetby wâgâ” kewâtaungâ Kunwymo Deusram. Jesuslâ mawânkâ aguykehobyry Deusram sani.

#### *Koendâ lelâ âzetaungâ*

<sup>18</sup> Tâjijwysaro modo, osomo aguehobyry aietaungâ, arâ mawânkâ Kywymâry Jesus Cristo einwânni modo aidyly.

<sup>19</sup> Tâjiso modo, âwydymo koendâ etaungâ, iwynedaungâ. Âwydymo kâjiewiâsedaundâ, kâzenagazedauundâ warâ.

<sup>20</sup> Tâjimeombyry modo, unwânmo, âzemo warâ einwântaungâ. Awârâ mawânâ Deus ize ato, Kywymâry Jesus xurâem mawwlymogue.

<sup>21</sup> Tâjiunwyndo, âmeonmo kâzeusedauundâ, newiâpabyra, nitywambyra warâ itomoem.

<sup>22</sup> Tâwanuneim modo, pymâ xirâ anano modo aguehobyry kadakadaundâ. Inuagaendylmo ume lelâ inkâba âsewaniwâdaungâ, koendâ amyguehon-hoem kulâ waypa. Koendâ lelâ âsewaniwâdaungâ, Kywymâry Jesus einwânni mawwlymogue. Aiedyse ato mankadylymo tytazema âmaemo.

<sup>23</sup> Idânârâ âwanu amânhekylymo, amânhedysemo mawwlymogue aietaungâ, tuomare, tugûigue warâ. Âwymârymo xurâem kulelâba, Kywymâry Jesus Cristo xurâenlâ amânhedylmo nidâ.

<sup>24</sup> Mâkâlâ ipywanimo awyly enanâguedauundâ. Tâinwânni modo xurâem kaynâ tienkanâguyly koendonro ise mâkâ âyanmo nhuduly. Cristo mawânkâ âwymârymo kuru.

<sup>25</sup> Idânârâ epywaze anhetyby aralâ. Koendonro aienibyry modoram, koendonrolâ ise nhuduly. Inakai aienibyry modoram inakailâ ise nhuduly warâ. Iozelâ ise arâ anhedyly.

## 4

<sup>1</sup> Pymâ domodo, koendâ âmaemoem tâwanuneim modo etaungâ. Kâzenokudaundâmo. Koendâ lelâ epywadaungâ. Târâ kaynâ tywymâgue mawwlymo enanâguedauundâ lâpylâ.

#### *Deus eynynonro modo xuruto*

<sup>2</sup> Deus agâ amyguepa tâiseba itaungâ. Inanaynmo lelâ itaungâ, eagâ amyguehomoem. Tynazeba itaungâ eagâ agueze. “Tuomare xina, xinaem amânhetby modo wâgâ” kely kâjimowâdaundâ.

<sup>3</sup> Deus agâ amyguedaymo, xinaem ekadaungâ lâpylâ, xirâ Cristo xunârybyry xina negatuba nipyra itoem. “Pabai, tâwâlâ Paulo aguehoem aienehongâ, agui Cristo wâgâ agueimpe itoem lâpylâ. Arâ lâpylâ xina nhekadyly, Paulo eagonro modo xurâem. Xirâ unâ saguhoem idatânrybyry, xutudânrybyry warâ modoram koendâ nhegatuhoem aienehongâ” kewâtaungâ Deusram. Awârâ wâgâlâ mawânâ tarâ kadeia oday ietagu, Cristo wâgâ unâ kâengatulgyue.

<sup>4</sup> Deusram ekadaungâ: “Paulo koendâ Cristo xunâry nhegatuhoem, idânârâ idani modo koendâ nhutuhoem warâ aiekâ” kewâtaungâ lâpylâ.

<sup>5</sup> Cristo wâgâ tâdâsemaguely amyguedaymo, Deus inomerymo nhuduhobyry ara einwântânry modo agâ itaungâ. Arâ ise Cristo wâgâ mâengatulymo mâindanehonlymo mâuntuen-honlymo warâ.

<sup>6</sup> Koendonro lelâ amyguehomo nidâ, idataynrim modo amyguelymo ize itomoem, peku pyni nhekubâzeândo ara. Âdara mâin-hoguhomo awyly xutuwâdaungâ, Cristo mâinwândylymo wâgâ madapâigueduomo.

*Kata xypygueândo*

<sup>7</sup> Taintuo, Tiquico ywâgâ idânârâ egatuze, Cristo eynynâ kypemugu xina inwynegyuly. Xina agâ Kywymâry Jesus xurâem koendâ tâwaneim awâkâ, aguehobyry anhedlyly lelâ waunlo.

<sup>8</sup> Awâkâ kâingonodyly âyanmo, âdara xina awyly mâuntuhomoem, omazehomoem, onhondâdomoem warâ.

<sup>9</sup> Onésimo eagâ kâingonokyly lâpylâ. Atonlo ewylâ awâkâ, Cristo eynynâ kypemugu kinwynegyuly, Kywymâry Jesus aguehobyry aieni. Tarâ Romadâ aitaynrim modo egatuze lâpylâ akaemo.

<sup>10</sup> Aristarco, tarâ kadeia oday yagonro, iwynu manwâtomoem aguely. Marcos lâpylâ idaenkulymo, Barnabé ipemugu. Âyanmo saindyly-ro watay, koendâ edaenkuwâdaungâ, iwâgâ âurutomobyry ara.

<sup>11</sup> Josué, Justo kelygue tâzekeim, lâpylâ idaenkulymo. Asaemo azagâ tokalâ warâ uguondo kulelâ judeu domodo Jesus einwânni enday yagâ tâwaneim. Iewanugue toenzepa iemawyadâdâ inanry asaemo, Deus idânârâ kywymâryem awyly kâengatuday.

<sup>12</sup> Epafras lâpylâ idaenkulymo; Cristo Jesus xurâem tâwaneim lâpylâ merâ, atârâ Colossodâ âmaemo ewy Cristo einwânnilâ merâ. Aunlolâ inanry Deusram nhekadyly âmaemoem. Xurâ keba modoram mâzenagazeolymô umelâ Jesus mâinwâmpyra mipyra mitomoem Deusram nhekadyly. Deus ize ato mâuntuhomoem, amânhetomoem warâ nhekadyly.

<sup>13</sup> Epafras anhekyly tâense winase. Awylygue toenzepa merâ âsewanily, uguely, âmaemo Colossos donro modo, Laodicéia donro modo, Hierâpolis donro modo warâ imâem Jesus wâgâ mâuntuhomoem.

<sup>14</sup> Lucas kua kyeni toenzepa kinwynegyuly, Demas lâpylâ warâ idaenkulymo.

<sup>15</sup> Cristo eynynâ kypemugudo Laodiceiadâ tâtyuneim modo kâendaenkuly lâpylâ. Ninfa kâendaenkuly, etydâ Jesus einwânni modo Jesus wâgâ imâem tiuntuhoem âtâdyguyrri modo warâ.

<sup>16</sup> Xirâ kata mâintaimbygueduomo, Laodiceiadâ Jesus einwânni modoram igonotaungâ, akaemo lâpylâ intain-homoem. Akaemoram kata kâingonotyby ise mâintainlymo-ro warâ, intaimbygueduomo.

<sup>17</sup> Arquiporam aguewâtaungâ: “Pymâ Jesus amânhetoem ‘Aiekâ’ kehobyry mâenwanikeba tâiseba ikâ” kewâtaungâ.

<sup>18</sup> Urâ Paulolâ xirâ wâgâ iezedy iweninri idaenkuhomoem. Ywâgâ adâkezelâ itaungâ Deusram, tarâ kadeia oday ietagu ume.

*Deus nhesemo*

Deusram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

## 1 TESSALONICENSES

### Paulo Saguho Kata Inwenibry Tessalônica Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbryrâ xirâ Paulo inwenibry. Deus xirâ kata Pauloram inwenien-honly myakâwândy Tessalonicadâ Jesus einwânni modoram, xidadâ imâsedo Macedônia eynynonro. Grécia xurâem itybyem mârâ âji iwerâ. Jesus xunâry egatuze azagâ tâtâly tientay, Tessalonicaram myakâwândy Paulo idâly. Jesus wâgâ aguely tindadysebaom modo toenzepa iewiâpadaunmâmomy. Aituo myakâwâm Paulo, Silas warâ âwiendylymo târâpa.

Paulo Corintodâ awyly ume, Tessalonicadâ Cristo einwânni modo egary egatuwânmy Timóteo eyam. Aituo Paulo xirâ kata inwenily, teon-hondâdomoem, Cristo einwânsezelâ itomoem, Deuz ize ato ara lelâ aitomoem warâ lâpylâ nhurudylymo.

Xirâ kata wâgâ tytainze kurâ, xirâ onro anaxi Jesus odopâduo aini modo. Idânârâ einwânni modo egâ oxioze eunu duaxi âkuly, iguewâtyby modo, iguedânry modo alelâ.

#### Aguely adaguho

<sup>1</sup> Urâ Paulo xirâ âyanmo iweninri. Âmaemo Tessalonicadâ alâ Jesus wâgâ agueze, ehogueze, iomaenze warâ âtâdyguyri modoram xirâ kâinwenily. Kunwym Deuz eynynonro modoma kurâ, Kywymâry Jesus Cristo eynynonro warâ. Xirâ kâinwenday tarâ yagâlâ asaemo Silas\*, Timóteo warâ.

Âynynâmo Deusram xina nhekadyly, koendâ mâzehohomoem, akaladânimo peba itoem warâ.

#### Jesus tâinwânse tawily Tessalônica donro modo nhenehon-hombry

<sup>2</sup> Deuz agâ adâkeday, xina inanânehonwâbyramo inanry. “Ize mato lelâ Tessalonicadâ âynynonro modo anhekyly, Pabai. Awylygue xina iomaru” tâkeze inanry xina eyam.

<sup>3</sup> Aunlolâ inanry xina âmaemoem eyam nhekadyly: “Pabai, Tessalonicadâ âynynonro modo Jesus tâinwânsemo. Awylygue Jesus eynynâ toenzepa ewanumo. Toenzepa âpynedylymo tagonro modo agâ. Awylygue ton-honre kehoem âsemawyadâdylymo warâ. Jesus odopâniem awyly nhutulymo, aguehobry awylygue. Awylygue saguhoem adâitobry ara anitombryra awylymo, tâwâlâ lelâlâ wâne Kywymâry Jesus Cristo nheinwândylygue âzenagazeolyo. Alâ olâ toenzepa kehoem nheinwândylymo” tâkeze inanry xina Deusram.

<sup>4</sup> Cristo eynynâ ypemugudo, Deuz âwynedâmo awyly, turâenlâ induakeyby mawylymo warâ, tutuze xina.

<sup>5</sup> Deuzlâ âduakenrimo awyly, xina aguehobry mâindatomoem aieni awyly warâ, tutuze xina. Unâ iwâkuru tâdâsemagueho Jesus wâgâ aguenri xina negatu. Jesus wâgâ xina aguely kulâ waypa ani. Deuz Ispiritury eon-honru xina nenehom lâpylâ. Âkeâ lelâlâ ani xina nhegatyly, iozeno awylygue. Agâmo tatay, xina aitobry tutuzelâ âmaemo. Koendâ mitomoenlâ ani xina arâ aidyly, aguely warâ.

<sup>6</sup> Âduaymo xina atay xina aitobry ara amidâmo. Kywymâry Jesus aito ara amidâmo lâpylâ iwâgâ âyanmo xina nhegatuduo.

Xina aguely mâindatuomo, Jesus meinwândâmo. Jesus iduery modo toenzepa akaladâdâmo, inagazedâmo warâ, mâinwândylymogue. Deuz Ispiritury olâ omazeândâmo.

<sup>7</sup> Akaemo Macedônia eynynonro modo, Acaia eynynonro modo warâ Jesus einwânni modo, Deuz ize ato ara lelâ amidylymo nutumo. Tiuntuduomo, amitomo ara lâpylâ adâidyse awylymo. “Tessalônica donro modo ara aguine” kelymo.

<sup>8</sup> Iwague endaylâ wâne ielu ipyru idadyly myara taypanro modoram amitomobry âjidaholy; Macedônia donro modo, Acaia donro modo alâkulâ inkâba idani. Tâinkâ lelâba Jesus einwândyly mâinmopa mawylymo egary âjidaholy. Tâinwânse lelâlâ mawylymo; egary lakuru indasezegulyo. Awylygue ani âwâgâmo xina aguepa awyly, idânârâ igarymo âjidahoybem awylygue.

<sup>9</sup> Tâinkâ lelâba igarymo tâjidahoze. Warâ inanry aguelymo: “Jesus wâgâ Tessalonicaram agueze mydâdaymo, tonlo modo amyguelymo tydasemo ani. Tydeusrymo segueto, tuhugueto warâ neinwâmpyra tâisemo ani. Deuz iguedânry aguehobry ara lelâ iwerâ aidylymo, mâkâ Deuz tokaleom.

<sup>10</sup> Tutuzemo, Deuz imery Jesus odopâniem awyly. Mâkâ nhenuengulylymo” warâ inanry âwâgâmo aguelymo. Jesus iguewâm, Deuz olâ kurâem iletomâ. Deuz xurâ keba modo agâ kydâsenagazebyra kitoem, kâmakeinlâ awâkâ Jesus.

\* 1:1 Silvano, Silas ezekeho lâpylâ.

## 2

*Deus xurâem Paulo Tessalonicadá ewanopyry*

<sup>1</sup> Cristo eynynâ ypemugudo, tutuzelâ âmaemo, Tessalonicadá xina Jesus xunâry nhegatuduo, toenzepa kurâdo Jesus nheinwântobyry.

<sup>2</sup> Âyanmo taindyly iraynâ, târâ xidadâ imâsedo Filiposdâ xina âsenagazedobyry, tutuzelâ âmaemo Jesus wâgâ xina agueduo, xina nenagazedâmo. Xina nunâguedâmo. Inakanhe kehoem ani xinaram aguelymo warâ. Toenzepa kurâ domodo Jesus wâgâ xina aguepa itoem anyguemo wâne. Xirâ unâ wâgâ xina aguepa nipyra olâ, Deus “Egatuwâdaunda” kehobyry awylygue. Mâkâlâ mawânkâ ani xina eon-honru xuduim, tyanepe kehoem xina aguehoem.

<sup>3</sup> Kewâdyly kulâ mâkeba xirâ xina âyanmo agueho. Jesus wâgâ xina kewâdyly kulâ nitaymba âyanmo. Âdinherurumo tienmakehoem kulâ inkâba xina Jesus wâgâ aguely.

<sup>4</sup> Deus: “Aguewâtaunda” kehobyrylâ xina aguezesedo. “Jesus wâgâ aguelyem ise urâem iwanumo” kehobyrylâma xina. Aguehobyry adyese xina awyly tiuntulygue arâ aguely. “Deus ize ato aguykenre, kurâdo tindadyse ato mâkeba. Mâkâlâ mawânkâ kunâry âdara awyly xuturim kuru. Jesus xunâry aguykeho tutuzelâ mâkâ” tâkeze inanry xina.

<sup>5</sup> Âdinherurumo tienmakehoem kulâ, inokuzemo kulâ warâ inkâba xina agâmo koendâ awyly, xina xunâgoengu warâ. Xinaram koendonro modo mâunduhomoem kulâ xina inomedâdaymbamo keankâ Jesus wâgâ. Awârâ tutuzelâ âmaemo, tutuzelâ lâpylâ Deus.

<sup>6</sup> Tohoguedoem inkâba xina Jesus wâgâ aguely, xina mâen-hoguedomoem inkâba, kurâdoram tâzehoguehoem inkâba warâ.

<sup>7</sup> “Cristo ingonotyby tawylygue, xina xyrentaungâ; xina aguehobyry ara aitaungâ warâ” keim tâise xina. Âdykâ olâ xina arâ aguepa âyanmo. Tâjise tymeombyry sawirim ara ani xina âduaymo tatay.

<sup>8</sup> Âwynedâmo inanry xina. Awylygue âmaemoem unâ iwâkuru Deus aguehobyry xina tiengatudyze awyly. Tâwâlâ lelâlâ wâne xina âdyoly; alâ olâ Kâmakerim Jesus wâgâ xina âyanmo adâkedyze awyly.

<sup>9</sup> Xirâ tânanâguezelâ âmaemo, Cristo eynynâ ypemugudo. Deus, “Egatuwâdaunda” kehobyry unâ tiengatuday, toenzepa xina nâsewani peto oday, kopae alelâ, ipa tato tianâtoem. Âdinherurumo ewy xina nekadaymba ani âduaymo tatay.

<sup>10</sup> Atârâ tatay, Deus ize ato arâ lelâ ani xina aidyly. Agâmo xina atay, pymâ domodo ezewenry xina neinwândâ. Aguehomo ara lelâ ani xina aidyly. Ânguyram alâ kulâ xina nâzewentâowâbyra. Âmaemo Jesus einwânni modo tutuzelâ âmaemo atârâ xina aitobyry. Xina aidyly nedâ lâpylâ Deus, xina aguely idânârâ nidadâ warâ.

<sup>11</sup> Tâjijunwym wâne tymeom nhedyly myara nhedâmo, tutuzelâ âmaemo.

<sup>12</sup> Tuomareba mataymo, xinalâ ani omazeânimo, âurunimo warâ, Deus ize ato lelâ amânhetomoem. Xurâem mitomoem, âgâsedâmo. Mâkâlâ âwymârymoem tâitoem âgâsenimo, târâ eydâ atodâ tagâ tohoguezeihinhe tynrenseinhe warâ mitomoem.

*Jesus nheinwândylymogue Tessalônica donro modo enagazedobyry*

<sup>13</sup> Warâ inanry Deusram xina aguely: “Koendonro âmâ, Tessalônica donro modoram Jesus wâgâ xina aguely mâindanehon-hobyry wâgâ, mâinwânehon-hobyry wâgâ warâ” xina kely.

Deus aguehobyrylâ xina xunâry awyly meinwândâmo. Mutumo, tyangahu odano kulâ keba xina agueho awyly. Deus wâgâlâ ani xina aguely. Idanipyryem, Jesus meinwândâmo. Deuslâ ani mâinwântomoem aienehoim. Iweloem âedylymo, âmaemo Jesus einwânni modo, imâem ize ato ara amitomoem, mâinwântomoem warâ.

<sup>14</sup> Cristo eynynâ ypemugudo, âpemugudomolâ ani inagazenimo. Âizepamo ani Jesus einwânnipyryem mawylymogue. Adâise lâpylâ myani Judeiadâ ipemugudomolanlâ myani târâ Deus xurâ modo âzenagazeoly lâpylâ, Cristo Jesus einwânnipyryem awylymogue.

<sup>15</sup> Judéia donro modo idamudo, Deus xunâry egatuwâni modo xyâwânmmomy. Iwerâem kulâ judeu domodo Kywymâry Jesus nyâen-homo. Iwerâ xina tânagazezemolâ inanry. Jesus unâry xina tiengatudyze atodâ xina nhejikelymo. Deus ize ato araba akaemo aidyly! Idânârâ Cristo einwânni modo iduery akaemo!

<sup>16</sup> Judeu keba modoram Jesus wâgâ tâdâsemagueho xina nhegatudyzebamo. Awylygue toenzepa inakai modo anhesezedylymo, Deus tânagazedo nhondylymo warâ. Toenzepa ise xypyry etay âzenagazeoly.

*Paulo Tessalônica donro modoram tâtâondyze itobyry*

<sup>17</sup> Iweâpa xina agâmopa awyly, Cristo eynynâ ypemugudo. Agâmopa lelâlâ wâne xina, alâ olâ inanry xina inanâguelymo. Toenzepa xina âyanmo tâtâondyze awyly!

<sup>18</sup> Nhentondyzemo xina. Urâ Paulo udâondyse widâ. Satanás olâ iekuâdâdâ.

<sup>19</sup> Pymâ Jesus odopâduo, xina agâlâ ise âmaemo mâk enado. “Tessalônica donro asaemo. Eagâmo âwâgâ xina agueday, âinwândâ asaemo. Tâzenagazeoly umelâ âinwândâmo” keze xina Jesusram. Aituo ise xinaram aguely: “Temary koendonro âmaemo” kely. Xina aguehobyry wâgâ olâ mâinwândylymo, âkelo anano modo Jesus nheinwândylymo lâpylâ warâ. Adaimpâni wâne tâpywado tienmakêduo tuomazeze, myara xina iomazely Jesus tâinwânse mawylymo tiuntuduo, tâpywado tienmakely-ro waunlo ara kehoem.

<sup>20</sup> Toenzepa lelâlâ xina adawily, xina iomaru warâ, Jesus mâinwântomobyry wâgâ. Pymâ Jesus enadoram idâppyem, “Âinwânipryro modo asaemo, âwâgâ xina agueduo” keze xina.

### 3

<sup>1</sup> Igarymo nidapyra tawyly xina nemaemba keankâ. Awylygue xina âseinwândyly: “Urâ, Silas warâ tarâlâ ise xina Atenasdâlâ.

<sup>2</sup> Timóteo ise Tessalonicaram idânri-ro warâ” uguely. Awylygue xina ingonodyly. Cristo eynynâ kypemugulâ mawânkâ koendâ Deus xurâem tâwaneim. Xina agâ nâsewani, unâ iwâkuru Jesus wâgâ egatulyem. Omazeânzemo keankâ xina ingonodyly, Jesus einwândyly mâinmopa mitomoem. Jesus wâgâ imâem inomedâzemo xina ingonodyly.

<sup>3</sup> Jesus izepaom modoram mâzenagazeolymogue âtywambyra mitomoem omazeânzemo. Tutuzelâ âmaemo, Jesus einwânni modo tânagazezeim awyly. Kydâsenomedâdoem, kieinwântoem warâ Deus nhutuybylâ myani awârâ.

<sup>4</sup> Agâmo tatay, xina âurudâmo: “Jesus kieinwândylygue âzenagazeoze kydaze” xina nygue. Arâ lelâlâ aidyly.

<sup>5</sup> Igarymo kâindapyra wawyly kâenmaemba wakynre. Awylygue keankâ Timóteo kâingonodyly, Jesus tâinwânselâ mawylymo kâuntuhoem. Toenzepa keankâ iekuâdâdylymo. Aituo keankâ kâpaunzedyly: “Diabu keanze Tessalônica donro modo tâsenagazedylygue Jesus einwândyly inmohomoem anieneho? Imâem iduaymo kâsewani, Cristo wâgâ eyanmo aguelyem. Âdyem nitaymbaka keankâ Jesus wâgâ kâenomedâdombyry? Iewanopyry âdyem nipyra kawânâ keankâ” uguely yangahu oday.

<sup>6</sup> Iweâ kulâ keankâ Tessalonicadâba odopâdyly. Âwâgâmo agueduo, toenzepa xina nohomaendâ. “Toenzepa Tessalônica donro modo Jesus nheinwândyly. Âjigue tâpynezemo. Inanâgueduomo, tuomazezemomy inanry. Nhedysemo myinanry warâ” nygue Timóteo. Toenzepa xina mâendyse mawylymo; arâ lâpylâ nhedysemo xina awyly.

<sup>7</sup> Arâ lâpylâ tarâ Jesus xurâ keba modoram xina adakaladâoly, xina âzenagazeoly warâ. Jesus einwândyly mâinmopa mawylymo tiuntuduo olâ xina iomaru kuru, Cristo eynynâ ypemugudo.

<sup>8</sup> Kywymâry Jesus ize ato aralâ amisedylymo awyly tiuntuduo, âwâgâmo xina nâseguâdâbyra iwerâ. Tâwaneim kua ityby ara xina.

<sup>9</sup> Awylygue Deus agâ xina aguely iwerâ: “Toenzepa xina iomaru, Tessalônica donro âynynonro modo xurâem amitobyry wâgâ. Jesus einwândyly nimopa awylymogue xina iomaru. Âdatâkeho xina nutuba toenzepa tuomarugue” xina kely Deusram âwâgâmo.

<sup>10</sup> Izedylymo wâgâ xina aguepa nipyra inanry, Deus agâ adâkeday. Alâ inanry xina Deusram nhekadyly, peto oday, kopae alelâ: “Pabai, Tessalonicaram xina idâontoem aietongâ. Tâlâ âwâgâ nhutudânrymo. Toenzepa myarâ tâtâdyze xina awyly, imâem âwâgâ enomedâzemo” tâkeze inanry xina.

<sup>11</sup> “Âynynonro modo enomedâze Tessalonicaram xina idâhoem aienehonwâdaungâ” tâkeze inanry xina Kunwym Deusram, Kywymâry Jesusram warâ.

<sup>12</sup> “Tessalônica donro âynynonro modo âjigue tâpynezemo. Âynynâbaom modo tywynezemo lâpylâ warâ. Âjigue koendâ âpynedomoem, âkelo modo inwynedoem warâ aiekâ. Toenzepa xina akaemo inwynedo ara, arâ lâpylâ idânârâ kurâ domodo niwynedâmo.

<sup>13</sup> Eon-hondâgâmo, tâsenagazeduo kulâ âinwândyly nimopa itomoem, âynynâbanro modo ara nipyra itomoem. Aituo ise âdy wâgâ tâwentâguezebamo awyly Deus enado, idânârâ âynynonro modo agâ modopâduo” xina kely inanry Kywymâry Jesusram.

### 4

#### *Deus ize ato ara lelâ adâjito*

<sup>1-2</sup> Agâmo tatay xina inomedâdâmolâ âdara Deus ize ato aguiendyly wâgâ. Arâlâ amidylymo-ro warâ, Cristo eynynâ ypemugudo. Iwerâ kâenkagulyly lâpylâ olâ, Deus ize ato ara amidylymo mâinmopa mawylymo, ize ato ara lelâ amânhedylymo warâ. Tutuzelâ âmaemo saguhoem xina ârutomobyry, Deus ize ato ara amitomoem. Alâ inanry xina âyanmo aguely, Kywymâry Jesus “Aguewâtaunda” kehobyry.

<sup>3</sup> Enanâgueze urâ âmaemoem Deus aguehobyry. Deus xurâ lelâlâ mawylimo enehoim lelâ aietaungâ. Uguondo modo, âwydymo lelâ xynanâdaungâ. Pekodo modo, osomo lelâ âynanâdâmo.

<sup>4</sup> Deus ize ato ara lelâ âwydymo agâ itaungâ. Koendâ eagâ itaungâ, xyrentaungâ warâ.

<sup>5</sup> Jesus eynynonro keba modo Deus nutuwâbyramo. Tâwâlâ nâjimanâbyramo. Tâdâgudyse idylimo-ro watay, âdaunlo agâlâ aidylimo. Akaemo aito araba aitaungâ.

<sup>6</sup> Âpemugumo Jesus einwâni iwydy, âkelo iwydy warâ kâdyananâdaundâ. Eagonro uguondo iwydy xynanâni-ro watay, emagaguylâ mâkâ aunlo. Kywypado kulâ awârâ arâ adâjidyly. Tywydy lelâ xynanâdânry toenzepa ise Kywymâry Jesusram âzenagazeoly. Adâkezelâ ani urâ saguhoem. Augueondyly xirâ ton-honre kehoem.

<sup>7</sup> Deus kuduakely izepa ato aguienloem inkâba, turâem lelâ kyize tawylgyue. Kydohogüin-hobyry keba kulâ kiynanâdyzeba mâkâ. Turâ modo aito ara lelâ aguidyse awyly.

<sup>8</sup> Xirâ enomedâdo Deuslâ keankâ âurutoemoem aguenri. Awylgyue xirâ kâenomedâdo tyeinwândysebaom modo urâ kulâ mâkeba nheinwântânrymo, Deuslâ. Deus Ispiritury âdaunloenlâ inakai aientaymba. Deuslâ, Tyispiritury âyanmo igononi, inomerymo xuduze, Deus monhomazeândomoem.

<sup>9</sup> Deuslâ keankâ inomedânimo âmaemo Cristo eynynâ âjipemugu modo, âjigüe mâpynedomoem. Aituo xirâ wâgâ augueompyra ise urâ.

<sup>10</sup> Idânârâ Macedônia eynynonro Jesus einwâni modo agâ koendâ lelâ mawylimo, tutuze urâ. Awylgyue “Alâ aisezedaugâ” uguely, Cristo eynynâ ypemugudo.

<sup>11</sup> Tâjiewiâsezeba, tâtuebazeba warâ itaungâ, agonromo kâdunâguedaundâ warâ. Koendâ lelâ itaungâ. Deus amânhedysemo ato lelâ aietaungâ, âdygue tâtynanâzeba itaungâ. Tynepa itaungâ. Âsewaniwâdaungâ olâ âpynirymo, itymo owogonromo, âdy ize matomo warâpe mitomoem. Warâma keankâ xina âurudylymo, agâmo taty.

<sup>12</sup> Arâ lelâ amisedylymo-ro watay, âwâgâmo koendâ agueze Jesus eynynâbaom modo: “Etaungâ asaemo Jesus einwâni modo. Typynirymo, tâty tywogonro warâpe tâitoem âsewanirim asaemo. Koendonro asaemo” kezemo. Ize matomobe lelâ ise âmaemo; ânguyram tâkaremba ise âmaemo warâ.

#### *Kywymâry Jesus odopâdo*

<sup>13</sup> Jesus einwâni modo igueduo âdaidylymo awyly xina mâuntudyzemo ato. Awylgyue aekuro tytyremba itaungâ, Jesus einwântânry modo araba. Iguewâtyby modo kurâem itonze awyly neinwâmpyramo. Awylgyue toenzepa âjityendylymo. Cristo eynynâ ype-mugudo, kurâ Jesus einwâni modo olâ arâpa awyly, tutuze kurâ.

<sup>14</sup> Jesus iguehobyry. Deus olâ akâwâm kurâem tyetonze. Awylgyue idânârâ Jesus einwâni modo igueduo, kurâem itonzemo awyly kiuntuly, Jesus odopâduo, eagâ isemo warâ.

<sup>15</sup> Kywymâry Jesus xinaram nhutuen-hoymbylâ xina âyanmo agueho. Odopâduo, idânârâ xurâ modo ara, idâze lelâ kurâ kaynâ, eagâ oxioze. Âjigüe ise einwâni modo kytâwâdyly, igueypy modo, iguedânry modo alelâ. Iguedânry modo waunroenlâ kytâwâbyra ise kurâ.

<sup>16</sup> Warâ ise aidyly. Deusdâpa ise Kywymâry Jesus xytâgyuly. Pymâ tâgareim saindyly wâne myara ise Jesus saindyly. Idânârâ turâ modo âtâdygyuhoem agueze. Anju domodo iwymâry ise kygâseni. Deus tytrombetary idyen-honze, Jesus odopâdyly awyly xutuhoem. Jesus einwâni iguewâtyby modo ise saguhoem kuru kurâem itoni.

<sup>17</sup> Ilâpygueduo ise kurâ iguedânry modo on-hoam kidyly eagâmo, kurâ Jesus einwâni modo. Eunu duay ise kydadaholy, Kywymâry Jesus agâ oxioze, aunloenlâ eagâ kitoem. Eagâpa kitaymba ise kurâ.

<sup>18</sup> Awylgyue Jesus einwâni igueduo, âtynrumo kuru tâiseba itaungâ. Jesus odopâduo, eagâ itonze kydawyly, tutuzema kurâ. Xirâgue agonromo iomazeândaungâ, egamiwâdaungâ warâ.

## 5

#### *Pymâ Jesus odopâdyly tynwânwânselâ kine*

<sup>1</sup> Cristo eynynâ ypemugudo, âdy aini wâgâ, âdara aidyly wâgâ warâ auguepa ise urâ. Ânguy âdara mâkâ odopâdyly awyly nutuwâbyra.

<sup>2</sup> Ânguy tynwânwândyly umeba ise odopâdyly, tutuzelâ âmaemo. Âtâ odo inwânwândyly umeba wâne tâmagazeim kopae âewyly myara mawânkâ ise odopâdyly.

<sup>3</sup> Warâ ise Jesus einwântânry modo aguely: “Idânârâ koendâ lelâ tarâ. Ânguy nâseguâdâbyra, takalagueba, nâsenagazebyra warâ” kezemo. Arâ aguelymo ume ise Jesus odopâdyly. Inakanhe aitomobyry wâgâ enagazezemo. Imery egasehoem pekodo



idâhu ewâmadyly watay, ewânugue nâsemaguewâbyra, myara ise Jesus eynynâbaom modo âsemagueho nudupa awyly.

<sup>4</sup> Cristo eynynâ ypemugudo, tutuzelâ âmaemo Jesus odopâniem awyly, iamu oday adakobâni emyenro keba mawylmogue. Odopâdily tânuenzelâ âmaemo. Awylygue inananymolâ mawylmo. Tânanano wâne tâmagazeim saintuo tânanaym lelâ-ro myara ise inananymo mawylmo, Jesus odopâduo.

<sup>5</sup> Peto oday adakobâni modo emyenro kurâ, Jesus xurâ kydawyllygue, âkealâ iwâgâ tutuze kydawyllygue warâ. Kopae adakobâni modo emyenro mâkeba kurâ, ize ato ara aini kydawyllygue, Kywymâry Jesus odopâdily tynwânwânse kydawyllygue warâ.

<sup>6</sup> Xykywâni modo arapa kine, xykydânry modo ara, âdy aini awyly kiuntuhoem.

<sup>7</sup> Kopae xykywâni emyenro, toku ikano emyenro warâ mawânkâ Jesus einwântânry modo. Jesus odopâdily nenuendaymbamo.

<sup>8</sup> Kurâ peto oday adakobâni modo emyenro olâ tânuenzelâ kine. Tâwâlâ kydâjimanâne, Deus ize ato aiedily kinmopa kitoem. Sodadu wâne tuhohu xuahuho metalgueto tyese, tuduery ipy tyâpa itoem, myara Jesus kyzeinwânsezene, kagonro kyjiwynene warâ, Satanâs amaymba kydâsemaguehoem, inakanhe kyese keduo. Sodadu wâne tyangahu xuahuru metalgueto tyese, myara Jesus kyzeinwâne.

<sup>9</sup> Kywymâry Jesus Cristo kieinwândylygue kydâsemaguehoem myakâwandy Deus kuduakely, kydâsenagazedoem inkâba.

<sup>10</sup> Kâmakeze akâwâm Cristo iguely, aunloenlâ eagâ kitoem. Odopâduo, eagâpa kitaymba ise kurâ igueppem, kyiguepa aielâ.

<sup>11</sup> Awylygue, âjigue âzeon-hondâdaungâ, ago kuru Jesus mâinwântomoem. Âjigue tâtuzuzelâ itaungâ, Deus ize ato ara amitomoem. Arâlâ amidilymo awyly, tutuze urâ.

#### *Paulo Tessalônica donro modo nhurutobyry*

<sup>12</sup> Eagonro lâpylâ âxurutomo, Cristo eynynâ ypemugudo. Tessalonicadâ Jesus einwânni modo iwymârydo xyrentaungâ. Kywymâry Jesus induakeybylâ akaemo âwymârymoem. Jesus wâgâ inomedâdilymo, ârudilymo warâ, imâem Jesus mâinwântomoem.

<sup>13</sup> Xyrentaungâmo, iwynedaungâmo warâ, âmaemoem anhekylymo wâgâ. Âwymârymo kâdunâguedaundâ. Koendâ lelâ itaungâ agonromo agâ.

<sup>14</sup> Warâ lâpylâ âyanmo auguely. Tâsewanidyzebanro modo xurutaungâ: “Tynepa itaungâ, âsewanize, ize matomobe mitomoem” kewâtaungâ tâsewanidyzebanro modoram. Jesus einwândyly imoze kewâni modo xurutaungâ, Jesus einwândyly nimopa itomoem. Imâemba kulâ Jesus wâgâ einwânni modo eon-honwanâdaungâ, imâem nheinwântomoem; tâmawydâzeim modo emawydâdaungâ. Ânguy kâdynedaundâ; idânârâ emawwâdaungâ, âdamyguepamolâ.

<sup>15</sup> Inagazenimo kâzenagazedoem. Koendâ lelâ idânârâ etaungâ, Jesus einwânni modo, einwântânry modo aielâ.

<sup>16</sup> Tuomare lelâ itaungâ.

<sup>17</sup> Deus agâ amyguepa tâiseba itaungâ.

<sup>18</sup> Deusram agewâtaungâ: “Deus, koendonro âmâ” kewâtaungâ, âmaemoem koendâ atay, koendâpa atay aielâ. Arâ amyguelymo mawânkâ Deus ize ato, Cristo Jesus eynynonro mawylmogue.

<sup>19</sup> Deus Ispiritury anhekyly kâzekuâdâdaundâ.

<sup>20</sup> Deus wâgâ ânguylâ aguely mâindadylymo-ro watay, izepa tâiseba itaungâ.

<sup>21</sup> Iwantaguedaungâ, sapâiguedaungâ warâ lakuru, aguehobyry âkealâ, âkealâba warâ awyly mâuntuhomoem. Deus eynynâ aguely-ro watay, idataungâ, einwântaungâ warâ.

<sup>22</sup> Inakanhe kulâ agueduomo olâ kâzeinwântaundâ. Ânguy inakanhe kulâ kâdurutaundâ lâpylâ warâ.

<sup>23</sup> Warâ inanry Deus agâ âwâgâmo auguely: “Deus, âmâlâ inanry xina takalagueba itoem aienehonrim. Tessalônica donro modo koendâ lelâ itomoem aiekâ, ara itomoem. Eagâmolâ ikâ, inakanhe nâpaunzebyra itomoem, inakanhe anipyra itomoem, âdygue tâwentâzeba itomoem, Pymâ Jesus Cristo odopâduo” tâkeze winase Deusram.

<sup>24</sup> “Aiese urâ” tâkehobyry aieni tawyllygue adâkehobyry aralâ ise aidily agâmo. Turâem myakâwandy âduakelymo.

<sup>25</sup> Cristo eynynâ ypemugudo, xina eynynâ adâkezelâ itaungâ Deusram.

<sup>26</sup> Tohonuguze âsedaenguwâdaungâ, Cristo eynynâ âjipemugu mawyllymo mânehonhomoem\*.

\* 5:26 Saguhoem tohonuguze âsedaengulymo. Iwerâma tâpymogoynze tâdâsedaenguly.

<sup>27</sup> Kywymâry Jesus “Aguekâ” kehobyry wâgâ arâ auguely âyanmo: “Idânârâ âmaemo Tessalônica donro Jesus einwânni modo xirâ pape itainly idataungâne” uguely. Xirâ kâinweniby idânârâ mâuntudyzemo kuru wato.

*Kywymâry nhesemo*

<sup>28</sup> Kywymâry Jesus Cristoram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

## 2 TESSALONICENSES

### Paulo Kata Azagâ Ieto Inweniby Tessalônica Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbryrylâ xirâ Paulo inweniby. Saguho kata Paulo eyanmo inweniby, tienmakebygueduom, Tessalônica donro modo koendâ nutubamo myakâwândy Kywymâry Jesus Cristo odopâdyly wâgâ. Tâlâ myakâwândy “Jesus nodopâdâ” keim. Tâlâ pylâ, “Inepa ise Jesus odopâdyly” keim. Arâ tunâgugue, âpa ezay tâwanu modo inmolymo. Âkelomo ipi ezanobyrygue, âkelomo nhepywadybygue warâ kulâ myakâwândy âwinduadylymo. Aituo Paulo xirâ kata inwenily, koendâ Jesus odopâdyly wâgâ tienomedâdomoem. Xirâ kata wâgâ wakeho tytainze kurâ: “Tâsewanidyzebaom ipyniry tuduzepa nidâ” kely.

Jesus odopâdyly iray, toenzepa ise inakanhe tadawly, Deus eynynâba itaynzemo warâ, kely tytainze kurâ xirâ kata wâgâ. Xirâ kata itainrim modo Jesus einwândyly nimopa itomoem adâkeze Paulo, iozepaongue kulâ enomedâdo neinwâmpyra itomoem warâ.

#### Aguely adaguho

<sup>1</sup> Urâ Paulo xirâ âyanmo iweninri. Âmaemo Tessalonicadâ alâ Jesus wâgâ agueze, ehogueze, iomaenze warâ âtâdyguynri modoram xirâ kâinweniondyly. Kunwym Deus, Kywymâry Jesus warâ eynynonroma kurâ. Xirâ kâinweniday tarâ yagâlâ asaemo Silas\*, Timóteo warâ.

<sup>2</sup> Âynynâmo Kunwym Deusram, Kywymâry Jesus Cristoram warâ xina nhekadyly, koendâ mâzehohomoem, akaladânimo peba mitomoem warâ.

#### Jesus odopâduo, tynynâbaom modo enagazeze

<sup>3</sup> Deus agâ adâkeday, inañehombamo inanry xina. “Ize mato lelâ Tessalonicadâ âynynonro modo anhekyly, Pabai. Awylygue xina iomaru. Toenzepa âjigüe âpynezededylymo, saguho byry takaze kehoem lâpylâ âinwândylymo warâ” xina kely inanry Deusram. Cristo eynynâ ypemugudo, xina arâ aguely, âkealâ awylygue.

<sup>4</sup> Tadawize inanry xina âwâgâmo agueze, âkelo anano modo Jesus wâgâ ehogueze âtâdyguynri modoram: “Tessalônica donro modo agâ tuomare xina. Tâsenagazededyly tâmaenzemo, Jesus einwândyly olâ nimopamo. Deuslâ tâeniem ize atomo iwerâ” tâkeze inanry xina âwâgâmo.

<sup>5</sup> Xypyry etay adâkehobyry ara ise Deus aguyedyly; awârâ meinwândâmo. Awylygue keankâ mâsenagazededylymo mâenmaenlymo. Deus adâkehobyry adyese lelâlâ awylylâ mâenonlymo. Awylygue ise Deus, kurâdo idânârâ iwymâryem ituo, “Tessalonicadâ ynynonro modo yagâlâ ise” kely. Warâ ise Deus anhekyly. Koendonroam, koendonrolâ nhuduly. Inakanhe aini-am, inakailâ nhuduly warâ.

<sup>6</sup> Ioze lelâ aieni Deus; awylygue ise inagazenimo nhenagazededyly lâpylâ.

<sup>7</sup> Deusdâpa Jesus âetuo ise kydâsenagazededyly adainly. Tyanjury ton-honruneim modo agâ ise âewlyly.

<sup>8</sup> Peto iatygu ara tohore kehoem ise mâkâ odopâdyly. Deus tiuntudyzeba, Jesus wâgâ unâ iwâkuru modo tindadyseba waunlo modo enagazeze.

<sup>9</sup> “Ton-honreim âmâ, Jesus, tynrenseim warâ” eynynonro modo keday, typygueba ise âsenagazededylymo; pymâem atodâbamo ise.

<sup>10</sup> Kywymâry Jesus odopâduo, xyrense, ehogueze warâ kurâ, eynynonro kydawlylygue. “Koendonro âmâ, Jesus, ton-honreim warâ. Âyrentâ xina” kykely ise eyam. Xina agâlâ ise târâ Deus eydâ atodâ mawlylymo, Jesus xunâry xina nhegatuyby, einwânnipyryem mawlylymogue.

<sup>11</sup> Awylygue inanry Deusram âwâgâmo xina aguepa nipyra awly: “Pabai Deus, xina nhekadyly, Tessalônica donro modo ize mato ara lelâ aitomoem, xypyry etay, ‘Ynynonro asaemo’ myguehoem. Jesus einwânni tawlylygue, koendonro adienysemo ato anhetomoem eon-honrumo xudugâ” xina kely inanry.

<sup>12</sup> Koendâ lelâ amidylymo tientuo, kurâ domodo wakezemo: “Koendonro awâkâ Jesus Cristo. Aguehobyry ara lelâ mawânkâ eynynonro modo aidyly” kezemo. Warâ lâpylâ ise Deus aguely: “Urâem, koendonro akaemo Tessalônica donro modo” keze. Arâ Deus aguely ise, Kunwym Deus, Kywymâry Jesus Cristo warâ koendonroem agâmo awylygue.

## 2

*Uguondo ânguydo kulâ âepanâgueze, Jesus odopâdyly iraynâ*

\* 1:1 Silvano, Silas ezekeho lâpylâ.

<sup>1</sup> Xina áurudámolá Kywymáry Jesus Cristo odopádyly wâgâ, idânârá kurâ Jesus einwânmi modo eagâ kydatádyguily wâgâ warâ. Koendâ xirâ áurutomobry xutuwâdaungâ.

<sup>2</sup> Idânârá kurâ domodo xutuze Kywymáry Jesus odopádyly. Awylygue tadahulizeba itaungâ, ânguylá “Kywymáry Jesus nodopâdá” keduo. “Deus Ispiritury Pauloram Jesus odopádybyem awyly nutuen-ho” myguehonlymo watay, kâzeinwântaundâ. “ ‘Kywymáry Jesus nodopâdá’ nygue Paulo” kely ânguylá watay, kâzeinwântaundâ. Ânguylá, “Paulo igatary ‘Kywymáry Jesus nodopâdá’ keho xina nemake” keduo, kâzeinwântaundâ warâ. Kewádylymo kulâ ise.

<sup>3</sup> Etaungâne. Ânguyram tâzenokuozebane itaungâ. Tâinkâ lelâba ise Deusgue tywymágu izepaom modo. Deus nyrempyramo, neinwâmpyramo warâ ise. Awârâ aidyly ume, uguondo ânguydo kulâ âpanâgueze. Deus iduery ise mâkâ. Kaudyly iraynâlá myakâwândy Deus mâkâ wâgâ aguely: “Aunloenlá ise mâkâ uguondo ânguydo kulâ tâdâsenagazedoam kâingonodyly” kewândymy Deus.

<sup>4</sup> Xirâ onro anam tatay, toenzepa ise Deus nhewiâsedily. Idânârá Deus xurâ modo, ize ato modo idueryem lâpylâ ise mâkâ. “Urâ lelâ yrentaungâ” keze. “Idânârá takaze ton-honreim urâ” keze. Deus ety Jerusalém donro odaji egawânse. Pymâ ton-honreim xurery wâgâ ise târâ ekadyly. “Idânârá onro anano modo iwymáryem urâ” keze. “Urâ lelâ Deus kuru” keze. Kewádyly kulâ olâ ise.

<sup>5</sup> Agâmo watay, Jesus odopádyly iraynâ âdara aidyly wâgâ auguelâ âyanmo. Enanâguewâdaungâ xirâ wâgâ âyanmo auguehobry.

<sup>6</sup> Tutuzelâ âmaemo awârâ anipyra itoem sainlânehondânrybe awyly. Awylygue mâkâ uguondo ânguydo kulâ nâpanâgueba awyly wao. Tâepanâgueho odaji ituolâ ise mâkâ âpanâguely.

<sup>7</sup> Uguondo ânguydo kulâ nâpanâgueba lelâlâ wâne, toenzepa olâ xirâ onro anam inakai modo aidyly. Toenzepa lelâlâ ise inakai modo aidyly, uguondo ânguydo kulâ sainlânehondânry xirâ onro anaymba idyly-ro watay.

<sup>8</sup> Sainlânehondânry xirâ onro anaymba ituo lelâ ise mâkâ uguondo ânguydo kulâ âpanâguely.

Âpanâguehobry iweâpa nipyralâ ise Kywymáry Jesus odopádyly, eon-honru etyze. Pymâem lelâlâ ise Jesus odopádyly, mâkâ eon-honru etyze. ÂBU tâkelygue kulâ ise Jesus mâkâ eon-honru nhetyly.

<sup>9</sup> Ton-honru nadainhopa awyly ara ise mâkâ uguondo ânguydo kulâ aisezedily. Satanás eon-honrugue ise adyenyro modo kehoem, iwâkuru modo warâ anhedyly. Etaynrim modo iomazeze, anhekyly modo tientuo. Koendonro modo ara ise anhekyly. Anhedyly eni modo âzenokuoze. Aituo ise tyangahu oday aguelymo: “Etaungâ. Deus eon-honruguelâ awâkâ adyenyro modo anhedyly” kezemo.

<sup>10</sup> Jesus eynynâbaom modo âzenokuoze, arâ aidyly tiendylygue. “Koendonro merâ. Koendâ merâ aidyly” kezemo. Akaemolâ ise tâwâlâ âturim tâdâsenagazedoam tâtâhomoem. Jesus wâgâ unâ aguenri nehoguebyramo, tindadysebamo warâ. Einwânnipyrymoen-ro watay, tynynâ inemopyryem tâise Deus.

<sup>11</sup> Jesus wâgâ unâ iozeno lelâ neinwâmpyra awylymogue ise Deus mâkâ uguondo ânguydo kulâ xunâry nheinwânehonly. Awylygue ise unâ tonokudo idânârá nheinwândylymo-ro warâ.

<sup>12</sup> Aituo ise Deus aguely: “Jesus wâgâ unâ iozeno tyeinwândysebaom modo ydâ izepa ise urâ. Tâdâsenagazedoanlá ise idâlymo, inakanhe adâidylylâ mawânkâ ize atomo kuru” kely ise.

#### *Deus induakeyby modo âsemaqueze*

<sup>13</sup> Cristo eynynâ ypemugudo, Kywymáry Jesus toenzepa inwynegyly âmaemo. Awylygue aunlolâ Deusram “Koendonro âmâ,” xina kely, koendonro âmaemoem anhetyby wâgâ. Kaudyly iraynâlá myakâwândy mâkâ âduakelymo, xurâem mitomoem, Tyispiriturygue imakehomoem, ize ato ara lelâ amitomoem warâ. Unâ iozeno Jesus Cristo wâgâ mâinwântuom, mâsemaquehomoem âduakelymo.

<sup>14</sup> Jesus wâgâ unâ iwâkuru xina nhegatuodo, meinwândâmo. Awylygue ise xypyry etay Kywymáry Jesus Cristo ehoguedodâ, xyrentodâ warâ mawylymo lâpylâ.

<sup>15</sup> Deus xurâem mawylymogue, ton-honre kehoem Jesus einwântaungâ. Agâmo tatay, xina inomedâdâmo, Deus ize ato ara amitomoem. Ilâpygueduo, âyanmo kata xina niweni, nigonodâ warâ xirâ modo wâgâ aguenri. Awylygue olâ inomedâdomobry ara lelâ aitaungâ, xina kely.

<sup>16-17</sup> Kunwym Deus toenzepa kywynedyly. Kagâ koendonro tawylygue ise konhondâdyly, kieinwândyly kinmopa kitoem. Aunloenlá ise eagâ kydawyly warâ. Kywymáry Jesus Cristoram, Kunwym Deusram warâ omazeândomoem ize ato lelâ amânhetomoem,

mâinwânsezedomoem, ohonwanâdomoem, koendonro amânhesezedomoem, koendonro lelâ amygezesezedomoem warâ xina nhekadyly.

### 3

#### *Xinaem Deusram ekadaungâ*

<sup>1</sup> Cristo eynynâ ypemugudo, kâmpygueândoem wauguely olâ. Xinaem wao Deusram ekadaungâ. “Paulo domodo agâ ikâ. Inepa kehoem Kywymâry Jesus wâgâ mârâ anakâ lelâba xutuen-hongâ. Mâkâ wâgâ aguelymo idataynrim modoram inepa xutuen-hongâ, einwânehongâ warâ, xina Jesus aguehobyry koendâ kehoem nhutihobyry ara.

<sup>2</sup> Toenzepa âunâry einwântânry modo, Jesus unâry egatuwâni modo xyâze kewâni modo. Paulo domodo olâ wao egâ, asaemo Deus iduery modoram nâzenagazeoba itomoem” kewâtaungâ wao Deusram.

<sup>3</sup> Adâkehobyry aieni lelâlâ mawânkâ Kywymâry Jesus. Awlylygue ise aunlolâ onhonwanâdâmolâ awlyly mâkâ mâinwânsezedomoem. Satanâs amaymba aunlolâ imakezemo mâkâ, Deus aguehobyry mankadomoem aienehonze keduo.

<sup>4</sup> Kywymâry Jesus ize ato ara amidyse mawlylymo xinaram nutuen-ho. Tutuze xina, Kywymâry Jesus tâinwânse mawlylymo, âurutomobyry ara lelâ amidylymo warâ.

<sup>5</sup> Warâ âynynâmo Kywymâry Jesusram xina nhekadyly: “Tessalonicadâ âynynonro modo âwynedyly nimopa nidâmo, Jesus. Aunlolâ âwynedâmo. Tarâ onro anaym matay, toenzepa mâsenagazedilyly memaenwân, Kunwym Deus mâinwâmpyry mipyry makâwâm. âynynonro modo tâsenagazedilyly nhemaen-homoem, âinwândilyly nimopa itomoem warâ eon-honrumo xudugâ” xina kely inanry eyam.

#### *Âsewaniwâdaungâ, tâwâlâ mâzetomoem*

<sup>6</sup> Kywymâry Jesus Cristo aguehobyry ara xirâ âyanmo auguely. Âduaymo tyneim modope watay, eataen-hoemba itaungâ. Jesus tâinwânsemo lelâlâ wâne, tyneinmo kulâ olâ. Arâpama keankâ inomedâdilylymo. Mâsewanihomoem keankâ inomedâdilylymo, âynomoemba; tâwâlâ mâzedilylymo mâuntuhomoem keankâ xina inomedâdilylymo.

<sup>7</sup> Tynuneba ani xina atârâ tatay, toenzepa xina nâsewani. Awlylygue xina âsewanihobyry ara âsewaniwâdaungâ.

<sup>8</sup> Âdylâ tyam xuduypy tâpywaze lelâ ani xina. Peto oday, kopae alelâ ani awâtârâ xina ewanu, ânguy tâbyguepa kulâ xinaram âdy nudupa itoem.

<sup>9</sup> “Xina ipyniry âunduwâtaungâ, Jesus inomedâzemo ingonotyby xina” xina kepa olâ âyanmo. Tâbyguepalâ âdydo imeom emakerim wâne tâise xina, arâ xina anipyra olâ ani. Toenzepa ani xina âsewanily, “Paulo domodo ara kydâsewanire” myguehomoem.

<sup>10</sup> Awâtârâ tatay warâ ani xina aguely âyanmo: “Tâsewanidyzebaom ipyniry kâduduwâtaundâ, tâdâsewanily nhutuhoem” xina kely ani.

<sup>11</sup> Arâ xina âyanmo aguely olâ; tâsewanidyzebanro modope âduaymo awlyly, tutuzema ani xina, nâsewanibamo. Âkelomo ewanu nhakaladâdilylymo kulâ.

<sup>12</sup> Kywymâry Jesus Cristo xunâry wâgâ xirâ aguely tynuneim modoram: “Agonromo ewanu kadakaladâdaundâ. Mâzetomoem âsewaniwâdaungâ, ize matomobe mitomoem” uguely.

<sup>13</sup> âyanmo olâ warâ auguely: “Cristo eynynâ ypemugudo, koendâ amisezedilylymo kâjimowâdaundâ” uguely.

<sup>14</sup> Jesus einwâni modo ewy xirâ kata wâgâ âurutomobyry ara adâidysebaom modope watay, ânguy aunlo awlyly xutuwâdaungâ, eataen-hoemba itaungâ warâ, âpybazedomoem lâpylâ. Tâpybazeduo, tâjityenduo warâ, koendâpa adâitobyry modo imozemo lâwâne keanra.

<sup>15</sup> Âduerymo arapa olâ etaungâmo-ro warâ. Xurutaungâmo, âukonomo mâunrutomo ara, uguely âyanmo.

#### *Paulo adâkely nhypygueândo*

<sup>16</sup> Warâ inanry âwâgâmo auguely Kywymâry Jesusram: “Âmâlâ inanry xina takalagueba itoem aienehonrim. Tessalonicadâ âynynonro modo koendâ itomoem aiekâ, tynynâ inakanhe atay, koendâ atay alelâ” uguely inanry.

<sup>17</sup> Urâ Paulolâ xirâ âyanmo iweninri, idaenkurinmo warâ. Urâlâ xirâ wâgâ iezedy iweninri. Iemaryguelâ xirâ idaenkuhomo kâinwenily. Iezewenrylâ inanry kata modo kâinwenily xypyrydâ iezedy kâinwenily.

#### *Jesus nhesemo*

<sup>18</sup> Kywymâry Jesus Cristoram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

## 1 TIMÓTEO

### Paulo Saguho Kata Inweniby Timóteoram

Xirâ kata wâgâ inwenily Paulo nhangahu odaji iemâmy Deus. Awlylygue Deus itaumbrylâ xirâ Paulo inweniby. Paulo eataen-ho myakâwândy Timóteo. Judéia donro myakâwândy Timóteo ise, Jesus einwânni, nhunwym pylâ gregu-ro warâ. Toenzepa Paulo tâmawypadâze myakâwândy Timóteo, Jesus xunâry âji iwaguenodâ nhegatuday. Efesodâ myakâwândy Timóteo âxiânly, târâ Jesus einwânni modo iwymâryem, iwâgâ imâem nhenomedâdomoem, Jesus wâgâ iozepa kulâ unâ egatuwâni modo agueho niwantaguebyra itomoem aguehoem warâ.

Xirâ kata wâgâ kiuntuly âdaunlo Jesus einwânni modo iwymâry (“pastor”) awlyly, emawypadâni (“diácono”) warâ. Xirâ kata wâgâ lâpylâ, tytaintze kurâ, pypâ modo Jesus einwânni edyly wâgâ. Mârâ ume agaityom modo, aripido modo warâ iduadyly epywado peba myakâwândy. Warâ myakâwândy Paulo aguely: “Pypâ typemugüemba watay, Cristo eynynonro modolâ mâkâ eni, xuani warâ” kely.

#### *Aguely adaguho*

<sup>1</sup> Urâ Paulo xirâ kata inweninri. Kâmakeim Deus, Cristo Jesus warâ Jesus xunâry egatuze ugonodylymo. Jesus kurâem anhetyby wâgâ mawânâ Deus, “Xuduze urâ” kehobyry emakeze kydawlyly kinwânwândyly.

<sup>2</sup> Xirâ âyam kâinwenily, Timóteo, Jesus mâinwântobyry wâgâ ymery ara kâenkly mawlylygue.

Âynynâ Kunwym Deusram, Kywymâry Cristo Jesusram warâ kâenkadyly, koendâ mâzehohoem, âtyendâlâ itoem, akaladâni peba itoem warâ.

#### *Iozepa kulâ enomedâdo kinwantaguebyra kine*

<sup>3</sup> “Efesodâlâ âxiângâ” tâkeze ani urâ âyam, Macedônia yan-yam udâday. Awârâ xidadâ oday tâlâ iozepa kulâ Jesus wâgâ enomedâni modo. Awlylygue atârâlâ âize wawlyly, iozepa kulâ anhekylymo, aguehomo warâ amânhenehomba mitoem.

<sup>4</sup> “Agaityom modo unâ nhegatuyby wâgâ kulâ tâtynanâzeba itaungâ. ‘Uguondo tynrenseimbyry imeryem, iweryem warâ wawlylygue, tynrenseim urâ’ tâkezeba itaungâ” kekâ awârâ modo wâgâ kulâ âtynanâni modoram. Unâ inakai nhaunâdyly kulâ awârâ modo. Deus wâgâ koendâ kiuntuho, kieinwânto warâ nhakaladâdyly kulâ warâ.

<sup>5</sup> Atârâ Efesodâ Jesus einwânni modo âjigüe kulâ nâtuëbabyra itomoem amyguedyse wawlyly. Âjigüe âpynedylymo ize wato. Kyangahu oday kunâry tywykeba, kydâpynedyly lelâ, Jesus kieinwândyly lelâ warâ-ro watay, âdy wâgâ kâwentâdo lâpeba kurâ.

<sup>6</sup> Tâlâ mawânkâ Deus itaumbryry âkealonro einwândyly imoimbyry modo. Jesus wâgâ kewâdyly kulâ nhenomedâgyulylymo. Ânwa iozeno imyim emyenro akaemo. Tienomedâdomolâ tutuzeim kuru waunlo ara, enanajimo, Deus aguehobyry takaze. Unâ âdyem itânry wâgâ aguely ize atomo kuru.

<sup>7</sup> Deus itaumbryry iweniby enomedâniem wâne akaemo ize awlyly, awârâ koendâ nutubamo olâ, adâkeholâ, enomedâze tâkewâdo warâlâ koendâ nutubamo lâpylâ olâ.

<sup>8</sup> Koendonro lelâlâ awârâ tâzezewenry Moisés inweniby, âdy Deus ize ato, izepa ato warâ awlyly kiuntuhoem, awârâ kiuntulygueba olâ ise kydâsemaguely.

<sup>9</sup> Xirâ kyzenanâguenre, Deus tâzewenry inwenien-honly ioze lelâ aini modo xurutoem inkâba, iozepa aini modo xurutoem. Deus agueho einwântânry modo, pymâdo agueho einwântânry modo; inakanhe aini modo; Deus xyrentânry modo, Deus itaumbryry einwântânry modo; tunwyndo xyâim modo; kyârim modo;

<sup>10</sup> eagâ tohogüin-hobyry keba kulâ xynanâni modo; uguondo, uguondo warâ âtynanâni modo, pekodo, pekodo warâ âtynanâni modo; kurâ nhawâdyly, nhoendyly toenzepa dinheru nhekadyly timohoem waunlo modo; konokuni modo; juiz, polícia warâ agâ âkealâba kulâ aguewâni modo, idânârâ Deus aiedyseba ato aieni modo warâ xurutoem myakâwândy tâzewenry inwenien-honly.

<sup>11</sup> Âdara kâmakely, âdara aguidyly warâ mawânâ kâengatuhoem Deus aguehobyry. Xirâ unâ koendonro Deusdâpalâ âewlyly. Koendonro, ton-honreim, tohoguezeim warâ Deus.

#### *Deus koendâ lelâ Paulo agâ atobyry*

<sup>12</sup> Aunlolâ inanry Kywymâry Cristo Jesusram aguely: “Koendonro lelâlâ âmâ, amyguehobyry agânhetoem won-honru mâunduhobyry wâgâ” uguly. Atuguely lâpylâ inanry. “Aiese ugonotobyry aieniemy wawlyly, tutuze mawlylygue myakâwâm, uduakely imaryem witoem” uguly eyam.

<sup>13</sup> Jesus kâinwândyly iraynâ, inakanhe kulâ kâinane Jesus wâgâ auguely. Jesus eynynonro modo tyâwâse kâinane urâ. Toenzepa kâinane eagâmo yewiâky, tâwentâguezemo, tapioguzemo warâ winane; inakanhe iwâgâmo adâkeze warâ. Jesus kâinwâmpyra wawylygue akâwâm âdawidyly awyly kâuntuba wawyly. Deus ize ato aralâ awidyly uguewâdylygue. Jesus xurâ modo kêenagazedyly. Aralâ olâ Deus ytyendâ, iedâ warâ, saguhoem inakanhe kulâ aitybyem wawyly umelâ.

<sup>14</sup> Koendonro lelâlâ Kywymâry Jesus tytyenzein-emba, tâmakezein-emba warâ wawyly umelâ, kâinwântoem eynynonro modo kâinwynedoem warâ anieneho, Cristo Jesuslâ arâ tâinwânni modo aitoem aienehonrim.

<sup>15</sup> Deus izepa ato aieni modo emakeze Cristo Jesus xirâ onro anaxi âewyly. Âkealâ xirâ, ton-honre lelâ idânârâ kyzeinwâne. Âkealâ awyly tutuze urâ, iemakewâm mawânkâ, urâ eagonro modo takaze kehoem inakanhe aityby.

<sup>16</sup> Aunloppyry wawylygue lakuru olâ Deus ienagazebyra awyly; tânagazezeinhe wawyly umelâ iedyly. Inakanhe aguidyly watay, kytyendâ Deus; Cristo Jesus kieinwândyly tynwânwânse. Awârâ tienehon-hoem mawânkâ akâwâm Deus koendâ yagâ awyly. Deus ytyenmâ, iemakewâm warâ, idânârâ Jesus einwânni modo tytyenze tawyly tienehon-hoem. Tâwâlâ wâne ise toenzepa Deus izepa ato aienibyryem awylymo, agânhetobyry ara, kâinwântobyry ara nheinwântuomo olâ âzêmakeozemo.

<sup>17</sup> Tynrenseim, ton-honreim, tywâkureim warâ Deus. Kywymâry kaynonro mawânkâ. Aunlolâ awâkâ tâlâ awyly; adaguho peba, xypyry peba warâ; aunloenlâ pymâem awyly. Igeim mâkeba awâkâ, tâenseim keba warâ. Deus tokaleom lelâlâ awâkâ, ânguy emyenro lâpeba. Aralâ ise.

<sup>18</sup> Ymery ara kâenkylly âmâ, Timóteo. Awylygue iozepa kulâ unâ egatuwâni modo mâempagunâdoem âyam auguely. Deus itaumbry egatuwâni modo âyam aguehobyry enanâgugâ: “Deus induakeyby âmâ tâmaryem” kehomobyry. Aguehomobyry mâenanâguely-ro watay, ozohondâze âmâ, iozepa kulâ unâ egatuwâni modo aguely mâempagunâdoem.

<sup>19</sup> Jesus einwândyly kâjimowâdaundâ. Tywykeba angahumo oday âunârymo nidâ. Tâlâ mawânkâ tuoday tutuzelâ âdy adyeseim, âdy adyesenry warâ awyly xurâem. Alâ olâ adyesenry anhedily waunlo. Pepi xytyby wâne paru myenraym tuzase, myara awâkâ aunlo Jesus nheinwândyly xuzadyly.

<sup>20</sup> Himeneu, Alexandre warâ mawânkâ Jesus einwândyly imowâniibyry modo. Satanâsram tâgamezemo olâ ani urâ, Deus wâgâ inakanhe kulâ adâkely awyly nhutuhoem.

## 2

### *Deus agâ aguykehoem kurutobyry*

<sup>1</sup> Jesus einwânni modo Deus agâ aguely olâ mârâ kuru. Idânârâ kurâ domodo eynynâ Deusram ekadaungâ. Ipa atomo Deus nhuduhoem ekadaungâ. Âzehohoem, âduahuohomoem warâ ekadaungâ. Âdara awylymo umelâ Deus eagâmo itoem ekadaungâ. “Koendonro âmâ” Deus kewâtaungâ, xurâmoem koendâ aitobyry wâgâ, koendonro modo nhuduhoem wâgâ warâ.

<sup>2</sup> Idânârâ pymâ domodo eynynâ Deusram ekadaungâ, itymo anaym pymâ xurâem, idânârâ âtâ anary iwymârydo modo eynynâ lâpylâ warâ. Koendâ kywymâryem awylymo-ro watay, tâdâtuebadyly peba, tywaunsezeim peba warâ ise kurâ. Deus ize ato aiese lelâ kurâ, kagonro agâ Deus ize ato ara koendâ lelâ ise kurâ warâ.

<sup>3</sup> Kâmakerim Deus, eagâ aguykeduo, tuomazeze.

<sup>4</sup> Mâkâ wâgâ âkealonro idânârâ kiuntudyze Deus; idânârâ Jesus nheinwândyly mâkâ âsemaguehoem.

<sup>5</sup> Tokalelâ Deus; tokalelâ Deus agâ kyeni kydâsemaguehoem aienehonrim, uguondo Cristo Jesus lelâ.

<sup>6</sup> Jesus iguely myakâwâm, iwâgâ idânârâ kydâsemaguehoem, kieinwândyly-ro watay. Deus aguehobyry odaylâ tyiguely awyly tienehon-hoem myakâwâm iguely, Deus idânârâ kydâsemaguedyze awyly xutuhoem warâ.

<sup>7</sup> Deuslâ myakâwâm unâ iwâkuru, judeu keba modoram kêengatuhoem agueim, unâ âkealonroge kêanomedâdomoem warâ. Âkealâ auguely, uguewâdyly kulâ mâkeba.

<sup>8</sup> Jesus einwânni modo âtâdyguyhodâ, uguondo modo Deus agâ aguely ize wato. XY-DYK itybyem, tâmary saunâniibyryem warâ, kâzewenry ara, Deus ize ato aieni modo lelâ. Tyewiâtuneim modo, tagonro agâ âjitoguyim warâ olâ tâdâtâdyguyhodâ Deus agâ aguepa nidâmo.

*Jesus einwânni pekodo modo xuruto*

<sup>9</sup> Warâ Jesus einwânni pekodo modo wâgâ auguely. Âtâ tagaraneim modogue, TÂM waunlo modogue, sodomo enehorim modogue uguondo modo âsewaniho modogue warâgê nâzetydâbyra nidâmo. Tâzekagâinday, koendâ kehoem tâzehohoem kulâ tyangahudu nhakuidaynly nipyra nidâmo. Tâpâgudâdily-ro watay, toenzepa tâensedoguepa nâpagudâdâmo, ourugueto, tuhu imeimbyry tâwâenseim perolagueto, âtâ tâwâenseinguepa warâ.

<sup>10</sup> Pekodo Jesus einwânni modo koendonro anhekyly wâgâ mawânkâ ise koendâ âzêholymo, âpâgudâdobyry wâgâpa.

<sup>11</sup> Jesus einwânni pekodo modo tâdâtâdyguyhodâ MYK alelâ nidadâmo, tâsenomedâdomoem. Uguondo tâdâtâdyguyho oday aguenri agueday MYK alelâ nidadâmo.

<sup>12</sup> Warâ âurutomo. Pekodo modo, uguondo modo nenomedâbyra, nurupyra warâ nidâ tâdâtâdyguyhodâ. Ekadybyenlâ MYK alelâ nidadâmo.

<sup>13</sup> Pekodo uguondo modo iwymâryem nipyra nidâ, Adão mawânkâ Deus waunroem nhygatyby, ilâpyryem Eva warâ awlylygue.

<sup>14</sup> Adão mâkeba enokudyby; Eva mawânkâ Diaburam âzenokuorim, Deus eyanmo aguehobyry sakanibyry warâ. Awlylygue mawânkâ pekodo uguondo modo iwymâryem nipyra awlyly.

<sup>15</sup> Imezezemo, âpyneânzemo warâ, Deus olâ esemo. Jesus nheinwândylymo, tagonrodo agâ âpnyedilymo. Deus ize ato ara lelâ aidylymo, toenzepa tâensedo keba anhekylymo warâ watay, Deusram âzemahezemo.

### 3

*Jesus einwânni modo iwymâry (pastor) âdaunlo awlyly xutuho*

<sup>1</sup> Âkealâ ise xirâ augueho. Jesus einwânni modo iwymâryem tâidysedo, âwanu koendonro lelâlâ awârâ ize atomo.

<sup>2</sup> Jesus einwânni modo iwymâry âdalâ kulâ aini keba nidâ, ânguy âdakepa itoem iwâgâ. Tywyein-ro watay, tokalelâ iwydy nidâ. Tâwâlâ idânârâ adienkyly modo imanâni, tâwâlâ âjimanâni, ânguy âwankuem ietânry, âxigodo tâtydâ tâjîtâze lelâ waunlo; enomedâdily xutuim warâ nidâ.

<sup>3</sup> Toku ikaji ini keba, alâ kulâ iewiâpani keba, tâdâjitoguyly keim keba, tâdâpeândily keim keba, tydinherugu, âdydo imeompe tawlyly kulâ izetonro keba warâ nidâ.

<sup>4</sup> Tâty odano modo koendâ nhedyly, nhurudyly waunlo nidâ; koendâ tymeombyry xuruni, sagâikerim warâ, âwankuem nâiehoba itomoem.

<sup>5</sup> Tâty odano modolâ koendâ nepyra, nurupyra warâ watay, Jesus einwânni modo eniem, xuruniem warâ nitaymba lâpylâ.

<sup>6</sup> Iwelo Jesus einwânniem ityby watay, mâkâ keba Jesus einwânni modo iwymâry nidâ. Mâkâ pymâem idyly-ro watay, toenzepa ise mâkâ âtyrendily, tagonro takaze. Arâ tyangahu oday xunâgu watay, Deusram âzenagazeoze, Deus takazenoem Diabu âdutuduo aietobyry ara.

<sup>7</sup> Jesus einwânni modo iwymâry anhekyly wâgâ koendâ nâzeho, Jesus xurâ keba modoram, xurâ modoram alelâ. Inakai anhedily watay, Jesus xurâ keba modo inakanhe iwâgâ aguezemo lâpylâ. Diabu iwyndyry odaji ihuguelylâ ise mârâ. Jesus einwânni modo iwymâry Deus izepa ato anhedily mawânkâ Diabu ize ato, Deus xurâem ewano âdyem nipyra itoem.

*Jesus eynynonro modo iwymâry emawiyadâni (diácono) âdaunlo awlyly xutuho*

<sup>8</sup> Iwerâ ârudilyly ise Jesus eynynonro modo iwymâry emawiyadâni âdaunlo awlyly wâgâ. Ton-honre lelâ âkealâ lelâlâ agueim nidâ warâ. Toku ikaji ini keba, tydinherugu, toenzepa âdype tawlyly kulâ izetonro keba warâ nidâ.

<sup>9</sup> Jesus einwânni lelâlâ, Deus itaumbyry xutuim lelâlâ warâ nidâ. Deus izepa ato adientuo, inepa Deusram adâitobyry nhygakehoem ekani nidâ.

<sup>10</sup> Uguondo Jesus eynynonro modo iwymâry emawiyadâniem tâidysedonrobe watay, waunroem âdaunloem awlyly edyly wao. Idânârâ âdapa lelâ aidyly watayma tâwâlâ âjidiuakeoly, awârâ âwanu anhetoem.

<sup>11</sup> Jesus eynynonro modo iwymâry emawiyadâni iwydy\*, âwankuem tyeseim keba nidâ. Âdalâ kulâ agueândaynly waunlo keba nidâ; adienkyly wâgâ, adâkeho wâgâ warâ âjimanâni, âkealâ lelâlâ agueim warâ nidâ.

<sup>12</sup> Jesus eynynonro modo iwymâry emawiyadâniem iduakeyby tywyein-ro watay, tokalelâ iwydy nidâ. Tâty odano modo koendâ nhedyly, nhurudyly waunlo nidâ, tywydy, tymeom, tâmary modo warâ koendâ eni.

\* 3:11 Gregüem, tâwâlâ diácono iwydy atay, diaconisa atay warâ.



<sup>13</sup> Jesus eynynonro iwymâry emawyadâni koendâ lelâ tâwanu aieni âwankuem tyetuneba ise Jesus einwânni modoram. Tyanepa ise Jesus tâinwânse tawily wâgâ aguely. Waunlo mawânkâ Jesus eynynonro modo iwymâry emawyadâniem itoem tuduakezeim.

*Unâ Jesus wâgâ agueim âkealonro*

<sup>14</sup> Inepa nhese udâdyse wawyly umelâ, âdara udâhoem nhuduly awyly kâuntuba urâ. Awylygue xirâ kata kâinweniby âyam kâingonodyly.

<sup>15</sup> Tahuleba widyly-ro watay, xirâ kata wâgâlâ ise mâuntuly, âdara Jesus einwânni modo aidyly awyly, Deus adaindânry xurâ modo. Âtâ enu wâneam nihugueba itoem esebydâni, mârâ emyenro kurâ. Jesus einwânni modo kieinwândyly, âkeâ lelâlâ Jesus wâgâ aguykely warâ watay, unâ âkealonro kiainhehonwâbyra kurâ.

<sup>16</sup> Imâmem kieinwânklyly Deus nhutuen-hoymby Jesus wâgâ âkealonro awyly. Xirâ mawânkâ nhutuen-honly:

Jesus kurâem idyly; onro anaxi tâetoem.

Deus imerylâ Jesus awyly nhenehonly Deus Ispiritury,

igueypyem awyly ume kurâem nhetondobyry wâgâ.

Anju domodoram eon-honru, ehogu warâ âzeholy.

Mârâ anakâ lelâba eynynonro modo iwâgâ aguelymo.

Mârâ anakâ lelâba iwâgâ aguely idanipyry modoram toenzepa âzeinwân-honly.

Deus ezaxilâ akâwâm adaholy, pymâmem kuru itoem.

## 4

*Jesus wâgâ iozepa kulâ unâ egatuwâni modo wâgâ agueho*

<sup>1</sup> Tutuzeinhelâ Deus Ispiritury aguely: “Xypyryam saindyly tutuze Jesus wâgâ unâ iozeno einwândyly imoim modope ise. Kadopâ modo konokuni nhenomedâdo kulâ ise nheinwânklymo” kely.

<sup>2</sup> “Jesus eynynonro xina” tâkezemo wâne. Nhenomedâdomo âewyly olâ Diabudâ kulâ. Toenzepa tâdâsenogudyly kely tyangahu oday. Nâdutubamo mawânkâ, ferro tâdâpigueingue iaduântybymo-en-ro waunlo ara. Awylygue tienomedâdo iozepa kulâ awyly nutuba awylymo.

<sup>3</sup> “Jesus einwânni modo nohogüimba nidâ” kelymo. “Tâlâ podo tâsenry, pyni tâinzenry warâ” kelymo. Kewâdylymo kulâ olâ. Podo modo, pyni modo warâ Deus nhugudyly myakâwândy kypyniryem, koduem warâ. Aituo, Jesus einwânni kydawlylygue, kydâwinduapya kidyly kitaymba kurâ. “Koendonro âmâ, xina ipyniry mâundylygue” kykebygueduo, tâwâlâ âdaunlolâ podo, pyni warâgue kydâwinduadyly.

<sup>4</sup> Idânârâ Deus nhugutyby modo koendonro lelâ. Awylygue pyni tâinzenry, podo tâsenry warâ peba awyly. Podo, pyni warâgue kydâwinduadyly iray, warâ Deusram aguykenre: “Pabai, koendonro âmâ, xirâ xinaram mâundylygue” kykenre.

<sup>5</sup> “Idânârâ kâungutyby modo koendonro lelâ” tâkeze Deus. Awylygue, “Koendonro âmâ” eyam kykeduo, tâwâlâ kieinly lelâ.

*Timóteo xurutobery*

<sup>6</sup> Xirâ modogue Jesus einwânni modo mâunrudyly-ro watay, Cristo Jesus emary koendonro ise âmâ. Deus tâinwânni modo anhedyse ato aiedyly kâjimo, nhenomedâdo einwândyly kâjimo warâ. Tutuze urâ, tâinwânse mawyly. Awylygue ise on-honru âduduoly Deus ize ato amânhetoem, kohonwandoem wâne kydâwinduadyly myara.

<sup>7</sup> Agaityom modo unâ nhegatyly inwantageze kulâ tâiseba ikâ, Deus wâgâpa aguely watay. Unâ iamimeom iomazeândoem tâgatuzeim, kydâsemaguehoem nipyra mawânâ. Tonhonroem adaimpâni ohoiwadyly wâne myara Deus ize ato lelâ amânhetoem aisezegâ, tonhonre lelâ Jesus mâinwântoem.

<sup>8</sup> Xirâ onro anaym kydawlyly ara kodo koendâ itoem, eon-honwadoem warâ kulâ kydohoiwadyly. Tonhonre kehoem Jesus kieinwântoem aguidyly olâ tywyneim kuru. Awârâ tywyneim kuru tarâ onro anaym kydawlyly ume, tarâpa kituo alelâ.

<sup>9</sup> Âkealâ xirâ konomedâdo aguely; kuoday ton-honre tâinwânseim lelâlâ xirâ.

<sup>10</sup> Awylygue mawânâ ton-honre kehoem kydâsewanily Jesus wâgâ kiengatuhom. Aunlolâ mawânkâ Deus Iguedânry kâmakely; aunlolâ lâpylâ eagâ kitoem kadyly kinwânwândyly. Deus lelâ mawânkâ kâmakeim, Jesus einwântaynrîm modo olâ tâmakein-ro warâ.

<sup>11</sup> Timóteo, inomedâdobyry ara, Jesus einwânni modo enomedâgâmo, xurukâmo warâ.

<sup>12</sup> Salokuzenomoem mawylygue kulâ âwankuem tâiehozeba ikâ. Âwâgâlâ enehongâ âdaunloem Jesus einwânni modo awyly. Koendonro wâgâ lelâ aguekâ, aiekâ warâ. Jesus einwânni modo iwynegâ, xurâmoem koendonro lelâ aiekâ warâ. Jesus mâinwâmpyra tâiseba

ikâ, iwâgâ iozeno keba kulâ kêzeinwândâ warâ. Ohogüimby keba mawylygue kulâ âdaunlo pekodo mâynanädily tâiseba ikâ. Arâ ise einwânni modo koendâ tadawly nhutulymo.

<sup>13</sup> Yaindily ara, Jesus einwânni modo âtâdyguyhodâ Deus itaumbry tytainze ikâ, idânârâ indatomoem, nhutihomoem warâ. Mâintaimby wâgâ eon-hondâgâmo, Jesus wâgâ tâinwânseingue enomedâgâmo warâ.

<sup>14</sup> Jesus einwânni modo iwymârydo tâmary angahu onwa niedâ. “Deus inomery nudu, xurâem mitoem” xina nygue warâ. Awlylygue iwerâ âyam auguely: “Deus amânhetoem iwanu nhuduypy aiedily kâjimo” uguely.

<sup>15</sup> Arâ lakuru aisezegâ. Awârâ aiedilylâ iwanu nidâ. Arâ ise idânârâ nhutulymo, Deus xurâem iwanu koendâ lelâ amânhekyly awlyly.

<sup>16</sup> Timóteo, koendâ amânhekyly xutugâ, Deus ize ato ara lelâ amitoem. Ioze lelâ Jesus wâgâ enomedâgâ. Arâ ise xyppyry etay mâzemaakeoly, amyguely idani modo Jesus einwânni modo âsemaguelymo warâ.

## 5

### *Ádara Jesus einwânni modo edily kiuntuho*

<sup>1</sup> Timóteo, agaitoem Deus izepa ato anhedily-ro watay, kêzeudâ; koendâ eyam aguekâ; tyewiâseba, pabai myguehoam amygueho aralâ aguekâ. Salokuzenomo Deus izepa ato anhedily-ro watay, âukono mâunruto aralâ xurukâ

<sup>2</sup> Áze aralâ aripido egâ, nhaundudo aralâ âwynsaundo modo egâ warâ; Deus xurâem tywykeim eagâmo akâiedâ.

<sup>3</sup> Jesus einwânni modo xurukâ, pypâ modo typemugüenry nhemawyadâdomoem, pynigue, âtâ iwogonromogue, âdy ipa atomogue warâ.

<sup>4</sup> Tymegue, tywegue warâ pypâ watay olâ akaemolâ eni nidâ, Jesus einwânni modo keba. Awârâ mawânârâ Deus aguiendyse ato. Kunwyndo agaitoem ituo kiendily Deus ize ato, iamudoem kydawly ume kêantomobyry ara.

<sup>5</sup> Tâlâ pylâ olâ pypâ modo mâkâ kulelânro; ânguy eni pebaom. Jesuslâ nheinwânkylimo, Deus tâendilylâ nheinwânkylimo warâ. Deus agâ aguepa nipyrâmo. Peto oday, kopae alelâ Deus tâentoem nhekadylymo. Pypâ aunlo modo mawânkâ Jesus eynynonro modo nhekyly.

<sup>6</sup> Tâlâ pylâ olâ pypâ modo Deus ize ato araba kulâ aini. Tohomaendily kulâ ize atomo, Deus xurâem adâidyly keba. Niguepa wâne, Deus xurâem olâ igueypyem, eagâpa ietybyem awlylygue. Aunlo modoma Jesus einwânni modoram tâensebamo.

<sup>7</sup> Timóteo, amyguehomo âurutobyry arâ Jesus einwânni modo xurukâ, ânguy inakanhe iwâgâmo aguepa itoem.

<sup>8</sup> Tâty odaylâ typemugu Jesus einwânni koendâ etânry watay, Jesus einwântânry takaze mâkâ inakai anhedily. Deus ize ato aiedily inmolylâ mâkâ arâ aituto.

<sup>9</sup> Pypâ sessenta anu takazeom; tokalelâ tusoneimbyry tâenseim,

<sup>10</sup> koendonroem lelâ âdutuoyby; koendâ lelâ tymeombyry enamanâniabyry; Jesus einwânni modo âkelo âji anaymba âetyby modo koendâ lelâ ejitâniabyry, ihugoguerimbyry; âsenagazeni modo koendâ enipyry, nhonipyry warâ; koendonro aiedily imodânrybyry warâ ise pypâ modo Jesus einwânni modoram tâentuneim modo.

<sup>11</sup> Pypâ sessenta anu âgânâyam tydadigueim modo keba tâenseim nidâ, aripi kebamo mawânkâ; ohogüin-onze kezemo. Tohogüin-onduo, Cristo xurâem adâidyly imozemo.

<sup>12</sup> Pypâ iduakeyby modo, “Cristo xurâem lelâ ise xina aidily” tâkezemo mawânkâ. Agueypyem, ohogüin-ondylymo-ro olâ watay, awârâ âwanu lelâ aieniem adâkehobyry nhakadylylâ. Awlylygue ise ewentâguedyly.

<sup>13</sup> Pypâ aripi keba âzemawyadâoly watay, toenzepa ise ynyu; mâkâ etyam, mâkâ etyam alâ kulâ ise adakobâdyly, âkelomo xunâguzee. Unâ iwylku kedunroem ise, xutudyzeba tadato kehoem ise nhegatyly.

<sup>14</sup> Awlylygue, tâwâlâ pypâ aripi keba watay nohogüin-ondâ, âtâdâlâ tâwanu anhetoem, koendâ tuso, tymeombyry warâ nhetoem. Arâ ise kuduery modo kunâguebyra awlyly kurâ Jesus einwânni modo.

<sup>15</sup> Tâlâ mawânkâ pypâ modo ewy Deus ize ato aiedily imoimbyry. Satanás ize ato anhekylymo iwerâ. Koendonro mâkeba awârâ.

<sup>16</sup> Warâ aguekâ pekodo modo Jesus eynynonro modoram: “Pypâgue typemugüeim âmaemo-ro watay, âmaemolâ etaungâmo. Pypâ typemugüenry modo lelâ mawânkâ Jesus einwânni modo nhekyly” kekâ.

<sup>17</sup> Iwerâ Jesus einwânni modo iwymârydo wâgâ ise auguely. Koendâ tâwano aieni modo koendâ lâpylâ nâzepywaomo, ipa tato nhanâtomobe itomoem. Jesus wâgâ unâ egatuim, Jesus wâgâ kieinwânkylimo enomedâni warâ lakuru, imâem nâzepywaomo.

<sup>18</sup> Arâ âurudylymo, warâ mawânkâ Moisésram Deus inwenien-hoymby: “Tapirá kâjitagâjiwândaundâ, trigu âekyguehoem nhakabely ume” kely. Mateus lâpylâ Jesus aguehobyry tywenize: “Tâwaneim tâzeywaoze lelâ nidâ” kely.

<sup>19</sup> Timóteo, tokalâ kurâam kulâ Jesus einwânni modo iwymâry âzewentâoly watay, mâkâ agueho kulâ kâjiwantaguedâ. Azagâ, azagâ tokalâ warâ ewentâni watayma akaemo agueho koendâ idakâ.

<sup>20</sup> Mâkâ Jesus einwânni modo iwymâry Deus izepa ato aienibryen-ro watay, kurâ domodo enanaynlâ eukâmo, eagonro pymâdo adienkyly wâgâ tyanelâ itomoem, “Inakai aguiendyly-ro watay, idânârâ enanaym ise kydâzeuholy” kehomoem.

<sup>21</sup> Timóteo, warâ âyam auguely, kêenkazedyly warâ. Âzekiba lelâ Jesus eynonro modo egâ. Âduery tâwentâzeim watay, eukâ, tyewiâseba olâ-ro warâ. Ataen-ho tâwentâzeim watay, eukâ lâpylâ. Xirâ kâzenanâneho, Kunwylm Deus, Cristo Jesus, anju domodo Deus xurâem aini warâ, amânhekyly tâensemo, amygueho tydasemo warâ.

<sup>22</sup> Jesus einwânni modo iwymârydo mâinduakely watay, tadahulizeba ikâ. Waun-roem âdaunlo awyly egâ wao. Idânârâ âdapa lelâ aidyly, aguely watayma tâwâlâ imary nhangahumo onwa iekâ, Kywymâry Jesus emaryem awyly xutuhoem. Koendâ iwâgâmo mâuntuba âmâ watay, Deus induakeyby keba kulâ iduakezemo âmâ. Awylygue Deus izepa ato anhedylimo-ro watay, âzewentâoze lâpylâ âmâ, mâinduakehobyry wâgâ. Âdy inakai akâiedâ. Tywykeba ikâ.

<sup>23</sup> Timóteo, âuwe oday tâwâmase mawyly, tutuze urâ. Awylygue, paru lelâba enygâ, uguely. Vinhu âdiempa âenygâ lâpylâ, âuwe ewânu ekadoem.

<sup>24</sup> Xirâ enanâguegâ. Tâlâ Deus izepa ato aieni inakanhe aito tâenseim. Idânârâ tâdutuoze âsenagazeze awyly anhetby wâgâ. Tâlâ olâ mâkâ inakanhe aito tâensenry, tutuzenry warâ, ânguy nutuba ise-ro warâ, xypyry odaxi idyly ara.

<sup>25</sup> Tâlâ lâpylâ Deus ize ato aieni koendâ aito tâenseim. Tâlâ lâpylâ mâkâ koendâ aidyly tâensenry, tutuzenry warâ. Âdalâ olâ koendonro awyly âdutuoze.

## 6

<sup>1</sup> Iwerâ kâinwenily tâbyguepa âsewanirim modo wâgâ. Timóteo, tâwanuneim Jesus einwânni modo, tywymâry âwankuem niepyra itomoem aguekâ, tylahureba tywymâry aguehobyry anhetomoem warâ. Arâ aidylymo watay, kieinwânkely Deus wâgâ, Jesus wâgâ warâ ânguy inakanhe aguewâpyra ise.

<sup>2</sup> Tâwanuneim modo Jesus einwânnigye tywymâguneim modoram warâ aguekâ: “Cristo eynynâ âpemugumo mâinwynegyly xurâem iwanumo; awylygue lâkuru koendâ kuru xurâem âsewaniwâdaungâ, einwântaungâ, âwankuem kâietaundâ warâ” kekâ.

### *Jesus wâgâ iozepa kulâ unâ egatuwâni modo Deus ewanu takaladâze*

Timóteo, xirâ kâinwenily modogye Jesus einwânni modo enomedâgâmo, xurukâmo warâ, nhutuhomoem.

<sup>3</sup> Tâlâ mawânkâ iozepa kulâ unâ egatuwâni modo kienomedâdo arapa kulâ agueim. Akaemo agueho olâ Kywymâry Jesus Cristo aguehobyry agâ, Deus itaumbry egatuwâni modo agueho agâ warâ nâseinwâmbyra. Jesus wâgâ iozeno tonomedâzeim nhakaladâdily kulâ.

<sup>4</sup> Tâwâlâ tutuze âdutulylo. Koendâ Deus itaumbry tiuntuly warâ wâne, enanajimo, âdy iwâgâ adâkeho awyly nutubamo olâ. Deus itaumbry wâgâ tâdâjigogyly, tâdâtuebadyly warâ kulâ ize atomo. Tâzewânu tâwinzenry ara awârâ. Âjigye tâsewânizemo, tâtuebazemo, tâpyguezemo, nâseinwâmbyra tâisemo warâ.

<sup>5</sup> Âjigye tâjihoguly nimopamo, tyangahugoenguenry âpaunzedily ara kulâ âpaunzedilylo. Âdy iozeno, âdy iozepaom warâ awyly nutubamo. Iozepa kulâ aguelymo: Toenzepa âdype tâjitoem, toenzepa tâjidinherugoem warâ kulâ Jesus einwândily, enanajimo.

<sup>6</sup> Tâlâ kydato wâgâ tuomare lelâlâ kurâ, imâem, imâemba warâ tâlâ kydawyly umelâ. Kuomaru koendonro kuru olâ Deus ize ato aguiendylygye, tutuzema kurâ idânârâ ize kydato Deus xuduze awyly.

<sup>7</sup> Âdy lâpeba kurâ kyazepygueduo; kyigueduo âdy kagâ kiampyra lâpylâ ise kurâ warâ.

<sup>8</sup> Awylygue, typynigye kurâ, tâtyem kurâ kywogonrogue watay, kydadahuliba kine, ipa kydatogye.

<sup>9</sup> Toenzepa âdype tâidysedo modo, ânguydo imeom wâne inra odaxi ihuguely, iguely warâ myara akaemo toenzepa lelâlâ âdype tâidysedo modo. Inakai kulâ adiendyse atomo. Tâwâlâ kulâ olâ inakanhe idylylo. Tyigyeho nhuinlymo paru tâsanigyeim ikaji tywârenry ihugueyby wâne tyense myara.

<sup>10</sup> Nady kyârim iwindy ara awârâ toenzepa âdype tâjidyly idânârâ inakai modo iwindyem awyly. Awylygue akaemo toenzepa âdype tâidysedo modo Jesus einwândyly inmolymo. Tâwâlâ kulâ olâ tâsenagazedo nhuinlymo.

*Paulo Timóteo nhurutobyry*

<sup>11</sup> Âmâ olâ, uguondo Deus xurâem aini mawylygue, awârâ inakai modo akâiedâ. Âsegamigâ Deus ize ato lelâ amânhetoom; Deus aguehobyry makabyra mitoom; toenzepa Jesus mâinwântoom; Jesus eynynonro modo mâinwynedoem; mâsenagazedyly mâenmaenhoem, Jesus einwândyly mâinmopolâ; eagonro modo âyam aguelygue tyewiâseba mitoom warâ.

<sup>12</sup> Tâgaseim ton-honre kehoem tâgatuze, tâbyry tienmakehoem, myara lâpylâ ton-honre ikâ, Jesus mâinwânsezedoem, Deus ize ato amânhetoom warâ. Aunloenlâ eagâ mitoom aenehonze mâkâ. Idânârâ kurâdo enanaym, Jesus einwânmiem itybyem mawyly adâkeze ani âmâ. Igâsedyby âmâ xurâem, aunloenlâ eagâ mitoom.

<sup>13</sup> Deus ize ato aralâ Cristo Jesus aitobyry enanâguegâ. Pôncio Pilatos enado tawyly ume, ânguy tawyly wâgâ aguewânmy tyanepa kehoem. “Messias urâ Deus ingonotyby” kewâm, tyiguely iraynâ. Awylygue, Kunwym Deus idânârâ xuguni, imery Jesus Cristo warâ âyam kâinwenily tânuagaenze awyly tutuze mawylygue, Deus aguehobyry aunlolâ aiekâ, Kywymâry Jesus odopâdyly ara.

<sup>14</sup> Awylygue amânhetoom mâjiduakeohobyry “Aiekâ” uguely âyam. Kywymâry odopâdyly ara awârâ aiedyly kâjimo, ânguy iwentâbyra itoem.

<sup>15</sup> Odopâdo odaji ituo, Deus, Jesus odopâdoem aienehonze. Koendonro lelâlâ Deus, ton-honreim, tohogezeim warâ.

Mâkâ kulelâ Kâeni kuru,

mâkâ takaze ânguy kâeni lâpeba.

Pymâ domodo iwymâry, kuturim modo xutuim warâ mâkâ.

<sup>16</sup> Mâkâ kulelâ iguedânry.

Iatytu, tohoreingue mâkâ enâmidybyem awyly.

Awylygue ânguy eyam iwaguepa naimpyra awyly.

Ânguy âdaunloenlâ Deus netaymba; ânguy nepyra ise-ro warâ.

Eyam aguykenre:

“Aunloenlâ Deus nâdyren-ho, nâzehogeo;

aunloenlâ ise pymâ kaynonroem awyly warâ” kykenre.

Arâlâ nidâ.

<sup>17</sup> Warâ aguekâ Cristo einwânmi modo âdypeom modoram: “Sawoem tâiseba itaungâ. ‘Âdykâ âdawitaymba ise urâ, âdypeom wawylygue’ tâkezeba itaungâ. Enanâguewâdaungâ, âdinherurumo, âsejiguymo warâ inepa adainrim kulâ awyly; xirâ anano kulâ mawânâ, aunloenlâ ini keba. Deus einwântaungâ kuru, agâmolâ itoem. Kyam tâwânreim mâkeba Deus; mâkâlâ tâlâ kydato xudunri, kuomazehoem.

<sup>18</sup> Koendonro lelâ aietaungâ. Âdypeom âmaemo watay, âdypebaom ipa ato mâunduhomoem âdinherurumo ewy nidâ. Tâwânrempa itaungâ; tâlâ matomo eagonro agâ epajigâdaungâ” kekâ âdypeom modoram, Timóteo.

<sup>19</sup> “Arâ ise koendonro modo amânhedylimo imâem isezedyly, iwâkuru modo âmaemoem aienibyryem mawylymo warâ. Deus koendonro nhuduly emakeze âmaemo, aunloenlâ eagâ mitoomem” kekâ âdypeom modoram.

<sup>20</sup> Timóteo, unâ iozeno Jesus wâgâ egaturin-em, aguehoymbyem âmâ, âdylâ tâwânseim kehoem âdalâ mânhenhomba mitoom xuduyppy ara. Awylygue amygueday âdaunloenlâ kieinwânkylly kâduguke. Tâlâ mawânkâ iozepa kulâ unâ egatuwâni modo. Deus xurâem tawyly, adâkezemo wâne, mâkâ keba olâ aguehomo; xirâ anano kulâ aguehomo. Tienomedâdomo “Deus wâgâ tutuzeim âkealonro xina” kelygue nhezetâdylimo, kewâdylimo kulâ olâ.

<sup>21</sup> Toenzepa olâ aguehomo einwânmi modo. Awylygue Jesus wâgâ unâ iozeno einwândyly inmolymo, mâkâ ânwa iozeno imyim ara.

*Deus nhesemo*

Deusram koendâ mâzehohomoem kâenkadyly.

Paulo

## 2 TIMÓTEO

### Paulo Kata Azagâ Ieto Inweniby Timóteoram

Xirâ kata wâgâ inwenily Paulo nhangahu odaji iemâmy Deus. Awlylygue Deus itaumbrylâ xirâ Paulo inweniby. Kata azagâ ieto Paulo Timóteoram inweniby. Xirâ kata agueho Timóteo Jesus einwânni modo iwymâryem awlyly ume ewanopyry wâgâ. Azagâ tokalâ warâ myakâwândy Paulo âwanu agueho, Timóteo tienomedâdoem. Sodadu tysejiguy âxiâymy modo wâgâ nâtynanâdaymba sodaduem tâitoem, arâ lâpylâ Timóteo nâseguâdâbyra nidâ âxiâymy modo wâgâ Jesus tienmawydâdoem. Tâgaseim tâgatudoem agueho tâinwânse, tâgatudyly xypyryam kehoem, arâ lâpylâ Timóteo Deus aguehobyry aniendâ, xypyryam kehoem. Tyzegueim, typi ezay tientâdybylâ nheinly, arâ lâpylâ Deus itaumbryy egatuim ize ato âduduoly aguely idataynrim modoranlâ. Xypyry etay aitaynrim modo wâgâ tytainze kurâ xirâ kata wâgâ. Toenzepa ise tâmagaduneim modo, konokuni modo, kyârim modo, Deus itaumbryy izepaom modo warâ, kely.

#### *Aguely adaguho*

<sup>1</sup>Urâ Paulo tywâgâ aguenriem Cristo Jesus ingonotyby xirâ kata iweninri. Deus adâkeze: “Cristo Jesus einwânni modo emakeze urâ; aunloenlâ ise yagâ awlylymo warâ” tâkeze. Xirâ mawânâ Deus kêngatudyze ato. Deuslâ xirâ kêngatuhoem yam agueim.

<sup>2</sup>Xirâ âyam kâinwenily, Timóteo, Jesus mâinwântobyry wâgâ ymery kâinwynegyly ara kêenkly mawlylygue.

Âynynâ Kunwym Deusram, Kywymâry Cristo Jesusram warâ kêenkadyly, koendâ mâzehoem, âtyendâlâ itoem, akaladâni peba itoem warâ.

#### *Tâdâturudo*

<sup>3</sup>Agânhekyly modo Deus xurâem lelâ, ydamudo aitobyry ara. Deus xurâem iewanu ume âdalâ kulâ awipyra watobyry wâgâ koendâ lelâ yangahu oday. Peto oday, kopae warâ Deus agâ augueday, tuomare lelâ urâ, âmâem anhetaymy modo kêenanâgueduo.

<sup>4</sup>Toenzepa nhetondyze wawlyly. Toenzepa ywyneni mawlyly tutuze urâ; kydâsedaenguday ogunropyry, tânanâgueze winase. Kydâzetondyly-ro watay, toenzepa lelâlâ ise womaru.

<sup>5</sup>“Jesus tâinwânse urâ” myguely; âkealâ amyguely. Tâinwânse lelâlâ âmâ, awârâ tutuze urâ. Jesus mâinwândyly iraynâlâ, âundu Lóide, âze Eunice warâlâ akâwâm Jesus einwânni. Awlylyguelâ akaemo ara lâpylâ mâinwândyly.

<sup>6</sup>Awlylygue lâpylâ angahu onwa iemary MÂ` kânhetobyry mâenanâguedyze wawlyly, Deus induakeybyem mawlyly xutuhoem, on-honru xuduimpyry xurâem amitoem. Awlylygue Deus amânhedyse ato aiedyly kâjimo, peto tyatygyue lelâ itoem tyatygyuze wâne kurâ, myara lâpylâ xurâem aisezegâ.

<sup>7</sup>Deus Tyispiritury ingonotybylâ mawânkâ tyanepa kyenehorim. Jesus einwândyly kinmopa kitoem, kon-hondâdâ mâkâ, idânârâ kienmaen-hoem. Kagonro agâ kydâpynedoem adyenehonze. Koendâ kydâpaunzedo tyenehonze mâkâ, Deus ize ato lelâ aguientoem, kydâjimanâdoem warâ.

<sup>8</sup>Tywypazeba, tyanepa warâ Kywymâry Jesus wâgâ unâ egatugâ. Tarâ kadeia oday wawlylygue, tâpybazezeba ikâ ytaen-hoem mawlylygue. Iwâgâ auguehobyry wâgâlâ tarâ wawlyly. Xara lâpylâ xurâ keba modoram âzenagazeoze keanze âmâ. Mâzenagazeodo olâ emaengâ lelâ; mâkâ xurâenlâma adâjidyly mâinmopalâ mawlyly; Deus mawânkâ ohondâze inagazedo modo mâenmaen-hoem.

<sup>9</sup>Deus kâmakewâm, kygâsemâ warâ xurâem kitoem. Aguientaymy modo wâgâ inkâba kygâsedyly. Kygâsedyly, kâmakedyze tawlylyguelâ, kagâ koendâ tâidyse tawlylyguelâ warâ. Adaguly iraynâlâ myakâwândy kâmakely wâgâ aguely: “Koendâ ise urâ kâingâsedaymy modo agâ” kely.

<sup>10</sup>Iwerâ olâ kâmakerim Cristo Jesus xirâ onro anaxi âetobyry wâgâ Deus koendonro awlyly kiendyly. Jesus wâgâ unâ koendonro kienwândylygue, tutuze kurâ, tâjiguely eon-honru sainrimpyryem mâkâ awlyly; tyanepa kine igueze. Kyigueduo, idâzema kurâ Deusram aunloenlâ eagâ kitoem; âdaunloenlâ eagâpa kipyra kitoem.

<sup>11</sup>Deus induakeybylâ urâ, Jesus wâgâ unâ koendonro kêngatuhoem. Iwâgâ kienwânkyly wâgâ kêenomédâdoem, auguehoem warâ.

<sup>12</sup>Xirâ âwanu agânhedilygue mawânâ kêzenagazeoly xurâ keba modoram. Arâlâ olâ, ytywambyra wawlyly, koendâ tutuzema urâ mâkâ kâinwânkyly. Tâinwânse lelâlâ urâ, Deus ton-honreim lelâlâ awlyly. Tytaumbryy ioze lelâ egatuhoem aienehonze mâkâ, xypyry etaji kehoem, xirâ unâ mawânkâ kêngatuhoem aguehobyry.

<sup>13</sup> Jesus wâgâ unâ iozeno auguely tydaselâ âmâ. Auguely mâindatybylâ mâenomedâdoem aguezesegâ. Mâenomedâdily kâjimo. Jesus mâinwândily imâem iesezegâ lakuru, Cristo eynynâ âpemugudo iwynegâ warâ. Mâkâ kieinwândilygue, kydâpynedylygue warâ mawânâ, Cristo Jesus agâlâ kydawyly, kagâlâ mâkâ awyly warâ kienehonly.

<sup>14</sup> Kywymâry Deus Ispiritury eon-honwanâdybem, xirâ unâ ioze lelâ egatuzezegâ; iozepa kulâ unâ egatuwâni modo xurukâmo lâpylâ warâ. Ioze lelâ unâ mâengatuhoem Deus aguehobyry âmâ âdylâ tâwâenseim mâenkanâdoem nhânly-ro waunlo ara.

<sup>15</sup> Ásia eynynâ Jesus einwânni modo ynnâ adâkedyzebamo, iemakedyzebamo warâ keankâ tyanumogue, até Fígelo, Hermógenes warâ, tutuzelâ âmâ.

<sup>16</sup> Onesíforolâ olâ toenzepa womazeâni, won-hondâni warâ. Awylygue Kywymâry Jesusram: “Koendâ Onesíforo ety odano modo egâ” uguely. Etadâdybem wawyly ume, ywypazedaymba keankâ mâkâ uguondo,

<sup>17</sup> Xará Romaram taintuo, ui mâkâ, woenke lelâlâ warâ.

<sup>18</sup> Tutuzelâ âmâ, koendâ kehoem idânârá mâkâ urâem anhytyby Efesodâ wawyly ume. Kywymâry Jesus mâkâ koendâ nhedyly ise ize wato xypyry etay enadoram kydâepanâgueday.

## 2

### *Ton-honre lelâ unâ iozeno Jesus wâgâ kyzezatunre*

<sup>1</sup> Timóteo, ymery ara kâenkily âmâ. Koendonro mawânkâ Cristo Jesus kagâ, inomery nhuduly ani, xurâem amitoem. Awylygue âzeon-hondâgâ awârâ on-honru nhuduypygue.

<sup>2</sup> Tâzenanaym inomédâdobyrygue eagonro modo enomedâgâ, xirâ ioze lelâ agueim modo. Akaemo ise eagonro kurâdoram egatuin-ro warâ. Amyguely tindatybygue ise akaemo eagonro modo nhenomedâdilylmo lâpylâ-ro warâ.

<sup>3</sup> Sodadu koendonro tâsenagazedily tâmaenze, nâwiempyrâlâ, arâ lâpylâ Cristo Jesus eynynonroem mawylygue mâzenagazeoly watay mâsenagazedily emaengâ; xurâem amidily kâjimo.

<sup>4</sup> Sodadu exército duano tywymâry ize ato ara lelâ adâidyse awyly. Awylygue tywymâry keba kulâ aguely niwantaguebyra awyly. Sodaduem tâitoem tysejiguy âxiâyby modo wâgâ nâtynanâdaymba. Arâ lâpylâ aikâ, Kywymâry Jesus ize ato ara lelâ amitoem, xurâem mitoem mânhâympy modo wâgâ tâtynanâzeba ikâ.

<sup>5</sup> Tâgaseim tâgatudoem turutobyry nhakadyly-ro watay, tâmakezeim nemakewâbyra. Awylygue âmâ lâpylâ, koendâ turâem aini modoram Deus nhuduly mâenmakehoem, koendâ lelâ aguehobyry aiekâ.

<sup>6</sup> Tâwaneim ton-honre kehoem âpa ezay âsewaniby mawânkâ ewily ekaunâday, waunroem kuru emakerim. Arâ lâpylâ ton-honre âsewanigâ, Deus itaumbryrâ mâengatuhoem, âyam nhuduly mâenmakehoem.

<sup>7</sup> Kâinweniby wâgâ tunâgue ikâ angahu oday; Kywymâry Jesus mawânkâ idânârá xirâ âyam xutuen-honze.

<sup>8</sup> Jesus Cristo Davi ipemugüem awyly wâgâ, ânguy awyly wâgâ warâ âpaunzegâ. Iguewâm lelâlâ, kurâem itonmâ olâ. Igueypem inkâba mâkâ iwerâ. Mâkâ wâgâlâ unâ koendonro kâengatuly.

<sup>9</sup> Kâengatuhobyry wâgâlâ kâsenagazedily; kyâimpiry ara korentygue ekâjibyem wawyly. Arâlâ olâ, Deus itaumbryrâ âzegatuozezedily; korentygue ekâjibyemba mawânâ.

<sup>10</sup> Awylygue kâsenagazedily kâenmaenly, Deus induakewâdyby modo Cristo Jesus nheinwândilygue âsemaguehomoem, tynrense kehoem mâkâ agâ aunloenlâ itomoem, Jesus agâlâ âdyren-hon-homoem warâ.

<sup>11</sup> Cristo agâ kyiguely watay, eagâlâ ise tâlâ kydawyly.

<sup>12</sup> Cristo xurâ keba modo kânagazehon-ho kienmaenzedyly lelâ watay, eagâlâ ise pymâem kydawyly.

“Cristo xurâ mâkeba urâ” kykely-ro watay, xypyry etay, “Urâ xurâ mâkeba âmaemo” keze lâpylâ mâkâ kyam.

<sup>13</sup> “Cristo xurâem aiese urâ” kykehobyry aguiempyryrâ kurâ-ro watay, Cristo olâ “Aiese urâ” tâkehobyry aunlolâ adyese lelâ.

Adâkehobyry aniempyryrâ itoem nuduwâpyra.

Âkeá lelâlâ ise xirâ; idânârá kyzeinwâne.

### *Cristo xurâem kâwano*

<sup>14</sup> Timóteo, Jesus einwânni modo mâenomedâday, ton-honre aguekâ: “Warâ ârudilymo. Tyewiâseba, tâjihoguzeba warâ itaungâ, Deus itaumbryrâ egatuwâni modo aguely wâgâ kulâ. Koendâ inkâba mâjihogulymo; Jesus wâgâ unâ idani modo mankaladâdilymo kulâ. Deus ydatâ âyanmo auguely” kekâ eyanno.

<sup>15</sup> Tãpyneânze âdalâ Deus xurâem iwano aiekâ, iwanopyry wâgâ koendâ lelâ agâ itoem. Ioze lelâ unâ Jesus wâgâ enomedâgâ. Arâ ise koendâ tâwaneim tywymâry adientyby nhenuagaenday tywypazebaum ara mawly. “Koendonro awârâ urâem amânhekly” keze Deus âyam.

<sup>16</sup> Âdy wâgâpa kulâ, Deus izepa ato wâgâ kulâ warâ âjihogulyimo-ro watay, eagâmo tâjihoguzeba ikâ. Awârâ alâ kulâ aguewâdly modo kadawâdâ; iwâkuru mâkeba awârâ. Deusdâ kurâdo iwague nhenehonly kulâ awârâ.

<sup>17</sup> Pinuri inakai wâne MON tâise, kunru odakâ kain-hoem myara awârâ iozepa enomedâdo toenzepa kurâdoram âzeinwân-honly, Jesus einwândly nhainly. Himeneu, Fileto warâ iozepa kulâ unâ egatuwâni modo ewy akaemo.

<sup>18</sup> Jesus wâgâ unâ iozeno ageim einwândly imoimbyryem akaemo. Ânwa iozeno imyimbyry idu oday xuzatybyem adakobâni aramo. Warâ nhenomedâdlymo: “Xypyry etay, kâguepybyry kurâem nitondaymba ise, kâgadopyry lelâ ise. Batiza kituolâ mawânâ ani kurâem kitondly” kelymo. Kewâdlymo kulâ olâ. Iozeno kieinwânkyly imoen-honze kulâ arâ aguelymo.

<sup>19</sup> Kurâ Jesus einwânni modo kuru olâ kinmopa; unâ iozeno Deus kyam nhutuen-hoymby tâinwânsema kurâ. Âtâ tâhugane kehoem itâdyby wâne nihugueba, myara lâpylâ unâ iozeno Jesus wâgâ kieinwândly watay, Jesus einwândly kinmopa kydawly. Âtâ iwyantary wâgâ ânguy âtâ sodo awyly xutuhoem ezedy tâjiwenioze, arâ lâpylâ tâzedygue kâzetâni byryem Deus awly, kurâ Jesus einwânni modo. Saguhoenlâ Deus itaumbry wâgâ iwenibyem: “Kywymâry Deus idânârâ turâ xurâ modo tutuze” kely. Iwenibyem lâpylâ: “Idânârâ Deus xurâ modo, Deus izepa ato aiedly nimo” kely.

<sup>20</sup> Egâ wâne âdypeom modo ety oday tâlâ isejiguy ourugueto, pratagueto warâ; sodo toenzepa ize awly mârâ; aunlolâ nhondly, tynzekly awlygue. Tâlâ lâpylâ isejiguy segueto, norogueto warâ. Nhyzekly keba mârâ; nhewanily nhamely waunlo,

<sup>21</sup> myara kurâ Jesus einwânni modo Jesus wâgâ iozepa kulâ unâ egatuwâni modo einwândly kyjimonre. Arâ ise tywykeba kydawly, Kywymâry Jesus xurâem. Ize tato anheto ise kurâ. On-hondybyem lelâ ise kurâ, koendonro ize ato aguentoem.

<sup>22</sup> Timóteo, salokuzenomo modo Deus izepa ato anhekly amânhedyse tâiseba ikâ. Tonhonre ikâ, Deus ize ato ara lelâ amitoem, Jesus mâinwânsezedoem lakuru, Cristo eynynâ âpemugudo mâinwynedoem, eagâmo mâtuebabyra mitoem warâ. Âkealâ kuru Kywymâry Jesus einwânni modo arâ lâpylâ anidâmo.

<sup>23</sup> Deus itaumbry koendâ xutudânry modo âjihogulyimo-ro watay, eagâmo tâjihoguzeba ikâ. Tâdâjihoguduo mawânâ tâdâtuebadyly. Koendonro mâkeba awârâ anheklymo. Aunlolâ mawânkâ iewiâpadylymo, âtuebadlymo warâ.

<sup>24</sup> Âmâ Kywymâry Jesus emary, ânguy agâ tâtuebazeba ikâ. Koendâ ikâ idânârâ agâ. Enomedâdlymo xutugâ, mâenomedâguyly agâ tyewiâpazeba ikâ.

<sup>25</sup> Kywymâry Jesus wâgâ xutudânry watay, koendâ enomedâgâ. Mâenomedâdo arapa kulâ aini watay, koendâ lelâ xurukâ, sagâikegâmo warâ. Unâ Iozepaom kulâ nheinwândly imoen-honze kewânkâ Deus, iozeno lelâ nhutuhomoem.

<sup>26</sup> Iozeno lelâ tyeinwântoem, iozepaom einwândly inmolymo watay, âsemaguezemo Diabu emaymba. Iweâpa mawânkâ Diaburam âdutuozeze awlymo, ize tato anhetomoem. Ânguydo inra odaxi ihugueby ara akaemo Diabu emaym awly.

### 3

#### *Xypyry etay aini modo*

<sup>1</sup> Xirâ enanâguegâ. Xypyry etay, Jesus odopâdly iray, toenzepa ise inakanhe tadawly.

<sup>2</sup> Toenzepa ise ize tatolâ aieni modo; dinheru, âdydo imeom kulâ izetonro modo; kaloenrim modo warâ. Toenzepa ise tagonro takaze tynrendysetonro modo; kywykewâni modo; tâmawadâni byry modoram “Alâ ise” kedânry modo; tunwym, tyze warâ aguely einwântânry modo; Deus âwankuem ieni modo, isejiguy âwankuem ieni modo warâ;

<sup>3</sup> tagonro iwynedânry modo; tunâguedobyry tânagazedobyry warâ enanânehondânry modo; tâwanugoengueim, tunâgoengueim warâ xunâgueni modo; âjimanâdânry modo; âdadiseba aini modo, ânguydo kulâ idu odano emyenro modo; koendonro izepanro modo;

<sup>4</sup> tataen-holâ egamenri modo; ize tatobe tâitoem, ize tato adientoem warâ koendâ âpaunzedânry modo; idânârâ kehoem tutuze âdutuwâni modo; Deus takaze kehoem tâlâ tato kulâ nhomaenguyly waunlo modo warâ.

<sup>5</sup> Jesus einwânniem tawly adâkezemo wâne, kewâdlymo kulâ olâ. Anheklymo wâgâlâ Jesus einwânni keba awlymo âzeholy. Tataen-hoemba ikâ awâkâ aunlogue.

<sup>6</sup> Âtâam, âtâam warâ adakobâdylimo, unâ iozepaom enomedâze kulâ. Toenzepa tâdâsenogudyly kelymo; pekodo unâ âdaunlo kulâ einwânni mawânkâ nhenokuguylymo kuru. Inakai modo kulâ adienkyly amaymba tâsemaguedyze tawlylgue pylâ pekodo aguehomo nheinwândyly lelâ-ro warâ.

<sup>7</sup> Aunlolâ unâ iwelo tiuntuzedyly wâne ize atomo, unâ iozeno kuru Jesus wâgâ agueim nutubamo olâ.

<sup>8</sup> Saguhoem Janes, Jambres warâ\*, Moisés iduerymoem myakâwândy, arâ lâpylâ asaemo iozepa kulâ unâ egatuwâni modo Jesus wâgâ unâ iozeno idueryem awylymo. Âpaunzedomo inakanhe ietybyen-ro waunlo ara. Jesus einwânniem tawlyly adâkezemo lelâlâ wâne, Jesus neinwâmpyramo olâ.

<sup>9</sup> Alâ aisezedyly nitaymba ise akaemo. Iweâpa nitaymba ise âdy utuim keba awylymo âdutuoly, Janes, Jambres warâ âdutuohobyry ara.

#### *Paulo Timóteo nhurutobyry*

<sup>10</sup> Âmâ olâ, Timóteo, koendâ tutuzelâ âmâ Jesus wâgâ kâenomedâdyby; mâkâ aguehobyry ara lelâ awitobyry; unâ tâdâsemagueho kâengatudyze watobyry; Jesus kâinwântobyry; uduery modo ienagazedyly ume; yewiâpabyra, watobyry tuomareba wîpyra watobyry; Cristo eynynâ ypemugudo kâinwynedobyry; koendonro, koendâpaom alelâ yagâ aidyly umelâ kâenmaen-hombyry;

<sup>11</sup> Jesus eynynâbaom modo toenzepa ienagazedobyry warâ. Idânârâ xirâ awitobyry modo tutuze âmâ. Tutuzelâ âmâ âdy yagâ aityby modo xidadâ Antioquiadâ, Iconiodâ, Listradâ warâ. Toenzepa ienagazedâmo lelâlâ uduery modo! Yâen-homba olâ keankâ Kywymâry Jesus; iemake idânârâ kâsenagazedo modo amaym.

<sup>12</sup> Idânârâ Deus ize ato ara aini modo âzenagazeoze eynynâbaom modoram, Cristo Jesus nheinwândylymogue.

<sup>13</sup> Inakai aieni modo, konokuni modo warâ Deus izepa ato aieseze molâ ise. Konokuzemo, âzenokuozemo lâpylâ warâ.

<sup>14</sup> Âmâ olâ, Timóteo, Jesus wâgâ unâ iozeno inomedâdobyry einwândyly kâjimo; oday tonhonre kehoem mâinwânkylâ einwânkâ. Tutuzelâ âmâ, ânguy, ânguy warâ Cristo einwândyly wâgâ inomedânibyry awyly; tâwâlâ einwânkâ âyam aguehomobyry.

<sup>15</sup> Iamudoenlâ unâ Deus wâgâ iweniby mâuntuly, Deus Itaumbyry wâgâ. Mârâ wâgâ mawânâ âdara tâdâsemaguelly awyly mâuntuly, Cristo Jesus kieinwândylygue lelâ tâdâsemaguelly warâ.

<sup>16</sup> Deuslâ myakâwândy tytaumbyry iweninri modo nhangahu odaji inwenilymo ieni. Idânârâ Deus Itaumbyry awo wogonro Deus Ispiriturylâ iweniehorim. Mârâ mawânâ Deus wâgâ kydâsenomedâdo; Deus wâgâ iozepa kulâ kieinwântuo, kuruni; Deus izepa ato aguienituo kydadagâikeho; Deus ize ato ara lelâ kitoem konomedâni warâ.

<sup>17</sup> Deus itaumbyry koendâ kiuntuduo, ohondybyem lelâ kurâ, idânârâ koendonro mâkâ aguiendyze ato aguienituoem.

## 4

<sup>1</sup> Timóteo, Kunwym Deus, Cristo Jesus warâ tutuzemo arâ âyam auguely. Idânârâ iwymâryem odopâdonze Jesus. Idânârâ âdy iguewâtyby modoem, iguedânry modoem warâ aini wâgâ agueze mâkâ. Tâinwânni modoem koendonro ise anhenonhly, tâinwântânry modo enagazehonze warâ. Awylygue âyam aguehobyry aiekâ, uguely.

<sup>2</sup> Jesus wâgâ unâ egatuzezegâ, amyguedyse mawyly ume, amyguedyseba mawyly ume, tindadyse awyly ume, tindadyseba awyly ume alelâ. Koendâ Deus itaumbyry xutudânry modo enomedâgâ, koendâ nhutuhomoem. Deus aguehobyry sakani modoram tâwâlâ ton-honre aguekâ. Einwânni modo xurukâ, toenzepa nheinwânsezedomoem lakuru. Deus itaumbyrygue koendâ enomedâgâ; mâenomedâdaymo, tyewiâseba ikâ.

<sup>3</sup> Iweâpa nipyrâlâ ise unâ iozeno tindadysebaom modope idyly. Iwelo tâsenomedâdo ise tiuntudyze atomo kuru. Awylygue ise iozepa kulâ unâ egatuwâni modo ingâsedylymo, tonomedâdoem, akaemo agueho ise tindadyse kehoem atomo.

<sup>4</sup> Aituo ise Jesus Cristo wâgâ unâ iozeno nidapyra idylymo. Agaityom modo xunârybyry egatuyby kulâ ise indakylymo, nheinwânkylimo warâ.

\* 3:8 Janes, Jambres warâ myakâwândy adyenyry modo kehoem Diabu eon-honrugue aieni, Moisés, Egito iwymâry Faraó warâ enado. Êxodo 7dâ, 8dâ warâ aguely. Testamento Saguhoery wâgâ ezedy mo nâepanâgueba, idânârâ judeu domodo olâ akaemo wâgâ adâkeze xunârymoem warâ.



<sup>5</sup> Âmâ olâ, Timóteo, koendâ âpaunzegâ, âjimanâgâ warâ amânhekyly wâgâ. Jesus einwânni mawylgyue mâzenagazeoly watay, mâsenagazedily emazenzegâ. Jesus wâgâ unâ koendonro egatuly kâjimo, eynynâbaom modo, âdara tâsemaguely awyly nhutuhomoem. Deus xurâem âsewanirim âmâ, emary mawylgyue idânârâ Deus amânhedyse ato aiekâ.

<sup>6</sup> Odokehomo sainsezedyly awârâ. Inepa ise yâlymo. Deusram egameby iaduânto ara, on-hondybyem wawyly Deusram kâtuhoem, Deus ewanuem yiguehoem warâ.

<sup>7</sup> Tâgaseim tâgatuday tozohoinze, xypyry etaji kehoem tâgatudoem myara lâpylâ kozohoinly xypyryam kehoem agânhetoom aguehobyry aienibyryem wawyly. Cristo Jesus einwândily kâinmowâbyra urâ, unâ aguehobyry auguehoem egatuly kâinmowâbyra urâ warâ.

<sup>8</sup> Awylgyue koendonro urâem târâ eydâ tatodâ Deus nhekanâdyby kâenmakely kâenuendily, tâgaseim waunroem saintyby tâpywado nhemakeho ara. Deus turâ xurâ modoem nhekanâdyby ise Kywymâry Jesus, juiz koendonro, iebyry nhuduly. Urâem lelâ inkâba ise awârâ ebyry âduduoly. Idânârâ mâkâ odopâdily tuomare kehoem enuenni modoem izetonro modoem warâ ise âduduoly.

*Tataen-ho modo wâgâ Paulo aguehobyry*

<sup>9</sup> Iweâpa tâiseba ikâ, xarâ yam mâetoom.

<sup>10</sup> Demas wodoke. Xidadâ Tessalonicaram nâtâ, Deus ize ato agâ âseinwândânry modolâ mawânkâ keankâ ize ato kuru. Galácia yan-yam Crescente nâtâ. Tito, Dalmácia yan-yam nâtâ warâ.

<sup>11</sup> Lucas lelâ taunlo yagonro. Marcos xuigâ. Mâetuo, agâ enekâ, Kywymâry ewanu aiedilyem imawyadâdoem.

<sup>12</sup> Efesoram Tíquico xigonodâ.

<sup>13</sup> Mâetuo, igâwynu kâyntado iety nhangatay kânhekyly kânhâymy enekâ Troadedâ Carpo ety oday. Pape iweniby modo enekâ lâpylâ, awârâ tâjityby wâgâ iweniby enekâ kuru.

<sup>14</sup> Alexandre, âdydo imeom metalgue xygahudâni, toenzepa inakanhe yenehom. Kywymâry Jesus olâ enagazenehonze yagâ anhetaymby modo wâgâ.

<sup>15</sup> Deus eynynonro modo izetonro mâkeba mâkâ uguondo. Cristo Jesus wâgâ unâ iozeno kiengatuly-ro watay, inepa mâkâ toenzepa iewiâpadyly. Awylgyue eagâ moxiodyly-ro watay, tâmaynelâ ikâ, uguely.

<sup>16</sup> Waunroem kuru, pymâ domodo enado kâsemaguehoem augueday, ynyndâ aguenriem ânguy nâxiânwâbyra keankâ yagâ; idânârâ yataen-ho modo wodokewâdaundâmo. Awârâ wâgâ Deusram kâenkadyly, nâzenagazeoba itomoem.

<sup>17</sup> Kywymâry Cristo Jesus olâ keankâ yagâlâ, judeu keba modoram koendâ kehoem iwâgâ unâ kâenomedâdoem won-hondâdâ. Uguondo modo ton-honreim emaymba yedâ mâkâ, udodo ara kehoem tyewiâtuneim modo emaymba.

<sup>18</sup> Idânârâ inakai modo amaym iemakeze Kywymâry Jesus; iemakeimbyryem yase myarâ kayam, pymâ ton-honreimhe tatoram. Awylgyue, “Ton-honreim, tywâkureim warâ âmâ” kykely kinmopa kine Kywymâry Cristo Jesusram. Arâlâ nidâ.

*Aguely âdypygueândo*

<sup>19</sup> Priscila, isolâ Áquila warâ ywynu nawâdâmo, Onesiforo ety odano modo lâpylâ warâ.

<sup>20</sup> Xidadâ Corintodâlâ Erasto nâxiâm; Miletodâlâ Trófimo xiâm warâ, tâwâne mawânkâ keankâ.

<sup>21</sup> Tahuleba tâiseba ikâ, igâwyno sainto iraynâlâ inepa âekâ. Tarâ Romadâ Jesus einwânni modo, idaenkuly mo lâpylâ, Êubulo, Prudente, Lino, Cláudia warâ.

<sup>22</sup> Kywymâry Jesus agâ aguely: “Timóteo agâlâ ikâ, eon-hondâzelâ” uguely.

*Deus nhesemo*

Xirâ kata wâgâ kâinweniby itainrim modo, idani modo warâ Deusram koendâ mâzehohomoem kâenkadyly.

Paulo

## TITO

### Paulo Kata Inweniby Titoram

Xirâ kata wâgâ inwenily Paulo nhangahu odaji iemâmy Deus. Awlygyue Deus itaumbryrlâ xirâ Paulo inweniby. Judeu keba myakâwândy Tito, Jesus einwânnyryem olâ myakâwândy. Paulo eataen-ho, emawydâni warâ myakâwândy, âji iwaguenodâ Jesus xunâry egatuzê awly ume. Ilha Cretadâ myakâwândy Tito âxiânly, târâ Jesus einwânny modo iwymâry modo tinduaekehoem, tonomedâdoem warâ.

Xirâ kata wâgâ Paulo tywenize Jesus einwânny modo iwymâry ewanu wâgâ. Âdy wâgâ Tito nhenomedâdo awly adâkeze; âdara aidylymo awly wâgâ adâkeze warâ.

Xirâ wâgâ kiuntuly, Jesus eynynonro modo, iozêpa kulâ unâ egatuwâni modo neinwâmpyra itomoem, Jesus tyeinwândyly iraynâ inakanhe adâitobryr anientombyra itomoem warâ.

#### *Aguely adaguho*

<sup>1</sup> Urâ Paulo xirâ kata âyam iweninri, Tito. Deus emary urâ. Jesus Cristo ingonotybylâ urâ, unâ iozeno turâem Deus induakeyby modoram kêngatuhoe, nheinwândylymo koeonhonwanâdoem warâ. Arâ ise nhutulymo ize ato ara adâjidyly.

<sup>2</sup> Tyeinwândylymogue aunloenlâ eagâ tâidyly inwânwândylymo. Onro, kau warâ tiungudyly iraynâ warâ myakâwândy Deus aguely: “Aunloenlâ ise ynynonro modo yagâ awly” kewândymy. Kewâdyly kulâ waunlo mâkeba Deus; adâkehobryr adyese lelâlâ. Awlygyue eagâ ise kydawly kiuntuly.

<sup>3</sup> Adâkeho odaji ituolâ myakâwâm Deus âdara kâmakely awly nhutuen-honly, yam âzegatuoly warâ. Kâmakeim Deus aguehobryryem urâ pylâ egatuin-ro warâ.

<sup>4</sup> Idaenkuho xirâ kata, Tito. Ymery ara kênkylly âmâ, Jesus wâgâ augueduo mâinwântobryr wâgâ.

Âynynâ Kunwym Deusram, Kâmakerim Cristo Jesusram warâ kêenkadyly, koendâ mâzehoem, akaladâni peba itoem warâ.

#### *Cretadâ Tito ewanopyry*

<sup>5</sup> Târâ ilha imâsedo Cretadâ watay, Jesus einwânny modo duay agânhekyly kêanwanikeba wakyntre. Âmâlâ olâ ise ewanikeim, Tito. “Jesus einwânny modo ewy ise pymâem tuduaezeim iwerâ. Idânârâ xidadâ modo odakâ Jesus eynynonro modo ato ara enomedânimo pymâ iduaegegâ” uguelâ âyam. Awâtârâ watay, âdaunlo pymâem ini awly wâgâ âyam auguelâ. Auguehobryr ara aikâ.

<sup>6</sup> Koendâ lelâ aini ise, Jesus einwânny modo iwymâry, ânguy iwâgâ âdakepa itoem. Ohogüimby-ro watay, tokalelâ iwydy nidâ. Jesus einwânny modo iwymâry imeom Jesus neinwândâmo, âdalâ kulâ anipyra nidâmo lâpylâ warâ.

<sup>7</sup> Deus ewanulâ ise Jesus einwânny modo iwymâry anhekyly. Awlygyue koendâ lelâ anidâ, “Inakanhe aidyly” kehoemba itoem; adâkehobryr lelâ aidyse ato waunlo keba; inepa kulâ iewiâpani keba; toku ikaji ini keba; tâdâjitoguyly keim keba; toenzêpa dinherupe, âdydo imeompe warâ tâidyse donro keba;

<sup>8</sup> âxigodo saintuo, tâty odaylâ ejitâni, kurâ domodo tienmawydâdyzedo; koendonro lelâ adidylyly wâgâ tunâgueim, adâidyly, adâkely warâ xuturim, âdalâ kulâ aini keba; Deus ize ato ara lelâ aini; âwâlâ âjimanâni;

<sup>9</sup> Jesus unâry tyam egatuyby âkeâ lelâlâ awly einwânny warâ nidâ. Arâ mawânkâ ise xirâ unâ iwâkuru nhegatuday, kurâ domodo nheinwântoem ingüizeândyly. Iozêpa kulâ unâ egatuwâni modo watay, koendâ nurudâ, arâ ise iozêpa kulâ adâkely awly nhutulymo.

<sup>10</sup> Toenzêpa mawânkâ kurâ domodo tywymâry modo turudyly tindadysebanro modo, judeu domodo aunlo kuru tâzewenry timodyzebaom. Awlygyue tienomedâday âdalâ kulâ aguelymo, ânguy koendâ ieni keba aguehomo. Tunârygue kurâdo nhenokudylymo kulâ warâ.

<sup>11</sup> Âdalâ kulâ nhenomedâdylymogue toenzêpa tâjiunwym, tâjise, tâjimery warâ enagadubadylymo. Âdykonlo iozeno, iozêpaom warâ awly nutuba idylymo. Idinherurumo tienmakehomoem kulâ mawânkâ arâ aguelymo. Warâ kulâ aidylymo. Aguelymo kêzeinwântaundâ. Arâ nhenomedâdylymo sainwâtaungâ, kewâdylymo kulâ mawânkâ.

<sup>12</sup> Cretadâ enomedâni modo ewy aguewânny Creta donro modo wâgâ: “Konokuni kulâ asaemo Creta donro modo! Ânguydo imeom iewiâpadyby ara kulâ asaemo. Toenzêpa idolagumo, tâsewanidyzebamo pylâ-ro waunlo asaemo” kewânny.

<sup>13</sup> Ákealâ myakâwâm aguely-ro warâ. Jesus wâgâ iozepa kulâ unâ egatuwâni modoram ton-honre aguekâ, kewâdily kulâ waunlo modo, Jesus wâgâ ioze aguenri lelâ nheinwântomoem.

<sup>14</sup> Eyanmo aguekâ, judeu domodo unâ nhugutyby einwândily inmohomoem, iozepa kulâ unâ egatuwâni modo agueho aniempyra itomoem warâ.

<sup>15</sup> Deus lelâ kieinwântuo, âdy tâinzenry lâpeba, âdy adyesenrylâ peba warâ. Jesus kieinwâmpyra kurâ watay olâ, âdy koendonro peba, kânanaji. Jesus eynynâbaom modo inakanhe adâidyly-ro watay, koendâ adâidyly enanajimo. Koendâ adâidyly-ro watay, inakanhe adâidyly enanajimo. Idânârâ tâpaunzedomo inakanhe awylygue, adientyby wâgâ nâjityembyramo warâ.

<sup>16</sup> “Deus eynynonro xina” tâkezemo wâne, iozepa kulâ olâ nhenomedâdilymo, koendâpa aidilymo, aguelymo warâ. Arâ awylymolâ; Deus eynynonro keba awylymo enehorim. Deus aguehobyry neinwâmpyramo. Izepa ato kehoem anhekylymo. Âdy koendonro adientysebamo, aiedily nutubamo warâ.

## 2

### *Koendâ adâjito modo xutuho*

<sup>1</sup> Deus wâgâ unâ tâinwânseim iozenogue lelâ enomedâgâmo, Tito.

<sup>2</sup> Agaityom modo xurukâ: “Toku ikayba itaungâ. Koendâ lelâ aitaungâ, âwankuem tyeseba mitomoem. Âwâlâ âjimanâdaungâ. Ton-honre lelâ Jesus einwântaungâ, iwâgâ iozepa kulâ enomedâdo mâinwâmpyra mitomoem. Idânârâ kurâdo iwynedaungâ. Jesus einwânniem mawylymogue mâzenagazeoduomo kulâ Jesus mâinwâmpyra tâiseba itaungâ” kekâ agaityom modoram.

<sup>3</sup> Aripido lâpylâ warâ xurukâ: “Deus ize ato ara lelâ aitaungâ, Jesus tâinwânse mawylymo mâenehon-homoem. Ânguy kâdunâguedaundâ. Toku ikayba itaungâ. Koendâ pekodo iwelo ohogüinze modo xurutaungâ.

<sup>4</sup> tuso agâ, tymery agâ warâ koendâ itomoem,

<sup>5</sup> âwâlâ âjimanâdomoem, eagonro uguondoram nâdynanâoba itomoem, tynepa itomoem pekodo ewanu aiese, tâty oday koendâ lelâ itomoem, tuso ‘Aiekâ’ kehobyry anhetomoem. Warâ xurukâmo, ânguy Deus itaumbry wâgâ inakanhe aguepa itoem” kekâ aripidoram, Tito.

<sup>6</sup> Uguondo xutuwâdyby modo, salokuzenomo modo warâ xurukâ lâpylâ: “Âwâlâ âjimanâdaungâ” kekâ eyanmo.

<sup>7</sup> Tito, âmâlâ koendâ lelâ aikâ lâpylâ, amito ara lelâ Jesus einwânni modo aitoem. Jesus wâgâ unâ mâengatuday, koendâ lelâ aguekâ, tâwankunremba warâ.

<sup>8</sup> Ioze lelâ aguekâ, ânguy âunâguebyra itoem. Âduerydo âpybazeze, âdy âunâguedomo peba awylygue, Jesus einwântaynrim modo tiunâguedo peba awylygue warâ.

<sup>9</sup> Tâwanuneim modo xurukâ: “Eagâ iwanomo âwankuem kâietaundâ, einwântaungâ warâ. ‘Aiekâ’ kehobyry aietaungâ, tylahureba.

<sup>10</sup> Eagâ iwanomo isejiguy kâzemagazedauundâ. Koendâ isejiguy nhontaungâ; koendâ ewanuem aitaungâ warâ. Koendâ lelâ amituomo ise eagâ iwanomo âwâgâmo koendâ aguely, âDeusrymo mâinwânkylimo wâgâ koendâ aguely warâ” kekâ tâwanuneim modoram.

<sup>11</sup> Idânârâ agâ koendonroem tawyly enehonwâm Deus, awylygue ise einwânni modo âsemaguely.

<sup>12</sup> Kagâ koendonro tawylygue, Deus konomedâdily izepa tato aiedily kinmohoem, Deus ize ato agâ âseinwândânry modo aiedily kinmohoem warâ. Konomedânybyryem âwâlâ kydâjimanâdoem, koendonro aguietoem, ize ato lelâ aguietoem warâ,

<sup>13</sup> toenzepa kuomaro, Jesus Cristo odopâdo kienuendily ara. Tynwânwânse kurâ ky-Deusry imâsedo, kâmakeim warâ.

<sup>14</sup> Tâwâlâ ize tawylyguelâ myakâwâm Jesus âtuly tyiguehoem, inakai amaymba kâmakehoem, inakanhe aguitobyry xygakeze, xurâem kitoem. Koendonro, ize ato lelâ warâ aguiendyse kitoem myakâwâm iguely.

<sup>15</sup> Tito, xirâ âyam auguewâtobyry modogue mâunrudysemo wawyly. Iomazeângâmo ton-honre lelâ Jesus nheinwântomoem. Deus wâgâ amyguely tindadysebaom modoram ton-honre aguekâ. Ânguyram amygueho âwankuem kâieneho, Tito.

## 3

<sup>1</sup> Atonlo Jesus einwânni modo xurukâ. Tito, warâ eyanmo aguekâ. “Idânârâ pymâ domodo einwântaungâ, âtâ anary iwymâry, xidadâ odano modo iwymâry alelâ. ‘Aietaungâ’ kehobyry, aietaungâ. Koendonro aiese on-hondybyem lelâ itaungâ” kekâ.

<sup>2</sup> “Ânguy kâdunâguedaundâ. Tâdâjitoguyly tâkezeba itaungâ. Koendâ lelâ itaungâ idânârâ agâ” kekâ eyanmo.

<sup>3</sup> Saguhoem Jesus einwântânry modo ara kâinane aguidyly, Jesus eynnonroemba kydatay. Deus kiuntuba kydakâwâm ilæeday. Koendonro, inakai warâ aguienkyly awyly kiuntuba. Deus, pymâ domodo warâ âdaunloenlâ kiynrempyra, kiejnwâmpyra warâ ky-dawyly. Deus eynnâbaom modoram kydâzenokuoly kulâ. Inakai modo aguiensezedyze kydato aiedyly kinmohoem nudupa. Kopaëlâgâembaba olâ koendâpa kidyly. Âkelomo tâlâ atogwe toenzepa tâsewânize kurâ. Izepamo kydakâwâm; akaemo lâpylâ kyizepa warâ.

<sup>4</sup> Kâmakerim Deus olâ kywynedâ tawyly enenehonwâm. Kagâ koendonroem tawyly enenehonwâm warâ.

<sup>5</sup> Koendâ aguitobyry wâgâpalâ kâmakely, kytyendylyguelâ. Inakanhe kitobyry xygawêwâm, tâwâlâ ize tawylyguelâ. Tyispirituryguelâ iweloem kyemâ, iweloem kyeszedyly aunloenlâ.

<sup>6</sup> Paru iazehodâ wâne paru nawepa-ro myara Deus Tyispiritury kyam ingonodyly. Kâmakerim Jesus Cristo anhetyby wâgâ, Deus Ispiritury kagâ awyly.

<sup>7</sup> Deus kâmakely, imeryem kitoem, eagâ aunloenlâ kitoem, koendâpa kydawyly umelâ. Aunloenlâ ise eagâ kydawyly, koendâ kâendylygue. “Inakanhe amitomobyry wâgâ mâsenagazedaymba ise âmaemo” kewâm Jesus eynnonro modoram.

<sup>8</sup> Iozeno lelâlâ xirâ âyam kâinwenily.

Deus einwânni modo xurukâ, koendâ adâidyly nimopa itomoem, koendonro aiedyly lelâ nhutuhomoem. Xirâ amyguedyse wato; koendonro xirâ idânârâem.

<sup>9</sup> Tito, auguely âyam, atonlo modoram warâ. Âdy wâgâpa kulâ tâseuzeba itaungâ. “‘Uguondo tynrenseimbyry imeryem, iweryem warâ wawylygue, tynrenseim urâ’ tâkezeba itaungâ” kekâ arâ aguewâni modoram. Tâjitoguyly kewâni modo agâpa itaungâ. Judeu domodo ezewenry wâgâ tâjihoguzeba itaungâ warâ. Earamopa itaungâ. Âdyem nitaymba awârâ modo; âdy mâkeba awârâ modo.

<sup>10</sup> Jesus einwânni modo tygue, tygue ienehonri-ro watay, ton-honre kehoem aguekâ. Iozepa kulâ aguezesedylymo-ro watay, ton-honre kehoem agueonkâ eyanmo. Iozepa kulâ enomedâdyly nimopamo-ro watay, âduaximo kâieneho.

<sup>11</sup> Arâ kurâ domodo tygue tygue ienehonrimbyry modo koendâpa tawylygue mawânkâ arâ kulâ aidylymo. Xurudylymo lelâlâ wâne, inakanhe adâidyly inmohomoem, alâ Deus izepa ato anhesezedylymo. Inakanhe aidylymo wâgâlâ koendâpa awylymo xutuly.

*Paulo Titoram adâkely nhypygueândo*

<sup>12</sup> Ârtemas atay, Tíquico atay warâ Cretaram kâingonodyse urâ. Asaemo ewy ise kâingonokyly, itaybyanoem. Asaemo ewy awyarâ saintuone, xidadâ Nicopolisram idâ, yagâ oxioze. Udâly ise myarâ kopâ, igâwynu warâ sakaze.

<sup>13</sup> Zenas, Apolo warâ Cretadâba âxiguedaymo âdylâ ize atomo âundugâne, koendâ lelâ idâhomoem. Tâzezewenry koendâ xuturim awâkâ Zenas. Idânârâ ize atomogwe emawyadâgâmo.

<sup>14</sup> Warâ Jesus einwânni modoram aguekâ: “Koendâ lelâ aguine. Kuduano modo âdy pebaro watay, ipa atomo kududunre. Tynepa kine. Arâ ise ânguy kydawyly kienehonzededyly” kekâ.

<sup>15</sup> Idânârâ taunlo yagonro modo idaenkudyzemo. Atonlo modo xina eataen-ho Jesus einwânni modo xina nhenanâguely lâpylâ.

*Deus nhesemo*

Deusram koendâ idânârâ mâzehohomoem kâenkadyly.

Xirâ kulâ âyam augueho, Tito.

Paulo

## FILEMOM Paulo Kata Inweniby Filemomram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Uguondo tynrenseim, tydinherugueim warâ myakâwândy Filemom, Jesus einwânni. Xurâem tâwaneimpe myakâwândy Onésimo, tâbyguepa âsewanirin-em nghanâtyby. Tywymâry isejiguy ewy emagazemâ olâmy Onésimo. Aitybyem Filemom etydâba âwiendyly. Xidadâ Paulo etadâdobyry yan-yam myakâwândy âwiendyly. Târâ Paulo Jesus wâgâ aguely indadyly myakâwândy. Tindatuo Jesus einwânniem idyly. Tagâlâ myakâwândy Paulo, Onésimo ize awyly, tâmawyadâdoem. Tutuze olâ myakâwândy tywymâry etyram Onésimo odopâniem awyly.

Deus, Pauloram xirâ kata inwenien-honly myakâwândy, Onésimo tywymâryam nhatoem. Tâwaneinhe kulâ inkâba myakâwândy Paulo Onésimo odopâdyze awyly, Cristo eynynâ ipemuguem lâpylâ. Paulo mâkâ ekaunâdyze awyly, Paulolâ tâty odaji Filemom nhekaunâgyuly waunlo ara lelâ.

### *Aguely Adaguho*

<sup>1</sup> Urâ Paulo xirâ kata âyam iweninri, Filemom. Kadeia oday tarâ wawyly, Cristo Jesus wâgâ auguelygue. Tarâ yagâlâ merâ Timóteo, kypemugu Cristo eynynâ, idaenkuly lâpylâ. Xina eataen-ho tutuzeim âmâ. Xina memawyadâdâ Jesus unâry xina nheगतuday.

<sup>2</sup> Iegary egatugâ awyârâ ityam Jesus wâgâ unâ idase idâwâni modoram. Áfia lâpylâ xina nhedaenkuly, kypemugu Cristo eynynâ. Arquipo xina nhedaenkuly lâpylâ warâ. Xina eataen-ho lâpylâ awâkâ, xina âsenagazedo ara Jesus Cristo nheinwândylygue âsenagazeni.

<sup>3</sup> Kunwym Deusram, Kywymâry Jesusram warâ kâenkadyly, koendâ mâzehohomoem, akaladânimo peba itoem warâ.

### *Filemom Jesus tâinwânse, Jesus einwânni modo tywyneze, tâmawyadâze warâ*

<sup>4-5</sup> “Filemom-ma idânârâ Jesus einwânni modo tâmawyadâze, tywyneze warâ. Kywymâry Jesus einwânni lelâlâ mâkâ” warâ aguelymo âwâgâ. Arâ igary kâindatobyry wâgâ, aunlolâ inanry Deus agâ auguely âwâgâ: “Pabai Deus, agâ womaru, koendâ Filemom egary kâindadylygue.

<sup>6</sup> Koendâ mâkâ âinwânni modo agâ. Nemawyadâbyramo nipyra. Awylygue âyam kâenkadyly, toenzepa lelâlâ Cristo wâgâ nhutuhoem, neinwâmpyra nipyra itoem, nheinwântoem lakuru. Arâ aidyly tiuntuduomo, toenzepa ise kurâ domodo iomaru agâ, Deus, koendâ Filemom aidylygue” uguely inanry âwâgâ Deusram.

<sup>7</sup> Ypemugu Cristo eynynâ, Jesus einwânni modo tywyneze, tâmawyadâzemo, koendâpamoro watay, tuomazeânzemo warâ myguehonly kâindatuo, toenzepa womaze. Toenzepa kehoem kozohondâdâ.

### *Paulo Onésimo eynynâ nhekadobyry*

<sup>8-9</sup> Xirâ kâinwenily, yataen-ho, âyam kâenkadoem. “Cristo eon-honrube wawylygue, agaityoem wawylygue, kadeia oday wawylygue warâ, ‘Ize, izepa alelâ auguehobyry amânhetoem’ auguely” tâkeze tâise urâ. Toenzepa kydpânyedyly olâ, xirâ auguehoem aienhoim: “Kâenkaguly waone aiekâ, amânhedyse matay” uguely-ro warâ.

<sup>10</sup> Warâ kâenkadyly Onésimo xurâem. (“Koendâ tâwaneim” keze Onésimo kely.) Kâinwynegyuly merâ, ymery ara kehoem. Tarâ kadeia oday watay, yam nâedâ; Jesus wâgâ augue eyam; neinwândâ-ro warâ. Nhunwym ara lelâ urâ, urâ Jesus wâgâ enomedâni awylygue.

<sup>11</sup> Ády keba wâne keankâ itydâ âsewanily ume. Iwerâ olâ iemawyadâniem itybyem. Ityam odopâduo, imawyadâze lâpylâ warâ.

<sup>12</sup> Kâingonodyly ise merâ ymery ara kâinwynegyuly. Koendâ edaenkugâ. Iedaenkuho aralâ edaenkugâ.

<sup>13</sup> Jesus unâry kâengatulylygue tarâ kadeia oday ietagu. Yagâlâ wâne ize wawyly, iemawyadâniem. Tarâlâ âmâ-ro watay, arâ lâpylâma tâise iemawyadâdyly.

<sup>14</sup> Xirâ kâenkadyby wâgâ âmâ olâ xutuim. Ákeá myguepa âmâ watay, âdapa. Ákeá myguely watay, âdapa lâpylâ warâ.

<sup>15</sup> Nâwiendâ wâne itydâba, koendâ lelâ olâ Deus aniendâ xurâem, âmâem alelâ. Iweâpa nidâ wâne itydâba âwientybyem. Jesus einwânnipyryem tawylylygue ise iwerâ âyanlâ odopâdyly. Aunloenlâ ise agâ ewanu.

<sup>16</sup> Odopâduo, âsewanize âmâem, agâ tâwaneim tawlylygue kulâba olâ, Cristo eynynâ âukono mâinwynegulyly awylylygue. Kâinwynegulyly merâ. Âmâ olâ ise iwyneni kuru-ro warâ. Ity oday mawânkâ ejiku, aralâ Jesus nheinwândyly lâpylâ warâ.

<sup>17</sup> “Paulo yataen-ho” myguely, Jesus xurâem kydâsewanilylygue. Awylylygue Onésimo odopâduo, koendâ edaenkugâ, urâlâ mâendaenkuly-ro waunlo ara lelâ.

<sup>18</sup> Âmâem inakanhe aitybyem, âsejiguy emagazenibyryem merâ watay, urâlâ ise anhetyby modo epywani.

<sup>19</sup> Xirâ kata wâgâ iezedy kâinwenily, urâlâ ipywani awyly mâuntuhoem: “Urâ Paulo ise merâ inakai anhetybybe watay epywani.” “Dinherugue iepywagâ” myguely iraynâ, saguhoem wao koendâ âmâem agânhetyby enanâguegâ. Urâlâ keankâ Jesus mâinwântoem agueim. Xirâ âmâem auguehobyry kâzenanânen-ho.

<sup>20</sup> Koendâ lelâ ikâ Onésimo agâ, âyam kâenkado ara, ypemugu Cristo eynynâ. Amituo ise won-honru mâunduly, azakâlâ Cristo eynynonro kydawlylygue.

<sup>21</sup> Koendâ Onésimo mâendaenkuly, tutuzelâ xirâ kâinwenily. Awârâ takaze Onésimo xurâem amidyly, tutuze urâ.

<sup>22</sup> Itydâ waone iejidy âungukâ, udâduo kâxidâdo. Tutuze urâ, Deusram ywâgâ amyguepa mipyra mawlymo: “Pabai Deus, Paulo xarâ nâetondâ” myguelymo inanry eyam. Inepa kewânkâ Deus amyguehomobyry aiese, agâmo witoem.

*Aguely xyppyry*

<sup>23</sup> Epafra idaenkuly. Tarâ yagâ kadeia odaylâ merâ. Cristo Jesus einwândyly, emaryem tadawyly warâ nimopalâ.

<sup>24</sup> Marcos, Aristarco, Demas, Lucas warâ iwynu sawâtaungâ lâpylâ. Yataen-ho lâpylâ asaemo, Jesus wâgâ aguelymogue.

*Kywymâry nhesemo*

<sup>25</sup> Kywymâry Jesus Cristoram koendâ mâzehohomoem kâenkadyly lâpylâ.

Alâ kulâ âyam augueho.

Paulo

## HEBREUS

### Hebreu Domodoram Kata Iweniby

Deus myakâwândy âdy xirâ kata wâgâ tywenezim awyly iweninribyry nhangahu odaji ieni. Ânguy iweninribyry awyly tutuduneba. Deus itaumbryrlâ xirâ iweninribyry nhegatu-uly.

Xirâ kata judeu domodo Jesus einwânni modoram myakâwândy âjigonoholy; Jesus eynynâboom modoram tânagazezim myakâwândy akaemo. (“Hebreu” lâpylâ judeu domodo, israelita warâ ezedy.)

Xirâ kata wâgâ toenzepa Jesus Cristo wâgâ itainly. Kunwym Deus xutuen-hoim mâkâ Jesus. Jesus kiuntuduo, âdaunlo Kunwym awyly tutuze kurâ, Deus imery mawânkâ Jesus. Saguhoem Deus wâgâ aguewâtyby modo takaze tutuzim lelâlâ mâkâ. Judeu domodoram tinweniday, iweninri tâgatuze Deus ety oday aini modo, târâ kurâ domodo eynynâ Deus agâ aguewâni modo ewanu wâgâ warâ.

Saguhoem Deus einwânni modo tâguy tyânwâsemo mykâinane. Mâkâ âguynro modo xyâppy iunu tientuo mykâinane Deus mâkâ egamewâni modo inakanhe aitobyry nhygakely. Xirâ kata wâgâ tutuze kurâ, âwâlâ Cristo âtuhobyry, inakanhe aguitobyry xygakehoem. Jesus kieinwântuo lelâ mâkâ kâmakely iwerâ, âguynro xyâppy iunu, nhunru warâ kiengameygue inkâba.

Capitulo 11dâ adâkeze Deus einwândyly wâgâ. Saguho modo toenzepa Deus einwânni modo ezedy tâgatuze myakâwândy mâkâ.

#### *Jesus Cristo wâgâlâ Deus âdutuoly*

<sup>1</sup> Saguhoem toenzepa adâkeze myakâwândy Deus kydamudo tytaumbryry egatuwâni modoram, tytanrugue aguely atay, eâenkymoem aguely atay, âpaunzedomo oday atay, enu oday nhugunehonly atay warâ. Akaemo pylâ myakâwândy Deus aguehobyry kurâ domodoram egatuin-ro warâ.

<sup>2</sup> Xirâ ume, xypyry iwaguepa idyly iray olâ mâkâ imerylâ Deus kiuntudyze ato agueim. Tymery agâlâ myakâwândy Deus idânârâ nhugudyly. Idânârâ tiungutyby modo sodoem itoem tymeryam aguewânmy.

<sup>3</sup> Deus eon-honru, iwâkuru, pymâem awyly warâ etolâ imery, Deus agâ âzekiba awylygue. Mâkâ imery itanru ton-honreingue idânârâ âdydo imeom eon-honwanâdybyem awyly. Mâkâlâ mawânkâ igueim, inakanhe aguitobyry xygakehoem, Deus xurâem tywykenryem kitoem. Igueypyem, kurâem itondybyem, Deus ton-honreim kuru eydâ atoam odopâmâ. Eahoru eynynâ ekadybyem awyly pymâ ekadodâ.

#### *Deus imery tynrenseim kuru, ton-honreim warâ, anju domodo takaze kehoem*

<sup>4</sup> “Ymery” kewânmy Deus Jesusram. Awylygue kiuntuly Jesus, anju domodo takazeno kuru awyly. Deus imery tynrenseim kuru anju domodo takaze. Deus Imery kelygue tâzekeim imâsedo kuru, “anju” kelygue tâzekeim takaze.

<sup>5</sup> Deus myakâwândy anju domodo ewyram:

“Ymery âmâ, unwâm urâ warâ;

kurâdoram ymery mawyly kânehonly warâ” kepa,  
tymeryam adâkehobyry ara, warâ iwenibyem awyly.

Deus itaumbryry awo wâgâ iwenibyem âdaunlo anjuam wakewâpyra:

“Nhunwym ise urâ; ymery ise mâkâ” kewâpyra;

tymeryam lelâ myakâwândy arâ aguely.

<sup>6</sup> Deus, tymery onro anaxi igonoseaji awyly ume,

“Idânârâ anju domodo ymery nhyrendyly ize wato” kewândymy.

<sup>7</sup> Anju domodo wâgâ aguewânmy Deus:

“Urâ Deuslâ anju domodo xuguni.

Sapezenru ara, peto ara warâ kehoem eon-honromoem adyese urâ.

Iemaryem aitomoem urâlâ agueim”

warâ iwenibyem awyly Deus itaumbryry awo wâgâ.

<sup>8</sup> Kunwym Deus tymeryam aguewânmy:

“Âdaunloenlâ nadainwâpyra ise pymâem mawyly.

Koendâ lelâ ise âynynonro modo mâendyly.

<sup>9</sup> Kurâ domodo koendâ anhekyly tohogueze âmâ;

akaemo inakanhe kulâ anhekyly olâ mâen-hoguebyra âmâ.

Awylygue aunloenlâ pymâem mitoem ajiedâ.

ÂDeusry urâ.

Mohomaendoem ajiedâ,

ataen-hodo duay tynrenseim kehoem âwanu amânhedylgye  
ewanumo takaze iwanu imâsedoem awylygye âduakely' kewândymy”

warâ iwenibyem awyly.

<sup>10</sup> Warâ lâpylâ myakâwândy iwenibyem awyly Jesus wâgâ aguehobyry:

“Âdy peba awyly ume, amygueduo akâwândy, onro, kau warâ mâungunehonly, Pymâ.  
Imaryguelâ mâyngadyly waunlo ara.

<sup>11</sup> Kau, onro warâ adainze;

âtâ tâjiwogonro adainly ara ise kau, onro warâ adainly,

Âmâ olâ ise âdaunloenlâ madaimpa.

<sup>12</sup> Âtâ tâjiwogonro xugukely ara ise kau, onro warâ mâungukely.

Âmâ olâ ise âdaunloenlâ mâtugugueba”

warâ iwenibyem awyly Deus itaumbry awo wâgâ.

<sup>13</sup> Jesus, anju domodo takaze kehoem awyly, tutuze kurâ, Deus mawânkâ, tymeryam  
adâkehobyry ara, eyanmo aguepa:

“Yahoru eynynâ ikagâ tynrenseim ekadodâ,

âduery modo eon-honru kainly ara,

âdydo ara kulâ âhuru iaxi kânhedylymo ara”

kewândymy Deus tymeryam; anju domodo ewyampa aguely; warâ iwenibyem awyly Deus  
itaumbry awo wâgâ.

<sup>14</sup> Anju domodo-ro? Anju domodoma tâenseim keba, Deus emaryem tâwaneim akaemo.  
Kurâ Jesusram âzemakerim modo emawyadâze Deus ingonokily.

## 2

*Mâsemaguhomoem Deus âgâsedomobyry imedyly wâgâ aguehobyry*

<sup>1</sup> Anju domodo takaze tynrenseim lelâlâ Deus imery awylygye, unâ iozeno kindatyby  
toenzepa kyjiwantaguene, kiuntuhoem, kieinwândyly kinmoba kitoem.

<sup>2</sup> Deus, anju domodo Moisésram tâzewenry nhuduhoem aguehobyry tâinwânseim  
myakâwândy mârâ. Einwântânrybyry modo tânagazenehonze myakâwândy Deus, aitomobyry  
aralâ.

<sup>3</sup> Tutuze kurâ, saguhobyry tâzewenry tâinwânseinhe awyly. Tâinwânseim kuru olâ Jesus  
xunârybyry.

Mârâ saguhobyry tâzewenry einwântânrybyry modo âzenagazeowânmy. Iwerâ Jesus  
einwântânry modo xurâem lakuru ise ton-honre kuru awyly xypyry etay. Kywymâry  
Jesus waunroem adâkezelâ tâdâsemaguely wâgâ. Idanipyry modo kyam âkealâ kuru awyly  
nutuen-homo lâpylâ.

<sup>4</sup> Jesus eon-honrugue lelâ adyeseim anhetomoem, kurâ domodo adawihom aieni  
modo anhetomoem, Deus eon-honrugue lelâ kuomazeâni anhetomoem warâ aiemâmy.  
Tyispiriturylâ Deus eyanmo ingonokily, anhekylymo wâgâ enomedâzemo ize tato aralâ.  
Arâ myakâwâm Deus aguehomobyry âkeâ lelâlâ awyly nhutuen-honly lâpylâ.

*Jesus Cristo lelâ kâmakerim*

<sup>5</sup> Kau, onro warâ iweloem aiehoze kely mawânâ âyanmo kâinwenily, mâuntuhomoem. Anju  
domodo keba Deus mârâ ume pymâem itoem agueho, tymery Jesuslâ.

<sup>6</sup> Deus itaumbry awo wâgâ Davi, Deusram aguehobyry iwenibyem:

“Deus, âdy mâkeba xina,

(‘xina’ uguely, idânârâ kurâ domodo xirâ onro anano modo.)

Âydâ xina itoem nuduwâpyra; inudâba aini kulâma xina.

Âyam tâenseim keba gâlâ tâise xina warâ.

Arâlâ olâ, xina agâlâ mâenanânehomba mawyly,

xina-enlâ mawyly warâ.

<sup>7</sup> Âdiempa kulâ myakâwândy xina eon-honru mâunduppy, anju domodo eon-honru  
mâunduppy iatyay awyly.

Xirâ anaym mâungutyby modo xuturin-em xina itoem amygye olâ, tâdyren-honze, ton-honre  
warâ,

xina tarâ pymâ-ro waunlo ara.

<sup>8</sup> Kurâ domodo ise idânârâ tâlânro modo xuturim”

warâ iwenibyem awyly kurâ domodo wâgâ.

“Kurâ domodo ise idânârâ tâlânro modo xuturim” kedu, idânârâ lelâlâ ise kurâ domodo  
nhutulyem awyly. Kiempyra olâ kurâ idânârâ tâlânro modo xuturin-em kurâ domodo  
awyly.



<sup>9</sup> Jesuslâ idânârâ tâlânro modo xuturim. Jesus tarâ onro anaym tawly ume, anju domodo iatyay kulâ myakâwâm mâkâ. Arâ aidily myakâwâm, tyiguehoem, idânârâ einwânmi modo âsemaguehoem. Deuslâ arâ aienehoim, kurâ domodo agâ koendâ tawly tienehon-hoem, arâ tâensein-empa awlymo umelâ. Iwerâ olâ Jesus pymâ ton-honreim, tynrenseim warâ, igueypyem, kurâem itondobyry wâgâ.

<sup>10</sup> Deuslâ idânârâ tâlânro modo aieni, eni warâ. Mâkâ peba-ro watay, âdy lâpeba tâise. Iozeno lelâ Deus anhekyly. Idânârâ tynnonro modo âsemaguelly ize mâkâ, tymery agâ pymâ tynrenseinhe, tohoguezeinhe warâ itomoem. Arâ ize awly, “ymeom” tâkeho modoem. Idânârâ Deus aguehobyry anhetuo, Jesus kâmakerin-em awly, âsenagazedly, iguely warâ, tunwynram katoem.

<sup>11</sup> Inakanhe aguitobyry xygakewâm Jesus, Deus xurâem tywykeba kitoem. Awlylygue mâkâ inakanhe aguitobyry xygakerimbyry, kurâ inakanhe kydawly xygakeyby warâ, âjiunwym wâgâ lelâ kydawly, Deus lelâ Kunwym awly. Awlylygue kakadâ Jesus pymâ tynrenseim awly, tywypazeba olâ mâkâ “Ukonodo, koudo modo” keze tynnonro modoram.

<sup>12</sup> Deus itaumbry awo wâgâ iwenibyem Jesus aguehobyry: “Deus, âwâgâ agueze urâ ukonodoram, koudo modoram warâ.

Koendâ ise âynnonro modo duay âwâgâ auguely” warâ iwenibyem awly.

<sup>13</sup> Iwenibyem lâpylâ Jesus aguehobyry: “Deus, imaxilâ kâtuly; âmâlâ iegâ, uwahugâ” kely. Isaíasdâ iwenibyem lâpylâ mâkâ aguehobyry: “Tarâ urâ, Deus, ymeombyry ara kâenkyly modo agâ” kely.

<sup>14</sup> Kurâ, Jesus “ymeombyry ara kâenkyly modo” keho, tune, tunre warâ kurâ awlylygue mawânkâ karalâ iazely. Arâ tyazeduo mawânkâ kâmakeze iguely, Diabu pymâem awly, eon-honru warâ tyain-hoem. Diabu mawânkâ kyiguehoem aienehoim.

<sup>15</sup> Tâwaneim tâbyguepa âsewanihoem sanâtyby, tywymâry “Aiekâ” kehobyry ize, izepa alelâ anhedyly, myarâ kâinane kurâ, Diabugue kywymâgu ume, ize, izepa alelâ “Aiekâ” kehobyry aguiendly. Jesus kiuntuly iraynâ, kyiguely tytaze ani kurâ. Jesus olâ kâmakedâ awlylygue, kyiguely kiyntabyra kydawly iwerâ.

<sup>16</sup> Anju domodo emakezeba myakâwâm Jesus âewly, Abraão iweompyry kâmayno amaymba emakeze.

<sup>17</sup> Kâmakezelâ âewly awly kiuntuduo, âdaituo Jesus karalâ kurâem idyly awly tutuze kurâ. Arâ aidily, Deus aguehobyry ara adâitoem, koendâ kitoem warâ. Jesus ewanu, kurâ domodo xurâem Deus agâ aguely, Deus aguehobyry kurâ domodoram egatuly warâ. Deus ety oday kurâ domodo eynynâ aguewâni modo iwymâry kuru aito ara aidily. Âwâlâ Jesus âtuly kynynâ tyiguehoem; arâ awlylygue mawânkâ Deus idânârâ ekanibyry modo inakanhe aito nhygakely.

<sup>18</sup> Iwerâ Deus kieinwâmpyra kyenehonze kely Diabu-ro watay, Jesuslâ kon-hondâni, Diabu aguely kinwantaguebyra kitoem. Âdynanâowâm lâpylâ mawânkâ Jesus, Diaburam, âsenagazemâ warâ, Deus neinwâmpyra itoem aiese Diabu keday; Diabu aguehobyry aniempyra olâ myakâwâm.

### 3

#### *Jesus tynrenseim kuru, Moisés takaze*

<sup>1</sup> Cristo eynynâ ypemugudo, Deus ingâsedybylâ âmaemo, aunloenlâ eagâ mitomoem. Kynynâ aguenriem Deus Ingonotyby Jesus awly xutuwâdaungâ, târâ Jerusalémdâ Deus ety oday kurâ domodo eynynâ aguewâni modo iwymâry kuru Deus agâ agueim ara. Awlylygue, Jesus wâgâ mâpaunzebyra tâiseba itaungâ.

<sup>2</sup> Deus aguehobyry idânârâ anhetuo, tynnonro modo eynynâ aguenriem itoem, aguehonwânmy Jesus, Deusram. Saguhoem Moisésram tynnonro modo eniem aguehobyry ara.

<sup>3</sup> Mâkâ âtâ itâni tuomaenzeim kuru, intâdyby takaze kehoem. Arâ lâpylâ Jesus xyrendly, Moisés takaze kehoem.

<sup>4</sup> Ânguylâ âtâ tytâze lelâ; Deus olâ idânârâ tâlânro modo xugunipyry.

<sup>5</sup> Tâzetary, tywymâry ety odano emyenro myakâwândy Moisés. Deus “Aiekâ” kehobyry adyese lelâ myakâwândy. Kurâ domodo Deus xurâ koendâ lelâ myakâwândy nhedyly, nhurudyly warâ. Wayam waunroem Deus agueho wâgâ aguewâm lâpylâmy.

<sup>6</sup> Cristo Jesus olâ âtâ sodo imery kuru emyenro, Deus imery lelâlâ awlylygue. Cristolâ âtâ oday xutuim kuru, Deus aguehobyry ara kehoem anhedyly. Kurâ Jesus einwânmi modo, Kunwym Deus ety kurâ, ton-honre Jesus kieinwântuo, “Xuduze urâ” Deus kehobyry kinwânwânsezeduo warâ.

*Tâeganepa itaungâ, Deus “Aiekâ” kehobyry aiese*

<sup>7</sup> Deus Ispiritury aguehobyry enanâguewâdaungâ, Deus itaumbry awo wâgâ iwenibyem mawânâ.

“Iwerâ âyanmo Deus agueho mâindatuomo,

<sup>8</sup> âdamudomo ara tâeganepa itaungâ.

Aguelymo myakâwâm:

‘Deus wâgâ kydâtynanâdaymba kine’ kewânmony.

Mârâ ume, myarâ myarâ warâ âdy peba ato einkâ tadakobâdaymo, aguelymo:

‘Kyzene olegue Deus inakanhe aguidyly nhemaenly, kânagazenehombalâ’ kelymo.

<sup>9</sup> Deus aguely:

‘Quarenta anu akâwâm akaemo eseze wawyly,

toenzepa kâinane xurâmoem koendonro modo agânhedily.

Arâlâ olâ akâwâm udueryem idilymo.

“Kyzene olegue Deus inakanhe aguidyly nhemaenly, kânagazenehombalâ” kelymo.

<sup>10</sup> Aituo eagâmo yewiâpadyly,

eyanmo auguehobyry adiendyseba awylymogue.

Tâeganemo akâwâm.

Auguehobyry tutuzelâ akâwâm,

izepa wato anhedylymo.

Mâkâ tani neinwâmpyra tawylymogue,

ânwa oze xuzani emyenro akaemo.

<sup>11</sup> Awylygue eagâmo yewiâpadyly; ton-honre kehoem auguely:

“Ynynonro modoram kâunduly” ugueho onroam

âdaunloenlâ naintaymbamo, negawântaymbamo warâ ise;

auguehobyry ara âdaunloenlâ târâ nekobyzeguebamo ise warâ”

kewândymy Deus kydamudo wâgâ, warâ iwenibyem awyly Deus itaumbry awo wâgâ.

<sup>12</sup> Cristo eynynâ ypemugudo, tonomeguelâ itaungâ. Tâeganepa itaungâ, Deus agueho mankybara mitoem, Deusdâ iwague mipyra mitomoem warâ.

<sup>13</sup> Deus itaumbry awo wâgâ iwenibyem: “Iwerâ âyanmo Deus agueho mâindatuomo, tâeganepa itaungâ” kely. Saguhoem “iwerâ” kehobyry umelâ lâpylâ kurâ iwerâ. Awylygue agonromo eon-hondâdaungâ, Satanâsram nâzenokuoba itomoem, Deus izepa ato aniempyra itomoem, tâeganepa itomoem, Deus einwândily nimoba itomoem warâ.

<sup>14</sup> Jesus kieinwândily adaguhobyry aralâ, kyigueho odaji kehoem kieinwânsezedyly watay, idânârâ iwymâryem awyly ume mâkâ agâlâ ise kurâ.

<sup>15</sup> Xirâ mawânâ Deus itaumbry awo wâgâ agueho:

“Iwerâ âyanmo Deus agueho mâindatuomo,

âdamudomo ara tâeganepa itaungâ.

‘Deus wâgâ kydâtynanâdaymba kine’ kewânmony.”

<sup>16</sup> Ânguyka myakâwândy Deus neinwâmpyra ini, aguely tindadyly umelâ? Akaemo kydamudo Egitodâba Moisés nhatyby modo.

<sup>17</sup> Ânguy agâka myakâwândy Deus quarenta anu lelâ iewiâky? Izeпа ato aienibyry modo agâ myakâwândy iewiâky. Awylygue myakâwândy mârâ âji âdy peba atodâ iguelymo.

<sup>18</sup> Ânguy wâgâka myakâwândy Deus ton-honre kehoem aguely: “ ‘Ynynonro modoram kâunduly’ ugueho onroam âdaunloenlâ naintaymbamo, negawântaymbamo warâ ise; auguehobyry ara âdaunloenlâ târâ nekobyzeguebamo ise warâ” kely? “Deus wâgâ kydâtynanâdaymba kine” keppyo modo wâgâ myakâwândy mâkâ aguely.

<sup>19</sup> Aituo tutuzelâ kurâ, “Ynynonro modoram xuduze urâ” Deus kehobyryam akaemo naimpyra atobyry, mâkâ tyeinwândyseba atomobyry wâgâ.

#### 4

<sup>1</sup> Deus kyam adâkezelâ myakâwâm eyam kytâhoem, târâlâ kokobyzeguehoem warâ. Aituo aguely idânârâ âyanmo. Tâmaynelâ itaungâ, Deus “Ikobyzegueho xuduze urâ” kehobyry mâenmakehomba mitomoem, kydamudo ewy tonroru kehobyry odaji negawâmpyra atobyry ara.

<sup>2</sup> Akaemo Deus aguehobyry indatobyry ara lâpylâ unâ koendonro tâdâsemagueho kindadyly. Akaemoem olâ Deus aguehobyry indatybymo âdyem nipyra, tindatyby modo neinwâmpyra awylymogue. Deus aguehobyry idadyly kulâ, agueho tâinwânseba warâ watay, âdyem nitaymba kurâem.

<sup>3</sup> Kurâ mâkâ einwânni modo olâ, Deus ezaxi idâze kurâ, einwânnipryem kydawlylygue, ekobyzegueze kurâ warâ, Deus aguehobyry ara. Mâkâlâ myakâwândy warâ agueim:

“Awylygue eagâmo yewiâpadyly; ton-honre kehoem auguely:

‘Ynynonro modoram kâunduly’ ugueho onroam

âdaunloenlâ naintaymbamo, negawântaymbamo warâ ise; auguehobyry ara âdaunloenlâ târâ nekobyzeguebamo ise warâ” keim.

Mârâ âji kokobyzegueho nhontybyem awyly myakâwândy, onro, iwogonro modo warâ nhugudyly iraynâlâ. Onro, kau, iwogonro modo warâ xugunipyryem, tâwanu nhewanike-lylâ myakâwândy.

<sup>4</sup> Warâ mawânâ iwenibyem awyly Deus itaumbryry awo wâgâ tâzekobyzegueho wâgâ. “Sete emedyly itobyry wâgâ myakâwândy Deus ekobyzeguely, idânârâ tâlânro modo xugunipyryem” warâ iwenibyem awyly.

<sup>5</sup> Unâ tâzekobyzegueho wâgâ agueim Salmosdâ iwenibyem lâpylâ, Deus aguehobyry: “ ‘Ynynonro modoram kâunduly’ ugueho onroam âdaunloenlâ naintaymbamo, negawântaymbamo warâ ise; auguehobyry ara âdaunloenlâ târâ nekobyzeguebamo ise warâ” warâ myakâwândy Deus aguely kydamudo tâinwântânry modo wâgâ.

<sup>6</sup> Akaemo myakâwândy waunroem kuru tâzekobyzeguely wâgâ Deus aguehobyry idani. Âji tâzekobyzeguehoam naimpyramo, negawâmpyramo warâ olâ myakâwândy, Deus neinwâmpyra awylymogue. Tâlâ olâ Deusram saini modo, târâ tokobyzeguehoemo.

<sup>7</sup> Eagonro umoenem iduakerimbyryem Deus, “Iwerâ” kelygue nhezêtâdyby, tâdâsemaguely wâgâ agueim, mâkânra tadaintoem. Iweâpa kydamudo Deus neinwâmpyra atobyry sakadybyem awyly ume, Davi aguehoem aguewânmy Deus: “Iwerâ âyanmo Deus agueho mâindadylymo-ro watay, tâeganepa itaungâ” kely.

<sup>8</sup> Tutuzelâ kurâ, eagonro âji tâzekobyzegueho wâgâ Deus aguely awyly, Canaã anary tynynonro modoram nhegameyby wâgâ lelâba awyly. Âji tâzekobyzegueho kuru keba olâ myakâwândy Canaã, Josué, eagonro modo warâ egawântomobyry. Âji tâzekobyzegueho kuru watay, “Ynynonro modo ekobyzeguehobe ise” kewâpyra tâise Deus, kurâ domodo Canaãram egawâmpygueduo iweâpa itybyem.

<sup>9</sup> Awylygue tâlâ Deus induakewâdyby modo ekobyzegueho, idânârâ tâlânro modo xugunipyryem sete emedyly itobyry wâgâ Deus ekobyzeguehobyry ara.

<sup>10</sup> Aituo, kokobyzeguehoem Deus aguehobyry odaji kâgawântuo, xirâ onro anaym idânârâ kâwanu “Aietaungâ” kehobyry ewanikeimbyryem ise kurâ, idânârâ tâwanu aiedyly ewanikeimbyryem Deus ekobyzeguehobyry ara.

<sup>11</sup> Awylygue toenzepa kydâzeon-hondâne Deus kieinwânsezedoem, eydâ atodâ âji tâzekobyzeguehoram kâgawântoem. Ânguy mâkâ neinwâmpyra kulâ eydâ atoram negawântaymba, kydamudo âdy einwântânry modo, Canaãdâ tâzekobyzeguehoram naimpyra, negawâmpyra warâ atobyry ara.

<sup>12</sup> Ton-honreim lelâlâ Deus itaumbryry adainrim keba warâ, espada tâynâ, tâynâ alelâ iewipy emyenro. Katâduo kuodano modo kehoem tâense kurâ, myara mawânâ Deus itaumbryry kintainduo, âdaunlo kydawyly nhutuen-honly. Ize kydato wâgâ kyangahu oday kunâgo ânguyram kiengatudânry tutuen-honze. Kunâry koendonro, inakai warâ awyly kyam tutuen-honze.

<sup>13</sup> Deus xurâem olâ âdy soentyby peba. Idânârâ tâense mâkâ. Aguidyly eni, aguykely idani, kyangahu oday kunâgo, ize kydato warâ xuturim mâkâ. Mâkânra ise idânârâ aguiantaymba modo wâgâ, aguykewâdobyry modo wâgâ warâ kydâkaduly.

### *Jesus kurâem agueim Deus enado*

<sup>14</sup> Jesus, Deus imery, kurâem agueim Deus enado, Deus ety oday kurâ domodo eynynâ aguewâni modo iwymâry kuru kurâ domodo eynynâ Deus agâ agueho ara. Cristo xurâem kydawyly aguykeduo, ton-honre lelâ Jesus kieinwândyly kinmoba kine.

<sup>15</sup> Jesus Deus enado tatay, kytendâ mâkâ, ton-honremba kydawyly ume, kytynru ume, tugûiguepa kydawyly ume, kyanu ume, kydadahulily ume, kydâsenagazedily ume warâ. Karalâ mawânkâ Jesus kurâem awyly. Kydâsenagazedo aralâ âsenagazemâ. Jesus, Deus neinwâmpyra itoem aienehonze kewânmy Satanâs, Jesus kieinwâmpyra kitoem aienehonze keho ara. Jesus olâ âdaunloenlâ Deus izepa ato aniempyra.

<sup>16</sup> Awylygue Deus enadoram kainne, eagâ aguykehoem, Kytendâ Deus, kagâ koendâ lelâ warâ; ohondybyem lelâ mâkâ, kydâzekainly idase, kienkadyze kurâ-ro watay.

## 5

<sup>1</sup> Kâzewenry Moisés inweniby ara, Deus ety oday kurâ domodo eynynâ aguewâni modo iwymâry kuru Deuslâ iduakeim, eataen-ho modo duay, tâmawydâdoem typemugudo eynynâ. Mâkâ mawânkâ kurâdo nhatyby Deusram egameim, inakanhe aitomobyry xygakehoem âguyyro modo xyârim warâ.

<sup>2</sup> Kurâdo Deus itaumbryry koendâ nutuba awylymogue aguehobyry nhakaduomo, tytyenzemo mykâinane mâkâ, emyenromolâ tawylygue, iozepaom adyese lâpylâ tawylygue.

<sup>3</sup> Deus izepa ato adyese lâpylâ tawlylygue, âguynro modo tyâze, Deusram tâgameze warâ, inakanhe adâitobryrhy nhygakehoem lâpylâ, kurâ domodo inakanhe aitobryrhy lelâba nhygakely itoem.

<sup>4</sup> Ânguy âwâlâ kulâ nâxiduagewâbyra, âwanu Deus ety oday kurâ domodo eynynâ aguewâni modo iwymâryem kuru tâitoem. Deus induakeybyem lelâ, âjigâseoly, saguhoem Arão, Moisés iwaigoru, igâsedobryrhy ara, waunroem kuru Deus ety oday kurâ domodo eynynâ aguewâni modo iwymâry kuruem itoem.

<sup>5</sup> Alâpylâ, Cristo tâwâlâ nâxiduagewâbyra, Deus eynynonro modo eynynâ aguenriem tâitoem. Deuslâ mâkâ iduakeim, tynynonro modo xurâem aguenriem. Deus aguewânmy eyam:

“Ymery âmâ, unwâm urâ warâ;

kurâdoram ymery mawlyly kênehonly warâ”

kewândymy. Warâ iwenibyem awlyly Deus itaumbryrhy awo wâgâ.

<sup>6</sup> Tâlâ lâpylâ Deus wakehobryrhy tymeryam:

“Aunloenlâ ise ynynonro modo eynynâ yagâ aguenriem mawlyly.

Saguhoem ynynonro modo eynynâ Melquisedeque\* aguehobryrhy ara ise yagâ amyguely”  
kewândymy Deus tymeryam.

<sup>7</sup> Tarâ onro anaym Jesus awlyly ume, kydâsenagazedo aralâ myakâwâm âsenagazedyly. Taenle, tânugure warâ myakâwâm Deusram nhekadyly, tâsenagazedyly nhain-hoem, tyiguely amaym tâmakehoem warâ. Mâkâ aguely idamâ Deus-ro warâ, eon-hondâmâ, mârâ nhemaen-hoem, kruz wâgâ iguehoem. Deus ize atolâ mawânkâ myakâwâm anhekyly, ize tato kulâ keba.

<sup>8</sup> Toenzepa kruz wâgâ tâsenagazeduo myakâwâm Jesus idânârâ Deus aguehobryrhy tâinwânseim lelâlâ awlyly nhutuly kuru, Deus imery tawlyly umelâ.

<sup>9</sup> Idânârâ Deus ize ato aienibyryem myakâwâm, kâmakerin-em idyly. Jesus mawânkâ aunloenlâ Deus agâ kitoem aienehoim, idânârâ kurâ einwânni modo, Deus agâpa kyenehonwâbyra.

<sup>10</sup> Deuslâ myakâwâm agueim: “Aunloenlâ ise ynynonro modo eynynâ yagâ aguenriem mawlyly. Ynynonro modo eynynâ Melquisedeque aguehobryrhy ara ise yagâ amyguely”  
kewânmy Deus.

#### *Jesus einwândyly kinmoba kine*

<sup>11</sup> Toenzepalâ auguedyse wato modo, Cristo, Melquisedeque ara tâwaneim awlyly wâgâ, xirâ unâ wâgâ idânârâ kêngatuhoem nudupa olâ, ton-honre mawânâ mâuntuhomoem.

<sup>12</sup> Iweâpalâ Kywymâry Jesus einwânseze mawlylymo. Iwâgâ koendâ xutuimbyryem mawlylymo tâise, eagonro modo mâenomedâdomoem. Aypa olâ, âmaemo lakuru tonomedâzeim; iamudo tyze inwanry wâgâ lelâ adakurim ara kulâ âmaemo, Deus itaumbryrhy koendâ mâuntuba lelâ mawlylymogue.

<sup>13</sup> Âdy Deus ize ato awlyly koendâ mâuntuwâbyra âmaemo. Iamudo tyze inwanry enynri ara kulâ, âdy iozeno, âdy iozepam warâ mâuntuba mawlylymo.

<sup>14</sup> Xutuwâdyby modo MON alelâ ipynigu, arâ lâpylâ koendâ Deus itaumbryrhy xutuwâni modo tâwâlâ ton-honreingue kehoem âzenomedâoly; tutuze mawânkâ Deus aguiendyse, aguiendyseba warâ ato.

## 6

<sup>1</sup> Cristo kieinwândyly adaguly ume kiuntuyby kulelâba kydutunre, Deus itaumbryrhy wâgâ kiuntuhoem ton-honreim modo wâgâ kydâsenomedâzezedoem, iamudo toku wogonro araba kitoem. Mâkâ âtâ itâni, enu nhepadâdyly, nhepaguely, nhepadâdondyly, nhepagueondyly arâ adâidylygue itâdyly newanikeba mâkâ ara inkâba kine. Xirâ modo mawânâ Jesus einwânni iwelo nhutudyze tadato:

Tâdâsemaguehoem Jesus einwândyly.

Deus izepa ato aiedyly imoly.

<sup>2</sup> Jesus tâinwânse tadawlyly enehon-hoem batiza tâjidyly.

Âwanu koendonro aieniem iduakeyby nhangahu onwa tâzetary iedyly xutuly.

Xypyry etay iguewâtyby modo kurâem ietozze Deus awlyly xutuly.

Deus xurâ modo aunloenlâ eagâ awlyly einwândyly,

mâkâ xurâ keba modo aunloenlâ âji tâdâsenagazedodâ awlyly warâ.

<sup>3</sup> Awârâ modo xuturimbyryenlâ kâpagudyly kipyra kine. Waunroem kytâzezene. Deus itaumbryrhy wogonro âdydo imeom xutuhoem ton-honreim kydutunre lâpylâ. Arâ ise

\* 5:6 Gênesis 14.17-24 warâdâ aguely etaungâ, Melquisedeque ânguy awlyly mâuntuhomoem.

kiuntuzezedily, Deus kyam nhutuen-honly-ro watay; mâkâ lelâ mawânkâ konomery xuduim.

<sup>4</sup> Tâlâ Jesus tyeinwândily imowânybyro modo. Nuduwâpyra akaemo nheinwântondoem. Saguhoem koendâ tutuzemolâ myakâwâm Deus itaumbry; Deus tywâgâ eyanmo nhutuen-honly. Koendonro modo Deus tyam nhuduypy tâmakezemolâ. Deus Ispiritury eagâmolâ warâ myakâwâm.

<sup>5</sup> Deus itaumbry idamâmo. Deus itaumbry koendonro awyly aguewânmo. Deus emary modo adyenyry anhedily emâmo, âdy waunroem aitaynrim modo awyly emâmo, xutuwanmo warâ.

<sup>6</sup> Arâlâ olâ, Cristo tyeinwândily inmolyro. Jesus einwânny modo, Jesus einwândily inmolyro watay, Deus imery kruz onwa nhakâjiondylyro waunlo ara, kurâdo enanaym âwankuem nhetondylyro waunlo ara warâ. Aunlopyryem, nuduwâpyra Deus eynynonro modo ewyem itondomoem.

<sup>7</sup> Etaungâ âpa ezary. Koendâ kopâ ihuguely-ro watay, onro koendonro tukuize, nady modo ago tâitaynze, sodo xurâem koendonro tuduze-ro warâ. Arâ lâpylâ ise Deus aguehobyry einwânny modo koendonro modo anhedilyro, akaemo agâ koendâ ise mâkâ-ro warâ.

<sup>8</sup> Mârâ âpa ezay sahabû, tygyreim warâ iazely watay olâ sodo xurâem tywyneim keba awylygue tâjadiuân-honze lelâ. Arâ lâpylâ ise Deus, Jesus einwândily inmoimbyro modo peto nhâtâny onwanji nhamele, tydâpa itomoem aienehonze.

<sup>9</sup> Jesus einwândily imowâny modo wâgâ arâ augueaki lelâlâ, tutuze olâ urâ, ton-honre lelâ mawlymo, yataen-hodo kâinwynegyly. Jesus einwândily mâinmoba mawlymogue, Deus nhemakeyby mawlymo tânehonze âmaemo.

<sup>10</sup> Agonromo Jesus einwânny modo toenzepa mâenmawydâdylyro, emawydâdezêlâ âmaemo-ro warâ. Arâ amituomo, Deus tywyneze lelâlâ mawlymo tânehonze âmaemo. Iozeno lelâ Deus anhekyly. Koendonro amânhekylyro nenanânehonwâbyra mâkâ, xurâ mawlymogue. Awylygue ise mâkâ agâmo koendâ lelâ awyly.

<sup>11</sup> Ize wato kuru olâ âwâlâ, âwâlâ warâ âmaemo ewy xypyryam kehoem Deus einwânseze mawlymo, Deus emaymba koendonro mâenmakelyro mâinwânwândilyro ara.

<sup>12</sup> Deus ewanuem amitaymo, tynepa mawlymo ize wato. Jesus einwândily âdykâ imodânny modo ara âizemo wawyly. Aituo ise Deus “Xuduze urâ” kehobyry mâenmakelyro.

*“Aiese urâ” tâkehobyry, adyese lelâlâ Deus*

<sup>13-14</sup> Enanâguewâdaungâ kydamudo Abraõoram Deus aguehobyry: “Iwâkuru modo lelâ ise âmâem agânhekyly. Toenzepa âweonzeânehonze urâ. Deuslâ urâ agueim, ‘Aiese urâ’ keim. Auguehobyry agânhepyra witaymba urâ” kewândymy Deus Abraõoram, agaityon-em, tymegueba warâ awyly ume. Tâzedy wâgâlâ myakâwândy aguely, ânguy takazeno peba awylygue.

<sup>15</sup> Abraõo tynwânwânse myakâwândy Deus tyam aguehobyry tâlâ tâidyly. Deus aguehobyry ara adâidyly einwândily warâ nimoba myakâwândy. Iweâpa itybyem lelâlâ myakâwândy, imezely, toenzepa iweonzely warâ.

<sup>16</sup> Takadâ kehoem ton-honreim ezedy kurâdo agueho, adâkeho âkealâ awyly einwântoem. Arâ agueduomo, idânârâ nhutulymo, aguehobyry adahowanze lelâlâ awyly, âdy nugukebalâ.

<sup>17</sup> “Koendonro emakeze âmaemo” tâkehobyry modo adâkehobyry adyese lelâlâ awyly, tunâry nugukeba awyly warâ nhutudyzemo myakâwândy Deus. Awylygue myakâwândy Deus Abraõoram aguely. “Urâ Deus agueim; auguehobyry aiese urâ. Iwâkuru modo ise âmâem agânhekyly” kely.

<sup>18</sup> Deus “Auguehobyry aiese urâ” keduo, “Deuslâ urâ agueim; auguehobyry agânhepyra witaymba ise urâ” keduo warâ, tutuze kurâ, âdaunloenlâ tunâry nugukeba awyly. Tâinwânse lelâlâ kurâ. Awylygue kurâ mâkâ einwânny modo ton-honre kydawly iwâgâ kydâsemaguely kiuntulygue, “Imakezemo urâ” kehobyry wâgâ. Awylygue ton-honre lelâ kinwânwândily, “Xuduze urâ” kehobyry emakeze lelâlâ kydawlygue.

<sup>19</sup> Âkeá lelâlâ kieinwândily Deus kyam nhuduly modo kienmakely, âsemaguenriem kydawly koendâ kiuntuly warâ, ton-honre kehoem pepi ekâjihobyry wâne âdyam nalehoba myara. Kydâsemaguely kieinwândilygue, iwerâ tâwâlâ ise Deus eydâ atoam kâgawândily, saguhoem kurâ domodo eynynâ aguewâny modo iwymâry kuru Deus Âepanâgueho iwyantary xuahuho nhakadobyry ara, eyam taintoem.

<sup>20</sup> Waunroenlâ Jesus idâwâm Deusram, idâze lâpylâ kurâ. Mâkâlâ Deus enado kynynâ agueim, kynynâ adâkely nimoba ise mâkâ-ro warâ. Deus ety oday kurâ domodo eynynâ aguewâny modo iwymâry kuru, kurâ domodo eynynâ Deus agâ aguehobyry ara.

Melquisedeque Deus agâ aguely myakâwândy Deus eynnonro modo eynynâ, myara lâpylâ Jesus kynynâ aguely.

## 7

*Melquisedeque pymâ, kurâ domodo eynynâ Deus enado ageim warâ*

<sup>1</sup> Xidadâ Salêm donro modo iwymâry myakâwândy Melquisedeque. (“Jerusalém” kely ezedy eagonrolâ mawânâ “Salêm” kely.) Deus toenzepa ton-honrein-am kurâ domodo eynynâ ageim lâpylâ myakâwândy mâkâ. Abraão tydykauru Lô tiennakehoem azagâ azagâ warâ pymâdo egakunibyryem odopâdily ume myakâwândy Melquisedeque, Abraão agâ oxioze idâly. Eagâ oxioydybyem myakâwândy, Melquisedeque, Abraão koendâ nhetoem nhekadyly Deusram.

<sup>2</sup> Aituo myakâwândy Abraão tuduery isejiguy modo tiennakeyby mârâ ewy, mârâ ewy warâ, dez ieto nhetyly, Melquisedequeram tiunduhoem, tynrense tawly tienehon-hoem.

“Pymâ koendonro lelâ aieni” keze awârâ “Melquisedeque” kely. Salêm donro modo iwymâry awylygue myakâwândy “koendâ tadato iwymâry” kehonly lâpylâ. (“Koendâ tadato” keze awârâ “Salêm” kely.)

<sup>3</sup> Ânguy Melquisedeque nhunwym, ise, idamudo warâ awyly nutuwâbyra. Âdykâ iazely, âdara iguely warâ awyly ânguy nutuba. Âdara ewanu adaguly, âdypygueândyly warâ awyly nâdutuoba lâpylâ warâ. Arâ awylygue, Jesuslâ waunlo ara mâkâ, Jesus wâneam kynynâ ageim typygueba kehoem myara.

<sup>4</sup> Etaungâ Melquisedeque toenzepa tynrenseinhe awyly. Tynrenseim lâpylâ myakâwândy Abraão, iwerâ xayam tâdyren-honzelâ mâkâ-ro warâ; Abraão wâgâlâ mawânâ “judeu imeombyry” kykehonly. Takadâ kehoem ton-honreim Melquisedeque awyly, xutuwâm olâmy Abraão. Awylygue myakâwândy tuduery modo tiengakudyby isejiguy tiennakeyby ewy dez ieto nhetyly tiunduhoem, Melquisedeque tynrense tawly tienehon-hoem. Pymâ kuruam mawânâ dízimo xuduly.

<sup>5</sup> Moisés kâzewenryem inweniby ara: “Ynnonro modo, âsejiguy mo dez ieto ewy ietyram antaungâ urâem. Levi iweompyry, awârâ âwanu aieniem kâinduakeyby modo, emakerin-ro warâ. Dez lelâ tâlâ âmaemo-ro watay, tokalâ etywâdaungâ, xuduwâtaungâ. Dez moedabe âmaemo-ro watay, tokalâ urâem mâunduly mo. Cem moedabe âmaemo-ro watay, dez urâem mâunduly mo. Arâ mawânâ tâlâ matomo ewy yam mâunduly mo” kewândymy Deus. Arâ mawânâ Abraão iweompyrylâ, Deus ety oday tâwanunem modo âjipemugienlâ âdydo imeom xuduypy emakewâni modo, eyanmo xuduwâni modo alelâ awyly.

<sup>6</sup> Kâzewenry ara, Deusram xuduypy modo emakerin-em iduakeyby keba myakâwândy Melquisedeque, Levi iweompyry keba awylygue. Levi iweompyry modo takazeno kehoem mâkâ awyly, tutuze olâ kurâ, Abraão tyam nhuduypy nhemakehobyry wâgâ. Deus kydamu Abraão koendâ nhetoem ekamâ lâpylâmy Melquisedeque, Abraão tiennakeyby ewy tyam nhudupygueduo. Abraôram saguhoem Deus: “Koendâ ise nhedyly; toenzepa âweonzehoem aiese urâ” kehobyrylâ mâkâ.

<sup>7</sup> Melquisedeque Abraão xurâem Deusram nhekaduo olâ, tutuze kurâ, Abraão takazeno mâkâ awyly. Mâkâ Deusram ekanibyry mawânâ tynrenseim kuru, xurâem ekadyby keba.

<sup>8</sup> Akaemo Levi iweompyry modo, kurâdo Deus xurâem tysejiguy ewy nhuduypy emakewâni modo, igueim kulâ akaemo. Melquisedeque wâgâ olâ arâpa, Abraão tysejiguy ewy eyam nhududuo, iguedânryam nhuduly-ro waunlo ara, iguehobyry wâgâ iweniby peba mawânâ Deus itaumbryry awo wâgâ.

<sup>9</sup> Tâlâ tato dez ieto ewy tokalâ Melquisedequeram Abraão nhududuo, iwey Levi tuduze lâpylâ myakâwândy. (Levi iweompyry modo mawânâ Deus etyram satyby modo emakeim.)

<sup>10</sup> Melquisedeque agâ Abraão oxioday, ipa myakâwândy Levi, tydamu Abraão oday lakuru. Awylygue Levi lâpylâmy tysejiguy ewy Melquisedequeram xuduwâm, kykely.

<sup>11</sup> Levita domodo ewy kurâ domodo eynynâ ageim anhekely wâgâlâ Deusram kurâdo âzemaekoely watay, âdaituo pylâka Melquisedeque emyenro âewyly emakerimoem, Arâo ewy keba âeni awyly.

<sup>12</sup> Iwerâ Arâo iweompyry keba awârâ âwanu aieniem Deus induakeyby. Awylygue awârâ Moisés tâzewenry inweniby âdugukeoely lâpylâ, iwerâ Jesuslâ kynynâ Deus agâ ageim itoem.

<sup>13</sup> Deus itaumbryry awo wâgâ tâjitaingoze, kâmakerin-em ingonokily wâgâ, Kywymâry Jesus wâgâ. Judâ iwey mâkâ, Levi iwey keba. Kâzewenry Moisés inweniby ara, Judâ iweompyry ewy kydamudo eynynâ Deus enado aguewâpyramo myakâwândy. Judâ domodo ewy âdaunloenlâ ânguydo imeom kurâ domodo nhatyby nemakewâbyramo, nyâmpamo, niaduâmpyramo warâ mârâ mesa tuhugueto Deus ety odano wâgâ.

<sup>14</sup> Tutuze kurâ, Kywymâry Jesus, Judá iwery awyly. Moisés olâ myakâwândy âdaunloenlá Judá iweom wâgâ aguepa Deus ety oday kurâ domodo eynynâ aguewâni modo wâgâ, tinweniday.

*Jesus kynynâ agueim Deus enado*

<sup>15</sup> Iwerâma tâzehoze saguho tâzezewenry xugukerimbyryem Deus awyly, tâlâ mawânkâ kynynâ Deusram agueim Melquisedeque emyenro, Levi, Arão warâ iweompyry emyenro keba.

<sup>16</sup> Jesus Deus enado kynynâ aguenriem âieholy, kurâ domodo ezewenry wâgâ inkâba. Deus enado kynynâ aguenriem awyly, igueypyem, kurâem itondybyem awylygue, nigueompyra ise-ro warâ.

<sup>17</sup> Iwenbyem Deus itaumbry awo wâgâ:  
 “Aunloenlá ise ynynonro modo eynynâ yagâ aguenriem mawly.  
 Ynynonro modo eynynâ Melquisedeque aguehobyry ara ise yagâ amyguely”  
 kewândymy Deus tymeryam.

<sup>18</sup> Warâ myakâwândy Levi iweompyry modo lelâ Deus agâ agueim keim tâzezewenry adainly, âdyempa idyly.

<sup>19</sup> Deus xurâem tywykeba nitaymba myakâwândy mârâ tâzezewenry saguho einwânni modo. Iwerâ kinwânwânkyluma koendonro lelâlâ, saguhobyry takaze kehoem, Deus eydâ atoom kaintoem tuduze mawânâ.

<sup>20-21</sup> Tâty oday kurâ domodo eynynâ aguewâni modoram, Jesusram adâkehobyry ara, aguepa myakâwândy Deus. Jesusram lelâ myakâwândy Deus aguely, tânado kynynâ aguenriem ituo:

“Aunloenlá ise ynynonro modo eynynâ yagâ aguenriem mawly.

Pymâ Deus urâ agueim.

‘Aiese urâ’ uguehobyry aieni lelâlâ urâ.

Unâry kâungukewâbyra ise urâ”

kely myakâwândy, warâ iwenibyem awyly.

<sup>22</sup> Deus enado kynynâ aguenriem ituo, iwelo tâdâseinwândo tâkehobyry aieniem lelâlâ Deus awyly xutuho mâkâ Jesus. Xirâ iwelo Deus âseinwândobyry tynynonro modo agâ koendonro kuru, saguhobyry takaze.

<sup>23</sup> Saguhobyry tâdâseinwândo ume agui Deus ety oday kurâ domodo eynynâ aguewâni modo iwymârydo kuru. Igueim kulâ awylymogue, mawânâ arâ awyly. Awylygue tokalâ igueduo, eagonro egânâpyaji âxiedyly, warâ itoem.

<sup>24</sup> Jesus olâ tâtaybyanoneim keba. Igueypyem, kurâem itonmâ, nigueompyra ise-ro warâ. Awylygue aunloenlá Deus enado kynynâ aguenrienlá awyly.

<sup>25</sup> Awylygue mâkâ kâmakeim iwerâ, aunloenlá Deusram kytâhoem, kâmakeze iguehobyry wâgâ. Tâlâ mawânkâ Jesus iwerâ, aunloenlá ise tâlâ awyly; Deus ezay mâkâ, tâinwântaynrim modo eynynâ Deus agâ adâkehoem.

<sup>26</sup> Jesus mawânkâ kynynâ agueim Deus enado. Deus agâ koendâ lelâ kitoem adyese mâkâ. Eagonro ize inkâba kurâ. Mâkâ lelâ koendonro Deus xurâem, ewentâdo lâpeba mâkâ. Deus izepa ato kulâ anientaymba mâkâ warâ. Xirâ onro anaym atay, Deus izepa ato aieni modo duay lelâlâ wâne myakâwâm. Deus olâmy akaemo duaypa iemâ, kayam samâmy-ro warâ, tyanlá.

<sup>27</sup> Deus ety oday kurâ domodo eynynâ aguewâni modo kopaelâgâembaba mykâinane ânguydo imeom nhâlymo Deusram tiengamehoem, inakanhe taitomobyry, kurâ domodo inakanhe aitobyry alelâ xygakehoem. Jesus olâ âdaunloenlá Deus izepa ato kulâ aieni keba. Iweâpalâ myakâwândy Deus, Moisésram tâzezewenry tiengatubygueduo, tymeryam aguely: “Aunloenlá ise ynynonro modo eynynâ yagâ aguenriem mawly. Pymâ Deus urâ agueim. ‘Aiese urâ’ uguehobyry aieni lelâlâ urâ. Unâry kâungukewâbyra ise urâ-ro warâ” kely. Arâ adâkehobyry nugukewâbyra Deus. Deus imery idânârâ Deus aiedyese ato aiemâ, aiesezelâ-ro warâ.

<sup>28</sup> Tâzezewenry Moisésram iweniehoymby ara, uguondo modo tâjuiduakeowâze mykâinane Deus ety oday kurâ domodo eynynâ aguewâni modo iwymâry kuruem, akaemo uguondo modo âdaunloenlá koendâ aini keba awyly umelâ. Jesus olâ âdaunloenlá Deus izepa ato kulâ aieni keba. Iweâpalâ myakâwândy Deus, Moisésram tâzezewenry tiengatubygueduo, tymeryam aguely: “Aunloenlá ise ynynonro modo eynynâ yagâ aguenriem mawly. Pymâ Deus urâ agueim. ‘Aiese urâ’ uguehobyry aieni lelâlâ urâ. Unâry kâungukewâbyra ise urâ-ro warâ” kely. Arâ adâkehobyry nugukewâbyra Deus. Deus imery idânârâ Deus aiedyese ato aiemâ, aiesezelâ-ro warâ.

## 8

*Iwelo tâdâseinwândo ume Deus enado kynynâ agueim Jesus*

<sup>1</sup> Kywâgâ agueim Jesus awyly mâuntudyzemo wato, Deus enado kynynâ adâkeze mâkâ. Târâ kaynâ mâkâ ekadybyem awyly, tynreim ejidydâ, Deus ton-honreim eahoru eynynâ.

<sup>2</sup> Saguhoem kurâdo eynynâ Deus agâ aguewâni modo iwymâry kuru tâwanu anhedly mykâinane âtâ tâjitybygue itâdyby sahomery oday Deus Âepanâguehodâ. Iwerâ olâ Jesus Deus enado kynynâ aguely, âji Deus anhetbydâ.

<sup>3</sup> Kurâ domodo eynynâ aguewâni modo iwymâry kuru iduakely, Deus iomazehoem xuduypy modo, ânguydo imeom inakanhe adâjitybory xygakehoem xyâppy warâ Deusram egamenriem. Âdy eyam nhegamely peba kulâ Deus Âepanâgueho odaji negawântaymba mykâinane. Arâ lâpylâ kynynâ Deus agâ agueim Jesus âdype awyly, Deusram tiengamehoem. Awylygyue myakâwâm tâwâlâ âtuly, inakanhe aguitybory xygakehoem.

<sup>4</sup> Tarâ onro anaynlâ Jesus watay, Deus ety oday kynynâ aguenriem nitaymba tâise; ânguydo imeom nhunru negameba tâise warâ, Judâ iwerypyry awylygyue. Levi iweompyry modo lelâ mawânkâ Deus ety oday âsewanirim, Deus xurâem satyby emakerim, kâzewenry ara.

<sup>5</sup> Iwerâ Deus enado Jesus anhekyly emyenro mawânkâ kurâ domodo eynynâ Deus agâ aguewâni modo iwymâry kuru anhekyly, âzekiba kehoemba olâ. Arâ lâpylâ âtâ Deus etyem itâdyby, târâ Deus eydâ ato donro ekudo lâpylâ awyly, eara kehoemba olâ. Warâ myakâwândy Deus, Moisésram aguely târâ iwy wâgâ, âtâ Deus xyrento saunâdyly saguly iraynâ: “Âdaunlo âtâ awyly kâenehon-hombry ara kehoem iety itânehongâ” kely myakâwândy eyam.

<sup>6</sup> Deus, Jesus âwanu anhekylyem aguehobyry koendonro kuru, Deus ety oday kurâ domodo eynynâ aguewâni modo iwymâry kuru anhetbyby takaze kehoem. Iwelo tâdâseinwândobyry, kydamudo agâ saguhoem âseinwândobyry takaze koendonro kuru keim mâkâ. Takaze koendonro kuru, tâkeze urâ, mârâ saguhobyry einwânnipyry modoram “Koendonro xuduze urâ” kehobyry mawânâ ise kienmakely.

<sup>7</sup> Saguho tâzewenry koendâ lelâ einwândyly-ro watay, iwelo tâdâseinwândo Deus anientaymba tâise.

<sup>8</sup> Saguho tâzewenry tynnonro modo neinwâmpyra awyly tiuntuduô myakâwândy Deus aguely:

“Sainse Israel donro modo agâ, Judâ donro modo agâ warâ iwelo tâdâseinwândo agânheto.

<sup>9</sup> Egîtodâba idamudomo kâentyday eagâmo kâseinwândobyry ara inkâba ise,

xirâ iwelo tâdâseinwândo eagâmo agânhekyly,

Mârâ ume tâmayne kehoem akâwâm akaemo târâpa kâentylymo,

tâjiunwym tymery emary wâgâ sawâni ara.

Eagâmo kâseinwândobyry araba olâ akâwâm aidylymo.

‘Amyguehobyry einwânse xina’ keypyem,

kâunrutomobyry araba kulâ akâwâm aidylymo.

Yeinwâmpyra atomobyry wâgâ akâwâm ‘Tâwâlâ pylâ itaungâ’ uguely.

<sup>10</sup> Israel domodo agâ tâdâseinwândo iwelo agânheto saintu warâ ise agânhedly:

Kâunrutomo koendâ nhutuhomoem aiese urâ,

yeinwântomoem aienehonze urâ-ro warâ;

mârâ tâzewenry iodaymo,

nhangahumo oday warâ iwenibyem awyly-ro waunlo ara kehoem ise,

âdaunloenlâ nenanânehomba itomoem.

IDeusrymo ise urâ, ynyonro modo ise akaemo-ro warâ.

<sup>11</sup> Ânguy ywâgâ nenomedâdondaymba ise;

idânârâ utudâmo lelâ awylygyue,

‘Kywymâry Deus xutuwâdaungâ’ ânguy kewâpyra ise.

Pymâdo, kurâdo âdy modo warâ utuzemo.

Kurâdo âdy keba modo utuzemo lâpylâ warâ.

Ânguy utudânry lâpeba ise.

<sup>12</sup> Idânârâ inakanhe aitomobyry xygakeze urâ.

Âdaunloenlâ kâenanâgueondaymba ise urâ izepa wato anhetomobyry”

kewândymy Deus, warâ itaumbry iwenibyem awyly.

<sup>13</sup> Iwelo tâdâseinwândo wâgâ Deus agueduo, saguho tâdâseinwândobyry ton-honremba ienipyryem tawylâ Deus agueho. Mârâ saguhobyry xuzadylylâ ise-ro warâ.

## 9

*Âdara Deus iomazeândyly tarâ onro anaym, târâ kaynâ warâ awyly xutuhô*

<sup>1</sup> Saguhoem kydamudo agâ Deus âseinwândy, âdara tohoguedyly awyly aguewânmy. Âtâ tâjitybygue itâdyby tohoguedo, tarâ onro anano wâgâ aguewâm lâpylâmy.



<sup>2</sup> Mârâ âtâ nhehugâdylymo myakâwândy Deus aguehobyry aralâ. Azagâ myakâwândy sahomegu; sahomery imâsedo waunroem; sahomery imeimbyry pylâ xyppyrdâ-ro warâ. Tânmize sahodâdybem myakâwândy. Waunro sahomery myakâwândy “Tynrenseim” kelygue tâzekeim. Târâ myakâwândy tâdâzesagon-ho modo sawo, mesa pão Deusram egamewâdyby ekanâdo warâ.

<sup>3</sup> Mârâ sahomery xyppyry myakâwândy “Deus Âepanâgueho” kelygue tâzekeim. Tyxieingue mykâinane sahomegu.

<sup>4</sup> Târâ mawânâ myakâwândy mesa ourugue xygatyby, edunu tyânângueim iaduânto, kaixa tynynonro modo agâ âseinwândobyry enanâgueho warâ. Ourugue etydâdyby myakâwândy mârâ kaixa. Ilâ odaylâ myakâwândy manâ etary ourugue xygatyby. Egi-todâba israelita domodo egasebygueduomo ipynirioem Deus nhuduypy myakâwândy manâ. Kaixa oday tâlâ lâpylâ myakâwândy Arão eamatorubyry iluseyby. Tâlâ lâpylâ myakâwândy azagâ lelâ tuhu tapalogueim kydamudo ezewenry Deus inwenihobyry.

<sup>5</sup> Mârâ kaixa wâgâ myakâwândy XYDYK warâ azagâ anju “querubins” kelygue tâzekeim ekudo modo; Deus târâlâ awlyly xutuhô myakâwândy akaemo. Tawâtarique myakâwândy mârâ kaixa enahuru wâgâ awylymo. Mârâ kaixa enahuru mykâinane tâjiunugue tukuizeim, Deus, inakanhe adâjitobyry modo nhygakehoem. Xirâ unâ wâgâ imâem adâkeze tâise urâ. Xirâ ume awârâ wâgâ kâengatuombyra olâ ise urâ.

<sup>6</sup> Aituo warâ myakâwândy Deus ety oday aieholy. Kopaelâgâembaba mykâinane Deus agâ kurâ domodo eynynâ aguwâni modo Sahomery Tynrenseim odaji egawândylymo, Deus aguehobyry ara adâitomoem.

<sup>7</sup> Mârâ sahomery xyppyry oday Deus Âepanâgueho odaji egawânni olâ mykâinane kurâ domodo eynynâ aguwâni modo iwymâry kuru lelâ. Tokalâ anu wâgâ, tokalelâ mykâinane egawândyly. Kudupi oday ânguydo imeom xyâpy iunugue tâmase lelâ egawândyly. Tâjiunugue mykâinane kaixa inwinkely, Deusram tienkadoem. “Inakanhe awitobyry, kurâ domodo inakanhe aitobyry warâ xygakegâ, tiuntudânryenlâ xina inakanhe kulâ aitobyry” warâ tâkeze mykâinane.

<sup>8</sup> Mârâ tâdâseinwândo saguhobyry ume, Deus Âepanâgueho âji odaji kurâ domodo negawântaymbamo mykâinane. Kurâ domodo eynynâ Deus agâ aguwâni modo iwymâry kuru lelâ egawânni. Warâ myakâwândy Deus ehoguedo âtâbe onro anaym awyly ume adâjidyly.

<sup>9</sup> Mâkâ ânguydo imeom, âdydo imeom warâ kydamudo Deusram saguhoem nhegameybymo ton-honremba mykâinane, mârâgue Deus iomazeânze kewâni modo tâwentâgueba niepyra awylygue. Awârâ mawânâ Deus Ispiritury kiuntudyze ato.

<sup>10</sup> Saguhobyry modo nheinwânkyly mykâinane tâentuneim modo lelâ, tâinzeim, tâinzenry, tânyzeim, tânyzenry, todokoguely wâgâ, Deusram âdydo imeom egamely wâgâ warâ mykâinane aguelymo. Mârâ tâzezewenry kyngahu oday kunâgo wâgâ, ize kydato wâgâ, kuodano Deus wâgâ aguykeho wâgâ warâ aguepa mykâinane. Saguho tâzezewenry einwândyly myakâwâm, iwelo einwândyly adaguly ara kulâ.

<sup>11</sup> Cristo olâ âemâ. Deus enado kynynâ agueim mâkâ, iwelo tâdâseinwândo agueho ara. Tarâ onro anaym Deus ety oday kurâ domodo eynynâ aguwâni modo anhetyby takaze kehoem, mâkâ kurâem anhetyby koendâ awyly. Deus aiedyse ato lelâ mâkâ anhekyly. Âji tynrenseindâ kehoem mâkâ âsewanily iwerâ, mârâ âtâ xirâ anaym Deus ehoguedoem itâdyby takaze kehoem tynrenseindâ. Uguondo kulâ anhetyby mâkeba mâkâ ejidy iwerâ, tarâ onro anano keba-ro warâ.

<sup>12</sup> Kayam idâppyem, âji Deus Âepanâgueho kuru odaji egawânâmmy Cristo. Inakanhe aguitobyry xygakeze myakâwâm egawândyly. Body iunu keba, bizeru iunu keba warâ myakâwâm nhakyly; tunu lelâlâ myakâwâm nhakyly Deusram, inakanhe aguitobyry xygakehoem. Arâ myakâwâm kydasemagueho typyguebaombe nhenehonly. Tunugue myakâwâm nhepywadyly. Tokalelâ olâ myakâwâm mâkâ iguely; iguzesedyly nipyra.

<sup>13</sup> Saguhoem, Deus ety oday kurâ domodo eynynâ aguwâni modo body, tapirâ warâ xyâpy iunugue Deus aguehobyry sakanibyry modo tywinkezemo mykâinane. Arâ lâpylâ mykâinane novilha nhâlymo. Eguepybyry nhaduândylymo. Iwelupâry etary odaji nhetadâgylymo. Awlylygue, ânguylâ Deus xurâem inakanhe idyly-ro watay, âdiempa mârâ pelupâ ewy nhetylymo, paru agâ intugândylymo, mâkâ inakanhe aityby inwinkelymo warâ, tywykeba itoem.

<sup>14</sup> Body, tapirâ warâ iunu ton-honre tywykeba kyese watay, Cristo iunu kruz wâgâ apâdyby lakuru ton-honreim kuru, inakanhe aguitobyry xygakehoem! Deus Ispiritury Âdykâ Iguedânry eon-honrugue Cristo tâwâlâ myakâwâm âtuly Deusram, kynynâ tyiguehoem. Mâkâ âdaunloenlâ Deus ize ato sakadânry iunu olâ tywykeba kehoem kyetâ Deus xurâem. Arâ ise Deus iguedânry xurâem kydasewanily, ânguydo imeom xyâly, iaduândyly awârâ keba ise aguienkyly.

*Iwelo tâdâseinwândobe idyly Jesus iguehobyry wâgâ*

<sup>15</sup> Deus tynnonro modo agâ iwelo tâdâseinwândo anhedily myakâwâm Cristo anhetyby wâgâ. Cristo iguely myakâwâm saguho tâzezewenry einwânnipyry modo inakanhe itobyry xygakeze lâpylâ, Deus tynnonroem ingâseguyly modo “Koendonro adaindânry xuduze urâ” kehobyry nhemakehomoem.

<sup>16-17</sup> Ângyulâ pape testamento inwenily, tyigueduo, ânguy xurâem turâ xurâbyry modo awily xutuhô watay, niguepa kulâ mâkâ xurâem ise kehobyry âdy tâmaxi nietaymba. Sodo igueduo lelâ mârâ pape âzeinwân-honly.

<sup>18</sup> Arâ lâpylâ mykâinane saguho tâdâseinwândo einwântoem, âgunro modo xyâly, mâkâ iunugue myakâwândy âdydo imeom Deus ety odano modo iwinkely-ro warâ.

<sup>19</sup> Deus tâzezewenry nhuduypy emakerimbyryem, kurâ domodo idâtygywânmy Moisés. Ilâpyryem myakâwândy eyanmo nhegatuly idânârâ Deus aguehobyry. Agueimpyryem, bizeru, body warâ nhâen-honly, iunu etyhoem. Kaneru xuhudu sapablyby hissopo iwatary onwa tienkâjibygueduo pylâ munru paru agâ itugândyby ikaji inkuily; tâzezewenry sawo pape ituwymby inwinkely. Ilâpygueduo kurâ domodo âtdâgyuypy inwinkewândyly lâpylâ.

<sup>20</sup> “Xirâ tâjiunu mawânâ Deus agâ kydâseinwândobyry adaguly xutuhô” kewândymy Moisés eyanmo.

<sup>21</sup> Tâjiunugue mârâ âtâ, Deus ety kehomô, tywinkeze lâpylâ myakâwândy. Deusram tuduzeim modo sawo, âdydo imeom idânârâ awâtârâ Deus ehoguedo modo onwa warâ aiemâ lâpylâmy.

<sup>22</sup> Deus, Moisésram kâzewenry inwenien-hoymby warâ iwenibyem awily: “Deus xurâem tywykeba kitoem, idânârâ kysejiguy modo, ânguydo imeom xyâpy iunugue tywinkeze lelâ” kely. Tâjiguely peba kulâ, munru tyapâzeba kulâ warâ, Deus inakanhe tadawily nygakewâbyra.

*Cristo igueduo, inakanhe aguitobyry âdygakeoly*

<sup>23</sup> Onro anano Deus ety, âdydo imeom iodano modo warâ tânehonze âdiempa âdara târâ kaynâ Deus eydâ atodâ awily. Târâ mawânâ Deus ety kuru. Saguhom idânârâ Deus ety odano modo ânguydo imeom iunugue lelâ mykâinane tywykeba itoem aieholo. Iwerâ Deusram kaintoem, aunloenlâ eagâ kitoem, ânguydo imeom xyâpy iunu takazeno samâmy Jesus Deus enado tunulâ, tâwentâzeba kitoem.

<sup>24</sup> Igueypyem, Cristo, Deus ezaxi lelâlâ egawânâmmy, âtâ uguondo kulâ intâdyby odaxiba myakâwâm egawândyly. Deus ety kaynonro ekudo kulâ mykâinane mârâ Deus ety kehomô taunlo. Jesus Deus ezaxi egawândyly myakâwâm, kynynâ aguenriem. Iwerâ kynynâ mâkâ aguely târâ.

<sup>25</sup> Deus ety oday kurâ domodo eynynâ aguewâni modo iwymâry kuru mârâ anu wâgâ lelâba mykâinane Deus Âepanâgueho odaji egawândyly. Myarâ tâgawântay, aunlolâ mykâinane ânguydo imeom iunugue tâmase egawândyly.

Cristo egawânâm lâpylâ Deus eydâ atoam, âwâlâ âtuze, inakanhe kydawyly xygakehoem. Tokalelâ olâ myakâwâm mâkâ aidyly, aisezedyly nipyra.

<sup>26</sup> Aunlolâ âtuzedyly-ro watay, onro âtugudyly umelâ, tâise âsenagazededyly, iguezesedyly warâ. Aypa olâ, xypyryam idâze awily ume, tokalelâ xarâ onro anaxi âemâ, kurâem tyguehoem Deusram âtuze, inakanhe aguitayn-hobyry modo xygakehoem, âdaunloenlâ nigueompyra tâitoem warâ.

<sup>27</sup> Idânârâ igueze kurâ tokalelâ. Ilâpygueduo ise Deus aguely âdy kagâ aini wâgâ-ro warâ, eagâ kaynâ atoam kytâly atay, âji tâdâsenagazedoam kytâly atay warâ.

<sup>28</sup> Onro anaxi odopâze mâkâ; inakanhe aguitobyry xygakeonzeba, igueonseba warâ olâ ise mâkâ odopâdyly. Tokalelâ mawânâ awârâ aimâ. Odopâdyly enuenni modo idânârâ emakeze ise mâkâ odopâdyly.

## 10

<sup>1</sup> Moisés tâzezewenry inweniby kintainduo, âdiempa kulâ kiuntuly âdara Deus inakanhe aguitobyry modo nhygakely awily wâgâ, âtâ ekudobyry âdaunlo mârâ âtâ awily âdiempa kulâ nhutuen-hon-ho ara, kurâ âsegudobyry âdaunlo mâkâ awily âdiempa kulâ nhutuen-hon-ho ara warâ. Aunlolâ mykâinane kurâdo Israel donro modo Deus etyram ânguydo imeom nhadylymo, anu, anu warâ, tyân-homoem, Deusram tiengamehomoem. Arâ aidylymo umelâ, Deus xurâem tywykeba nipyramo olâ myakâwândy.

<sup>2</sup> Inakanhe aitomboery xygakeybyem lelâlâ-ro watay, tâwentâguezebamo tâise, ânguydo imeom xyâpy iunu Deusram egamely imoimbyrymoem tâise warâ.

<sup>3</sup> Arâpa olâ. Aunlolâ tâgyu nhadylymo Deus etyram, târâ tâwanuneim modo nhâhoem, iunu pylâ Deusram nhegamelymo itoem. Inakanhe adâitobyry tânanâguezelâ mykâinane akaemo. Aituo pylâ tâwentâguelâ tawily nhutulylymo-ro warâ.

<sup>4</sup> Tapirâ, body warâ iunu âdaunloenlâ ton-honruneba ânguylâ inakanhe aitobyry xy-gakeze.

<sup>5</sup> Deus itaumbry awo wâgâ iweniby enanâgüewâdaungâ, Cristo Deusram aguehobyry, xará onro anaxi tâewily iraynâ:

“Deus, ânguydo imeom xyâpy iunu, âdydo imeom warâ kurâ domodo nhudyry ize inkâba âmâ.

Awylygue wodo mâungudyly.

<sup>6</sup> Mâkâ ânguydo imeom itydâ xyâpy, iaduântyby warâ mâen-hoguedaymba âmâ.

Inakanhe adâjitybyry mâyngakehoem âyam egameyby, omazeândaymba.

<sup>7</sup> Awylygue aguely:

‘Talâ urâ, agânhedyse mato aiese on-hondybyem.

Ywâgâ amyguehobyry iweniby ara aidyse wawily’ ”

kewândymy Deusram, warâ Salmosdâ iwenibyem awily.

<sup>8</sup> Waunroem kuru: “Ânguydo imeom xyâpy iunu, âdydo imeom warâ kurâ domodo nhudyry ize inkâba âmâ. Mâkâ ânguydo imeom itydâ xyâpy, iaduântyby warâ mâen-hoguedaymba âmâ. Inakanhe adâjitybyry mâyngakehoem, âyam egameyby, omazeândaymba” kewânmy Cristo, Deusram. Moisés tâzezewenry inweniby agueho aralâ aidylymo umelâ myakâwândy arâ aguely.

<sup>9</sup> Mâkâlâ tyâzeim tawily aguewâm lâpylâmy. “Talâ urâ, agânhedyse mato aiese on-hondybyem” kewânmy Cristo Deusram. Kruz wâgâ tyigüehoem Cristo âtuduo, iwelo tâdâseinwândo nadagu. Saguhoem inakanhe tadawily xygakehoem ânguydo imeom xyâyly âdyempa niedâ Deus.

<sup>10</sup> Deus ize ato mawânkâ myakâwâm Jesus Cristo anhekyly. Tokalelâ kruz wâgâ tyigüehoem âtuwâm âdaunloenlâ nigüeompyra tâitoem. Aituo, Deus xurâem, tywykeba kurâ Jesus einwânni modo. Âdy inakai kâwentâdo lâpeba kurâ.

<sup>11</sup> Kopaelâgâembaba Deus ety oday kurâ domodo eynynâ aguewâni modo ânguydo imeom nhâlymo, iunu, nhunru warâ Deusram nhegamelymo, judeu domodo xurâem ekadoem. Tokalelâba aidylymo, kopaelâgâembaba awârâ âwanu aieseze awilymo. Arâ lelâlâ wâne aidylymo, ânguy inakanhe aito nygakeba olâ awârâ.

<sup>12</sup> Jesus Cristo olâ âwâlâ âtuwâm, kruz wâgâ tyigüehoem. Tokalelâ myakâwâm iguely, Deus izepa ato agüentyby xygakeze. Aunlolâ mârâ koendonro kurâem anhetyby. Idânârâ inakanhe adâjitybyry xygakehoem tâtuze myakâwâm. Âdaunloenlâ nâtuondaymba ise mâkâ tyigüeoem. Igüeypyem, kurâem itondybyem, kau odaxi âkuwâm. Deus eahoru eynynâ mâkâ ekadybyem awily, pymâem kuru tâitoem.

<sup>13</sup> Târâ Cristo, Deus tuduery modo tuhuru iaxi nhedyly ara.

<sup>14</sup> Tokalelâ myakâwâm mâkâ iguely, inakanhe agüitybyry xygakehoem, tywykeba kitoem warâ. Tyigüeduo, Deus eynynonro modo aunloenlâ tâwentâgüezein-empa ienehonwâm.

<sup>15</sup> Deus Ispirity mawânkâ kyam adâkeze inakanhe agüitybyry xygakeze Jesus iguehobyry wâgâ:

<sup>16</sup> “Israel domodo agâ tâdâseinwândo iwelo agânheto saintuo warâ ise agânhedyly.

Kâunrutomo koendâ nhutuhomoem aiese urâ,

yeinwântomoem aienehonze urâ-ro warâ;

mârâ tâzezewenry iodaymo kehoem nhangahumo oday kehoem warâ iwenibyem awily-ro waunlo ara ise,

âdaunloenlâ nenanânehomba itomoem”

kewândymy Deus Ispirityry.

<sup>17</sup> Ilâpyryem aguely:

“Idânârâ inakanhe aitomobyry xygakeze urâ.

Âdaunloenlâ kâenanâgüeundaymba ise urâ izepa wato anhetomobyry’ ”

kewândymy Deus Ispirityry, warâ iwenibyem awily Deus itaumbry awo wâgâ.

<sup>18</sup> Inakanhe agüitybyry xygakeybyem mawânârâ, ânguydo imeom, âdydo imeom warâ tâgameduneba iwerâ. Jesus iguehobyry wâgâ tâwentâgüezeba kydawily Deus xurâem.

*Kâkuâdâni peba kurâ, Deus agâ agüykehoem*

<sup>19</sup> Awylygue, Cristo eynynâ ypemugudo, Deusram iwaguepa kaintoem, eagâ agüykehoem warâ, âdy kâkuâdâni lâpeba iwerâ kurâem kruz wâgâ tunu tyapâze Cristo iguehobyry wâgâ.

<sup>20</sup> Sahomery xuahuru tyxiem Deus Âpanâgüeho xuahum myakâwâm iotagâ adaugueim, Jesus kruz wâgâ igüeduo. Kurâ domodo eynynâ aguewâni modo iwymâry kuru lelâ mykâinane myarâ egawânni. Iwerâma tâwâlâ Deus ezaxi kâgawândily, eagâ agüykehoem.

Áwâlâ myakâwâm Jesus âtuly tyiguehoem; awylygue âdy kâkuâdâbyra awyly, Deusram iwaguepa kaintoem.

<sup>21</sup> Iwerâ Jesulâ kynynâ Deus agâ agueim, mâkâlâ Deus xurâ modo eni, saguhoem Deus ety oday kurâ domodo eynynâ aguewâni modo iwymâry kuru, mârâ âtâ nhetobyry ara, Deus xurâ modo eynynâ agueho ara warâ.

<sup>22</sup> Awylygue Deus iopaji kainne, eagâ aguykehoem. Kyzehoguene lelâlâ mâkâ. Tâwentâzeba kêendly kyzeinwâne lelâlâ warâ, einwânni ara kidyly kulâ warâpa. “Aiese urâ” tâkehobyry aiese awyly kyzeinwâne; kieinwâmpyra kipyra kine. Inakanhe aguitobyry mâkânra kyzegatunre, nhygakehoem eyam kyzekane-ro warâ. Arâ ise xurâem tywykeba kydawyly, paru tywykenrygue igokeyby ara kydawyly.

<sup>23</sup> Deus “Aiese urâ” tâkehobyry aieni lelâlâ awyly kiuntulygue, tynynonro modoram koendonro Deus nhuduly kienmakely kinwânwândyly kinmoba kine. Tutuzema kurâ, adâkehobyry aiese lelâlâ Deus awyly.

<sup>24</sup> Âdara kataen-ho keon-hondâdyly wâgâ kydâpaunzene, tagonrodo inwynedomoem lelâlâ, eagonro modo xurâem koendonro lelâ anhetomoem warâ.

<sup>25</sup> Jesus einwânni modo Deus ety oday tâdâtâdygyuly imoimbyry modo araba kine! Deus ehoguze tâdâtâdygyuly kinmoba kine. Kywymâry Jesus sainto iwaguepa awyly tutuze kydawylygue, âjigue kydâzeon-hondâne.

<sup>26</sup> Unâ iozeno Cristo wâgâ agueim xuturimbyrenlâ, Jesus kieinwâmpyra kidyly. Saguhoem aguientyby modo aguiendyly watay, ânguy igueonni lâpeba ise, inakanhe aguitobyry xygakehoem.

<sup>27</sup> Deus izepa ato aiese sahozeyby eanu lelâ ise xypyry etay aini modo wâgâ. Deus enado tâepanâgeduo, Deus tyam aguely idase: “Âji tâdâsenagazedoam ise mydâly, peto nhâtânryam, uduery modo iaduhoram” kehonze.

<sup>28</sup> Saguhoem mykâinane pymâ domodo tâzezewenry Moisés inweniby sakanibyry tyâen-honze, azagâ, azagâ tokalâ warâ kurâdo mâkâ inakanhe aidyly enipyrybe-ro watay. Nityembyra kehoem mykâinane xyâhoem pymâdo aguelymo.

<sup>29</sup> Awârâ takaze kehoem ise Deus imery imenibyry âsenagazedyly. Jesus iunu âwankuem ieni, âdyem nitaymba awârâ keim; inakanhe kehoem ise âsenagazedyly. Kruz wâgâ Jesus Cristo tunu nhapâdobyry wâgâ myakâwâm Deus tynynonro modo agâ tâseinwândo iwelope nhedyly. Ilâ wâgâ mawânkâ Deus kâwentâguedo peba nhedyly. Inakai kuru ise Deus Ispiritory kagâ koendonro iwykeim âsenagazedo.

<sup>30</sup> Deuslâ myakâwândyly warâ agueim: “Kankanehonwâbyra ise urâ. Aitomobyry ara ise nhepywadoemoem auguely” keim. Watâkeze lâpylâ: “Urâ iwymârymo ise ynynonro modo âdara awyly agueim; eyanmo agueho nhakadylymo-ro watay enagazenehonze urâ” kewândymy Deus. Warâ iwenibyem awyly Deus itaumbry awo wâgâ.

<sup>31</sup> Kyanoem lelâlâ Deus Âdaunloenlâ Iguedânry emaym einwântânry modo awyly, itaumbry sakani nhenagazedo tutuze kydawylygue.

<sup>32</sup> Enanâguedaungâ, Jesus mâinwândylymo adaguday aityby modo. Deus itaumbry imâem mâuntuduomo, angahumo oday Deus nhajimanâdyly-ro waunlo ara mienehomo. Eynynonro keba modo inagazedylymo lelâlâ wâne, einwândyly mâinmoba olâ ani âmaemo, adaimpâni adameodânry ara.

<sup>33</sup> Âdatay tâzenagazeoze, tâjiwykeoze warâ ani âmaemo kurâ domodo enanaym. Âdatay âpemugumo Cristo eynynonro âzenagazeolyimo tâense âmaemo, eagâmolâ mâsenagazedylymo waunlo ara.

<sup>34</sup> Jesus einwânni modo etadâdyby modo tytyenze ani âmaemo; awylygue eon-hondâzemo eyanmo IU midylymo. Idânârâ tâlâ matomo emakeduo, mâjityembyra ani âmaemo; mo-homaendylymo lelâ, mârâ koendonro adaindânry emakerimbyryem mawylmogoe, mârâ âdaunloenlâ imaymo âzemaekodânry.

<sup>35</sup> Aituo, Jesus mâinwândylymogoe mâzenagazeolyimo watay, einwândyly kâjimowâdaundâ. Mâinwânsezedylymo watay, emakeze âmaemo koendonro “Xuduze urâ ynynonro modoram” Deus kehobyry.

<sup>36</sup> Mâzenagazeolyimo Cristo xurâem mawylmogoe watay, emawâdaungâ, einwândyly mâinmobamolâ, Deus ize ato amânhetomoem. Arâ ise tâlâ mawylmo koendonro “Xuduze urâ ynynonro modoram” kehobyry.

<sup>37</sup> Xirâ enanâguedaungâ Messias saindyly wâgâ, Deus itaumbry awo wâgâ iweniby, mâkâ Deus ingonokyly wâgâ aguehobyry:

“Iweâpa nitaymba ise auguehobyry âewyly;

Iweâpa nitaymba lelâlâ ise.

<sup>38</sup> Urâem tywykenry modo aunloenlâ ise yagâ awylymo, yeinwândylymogoe;

Yeinwânnipyryem yeinwândyly inmolymo watay olâ,  
 eagâmo tuomareba ise urâ,  
 enagazenehonzemo urâ-ro warâ' nyguemy Deus.  
 Awlylygue Deus einwânsezedaugâ”  
 warâ iwenibyem awlyly Deus itaumbry awo wâgâ.

<sup>39</sup> Tâsenagazedylgue kulâ Jesus einwândyly imorim modo emyenro mâkeba kurâ. Âji tâdâsenagazedoam ise akaemo idâly. Kurâ olâ emakeybyem, Jesus lelâ kienwânkylly. Awlylygue ise kytâly Deus eydâ atoam.

## 11

### *Saguhoem Deus einwânni modo wâgâ kiento*

<sup>1</sup> Koendâ kiuntuhoem âdara Jesus einwândyly wâgâ adâjidyly wâgâ ise auguely. Deus kienwândyly-ro watay, aguehobyry emakeze kydawlyly tâinwânse lelâlâ kurâ, mâkâ emaymba kienmakely kinwânwânkylly. Kientânry modo tâlâ lelâlâ awlyly kiuntuholâ awârâ.

<sup>2</sup> Tyeinwândylygue myakâwândy saguho Deus einwânni modo Deusram âzehogueolyo.

<sup>3</sup> Deus tâinwânse kydawlylygue, tutuze kurâ, idânârâ tâlânro modo tytanrungle kulâ Deus nhugutyby awlyly, âdygue inkâba myakâwândy idânârâ kienkylly modo nhugudyly. Arâ myakâwândy mâkâ tâensenry modo, tâenseim modo warâ nhugudyly.

<sup>4</sup> Deus tâinwânse myakâwândy Abel. Awlylygue nhegameyby kordeiru xyâppy Deus nhehoguegulyly kuru, iwaigoru Caim typi ezano ewy nhegameyby takaze. “Yeinwândylygue, uguondo koendonro âmâ” kewândymy Deus eyam. Adão, Eva warâ umelâ myakâwândy awârâ aidyly. Arâlâ olâ, Abel wâgâ aguely kindatuo, konomedâdylly Deus einwândyly kiuntuhoem, Abel nheinwântobyry ara.

<sup>5</sup> Deus tâinwânse myakâwândy Enoque. Awlylygue myakâwândy xuzadyly. Deuslâ myakâwândy xirâ onro anaymba sani. Ânguy nepyra myakâwândy, Deuslâ tâzaxi sani awlylygue. Enoque toenzepa Deus tuomazeânehonze kely iwenibybe Deus itaumbry awo wâgâ.

<sup>6</sup> Deus kienwâmpyra kulâ nuduwâpyra iomazeândoem. Deus agâ aguykedyze kurâ-ro watay, tâlâ mâkâ awlyly kyzeinwâne lelâlâ, tyam saini modoram koendonro xuduze awlyly kyzeinwâne lâpylâ warâ.

<sup>7</sup> Deus tâinwânse myakâwândy Noé. “Pepi imâsedo âtâ emyenro xygakâ. Toenzepa kopâ igonose urâ, idânârâ onro wogonro modo adain-hoem” Deus kely idamâmy. Âdykâ paru kaynâpa ihuguely nepyra myakâwândy Noé<sup>\*</sup>. Alâ olâ myakâwândy pepi imâsedo nhygadyly lelâ, Deus tyeinwândylygue, ihugewânmy kopâ-ro warâ. Noé, ety odano modolâ warâ olâmy âsemaguewâm mârâ pepi imâsedo oday tawlylymogue. Eagonro modo olâ myakâwândy, Deus neinwâmpyra tawlylymogue, pepi imâsedo odaji negawâmpyramo. Awlylygue myakâwândy parugue tyense iguewâdyllymo. Deus xurâem tâwentâguezenry lelâlâ myakâwândy Noé, nheinwântobyry wâgâ.

<sup>8</sup> Deus tâinwânse myakâwândy Abraão. Awlylygue myakâwândy Deus tygâsedylly indadyly. “Igasegâ tarâ onro azehobyrydâba. Onro ijidyem uguehobyryam idâ” Deus keduo, idâly lelâ. Tonrorudâpa âxiguely, âdyam tâtâly nutubalâ.

<sup>9</sup> Deus tyeinwândylygue myakâwândy mârâ âji aguehobyryam taintuo, âkelomo eonroru anano ara kulâ awlyly. Abraão, eagâ idâwâtyby modo warâ âtâ ânguydo imeom itubygye itâdyby odaymo mykâinane, âdapa lelâ. Etywâdylly, idâkawynly waunlo mykâinane etymo, myarâ, myarâ warâ âxiguelymo-ro watay. Abraôram adâkehobyry ara lâpylâ myakâwândy Deus, Isaquerâ, Jacôram warâ aguely, eyanmo tiunduly wâgâ. Deus einwândyly âdaunlenlâ nimobamo myakâwândy.

<sup>10</sup> Warâ myakâwândy Abraão ejiku; târâpa tâjidy kuru awlyly, tutuze olâ myakâwândy. Deus eydâ atodâ tâjidype awlyly, tynwânwânse tawlylygue. Mârâ âji Deus nhontyby, nhygatyby warâ, âdaunlenlâ adakalagueodânryam idârin-em tawlylygue warâ.

<sup>11</sup> Abraão einwânmâ lelâlâmy adâkehobyry aieniem lelâlâ Deus awlyly. Awlylygue myakâwândy tâjiunwyn-em idyly, agaityoem imezein-empa tawlyly umelâ. Iwydy Sara lâpylâ aripiem, adamyim keba myakâwândy mâkâ. Deus olâ myakâwândy eyanmo “Imezeze âmaemo” tâkeze; awârâ einwânmâmomy-ro warâ. Awlylygue myakâwândy Deus imezehoemoem anhenonhly.

<sup>12</sup> Arâ myakâwândy iguezeseajiomyby Abraão kulelâ toenzepa kurâdo idamumoem idyly. Nuduwâpyra mâkâ iweompyry sapâguehoem, agui awlylymogue. (“Iguezeseseajiomyby” uguely, agaityon-em kehoem awlylygue.) Ximukâ kau wogonro sapâguehoem

\* 11:7 Mârâ ume ondaypa kulelâ myakâwândy paru modo iazely.

nuduwâpyra, sagunu parutabâ emelano sapâguehoem nuduwâpyra warâ, myara akaemo sapâguehoem nudupa awlyly.

<sup>13</sup> Idânârâmy akaemo iguewâm, Deus einwândyly nimobalâ: Abraão, Isaque, Jacó warâ. Canaãdâ lelâlâmo wâne mykâinane. Onro tâxidâdobyry sodoem nipyralâ olâ myakâwândy iguewâdylimo. Deus eydâ ato tâjidy kuru awlyly, tutuzemo myakâwândy. Tuomare kehoem myakâwândy myarâ taindily inwânwândylymo, Deus “Xuduze urâ” kehobyry tienmakehoemoem. Aituo, Canaãdâ tawlylymo ume, adakobâze idâppy aramo kulâ myakâwândy, iwague endaylâ tâjidy kuru eni ara. Awlylygue myakâwândy aguelymo: “Sakani kulâ kurâ xirâ onro anakâ” kelymo.

<sup>14</sup> Arâ aguewâni modo tâjidy lelâlâpe tâidyly tynwânwânse awlyly tutuen-honze.

<sup>15</sup> Kydamudo Abraão, Isaque, Jacó warâ tydamudo eonronru anaxi todopâdily wâgâ nâtyanâbyramo myakâwândy. Izemo-ro watay, tâwâlâ tâise odopâdylimo.

<sup>16</sup> Akaemo âji ize ato olâ myakâwândy Deus eydâ ato âji koendonro kehoem, eydâ atomo takazeno. “Ynynonro akaemo” keze tywypazeba myakâwândy Deus. Târâ kaynâ eydâ tatodâ âji xurâmoem nhonipyryem myakâwândy mâkâ.

<sup>17-18</sup> Deus “Aiese urâ” tâkehobyry aieniem lelâlâ awlyly tyeinwândylygue myakâwândy Abraão, “Âmery xygâ, idânârâ aguehobyry aiese lelâlâ mawlyly kâinwântoem” Deus keduo, on-hondybyem awlyly tymery xygâze, tymery Isaque wâgâ lelâ toenzepa tyweonzely awlyly tiuntuly umelâ.

<sup>19</sup> Tutuze myakâwândy Abraão, Isaque iguely-ro watay, Deus kurâem ietoniem awlyly, “Aiese urâ” tâkehobyry adyese lelâ Deus tâkeduo. Tâinwântâ lelâlâ awlyly tientuo, tymery nyâmpa itoem aguewâm Deus. Imery niguepa lelâlâ wâne, Abraão xurâem olâ myakâwândy igueypem imery kurâem itondily waunlo ara.

<sup>20</sup> Deus tâinwânse myakâwândy Isaque. Awlylygue myakâwândy Deusram nhekadyly, tymeombyry Jacó, Esaú warâ agâ Deus koendâ itoem. Tutuze myakâwândy mâkâ, tienkadyby wayam waunroem ainiem awlyly.

<sup>21</sup> Deus tâinwânse myakâwândy Jacó. Awlylygue myakâwândy tyiguely iraynâ, “Koendâ lelâ ise Deus nhedylymo” kely akaemo azagâ tyweonram, José imeombyry modoram. Arâ adâkebygueduo myakâwândy, tamatagoru wâgâ âzesebydâdily, Deus nhehoguedily warâ.

<sup>22</sup> Deus tâinwânse myakâwândy José. Canaãdâ eonronrumo tiunduly Deus aguehobyry awlyly, tutuze myakâwândy José. Awlylygue myakâwândy tyiguely iraynâ, Israelita domodo Egitodâba egasely wâgâ aguely. “Kypemugudo Canaãram odopâduo, ieguepybyry nhadysemo ise urâ, târâ onro kyam tiundulyem Deus aguehobyrydâ epyâdoem” kewândymy.

<sup>23</sup> Deus tâinwânse myakâwândy Moisés nhunwym, ise warâ. Awlylygue myakâwândy tymery iazeduo nhoendylymo ânguy nepyra atodâ, tyâzepa itoem. Azagâ tokalâ warâ nunâ ara myakâwândy nhoendylymo. Tywâkureim awlylygue, tâwanu aieniem Deus in-duakeyby mâkâ iamudo awlyly xutuwanmomy. Awlylygue myakâwândy egípcios domodo iwymâry aguehobyry sakaze tyanepa walylymo, iamudo uguondo imeombyry modo idânârâ xywâdily kehobyry.

<sup>24</sup> Deus tâinwânse myakâwândy Moisés. Awlylygue myakâwândy tutuduo, pymâ Egitto donro exiry imery kely izepa awlyly, mâkânra enamanâdyby tawlyly umelâ.

<sup>25</sup> Warâ myakâwândy tyangahu oday xunâgu: “Egípcio domodo agâlâ urâ-ro watay, imâemba kulâ ise womaru, eagâmo Deus izepa ato agânhetuo. Ypemugudo Deus xurâ modo agâlâ koendâ wawlyly, tâwâlâ lelâlâ wâne eagâmo kâsenagazedily.

<sup>26</sup> Âdapa lâgâlâ idânârâ âdype, iwâkuru modobe warâ wawlyly, pymâ Egitto donro iweryem wawlylygue. Womaru kuru olâ ise, Deus ize ato agânhetuo, tâwâlâ lelâlâ wâne ise kâsenagazedily, Messias, Deus ingonokily ara” kely tyanlâ. Deus tynynonro modoram nhuduly wâgâ myakâwândy âpaunzedily, mârâ koendonro tienmakely târâ eagâ kaynâ tatay, tågaseim taintodâ lelâ eseni ara myani.

<sup>27</sup> Adâkehobyry aieniem lelâlâ Deus awlyly tyeinwântuo myakâwândy Moisés Egitodâba egasely Israelita domodo agâ, Faraó nytabyra kehoem. Deuslâ myakâwândy nheinwânsezeguly, awlylygue myakâwândy idâzesedily lelâ; Deus tâensenry nhedyly-ro waunlo ara myakâwândy.

<sup>28</sup> Deus tyeinwândylygue myakâwândy Egitodâba tâgasely iraynâ, waunroem kuru âty Páscoa etyguedo anhedily. “Kordeiru atay, kabra atay warâ xywâtaungâ; itymo iwyantary onro iunu ietaungâ warâ. Deus mawânkâ anju kyârim igonose, âtâ modo odakâ tâjimebyary xygâze. Kymeombyry olâ ise âda tyeseba, kâty iwyantary modo munrube ietybyem awlylygue” kewândymy typemugudoam.

<sup>29</sup> Deus tâinwânsemo myakâwândy akaemo israelita domodo Moisés agâ Egitodâba egasewâdyby modo. Awlylygue Egitodâba egasebyem, Parutabâ Tapabilein-am

saintuomo, Deus paru iotagâ kehoem nhaweânehonly, âzekuâdomoem. Igueyam, iatubyam warâ myakâwândy paru epagudybyem awyly, israelita domodo sakadoem. Egípcio domodo akaemo nhapygye ekuâze tâkewâzemo lâpylâ myakâwândy. Deus olâ myakâwândy paru ezaxi tyetonze, nakabyra itomoem. Aituo myakâwândy idânârâ kehoem âjienlâholymo, paruam âduonlymo-ro waunlo ara kehoem. Idânârâ israelita domodo olâmy âsemaguewânmo.

<sup>30</sup> Deus tâinwânsemo myakâwândy israelita domodo Canaã anaxi saintyby modo. Awylygye myakâwândy Jericóram saintybyem, mârâ xidadâ sahodâdobyry Deus ihugueânehonly. Seis emedyly ara lelâ myakâwândy xidadâ sahodâdobyry nhenâmidylymo. Sete emedyly ieto wâgâ nhenâmidylymo ume myakâwândy Deus mârâ sahodâdobyry ihugueândyly, nheinwândylymogue.

<sup>31</sup> Deus tâinwânse myakâwândy mâkâ pekodo Raabe, MON warâ adyeseim. Awylygye myakâwândy tâty oday akaemo azagâ uguondo israelita xidadâ enuagaenze Josué ingonotyby modo nhoendyly, Jericó iwymâry modoram nâzehoba itomoem. Sahodâdobyry ihuguebygueduo, xidadâ odaji egawântybyem, idânârâ tonlo modo Deus einwântânry xyâwânmmomy; mâkâ pekodo olâ myakâwândy nyâmpamo, Deus nheinwântobyry wâgâ.

<sup>32</sup> Toenzepa lelâlâ Deus einwânnypry modo; idânârâ wâgâ auguehoem nudupa olâ. Unâ modo tydase olâ âmaemo, Gideão, Baraque, Sansão, Jafte, Davi, Samuel, eagonro Deus itaumbryr aguewâni modo wâgâ warâ.

<sup>33</sup> Deus tâinwânse tawlymogue myakâwândy tâseguebydaymo, tuduery ton-honreim modo kehoem nhainlymo. Pymâem awylymo ume, koendâ lelâ myakâwândy aguehobyry aralâ. Tâinwânse awylymogue myakâwândy Deusram âzemaekolymo. Leão itahuwânmmomy.

<sup>34</sup> Peto kâmayno kehoem nhâlâmâmmomy. Sodadu domodo ispadary amaym âsemaguelymo. Ton-honreba awylymo ume, eon-honrumo âduduoly. Tâseguebydaymo, ton-honremo lelâ mykâinane, toenzepa uguondo modo xyâwânmmomy. Sodadu âkelo anano modo agâ tâjitoguyday akaemolâ mykâinane ton-honreim kuru.

<sup>35</sup> Deus nheinwândylymogue myakâwândy pekodo modo ipemugumo ewy igueypy eagâmo itondoem Deusram kurâem âiehondyly warâ.

Tâlâ lâpylâ olâ myakâwândy Deus einwâni modo ewy, typygueba kehoem Deus einwântânry modoram tânagazezeim, Deus einwândyly nimoba awylymogue. Tâsemaguehoemo kulâ âdakepamo olâ myakâwândy. Tyigueduo eydâ tatoam Deus tadyly tâinwânsemo myakâwândy, târâ kurâem tâitondomoem. Deus eydâ atodâ koendâ kuru tawly xutuwanmmomy.

<sup>36</sup> Tâlâ myakâwândy akaemo ewy âwankuem tyeseim, tapioguozeim warâ. Tâlâ myakâwândy âjihugâjioly, âzemaâjioly, iweâma pylâ kadeia odaji samely-ro tyeseim.

<sup>37</sup> Tâlâ lâpylâ tuhugue tamytâze, serrotgye iotagâ tadatyoze, espadague tadatâoze warâ tyâzeim.

Tâlâ myakâwândy ety odaybalâ tâgaseânzeim modo. Aituo âdy peba tawlygye, tâguymo itubygye kulâ myakâwândy âzetydâdylymo. Toenzepa myakâwândy âdy peba tawlymogue âsenagazedelymo. Deus einwântânry modoram tâzenagazeolygye, nekobyzeguebamo myakâwândy. Toenzepa lelâlâ âsenagazedelymo, inakanhe kulâ adâieholymogue.

<sup>38</sup> Tâjikebamo myakâwândy myarâ, myarâ warâ kulâ adakobâdylymo, iwy modo wâgâ, âji paru peba ato einkâ, âdy peba ato einkâ warâ. Iwy tâtagueim oday, onday warâ kulâ myakâwândy ejikumo. Xirâ onro anaym Deus einwântânry modoram âdy keba ara kulâ myakâwândy âzeholymo, Deus xurâem olâ akaemo tywyneim.

<sup>39</sup> Idânârâ mâkâ Deus einwânnypry modo koendonro emakerin-em aguehoymbyem Deusram, nmakebamo wao olâ.

<sup>40</sup> "Inwânwândylymo wao ise, iwelo kâseinwândo agânhedlyly ara" warâ myakâwândy Deus xunâry. Cristo iunugue myakâwâm idânârâ inakanhe tadawly tyngakedyze awyly, akaemo saguhobyry modo inakanhe aitobyry, iwerâ inakanhe aguitobyry alelâ. Idânârâ tynnonro modo ize tato ara aidylymo tynwânwânse myakâwândy Deus.

## 12

### *Kunwym Deus kuruto*

<sup>1</sup> Toenzepa mawânkâ aguidyly, aguykely warâ enuagaeni modo. Awylygye Jesus ize ato aguiempyry kyenehorim kyjimonre. Inakanhe aguitobyry kyjimonre. Mydy ânguydo imeom nhawâto ara awârâ inakai modo kawâdyly. Âdaunloenlâ ton-honremba kipyry olâ kine. Kynynâ inakanhe awyly kyzemaenre, Deus kyize ato ara kitoem. Mâkâ tâgaseim ara kine. Toenzepa egaky enuagaeni modo, âgânâyam MYK nipyry olâ egaky, tadaintoam taintoem.

<sup>2</sup> Jesus lelá kânanano nidâ, mâkâ tâgaseim, tâzegaky xypyryam taindily lelá enanano myara. Jesus wâgâ mawânâ Deus einwândily adaguly; Jesuslâ kienwânsezedoem aienehoin-ro warâ. Kywypado kruz wâgâ tâjiguely awily umelâ myakâwâm Jesus iguely kâjipyay. Tutuze mawânkâ Deus aguehobyry adientily-ro watay, tuomare lelá tawily. Awilygue arâ adâieholo nhemaenily lelá. Iwerâ Deus ekadodâ eahoru eynynâ ekadybyem awily, Deus eyam aguehobyry ara.

<sup>3</sup> Koendâ mâkâ wâgâ âpaunzedaungâ. Toenzepa âsenagazemâ, Deus ize ato aietânry modo âdalâ kulâ adyedyly emaenwâm warâ. Awilygue Deus ize ato aiedily nimoba atobyry enanâguedaungâ; tuomareba tâiseba lâpylâ itaungâ; einwândily kâjimowâdaundâ warâ.

<sup>4</sup> Toenzepa inakanhe aini modo âwankuem âedylymo, inagazedilymo warâ. Tyâzepa olâ âmaemo, Jesus mâinwândilymogue.

<sup>5</sup> Deus on-honwanâdomoem aguehobyry mâenanâgubaka âmaemo, tâjiunwym tymery eon-hondâze agueho ara aguehobyry?

“Mery, âDeusry agueim,  
idakâ wao auguely.

Amânhedyseba wato amânhedyly watay,  
ton-honre kehoem ise âyam auguely.

Âurudyly watay, idakâ.

Agâikeduo, tâjityenzeba ikâ,  
inakanhe amidilyguema âurudyly.

<sup>6</sup> Urâ, Pymâ Deus, idânârâ kâinwynegyuly modo tagâikeze urâ,  
idânârâ ‘ymery’ ugueho modo turuse urâ warâ,  
izepa wato anhetuomo”

warâ iwenibyem awily Deus itaumbry awo wâgâ.

<sup>7</sup> Deus agâikelymo-ro watay, âdara myguepamolâ emaenwâdaungâ, tâjiunwym tymery tinwynegyuly tymery nhagâikeho ara. Agâikehomo wâgâlâ tymery ara lelâlâ nhedylymo awily Deus nhenehony. Âdykâ tâjimersy, nhunwynram tagâikezenry, turusenry warâ lâpeba.

<sup>8</sup> Âurupyramo, agâikebamo warâ mâkâ-ro watay, mâkâ imery keba lelâlâ mawilymolâ nhenehony. Tâjiunwym tymery nhagâikeho ara, nhuruto ara warâ lâpylâ Deus tynynonro modo nhagâikely, nhurudyly warâ.

<sup>9</sup> Kunwym domodo kurudyly, kagâikely warâ tydase kurâ, tâinwânse-ro warâ, kiyn-rendilymogue. Kunwym kaynonro kagâikely, kurudyly warâ olâ koendâ kyjidane kuru. Kyigueduo aunloenlâ mawânâ ise eagâ kydawily.

<sup>10</sup> Iamudoem kydawily ume, kunwym domodo kagâikedâmo, âdara koendâ kydawily tiuntuhoem, aunloenlâba olâ mârâ. Koendâ kitoem Deus kagâikeho, kuruto warâ olâ aunloenlâ, mâkâ ara kitoem, âdy inakanhe aguiempyra kitoem warâ.

<sup>11</sup> Inakanhe aguitobyry wâgâ kagâikeduo, tâjityenze kurâ, tuomareba warâ, aguykehonday. Ilâpygueduo olâ âdy Deus konomedâdyze ato awily xuturimbyryem kurâ, Deus ize ato ara ise kurâ, kurâ domodo agâ koendâ ise kurâ warâ.

### *Deus wâgâ kuruto*

<sup>12</sup> Mâsenagazedilymo ume ton-honremba tâise lelâlâ wâne âmaemo, âzeon-hondâdaungâ olâ, Deus amidysemo ato ara amisezedomoem. Adaimpâni ara itaungâ, tokozelygue tâwâkonubaze lelâlâ wâne, ton-honwandonze olâ tadaimpâdily nimoba tâitoem. Tâgaseim ara lâpylâ itaungâ, tixigâmylygue tâzeumpaze lelâlâ wâne, tixigamadonze olâ tâgaky tien-wanikehoem.

<sup>13</sup> Koendâ lelá aitaungâ, âpemugumo ton-honremba kulâ Jesus einwânni nheinwândily eon-honwandoem, ihudune tâwâneim nihugueba itoem, ânwa tywyguneim iwygueim ara, tâtaguneim etamuim ara warâ itaungâ.

<sup>14</sup> Âzeon-hondâdaungâ, ânguy agâ mâtuebabyra, âewiâpabyra warâ mitomoem, Deus ize ato ara lelá mitomoem, Arâpa-ro watay, ânguy Kywymâry Jesus netaymba ise.

<sup>15</sup> Tâmaynelâ itaungâ, ânguy Deus koendâ kâeniðâba nâxigueba itoem, Deus izepa ato aiedily imâem mânhenhomba mitomoem. Inakanhe tadawily imâembaombyry, imâem tâise mawânâ, idânârâ tawâse warâ, nady kâgueâni iwindy imâem idily, âzedypâguely, idânârâ nady âpa ezano inakanhe ieni ara.

<sup>16</sup> Tâmaynelâ itaungâ, ânguy eagâ tohoguim-hobyry keba kulâ nynanâbyra itoem.

Tonomeguelâ itaungâ. Deus âwankuem kâietaundâ; anhekyly, agueho warâ âwankuem kâietaundâ, Esaú, Isaque imebyary, Deus ezewenry âwankuem nhetobyry ara. “Koendonro ise idânârâ tâjimebyary modo agâ agânhekyly” kewândymy Deus. Esaú olâ myakâwândy tâwindygue kulâ, tâjimebyary nhemakely, tukonoram tuduze ipyniry ebyryem.



<sup>17</sup> Tutuzelâ âmaemo Esaú agâ aityby. Ilâpygueduo, “Tunwynram urâem Deusram ekagâ, yagâ koendâ itoem” kewândymy. “Nudupa enra, âukono xurâenma sekadai. Âdaunloenlâ tuguzezeba awârâ-ro warâ” kewândymy nhunwym. Esaú, tuogunre, tunwynram agueze-semâ lâwânemy; nudupa olâ myakâwândy nhunwym agueontoem, tokalelâ mawânâ tâjimebyary xurâem ekadyly.

<sup>18</sup> Tyanuneba Deus eydâ atoam aindylimo. Kydamudo olâ myakâwândy iwague Deus âepanâgüehodâ. Enanâgüewâdaungâ târâ iwy Sinaidâ Deus, Moisés agâ agueze âepanâgüehobyry. Toenzepa lelâlâ myakâwândy eanumo. Tâmyguyne myakâwândy eunu iwy wâgâ, toenzepa iamu warâ. PEBYK PEBYK idyly, peto eunu iwy wâgâba egasely emâmomy. Toenzepa myakâwândy adapezeiny.

<sup>19-20</sup> Trombeta ton-honre kehoem âjidyly. Deus, “Xirâ iwy onwa wopaji taintoem âkuze keim tuhugue tamytâze ise âdyoly, kurâ, ânguydo imeom alelâ” kely tindatuomo, “Tindatondyzeba xina” kewânmmomy. Arâ aguelymo myakâwândy, mâkâ agueho nemaemba tawylmogue.

<sup>21</sup> Kyanedâ lelâlâ myakâwândy mârâ nhekylymo. Kyanoem lelâlâ awylygue myakâwândy Moisés aguely: “Tapâne kehoem urâ ianugue” kely.

<sup>22</sup> Âmaemo olâ tyanepa, Deus agâ amygueduomo. Eagonro iwyrâam aindylimo waunlo ara, mârâ iwy Sião kaynonroam, Jerusalém kaynonro kelygue tâzekeim, Deus Âdaunloenlâ Igedânry eydâ ato mârâ. Toenzepa târâ anju domodo awyly, tapâgüely eki kehoem.

<sup>23</sup> Jesus eynynno modo Deus nhuduly koendonro emakeze âtâdyguyhobyryam aindylimo, saguhoem tâjimebyary tunwym emaymba koendonro nhemakehobyry ara. Jesus einwânny modo ezedy iwenibyem mawânâ livru wâgâ târâ Deus eydâ atodâ. Deusram saintybyem âmaemo, mâkâ ise tâjigueduo âdy aini, aitânry warâ awyly kagâ agueim. Deus einwânny modo igüewâtbyby ejidyram saintybyem âmaemo.

<sup>24</sup> Jesusram saintybyem âmaemo, mâkâ iwelo tâdâseinwândo aienibyryam. Kruz wâgâ tyigueday tunu iapâmâ, inakanhe kydawlyly xygakeze, saguho tâzezewenry ume tâjiunugue inakanhe itomobyry xygakehoem iwinkehobobyry ara. Awylygue tyanepa mawylimo, Deus agâ amygueduomo, Jesus târâlâ awylygue. Enanâgüewâdaungâ Abel aitobyry. Caim tukono Abel xyâwânmy. Onro onwa myakâwândy iunu apâdyly. “Abel iunu kâentuo, tadaenlu kâindadyly, xyâimpyry kâenagazedoem nhekadyly-ro waunlo ara” kewândymy Deus. Jesus olâ myakâwâm tâweântoem nekabyra, tunu tyapâze kruz wâgâ tyigueday. Aguely myakâwâm: “Pabai, xirâ inakanhe aitomobyry xygakegâ; âdy adienkyly nutuwâbyra asaemo” kely lelâ.

<sup>25</sup> Awylygue tâmaynelâ itaungâ. Deus âyanmo aguely-ro watay, mâindadyseba tâiseba itaungâ. Deus âyanmo agueduo, iwantaguedaungâ. Saguhoem Moisés “Aietaungâ” kehobyry aniempyra ituomo, Deus myakâwândy kydamudo tânagazehonze. Arâ lâpylâ kurâ iwerâ mâkâ kaynonro “Aietaungâ” kehobyry aguiempyra kurâ-ro watay, âsenagazeze lelâlâ kurâ. Kieinwâmpyra kydatobyry wâgâ nuduwâpyra awârâ tâdâsenagazedily amaymba kydâsemaguehoem.

<sup>26</sup> Saguhoem, iwy Sinaidâ adâkeday, onro ekâniwânmy Deus. Wakewândymy: “Aietonze urâ. Onro lelâba olâ ise kâenkâniën-honly, kau ekâniën-honze lâpylâ urâ” kewândymy.

<sup>27</sup> “Aietonze urâ” keduo, tutuze kurâ, nhugutyby modo adainze, âdugugueze warâ awyly. Tuguezenry modoma ise tuguzezeba, aunlolâ awylygue.

<sup>28</sup> Aituo, Deusram wakykenre: “Koendonro lelâlâ âmâ, âmâlâma ise xina iwymâry” kykenre. Deus aguehobyry âdaunloenlâ tuguzezeim mâkeba. Awylygue tuomare lelâ kine Deus agâ, kyzehoguene warâ, mâkâ ize ato ara. Deus âwankuem kiempyra kine, kydynrene warâ.

<sup>29</sup> Peto kyaduâni emyenro mâkâ.

## 13

*Âdara Deus kionmazeândyly*

<sup>1</sup> Âpynedaungâ, Cristo eynynâ âjipemugüem mawylmogue.

<sup>2</sup> Jesus einwânny modo mâenjitâbyra tâiseba itaungâ, mâuntudânrymo awylygue kulâ. Kiuntudânryenlâ kyam tâepanâgüeze mawânkâ anju.

<sup>3</sup> Jesus einwânny modo etadâdyby edyly kâzenanânehonwâdaundâ; eagâmolâ itagumo waunlo ara lelâ nidâ. Âsenagazeni modo eon-hondâdaungâ, mâsenagazedily ume on-hondâdyze matomo ara.

<sup>4</sup> Koendâ ohogüimbyem tadawlyly, inakai olâ ohogüimby modo âximohoem aiedyly. Uguondo modo tywydy lelâ nyanânâ, pekodo modo isoram lelâ nâdynanâo warâ. Uguondo, pekodo warâ tohogüin-hobyry keba kulâ xynanâni watay, Deus xurâem inakanhe

kulá. Ará lâpylâ ohogüindânry modo kywypadoem kulá aini modo Deus xurâem inakanhe awyly. Awârâ aieni modo enagazehonze Deus.

<sup>5</sup> Dinheru ize mawwlymo kulâ âutubamo nidâ. Tuomare lelâ itaungâ tâlá matomogue. Wakewâm mawânkâ Deus: “Ipa matomo xuduze urâ. Nhepyramo witaymba ise urâ. Odokebamo ise urâ warâ” kewândy.

<sup>6</sup> Awylygue tâegane lelâlâ, tâinwânse lelâlâ warâ aguykenre:

“Ywymâry Deus mawânkâ idani,  
iemawyadâdoem kâingâsedily watay.

Awylygue tyanepa wawwly.

Âwâlâ wâne urâem ânguylâ inakai aiese kely, yagâlâ olâ mâkâ Deus, itetâ-ro warâ”  
kykenre, itaumbry awo wâgâ iwenihobry ara.

<sup>7</sup> Deus itaumbry âyanmo egatuwânibry modo enanâgüewâdaungâ. Tyiguepa tawwly ara âdara atomobry, âdara iguehomobry warâ anghumo odaji ietaungâ, akaemo ara mâinwântomoem, akaemo anhetobry ara amânhetomoem warâ.

<sup>8</sup> Jesus Cristo nâtuguguewâbyra. Saguhoem tatobry aralâ mâkâ; arâlâ mâkâ iwerâ; arâlâ ise-ro warâ.

<sup>9</sup> Deus itaumbry awo wâgâ iwenihobry araba kulâ, Jesus agueho araba kulâ warâ inomedâdomo kâzeinwântaundâ. Âdalâ kulâ unâ egatuwâni modo tyampygueni ânwa iozepaom oze sani emyenro kulâ mawânkâ. “Kieinly wâgâ, kienlyly wâgâ warâ Deus ara kydawyly” tâkezemo. Kieinly, kieindânry warâ wâgâpa mawânâ kieinwândily imâem idyly. Kieinwândily imâem idyly, kagâ Deus koendâ awylygue lelâ.

<sup>10</sup> Kurâ domodo eynynâ Deus agâ aguewâni modo, inakanhe tâjitobry xygakehoem Deusram ânguydo imeom nhunru egameyby ewy nâtaymbamo myakâwândy, mâkâ nhunru iaduândily awylygue. Arâ lâpylâ saguho tâzezewenry tyeinwândilygue âsemagueze kewâni modo Deusram kygâtudo ara tygâseba awylymo. Kurâem kruz wâgâ Jesus anhetby wâgâ mawânâ kionmaendily, kien-hoguedily warâ.

<sup>11</sup> Deus ety oday kurâdo eynynâ aguewâni modo iwymâry kuru mawânkâ ânguydo imeom xyâppy iunu sani mârâ âji tynrenseim Deus Âepanâgueho odaji, inakanhe adâitobry, kurâ domodo inakanhe aitobry warâ xygakehoem ekaze. Ânguydo imeom iunu etyby, eguepybry âtâ itâdyly odayba tyesemo mykâinane iaduântoem.

<sup>12</sup> Alâpylâ myakâwâm xidadâ Jerusalém odayba Jesus iguely, tunu tyapâze, inakanhe aguitobry xygakehoem, tywykeba Deus ezaxi kâgawântoem.

<sup>13</sup> Awylygue Jesusram inoro. Eagâ anhetybymo ara kagâ anhetuomo kyzemaenre; tâwâlâ wâne kywypado modo awyly kyzemaenre lelâ olâ xidadâ odayba kruz wâgâ kyiguely waunlo ara.

<sup>14</sup> Xirâ onro anaym âji aunloenlâ kito lâpeba mawânâ. Târâ kaynâlâ mawânâ ise kâjidy kuru, Deus eydâ atodâ.

<sup>15</sup> Awylygue Deus koendâ awyly wâgâ, eon-honru wâgâ warâ aguykely kinmoba kine, kurâem anhetby wâgâ, Jesus Cristo iguehobry wâgâ. “Jesus Cristo kâmakerim, kywymâry warâ” tâkeze kurâ. Arâ aguykeduo, Jesus tâinwânse kydawyly tânehonze kurâ. Mâkâem kygâtudo, mâkâ agâ aguykeday kytaumbry warâ iwerâ eyam kiunduly, ânguydo imeom xyâppy iunu keba.

<sup>16</sup> Koendonro aiedily kinmoba kine, kagonro modo kyzemawyadâne warâ. Arâ aguidily-ro watay, Deusram âdylâ toenzepa kehoem ize ato kiunduly-ro waunlo ara xurâem.

<sup>17</sup> Jesus einwânni modo iwymârydo aguehobry aietaungâ, einwântaungâ warâ. Aguehomobry amânhedilymo-ro watay, koendâ ise âmaemoem, tuomare kehoem ise tâwanu anhedilymo-ro warâ. Aguehomobry mankadilymo watay olâ, âurutomobry âdyem âepyramo ise, tytynre ise akaemo-ro warâ Deus xurâem tâsewanily ara. Tyigueduomo, Deus enado, onro anaym xurâem tâsewanihobry wâgâ aguezemo. Jesus imâem mâinwântomoem adientyby wâgâ aguezemo. Awylygue akaemo tarâ atay imâem âsewanily, Jesus wâgâ imâem mâuntuhomoem.

<sup>18</sup> Xina xurâem ekazezedaungâ lelâ Deusram. Aunlolâ Deus “Aietaungâ” kehobry adientyby xina awyly. Awylygue mâkâ xurâem tywykeba tawwly tutuze xina.

<sup>19</sup> Âyanmo kâenkaguly kuru olâ Deus agâ amyguehomoem, inepa âyanmo ugonotondoem.

*Kata xypyryem Deus agâ aguehobry*

<sup>20</sup> Deusram augueday, warâ eyam auguely: “Deus, xina ekobyzegueho, xina koendâ ieni warâ âmâ. Pymâ Jesus igueduo kurâem ietonibry âmâ. Xina eni mâkâ tâguyeim, tâguy nheto ara. Kruz wâgâ tunu nhapâduo, tâdâseinwândo iwelopo xina awyly, âdaunloenlâ

adaindânry. Pymâ tâseinwândo selupe tyese myara lâpylâ xirâ iwelo tâdâseinwândo Jesus iunugue âynnonro modo agâ âseinwândybyem awyly.

<sup>21</sup> Idânârâ koendonro xinaram xudugâ, amânhedyse mato xina anhetoem. Jesus Cristo wâgâ ise ize mato xina agâ amânhedyly. Koendonro Cristo awyly, ton-honreim, tohogueim warâ awyly wâgâ aguykely kinmoba kine. Arâlâ nidâ” ugely.

*Âdypygueândo*

<sup>22</sup> Xirâ kâjitaumbyguehobyry kâinweniby mâintainduomo, koendâ iwantaguedaungâ, âmaemo Cristo eynynâ ypemugudo modo. Xirâ kâinwenily âurutomoem, Jesus einwândyly mâinmoba mitomoem. Imâsedo keba lâgâlâ xirâ kata kâinweniby.

<sup>23</sup> Timóteo, Cristo eynynâ kypemugu, kadeia oday awyly keankâ, Jesus wâgâ agueduo. Mâuntudyzemo olâ urâ, etagueybyem awyly. Inepa xarâ saindyly-ro watay, yagâ sase urâ, âyanmo IU ise udâly watay.

<sup>24</sup> Awâtârâ Jesus einwânni modo iwymâry domodo, idânârâ Jesus einwânni modo lâpylâ warâ xina iwynu nawâdâ, Cristo eynynâ âpemugumo Itália donro modo iwynu manwâtomoem aguelymo lâpylâ.

*Deus nhesemo*

<sup>25</sup> Âynynâmo Kunwym Deusram kêenkadyly, koendâ mâzehohomoem. Xirâ kulâ âyanmo auguedyse wato. Alâ kulâ.

## TIAGO Tiago Kata Inweniby

Xirâ kata wâgâ inwenily Tiago nhangahu odaji iemâmy Deus. Awylygue Deus itaumbryrylâ xirâ Tiago inweniby. Maria imery myakâwândy Tiago; awylygue myakâwândy Jesus iukonoem awyly ise eynynâ.

Deus, xirâ inwenien-honly myakâwândy, Jesus einwânni modo âdara adâidyly awyly nhutuhoem. Xirâ kata wâgâ tutuze kurâ, âzekiba lelâ idânârâ kiendyly awyly, âdypeom, âdypebaum amlâ. Jesus einwânni modo âtâdyguyhodâ tydinherugueim modo lelâ koendâ tâdaenkuzeim, tydinheruguenry modo pylâ koendâ tâdaenkuzeba-ro waypa kelype.

Koendonro aguyjiene, Jesus tâinwânse lelâlâ kydawlyly kienehon-hoem, kely tytainze kurâ xirâ kata wâgâ. Âkelomo kienmawiyadâbyra kurâ, kienagazedlyly warâ-ro watay, kykewâdyly kulâ, “Jesus tâinwânse urâ” kykely. Aguykeho tymanâzelâ kine, âdalâ kulâ aguykeba kitoem. Peto xigâlegueam poji nhawâdyly watay, imeâgâemba kehoem tugueze, myara lâpylâ kytanru iwylky inakanhe kyedyly.

Âdypeom turâem tâwanuneim modo nenokubyra nidâ. Koendâ lelâ nepywadâmo. Jesus einwânni Deus izepa ato anhedyly watay, eagonro modo nurudâ, âdalâ kulâ adâidyly imohomoem, Deus lelâ nheinwântomoem warâ.

### *Aguely adaguhô*

<sup>1</sup> Urâ Tiago xirâ iweninri. Deus, Kywymâry Jesus Cristo warâ emary urâ. Idânârâ Deus eynynonro modo kêendaenkuly tâinkonro modo lelâba.

### *Tâsenagazedlyly tâmaenze Jesus eynynonro modo*

<sup>2</sup> Cristo eynynâ ypemugudo, mâsenagazedlylymo watay, tâjityenzeba itaungâ, tuomare lelâ itaungâ.

<sup>3</sup> Tutuzelâ âmaemo, mâsenagazedlylymo umelâ, Jesus einwândyly mâinnoba mawyllymo. Awârâ wâgâ enehorimbyryem âmaemo, mâkâ einwânsezelâ mawyllymo.

<sup>4</sup> Mâsenagazedlylymo umelâ, Jesus mâinwândylylymo mâinnoba âmaemo watay, Deus ize ato aralâ âmaemo. Ize ato lelâ amânhekylymo. Koendâ kehoem ize ato aiedyly xutuimbyryem âmaemo. Ton-honreba mitaymba ise âmaemo, mâinwândylymogue. Izepa ato kulâ amânhetaymba ise âmaemo.

<sup>5</sup> Âda midylymo mâuntuba âmaemo watay, Deusram ekadaungâ. Kienkaduo, âdiempa kulâ xudunri mâkeba mâkâ; kienkadobyry wâgâ kagâ tyewiâtuneba ise mâkâ.

<sup>6</sup> Deusram kienkaduo olâ, kienkadyby nhuduly kyzeinwâne lelâlâ. “Xuduze keanra” kykeba kine. Kieinwândyly, kieinwâmpyra kidyly watay, parutabâ sahugânu ara kulâ kurâ, sapezenruam wayam, wayam âiehoim ara kurâ, Deus lelâ kieinwâmpyra kydawlylygue.

<sup>7-8</sup> Iwerâ tâinwânse, kopaelâgâem neinwâmpyra waunlo; âdy nhekadyby nâduduowâpyra ise.

### *Âdypeom, âdypebaum warâ*

<sup>9</sup> Âmaemo âdypebaum Jesus einwânni modo, tuomare lelâ itaungâ, Deus xurâem kurâdo tynrenseim âmaemo.

<sup>10</sup> Alâ pylâ âmaemo âdypeom modo, Deus tâlâ matomo nhainly-ro watay, tuomare lelâ itaungâ, Jesus tâinwânse mawyllymogue. Igueze âmaemo, nady sawanku adakâdybyem âdiempa kulâ ehogu, inepa iguely myara.

<sup>11</sup> Xixi ton-honre kehoem watay, âdâpigu nady tyaduânse. Sawanku tâihugewâze, tywâkureba tâise-ro warâ. Arâ lâpylâ âdypeom modo iguely, tâlâ tato modo imâem tientoem tâsewanily umelâ.

### *Deus mâkeba inakanhe aguitoem aienehoim*

<sup>12</sup> Kurâ Jesus einwândyly kinmobalâ kydâsenagazedlyly emanenrimbyry kuomazeânze Deus. Arâ kienmaenzedyly-ro watay, aunloenlâ kyigüepa kitoem aiese Deus, tâgaseim waunroem saintyby tâgatobyry ebyry nhemakeho ara. Awârâ mawânkâ adienkylyem aguehobyry tywyneni modoem.

<sup>13</sup> Inakanhe aguidyse lelâ kurâ-ro watay, “Deuslâ ‘Inakai aiekâ’ keim” kykeba kine. Ânguy Deus inakai anhetoem aienehonrim lâpeba; inakai modo aguietoem aguewâpyra lâpylâ mâkâ warâ.

<sup>14</sup> Deus xurâ mâkeba awârâ inakanhe adâjidyly. Kurâlâ mawânâ Deus aguehobyry kiankadoem inakanhe aguidydonro. Atâ wâgâ eturu tientuo mawânkâ kanra âsenogudyly, iwogonro sawâse idâly; nhawâtu, adaweoly; arâ lâpylâ mawânâ tâwâlâ kulâ kydâsenogudyly, Deus izepa ato aguiendyse kydawlylyguelâ.

<sup>15</sup> Inakanhe aguidyse kydatogue kydâpaunzeduo mawânâ inakanhe aguidyly; Deus aguehobyry kiankadyly. Itaumbyry kiankaduo, kyiguelylâ, aunloenlâ eagâpa kidyly-ro warâ.

<sup>16</sup> Cristo eynynâ ypemugudo, tâsenoguzeba itaungâ. “Mârâ inakai agânhedyly, Deuslâ mawânkâ agânhetoem ageuim” tâkezeba itaungâ.

<sup>17</sup> Idânârâ koendonro modo, iwâkuru modo warâ kienmakely Deus kaynonrodâlâ âewyly; xixi, nunâ, ximukâ warâ tytanrugue kulâ xugunipryry nhuduly. Xixi, nunâ, ximukâ warâ tâjidydâpa tâtugugueze. Âtugugueduo tyamase. Deus olâ nâtugugueba; aunlolâ kagâ awyly, kurâem koendonro modo aiese,

<sup>18</sup> Tâwâlâ ize tawylyguelâ kyazeântondyly, itaumbyry kienwântoem. Etâdyby ewily waunroem ekaunâdyby wâne eyam xuduly, myara lâpylâ waunroem kydawyly, idânârâ nhugutyby modo enday.

*Deus aguehobyry ara aguine, kindadyly kulâ warâ inkâba*

<sup>19</sup> Xirâ enanâgüewâdaungâ, Cristo eynynâ ypemugudo kâinwynegyuly modo. Onhondybyem lelâ itaungâ idase. Inepa kehoem âdy kâjihoguwâdaundâ; koendâ wao amyguehomo xutuwâdaungâ; inepa tyewiâpazeba itaungâ warâ.

<sup>20</sup> Kyewiâpaduo mawânâ Deus izepa ato ara kulâ aguidyly, aguykely warâ.

<sup>21</sup> Idânârâ inakanhe tadawyly imowâdaungâ. Eagâ mohogüin-homobyry keba kulâ kâdynanâdaundâ. Nady âpa ezay etâdyby wâne tyazeze, ago tâise, tâwiseze warâ myara awârâ Deus itaumbyry, kienwântuo kydâsemaguehoem idyly. Deus aguehobyry kyangahu odaylâ watay, ize ato adyese kurâ. Koendâ lelâ itaungâ, aguehobyry ara lelâ amitomoem.

<sup>22</sup> Tâsenoguzeba itaungâ. Idadyly kulâ warâ inkâba Deus itaumbyry; aiedyly koendonro kuru.

<sup>23</sup> Takaday espelhu oday tahule kulâ âzeni ara awâkâ kurâ Deus aguely indadyly kulelâ, ageho ara anipyra waunlo.

<sup>24</sup> Âzedyly. Idâly. Inepa âdara tawyly nhenanânehonly.

<sup>25</sup> Koendâ kehoem unâ iwâkuru tâdâsemaguehoem Deus aguehobyry aguidyly-ro watay, arâ ise âdaunloenlâ kydzewentâoba kydawyly Deusram. Deus inwenien-hoymby kienanânehomba aguiensezedyly lelâ warâ watay, idânârâ aguienkyly modo koendâ ese Deus.

<sup>26</sup> Jesus einwânniem lelâlâ kydzâdutuly, aguykeho kinmanâbyra olâ kurâ warâ watay, âwâlâ kulâ kydzâsenogudyly. Deus xurâem aguienkyly âdyem nitaymba, Deus niomazeândaymba awârâ.

<sup>27</sup> Jesus tâinwânse kydawyly kienehondyze Kunwym Deus, todonenry modo, pypâ modo warâ kienmawyadâdylygue, mâkâ izepa ato aguiempyra kydawylygue warâ. Arâ mawânâ xurâem tywykeba kydawyly.

## 2

*Âzekiba koendâ kydawyly nidâ âdypeom agâ, âdypebaom agâ alelâ*

<sup>1</sup> Cristo eynynâ ypemugudo, Kywymâry Jesus Cristo, Kunwym Deus iwâkuru enehoim, einwânny warâ âmaemo. Awylygue âzekiba kurâ domodo sawiwâtaungâ, âdypeom, âdypebaom alelâ, mâkâ lelâ manwilymo, mâkâ mawipamo waypa.

<sup>2</sup> Deus ehogueze âtâdygybyem matomoam azagâ uguondo egawândyly, tokalâ tydinherugueim, tâtygoengue kehoem, ane ouruguetobe warâ, eagonro olâ âdy odo keba, ety adaugepyem, tywyke kehoem warâ.

<sup>3</sup> Tâtygoengueim lelâ mawilymo, âji iwâkurudâ mâenkanâgyulymo. Âdy pebaonram, “XYDYK warâlâ ikâ” myguelymo. “Onwâgâlâ ikagâ ypebaylâ” myguelymo.

<sup>4</sup> Arâ amituomo, ânguy âzekiba mâempyra mawilymolâ awârâ. Âdypeom manwilymo, toenzepa idinherugue kulâ, âdypebaom pylâ mawipa âmaemo-ro. Koendonro mâkeba awârâ arâ adâjidyly!

<sup>5</sup> Idataungâ, Cristo eynynâ ypemugudo kâinwynegyuly modo. Xirâ onro anaym âdy pebaom modo Deus induakely, toenzepa tâinwântoem. Tâlâ ise akaemo târâ Deus pymâem atodâ, Deus “Ywyneni modoam xuduze urâ” kehobyry.

<sup>6</sup> Âdypebaom modo Deus induakeby izepa olâ âmaemo! Âdypebaom modo mâkeba inagazenimo! Âdypeom modolâ pymâ modoram igamenrimo, mâzewentâohomoem.

<sup>7</sup> Jesus Cristo eynynonro âmaemo. Âdypeom modo olâ mâkâ ezedy wâgâ inakanhe kulâ aguenri.

<sup>8</sup> Iwenibyem Deus itaumbyry awo wâgâ: “Agonromo agâ âpynedaungâ; koendâ mâzetomo ara, arâ lâpylâ agonromo agâ koendâ âzetaungâ.” Xirâ tâzewenry Pymâ Deus aguehobyry adyese âmaemo watay, mâkâ aguiendyse atolâ amânhekylymo.

<sup>9</sup> Âdypeom modo lelâ ize matomo, âdypebaom modo pylâ izepa âmaemo-ro watay olâ, Deus aguiendyse ato araba amidilymo. Inakanhe kulâ amidilymogue, Deus iwentâzemo.

<sup>10</sup> Ize tato lelâ Deus aguiendyse ato. Deus aguiendyse ato iweniwânmy Moisés.

Tokalâ Deus aguehobyry sakanibyry-ro watay, idânârâ nhakadylylâ mârâ. Mâkâlâ ise tâwentâguezeim, idânârâ Deus aguehobyry aniempyra awylygue.

<sup>11</sup> “Eagâ mohogüin-homobyry keba kulâ kâdynanâdaundâ. Ânguy kâdyâwâtaundâ” kewândymy Deus. Âdykâ âkelo agâ mipyra lelâlâ wâne âmaemo, âguedy xyâimpyry âmaemo-ro watay olâ, Deus iwentâzemo, idânârâ aguiendyse ato mâinwâmpyra matomobyry wâgâ.

<sup>12</sup> Deusram emakeybyem mawylymogue, ize ato ara lelâ aitaungâ, aguewâtaungâ warâ. Xypyry etay koendonro âyanmo xuduze mâkâ, “Koendonro aiekâ” kehobyry aienibyryem âmaemo-ro watay. Amânhepyramo-ro watay olâ ise koendonro nudupa âyanmo.

<sup>13</sup> Ânguy kintyembyra kurâ-ro watay, Deus kyttyendaymba lâpylâ ise xypyry etay, âdara kydawyly wâgâ adâkeday. Âkelo ityeni kurâ watay olâ, Deus kyttyenze lâpylâ.

*Jesus eynynonro lelâlâ kurâ watay, kaikânro modo kyzemawyadâne*

<sup>14</sup> “Jesus einwânni urâ” myguelymo, âkelomo xurâem koendâ amipyra âmaemo warâ watay olâ myguelymo kulâ, Cristo eynynâ ypemugudo. Amygueduomo kulâ Deus imakewâbyramo ise.

<sup>15-16</sup> Tâwâlâ wâne Jesus einwânni âdypebaom modoram, “Tâseguâdâzeba itaungâ. Deus âpynirimo, itymo owogonromo warâ xuduze” myguelymo; mâwampyramo, mâentydâbyramo warâ watay olâ ise amyguehomobyry âdyem nîpyra. Tâlâ âmaemo tuduzeim, pyni, âtâ tyeseim warâ watay, âunduwâtaungâ.

<sup>17</sup> “Jesus tâinwânse urâ” kykely, ânguy kienmawyadâbyra kulâ-ro watay, kieinwânto âdyem nitaymba, igueypy ara kulâ.

<sup>18</sup> Tâlâ wakeim modo: “Koendonro agânhepyra wâne urâ. Cristo kâinwândylygue olâ ise kâsemaguely” keimpe âmaemo ewy. Tâlâ pylâ olâ, “Urâ olâ, kâsemaguely ise koendonro agânhedilygue, Jesus kâinwâmpyra wawyly umelâ” keim modo. Eyanmo wauguely olâ: “Nuduwâpyra Jesus kieinwântoem, koendonro aguiempyra kulâ. Koendonro aguienkyly wâgâma Jesus tâinwânse lelâlâ kydawyly kienehonly” uguely.

<sup>19</sup> Tutuzelâ âmaemo Deuspe awyly. Âkealâ awârâ. Awârâ mâuntulymogue kulâba olâ ise mâzemaekelymo. Kadopâ inakai modo mawânkâ Deuspe awyly tutuzemo lâpylâ, tytazemo-ro warâ.

<sup>20</sup> Tuândy awâkâ, “Jesus tâinwânse urâ, âdy koendonro agânhepyra olâ urâ âkelomo xurâem” keim. Koendonro aguienkyly wâgâma Jesus tâinwânse kydawyly kienehonly.

<sup>21</sup> Enanâguewâdaungâ Deus aguehobyry kydamu Abraâoram, Abraâo tâinwântâ lelâlâ awyly tientoem: “Âmery Isaque xyâgâ, ânguydo imeom yam mâengamehoem mâyan-ho ara” kewândymy. Aituo Abraão tuhu angatoam ietyby onwa Isaque nhadyly, nhegue-tunâdyly. Nhâly ume kehoem myakâwândy: “Akâiedâ! ‘Aiekâ’ uguehobyry amânhehoem on-hondybyem mawlyly xutuaguilâ” kely Deus Abraâoram.

<sup>22</sup> Deus “Aiekâ” kehobyry ara kehoem myakâwândy Abraão aidyly, Deus tâinwânse lelâlâ tawyly tienehon-hoem, adienkyly modo wâgâ.

<sup>23</sup> Deus itaumbyry awo wâgâ iwenibyem: “Deus aguely Abraâoram: ‘Pymâ Deus tâinwânse lelâlâ âmâ. Awylygue âdy iwentâdo lâpeba âmâ’ kely.” Aituo myakâwândy Abraão “Deus eataen-ho” kehonly.

<sup>24</sup> Arâma kieinwândyly kienehonly, “Aiekâ” kehobyry aguiendylygue. Arâpa watay, kieinwândyly âdyem nitaymba, Deus xurâem tâwentâguezenry keba kurâ-ro warâ.

<sup>25</sup> Enanâguewâdaungâ pekodo MON waunlo Raabe, azagâ ugondo israelita nhoentobyry. Sodadu israelita domodo iray igonotyby myakâwândy akaemo azagâ, xidadâ enuagaenze. Deus wâgâ unâ tindatyby tâinwânse tawylylygue myakâwândy Raabe akaemo azagâ ugondo tâty oday soense tyanepa awyly. Ilâpyryem âsemaguehomoem eagonro ânwa oze indâwantâdylymo. Adienkyly wâgâlâ tâinwânse tawyly nhenehonduo, ewentâdo lâpeba Deus xurâem.

<sup>26</sup> Kâgadopyry âzetyly-ro watay, igueypyem kurâ. Arâ lâpylâ, Deus aguiendyse ato aguiempyra kurâ-ro watay, “Jesus einwânni urâ” kykeho, âdyem nîpyra awyly. Igueypy ara kulâ Deus kâendyly.

### 3

*Kulugue inakanhe aguykeho kaindâ lâpylâ*

<sup>1</sup> Âmaemo ewy aguipalâ tâise Jesus eynynonro modo âtâdyguyhodâ enomedâniem ini, Cristo eynynâ ypemugudo. Xina Deus wâgâ enomedâni modo ise, âdalâ kulâ xina aidyly-ro watay, âsenomedâni modo takaze kehoem tâwentâguezeim, tutuzelâ âmaemo.

<sup>2</sup> Idânârâ kurâdo Deus izepa ato adyese lelâ. Âdykâ lâgâlâ ânguy Deus izepa ato aniempyra nipyra. Mâkâ âdalâ kulâ aguedânry, Deus ize ato ara isezedyly lakuru. Adâkeho modo, adienkyly modo, tyangahu oday tunâry modo warâ tymanâze mawânkâ.

<sup>3</sup> Kawaru itano tyese kurâ, ize kydato ara aguientoem. Mârâgue kulâ mâkâ kiempagunâdyly, kiangâikely warâ.

<sup>4</sup> Etaungâ pepi imâsedo; sapezenru ton-honreim mârâ igononi, leme imeimbyry kulâ olâ sani sagâikeim warâ.

<sup>5</sup> Alâpylâ kulu, imeimbyry kulâ wâne, sawoem kitoem, imâsedoem kehoem kydâdutuhoem warâ adyese olâ. Etaungâ! Peto imeimbyry wâne, poji imeâgâemba tugueze olâ!

<sup>6</sup> Kulugue inakanhe aguykeho kaindâ lâpylâ, peto ara kehoem. Idânârâ unâ inakai adâkeze kurâ. Inakanhe aguykeho idânârâ kodo inakanhe nhedyly, tâzewânu inakai kodo nhahuly wâneam myara. Peto poji anaym adapeguily-ro watay, idânârâ tyaduânse, myara lâpylâ kunâry iwyku MON idyly, idânârâ kodo nhahuly, kyigueho odaji kehoem. Âdykâka awârâ âewyly? Infernuda, Satanâs ejidydâ.

<sup>7</sup> Idânârâ ânguydo imeom tahozeânze kurâ, tawâguneim modo, idu odano modo, ârahujini modo, paikano modo warâ. Kianwâdyly watay, tâwâlâ ize kydato ara aguiendyly.

<sup>8</sup> Ânguy olâ tulu nimanâbyra, inakanhe adâkeba tâitoem. Âgâu kâtobyry ewânedyly, ara lâpylâ inakanhe aguykeduo ewânedyly, kyâdâ-ro warâ. Ânguy tulugue inakanhe adâkeho aguepa tâitoem aguepa nitaymba.

<sup>9</sup> Kytanrugue Kywymâry, Kunwym Deus koendâ awyly wâgâ adâkeze kurâ. Mâkâam aguykehogueâ lâpylâ olâ âkelomo kiunâguedyly Deus tara nhugutyby modo.

<sup>10</sup> Kytaybalâ unâ Deus koendonroem awyly wâgâ aguely egasely, mârâ oze lâpylâ olâ kurâ domodo wâgâ inakanhe aguykely egasely. Arâ aguykeba kine, Cristo eynynâ ypemugudo.

<sup>11</sup> Paru tânyzeim, paru tânyzenry warâ âzetay lelâ inkâba iazely!

<sup>12</sup> Cristo eynynâ ypemugudo, figu lelâ figueira ewily, azeitonague pylâ ewitu nitaymba. Uva lelâ uva edy wogonro, uva, figu warâ inkâba. Paru tânyzenry egasehodâ, paru tânyzeim negasewâbyra. Awylygue kytarygue koendonro wâgâ lelâ aguykenre, inakai modo wâgâ lâpylâ waypa.

#### *Azagâ tâzenomery wâgâ agueho, Deus nhuduypy, Diabu nhuduypy warâ*

<sup>13</sup> Âduaymo tâlâ âdy iozeno, âdy iozepaom warâ awyly xutuim watay, koendâ adâidylyguelâ awârâ nenehomo. Koendâ adâidylygue, sawoem nipyra tiuntuyby aniendâmo.

<sup>14</sup> Angahumo oday agonromo wâgâ mâsewânilymo, âdalâ kulâ amyguelymo, amidilymo warâ watay, "Tonomegheim urâ" tâkezeba itaungâ; mygiewâdylymo kulâ awârâ.

<sup>15-16</sup> Deus konomery nhuduypy mâkeba awârâ. Xirâ onro anano kulâ awârâ. Tâzenomery inakai Diabudâpa âewyly, adyese kurâ-ro warâ, kyangahu odaylâ mawânâ âtugudyly. Âdykâlâ âkelomo isejigy wâgâ âsewânirimbe, âkelomo takaze âdutuimbe warâ watay, tâdâtuebadilybe, inakai modobe warâ.

<sup>17</sup> Konomery Deusdâba âenibe kurâ-ro watay olâ aguidyly, âdygue kâwentânehomba. Ânguy kieumpyra kurâ; kintogyba kurâ. Koendâ lelâ ize kydawyly. Idânârâ agâ kataenhon. Toenzepa kinwynedyly lelâ. Koendonro modo aguienkylygue âdaunlo modulâ kienmawyadâgyly. Aguykehogue, aguienkylygue warâ ânguy kienokubyra kurâ warâ.

<sup>18</sup> Deus xurâem koendonro tâdâsegybe, tâjidueku warâ epagunâni modo ewanopyry, ewy etâdyby wâne, ewilyem tâzekaunâoze myara.

## 4

#### *Deus ize ato agâ âseinwândânry modo*

<sup>1</sup> Âdykâbaka tâdâjiewiâsedyly, tâdâsegybebydze tadawyly warâ âewyly, inanjimo? Deus mâinwândyse lelâlâ wâne âmaemo, mâkâ aguehobyry takaze lâpylâ olâ âmaemo. Angahumo oday tâdâjigitogylybe-ro waunlo ara.

<sup>2</sup> Toenzepa âdydo imeompe midyse mawylymo. Ize matomo manâto peba-ro watay, kurâ tyâze lelâlâ âmaemo, âdype mitomoem. Mâkâ tâlâ atogue toenzepa tâsewânize âmaemo. Awylygue mâintogydyze mawylymo, ize matomobe mitomoem. Deusram mâenkabyra mawylymogue olâ, ize matomo peba mawylymo.

<sup>3</sup> Deusram tâkaze lelâlâ wâne âmaemo, mâenmakeba olâ âmaemo. Koendâ âunâgumogeba mâenkadylymo awylygue, Deus nudupa awyly. Tâwâlâ omaromoem kulâ mawânâ mâenkadylymo.

<sup>4</sup> Deus aguehobyry mâinwâmpyra mawylymogue, ize ato aiedyly mâinmolylo, ize matomo amânhetomoem kulâ. Tutuzelâ âmaemo, Deus ize ato agâ âseinwândânry modo ize matomo watay, Deus idueryem midylymolâ awyly. Augueondyly, Deus izepa ato ara kulâ xirâ onro anaym amidilymo watay, Deus idueryem midylymolâ lâpylâ.

<sup>5</sup> Wará iwenibyem awyly Deus itaumbry awo wâgâ: “Deus kyispiritury kuodaxi ienipryem. Awylygue koendonro, koendâpaom alelâ aguiendyse kydawly.”

<sup>6</sup> Deus koendonroem awyly olâ ton-honreim kuru, inakanhe aguipryra kitoem. Awylygue Deus itaumbry awo wâgâ warâ iwenibyem awyly: “Tadaloenly kewâni modo ize inkâba Deus; ‘Âdy mâkeba urâ’ kewâni modo tâmawyadâze, eon-honrumo tuduze warâ olâ.”

<sup>7</sup> Deus aguehobyry ara aitaungâ. Diabu, Deus izepa ato âyanmo aienehonze keduo, âdaunloenlâ aguely kâjiwantaguedaundâ. Idatânry ara midylymo lelâ-ro watay, âydâpamo âxiguze lelâ.

<sup>8</sup> Deusram iwaguepa aintaungâ, iwaguepa âyanmo saintoem lâpylâ. Imarymo tywykeba itoem mâzemaunguehomo ara, inakai modo amânhekylymo imowâdaungâ, Deus enanaym koendâ mitomoem, âmaemo Deus izepa ato aieni modo. Inakanhe mâpaunzedomo imowâdaungâ, âmaemo koendâ lelâ amidylymo waunlo emyenro modo.

<sup>9</sup> Toenzepa âjityendaungâ, toenzepa kehoem ohogüendaungâ warâ inakai modo amânhetomobyry wâgâ. Âilumo ogunrumoem ietaungâ, Deus mâinwâmpyra matomobyry mâuntuduomo. Omarumo âtynrumoem ietaungâ warâ.

<sup>10</sup> “Âdy mâkeba urâ” kewâtaungâ Kywymâry Deusram. Arâ ise xurâem, tynrenseinhe mawylymo.

*Ânguy kiunâguebyra kine*

<sup>11</sup> Cristo eynynâ ypemugudo, âkelomo kâdunâguedaundâ. Deus ânguy kiunâguebyra kitoem adâkeze. Âdaituoba kulâ âkelomo mâenwentâdylymo, mâunâguedylymo warâ watay, Deus aguehobyry mâunâguedylymo. Deus aguehobyry mâunâgueduomo, Deus takaze mâdutulymo. Âmaemo mawânâ âdy ioze, âdy iozepaom warâ awyly agueim, Deus keba. Arâ-ro watay, Deus einwânneimba tâise âmaemo, Deus xuturin-em ise mygüewâdylymolâ.

<sup>12</sup> Deus lelâ warâ “Aitaungâ” keim. Mâkâ lelâ ânguy tâwentâzeim, tâwentâzenry warâ awyly xutuim. Mâkâ lelâ ise xypyryem agueim: “Mâkâ modo ise kâenmakely. Mâkâ modo ise ydâpa kânhekyly” keim warâ. Awylygue ioze inkâba ânguy kienwentâdyly.

*Kopaelâgâ aini ânguy nutuwâbyra*

<sup>13</sup> Idataungâ. Watâkeze âmaemo: “Iwerâ atay, kopaelâgâ atay warâ idâze urâ xidadâram. Tokalâ anu ise târâ wawyly. Âdydo imeom sanâse, vende iese warâ urâ, toenzepa ise ydinerugy” mygüelymo.

<sup>14</sup> Âdy kopaelâgâ agâmo aini mâuntuba olâ âmaemo, âigüelymo atay, âigüepamo atay warâ. Ikamu emyenro kulâ âmaemo, âewyly, sakadyly waunlo.

<sup>15</sup> Awylygue warâ agüewâtaungâ: “Deus ize-ro watay, auguehobyry aiese urâ” kewâtaungâ.

<sup>16</sup> Kopaelâgâem aini tutuze mâdutulymo-ro watay, Deus takaze mâdutulymo awârâ. Inakai kulâ arâ tâdâpaunzedyly. Mâkâ lelâ awârâ xuturim, âmaemo mâkeba.

<sup>17</sup> Mâkâ Deus aguehobyry adyeseinhe tiuntuly umelâ aietânry, Deus aguehobyry nhakadylylâ mâkâ.

## 5

*Toenzepa tydinerugueim modo xuruto*

<sup>1</sup> Idataungâ, âmaemo toenzepa âdydo imeom sodo modo, Deus einwântânry modol! Ohogüendaungâ, adaenkewâdaungâ warâ wayam mâsenagazedomo wâgâ.

<sup>2</sup> Toenzepa tâl matomo modo âdyempa itaynly, iwânzewâdyly, xuhurozewâdyly warâ. Itymo owogonromo tâwânseim tuonroam âdâhowâdyly.

<sup>3</sup> Âdinerurumo, âsejiguyumo ourugüeto warâ mâenkanâdybymo tohozeleba idylylâ ise xutuen-hoim âdy pebaom modo mârâgue mâenmawyadâbyra matomobyry. Xypyry etaji kehoem mawânâ âdinerurumo, âsejiguyumo warâ idâtyguyimbyryem mawylymo âmaemoem lelâ. Awylygue ise peto nhâtânry amaym mâsenagazedylymo.

<sup>4</sup> Âpimo ezay tâwanunem modo ewanopyry ara mâempywadaymba âmaemo. Kywymâry Deus Ton-honreim olâ tâwanunem modo saenlumo tydase.

<sup>5</sup> Âdy ipa matomo lâpeba âmaemo xirâ onro anaym. Koendâ lelâ kehoem ize mawylymo, âdyam ize matomoam tâtâze lelâ âmaemo warâ. Tapirâ xyâhoem sadyzeândyly wâne myara, adyzesedylymo pyni tâkubâgueingue, tâwânseingue warâ, âigüehomo odaji idyly ara.

<sup>6</sup> Âdaitânry modo tunâgüeze, tâwentâze warâ âmaemo, pymâ modo enanaym, xyâhomoem kulâ. Âdara âsemaguehomo peba-ro warâ, âdypeom keba awylymogüe.

*Kydâsenagazedyly kienmaen-hoem kuruto*



<sup>7</sup> Cristo eynynâ ypemugudo, idânârâ mâsenagazedilymo emawênâdaungâ, Kywymâry Jesus odopâdily ara. Etaungâ. Âpa ezary sodo kopâ waunro ihuguely nhenuendily tientâdoem. Ilâpyryem sahanânî ihuguely nhenuendily, tienkaunâdoem. Mârâ pyni nhekaunâgulyma tywyneim kuru, mârâgue mawânkâ ise ipynigu.

<sup>8</sup> Myara lâpylâ Kywymâry Jesus enuenze tynazeba itaungâ. Inepa ise odopâdily.

<sup>9</sup> Cristo eynynâ ypemugudo, âpemugumo Jesus eynynonro modo kâdunâguedaundâ, Cristo eynynâ ypemugudo, Deus inwentâbyramo itoem. Ohondybyem mawânkâ Jesus. Inepa ise âewyly, tâwentâzeim, tâwentâzenry warâ wâgâ agueze.

<sup>10</sup> Jesus mâinwândilymogoe mâzenagazeolymo emawênâdaungâ, saguhoem Deus itaumbyry aguewâni modo nhemaen-hobyry ara.

<sup>11</sup> Akaemo wâgâ koendâ aguykely olâ, tâsenagazedily umelâ Deus einwândily nimoba atomobyry wâgâ. Jô aiehohobyry enanâguewâdaungâ. Toenzepa âsenagazemâmy. Idânârâ tâlâ ato modo adainwânmy: imeombo, eguydo, isejiguy, ipi ezary modo; toenzepa ewâmamâ lâpylâmy warâ. Deus einwândily nimoba olâ myakâwândy. Ilâpygueduo olâ, koendâ kehoem myakâwândy Deus eagâ awyly. Idânârâ tâlâ ato adaimpy ejîpyano xuduwânmy Deus. Kytyendâ lelâlâ Deus, koendâ lelâ kagâ awyly warâ.

<sup>12</sup> Cristo eynynâ ypemugudo, aiese lelâlâ mâdutulymo watay lelâ, “Aiese urâ” kewâtaungâ. Amânhepyra mâdutuduomo olâ “Agânhepyra ise urâ” kewâtaungâ. “Tâwâlâ ise kau, onro warâ tytanrueg kula xugunipry ienagazenehony, âkealâba auguely watay!” tâkezeba itaungâ. Arâ Deus ezedy âwankuem mânhedilymo-ro watay, inwentâzemo, inagazezemo warâ mâkâ. Xirâ mâuntudyzemo wato.

<sup>13</sup> Mâsenagazedilymo watay, Deus agâ aguewâtaungâ. Omarumo ume, Deus koendonroem awyly wâgâ âgâtudaungâ.

<sup>14</sup> Iwâmadylymo watay, Jesus einwânî iwymâry modo igâsedaungâ, Deus agâ aguehoem, tâwâneim nhangahu onwa azeiti âdiempa nhetomoem warâ. “Kywymâry Jesus aguehobyry ara xirâ âmâem agânhedily” kezemo.

<sup>15</sup> Deus tâwâneim kua iese awyly tâinwânse kehoem Deusram nhekadylymo watay, tâwâneim kua iese Deus. Inakanhe aityby mâkâ tâwânein-ro watay, inakanhe aitobyry xygakeze lâpylâ.

<sup>16</sup> Deus izepa ato amânhedilymo-ro watay, agonromo agâ âkaduwâdaungâ. Deusram ekadaungâ, inakanhe amitomobyry nhygakehoem, kua âetomoem lâpylâ warâ. Deus ize ato lelâ aieni nhekadyby ton-honre lelâlâ, Deus ize ato aienehonze.

<sup>17</sup> Elias enanâguewâdaungâ, Deus eynynâ agueppy. Kâmyenro kulâ lâpylâ myakâwândy mâkâ. Kopâ nihugueba itoem myakâwândy Deusram nhekadyly. Trê anu, tuotagueze myakâwândy kopâ nihugueba awyly!

<sup>18</sup> Awârâ sakabygueduo myakâwândy, Deus agâ agueondily; kopâ ihuguehoem nhekadondily. Toenzepa myakâwândy kopâ ihuguely. Âdydo imeom etâdyby iazely, ago idyly, ekaunâdily warâ.

<sup>19</sup> Âpemugumo ewy Jesus eynynâ iozeno lelâ aniempyry-ro watay, inepa kehoem xuru-taungâ, koendâ lelâ nheinwântondoem.

<sup>20</sup> Xirâ enanâguewâdaungâ. Mâkâ iozeno einwântânry koendâ lelâ Jesus nheinwântondoem amânhenehonlymo watay, âsemagueze mâkâ. Inakanhe aitobyry modo Deus xygakeze. Igueduo, Deus agâpa nitaymba ise.

Tiago

## 1 PEDRO

### Pedro Saguho Kata Inweniby

Xirâ kata wâgâ inwenily Pedro nhangahu odaji iemâny Deûs. Awylygue Deûs itaumbryrâ xirâ Pedro inwenily. Jesus nhapygueni, aguely idani modo ewy myakâwândy Pedro.

Jesus einwânni modo tâsenagazedylgye âkelo âjiram âwientyby modoram myakâwândy inwenily kuru, iomazeândoem. Deûs itaumbryr egatuly izepaom modoram myakâwândy âzenagazeolymo. Aituo xirâ kata inwenily myakâwândy xurutomoem, einwândyly nimopa itomoem, tyeinwândylygye tânagazedylgye umelâ, Deûs ize atolâ anhesezedomoem warâ. Cristo tânagazedylgye nhemaen-hobyry ara, Tunwym ize ato aniempyrya nipyralâ, arâ lâpylâ tâise akaemo nhemaenly, tyeinwândyly nimopamolâ.

Xirâ kata wâgâ einwânni modo tâduruhozemo myakâwândy, âpynedomoem, nâpeâmbyra itomoem, tâsenagazedylgye nhemaen-homoem warâ.

#### *Aguely adaguho*

<sup>1</sup> Urâ Pedro, tywâgâ aguenriem Jesus Cristo ingonotyby. Âmaemo Deûs turâem iduakewâdyby modo wayam wayam ityby modoram xirâ kata kâinwenily, Ponto eynynonro modoram Galácia eynynonro modoram, Capadócia eynynonro modoram, Ásia eynynonro modoram, Bitínia eynynonro modoram warâ.

<sup>2</sup> Iduakewâdyby modo âmaemo Deûs aguehobyry ara, xurâem mitomoem. Deûs Ispiriturylâ âduakewânimo, turâem âetomoem, Jesus Cristo einwânniem tywykenry ara mitomoem. Jesus Cristo tunu tyapâze kruz wâgâ, inakanhe amitomobyry modo xygakehoem.

Alâ inanry ânynnâmo Deûsram kâenkadyly, imâem kehoem koendâ mâzehohomoem, âdylâ akaladânimo peba itoem warâ.

#### *Deûs agâ kito kinwânwânto*

<sup>3</sup> “Koendonro lelâlâ âmâ, tuomaenzeim warâ!” kykenre Deûsram, Kywymâry Jesus Cristo nhunwynram. Toenzepa koendonro kurâem aniendâ, xurâem koendâpa kydawyly umelâ. Iweloem kyetondâ, kyazeondyly-ro waunlo ara. Iweâma kurâ tutuze, “Aiese urâ” tâkehobyry aiese awyly kurâem. Jesus igueypyem awyly ume kurâem tyetonze myakâwâm. Awylygue, tâinwânse lelâlâ kurâ, mâkâ aunloenlâ tagâ kyese awyly kyigueduo.

<sup>4</sup> Deûs tynynonro modoram “Xuduze urâ” kehobyry kienmakely kinwânwândyly. Âdaunloenlâ adainrim keba, inakanhe ini keba warâ ise kienmakely târâ kâjidydâ.

<sup>5</sup> Koendonro modo mâenmakelymo nhontybyem târâ. Jesus tâinwânse mawlymogue, nhetâmolâ Deûs, eydâ atoram mydâlymo. Xypyry etay Deûs xutuen-honze, kienmakely tienkanâdyby âdaunloenlâ eagâpa kipyra kito.

<sup>6</sup> Awârâ wâgâ ohomaendaungâ, imakezemo mawânkâ Deûs. Mârâgue lelâba wâne iwerâ mâsenagazedylgye, aekuru tâjityenzeba olâ itaungâ. Sakani kulâ awârâ mâsenagazedomo. Tâese wâne, takaze olâ; aunloenlâ nipyra.

<sup>7</sup> Jesus tâinwânse kuru mawlymo eto awârâ mâsenagazedomo. Egâ wâneam ouru. Peto onwanji âieholy mârâ âjiguetolâ kuru awyly xutuhom myara. Âjiguetolâ watay, nadaimpa peto onwaym. Arâ lâpylâ Jesus tâinwânse mawlymo âzeholy mâsenagazedylgye wâgâ. Jesus mâinwândyly olâ âdyem ini kuru, ouru takaze, adainrim keba mawânâ ise. Jesus Cristo odopâduo, âyanmo Deûs aguely ise: “Tâdâsenagazedylgye lelâlâ wâne, arâlâ olâ Jesus mâinwânsezedylymo. Âdyren-honze âmaemo warâ, âwâkurumo, on-honrumo warâ xuduze urâ” keze mawânkâ âyanmo.

<sup>8</sup> Jesus mâinwynedylymo, âdykâ mâempyramolâ. Tâinwânse âmaemo mâkâ, iwerâ mâempyramolâ. Toenzepa omarumo, âmaemoem anhetyby wâgâ; âdara myguehomo nudupa lâgâlâ.

<sup>9</sup> Mohomaendylgye, Deûs imakelymo awylygue, Jesus mâinwântomobyry wâgâ warâ.

<sup>10</sup> Saguhoem Deûs itaumbryr egatuwâni modo koendâ kehoem myakâwândy awârâ tâdâsemaguely wâgâ tiuntudyze awylymo. Cristo âewyly iraylâ, mâkâ kieinwântuo kydâsemaguely awyly wâgâ adâkezemo myakâwâm, ânguy adâkeho awyly koendâ nutubamo olâ myakâwâm.

<sup>11</sup> Waunroenlâ, xutunrimo Deûs Ispiritury eyanmo aguewânmy: “Messias, Deûs ingonokyly, âsenagazeze. Âsenagazedylgye olâ âdyren-honze” kewânmy. Messias ezedy olâ myakâwândy aguepa. Awylygue aunlolâ aguelymo: “Ânguyka ise Messias, Deûs Ingonokyly? Aunlolâ âdaraka ise saindyly?” kezesylymo.

<sup>12</sup> “Messias wâgâ amyguelymo, âigueduom olâ ise awârâ aidyly. Wayam ise awârâ aidyly, âweonmo ume” kely myakâwândy Deûs eyanmo. Iwerâ unâ iwâkuru tâdâsemagueho

mâindadylymo, Jesus einwândyly wâgâ aguewâni modo nhegatyby. Xirâ unâ âyanmo egatuwânybyry modo Deus Ispirituryam aguehoymbyem aguelymo. Awârâ tâdâsemagueho wâgâ mawânkâ anju domodo toenzepa tiuntudyze awylymo wâne, nutubamo olâ ise.

*Deus amânhedysemo ato aiedyly kâjimowâdaundâ*

<sup>13</sup> Ohondybyem lelâ itaungâ, Deus amânhedysemo ato inepa amânhetomoem. Inanaynmolâ itaungâ. Aunlolâ mâenmakelymo iwânwântaungâ, Jesus Cristo odopâduo, “Koendonro xuduze urâ” Deus kehobyry.

<sup>14</sup> Deus mawânkâ âgâsenimo, xurâem mitomoem; awylygue mâkâ ara lâpylâ aitaungâ. Âdaunloenlâ inakai akâiedaundâ, inakai aniempyra ato ara.

<sup>15</sup> Iwenibyem mawânâ Deus itaumbryry awo wâgâ: “Âdy inakai akâiedaundâ, inakai agânhepyra wato ara” kewândymy Deus.

<sup>17</sup> Deus agâ amygeduomo, “Kunwym Deus” myguelymo. Xypry etay, mâkâ enado ise idânârâ kydâtadyguely, xirâ onro anaym aguientaumby modo xutuhoem. Agueduo, ioze lelâ ise aguely, anhedyly warâ, kieinwântobyry ara, kieinwâmpyra kydatobyry ara warâ. Tâinwânnipryry modo koendâ ise nhedyly; tâinwântânrybyry modo olâ ise koendâpa nhedyly. Awylygue onro anaym mawylymo ara aunlolâ Deus xyrentaungâ.

<sup>18</sup> Âadamudomo ezewenry amânhedylmogoe kulâ ani saguhoem Deus xurâem mawylymo, inanajimo. Âdyem nipyra olâ mârâ tâzezewenry, awylygue mârâ aguiendylyguepa Deus xurâem kidyly.

Âdygue imakehomoem epywadobyry tutuzelâ âmaemo. Dinherugue, ourugue, pratague warâ inkâba imakehomoem epywadyly; adainrim modo kulâ awârâ.

<sup>19</sup> Cristo kruz wâgâ tunu tyapâze igueduo, tâwâense kehoem akâwâm imakehomo nhanâdily. Kaneru tywykenry kehoem inakanhe adâjitoobyry xygakehoem tyâzeim, myara akâwâm Cristo iguely, inakanhe aguitobyry xygakeze, âdaunloenlâ âdy inakai aniempyra awyly umelâ.

<sup>20</sup> Idânârâ âtugudyly iraylâ, Deusram aguehoymbyem awyly kâmakerin-em. Iwerâ xirâ “Xypry etay” keho ume Deus Jesus ingonodyly xarâ onro anaxi, koendâ kyese.

<sup>21</sup> Cristo wâgâ tâwâlâ Deus mâinwândyly, xurâem midyly warâ. Igueypyem awyly ume, kurâem ietomâ, pymâ ton-honreinhe, tywâkureinhe warâ ienehonwâm. Deus awârâ anhedyly, kieinwântoem, “Aiese urâ” kehobyry anhedyly kinwânwântoem warâ.

<sup>22</sup> Unâ âkealonro tâinwânse mawylymogoe, inakanhe amitomboobyry xygakely, igokeyby ara âmaemo. Awylygue ton-honre lelâlâ Cristo eynynâ âpemugumo mâinwynedylymo. Toenzepa iwynedaungâmo lakuru; amyguelymo kulâ waypa nidâ.

<sup>23</sup> Iweloem ietybyem âmaemo, iazeontybyem. Odomo iguedânrygue iazeypyem mawylymo Deus iguedânry aguehobyry âdykâ adaindânry wâgâ. Deus inwenien-hoymby aunloenlâ ise âdyem awyly.

<sup>24</sup> Saguhoem Deus, Isaías inwenihoem aguehobyry ara kehoem kagâ aidyly: “Egâ wâneam nady poji anano modo.

Tywâkure lelâlâ wâne sawanku, aunloenlâ nipyra olâ. Inepa kehoem nady iladyly;

sawanku onro onwa ihuguely warâ.

Arâ lâpylâ idânârâ kurâ domodo xirâ onro anaym iguein-em awylymo.

Idânârâ eon-honrumo adainze, imâsedoem awylymo warâ.

<sup>25</sup> Kywymâry Deus aguehobyry olâ ise âdaunloenlâ nadaimpa; alâ ise aisezedyly aguehobyry aralâ”

warâ Deus itaumbryry awo wâgâ iwenibyem awyly.

Jesus wâgâ unâ koendonro âyanmo egatuybylâ xirâ Deus itaumbryry.

## 2

*Idânârâ tynnonro modo agâlâ Jesus*

<sup>1</sup> Inakai aiedyly imowâdaungâ. Ânguy kâzenokudaundâ. Inakanhe aini âmaemo watay, koendonro ara tâiseba itaungâ. Tâsewânizeba itaungâ. Agonromo kâdunâguedaundâ.

<sup>2</sup> Egâ wâneam iamudo iwelo iazeypy. Tyze inwanry tienydyze lelâ. Tadakuilygue ago idyly. Arâ lâpylâ Deus itaumbryry iozeno xutuzezedaungâ. Deus Ispiritury unâ nhuduypylâ mawânâ kydâsemagueho wâgâ kiuntuho. Mâindadylymogoe, mâinwândylymogoe warâ

mawânâ iwâgâ imâem mâuntulymo, kâenmakebynra “Xuduze urâ” kehobyry mâuntulymo warâ.

<sup>3</sup>Iwenibyem mawânâ Deus itaumbry awo wâgâ: “Kywymâry tâinwânse mawylmogue, tutuze âmaemo, koendâ kagâ awyly.”

<sup>4</sup>Tuhugue âtâ itâdily watay, itâni tuduakeze; izepa tato pylâ nhamuin-ro. Mârâ tuhu samuimby ara lâpylâ toenzepa Jesus ineni modope awyly. Deus olâ “Jesuslâ Messias kâingonotyby; tywyneim awâkâ urâem” tâkeze. Igueypyem inkâba Kywymâry Jesus; tâlâ mâkâ. Eyam iwaguepa aintaungâ, tuhu tywyneim kehoem emyenroam.

<sup>5</sup>Âtâ saunâtoem tuhu angatoam iedyly myara lâpylâ Deus on-hoam âedylymo, Ispirity etyem mitomoem. Kurâ domodo eynynâ Deus agâ agueim lâpylâ âmaemo. Deus Ispirity aguehobyry aralâ, Deus tuomaenze, eagâ adâkeze warâ âmaemo, Deusram ânguylâ mâundulymo waunlo ara. Amyguehomo tydase Deus, Jesus Cristo iguehobyry wâgâ.

<sup>6</sup>Warâ myakâwandy Jesus Cristo wâgâ Isaías inwenily:

“Âtâ itâni tuhu imâsedo iaxi tyese, ipery nihugueba itoem myara, mâkâ kâinwynegyly kâingonodyly.

Siâodâ\* ise mâkâ, eydâ watodâ.

Idânârâ iwymâryem itoem augue.

Auguehobyry modo aiese lelâ urâ.

Mâkâ kâingonokyly einwâni nâpybazedaymba ise tinwânwântyby wâgâ kely Deus.”

Warâ iwenibyem awyly Deus itaumbry awo wâgâ.

<sup>7</sup>Âmaemoem tywyneim lelâlâ Jesus, tuhu tywyneingue tâzekeim; awylygue mâinwyndelymo. Einwântânry modo olâ, mâkâ izepa. Warâ iwenibyem awyly Deus itaumbry awo wâgâ: “Mârâ tuhu âtâ itâni modo izepa atobyry ize tadatoem nidâ” kely iwenibyem Salmosdâ.

<sup>8</sup>Warâ Jesus Cristo wâgâ Isaías inwenily: “Ihodaigâximo ise xirâ tuhu, ihuguehomoem” kely iwenibybe lâpylâ Deus itaumbry awo wâgâ. Toenzepa wâne Deus itaumbry idani modo neinwâmpyramo olâ. Aituo ise Deus ize ato aralâ âsenagazedelymo xypyry etay.

<sup>9</sup>Âmaemo Jesus einwâni modo olâ Deus âduakelymo, xurâem mitomoem. Kurâ domodo eynynâ Pymâ Deus agâ agueim âmaemo. Deus ize ato ara lelâ aini modo âmaemo. Deus tâlâ ato âmaemo. Deus ton-honrugue anhetyby egaturin-em iduakeyby âmaemo. Kopae iam duay adakobâni ara ani âmaemo saguhoem. Deus ingâsedybylâ âmaemo, idânârâ iwâgâ mâuntuhomoem. Awylygue iwerâ, ânwa koendâ kehoem tyajineim oze adakobâni ara âmaemo.

<sup>10</sup>Saguhoem Deus xurâempa ani âmaemo; iwerâ olâ xurâem âmaemo. Saguhoem idânârâ ktyendâ Deus awyly mâuntuba ani âmaemo; iwerâ olâ ktyendâ awyly tutuze âmaemo.

*Jesus einwântaynrim modo aito*

<sup>11</sup>Yataen-ho kâinwynegyly modo, enanâguedaungâ xirâ onro anaym sakani kulâ mawylmo; tarâ tâjikeim keba âmaemo. Awylygue âyanmo kâenkadyly, inakai modo amânhedyse matomo imowâdaungâ. Kuoday tâdâjitoguylybe-ro waunlo ara mawânâ; in-akanhe aguidyse kydato, Deus ize ato aguienkyly agâ âjitoguyly-ro waunlo ara.

<sup>12</sup>Koendâ lelâ Jesus einwântânry modo agâ itaungâ. Awylygue, tâwâlâ wâne âunâguedelymo, koendonro modo amânhedelymo tientuo olâ, inakai keba mawylmo, aguezemo. “Koendonro âmâ, Deus” kezemo xypyry etay.

<sup>13</sup>Kywymâry Jesus xurâ mawylmogue, idânârâ pymâ domodo agueho kadakadaundâ. Pymâ kuru César einwântaungâ.

<sup>14</sup>Pymâ kuru, pymâdo tâmaryem ingonotyby modo einwântaungâ lâpylâ. Aguehoymbyem akaemo inakanhe aini modo nhenagazenehon-homoem, koendonro aieni modo wâgâ koendâ aguehomoem warâ.

<sup>15</sup>Pymâdo tâinwânse âmaemo, koendonro adyese âmaemo warâ watay, Jesus kâmakerim wâgâ xutudânry modo MYK isemo lelâ, âdy wâgâ inwentâguedomo peba mawânâ ise. Awârâ mawânâ Deus amânhedysemo ato.

<sup>16</sup>Etadâdybyem etagueyby ara âmaemo. Awylygue koendonro aietaungâ. “Iweâma tâwâlâ âdylâ inakai agânhedylly, ânguy ienagazedaymba ise” tâkezeba itaungâ. Deus agâlâ âmaemo iwerâ. “Aietaungâ” kehobyry amânhepyra tâiseba itaungâ.

<sup>17</sup>Kurâ domodo âwankuem kâietaundâ. Cristo eynynâ âpemugumo iwynedaungâ. Deus xyrentaungâ. Âwankuem kâietaundâ. Pymâ César âwankuem kâietaundâ warâ.

*Kydâpeâmbyralâ, kydâsenagazedelyly kyzemaenre*

<sup>18</sup>Tâzmary modo, âwymârymo einwântaungâ. Koendonro âwymârymo atay, koendonro keba atay alêlâ, âwankuem kâietaundâmo warâ.

\* 2:6 Siâo egâ vocabulâriodâ.

<sup>19</sup> Alá kulá eagâ iwanomo inagazedilymo-ro watay, tyewiâpazeba itaungâ; alá emaeuwâdaungâ. Âdy agâmo aini tutuze Deus; mâkâlâ ise koendâ âenimo.

<sup>20</sup> Aguehobyry mankaduomolâ âwymârymoam mâzenagazyemo watay, âkealâ inagazehonlymo, aguely mankaduomolâ. Âdaituoba kulâ eagâ iwanomorom mâzenagazeolyo watay olâ Deuslâ ise koendâ nhenimo.

<sup>21</sup> Âdakykebalâ Deus kydâsenagazedily kienmaendyze awyly. Aitoem lakuru mawânkâ Deus kygâsedily, “Aiekâ” kehobyry aguietoem.

Cristo kruz wâgâ âsenagazedobyry enanâgüewâdaungâ, Deus agâpa kydâiehoba kitoem akâwâm mâkâ aieholy. Tâsenagazeze lelâlâ wâne, âpeânze kepa olâ akâwâm. Kydâsenagazedily ume, kyewiâpabyra kitoem kienanâgüelylâ awârâ.

<sup>22</sup> Inakanhe aityby mâkeba mâkâ, âdykâ ânguy nenokubya lâgâlâ warâ.

<sup>23</sup> Tâjiwykeoduo, koendâ lelâ aguely, ânguy niwykeba. Kruz wâgâ tâsenagazeduo, “Inagazezemo lâpylâ urâ ayetomobyry wâgâ” kepa akâwâm. Warâ akâwâm aguely: “Deus emaxilâ kâtuly” kely. Tutuze Jesus, Deus koendonro, iozeno lelâ warâ awyly, tânazageni modo âdanhedyly tutuze warâ.

<sup>24</sup> Kruz wâgâ akâwâm Cristo iguely, tâwâlâ âtuly, inakanhe aguitobyry xygakehoem. Iguely akâwâm, inakai modo aguiempyra kitoem, Deus aguiendyse ato lelâ aguietoem warâ. Jesus sapioguhobyry wâgâ kua ietybyem kydawyly; Jesus Cristo âzenagazeohobyry wâgâ ani Deus agâ koendâ kydâieholy.

<sup>25</sup> Kaneru ânwa oze xuzatyby ara ani âmaemo. Kaneru eni emyenro pylâ Jesus Cristo-ro. Xurâempa ani âmaemo saguhoem, iwerâ olâ xurâem midâmo; nhêtâmo mâkâ aunlolâ.

### 3

#### *Ohogüimby modo xuruto*

<sup>1-2</sup> Tâjiwydy modo, osomo einwântaungâ. Deus aguehobyry neinwâmpyramo lelâlâ wâne, amidilymo koendâ awyly tientuolâ ise tyeinwândyse idilymo, Jesus wâgâ unâ eyanmo amyguezesebyramolâ.

<sup>3</sup> Âmaemo pekodo modo, mâpâgudâdomo ouru mâzekagâin-homo, itymo tâwânseim warâ wâgâ inkâba âwâkurumo âzeholy.

<sup>4</sup> Amânhekylymo wâgâlâ, amyguehomo wâgâlâ tyewiâseba mawylymo wâgâlâ, tâdâjitoguly myguepa mawylymo wâgâlâ warâ mawânâ âwâkurumo âzeholy. Xirâ mawânâ ise adaindânry, tâwâlâ wâne aripiem midilymo. Awârâ mawânâ Deus xurâem tâjiwâkuru adaindânry.

<sup>5</sup> Arâ myakâwândy pekodo saguho modo, Deus einwânni. Koendonro adienkylymoguelâ, adâkehomoguelâ warâ tywâkuru nhenehonylmo. Deus “Aiese urâ” kehobyry tynwânwânsemo myakâwândy; tusomo tâinwânsemo warâ.

<sup>6</sup> Sara enanâgüewâdaungâ. Tuso Abraão tâinwânse myakâwândy, “Ywymâry” tâkeze myakâwândy eyam. “Sara iweom” kehonze âmaemo, eara amânhekylymo, aiese tyanepa âmaemo-ro watay.

<sup>7</sup> Tâjisodo, tutuze âmaemo, âdara Deus âwydymo mâendysemo awyly. Koendâ kehoem etaungâmo; akaemo takaze awârâ on-honrumo. Tawize kehoem etaungâmo. Agâmolâ ise Jesus einwânni modoram Deus nhuduly koendonro modo nhemakelymo. Koendâ mâempyra âmaemo-ro watay, Deus âdapyrâmo ise, eagâ amyguedyse matomo.

#### *Idânârâ Jesus einwânni modo xuruto*

<sup>8</sup> Xyppyryem kuru warâ âurudysemo wawyly. Âzekiba lelâ mâpaunzedomo nidâ; tuogunreim agâ ohogüendaungâ; tuomareim agâ ohomaendaungâ. Âpyndaungâ. Ityendaungâmo. Agânonro agâ imâsedoem ise tâkezeba itaungâ.

<sup>9</sup> Tâpeânzeba itaungâ. Inakanhe aini xurâem inakanhe adâiseba itaungâ. Tyewiâseba itaungâ, agâmo tyewiâtuneim modo agâ. Kâzenagazedaundâmo; Deusram ekadaungâ, inagazenimo agâ koendâ itoem, inakanhe aitomobyry, koendonroge mâempywydilymo waunlo ara. Deus ingâsedybylâ âmaemo, idânârâ agâ koendâ mitomoem. Arâ ise “Xuduze urâ” kehobyry mâenmakelymo.

<sup>10</sup> Warâ Salmos wâgâ, Deus itaumbry iwenibyem awyly:

“Tuomare lelâ ize kydatay, ânguy kiunâgüebyra kine,  
ânguy kienokubya kine warâ.”

<sup>11</sup> Inakai aiedyly kyjimonre lelâlâ;  
koendonro aguyjiene.

Ânguy agâ kydâtuebabyra kine.

Aunlolâ kyewiâseni modo agâ koendâ lelâ kine, iewiâkymo adain-hoem.

<sup>12</sup> Deus ize ato aieni modo mawânkâ aunlolâ koendâ lelâ âzeholy.

Nhekadybymo ájidaholy lelâ warâ;  
inakai aieni modo olâ nepyra, nhekadybymo nidaprya warâ”  
warâ iwenibyem awlyly Deus itaumbryy awo wâgâ.

*Kydâsenagazedylly koendonro aguiendyllygue*

<sup>13</sup> Koendonro lelâ amânhekylimo-ro watay, ânguy âmaemoem inakai aiese ton-honruneba.  
<sup>14</sup> Aituo, koendonro amânhedyllymo umelâ mâzenagazeolymo watay, Deus koendonrogye  
ipywazemo, omazeânzemo warâ. Awlylygue inagazenimo kâdytadaundâ, tâseanezeba itaungâ  
warâ.

<sup>15</sup> Toenzepa Cristo xyrentaungâ. Amânhetomoem aguehobyry aietaungâ, mâkâ mawânkâ  
âwymârymo kuru. “Âdaituoka Jesus mâinwândyllymo? Âdaituoka, ‘Âgueduomo, Deusram ise  
mydâlymo’ kely mâinwândyllymo?” keim, mâin-hoguhomoem âturydybyem lelâ itaungâ.

<sup>16</sup> Koendâ lelâ ihoguwâdaungâ. Idataungâ lelâ aguely; tyewiâse kâjihoguwâdaundâ. Tâwâlâ  
mâsewândâdomoem akâiedaundâ. Tywykeim peba angahumo oday nidâ. Jesus eynynâbaom  
modo âunâguenimo koendonro modo lelâ amânhedyllymo tientuo, âpybazezemo.

<sup>17</sup> Deuslâ mâsenagazedylly donromo watay, koendonro amânhedyllymoguelâ  
mâsenagazedyllymo nidâ, inakanhe amidyllymo wâgâ inkâba.

<sup>18</sup> Tyiguely ume, Cristo âsenagazemâ lâpylâ. Inakanhe aguitobyry xygakeze akâwâm mâkâ  
iguely. Tokalêlâ olâ iguewâm; niguezesebyra. Mâkâ inakanhe aitànry iguely akâwâm  
inakanhe aini modo xurâem, tâinwânni tunwynram tiantoem. Kruz wâgâ sodo adakâjioly  
iguehoem; Deus Ispiritury olâ Jesus kurâem ietomâ.

<sup>19</sup> Kurâem tâitondylly iraynâ Jesus idâwânmy iguewâtyby modo egadopryy etadâdobyryam,  
mâkâlâ Messias einwânnipryy modo emakeim tawlyly wâgâ agueze.

<sup>20</sup> Noé pepi imâsedo nhygadyly ume, toenzepa myakâwândy kurâ domodo inakanhe  
kulâ aidyllymo. Tâinwândyllymo tynwânwânsezêlâ myakâwândy Deus. Inepa nenagazene-  
hombamo. Deus neinwâmpyramo olâ myakâwândy. Idânârâ onro xytybyem awlyly ume,  
aguipa kulâ myakâwândy âsemagerim, pepi odaji âxyedyby modo lelâ. Oito lelâ myakâwândy  
âsemagueyby: Noé, iwydylâ, azagâ tokalâ warâ imeom, azagâ tokalâ warâ iweisedo, alâ kulâ.

<sup>21</sup> Pepi imâsedo oday tawlylygue paru inwenly ume, Noé domodo âsemaguehomobyry  
ara iwerâ kydâsemagueho. Arâ lâpylâ Jesus Cristo mâinwântuomo mâsemagueylymo. Batiza  
mâieholymo ani, Jesus einwânnipryy mawlylymo mâenehon-homoem, âwykumo etyhoem  
inkâba. “Tâwentâgueba urâ, Deus xurâem, inakanhe witobyry xygakehobyry wâgâ” tâkeze  
ani âmaemo, batiza mâieholymo ume. Deus eon-honrugue Jesus kurâem itobyry wâgâlâ  
âsemagueybyem mawlylymo. Awlylygue tâwâlâ paikayba mâjikaguemo, Jesus wâgâ iweloem  
ietondyllybyem mawlyly mâenehon-homoem.

<sup>22</sup> Kayam Deus eydâ atoram todopâze akâwâm mâkâ. Iwerâ Deus eapay eahoru eynynâ  
ekadybyem awlyly, pymâem, idânârâ anju domodo, ton-honroneim modo warâ iwymâryem.

## 4

*Iweloem ietondyllybyem*

<sup>1</sup> Kruz wâgâ tâsenagazeze akâwâm Cristo iguely. Âdara aguydâieholly kiuntuholâ mâkâ.  
Xurâem mawlylymogue mâzenagazeolymo-ro watay, ohondyllybyem lelâ itaungâ âsenagazeze  
mâinwânkylymo mâinmopa mitomoem. Cristo xurâ kydawlylygue kydâzenagazeoly kien-  
maenly watay, inakai modo aiedylly imoimbyryem kydawlyly tânehonze, Deus izepa ato  
kulâ keba aguienkyly awlyly. Cristo aralâ tywykeba ize kydawlyly.

<sup>2</sup> Awlylygue saguhoem adâjitobyry modo Deus izepa ato âdaunloenlâ akâiedaundâ. Deus ize  
ato lelâ aietaungâ, âiguehomo saindyly ara.

<sup>3</sup> Saguhoem Jesus mâinwâmpyramo mawlylymo ume, inakai modo aiedylly mâinmopa matau-  
nagynre, Jesus xurâ keba modo adiydyse ato. Eagâ mohogüin-homobyry keba kulâ  
mâynanâguelymo. Âdylâ inakanhe amidyllyse matomo adyese lelâ kâinane âmaemo. Okumo  
ikaji midyllymo mâinmopa kâinane âmaemo. Ataen-homo agâ adakuize tâtâdyguyze lâpylâ  
ani âmaemo âjigüe oku ikaji mitomoem, kywypado modo amânhetomoem. Kywypadoem  
kehoem kâinane âty mododâ amidyllymo, ekudyby modo deus kewâto mâen-hoguedomoem.

<sup>4</sup> Iwerâ olâ arâ amipyra âmaemo. Awlylygue ataen-homo Jesus eynynâbaom  
âseguâdâdyllymo, saguhoem eagâmo amitomobyry ara amidyllysebam mawlylymogue.  
Eagâmo amidyllyseba mawlylymogue, âynanâdâmo, âwankuem âetâmo warâ.

<sup>5</sup> Xypyry etay idânârâ adientyby modo egatuzemo Deus enado iguewâtyby modo,  
iguedânry modo alelâ. Xirâ anaym aguitobyry ara ise Deus kâpywadyly.

<sup>6</sup> Saguhoery modo ipa, iguewâtybyem. Tunârybyry nheinwântomobyry arâlâ Deusram  
âzepywaolylymo, arâ lâpylâ ise Deus kâpywadyly. Unâ tâdâsemagueho koendonro egatuwâm olâ,

tâinwânni modo Deus eydâ atoram idâhomoem, tyigueduomo, nadaimpa itomoem, Deus nadaimpa ato ara.

*Deus konomery nhuduypy ara lelâ aguine*

<sup>7</sup> Iwaguepa xirâ modo adain-ho. Inanaynmolâ itaungâ. Tâwâlâ âjimanâdaungâ, Deus ize ato ara amitomoem, Deus agâ amyguehomoem warâ.

<sup>8</sup> Koendonro kuru mâpnyedilymo. Agonromo agâ tâpyneze kehoem âmaemo watay, mâkâ inakanhe aito enanânehonze âmaemo.

<sup>9</sup> Âxigodo âwantaungâ; xykyho xuduwâtaungâ warâ. Xurâmoem amânhekylymo wâgâ tylahureba itaungâ.

<sup>10</sup> Âikâ, âikâ warâ Deus konomeryem nhuduypy. Awylygue mâkâ, mâkâ warâ emawyadâdaungâ inomerymo Deus nhuduypygue, tywymâry isejiguy xuturim koendâ kehoem isejiguy modo nhewaniho ara.

<sup>11</sup> Deus itaumbyry mâengatuhomoem Deus inomerymo nhuduly-ro watay, Deus amyguedysemo ato lelâ egatuwâdaungâ. Kâmawyadâniem Deus inomerymo nhuduly-ro watay, aietaungâ on-honrumo Deus nhuduypygue. Koendâ lelâ amidilymo tientuomo, Deus ise nehoguegylymo, Jesus Cristo eynnonro modo koendâ aidylygue. Aunlolâ tynrenseim, tuomaenzeim, idânârâ iwymâry warâ mawânkâ. Âkealâ xirâ-ro warâ.

*Jesus einwânniem kydawlylygue kydâsenagazedo*

<sup>12</sup> Yataen-hodo kâinwynegyly modo, tadahulizeba itaungâ iwerâ mâsenagazedilymogue. Ouru wâne peto onwanji tâiehoze, iwyku etyhoen-ro, myara lâpylâ agâmo aidyly, Deus ize ato ara mitomoem. Âmaemo kulelâ inkâba âsenagazeni; idânârâ Jesus einwânni modo, Jesus eynynâbaom modoram tâzenagazeozemo.

<sup>13</sup> Mâsenagazedilymo ume, tytyremba itaungâ, ohomaendaungâ lelâ. Cristo aiehoehobyry ara amâieholymo awylygue. Odopâday, ehogu, eon-honru warâ ese kurâ. Toenzepa lelâlâ ise mohomaendilymo.

<sup>14</sup> Jesus Cristo eynnonroem mawlymogue âwankuem mâiehoduomo, mâzenagazeoduomo warâ, tuomare lelâ itaungâ, Deus Ispiritury ton-honreim mawânkâ agâmolâ.

<sup>15</sup> Âmaemo ewy ânguy nhyân-hombyry wâgâpa, emagadudobyry wâgâpa, âkelomo nhy-nanâdobyry wâgâpa, âdylâ inakanhe aitobyry wâgâpa warâ âzenagazeoly nidâ.

<sup>16</sup> Cristo xurâem mawlymogue mâsenagazedilymo watay olâ tâpybazezeba itaungâ. Deusram aguwâtaungâ: “Tuomare xina, ‘Cristo eynnonro’ kelygue tâzekeim tawlylygue” kewâtaungâ.

<sup>17</sup> Tâdâsenagazedo saintybyem mawânâ, kurâ Deus xurâ modolâ waunroem kuru âsenagazeni-ro warâ. Xirâ onro anaym; toenzepa kuru âsenagazeni olâ ise unâ koendonro tâdâsemaguely wâgâ agueim tindadysebaom modo, aunloenlâ âsenagazedoam sameduomo.

<sup>18</sup> Arâ mawânâ iwenibyem awyly Deus itaumbyry awo wâgâ: “Ton-honre kehoem lelâlâ koendonro aieni modo âsemaguely. Arâ-ro watay, nuduwâpyra lelâlâ Deus eynynâbaom, ize ato aietânry modo âsemagueloem” warâ iwenibyem awyly.

<sup>19</sup> Deus ize ato aralâ mâsenagazedilymo watay, emaxi âtuwâdaungâ. Âgumimopyry mawânkâ; adâkehobyry aiese. Koendonro aiesezedaugâ lelâ, Deus ize ato amânhedilymogue, mâzenagazeolyumo umelâ.

## 5

*Jesus einwânni modo xuruto*

<sup>1</sup> Jesus Cristo einwânni modo iwymârydo kâunrudily iwerâ. Koendâ auguely idataungâ, Cristo einwânni modo iwymâry lâpylâma urâ. Tâense urâ Cristo âsenagazedily. Mâkâ ehogu, eon-honru warâ âzehoday, târâ eagâlâ ise urâ.

<sup>2</sup> Ârudilymo, koendâ Deus xurâem ityby modo mâentomoem. Ovelha eni koendâ tâguy nheto ara, akaemo eniem Deus induakeyby âmaemo. Amânhedyse mawlymogue lelâlâ awârâ aietaungâ, Deus ize ato ara, “Aiekâ” myguehonduomo kulâ inkâba. Mâzepywaohomoem kulâ inkâba aietaungâ, Jesus einwânni modo mâenmawyadâdize mawlymogue lelâlâ.

<sup>3</sup> Amyguehomobyry lelâ tâinwânseim ize matomo waypa lâpylâ nidâ. Amitomoguelâ, âdara aidylymo awyly xutuen-honwâdaungâ, enehonwâdaungâ warâ.

<sup>4</sup> Kâeni kuru Kywymâry Cristo odopâduo, aunlolâ ise mâzehogueloem. Tâmakezeim iwâkuru, ehozelu adaindânry waunlo emakeze âmaemo.

<sup>5</sup> Alâpylâ salokuzenomo modo, âwynsaundo modo warâ kâunrudily. Agaityom modo einwântaugâ. Idânârâ âyanmo xirâ kâinwenily: Koendâ lelâ agonromo emawyadâdaungâ. Arâ mawânâ iwenibyem awyly Deus itaumbyry awo wâgâ: “Sawo modo eynynâ inkâba Deus, sawo keba modo agâ olâ koendâ” warâ iwenibyem awyly.

<sup>6</sup> Deus ton-honreim awyly enanâguewâdaungâ. Mâsenagazedylimo emañwâdaungâ. Epagudo odaji ituo epagunâze mâkâ. Imakezemo, ihoguezemo-ro warâ.

<sup>7</sup> Ikuâdânimo emaxilâ idânârâ xuduwâtaungâ. Aunlolâ mawânkâ mâkâ nhedylymo.

<sup>8</sup> Inanaynmolâ itaungâ, ohondybyem lelâ warâ. Awârâenlâ mawânkâ kuduery Diabu tununreim. Leão wâne tygâse kehoem todunhuinly tyântoem myara mawânkâ kânâmidyly. Jesus kieinwâmpyra kyedyse mawânkâ.

<sup>9</sup> Ozohondâdybyem lelâ itaungâ, Diabu, Jesus mâinwâmpyra ânehonzemo keduo. Jesus lelâ einwântaungâ. Âmaemo kulelâba âsenagazeni awyly tutuzelâ âmaemo. Tâinkâ lelâba Jesus einwânni modo âsenagazedylimo lâpylâ.

<sup>10</sup> Aunloenlâ nipyra olâ ise mâsenagazedomo. Inepa ise mâsenagazedylimo adainly. Kondenro lelâla Deus, kytieni warâ. On-honwanâzemo, aini modo mâenmaen-homoem. Se ondaxi kehoem epadâdyby wayam, wayam warâ nâzekâniwâbyra, arâ ise mâkâ mâinwâmpyra mipyra ânehonlymo, koendâ mâinwânsezedomoem lakuru. Koendâ âesemo mâkâ; ize tato ara ânehonzemo. Mâunloenlâ eagâ mitomoem âgâsedâmo, Cristo agâ itybyem mawylmogue. Mâkâ agâlâ ise. Mâzehogueolyimo, mâdyren-honlymo, mojiomaeonlymo warâ.

<sup>11</sup> Âdaunloenlâ nadainwâpyra ise mâkâ eon-honru. Aunlolâ ise arâ awyly. Arâlâ nidâ.

*Kata xypygueândo*

<sup>12</sup> Xirâ kata imeimbyry âyanmo kâinweniday, iemawyadâni olâ Silas. Toenzepa kâinwynegyuly merâ, Cristo eynynâ ypemugu. Aunlolâ Jesus einwânni merâ. Omazeânzemo xirâ kata kâinwenily. Kagâ koendâ, kytendâ warâ Deus awyly auguedyse wato. Awylygue mâuntudyzemo wawyly, Deus koendâ kehoem nhetâmo awyly. Mâinwâmpyra tâiseba itaungâ.

<sup>13</sup> Babilônia donro Jesus einwânni modo, âyanmo tywynu nhawânehonlymo, akaemo, aramo Deus-am iduakewâdyby modo. Marcos lâpylâ âyanmo tywynu nhawânehonly; yataenho merâ, ymery ara kâinwynegyuly.

<sup>14</sup> Âwaparymodâ tohonuguze âsedaenguwâdaungâ, Cristo eynynâ âjipemugu mawylimo mânehon-homoem\*.

*Deus nhesemo*

Alâ Deusram kâenkadyly, âmaemo Cristo eynynonro modo madahuliba mitomoem, kâmaynoem mawylimo umelâ, nhetâmolâ awyly mâuntulymogue warâ.

Pedro

\* 5:14 Saguhoem tohonuguze âsedaengulymo. Iwerâma tâpymogoynze tâdâsedaenguly.



## 2 PEDRO

### Pedro Kata Azagâ Ieto Inweniby

Xirâ kata wâgâ inwenily Pedro nhangahu odaji iemâmy Deus. Awylygue Deus itaumbrylâ xirâ Pedro inweniby. Jesus aguely idani modo emy myakâwândy Pedro.

Kata azagâ ieto xirâ Deus, Pedroam inwenien-hoymby Jesus Cristo einwânni modoram. Iozepa kulâ Deus wâgâ enomedâni modo tâinkâ lelâba awyly wâgâ myakâwândy inwenily. Deus wâgâ iozepa kulâ aguelymo lelâ waypamo myakâwândy, inakai modo anhedylymo, eagonro modo tagâ aitoem aguelymo warâ lâpylâ.

Pedro kurudyly iozepaom modo kulâ einwândyly wâgâ, Deus ize ato ara lelâ agui-toem. Iozepa kulâ unâ egatuwâni modo, Cristo odopâdyly âwankuem tyesimo mykâinane. “Nodopâdaymba ise; iweâpa itybyem mawânâ. Nodopâbyra awylylâ ise mâkâ” tâkezemo mykâinane. Xirâ kata wâgâ olâ tutuze kurâ, koendonro lelâlâ Deus awyly. Agui Jesus einwânni modo idyse mâkâ. Xirâ kata kintainduo, tutuze kurâ, Jesus odopâdyly tynwânwânselâ kydawyly, aunloenlâ eagâ kitoem.

#### *Aguely adaguho*

<sup>1</sup> Urâ Simão Pedro, Jesus Cristo emary, tywâgâ aguenrim induakeyby, xirâ Jesus Cristo einwânni modoram iweninri, xina nheinwântobyry ara einwânniram. KyDeusry mawânkâ mâkâ, kâmakerim warâ. Mâkâ kieinwântoem aieni. Awârâ anhedyly, koendonro, iozeno warâ tawylygue.

<sup>2</sup> Âynynâmo Deusram kâenkadyly, imâem kehoem mâzehohomoem, akaladânimo peba itoem warâ. Arâ ise aunlolâ koendâ kuru mawylymo, Deus, Kywymâry Jesus Cristo warâ mâuntuzedylymo.

#### *Deus kygâsemâ, kuduakewâm warâ*

<sup>3</sup> Deus tawylygue, ton-honruguelâ, idânârâ ize kydato xuduwâm aunloenlâ eagâ kitoem, ize ato lelâ aguietoem warâ. Tutuze kurâ mâkâ. Mâkâlâ mawânkâ kygâseni xurâem kitoem. Awylygue ize ato ara lelâ aguidyly, koendonro, ton-honreim, tohogueim warâ awylygue.

<sup>4</sup> Deus koendonro lelâlâ tawylygue, “Koendonro aiese urâ âmaemoem” tâkehobyry adyese lelâlâ. Mâkâ ara kizezedoem ize ato lelâ aguietoem warâ adyese. Deus eynynâboom modo inakanhe aito aguiendyse kipyra kurâ warâ.

<sup>5</sup> Awylygue Jesus mâinwântuomo, idânârâ agâ koendâ lelâ aitaungâ. Eagâmo koendâ mawylymo ume, koendâ lâpylâ Deus wâgâ xutuzedaungâ.

<sup>6</sup> Deus wâgâ mâuntuzezedaymo, tâwâlâ kulâ inakai amânhepyra mitomoem âjimanâdaungâ. Mâjimanâdylymo umelâ, mâsenagazedylymo emawândaungâ. Mâsenagazedylymo mâenmaenlymo umelâ, Deusram âtuwândaungâ, ize ato lelâ amânhetomoem.

<sup>7</sup> Deus ize ato lelâ amânhetomoem mâtulymo ume, Cristo eynynâ âpemugumo ize isezedaungâ. Cristo eynynâ âpemugumo agâ âjize mawylymo ume, idânârâ kurâ domodo iwynedaungâ, tâwâlâ wâne Jesus einwânni, einwânni keba warâ awylymo.

<sup>8</sup> Arâlâ amisezedylymo watay, alâ ise Kywymâry Jesus Cristo mâuntuzedylymo, mâkâ ize ato aieseze lelâ âmaemo, se ewiseim ewisezedyly wâne tâwiseho odaji ituo myara.

<sup>9</sup> Arâ aitânry olâ epy ara kulâ, Deus nepyra tâitoem âzепâinly-ro waunlo ara. Inakanhe tâitomobyry xygakerimbyryem Deus awyly enanânehorimbyryem.

<sup>10</sup> Aituo Cristo eynynâ ypemugudo, koendonro amânhetomoem âzeon-hondâdaungâ, turâem Deus induakeyby, ingâsedyby warâ mawylymo mâenon-homoem, tâgaseim nihugueba kehoem tâzegato xyppyram saini ara.

<sup>11</sup> Arâ ise Deus ikaunâdylymo: “Âetaungâ; âdy igawâmpyra âenonrimo lâpeba tarâ” keze. Aituo ise myarâ Kâmakerim, Kywymâry warâ Jesus Cristo tpygyueba kehoem pymâem atoram mydâlymo.

<sup>12</sup> Unâ iozeno Deus nhegatyby tydase âmaemo; tâinwânse ani âmaemo; mârâ ara lelâ amidlymo warâ. Tutuzelâ âmaemo, aunlolâ xirâ modo mâenanâguedyzemo wawyly.

<sup>13</sup> Iewanulâ xirâ, yiguepa wawyly ara mâenanâgüehomoem âyanmo aguely.

<sup>14</sup> Inepa iguein-em wawyly tutuze urâ, Kywymâry Jesus Cristo mawânkâ yam nutuen-ho. Wodopyry nhânze urâ, âtâbâbyry kânâho ara.

<sup>15</sup> Xirâ modo toenzepa mâuntudyzemo wato, yigueduo, auguehobyry mâenanânehomba mitomoem.

*Kunwym Deus Jesus xyrentoem anhenehonday, Pedro domodo nhetobyry*

<sup>16</sup> Tiungutyby kulâ mâkeba xina nhegatyly, “Kywymâry Jesus Cristo pymâem tohogue kehoem ise odopâdyly” xina keho. Tânugue lelâlâ ani xina nhedyly, Jesus eon-honru imâsedeom awyly.

<sup>17</sup> Târâ iwy wâgâlâ ani xina, Kunwym Deus, Jesus ehogu, xynru warâ wâgâ agueday, Jesus ety iwogonro sapekadyly, ehazeladyly warâ xina emâ. Deus ton-honreim kuru: “Ymery toenzepa kâinwynegyuly merâ, toenzepa womazeâni” kely xina idamâ warâ.

<sup>18</sup> Kywymâry Jesus Cristo agâ iwy tynrenseim wâgâ xina awyly ume, kaynâpa tâjitanru âemâ.

<sup>19</sup> Tutuzelâ kurâ, saguhoem Deus eynynâ aguewâni modo Cristo wâgâ inweniby iozeno tâinwânseim awyly. Mâkâ odopâdyly wâgâ inwenibymo, xina agueho agâ âzekiba lelâ. Akaemo inweniby modo koendâ lelâ idataungâ, einwântaungâ warâ. Inwenibymo âyanmo xutuen-honze, âdy mâinwânkylymo awyly, esagon-ho âji tyameim nhesagon-ho ara. Xirâ unâ agueho koendâ idasezedaungâ. Jesus Cristo odopâduo ise koendâ kuru Deus wâgâ mâuntuhomoem anhenehonly, emedyly wâgâ xixi egaseduo onro wogonro modo eto ara. Ximukâ emeni emyeno ise mâkâ, koendâ Deus wâgâ mâuntuhomoem.

<sup>20</sup> Xirâ kâinwenily koendâ xutuwâdaungâ. Saguhoem Deus wâgâ aguewâni modo tonomery mâkeba myakâwândy inwenilymo, Deuslâ inwenihomoem agueim. Konomerygue kulâ Deus itaumbry kiuntuwâbyra lâpylâ kurâ.

<sup>21</sup> Deus aguehobyry nhegatylymo watay, tyangahu oday tunâry kulâ, tonomery kulâ warâ mâkeba nhegatylymo. Deus Ispiriturylâ nhangahumo oday xunârymo xuduim; âdakeze Deus aguely awyly mâkâlâ egatuen-horim.

## 2

### *Deus wâgâ iozepa kulâ unâ egatuwâni modo (Jd 3-16)*

<sup>1</sup> Iweâpalâ myakâwândy Deus eynynonro modo enokunibe awyly, “Deus wâgâ aguenri urâ” kewâni modo. Arâ lâpylâ ise iwerâ âduaymo Deus wâgâ unâ iozepa kulâ unâ egatuwâni modo âepanâguely, inokuzemo kulâ. Xypyry etay olâ âsenagazemo; inakanhe adâitobyry epywaze igueypy Jesus Cristo, tywymâryem, todoem warâ izepamo mawânkâ. Arâ tawily-moguelâ ise tâwâlâ inepa tain-ho nhuinlymo.

<sup>2</sup> “Jesus eynynonro urâ” kewâni modo akaemoram toenzepa âzenokuoze. Awylygue ise inakanhe aitemo ara aidylymo. “Jesus eynynonro urâ” kewâni modo inakanhe aidyly tientuo, Jesus eynynâbaom modo: “Âdyem nitaymba mynra unâ Jesus wâgâ einwândyly” kezemo.

<sup>3</sup> Deus wâgâ iozepa kulâ unâ egatuwâni modo toenzepa tydinherugu kulâ ize atomo. Awylygue tâdâsenogudyly kelymo, tyangahu oday tiungutyby kulâ aguehomo; dinheru tienmakely kulâ mawânkâ ize atomo. Deus olâ nykyba. Tutuze mâkâ, âdy anhekylymo awyly. Iweâpalâ on-hondybyem awyly, akaemo tienwentâdoem, tienagazenehon-hoem warâ.

<sup>4</sup> Adâkehobyry aietânry modo idânârâ enagazenehonze Deus. Enanâguewâdaungâ anju domodo Deus aguehobyry sakanibyry agâ aityby. Akaemo nityendaymba myakâwândy Deus. Tâtagueim tuhuadaguenry odaji igonomâmomy, âji tâdâsenagazedo odaji. Iamu oday ekâjibyem akaemo târâ awyly. Deus âda tyedyly awyly akaemo inwânwânkyly. “Târâ mâsenagazedilymo. Âdaunloenlâ nadainwâpyra ise” kely ise eyanmo.

<sup>5</sup> Enanâguewâdaungâ lâpylâ iweâpa Noé ume kurâ domodo inakai modo aiehoobyry. Deus ize ato adientysebamo myakâwândy. Aituo Deus paru inweândyly. Idânârâ kehoem paru onro nhytyândyly. Idânârâ kehoem iguewânmy. Mârâ ume Noé kulelâ myakâwândy Deus ize ato ara aini. Paru inwenly saindyly iraynâ, aunlolâ mykâinane Noé typemugudoam aguezesedyly: “Deus aguehobyry sakadyly, inakai modo aiedyly warâ imowâdaungâ. Einwântaungâ” kezesyly. Tindadysebamo olâ myakâwândy. Aituo, Noé, iwydylâ, imeombyry, iweisedo alâ kulâ Deus nhemakely, paru inwenly amaym.

<sup>6</sup> Enanâguewâdaungâ lâpylâ iweâpalâ xidadâ Sodomadâ, Gomorradâ warâ tâtyuneim modo aietobyry. Deus izepa ato adyesemo myakâwândy. Awylygue myakâwândy Deus aguely: “Idânârâ kehoem ise kainlymo” kely. Aituo peto ingonodyly, inakai modo tyain-hoem, idânârâ kehoem pelupâem imâmomy. Arâ adientuo, kyam nhutuen-honlylâ xurâ keba modo xypyry etay âsenagazeniem awyly.

<sup>7</sup> Lô lelâ myakâwândy Deus nhemakely Sodoma donro enday. Uguondo koendonro myakâwândy Lô. Aituo toenzepa âjityendyly, tâty anano modo inakai modo anhesedyly-mogue.

<sup>8</sup> Târâ kurâ domodo duay tawlylygue myakâwândy Ló. Kopaelâgâembaba inakai modo anhedilymo, aguelymo indadyly, Deus ize ato araba aidylymo awyly warâ nhedyly. Awylylygue, toenzepa myakâwândy âpaunzedily, âjityendily warâ.

<sup>9</sup> Deus olâ aunlolâ tynynonro modo nhemakely, nhedyly warâ âsenagazedily ume. Âkealâ Deus tynynonro keba modo enagazenehonze awyly. “Ydâ iwague ise mâsenagazedilymo” keze eyanmo.

<sup>10</sup> Idânârâ izepa tato aieni modo enagazenehonze Deus. Kywypado adiyndyse tatolâ aieni modo toenzepa enagazenehonze, Deus xurâem inakanhe adâjito. Deusgue tywymâgu izepaom modo toenzepa enagazenehonze lâpylâ mâkâ.

Akaemo iozepa kulâ unâ egatuwâni modo ânguy xyreni keba akaemo; ânguydo kulâ. Ânguy neinwântaymbamo; tonomegue mawânkâ âdutulymo. Idânârâ anju domodo tonhonreim Deus agonro âwankuem tyesemo lelâ. Iwâgâmo koendâ aguepamo, inwykelymo warâ.

<sup>11</sup> Deus wâgâ iozepa kulâ enomedâdaynrim modo takaze ton-honre olâ anju domodo, akaemo takaze kehoem koendâ awylymo warâ. Anju domodo olâ Kywymâry enanaym akaemo wâgâ inakanhe aguepa, newentâbyramo warâ.

<sup>12</sup> Ânguydo imeom poji anano, idu odano warâ tyâzeinhelâ iazely, adiyndyse tatolâ mawânkâ anhekyly, nâpaunzebyra tawlylygue. Arâ lâpylâ Deus wâgâ iozepa kulâ unâ egatuwâni modo adienkyly wâgâ nâpaunzebyra kulâ aguelymo. Unâ tâdâsemaguely wâgâ agueim âwankuem tyesemo, nutuba kulâ, tywykezemo warâ. Awylylygue ise ânguydo imeom xyâly ara kulâ Deus akaemo nhainly.

<sup>13</sup> Akaemo Deus wâgâ iozepa kulâ unâ egatuwâni modo kânagazedâmo. Awylylygue ise Deus nhenagazenehonlymo lâpylâ. Kopae kulelâba kywypado anhedilymo, peto oday alelâ. Âjigüe mâtâdyguelymo mâwinduatomoen-ro watay, âduaymolâ akaemo. Akaemo âduaymo atobyry wâgâ, Jesus eynynâbaom modo âunâguezemo. Âwypazenehonze akaemo, âtâ kywogonro tywykenry iwykanâni emyenro akaemo.

<sup>14</sup> Pekodo nhesedylymo, eagâ tâguetudyze tawlylymogüe; Deus izepa ato adiyndily nepa-gunâbyramo. Deus xurâem ityby iwelo modo enokuze kehoem. Dinheru tienmakely kulâ enananomo warâ. Awylylygue Deus nhenagazeguylyem awylymo.

<sup>15</sup> Ânwa iwâkuru oze tâtâly enanânehoimbyry ara akaemo, Jesus lelâ Deusram kainto kely neinwâmpyra itybyem tawlylymogüe.

Enanâgüewâdaungâ iweâpalâ Balaão aitobyry, Beor imery. Balaão ara akaemo iozepa kulâ unâ egatuwâni modo. Toenzepa tydinherugu kulâ myakâwândy Balaão ize ato.

<sup>16</sup> Awylylygue myakâwândy Deus izepa ato anhedily. Deus olâ myakâwândy Balaão eguy jumenta kurâ ara kehoem tytainhehonze, Balaão inakai adiyndyse tato aniempyra itoem.

<sup>17</sup> Âdyem nitaymba akaemo Deus wâgâ iozepa kulâ nhenomedâdo, paru iazeho saweypy ara kulâ. Eunu tâmyguyne kehoem kopâ ihugueim ara, adapezeinduo olâ tâtygagueze; kopâ nihuguebalâ mârâ emyenro akaemo. Deus âji tyameim aienibyryem xurâmoem. Târâ ise akaemo aunloenlâ âsenagazedilymo.

<sup>18</sup> Tonomegueinhe kehoem âdutulymo, tuândy ara kulâ olâ nhenomedâdilymo. Aguelymo: “Tâwâlâ inakai modo, kywypado warâ aguiendily; kuomaru mawânkâ Deus ize ato” kelymo. Kanra aweim wâne kanra tonokuze eturugue myara akaemo tienomedâdogue konokuze kelymo. Ton-honreba kulâ Jesus einwâni modo mawânkâ enokuze kehoem kuru, koendâ Deus aguehobyry nutubamo mawânkâ.

<sup>19</sup> Warâ akaemo Deus wâgâ iozepa kulâ unâ egatuwâni modo Cristo eynynonro modoram aguelymo: “Xina inomedâdomo amânhedylymo-ro watay, idânârâ amânhedyse matomo aiese lelâ âmaemo” kelymo. Adâkely umelâ olâ inakai aiedily nimopa awylymo. Mâkâ inakai amaymba âsemaguedânry emyenro akaemo.

<sup>20</sup> Kywymâry, Kâmakeim warâ Jesus Cristo kieinwândily-ro watay, kywypado aiedily, eynynâbaom modo anhekyly aiedily warâ tumoze kurâ. Ânguydo imeom tywyânto amaymba âsemagueyby emyenro kurâ. Tâlâ olâ kywypado, inakai warâ adiyndily imowânybyry modo timoymby aietoni. Ânguydo imeom âsemagueybyenlâ ihugueoni ara akaemo. “Jesus einwâni urâ” keyppenlâ inakanhe aitonduo, saguhobyry takaze kehoem ise inakanhe idily.

<sup>21</sup> Koendâ tâise Cristo wâgâ nutubamo lelâlâ awyly, koendâpa mawânâ Deus aguehobyry xutuimbyryem, xutudânry ara idilymo. Âkeá lelâlâ xirâ: “Cristo tâinwânse xina” keyppem, inakanhe aitondyby modo toenzepa enagazenehonze Deus, Cristo einwântânry takaze kehoem.

<sup>22</sup> Tâlâ wakeho: “Tâeankehobyry tâinhonse lelâ kaxoro. Pâsega igokeyby ikila onwanjilâ âjikobeguyonze todopâze”; myara akaemo, “Cristo tâinwânse xina” keypyem inakanhe aitoni modo.

### 3

#### *Kywymâry Jesus odopâdo*

<sup>1</sup> Cristo eynynâ ypemugudo kâinwynegyuly modo, kata azagâ ieto xirâ âyanmo kâinwenily. Waunro kata kâinwenily wâgâ, xirâ azagâ kata ieto wâgâlâ warâ kâinwenily mâuntuybymo mâenanâguedyemoem, iozeno wâgâ lelâ angahumo oday âunâgomoem warâ.

<sup>2</sup> Mâenanâguedyemoem urâ, akaemo saguhoem Deus itaumbry egatuwâni modo aguehobry, tynynâ aguenriem iduakewâdyby modo. Enanâguedaungâ lâpylâ Kywymâry, Kâmakerim Jesus aguehobyry, mârâ unâ egatuwâni modo âyanmo nhegatuhyby.

<sup>3</sup> Cristo odopâdyly iraynâ âdy waunroem kuru aini âyanmo kâengatudye wato. Tâlâ ise âdyly inakai, kywypado warâ adiendyse tato aieni modo. Âilezemo, âwankuem âesemo warâ, Jesus mâinwândylymogue.

<sup>4</sup> Aguelymo ise: “Jesus tarâ onro anaym tatay, odopâze tawily aguewânmy. Nodopâbyra lelâ olâ! Âdykâ wânkâ? Toenzepa einwânni modo tâiguzze, odopâdyly nepyrâlâ. Âdy nâtuguguewâbyra. Idânârâ aidyly onro adaguly ume aitobyry aralâ” kezemo.

<sup>5</sup> Iozepa kulâ olâ arâ aguelymo. Koendâ tiuntuyby enanânehonze kelymo. Idânârâ tâtuguguewâze lelâ. Saguhoem kau, onro warâ lâpeba myakâwândy. Deus agueduo myakâwândy kau, onro alelâ âepanâguely. Paikaylâ onro nhugudyly; aguely paru ontay, onrope itoem\*.

<sup>6</sup> Paruguelâ myakâwândy mâkâ saguhoem tâlânro modo nhainly lâpylâ. Toenzepa myakâwândy kopâ in-hugueândyly, Inwenwâmy toenzepa lelâlâ. Idânârâ tâlânro modo adainwânmy.

<sup>7</sup> Arâ lâpylâ kau, onro warâ tâlâ awily ise Deus aguehobyry odajilâ. Mârâ ume peto ise ingonokily, onro, kau alelâ sainze. Xypyry etay, koendonro ise turâ modoram nhuduly; tynynâbaom modo ise aunlolâ nhenagazegyuly.

<sup>8</sup> Xirâ mâenanâguedyemoem wato, kâinwynegyuly modo. Tokalâ emedyly âdiempa kulâ kurâem, mil anu olâ imâem. Kywymâry Jesus xurâem olâ mil anu âzekiba lelâ tokalâ emedyly agâ.

<sup>9</sup> “Odopâze urâ” kehobyry iweâpa sakadybyem awilygue, aguelymo: “Adâkehobyry ara anipyra awilylâ ise Jesus” kelymo. Iozepa kulâ olâ aguelymo. Âji tâdâsenagazedoram ânguy tingonodyse inkâba mâkâ. Tynynâbaom modo inakanhe adâidyly inmoly mâkâ inwânwânkyly, nheinwântomoem. Idânârâ tâinwândyly mâkâ ize ato, tienmakehomoem. Awilygue nodopâbyra awily wao.

<sup>10</sup> Pymâ Jesus odopâze lelâlâ olâ-ro warâ. MOK alelâ ise mâkâ âepanâguely; ânguy tynwânwândyly ume inkâba, tâmagazeim sainto ara ise âewily. Kyanoem ise kaynâ âjipyrygue. Kau xuzase. Idânârâ iwogonro iaduwwâse. Xixi, nunâ, ximukâ warâ ipa ise. Onro xuzase; idânârâ iwogonro ipa ise warâ.

#### *Jesus odopâdyly kyzenuene*

<sup>11</sup> Tutuze kurâ, idânârâ âdydo imeom sainrin-em Deus awily. Arâ-ro watay, âdaraka ise amidylomo? Idânârâ inakanhe amânhekylymo imowâdaungâ, Deus ize ato lelâ amânhetomoem.

<sup>12</sup> Jesus odopâdyly enuendaungâ. Xurâem âsewaniwâdaungâ, sainto iwaguepa isezedoem. Xypyry etay, kau iaduwnse, iwogonro modo sainze warâ Deus. Toenzepa ise mârâ peto âdâpigu, xixi, nunâ, ximukâ warâ âjixigoguzze; âdy nâxiânwâbyra ise!

<sup>13</sup> Deus olâ adâkeze: “Onro iwelo, kau iwelo warâ aiese urâ” tâkeze. Idânârâ mârâ onro iwelo anano modo koendonro lelâ ise anhekyly, Deus ize ato lelâ. Awârâ mawânâ kinwânwânkyly.

<sup>14</sup> Awilygue, yataen-hodo, kau iwelo, onro iwelo warâ mâenuendylymo ara, âzeon-hondâdaungâ, ioze lelâ amitomoem, tywykeba mitomoem warâ Deus enado, âdy wâgâ inwentâbyramo itoem.

\* 3:5 Gênesis 1.6-10 warâdâ Deus aguely myakâwândy: “Paru iotay kehoem taynynâ, tâynynâ ienipe nidâ, nhangatano, iano warâ itoem” kely. Aituo arâ âzepajigâdyly. Arâ myakâwândy Deus paru nhepajigâdyly, iano, nhangatano warâ myakâwândy. Mârâ epajigâdobyry kaynonroam Deus “kau” kely. Azagâ emedyly ieto wâgâ myakâwândy Deus awârâ nhugudyly; tytanrungue kulâ nhugudyly. Iguantybyem myakâwândy emedyly. Deus aguely: “Paru kau iano tokalâ âzejidydâ lelâ nâtâdyguy, onro âepanâguedyemoem” kely. Arâlâ myakâwândy aidyly aguehobyry ara. Mârâ tapigüenryam Deus “onro” kely, mârâ paruam “parutabâ” kely warâ. Mârâ onro, parutabâ warâ tientuo, koendâ myakâwândy Deus xurâem.

<sup>15</sup> Xirâ enanâgüewâdaungâ. Agui kurâ domodo tienmakely Kywymâry ize ato. Akaemo tâinwântânry modo tâinwândyly wao inwânwânkyly; awylygue olâ iweâpa idyly. Tonomery Deus nhuduypygye xirâ modo wâgâ âyanmo tywenize ani Cristo eynynâ kypemugu kin-wynguyly Paulo.

<sup>16</sup> Tygatary modo wâgâ Kywymâry odopâdyly wâgâ tywenize, âdy Deus iomazehoem aguienkyly wâgâ warâ. Tâlâ mâkâ inweniby wâgâ tutuzein-emba kehoem agueim. Awylygue Deus itaumbyry xutudânry modo, ton-honremba kulâ Jesus einwânni modo warâ, iozepa kulâ Paulo inweniby nhegatulylymo. Kyam Deus âjitaumbyguehobyry idânârâ inwenien-hoymby koendâ nutuwâbyra lâpylâ akaemo. Awylygue âdakeze aguely awyly koendâ nenomedâbyra awylymo. Aituo tâwâlâ akaemo Deus tânagazedo nhuinlymo.

<sup>17</sup> Yataen-hodo, tutuzelâ âmaemo, Deus itaumbyry koendâ egatudânrybe awyly. Awylygue tonomeguelâ itaungâ, Deus izepa ato aieni modo kewâdyly kulâgue enomedâni modo mâinwâmpyra mitomoem. Akaemo agueho mâinwantaguedylymo-ro watay, unâ iozeno iwerâ mâinwânkylymo mâinwâmpyra ise âmaemo. Iozeno einwândyly mâinmolylymo-ro watay, tuhu iwy wogonro âtâgâni ara ise âmaemo.

<sup>18</sup> Kywymâry, Kâmakerim Jesus Cristo koendonro lelâlâ kagâ, koendâ kêendyly warâ. Awylygue kurâem koendonro anhekyly koendâ xutuzezedaungâ. Koendâ mâkâ xutuzezedaungâ lâpylâ warâ. Eyam wakykely kimoba kine: “Âynrentâ xina. Koendonro lelâlâ âmâ, ton-honreim, iwâkuru warâ” kykenre. Arâlâ nidâ.

Xirâ mawânâ mâuntudyzemo wato.

Pedro

## 1 JOÃO

### João Saguho Kata Inweniby

Deus myakâwândy âdy xirâ kata wâgâ tywenezheim awyly iweninribyry nhangahu odaji ieni. Kata wâgâ tâzedy niweniba myakâwândy iweninribyry, idânârâ enanajimo olâ João iweninri, mâkâ toenzepa Jesus inwynegyuly. Versîculu 1dâ, “Jesus tarâ onro wâgâ awyly ume tâense, tydase warâ xina” kehobyry. Awylygue kata “João Saguho Kata Inweniby” kehonly. Deus itaumbryrlâ xirâ.

Deus xirâ kata inwenien-honly myakâwândy kywynedylygue, âdara kagonro agâ kydâpynedyly kiuntuhoem warâ. Koendâ lelâ mâkâ kurâem aidyse awyly. Iweniby itainrim modo turuse xirâ, Jesus wâgâ iozepa kulâ egatuwâni modo neinwâmpyra itomoem. Mârâ ume tâlâ myakâwândy: “Uguondo lelâlâ mâkeba Jesus, egadopryry kulâ” kerim modo. Awâkâ arâ tunâgueim modo olâ Deus iduery.

#### *Aguely Adaguho*

<sup>1</sup> Jesuslâ myakâwândy kaudyly iraynâlâ Deus Kyam Xutuen-hoim. Mâkâ xurâem kydawylygue mawânâ ise aunloenlâ Deus eydâ atodâ kydawyly. Mâkâ wâgâlâ mawânâ âyanmo kâinwenily. Onro anaym awyly ume, eagonropyrylâ xina, aguely idanipyry, tânugue enipyry, tâmarygue MÂ’ ienipyry warâ.

<sup>2</sup> Deus Xutuen-hoim âepanâguewâm. Xina emâ. Iwerâ mâkâ wâgâ xina nhegatyly. Mâkâlâ mawânâ aunloenlâ Deus ezay kitoem aieni. Kunwym Deus agâlâ myakâwândy mâkâ, onro anaxi âemâ olâ ânguy Deus awyly xutuen-honze.

<sup>3</sup> Tientyby, tindatyby warâ xina âyanmo nhegatyly, xina nheinwânto ara mâinwântomoem, xina agâ tokaleon-em mitomoem. Arâ lâpylâ âmaemo, Deus agâpa mâiehowâbyramo; Kunwym Deus agâpa, imery Jesus Cristo agâpa warâ tyetuneba ise kurâ.

<sup>4</sup> Xirâ kâinweniby mâintainlymo, koendâ kehoem mâuntulymo warâ watay, toenzepa ohomaenze âmaemo, xina iomaro ara, Deus ize ato ara warâ. Xirâ wâgâ mawânâ âyanmo kâinwenily.

#### *Koendonro lelâlâ Deus*

<sup>5</sup> Jesus Cristo aguehobyry tindatyby ise xina âyanmo nhegatyly. Koendonro mâkâ Deus, âdaunloenlâ inakai keba, inakai aieni keba warâ, iajinu emyenro, iamu emyenro keba.

<sup>6</sup> “Deus agâpa witaymba urâ” kykely umelâ, Deus izepa ato aguiendyly-ro watay, kykewâdyly kulâ; ioze inkâba aguykely. Tâinwânse kydawyly wâgâ adâkeze wâne kurâ, iamu oday kulâ olâ kydadakobâdyly.

<sup>7</sup> Deus ize ato ara lelâ aguidyly-ro watay, iajinu oday kydadakobâdo ara lelâ kurâ. Iozeno lelâ mawânâ Deus aunlolâ. Awylygue on-hoam itybyem kurâ. Deus xurâem tâwentâgueduneba ise kurâ, idânârâ izepa ato aguientyby xygakeybyem mawânâ, imery Jesus kruz wâgâ tunu tyapâze iguehobyry wâgâ.

<sup>8</sup> “Deus aguehobyry âdaunloenlâ kankadaymba urâ” kykely-ro watay, tâwâlâ kulâ kydâsenogudyly; âdy iozeno, iozepaom warâ awyly kiuntuwâbyra kurâ.

<sup>9</sup> Deusram, “Inakanhe aini kulâ urâ; tâjityenze olâ urâ awitobyry wâgâ” kykeduo olâ, inakanhe aguitobyry tygakeze. Aituo ise âdy mâkâ kâwentâguedo peba-ro warâ, mâkâem tywykeba ise kurâ. Adâkehobyry aiese lelâlâ mâkâ-ro warâ, koendonro lelâlâ mawânâ Deus.

<sup>10</sup> “Âdykâ Deus izepa ato agânhepyra urâ” kykely-ro watay, “Deus konokuni” kykelylâ, “Idânârâ izepa wato adyese mo lelâ” tâkeze mawânâ, aguehobyry peba kuoday-ro warâ.

## 2

#### *Kâmakehoem Jesus tunwynram aguehobyry*

<sup>1</sup> Âmaemo ymery ara kehoem kâinwynegyuly modoram xirâ kâinwenily, âurutoemoem, Deus izepa ato amânhepyra mitomoem warâ. Deus aguehobyry kiankadyly watay, Jesus lelâ kynynâ agueze ton-honreim, “Pabai, merâ inakanhe aitobyry xygakegâ” keze, âdaunloenlâ inakanhe aityby keba awylygue.

<sup>2</sup> Mâkâ lelâ mawânâ inakanhe aguitobyry epywaze igueypy. Awylygue kieinwândyly-ro watay, tygakeze Deus. Inakanhe aguitobyry kulelâ mâkeba nhygakely; idânârâ mâkâ inakanhe adâitobyry nhygakehoem ekani modo inakanhe aitobyry tygakeze lâpylâ.

<sup>3</sup> Deus aguehobyry kiankabyra kurâ-ro watay, âkealâ “Tutuze urâ” kykely.

<sup>4</sup> Aguehobyry neinwâmpyra kulâ, “Deus tutuze urâ. Mâkâ xurâ urâ” keim watay olâ âkealâba aguely. Deus itaumbryry iozeno nhutuen-hoymby ozepa kulâ aidyly.

<sup>5</sup> Aguehobyry kienwândyly watay olâ, kinwynedyly tânehonze kurâ, ize ato ara kehoem. Aguehobyry kienwântuo mawânâ ise eagâpa kydâiehoba kydawyly.

<sup>6</sup> “Deus agâpa witaymba urâ” kykely-ro watay, Jesus aralâ kine.

*Jesus eynynonro modo ânguy izepa nipyra nidâmo*

<sup>7</sup> Yataen-ho kâinwynegyuly modo, xirâ âurutomo iwelo mâkebalâ xirâ, tâdâpynedyly wâgâ aguely. Jesus Cristo einwândyly mangulymo ume mâindatybymolâ; aguientoem aguehobyrylâ mawânâ.

<sup>8</sup> Iwerâ olâ aguehobyry iweloem âzeholy, Jesus mawânkâ enehonwâm, âdara tâdâpynedyly awyly. Iwerâ tâpyneze lâpylâ kurâ. Iajimatuo iamu peba idyly myara âdara Jesus einwândyly awyly mâuntuzedylymo.

<sup>9</sup> Mâkâ “Jesus aguehobyry ara lelâ awidyly” kerim, adâkely umelâ Cristo eynynâ type-mugu niwynebyra awyly izepa waunlo watay, iamu duano mâkâ.

<sup>10</sup> Mâkâ âkeâ lelâlâ Jesus einwânâni modo iwyneni olâ iajinu duaylâ adakobâdyly waunlo ara lelâ. Deus “Aietaungâ” kehobyrylâ mawânâ kienwânkyly. Arâ lelâ kurâ watay, ânguy Deus neinwâmpyra itoem aguienehonwâbyra kurâ.

<sup>11</sup> Cristo eynynâ typemugu iwynedânry, Deus aguehobyry inmedylylâ. Inakai adyese, Deus aguehobyry tiankadyly nutubalâ, Deus itaumbry koendâ nutuba tawylygue, iamu duay xuzatyby ara; epy âdykâingâ tâtâly xutudânry ara kulâ.

<sup>12</sup> Iamimeom, âyanmo xirâ kata kâingonodyly,

Cristo mâinwântuomolelâ Deus inakanhe amitomobyry nhygakely.

<sup>13</sup> Tâjiunwyndo modo, âyanmo xirâ kata kâinwenily,

Deus tutuze mawlymogue.

Kaudyly iraynâlâ tâlâ myakâwândy mâkâ.

Salokuzenomo modo, âwynsaundo modo warâ âyanmo xirâ kata kâinwenily.

Ton-honre mataunaguyre Satanâs amânhedysemo ato amânhepyra mitomoem.

<sup>14</sup> Iamimeom, augueondyly âyanmo.

Deus tutuze âmaemo, unwânmo koendâ mâuntuhomo ara.

Tâjiunwyndo modo, âyanmo augueondyly,

Deus tutuze mawlymogue.

Kaudyly iraynâlâ tâlâ myakâwândy mâkâ.

Salokuzenomo modo, âwynsaundo modo warâ, âyanmo augueondyly,

Jesus tâinwânse lelâlâ mawlymogue.

Deus itaumbry mawânâ angahumo oday âunâgomo,

Awylygue ton-honre âmaemo, Satanâs amânhedysemo ato amânhepyra mitomoem.

<sup>15</sup> Deus mâinwâmpyra mitomoem aienehonrim modo kulâ kâjiwynedaundâ. Deus mâinwâmpyra mitomoem aienehonrim modo mâinwynedylymo watay, Kunwym Deus mâinwynedaymba âmaemo.

<sup>16</sup> Deus einwântânry modo âwâlâ tâzehoguedoem kulâ idânârâ adyendyse awylymo. Idânârâ tienkyly modo sodoem tâidyse awylymo. Imâm tâlâ tawylygue, sawoem idylymo. Deus keba olâ awârâ arâ aitoemoem aienehoim.

<sup>17</sup> Idânârâ Deus kienwâmpyra kyenehorim modo âdypygueânze; idânârâ inakanhe tadawyly âdypygueânze warâ. Kurâ Deus ize ato ara aini modo olâ ise kydadaimpa. Aunloenlâ ise tâlâ kydawyly.

*Cristo Iduery*

<sup>18</sup> Âmaemo ymeombyry ara kâenkyly modo âurudylymo. Inepa ise idânârâ adainly. Tutuzelâ âmaemo aguehobyry, xypyry etaji ituo, âepanâguezê “Cristo Iduery” kehobyry. Toenzepa iwerâ Cristo iduery modo. Awylygue xypyry etaji idyly kiuntuly.

<sup>19</sup> Deus itaumbry wâgâ âsenomedâze kagâ âtâdygyby modo kagâpa tâisemo ani. Jesus einwânâni modolâ-ro watay, kagâ tâtâdygyzêzemolâ tâise. Kagâ nâtâdygybya awylymolâ, Jesus neinwâmpyra awylymo xutuen-hoim.

<sup>20</sup> Onwanmo olâ Deus Tyispiritury tugonose, Deus Induakeyby mawlymo xutuhomem, Deus emary modo nhangahu onwa azeiti iapâdyly, Deusram âjiduakeoybymo awyly xutuhomem myara. Awylygue konomedâdo iozeno mâuntulymo, Deus nhutuen-hoymby.

<sup>21</sup> Iozeno mâuntuba mawlymogue inkâba xirâ kata âyanmo kâingonodyly, unâ iozeno einwândyly mâinmoba mitomoem lâkuru âurdylymo. Tutuzelâ âmaemo, iozeno, iozêpaom agâ nâseinwâmbrya awyly. Awylygue iozeno modo lelâ Deus xurâ awyly.

<sup>22</sup> Xirâ kata kâinwenily olâ, ânguy tâdâsenogudyly kerim modo awyly mâuntuhomoem. “Messias mâkeba awâkâ Jesus, kâmakeze Deus ingonotyby mâkeba” kewânâni modo, konokuni modo kulâ, Cristo izepaom modo arâ agueim. Imery Jesus neinwâmpyramo watay, nhunwym Deus neinwântaymbamo lâpylâ.

<sup>23</sup> Tâzenanaym kehoem: “Jesus Deus imeryem awyly kâinwântaymba urâ” keim, Kunwym Deus xurâem nitaymba. Tâjiduay kehoem: “Tâinwânse urâ Jesus Deus imeryem awyly” keim watay olâ Kunwym Deus xurâlâ mâkâ.

<sup>24</sup> Jesus wâgâ unâ iwâkuru einwândyly mangulymo umelâ mâindybyymo wâgâ âpaunzedaugâ, unâ agueho ara lelâ aitaungâ warâ. Arâ amidylymo watay, Jesus ize ato aralâ amidylymo, Nhunwym ize ato aralâ warâ.

<sup>25</sup> Cristolâ “Âmaemo yeinwânni modo, âigueduomo, kurâem itonze âmaemo, aunloenlâ ise yagâ mawylymo târâ Deus eydâ atodâ” keim.

<sup>26</sup> Xirâ kata wâgâ âurudylymo, inokuzemo kewâni modoram mâzenokuoba mitomoem.

<sup>27</sup> Cristo Tyispiritury âyanmo ingonotyby agâmolâ, iozeno mâuntuhomoem adyenehonze warâ. Idânârâ mâkâ konomedâdo iozeno lelâ, kewâdyly kulâ waunlo mâkeba; idânârâ Deus tienehonzye ato lelâ konomedâdo. Awylygue, mâkâ inomedâdomo mâindydylymo watay, âdy tâinwânseim awyly xutuze âmaemo. Deus Ispiritury amânhetomoem aguehobyry lelâ aietaugâ. Cristo agâ tokaleom ara lelâ itaugâ, Deus Ispiritury aguehobyry ara.

### *Deus eynynonro modo*

<sup>28</sup> Augueondyly. Cristo agâ tokaleom ara lelâ itaugâ, âmaemo ymeombyry ara kâenkyly modo. Ize ato lelâ aguiensezeguyly watay, kydâpybazedaymba ise kurâ, âetonduo. Kydotoendaymba ise kurâ, kientuo. Tyanuneba ise kurâ, sainto odaji ituo.

<sup>29</sup> Tutuze âmaemo, koendonro lelâ Cristo anhetyby awyly. Awylygue xutuwâdaungâ lâpylâ, koendonro amânhetuomo, Deus imeryem mawylymo.

## 3

<sup>1</sup> Angahumo odaylâ Kunwym Deus toenzepa kywynedyly awyly nidâ. Toenzepa kywynedylygue “Ymeombyry” kely kyam. Mâkâ imeom lelâlâ kurâ. Deus eynynâbaom modo olâ nutubamo Deus imeryem kydawwyly, eynynonro keba tawylmogue.

<sup>2</sup> Iweâma tuomare kurâ, Deus imeryem kydawwylygue. Kuomaru kuru olâ ise, eydâ atoram kytâduo. Kiuntuba olâ kurâ, mârâ ume âdara kidyly awyly. Cristo âetonduo olâ xutuze kurâ, eara kitoem aiese mâkâ-ro warâ.

<sup>3</sup> Deus izepa ato kulâ anientaymba Cristo; tywykenry mâkâ Deus xurâem. Cristo ara kidyly tynwânwânse kurâ; awylygue Deus ize ato lelâ aguiendyse kydawwyly, Deus xurâem tywykenryem kitoem.

<sup>4</sup> Deus izepa ato aiesezeni mawânkâ tâwentâguezeim, aguehobyry nhakazededylygue. Deus aguehobyry sakadyly watay, aguehobyry izepa tadawyllylâ.

<sup>5</sup> Kâtaybyay igueze akâwâm Cristo onro anaxi âewyly, inakanhe aguitayn-hobyry modo âsebywadoem. Mâkâ olâ âdaunloenlâ Deus aguehobyry nakabyra. Xirâ tutuzelâ âmaemo.

<sup>6</sup> Cristo agâ tokaleom inakanhe aisezedyly nitaymba. Deus izepa ato aiesezeni olâ Cristo âdaunlo awyly nutuba, Deus imery awyly nutuba warâ.

<sup>7</sup> Âmaemo ymeombyry ara kâenkyly modo, Cristo eynynâbaom modo inokubyramo nidâ. Iozepa kulâ akaemo aguely. Koendonro lelâ aieni mawânkâ tâwentâguezeba. Deus ize ato lelâ anhekyly, Jesus Cristo tunwym ize ato anheto ara.

<sup>8</sup> Deus izepa ato aiesezeni olâ Diabu xurâ; idânârâ nhugudyly iraynâlâ myakâwândy Diabu, Deus izepa ato aieseze awyly. Deus imery onro anaxi âemâ, Diabu anhetyby sainze.

<sup>9</sup> Deus xurâ kydawwylygue, Deus izepa ato kulâ aguiensezedaymba kurâ, Ispiritury kagâlâ awylygue. Aguehobyry kiankazededoem nuduwâpyra, Kunwym awylygue.

<sup>10</sup> Tutuzelâ âmaemo, ânguy Deus xurâ, ânguy Diabu Deus warâ awyly. Koendonro aietânry modo, Cristo eynynâ typemugu iwynedânry modo xurâ imeom mâkeba.

### *Kypemugudo Jesus einwânni modo agâ kydâpynene*

<sup>11</sup> Jesus einwândyly magulymo ume unâ mâindybyymo xirâ: “Jesus einwânni modo agâ kydâpynene; koendâ kydâzeto ara, arâ lâpylâ kagonrodo agâ koendâ kydâzene” kely.

<sup>12</sup> Caim ara inkâba kine. Diabu xurâem tawylygue myakâwândy tukono Abel nhâly. Abel olâ myakâwândy koendâ lelâ aini. Awylygue myakâwândy Deusram koendâ lelâ âzeholy. Caim pylâ myakâwândy Deus aguehobyry sakani-ro warâ. Tâsewânilygue kulâ myakâwândy tukono nhâly.

<sup>13</sup> Cristo eynynâ ypemugudo, Deus xurâ mawylmogue Deus iduery modo âewiâsedylmogue, tâseguâdâzeba itaugâ.

<sup>14</sup> Deus xurâem, iweloem ietybyem kydawwyly tutuze kurâ, Cristo eynynâ kypemugudo kinwynedylygue. Tânehonze awârâ igueypem, kurâem itondyby ara kydawwyly. Âpynedânry modo olâ igueypy aramo kulâ, iweloem tyesebamo awylygue.



<sup>15</sup> Máká Cristo eynynâ typemugu agâ âpynedânry, kyârinlâ mákâ, Deus xurâem. Tutuzelâ âmaemo, kyârimpyry, adâitobyry Deus nhygakehoem nekabyra watay, tyigueduo, aunloenlâ Deus agâ nipyra awyly.

<sup>16</sup> Xirâ kiuntuly, âpyneni tyanuneba tagonro tienmakeday igueze. Cristo awârâ enonwâm, kâmakeze tyiguehobyry wâgâ. Awylygue Cristo eynynâ kypemugu kâmaynoem watay, kienmakehoem kyiguely kyintadaymba kine.

<sup>17</sup> Wakykely: “Deus tywyneze urâ, tâinwânse urâ warâ” kykely. Tâlâ kydato modo âdypebaom modo agâ kiempajigâbyra kurâ watay, tânehonze awârâ Deus kinwynebyra kydawyly, kyam aguehobyry aguiempyra kydawyly warâ.

<sup>18</sup> Âmaemo ymery ara kâenkylly modoram xirâ auguely. “Kydâpynene” kykely kulâ mâkeba nidâ. Kagonro kienmawryadâdoem aguyjiene. “Kydâpynene” kykeduo, âkeâ lelâlâ aguykenre.

#### *Tyanepa ise Deus enado kydawyly*

<sup>19</sup> Kydâpyneduo, Deus aguehobyry kiankabyra kydawyly kiuntuly. Deus enado âdapa kehoem kydawyly; eagâ agueze tyanepa kydawyly warâ.

<sup>20</sup> Inakanhe aguitobyry wâgâ âwâlâ kulâ kydâsewendâdylly watay, kydâseguâdâbyra kine. Tutuze Deus, aguiendyseba ato aienibyryem lelâlâ kydawyly. Kienkadyly watay, kytizenze olâ mákâ.

<sup>21</sup> Yataen-ho kâinwyneguely modo, Deus kâwentâguebyra awyly kiuntuly watay, tyanunepa kurâ, eagâ aguykehoem.

<sup>22</sup> Kienkadyby xuduze lelâ, aguehobyry kiankabyra kydawylygue, ize ato aguiendyllygue warâ.

<sup>23</sup> Xirâ azagâ mawânâ Deus aguehobyry tutuzeim: “Ymery Jesus Cristo einwântaungâ” kely. “Âpynedaungâ” kely warâ.

<sup>24</sup> Aguehobyry aguiendylly watay, Deus agâpa kitaymba kurâ, kagâpa nitaymba lâpylâ ise. Kagâ awyly kiuntuly, Tyispiritury ingonotyby kagâ awylygue.

## 4

#### *Deus Ispiritury eynynâ agueim, aguedânry warâ*

<sup>1</sup> Toenzepa mârâem lelâba, “Deus Ispiritury auguehoem aguehobyrylâ kâenomedâdo” kewâni modo. Yataen-ho kâinwyneguely modo, idânârâ arâ agueim modo olâ kâzeinwântaundâ, tâlâ mawânkâ konokuni modo. Koendâ wao aguehomo, nhenomedâdomo warâ âkealâ, âkealâba warâ awyly xutuwâdaungâ, Deus eynynonro, eynynâbaom warâ awyly mâuntuhomoem.

<sup>2</sup> “Jesuslâ Messias, Deus Ingonotyby. Karalâ mákâ kurâem awyly, tunre, tybygue warâ; egadopyry mâkeba” keim tutuze kurâ, Deus Ispirituryam aguehoymby awyly aguehoem.

<sup>3</sup> “Deus Ingonotyby Messias mâkeba mákâ Jesus. Kurâ egadopyry âepanâgueby kulâ” keim olâ Deus Ispiritury pebaom. Cristo Iduerygue taseim awâkâ arâ agueim. Tydaselâ âmaemo, “Cristo Iduery âese onro anaxi” kely. Toenzepa Cristo iduery eon-honrugue aini modo xirâ onro anaym awyly iwerâ.

<sup>4</sup> Deus xurâ olâ âmaemo, ymeombyry ara kâenkylly modo. Awylygue iozepa kulâ unâ egatuwâni modoram mâzenokuoba mawylimo. Deus Ispiritury agonromo, ton-honreim kuru, Satanâs ispiritury onro anano modo agonro takaze eon-honru.

<sup>5</sup> Iozepa kulâ unâ egatuwâni modo Deus iduery eon-honrugue aguelymo; awylygue Deus izepa ato kulâ aguehomo. Deus eynynâbaom modoram aguelymo tâjidahoze, Deus iduery lâpylâ awylymogue.

<sup>6</sup> Xina olâ Deus xurâ; Deus eynynonro modo xina aguely tydasemo; xurâ keba modo olâ xina aguely nidapyramo. Ânguylâ Jesus wâgâ nhenomedâdylly watay, agueho koendâ idataungâ. Mákâ âyanmo agueho xina aguehobyry arâlâ watay, iozelâ ise, Deus Ispiritury iozeno xutuen-hoim mákâ agâlâ awylygue. Mákâ agueho xina aguehobyry agâ âzekiba nipyra watayma konokuni kulâ ise agueim, Satanâs mawânkâ arâ agueim.

#### *Kagonro agâ kydâpynedylly kyzenehonre*

<sup>7</sup> Yataen-ho modo, aunlolâ kagonrodo agâ kydâpynene; Deuslâ mawânkâ kydâpynedoem kon-honru xuduim. Kurâ Cristo eynynâ kypemugudo agâ âpyneni modo, Deus imery kurâ; iamudo, tunwym nhutuho ara Kunwym Deus kiuntuly.

<sup>8</sup> Âpynedânry modo olâ Deus nutubamo. Kurâem adienkylly modo wâgâlâ kywynedâ tawyly Deus nhenehonry.

<sup>9</sup> Kywynedâ tawyly enehonwâm Deus, tymery tokaleom onro anaxi igonomâ; mákâ kurâem iguehobyry wâgâ mawânâ ise kyigueduo aunloenlâ eagâ kydawyly.

<sup>10</sup> Awârâ mawânâ Deus toenzepa kywynedâ tawly nhenehon-hombyry. Kinwynedylygue inkâba Deus arâ anhedily, kywynedylyguelâ. Awlygue tymery tokaleom ingonodyly, kieinwândylygue, inakanhe aguitobyry nhygakehoem.

<sup>11</sup> Yataen-ho modo, arâ kehoem Deus kywynedyly watayma kydâpynene lâpylâ-ro.

<sup>12</sup> Ânguy âdaunloenlâ Deus netaymba. Cristo eynynâ kypemugudo agâ kydâpynedyly watay olâ Deus kagâlâ. Kagonro modo agâ toenzepa lelâlâ kydâpynedyly watay, Deus kyize ato ara kisezedyly lakuru.

<sup>13</sup> Deus Tyispiritury kagâ itoem nhuduypy wâgâ mawânâ kiuntuly, Deus agâpa kipyra kydawly, kagâpa nipyra awyly warâ.

<sup>14</sup> Xina Jesus agonropyry modo tutuze xina, einwânni modo emakeze Kunwym Deus tymery ingonodyly awyly. Xina emâ, iwâgâ egatuly xina nimoba-ro warâ.

<sup>15</sup> “Deus imeryma Jesus Cristo” kykely MON warâ-ro watay, kagâlâ Deus, eagâlâ kurâ warâ.

<sup>16</sup> Tutuze kurâ, Deus toenzepa kywynedâ awyly, kywynedyly nimoba awyly tâinwânse kurâ-ro warâ.

Kurâem adienkyly modo wâgâlâ kywynedâ tawly Deus nhenehonly. Cristo eynynâ typemugu agâ tâpynedyly imodânry Deus agâlâ, eagâlâ Deus warâ.

<sup>17</sup> Iwerâ Deus kywynedo ara kehoem kinwynedoem anhenehonly. Awlygue ise, xypyry etay, enado kydâepanâgueduo tâegane kydawly. Cristo eynynâ kypemugu agâ tâpyneze lelâ kurâ-ro watay, xirâ onro anaym tawly ume Cristo anhetbylâ aguienkyly awyly, xutuze Deus. Aituo ise xypyry etay tâwëntâzeba, tywykeba warâ kydawly.

<sup>18</sup> Deus kywynedâ awyly tâinwânse lelâlâ kurâ-ro watay, kiyntadaymba kurâ. Nuduwâpyra kywyneni modo kiyntadoem; kurâem inakai aieni modo lelâ kiyntaguyly. Deus tytaze kurâ-ro watay, koendâ kubalâ eagâ kydawly, kyanu mawânâ kânagazedoem aienehonrim.

<sup>19</sup> Iwerâma Deus tywyneze kurâ, kieinwândyly iraylâ mawânkâ kywynedyly.

<sup>20</sup> Jesus einwânni modo kinwynebyra kulâ, “Deus tywyneze urâ” kykely-ro watay, konokuni kulâ kurâ, Deus iwyneni mâkeba. Tâenseim mâkeba Deus, Jesus einwânni modo olâ kagâmolâ. Kienkyly modolâ kinwynebyra kurâ-ro watay, nuduwâpyra Deus kientânry kinwynedoem.

<sup>21</sup> “Deus tywyneze âmaemo-ro watay, ynyonro modo iwynedaungâ lâpylâ” nygue Jesus, xina agâ watay ume.

## 5

*Ton-honre kurâ, Deus ize ato agâ âseinwândânry modo aguiempyra kitoem*

<sup>1</sup> Idânârâ Jesus Deus Ingonotyby awyly einwânni modo, Deus imeonlâ. Kunwym Deus kinwynedylygue, Jesus einwânni modo tywyneze lâpylâ kurâ, Deus xurâlâ mawânkâ akaemo. Nhunwym tywyneze kurâ watay, imery tywyneze lâpylâ kurâ.

<sup>2</sup> Deus tywyneze kurâ-ro watay, aguehobyry kiankadaymba kurâ, eynyonro modo tywyneze lâpylâ warâ.

<sup>3</sup> Deus tywyneze kurâ watay, âdy mâkeba gâlâ agueho ara kidyly. Tuonugueim kyenwandy kianâdyly ara kulâ.

<sup>4</sup> Idânârâ kurâ Deus imeryem itaymby modo Deus kieinwâmpyra kitoem aienehoim modo aguiempyra kitoem ton-honre kurâ, Jesus tâinwânse kydawlylygue.

<sup>5</sup> Kurâ Deus imerylâ Jesus awyly einwânni modo lelâ ton-honreim, Deus kieinwâmpyra kitoem aienehoim modo aguiempyra kitoem.

*Deus imerylâ Jesus Cristo awyly tutuze kurâ*

<sup>6</sup> Jesus onro anaxi âetybyem, Deus imeryem tawly enehonwâm. Batiza âiehobygueduo akâwâm Deus, Jesus tymerylâ awyly aguely: “Ymery âmâ” kely eyam. Tunu tyapâze tâigueday, tânehonze lâpylâ Deus imeryem tawly. Augueondyly, adâitobyry wâgâ akâwâm Deus imeryem tawly nhenehonly, batiza tyepygueduo, kruz wâgâ tunu nhapâduo warâ. Deus Ispiritury kewâdyly kulâ nitaymba; mâkâlâ Jesus Deus imeryem awyly xutuen-hoim.

<sup>7</sup> Azagâ tokalâ warâ Jesus Deus imeryem awyly wâgâ agueim.

<sup>8</sup> Deus Ispiriturylâ mawânkâ Deus imery Jesus awyly xutuen-hoim. Jesus batiza iepygue-duo, Kunwym Deus. “Ymery toenzepa kâinwynegyly merâ” kewâm. Kruz wâgâ tunu tyapâze, tyigueday, Jesus “Pabai, imaxi iegadopyry kâengamely” kewâm lâpylâ warâ. Xirâ azagâ tokalâ warâ mawânâ kyam tutuen-honze Jesus Deus imery lelâlâ awyly.

<sup>9</sup> Mâkâ aidyly enipyry kyam nhegatuly, tâinwânse lâpylâ kurâ. Deus aguehobyry olâ tâinwânseim kuru. Awlygue Jesus wâgâ aguehobyry kieinwândyly.

<sup>10</sup> Jesus einwânni modo tutuze, tutuzemo lelâlâ, Deus agueho âkealâ awyly. Jesus einwântânry modo olâ tyangahu oday “Konokuni kulâ awâkâ Deus” tâkezemo. Arâ aguelymo, Jesus wâgâ Deus aguehobyry neinwâmpyra tawylयोगue.

<sup>11</sup> Xirâ mawânâ kyam Deus nhutuen-honly. Imery tâinwânse kydawylयोगue, typygueba ise eagâ kydawylы.

<sup>12</sup> Deus imery einwânni modo iweloem ietybyenlâ, Deus agâpa nâiehobamo warâ. Deus imery einwântânry modo olâ iweloem tyeseba. Aunloenlâ ise Deus agâpa awylыmo.

*Typygueba ise Deus agâ kydawylы*

<sup>13</sup> Âmaemo Deus imery einwântaynrim modo âyanmo xirâ kâinwenily, iweloem ietybyem mawylыmo mâenanâguehomoem. Âgueduomo Deus eydâ atoam ise mydâlыmo, typygueba mâkâ agâ mitomoem.

<sup>14</sup> Awylयोगue Deus agâ agueze tyanepa kydawylы. Ize ato ara kienkadyly-ro watay, tutuze kurâ kydatâ awylы.

<sup>15</sup> Kydatâ awylы kiuntylयोगue, kienkadyby xuduze awylы kiuntuly.

<sup>16</sup> Cristo einwânni modo ewy Deus izepa ato anhedyly watay, “Pabai, ityengâ mâkâ; inakanhe aitobyry xygakegâ” kykenre Deusram. Arâ kienkadyly watay, inakanhe aitobyry xygakeze Deus. Igueduo, aunloenlâ ise Deus agâ awylы. Tâlâ olâ inakanhe tâjityobyry âdaunloenlâ Deus nhygakedânry. Awylयोगue ânguy Deusram nhygakehoem nhekadoem nudupa awylы.

<sup>17</sup> Idânârâ inakai aguienkyly, aguykeho warâ Deus izepa ato lelâ. Tâlâ olâ inakanhe tâjityobyry âdaunloenlâ Deus nhygakedânry.

<sup>18</sup> Kurâ Deus eynynonro modo Deus aguehobyry kiankazedylы kitaymba kurâ, Deus imery kâentâ mawânkâ. Awylयोगue Satanâs inakai modo kurâem aniempyra awylы.

<sup>19</sup> Deus xurâem kydawylы tâdutuzelâ kurâ. Tutuze lâpylâ olâ kurâ, mâkâ eynynâbaom modo Satanâs emaym awylы.

<sup>20</sup> Deus imery onro anaxi âemâ; awârâ tutuze kurâ. Mâkâ lelâ Deus wâgâ koendâ kiuntuhoem konomedâni. Aituo Deus agâpa tyetuneba kurâ, imery Jesus Cristo agâpa tyetuneba lâpylâ warâ. Kunwym Deus tokalelâ, ipa eagonro. Mâkâ mawânkâ iweloem kyetoni, kyigueduo typygueba eagâ kitoem.

<sup>21</sup> Âmaemo ymery ara kâenkyly modo, akaemo Deus ara kehoem nhyrenkylymo kâdynanâdaundâ.

Alâ kulâ.

## 2 JOÃO

### João Kata Azagâ Ieto Inweniby

Deus myakâwândy âdy xirâ kata wâgâ tywenizeim awyly iweninribyry nhangahu odaji ieni. Kata wâgâ tâzedy niweniba xirâ iweninribyry, idânârâ enanaji olâ João iweninri, mâkâ toenzepa Jesus inwyneguyly. Awylygue “João kata azagâ ieto inweniby” kehonly. Deus itaumbrylâ xirâ, iweninribyry olâ egatuim. Deus xirâ kata imeimbyry inwenien-honly myakâwândy Jesus einwânni modoem. Xirâ kata itainrim modoram nhekadyly, tagonro agâ âpynedomoem, Jesus wâgâ iozepa kulâ tonomedâni neinwâmpyra itomoem warâ.

#### *Aguely adaguho*

<sup>1</sup> Âyam xirâ kata kâinwenily, âmâ pekodo Deus induakeyby, âmeombyryam warâ\*. Jesus einwânni modo iwymâry urâ. Toenzepa âwynedylymo. Urâ kulelâba olâ âwynenimo; idânârâ Kunwym Deus itaumbryry iozeno einwânni modo âwynedâmo lâpylâ.

<sup>2</sup> Deus itaumbryry iozeno xina nheinwânto ara mâinwândylymogue xina âwynedylymo. Deus nhutuén-hoymby aunlolâ kyangahu oday awyly, itaumbryry iweniby ara lelâ aguidyly warâ.

<sup>3</sup> Kunwym Deusram, imery Jesus Cristoram warâ kâenkadyly, kytendomoem, koendâ kâentomoem, kydadahuliba kyetomoem warâ. “Xina agâlâ itaungâ, amyguehomobyry xina nheinwântay, tagonrodo agâ xina âpyneday warâ” uguely inanry eyanmo.

#### *Agonromo agâ âpynedaungâ*

<sup>4</sup> Âmeom egary xidadâ. Toenzepa kohomaendâ, Deus itaumbryry iozeno lelâ anhekylymo kely kâindatuo, Kunwym Deus aguitoem aguehobyry ara aidylymo awylygue.

<sup>5</sup> Aituo, kou Cristo eynnonro, wauguely âyam, kurâ Jesus einwânni modo kagonro agâ kydâpynene, uguely. Iwelo mâkeba xirâ kuruto. Jesus Cristo einwândyly kianguly umelâ, xirâ kiuntuly.

<sup>6</sup> Deus aguehobyry ara lelâ aguidyly-ro watay, Deus tywyneze kydawyly tânehonze kurâ. Augueondyly, Jesus mâinwândylymo magulymo umelâ, agonromo agâ âpyneniém mawulylymo mâuntulylymo.

<sup>7</sup> Tâinkâ lelâba iozepa kulâ enomedâze kewâni modope awyly. “Kurâ ara inkâba Jesus Cristo iazely. Tâzegadopyry uguondoem ityby kulâ” kelymo. Arâ aguehomoem aguehoymbyem akaemo Cristo Idueryam. Xypyry etay ise mâkâ uguondo Cristo Iduery âepanâguly. Toenzepa ise mâkâ tâdâsenogudyly kely.

<sup>8</sup> Tonomeguelâ itaungâ, akaemoram mâzenokuoba mitomoem. Mâzenokuoba âmaemo-ro watay, Deus ipywazemo, xurâem amitomobyry wâgâ, tynnonro modoram koendonro tiunduly ume.

<sup>9</sup> Tâlâ lâpylâ Cristo nhenomedâdogueba kulâ enomedâni modo, tyangahu odano tunârygue kulâ nhenomedâdylymo. Jesus Cristo takaze kehoem tonomegue wâne âdutulylymo, Deus agâbamo olâ. Cristo wâgâ aguwâni modo olâ, Kunwym Deus, imery Jesus Cristo warâ agâba tyesebamo.

<sup>10</sup> Itymo anaxi Cristo nhenomedâdobyry araba kulâ unâ egatuwâni modo saindyly-ro watay, ataen-homo ara kâzeakaunâdaundâ, “Âetaungâ ietyram; ikobyzegewâdaungârâ, yagâ âwinduataungârâ” tâkezeba itaungâ eyanmo.

<sup>11</sup> Akaemo mâenkaunâdylymo-ro watay, inakanhe aitomo amânhedilymolâ lâpylâ mawânâ.

#### *Aguely âdypygueândo*

<sup>12</sup> Toenzepa âyanmo kâengatudyze watobe urâ, xirâ kata wâgâba olâ kâengatudyze wawyly. Udâdyse urâ âyanmo, urâ lelâlâ âyanmo auguehoem, on-hoam lelâ kuomaroem.

<sup>13</sup> Âwidy Deus induakeyby imeombyry idaenkulylymo lâpylâ†.

Xirâ kulâ âyanmo augueho.

\* 1:1 Ise, imeombyry warâ lelâlâ tâdaenkuzeim, tâlâ pylâ olâ awâkâ “Jesus âjigüe einwânni âtâdyguyri modoram inwenily” kerim modo. † 1:13 “Xirâ kata iweninribyry ijidadâry donro Jesus einwânni modo agueho” kerim modope lâpylâ “âwidy Deus induakeyby imeombyry” keduo.

## 3 JOÃO

### João Kata Azagâ Tokalâ Ieto Inweniby

Deus myakâwândy âdy xirâ kata wâgâ tywenezim awyly iweninribyry nhangahu odaji ieni. Xirâ kata wâgâ tâzedy niweniba myakâwândy iweninribyry, idânârâ enanaji olâ João iweninri, mâkâ toenzepa Jesus inwynegyuly. Awylygue xirâ kata “João igatary azagâ tokalâ ieto” kehonly. Deus itaumbryrylâ xirâ. Xirâ kata iweninribyry Gaioram xirâ kata igonodyly. Koendâ Gaio wâgâ aguely, Jesus xurâem anhekyly wâgâ aguely warâ. Koendâ lâpylâ Demétrio wâgâ aguely. Diótrefes inakanhe anhekyly wâgâ adâkeze lâpylâ olâ.

#### *Aguely adaguho*

<sup>1</sup> Âyam xirâ kata kâinwenily, Gaio. Jesus Cristo einwânni modo iwymâry urâ. Yataen-ho toenzepa lelâlâ kâinwynegyuly âmâ.

#### *Gaio wâgâ koendâ aguehobyry*

<sup>2</sup> Koendâ lelâ idânârâ âmâem ize wawyly, tâwânepa warâ. Deus einwândyly mâinmopa mato ara.

<sup>3</sup> Jesus einwânni modo eydâ mato dompyryem xarâ nâedâmo. Yam aguelymo keankâ: “Deus ize ato aiedyly nimowâbyra Gaio, Deus itaumbryry agueho ara adâidyly nimowâbyra warâ” nyguemo. Awârâ kâindatuo, toenzepa kohomaendâ.

<sup>4</sup> Toenzepa inanry kohomaendyly, ymery ara kehoem kâinwynegyuly modo Deus itaumbryry agueho ara lelâ aidylymo kely, kâindadyly-ro watay.

<sup>5</sup> Yataen-ho kâinwynegyuly, koendâ kehoem amidâ, Cristo eynynâ kypemugudo âyam IU ise idâppy modo koendâ mâendaenkuhobyry wâgâ. Mâuntuly modo keba wâne, arâlâ olâ koendâ medaenkumo. Arâ amituo, Deus ize atolâ amânhekyly.

<sup>6</sup> Taunlo Jesus einwânni modo agâ tâtâdyguyduomo, amânhyby negatumo. “Koendâ lelâ keankâ Gaioram xina âzedaenkuoly” nyguemo xinaram. Eydâ mato einkâ sakadondylymo-ro watay, idâhomoem âdylâ âundugâ, Deus xurâenlâ mawânkâ aidylymo.

<sup>7</sup> Jesus Cristo wâgâ agueze adakobâdaymo, Jesus einwânni modoam keankâ âzeholyo, Jesus einwântânry modoamba.

<sup>8</sup> Kurâ Cristo eynynonro modo, myarâ myarâ warâ Jesus wâgâ agueze adakobâni modo kyzemawydânemo. Ipa atomo eyanmo kiunduly watay, Deus itaumbryry iozeno nhegatudaymo kienmawydâdylmolâ ise.

#### *Diótrefes, Demétrio warâ wâgâ aguehobyry*

<sup>9</sup> Kata xiwenilâ awâtârâ eydâ matodâ Jesus einwânni modoram. Awâtârâ Jesus eynynonro modo iwymâryem tâidyse olâ Diótrefes. Awylygue adâkeho lelâ akaemo indadyse ato, kâinweniby adâkedyzeba.

<sup>10</sup> Awyarâ yaindyly-ro watay, âyanmo egatuze urâ, Diótrefes inakanhe aitobyry. Ywâgâ koendâpa anygue. Adâkehogue, inakanhe yedyse. Ywâgâ kulelâba olâ, eagonro modo wâgâ inakanhe anygue lâpylâ. Jesus einwânni modo myarâ idâwâtyby modo tâtyam nigâsedaymba mâkâ. Tonlo Jesus einwânni modo tâtyam ingâsedyzebamo lâpylâ warâ. “Itymoram mâingâsedylimo-ro watay, xina Jesus einwânni modo agâ mâtâdyguyba ise âmaemo” kely eyanmo.

<sup>11</sup> Yataen-ho Gaio, koendonro modo aito ara lelâ aikâ; inakai modo aito araba aikâ. Koendâ adâidyly imodânry Deus xurâlâ, inakanhe adâidyly imodânry olâ Deus xurâ keba.

<sup>12</sup> Idânârâ koendâ aguelymo inanry Demétrio wâgâ. “Uguondo koendonro mâkâ” kelymo. “Deus itaumbryry oze lelâ adâidyly nimowâbyra.” Koendâ adâkeze lâpylâ urâ iwâgâ; âkealâ auguely awyly tutuze lâpylâ âmâ.

#### *Aguely âdypygueândo*

<sup>13</sup> Toenzepa âyam kâengatulybelâ urâ, xirâ kata wâgâba olâ auguedyse wawyly.

<sup>14</sup> Inepa nhedyse wawyly, âmâ, urâ warâ kydâtunâguedoem.

<sup>15</sup> “Pabai, agâ koendâ lelâ Gaio itoem aiekâ. Sakaladâni peba iekâ” uguely Deusram. Idânârâ taunlo atoen-ho modo idâenkuly. Idânârâ atonlo yataen-ho modo kâendaenkulymo lâpylâ warâ.

Xirâ kulâ âyam kâinwenily.

## JUDAS

### Judas Kata Inweniby

Xirâ kata inwenily Judas nhangahu odaji iemâmy Deus. Awylygue Deus itaumbrylâ xirâ Judas inweniby Jesus einwânni modoram. Judas Queriote donro keba xirâ iweninri, eagonro ugonndo Judas kelygue tâzekeim.

Judas xirâ itainrim modo nhurudyly, iozepa kulâ unâ egatuwâni modoram nâzenokuoba itomoem. Saguhobyry modo ume tumunreim modo tâzenagazeoze myakâwândy arâ lâpylâ ise Jesus Cristo wâgâ iozepa kulâ agueypy modo enagazedlyly.

#### *Aguely adaguho*

<sup>1</sup> Urâ Judas, xirâ kata iweninri, Jesus Cristo emary, Tiago iukono. Âmaemo Deus tynynonroem induakeyby modoram xirâ kata kâinwenily. Tywyneim âmaemo Kunwym Deus xurâem, Jesus Cristolâ nhenimo warâ.

<sup>2</sup> Âynynâmo Kunwym Deusram kâenkadyly, âtyendâmolâ itoem, akaladânimo peba itoem, toenzepa âwynedylymo nhenehon-hoem warâ.

#### *Jesus wâgâ iozepa kulâ unâ egatuwâni modo enagazedo (2Pe 2.1-22)*

<sup>3</sup> Yataen-ho kâinwyneguily âmaemo. Toenzepa keankâ âdara Deus kâmakely awyly wâgâ âyanmo kâinwendyze wawyly. Awârâ wâgâpa olâ xirâ kata kâinwenily. Tâlâ mawânâ Deus tynynonro modo nheinwânkily nhenomedâdobyry. Awârâ konomedâdobyry modo âdalâ nâdugukeowâbyra. Âurutomoem xirâ kata kâinwenily, Jesus wâgâ ioze lelâ inomedâdomobyry mâinmopa mitomoem, inomedâdomobyry arapa iese kerin-am madagâikeoba mitomoem.

<sup>4</sup> Âduaymolâ inokunimo; inokudylymo kulâ awyly mâuntuba olâ âmaemo. Angahumo oday âunârymo tiungukedyzemo, mâuntuba olâ âmaemo. Adâkely umelâ Deus xunârybyry nhugukelymo. “Deus koendonro awylygue, inakanhe aguitobyry xygakeim awylygue warâ, tâwâlâ inakai modo aguiendyly, tâwâlâ âdalâ kulâ aguykeândaynly warâ” kelymo. “Deus eynynonro xina” tâkewâzemo wâne, kewâdilymo kulâ olâ. Jesus Cristo kulelâ kywymâry; mâkâ aguietoem aguehobyry ara adâidysebamo olâ. “Ywâgâ iozepa kulâ unâ egatuwâni modo enagazeze olâ urâ” kewânmy Deus.

<sup>5</sup> Kydamudo israelita domodo aitobyry enanâguewâdaungâ. Egitodâ awylymo ume, enagazenimo amaymba tâmakezemo myakâwândy Deus. Deus tâmakebygueduolâ, toenzepa Israel domodo ewy Deus aguehobyry takazemo myakâwândy. Awylygue myakâwândy Deus tâinwântânry modo ingueânehonwâdily. Tutuzelâ wâne âmaemo xirâ, mâenanâguehomoenlâ olâ auguely.

<sup>6</sup> Idânârâ adaguly iraynâ akaemo anju domodo Deus aguehobyry sakanibyry modo enanâguewâdaungâ lâpylâ. Deus eydâ atodâmolâ myakâwândy, tyeinwândyly ume. Deus tywymâryem awyly izepamo olâ myakâwândy. Deus agâ âzekiba myakâwândy ize awylymo. Awylygue myakâwândy Deusram târâpa âieholymo. Tâtagueim tuhoadaguenry tyameim odaji myakâwândy âjigonoholyo, aunloenlâ korentygue ekâjiwâdybyem awylymo. Târâlâ akaemo typygueba kehoem Deus tânagazenehon-ho saindyly inwânwândylymo.

<sup>7</sup> Enanâguewâdaungâ lâpylâ Sodoma donro modo agâ, Gomorra donro modo agâ, xidadâ mârâdâ iwaguepaom modo agâ warâ aityby. Inakai modo, kywypado modo warâ aiedyly nimopamo myakâwândy. Anju domodo Deusgue tywymâgu izepa atobyry, ara lâpylâ myakâwândy akaemo Deusgue tywymâgu izepa awylymo. Eagâ tohoguinhobyry lelâba myakâwândy nhyinanâguilymo, pekodo modo, ugonndo modo alelâ. Pekodo, pekodo agâ, ugonndo, ugonndo agâ warâmo kulâ myakâwândy. Arâ inakanhe aidylymogue myakâwândy Deusram âzenagazeolyo. Petomâgue myakâwândy iadulylymo, adainlymo warâ. Mârâ peto amaymba nâsemaguebamo myakâwândy, myara lâpylâ ise Deus eynynâbaom modo mârâ peto nhâtânry amaymba nâsemagueba awyly.

<sup>8</sup> Mârâ xidadâ anano modo, “Adâiseba itaungâ” tâkehonly umelâ aitomobyry ara lâpylâ asaemo iozepa kulâ unâ egatuwâni modo Deus enudâba kulâ aidyly. Warâ aguelymo: “Xina anhekily koendâ lelâ awyly, Deus nenehom xina nhâenkyem” kelymo. Kewâdilymo kulâ olâ. Awylygue âdaunlo modolâ nhyinanâguilymo; aituopylâ tâwâlâ kulâ inakanhe idylymo-ro warâ. Awylygue tywymâry modo aguely neinwâmpyra awylymo. Deus pymâ imâsedo kuru aguely neinwâmpyra awylymo. Anju domodo nhunâguedylymo warâ.

<sup>9</sup> Anju domodo iwymâry, anju Miguel, asaemo iozepa kulâ unâ egatuwâni modo ara âdalâ kulâ aguepa myakâwândy. Diabu niwykeba myakâwândy, Miguel, Diabu warâ myakâwândy ânguy Moisés eguepybyry sodoem ini awyly wâgâ âjihogulymo. Ton-honre myakâwândy

Miguel, ádylá adientoem, Diabu niwykeba olá myakâwândy. Warâ myakâwândy aguely: “Satanás, ioze inkâba awârâ amidyly. Deus ise agâ ageuim, urâ mâkeba” kely.

<sup>10</sup> Asaemo iozepa kulâ unâ egatuwâni modoma tiuntudânry modo tywykeze. Ânguydo imeom wâne adienkylygue nâpaunzebyra, adienyise tatolâ anhekylymo, myara lâpylâ asaemo iozepa kulâ unâ egatuwâni modo ize tatolâ anhekylymo Deus ize ato keba. Awylygue ise Deusram âzewentâolyo; xypyry etay âzenagazeolyo warâ.

<sup>11</sup> Kaikâlâ ise asaemo ize tato kulâ aieni modo, Caim ara. Dinheru wâgâ kulâ âtynanâni modo, Balaão ara. Corá aimâmy myara lâpylâ aidylymo. Deus israelita domodo iwymâryem induakeyby Moisés tywymâryem izepa myakâwândy Corá; awylygue myakâwândy Moisés idueryem idyly. Awylygue myakâwândy Deus, Corá iguehoem anhedily.

Arâ lâpylâ ise “Deus eynynonro urâ” kewâni modo, kewâdily kulâ-ro waunlo modo aiehowâdily.

<sup>12</sup> Âmaemo Jesus eynynonro modo âjigüe mâwinduatomoem, tâpyneze mawylymo mânenhon-homoem warâ mâtâdygyuhomobyryam tâtâze akaemo iozepa kulâ unâ egatuwâni modo, agâmo âwinduase. Tywykenry duay tywykeim emyenro akaemo. Tywypazeba kehoem tâzenanaym toku ikaji idylymo. Kaneru etaynrin modo wâne, turâem koendonro adientay, kaneru nepyramo myara, akaemo tâwâlâ on-hondylymo, âkelo olâ niompyramo. Eunu tâmygyuneim kopâem ihugueim emyenro akaemo; ihugueim ara wâne sapezenruam tadahoze olâ nihugueba itoem. Âkealâ konomedâdomo tynwânwânse kurâ; konokudylymo kulâ olâ. Nady ewisely kinwânwânkyly, newiseba olâ, waunlo emyenro akaemo. Mârâ se iwindy agâlâ tojionkeoze, iladoem myara ise akaemo iozepa enomedâni modo iguelymo, Deus agâpamo ise typygueba kehoem.

<sup>13</sup> Parutabâ sahugânu ton-honreim ara kehoem akaemo. Sagunu onwa tâese mârâ sahugânu, todopâday olâ iwyku sagunu wâgâ tâxiânze. Arâ lâpylâ akaemo iozepa kulâ unâ egatuwâni modo, âdykâ takadomobyrydâ, kywypado modo, inakai modo warâ kehoem anhekylymo. Ximukâ kau wâgâ tâjidy xugukerim emyenro akaemo. Mârâ ximukâ aunlo tânuagaenze adakobâni modo watay, tuzase. Arâ lâpylâ ise iozepa kulâ unâ egatuwâni modo, Deus eydâ atoam kainlânhehomba awyly. Âji tyameim kehoem aienibyrenlâ Deus, akaemo iozepa kulâ unâ egatuwâni modo ejidyem. Târâ ise Deusram aunloenlâ âzenagazeolyo.

<sup>14-15</sup> Saguhoem Enoque adâkezelâ myakâwândy akaemo iozepa kulâ unâ egatuwâni modo wâgâ. Tâlâ tawyly umelâ myakâwândy Enoque, iwerâ aitaynrin modo wâgâ aguely. Warâ myakâwândy aguely: “Wayam waunroem Kywymâry âetuo, eanjury modo eagâ âese, tapâguely ekimo ise-ro warâ. Ilâem ise kurâdo modo âda tiendyly wâgâ aguely. ‘Yagonroenlâ ise âmaemo’ keze tynynonro modoram. Tâinwântânrybyry modoram olâ, ‘Yizepa mataunaguynre. Ize wato ara aityby mâkeba âmaemo. Ywykewânmo, unâguemâmo warâ. Iwague ise ydâpa mawylymo’ keze” kewândymy Enoque. (Adâogüe tydamudoguem myakâwândy Enoque\*.)

<sup>16</sup> Alâ akaemo konokudaynrin modo ilahuru Deus agâ, anhekyly modo izepa tawyly-mogue. Alâ inakanhe adâidyse tato anhedilymo. Tadaloenly keduoonro akaemo; âdypeom modo wâgâ, pymâ domodo wâgâ warâ koendâ aguelymo, âdylá tienmakehomoem kulâ.

### *Kydâturudo*

<sup>17</sup> Yataen-hodo, Pymâ Jesus Cristo tunâry egaturin-em induakeyby modo aguehobyry kâzenanânehonwâdaundâ.

<sup>18</sup> Wakewânmony: “Xypyry etaji idyly-ro watay, sainse lâpylâ Deus âwankuem ieni modo; einwâni modo âwankuem iseemo lâpylâ warâ. Deus eynynonro keba ise akaemo. Awylygue ise idânârâ inakai adienyise tato anhedilymo” kewânmo.

<sup>19</sup> Jesus eynynonro modo âjizepa itomoem aienehonrim modo wâgâ myakâwâm aguelymo. Idânârâ inakai modo tâpaunzedo, adyese lelâ akaemo konokuni modo. Eagâmo inkâba Deus Ispiritury.

<sup>20</sup> Earamo tâiseba itaugâ, yataen-hodo. Ago lelâlâ Jesus einwânsezedaugâ, koendâ kehoem Jesus wâgâ âsenomedâzezedaugâ warâ. Deus agâ amyguedaymo, Deus Ispiritury amyguehomoem nhuduhobyry aralâ Deus agâ aguewâtaungâ.

<sup>21</sup> Deus âwynedâmo awyly kâzenanânehonwâdaundâ. Kywymâry Jesus Cristo odopâdily tânuenzelâ itaugâ; aunloenlâ ise eagâ kydawlyly. Kytyendâ tawylygue ise Jesus tagâ kyedyly.

\* 1:14-15 Gênesis 5.3-24 warâdâ aguely. Saguho uguondo Adâogüe tydamudoguem merâ Enoque. Jarede imery myakâwândy mâkâ. Maalalel imery myakâwândy Jarede. Cainâ imery myakâwândy Maalalel. Enos imery myakâwândy Cainâ. Sete imery myakâwândy Enos. Adâo imery myakâwândy Sete.

<sup>22</sup> Tâlâ âduaymo ton-honremba kulâ Jesus einwânni modo. Awylygue tâinwânse, neinwâmpyra warâ awylymo. Akaemo modo tytyenzelâ itaungâ, eon-hondâdaungâmo warâ, koendâ nheinwântomoem.

<sup>23</sup> Âdylâ peto onwanji ihuguezeajiom tâmaegoze kehoem manwâdylymo wâne, myara inepa kehoem eagâmo aguewâtaungâ, eon-honrumo xuduwâtaungâ, Jesus koendâ nheinwântomoem. Iozepa enomedâni modo tytyenzelâ itaungâ. Tonomeguelâ olâ itaungâ, inakanhe aitomo ara amipyra mitomoem. Inakai kulâ akaemo nheinwânkyly, anhekyly warâ, âtâ tâjiwogonro itânzeyby ara. Mârâ itângu izepa mawylymo, ara lâpylâ akaemo iozepa enomedâni modo aito izepa itaungâ.

*Koendonro awâkâ Deus*

<sup>24</sup> Warâ inanry auguely, Deus agâ augueday: “Koendonro lelâlâ âmâ xina agâ. Tâenselâ âmâ, Satanás xinaram ‘Aiekâ’ keho xina aniempyra awyly. Toenzepa ise xina iomaru, xina mâenkaunâduo. Eydâ matoam xina idâhoem amiendâ, tâwentâzeba âyam xina saintoem. Âwâkuru, on-honru warâ ese xina.

<sup>25</sup> Âmâ lelâ Deus, ânguy imyenro lâpeba. Xina etaybyay Pymâ Jesus Cristo iguehobyry wâgâ xina mâenmakely. Koendonro lelâlâ âmâ. Imyenro koendonro lâpeba. Âmâ ton-honreim kuru. Âmâlâ idânârâ xutuim. Arâlâ âmâ iwerâ. Aunlolâ ise âmâ. Âkeá lelâlâ xirâ xina agueho” uguely Deusram.

Alâ kulâ ise âyanmo kâinwenily.

Judas



## APOCALIPSE

### Deus Waunroem Aitaynrîm Modo Nhutuen-hon-ho

Deus myakâwândy João nhangahu odaji ieni âdy xirâ livru wâgâ inwenily awyly, onro adaimpygueduo âdy aini awyly kiuntuhoem, âdara târâ Deus eydâ atodâ awyly kiuntuhoem warâ. João lelâlâ wâne iweninri, Deus itaumbry olâ nhगतuly. Jesus nhapygueni, aguely idani warâ myakâwândy João. “Jesus toenzepa inwyneguly” kelygue myakâwândy ezekely. Ilha Patmosdâ myakâwândy mâkâ etagu, unâ tâdâsemagueho nhगतuhobyry wâgâ.

Ásia eynynâ Jesus einwânni modoram mâkâ xirâ livru inwenily.

“Kordeiru” kelygue tâzekeim Jesus, inakanhe aguitobyry xygakeze mawânkâ myakâwândy iguely. Xypyry etay tâdâsenagazedo wâgâ adâkeze João, anju domodo trombeta indyduomo, tâdâsenagazedo modo saindily awyly wâgâ. Azagâ ânguydo imeom adyry âepanâguely wâgâ adâkeze. Deus lelâlâ ara tynrendysedo ise akaemo. Deus iduery modo on-hoam isemo, Jesus agâ tâsegyebhomoem. Kawaru tapekeim wâgâ ise Jesus âewyly. Akaemo eon-honru idânârâ ise Jesus nhainly. Kau iwelo, onro iwelo warâpe ise. Jesus ise pymâ imâsedo kuru-ro warâ.

Xirâ livru wâgâ tutuze kurâ, târâ Deus ezay âdara awyly. Jesus xurâ modo lelâ ise târâ. Jesus eynynâbaom modo olâ ise âji tâdâsenagazedodâba nipyra; aunloenlâ ise târâ awylymo.

#### *Aguely adaguho*

<sup>1</sup> Xirâ pape kâinwenily Jesus einwânni modoam, waunroem aitaynrîm modo Jesus nhutuen-hoymby nhutuhoem. Deus myakâwândy waunroem aitaynrîm modo tânehonze Jesus Cristoram. Jesus tyanjury tydâpa ingonotyby xirâ modo yam xutuen-hoim.

<sup>2</sup> Urâ lelâlâ kâentaymby modo awylygue âkeâ lelâlâ xirâ kâinwenily, waunroem aitaynrîm modo tutuze lelâ mitomoem. Deus kurudyse ato xirâ kâinwenily, Jesus Cristo yam nhutuen-hoymby.

<sup>3</sup> Jesus einwânni modo âtâdyguyhodâ xirâ pape itainrim modo koendâ lelâ ise Deus agâ. Koendâ lelâ lâpylâ ise aguely idani modo, xirâ livru wâgâ tâdâturudo einwânni modo warâ. Iweâpa nipyra ise idânârâ xirâ modo aidyly.

#### *Sete xidadâ anaym Jesus einwânni modoram João aguehobyry*

<sup>4-5</sup> Urâ João xirâ iweninri Jesus einwânni modoram, Ásia eynynonro sete xidadâ modoram. Deus agâ augueday: “Koendâ Ásia eynynonro modo egâ, koendâ lelâ agâ itomoem. Sakaladânimo peba iekâ” warâ keze urâ Deusram, Jesus Cristoram, sete espîritu koendonro modoram warâ. Iweâpalâ mykâinane Deus tâlâ awyly; iwerâ tâlâ; aunlolâ ise tâlâ awyly warâ. Deus eydonro akaemo sete espîritu modo. Jesus Cristo olâ Deus wâgâ ioze kehoem kuru kiuntuhoem agueim. Iguewâm; ipa lelâlâ imâ. Igueypyem mâkâlâ akâwâm waunroem kuru kurâem itoni. Xirâ onro anaym idânârâ pymâ domodo iwymâry mâkâ.

Kywyneni lelâlâ mâkâ. Kruz wâgâ tunu tyapâze iguehobyry wâgâ inakanhe aguitobyry xygakewâm Deus.

<sup>6</sup> Eynynonro modoem aguitoem aguewâm Jesus Cristo, Deus agâ aguenriem kitoem, Deus, kurâ domodo agâ aguehoem kienmawyadâdoem warâ. Tâtaybanoem kyemâ, tunwym Deus agâ tâwaneinhe. Âdaunloenlâ Jesus koendonroem awyly wâgâ aguykely kimopa kine, eon-honru wâgâ warâ. Âkeâ lelâlâ xirâ.

<sup>7</sup> Xirâ kâinwenily aguely xutuwâdaungâ. Inepa ise Jesus Cristo odopâdyly eunu duay. Idânârâ kurâ domodo Jesus Cristo odopâdyly esemo. Kruz wâgâ awyly ume ferro tuosebileingue sodo ihoguyimbyry modo esemo lâpylâ. Idânârâ kurâ domodo onro anano mâkâ eynynâbaom modo, Jesus odopâdyly tientuo, tânagazedily ytaze ohogüenzemo. Âkeâ lelâlâ xirâ.

<sup>8</sup> – Idânârâ adaguho, âdypygueândo warâ urâ. Letra A adaguho, letra Z pylâ xypyry\* ilâ emyenro urâ – kely Deus Ton-honreim.

Tâlâlâ myakâwândy Deus; tâlâ iwerâ; aunlolâ ise tâlâ awyly warâ.

#### *João, Jesus Cristo nhetobyry*

<sup>9</sup> Âpemugumolâ urâ João, Jesus Cristo eynynonro kydawlylygue. Aramo, Jesusgue tywymâgueim lâpylâ urâ. Jesus einwânni wawlylygue keankâ iduerydoram kâzenagazeoly. Inagazedomo ara lâpylâ kâzenagazeoly; toenzepa ienagazedilymo; kâenmaenly lelâ olâ, âdara uguopalâ, Jesus einwândily kâinmopalâ warâ. Ilha Patmosdâ ietagu, Deus itaumbryry kâengatuhobyry wâgâ, Jesus nhenomedâdobyry âkeâ lelâlâ awyly aguehobyry wâgâ warâ.

\* 1:8 Gregu domodo itanwe-em, “Alfa” kely “Adaguho” keze, “Ômega” kely “Xypyry” keze warâ. Awylygue Cristo Alfague, Ômegague warâ tâzekeim.

<sup>10</sup> Semana adaguho oday keanká Deus Ispiritury âewyly, wayam waunroem aini modo kâentoem aienehonze. Ykayná keanká tâjitanru kâindadyly. Ton-honre kehoem aguely, trombeta ara:

<sup>11</sup> — Idânârâ mâenkyly modo iwenigâ pape wâgâ. Igonokâ sete xidadâ anaxi Jesus einwânni modoram, Êfeso, Esmirna, Pêrgamo Tiatira, Sardes, Filadêlia, Laodicéia warâam — kely keankâ yam.

<sup>12</sup> Kâemyobâdyly keankâ, yagâ agueim ese. Âsemyombâdybem, sete candelabru ourugue xygatyby kâendyly.

<sup>13</sup> Mârâ duay keankâ uguondo emyenro kâendyly. BOH waunlo keankâ ety iwogonro. Ouru xygatybygue ihogâdyly nhewandanopyryem epady onwa, pymâem awyly xutuhoem.

<sup>14</sup> Tapeke lelâlâ keankâ nhangahudu, kâdâkerâ† ara kehoem. Peto iatygu ara kehoem keankâ enu ehozelu.

<sup>15</sup> Bronze sareântyby ehozelu ara kehoem keankâ ihuru ehozelu. Iwâelu imâsedo ipyru ara kehoem keankâ itanru eon-honru.

<sup>16</sup> Emary aho eynynâ sete ximukâ keankâ emano. Itayba espada tuosebileim, tâynâ, taynâ warâ iewipy keankâ egaserim. Xixi wâne toenzepa kehoem tohobaze myara keankâ emydy ehozelu.

<sup>17</sup> Kâentuo, iekomadâ; ipebaji kehoem yihuguely igueypy ara. Aituo tâmary aho eynynon-rogue MÂ' yedyly. Aguely:

— Tyanepa ikâ. Idânârâ adaguho urâ. Idânârâ adaimpygueduo, ipa witaymba ise urâ.

<sup>18</sup> Mâkâ iguedânry urâ! Yigewâm wâne. Kurâem witonmâ olâ, aunloenlâ witoem. Iguewâtyby modo kurâem kânhetondoem aguehomybem urâ. Ânguy igueypyem nâtâzededaymba ise, kurâem itondoem agânhetuo. Etadâdyby wâne myara akaemo, urâ pylâ xave etaguehomo sodo-ro myara.

<sup>19</sup> Awylygue wayam aini modo mâenkyly wâgâ iwenigâ, iwerâ aini modo wâgâ, ilâpygueduo aini modo wâgâ warâ.

<sup>20</sup> Sete ximukâ lelâ metai iemaym, aho eynynâ, sete candelabru modo sawo duay wawyly warâ. Mâuntuba olâ âmâ âdy mâentyby awyly. Wakeze xirâ aguely. Sete xidadâ anaym yeinwânni modo mâenanâgueholâ ise awârâ sete candelabru ourugueto modo. Awârâ sete ximukâ ise ynynonro modoram unâry egatuwâni modo mâenanâgueho-ro warâ — kely keankâ Jesus.

## 2

*Efesodâ Jesus einwânni modoram unâ egatuhobyry*

<sup>1</sup> Aituo keankâ Jesus yam aguely:

— Xirâ iwenigâ Efesodâ ynynonro modoram unâry egaturin-am.

“Sete ximukâ tâmary aho eynynâ sawâni, sete candelabru modo duay adakobâni warâ urâ. Ytaumbyry xirâ âmaemo Êfeso donro modoram:

<sup>2</sup> “Tutuze urâ idânârâ urâem amânhetybymo. Ton-honre minasemo ize wato ara lelâ amitomoem. Toenzepa tâsenagazeze minasemo, yeinwândyly mâinmopa olâ âmaemo. Konokuze kulâ, ‘Cristo xina igononi iwâgâ agueze’ kewâni modo, agueduo, tâpaunzeze âmaemo, âkealâ, âkealâba warâ awyly mâuntuhomoe. Tutuze olâ urâ, aguelymo mâinwâmpyra mawylymo, kewâdylymo kulâ awylygue.

<sup>3</sup> Ynynonro keba modo inagazedâmo, yeinwândylymogue. Mâzenagazeolymogue kulâ yeinwâmpyra mipyra olâ keankâ âmaemo. Toenzepa wâne mâzenagazeomo, tuomareba mipyra olâ mataunaguynre.

<sup>4</sup> “Tâlâ olâ inwentâdomo. Waunroem yeinwâmpygueduomo ywynedylymo ara inkâba ywynedylymo iwerâ.

<sup>5</sup> Saguhoem ywynedomobyry enanâguewâdaungâ. Tâjityenzelâ itaungâ, iwerâ toenzepa ywynebyra mawylymogue. Toenzepa ywynedondaungâ, saguhoem ywynedomobyry ara. Odopâze urâ. Izepa wato aedyly mâinmopa âmaemo-ro watay, inagazezemo urâ. Candelabru ejidydâpa ejikely wâne myara ise aedylymo, amidylymo mâungukeba âmaemo watay.

<sup>6</sup> “Koendâ lelâlâ, Nicolau eynynonro modo nhenomedâdomo izepa mawylymo. Ienudâba lâpylâ akaemo aidyly.

<sup>7</sup> “Awylygue aguely mâuntudyze mataymo, idataungâ Deus Ispiritury aguely idânârâ yeinwânni modoram.

† 1:14 Gregüem adâkeze: “Neve ara kehoem nhangahudu sapeku.” Tapeke mawânârâ neve, toenzepa sapeku. Bakairi domodo olâ neve âdykâ nepyra awylygue, tarâ “kâdâkerâ ara” kehonly lelâ, tapekeim enday kâdâkerâlâma idânârâ nhutuly.

“Âmaemo xypyry etaji kehoem yeinwândyly imodânry modo, Deus enadoram alehozemo urâ, âji iwâkuruam, âigueompyra mitomoem. Nady ewily kyigueânehondânrybe târâ. ‘Tâwâlâ xirâ nady ewily einwâtaungâ’ keze urâ âyanmo” – kely keankâ Jesus Efesodâ tynnonro modoram.

*Esmirnadâ Jesus einwânni modoram unâ egatuhobyry*

<sup>8</sup> Aituo keankâ Jesus agueondyly:

– Xirâ iwenigâ Esmirnadâ ynnonro modoram unâry egaturin-am.

“Idânârâ adaguho urâ. Idânârâ adaimpygueduo, ipa witaymba ise urâ. Yigewâm wâne, kurâem witonmâ olâ. Ytaumbyry xirâ âmaemo Esmirna donro modoram:

<sup>9</sup> “Tutuze urâ, mâzenagazeolyo, âdypeom keba mawylymo warâ. Yeinwânni modoram kâunduly tâlâ olâ âmaemo. ‘Judeu urâ’ kewâni modope awâtârâ, Deus xurâ keba olâ akaemo. Âunâguenimo kulâ akaemo awyly, tutuze urâ. Deus keba nheinwânkylimo, Satanâs kulâ.

<sup>10</sup> Mâzenagazeolyo kâdytadaundâ. Pymâ modo nhegameybyem âzetadâoze âmaemo ewy. Satanâs ise aenehonrimo. Yeinwândyly mâinmopamolâ mâsenagazedylimo mâenmaenlymo-ro watay, arâ ise âkealâ kuru yeinwântâ mawylymo âduuoly. Dez iguandyly awârâem kulâ olâ ise mâzenagazeolyo. Yeinwândyly kâjimowâdaundâ, mâdyolyo umelâ. Adaimpâni emænrinbyry wâne koroa tâmakeze, myara ise Deus eydâ atodâ aunloenlâ mitomoem agânhedyly, âmaemo yeinwândyly imodânry modo.

<sup>11</sup> “Awlylygue aguely, mâuntudyze mataymo, idataungâ Deus Ispiritury aguely idânârâ yeinwânni modoram.

“Âmaemo xypyry etaji kehoem yeinwândyly imodânry modo, Deus agâpa ini keba ise âmaemo. Âgueduomo, aunloenlâ ise eagâ mawylymo. Tânazagedonduneba ise âmaemo” – kely keankâ Jesus Esmirnadâ tynnonro modoram.

*Pergamodâ Jesus einwânni modoram unâ egatuhobyry*

<sup>12</sup> Aituo keankâ Jesus agueondyly:

– Xirâ iwenigâ Pergamodâ ynnonro modoram unâry egaturin-am.

“Espada tuosebileim taynâ, tâynâ warâ iewipy sodo urâ. Ytaumbyry xirâ âmaemo Pêrgamo donro modoram:

<sup>13</sup> “Satanâs pymâem ato donro mawylymo, tutuze urâ. Awâtârâ mawlymogoe kulâ, yeinwâmpyry mipyra olâ mitaunazemo. ‘Jesus xurâ xina’ warâ inanry amyguezesedylymo. Awâtârâlâ ani Antipas âdyoly Satanâs eynnonro modoram, ywâgâ aguely nimopa awlylygue. Tâwâlâ lelâlâ wâne ataen-homo âzenagazeoly, âdyoly warâ, alâ olâ yeinwândyly mâinmopa mawlylymo.

<sup>14</sup> “Ize wato lelâ waypa olâ amânhekylymo. Balaão nhenomedâdobyry ara ainipe âduaymo. Warâ myakâwândy Balaão Balaqueam aguely: ‘Israelita domodo xurukâ, Deus lelâ netyguebyra itomoem. Ekudyby modo deus keho netyguedâmo lâpylâ, eyam podo egameyby nâdâmo warâ. Pekodo ohogüimby, uguondo ohogüimby, ohogüindânry âdaunlolâ nhynanâdomoem, warâ xurukâmo’ kewândymy.

<sup>15</sup> Tâlâ lâpylâ âduaymo Nicolau eynnonro modo inakanhe nhenomedâdomobyry einwânni modo.

<sup>16</sup> Âjityendaungâ, inakanhe kulâ amitomobyry wâgâ. Inakanhe amidylimo imowâdaungâ. Inepa ise kodopâdyly. Inakanhe amidylimo mâinmopa âmaemo-ro watay, inagazezemo urâ. Xirâ espada tuosebileim ytayba egasingue ise agâmo kâseguebyly.

<sup>17</sup> “Awlylygue aguely mâuntudyze mataymo, idataungâ Deus Ispiritury aguely idânârâ yeinwânni modoram.

“Âmaemo xypyry etaji kehoem yeinwândyly imodânry modo, Deus nhekanâdyby manâ kehogue âwasemo urâ. Tuhu tapekeim xuduze lâpylâ urâ yeinwânni modoram. Ezedyomo iwelo iweniby ise tuhu wogonro. Ânguy âkelo ezedy nutuwâbyra ise; sodo lelâ ise xutuim” – kely keankâ Jesus Pergamodâ tynnonro modoram.

*Tiatiradâ Jesus einwânni modoram unâ egatuhobyry*

<sup>18</sup> Aituo keankâ Jesus agueondyly:

– Xirâ iwenigâ Tiatiradâ ynnonro modoram unâry egaturin-am.

“Deus imery urâ. Peto iatgyu ara ienu ehazelu. Uhuru ehazelu bronze ehazeliby ara. Ytaumbyry xirâ âmaemo Tiatira donro modoram:

<sup>19</sup> “Âdy amânhekylymo awyly, tutuze urâ. Tutuze urâ, agonromo tywyneze mawlylymo, yeinwândyly mâinmopa mawlylymo warâ. Mâsemawyadâdylymo. Idânârâ tâmaenze mitaunazemo, âdamyguepamolâ, yeinwândyly mâinmopamolâ warâ. Imâem iwerâ urâem amidylimo, saguhoem yeinwâmpygueduomo amitomobyry takaze kehoem.

<sup>20</sup> “Pekodo Jezabel izepa wato aniempyra itoem, aguepa itoem warâ amânhepyra mawlymo olâ iekuâdâni. ‘Deus aguehobyrylâ augueho’ kely wâne; kewâdily kulâ olâ. ‘Ohogüindânry modo, ohogüinwâdyby modo alelâ tâwâlâ kywypado aniendâmo, âdalâ nidâmo ize tato aralâ’ kely. ‘Koendonro kuru lâpylâ xygatyby modo deus keho etygedyly, eyam egamebyr podo sâdily warâ’ kely. Kewâdily kulâ olâ mâkâ. Izepa wato amânhetomoem adienehondyze mâkâ.

<sup>21</sup> ‘Inakanhe kulâ amyguely. Inagazenehonze urâ, amyguely mâinmopa âmâ-ro watay’ uguezesedyly inanry mâkâ pekodoam. Timodyzeba olâ inakanhe adâidyly. Âdaunlo uguondolâ ize ato tynanâniem.

<sup>22</sup> Tâzewânu inakaigüe enagazeze urâ toenzepa kehoem. Alâpylâ ise uguondo modo eagâ ityby kâenagazedily. Nâjityembyra, adâidyly nimopamo warâ watay, toenzepa kehoem ise kâenagazedilymo.

<sup>23</sup> Mâkâ pekodo ara aini modo xyâze urâ. Awârâ tientuo ise, idânârâ nynonro modo tyangahu oday tunâgo tutuze wawly nhutulymo. Aitomobyry ara ise epywadylymo. Inakanhe aitaymby modo enagazeze urâ. Koendâ aitaymby modo agâ koendâ lâpylâ ise urâ.

<sup>24</sup> “Âjidadârymo oday tâlâ wâne inakanhe aini modo. Tuomare olâ urâ, agui mawânkâ âduaymo akaemo arapaom modo. Mâkâ pekodo inakai Satanâs wâgâ nhenomedâdobyry, âdara aidyly wâgâ warâ tiuntudyzebamo. Xirâ olâ âyanmo augueho:

<sup>25</sup> ‘Kodopâdily ara, iozeno kâenomedâdo einwândily kâjimowâdaundâ.’

<sup>26-27</sup> “Âmaemo xypyry etaji kehoem yeinwândily imodânry modo, auguehobyry ara lelâ aitaynrim modo, pymâem yagâ âesemo urâ. Pabai Deus mawânkâ saguhoem kuru yam adâkeze: ‘Idânârâ onro anano modo iwymâryem ise âmâ. Yizepaom modo sainze âmâ, âmugâ xukagâdily wâne-ro myara’ kewândy. Pabai pymâem witoem aguehobyry ara, arâ lâpylâ ise pymâem mitomoem auguely.

<sup>28</sup> Ximukâ emedyly umeno xigâlegueam ehoru, iwâkuru warâ myara aenehonzeno urâ, yeinwândily mâinmopa matomobyry wâgâ.

<sup>29</sup> “Awylygüe auguely mâuntudyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Tiatiradâ tynynonro modoram.

### 3

#### *Sardesdâ Jesus einwânni modoram unâ egatuhobyry*

<sup>1</sup> Aituo keankâ Jesus agueondily:

– Xirâ iwenigâ Sardesdâ nynonro modoram unâry egaturin-am.

“Sete ispiritubeom urâ; sete ximukâbe iemaym. Ytaumbyry xirâ âmaemo Sardes donro modoram: “Tutuze urâ idânârâ amânhekylymo. Atonlo modo enanaji, yeinwântâ âmaemo-ro waunlo ara. Arâpa olâ, iguewâtyby modo ara kulâ âmaemo, ienanaji.

<sup>2</sup> Deus âurudâmolâ, ize ato ara lelâ amitomoem, koendâ lelâ amipyra olâ âmaemo. Mâuntudânrymoenlâ izepa wato adyese mawlymogue inanaynmolâ itaungâ, amânhepyra mitomoem. Xykywâni modo arapa itaungâ; auguely tywantaguezelâ itaungâ warâ. Âdiempa kulâ yeinwândilymo. Âzeon-hondâdaungâ, imâem yeinwântomoem, mâinmopa mitomoem warâ. Iguedânry ara itaungâ, igueypy ara inkâba!

<sup>3</sup> Deus itaumbyry idanipyry âmaemo. Deus wâgâ inomedâdomobyry mutuwâdaundâmo. Awârâ enanâguewâdaungâ. Angahumo odaji itaungâ warâ Âjityendaungâ Deus aguehobyry mankadomobyry wâgâ. Inakanhe mawlymo imowâdaungâ warâ. Deus aguehobyry kadakadaundâ. Inakanhe amidilymo mâinmopa âmaemo-ro watay, kodopâduo inagazezemo urâ. Tutuzeba, tânuenzeba warâ wâne tâmagazeim saindily myara ise kodopâdily, ywânwândilymo umeba.

<sup>4</sup> “Âmaemo Sardes donro modo ewy tâlâ ize wato ara aini modo. Izepa wato aieni keba mawlymogue, âtâ tapekeim, tywykenry ara lelâ mawlymo. Yeinwântomobyry wâgâ, koendâ lelâ amitomobyry wâgâ warâ, tâwâlâ yagâ itaungâ.

<sup>5</sup> “Âmaemo xypyry etaji kehoem yeinwândily imodânry modo, inakanhe amitomobyry xygakeze urâ. Tapekeingüe âzetydâdyby modo ara ise âmaemo. Mârâ pape Aunloenlâ Deus Agâ Ini Modo Ezedi sawo wâgâ iwenibyem izedymo. Mârâ wâgâpa izedymo kâyngakeba ise urâ-ro warâ. Pabai enado, anju domendo enado warâ agueze urâ: ‘Ynynonro modo asaemo’ keze urâ.

<sup>6</sup> “Awylygüe auguely mâuntudyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Sardesdâ tynynonro modoram.

#### *Filadelfiadâ Jesus einwânni modoram unâ egatuhobyry*

<sup>7</sup> Aituo keankâ Jesus agueondily:

— Xirâ iwenigâ Filadelfiadâ nynnonro modoram unâry egaturin-am.

“Deus izepa ato âdykâ aieni keba urâ. ‘Aiese urâ’ uguehobyry aieni urâ. Tako Davi Deus eynnonro modo iwymâryem awyly myakâwândy, myara pymâem witoem aguehoymbyem urâ. Agueze urâ, ânguy Deus eydâ atoam idâim awyly, ânguy idâdânry awyly warâ, xave kênahungueho, kênahun-ho warâgue iematu-ro waunlo ara. Kênahungueyby, ânguy nenahunwâbyra. Kênahuymyb, ânguy nenahungueba warâ. Urâ kulelâ ise enahum, enahungueim warâ. Ytaumbyry xirâ âmaemo Filadelfia donro modoram:

<sup>8</sup> “Âdy amânhekylymo awyly, tutuze urâ. Aguipa kulâ Filadelfiadâ yeinwânni modo, âdaunlo modo kulâ, âdy pebanro modo kulâ warâ mawylymo, tutuze urâ. Aunlo kulâ wâne âmaemo, inomedâdomobyry ara lelâ olâ amidylymo. ‘Jesus eynnonro keba xina’ myguepa olâ mitaunazemo. Yeinwântuomo lelâ âwymârymoem Deus awyly, eydâ atoam tâdâtaly warâ. Ânguy nynnonro modo myarâ nâtâba itoem anienehonwâbyra. Ânguy nhenahunly keba pyanta kênahungueyly-ro waunlo ara.

<sup>9</sup> “Idataungâ augueho! Tâlâ awâtârâ Filadelfiadâ judeu domodo ewy ‘Deus eynnonro xina’ kewâni modo. Kewâdylymo kulâ olâ, Satanâs eynnonro kulâ akaemo. Tâwâlâ wâne iwerâ âduerymoem awylymo. Xypyry etay olâ inadomo âzeuguhoam isemo, âyrentomoem. ‘Jesus âwynedâmo awyly, tutuze xina’ kezemo. Warâ ise âyrentomoem agânhedlylymo.

<sup>10</sup> “Inomedâdomobyry ara, yeinwâmpyra mipyra olâ mitaunazemo, mâzenagazeolyo umelâ. Awylygue ise âdaenehombamo wawyly, kurâ domodo idânârâ âzenagazeolyo umelâ. Tâdâsenagazedo ume nynnonro modo emakeze urâ. Tâdâsenagazedo saintuo mawânâ ise ânguy nynnonro, ânguy ynnâbaom warâ awyly xutuly.

<sup>11</sup> Inepa ise kodopâdyly. Yeinwândyly kâjimowâdaundâ. Adaimpâni emenrimbyry wâne koroa tâmakeze myara ise yeinwândyly imodânry modo xurâem koendonro Deus nhuduly. Ânguyam yeinwâmpyra mitomoem akâienehonwâdaundâ. Koendonro mâenmakeyby mâenmagazenehonly waunlo ara tâise awârâ.

<sup>12</sup> “Âmaemo xypyry etaji kehoem yeinwândyly imodânry modo, aunlolâ Deus eydâ atodâ mitomoem aiese urâ. Âtâ enu koendâ kehoem epadâdyby wâne alâ kulâ nihugueba, myara lâpylâ ise Deus eydâ atodâ âdaunloenlâ igaseba mawylymo. Azagâ âze âwâgâmo iwenize urâ, yDeusry ezedy, iezedy iwelo warâ. ‘Jerusalém iwelo donro merâ, Deus ety anary donro kaynonrodâpa âetyby’ kely iwenize lâpylâ urâ warâ.

<sup>13</sup> “Awylygue auguely mâuntudyze mataymo, idataungâ Deus Ispiritury aguely idânârâ yeinwânni modoram” — kely keankâ Jesus Filadelfiadâ tynnonro modoram.

*Laodiceiadâ Jesus einwânni modoram unâ egatuhobyry*

<sup>14</sup> Aituo keankâ Jesus agueondyly:

— Xirâ iwenigâ Laodiceiadâ nynnonro modoram unâry egaturin-am.

“ ‘Aiese urâ’ uguehobyry aieni urâ. Âkeâ lelâlâ Deus eynynâ aguenri urâ; uguewâdyly kulâ waunlo mâkeba urâ. Idânârâ tâlânro modo âtugudobyrylâ urâ warâ. Ytaumbyry xirâ âmaemo Laodiceia donro modoram:

<sup>15</sup> “Âdy amânhekylymo tutuze urâ. Ago lelâ ynnâ mawylymo warâ inkâba âmaemo. Ago lelâba lâpylâ udueryem mawylymo. Paru tanreim emyenro âmaemo, tâdâpigue kehoemba, tyânkânre kehoemba warâ.

<sup>16</sup> Paru tanreim kywilupanâdyly myara kulâ yeinwândylymo, yeinwâmpyra warâ mawylymo. Agâmopa widyly tâise ize wato, paru tanreim ytyba kamely myara.

<sup>17</sup> “Âdypeonlâ xina. Âdy ize inkâba xina warâ. Deus ize ato ara lelâ xina aidyly’ myguelymo wâne. Tâwâlâ kulâ olâ mâsenogudylymo. Âdalâ Deus ize ato amânhetaymba âmaemo! Âdaunlo kulâ âmaemo! Âdypeom mâkeba âmaemo urâem, ize wato peba mawlymogue, tâwâlâ wâne toenzepa âdydo imeomp mawylymo. Epy ara kulâ olâ âmaemo, ywâgâ âdy mâuntuba mawlymogue. ‘Koendâ Jesus wâgâ tutuze xina’ tâkeze wâne âmaemo. Âzetygueyby ara kulâ olâ âmaemo, imâem yeinwâmpyra mawlymogue, inanajimo yeinwântâ wâne âmaemo!

<sup>18</sup> “Xirâ olâ âyanmo augueho, ipa matomo yam ekadaungâ, Deus ize ato ara amitoemoem. Deus tynnonro modoram koendonro nhuduly âyanmo xuduze urâ, Deus enado mâpybazebyra mitomoem. Ipa matomo xuduze urâ, Deus wâgâ koendâ mâuntuhoemoem. Ouru tywykenry, itymo mâtuahuhomo, tâzenu ewânu ewindy awârâ modo kâunduly âyanmo-ro waunlo ara ise.

<sup>19</sup> Idânârâ kâinwynegyuly modo turuse, tagâikeze warâ urâ, inakanhe adâidyly imohoemoem. Tâjityenzelâ itaungâ inakanhe amidylymogue. Imowâdaungâ lelâlâ inakanhe amidylymo; imoze myguelymo kulâ mâkeba nidâ.

<sup>20</sup> “Egâ wâneam mâkâ adakobâni saindyly pyantaji. Âtâ odo ingâsedyly. Pyantaylâ nhenahungueyly inwânwândyly. Mâkâ adakobâni tygâsedyly tindatuo, âtâ odo pyanta nhenahungueyly, egawântoem. Aituo ise on-hoam lelâ âwinduadylymo, tagonro agâ

ohomaendilymo warâ. Mâkâ adakobâni emyenro urâ. 'Igwânkâ. Xina agâ ikâ' myguelymo kâinwânwânkyly. Ygâsedilymo-ro watay, agâmolâ ise urâ. On-hoam lelâ ohomaenze kurâ.

<sup>21</sup> “Âmaemo xypyry etaji kehoem yeinwândyly imodânry modo, idânârâ kurâdo iwymâryem wituo, yagâ pymâem ise âmaemo. Âdaunloenlâ Satanâs kâinwâmpyra watobyry ara lâpylâ mâinwâmpyra mawylimo. Iwerâ Pabai Deus agâ pymâem wawlyly. Aituo ise âmaemo yeinwânni modo yagâ pymâem midylymo lâpylâ.

<sup>22</sup> “Awlylygue auguely mâuntudyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Laodiceiadâ tynnonro modoram.

## 4

### *João tâjigâky indatobyry*

<sup>1</sup> Jesus tynnonro modoram xirâ modo auguehoem aguepygueduo keankâ, pyanta ara kau wâgâ âzenahunguely kâendyly. Âzenahunguehobyry oze Deus eydâ ato sedâ, tâjitanru xidadâ warâ. Trombeta ara keankâ itanru ipyru. Saguhoem yam aguepylâ keankâ yam agueoni.

– Xarâ âkugâ, wayam waunroem âydo imeom aitaynrim modo âyam kâenehohuem – kely.

<sup>2</sup> Aguepygueduolâ kehoem keankâ ienu âtygadyly; Deus Ispiritury âewyly, wayam waunroem aini modo kâentoem aienehonze. Deus sedâ mure imâsedo, iwâkuru warâ wâgâ ekadybyem awlyly, pymâem atodâ.

<sup>3</sup> Tohozele kehoem keankâ, tuhu iwâkuru kehoem jaspe ara, sârdio ara warâ. Mârâ mure Pymâ Deus xurery tânâmize nanagope keankâ. Tuhu esmeralda ehazelu ara keankâ ehazelu.

<sup>4</sup> Mâkâ Pymâ xurery tânâmize vinte e quatro lelâ mure sedâ. Vinte e quatro agaityom tynrenseim modo mârâ modo wâgâ ekadybyem sedâ warâ. Tapekeim keankâ etymo iwogonromo. Koroa ourugue xygatyby keankâ nhangahumo wogonro, pymâem awlylymo tutuho.

<sup>5</sup> Ielu âzehoruguely sedâ Pymâ Deus xurery wâgâ. Ielu âjipyruguely ton-honne kehoem xidadâ lâpylâ mârâ muredâ. Tâzekado emyto tâlâ keankâ sete esagon-ho tyatygueim modo. Sete lelâ ispîritu Deus emary modo mârâ nhenehonly.

<sup>6</sup> Pymâ Deus xurery xuaynâ tâlâ keankâ paru emyenro, tysenzeim kehoem vidru ara, tuanreim olâ keankâ, cristal emyenro.

Pymâ xurery tânâmize taynâ, tâynâ warâ quatro ânguydo imeompe keankâ. Toenzepa keankâ mâkâ modo enu, waunroem, âgânâ alelâ.

<sup>7</sup> Leão emyenro keankâ waunro kuru. Azagâ ieto keankâ xibu emyenro. Azagâ tokalâ ieto keankâ kurâ emydygueom. Quatro ieto keankâ ârigâ sawâguni emyenro.

<sup>8</sup> Akaemo quatro ânguydo imeom seis, seis, seis, seis warâ sawâry. Sawârymo wâgâ kehoem keankâ akaemo enu, MON warâ kehoem. Deus wâgâ tygâky nimopamo keankâ:

– Âdalâ inakanhe aityby mâkeba âmâ, Pymâ Deus.

Inakai aieni mâkeba âmâ, koendonro lelâ aieni.

Idânârâ takaze on-honru.

Igueim mâkeba âmâ; tâlâ mykâinane âmâ saguhoem.

Iwerâ tâlâ âmâ. Aunlolâ ise tâlâ mawlyly warâ

– kely keankâ igâkymo.

<sup>9</sup> Warâ keankâ Deus pymâem awlyly wâgâ igâkymo lâpylâ:

– Ton-honreim, iwâkuru warâ âmâ! Tynrenseim âmâ! Tuomare xina, koendonro xinaem aieni mawlylygue! Igueim mâkeba âmâ – kelymo Deusram.

<sup>10</sup> Akaemo quatro ânguydo imeom Deus xurâem igâky ume keankâ akaemo vinte e quatro agaityom tynrenseim modo âzeguhoam itybyenmo Deus enado. Tykoroary nhetylymo. Nhekanâdylymo Pymâ Deus xurery enado. Pymâlâ wâne akaemo, Deus olâ pymâem kuru nhutulymo, takadâmo kehoem.

<sup>11</sup> Warâ keankâ igâkymo:

– Xina iwymâry kuru âmâ.

Âmâ kulelâ Deus xina nheinwânkyly.

Tohoguezeim, tynrenseim warâ âmâ.

Awlylygue koendâ mawlyly wâgâ, tynrenseim mawlyly wâgâ, ton-honreim mawlyly wâgâ warâ xina aguely.

Âmâlâ idânârâ tâlânro modo xuguni.

Awlylygue idânârâ tâlâ awlyly, ize mawlylyguelâ

– kelymo keankâ Deusram.

## 5

*Pape ituwymby Jesus nhemakehobyry*

<sup>1</sup> Aituo keankâ Deus emaym aho eynynâ pape ituwymby kâendily. Ioday, ikaynâ alelâ keankâ mârâ pape iwenibyem awyly. Sete lelâ keankâ sakâjîho.

<sup>2</sup> Târâ anju domodo ewy sedâ lâpylâ. Ago kehoem keankâ mâkâ aguely:

– Ânguyka ise awârâ sakâjîhobyry etyim, nhawynkeim warâ? – kely.

<sup>3</sup> Deus nhygataymby modo ewy mârâ sakâjîhobyry etyim peba olâ keankâ, pape tintainhoem, anju târâ kaynâ, kurâ tarâ onwâgâ, onro iano modo alelâ.

<sup>4</sup> Awylygue keankâ toenzepa ytyrnu, wogunru warâ, ânguy aguehoymby peba awylygue, pape intuwynguehoem, intainhoem warâ.

<sup>5</sup> Aituo keankâ akaemo agaityom tynrenseim modo ewy yam aguely:

– Tuogunrepa ikâ. Egâ mâkâ, Judâ domodo ewy, pymâ Davi iwerypyry leão ara tonhonreim mâkâ. Deus iduery eonhonru idânârâ sainwâm mâkâ. Mâkâ lelâ ise pape sakâjîhobyry etyim, ituwyngeim, itainrim warâ – kely keankâ.

<sup>6</sup> “Kordeiru” kelygue tâzekeim XYDYK warâ sedâ. Sodo wâgâ xyâhobyry xypyhobyrybe keankâ; igueypyemba olâ keankâ mâkâ iwerâ. Sete lelâ keankâ iwâenky, enu warâ. Mârâ sete tâzenu, Deus sete ispiritû onro anakâ ingonotyby modo mârâ nhenehonly. Deus xurery enado mâkâ âepanâguely. Vinte e quatro agaityom tynrenseim modo, quatro ânguydo imeom warâ mâkâ enâminibyemmo keankâ.

<sup>7</sup> Aituo keankâ mâkâ Kordeiru, Pymâ Deus xurery opaji saindyly. Mure wâgâ ekadyby tâmary ahogue pape ituwymby mâkânra nhuduly, Kordeiru kelygue tâzekein-am.

<sup>8</sup> Akaemo quatro ânguydo imeom, akaemo vinte e quatro agaityom tynrenseim modo warâ keankâ Kordeiru enado âzeguhoam idylymo. Vinte e quatro agaityom modo harpague tâmatunemo lelâ keankâ. Kudupi orugue xygatyby edunu tyânringueingue tummykeimbemo keankâ warâ. Kurâdo Deus agâ aguelylâ mârâ edunu tyânringueim nhenehonly.

<sup>9</sup> Akaemo âzeguhoam ityby modo igâky keankâ mâkâ Kordeiruram. Tâjigâky iwelogue igâtudylymo:

– Âmâ lelâ pape sakâjîhobyry sakâjigueim, ituwymby ituwyngeim warâ kehobyry.

Âmâlâma kruz wâgâ igueypy, ânu iapânibyry warâ.

Idânârâ kehoem kurâdo onro anano modo Deus eynnonroem mânhetoem myakâwâm âiguely.

<sup>10</sup> Âynnonroem akaemo. Âmâ iwymârymo warâ.

Âmâ ani imaryem ienimo, eynynâ kydato Deus aitobyry nhegatuhoem.

Agâ ise târâ onro anaym pymâem awylymo

– kely igâkymo.

<sup>11</sup> MYK witondily keankâ. Anju domodo kâendily. Toenzepamo keankâ tapâguely ekimo kehoem. Tâpagunemo keankâ Deus xurery imâsedo, quatro ânguydo imeom, vinte e quatro agaityom tynrenseim modo warâ tânâmezemo kehoem. Igâkymo xidadâ.

<sup>12</sup> Ago kehoem keankâ aguelymo:

– Kordeiru âmâ.

Saguhoem kordeiru tâdyoze kâinane, inakanhe tadawyly xygakehoem;

arâ lâpylâ akâwâm âiguely, inakanhe tâjito xygakeze.

Pymâ tonhonreim âmâ.

Idânârâ tâlânro modo sodo âmâ.

Idânârâ tutuze âmâ. Âdylâ aiese tonhonre âmâ

Tynrenseim âmâ. Koendonro lelâlâ âmâ

Aunlolâ koendâ mawyly wâgâ xina aguely.

Alâ idânârâ âwâgâ anyguemo

– kelymo keankâ.

<sup>13</sup> Ilâpygueduo kaynonro modo, onro anano modo, ondano modo, paikano modo warâ igâkymo kâindadyly. Warâ keankâ aguelymo tygâkymoem:

– Koendâ mawyly wâgâ xina aguely.

Pymâ Deus wâgâ, Kordeiru wâgâ warâ xina aguely.

Tynrenseim, koendonro warâ âmaemo!

Iwâkuru, tonhonreim warâ âmaemo.

Âdylâ aiese tonhonre âmaemo.

Aunloenlâ ise arâ mawylymo. Arâpa mitaymba ise âmaemo

– kely keankâ igâkymo.

<sup>14</sup> Alâ pylâ keankâ akaemo quatro ânguydo imeom aguely:

– Âwâgâmo aguehomobyry ara lelâlâ âmaemo! – kelymo keankâ.

Akaemo vinte e quatro agaityom tynrenseim modo âzeguhoam idylymo keankâ.  
 – Koendonro lelâlâ âmaemo! – kelymo keankâ Deusram, Kordeiruram warâ.

## 6

*Pape ituwymby sakâjihobyry modo sakâjigüewâdobyry*

<sup>1</sup> Aituo keankâ Kordeiru mârâ pape ituwymby waunroem sakâjihobyry nhakâjigüely kâendyly. Nhakâjigüely ume keankâ mâkâ quatro ânguydo imeom ewy agüely kâindadyly; ielu âjipyrgüely ara keankâ itanru.

– Âekâ, onro anaxi idâ-ro warâ! – kely.

<sup>2</sup> Agueduo MYK widyly. Kawaru tapekeim kâendyly. Tâka, pyrâu warâ keankâ mâkâ kawaru wogonro emano. Koroa eyam nâduduo, âseguebyrin-em kehoymby awyly xutuhoem. Tuduery modo eon-honru nhainly sedâ.

<sup>3</sup> Aituo keankâ Kordeiru mârâ pape ituwymby sakâjihobyry azagâ ieto nhakâjigüely. Nhakâjigüely ume keankâ ânguydo imeom azagâ ieto agüely kâindadyly:

– Âekâ, onro anaxi idâ-ro warâ! – kely.

<sup>4</sup> Agueduo keankâ eagonro kawaru egasely, tapabileim. Mâkâ kawaru wogonroam espada keankâ tuduzeim, âseguebyhoem. Kurâdo âseguebyhoem, âjigüe âdyâwâtoem warâ “Aieta” kehoymbyem keankâ mâkâ egasely.

<sup>5</sup> Aituo keankâ Kordeiru mârâ pape ituwymby sakâjihobyry azagâ tokalâ ieto nhakâjigüely. Nhakâjigüely ume keankâ ânguydo imeom azagâ tokalâ ieto agüely kâindadyly.

– Âekâ, onro anaxi idâ-ro warâ! – kely.

Agueduo MYK widyly; kawaru tâmyguyneim kâendyly. Balança keankâ mâkâ kawaru wogonro emano.

<sup>6</sup> Aituo keankâ tâjitanru kâindadyly. Akaemo quatro ânguydo imeom duay keankâ agüely: – Pyni peba ise. Tuguanse ise uguondo âsewanily, trigu ifarinhary tâpajigâze kulâ atay, tokalâ kilo, tâpajigâze cevada atay warâ tianâtoem. Se oliva ipery olâ kadatâwâdaundâ; uva edy kâzemodywâdaundâ warâ – kely keankâ.

<sup>7</sup> Aituo keankâ Kordeiru mârâ pape ituwymby sakâjihobyry quatro ieto nhakâjigüely. Nhakâjigüely ume keankâ ânguydo imeom quatro ieto agüely kâindadyly.

– Âekâ, onro anaxi idâ-ro warâ! – kely.

<sup>8</sup> Agueduo MYK widyly; kawaru tapadureim kâendyly. “Tâjigüeho” kelygue tâzekeim keankâ mâkâ kawaru wogonro. “Âji tâdâsenagazedo” kelygue tâzekeimbe keankâ eagâ. “Onro anano modo ewy quarta parte ise mâyânlymo. Tâseguebyday, tâwindygue, tâwânugue warâ iguehomoem ise amânhedlymo. Eagonro modo âdâhözemo ânguydo imeom idu odano modoram” warâ kehoymbyem keankâ akaemo egasely.

<sup>9</sup> Aituo keankâ Kordeiru pape sakâjihobyry cinco ieto nhakâjigüely. Nhakâjigüely ume keankâ kurâ domodo egadopry kâendyly, Deus itaumbryry nhagatulymogue, Jesus wâgâ agüely nimopa awylymogue warâ xyâwâtyby. Ânguydo imeom xyâppy Deusram egameho iopay keankâ akaemo.

<sup>10</sup> Ago kehoem keankâ Deusram agüelymo:

– Amânhedyse mato aiese ton-honre âmâ, Pymâ. Âdy inakai aieni mâkeba âmâ. Aiese myguehobyry, adyese lelâlâ âmâ. Inepa xina xyâimpyry modo enagazegâ. Inepa xina eweânkâ – kelymo.

<sup>11</sup> Eyanmo âtâ tapekeim nâduduo, aituo keankâ Deus eyanmo agüely:

– Tadahulizeba itaungâ. Toenzepa ise iwerâ ywâgâ agüewâni modo âdyoly uduery modoram. Âpemugumo lâpylâ akaemo, Jesus Cristo eynynâ. Âdiempa iwânwântaungâ wao, idânârâ âdyowâdylimo ara – kely.

<sup>12</sup> Ilâpygüeduo keankâ Kordeiru pape sakâjihobyry seis ieto nhakâjigüely kâendyly. Nhakâjigüely ume keankâ ton-honre kehoem onro âzekânily. Xixi tohoreba idyly, emygüemadyly warâ, âtâ tâjiwogonro tâmyguyneim tâjitynru enehon-ho ara kehoem. Nunâ tâjiunu ara sapabiladyly.

<sup>13</sup> Kau âzekânily lâpylâ. Ximukâ onro onwa ihugüewâdylly, figu sahuadânry tâwy wâgâpa ihugüewâdylly wâne sapezenru tâkâniduo myara.

<sup>14</sup> Kau adawynly, pape ituwymby ara idyly. Idânârâ iwyy modo, ilha modo warâ eagonro âjiam âtugugüewâdylly.

<sup>15</sup> Idânârâ kurâdo âwientaynly; otoendylimo iwyy odano tâtagueim odaxi, tuhu imâsedo modo duaxi warâ. Idânârâ kehoem keankâ pymâ domodo otoendaynlymo. Idânârâ kehoem keankâ sodadu domodo iwymâry, kurâ domodo iwymâry warâ otoendaynly. Idânârâ kehoem âdypeom modo, ton-honreim modo kehoem warâ otoendaynlymo keankâ. Idânârâ wâne otoenze kewâdylimo, kurâdo âdy modo, kurâdo âdy keba modo lâpylâ warâ.



<sup>16</sup> Aguelymo keankâ iwy modoram, tuhu imâsedo modoram warâ:

– Xina onwa âihuguegâ, xina moentomœm, mâkâ Pymâ Deus xina nepyra itoem, mâkâ Kordeiru xina agâ tyewiâseba itoem warâ – kelymo.

<sup>17</sup> – Iweâma naintai tyewiâky nhenehon-homo. Ânguy iewiâkymo nemaenwâbyra ise, tuduery nhenagazeduomo – kelymo.

## 7

*Deus eynynonro modo inwendydâ PE ietobyry*

<sup>1</sup> Îlâpygueduo keankâ quatro anju modo kêendly. XYDYK warâmo keankâ xixi egaseho eynynâ, xixi egawânto eynynâ, sul eynynâ, norte eynynâ warâ. Sapezenru nhawâdylymo keankâ, onro anaym, parutabâ ikay, poji anaym, idu oday warâ nadapezeimba itoem.

<sup>2-3</sup> Aituo keankâ Deus eynamo aguely:

– Onro, parutabâ warâ inakanhe mânhetomoem auguely – kely.

Aituo eagonro anju kêendly kaynâ, xixi egaseho eynynâ. Deus Iguedânry eynynonroem kurâdo awyly xutuhœm PE ietobe keankâ mâkâ emaym. Aituo akaemo quatro lelâ tagonro sapezenru sawâni modoram adaenkely:

– Ine wao. Sapezenru kâjïmowâdaundâ wao. Saguhœm kuru Deus eynynonroem awylymo xutuhomoem xina PE niedâmo wao. Xina anhepygueduomo ise onro, parutabâ, idu modo warâ inakanhe mânhenehonlymo sapezenruam – kely.

<sup>4</sup> Yam anyguemo âdara lelâ kurâdo Deus imarkarybeombe awyly. Toenzepa keankâ marka ietyby modo, cento e quarenta e quatro mil lelâ keankâ idânârâ; israelita domodo keankâ akaemo.

<sup>5-8</sup> Warâ keankâ PE ietaymby modo:

12.000 lelâ Judâ iweompyry,

12.000 lelâ Rúben iweompyry,

12.000 lelâ Gade iweompyry,

12.000 lelâ Aser iweompyry,

12.000 lelâ Naftali iweompyry,

12.000 lelâ Manassés iweompyry,

12.000 lelâ Simeão iweompyry,

12.000 lelâ Levi iweompyry,

12.000 lelâ Issacar iweompyry,

12.000 lelâ Zebulom iweompyry,

12.000 lelâ José iweompyry,

12.000 lelâ Benjamim iweompyry warâ.

*João kurâdo tapekeingue etyunu nhetobyry*

<sup>9</sup> Îlâpyryem MYK widyly. Toenzepa kehoem kurâdo kêendly. Toenzepamo keankâ tapâguely ekimo kehoem, tâinkonro modo lelâba keankâ. XYDYK warâmo Pymâ Deus enado, Kordeiru enado warâ. Tapekeingue keankâ etyunumo. Wakuri sarygue tâmasemo keankâ, tuomare tawyly tienehon-homoem.

<sup>10</sup> Toenzepa kehoem adaenkelymo:

– Deus mure imâsedo wâgâ pymâem tawylygue ekadyby koendonroem awyly wâgâ aguykely. Kordeiru koendonroem awyly wâgâ aguykely. Kâmakerim asaemo! – kelymo keankâ.

<sup>11</sup> Idânârâ anju domodo XYDYK warâmo keankâ târâ Pymâ Deus xurery tânâmize. Vinte e quatro lelâ agaityom tynrenseim modo lelâlâ, quatro ânguydo imeom warâ tânâmizemo. Pymâ Deus enadoram idâlymo, enagozelymo idylymo keankâ akaemo anju domodo. Deus koendonroem awyly wâgâ agueze:

<sup>12</sup> – Âkeâ lelâlâ xina âwâgâ aguely, xina iDeusry. Aunlolâ koendâ mawyly wâgâ xina aguezesedyly. Koendonro lelâlâ âmâ. Idânârâ tutuze âmâ. Tuomare xina, koendâ lelâ xina agâ mawylygue. Toenzepa tynrenseim âmâ. Âdy ize mato adyese lelâlâ âmâ, ton-honreim âmâ warâ. Aunlolâ myakâwândy âmâ, arâlâ ise âmâ-ro warâ – kelymo keankâ.

<sup>13</sup> Agaityom tynrenseim modo ewy yapâigue:

– Tutuze âmâ akaemo tapekeingue tâtyuneim modo ânguy awyly? Âdykâba âewylymo warâ? – kely.

<sup>14</sup> Aituo keankâ kâin-hoguly:

– Kâuntuwâbyra urâ. Âmâlâ xutuim – uguely.

Aituo keankâ yam aguely:

– Inakanhe kehoem tâsenagazedely emaanrimbyry akaemo, Jesus einwândyly nimopamo awylygue. Kordeirilâ keankâ akaemo nheinwânkely, Jesuslâ. Turâem tunu tyapâze

igueypy tainwânse awylymogue, Deus inakanhe itomobyry nhygakely, âtâ tywykeim igokeho ara. Iweâma tywykeba tapekeingue etyumo, inakanhe itomobyry xygakeybyem awylygue.

<sup>15</sup> Jesus einwânnipryem awylymogue tywykebamo. Aituo Pymâ Deus enado epagunumo. Târâ eydâ atodâ aunlolâ ise emaryem awylymo, peto oday, kopae alelâ. Mâkâ mure imâsedo wâgâ ekadybyram nâjimowâbyramo ise.

<sup>16</sup> Typynigueba nipyramo, tokuempa nipyramo warâ ise asaemo. Xixi âdâpiguae nâsenagazedaymbamo ise.

<sup>17</sup> Eagâmolâ mawânkâ ise Pymâ Deus xurery eapano Kordeiru; kaneru eni wâne tâguy modo nhedyly myara ise âzeholymo. Kaneru eni wâne tatuandylygue tâguy niguepa itoem parube atoam tase, myara ise niguepa itomo nhuduly. Tytyremba, tâwânepa warâ iesemo Deus. Mâkâlâ enugurumo idânârâ xygyrim waunlo ara lelâ ise.

## 8

*Jesus pape sakâjihobyry sete ieto nhakâjiguhobyry*

<sup>1</sup> Aituo keankâ Kordeiru pape sakâjihobyry sete ieto nhakâjiguely. Mârâ nhakâjiguebygueduo, Deus eydâ atodâ ânguy âdakepa, âdy tygâseba warâ nidâ wao âdiempa, meia hora awârâem.

<sup>2</sup> Ilâpygueduo keankâ sete anju domodo kêendily Deus enado. Akaemoam keankâ mârâ tâjitarygue tydzyeim trombeta âduduoly.

<sup>3</sup> Ilâpygueduo keankâ eagonro anju kêendily. XYDYK warâ mârâ edunu tyânrangeim Deus indatoem iaduânto mesa opay. Mârâ edunu etary ourugue xygatybybe keankâ emaym. Toenzepa keankâ edunu tyânrangeim eyam âduduoly, Pymâ Deus xurery enado iaduântoem, Deus eynnonro modo eagâ agueday.

<sup>4</sup> Anju emaym awyly ume keankâ edunu tyânrangeim iaduântyby eunu âkuly Deus eydâ atoam, Deus eynnonro modo eagâ agueday.

<sup>5</sup> Aituo keankâ anju mesa wâgâpa peto ehoru nhanâdily, mârâ edunu tyânrangeim iaduânto tiunmykanâdoem. Ilâpyryem nhamely onro anaxi. Awârâ anhetuo keankâ kopâ âjipyruguely. PEBYK PEBYK idily. Onro âzekânily warâ.

*Anju domodo trombeta indyhobyry*

<sup>6</sup> Inepa lâpylâ akaemo sete anju domodo trombeta tindyho ara itaynlymo.

<sup>7</sup> Aituo anju saguho tytrombetary indily. Indyday, pewendâ ihuguely, peto tâjiunu emyenro tapabileingue tuduase ihuguely onro anaxi. Toenzepa se modo, poji, idu warâ tyaduânse lelâlâ keankâ, terça parte keankâ tainzeim.

<sup>8</sup> Ine warâ lâpylâ anju nhatano tytrombetary indily. Indyday, iwy imâsedo tyatygueim emyenro parutabâ ikaji adameoly. Ihugueduo, mârâ paru ewy terça parte keankâ tâjiunuem ini.

<sup>9</sup> Toenzepa ânguydo imeom parutabâ ikano modo niguwâdâ, terça parte keankâ iugerim. Toenzepa pepi imâsedo modo parutabâ ekuâdo adainholy agâ, mârâ modo ewy terça parte keankâ adainhoim.

<sup>10-11</sup> Aituo tonlo kaynonro anju azagâ tokalâ ieto tytrombetary indily. Indyday, ximukâ imeâgâkeba kau odaypa ihuguely. Ximukâ ihugueyby ezedy keankâ “Absinto”. Peto ehoru ara keankâ iatygu. Toenzepa paru ikaji, saimu ikaji, paru iazeho modo ikaji warâ keankâ ihuguely; mârâ modo ewy terça parte keankâ ihuguely. Ihuguehobyrydâ, paru inakanhe nhedyly. Mârâ paru ago lelâlâ idurandyly. Toenzepa kurâ domodo nigue, mârâ paru tudureim tienyduomo.

<sup>12</sup> Aituo keankâ anju quatro ieto tytrombetary indily. Indyday, xixi, nunâ, ximukâ modo warâ inakanhe itaynly. Tohoreba itaynly; koendâ tâwanepa idylymo. Oito hora kulâ keankâ xixi ehoru peto oday; nunâ, ximukâ warâ ehoru oito hora kulâ kopae; arâ lâpylâ keankâ peto oday, kopae warâ oito hora tyajinepa awyly.

<sup>13</sup> Anju quatro ieto tytrombetary indypygueduo ârigâ kêendily kaynâ sawâgu. Ton-honre kehoem keankâ aguely kâindadily:

— Kaikâ! Kaikâ! Kaikâ âmaemo-kâ! Inakanhe kehoem ise Deus eynynâbaom modo âsenagazedily! Akaemo trêns anju domodo tytrombetary indyduo, inakanhe kehoem ise Deus eynynâbaom modo âsenagazedily — kely.

## 9

<sup>1</sup> Ârigâ kêempygueduo, aguely kâindapygueduo warâ keankâ anju domodo cinco ieto tytrombetary indily. Indyday ximukâ emyenro sedâ, Deus eydâ atodâba xarâ onro anaxi xytâguyby. Xave xuduypygue ematu sedâ, tâtagueim tâsanigueim kehoem odaxi tâdâwânto enahungueho, kadopâ modo ejidy iwyantary enahungueho.

<sup>2</sup> Mârâ tâtagueim tâsanigueim kehoem odaxi tâdâwânto nenahungue mākâ. Nhenahungue-  
duo, toenzepa keankâ eunu egasely, se âduguely umeno ara kehoem. Toenzepa keankâ  
eunu, xixi etoem nudupa.

<sup>3</sup> Mârâ eunu duaypa keankâ kahuli modo egasely. Tawâgune keankâ xytâguylymo onro  
anaxi. Ielawada aito ara aitomoem keankâ mākâ modo aguehoymbyem awyly.

<sup>4</sup> Aituo keankâ Deus eyanmo aguely:

– Poji anaym, idu oday warâ ago ini modo, âpa ezay etâdaymby modo warâne inakanhe  
kâietaundâ – kely.

– Yeinwântânry modo inwendy wâgâ PE tyetuneba. Akaemo lelâ ise mânagazeguylymo.

<sup>5</sup> Kâdyâwâtaundâmo olâ. Âpymo ewânugue cinco nunâ ara lelâ âsenagazedomoem olâ  
auguely – kely.

Ielawada kyâhobyry ewânu ara kehoem ise tyâhobyry nhewânedylymo.

<sup>6</sup> Mârâ cinco nunâ wâgâ toenzepa ise kurâ domodo âsenagazedyly. Tyâhobyry ewânu  
epagudyze isemo, tâwânepa nipyra olâ ise. Tyiguedyse isemo, niguepamo olâ ise.

<sup>7</sup> Kawaru sodadu domodo tuduery agâ âseguebyze sani modo ara keankâ mākâ kahuli  
modo nhontaymbyem awyly. Koroa ourugue xygatyby emyenrobe keankâ nhangahumo  
wâgâ. Kurâ emydygue keankâ emydymo.

<sup>8</sup> Tuseguemo keankâ pekodo ara. Imâsedo modoem keankâ ierymo, tuosebimune warâ,  
udodo iery ara.

<sup>9</sup> Ferro tyxierny emyenrobe keankâ ihohumo, xuahuruem. Toenzepa keankâ sawâgutay  
sawâry igâky. Kawaru karosa epâgüewâni modo tâgase idâday wâne ihurumo tygâse, myara  
kehoem keankâ akaemo sawâry igâky.

<sup>10</sup> Tonwyn-em keankâ, ielawada ipy emyenrobe warâ. Cinco nunâ ara lelâ kurâdo  
nhenagazedomo keankâ mârâ eonwynmo.

<sup>11</sup> Xutuimogue tywymâgüemo keankâ. Mârâ tâtagueim tâsanigueim kehoem kadopâ modo  
ejidy xutuinalâ keankâ iwymârymo. “Sainrim” kelygue keankâ ezeku, “Abadom” judeu  
domodo itanwe, “Apolião” gregu domodo itanwe warâ. Satanâslâ olâ mākâ agueho.

<sup>12</sup> Anju cinco ieto tytrombetary indygygueduo inakanhe kehoem keankâ  
tâdâsenagazedyly. Tâlâlâ olâ azagâ inakanhe kehoem tâdâsenagazedo.

<sup>13</sup> Aituo keankâ anju domodo seis ieto tytrombetary indyly. Indyday keankâ tâjitanru  
kâindadyly. Mârâ mesa ouruguetu iotay keankâ itanru âewyly. Edunu tyânângueim Deus  
enado iaduânto mârâ mesa.

<sup>14</sup> Mākâ aguenri wakely keankâ trombeta idyimpiryam:

– Awâkâ quatro anju domodo paru imâsedo Eufrates iwaguepa ekâjiby modo  
ekâjigüewâgâ – kely.

<sup>15</sup> Aituo keankâ akaemo anju domodo âzekâjigüeo, toenzepa kurâ domodo, onro anaym  
tâlâom modo terça parte xyâze idâhomoem. Deus aitomoem aguehobyry oday lelâ keankâ  
nhálymo adaguly, (hora oday, iguandyly wâgâ, nunâ wâgâ, anu wâgâ warâ).

<sup>16</sup> Kawaru wogonro âseguebywâni modo nâepanâgue. Toenzepa keankâ sodadu domodo,  
toenzepa lelâlâ.

– Duzentos milhões sodadu kawaru wogonro – kely keankâ kâindakyly.

<sup>17</sup> Deus nhenehonly ume, kawarudo kâendyly, iwogonro modo warâ. Metal tapie-  
gureim keankâ kawaru wogonro modo ihohu xuahuru. Tâlâ keankâ ferro peto ara  
tapabileingue ihohu tuahugueim. Eagonro modo keankâ tukueingue ihohu tuahugueim,  
tuhu tâwâenseim safra emyenro. Eagonro modo ihohu xuahuru keankâ tapadureim,  
enxofre emyenro. Kawarudo nhangahu keankâ leão nhangahu ara. Itaybamo peto  
egasely, peto eunu, enxofre warâ.

<sup>18</sup> Kawarudo itayba egaseybygue keankâ toenzepa kurâ domodo iguely lelâlâ, peto  
tyaduântuo, tâepaiguedaymo, peto eunugue, enxofre itângugue warâ. Kurâ domodo ewy terça  
parte keankâ arâ igueim.

<sup>19</sup> Warâ keankâ kawarudo tytayba egaseybygue, tonwyngue warâ kurâ domodo nhály.  
Eonwynmo xypyrydâ, âgâu nhangahu ara awylygue, toenzepa kurâdo tâdâhoze mârâ  
tozonwym modoram.

<sup>20</sup> Igüewâtânrybyry modo, typemugudo, tataen-hodo warâ âsenagazedyly, iguely warâ  
nedâmo. Arâlâ inakai aiedyly nimopamo olâ keankâ. “Deus” tâkewâdo akaemolâ tyngatyby  
enado âzeguhoam tâidyly nimopamo keankâ. Kadopâ modo iomaendyly nimopamo keankâ.  
Tydeusry ouruguetu, prataguetu, bronzeguetu, tuhuguetu, segueto warâ aiesezemolâ  
keankâ. Aienibryem, enado âidylymo. Kâempyra, kydapyra, nadakobâbyra waunlo kulâ  
akaemo tydeusry nhygatyby. Âdara nidapyra. Âdara nadakobâbyra warâ. Arâlâ olâ  
tâdâidyly, tâjigâtudyly warâ nimopa awylymo mākâ modo enado.

<sup>21</sup> Nâjityendaymba keankâ merâ kurâdo, Deus neinwâmpyra tatobyry wâgâ. Inakanhe adâidyly timodyzebamo keankâ. Kurâdo tyânly nimopamo keankâ. Âmeodoem, kuenwenriem warâ tawlyly nimopamo keankâ. Ohogüindânry modo, ohogüinwâdyby modo warâ âdaunlo modolâ tiynanâdyly nimopamo. Tâmagaguy nimopamo. Warâ Deus izepa ato anhesezedylymo.

## 10

### *João anju pape ituwymbygue tâmase nhetobyry*

<sup>1</sup> Aituo keankâ anju eagonro ton-honreim xytâguyly kâendyly Deus eydâ atodâba. Eungue etydâdybyem keankâ mâkâ. Nhangahu tânâmize keankâ mârâ nanago. Xixi ara keankâ emydy ehazelu. Peto XYDYK warâ tyatygueim ara keankâ ixinary.

<sup>2</sup> Pape imeimbyry ituwymbyguebybe keankâ emaym. Sapilugueybyenlâ keankâ pape emaym awyly. XYDYK warâ keankâ, ipery aho eynnonro parutabâ ikay, ipery pâem eynnonro keankâ onro wâgâ warâ.

<sup>3</sup> Leão ara ton-honre kehoem keankâ adaenkely. Adaenkebygueduo keankâ kopâ ara ton-honre kehoem âjipyruquely kâindadyly. Sete lelâ keankâ âjipyruquely.

<sup>4</sup> Kâindatuo keankâ pape kanâdyly, iweniho warâ. Mârâ kopâ ipyru aguehobyry kâinwenidyze wakynre. Târâ Deus eydâ atodâba olâ wakely xidadâ:

– Mâindatyby kâjiweni. Angahu oday lelâ nidâ – kely keankâ.

<sup>5</sup> Ilâpygueduo keankâ anju parutabâ wâgâ, onro wâgâ warâ XYDYK warâ kâentyby, tâmary aho eynnonro nhaunâdyly kâendyly.

<sup>6</sup> Warâ aguely:

– Deus iguedânrylâ keankâ xirâ agueze ugononi, kau, onro, parutabâ, idânârâ tâlâom modo tytanrugue kulâ xugunipyry. Adâkehobyry aiese iweâpa nitaymba ise Deus.

<sup>7</sup> Anju sete ieto tytrombetary indyduo ise awârâ anhedily. Tâmary tywâgâ aguewâni modoram adâkehobyry ara ise anhedily. Âdutuoly ise iweâma – kely.

<sup>8</sup> Aituo keankâ mâkâ Deus eydâ atodâ kâindatyby yam agueondily:

– Egâ mâkâ anju, parutabâ ikay, onro wâgâ warâ tâpagueim. Eyam idâ. Mârâ pape ituwymbygueby ekagâ. Xuduze lelâ âyam – kely.

<sup>9</sup> Agueduo keankâ mâkâ anjuam udâly. Sainitybyem eyam aguely:

– Enekâ wao awârâ pape imeimbyry imano – uguely.

Aituo keankâ aguely:

– Anra. Sawâkâ. Sagugâ. Mâinlawiguedily ume xirâ pape imeimbyry saekuzeze penrâ ara. Âuwe odaxi idâduo olâ iduranse – kely.

<sup>10</sup> Aituo keankâ mârâ pape imeimbyry emaymba kâenmakely, kanguhoem. Âkealâ mykeankâ aguely. Kâinlawiguedily ume tâkubâgue, taekure warâ keankâ penrâ ara. Konwompigueduo olâ uwe oday nidurandâ.

<sup>11</sup> Aituo keankâ aguehonly:

– Âtâ anakonro modoram, âkeloem tytanrunem modoram warâ ise âdy Deus anhekyly awyly wâgâ amygueondily, idânârâ pymâ domodo âdara Deusram aieholymo awyly wâgâ warâ – uguehonly.

## 11

### *Azagâ uguondo modo Deus wâgâ aguenri*

<sup>1</sup> Ilâpygueduo keankâ régua âduduoly yam, âdydo imeom ekudo. Aituo keankâ Deus yam aguely:

– Iety, mârâ mesa iety odano yam xuduypy ekanâdo warâ ekuda. Ietydâ âdara kurâdo lelâ yagâ agueim modo awyly sapâguegâ lâpylâ warâ.

<sup>2</sup> Judeu keba modo idaserary keho olâ kâzekudâ. Ynynâbaom modo mârâ xidadâ odano modo tâmaxi iesemo. Enagazezemo. Arâ ise azagâ tokalâ, tuotagueze warâ anu ara aidlylymo.

<sup>3</sup> Azagâ uguondo igonose urâ. Ywâgâ aguewâni modo ise akaemo. Tyxiuneingue ise etyumo. Tâdâsenagazedo inepa saindyly awyly xutuho ise mârâ. Azagâ tokalâ, tuotagueze warâ anu ara lelâ ise ytaumbyry egatuze awylymo – kely.

<sup>4</sup> Akaemo azagâ uguondo modo Deus itaumbyry egatuim, Deus idânârâ kurâdo iwymâry enado XYDYK warâmo keankâ, ohondybymoem Deus xurâem tâsewanihoem. Azagâ se oliveira, azagâ candelabru warâ saguhoem iweâpalâ Zacarias inwenibylâ, akaemo azagâ uguondo modo Deus emary lâpylâ akaemo.

<sup>5</sup> Deus itaumbry egatuim modo enagazeze kelymo-ro watay, tytayba peto sameze akaemo Deus itaumbry aguewâni modo, tuduerymo tyain-homoem. Warâ ise tânagazeze keypy modo nhainlymo.

<sup>6</sup> Eon-honrumo nâduudo adyesenry modo anhetomoem, Deus itaumbry nhगतulymo ara kopâ nihugueba itoem adyenehonzemo azagâ tokalâ, tuotagueze warâ anu ara. Paru tâjiunuem tyesemo. Xirâ anano modo inakanhe kehoem nhenagazenehon-homoem aguehoymbyem ise akaemo. Idânârâ xirâ modo adyesemo lelâ ize tatobry ara kehoem.

<sup>7</sup> Azagâ tokalâ, tuotagueze warâ anu pygueduo ise akaemo azagâ Deus itaumbry egatuly nhewanikely. Ilâpygueduo ise mâkâ Ânguydo imeom adyry mârâ tâtagueim tâsanigueim kehoem odaypa egasely, kadopâ modo ejidy odaypa. Akaemo azakâlâ unâ egatuim modo agâ âseguelyze. Mâkâ ânguydo imeom adyry ise takazemo kehoem ton-honreim. Akaemo azagâ Deus emary modo xyâze mâkâ.

<sup>8</sup> Eguepymobry tâpyâduneba ise. Akaemo azagâ eguepybyry xidadâ tynrenseim earuary oze ise sameybyem awly, iwymârymo kruz wâgâ iguehobrydâlâ. Xidadâ Jerusalém, “Sodoma” kelygue, “Egito” kelygue warâ tâzekeim lâpylâ mârâ. (Deus ingonotyby izepamo myakâwândy mârâ azagâ xidadâ anano modo.)

<sup>9</sup> Idânârâ onro anano modo, âikâ tytanruneim modo warâ akaemo eguepybyry esezemo. Azagâ tokalâ, tuotagueze warâ iguandyly ara ise eguepymobry târâ awly, idânârâ nhetomodâ, peto oday, kopae warâ. Nepyânehonwâbyramo ise.

<sup>10</sup> Toenzepa ise idânârâ Deus einwântânry modo iomarumo, mâkâ azagâ Deus itaumbry egatuim modo iguehobry wâgâ. Tataen-homoram âdylâ xuduzemo, iguehomobry wâgâ tuomarumo tienehon-homoem. Inakanhe aitaynrîm modo tyewiâpazemo keankâ Deus itaumbry egatuim modo agâ, tyam aguezesedobry, tâusezedobry wâgâ warâ. Awlygye keankâ akaemo tumunruneim modo iomamunu, Deus itaumbry egatuim modo iguepyem awly tiuntuuom.

<sup>11</sup> Azagâ tokalâ, tuotagueze warâ iguampygueduo, Deus ÂBU nhedyly enatarymodâ akaemo tâmary modo. Aituo kurâem itondylymo. Kurâem itondybyem saudylymo. Idânârâ mârâ etaynrîmbyry modo toenzepa lelâlâ keankâ âseanedylymo.

<sup>12</sup> Mâkâ azagâ unâ egatuim modo Deus eydâ atodâ ago kehoem aguely nidadâmo:

– Âkuwâdaungâ xarâ! – kely.

Tuduerymo tâensedyly umelâ keankâ akaemo azagâ Deus itaumbry egatuim modo âkulymo eunu duay Deus eydâ atoam.

<sup>13</sup> Âkulymo ume, ton-honre kehoem keankâ onro âzekânily. Âtâ xidadâ odano modo nadakalague, décima parte keankâ adakalagueoim. Toenzepa kurâ domodo nigue, sete mil lelâ. Toenzepa iguewâtânry modo nâseanedâmo. Aguelymo keankâ:

– Ton-honreim lelâlâ awâkâ Deus kaynâ tâtyeim – kelymo.

<sup>14</sup> Saguhogue, nhatanogue warâ kurâ domodo toenzepa lelâlâ nâsenagazedâ. Tâsenagazedly nypygueâmbyramo lelâ olâ-ro warâ. Tâlâ mawânâ ise ilâ takaze kehoem aini. Âsenagazedonzemo inepa lâpylâ!

### *Anju sete ieto tytrombetary indyhobry*

<sup>15</sup> Ilâpygueduo keankâ anju sete ieto tytrombetary indyly. Deus eydâ ato donro modo ewy aguely kâindadyly. Ago kehoem keankâ aguelymo:

– Deus Kywymâry ton-honreim kuru! Idânârâ kurâdo iwymâry ise merâ! Ingonotyby Messias pymâem ise lâpylâ! Typygueba ise pymâem awly! – kelymo.

<sup>16</sup> Vinte e quatro agaityom tynrenseim modo târâlâ keankâ, Deus enadolâ. Pymâem tato turery wâgâ ekadybymoem keankâ. Aituo saudylymo; âzeguhoam idylymo. Tâmydy onro onwa nhedylymo Deus enado, tynrense tawly tienehon-homoem. Deus iwâkuruem awly wâgâ, anhetyby wâgâ warâ keankâ aguelymo:

<sup>17</sup> – Ton-honre âmâ idânârâ ize mato aiese, Deus!

Xina iwymâry kuru âmâ.

Aunlolâ tâlâ mawyly.

Tâlâ myakâwândy âmâ, kaudyly iraynâ.

Tâlâ âmâ iwerâ warâ.

Idânârâ xuturim, iwymâry warâ âmâ.

Awlygye xina agâ iomaru.

<sup>18</sup> Toenzepa âduery modo agâ iewiâkymo.

Naintai mawânâ inakanhe aitomobry wâgâ âsenagazedomoem amânheto iweâma.

Naintai mawânâ idânârâ iguewâtyby modo âdara iedyly awly wâgâ amygueho.

Naintai mawânâ imary modoram koendonro mâunduho, âtaumbry egatuwâni modoram.

Naintai mawânâ âynynonro modoram koendonro mâunduho, idânârâ âinwânnipryy modoram, âdy modoram, âdy keba modoram alêlâ.

Naintai lâpylâ idânârâ kânagazenibyry modo, kyârimpyry modo warâ mâenagazedo – kelymo Deusram.

<sup>19</sup> Ilâpygueduo keankâ târâ kaynâ Deus ety iwyantary âzenahungueoly. Ioday kaixa, “arca” kelygue tâzekeim, nâzeho, Deus kurâem anhetyby kienanâgueho. Mârâ kaixa âzehoduo, ton-honre kehoem kopâ âjipyrygueoly. PEBYK PEBYK idyly. Onro âzekânyly. Toenzepa pewendâ ihugueoly warâ. Warâ keankâ aidyly.

## 12

*Pekodo, dragão warâ âepanâguehobyry*

<sup>1</sup> Kau wâgâ keankâ âdykâ tâenseny âepanâgueoly. Pekodo xixigüe tâtyeim emyenro keankâ. Ihuru iay keankâ nunâ. Doze ximukâgue xygatyby keankâ koroa nhangahu wogonro.

<sup>2</sup> Tase keankâ, imery egasezeaji. Tymery egasely awylygue, toenzepa saenlu.

<sup>3</sup> Târâ kaynâ keankâ eagonro âdykâ tâenseny âepanâgueoly, dragão tapabileim keankâ. Sete lelâ keankâ nhangahu, dez iwâenky. Koroape keankâ mâkâ nhangahu modo wâgâ warâ.

<sup>4</sup> Tonwyngue keankâ ximukâ kau odano modo ewy toenzepa indâtyguoly; terça parte onro anaxi nhamuinly warâ. Aitybyem pekodo imery egaserim enado epagu. Iamudo tiândyse keankâ egasebygueduolâ kehoem.

<sup>5</sup> Aituo keankâ imery uguondo egasely. Idânârâ iwymâry ise, tuduery modo tyain-hoem ferrogue ematu waunlo ara. Iamudo tiândyse wâne, iamudo nejikemo olâ târâpa. Deus turery wâgâ atoam nadâmo.

<sup>6</sup> Âji âdy peba atoram keankâ pekodo âwiendyly, Deus tâjidy kehobyryanlâ. Azagâ tokalâ, tuotagueze warâ anu ise Deusram âzehozezedyly.

<sup>7</sup> Ilâpygueduo keankâ tâdâsegyebyly aidyly târâ kaynâ. Anju domodo Miguelgue tywymâgueim dragãoque tywymâgueim modo warâ âsegyebylymo. Ton-honre kehoem keankâ âsegyebylymo.

<sup>8</sup> Dragão ton-honremba niedâmo. Aituo keankâ eagonro modo agâlâ Deus eydâ atodâba âieholymoly.

<sup>9</sup> Dragão, eataen-ho modolâ warâ Deus eydâ atodâba âjiânkyolymoly. Âgâu kaudyly ume âepanâguebylâ mâkâ dragão. Diabu, Satanás warâ lâpylâ mâkâ ezedy. Deus izepa ato aguientoem konokunilâ mâkâ. Dragão, idânârâ eataen-ho modo warâ xirâ onro anaxilâ keankâ adameoly.

<sup>10</sup> Ilâpygueduo keankâ Deus eydâ atodâ ânguy kukeanra ago kehoem aguely:

– Iweâma ise Deus tynynonro modo nhemakely, ton-honru pymâem tawyly warâ nhenehonly. Iweâma Messias ton-honru nhenehonly; idânârâ iwymâryem ise kehobyry. Diabu, “Konokuni” kelygue tâzekeim, Deusdâpa nâieho; kataen-hodo nenokudaymba ise mâkâ iwerâ. Deus eydâ atodâba sameybyem mawânkâ iwerâ.

<sup>11</sup> Akaemo kagonro modo Diabu neinwântaymbamo, Kordeiru tunu tyapâze turâem iguehobyry tâinwânse tawylmogüe, mâkâ xunârybyry, iwâgâ nhegatybybymo warâ iozeno kuru awyly tyeinwândylymogüe warâ. “Jesus einwândyly mâinmopa âmaemo-ro watay, âzemo xina” tâkehonduo kulâ, einwândyly nimopamo keankâ. Tyanepamo keankâ igueze.

<sup>12</sup> Omazewâdaungâ, idânârâ âmaemo Deus eydâ atodâ tâjikeim modo. Kaikâlâ âmaemo Jesus eynynâbamo modo, âdykâ matomodâlâ, âtâ anaym, paru oze mataymo warâ. Âyanmo kehoem Diabu nâjigonoho. Tyewiâse lelâlâ mâkâ, iwaguepa ton-honru adain-ho, tutuze tawylygue – kely.

<sup>13</sup> Deusdâpa, kurâdo ety anaxi sameybyem tawyly tiuntuduo keankâ dragão, iamudo egaseyby ise nhapygue idâlly.

<sup>14</sup> Aituo pekodo adawâtâoly ârigâ imeâgâkeba sawâry ara. Tawâry xuduypygue keankâ sawâgudyly tâjidy kehobyryam idâlly, dragão tuiopyra atoram. Azagâ tokalâ, tuotagueze warâ anu ise Deus awâkâ ese awyly.

<sup>15</sup> Aituo keankâ toenzepa kehoem dragão itayba paru egasely. Mârâ paru egaseyby inweândyly; pekodo nhapygue idâlly, paruanlâ târâpa adahohoem wâne.

<sup>16</sup> Deuslâ olâ keankâ pekodo emakerim. Onro nhatuen-hoymby odaxilâ keankâ idânârâ paru dragão itayba egaseyby âwândyly. Onro paru nhuonly ara idyly.

<sup>17</sup> Dragão iewiâpadyly, pekodo âsemagueduo. Âda tiempyra tâituo keankâ pekodo iweompyry, Deus aguehobyry, Jesus nhenomedâdobyry warâ einwândyly imodânry modo agâ âsegyebyze idâlly.

<sup>18</sup> Aituo keankâ dragão XYDYK idyly sagunu wâgâ.

## 13

*Azagâ ânguydo adyry modo*

<sup>1</sup> Ilâpnyem keankâ ânguydo adyry parutabâ ikayba âjikaguely kêandyly. Dez lelâ keankâ iwâenky, sete lelâ nhangahu warâ. Idânârâ iwâenky wâgâ keankâ koroa imeimbyry emyenro ourugeto modo. Deus wâgâ inakanhe lelâlâ aguely keankâ mâkâ nhangahu modo wâgâ iweniby.

<sup>2</sup> Udodo adyry emyenro keankâ mâkâ ânguydo. Emary, ihuru warâ imeonkebaem, tuhudune warâ keankâ; eondary tuosebimune kehoem keankâ, urso ara. Itary imâsedoem keankâ; iery modo tuosebile kehoem keankâ, leão ara. Dragão keankâ mâkânra aguely:

– Toenzepa ise on-honru; won-honru agâ âzekiba. Âmâ, urâ warâ ise kurâdo iwymâryem kydawwily – kely.

<sup>3</sup> Tokalâ nhangahu wâgâ âdyâhobyrygue tywinurigue keankâ mâkâ ânguydo adyry parutabâ ikanobyry. Iguerim ara kehoem keankâ, mârâ tywinurigugue. Nypy olâ mârâ in-epa. Awârâ tientuo, toenzepa kurâ domodo nâsewânimo. Awylygue mâkâ nheinwândylymo.

<sup>4</sup> Aituo keankâ aguelymo:

– Tynrenseim, ton-honreim warâ awâkâ dragão. Awâkâlâ keankâ mâkâ ânguydo adyry parutabâ ikanobyryam “Âmâ, urâ warâ ise kurâdo iwymâryem kydawwily” keim – kelymo. Aituo keankâ agueondylymo:

Tynrenseim, ton-honreim warâ lâpylâ mâkâ ânguydo adyry parutabâ ikanobyry. Ânguy ton-honruneba mâkâ ara kehoem! Ânguy eagâ tâdâseguelybyly nemaenwâbyra ise! – kelymo.

<sup>5</sup> Dragãoram quarenta e dois nunâ\* ara ton-honru nhenehon-hoem aguehoymbyem keankâ mâkâ ânguydo adyry parutabâ ikanobyry. Deus wâgâ inakanhe kehoem aguehoem aguehoymbyem.

<sup>6</sup> Aituo mâkâ inakanhe aguely adaguly Deus wâgâ, eydâ ato donro modo wâgâ warâ. Deus ezedy, ejidy tynrenseim warâ âwankuem nhedyly keankâ.

<sup>7</sup> Deus eynynonro modo agâ âseguelyhoem, eon-honru nhain-hoem warâ aguehoymbyem keankâ mâkâ ânguydo adyry. Idânârâ kurâdo xirâ onro anano modo iwymâryem keankâ.

<sup>8</sup> Kaudyly umelâ Deus aunloenlâ tagâ ini modo ezedy inweniby modo mâkâ ânguydo adyry neinwâmpyramo keankâ, mâkâ kurâdo inakanhe ito epywaze igueypy xurâ tawly-mogue. Idânârâ akaemo mârâ pape wâgâ ezedy tywenizenrybyry modo lelâ mâkâ ânguydo adyry izetonro, ehogueni warâ.

<sup>9</sup> Awylygue, mâuntudyze mataymo, kâinweniby koendâ xutuwwâdaungâ.

<sup>10</sup> Kydadawâholy kydzetadâohoen-ro watay, arâlâ ise aguydâieholy. Espadague âdyoim kydatay, arâlâ ise kydâdyoly. Tâwâlâ toenzepa kydzâzenagazeonre Deus eynynonroem kydawwilygue, kieinwâmpyra kîpyra olâ kîne. MYK alelâ kydzâzenagazeoly kyzemaenre.

<sup>11</sup> Aituo keankâ eagonro ânguydo adyry onro anaynlâ kêandyly. Imeombyryem keankâ iwâenky, kaneru iwâenky ara, azagâ lelâ. Dragão agueho ara, ton-honre, kyanedâ warâ olâ keankâ aguely.

<sup>12</sup> Mâkâ ânguydo parutabâ ikanobyry aguehobyryem keankâ aguely, aidyly warâ. Mâkâ parutabâ ikanobyry enanaym keankâ mâkâ ânguydo adyry onro anano, idânârâ kurâdo warâ iwymâryem awyly. Aguely:

– Awâkâ ânguydo parutabâ ikanobyry einwântaungâ. Igueim ara kehoem keankâ iwinurigu. Nypy olâ mârâ. Mâinwâmpyra âmaemo-ro watay, inagazezemo urâ – kely.

<sup>13</sup> Mâkâ ânguydo adyry onro anano, âdykâ kientânry modo kehoem anhekyly. Kau odaypa peto nihugueândâ idânârâ kurâdo enanaym.

<sup>14</sup> Toenzepa âdykâ kientânry modo mâkâ ânguydo parutabâ ikanobyry enanaym an-hetoem aguehobyryem keankâ mâkâ. Mârâ modo adylyndylygue idânârâ kurâdo onro anano modo nhenokudyly. Warâ keankâ eyanmo aguely:

– Merâ ânguydo adyry parutabâ ikanobyry ekudo âyngataungâ. Warâ ise mâkâ espadague nhangahu satâby, niguepa olâ-ro waunlo mâen-hoguedylymo, mâentyguedylymo warâ. Enado âzeguhoam itaungâ, mâen-hoguedomoem – kely.

<sup>15</sup> Aguehobyry ara keankâ ânguydo adyry paikano ekudo anhedilymo. Aituo ânguydo onro wogonro mâkâ ekudo kurâem nhenehonly, intainheonly warâ. Aituo keankâ ekudo xygatyby aguely:

– Idânârâ lenado âzeguhoam itânrybyry modo xyâwâtaungâ – kely.

<sup>16</sup> Aituo keankâ mâkâ ânguydo adyry onro anano aguely:

\* 13:5 Azagâ tokalâ, tuotagueze warâ anu awârâ agueho.

– PE tyetaynze ise idânârâ ynynonro modo, emary aho eynynonro wâgâ atay, inwendy wâgâ atay warâ. Idânârâ PE ietaymbyem lelâ nidâmo, tynrenseim modo, tynrensenry modo alelâ; âdypeom, âdypebaom modo; tâpyguebalâ âsewanirin-em sanâtyby modo, tâpywazeim modo alelâ.

<sup>17</sup> Izededy atay, ynumerury atay warâ ise marka urâem awylymo xutuho. Ânguy âdy nanâpyra, vende niepyra warâ ise, xirâ marka peba-ro watay – kely.

<sup>18</sup> Seiscentos e sessenta e seis keankâ mârâ número, uguondo ezedy xutuho. Tonomeguneim modo xutuze mârâ número âdakeze aguely awyly, uguondo ezedy xutuho mârâ. Ton-honre wâne ise mârâ número xutuhoem, âdutuoze olâ.

## 14

*Cento e quarenta e quatro mil kurâ domodo igâtudobyry*

<sup>1</sup> Aituo keankâ mâkâ Kordeiru XYDYK warâ iwy Sião wâgâ kâendyly. Cento e quarenta e quatro mil lelâ keankâ kurâdo eagâ awyly. Mâkâ Kordeiru ezedy, nhunwym ezedy warâ iwenibym keankâ inwendymo wâgâ.

<sup>2</sup> Deus eydâ atodâ ânguylâ aguely xidadâ, ton-honre kehoem, iwâelu imâsedo ara, kopâ ipyru ara warâ. Koendâ kehoem lâpylâ olâ keankâ igâky, harpa igâky wâne myara.

<sup>3</sup> Cento e quarenta e quatro mil kurâ domodo igâky mo keankâ mâkâ Pymâ Deus xurery enado, quatro ânguydo imeom enado, vinte e quatro agaityom tynrenseim modo enado warâ. Tâjigâky iwelo keankâ igâtudomo; akaemo emakewâdyby modo lelâ olâ xutuino-ro warâ.

<sup>4</sup> Koendâ lelâ aidylymo, âdaunloenlâ pekodo nynanâbyramo warâ. Mâkâ Kordeiru agâpa nipyramo, âdykâingâ idâhobyrydâ mâkâ agâlâ idâllymo. Emakeyby keankâ akaemo, Deusram, Kordeiruam warâ xudyppy awylymogue; saguho nady etâdyby ewily wâne Deusram xuduly myara xudyppyem awylymogue.

<sup>5</sup> Âdykâ ânguy âdaunloenlâ enokunibyry mâkeba akaemo; alâ kulâ aguepamo, ewentâguedomo peba warâ.

*Azagâ tokalâ warâ anju domodo unâ nhegatuhyobyry*

<sup>6</sup> Aituo keankâ anju eagonro sawâgu kâendyly târâ kaynâ, idânârâ kurâdo tâentodâ, tydatodâ warâ. Unâ koendonro âtuguguedânry egatuim mâkâ, Deus kurâem anhetyby. Idânârâ kurâdo xirâ onro anano modoram keankâ nhegatuhy.

<sup>7</sup> Ton-honre kehoem keankâ aguely:

– Deus xyrentaungâ. “Deus, ton-honreim âmâ, koendonro warâ” kewâtaungâ eyam. Inepa ise Deus koendonro nhuduly tâinwânni modoam. Tâinwântânry modo enagazeze warâ. Awârâ kau, onro, parutabâ, paru, idânârâ tâlâom modo tytanrugue kulâ xugunipyry ehoguedaungâ – kely keankâ.

<sup>8</sup> Mâkâ aguepygueduo keankâ eagonro anju aguely kâindadyly:

– Babilônia xidadâ tâgareim adainholy ise! Mârâ xidadâ anano modo ety adakalagueoze! Kurâ domodo tumuenze keankâ akaemo tonlo modo. Uguondo modo wâne tagonro toku ikaji tyese myara keankâ akaemo kurâ domodo anhedyly, inakanhe kulâ aitoemoem, Deus izepa ato ara kulâ aitoemoem. Awylygue ise idânârâ adainholy mo – kely.

<sup>9-10</sup> Aguepygueduo keankâ anju azagâ tokalâ ieto aguely kâindadyly târâ kaynâ. Ton-honre kehoem keankâ aguely:

– Toenzepa ise Deus iewiâky, idânârâ ânguydo adyry parutabâ ikano ehoguenibyry modo agâ, ekudo xygatyby ehoguenibyry modo agâ warâ. Toenzepa ise nhenagazenehony. Deus toenzepa enagazeze idânârâ inwendy wâgâ atay, emary wâgâ atay warâ mâkâ imarkarybeom. Toenzepa ise Deus eagâmo iewiâky. Igopurumo odaji nhenyhoem vinhu tudureim XU nhedyly-ro waunlo ara ise. Peto onwaym idânârâ âsenagazeze akaemo; enxofre eunu lelâ ise tytângue egaseim. Mârâ eunu tâepaigueho nghan-hulygue ise âsenagazedelymo. Âsenagazezemo anju domodo enanaym, Kordeiru enanaym warâ.

<sup>11</sup> Niântaymba ise mârâ peto iaduânimo. Nâkuba nitaymba ise mârâ eunu. Tâzekobyzeguely peba ise târâ peto oday, kopae warâ akaemo ânguydo adyry, ekudo xygatyby warâ einwânni modoem. Aunlôlâ ise akaemo inwendy wâgâ atay, emary wâgâ atay warâ mâkâ ezedypeom modo âsenagazedely.

<sup>12</sup> Awylygue Deus eynynonro modo xirâ anaym tâsenagazedely nemaenmo lelâlâ, Jesus tyeinwândyly nimopamolâ, Deus aguehobyrylâ tyeinwândyly nimopamolâ warâ, âji tâdâsenagazedoam nâtâba itomoem.

<sup>13</sup> Aituo keankâ Deus eydâ atodâ tâjitanru kâindadyly. Warâ keankâ aguely:

– Xirâ âyam augueho iwenigâ: “Kaikâ mâkeba akaemo Kywymâry Jesus nheinwândylymogue kulâ tyâzeim modo” – kely.

Aituo keankâ Deus Ispiritury aguely:



– Âkealâ amyguely. Iweâma tâwâlâ ekobyzeguelymo, âwanu aienibyryem; Deus tutuze mawânkâ koendonro aienibyryem awylymo – kely.

*Xypyry etay aitynrim modo*

<sup>14</sup> Aituo keankâ MYK widyly. Xypyry etay aitynrim modo kêendyly. Uguondo kêendyly eunu tapekeim wâgâ ekadybyem. Koroa ourugueto keankâ nhangahu wogonro. Taho iewipy uva ekaunâdo emyenro keankâ emano.

<sup>15</sup> Aituo anju Deus ety odaypa egasely. Ton-honre kehoem adaenkely mâkâ eunu wâgâ ekadybyam:

– Awârâ taho imano emyra. Ekaunâdo odaylâ mawânâ onro anaym sahuadyby modo – kely.

<sup>16</sup> Aituo keankâ mâkâ eunu wâgâ ekadyby, onwogonro modo indâtygyuly kêendyly, uva ekaunâdoem idâtygyuho ara.

<sup>17</sup> Aituo keankâ eagonro anju kêendyly târâ kaynâ. Târâ Deus ety odaypa egasely. Taho uva ekaunâdobe lâpylâ keankâ mâkâ emaym.

<sup>18</sup> Ilâpyryem keankâ eagonro anju târâ kaynâ Deus ety odaypa egasely. Mârâ peto mesa wogonro edunu tyânringueim iaduânto eni keankâ mâkâ. Ago kehoem keankâ adankely mâkâ tagonro taho uva ekaunâdogue tãmaseinra. Aguely:

– Awârâ taho imano emyra. Onro anakâ uva ewily ekaunâda, sahuadybyem mawânâ – kely.

{“Uva ewily ewy wâgâpa satâwâdyly wâne myara ise Deus tynynâbaom modo âikâam nhedyly” keze awârâ aguely.}

<sup>19</sup> Ilâpygueduo keankâ anju tydahorugue âpa ezay uva ewily ewy wâgâpa nhatâwâdyly. Tanki imâsedo odaji uva ewily nhamely, ekuguehoem. Uva âzekuguehoem toenzepa sakabely wâne myara ise Deus tynynâbaom modo agâ iewiâky, awârâ nhenehonly.

<sup>20</sup> Âji uva ewily ekugueho âikâlâ keankâ xidadâ odaypa awyly. Munruem keankâ mârâ uva ekuru. Trezentos kilômetros keankâ iwague awyly, tokalâ, tuotagueze warâ metru keankâ esanigu mârâ tâjiunu.

{“Toenzepa ise Deus eynynâbaom modo âsenagazedyly. Toenzepa ise tâdâseaguebyly. Tunu tyapâze ise iguelymo. Saimu imâsedo ara ise awârâ tâjiunu” keze awârâ aguely.}

## 15

*Sete anju domodo*

<sup>1</sup> Ilâpygueduo keankâ âdykâ tâensenry kêendyly kau wâgâ. Kyoem keankâ mârâ, âwankuembra lâgâlâ. Sete anju domodo lelâ keankâ kêenkily. Sete tâdâsenagazedo xypyrygue tãmatunemo keankâ. Tynynâbaom modo inakanhe aitobyry wâgâ tyewiâse mâkâ Deus. Tãdâsenagazedo odaji idyly watay, “Warâ ise merâ âsenagazedyly” Deus kehobyry aralâ ise âsenagazedylymo.

<sup>2</sup> Aituo keankâ paru, vidru emyenro peto agonro kêendyly. Mârâ paru iwaguepa kurâdo sedâ lâpylâ tâpagune; âdykâ mâkâ ânguydo adyry parutabâ ikanobyry einwãnnipyry keba, ekudo xygatyby tien-hoguedoem enado âzeguhoam ityby keba, inumerury ezedy xutuhogue marka ietyby keba warâ keankâ akaemo. Deus nhudyppy harpa keankâ indylymo.

<sup>3</sup> Tãsemagueduomo saguhoem Deus emarybyry Moisés igâtudobyry ara nigâtudâmo, Kordeiru igâkylâ:

– Deus, xina iwymâry, ton-honreim âmâ.

Ize mato aiese ton-honre âmâ.

Idânârâ amânhekily koendonro mawyly tânehonze, on-honru tutuen-honze warâ.

Idânârâ kurâ domodo iwymâry âmâ.

Koendâ lelâ aieni âmâ; âdy koendâpa kulâ aieni mâkeba âmâ.

Ânguy enokuni keba âmâ.

<sup>4</sup> Idânârâam tâdyren-honze âmâ, Pymâ.

“Deus kywymâry, ton-honreim kuru” kezemo idânârâ.

Âmâ kulelâ inakai aietânry.

Idânârâ kurâ domodo amânhekily esemo.

“Idânârâ amânhekily koendonro lelâ” kezemo âyam.

“Deus, ton-honreim âmâ” kezemo âyam.

Tientuomo, xutuzemo idânârâ koendâ lelâ, ioze lelâ warâ amidyly awyly

– kelymo keankâ Deusram.

<sup>5</sup> Ilâpyryem keankâ Deus ety kêendyly kaynâ. Ety iwyantary âzenahungueduo, koendâ ioday sedâ, Deus âepanâguedodâ.

<sup>6</sup> Sete anju lelá târâpa negase. Sete tâdâsenagazedo xypyrygue tâmasemo keankâ. Linhuguetopekeim, ehozelu pylâ-ro waunlogue keankâ etyumo. Ouru xygatybygue keankâ ihogâdylimo nhewandanomopyryem, epady onwa.

<sup>7</sup> Quatro ânguydo imeom ieto ewy keankâ eyanmo kudupi ourugueto vinhugue tatune xuduim, mâkâem, mâkâem warâ. Tynynâbaom modo agâ tyewiâse tawly Deu Iguedânry nhutuen-hon-holâ keankâ mârâ vinhû.

<sup>8</sup> Toenzepa keankâ Deus ety oday âseunugely. Deus ton-honre awyly, koendonroem awyly warâ xutuho mârâ eunu ety odaypa egaserim. Mârâ sete lelá tâdâsenagazedo modo akaemo anju nhenetaymby anipyra kulâ, ânguy negawântaymba keankâ myarâ Deus ety odaji.

## 16

*Sete lelá Deus einwântânry modo âsenagazedo*

<sup>1</sup> Ilâpyryem keankâ tâjitanru ton-honre aguely kâindadyly Deus ety oday. Akaemo sete anju domodoram aguely:

– Idâwâtaungâ. Onro anano modo onwa âgudupiryimo odano iapâdaunda. Ynynâbaom modo onwa yewiâky mânhapâdylimo ara ise – kely akaemo sete lelâram.

<sup>2</sup> Saguho anju idâly; mârâ tugudupiry odano onro onwa nhapâdylly. Aituo toenzepa nâsenagazedâ akaemo kurâdo mâkâ ânguydo adyry parutabâ ikanobyry ezedygue inwendy wâgâ atay, emary wâgâ atay warâ PE letyby modo, ekudo xygatyby nhehoguedyly waunlopyry modo. Pinuri xypydânry keankâ iwâgâmo âepanâgueim. Awârâ keankâ saguho tâdâsenagazedo.

<sup>3</sup> Mâkâ anju azagâ ieto mârâ tugudupiry odano parutabâ ikaji keankâ nhapâdylly. Nhapâbygueduo mârâ paru tâjiunu sakamadyby tywângueim ara idyly. Idânârâ ânguydo imeom parutabâ ikano modo nigewâdâ. Paru munruem idyly keankâ tâdâsenagazedo azagâ ieto.

<sup>4</sup> Ilâpyryem keankâ mâkâ anju azagâ tokalâ ieto mârâ tugudupiry odano paru imâsedo ikaji, iwatary modo ikaji warâ nhapâdylly. Aituo keankâ paru imâsedo, iwatary modo warâ munruem itaynly. Awârâ keankâ tâdâsenagazedo azagâ tokalâ ieto.

<sup>5</sup> Aituo keankâ anju paru xutuim Deusram aguely kâindadyly:

– Aunlolâ tâlâ mawyly; tâlâ minase, iwerâ tâlâ âmâ warâ. Âdykâ inakanhe amitaymba âmâ, Deus. Inakanhe amidyly mâkeba, âynynâbaom modo mâenagazedylly.

<sup>6</sup> Âtaumbyry egatuwâni modo nyâwâdâmo. Âynynonroem ityby modo nyâmo, iunumo niapâdâmo warâ. Awylygue keankâ munru mâunduly nhenyhomoem. Adâitobyry aralâ akaemo nhemakely – kely keankâ.

<sup>7</sup> Aituo keankâ tâjitanru kâindadyly. Deusram xuduypy egamehodâba keankâ aguely.

– Xina iwymâry âmâ, Deus. Ize mato tâwâlâ adyese âmâ. Âkealâ, kurâdo inakanhe aitaynrin modo mâenagazedylly. Aitomobyry wâgâlâ mâenagazedyllymo – kely keankâ.

<sup>8</sup> Ilâpyryem keankâ anju quatro ieto mârâ tugudupiry odano xixi onwa nhapâdylly. Mârâ nhapâbygueduo xixi toenzepa kehoem âdâpigadyly, kurâ domodo nhaduândylly warâ.

<sup>9</sup> Toenzepa wâne xixi tyaduântobyry âdâpigugue âsenagazedyllymo, nâjityembyramo lâgâlâ olâ Deus tieinwâmpyra tawlymogues. Neinwâmpyramo lâgâlâ olâ. “Deus, inakanhe amidyly mâkeba keankâ, xina mâenagazenehonduo, izepa mato kulâ keankâ xina anhekylly” kepamo. Deus inwykelymo lelá tâsenagazedo ingonotobyry wâgâ.

– Âmunuru kulâ, Deus. Âdaituoba kulâ xina mâenagazedylly – kelymo keankâ.

Awârâ keankâ tâdâsenagazedo quatro ieto.

<sup>10-11</sup> Ilâpyryem keankâ anju cinco ieto tugudupiry odano onro anaxi nhapâdylly, ânguydo adyry parutabâ ikanobyrygue tywymâguneim modo onwa. Idânârâ niamadâ lelâlâ. Âdy nepyramo lâgâlâ keankâ. Tulu tâsemo kehoem keankâ, toenzepa âsenagazedyllymo ewânugue. Arâlâ olâ inakanhe adâidyly nimopa awylymo-ro warâ. Deus kaynonro inwykelymo lelá.

– Tâzewânu modogue toenzepa xina menagazedâ. Egâ xina iwinuriry, xina iaduhobyry warâ inakanhe kehoem awyly. Tumunreim lelâlâ âmâ, Deus – tâkely nimopamo keankâ.

Awârâ keankâ tâdâsenagazedo cinco ieto.

<sup>12</sup> Ilâpyryem keankâ anju seis ieto mârâ tugudupiry odano paru Eufrates ikaji nhapâdylly. Aituo paru tâgaseba idyly, sawely warâ. Akaemo pymâ xixi egaseho eynynâba saintaynrin modo âzekuâdoem keankâ mârâ sawely.

<sup>13</sup> Aituo azagâ tokalâ warâ kadopâ inakai kulâ kâendylly, pârâru emyenro modo. Dragão itayba, ânguydo adyry parutabâ ikanobyry itayba, ânguydo konokuni itayba warâ keankâ egasely.

<sup>14</sup> Ânguy anhetânry adyese keankâ akaemo azagâ tokalâ warâ kadopâ modo. Onro anakâ pymâ modo idâtyguyze keankâ akaemo idâly, Deus ton-honreim agâ tâseguebyhomoem. Xypyry etay ise awârâ modo aidyly. Ilâem mawânkâ ise Deus, tynynâbaom modo nhenagazedlyly.

<sup>15</sup> Aituo keankâ Jesus aguely kâindadyly.

– Xirâ xutuwâdaungâ! Odopâze urâ, idânârâ ânguy ienuendlyly umeba kehoem, tâmagazeim saindlyly wâne tynwânwândlyly umeba myara. Ienuenibrylâ ise yagâ tuomareim kuru. Etaungâ wâne mâkâ âtâ eni, sodo âxigueduo, tykyhoem âzetygueim, âtâ sodo saintuo, tâtyemba tawlyly nhetuo, âpybazedlyly waunlo. Mâkâ araba itaungâ – kely keankâ Jesus.

<sup>16</sup> Aituo keankâ akaemo azagâ tokalâ warâ kadopâ modo, pymâ domodo indâtyguylymo tâdâseguebyhoam, israelita domodo itanwe Armagedomram. Paru sawely, akaemo pymâ domodo âseguebyze saindlyly awârâ modo keankâ tâdâsenagazedo seis ieto.

<sup>17</sup> Akaemo seis anju domodo nhapâbygueduo keankâ anju xypyry kau, onro warâ ontay tugudupiry odano nhapâdlyly. Aituo keankâ Deus tâty oday turerly wâgâ ekadybyem tonhonre kehoem aguely kâindadyly.

– Ipa, idânârâ yrynâbaom modo sete lelâ âsenagazedo ajietai! – kely keankâ.

<sup>18</sup> Awârâ aguepygueduo keankâ ielu toenzepa kehoem âzehoruguely; kopâ âjipyruguely warâ. Ago kehoem onro âzekânily; toenzepa lelâlâ inakanhe nhedyly. Kurâdobe awlyly ara xirâ onro anaym, âdykâ ton-honre kehoem onro nâzekâniwâbyra myara kehoem.

<sup>19</sup> Onro âzekâniduo, xidadâ imâsedo, azagâ tokalâ warâem kehoem nâzepajigâdâ. Idânârâ onro anano kurâ domodo ety anary nadainho. Deus toenzepa niewiâpadâ Babilônia donro modo inakanhe aitomobyry wâgâ. Âdaunloenlâ inakanhe aitomobyry nenanânehomba mawânkâ. Awlylygue ise toenzepa âsenagazedlylymo, vinhu venenupeom nhenyhomoem nhuduly-ro waunlo ara.

<sup>20</sup> Idânârâ ilha modo nytywâdâ. Idânârâ iwy modo nuzataym warâ.

<sup>21</sup> Pewendâ ihuguely keankâ kau odaypa kurâ domodo onwa. Imâsedo, tâmânreim warâ keankâ mârâ pewendâ. Quarenta kilo keankâ emânru. Toenzepa kurâ domodo âsenagazedlyly mârâ pewendâgue. Awlylygue keankâ Deusram inakanhe kehoem aguelymo:

– Âmunru kulâ, Deus. Awlylygue pewendâ xina onwa mâin-hugueândlyly. Âmâ xina enagazeni inakanhe kehoem! Xina nemaemba ise enra – kezesedylymo.

## 17

### *Pekodo MON warâ adyeseim, ânguydo adyry warâ*

<sup>1</sup> Aituo akaemo kudupigüe tâmatuneim modo ewy yam agueze âewlyly:

– Egârâ mâkâ pekodo; mârâ xidadâ imâsedo paru modo emelay saunâtyby âdara awlyly etolâ mâkâ pekodo. Alâ kulâ adyeseim mâkâ MON warâ tynanâzeim. Idânârâ tâdutuoze inakanhe aitobyry. Agueze urâ âyam, âdara Deus mâkâ pekodo MON waunlo nhenagazedlyly awlyly.

<sup>2</sup> Tâinkânro modo lelâba pymâ domodoram tâdynanâoze. Vinhu nhuduypygye idânârâ toku ikaji nidâmo, nynanâdâmo warâ – kely.

<sup>3</sup> Aituo Deus Ispiritury wayam waunroem aini modo kâentoem anhenehonduo, âji âdy peba atoam anju yadâ. Târâ pekodo sedâ, ânguydo adyry parutabâ ikayba salokuyby tapabileim wâgâ. Sete lelâ keankâ mâkâ ânguydo nhangahu, dez lelâ iwâenky warâ. Idânârâ sodo wâgâ tâjitanru inakai Deus wâgâ agueim iwenibyem keankâ.

<sup>4</sup> Iwâkuru keankâ pekodo ety iwogonro, pûrpura ara, karmesim ara warâ tyweneim. Ourugue keankâ iwâkudâdybyem awlyly, tuhu imeombyry perolague iwâkudâdybyem, eagonro tuhu imeombyry tâwânseim modogue warâ. Kopu ouruguetto keankâ emano. Vinhugue tumyke keankâ mârâ. Idânârâ inakai modo, idânârâ tâjiwypado modo warâ anhetbyby enanâgueho mârâ vinhu.

<sup>5</sup> Âze iwenibybe keankâ inwendy wâgâ; âdakely awlyly ânguy nutuba olâ keankâ. “Babilônia ton-honreim urâ. MON waunlo urâ; idânârâ pekodo modo yara lâpylâ ize wawlyly. Tâlâ wawlylygue mawânârâ onro anaym kywypado modope awlyly” kely.

<sup>6</sup> Toenzepa Deus eynnonro modo Jesus einwândlyly imodânry modo tyâen-honze mykeankâ mâkâ pekodo. Iunumo tienlylygue toku ikaji idyly-ro waunlo ara keankâ mâkâ pekodo.

Kâentuo, toenzepa kâseguâdâdâ, kâseanedâ warâ.

– Inakai kulâ myanze awâkâ! – uguely keankâ.

<sup>7</sup> Aituo keankâ anju aguely:

– Arâ kehoem tâseguâdâzeba ikâ, tâseanezeba ikâ warâ. Mâkâ pekodo wâgâ, ânguydo adyry iwâgâ adakobâdo, sete lelâ tyangahueim, dez lelâ pylâ iwâenkyun-ro waunlo wâgâ tutuzenrybyry âyam agueze urâ.

<sup>8</sup> Mâkâ ânguydo adyry mâentyby onro anaym âepanâguebyrâ mâkâ. Iwerâ olâ tâentonzeba. Egasezeaji olâ tâtagueim imâsedo odaypa, kadopâ modo etadâdobyry odaypa. Typygueba ise Deusram eon-honru adainholy. Mâkâ ânguydo adyry tientuo ise Deus eynynâbaom modo toenzepa âseanedylimo. Aunloenlâ Deus Agâ Ini Modo Ezedy sawo wâgâ iweniby kebamo mawânkâ. Kaudyly iraynâlâ myakâwândy tâzezedy sawobe awyly. Tâlâ mâkâ ânguydo adyry onro anaym âepanâgueby. Iwerâ olâ tâentonzeba. Âepanâgueonze olâ-ro warâ – kely keankâ anju.

<sup>9</sup> Aituo keankâ anju yam aguely:

– Tonomeguneim modo lelâ ise xirâ aguely xutuim. Pekodo metai, ânguydo adyry sete tyangahueim wâgâ. Sete iwiy imeimbyry modo wâgâ âtâ anary saunâtyby wâgâ, sete pymâ domodo wâgâ warâ mârâ sete nhangahu nhenehonly.

<sup>10</sup> Cinco asaemo pymâdo ewy igueypyem. Tokalelâ iwerâ pymâem awyly, eagonro nâepanâgueba. Âepanâgueduo, âdiempa kulâ ise Deus merâ pymâem nhenehonly.

<sup>11</sup> Mâkâ ânguydo adyry parutabâ ikanobyry pymâem ise lâpylâ. Onro anaynlâ âepanâguebyrâ mâkâ; iwerâ olâ tâentonzeba. Merâ sete pymâ domodo ewylâ ise, âepanâgueoni, pymâdo oito ieniem. Xypyry etay olâ, Deusram ton-honremba âiehoze lelâlâ – kely keankâ anju.

<sup>12</sup> Yam agueondyly keankâ:

– Dez lelâ awâkâ ânguydo adyry iwâenky awyly metai. Mâkâ dez pymâ domodo tâwanu sagudânry modolâ awârâ nhenehonly. Ânguydo adyry parutabâ ikanobyry âepanâgueonduo olâ, âdiempa kulâ eagâ pymâem itomoem aguehonzemo, tokalâ hora awârâem kulâ.

<sup>13</sup> Akaemo dez pymâ domodo âseinwânzemo, ânguydo adyry parutabâ ikayba âepanâguebyrâ agâ, mâkâlâ pymâ kuru itoem, akaemo pylâ eynynonro modo-ro warâ tâitomoem.

<sup>14</sup> Ânguydo adyry, mâkâ dez pymâ domodo warâ, Kordeiru itoguzemo, emaeenze olâ-ro warâ, pymâdo iwymâry tawylgyue, xutuwâni modo xutuim tawylgyue warâ. Kordeiru, xurâ modo warâ eagâlâ ise âsegebylmo, eon-honrumo sainsemo-ro warâ, mâkâ ingâsedybymo mawânkâ einwândyly nimopamo warâ – kely.

<sup>15</sup> Aituo keankâ anju yam agueondyly:

– Mâkâ pekodo MON warâ adyeseim paru emelay ekadybyem metai. Idânârâ kurâdo onro anano modo, mârâ paru nhenehonly.

<sup>16</sup> Ânguydo adyry paru ikanobyry, dez pymâ domodo warâ mâkâ pekodo MON waunlo iewiâsezemo. Idânârâ tâlâ ato modo emakezemo. Ety iwogonro etyzemo. Nhunru sâsemo. Petogue ise âsegubydâdyby nhainlymo-ro warâ.

<sup>17</sup> Xirâ aiese lelâ akaemo, Deuslâ aiedysedonro awylgyue. Awylgyue ise idânârâ, merâ ânguydo adyryam adâkehomoem âturudylmo: “Ize tawylgyuelâ ise amyguehobyry xina anhedyly. Akaemo iwymâryem tato modoram, amyguely einwânehonze xina warâ. ‘Aiekâ’ myguehobyry aiese lelâ xina” kezemo. Ânguydo adyry ise nheinwânkylmo. Xirâ aiese akaemo, “Arâ ise aidyly” Deus kehobyrylâ mawânârâ.

<sup>18</sup> Pekodo MON warâ adyeseim mâentyby wâgâ augueday, xirâ âtâ anary imâsedo paru emelano wâgâlâ enra auguely. Idânârâ onro anano modo iwymâry mâkâ tonlo pymâ – kely keankâ anju.

## 18

### *Deus xidâdâ imâsedo Babilônia keho nhain-hobyry*

<sup>1</sup> Yam aguepygueduo keankâ eagonro anju Deus eydâ atodâba xytâgyuly kâendyly. Tonhonre keankâ mâkâ, âdydo imeom aiese. Idânârâ kurâ domodo onro anano modo tyajimanâse keankâ mâkâ ehoru.

<sup>2</sup> Tonhonre keankâ adaenkely:

– Babilônia xidâdâ imâsedo tadainhoze! Idânârâ iodano modo tadainhoze! Kadopâ modo lelâ atonlo iwerâ; elaho modo, tywânguneim sâni eagonro modo alelâ.

<sup>3</sup> Deus neinwântaymba keankâ akaemo Babilônia donro modo. Inakai, kywypado warâ olâ keankâ anhekylymo. Âkelo anano modo inakanhe adâito ara aitomoem adyeseimo keankâ, pekodo inakanhe kulâ aini uguondoam vinhu nhuduly, toku ikaji itomoem, eagâ kywâpado kehoem adientoem. Onro anaym pymâ domodo tâesemo keankâ, Babilônia donro modo agâ Deus izepa ato aiese. Âwâlâ tohomaendomoem toenzepa keankâ âdydo imeom

nhaunkulymo, kywypado, inakai warâ adientomoem; âkelo anaymba âetyby modo âdydo imeombe tâisemo keankâ, akaemo tianâdyse ato vende tientomobyrygue – kely.

<sup>4</sup> Aituo keankâ târâ Deus eydâ tatodâ aguely kâindadyly:  
– Igasewâdaungâ âmaemo ynynonro modo awârâ xidadâ odaypa.  
Igasewâdaungâ, atonlo modo ara inakanhe amipyra mitomoem,  
atonlo modo inakanhe tâitobyry epywaze âsenagazedomo ara mâsenagazebyra mitomoem warâ.

<sup>5</sup> Izepa wato aiedyly nimopa atonlo modo.  
Inepa, inepa warâ inakai anhedylymo.  
Kau opaji kehoem inakai aitomobyry saintybyen-ro waunlo ara kâendyly.  
Yangahu odaylâ inanry inakanhe aitayn-homobyry.

<sup>6</sup> Warâ xidadâ sainrim modoram auguely:  
“Babilônia donro modo toenzepa kuru enagazedaungâ, kurâ domodo nhenagazedo-  
mobyry takaze kehoem.  
Toenzepa lelâlâ enagazedaungâmo.  
Vinhugue sakuizezedaungâmo, azagâ lelâ âkelomo nhakuihobyry takaze kehoem.  
<sup>7</sup> Toenzepa âdydo imeompe akaemo Babilônia donro modo.  
‘Iweâma ton-honre kurâ’ tâkezemo inanry.  
‘Pymâ lelâlâ kurâ. Aunlolâ ise koendâ kydawyly.  
Âdykâ tytynruneba, tumowâduneba warâ ise kurâ, pypâbyry modo ara’ tâkezemo inanry.

Iweâma âdy peba letaungâmo.  
Enagazedaungâmo toenzepa kehoem.  
Toenzepa itywandomoem aietaungâ.

<sup>8</sup> Tânanaji, ton-honreim keankâ akaemo, inepa olâ ise âsenagazedilymo.  
Toenzepa ise ewânumo.  
Toenzepa ise itynrumo typemugumo iguehobyry wâgâ.  
Tâwindygue âsenagazezemo.  
Petogue ise adainholymo.

Inepa ise arâ âsenagazedilymo, tokalâ iguandyly wâgâ kulelâ waunlo ara.  
Pymâ Deus urâ. Urâlâ ise enagenimo.

Ton-honreim lelâlâ urâ” uguely – kely Deus.

<sup>9</sup> Âtâ anary iwymâry modo, Babilônia donro modo agâ Deus izepa ato aienibyry, âdype tâitoem akaemo tonlo modoram âdydo imeom vende ienipyry modo warâ xidadâ petogue adainly esemo. Toenzepa ise âjityendylymo, awârâ tientuomo. Saenlumo, eogunrumo warâ ise petomâ eunu tientuo.

<sup>10</sup> Toenzepa âseanezemo, atonlo modo âsenagazedilymo tientuomo. Awylygue ise iwaguelâ awylymo.

– Kaikâlâ âmaemo! Toenzepa lelâlâ mâsenagazedilymo, âmaemo Babilônia domodo! Kurâdo onro anano modoram âsejiguymo vende mânhetuomo olâ inanry âdydo imeombe midylymo. Inepa kulâ awârâ mâsenagazedilymo inakanhe amitomobyry epywaze – kelymo, akaemo tonlo modo agâ waunlo ara.

<sup>11</sup> Idânârâ âtâ anano âdydo imeom vende ieni modo esemo lâpylâ mârâ xidadâ adainholyo. Toenzepa âjityenzemo, tysejiguy vende tiento peba ituo. Aituo ise eogunrumo, saenlumo warâ ton-honre kehoem.

<sup>12</sup> Xirâ modo ani nhakylimo vende tientoem: Ouru, prata, tuhu tâwâenseim modo, pérola iwâkudâdyby; âtâ tâwâenseim linhugueto, sedagueto warâ, purpurague tyweneim pymâ domodo ety emyenro, carmesingue tyweneim, kurâdo tynruneim ety ara tyweneim; se tâwâenseim modo warâ, aunlo kulâ keba; marfingue aietyby tâwâentuneim modo, se iwâkurugue, bronzegue, ferrogue, marmoregue warâ;

<sup>13</sup> canela, cardamomo, óleo tyânârnguneim modo, uriza tyânârnguneim modo, edunu tyânârnguneim modo, mirra ânwin-em, âguedy epyâdoem nhârânzeântoem tyeseim warâ; tyânârnguneim pyni nhârânzeântoem, urizaem warâ adyeseim, lamparina wâgâ tyaduânseim warâ; vinhu, oliva igady; trigu ifarinhary xunoyby, trigu ewily warâ; âgunro: tapirâ, kaneru, kawaru; karosa iwâkuru kawaru, tapirâ warâ nhepâguely modo; uguondo modo, pekodo modo tâpyguebalâ âsewanihoem sanâtyby modo, guerradâ sawâtaymy modo warâ nhakylimo, Babilônia donro modoram vende tientoem. Ânguy nanâtondaymba olâ ise awârâ âdydo imeom nhatybymo.

<sup>14</sup> Babilônia donro modoram aguelymo iwaguelâ:  
– Nadainhaki mârâ koendonro modo ize matobyry. Âmaemo xurâ tâwâentuneim modo, iwâkuru modo waunlo memakehoanguimo. Âdype mitondaymba ise âmaemo – kezemo.

<sup>15</sup> Tyane ise akaemo âdydo imeom vende ieni modo.

– Iwaguelâ kine. Xidadâam kaintuo, atonlo modo agâ âsenagazeze kurâ – kezemo.

Aituo iwague endaylâ ise nhesedylymo. Itynrumo ise, tydinheruguepa tawylmogue.

Aituo ise adaenkelymo:

<sup>16</sup> – Kaikâ Babilônia donro modo-kâ! Inakanhe kehoem akaemo âsenagazedylly mârâ xidadâ imâsedo odano modo. Saguhoem akaemo ety keankâ linhuguetô tâwânenseim kehoem. Tâwânenseim kehoem keankâ etymo iwogonro, pûrpura emyenro tapabileim. Ourugue keankâ âpâgudâdyllymo, tuhu imeimbyry tâwânenseim iwâkuru waunlogue, perolague warâ!

<sup>17</sup> Inepa olâ nadainhoakimo – kezemo.

Idânârâ paikanobyry modogue âzetaynrim modo: pepi imâsedo iwymâry modo, ioday tâwanuneim modo; pepi oday tuantaji, tuantaji warâ sanâtyby, vende ietyby warâ sani modo; paikanobyry ebyrygue âdylâpe ityby modo warâ iwague endaylâ xidadâ adainly nhesezedylymo.

<sup>18</sup> Peto iatygu, eunu warâ tientuomo, adaenkelymo keankâ:

– Imâsedo, ton-honreim warâ keankâ mârâ xidadâ! Mârâ emyenro kuru lâpeba! – kelymo.

<sup>19</sup> Toenzepa keankâ itynrumo. Sagunu nhamelymo tyangahumo onwa, toenzepa tytyrungue, tâzewenrymo ara. Eogunrumo, saenlumo warâ keankâ,

– Kaikâlâ Babilônia donro modo! Toenzepa lelâlâ akaemo xidadâ imâsedo odano modo âsenagazedylly! Pepi imâsedo sodo modo parutabâ oze âdylâ sanâse, vende iese warâ idâim âdydo imeombe tâisemo ani, mârâ xidadâ odano modo ize ato tiandylygue. Inepa olâ ize tato idânârâ kehoem nanhehoanguimo! – kelymo.

<sup>20</sup> Omazewâdaungâ olâ, mârâ xidadâ odano modo adain-hobyry wâgâ, âmaemo Deus eynynonro modo. Tuomare itaungâ, âmaemo Deus eydâ ato donro modo. Tuomare itaungâ, âmaemo Jesus tywâgâ agueze induakeyby modo. Tuomare itaungâ, âmaemo Deus itaumbryr egatuze igonotaymby modo. Inagazenimobyry enagazeze Deus.

<sup>21</sup> Aituo keankâ anju ton-honreim tuhu imâsedo, tâmânreim nhanâdylly, trigu akoho emyenro. Ton-honre kehoem keankâ parutabâ ikaji nhamely. Akaemo Babilônia donro modoram aguely iwaguelâ:

– Xirâ tuhu parutabâ ikaji ton-honre kehoem sameyby xuzatyby ara ise âmaemo xidadâ imâsedo Babilônia donro modo madainholymo ton-honre kehoem, mâzehoba mitomoem.

<sup>22</sup> Ânguy nâzetyguedaymba ise awâtârâ. Harpalâ ânguy nidywâpyra ise. Ânguy flauta, trombeta, awârâ modo nidywâpyra ise. Ânguy nigâtudaymba ise awâtârâ. Ânguy âdy ekudo anientaymba ise, âkelo âwanu aieni modo lâpeba ise warâ. Pekodo modo egogu tydatuneba ise.

<sup>23</sup> Ânguy lâpeba ise tarâ xidadâ oday. Lamparina ehobanâni lâpeba ise awâtârâ. Âwynsaundo, salokuzenomo modo warâ ipa ise awâtârâ ohogünrin-em. Târâ âdydo imeom vende ienipyry modo ton-honremo; kurâdo takaze kehoem âdutulylymo. Kurâdo idânârâ âtâ anano modo inakanhe amidyllymo tientuo, adienysemo lâpylâ myara. Âwenwenrymogue keankâ idânârâ mâenokudyllymo – kely keankâ.

<sup>24</sup> Mârâ xidadâ imâsedo Babilônia odano modo toenzepa âsenagazezemo, inakanhe aito-mobyry wâgâ, iumunromobyry wâgâ warâ. Toenzepa Deus eynynonro modo, itaumbryr egatuwâni modo warâ nâdyomo akaemoam. Babilônia donro modulâ tâwentâguezeim, kurâdo onro anano modo xyâhobyry wâgâ.

## 19

<sup>1</sup> Mâkâ anju aguepygueduo keankâ akaemo Deus eydâ ato donro modo saenlu waunlo ara kâindadylly.

– Aleluia! Koendonro lelâlâ âmâ, Deus! Xina emakerim âmâ! Iwâkuru âmâ! Ton-honreim lelâlâ âmâ warâ!

<sup>2</sup> Âkealâ, izepa mato aienibyry modo mâenagazenehonly. Tâsenagazedyllylâ mawânkâ ize atomo. Kurâ domodo inakanhe nieneho akaemo Babilônia donro modo. Pekodo wâne tokalâ uguondo agâ lelâ tâidyseba, myara akaemo ize mato lelâ adienyseba awyly; eagonro kurâ domodo âinwâmpyra itoem nhenomedâdyllymo lâpylâ warâ. Mâenagazedyllymo olâ inakanhe aito-mobyry wâgâ, âynynonro modo nhâwâtomobyry wâgâ warâ – kelymo keankâ.

<sup>3</sup> Inepa lâpylâ keankâ agueondyllymo:

– Aleluia! Koendonro lelâlâ âmâ, Deus! Mârâ xidadâ nadainhaki. Niântaymba ise mârâ peto xidadâ sainrimpyry – kelymo.

<sup>4</sup> Aituo keankâ akaemo vinte e quatro agaityom tynrenseim modo, quatro ânguydo imeom warâ âzeguhoam idyllymo, pymâ Deus xurery enado. Deus koendonroem awyly wâgâ aguelymo keankâ.

– Âkeá lelá lá xirá xina agueho. Koendonro, iozeno wará awâkâ Deus! – kelymo keankâ.

*Kordeiru, tynynonro modo agâ itobyry*

<sup>5</sup> Aituo keankâ Deus xurerydâpa tâjatanru kâindadyly.

– Aguewâtaungâ kyDeusry koendonroem awyly wâgâ, idânârâ emary modo, âmaemo xyrentaynrim modo warâ. Idânârâ iwâgâ aguewâtaungâ, âmaemo âdy modo, âdy keba modo aelâ – kely keankâ.

<sup>6</sup> Aituo keankâ toenzepa kurâ domodo aguely kâindadyly. Iwâelu imâsedo ara ton-honre keankâ aguelymo, kopâ ipyru ara warâ.

– Aleluia! Koendonro lelá lâ awâkâ Deus! Kywymâry awâkâ! Ton-honreim lelá lâ Deus! Idânârâ ize tato adyese lelá! Idânârâ kurâ domodo iwymâry lelá lâ awâkâ!

<sup>7</sup> Tuomare kine! Kuomarugue kydadaenkenre! “Koendonro lelá lâ Deus, ton-honreim lelá lâ warâ” kykenre. Kydâzetyguene. Sainseaji mâkâ Kordeiru ohogüin-ho. Ohondybyem lelá mâkâ iwidyem ini.

<sup>8</sup> Pekodo ohogüinrim wâne tywâkure, tapekeim, tywykenrygue âzetydâdyby myara, Jesus eynynonro modo ohondybyem awyly, aunloenâ eagâ tâitomoem, inakanhe aitomobyry xygakeimbyryem Deus awylygue – kelymo keankâ.

<sup>9</sup> Aituo keankâ anju yam aguely:

– Xirá auguely iwenigâ. Tuomareim ise Kordeiru ohogüin-ho etyryam igâsedaymby modo. Akaemo agâ ise Deus koendâ lelá awyly warâ – kely.

Aituo keankâ agueondyly:

– Deus itaumbry iozeno xirá – kely.

<sup>10</sup> Mâkâ anju enado âzeguhoam widâ, yakadâ awyly kênehohoem. Warâ olâ keankâ aguely:

– Ienado âzeguhoam tâiseba ikâ. Deus emary kulâ urâ, ara, idânârâ Jesus einwânni modo ara warâ. Unâ iozeno Jesus aguehobyry einwânni akaemo. Deus lelá ehoguegâ – kely.

Jesus unâ iozeno aguehobyry mawânâ Deus Ispirityru nhutuen-honly Deus itaumbry egatuwânni modoram.

*Kawaru tapekeim wogonro*

<sup>11</sup> Ilâpyryem keankâ kau, Deus eydâ ato, âzenahunguely-ro waunlo ara, kâendyly. Kawaru tapekeim wogonro âpanâguely kâendyly. “Tâinwânseim” kelygue tâzekeim; “Ioe lelá tunâguem” warâ keankâ mâkâ kawaru wogonro ezedy. Mâkâ ise ânguy âsenagazeni, ânguy âsenagazedânry warâ awyly agueim. Ewentâguedobyry ara ise mâkâ anhenehonly. Iozelâ tuduery modo nhenagazenehonly, eagâmo âseguebylymo warâ.

<sup>12</sup> Peto iatygu ara kehoem keankâ enu ehozelu. Agui keankâ koroa nhangahu wâgâ awyly, pymâ tynrenseim tyangahu onwa nhekyly ara. Tâzezedy keankâ iwâgâ iweniby. Mâkâ lelá keankâ mârâ tâzezedy âdakely awyly xutuim. Ânguy eagonro nutuwâbyra âdakeze aguely awyly.

<sup>13</sup> Munrugue tapigunre keankâ mâkâ ety BOH waunlo tâwâgueim. “Deus Xutuen-hoim” mâkâ ezedy.

<sup>14</sup> Eagâlâ keankâ izodadury modo idâly. Kawaru tapekuneim modo wâgâmo keankâ, etymo iwogonro tâwânseim, tapekeim kehoem, tywykeim keba warâ.

<sup>15</sup> Espada tâynâ, tâynâ warâ iewipy keankâ Deus Xutuen-hoim itayba egaserim. Mârâgue tuduery modo eon-honru nhainwâdyly. Idânârâ tâlânro modo xutuim ise mâkâ, tuduery modo ton-honrema iese warâ, tienagazedomoem ferrogue tâmase-ro waunlo ara ise. Uva ekuguehoem sakabeho ara ise inakanhe aitomobyry wâgâ adakabeolymo, Deus toenzepa ton-honreim iewiâky ume.

<sup>16</sup> Ety iwogonro BOH waunlo wâgâ iwedyduno eynynâ iwenibyem keankâ: “Pymâdo idânârâ iwymâry. Xutuwânni modo xutuim warâ urâ” kely.

<sup>17</sup> Aituo keankâ anju XYDYK warâ kâendyly xixi wâgâ. Elahoam, tywângueim sâtaynrim modoram ton-honre kehoem adaenkely:

– Âetaungâ. Deus âyanmo nhuduypy sâse âtâdyguywâdaungâ.

<sup>18</sup> Pymâ domodo, sodadu domodo, sodadu iwymâry domodo warâ iguewâtyby nhunru sâtaungârâ. Kawaru iguewâtyby nhunru, iwogonro modo igueypy nhunru warâ sâtaungârâ. Idânârâ iguewâtyby modo nhunru sâtaungârâ, kurâdo âdy modo, âdy keba modo aelâ, tâbyguepa âsewanirin-em sanâtyby modo, tâpywaze tâwaniduneim modo warâ lâpylâ. Âtaungâ merâ iguewâtyby modo nhunru sâse – kely keankâ.

<sup>19</sup> Aguepygueduo keankâ ângydo adyry parutabâ ikanobyry kâendyly. Onro anano modo pymâdo agâ âtâdygybyem awyly, izodadury modo agâ warâ. Idânârâ mâkâ modo âewyly keankâ, mâkâ kawaru tapekeim wogonro agâ, izodadury domodo agâ warâ âseguebyze.

<sup>20</sup> Idânârâ keankâ âseguelymo. Mâkâ kawaru tapekeim wogonro keankâ emainerim. Ânguydo adyry parutabâ ikanobyry netadânehom kurâdo enokuni netadânehom, “Deus itaumbry egatuim urâ” keimpyry. Mâkâ kewâdyly kulâ egatuim, saguhoem ânguydo adyry enanaym âdydo imeom adyenyry kehoem aienibyrylâ mâkâ. Mâkâ adyenyry anhetuo, akaemo ânguydo adyry imarkarygue tymarkagueim modo tonokuze ani. Mâkâ ânguydo adyry ekudo enado âzeguhoam itaynrim tâzenokuoze ani warâ. Tyâdunepa keankâ ânguydo adyry, kurâdo enokuni warâ. Peto imâsedo onwanji olâ keankâ adameolyo, mârâ saimu imâsedo peto emyenro onwanji. Mârâ petodâba keankâ eunu âkuly, tytângue kehoem kyârim enxofre ara.

<sup>21</sup> Mârâ espada imâsedo kawaru tapekeim wogonro itayba egaseybygue keankâ akaemo izodadury domodo âdyoly. Elaho domodo, ânguydo imeom tywângueim sâni modo warâ kurâdo igueypy nhunru, kawaru igueypy nhunru warâ nâdâmo. Toenzepa nâdâmo, nioladâmo warâ.

## 20

### *Mil anu lelâ Satanás etagobyry*

<sup>1</sup> Aituo keankâ anju xytâguyly kâendily Deus eydâ atodâba. Tâtagueim imâsedo iwyantary enahun-ho xavepe keankâ emaym, korenty imâsedo tâmânreimbe warâ.

<sup>2-3</sup> Dragão tapabileim eon-honru naim lâpylâ, “Âgâu adyry iwelo keba”, “Diabu”, “Satanás” gue tâzekeim lâpylâ mâkâ. Korentygue keankâ nhekâjily. Ekâjirimbyryem, tâtagueim tuhuadaguenry odaxi nhamely. Selupe niedâ mâkâ, etadâdobyry iwyantary, tutuzeba kulâ tânahunguezeba itoem, Diabu iweâpadobe mil anu lelâ itoem, Messias agâ nâjitoguyba itoem. Târâ tâtagu ume, onro anano modo nenokudaymba ise. Mil anu sakabygueduo ise âzetagueoly wao.

<sup>4</sup> Aituo keankâ mure modo kâendily, pymâ domodo xurery. “Pymâem itaungâ” kehobyry modo keankâ mârâ onwa ekani. Alâpylâ Deus itaumbry, Jesus nhenomedâdyby modo warâ egatuwâni modo tugosagâze iguewâtyby modo egadopyry kâendily keankâ. Ânguydo adyry parutabâ ikanobyry einwântânrybyry, ekudo xygatyby enado âzeguhoam itânrybyry, ehoguedânrybyry warâ akaemo. Inwendymo wâgâ atay, emarymo wâgâ atay warâ ânguydo adyry imarkary peba keankâ akaemo. Kurâem itondybymoem keankâ. Aituo ise pymâem awylymo Cristo agâ mil anu lelâ, Diabu tâtagueim tuhuadaguenry oday awyly ara, Deus pymâem inimopyryem awylygue.

<sup>5</sup> Saguhoem kurâem tâjítondylylâ keankâ xirâ.

Eagonro iguewâtyby modoma keankâ kurâem nitombyra, mârâ mil anu âwanikely ara.

<sup>6</sup> Xirâ ume kurâem tientondyby modo agâ koendâ lelâ Deus, Deus eynynonro awyly-mogue. Peto onwanji nadamuneowâbyramo ise. Igueondylymo nitaymamo ise. Deus, Cristo warâ emaryenmo ise, Deus aguehobyry kurâdoam aguenriem. Mil anu ise Cristo agâ pymâem awyly.

### *Diabu eon-honru sain-hobyry*

<sup>7</sup> Mil anu âwanikeduo ise Satanás etaguely mârâ etadâdobyry odaypa.

<sup>8</sup> Onro anano modo enokuze ise egasely. Satanás idâtyguzemo, âseguelyhoem Deus agâ, eynynonro modo agâ warâ. Gogue donro modo, Magogue donro modo warâ keankâ akaemo Deus agâ âseguelyim modo. Aguiom keankâ akaemo. Sagunu paru emelano sapâguehoem nuduwâpyra, arâ lâpylâ ise sapâguehoem nudupa awyly, toenzepa awyly-mogue.

<sup>9</sup> Tysegoze kehoem ise idâlymo israelita domodo ety anaxi. Âtâ anary Deus ize ato, eynynonro mârâ anano modo warâ enâmizemo. Deus olâ peto igonose, tynynâbaom modo nhaduântoem.

<sup>10</sup> Ilâpygueduo ise Deus, Diabu Konokuni nhamely mârâ âji infernuram, peto imâsedo onwanji. Mârâ peto ejidydâ ise mâkâ, eunu tytângueindâ, enxofre ara kyârindâ, mâkâ ânguydo adyry parutabâ ikanobyry, mâkâ kurâdo enokuni warâ samehobyrydâ. Âsenagazedilymo nadainwâpyra ise târâ. Peto oday, kopae alelâ ise âsenagazedilymo typygueim mâkeba.

### *Xyppyry etay Deus kurâdo âda tiendily nhutuho*

<sup>11</sup> Aituo keankâ mure imâsedo tapekeim kâendily, mâkâ kurâdo âdaiedily awyly wâgâ agueim xurery. Deus târâ ekadybyem kâendily warâ. Onro, kau warâ nuzadâ; tâentonzeba keankâ.

<sup>12</sup> Idânârâ kurâdo iguewâtyby modo sedâ, âdy modo, âdy keba modo alelâ. Tâpagune keankâ Deus enado awylymo. Idânârâ aitomobyry iwenihobyry pape modo nadapilugue-owâdâ. Ilâpygueduo eagonro pape adapilugueoly, Aunloenlâ Deus Agâ Ini Modo Ezedy awo. Mârâ pape wâgâ iwenihobyry ara keankâ akaemo iguewâtyby modo aguehonly. Deus



izepa ato aienibyry modo, inakanhe adâitobyry aralâ nhemakely. Jesus einwânnipyry modo koendonro emakerim.

<sup>13</sup> Târâlâ keankâ idânârâ kurâdo iguewâtyby modo, parutabâ ikaji sameyby modo, onro anaym epyâdyby modo warâ. Aitomobyry ara keankâ idânârâ aieholymo.

<sup>14-15</sup> Idânârâ mârâ Aunloenlâ Deus Agâ Ini Modo Ezedy awo wâgâ tâzekenry modo nadameomo tâdâsenagazedoram. Aunloenlâ ise akaemo, mârâ âji donroem awelymo, peto onwaym. Tâjiguely xypyrylâ ise xirâ, peto onwanji tâdâsenagazedoem tadameoho. Deus eynynonro modo, eynynâbaom modo agâpa iepygueduo, tâjiguely peba, tâdâzepyâdyly peba warâ ise; tpygueba mawânkâ ise Deus eynynonro modo eagâ awyly. Eynynâbaom modo aunloenlâ ise âji tâdâsenagazedodâ awylymo.

## 21

### *Kau iwelo, onro iwelo warâ*

<sup>1</sup> Deus eynynâbaom modo peto onwanji samely kêempygueduo, kau iwelo, onro iwelo warâ sedâ. Kau saguhobyry, onro saguhobyry warâ nadaim, parutabâ peba nidâ warâ.

<sup>2</sup> Deus ijidadâry “Jerusalém Iwelo” kelygue tâzekeim sedâ, Deus eydâ atodâba xytâguyby. Âwynsaundo salokuzenomo tohoguim-ho agâ oxioni ara âpâgudâdyly, tâty iwâkurugue âzetydâdybyem awyly myara keankâ mârâ xidadâ iwâkudâdybyem, iwâkuruem warâ awyly; Deus ejidyem on-hondybyem awyly. Idânârâ koendâ lelâ keankâ mârâ xidadâ oday awyly.

<sup>3</sup> Ton-honre kehoem tâjitanru kâindadyly mârâ pymâ Deus xurerydâ.

– Tynynonro modo duaylâ ise iwerâ Deus ejiku. Aunloenlâ ise akaemo agâ awyly, eynynonro modo ise akaemo-ro warâ. Mâkâ kulelâ ise nheinwânkylimo.

<sup>4</sup> Ânguy tytynruneba ise târâ, Deus itynrumo etyze mawânkâ. Ânguy niguepa ise. Tozogunru lâpeba ise târâ. Ânguy newâmataymba ise, nâsenagazebyra warâ. Idânârâ awârâ modo nadaim – kely.

<sup>5</sup> Pymâ Deus yam aguely keankâ:

– Iweâma idânârâ âdydo imeom iweloem kânhetaynly; saguhoem mykeankâ myara inkâba ise. Iwenigâ awârâ idânârâ iweloem itaynrin modo wâgâ. Tâinwânseim lelâlâ xirâ augueho – kely.

<sup>6</sup> Aituo keankâ ageondyly:

– Idânârâ aietybyem awyly! Idânârâ adaguho, âwanikeho warâ urâ, letra A adaguho, letra Z pylâ xypyry, ilâ emyeno urâ. Utudyzedo modoem, yeinwândysedo modoem warâ, aiese lelâ urâ, ize atomo ara, paru sawedânry ewygue tatuanduneim modo niguepa itoem kankuihobyry ara. Tâbygunepa ise agânhedily. Âdygue iepywadyzemo inkâba urâ.

<sup>7</sup> Idânârâ xirâ xuduze urâ, yeinwândyly imodânry modoam. Ymery ise akaemo. Urâ ise iDeusrymo warâ.

<sup>8</sup> Yeinwântânry modo olâ aunlolâ ise âsenagazedylimo petomâ onwaym. Tpygueim keba ise mârâ peto iatygu, eunu tytângueim, kyârim waunlo ise mârâ. Ywâgâ tâsenagazedily xytani modo ise petomâ onwaym âsenagazeni, alâpylâ yeinwândyly imowâni modo; Deus iewiâto aietaynrin modo; kyârim modo; uguondo tywydy lelâ xynanâdânry modo, pekodo modo tusoram lelâ âdynanâodânry modo; kuenweim modo, ome odo modo; kurâdo nhygatyby ekudo modo, Deus ara kehoem xyreni modo; idânârâ kurâdo enokuni modo warâ. Warâ ise akaemo kurâdo idânârâ âsenagazedily mârâ petomâ nhâtânry onwaym. Tâjiguely azagâ ieto awârâ – kely keankâ.

### *Jerusalém iwelo*

<sup>9</sup> Ilâpyryem keankâ anju kaynâpa âewyly. Tokalâ akaemo sete igudupiry tâdâsenagazedogue tumykeimbyry ewy keankâ mâkâ. Yam aguely keankâ:

– Âekâ. Mâkâ Kordeiru iwidyem ini âyam enehonze urâ – kely keankâ.

<sup>10</sup> Deus Ispiritury âewyly, wayam waunroem aini modo kâentoem aienehonze. Anju iwyy kaynonro onwa yadâ. Deus ijidadâry, Jerusalém iwelo nhenehony keankâ. Deus eydâ atodâba keankâ xytâguyly.

<sup>11</sup> Tywâkure kehoem keankâ xidadâ, tohozele warâ, ehuru Deusdâpa âenigue. Tuhu iwâkuru tâwânseim jasje ara keankâ mârâ xidadâ ehozelu, vidru tapiegreim ara.

<sup>12-13</sup> Kaynâ kehoem keankâ mârâ xidadâ sahodâdo, ton-honre kehoem warâ. Doze lelâ keankâ pyanta myarâ tâdâwânto, azagâ tokalâ warâ xixi egaseho eynynâ, azagâ tokalâ warâ norte eynynâ, azagâ tokalâ warâ sul eynynâ, azagâ tokalâ warâ xixi egawânto eynynâ warâ. Pyanta eni keankâ anju domodo. Mârâ doze pyanta modo wâgâ keankâ akaemo doze Israel iweompyry modo ezedy iwenibyem awyly.

<sup>14</sup> Doze tuhu imâsedo modo wâgâ keankâ mârâ sahodâdo saunâtybyem awyly. Doze lelâ tuhu mododâ keankâ doze “Kordeiru tunâry egatuze ingonotaymby modo” ezedy iwenibyem awyly lâpylâ.

<sup>15</sup> Metru emyenrogue tâmase keankâ mâkâ anju yagâ tunâgueim. Ouruguetto keankâ mârâ emano; xidadâ, pyanta modo, sahodâdo modo warâ ekudo keankâ mârâ.

<sup>16</sup> Mârâ xidadâ nekudâ. Azagâ mil e duzentos kilômetros keankâ iwague awyly, etaedygu agâ âzekiba. Alâpylâ azagâ mil e duzentos kilômetros kaynâ awyly warâ. Idânârâ ekudobyry modo âzekiba lelâ.

<sup>17</sup> Mârâ sahodâdobyry nekudâ lâpylâ anju. Sessenta e seis metros keankâ kaynâ awyly. Kienkudo aralâ keankâ nhekudylymo.

<sup>18</sup> Tâwânseim tuhu jaspegue aietyby keankâ mârâ sahodâdo. Âtâ modo, arua modo warâ mârâ xidadâ odano modo keankâ ouru âjiguetto kehoem, tohozele kehoem vidru ara.

<sup>19</sup> Sahodâdo iano modo keankâ tuhu iwâkuru, tâwânseim modo. Saguho tuhu imâsedo keankâ jaspeguetto; nhatano safiraguetto; azagâ tokalâ ieto âgataguetto; quatro ieto esmeraldaguetto;

<sup>20</sup> cinco ieto sardônicaguetto; seis ieto sârdioguetto; sete ieto crisólitoguetto; oito ieto beriloguetto; nove ieto topâzioguetto; dez ieto crisóprasoguetto; onze ieto jacintoguetto; doze ieto ametistaguetto. Warâ keankâ mârâ sahodâdo iano tuhu imâsedo, iwâkuru, tâwânseim warâ awyly nhemaen-hoem.

<sup>21</sup> Pérolaguetto keankâ mârâ doze pyanta modo. Tokalâ pérola imâsedogue aietyby kulâ keankâ mârâ pyanta modo. Arua imâsedo mârâ xidadâ odano keankâ ouru tâwânseim âjiguetto lelâ, vidru ara tohozeleim.

<sup>22</sup> Deus ehoguedo âtâ lelâ keankâ ipaom mârâ xidadâ oday. Târâlâ mawânkâ Kywymâry Deus ton-honreim. Târâlâ lâpylâ mâkâ Kordeiru warâ. Târâlâ awylymoguetto, âtâ eagâmo aguehoem tâdâtâdygyho peba awyly. Âdykâlâ ise eagâ aguykely.

<sup>23</sup> Xixi peba, nunâ peba warâ keankâ mârâ xidadâdâ, tyamepa târâ awylygue, Deuslâ, Jesus Kordeirilâ warâ tohorugue, idânârâ iajimanâni awylygue.

<sup>24</sup> Mârâ iajinu oday ise kydadakobâdyly. Warâ ise onro anaym âtâ anary iwymâry modo Deusram aguely:

– Saguhoem xina ani tohoguezeim, tynrenseim warâ pymâem tatay. Iwerâ olâ xina âmâ nhehogueguely, nhyrenkyly warâ – kelymo.

<sup>25</sup> Pyanta modo tânahuwâduneba ise. Niamapyra awylygue ise tânahunzeba awyly.

<sup>26</sup> Warâ ise kurâdo onro ananobyry modo Deusram aguelymo:

– Tynrenseim ani xina saguhoem. Iwerâ olâ âmâ lelâ xina nhyrenkyly. Saguhoem ehoguedyby ani xina. Iwerâ olâ xina koendonro mawyly wâgâ aguely – kelymo ise.

<sup>27</sup> Âdy Deus izepa ato lâpeba ise târâ, âdy inakai lâpeba warâ. Ânguy kywypazenehoim lâpeba ise târâ, konokuni lâpeba warâ. Aunloenlâ Deus Agâ Ini Modo Ezedy Awo wâgâ tâzekuneim modo lelâ ise mârâ xidadâ odano modo; xirâ mawânâ Kordeiru iwapery wogonro.

## 22

<sup>1</sup> Aituo keankâ anju kaynonro paru iwâkuru kehoem nhenehonly. Mârâ paru ewy enynri modo aunloenlâ ise Deus agâ awylymo; niguepamo ise warâ. Tysenze keankâ mârâ paru, vidru ara tohozeleim kehoem keankâ. Mure imâsedo Pymâ Deus, Kordeiru Jesus warâ ekadomo iay mârâ egasely.

<sup>2</sup> Mârâ xidadâ earuary imâsedo tuotagueze keankâ paru sakadyly. Paru taynâ, tâynâ warâ keankâ se modo. Toenzepa mârâ modo ewitunu; doze nunâ ara âkeloem âkeloem warâ ewisely. Mârâ ewily einrim modo nîgiewâpyramo ise. Aunloenlâ ise Deus agâ awylymo. Saryguelâ ise idânârâ âsewiândylymo, aunloenlâ tâwânepa tâitomoem.

<sup>3</sup> Deus izepa ato lâpeba ise târâ xidadâ oday.

Târâ ise Deus, Jesus Kordeirugue tâzekeim lâpylâ warâ pymâem awyly, pymâ xurery wâgâ. Idânârâ eynnonro modolâ ise ehogueni, iomaeni warâ.

<sup>4</sup> Eagâlâ ise kurâ; emydy ese kurâ warâ. Kywendy wâgâ iwenibyem ise mâkâ ezedy, eynnonroem kydawlyly xutuhoem.

<sup>5</sup> Niguantaymba ise târâ Deus eydâ atodâ. Mârâ xidadâdâ xixi iajinu, lamparina warâ tywynuneba ise. Tyamuneba ise târâ. Pymâ Deus ehozelulâ mawânâ ise tonlo modo iajimanâni. Jesus agâ aunloenlâ ise pymâem awylymo.

*Jesus odopâdo*

<sup>6</sup> Aituo keankâ anju aguely yam:

– Âkealâ, tâinwânseim lelâlâ awârâ mâentyby, mâindatyby warâ. Deuslâ keankâ tyanjury igononi, âdy inepa aini awyly xutuen-honze. Tytaumbyry egatuwâni modo enomedâniem Tyispiritury igononibyry lâpylâ mâkâ – kely.

<sup>7</sup> Anju aguepygueduo keankâ Jesus yam aguely:

– Xutuwâdaungâ xirâ. Inepa ise kodopâdyly – kely keankâ.

Tuomareim ise akaemo, xirâ pape wâgâ âdydo imeom aitaynrim modo wâgâ iweniby idânârâ einwânnipyry modo.

<sup>8</sup> João urâ. Urâlâ keankâ idânârâ xirâ yam egatyby modo idani, idânârâ yam enehoymbly modo eni warâ. Awârâ modo kâindapygueduo, kâempygueduo warâ, âzeguhoam widâ anju awârâ modo egatuimbyry, enehoiimbyry warâ enado kâen-hoguedoem.

<sup>9</sup> Warâ olâ keankâ yam aguely:

– Adâiseba ikâl Iehoguedâl! Deus lelâ ehoguegâl! Ara, Deus emary kulâ lâpylâ urâ, Deus eynynâ aguewâni modo, Cristo eynynâ âpemugumo ara warâ. Xirâ pape wâgâ Deus aguehobyry einwânni modo ara, Deus emary lâpylâ urâ – kely.

<sup>10</sup> Aituo keankâ agueondyly:

– Kurâdoram kodoendâ xirâ aini wâgâ mâinwenily. Inepa ise idânârâ aguewâtobyry modo aidyly.

<sup>11</sup> Xypyry etaji ituo, âdatâjito nuduwâpyra. Alâ awâkâ idânârâ inakanhe aitaynrim modo inakai aniensezedâmo. Uguondo tywydy lelâ xynanâdânry modo anisezedâmo; pekodo tusoam lelâ âdynanâodânry modo anisezedâmo. Idânârâ koendonro aietaynrim modo koendonrolâ aniensezedâmo. Idânârâ Deus eynynonro modo alâ Deus ize ato lelâ aniensezedâmo warâ – kely.

<sup>12</sup> Aituo keankâ Jesus aguely:

– Xirâ xutuwâdaungâl! Inepa ise kodopâdyly. Kodopâduo, koendonro modoram koendonrolâ ise kâunduly. Inakai modoram inakailâ ise kâunduly warâ. Amânhybyymo ara ise âyanmo kâunduly.

<sup>13</sup> Idânârâ adaguho, âwanikeho warâ urâ. Letra A adaguho, letra Z pylâ xypyry ilâ emyenro urâ. Kaudyly iraynâlâ akâwândy tâlâ wawyly. Idânârâ âdydo imeom adaimpygueduo, kadainwâpyra ise urâ – kely Jesus.

<sup>14</sup> Inakanhe aitobyry xygakeyby modo Deus agâ tuomareim kuru. Âtâ iwyku etyhoem wâne igokely myara lâpylâ Deus inakanhe aitomobyry nhygakely. Deus ijidadâry iwyantary oze egawântomoem, târâ peim modo nhein-homoem warâ aguehoymbym akaemo. Mârâ peim einrimpyry modo nigueontaymbamo ise. Aunloenlâ ise Deus lelâlâ eydâ atodâ awylymo.

<sup>15</sup> Deus izepa ato aieni modo; kuenwenwâni modo, ome odo modo; uguondo tywydy lelâ xynanâdânry modo, pekodo tusoram lelâ âdynanâodânry modo; kurâdo xyâwâni modo; xygatyby modo Deus ara kehoem xyreni modo; kurâdo enokuni modo, tâdâsenogudyly keduonro modo warâ olâ ise mârâ xidadâ odaji tâkaunâzebamo.

<sup>16</sup> Aituo keankâ Jesus agueondyly:

– Jesus urâ. Anju xigonotai, idânârâ âmaemo ywâgâ âsenomedâze âtâdygywâni modoram xirâ urâ egatuze. Davi iwerypyry urâ. “Ximukâ Emedyly Umeno” urâ\* – kely.

<sup>17</sup> Deus Ispiritury, Kordeiru Iwydyem Inigue tâzekeim modo warâ Jesusram agueim.

– Odopâgâ, Jesus! – kerim.

Idânârâ xirâ kâinweniby itainrim modo, idataynrim modo warâ,

– Odopâgâ, Jesus! – nyguemo lâpylâ.

Âmaemo Jesus eagonroem midysedonro modo, iweâ lelâlâ einwântaungâ. Eyam idâwâtaungâ, toenzepa tatuanzeim paru enyze idâly wâne myara. Tâbyguempa ise imakelymo. Aunloenlâ ise eagâ mawylymo.

### *Aguely xypyry*

<sup>18</sup> Urâ João ton-honre xirâ âyanmo aguely, âmaemo xirâ pape wâgâ iweniby itainrim modoram, idataynrim modoram warâ.

– Xirâ pape wâgâ iweniby imâem ienipyry, Deus imâem enagazeze lâpylâ. Tâzewânu, âdy peba tadawyly awârâ modogue âsenagazeze lelâlâ, xirâ pape wâgâ agueho ara. Xirâ pape agueho xugukeimbyry lakuru ise toenzepa kuru âsenagazeni.

<sup>19</sup> Xirâ pape waunroem aitaynrim modo xutuho wâgâ iweniby ewy etyimbyry, eyam koendonro tiunduly Deus etyze lâpylâ. Deus ijidadâry odaji negawântaymba ise. Tonlo se ewily ewy einwâpyra ise warâ – uguely âyanmo xirâ pape wâgâ iweniby xugukeim modoram.

\* **22:16** Arâ ezekely, mâkâ wâgâ mawânâ iweloem kydâiehondyly, ximukâ emedyly umeno iwelo emedyly awyly xutuho ara.

– Mârâ se ewily ewy einrimpyry modo olâ igueondyly nitaymba ise. Aunloenlâ ise yagâ awyly – keze Deus.

<sup>20</sup> Jesuslâ keankâ idânârâ xirâ pape wâgâ iweniby, kâindatoem, kâentoem warâ agueim. Mâkâlâ mawânkâ agueim:

– Inepa ise kodopâdyly – keim.

Aituo keankâ eyam auguely:

– Âkeá lelâlâ xirâ auguely. Inepa odopâgâ, pymâ Jesus! – uguely.

<sup>21</sup> Ize wato kuru olâ Kywymâry Jesus koendâ lelá idânârâ tynnonro modo agâ awyly.

Alâ kulâ.

João